



Ex Bibliotheca
Gabriel ARCHINARD


In libris solatium



John Carter Brown
Library
Brown University







HISTOIRE OV COMMENTAIRES

DE TOVTES CHOSES MEMO-
RABLES, AVENVES DEPVYS LXX. ANS

en ça par toutes les parties du monde, tant au
faict seculier que Ecclesiastic: composez premie-
rement par Laurens Surius, & nouuellement mis
en Frâçois par Iacq. Estourneau Xainctongeois.

~~À~~ A Tres-vertueux & tres-illustre Prince Monseigneur le Duc
d'Anjou, frere du Roy.




A PARIS,

Chez Guillaume Chaudiere rue S. Iacques, à l'enseigne
du Temps & de l'Homme Sauvage.

M. D. LXXI.

AVEC PRIVILEGE DV ROY.





A TRESILLVSTRE,

TRESVERTVEVX, ET VICTO-

RIEVX PRINCE, MONSEIGNEVR

le Duc d'Anjou, frere du Roy, representant

sa Maieſté par toutes les terres de

ſon obeſſance,

53

mones



Onſeigneur, ceux qui ont appli-
qué leur eſprit & labeur à re-
chercher le naturel des choſes,
nous ont laiſſé par eſcrit, qu'il ſe
trouue vne ſorte de Serpent

nômé^a Dipsas, lequel ſe plaiſt fort à demeurer
<sup>a Pource
que ce mot
en grec ſi-
gnifie ſoiſ.</sup>
és lieux, où il y a ordinairement quelques ruiſ-

ſeaux, non pour aultre occaſion que pour infe-
cter les eaux, à fin que toute beſte qui en boy-
ra, meure par la violéce du venin y giſant. Que
ſi par cas fortuit ce Serpent vient à mordre l'hô-
me, il luy engendre vne ſoiſ ſi extreme & inſa-
tiable, que iamais il ne ceſſe de boire, qu'il n'ayt
l'ame ſeparée du corps. Leſquelles proprietéz

eſtans diligemment conſiderées par vn de noz
<sup>Epiplane
au tome
troiſieſme
du premi-
er liure.</sup>
plus anciens & renômmez Docteurs, il les a naïf-
vement appropriées à la nature de l'heréſie : &

ã.ij.

EPISTRE.

me semble à la verité qu'il a eu raison, quand ie me metz à discourir sur les faictz des heretiques de ce siecle. Car, Monseigneur, eux estans enfans de ce grand Serpent qui deçeut le premier homme, & qui par ses ruses le despouilla des pretieux dōs que Dieu le createur luy auoit donnez en grand' largesse, ilz imitēt leur pere le plus qu'il leur est possible: & en cetuy nostre temps ont tellement gasté par leur poison les eaux viues de l'Escripture saincte, & toutes sortes de liures, que ceux qui pēsoient auoir leurs sens bien aiguz & subtilz, se sont veuz tout soudain estre surprins de tel venin, toutes & quantes fois qu'ilz se sont en-hardis à boire des eaux par eux infectes. D'auantage ceux qui ont esté vne fois attainctz de leurs morsures veneneuses, ont eu si grand soif de poursuyure plus auāt en leurs erreurs, qu'en fin ilz se sont déuestuz de toute religion, & sont tumbez en atheïsme, n'ayans aultre desir en ce monde que de corrompre plusieurs, pour estre du tout semblables au naturel du sus-dict Serpent.

OR de ce, Monseigneur, les histoires modernes nous font foy, lesquelles neantmoins quelques vns frappez du mesme mal que i'ay dict, ont tasché de corrompre, ayans la main par-

tialle, ne louians sinon ce qui sembloit symboliser à leurs affectiōs, & se parforceans par leurs parolles emmiellées, & par ie ne sçay quelles harengues controuuées, d'enlacier & enuelopper les lecteurs au piege, auquel eux-mesmes ont esté sottement prins. Et d'autant qu'ilz ne se sont pas seulement meslez des affaires Ecclesiastiques, ains encor' ont traicté ce qui est de l'estat & du faict seculier, ilz ont amadoué par leurs escriptz plusieurs cerueaux esuentez, qui ne se plaisent qu'à puyser la cognoissance des choses passées en des boubiers, & non en des sources pures & nullement gastées. Dommage certes, qui est d'autāt plus à estimer, que les choses auenuës de la memoire de nos Peres & de la nostre mesme, est de merueilleuse importāce.

P O V R ces raisons & aultres plusieurs, Mō seigneur, il s'est trouué de nostre aagé vn personnage fort laborieux, docte, & Catholic, nommé Surius, Chartreux, auquel Dieu (qui disperse tousiours ses graces à quelcun pour l'vtilité de son peuple Chrestien) a tant faict de faueur, qu'il a mis en lumiere vn recueil assez ample de toutes choses memorables auenuës depuys soixante-dix ans en ça, ie dis tant en l'estat Ecclesiastic que seculier, dont est issu vn fruiet mer-

EPISTRE.

ueilleux à toute qualité d'hommes. Or estoit ceste histoire composée en Latin, & partât son fruit n'estoit communicable à infinis hommes, desquelz les aultres, pour auoir esté des leur berceau employez aux affaires, n'entendent pas ce langage, les aultres ayment mieux lire toutes choses en nostre langue Françoisse, bien qu'ilz soient doctes & lettrez. Au moyen dequoy estant presque irrité, de voir les heretiques auoir tât trauaillé à nous faire suçer la doctrine de Satan par leurs histoires Françoises, & d'autre part estant esguillonné par quelques hommes d'autorité grande, de faire le coup d'essay de mes labeurs sur l'histoire de Surius, à fin qu'elle seruist de contre-poix à toutes aultres pernicieuses, & qu'elle contentast ensemblemēt les Ecclesiastiques & ceux qui traitēt les affaires d'estat: I'y ay employé quelques bonnes heures, & l'ayant tellemēt façonnée qu'elle sentoit son François, i'ay osé la faire voir au public sous l'adueu & autorité de vous, Monseigneur, qui par le lustre de vos vertus & perfections pouuez esblouir les yeux de ceux, qui regardent plus volontiers les labeurs d'autrui par enuie, que par honneste affection. Et à qui eusse-ie plustost offert & cōsacré l'histoire des

EPISTRE.

choses memorables de ce temps, qu'à ce Prince qui seul a plus faict de choses memorables en quatre ans, se monstrant le vray bras & pilier de l'Eglise en sa tendre ieunesse, qu'aulture qui ayt esté de ce siecle? qui a respandu son los & hōneur iusqu'aux extremitez de la terre, pour auoir esté le sage pilote, qui par sa dexterité a empesché que la Nauire de l'Eglise ne fust engloutie dās les ondes, lors que tous les vēs & orages auoiēt cōiuré de la faire culbuter? qui par son nom & grandeur sert de bouclier à ceux, qui mettent leurs labeurs en sa sauuegarde & protection? Je confesse toutesfois que ie puy auoir offencé en ce, que i'ay esté si osé, que de presenter vne chose assez mal polie & agécée à voz yeux, qui ne sont nourrys qu'à voir choses parfaictement elabourées, & dignes qu'un tel Prince que vous daigne en estre le defendeur. Mais, Mōseigneur, vostre douceur & bonnairété qui sert de miel à voz rares vertus & faictz loüables, m'a si bien maistrisé, que i'ay eu l'hardiesse de vous consacrer mon premier fruiēt, me confiant en vostre humanité, que le goust d'iceluy ne vous semblera que plaisant & delectable, combien que sa valeur ne vous puisse semondre à le receuoir souz vostre ad-

EPISTRE.

ueu. Et partant, ô Prince tres-uertueux & tres-illustre, plaise vous accepter ce petit don comme s'il estoit digne de vous, & pensez que l'artisan qui vous en fait l'offre, vous presente quant & quant le meilleur de son cueur & de son ame, & qu'il priera le grand Dieu des armées augmēter ces vertus qui luy sent en vous, & bien-heurer toutes voz entreprises. En Paris ce X. de Iuin M. D. L X X I.

Celuy qui vous sera toute sa vie tres-humble seruiteur Iacq. Estourneau Xainctongeois.





PREFACE AUX LE- CTEURS PAR LE TRA- DVCTEUR.



L n'y a personne si ennemy des lettres, amy lecteur, & si enyuré en ses particuliers plaisirs, qui ne confesse volontiers, que la cognoissance des choses ia passées & auenües contient en soy vn merueilleux fruit, oultre la delectation que l'esprit de l'homme reçoit en les lisant. Car plusieurs autres sciences ne se laissent pas manier facilement, pour la grande difficulté de laquelle elles sont enuelpées: les autres conuiennent seulement à quelque sorte d'hommes, & non generallyment à tous: les autres aussi enrichissent plustost l'homme d'une soëue contemplation, qu'elles ne l'achement à bien & heureusement passer le temps de sa vie. Mais le champ de l'histoire est si fertile, & avec cela si ouuert à toute qualité d'hommes, que l'on y cueille toute sorte de fruit, sans estre enuironné de hayes espineuses, qui nous empeschent d'y mettre nos mains: & ne demeurent point ses fruitz si longuement à meurir, qu'ilz puissent aucunement attiedir l'ardeur que nous leur portons naturellement. D'auantage ce champ d'histoire n'est point si estroit, que la seule contemplation y ayt place: ains il estend ses bornes si auant, que l'action y renga à l'ayse, ie dy celle action qui nous sert de guyde en tout le cours de ceste vie, & selon la valeur de laquelle nous ferons guerdonnez par celui qui voit toutes nos actions & dedans & dehors. Car comme quand nous auons veu dans le mirouer les macules de nostre face, nous les nettoions en toute diligence: ainsi quand l'histoire nous représente deuant les yeux les hommes vitieux, & les mal-heurs qui les ont accompaignez à cause de leurs vices, nous faisons nostre prouffit de cela, & nous donnons garde que les vices ne nous maistrisent de telle façon. Au contraire, quand nous voyons dās l'histoire, comme dans vn tableau, estre peinctz les beaux & vertueux faictz des hommes, & que par-apres nous venons à considerer, que Dieu a bien-heuré à cause de ce tous leurs desseings & entreprises: il n'y a celui qui ne bouille au dedans de son cueur d'un desir d'estre imitateur d'hommes si vertueux, & qui ne soit esguilloné par la louange de leurs actes honnestes à suyure le chemin de vertu, & quitter la toute faict-neatise, ambitio, ou volupté. Et c'est pourquoy l'histoire est cherye & embrassée de tous hommes, quelque vacatiō qu'ilz ayent esleu: comme ainsi soit qu'on reicte la cognoissance de plusieurs autres choses, pour-ce qu'elles ne semblent pas symboliser avec l'estat que nous suyons. Or neantmoins on peult dire cela des Princes, & de ceux qui manient les grandes affaires, que leur propre liure, & l'estude auquel ilz doyuent employer quelques bonnes heures, c'est l'histoire. Car iaçoit que

P R E F A C E.

les personnes se changent de iour à autre es Republiques, toutesfois mesmes affaires, mesmes circonstances, mesmes difficultez se presentent tous les iours: lesquelles ils peuuent dextrement & heureusement conduire, prenans esgard au succes ou à la desconuenue de ceux, qui se sont iadis veuz au milieu de telles difficultez. De maniere que ce grand Thucydide, homme qui n'estoit pas moins experimenté à manier les grandz affaires qu'à les coucher discrettement par escript, est reputé auoir bien & sagement dict, que l'histoire est vn thesor veritablement royal, & qui ne doit oncques tomber d'entre les mains des Princes. Car qu'est-ce aultre chose, ne scauoir que ce qui passe deuant nos yeux & se faict durant nostre aage, sinon qu'estre tousiours enfant? Si l'homme a cela plus que les bestes, qu'il peut par la raison de laquelle il est naturellement doué, voir les choses qui peuuent s'ensuyure, esplucher leurs causes, considerer leurs progres, les conferer les vnes avec les autres, se reigler selon les accidens du passé, au lieu que les bestes se rengent seulement à ce qu'elles voient & qu'elles touchent: qui est-ce qui porte le nom d'homme à bon droit, sinon celuy qui volle alaigrement sur les siecles passez, cueillant d'iceux les plus soëfues & pretieuses fleurs, comme faict la mouche à miel, quand elle bastist peu à peu son tant sauouré fruct en sa ruche?

O R il a couru vn temps, qu'on ne recommandoit que les histoires anciennes, & sembloit à quelques vns, que d'icelles seules, comme d'une vraye fontaine, on deuoit puiser tous exemples pour nous semondre à la vertu: sans faire cas des plus modernes, esquelles on pensoit n'estre rien escrit de singulier, rien de remarquable, rien de fructueux ou necessaire. Laquelle opinion s'est à bon droit eu. moiye peu à peu, & s'est veüe, sans y penser, destituée de tous defenseurs: pour-auint que de nostre siecle choses si grandes ont esté faictes, non point en vne certaine nation seulement, (comme le plus souuent il auenoit le temps passé) mais par tout le circuit de la terre vniuerselle, que la splendeur des choses modernes obscurcist la gloire des anciennes: & ne craint-on plus de parangonner les faicts plus nouueaux à ces anciens, qui sont à la verité plus recommandables par les doctes & excellentes plumes qui les ont escriptz, que pour leur propre excellence & beauté. Et si d'auenture quelcun desire, que les faictz recens ayent rencontré des espritz si g.illardz & si disertz pour les escrire, certes il a assez de quoy assouuir ce souhaict: veu que ce siecle a nourry tant d'excellens personnages en tout scauoir & eloquence, que deormais nous n'auons plus occasiō de nous plaindre, & admirer seulement l'antiquité. Encor' auons-nous vn point, qui peut à bonne & iuste cause seruir de contre-poix à toute la recommandation qu'on pourroit faire des histoires antiques. Car puy que nous tous faisons profession d'une religion, sans laquelle tous nos faicts ne sont qu'autant de fumée: & puy qu'en ces vieilles histoires, nous ne pouuōs que remerquer des haultz faictz d'armes des p.ryens, de l'ambition des grandz de ce monde, & rien de ce qui sert pour nous acheminer à cognoistre nostre Dieu: y a-il homme qui ne vueille lire plus volontiers nos histoires, esquelles nous voyons comment Dieu gouuerne son Eglise, & comment tous les assaux de Satan ne peuuent rien faire contre elle?

I L me semble, que celuy n'a point l'ame Chrestienne, qui prend plus grand plaisir à lire les gestes d'un Hannibal, d'un Xerxes, ou si vous voulez encore, d'un Roland ou d'un Amadis, qu'à voir ce que nous ont escrit un Eusebe, un Nicephore, un Theodorit, & plusieurs autres: lesquels desireux de faire cognoistre aux hommes la suyte de l'Eglise, & les preux Cheualiers qui ont emporté le prix durant les persecutions, nous ont laissé leurs histoires, des-

P R E F A C E.

quelles nous receuons merueilleuse consolation encor à present, pour ce que nostre saison a grande sympathie avec la leur, tant pour les heresies, que pour les persecutions. Au moyen de quoy ceux qui depuis quelques siecles ont laissé des histoires à la posterité, (entre lesquelz sont Zonare, Sabellic, Blonde, Nauclere & aultres) ont si naïfvement marié les affaires seculiers avec les Ecclesiastiques, qu'à bon droit ilz seront louez à tousioursmais pour leurs œuvres delectables & prouffitables. Au contraire, si l'en trouue quelcun, qui dans ses histoires se contente de nous représenter vn cliquetis d'armes, de nous faire de longues harangues, & au reste ne touche nullement ce qui est le principal, à sçauoir l'estat de l'Eglise, ses assauts, ses victoires, & l'ignominie de ses ennemis: celuy-là, à mon aduis, ne couronnera point son œuvre de la perfection que le Poëte Horace requiert, quand il nous admoneste de mesler le delectable avec l'utile, si nous voulons que nostre œuvre ait toutes ses façons.

Ce qu'ayant bien cognu Iehan Sleidan, vn des plus fins & ruséz de nostre memoire, il s'en est seruy si industrieusement, (& à la mienne volonté que ce fust esté avec vn bon Zele) qu'il a comprins en ses commentaires les faictz qui touchent la religion, & ensemble a sommairement escrit ce qui s'est passé ez autres affaires. Dont il a pour quelque temps si bien gaigné le cœur des hommes, & a engendré à plusieurs vne si bonne opinion de son histoire, qu'ils l'ont osté préférer à toutes autres escrits de nostre memoire. Mais quoy? sera-il dit que le Catholique emprunte la verité des faictz, d'un heretique? Les esprits des enfans de l'Eglise seront-ils si nonchalans, qu'ilz ayment mieux mendier ce qu'a enduré leur mere en ce siecle, des escrits d'un sectaire, qui auoit la main partielle si autre iamaiz l'eut: que de l'escire eux-mesmes, & le produire en plain iour sincerement, sans fard, sans mignotise, sans calomnies, sans impostures, sans heresie? N'a-il aucun si peu soucieux de son salut, qui vueille pescher la verité en des bourbiers, & par-my des harangues fardées, controuuées, seulement pour empieter le lecteur, & le precipiter finement ez labyrinthes d'erreur, hors desquelz il ne pourra assement se desbestrer? A la mienne volonté que ceux qui brulent d'un desir de sçauoir toutes choses, eussent pesé le danger de ce poison avec plus grand soing, qu'ilz n'ont pas faict: sans point de faulte nous n'aurions point aujourd'huy tant de neutralistes qui ont leurs ames en sequestre. Car tels hommes pour la plus part (ce sçay-je bien) ont esté deceuz en lisant ce pernicieux authour, lequel les a si bien abreueuez de son impieté, qu'ilz ne font cas des ceremonies de l'Eglise, & quoy que leur conscience les tennaille, ilz parlent tousiours à l'auantage des heretiques.

Afin donc que ceux qui veulent paistre leur esprit en la lecture des histoires modernes, peussent icelles cognoistre sans danger ny peril quelconque, & par mesme moyen entendre les choses seculieres & les Ecclesiastiques, tout ainsi qu'elles se sont passées en ce siecle: il s'est trouué vn docte personnage, nommé Laurët Surius, lequel nō ingrat des faueurs qu'il a receuës de son Dieu en la cognoissance des choses, a employé son aage à recueillir de tous les bōs authours de nostre memoire, les pointz plus notables, & prouffitables aux lecteurs. En quoy il s'est porté si ingenieusement, qu'il n'y a fait quelq peu remarquable & digne d'estre apprins, tant au fait de la religion, q en toutes autres choses ciuiles ou seculieres, qu'il n'ait inseré en ses cōmentaires. Et, ce que nous deuons encore plus admirer, bien que son histoire cōprenne toutes les choses sus-dictes, si est-ce qu'elle n'est point si longue, qu'elle puisse ennuyer le lecteur. Car qu'auoit à faire nostre Surius à réplir dix ou douze feuillets d'une harègue inutile, ou de la descriptio de quelque place, choses fort coustumieres à ceux qui n'ont pas assez

P R E F A C E.

ample matiere à escrire ? Il a donc si bien ramassé son liure, & l'a remply de si pretieuses fleurs, qu'il n'y a rien inutile, rien superflu, rien qu'on puyssé reietter, sans enlaidir grandement tout le corps de son histoire: laquelle il repete des l'an mil cinq cens, auquel temps Nauclere auoit mis fin à son histoire vniuerselle. Et quand à la verité des choses par luy mentionnées, il n'y eut oncques homme qui l'ayt peu conuaincre de faulcté, comme l'on a bien fait quelques Alemans: pour-aultant qu'il n'escriit rien esmeu de ses passions particulieres, ains selon que la verité luy commandoit. Laquelle il remonstre maintesfois au lecteur l'incitant à bien viure, à considerer le iugement de Dieu, à se prendre garde des diuisions, contrarietez & guerres des heretiques de nostre temps, à se tenir tousiours dans le giron de nostre mere l'Eglise Catholique, detestant tous les ennemys que Satan a suscitez à l'encôtre d'elle, soit par l'heresie, soit par la tyrannie des Turcs.

O R iusques icy, combien que plusieurs ayent admiré la pieté & vtilité de son histoire, iusqu'à auoir esté imprimée six ou sept fois en Latin: toutesfois il ne s'est encore trouué François qui l'ait tant cherye & aimée, que j'ay fait, ce me semble: veu que estant marry & desplaisant, que le fruit d'icelle fust seulement entre la main de ceux, qui ont cest heur que d'entendre la Langue Latine, ie me suis peiné à la traduyre en François, afin que le simple peuple, & tous autres qui ne scauent le Latin, fussent participans du merueilleux fruit d'icelle. A fin aussi, que ceux qui ont esté empoisonnez par la lecture des histoires heretiques, venans à lire ceste-cy, la prennent pour contre-poison: & estans mieux informez de la verité, se rengent au trouppeau de Iesus-Christ, duquel ilz s'estoient esgarez. Qui sont les causes, (pour faire bref) lesquelles m'ont occasionné & presque contraint à faire voir au peuple François l'histoire de nostre Surius, laissant pour quelque temps mes principaux estudes, pour vacquer à vne chose pleine à moy de delectation, & qui sera, peult-estre, agreable & vtile à plusieurs. Car en telles choses, ie me persuade que le langage orné & poly ne sera pas tant desiré, que la vraye sentence de l'auteur: laquelle j'ay rendue fidellement sans beaucoup me soucier de la mignotise du langage, qu'il fault apprendre dans les labeurs de ceux, qui en sont les maistres & en font profession, & non dans ces histoires, qui ne sont basties que pour les moins scauans & pour le peuple, par celuy qui se recognoist n'entendre guerres à cela, & qui toutesfois a tasché par cecy à faire chose qui sera fructueuse à tous ceux qui la liront. Et à Dieu.



TABLE DES CHOSES

PRINCIPALLES CONTENUES EN

CESTE HISTOIRE.

A

PA Abbé du Liege tué par son serui-
teur. 365
Abdamelech s'empare de Tunes.
252.
Abdy su patriarche d'Assyrie vient à Ro-
me & qu'il y feir. 357. & 358
Abraim d'esclauue vient grand Seigneur.
158. il incite Solyma contre les Per-
ses, en fin il tombe en sa disgrâce & est
tué. 160
Aden ville d'Arabie pillée par les Turcs.
191. & son Roy trahystreusement tué.
Adiaphoristes ou melancthonistes. 391
Adrian 1. escrit contre le liure attribué à
Charlemaigne 280. ses legatz presi-
dent au 7. concile general. 281
Adrian 6. fut precepteur de Charles le
quint 74. il meurt. 79
Adultere de nos nouueaux predicās. 359
Aegypte fertile & peuplée. 53
Ætna ou mont-gibel en Sicile. 183
meurs des Africains bresuemēt descriptz.
156
Africains cautz & infidelles. 251
Agneau sorty de terre. 29
Albe royale d'oū est ainsi dictē. 244. cō-
ment elle fut prinse des Turcs.
Alberic Vespuce cherche nouuelles ter-
res. 11
Albert de Brandebourg vexe ceux d'Vl-
me. 289 ceux de Noremberg & les E-
uesques 293. il l'accorde avec l'Empe-
reur 294. sa cruauté 295. il meurt.
309
Albert maistre de Prusse se marie contre
son ordre. 93
Alemaigne conuertie à la foy 2. quelle
elle estoit anciennement. 36
Agriculture l'onee. 23. 2.

Albert Pigbius meurt. 240
Alces quel animal. 22
Alexandre Farnese est fait Pape. 152
Alexandre de medicis se marie. 176. com-
ment il fut tué par l'aurēt de medicis.
184
Alexandre 6. accorde les Espaignolz &
Portugais 3. il escrit aux moscouites. 15
expedition de l'empereur à Alger. 135
Alsacie pais fort beau. 14
à Amboyse l'empereur se trouua en dan-
ger. 212
Amidas se fleue contre son pere muleasse
251. sa meschanceté enuers son pere.
252
les Anabaptistes naissēt. 98. leurs erreurs
ibid. la folie de quelques vns 99. vn
coupe la teste à son frere. 100
les Anabaptistes prennent munster 146.
ilz creent vn cōturier leur Roy ibid.
& toute l'histoire de leur siege.
Anabaptistes audacieux à Anuers. 405
André d'Orie se retire à l'empereur 103.
il préd Gennes 104. il oste vne grosse
proye aux Turcs 195. il se reconcilie
au Roy. 198
Angleterre réunie à l'eglise Catholique.
299
les Anglois vainquent les escoissois. 275.
ilz font la guerre aux images ibid.
Anne de Boulē Royne d'Angleterre des-
capitée. 182
Anne de Cleues repudiée par le Roy
d'Angleterre. 221
Anvers confuse & vraye Babylone. 405
& toute l'histoire des troubles ensuy-
uant.
Afrique prinse & ruinée. 284
Apostatz de nostre temps bien descriptz
par Erasme. 181

TABLE.

les Apostres ont euité les heretiques.	253.	pays
220		aux François.
l'Archeuesque de coloigne. fauteur de	283	
luther.	241	la ville de Bonne pleine d'heretiques.
Arilum destruite par les françois.	13	
237		Bopparde occupée.
l'Assemblée d'Arau.	229	Bornemisse fault à rendre bade.
les Ariens renaiscent en quelques lieux.	405	Bosleduc plein d'heretiques.
205		Bourdeaux en trouble.
les Assyriens ont les saintz liures & nos	237	brabant affligé par Rosseim.
anciens auteurs.	244	brabançons vaincuz par le Duc de Luli-
ceux d'Austriche n'impetrent point châ		ers.
gement de religion.	304	brence blaspheme du signe de la croix.
		261
		Il escrit contre P. martyr & Boulenger.
		358. erreur par luy controuvé.
		388
		brence & bullinger mortelz ennemys.
		389
		brence dict qu'il n'y a point d'enfer.
		ibid.
		briseurs d'Images à Anuers.
		404
		bruges en Flandres & des troubles y ad-
		uenus en suyuant.
		404
		le Duc de brunswic chassé de ses terres
		238. il est prins avec son filz.
		256
		bruxelles, & des troubles y auenuz.
		407
		bucer Zuinglien & lutherien 95. com-
		ment il parla à luther ibid. il corrompt
		plusieurs liures 96. il veult reformer
		Coloigne 241. il circonciit son filz.
		285. il est inconstant en vn synode.
		204.
		bucer & Fagius bruslez apres leur mort.
		310
		bullinger & brence ne cessent de sentre-
		guerroyer. 387. & en suyuant
		budée meurt à Paris.
		221
		bude en Hongrie assiegée.
		229
		C.
		Calais & Guines prises par les Fran-
		çois.
		314
		les Calcutiens grandz idolatres
		192
		Calvin est peint de toutes ses couleurs &
		ses blasphemes 201. son miracle. ibi.
		sa fraude en matiere de l'Eucharistie.
		102. il descriit les Lutheriens. 103. il
		faict mourir Sernet. 297. il escrit contre
		Vvestphal. 300. il dict blanc &
		noir de Saint Pierre à Rome. 336.

B.

B abylone descrite.	159
Baiazet met son frere en fuyte.	6
les Bádoliers des montz veulent tuer	
le Turc.	196
Baptisme des Moscouites.	10
Barberouffe mandé par Solymán. 155. il	
est faict Amiral & bascha. ibid. il préd	
Tunes & autres villes. 157. il est chaf-	
sé d'Afrique.	177
Baschatz quelz hōmes sont en Turquie.	
48	
Basile cruel Prince de Moscouie. 17. il se	
cache souz du foin. 28. il court sus aux	
Tartares.	29
Basle descrite. 14. & elle se reuolte de	
l'Empire. on y brusle les images.	
106	
Bati Tartare afflige les Chrestiens.	
16	
Beglier beichs de Turquie.	48
Belgrade prinse des Turcs.	70
S. Benno Euesque est canonizé.	79
les Bernois se font Zuingliens. 100. ilz	
ostent plusieurs places au Duc de Sa-	
uoye.	176
Bertramus quel homme a esté.	140
Beze blaspheme sur les louanges de Cal-	
uin.	202
les Bisons & Vres comme different.	
22	
les Boëmiens s'accordent avec leur Roy.	
274	
Bœufz inombrables venuz d'Hongrie.	
233	
Boloigne la grasse prinse par le Pape.	
32	

TABLE.

il escrit contre Hesufius. 347. il ne veult pas confesser que Luther aye e- sté Elie. 213. ses impostures descouuer tes. 202	theriens. 312. & 313
Caluinistes & Lutheriens à Anuers. 405	Colloque de Mulbrun entre les Euange- liques. 363
Cambaye ville ez indes. 182	Coloigne en trouble à cause du peuple seditieux. 41
Cambay prins par l'Empereur. 248	Colomb inuenteur des terres neuues. 4
Campfon Soudan d'Egypte. 52	Comete apparüe & descrire. 206
les Canibales mangeurs d'hommes. 4.	Concalde de Sylueira Iesuite. 225
Caruenna ville en Afrique. 156	le faulx Concile de Pises. 40
Cardinaux faictz par le Pape. 197	Concile de Latran souz Iules 2. 40
Carollstade se faict laboureur. 71. il se ma- rie. 84. qu'est-ce que les Lutheriens escriuent de luy. 126	le Concile de Trente continué. 287. les Iesuytes y sont confirmez. 225
Castro en Italie prise par les Turcs. 195	Conciles reiettez par noz heretiques. 216
Castronovo prise des Turcs. 212	le Prince de Condé prins. 356
Catherine repudiée & son epistre au roy 168. ses apophregmes. 169	la Confession d'Ausbourg 118. combien les Lutheriens l'estiment. ibid. elle est confutée par les Catholiques. 121
du royaume de Cazan. 28	la Confession de quatre villes. 125
du liure de Charlemaigne. 180. il dōne Vlme aux moynes. 289	Constance proscrip̃te 277. elle se rend à la maison d'Austriche. 278
Charles né à Gand. 1	Constantinople a mouuement de terre. 38
Marrhanes deffaictz par Charles Roy d'Espaigne. 61. il restitue Milan à Sforce. 112. il est faict Empereur. 62. sacré à Boloigne. 114. & quel homme il estoit. 111. la procession à Ausbourg 119. il se trouue en danger sur la mer. 170 il va en Prouence. 177. il faict guerre aux Protestans. 262. & ensuy- uant. il laisse l'Empire 314. le sommai- re de sa vie. 315. il passe par France. 211	le Conte d'Elfenstein se faict Catholi- que. 424
Charles filz du Roy meurt. 257	le Conte de Serin contre les Turcs. 398
Chartreux martyriséz. 163	Cordeliers mal-traictéz. 165
le Roy Christierne fort cruel & com- ment il print Stocholmie. 58. il meurt Lutherien. 134	Corfou assiegée des Turcs. 196
Christofle longœil enterré en Corde- lier. 210	à Cordoue les Sarrazins habitoient. 156
Clement 7. donne argent contre les Turcs. 135. il meurt. 152. il marie sa niece au filz du Roy François. 145	le Pape Cornelius accusé des heretiques. 336
le Duc de Cleues reconcilié avec l'Em- pereur. 248	Corne de licorne donnée au Roy fran- çois. 145
Coffrer de marbre remply de richesses. 250	les trois Coronnes imperialles. 114
Colloque de Ratisbone. 226	Cromuel Tyran d'Angleterre. 220
Colloque d'Yvormes, & la risée des Lu- theriens. 312. & 313	la Croix ṽsitée aux Chrestiens. 340
	Croix veuë en vn Fresne abbatu. 332. en la chemise d'vne femme. 333
	Cuselbas quelz Turcs sont. 7
	la ville de Cutheia prinse. 10

D.

D Anuilliers prise & ruiné. 237
Dauid George & son histoire. 307
Deruises moines des Turcs. 234
le Diable enseigne Luther. 55
le Diable de quelles gens adoré. 192
†. ii.

TABLE

Didyme d'Alexandrie auetgle. 286
Die en indie assiegée des Turcs. 191
Dispute de Bade. 100. de Berne pleine
de scandales. ibid. avec les Caluinistes
en France. 351
la Diuination est chose mauuaise. 257
les Donatians se faisoient mourir de leur
bon gré. 99
Dragut combat pour les Turcs. 372
Dure souuent assiegée & prise. 246
Dure prise & perdue par les Brabâçons.
238
premier Duc de Florence. 184

E.

ECCius pour contarin contre les Lu-
theriens. 227
Ecclesiastiques vexez à Anuers. 402
Edict contre les ministres d'Anuers. 401
Edouard Anglois meurt. 296
Egre ville Catholique. 269
vn Elephât & Rhinocerot descriptz. 50
M. Eleonor vient en France. 121
Elizabeth change la religion en Angle-
terre. 332. elle retient la croix à sa mai-
son. 333
eueschez du Rhin avec leurs epithetes.
278
erard Cardinal & euesq du Liege meurt,
moqué de Sleidan. 198
erasma Alber contre les Sacramentaires.
302
erasma accusé se purge du Zuinglianif-
me. 96. qu'il a escrit des euangeliques.
181. quand il mourut. 179
erphord contre le Senat. 35
les moscouites gardent l'eucharistie tout
l'an. 26
exaltation de S. Croix ancienne. 38
exche, & du siege malheureux d'icelle.
193

F.

FAmille reformée par le Pape. 383
les Femmes preschent. 73
Ferdinand est fait Roy d'Hongrie.
93
il en chasse le Vayuode. 107 il est fait
Roy des Rommains 127. il est empe-
reur 314. sa perte cōtre les Turcs 194.
son Ambassade au Turc. 231

Flâdres pleine de troubles 368 voy tous
les feuilletz suyans.
Florence se rend à l'empereur. 121. elle
est donnée à Alexandre de medeis. la
mesme.
la Foy sans charité ne profite de rié. 199
les Francardz de Bruges. 401
à Francfort sur Odera est faicte vne V-
niuersité. 31
Francfort en troubles. 88
Francisque Sforce meurt. 173
les François chassez de Naples. 25
François Xavier Iesuite & son zele. 368
les François mal-heureux contre les
Turcs. 24
François de Guyse tué. 357
les François mal-heureux contre l'em-
pereur. 237
François le Dauphin meurt. 178
le Roy François prend milan 50. il fait
guerre à l'empereur. 71. il est prius à
Paue 83. il meurt, & de sa bibliothe-
que. 268
François 2. Roy de France 334. le trou-
ble aduenu luy viuant 347. son cuer
bruslé. 353
Frideric d'Aragon priué du Royaume
de Naples. 25
Frideric Staphyle quitte les heresies. 360
& descouure leurs impostures. 361
les Fruicts du nouueau euangile. 94. 388
la diuine Fureur de Luther & non poëti-
que. 389

G.

Comment Gainas iadis demandoit
vn temple à l'empereur. 95
de la ville de Gand. 1
la ville de Gand seditieuse. 211
Garfias de nape oste grosse proye aux
Turcs. 244
Gazel gouuerneur de Syrie se rebelle cō-
tre le Turc. 64
la ville de Gennes pillée 74. elle chasse
la noblesse 33. elle est assuettie par les
François. ibid.
George Paccius fauzaire & cause d'un
grand trouble. 102
George de Saxe aduersaire de Luther 94
il souffre beaucoup de luy 142. il a de-
bat avec l'electeur de Saxe 143. ses he-

TABLE.

ritiers. 208
 George Sichel tué cruellement. 45
 George David & son histoire entiere. 248. & 307
 Cheldres se reuolte de son Duc. 196
 de l'Isle de Giapan nouvelle. 367
 les Giapaniens affectionnez à la religion Chrestienne. 370
 des Ambassadeurs de Goslaire. 207
 la ville de Gothe se rend. 430
 la Goulette prise par l'empereur. 171
 la Gouvernante de Flandres respôd aux seigneurs 400. ses edictz mesprizez. 406
 les Grecz rebelles à l'eglise Romaine. 18
 Grenade prise des maures. 156 recourée par Ferdinand. ibid.
 Gritti aymé de Solymán. 153 comment il fut tué. 154
 que dict Gropper de Sleidan. 242
 la ville de Guince assiegée du Turc. 136
 d'où est venu le mot des gueux. 399
 gueux chassés de Bruges. 406 ilz sont prins pres Tournay. 411. leurs ministres a Anuers. 401. & toute leur histoire ce cez feuilletez ensuyuans.

H

H Arduel qui fut & comment il mourut. 7
 Heele montaigne admirable. 183
 ceux d'Heidelberg condamnent Luther & Brence. 346
 Helie Ambassadeur de l'empereur & de son eloquence. 189
 S. Helene moquée des Lutheriens. 345
 le Comte d'Helseustein retourne à l'eglise. 424
 Helmonde & endouie prinse par Rofseim. 245
 le Roy Henry se marie 145. il punit les heretiques 282. il met garnison à Parme 286. il fait guerre à l'empereur 286. il fait vn edict contre les heretiques 287. il s'empare de trois dioceses 289. il gaste Luxembourg 293. il enuoye armée en Italie 310. il fait paix avec le Roy Philippe 333. il meurt de sa bleçure. là mesme.
 Henry d'Angleterre marié avec Cathe-

rine d'aspaigne 37. il escrit contre Luther 71. il repudie sa femme 141. il finitule chef de l'eglise 152. il maltraicte ses femmes 238. il meurt 268.
 Henry Henriquez travaille pour la foy aux barbares 369. & autres Iesuites.
 Henry Zurphan heretique est bruslé. 83 & il excite des discordz.
 Herbe miraculeuse à l'image de Christ. 345
 d'où sort Heresie. 87
 les Heretiques s'vnissent pour nous ruiner. 87
 les Heretiques crient tousiours le concile. 122
 les Heretiques corrompent les Anciens. 336
 les Heretiques sentre-battér. 387. & 388
 Herman de Coloigne priué de son Archeuesché. 267
 Herman ministre seditieux à Bruges. 408. il est hay des siens mesmes. 420
 Helsdin prins des François. 175
 S. Hilarion moquée des heretiques. 341
 Hinsberg assiegée de ceux de iuliers. 238
 Hippolyte de medicis téd à l'estat de Florence. 176 & perist miserablement.
 de l'Histoire Lutherienne, autrement des Centuries 335. laquelle est confutée en plusieurs passages en suyuant.
 les Horribles iugemens de Dieu enuers les schismatiques. 200. & 201
 le pirate Horuc occupe Alger. 155. & est tué des espaignolz. ibid.
 Hongrie bien descrite. 233
 Hongrie gastée par le Turc. 230
 les Hongres sont abastardys & leur infolence ou temerité. 232
 les Huguenorz excitent les troubles premiers en France 349. les seconds & troisiemes sont bresuemét recitez sur la fin du liure.

I.

I Acobins punis à berne & pourquoy. 37
 S. Iacques de complut fait miracles. 345
 Iacques Smidelin ministre fort impudét. 119
 le Roy de perse Iacup meurt. 7. & 8
 †.iij.

TABLE.

quelz hommes sont les Janissaires. 48.	se les troubles en Flandres. 399
de leur opiniastré & des Spaches. 195	qui sont les Interimistes. 392
Ianne de Semery Royné d'Angleterre. 182	l'Inuocation des sainctz a esté pieça op- pugnée. 343
Iehan de lasco hay des Lutheriens 298.	Ioachim Vadian contre l'Eucharistie. 179
il escrit contr' eux. 301. il meurt. 334	Ioachim Vvestphal contre les Zuingli- ens 294. contre Caluin 300. contre
S. Iehan euitoit Cerinthe heretique. 311	Iehan de lasco. 312
Iehan Campanus blasphemé la S. Trini- té. 138	l'heretique Iouinian iadis ne peut dege- voir grand peuple. 90
Iehan Eckius taxe Luther. 61. il dispute auec Carolstade & Luther. 62	S. Irenée dict de belles sentences tou- chant l'Eglise 362. ses os bruslez à Ly- on. 356
Iehan Gropper esleu cardinal. 268. de sa grande continence. ibid.	des Isles fortunées. 4
Iehan marbach Vbiquitaire. 366. & com- bien il a attribué à Luther. 4	de l'Isle S. Iehan ez terres neuues. 4
Iehan Euesque de Rochestre martyrisé 161. son chef ne pallist point apres la mort. 162	l'Imperatrice Isabel meurt. 71
Iehan Trauerfi martyrisé. 165. & ses doigts ne peuuent estre bruslez.	Ismael Sophi Roy de Perse est descrit 47. il enuoye Ambassadeurs aux Ve- nitien. 9
Iehan Duc de Saxe meurt. 140. & Luther le parangonne à christ.	vn Iuif achete vne hostie, & du miracle qui sen ensuyuit 39. d'vn autre mira- cle. 305
Iehan Stolsius defend Luther. 298	vn Iuif faict Chrestien par le Pape Pie. 5. 384
Iehan Stoné Augustin martyrisé pour la foy. 165	Iuifz tuez à lisbone. 31
Iehan Vayuode Roy d'Hongrie meurt. 227. aucuns blasphemement Iesuf-christ n'estre point Dieu 100. & qu'il fest de sesperé. 100	les Iuifz tuent les enfans des Chrestiens. 39
les Iesuites approuuez & l'histoire de leur origine. 222	le Duc de Iuliers viét à Gand vers l'Em- pereur. 219
Ignace Loyola premier Iesuite & toute sa vie. 222	Iulian l'Apostat se mocque des Chrestiens 175. il chasse les diables auec le signe de la croix. 261
Mathias Illyric disciple de Melancthon escrit contre son maistre. 279. il se complaint que la confession d'Aus- bourg est corrompue. 280. il escrit les Centuries 335. il est banny des Luthé- riens. 358	Iules Pflug Euesque de Numbourg. 236
Illyric venu à Anuers n'y peut nicher 410. & son brocard sur Anuers.	Iunusbei Legat du Turc mal traicté des Venitiens. 196
les Images abbatués en Angleterre. 333	L.
les Indiens bons chrestiens & de leurs en- fans. 367. & 368	Labyrinthe d'Aegypte. 54
les Indulgences occasionnent Luther à parler trop. 56	Landrecy assiégé par l'Empereur. 248
les belles Indulgences de Luther. 394	la Langue Sclauonique. 15
l'Infant d'Hongrie porté au Turc. 230	le Lantgraue d'Hesse veult accorder les heretiques à marpurg 106. il se rend à l'Empereur 272. les conditions de sa paix ibid. on prie pour sa deliurance & est deliuré. 287
Innocent quatriesme enuoye des le- gatz aux tartares. 16	Laurent Campege Legat du Pape reforme le Clergé. 82
le bruiet de l'Inquisition d'Espagne cau-	Laurent de medicis tue Alexandre son pa

TABLE.

rent.	184
Legat du Roy Ferdinand enuoyé au Turc, & comment il fut reçu.	231
Legatz detenuz à Bosleduc.	424
Legatz des Protestans à la gouuernante de Flandres.	420
Legatz enuoyez au turc & leur respôce.	231
Leon 10. meurt de poison.	71
L'Euesque du Liege courtois enuers Polus.	176
Liberté pernicieuse.	180
le Liure des actes du Concile de Constance.	107
quelques Liures sont à bon droit defenduz ou bruslez.	220
Liures heretiques ne doiuent estre leuz.	ibid.
Lipse quelle ville est.	209
Lituanie descrite 22. quelz heretiques il y a ibi. cruelle sorte de supplice.	ibi.
Liunionie quand faicte Chrestienne.	24
Liunioniens bataillent contre les moscouites.	21.
le Cappitaine lodron tué des Turcs.	194.
Longueil loué les Scholastiques.	382.
Loys Roy de France espouse la sœur du Roy d'Angleterre 49 il meurt.	ibid.
Loys Sforce meurt miserablement.	49
Loys Roy d'Hongrie aussi.	93
Lucas Sternberg blasphemé.	348.
Luther où né, & quand il fut faict moine 55. il hante le diable.	ibi.
il oppugne les Pardons 57. il humilie au Pape, ibid. il se moque du clergé.	ibi.
Luther proeste suyure l'Eglise Romaine 59. il se souzmet aux vniuersitez 60. il loue & blasme la Sorbonne.	ibi.
il condamne les decretales 61. sa dispute avec Eckius 62. il croit le purgatoire.	ibid.
Luther croit l'Eglise Romaine 63. apres au contraire. ibid. il incite les seculiers à tuer les ecclesiastiques 65. comme il vint à la journée de Vormes, & de ce qui y fut faict.	66 & ensuyuant.
Luther blasme la philosophie 69. & S. Thomas d'Aquin ibid. il blasme Melancthon d'auoir suyuy son conseil, & ses Augustins.	72
Il tourne le nouueau testament en Aleman 73. liures saintz par luy reiettez.	

74. il necessite l'homme à paillardise	
75. il escrit contre Zuingle 80. contre les païsans 92. contre le canon de la messe 92. il appelle les Alemans pour-ceaux 99. il blasme les Zuingliens ib.	
il escrit choses repugnantes de la guerre contre les Turcs 129. il calomnie les catholiques 130 & S. Hierosme 138. il approuue l'Arianisme ibid. il se contrarie en l'innocation des Saintz 140 il apprend du diable 149. il dict blanc & noir 204. il ne plaist aux Zuingliens 239. il veult qu'on prie pour christ 259. sa mort ibid. son gentil miracle 260. impie voix d'iceluy contre la croix de christ.	345
Luther comparé à Saint Pol.	213
vn prebtre Lutherien tue sa femme.	359
les Lutheriens punissent les Zuingliens.	
99. ils prophetisent mal 146. les Zuingliens les lauent bien 213. ilz bataillent contr'eux 294. ilz condamnent Melancthon, ilz ne sçauent quelz sont les romes de Luther 365. ilz sont marrys dequoy l'Eglise n'a plus de biens 394. & dequoy les œuvres de Zuingle sont imprimées.	239
Luther & Osiander contraires quand à la iustification.	187
Luxure merueilleuse par le Lutherisme.	393

M.

Maderes habitée par les Portugais.	
12	
ceux de Magdebourg opiniastrés.	
279. on les assiege 284. ilz se rendent	287
Mahometh tue l'Empereur de Trebisonde.	7
Mahometh & son sepulchre.	192
Mahometains diuisez en deux sectes & pourquoy ils sentre-hayssent.	7
le siege de Malte tout descrit.	371
Maux auenuz en Allemaigne, selon Vvingand.	39
Maience pleine de sedition.	88
Malacha prise par les Portugais 49. quel païs c'est.	191
Malines embrasée de feu.	267
les Malucces se fôr chrestiens & puyz sont apostatz, dont ilz sont punis.	368

TABLE.

Maluenda dispute avec Bucer & le confond.	258	Meiz assiegée par l'empereur.	294
mammelus quelz hommes sont & quelz priuileges ilz ont.	52	Michel Sellier anabaptiste est puny.	100
Manomotapie conuertie à la foy, & incontinent apostate.	225	Miracle de caluin.	201
les marchans Lutheriens se plaignent des Abbayes abbarués.	166	Miracles de S. Kunegunde 27. d'une eucharistie percée par vn Iuif 39. de la vierge Marie en Angleterre 261. qlz miracles se font à present ez Indes 367	
M. Marguerite fille de Maximilia meurt.	125	la messe blasphemée de Luther & Sapide.	92
Marguerite de Sarisberi deffaicte en Angleterre.	236	messe celebrée à Strasbourg.	83
la vierge Marie conceuë sans peché.	38	messe profitable aux viuās & aux morts 199	
Marie Roynie d'Angleterre emprisonne quelques vns 299. elle faict deffaite quelques grands Seigneurs. ibid. elle r'establit la religion.	328	mise Lutherienne.	208
la mort de Marie, sœur de l'empereur.	324	moynes de Turquie.	233
Marie, Roynie d'Escoce, meurt.	347	monastere de la Trinité en moscouie.	20
Martin de Valence presche la foy en Mexique 320. & faict miracles.	321	munster occupée par les Anabaptistes. 146. & toute l'histoire. ibid. la prinse d'icelle.	148
S. Martin de Tours brulé par les Hugue notz.	356	monasteres au tēps passé n'estoient point colleges.	29
Martyrs de Iesus-christ & du diable.	76	monstre veu à Rauenne.	41
Mathias Huniades, Roy d'Hongrie.	232	Moscouites & leur histoire 17. quand ilz ont esté chrestiens. ib. ilz payent tribut au Tartare, ilz sont fort miserables, ils suyuent l'Eglise Grecque, ils abominent nos heretiques, leur opinion touchant les femmes, touchant les conciles. comment ilz se confessent & communient, comment ilz prient les Saints & ieusnent, ils celebrent les festes, & leur opinion du purgatoire, ilz affligent ceux de Torpat, leur cruauté, ils affligent fort la Liuonie. tout cela est conioint.	
Maximilian premier dompte les Guelldrois 30. il est ennemy du Roy de France 40. il meurt.	61	Muleasse Roy de Tunes tue ses freres 157 il senfuit vers son oncle. ibid. il est docte 173 il viēt vers l'empereur 171. qui le restitue. il est aucuglé par son fils.	252
Maximilian d'Austriche va en Espagne 277. il est crée Roy des Romains 358 il est faict Roy d'Hongrie 360. les affaires luy succedēt bien cōtre le Turc.	377	Mulhuse se reuolte.	130
Maximilian Sforce recouure Milan & cremone.	43	Mustapha & Pial Turcs ne s'accordēt.	373
meche ville d'Arabie, pourquoy elle est tant estimée.	192	Mustapha cruel contre les mortz. ibid.	
Milan osté aux François.	71		
Milan donné à Francisque Sforce.	206		
Melancthon dict mal des Lutheriens, 22. il reiette la philosophie 69. il se faict boulenger. ibid. il combat contre les Zuingliens 125. il change souuent la confession d'Ausbourg 311. il reiette quelques escriptz de Luther 335. il blasphemel'innuocation des Saintz.	343.		
Melchior Zobel euesque d'Vircibourg illec tué.	314		
mensonges inombrables de Luther.	75		
le Mercure du Roy loys.	13		
merite des bonnes œuures.	199		

N.

N Auigations d'Espagne aux indes. 190.
 Naples change souuēt de maistres. 25
 Neruie ville en Liuonie. 330
 Nestoriens nouueaux. 205
 Concile

TABLE.

Concile de Nice moqué, 381
 Nicolas Amldorf contre Brouce & Melancthon. 273
 Nicolas le Coc, du discord des heretiques 313
 ceux de Nimegen soppoient aux heretiques. 412
 les Noces de nos Apostatz. 215
 ceux de Noremberg vexez par le Marquis Albert 292. ilz assaillent ses pais. 295
 journée de Noremberg. 240
 Duc de Northombrelant descapité. 297
 Noüars defendue par les Suysses. 41
 Nouogardie prinse des Moscouites. 16

O.

O Ecolampade guerroyé par les Luthériens 86. il meurt 131. son epistaphe 133. qu'est-ce qu'en dict Luther 249. il approuue la priere des Saints. 151
 Oeuures bonnes quelz fructz produysent. 151. & 199
 Ormus ville sur le destroict du goulphe de Perse. 191
 Osiander inuente nouvelle doctrine 285 dont les Luthériens luy font la guerre ibid.
 fondement de la sentence d'Osiander. 187
 Ottomans rures comment font la guerre 135. d'oü leur puissance est creüe. 137
 carmes d'Ouide de l'amour recitez par vn ministre. 392

P.

LE Pape cõferé avec le diable par Luther. 237
 les Parisiens condamnent Luther. 69
 Parisiens soppoient aux Caluinistes. 351
 Charles Quint à Paris. 211
 le Patriarque d'Alexâdrie promet obeissance au Pape. 366
 Paul Forme & de ce qu'il feist à vne hostie consacrée. 38
 Paul 3. enuoye secours à l'Empereur. 263
 Sleidan le taxe. 274
 les Parisiens en grand' peur pour les heretiques. 350
 Parpignâ desêdu par les Espaignols. 236

Pest prise des Alemans & prise par les rures. 228. & 229
 comment les Perses guerroyent 47. ilz ont appris à foudre l'artillerie. 190
 Peucer compose vn gentil liure. 377
 Philippe d'Austriche en France. 25 la peste le pousse en Angleterre 32. qui ont esté les enfans. là mesme.
 le roy Philippes inuesty de Flâdres. 281
 ses noces avec la R. d'Angleterre. 299
 sa victoire à S. Quentin 310. & à Gravelines 315. il faict paix avec le roy Henry 332. il espouse Madame Isabel. là mesme.
 S. Philippe faict miracles en Sicile. 345
 Pialis rure à Malte. 372
 ce que feist vn Picard d'vne Eucharistie. 26

le Seigneur Pierre Louys est meurtry en Italie. 274
 Pierre brusli ministre. 254
 Pierre Martir dispute à Oxfort 282. sa mort. 358
 Pierre Paul Vergier Legat du Pape. 174
 Pie 3. meurt. 25
 Pie 4. enuoye secours aux Maltois. 372
 Pie 5. contre les liures heretiques 384. il guerist des femmes demoniacles. là mesme. ce qu'il a ordonné des purins. 386. & le reste ensuyuant.
 Poictiers assiegée. 356
 les Polonnois vainquent les Moscouites. 46
 Proye ostée aux rures. 243
 les Princes Catholiques avec les Luthériens. 122
 les Princes ne veulent s'humilier au Pape. 197
 l'arrogance des Princes condamnée par Luther. 201
 Prodiges apparuz. 206
 Prosopolatres quelz hommes sont. 393
 les Protestans escriuent aux roys 127. ilz font la guerre à l'Empereur & toute ceste histoire 263. & de la guerre de Saxe. 269
 Pyramides d'Egypte. 54

Q.

Bataille de S. Quentin. 310

*Natimite Du Roy Philippe.
 fol. 200.*

TABLE

est un Roy. R. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100. 101. 102. 103. 104. 105. 106. 107. 108. 109. 110. 111. 112. 113. 114. 115. 116. 117. 118. 119. 120. 121. 122. 123. 124. 125. 126. 127. 128. 129. 130. 131. 132. 133. 134. 135. 136. 137. 138. 139. 140. 141. 142. 143. 144. 145. 146. 147. 148. 149. 150. 151. 152. 153. 154. 155. 156. 157. 158. 159. 160. 161. 162. 163. 164. 165. 166. 167. 168. 169. 170. 171. 172. 173. 174. 175. 176. 177. 178. 179. 180. 181. 182. 183. 184. 185. 186. 187. 188. 189. 190. 191. 192. 193. 194. 195. 196. 197. 198. 199. 200. 201. 202. 203. 204. 205. 206. 207. 208. 209. 210. 211. 212. 213. 214. 215. 216. 217. 218. 219. 220. 221. 222. 223. 224. 225. 226. 227. 228. 229. 230. 231. 232. 233. 234. 235. 236. 237. 238. 239. 240. 241. 242. 243. 244. 245. 246. 247. 248. 249. 250. 251. 252. 253. 254. 255. 256. 257. 258. 259. 260. 261. 262. 263. 264. 265. 266. 267. 268. 269. 270. 271. 272. 273. 274. 275. 276. 277. 278. 279. 280. 281. 282. 283. 284. 285. 286. 287. 288. 289. 290. 291. 292. 293. 294. 295. 296. 297. 298. 299. 300. 301. 302. 303. 304. 305. 306. 307. 308. 309. 310. 311. 312. 313. 314. 315. 316. 317. 318. 319. 320. 321. 322. 323. 324. 325. 326. 327. 328. 329. 330. 331. 332. 333. 334. 335. 336. 337. 338. 339. 340. 341. 342. 343. 344. 345. 346. 347. 348. 349. 350. 351. 352. 353. 354. 355. 356. 357. 358. 359. 360. 361. 362. 363. 364. 365. 366. 367. 368. 369. 370. 371. 372. 373. 374. 375. 376. 377. 378. 379. 380. 381. 382. 383. 384. 385. 386. 387. 388. 389. 390. 391. 392. 393. 394. 395. 396. 397. 398. 399. 400. 401. 402. 403. 404. 405. 406. 407. 408. 409. 410. 411. 412. 413. 414. 415. 416. 417. 418. 419. 420. 421. 422. 423. 424. 425. 426. 427. 428. 429. 430. 431. 432. 433. 434. 435. 436. 437. 438. 439. 440. 441. 442. 443. 444. 445. 446. 447. 448. 449. 450. 451. 452. 453. 454. 455. 456. 457. 458. 459. 460. 461. 462. 463. 464. 465. 466. 467. 468. 469. 470. 471. 472. 473. 474. 475. 476. 477. 478. 479. 480. 481. 482. 483. 484. 485. 486. 487. 488. 489. 490. 491. 492. 493. 494. 495. 496. 497. 498. 499. 500. 501. 502. 503. 504. 505. 506. 507. 508. 509. 510. 511. 512. 513. 514. 515. 516. 517. 518. 519. 520. 521. 522. 523. 524. 525. 526. 527. 528. 529. 530. 531. 532. 533. 534. 535. 536. 537. 538. 539. 540. 541. 542. 543. 544. 545. 546. 547. 548. 549. 550. 551. 552. 553. 554. 555. 556. 557. 558. 559. 560. 561. 562. 563. 564. 565. 566. 567. 568. 569. 570. 571. 572. 573. 574. 575. 576. 577. 578. 579. 580. 581. 582. 583. 584. 585. 586. 587. 588. 589. 590. 591. 592. 593. 594. 595. 596. 597. 598. 599. 600. 601. 602. 603. 604. 605. 606. 607. 608. 609. 610. 611. 612. 613. 614. 615. 616. 617. 618. 619. 620. 621. 622. 623. 624. 625. 626. 627. 628. 629. 630. 631. 632. 633. 634. 635. 636. 637. 638. 639. 640. 641. 642. 643. 644. 645. 646. 647. 648. 649. 650. 651. 652. 653. 654. 655. 656. 657. 658. 659. 660. 661. 662. 663. 664. 665. 666. 667. 668. 669. 670. 671. 672. 673. 674. 675. 676. 677. 678. 679. 680. 681. 682. 683. 684. 685. 686. 687. 688. 689. 690. 691. 692. 693. 694. 695. 696. 697. 698. 699. 700. 701. 702. 703. 704. 705. 706. 707. 708. 709. 710. 711. 712. 713. 714. 715. 716. 717. 718. 719. 720. 721. 722. 723. 724. 725. 726. 727. 728. 729. 730. 731. 732. 733. 734. 735. 736. 737. 738. 739. 740. 741. 742. 743. 744. 745. 746. 747. 748. 749. 750. 751. 752. 753. 754. 755. 756. 757. 758. 759. 760. 761. 762. 763. 764. 765. 766. 767. 768. 769. 770. 771. 772. 773. 774. 775. 776. 777. 778. 779. 780. 781. 782. 783. 784. 785. 786. 787. 788. 789. 790. 791. 792. 793. 794. 795. 796. 797. 798. 799. 800. 801. 802. 803. 804. 805. 806. 807. 808. 809. 810. 811. 812. 813. 814. 815. 816. 817. 818. 819. 820. 821. 822. 823. 824. 825. 826. 827. 828. 829. 830. 831. 832. 833. 834. 835. 836. 837. 838. 839. 840. 841. 842. 843. 844. 845. 846. 847. 848. 849. 850. 851. 852. 853. 854. 855. 856. 857. 858. 859. 860. 861. 862. 863. 864. 865. 866. 867. 868. 869. 870. 871. 872. 873. 874. 875. 876. 877. 878. 879. 880. 881. 882. 883. 884. 885. 886. 887. 888. 889. 890. 891. 892. 893. 894. 895. 896. 897. 898. 899. 900. 901. 902. 903. 904. 905. 906. 907. 908. 909. 910. 911. 912. 913. 914. 915. 916. 917. 918. 919. 920. 921. 922. 923. 924. 925. 926. 927. 928. 929. 930. 931. 932. 933. 934. 935. 936. 937. 938. 939. 940. 941. 942. 943. 944. 945. 946. 947. 948. 949. 950. 951. 952. 953. 954. 955. 956. 957. 958. 959. 960. 961. 962. 963. 964. 965. 966. 967. 968. 969. 970. 971. 972. 973. 974. 975. 976. 977. 978. 979. 980. 981. 982. 983. 984. 985. 986. 987. 988. 989. 990. 991. 992. 993. 994. 995. 996. 997. 998. 999. 1000.

Reliques de S. Radegonde brûlées 316
 Journées de Ratisbone 125. & 257
 Raucenne gastée par les François. 1263
 le docteur Regnault martyrisé. 1263
 Regnault Polus taxé par Sleidan & toute son histoire. 1263
 Religion changée au diocèse de Colongne. 253
 Reliques des Saintsz mocquées par les heretiques 343. & de leur translation. 344
 la Royne d'Hongrie quitte Bude. 230
 René Prince d'Orange où mort. 252
 Reualie par qui edifiée. 24
 Rezo occupée par les turcs. 243
 Rhinocerot décrit. 250
 Rhodes prinse par le turc. 74
 Robert Vvaucop, aveugle, est fait Archeuesque. 286
 Rochandulfe mal-heureux contre les turcs. 229
 Rodolfe Agricola en q̄l habit enseucl. 210
 Rome prinse. 97
 que feir Rossheim pour le Roy de France. 237
 Rupert conte Palatin banny par l'Empereur. 27
 Ruermunde se rend à l'Empereur 247.
 elle est gastée par les Gueux. 414
 les Rustiques de Spire conspirent. 23
 Rustiques tuez iusqu'à cent mille. 87
 Russiens, voy Moscouites.

S.

Salentins verex par les turcs. 195
 les Saints blasphemex par les heretiques de nostre temps. 343
 Saint Disier assiegé par l'Empereur. 252
 Sang tumbé par pluye en Vvestphalie. 248
 la Satisfaction est moquée par Luther. 124
 les Saxons deçeu par Luther. 70
 Sauterelles en grande abondance. 238
 Scaffusen liguée avec les Suisses. 14
 Schismes de deux sortes. 390
 docteurs Scholastiques mocquez des

heretiques. 382
 Seytas belle ville. 9
 Sebastian de canô nauigue terriblemēt. 319
 Sebastia de mōte-cucullo puny à Lyon. 178
 Sectes de diuerses sortes. 209
 Selym fait mourir son pere, ses freres & ses neueux. 39
 Selym deffait les Perses 46. & puy iceux le deffont. ibid.
 Selym & le Sophi parangonnez. 47
 Selym gagne Aladole en Añe 51. il separe de la Syrie & de l'Egypte 53. sa mort. 64
 Siene se rend à l'Empereur. 300
 le maistre des Sentences moqué par les heretiques. 382
 de la mort du conte de Serin. 298
 Sigile descrite. 183
 Siget pris des turcs. 398
 mort de Sigismond Roy de Poloigne. 275
 sageſſe d'iceluy & de son filz. ibid.
 le mont Sinai descrit. 190
 le pais de Sina merueilleusement grand. 370
 les Sinaïens faitz chrestiens. 370
 Sleidan ment touchant caierain 60. & quand à Luther 61.
 proprieté de Sleidan notables 64. il veut rendre l'Empereur menteur 70.
 il calomnie messieurs de la Sorbonne. 69
 Sleidan est fin à citer quelque chose de Luther 64. l'opinion que quelques grands hommes ont eue de ses liures. 306
 Sleidan calomnie Polus & Paul 3. 186.
 ses menſonges, ses fallaces 182. son menſonge quand à Gropper. 242. sa mort. 306
 Journée de Simalcalde 187. quelz homes sy trouuerent. là meſme.
 Smidelin & Seeceius quelz liures imprimēt. 398
 Smolencho prins des Turcs. 46
 Solyman prend Bude en Hongrie 230. il assiege Guince 136. il assiege Vienne d'où il emmeine force captifz 137. il fait guerre aux Perses, & le reste de l'histoire 157. il fait mourir son filz. 282. la derniere victoire. 398.

TABLE.

Spire en troubles.	40	gais.	190
Journée celebre de Spire.	249	les Turcs cruelz cōtre les nouveaux Ma-	
Strigonie prinse par le Turc.	231	hometains.	10
la Suëtre d'Angleterre.	105	quelz Turcs sont enuiez des Ottomans.	48
Suisses corrompuz à Diion.	44	les Turcs gastent l'Austriche.	228
les Suisses catholiques vainquent les he-	131	les Turcs guerroyent ez indes.	191
retiques.	131	les Turcs & les Zuingliens cōferez.	192
Synode au monde neuf.	329	les Turcs assiegent Malte, 73. & le reste	
		de ceste histoire ensuyuant.	

T.

Où sort le Tanaïs.	21
les Tartares commandent aux Rus-	
siens.	16
les Tartares se font Mahometains, là mes-	
me. Tauris ville des Roys Persans.	8
Techel admirable Persan.	9
Terouenne prinse.	42
Terre-tremble à Lisbonne.	127
le nouveau Testament de Luther defen-	
du.	75
Theodore de Beze vend ses benefices.	302.
vn faict notable d'iceluy 303. il	
est aux premiers Troubles de France.	351
Thionuille prinse par les François.	315
sepulchre de S. Thomas.	368
Thomas Morus escrit contre Luther.	78
comment il fut martyrisé en Angle-	
terre.	161
Thomas Munzer faict esleuer les rusti-	
ques 87. comment il fut descapité.	88
Thomas Cromuel descapité.	220
reliques de S. Thomas de Cantorbic pro-	
fanées.	208
Thomas Morus prophetise d'Erasme.	181
Tilman Hesusus escrit contre les Sacra-	
mentaires.	346
Tomumbei Sultan mal-heureusement	
mort.	52
Tornay renduë aux Anglois.	43
Torpat prinse par le Moicouite.	331
Transsylvanie à qui donnée par le Turc.	232
Trinitaires heretiques en Poloigne.	341
Tripoly prinse par les Turcs.	286
Chasteau de Tunes pris par les esclaves.	172
grande inconstance de ceux de Tunes.	252
le Turc courrougé contre les Portu-	

V.

V Accie recouuerte par les Turcs sur	
Ferdinand.	228
Valenciennes prinse d'assault.	225
le soing & industrie du Sieur de la Va-	
lette à Malte.	375
Valpon & Socles prinse des Turcs.	244
Vbiquitaires heretiques.	364
Vbiquité où trouuée.	387
la vie de S. Vdairic d'Ausbourg.	339
Velsius se recognoist.	302
Venus plus honorée que la vierge Ma-	
rie.	247
feu suruenu dans Venise.	44
Venise descrite.	ibid.
Venitiens mal-traictez du Soudan.	9
Venitiens fort affligez en guerre.	33
Venitiens affligez à Alexandrie. 191. ils	
demandent paix au Turc.	220
Venlo se rend à l'Empereur.	247
Vn veau avec le froc né à Vvittemberg.	262
Vigilance preferé à S. Hierosme par les	
heretiques.	343
Vilne est descrite.	22
Vin en abondance en Hongrie.	233
Vierges tirées de leur couuent à la suasio	
de Luther.	76
Visitation de Saxe fort somptueuse.	201
la Vie monastique moquée.	340
Vladislas est faict Roy d'Hongrie.	30
Vlrich tenté par les heretiques.	406
les Veux doyuent estre accomplis.	92
Vres & Bisons comment different.	22
Vvigand compose vn liure des biens &	
maux d'Alemaigne 390. & tout les	
choses remarquables en iceluy ez feu-	
illetz suyuant.	
Vvoldimer prince de Moscouie.	16
trouble à Vvorme.	38

TABLE.

colloque de V vorme.	214	Zuingle contre les indulgences.	113
Journée de V vorme.	255	Zuingle contre Luther.	80
X.		Zuingle est admonnésté en dormant d'a bolir la Messe 131. meurt en guerre. là mesme. son corps est bruslé 131. les Zu ingliens recueillent ses cendres. ibid.	
EMpire de Xantan 370. & quelle na tions luy obeissent.		Zuingle accusé d'estre Nestorien.	214
Z.			

VN Zacharie Flamé faict rougir Cal
uin. 202
le Roy de Zibityn tué meschammét
par les Turcs. 192

Fin de la table.

EXTRAICT DV PRIVILEGE

DV ROY.

PAR grace & priuilege du Roy, il est permis à Guillaume Chaudiere Marchand
Libraire, en l'Vniuersité de Paris, imprimer ou faire imprimer, vne ou plusieurs
fois, vn liure intitulé, *Histoire des choses memorables aduenues en la Chrestienté, traduit du La
tin de Laurent Surius, par Jacques Estourneau Xaintongeais.* Et fait ledict Seigneur defense
à tous autres de nostre Royaume, de quelque qualité qu'ils soient, d'imprimer, ou fai
re imprimer, vendre ny distribuer en ses pays, terres & seigneuries ledict liure, sans
congé & consentement dudit Chaudiere, iusques au temps & terme de dix ans, en
tiers & consecutifs, apres la premieré impression qui sera faicte dudit liure, sur les
peines contenuës es lettres patentes dudit Seigneur. Donné à Paris, le septiesme
iour de Septembre, l'an de grace mil cinq cens soixante & dix: Et de nostre regne le
dixiesme.

Par le ROY en son Conseil,
Signé DE PUYBERAL.

A esté acheué d'imprimer le douziesme iour de Iuin 1571.



HISTOIRE DE TOVTES CHOSSES

MEMORABLES, ADVENVES PAR

TOVT LE MONDE DEPVIS 70. ANS EN ÇA,

*compofée par Laurent Surius Chartreux, & nouvellement mife
en Francoys par I. Eftourneau Saintongeois.*



YANT en moy refolu d'efcrire brefue-
mēt l'hiftoire de ce ſiecle, j'ay penſé que

*Prologue
de l'auteur*

le cas requeroit, de luy donner ſon com-
mencement par celuy, qui a eſté le prin-
cipal ornement de noſtre aage, à ſçauoir
Charles, cinquiefme de ce nom, Empe-
reur des Romains, lequel (comme tref-
bien a dict certain personnage d'autorité & doctrine gran-
de) a eſté nommé de pluſieurs l'amour & les delices du peu-
ple Chreſtien. Au moyen dequoy ie ne veux paſſer ſouz ſilē-
ce les loüanges d'un ſi puiffant & humain Empereur, en ces
miens commentaires, en quoy faiſant ie proteſte de ne con-
trouuer rien qui ſoit, & ne me laiſſer transporter à mes parti-
culieres affectiōs, de maniere que ie n'eſcriray choſe, laquelle
n'ait eſté preallablement eſcrite par auteurs fort recommē-
dables. Et combien qu'en ceſte part i'eufſe peu reciter beau-
coup d'autres choſes plus ſingulieres, toutesfois ie m'en ſuis
paſſé: tāt pour euitier prolixité, que pour clorre l'entrēe au fol
iugement d'un tas d'hommes, leſquels meſurent les autres ſe-
lon eux-mefmes, & ne ſe peuuent perſuader qu'il ſoit poſſible
de faire ce, qu'ils ne veulent ou ne peuuent effectuer. Que ſi
i'eſtends plus le vol de ma plume à propoſer les louanges de
ceſt Empereur, que de quelques Rois & Princes fort ſegna-
lez, & qui meritent bien d'eſtre hault-louēz, perſonne n'eſti-

A.j.

me que j'aye fait cela par mespris, mais bien ayant esgard à la briefueté, laquelle ne m'a permis de comprendre icy les vertus & prouesses de tous les grandz. Et à la verité, ce Prince s'est monstre si debonnaire enuers l'estat Chrestien, que, puy qu'il est impossible de parler de tous esgallement, nous deuons pour bonne & iuste cause nous esgayer vn peu plus librement, à descrire ses perfections. Mais venons déia au fait.

Naissance de Charles, qui fut Empereur

L'AN de grace 1500. Charles d'Austriche nasquit à Gand, ville de Flandres, le iour Saint Mathias: lequel Charles fut depuys Empereur des Romains, cinquiesme de ce nom. Or vint-il en ce monde l'an du Iubilé, qui est an de grace, environ trois heures apres minuit: & comme ie vien de dire, ce fut à Gand, qu'un chascun sçait estre vne des plus grandes Citez de l'Europe. Car les habitans d'icelle asseurent, qu'elle a bien auec ses faulx-bourgs sept mil de Flandres en circuit: & contient sept parroisses, en l'une desquelles, à sçauoir celle de S. Michel, y a, cōme-on dict, bien vingt mille personnes, tous receuans nostre Seigneur à Pasques. Au pourpris de ladicte ville on voit sept pons, bastiz de pierre sur le violent & impetueux fleue de Lescault: & quoy que iadis sept Princes la tindrent estroitement assiegée l'espace de sept ans, si est-ce qu'ilz ne la peurēt oncques forcer: en memoire dequoy sont encor' à present sept Tēples en estre, edifiez par sept Rois, en autant de places ou ilz se camperent durant le siege. A cause dequoy il semble, que ce lieu tant insigne fust vne marque & arre de l'excellence, qui deuoit à l'aduenir bien-heurer ce Charles. Je ne veux omettre ce que quelques vns ont obserué, qu'il y auoit presque autāt d'annees depuys l'empire d'Octauian, (qui regnoit lors que Iesus-Christ vint en ce monde pour en chasser Satan) iusques à Charlemaigne, (qui fut premier Empereur entre les Alemans, & contraignit les Saxons de receuoir la doctrine Euangelique, ayant domté leur superbe rebellion en trente ans) comme il y a eu entre Charles le grand, & cestuy nostre Charles, lequel s'aydant de quelques gens de bien & religieux, a planté la foy Chrestienne en beaucoup de prouinces tref-amplés, lesquelles il a descouuer

res, & quant & quāt reduytes souz sa puissance. Où il est bon de cōsiderer, que comme la doctrine de nostre Sauueur print pied & accroissement en Alemaigne & ez Regions voylines, pour lors que les affaires de la Grece estoient en grand trouble, & qu'on ouuroit la porte à toute sorte d'opinions & heresies, ce qui se feit enuiron le temps de Charles le grand: le semblable est pareillement adueni de nostre temps. Car l'Alemaigne & quelques autres nations s'estans retirées de l'obeïssance del'Eglise Romaine & Apostolique, par eux nommée Papistique, pour adherer à la fauce doctrine de Luther & ses semblables, vrays esgoutz de toute abomination: la religion Catholique s'est estenduë iusqu'ez Antipodes & terres neuues, tant celles que Charles le quint a trouuées, que celles que les Portugais se sont subiuguées, soit par force, soit par composition. De sorte que la Religion, que Luther oppugne de toutes ses machines, a esté & est encor' à present receuë par innumerables peuples. Ce que certainement ie ne puy dire sans pleurer à chaudes larmes, & me complaindre de la calamité de nostre temps, dont ie suis cōtrainct de laisser cecy à vn lieu plus commode.

ESTANT donc Charles né en la ville de Gand, fut dressée ^{Baptême de Charles futur Empereur} vne fort belle & riche gallerie, venant du palais à l'Eglise S. Iehan, lequel œuure fut certainement admirable & de tresgrandz fraiz, attendu que ceste gallerie auoit de longueur 3500. piedz, & sept de largeur, & aussi sept piedz de haulteur, de façon qu'on pouuoit aller aysémēt par dessouz: & si estoit toute embellie de trois couleurs, iaune, rouge, & bleu. En icel le eussiez veu maintes choses dignes d'admiration, lesquelles neantmoins ie tairay pour le present, à fin que ie ne soye trop long. Je me contenteray de vous dire, que dans ceste gallerie ou allée y auoit plus de deux mille torches, & y voyoit on quarante arcs triomphaulx, grandz comme sont ordinairement les portes des villes. Entre lesquelz on en remarquoit trois plus magnifiques & superbes que les aultres, dictz l'un de Sapience, l'autre de Iustice, & le tiers de Paix & Concorde. Si fut encore bastie vne aultre gallerie en l'air, avec des

cordes entre-lassées par-ensemble, & venoit ceste cy du sommet de l'Eglise S. Nicolas, iusqu' au feste de la tour du Capitole, toute resplandissante de torches allumées. Doncques le treiziesme iour apres que Charles eut pris sa naissance, il fut porté au temple de S. Iehan par celle premiere gallerie, que nous auons descrite. Dont plusieurs ont esté ravis en grande admiration, pour-auint que Charles fut porté si industrieusement au lieu du Sainct Baptisme, que ceux qui faisoient cest office ne touchoient point la terre. Et à vray dire, il monstra durant sa vie, combien peu il se soucioit des grandeurs mondaines, & ce en plusieurs cas, (comme i'espère monstrier cy apres.) Mais principalement lors qu'il se despouilla de tous ses tiltres, pour en inuestir son filz Philippe, qui a succédé à tous ses biens: & conféra quant & quant le sacré diademe de l'Empire, à son frere Ferdinand, pieça Roy des Romains. Les parrains de Charles aux euees baptismales, furent deux tres-illustres Cheualiers de la toison d'or, Charles de Croye, & le Marquis de Berges, avec deux Princesses du sang Royal, madame Marguerite de Bretagne, sœur d'Edouart le quint, Roy d'Angleterre, & Marguerite d'Austriche fille de l'Empereur Maximilian. Et tout fut fait avec vne infinité de si riches & rares dons presentez à l'Infant, & par ses parrains & par aultres, que sans faulte c'estoit vn signe manifeste de la future grâdeur & puissance du nouveau né. Que si nous voulons rechercher de plus pres dont il est sorty, nous trouuerons son sang estre des plus anciens, des plus illustres & nobles qui puissent point estre, d'autant que d'un costé il est issu des Archiducz d'Austriche, & de l'autre des Comtes de Habsburg, & finalement du sacré sang des François. Car il n'y a celuy qui ne sçache, que les François sont descenduz des Germains, lesquels s'emparerent de la Gaule: si que le premier qu'ilz eurent, fut le puissant & inuaincu Pharamod, qui chassa les Romains des Gaules, & Clodio, leur Roy second, rendit les Thuringiens à soy tributaires. Puis Merouée chassa les Huns de la ville d'Orleans. Si vint par-apres Clouis, qui premier embrassa la religion Chrestienne, ayant ja deuant Pha-

*De quel-
les maisons
il estoit issu*

ramond faißt la Loy Salique, (selon aucuns) laquelle veult que les femmes ne viennent à la couronne de France. Cestuy Clouis en l'an quinziesme de son regne obtint vne tref-heureuse victoire alencontre des Alemans, au moyen de laquelle s'estant faißt Chrestié, reçeut le S. Baptisme par S. Remy, Archeuesque de Reims, & fut pour lors oinct du sainct huylle, apporté diuinement, comme aussi de là en auant il eut en ses armoiries trois fleurs de lis: & ayant edifié vne Eglise, dicté à present S. Geneuiefue, où on le voit inhumé encor auourd'huy, il passa de ce siecle en l'autre, l'an de grace 514. Car ie ne veux rapporter les choses sus-dictes qu'à Clouis, bien que ie sçache assez, que quelque sçauant homme les a attribuées à Clodio, sans que ie sceusse dire aussi, quel autheur il a peu suyre en cela. Or pendant qu'en France viuoient plusieurs freres, enfans de Roy, le royaume fut diuisé, de sorte que le Royaume d'Austrasie (dicté maintenant Lorraine) fut pour lors estably, lequel contenoit deux Cours royales, l'une à Metz, l'autre à Coloigne sur le Rhin. Si tiennét plusieurs, que ce royaume fut de grande estendue, comme celuy qui enfermoit Oultreict, Coloigne, Treues, Maience, Gueldres, Cleues, Iuliers, Hollande, Zelande, Haynault, Hasbanie, le Liege, Limburc, Alsatie, & ce qui est du Comté Palatin du Rhin, avec la forest d'Ardenne, Barroys, & celle partie de Champagne où la Meuse prent sa source. Mais aussi d'autres luy assignent ses bornes beaucoup plus petites, dequoy ce seroit chose superflüe de parler en cest endroiçt. Car c'est assez qu'õ sçache, que nostre Charles est d'un sang noble & ancien, autant qu'il est possible, lequel luy-mesmes a illustré par apres. Son pere fut Philippe d'Austriche, filz de l'Empereur Maximilian, lequel Philippe estoit Roy de Castille & de Leon en Espagne, né à Bruges en Flandres: & eut à femme Iehanne, fille de Ferdinand & Elizabeth, Roys de Castille & d'Arragõ. Mais c'est, peult-estre, trop parlé de ce Charles. Suffise, que ce temps si miserable a dequoy s'esjouir, de ce qu'estant presque accablé de monstreuses heresies & guerres tref-sanglantes, il a peu respirer souz vn Empereur, en qui il est impossible de

iuger si la pieté ou prouesse eut eu plus hault lieu : & n'y a celuy qui puisse doubter, que ce Monarque ne doyue estre à bon droit paragonné à ces anciens Empereurs, veu mesmes que Solymán, ce fouldre de Turquie, a redouté grandement ses forces, ou, comme il disoit, son bon-heur fatal. C'est sans doute qu'il ne s'est montré paresseux à la tuition & defen-
 * ce de l'Eglise Catholique, combien qu'il n'a peu faire tel exploit & punition des heretiques comme il eust bien voulu: lesquelz se voylans du manteau de la parolle de Dieu, ont semé des heresies ia condānées par l'Eglise vniuerselle: & preschans la liberté de conscience ont amadoué ie ne sçay quelz espritz, qui se sont en-orgueillis souz l'Empire de Charles. Mais comment? bien que Luther se puisse vanter d'estre le pere de tous, neantmoins ilz sont bigarrez en tant de sortes, qu'à grād' peine en sçauroit-on faire vn certain rolle, de maniere que Luther n'auroit pas beaucoup de gens, qui voulussent aller à la guerre souz son enseigne, fil estoit encor' en estre. Nous ne lairrons point ce propos, sans admonester le lecteur, qu'il considere, comme Dieu voyant par l'œil de sa prescience les heresies & schismes horribles, qui deuoient suruenir en l'Europe: & ne cherissant d'autre part sinon que la concorde de noz ames souz vne mesme Religio, a excité l'esprit des Roys de Portugal à chercher des Regions ez parties meridionales. Oū faut entendre, que ia deuant les Castillans auoient trouué vn nouveau monde, ou des prouinces inconnues par le passé. Afin donc que contention & altercas ne s'esmeust entre les Castillans & Portugais, le Pape Alexandre sixiesme interposant là dessus son decret, voulut, que les Espaignolz en leurs nauigations tiendroient la route du Ponant, & les Portugais celle d'Orient. Et en ceste sorte les Espaignolz trouuerent terre ferme de grandeur incroyable, avec plusieurs isles fort grandes, & fertiles tant en or que pierres precieuses. Les Portugais aussi voguerēt tant, que ayans outrepasé la mer rouge, & le goulphe de Perse, ilz trauerferent la coste d'Indie, & paruindrent iusques à Calecut, & finalement ez regions, que maintenant nous appellons Malacha,

*Diuisiō
des terres
nouuelle-
ment des-
couuertes.*

& Royaumes de Sina. Si ne furent contens ces Princes tant loüables d'auoir aggrādy si fort leur Empire, mais encore s'esuertuerent ilz de faire germer en ces pais barbares la semence de l'Euangile: & Dieu par sa grace a tellement bien-heuré ce saint proiect, qu'une multitude infinie d'Idolâtres s'est venuë rendre entre les bras de Iesus-Christ, pendant que les heretiques ont tout rauagé & bouleuersé en l'Europe.

EN la Cour du Roy d'Espaigne y eut vn nommé Christophe Colomb, natif de Genes, qui desiroit fort descouvrir quelques nouueaux & estranges pais en ceste terre: de façon que bien souuēt il supplia la maiesté, de luy faire liurer ce qui luy estoit necessaire pour exploicter ses desseings. Mais il fut long temps repoussé, comme vn esuenté, & qui desseigne choses impossibles. Finalement, n'ayant cessé de supplier le mesme, iusqu'à huiët ans expirez, le Roy commença à l'escouter, & commanda qu'on luy liurast vne barque & deux Carauelles, garnies d'armes & de viures comme il seroit besoing. Parquoy ayant hauçé les voiles au destroit de Gibraltar, il vint premieremēt surgir aux Isles fortunées, qu'à present on nomme Canaires, pour la grand'abondance de chiens qu'on y voit: & iadis furent nommées les fortunées, à cause de leur air merueilleusement temperé, doux, & soëf. On dict qu'elles sont dix en nombre, desquelles les troys sont desertes, mais les autres fertiles & cultiuées. Quand l'air est serein & vuyde de tous nuages, on voit de fort loing celle qui se nomme Teneriffe, & ce à cause d'un rocher de haulteur desmesurée, le sommet duquel va en appointissant comme vne Pyramide, & rend ce rocher des flammes sans cesse, comme le mont Gibel en Sicile. Ceux qui ont mesuré ce rocher, afferment qu'il peult bien auoir depuis le pied iusques à la cyme huiët ou neuf mil d'Alemaigne de haulteur. Les habitans cueillent les fruietz au mois de Mars & d'April: & raconte-on beaucoup d'autres choses de ces Isles, lesquelles ie ne veux icy inserer, pour n'estre encor' asseuré de la verité: Tāt y a que lors que Colomb print terre en ceste coste, les habitās alloiēt tous nudz, ne scachans qui estoit le vray Dieu: mais peu à peu

De Christophe Colomb.

Des Isles Canaires.

la plus saine partie de ces Isles se sont faictes enregistrer au papier de Iesus-Christ. Teneriffe & Gran-canaria, (ou grãde Canaire) sont plus grandes que toutes les autres, lesquelles en ce téps estoient habitées en la sorte que nous venons de dire. Colomb partant de ce lieu singla vers l'Occident, où il rencontra quelques Isles, dont il en nomma vne l'Espagnolle, & l'autre S. Iehan.

*De l'Isle
Espai-
gnolle.*

EN l'Isle S. Iehan vous eussiez veu des forestz tref-espesles, & eussiez ouï le chant melodieux d'infinis oyseaux, mais principalement de rossignolz, voire mesmes en Novembre. On y voyoit aussi force riuieres, fort belles, & claires au possible, & avec cela quelques portz assez commodés. Ayant donc Colomb costoyé longuement ceste Isle, & n'en voyant iamais la fin, cōclud que c'estoit terre ferme, dont il rebroussa chemin en l'Espagnolle. Si fut incontinent apperceu par les habitans, lesquelz commencerent à fuir l'ayans veu avec ses compaignons, pouraultant qu'ilz pensoient, que ce fussent les Canibales, qui sont peuples viuans de chair humaine, & fault penser que Colomb auoit passé iouxte la region de ces Canibales.

*Des Cani-
bales.*

Les habitans del'Espaignolle vont tous nudz. Quand aux Canibales, ilz se ruent sur les lieux qui les auoyinent pour en tirer de la proye, & si ceux qu'ilz prennent ne passent point l'aage de quatorze ans, ilz les engraisent, leur couppant premierement les genitoires, comme nous faisons aux cocz: que filz oultre-passent quatorze ans, ils les font incontinct mourir, & deuorent les entrailles, & les parties extremes du corps, encore toutes sanglantes & fraisches: & ce faict, ilz salent les aultres parties pour en manger ordinairement, comme nous faisons des viandes que nous accoustons à la façon. Quand aux femmes ilz ne leur font point de mal, mais comme si c'estoient gelines, ilz les gardét pour en auoir du fruit. Colomb ayant laissé en ceste Isle Espaignolle 38. hommes, il print la route pour retourner en Espagne, où estant arriué, il fut honorablemēt receu du Roy & de la Royne, de sorte que sça-

*Second
voyage de
Columb.*

chans qu'il auoit intention d'y faire vn second voyage, ilz luy feirēt deliurer dix-sept barques & douze carauelles, dans lesquelles

quelles estoient douze cens homes, & ne manquoient point ny d'aitaillemens ny de toutes sortes d'armes. Comme donc il vogueoit sur mer, il rencontra maintes Isles, & en nomma quelques vnes, comme il appella l'Archipelago certain lieu, où ilz trouuerēt quelques 47. ou 48. Isles. Or paruenuz qu'ilz furent à l'Espaignolle, ilz ne peurent oncq' entendre, dequoy estoient deuenus ceux qu'il y auoient laissez, à cause que le Roy de l'Espaignolle les auoit faict mourir. Neantmoins Colomb bastist vne ville en ceste Isle, & au milieu d'icelle le chasteau S. Thomas, qui furent les heureux commencemens de planter la foy Catholique en ces prouinces.

EN ceste année 1500. les Portugais, souz la conduyte de Pietro Aluaro leur Capitaine, furēt poussez par vne tempeste de mer en vne region merueilleusement ample & grande, dictē vulgairement la terre du Bresil, à cause que le Bresil en est apporté en ces quartiers, qui est vn bois propre à la teinture des draps. Si commāda Aluaro, qu'on dressast vne croix en icelle prouince, à la cyme d'un hault arbre, & fut la dessouz celebrée la Messe, y assistant toute la troupe, dont on appelle ceste regiō le païs Sainte croix. Et de faict on ne scauroit croire, cōme la religion Chrestienne se dilate en ces endroictz. Car Dieu voyant, qu'en bref pulluleroit vne sorte d'hommes, qui, pires que Turcs, demoliroiet les croix, signes de la passion de Iesus-Christ, a voulu transporter ce sacré signe aux Idolatres, enuers lesquelz il a esté pretieux & venerable. C'est chose trop certaine, qu'en plusieurs lieux de ces Indes Occidentales, les croix y erigees ont chassé les diables, tellement que par apres ils ne peurent donner responce aux Indoys, comme ilz fouloient. Je m'estonne donc comment il y a des homes semblables aux diables, qui sont incroyablement tourmētez par ce signe, & au moyen de ce ilz le haïssent plus que chose de ce monde. Or ces terres estans descouuertes, on commença par apres à les frequenter d'auantage, & y a-on trouué force choses rares & non iamais ouies.

AMERIC Vespuce, homme fort lettré, ayāt sillonné vne infinité de mers, premierement souz le Roy d'Espaigne, &

B.j.

De la terre du Bresil.

D'Americ Vespuce.

puyz souz celuy de Portugal, afferme qu'il a veu choses dignes d'admiration, & descouert plusieurs Isles: mais nous ne pourrions tout coucher par escript. Biē nous deuons nous eslouir, & rendre graces à Dieu, de ce qu'il luy a pleu reduyre de nostre memoire infinis peuples à sa Loy, & ce par le moyē des tres-religieux Roys d'Espaigne & Portugal, au Royaume desquelz la foy Catholique a demeuré syncere & constante iusques icy. Quād aux Portugais, i'en diray en passant ce que Paul Ioue, l'un des meilleurs historiens de nostre aage, en a escrit en ceste maniere: les Portugais ayans par le commandement de leur Roy Emmanuel, & par vne opiniastre & comme folle nauigation passé oultre la mer Atlantique & les Isles fortunées: ayans aussi laissé derriere eux les promontoires de Praxie, & de bonne esperance, finalement vindrent surgir à la coste d'Ethiopie, subiuguerent quelques peuples, passerēt oultre la mer rouge & le goulphe de Perse, surmonterent en Carmanie & Indie les Roys de Cannor, Cuchin, & Calcuth: où ilz establirent lieux propres pour exercer trafic de marchandise, & si y bastirent quelques forteresses. Puis apres, estant leur flotte & armée augmentée par la venue de quelques nouueaux Capitaines, se meirēt en teste de penetrer es plus profondz pais des Indes, si que vsans pour ceste fin de l'art de bien nauiger, vindrēt depuys Calcuth, (laissans derriere eux le fleuue d'Inde & de Gange) iusqu' en celle partie qu'on appelle maintenant Malacha: où ilz feirent à eux tributaire le Roy de celle region, effrayé de la nouueauté de l'artillerie, qu'il veit pour lors. Encore d'un autre costé, apres auoir obtenu victoire contre les Indois, meirēt garnison sur le destroit de la mer rouge, & fermerent le passage de la mer d'Arabie aux marchandz d'Egypte, si qu'en fin ilz furent maistres de toutes les mers Leuantines. En quoy certes nous sommes cōtrainctz de hault-louër la clemēce singuliere de nostre Dieu, qui a voulu que tāt de peuples barbares fussent domptez par les Chrestiens, & goustassent le doux fruct de sa parolle. Mais aussi auons nous dequoy estre assez contristez, quand nous voyons que ce-pendāt le Royaume de Dieu nous est osté, &

*Des nau-
gatiōs des
Portugais
au Levāt.*

est donné au peuple qui en fera du fruit. A la mienne volonté que ceux qui ont esté enchanter par Luther & ses adheras, se recogneussent, de peur que nostre Dieu s'estrange totalement de nous, pour estre seruy au nouveau monde.

CE fut enuiron ce temps que Baiazet, Roy de Turquie, ^{Prins de Modon en la Morée, par le Turc.} meit le siege deuant la ville de Modon en la Morée, ayant quant & soy cent cinquante mille hommes: lesquelz veindrēt aux mains avec les nostres, & apres plusieurs escarmouches, où d'un costé & d'autre mourut grand nombre d'hommes, les Chrestiens sçachans que cinq galeres des Venitiens estoient arriuées au port, laisserent leur garnison, & coururent fort inconsiderément recueillir ces nouueaux venuz: tellemēt qu'alors les Turcs entrerent à l'improuiste dans la ville, où ilz feirent merueilleux carnage des pauures Grecz & Venitiens. Et mesmes massacrerent l'Euesque de Modon, tout mitré qu'il estoit & vestu de ses ornemens Pontificaulx, ne pardonnans ces Barbares à qui que ce fust, sinō peult-estre à ceux, lesquelz ou l'aage ou la beauté rendoit propres, pour estre esclaves, ou pour seruir à la lubricité de ces mastins. Il y eut quelques milles captifz à ce sac, lesquelz estans bien garrottez de grosses cordes, furēt menez où estoit Baiazet: lequel fut si felon, qu'il les fait mourir miserablement en sa presence. Mais aussi luy-mesme fut peu apres tué par son filz, qui au-par-auant luy auoit rauy le Royaume. Le pere de ce Baiazet fut Mahōmet, Empereur de Turquie, lequel vint à Otronto ville d'Italie: & certes les affaires Chrestiennes estoient lors totalement desplorées, si Dieu par sa misericorde n'eust deliuré le genre humain d'une si cruelle beste que fut ce Mahōmeth, lequel deceda de mort soudaine: & fut lors assez cogneu, que l'ire de Dieu nous talonnoit de pres, si nous voulōs tousiours demeurer en la bouë de noz pechez. Baiazet ayant puy apres forcé quelques places des Chrestiens, rebroussa chemin vers Constantinople.

CE fut aussi en ce temps, que tout l'Orient estoit regy & gouuerné par trois Seigneurs tref-puissans: par le Turc Baiazet, par Caïtbei, Soltan d'Egypte & de Syrie, & par Iacup, Roy

*de Baiazet, Roy
des Turcs,
& son frere*

des Perſes. Si eſtoit la puiſſance de Baiazet beaucoup plus redoutable que nulle des autres, à cauſe d'un grandiffime nombre de gendarmerie qu'il ſouldoyoit, fuſt en paix ou en guerre, ſelon que ſes predeceſſeurs ſouloient faire. Mais comme il eſtoit d'un eſprit aſſez doux, & ſe paiffant ſur la philoſophie, apres qu'il eut chaſſé ſon frere Gemés, il aima micux auoir alliance avec ſes voyſins, que d'enuieillir en guerre. Aucuns ont appellé ce ſien frere Zizime, mais mal, à mon iugement, pour-ce que le nom de Gemés luy eſtoit donné d'un Roy des Parthes ainſi appellé: Ceſtuy-cy apres le decés du pere taſcha d'emporter le ſceptre de Turquie: mais eſtant vaincu, il fut contrainct de ſ'en fuir, & ſe vint redre à Rhodes, où il fut prins par le Seigneur d'Aubeſſon, Grād-maître de l'Isle, & delà fut amené à Rome, où Baiazet ſon frere payoit tous les ans quarante mille eſcus pour ſon entretenement. Puyſ apres il treſpaſſa à Gayete.

PENDANT ce tēps Sophi Iſmaël ſempara du Royaume de Perſe, & par toutes les prouinces que ce Sophi ſeigneurioit, ſourditi vne nouuelle opinion cōtre la ſuperſtitiō du faulx prophete Mahommet. Ce Sophi eut le vêt ſi à gré en tout ce qu'il entreprint, qu'en peu de temps il domta les Medes, Perſes, & Armeniēs: & par pluſieurs belles victoires qu'il obtint, ſon nom vola incōtinēt par toute la terre, de maniere que les Iuiſz (le iouēt de fortune, pour auoir repudié le filz de Dieu, vray & vnique Meſſie) ſe perſuaderent ayſément, que c'eſtoit cy leur Meſſie, & à ceſte cauſe ilz ſe reſiouïſſoiēt en l'Europe, banquetans enſemble, & ſ'enuoyans de l'un à l'autre des preſens, en diſant qu'ils deuoïēt auoir bonne eſperance, veu que leur tant deſiré Meſſie eſtoit venu. Mais ils furent bien loing de leur eſpoir, d'autant que le Sophi a plus hay ce peuple Iudaic, que nul autre. Or à fin que le lecteur puiſſe plus facilement entendre l'hiſtoire de ce Sophi, ie reprendray les choſes vn peu plus hault. Son pere donc fut Aidar harduel, Roy aſſez remarquable entre les Perſes, mais principalement admirable en ſon eſprit & en ſes mœurs. Car meſpriſant routes richesses & honneurs de ce mōde comme pures riſées & mi-

*D'où fut
iſſu le So-
phi de Per-
ſe.*

feres de fortune (ce que neantmoins plusieurs cherissent tresfort, comme si en cela gisoit le souuerain bien de l'homme) il choisit vne façon de vie fort austere, laquelle il seroit beaucoup plus aysé d'admirer, que d'imiter. Parquoy il acquist vn tel los & renommée, que vn nommé Vsumcassan, qui auoit esté gouuerneur d'Armenie, & s'en estoit emparé, ayant occis Moloanchre Roy legitime des Perse: le fit son gendre, luy donnant en mariage sa fille Marthe, laquelle il auoit eue de la fille de l'Empereur de Trebisonde & de Pont, qui en son viuant suyuoit la loy Chrestienne. Toutesfois il ne se fault esmerueiller, comment il voulut donner sa fille, qui estoit Chrestienne, audict Vsumcassan Mahometain. Car ce fut avec telle condition, que sa fille viuroit à sa liberté: & d'auantage le Roy de Trebisonde & de Perse faisoient ceste alliance, à fin de pouoir mieux resister à Ottoman Mahometh, la puissance duquel leur donnoit fort à craindre. Et de faict, Mahometh s'estant fortifié de l'artillerie, l'usage de laquelle estoit encor' alors incogneu aux Perse, surmonta Vsumcassan es champs d'Oyc, & si par-apres print l'Empereur de Trebisonde, lequel il emmena à Constantinople, & le fit mourir en prison. Cest Harduel, duquel nous parlions maintenant, demeurant à Tauris, cité fort peuplée en la grande Armenie, commença à prescher vne opinion ou plustost superstition, laquelle estoit bien Mahometaine, mais neantmoins beaucoup dissemblable à celle, que tenoyent les Mahometains tant en l'Asie qu'en l'Afrique. Car il dogmatiza, qu'il falloit nécessairement obseruer les ceremonies de la loy Mahometaine, enseignées par Haly compagnon & disciple de Mahometh: combien que les autres Mahometains suyussent ce qu'auoit enseigné Homar, l'autre disciple & interprete de Mahometh. Et c'est pourquoy les Mahometains s'entrehaussent merueilleusement, souz pretexte de religion. Ce que pieça pouoit grandement seruir aux Chrestiens, à diminuer la puissance des Turcs, que nous craignons si fort: mais ie ne sçay à quoy il a tenu, sinon que ie die, que les pechez des Chrestiens mesmes sont si enormes, qu'ilz meritent

*D'où est
venue la
division des
Mahometains.*

encore plus grandz fleaux. Or pendant que Harduel respan-
doit à Tauris sa nouvelle religion, infinie multitude de peu-
ple accouroit de Perse & d'Armenie pour le voir, de manie-
re que cela seruit pour donner martel en teste à Iacup, filz
d'Vsumcassan, qui auoit succédé au Royaume de son pere oc-
cis par Mahometh. Et alloit la crainte de Iacup tousiours en
augmentant, voyant l'amas des peuples qui venoyent à Har-
duel: & d'auantage il craignoit d'estre chassé par les Perles hors
du Royaume, ramenteuant en soy, que son Pere auoit occupé
le royaume de Perse par voye de faict, auquel il n'estoit en-
core bien assésuré. Parquoy estât auégulé de ce soupçon, &
ne respectant ny la consanguinité ny l'innocence de l'homme,
il le feit mourir secrettement: tant a de puissance la conuoiti-
se de regner seul. En oultre, il meit à mort, ou pour le moins
chassa tous ceux, qui auoyent sūy la religion d'Harduel.
Toutesfois Ismaël Sophi, filz de cestuy Harduel, estant enco-
re bien ieune, fut preserué de mort, & fuyant la persecution
de son oncle Iacup, il se retira en Hircanie, chez vn Pyrchale,
qui auoit esté feal amy à son pere, & qui alors seigneurioit
quelques villes sur la Mer Caspie. Si eut vn disciple d'Har-
duel, nommée Techel, & depuis Cuselbas (c'est à dire teste
rouge) qui ne cedit en rien à son maistre, & estoit du pays
mesme de Perse, issu du sang Royal, & tres-renommé pour sa
doctrine & religion admirable. Cestuy pareillement fuyant
Iacup se retira en la petite Armenie, où choisissant sa deme-
re sur vne montagne opposée au grand mont Taurus, passa là
sa vie fort austerement l'espace de quelques années, d'autant
que c'estoit vn lieu propre à cela, à cause de plusieurs beaux
arbres fructiers qui y croissent, & aussi qu'il est fort doux &
plaisant à cause de plusieurs ruisseaux, qui iamais n'y tarissent.
Viuant en ce lieu, & ne mangeant que ce que la terre pro-
duist de son bon-gré, la renommée fut si grande de luy, que
chacun l'appelloit le diuin Prophete. Si fut premierement ap-
perçu par les pasteurs, & puis quelques laboureurs, eston-
nez de la trop grande austerité d'iceluy, luy fournirent tou-
tes choses necessaires. En fin, pour-ce qu'il se mesloit de pre-

*De Techel, an-
theur du
turba rou-
ge.*

dire les choses futures, on l'amena ez villes & bourgades, au grand estonnement de tous, si que peu s'en fallut qu'ilz ne l'adorassent comme vn Dieu. Or auoit-il ia remply toute la prouince de sa renommée, si biē qu'ayant publié quelque interpretation de la Loy nouuelle, il persuada ayfement au peuple, qu'on ne pouuoit estre sauué, si on n'obseruoit son interpretation. Cōme donc plusieurs se laissent gaigner à ceste superstition, il commanda que tous ceux de la secte portassent vn turban rouge en teste, pour deuise de sa nouuelle religion: & de la est venu que tous les sectateurs de ceste nouuelle doctrine sont appelez en Orient Cuselbas, à cause de leur turban rouge. Voila quād à Techel. Ismaël pareillement, ayant embrassé la doctrine de son pere, & croissant tousiours en aage, il vint si parfait, & fut veu si admirable par sa courtoisie & beauté naturelle, & par vne sagesse & hardiesse qu'il auoit, qu'en peu de temps il se rendit fort & puissant, & l'acquit vn grand los, non entre la populace seulement, mais encore entre les plus nobles & puissans de toute la prouince: de maniere que luy n'ayant encore atteint l'adolescence, il se veit auoir & richesses & honneurs avec principauté, quoy qu'on pensast qu'il abhorroit telles choses. Il fut aussi surnommé Sophi, lequel nom me semble estre prins de ces anciens Mages, lesquels nous lifons auoir mesmes commandé aux Roys Persans. Si aduint, que Iacup, Roy des Perses, mourut en ce temps, au moyē de sa femme qui estoit forcier. Quoy voyant le Sophi, ne faillit pas à demāder la succession de son pere, & ce que luy eschéoit par le douaire de sa mere. Parquoy il assemble quelques forces des hommes de la secte, & de ceux que luy prestoit le Roytelet Pyrchale: à tout lesquels il entra dans l'Armenie, & recouura toutes les places de son pere: ce qu'il fit plus par sa renommée, & par la bienueillance qu'on luy portoit, que par forces qu'il eust. Et ne tarda gueres à assembler vne grosse armée par le moyen de ceux qui se plaisoyent à nouuelletez, de sorte qu'il print vne ville, située es limites de Medie, & nommée Sumache, en laquelle il ne laissa rien qui peust estre emporté. Ce que luy au-

*Discours
des faictz
& succez
de Sophi,
Roy de
Perse.*

gmenta de beaucoup sa renommée, & s'estant enrichi du pillage de ceste ville, il embellit son armée de toutes sortes d'armes, desquelles iusqu'alors elle auoit esté mal prouueüe. Cela l'esguillonna de plus en plus à cōquerir le Royaume de Perse, tellement qu'il se meit en teste de prendre la grand' ville de Tauris, où communement seiournent les Roys de Perse, d'autant que c'est la plus celebre & magnifique ville qui soit, non seulement en Armenie, ains encor en tout le Leuant, à cause du peuple, & des richesses qui y abondent. Autresfois elle fut appellée Terne, distant enuiron de quatre bonnes iournées de la Mer Caspie, & gueres loing du lieu dict Derbeto, où on conte qu'il y a des portes de fer, qui ferment le passage aux Scythes, à fin qu'ilz n'entrent ez destroictz d'entre les montaignes & la Mer. Ainsi donc Sophi Ismaël enuahit l'Empire de Perse, & quant & quant ceste nouvelle doctrine Mahometaine s'amplifia merueilleusement, qui fut en l'an 1499. durât lequel temps les François entrerent en Italie, & les Venitiens eurent du pire en vne bataille contre le Turc en l'Isle de Protos. Arriué que fut Ismaël deuant la cité de Tauris, il sceut que dedans icelle estoit Aluan, filz de Iacup, qui auoit chassé son frere Moratchan hors de Perse, & auoit fait iustice de quelques Seigneurs, qui partializoient avec Moratchan. Dont le peuple ne luy vouloit gueres de bien, & fut le moyen par lequel le Sophi iouit plus tost de la ville. Car si tost que les habitans entendirent, que le Sophi s'approchoit, ilz luy enuoyerent les clefz de la ville, si que Aluan gagna au pied le plus tost qu'il peut, voyant qu'il ne pouuoit faire teste au Sophi, pour n'y auoir aucun citoyen qui se voulust formalizer pour luy. Ainsi Ismaël les commença à tirer à sa cordelle, & par promesses il les gagna si bien, qu'ilz se feirent de sa secte. Si feit le Sophi, estant entré dans la ville, demolir le tombeau de Iacup son Oncle, tombeau fort richement elabouré, & en ietta la poudre au vent, pour oster toute souuenance d'iceluy, & pour se vanger de la mort de son pere. Or tandis nouuelles vindrent, que Aluan, s'estant r'allié avec Moratchan son frere, s'approchoit avec bonnes forces, dequoy le Sophi ne s'effraye

seffraye nullement, ains va au deuant d'eux le plus vistemēt qu'il peut, si que par ceste viffesse il surprit Aluan en desarroy, qui mourut comme il batailloit fort courageusement. Lequel bruiēt estant couru par l'armée, toutes ses troupes s'en fuirent à vau de rouverte. Aiant le Sophi seiourné là par quelques iours, & rafraischi sa gendarmerie, il s'achemina avec ses forces vers la ville de Scyre, pourautant que les prouinces voisines luy promettoyent estre de son parti. Et apres auoir esté receu magnifiquement, il faisoit harengues publiquement, par lesquelles il conseilloit de prendre la nouuelle religion, & adionstoit menaces pour ceux, qui dans trente iours refuseroyent de laisser les anciennes ceremonies, dont presque tous consentirent à ce qu'il demandoit. Ceste ville de Scyre est fort riche & opulente, si que des richesses d'icelle il paya toute sa gendarmerie, & n'y eut celuy qui ne fust biē & richement armé. Car entendez que plusieurs boutique estoyent pleines d'armes, lesquelles les artizans de cespaïs forgent fort industrieusement, avec du fer & de l'acier recuiēt, & vne tresbonne trempe, qu'ilz font avec quelques sucz d'herbes: & en outre la façon est beaucoup plus mignonne que des nostres. Ilz ne font pas seulement des armures pour les hommes, mais encore font ilz des bardures aux cheuaux, faictes de lames fort deliées. Prise que fut Scyre, il n'eut aucune peine à prendre la ville de Sapha, qu'on pense estre l'ancienne Suse: & aussi Sulthane, où on voit de merueilleuses ruines & masures d'edifices. Ce faict, il s'empara de la Mesopotamie au grād contentement d'un chacun, pourautant que Morathchan, frere d'Aluan, s'en estoit fuy en Arabie, quant & sa femme & ses enfans, & ses plus precieuses richesses. De l'Assirie il print son chemin en Mede, & estant retourné en Armenie, il fait guerre aux Albanois, Iberiens & Tartares, qui habitent au delà de la Mer Caspie, & ce, pour-autant que ia y auoit quatre ans passez, qu'ilz n'auoyent payé le tribut accoustumé d'estre payé. Or pendant que les affaires du Sophi prosperoyent si fort en Perse, Techel, duquel nous auons cy dessus parlé, remplit toute l'Armenie & vne bonne partie de la

*Discours
des faictz
de Techel
contre les
Tures.*

Natolie, de nouvelle religion : & ayant enflammé plusieurs, apasiez de la nouvelle religion, à prendre les armes, il enuahist les terres du Turc, si qu'on voyoit deia plusieurs, desireux d'une religion nouvelle, qui pour deuise portoyent le turban rouge, comme la nature de l'homme est fort amoureuse de choses nouvelles, quoy qu'elles soyent meschantes & abominables. Mais voyant bien Techel qu'il ne bastoit pas pour conduire vne guerre si difficile, il permit de piller les biens de ceux qui seroyent opiniastrés en leur loy ancienne. Et tirans de Capadoce en Lycaonie, ilz se rafraischirēt bon espace de tēps en celle region fertile & plantureuse, & estoient là en seureté. Ce que voyās ceux de ce pais là, se sauuerēt avec leurs biens en vne ville fort celebre de ce pais, nōmée Cony. Techel ne cessoit iamais d'espoionner les siens à se porter vaillāmēt, en leur proposant le butin, & menaçāt terriblemēt les refractaires & reuesches, pour quelle occasion plusieurs aimērēt mieux se mettre de son costé. Or faut il entēdre, que les Turcs, indignéz d'un tel degast & rauage, se mettoyēt en ordre pour luy courir sus, quand quelque caualerie, que le Sophi enuoioit, suruint, & deuez pēser q le Sophi auoit ia deuāt enhorté Techel, de dilater la doctrine nouvelle par tous moiens à luy possibles, iusques à cōtraindre les hōmes, & pour ce faire luy promettoit tout secours & aide. Ce que le Sophi en faisoit, ne tēdoit à autres fins, que pour dōner quelque bonne escorne au Turc Baiazet, lequel il festoit desia deliberé d'ēuahir à toute force. Il despescha aussi quelques Ambassadeurs à la Seigneurie de Venise, pour les suplier qu'il luy voulussent enuoier quelques maistres, qui fussent bien entendus à fonder l'artillerie. Si furent bien receus ces Ambassadeurs par les Venitiens, mais ils ne peurēt pas effectuer ce que leur requeroit le Persan, à cause qu'ilz auoyent promis treues au Turc pour cinq ans, & qu'aussi ils estoyēt assez empressez d'ailleurs: ce nōobstant ils feirent de beaux & riches presens aux Ambassadeurs, & les r'enuoyerēt honorablemēt. Mais Baiazet, ayāt entendu qu'ils estoient retournez en Perse par la Syrie, s'en cōplaignit fort au Soudan d'Egipte, tellement que tous les marchans de Venise, qui trafiquoyēt en Tripoli, A-

Iep, Baruth, & Alexâdrie, furēt tous emprisonnez, d'où ils ne
 fortirēt qu'au bout d'un an, leurs vies sauues, ayant premiere-
 mēt endure mille griefz & iniures de ces barbares Mamelus.
 Techel, se sentāt bien fortifié par le secours q̄ le Sophi auoit
 enuoyé, chassa Orcanes & Mahometh, neueux de Baiazer,
 qui estoiet venus en bataille rengée à l'encontre de luy, & s'il
 n'eust eu faute d'artillerie, sans point de doute il eust mis le
 siege deuant Cony, qui est tresbelle ville, & encores y eut-il
 plusieurs en ces quartiers qui se rengerēt à sa secte. Delà, pre-
 nant la route pour aller en Bythinie par Galatie, mettant tout
 à feu & à sang par où il passoit, il desconfit en pleine bataille,
 (s'estant aydé en cela de grande vistesce) celui qu'ilz appellent
 le Bellerbech, c'est-adire Colonel general de la cauallerie
 d'Asie, & y eut vn grand carnage de ses gens, & le reste fut mis
 en route. Ce faict il assiegea Cutheia, laquelle il força, tant fut
 grande la proüesse & fureur de ses gens, & fut la boucherie
 des Turcs fort grande, & le Colonel susdict y fut prins, qui
 sy estoit retiré avec ses femmes, & auoit longuement souste-
 nu l'effort des ennemys. Ceste ville est le siege, où se tient or-
 dinairement le grand Connestable de la Natolie, qu'ilz nom-
 mēt Bellerbech, comme le siege du Connestable de l'Europe
 est Sophia, ville de la Mœsie. Techel se sentāt enrichy du bu-
 tin de ceste cité, estoit ia resolu d'aller planter le siege deuant
 Pruse, ville capitale de Bythinie. Mais Baiazer, qui ne dormoit
 pas, enuoya en Asie grandes forces sous la charge & cōduicte
 d'Alibassa Macedonien, ce que sc̄achant Techel tourna tout
 aussi tost bride, & ayāt rauagé tout ce qu'il peut, partit de Pôt.
 Le capitaine Halybassa le talonnoit de fort pres, tellement
 qu'apres quelques iournées il tailla quelques vns en pieces,
 de l'arrieregarde, qui estoiet lassez & recreus du chemin. Te-
 chel estant outré & irrité de cela, feit mourir le grand Colon-
 nel, qu'il tenoit prisonnier, au milieu du chemin, de la mort
 duquel Halybassa fut fort estonné: mais si est ce qu'il ne laissa
 pas pourtant à les poursuyure le plus legerement qu'il pou-
 uoit. Mais voyant qu'il ne gaignoit rien à faire ainsi, il laisse là
 toute l'infanterie, & prend avec soy huit mille cheuaux, &

*La mort
d'Halys-
bassa.*

*Les Per-
ses punis
pour ne
suyure la
religion co-
mune.*

marche le plus royde qu'il peut par la route que l'ennemy auoit
suiuie. Si feit tant, que estant paruenue au mont Olyga, il com-
mença à agacer l'arriere garde luy faisant quelques rencôtres
bien dommageables. Techel ne s'effraye point pourtant, &
quoy qu'il sceust bien que ses gens estoient tous recreus, &
presque abbatu du chemin, si est-ce qu'ayant rengé ses trou-
pes, il feit teste aux Turcs. Toutesfois il y eut plusieurs gens
du costé de Techel, qui furent mis en route par les harquebu-
ziers à cheual, & neantmoins il dressa de rechef son armée,
ayât choisi les mieux armez, lesquels il mena de l'arrieregarde
à la pointe de la bataille, cōmendât aux autres, qu'en se defen-
dant ils gaignassent quelque lieu seur. Quoy voyant Halysbas-
sa, entra pelle-melle parmy les ennemis par deux fois, avec
vne cornette de cheuaux, où il fut à la fin rué ius à terre, & tué
par ceux de Techel. Parquoy les Turcs, espouuâtés de la mort
d'iceluy, commencerent premierement à batailler assez len-
tement, & puy tout d'un coup se meirent à fuyr. Ce faict, Te-
chel se retira avec le reste de ses gens dans Tascia, où bié tost
arriua Iunusbassa, avec quarâte mille Turcs tant de pied que
de cheual, & s'entre-donnerent maintes legieres escarmou-
ches. Iusques à ce que Techel, voyant qu'il ne feroit pas bien
ses besongnes alencontre de tant d'hommes, passa coyement
les montaignes, & descendit en la petite Armenie. Doncques
scachât Iunusbassa, que Techel auoit gaigné au pied, recher-
cha diligemmēt les sectateurs de la religion Persique par tou-
te la Turquie, iadis l'Asie mineur, & feit mourir tref-cruelle-
ment tout ceux desquelz il peut finer: aussi meit le fer chaud
sur le front de ceux qui n'auoyent point porté les armes, &
puy les emmena avec soy en l'Europe. Cependant Techel
se sauua au camp d'Ismael, qui pour lors faisoit guerre sur les
frontieres de Tartarie. Voila comment en ce temps il y auoit
en la tref-pernicieuse & detestable superstitiō de Mahometh,
des diuorces fort dangereux, & des haynes & animositez im-
placables, l'un soustenant qu'il failloit suyure Homar, disci-
ple de Mahometh, & l'autre Halys. Ce qui reüssissoit au grād
proffit des Chrestiens, & pouuons bien dire, que si ces trou-

bles ne fussent suruenus entre les Mahometains, Baiazet, Empereur des Turcs, eust bié donné plus d'affaires aux Hongres & Venitiens. Mais iacoit que Dieu se courrouce à bon droit pour les fautes & pechez des hommes, toutesfois il ne nous punit pas à la rigueur, ains il adoucist l'austerité de sa vengeance par vne misericorde ineffable, afin que nous ayôs moyē de nous retourner à luy. Tandis doncques que les Mahometains estoient acharnez les vns sur les autres sous pretexte de religion, Baiazet fut de tant plus incliné à faire paix avec les Venitiens, & laissant à vn autre temps les guerres de l'Europe, tascha par tous moyens de se véger du tort, que les Perses luy auoient faiët.

L'AN 1501. le dixiesme iour de May, Alberic Vespuce fut enuoyé du tres-puissant Roy de Portugal, pour descouurir des regions nouuelles. Parquoy les Portugallois prenās trois barques, vindrent surgir à vn promontoire d'Ethiopie, qu'on appelle le cap Verd, & partans delà, & singlans tousiours vers le Pole Antarctique, vindrent à vne Isle, (apres auoir souffert mille tempestes) en laquelle l'hyuer est au moys de Iuin, & la nuit & le iour aussi long l'un que l'autre. ^{L'hyuer au moys de Iuin.} Finalement le dix-septiesme iour d'Aoust, ilz aborderent quelque terre, les habitants de laquelle estoient plus farouches & espouuentables, que ne sont les bestes, combien que la region estoit fort belle & plaisante, & est située outre le cercle Equinoctial tirāt vers le midy, au cinquiesme degré. Ilz voyoient sur le sommet d'une montagne des hommes nudz, lesquelz ne vouloiēt iamais s'approcher des Portugallois, quoy qu'ils les inuitassent fort doucement. Le lendemain reprenans courage, feirent force feux par toute la contrée, à fin que les Portugallois quittassent leurs nauires pour les venir trouuer. Ce que feirent les Portugallois, mais les autres reculoiēt tousiours, afin qu'ilz les emmenassent plus auant en la terre. Ce qui sembla assez dangereux: au moyen dequoy deux des plus hardiz impetrerent du Capitaine, de penetrer plus auant en la region, avecq' condition qu'ilz reuiendroiēt aux nauires dans le cinquiesme iour. Les Portugallois attendirent long temps ces deux hommes,

mais iamais ilz n'en peurēt riē sçauoir, & de iour à autre vous eussiez veu les habitās venir sur le riuage, sans toutesfois vouloir iamais parler avec les Portugallois. Si aduint, que le septiesme iour iceux estans allez dans la terre, veirēt que les hōmes auoient amené leurs femmes quant & eux, & qu'ilz leur permettoient de deuiser ensemble. Mais les femmes trembloient de peur, de sorte que les Portugallois leur enuoyerēt vn ieune homme bien robuste, & eux se retirerent à leurs vaisseaux, afin qu'ilz ne fussent soupçonnez. Arriué que fut à elles ce ieune homme, toutes l'environnerent, & s'approchoient de luy comme estonnées, quād voicy vne cruelle femme, qui descendit de la montaigne, tenāt en sa main vne grande perche, & ne fut plustost venue où estoit le ieune homme, qu'elle l'atterra mort à ses piedz, & incontinent les autres l'enleuerent & le porterent en la montagne. Les barbares aussi accoururent tous au bord, & feirent rage de ietter des dardz dās les nauires. Mais les Portugallois lascherent quatre coups de canon sur eux, dequoy ilz furent si effrayez, qu'ilz s'en fuyrent tous. Lors les femmes prindrent le pauvre homme, ce voyans ses compaignons, & le meirent en pieces, puy le rostirent, & le mangerent. Les hommes mesmes montroient par quelques signes, qu'ilz auoient deuoré en ceste façon les autres deux.

Les Barbares mangèrent vn Portugallois.

C E L A esguillonnoit fort les espritz des Portugallois, & volontiers eussent-ils vengé ceste iniure, n'eust esté que leur Capitaine ne le voulut iamais permettre, se craignant encore de pis, s'il hazardoit ce peu de forces qu'il auoit, avec vn nombre infiny d'hommes. Parquoy ilz hauçerent les voyles, & voguerent beaucoup plus auant, où ilz apperceurent maintes choses qui les rauissoient en tresgrande admiration, de maniere qu'ilz s'approcherēt tāt du Pole Antarctique, qu'ilz voyoient les estoilles qui sont autour d'iceluy, lesquelles sont & en plus grand nombre & beaucoup plus remarquables, que ne sont celles qui environnent nostre Pole. Finalement ilz trauerferent tant de Mers, que le Pole Antarctique estoit esleué sur leur horizon de bien cinquante deux degrez, & lors ilz ne veirent oncques plus les estoiles de la grāde & petite Our-

se. Si cogneurét que le septiesme iour d'April, lors que le Soleil est sur la fin du Belier, la nuit leur estoit de quinze heures, & regnoit l'huyér en ces pais là. Mais ie n'auroy iamais fait, si ie voulois exposer tout ce qui a esté descouvert & cogné, tant par les nauigations de Vespuce, que par autres, en ces regions si loingtaines de nous: & deuons principalement rendre graces & loüanges à Dieu, comme ia cy dessus ay dict, de quoy tant de nations Idolatres ont esté cōuerties, & maintenant seruent à vn seul Dieu, & ce par le moyen des Roys d'Espagne & de Portugal, lesquelz ont si bien fait, qu'iceux peuples, ayans laissé le cult des faux Dieux, ne reuerét ou adorent de present autre que Iesuf-christ.

ENTRE Espagne & les Isles Canaires, les Portugallois ont trouué l'Isle de Maderes, laquelle quoy qu'elle fust sauage & totalement deserte, si estoit-elle pourtant d'un terroir fort fertile. Ce que voyans les Portugallois, meirent le feu dans des forestz tresespesses, afin que par ce moyē on y peust semer, & habiter facilement, & fut quelquefois le feu si violent, que plusieurs se trouuerét en grand peril de leur vie. Or ia est-elle frequentée des Portugallois, lesquelz y ont basti des maisons, & l'ont renduē tres-fertile, pourautāt qu'elle est lauée de maintes fontaines, & de belles riuieres, & si porte force perdrix, pigeons sauages, paons, porcz-sangliers, & plusieurs autres animaux, qui auoyent là fait leur repaire de toute memoire. Il sy treuue des arbres fort excellens, & ressemblās assez aux cedres ou aux cyprés, lesquelz ilz couppent avec quelques engins qu'ilz ont, & s'en seruent en beaucoup de façons & vsages, & est la couleur de ces arbres rouge, & de fort bone odeur. On y a planté des cannes de sucre, lesquelles sont bien fertiles, & portēt du meilleur succe qui soit, pource que le naturel de celle region se comporte à la façon de celuy de Sicile & de Chypre. On y a aussi transporté de la plante de vigne qui est en Candie, & porte plusieurs & gros raisins, desquelz on fait du vin fort bon & delitieux. On y voit aussi des raisins noirs.

ON voit en cest an des croix sanglantes, tumbées sur les

*La nuit
de 15. heures
au mois
d'April*

*De l'Isle
de Maderes.*

Croix sanglantes.

robbes des hommes & des femmes par toute l'Alemaigne, & croit-on qu'elles signifoient la grand' peste, qui suruint l'année ensuyuant. Car Dieu bien souuent aduertit les humains par telz signes, qu'ilz se corrigent, & qu'ilz destournent son ire embrasée sur eux. En mesme temps la faculté de Theologie de Mayence, suiuant le decret du Concile de Basle, & ensemble les Theologiens tant de Paris que de Louvain, arresterent & ordonnerent qu'il falloit croire, que la sacrée vierge Marie, laquelle le filz de Dieu s'est choysie pour sa mere deuant toute eternité, auoit esté conceüe sans peché Originel, & ce par vn particulier priuilege. Or ne me faut-il point icy arrester, sur ce que les anciens Docteurs de l'Eglise ont escrit de ceste matiere, lesquelz certainemēt ont parlé de ceste vierge en grand honneur & reuerēce. Tesmoing m'en sera S. Augustin, ceste grande aigle des Docteurs, lequel l'autre-treixiesme chapitre du liure de *natura & gratia*, resoult, que quand il est question de parler des pechez, il ne faut iamais mettre la vierge Marie sur les rangs, d'autant que nostre Seigneur est nay d'icelle. N'a-il donc pas estimé, que ceste vierge auoit esté douée de quelque priuilege, veu qu'il cōfesse, qu'elle est exempte de tout peché? Que les autres estriuent tant qu'ilz voudront sur cela, pour le moins ceux qui craignent Dieu, n'oseront dire iamais le contraire. Autrement si elle a esté subiecte aux loix des autres hommes, pourquoy n'a-elle aussi biē enfanté avec douleur & perte de sa virginité? Il a esté dict à Eue en la personne de toutes femmes, tu enfanteras tes enfans en douleur. Et toutesfois la vierge Marie a conçu par vn miracle non iamais oüy, non point de l'homme, ains du S. Esprit: & si a enfanté vierge, exempte de concupiscence en conceuant, & de douleur en enfantant. Celuy doncques qui a voulu qu'elle fust sa mere, de maniere qu'elle ne cōceuroit point par vn homme, mais par le S. Esprit, certes aussi a-il voulu, qu'elle fust nette de toute souillure de peché, pour dignement concevoir & enfanter le filz de Dieu. Car comme il est escript au liure de Sapience, la Sapience n'habitera point en vn corps subiect à pechez, & toutesfois la Sapience mesme de
Dieu

*Discours
de la con-
ception de
la vierge
Marie.*

Dieu a habité l'espace de neuf moys, és entrailles sacrez de ceste sainte vierge. Parquoy la faculté de Theologie de Mayence, ayant diligemment pesé ces raisons & autres semblables, a ordonné, que iamais aucun ne seroit promu en Theologie en leur vniuersité, que premierement il ne iure, que iamais il n'aura opinion contraire, & ne l'approuuera en sorte quelconque. Je sçay bien qu'il y en a encores de present, qui feront difficulté de soubzcripre à ceste sentence si bonne, quoy que plusieurs doctes hommes l'ayent confirmée & corroborée par argumens irrefragables. Mesmes le Concile de Trente, commencé soubz Pape Paul 3. & finalement acheué soubz Pape Pie 4. a commandé, qu'on deuoit s'arrester, quand à la Conception de la Vierge Marie, aux constitutiōs de Sixte quatriesme, qui a ordonné choses tres-seantes à l'immaculee cōception de la sacrée vierge. On dit qu'en ce concile de Trète ont assisté 180. Euesques & plus, & maintz autres grādz personnages de sçauoir inestimable, de sorte que les sectaires n'y ont osé iamais monstrier le nez, quoy qu'on leur eust donné assurance, principalement lors que sous Pape Pie 4. il y vint tant d'hommes d'excellent & rare sçauoir. Doncques s'il y a quelcun, qui ne vueille outrepasser les limites de la modeſtie Chrestienne, qu'il acquiesce à la sentēce definitiue de l'Eglise, & ne deroge au singulier priuilege de la mere de Dieu, de peur que se monstrāt reuesche enuers sa mere, il n'encoure l'ire intolerable de son filz.

IL vint en ce mesme an vn Italien en France, lequel estāt enflé d'une superbe & arrogance, se disoit estre Mercure, ia-
 goit que son propre nom fust Iehan, & se van-
 teur d'Apollonius Tyaneus, lequel quelques vns appellent
 Philosophe & les autres Magicien, & se glorifioit encores,
 qu'il n'y auoit personne qui le secondaſt en la sciēce des cho-
 ses secretes & occultes, de sorte qu'il ne tenoit compte des
 anciens Theologiens & Philosophes. Il menoit quant & soy
 sa femme & enfans, & ses seruiteurs & chambrieres. Il alloit
 nud avec toute sa famille, & ne luy ne les siens n'estoient ve-
 stuz que de toyles, & si portoient vne chesne de fer à leur col,

*D'un mer-
 cure Italiē
 qui se van-
 toit oultre
 mesure.*

à la maniere d'Apollonius Thyaneus, la vie duquel, a esté écrite par Philostratus, & encore deuât luy par Damis, qui luy auoit fait compaignie en tous ses voyages & peregrinations. Ayant demeuré quelque temps à Lyon, & cōmençant à estre renommé, il se vantoit au Roy Loys, que c'estoit son mestier de faire choses grandes. Tellement que le Roy s'esmerueillât de cest homme, le feit interroger par des hommes doctes, & principallemēt medecins, à fin qu'ilz sondassent, si cest homme auoit vne si prodigieuse cognoissance des choses, comme il se vantoit. Ilz luy proposerent plusieurs questions, & de matieres fort diuerses, ausquelles il respondoit promptemēt, & principalement en ce qui estoit de la medecine, de sorte que les autres estoient plus estonnez que fondeurs de cloches, ne sçachans d'où cela luy venoit, veu qu'il n'auoit aucunes lettres. Retournez doncques qu'ilz furent au Roy, ilz luy exposerent comme le tout s'estoit passé, non sans grande admiration. Si donna le mesme Mercure au Roy, vne espée merueilleusement estoiffée, & enuironnée de 180. petis cousteaux, & encores vn bouclier, où il y auoit vn mirouer fort industrieusement fait, auquel il disoit estre quelque energie grande. Au demeurant, on ne sçait où il alla apres, ne de quoy il est deuenu. Tant y a que si grand'arrogance & ostentation ne sied guieres bien à vn Chrestien Philosophe, considéré mesmement, que cest Ethnique Ciceron nous admoneste, que tāt plus que nous sommes grandz, nous deuons estre plus humbles, ce qui est exprimé par mesme sentence en l'Ecclesiastique, qui dict, Tant plus grand seras, humilie toy d'auātage en toutes choses. Enuiron ce temps certain homme nommé Iehan d'Eltz, accompagné de quelques gēs à cheual & à pied, en plein iour, sans que personne luy feist resistance, enuahit la ville royale nommée Budobriga, & vulgairement Bopparde, laquelle ia de long temps estoit engagée à l'Archeuesque de Treues. Iceluy donc ayant chassé tous ceux qui tenoient le party de l'Euesque, s'empara de la forteresse & de toute la finance, & si meit garnisons es tours. Il faut sçauoir que Henry septiesme Empereur, ayant reçu quelques deniers de l'Arche-

Eccle. 3.

Bopparde
prise d'é-
blac.

uesque de Treues, auoit hypothéqu  ceste ville. Et lisons, que depuys trois cens ans en  a, les Empereurs n'ont fait guieres de difficult  d'aliener les villes de l'Empire, sans se soucier de les racheter, d'o  est aduenu, que plusieurs places des appartenances de l'Empire, sont occup es par les Seigneurs seculiers & Ecclesiastiques, comme quelques vns ont laiss  par escrit.

LA famine molesta grandement toute la Suebe en ceste ann e, mais ceux de Strasbourg la soulagerent & diminuer t beaucoup, en vend t quelque n bre de from t qu'ilz auoient de long temps recueilly,   iuste & loyal pris, & non point iniquement, comme plusieurs font auioird'huy. Et certes telle charit  des hommes est fort rare en ce temps, combien qu'il n'y ait rien plus selon la nature, que d'ayder celuy, qui   mesme nature que nous. Et n'est merueille si se trouua grande abondance & plant  de bledz   Strasbourg, pourautant que ceste partie d'Alsatie est fort pl tueuse en bledz & fort b s vins, tellement qu'elle ne fournit pas seulement ceux du pa s, mais bien encore les voisins & estrangers: & n'y a presque region sur le Rhin, qui puisse estre compar e   icelle, quand   la fertilit  des biens, i oit que depuys le Rhin iusques au pa s montagneux elle n'aye de largeur qu'environ trois lieues d'Allemagne. En ce quartier y a plusieurs riuieres, lesquelles sortans du mont Vogesus se desgorge t dans le Rhin, & y a quelques autheurs qui ne sont pas trop   mespriser, qui afferment, n'y auoir pa s en toute l'Allemagne si plantueux qu'est l'Alsatie,   regarder tous les fructz qu'on en peut cueillir. En icelle y a 46. villes toutes closes de murs, cinquante lieux de forteresse, & vn nombre infiny de Bourgades. Mais peut-estre ie dy cecy sans en auoir occasion.

EN ceste saison la cit  de Basle se retira de l'obeissance de Maximilian l'Empereur, & quant & qu t de l'Empire, faisant ligue avecques les Suisses, qui sont neutres. Ce que voyans ceux de Scaffusen, se reuolterent pareillement, & se rendirent c f derez avec les mesmes Suisses, & dit on que les lettres de ceste alliance furent pass es   Lucerne. Basle est vne des plus belles & renomm es villes d'Allemagne, & dit Ammi  Mar-

*Descriptiō
de la ville
de Basle.*

*Schaffu-
sen ville
d'Ale-
magne.*

cellin, qu'elle estoit ia du temps des Empereurs Gratian & Valentinian. Le fleuve du Rhin la laue, & passe presque par le milieu d'icelle, mais il y a vn pont, sur lequel on va de l'vne partie à l'autre. Le plat país est fort fertile en vin & bledz, voire mesmes au pourpris de la ville. Le Pape Pie, second de ce nom, y bastit & fonda vn beau college, lequel il dota de plusieurs grandz priuileges. Si a deça & delà le Rhin double ville, l'vne qu'ilz appellent la grande, & l'autre la petite Basle, & seroit ceste ville beaucoup plus insigne, n'estoit que maintenant elle fuyt l'erreur de Zuingle, lequel l'Eglise Catholique a pieça condamné en la personne de Berenger. Et nous deuions fondre en larmes, dequoy en vne nation si forte, l'erreur & heresie ont prins si grand pied, que l'Alemagne presque toute en est ruinée, cōme nous dirons en son lieu. Schaffusen est pareillement située sur le Rhin, en vn lieu fort plaisant, commode & plantureux, & bien pres de ceste ville le Rhin se precipite comme dans vn abisme, iusques à quarante ou cinquante coudées, de sorte que toute l'eau se resolt en escume & vapeur, qui est chose assez horrible à veoir. Il est vray que les Schaffusiens auoient premierement fait alliance avec les Suisses pour quelque certain temps, mais à la fin cela fut changé en alliance perpetuelle. En ceste cité Eberard, Conte de Suebe, edifia vn fort riche & opulent monastere, qu'on appelle en Aleman Schiffusen, & fut ce conuent basti à grandz & incroyables fraiz, pource que de tous quartiers on y apporta de grandes colonnes de pierres, desquelles on en voitencores de present douze dans l'Eglise, chacune desquelles a dix-sept piedz de hauteur, & de circuit neuf piedz. Si fut ceste Eglise consacrée par le Pape Leon neuuesme, qui fut cousin dudit Conte Eberard, en L'an 1052. & fut ledit Pape homme de fort sainte vie, & avec ce de bien grā de doctrine & eruditiō, cōme ses ceures le tesmoignēt assez.

A v mois de Nouembre de cest an present, Philippes, Archiduc d'Austriche, & filz de l'Empereur Maximilian, ayant fait paix & alliance avec les François, passa parmy la France pour aller en Espagne, avec Ichanne sa femme, fille de Ferdi-

nand, Roy des Espaignès, & furēt receuës leurs maïestez fort honorablement par tous lieux où ilz passerent, mais singulierement à Paris.

Si fut raporté en ceste mesme année au Pape Alexandre sixiesme de ce nom, que les Russiens & autres nations de la Lithuanie, qui suyuoïēt les cceremonies de l'Eglise des Grecz, fouhaittoient fort d'estre coniointz à l'Eglise Romaine, mais qu'ils estoïēt empeschez de ce faire, à l'occasion de quelques vns, qui leur faisoïēt accroire, q̄ necessairemēt ilz seroient rebaptizez, d'autant qu'ils auoient reçu le baptisme à la façon des Grecz, c'est adire en la troisieme personne. Le Pape dōc-ques leur escriuit iouxte la teneur du Concile de Florence, célébré soubz le Pape Eugene quatriesme, (auquel Concile l'Eglise Grecque, voire mesme les Armeniës, furent d'accord avec la Latine) que le Baptisme estoit vallable & legitime, lequel estoit conféré en la tierce personne, quand on dit ainsi, Soit baptizé tel ou tel au nom du Pere, du filz, & du S. Esprit: combien qu'en l'Eglise Latine il ne faille pas changer la forme des parolles, ie te baptize au nom du Pere &c. Mais pour- ce que nous sommes tumbez sur le propos de ceux de Russie, en latin diēt Rutheni, il m'a semblé vtile, si ie disoie quelque cas de ces natiōs, afin que le lecteur en rapporte quelque cognoissance. Ceste gent doncq' contient des regions tres-amples, & sont communément appelez en nostre temps, Moscouites ou Russiens. Or vsent-ils de la langue de Sclauonie, laquelle est presque la plus dilatée & frequentée qu'autre qui soit, comme celle de laquelle vsent ceux de Dalmatie, Bosne, Croatie, Istrie, Carniola, Carinthie, Stirie, Moesie, Sernie, Bulgarie, & les autres en tirant vers Constantinople, pareillemēt ceux de Boëme, Lusatie, Silesie, Morauie, Pologne, Russie, & quelques autres peuples situez vers le Pont, voire mesmes quelques reliques des Vandales, qui habitent outre le fleuve d'Elbe tirant du costé de Septentrion. On ne sçauoit sçauoir au reste, qui les a seigneuriez des le commencement, pource qu'ilz n'ont point eu de caracteres, par le moyē desquelz ilz eussent peu laisser la cognoissance des choses à la posterité.

Le Baptisme donné en la troisieme personne est bon.

Des Russiens ou Moscouites.

Au moyen dequoy ilz ont commencé à escrire leurs Annales, seulement au temps que Michel, Empereur de Constantinople, enuoya les lettres de Sclauonie en Bulgarie. Entre autres qui ont dominé sur eux, il y a eu vn Igor, qui eut à femme Olha de Plefcouie. Cestuy-cy alla avec son camp iusques és villes d'Heraclee & Nicomedie, mais il fut contraint de fuyr, & en fin fut tué par Maldit Capitaine des Dreuulians, & laissa vn sien filz nommé Sunatoslaus. Si vengea terriblement Olha la mort de son espoux, si qu'elle feit mourir la plus part de ces Dreuulians, & meit le feu dans leur camp, quoy faiët elle vint en la Grece, où elle reçeut le saint baptesme, soubz le regne de Iehan, Empereur de Constantinople, en l'an du mōde 6463. (Car cela est ainsi dans leurs Annales, & ont de coustume les Russiens, de conter depuys la creation du monde, & non depuis l'incarnation de nostre Seigneur) Au demeurant, son nom Olha luy fut changé en Helene, & ainsi ce fut la premiere, qui embrassa la religion Chrestienne en ce pais de Russie, comme disent les Annales susdictes. Decedée qu'elle fut, son neveu Volodimer estant ia baptizé, la redigea au nombre des Dieux, & luy fut cōsacré & dedié l'vnziesme iour de Iuillet. Si ne peut-elle pourtant induyre son filz Vatoslaus à se faire Chrestien, lequel ayant succédé au royaume & estat de sa mere, mena ses forces iusques au fleuve du Danube, où il descōfit les Bulgares. Il feit aussi forte guerre à Basile & Constantin, Rois de Constantinople, lesquelz il meit en route, & rauageoit tout le plat pais de la Grece, de sorte que les autres seigneurs de Grece luy feirent present de quelques deniers, mais il n'en feit compte, & ayma mieux prēdre d'eux des vestemens & des armes. Toutesfois en fin fut-il tué par Curés, Capitaine des Pieczenigās, qui luy auoit dressé quelques embusches, & du test de sa teste il feit vne coupe, en laquelle il escriuit ces motz, pendant qu'il veut auoir ce qui est à autrui, il perd le sien. Or laissa-il trois enfans, ausquelz il auoit des son viuant departy ses seigneuries, & estoient ainsi nommez, Ieropolch, Olega, & Volodimer. Aduint que Ieropolch occit son frere Olega, mais il n'en porta pas longuemēt la punitiō,

*Olha Roy-
ne des Mo-
scouites se
feit Chre-
stienne.*

*Vatoslaus
Roy de
Moscouie.*

d'autant que par la fraude d'un sien intime Conseiller, il fut mis entre les mains de son autre frere, lequel le fit mourir tout aussitost, & par ainsi tout le Royaume escheut à Volodimerus, lequel pour lors adoroit maintes Idoles, & auoit plusieurs femmes, avec huit cens concubines.

Si cherissoit & aimoit plus la religion Chrestienne, que nulle autre, & partant il enuoya deuers Basile & Constantin, Roys de Constantinople, pour les prier de sa part, qu'ilz luy ottroyassent en mariage leur seur Anne, en quoy faisant il promettoit de prendre la religion Chrestienne, & restituer tout ce qui auoit esté emporté de la Grece. Les noces se font, Volodimer est baptizé en Corson, & fut nommé Basile, ce qui aduint l'an du monde 6469. depuis lequel temps la Russie n'a point abandonné la religion Chrestienne. Les Russiens l'ont nombré entre les Dieux, & celebrent sa feste le quinziesme iour d'Aoust, & y a vne ville nommée de son nom Volodiria, entre le fleuve Vuola, & le fleuve Occa. Les successeurs d'iceluy ne firent aucun acte de prouesse & vaillance, iusques au temps de George & Basile, lesquels Bati, grand Roy des Tartares, qui a si vilainement persecuté & enuahy les terres des Chrestiens, desconfit, & leur osta la vie, & quant & quant gasta & renuersa la meilleure partie de Russie, emportant la plus riche proye. Et depuis ce temps la, c'est asçauoir l'an du monde 6745. iusques au regne de Basile, qui les gouuernoit n'y a pas long temps, les Russiens ont tousiours esté tributaires aux Tartares. Or comme Bati, Roy des Tartares, apres auoir gasté toutes les terres chrestiennes, & laissé son nom fort redoutable en l'Europe, se fust retiré en Scythie avec ses gens: Innocent quatriesme, Pape de Rome, luy enuoya un bon nombre de gens doctes, qui furent choisis au concile de Lyon, l'an 1246. à fin qu'ils l'exhortassent d'adorer un seul Dieu, & son fils Iesuf-Christ, sauueur de tout le monde, & pour le distraire de ne plus resprendre le sang des pauures & innocens chrestiens. Les prieres de ces personnes religieuses estās ouïes par le Roy des Tartares, promit de ne rien attenter aux appartenances des Chrestiens, durāt cinq ans prochains.

Volodimer Roy des Moscoites se fait baptizer.

Ceste cote du temps n'est pas vraye, mais il y faut s'apleer.

Bati Roy des Tartares.

Innocent Pape enuoya ambassade au Tartare.

Mais les ambassadeurs du Pape ne faisoient que partir de la cour du Tartare, quand les Ambassadeurs des Sarrazins arriuerent, qui enhorterent les Tartares, à suyure plustost la religion de Mahomet plaisante & voluptueuse, que celle des Chrestiens, par quel moyen ils desroberent le cueur à ces Tartares, & mesmement au Roy Bari, & deslors reçurent ceste infecte & maudite superstition de Mahometh, laquelle ils retiennent encores de present. Mais pour retourner aux Russiens, apres que Bari eut rendu ceste prouince tributaire, les Tartares eurent grand credit & puissance entre les Russiés, sur laquelle s'appuyans les Princes de Russie, bien souuent ils obtenoyent quelques gouuernemens, & par fois chassoyent leurs proches parens, tellement que tādīs qu'un chacun s'efforçoit à auoir le dessus de son compaignon, les affaires des Russiens tomberent en grande confusion, iusques à ce que vint Iehan Basile, fils de l'aucugle Basile, à qui quelque capitaines de Moscouites nommé Demetrius, auoit fait arracher les yeux. Ce Iehan Basile fut fort heureux en ses actions, tellement qu'il s'empara de ce grand duché de Tuuer, & print Nouogardia la grande, qui est vne cité fort ample, ayant de circuit, (comme quelques vns afferment) sept lieües d'Allemagne, de laquelle ville il emmena en Moscouie plus de trois cens chariotz chargez d'or ou d'argēt & de pierrerie, enuiron l'an de grace 1479. On dit que dans ceste cité, se trouuent sept conuens de l'ordre de S. Benoist, esquelz y a grande multitude de religieux, & contient aussi plusieurs belles eglises. Quand nous auons le solstice de l'esté, elle a le plus grand iour de l'année, de dixhuit heures. Or doncques ce Iehan Basile, que nous venons de nommer, la teint assiegée l'espace de sept ans entiers, de sorte qu'en fin il la forcea, & emmena en Moscouie l'Archeuesque & tous les plus riches & puissans qui fussent dans la ville: quoy fait, il renuoya des siens pour habiter es possessions qu'il auoit conquises. Si reçoit toutes les années vn grand tribut de ce païs, oultre le reuenu commun qu'il y a, & au lieu de l'Archeuesque, il installa certain Euesque, auquel il ne donna que bien peu du reuenu de cest Archeuesché.

Archeuesché. Mais apres que les Moscouites eurent vn peu habit  en ces regions, aduint qu'ils y planterent qu t & quant leur damnable religion. Ce Iehan Basile engendra de Sophie, fille d'Emanuel, Roy de Constantinople, vne fille nomm e Helene, laquelle fut donn e en mariage   Alexandre grand Duc de Lit anie, qui fut aussi par apres declar  Roy de Poloigne. Ces noces sembloient apporter avec soy vne telle corde, que de l  en auant on n'orroit plus parler de guerre: mais comme le Polonois eust refus  de faire certaine chose laquelle il auoit promise, Iehan Basile luy mena guerre, & ayant liur  la bataille, il emporta la victoire, ayant prisonnier Constantin, vn des plus vaillans & experimentez Capitaines du Roy de Poloigne, avec plusieurs autres Seigneurs, & s'empara de maintes prouinces & forteresses du pa s de Lit anie. Ce Constantin vsant de quelque finesse, s'en fuit de Moscouie vers Alexandre, quoy que le Moscouite luy eust donn  pleine & entiere libert , pourueu que laissant Alexandre il se me st de son party, & fut ce Constantin qui accoustra bien mal les Moscouites, comme nous verrons en son lieu, assauoir l'an 1514. Mais i coit que la puissance & les moyens de ce Iehan Basile ay t est  fort gr ds, si est-ce qu'il estoit subiect aux Tarbares, de maniere qu'il alloit au de  t de leurs Ambassadeurs quand ils venoyent, & les escoutoit tout debout, eux estans   leur aise. Finalement apres le dec s de cestuy-cy, luy succ da Basile Iehan, lequel regnoit n'y a pas encores long temps, en Moscouie. Il teint captif Demetrius, fils de son fr re Iehan, lequel Iehan Basile l'ayeul auoit constitu  Seigneur de toute la R ssie, apres la mort de Iehan pere d'iceluy Demetrius. Lequel Demetrius estant aussi pass  de ce siecle en l'autre, Basile commanda tout seul, & ne conserua pas seulement ce que son pere luy auoit laiss , mais encores adiousta-il plusieurs prouinces   son empire, quoy que ce fust par son industrie, plustost qu'  force d'armes. Car il reduit en son obe ssance & Plescouie, & la belle Principaut  de Smolenzko, laquelle appartenoit aux Lit aniens y auoit plus de cent ans, comme nous dirons cy apres. Et quoy que ce Basile fust assez mal-

*Cruauté
& tyrannie
d'un Sei-
gneur des
Mofcovi-
tes.*

heureux en guerre, si estoit-il pourtant estimé tres-heureux par les siens, pourautant qu'il se mōstroit fort cruel & presque intollerable enuers eux, desorte qu'il ne vouloit iamais permettre que ses propres freres, ny autre prince quelconque, teinssent des Chasteaux & lieux de forteresse. Et falloit necessairement, qu'ils seruissent leur Seigneur à leurs propres coustz & despens, fust à la Cour, ou en guerre, ou en Ambassade, & le plus qu'il faisoit, c'estoit de donner à quelques vns, qui auoyent fort grandes charges, quelques places ou mestairies, & ce encores pour vn an & demy, en payant certaines rentes au Prince, & ce terme passé, ils estoient contrains de seruir six ans entiers à leur propre bource. Aduint que quelquesfois il voulut enuoyer en Ambassade vers l'Empereur Maximilian, vn de ses plus fauoritz secretaires, mais luy ayant respondu qu'il n'auoit pas pour se conduire iusques là, il fut mis en prison, où il finit ses iours miserablement, & furent tous ses biens confisquez au Prince, sans que ses freres ou heritiers en cheussent d'vn liart. Si quelquesfois les Ambassadeurs rapportoyent quelques presens qu'on leur auoit fait, s'il voyoit qu'ils estoient assez riches, il se les prenoit presque tousiours, tellement qu'vn iour il enuoya des Ambassadeurs à Charles le quint, lequel leur fait present de belles chesnes d'or, & de quelques pieces d'or d'Espagne, & quand & quand Ferdinand, frere de l'Empereur, leur offrit quelques vases d'argent, & des draps d'or & d'argent, ensemble quelques especes d'or d'Allemagne. Retournez doncques qu'ilz furent à leur maison, leur Prince Basile print gentiment pour luy les chesnes & les vases, & encores vne bonne partie des escus d'Espagne. Si abusoit aussi bien forte de sa puissance, enuers le Clergé & les lays, de sorte qu'il faisoit à son plaisir de leur vie & de leurs biens, sans que personne luy resistast, voire mesmes se persuadoient-ils, qu'il n'auoit aultre volonté que celle de Dieu, & l'appelloient le portier & chābrier de Dieu. De sorte que par si grandé cruauté ceste nation se rendoit farouche & sauuage, cōbien que on ne scauroit bonnement dire si c'est la cruauté de ce peuple barbare,

qui merite vne telle tyrannie, ou si le peuple est fait si cruel, pour estre ainsi tyrannizé. Ce Basile fut le premier qui usurpa le nom & tiltre de Roy, d'autāt que tous ses predecesseurs estoient contentez d'estre nommez grādz Ducs, bien que son pere voulut estre appellé grand Seigneur de Ruffie. Voire mesmes fut-il appellé Empereur, mais on ne doute point que ce fut fait par mesgarde. Escriuant au Roy de Poloigne, il ne fintituloit point Roy, mais seulement grand Duc, pourautant que ne l'un ne l'autre ne vouloit recevoir les lettres de son compaignon, si elles contenoient aucun nouveau tiltre. En premiere nocces ce Basile icy espousa Salomea, fille d'un sien subiect, mais ayant habité avec elle l'espace de vingt ans & plus, sans auoir lignée aucune, il l'enferma en un monastere l'ā 1526. quoy que ce fust malgré ses dens, & print à femme Helene, fille de quelque Capitaine, de laquelle il eut un filz nommé Iehan, l'an 1528, qui succeda au Royaume des Moscouites apres le deces de son pere, & sa mere, morte de poison, à elle presenté par on ne sçait qui.

QUAND à ce qui concerne la religiō, les Moscouites ou Russiens adorent bien Iesuf-christ, mais c'est à la façon des Grecz, lesquelz se sont bien souuēt retirez de l'obeissance de l'Eglise Romaine, & souuent aussi ont conuenü avec elle. Le motif de cela est, que les Euesques de Constantinople, se voyans auoir leur siege en vne cité si segnalée, & qui estoit dite la nouvelle Rome, se sont estudiez de tout leur pouuoir d'auoir mesme autorité, ou pour le moins seconde, apres le Pape de Rome. D'où nous voyons qu'au premier Concile de Constantinople, qui fut vniuersel, y a un canon, par lequel le second lieu apres le Pontife de Rome est donné à l'Euesque de Constantinople. Mais pourtant on cognoist bien que ce Canon là est faux, par les escritz du grand Leon, Pape de Rome, lequel viuoit il y a plus de onze cens ans, en grande sainteté & merueilleux sçauoir. Aduint doncques que au grand Concile de Chalcedone, Anatolius, Euesque de Constantinople, impetra cauteleusement des peres qui y assisterent, que luy & ses successeurs auroient la secōde dignité apres le Pape.

*Que les
Euesques
de Constā
tinople ont
desiré sous
iours le se-
cond lien
apres le
Pape.*

Ce que sçachant Leon, pour lors Pape de Rome, s'y opposa par toutes voyes, & feit tant, que ce qu'il auoit impetré par voyes obliques, fut déclaré nul & d'aucun effect. Et mesmes il semble que Leon afferme, que le precedent Canon du Concile de Constantinople, ne paruint iamais à la cognoissance du saint siege de Rome. Car voicy ses mots en l'Epistre 53. escrete à Anatolius: la subscription que tu te vantes auoir esté faicte y a soixante ans par quelques Euesques, (car il y a enuiron autant d'annees entre le Concile de Constantinople & de Chalcedone) ne fauorise en rien à ta cause, laquelle subscription ne fut iamais enuoyée à la cognoissance du siege Romain par tes predecesseurs, & partant, toy voyant que ta cause estoit fort foible & infirme, tu t'es peiné d'y adiouster quelque ayde assez inutile, asçauoir en arrachant des freres quelque espee de consentement, lequel ilz ont donné par importunité. Que si quelcun desire sçauoir, pourquoy ce saint Pô-tife si roydemment s'opposa, à Anatolius, qui demandoit choses illegitimes, luy mesme en rend la raison en la mesme Epistre: tu peux cognoistre, dit-il, que ie contrediz à ta dilection d'un cueur beneuole, afin que tu ne te messes de troubler l'Eglise vniuerselle. Car ce bon Pape ne vouloit, en sorte que ce fust, deroger aux priuileges de l'Eglise d'Alexâdrie & Antioche, lesquelz leur auoient esté donnez au Concile de Nice. Pareillement du temps de Gregoire le grand, Pape de Rome, y eut un Euesque de Constantinople, nommé Iehan, lequel osa se nômer Patriarche vniuersel, lequel tiltre tous ses successeurs affecterent par apres, au grand scandale de toute l'Eglise, iusques à ce que le Turc les a bien empeschez d'estre si glorieux & ambitieux. Gregoire doncq' voyant l'insolence & arrogance de ce Iehan estre intolerable, luy remôstra sa faute par escrit, ce que ne profitta pas de beaucoup, à cause que les Grecz s'opiniastrerent tousiours en leur premiere opinion, ce qu'ilz n'ont faict sans en experimenter vne bien grande punition. Les Moscouites doncques suyuant la façõ de faire des Grecz, ne conuiennent pas en toutes choses avec l'Eglise Romaine, & dit-on que le Patriarche de Constantinople, à la priere du

Les Mos-
couites sui-
uent les
Grecs.

pere de celuy, lequel, (si ie ne me trompe) commande maintenant en Moscouie, enuoya certain religieux pour rediger en bon ordre tous les liures, Canons, & Decretz appartenans à la Foy. Et comme le moyne se fust apperceu de plusieurs erreurs, on tient qu'il dit au Prince, que certainement celuy là estoit schismatique, qui ne suyuoit les ceremonies ou Romaines ou Grecques, & que peu apres on luy tollut la vie, quoy que le Prince l'aymast beaucoup, & disent aussi que le sembla ble aduint à vn marchand de Grece, qui auoit dit tout le mesme. Voyla comme les Moscouites se iactent qu'il n'ya qu'eux qui soient bons Chrestiens, & disent que nous auons fait ban que-route à l'Eglise primitiue & aux constitutions anciènes, combien qu'ilz ayent en tref-grande abomination les Lutheriens & autres sectaires de ce temps. On trouue escrit dans leurs Annales, que S. André vint de la Grece au fleuve Bory-^{Que disent les Moscouites de S. André.}sthene, & qu'il nauigua iusques és montaignes où de present est Chiouia, & qu'il beneist la terre de Ruffie, & que là il baptiza les hommes. Disent aussi, que de là auât il alla iusques à la Mer de Germanie, & dela vint à Rome, & finalement qu'il fut crucifié en la Morée par Agus Antipater. Mais ne disputons point si cela ést vray, pour le moins c'est chose trop asseurée, que S. André ne les a pas enseignez à errer.

A v demeurant, tous les Archeuesques & Euesques de Moscouie ne mangent iamais de chair, & les Prieurs des con-^{Quelques mœurs des Moscouites.}uens, qui sont fort frequens en ce país là, sont esleus selon le bon plaisir du Prince. Les prestres sont mariez, mais quand leur femme est morte, il ne leur est pas permis d'exercer aucun ministere ny de sacrifier, sinon qu'ilz entrent en religion, & qu'ilz viuent selon les reigles du monastere. Les lays peuvent bien conuoler à secondes nopces, mais si est-ce qu'ilz estiment vn tel mariage auoir ie ne scay quoy de mauuais, les troisiemes nopces ne sont point permises, sinon qu'il y aye grande necessité, & quand aux quatriemes ils les abhorrent du tout. Le diuorce a lieu entre eux, voire mesmes ilz repudient, combien que ce soit en le celant le plus qu'ilz peuuent, scachant bien que cela est contraire à la religion & aux ordō-

Les prestres ne s'ont point Bigames en Moscouie. nances. Que si vn prestre se marie deux fois, il est totalement sequestre de la compagnie & accointance du clergé. Et faut diligemment noter ceste loy de Bigamie entre les Moscouites, laquelle les Grecz obseruent de point en point iusques à ce temps. D'où appert euidentement, l'impudence & peruersité de nos Heretiques, lesquels ne rougissent point en affermant, qu'il est permis aux prestres de Grece de se marier dix fois l'une apres l'autre, si tel est leur plaisir. Ce qu'a escrit Philippe Melancthon en quelque liure, auquel entre autres choses il soustient, que les prestres se doyuent marier. La coustume que les prestres se marient, (dict Melancthon) est obseruée encores ce iourd'huy en la Grece, & non seulement les gens mariez peuuent estre prestres, & auoir vne femme seule, ains il leur est permis de se marier tant de fois qu'ilz voudront, voire dix fois si bon leur semble. En quoy Melancthon met impudemment, comme il a fait en plusieurs autres matieres, ce que nous pourrions enseigner par plusieurs tesmoignages: & sans faute vn homme n'est guieres sage, qui fuyt pour conducteurs des gens si vilains & effrontez, que sont ceux la. Mais reprenons noz erres. Les reuenus & oblatiōs des prestres sont fort minces, & ne different pas guieres leurs accoustremens de celuy des lays, si ce n'est quand à la couuerture du chef. Aussi à quel propos seroient ilz differens d'eux en habit, attendu qu'ilz ne le sont pas en mariage? Les monasteres auoyent des loix fort rigoureuses, mais pour n'estre entierement obseruées, cela a refroidy beaucoup. Ilz ne mangēt iamais de chair. Si sont les habitz ordinaires des Euesques semblables à ceux des moynes. Ilz ont tous ceste persuasion, que depuis le septiesme Concile general, il n'a esté ny n'est permis, d'enioindre vn Cōcile vniuersel, ou d'y aller, sous peine d'Anatheme, ce qu'ilz obseruent estroitement encores de present. Du temps que le Concile de Florence se celebroit soubz Eugenius quatriesme, il y eut quelque Metropolitain, qui se hazarda d'aller au Concile, auquel s'accorda l'Eglise Latine avec la Grecque. Mais il ne fut pas si tost de retour, qu'il fut mis en prison, & n'en sortit qu'à grand' peine. Quand ilz baptizent les petis en-

fans, ilz les plongent par trois fois entierement dans l'eau, la-
 quelle ilz consacrent à chascun Baptesme, & sans cela ilz esti-
 ment qu'ilz ne sont pas deuement baptizez, & par apres ilz
 leur donnent le chresme cōsacré en la sainte sepmaine. En-
 uiron Pasques ilz confessent leurs pechez avec vne merueil-
 leuse contrition de cuer, & se tiennent debout le confesseur ^{Comment}
 & le penitent, au milieu de l'Eglise, & la confession faicte, ilz ^{la cōfessio}
 obseruent de terribles ceremonies, pourautant que ilz pren- ^{se faict, &}
 nent la sainte communion sous les deux especes, meslans le ^{comment}
 corps avec le sang dans le Calice, duquel le prestre prent vne ^{ilz commu-}
 fort petite partie avec vn cueillyer, & le presente au penitent. ^{nient.}
 C'est la coustume aussi de faire communier les petis enfans
 aagez de sept ans seulement, lesquelz filz ne peuuent com-
 munier à cause de quelque maladie, ilz leur versent dans la
 bouche vne goutte du sang, se contentans d'une seule espece.
 Au reste ilz ne consacrent iamais, sinon quand ils celebrent la
 Messe, & pour les malades ilz consacrent l'Eucharistie le iour
 du leudy saint, & la gardent pour toute l'année, d'où est ayse
 à colliger, qu'ilz ne donnent qu'une espece aux malades. Il est
 vray, qu'à peine les sçauroit on endurer, en ce qu'ilz adorent
 le pain deuant qu'estre consacré, & le portent parmy l'Eglise.
 Ilz obseruent les grandes & solennelles festes, mais aux au- ^{Festes des}
 tres, qui ne sont pas si celebres, les Bourgeois & hommes me- ^{Moscoui-}
 chaniques assistent au seruice diuin, & apres cela, chacun s'en ^{tes.}
 retourne trauailler, ceux qui sont plus excellēs, passent la fe-
 ste ioyeusement, & bien accoustrez. Ilz celebrent la feste de
 la S. Trinité le second iour de Pentecoste, & la Toussaintz,
 le huietiēme iour apres Pētecoste. Ils croient qu'il n'y a point
 de Purgatoire, ains estiment que & les bōs & les mauuais at- ^{Erreur du}
 tendent la sentence du dernier iour, & que ce pendāt les mes- ^{Purgatoi-}
 chans ne sont point punis ny tourmentez. Ce nonobstant ilz
 font prieres pour les trespassez, croyans qu'elles leur seruirōt
 de quelque allegement au grand iour du iugement. Ilz ne
 prennent point d'eau beneiste, que le prestre ne la donne: en-
 tre tous les saintz ilz honorent singulierement S. Nicolas, les
 miracles duquel sont encores fraichement faictz en ce païs

*Quaresme.**Ieufnes
des Moscouites.*

là. Ilz ieusnent les sept semaines du Quaresme, biē qu'à la premiere ilz vsent de lestage, mais aux autres ilz n'vsent pas mesmes de poisson. Il y en a qui ne mangent que le Dimanche & le samedi, & les autres iours ne mangent rien qui soit. Ilz gardent le ieufne de S. Pierre, depuys l'octaue de Pentecoste, iusques à la feste S. Pierre & S. Pol, & le ieufne de la vierge Marie, depuys le premier iour d'Aoust, iusques à la feste de son Assumption.

ILZ ieusnent pareillement sept semaines pour l'Aduent, & appellent cela le ieufne S. Philippe. Pource que selon leur Calendrier, il commence à la feste S. Philippe. Vray est qu'ilz ne ieusnent pas vne veille de feste sinon la decollation S. Iehan, laquelle tūbe le 29. d'Aoust. Les moynes sont cōtrainctz quand ilz ieusnent, d'vsfer de breuage aigre & d'eau meslée avec du froment. Aussi ne peuent les prestres vsfer pour lors d'eau de miel ou de ceruoise, combien que toutes ces loix s'abatarassent auourd'huy. Quand ce n'est pas temps de Ieufne, le samedi ilz mangent de la chair, mais le mercredi nulle ment. En ce païs là y a vn cōuent de la Trinité fort renommé, où est enterré S. Serge, & dict on qu'il faict là plusieurs miracles, à cause dequoy il y vient gens de tous les quartiers, lesquels sont nourrys de la largesse du conuent. Ces Moscouites ont des femmes iaagées, & imbecilles, lesquelles font le pain à chanter, & y est celebrée la Messe en langue vulgaire. Les femmes de ce païs viuent assez miserablement, pource que elles sont presque tousiours encloses au logis, où elles filent seulemēt, & ne font guieres autre choses, hors mis les patures femmes, lesquelles trauaillent pour la maison & font la cuyline. Et si ne leur permettent pas souuent d'aller à l'Eglise, & moins encores de visiter leurs amis, si elles ne sont de ia toutes chenuës. Il y eut quelquefois vn Aleman qui s'alla marier en ces quartiers, & sa femme se plaignoit à luy, disāt qu'il ne portoit point bōne affectiō à elle, à cause que iamais il ne la battoit. L'Alemā oyāt cela, respondit qu'il l'aimoit vniquemēt, & qu'il n'estimoit pas que les coups fussent le signe d'un grand amour. Par apres il la battit assez brusquement, & experimenta

*Battre biē
vne femme,
est si-
gne qu'on
l'aime.*

rimenta que la femme l'aimoit beaucoup plus ardemment, qu'elle n'auoit fait parauant. Mais il la battit si souuent, qu'en fin le pandard luy rōpit le col & les iambes. Tous les Moscouites cōfessent qu'ilz sont serfz du Prince, & aussi sont ilz plus nays à seruir qu'à estre libres. Ilz vsent tous d'une robe longue sans plis, & ont les manches fort estroites. Quand ilz entrent en la maison d'autrui, ilz obseruent plusieurs ceremonies, comme de s'encliner bien souuent, & quelques autres semblables. Leur Prince a des postes establies en plusieurs lieux, & certain nombre de cheuaux, avec lesquelz ilz feront quelquefois en trois iours six vingt lieues d'Alemaigne, quoy que ces cheuaux soient fort petis, & bien meigrement traictez. En ce pais de Moscouie y a grand' quātité de plusieurs sortes de peaux, comme d'hermines, de martres, de genethes & autres. Et est le pais & seigneurie entiere de ce Prince de fort grande estendue, de sorte que quelques vns disent, qu'il a de long & de large bien cinq cens lieues d'Alemaigne. La ville de Moscouie est la metropolitaine ville de Ruffie, & la prouince où est ceste ville, (de mesme nom qu'icelle,) sent vn hyuer fort ^{Hyuer} aspre, de sorte que l'eau iettée en l'air est plustost gelée, ^{fort aspre.} qu'elle n'est descendue à terre, mesmes quelquesfois les arbres, les bestes, & les hommes y meurent de froid: & si aduiuent aussi, qu'ilz ont l'esté fort violent & d'extreme chaleur. Or combien qu'ils soient tous appelez Moscouites, si est-ce que Moscouie est vne bien petite region, & domine le Seigneur de Moscouie sur plusieurs autres prouinces, & est située ceste Moscouie, sur les limites de l'Europe bien pres de l'Asie. En la ville de Moscouie, qui est merueilleusement grāde, est le chasteau du Prince, fait à la mode d'Italie, lequel est bien fort, & represente vne ville tant il est grād, mesmes en iceluy y a plusieurs Eglises. Les maisons de la ville sont presque toutes de boys, mais les bouleuerds du chasteau, & le logis du Roy sont entierement de brique. La region est fort saine, tellement que la peste y est bien rarement, combien qu'il y regne vne sorte de maladie, qui ne differe guieres de la peste. Le plus long iour de l'an y est de dix-sept heures, & vn quart d'heure. Mais

*La puis-
sance des
Moscovi-
tes.*

à tâtie laisseray ce propos, & ne parleray point des autres provinces de ce Prince de Moscouie, pource qu'il seroit trop long, ie veux pourtant bien aduertir le lecteur, que ce Seigneur est terriblement puissant, & que ia est-il pres d'enuahyr l'Allemagne, sur laquelle il a desia vsuré vne bonne partie en la Liuonie, comme nous verrôs cy apres quand ie parleray de la prinse de Torpat. Et ne faut point douter, que quand quelque occasion luy aura facilité les moyens d'attenter plus grandes choses, il ne le face, veu les discordes & altercations qui accablēt toute la pauvre Allemagne. Le pere de celuy qui regne maintenant en ces quartiers là, vsoit en ses lettres des tiltres que voicy, Le grād Seigneur Basile, par la grace de Dieu Roy & Prince de Russie, grand Duc de Volodimerie, Moscouie, Nouogardia, Plescouie, Smolluchie, Tuuerie, Iugarie, Permie, Viakie, Bulgarie &c. Grand seigneur & grand Duc de la terre de Nouogardia la basse, de Czernigouie, Rezanie, Volothie, Riscouie, Beloie, Rostonie, Iaroslauie, Biellozorie, Vdorie, Obdorie, Condiuie &c. & faut bien croire qu'ilz ont bien augmenté leurs tiltres, depuys qu'ilz ont occupé grande partie de la Liuonie. En la Russie y a plusieurs fleuves & mareltz. Les Anciens ont escrit que le tant renommé fleuve de Tanais yssoit des monts Riphées, mais on ne scauroit dire où sont ces montaignes. Et quād à la source du Tanais, ell'est en vn grand & desmesuré Lac dans vne forest, huit lieües d'Allemagne ou enuiron de la ville de Tulla, laquelle est loing de la ville de Moscha de trente six lieües d'Allemagne, & de ce mesme Lac sort vn autre grand fleuve, nommé Schar, qui a son cours vers l'Occident, & le Tanais premierement court vers l'Orient, mais soudain il se tourne vers le Midy, & faict les paluz de Mæotis, & l'appelle on aujourd'huy le Don.

*La source
du Fleuve
Tanaïs &
la beauté
d'iceluy.*

ON faict grand cas de ce fleuve Tanais, pourautant qu'il porte plusieurs bons poissons, & pource que sur son riuage croissent diuerses herbes, des racines tres-soëfues, & plusieurs arbres de toutes sortes, qui apportent vne bien grande delictation: & dauantage en cel lieu y a si grande abôdance de bestes, que ceux qui passent par là, n'ont affaire sinon que de feu

& de sel. Tout contre Moscouie est la Lituanie, laquelle à present est seigneurie par le Roy de Poloigne, & a s^{on} propre & particulier langage, vsant des ceremonies de l'Eglise Romaine, combien que les habitans soient la plus part Russiens. Vilna est la ville capitale de tout le pais, laquelle est situee entre quelques costaux, & en icelle y a plusieurs temples & monasteres, & signamment celuy des Cordeliers de l'Obseruance, lequel a esté basti à fort grandz fraiz & despens. En ceste prouince l'heresie de Nestorius & Arius a tout gasté pour le iourd'huy, & occupe plusieurs Eglises. Mesmes se trouuēt des heretiques qui sont si impies & detestables, qu'ilz osent appeller la sainte & sacrée Trinité, le Cerberus à trois testes. Que si on veut sçauoir soubz quel voile & manteau si grâdes meschâcetez sont proposées au peuple, c'est le pretexte de la parole de Dieu, lequel Luther, qui a esté la source de tous ces maux, a estably pour vraie reigle, & ne tendent tous ces desseings, sinon qu'à transformer la religion Chrestienne en la miserable & faulse superstitiō de Mahomet. Et n'y a point de doubte, que les Turcs & autres Barbares ne s'esjouissent grandement de telles perturbations & partialitez des Chrestiens, attendu qu'icelles leur faciliteront quelque iour le chemin, pour rediger & l'Allemagne & les nations qui l'auoyfinent, en vne cruelle seruitude. Aureste, iacoit que, comme nous auons dit, il y ait dans Vilna plusieurs Eglises, & que mesmes l'Euesque obeisse au Pontife de Rome, si est-ce qu'il y a plus d'Eglises des Russiens, que de ceux qui recognoissent l'Eglise Romaine, bien qu'en la principauté de Lituanie vous auez trois Eueschez obeissans au Pape, celui de Vilna, Samagithia, & Chiauia. Les Litüaniens enuoient és nations estranges du Miel, de la cire, de la Cédre, de la poix, & des aix pour faire Nauires, mais ilz vsent du sel qu'on leur apporte de dehors. Lituanie est vne region toute pleine de Forests, & abondante en fleuues & paluz. A cause que l'air y est vn peu trop froid, les bledz ne viennent gueres à maturité, & est ceste gent fort miserable & en extreme seruitude. Mesmes il y a quelque hommes doctes qui ont escrit, que depuys le temps de leur Prince

L'AN M.D.I.

HISTOIRE DE TOUTES CHOSES

*Cruauté
sur les Li-
tuaniens.*

*Des Bi-
sons &
Beuffles.*

*Tyrannie
des Luthe-
riens.*

Vuitolde, ilz ont ceste coustume, que celuy qui est condamné à mourir, est contrainct de se pendre luy mesme par le commandement de son maistre: ce que certes est fort horrible, & toutesfois s'il ne le faict, le pauvre homme est battu & tourmenté vilainement, & en fin le pend-on, & à cause de ce plusieurs sont contrainctz de se forfaire eux-mesmes. La Lituanie nourrit des Bisons, Vres, & Alces, qui sont tous beufz sauvages, toutesfois plusieurs se trompēt appellans les Vres (qui sont proprement Beuffles) Bisons, d'autant que les Bisons sont bien differens des autres, à cause qu'ilz ont du crain alentour du col & des espauls, & ont de la barbe cōme vn bouc: leur poil flaire. Ilz ont la teste bien petite, & les yeux grandz & farouches, le frond large, & si ont les cornes quelquesfois si esloignées l'une de l'autre, que trois gros hommes y pourroiet seoir à leur ayse. Sur le dos ilz ont vne bosse vn peu haute, & ont le derriere & le deuant vn peu plus bas. Quand aux Vres ilz ne se trouuent qu'en Mazzouie, qui est vne regiō voyfine de Lituanie, & ce sont beufz sauvages, qui ne different point des nostres, sinon que tous sont noirs, & ont vne petite ligne sur le dos à demy blanche. L'Alces est vn animal vn peu plus haut qu'un cerf, qui a les oreilles & les narines vn peu eminentes, & a les cornes quelque peu diuerses de celles d'un cerf, & la couleur tirāt plus sur le noir. Il court fort legeremēt, mais non pas comme les autres, ains comme feioit vne haquene. Mais c'est trop parlé des Moscouites ou Russiens, & de leur estat, il nous faut seulement prier la misericorde de nostre Dieu, que nous autres Alemans, & noz voyfins, qui detestons & abhorrons la puissance du Pontife de Rome, ne soyōs quelquefois subiuguez par eux, lesquelz par apres nous tyranniseront si fort, que nous vouldriōs plustost estre mortz, soit que ce fussent les Turcs, ou les Tartares, ou bien les Moscouites qui nous feissent tel cas. Certes Philippes Melanctho vn peu deuant sa mort, voyant qu'il estoit fort mal traicté de quelques vns non seulement partizans, mais encores trefaffectiōnez à la secte de Luther, a dit ces parolles d'iceux, ilz assemblent, dit-il, des Conciles, quand & où bon leur semble,

& l'attribuent & vsurpent plus grande, plus intolerable, & moins excusable puissance & autorité, q̄ ne fait iamais le Pape de Rome: & qu'on regarde bien à quoy viendra tout cecy, dit ce grand Achilles de l'Eglise de Luther, c'est-adire Melancthon.

L'AN 1502. courut vne tres-cruelle peste par toute l'Allemagne, & croit-on que ceux en moururēt, sur les robes desquelz estoient tombées des croix sanglantes, comme nous auons dict cy dessus: voire mesmes, qui est chose esmerueillable, es chemises, qui estoient enfermées dans les coffres ou baïs, les mesmes croix furent trouuées, voire aussi sur le corps des hommes: & cecy dura par trois ans.

*Croix sur
les chemi-
ses enfer-
mées.*

EN ceste annee sourdit par deux Rustiques, la premiere conspiration & rebellion à lencōtre de l'Euesque & Chanoines de la ville de Spire, contre la foy & serment à eux donné, comme à leurs Seigneurs. Si creut peu à peu le nombre de ces seditieux, estans amorcez & inuitez à ce faire par la cauteleuse persuasion des rustiques: & si par la prouidence de Dieu ce mal n'eust esté descouuert en brief, ceste racaille d'hommes n'eust peu estre domtée aysemēt. Car on subornoit quelques vns des plus fins & rusez de ceste ligue, lesquels s'en alloient parmy les villes & bourgades, pour enflāmer tous ceux qu'ilz pourroient, alencontre du Clergé, des Seigneurs, & des magistratz, & quand & quand les ioindre à leur coniuration. Et ia auoient esleu deux Capitaines, qui auroient toute puissance & commandement sur les autres, & ausquelz on obeiroit sans rien contester. Mais il aduint, que eux ayans assigné certain iour, auquel tous ceux de la ligue se deuoient assembler, furent prins les deux chefs & autheurs de la sedition, lesquels estans mis à la torture, confesserent tous leurs desseings: lesquels ne tendoient à autre fin, sinon que, apres auoir secoüé tout ioug, ilz iouiroyent d'une liberté entiere, & viuroiēt tout ainsi que bon leur sembleroit, & qu'avec cela ilz chasseroient le magistrat. Voire mesmes si quelcun vouloit empescher que leur entrepr̄se ne reüssist son effect, ilz le massacreroient comme ennemy & aduersaire de la Iustice diuine. Or auoient ilz

*Coniura-
tion des ru-
stiques alē
contre de
ceux de
Spire.*

deliberé de se ruër en premier lieu sur le Marquis de Baden, & puis sur l'Euesque de Spire, & consequemment sur le Clergé, finalement de se remettre en toute telle liberté qu'ilz desiroient. Lesquelz desseings, quoy qu'ilz fussent seditieux & dignes d'estre tresbien chastiez, si sembloient ilz pourtant à ces peruers & desesperéz hommes, estre iustes & legitimes: mesmes estans alterez de voir le succes de ceste leur entreprise, ilz vouloient que chacun d'eux dist pour ceste fin certaines prieres à Dieu, à fin que iceluy se monstraist protecteur & fauteur d'une telle meschanceté: & estoient les prieres cinq fois *Pater noster* & autant d'*Aue Maria*, qu'il conuenoit dire à genoux. Et n'estans contents de cela, ilz prindrent pour leur deuise la vierge Marie & S. Iehan l'Euangeliste, comme si les Sainctz fauorisoient à l'iniquité des hommes. Mais l'Empereur Maximilian les feit bien repêtir de leur follie, les faisant chastier publiquemēt, & quelques vns mettre à mort. C'est ainsi doncq' que les conseilz & desseings seditieux, (principalement alencontre du Magistrat, auquel Dieu nous commande d'obeir) ne viennent iamais à leur effect pretendu, & le plus souuent reüssissent mal à ceux qui en ont esté les auteurs, Dieu estant tousiours surueillant sur les choses humaines. Et iagoit que quelquefois par sa Iustice cachee il permet, que les hommes dressent des malheureuses embusches, si ne permet-il pourtant qu'ilz effectüent ce qu'ilz ont desseigné. Ces seditieux auoyent le mot du guet entre eux, à fin qu'ilz ne fussent surpris, & estoit tel que celuy qui estoit interrogé, en quel estat sont maintenant les affaires? deuoit respondre en son Aleman, nous ne sçaurions viure à cause du Clergé. Et en ceste maniere il sembloit qu'ilz ne s'attaquassent qu'au Clergé, mais sous ce pretexte ilz taschoient de se soustraire de l'obeissance de quelque Magistrat que ce fust. Telz laboureurs ne se contentoient pas de leur fortune, combien que le Poëte aye dict vray en cecy.

Virg. 2.
Georg.

Par trop heureux seroit le laboureur, s'il cognoissoit son bien & son bon-heur. Mesmes les anciens payens, quand ilz vouloient haut-louër quelque, ne sçauoyent quel plus beau tiltre luy dô-

ner, que de l'appeler vn bon laboureur: & Ciceron dit si clairement, il n'y a rien meilleur que l'agriculture, rien plus fructueux, plus soëf, & qui soit plus seant à vn homme honneste.

A v moys de Septembre de l'an present, Vualther de Plettemberg, grand maistre de Liuonie, esmeu & persuadé par Alexandre, Roy de Poloigne, & grād Duc de Litüanie, dressa la guerre alencontre du Moscouite, pourautant qu'Alexandre luy auoit promis, qu'il le viëdroit secourir en bonne compaignie. Cë voyans les Moscouites, vindrent au deuant de Plettemberg avec grandes forces, & d'autre part Alexandre ne veint point. Parquoy Plettemberg, connoissant qu'il ne pourroit tourner le dos sans grād peril & ignominie, enhorra les siens à bien faire, & faisant iouer l'artillerie, entra sur les ennemys pelle melle, de maniere qu'il les meit en route. Mais il ne pouuoit les poursuyure, pource qu'il auoit trop peu de gens, & si estoyent armez trop pesammët: dequoy les Moscouites s'estans apperceus, se r'assemblerent & mirent en bon ordre, & donnans sur l'infanterie de Plettemberg en tuerent plusieurs, mesmes quelques vns des plus vaillans & de nom. Alors entre les Liuoniens y eut vn quidam, nommé Luc Hammeister, lequel se meit du costé des Russiens, & fut cause par sa trahison, que quatre cens soldats furent vilainemët occis par les Moscouites, mais le reste se sauua aux gens de cheual. Que si Plettemberg eust eu plus de gens, les Moscouites mis vne fois en route, n'eussent iamais eu le moyen de se r'allier, & recommencer le choc. Or faut-il sçauoir, que la Liuonie ne fut conuertie à nostre Seigneur que l'an 1190. ou enuiron, par vn religieux nommé Meinard, qui fut en ce lieu là avec quelques Marchans de la ville de Lubec, & les freres Teutoniens, (autrement appelez de la vierge Marie) amplifierent beaucoup la Foy en ces quartiers, & l'ont defendue iusques à nostre temps: auquel cest ordre si excellent, ayant forligné de la voye des anciës, a esté en proye aux Moscouites, comme nous dirons en son lieu. Au temps passé lors qu'ils estoyent fort puissans, les plus nobles d'entr'eux s'appelloyët & se signoyent freres: mais aujourd'hui en Liuonie ils ont

*Desconfi-
ture des
Liuniens.*

ietté l'habit blanc de leur ordre. Car moyesme ay leu vn priuilege, que ceux de cest ordre en Liuonie donnoyent aux habitans de Lubec, pour auoir receu d'eux quelque plaisir & bien-faict: & estoit tel le commencement de ce priuilege, le frere Godefroy, Grand-maistre, les commendataires & freres de la maison des Cheualiers en Liuonie &c. lesquelles lettres estoient dattées de l'an 1299. Si deuons estimer, que ce peuple de Liuonie a esté le temps passé fort barbare, & despoüillé de toute humanité: pourautant qu'auourd'hui mesmes ils ont vne merueilleuse variété de lagage. Car autremét parlent les Liuoniés, autremét les Estons, & les Lettiens tout autremét que les Curoniens: lesquelz quatre langages sont en autant de cantons de Liuonie, comme ainsi soit que les villes & chasteaux soyent à la façon de Saxe. En Liuonie y a trois villes principales, Riga, Torpat, Reualia: & ceste-cy a son Euesque, dependât de l'Archeuesque de Lunde en Dannemarch, à cause que autresfois Vualdemar, second de ce nom, Roy de Dannemarch, bastit Reualia, & commanda que le peuple qui fut là trouué, fut baptizé: & enuoya là des prestres de sa prouince, pour enseigner le peuple & administrer les sacremens.

*Euesché
d'un Roy-
aume de-
pédât d'un
autre Roy
aume.*

A V S S I fut-ce en ce temps, que le Roy de France enuoya vne armée de Mer alencontre du Turc, de laquelle estoit Capitaine general Philippe de Rauastaing: lequelestant parueni iusques à l'isle de Lesbos, & ayant braqué l'artillerie au deuât de la ville de Merelin, les Turcs se defendirent si vaillamment, qu'il fut cōtrainct s'en retourner sans rien exploicter. Et la tempeste par-apres agita si bien toute sa flotte, que apres maintz dangers & merueilleux orages, à peine peut-il se sauuer dans Tarante. Bien est vray que les François attribuent la mauuaise issue de cecy aux Venitiens, lesquels enuiron ce temps, ayans tiré avec eux Consaluo, (qui fut surnommé le grand pour ses hautz faitz d'armes & grande proüesse) prindrent d'assaut l'Isle Cephalene, où il y eut la plus grand part des Turcs occis, & mesmes s'emparerent de la ville de S. Maure, en l'Isle de Neritos.

*Mal-heur
des François
alencontre
du Turc.*

Les Roys de France & d'Espagne enuiron ce temps, despouillerent Federic d'Aragon du Royaume de Naples, lequel il auoit tenu ia l'espace de cinq ans, & se le diuiserēt en tr'eux. Si se retira Federic avec sa femme vers Loys, Roy de France, duquel il fut receu fort courtoisement: non seulement lors que les François auoiēt part à Naples, mais encores lors que les Espagnolz les en chasserēt. Alors sans difficulté Consaluo reduict sous l'obeissance de Ferdinand, Roy d'Espagne, les Brutiens & l'Apouille, & assiegea Alphonse fils de Federic dans Tarente: & l'ayant prins, l'enuoya en Espagne. Or on ne scauroit dire ny escrire sans horreur cōbien de sang des Chrestiens a esté respandu pour l'appetit de ce Royaume de Naples. Maistandis que les Chrestiens guerroyent si cruellement ensemble, & tachent à s'aterrer l'un l'autre, les Turcs enuahissent les Royaumes & terres des Chrestiens. Et par ce moyen, presque de nostre memoire le Turc a occupé deux Empires des Chrestiens, celui de Constantinople, & celui de Trebisonde: lesquels sont maintenāt sous la captiuité de Mahometh. Et ne seruiroit de rien d'escrire, qu'est-ce qui peut aduenir à plusieurs Royaumes de l'Europe, par cest embrasement des esprits touchant le faict de la religion, lequel glisse tousiours de plus en plus: pource que quiconque n'est entierement desnué de iugement & raison, les peut voir assez clairement.

Le Royaume de Naples usurpé.

L'AN 1503. l'hiuer fut fort aspre & dura longuement, & par apres vint l'esté terriblement chaud & sec, de sorte que pour la trop grande secheresse presque tous les fructz de la terre furent perduz: & principalement le foin & l'auoine, & aussi le bled, & dauantage presque tous les pourceaux moururent.

En cest an, Philippe d'Austriche, filz de l'Empereur Maximilian, retourna d'Espagne en France: & comme il estoit à Lyon, la paix fut faicte entre l'Empereur, les François & les Espagnols, laquelle ne deuoit estre de longue durée, comme l'effect nous le fait scauoir. Aucuns escriuent que Philippe se trouua en ce tēps assez pres du peril en France, à cause qu'on

Philippe d'Austriche en France.

auoit mandé d'Alemaigne au Roy (qui vouloit tout sçauoir) qu'on faisoit amas de gens en Alemaigne pour aller secourir Ferdinand, touchant le Royaume de Naples. Mais Philippe protesta au Roy, que certainemēt il auoit eu charge de faire la paix: mais qu'au reste, si Ferdinand brasloit ce-pendant quelque cas soubs main, qu'il en estoit ignorant: & dit-on que le Roy Loys se contenta de ceste responce. Apres cela Philippes alla veoir sa sœur Marguerite, laquelle Philebert, Prince de Piedmond, auoit espoulée.

*Mort du
Pape A-
lexandre.*

A v mois d'Aoust de ceste année presente deceda le Pape Alexandre sixiesme de ce nom, par quelque poison qu'on luy donna à boire par mesgarde: lequel auoit esté préparé en vn banquet pour quelque autre. Il y eut aussi quelque grand Seigneur qui beut de la mesme poison, mais il fut preserué. Succeda dōcques à Alexādre le Pape Pie troisieme, Cardinal de Siene, & neveu de Pie second, mais il n'eust pas si tost demeuré en ceste dignité seize ou dix-sept iours, qu'il trespassa de ceste vie à l'autre: faisant toucher au doigt d'vn chacun, par sa mort si soudaine, la vanité & inconstāce des choses humaines, à fin q̄ personne ne s'applique par trop à icelles, veu qu'el les sont si fressles & caduques. Luy donques decedé, succeda en son lieu Iules secōd du nom. En l'an premier duquel, comme les François & Espaignolz eussent longuemēt trauaillé à

*Les Fran-
çois iettez
hors du
Royaume
de Naples.*

qui demeureroit le Royaume de Naples, en fin les Frāçois en furent totalement deboutez non sans grande perte de leurs gens. Ce que faisoit Consaluo, vn vaillāt Capitaine Espagnol qui estoit là au nō de Ferdinād son maistre. Lequel les Frāçois assiegerēt quelquefois à Barol, mais luy estāt secouru des fraiches troupes d'Alemās & Espagnols, il dōna la chasse aux Frāçois, demeurāt sur le chāp leur Capitaine le Seigneur de Nemours. Et de rechef les François, ayans mis sus vne nouuelle armee, & ayās entré par deux endroits dans le Royaume, conduis par le Sieur de la Trimouille, & le tres-illustre Frāçois Gonzague, Prince de Mātoüe: Cōsaluo les assailla dās leurcāp, & les meit en route. Dequoy estās les forces des Frāçois fort amoindries, furēt cōtraints de rēdre Gayete par cōpositiō, de

forte qu'estas mōtez sur mer retournerēt sans armes en Frāce. Et voila cōment la terre de Naples a souuent changé de maistres, & a ancanty les forces des Chrestiens: lesquelles si elles eussent aussi bien esté tournées alencontre du Turc, ou autre ennemy de la foy, à la verité par ces forces ainsi r'aliées on l'eust peu ou vaincre ou debilater. Mais pour chastier noz pechez ses fleaux s'augmentent de iour à autre, sans que personne s'esmeue en rien de la captiuité plus-que Babylonique en laquelle sont maintenant detenuës plusieurs nations iadis Chrestiennes: & serons tousiours endormys iusques à ce qu'il nous vienne resueiller. En mesme temps, sur les limites de France & d'Espaigne, les François eurent du pire en cerraine bataille contre les Espagnolz. Et en mesme an deceda de ce siecle, Iehā, de la maison des Marquis de Bade, Archeuesque de Treues, lequel auoit administré son Euesché fort longuement, assçauoir par l'espace de cinquante sept ans, & en vescu 79. Il eut pour successeur Iacques, de la mesme famille, qui fut homme si excellent en esprit, eloquence, prudence & erudition, qu'à peine en eust-on sçeu trouuer vn autre parangonnable à luy en toutes ces choses. Il a escrit deux liures des Antiquitez, lesquelles il rechercha merueilleusement, & demeura Euesque enuiron huiet ans.

Il y eut vn Picard, qui, durant ceste année, rauyt & osta par force la saincte hostie d'entre les mains d'un Prestre, cōme il disoit la Messe à la saincte Chapelle à Paris: & si la brisa, & iecta par terre, ce voyans plusieurs hommes d'autorité. Estant sur cela mis en prison, & admonnesté de requerir pardon de ce sien forfait, ne le voulut oncques faire, au moyen dequoy il fut bruslé. Or faut il sçauoir que les Picardz, ou Pighardz, entre autres erreurs ia condamnez, tiennent cestuy-cy: que Iesus-christ n'est pas personnellement & reallement en l'Eucharistie, mais seulement sacramentellement, & partāt qu'il ne le faut pas adorer en icelle: lequel erreur suyuent au iourd'huy les Zuingliens & Calvinistes, comme si c'estoit la vraye lumiere de l'Euangile. Mais il y a tant de choses escriptes par hommes tresdoctes alencontre de cest erreur abomi-

*Meschan-
celé d'un
Picard à
la saincte
Chapelle.*

nable, & deffors que Berenger choppa sur ceste matiere, & aussi de nostre temps: que ceux qui ne veulēt laisser ceste perverse opinion, faillent totalement à leur escient, & non point imprudemment, comme le temps passé. Ce que j'entendz des hommes doctes. Car quand au simple peuple, il est tant brouillé, voire enchanté, par les predications de ces faux-prophe-tes, que horsmais il ne sçait à qui croire. Car les Lutheriēs defendent à tout rompre la reale presence de Iesuf-christ en l'Eucharistie, en y meslant toutesfois des erreurs bien lourds: & d'autre part les Zuinglians soustiennent aussi opiniastrement, qu'il n'y est pas corporellement & reallement, n'y n'est ainsi reçu. Et ce pendant le peuple miserable est diuisé en mille sectes, & ne peut considerer, que soubz le pretexte de l'Euangile & parole de Dieu, il est mené en vn tref-certain & eternal danger de sa vie.

*Grandes
maladies.*

IL y eut ceste année apres vne peste incredible (laquelle en aucuns lieux emporta la troiziesme partie des hommes, & en d'autres la seconde) vne grāde multitude de maladies, desquelles moururēt plusieurs milliers d'hommes. Les hommes auoyent communément des Fieburnes pestiferes, des chaleurs internes, douleurs de teste intolerables, Catharres, vne incredible puanteur d'haleine, Finalement il semble que cest an n'a rien apporté que misere & calamité. Et telz fleaux admonnestent les meschans de se recognoistre, & exerce les bons à patience. Mais helas! plusieurs estiment que cela se face fortuitement, dont aduient qu'ilz demeurent tousiours en la boüe, & ne profitent rien pour cela.

*Georgius
Agricola*

A v moys de Iuillet alla de vie à trespas à Heidelberg, Iehā Dalburg, Euesque de Vuormes, en l'an douziesme de son Pō-tificat. Lequel a esté homme docte au possible aux langues Hebraïque, Grecque, & Latine: & tout le temps qu'il pouuoit desrober de ses occupations publiques, il l'employoit à estudier, de sorte que par son grand sçauoir, son renom voloit, nō en Germanie seulement, mais aussi en Frāce & Italie. Il auoit eu pour maistre, nommément és lettres Grecques, Georgius Agricola de Frisie, homme qui fut ensemblement & docte &

de fort bonne vie. Laquelle loüange, (d'estre docte & hōme de bien) est bien grande à cause de sa rarité. Car de nostre réps on a veu veritablement grand nombre d'hōmes doctes, mais qui fussent doctes & gens de bien & de pieté, pas beaucoup.

EN cest an fut faicte vne assemblée des princes Electeurs à Frâcfort, quoy que le motif de ceste assemblée ne fust guieres manifesté. Là se trouuerent les Ambassadeurs de l'Empereur Maximilian, & Raimond Cardinal de Gurc, Legat du S. siege Apostolic: lequel se rendit là de Coloigne auant, par le Rhin & la riuere de Mogan. Apres cela s'achemina iusques à Basle, passant par Vuormes & le país de Spire: & estât arriué à ladicte ville on luy fait rapport de certains miracles, qui n'estoient à mespriser, lesquelz se faisoient fort souuent aux reliques de troys saintes vierges, Kunegunde, Viberade, & Mer-
 tilde. Parquoy il enuoya au village où se faisoient ces mira-
 cles, (lequel est du diocese de Constance) vn nommé Jacques
 Merbolt, du diocese de Bamberg, afin qu'il s'enquist plus dili-
 gemment de la verité du faict. Et ne fut pas cest homme plus-
 tost arriué audit lieu, que trois miracles fort celebres furēt
 faictz deuant luy. Car il y eut vne femme borgne qui y fut
 guerrie: & vne paralytique, qui fut restituée à sa conualescen-
 ce: & pour le troisieme, il y eut vn muēt, qui recouura la pa-
 rolle. Ce qu'estant paruenue aux oreilles du Cardinal, quoy
 que ces vierges n'eussent esté encores mises au nombre des
 Sainctz, solennellement & à la maniere accoustumée, il com-
 manda neantmoins qu'on leur feist honneur, veu que les mi-
 racles tesmoignoient assez de leur sainteté. Le temps doncq'
 estoit encores meilleur pour lors qu'il n'est pas maintenant, à
 cause que noz nouueaux Euangeliques infectēt tout de leurs
 erreurs, combien que iusques icy ils n'ont sceu faire aucū mi-
 racle pour confirmer leur doctrine.

CE fut en cest an que George, Duc de Bauiere, mourut, instituāt son heritier Rupert, filz du Conte Palatin: qui ia deuant auoit espousé sa fille. Mais ce sçachant Albert, qui estoit plus prochain heritier, s'opposa au testamēt du Duc George, comme estant illegitimement faict & de nulle efficace. Et

L'AN M.D.III.

HISTOIRE DE TOUTES CHOSES

voyant qu'il ne faisoit rien pour cela, en appella à Maximiliã, la fille duquel il auoit prinse en mariage. Si se trauailla beaucoup Maximilian d'assoupir toute noyse & contention, & les reünir en concorde. Mais Rupert, qui estoit encores conduict par conseil d'autrui, refusa les cōditions à luy offertes par Maximilian, lesquelles n'estoient que bonnes: qui fut cause de la misere & mort trop soudaine de ceieune Prince Rupert.

EN L'AN 1504. Maximiliã, Empereur des Rōmains, voyant que par sa clemence & debonnaireté il ne pouuoit rien obtenir de Rupert, (qui estoit enflé par le cōseil de quelques vns) defendit & eauë & feu, tant à luy comme à tous ceux qui le suyuroient: & si manda à Philippe Conte Palatin, pere d'iceluy, qu'en sorte que ce fust il n'aydast à son filz qui estoit prosript. Alors Philippe balāçoit entre crainte & espoir: son sang l'espoinçonnant de secourir son filz, & le commandement de l'Empereur l'empeschant de rien attenter. Toutesfoys en fin le desir paternel fut le plus fort, & ne tenant conte du mandement de l'Empereur, secourut son filz de toutes les forces, desquelles il peut finer. Au moyen dequoy Maximiliã denonça la guerre à luy & à son filz, & permit à chacun de fouller & piller toutes leurs terres & appartenances. Si se trouuerent plusieurs grandz Seigneurs, qui prindrēt les armes au commandement de l'Empereur, (tant estoit-il bien obeiz encores en ce temps là) & assaillirent en diuers lieux le pere & le filz, & les endommagerent grandement, d'autant qu'ilz mettoient tout à feu & à sang. Pareillement l'Empereur Maximilian recouura sans coup ferir, plusieurs choses de l'Empire, hypothequées à ce Conté. Et ne faut pas penser que les bourgades, Monasteres, Eglises, & biens Ecclesiastiques n'eurent bié des affaires, àsçauoir de ce qui estoit és terres du Palatin. Mais de peur que l'ire & malalent de l'Empereur ne s'enflamast dauantage alencontre de Philippe, Christophle, Marquis de Bade, le pria si fort qu'il le fleschit, & pardonna à Philippe, qui estoit ia tant affligé qu'il n'en pouuoit plus: & commanda en oultre à tous gentilz-hommes, qu'ilz desistassent à luy porter aucun dommage. Car ce sage Empereur ne vouloit point rui

Guerre entre l'Empereur & le Conte Palatin.

ner ce Seigneur, lequel il voyoit bien estre de-ia assez humilié: & estima aussi, qu'il n'estoit pas expedient d'oster au Palatin son droit d'Electiō. Et n'est pas chose peu loüable à ces gentils-hommes, dequoy ilz obeyrent tout soudain au mandement de l'Empereur commandāt qu'ilz se retirassent. Que si ceste obeïssance eust tousiours demeurée en l'Empire, certes il ne falloit que les forces des Alemans à opprimer la Tyrannie du Turc, & le chasser bien loing des limites de l'Empire Romain. Mais nous voyons à l'œil, que avec ceste nouvelle forme d'Euangile, plusieurs choses ont esté changées en l'Empire, au grand dommage & decroissement d'iceluy. Or pendant que tout estoit embrasé de guerres en Bauierē, & au Cōté Palatin, le Prince Rupert, accablé d'une angoisse d'esprit, alla de vie à trespas en la fleur de son aage, ce qui abregea aussi les iours à sa femme.

EN cest an les Tartares, nommez Casaniens, se reuolterēt de l'obeïssance de Basile, Prince de Moscouie. Cazan est vn Royaume distant enuiron de septante lieuës d'Allemagne de la basse Nouogardia, auquel se trouuent des archers fort experimentez & adroictz. Et sont ces Tartares beaucoup plus acortz & ciuilez que les autres, pource qu'ilz labourent les terres, & habitent en des maisons, & exercent le faiēt de marchandise. Si auoit Basile subiugué ces Cazaniens, de maniere qu'ilz estoient cōtrainctz recevoir leur Roy de sa main: mais, comme i'ay dict, en ce temps icy ilz se remeirent en liberté. Apres laquelle reuolte s'ensuyuirēt plusieurs guerres, lesquelles ie descriray des à present fort briefuemēt, afin qu'il ne me faille point de foys à autre dire vn mot des choses estrange-
Guerres aduenues pour le royaume de Cazan en Tartarie.
 res, iusques à l'ēny. Basile, Seigneur de Moscouie, n'eut plustost esté aduerty de ceste rebellion des Cazaniens, qu'il enuoya contre eux vne grosse armée avec quelque artillerie: de sorte que les Cazaniens, voyans qu'ilz n'estoient pas esgaux en force, delibererent de les auoir par ruse. Parquoy ilz s'aprochent faisans semblāt de vouloir faire teste, mais ilz auoiet mis tous les plus vaillans en embusches, & quand à eux ilz fuyrent. Les Moscouites ne faillirent pas à les poursuyure,

sans garder aucun ordre: tellement que estans comme insensés, d'appetit qu'ilz auoyent d'emporter la proye & le butin, voicy les archers des Tartares: qui, sortàs de leurs embusches, vindrent à la file se ruer si brusquement sur eux, qu'ilz les forcerent non seulement de fuyr, mais biē encores de laisser leur artillerie. Or estant mort le Roy, au temps duquel les Cazaniens festoyent soubzleuez, quelque autre, nommé Scheale, espousa la femme du defunct: & estant aydé par le Prince de Moscouie & par son beau frere, recouura le Royaume de Cazan. Mais les Cazaniens ne l'aimoient nullement, tant pour plusieurs autres raisons, que pource qu'il sembloit trop favoriser au Prince de Moscouie. Parquoy ilz offrirent le Royaume à l'un des Roys de la Taurique, deuant la face duquel s'enfuyt Scheale en grand' erre vers la Moscouie, d'où il estoit venu, avec sa femme, ses concubines & ses plus pretieux biens: ce qui aduint l'ā 1521. Le Roy de la Taurique introduict qu'il eut son frere avec grande gendarmerie au Royaume de Cazan, passa le fleuve de Tanais pour aller droit en Moscouie. Dequoy estāt tout effrayé Basile, Roy de Moscouie, feit amas de gens tout soudain, pour aller couper chemin aux Tartares, mais ilz auoient iā passé le fleuve Volga, & festoient les Roys de la Taurique & de Cazan freres, aheurtēz alencontre du Moscouite. De sorte que voyāt Basile q̄ mal bastoit pour luy, laissa quelques gens notables avec quelque garnison au Chasteau de Moscouie, & gaigna au pied: & dit-on que la peur luy chaussa si bien les esperons, qu'il demeura caché tout vn long tēps soubz du foin. Les Tartares, penetrans fort auāt engendrerent merueilleuse crainte aux Moscouites: de maniere qu'ilz s'enfuyoient dans le grand Chasteau de Moscouie: d'où sans faute se fust engendrée vne peste, à cause d'un si grand nombre de peuple qui sy estoit retiré, si les ennemys eussent faiēt le moindre seiour du monde deuant ce Chasteau. Or se trouuerent dans iceluy quelques Alemans, qui s'entendoient fort bien à fondre des pieces d'artillerie: qui fut cause que les Moscouites se sauuerent par ce moyen. Car le Capitaine de la forteresse & ceux de la garnison, auoiēt iā resolu

*Basile
Prince de
Moscouie
chassé par
les Tartar-
es.*

*Les Alle-
mans fai-
seurs d'ar-
tillerie sau-
vent les
Moscoui-
tes.*

La cruauté des Tartares.

fois, l'autre année il enuoya encore vne plus puissante armée sous la charge de Michel George, l'un de ses principaux Conseillers, pour assieger le Roy de Cazan. Mais leurs affaires n'allèrent point bien, à cause de la disette des viures qu'ilz souffroient, les Tartares empeschans à toute force qu'ilz n'en eussent: tellement qu'ilz furent contrainctz de leuer le siege de deuant Cazan, & s'en retournerent avec leur courre honre en Moscouie, en condition que les Tartares impetroyent la paix de Basile par leurs Ambassadeurs. On dit que dás ceste armée des Moscouites y eut cent octante mille hommes, mais que celuy qui en estoit le conducteur fut corrompu par les Tartares, & que à ceste cause il desista de s'emparer du Chasteau de Cazá, comme il en eust les moyés assez faciles. Quelques hommes d'autorité recitent, que dás quelque Isle, (qui n'est pas beaucoup distante de ces Tartares Cazaniens) croist quelque semence qui ressemble assez à la semence des melons: si ce n'est qu'elle est vn peu plus grande & ronde. Et que de ceste graine cachée soubz terre naist certaine chose semblable à vn aigneau, hault de cinq paumes, & disent qu'il a la teste, les yeux, les oreilles & tout le reste semblable à la forme d'un petit aigneau, voire mesmes vne peau tres-deliée, de laquelle ceux du pais se font des coëffes. Au reste, que ceste plante, (si plante se doit appeller), n'a point de chair, mais bien du sang: & qu'au lieu de chair elle a certaine matiere fort semblable à la chair des cancre. Ses ongles ne sont point de corne, comme celles d'un aigneau, mais elles sont couuertes de poil, & la racine respond au nombril comme au milieu du ventre, & ne vit sinon tant que les herbes qui sont autour d'elle demeurent: lesquelles mangées, ceste racine se seche pour faute d'aliment. Pour le moins elle est si bonne & soefue, que les Loups & autres animaux de proye viennent pour la deuorer. Et certes cecy sembleroit estre chose cōtrouuée, si n'y auoit plusieurs hommes de nom & d'autorité, qui l'asseurent estre vraye: & à la verité, il n'y a rié difficile à Dieu, lequel nous deuons haut louer & magnifier en ses œures.

*Graine
fort admi-
rable.*

L'AN 1505. alla de vie à trespas Bertold, de la maison des

Contes de Hennenberg, Archeuesque de Maience, en l'an 21. de son Pontificat. On dit beaucoup de bien & d'honneur de cest Euesque, & recommande on fort sa prudence singuliere, sa subtilité d'esprit, son eloquence, sa pouruoyance es affaires d'importance, maturité de conseil, longue experience, & patience extreme au labeur: & dit-on encores, qu'il a deschargé l'Eglise de Maience de beaucoup de debtes qu'elle deuoit. S^{on} successeur fut le Doyen de la mesme Eglise, homme de fort singuliere vie: mais le pauvre homme estoit le plus souuent malade de la pierre. Or voyons nous que plusieurs estiment ceux-là miserables, lesquels sont assaillys de maladies diuerses, & sont comme le but où fortune descoche ses flesches: au contraire, ilz p^{re}sent ceux-là bien heureux, qui ont tousiours le vent en poupe. Mais l'escriture chante bien autrement, laquelle promet aux gens de bien presque tousiours aduersité, & aux meschans repos & prosperité. Et dict tres-bien S. Denys Arcopagite au liure de *diuinis nominibus*, chap. 8. On peut dire sans errer, que c'est le propre de la Iustice diuine, de n'alentir & n'abastardir point le courage d'un homme de bien, par largesse des biens terriens. Mesmes Dieu dict en l'Apocalypse, ie chastie & corrige ceux que j'ayme: & parlant au Psal. 80. des meschans, il dict, ie les ay laissez selon le desir de leur cueur, ilz s'en iront en leurs inuentions. Ce que j'ay voulu inserer pour abbatre le fol iugement de quelques vns, lesquels pensent estre amys de Dieu lors que toutes choses leur viennent à souhait, quoy qu'ilz viuent mal: & au contraire, que Dieu est fasché contre eux, encores qu'ilz viuent bien, sil leur aduient quelque aduersité.

A v^e commencement du moys de Iuillet, l'Empereur Maximilian feit vne Diete à Coloine sur le Rhin, à laquelle se trouuerent plusieurs Princes, Contes, & Seigneurs. Là fut faite la paix entre Messieurs, Albert de Bauiere, & Philippe Conte Palatin, & commanda l'Empereur que les conditions de la paix fussent inuiolablement gardées sous peine de lesemaiesté. Et ce pendant Maximilian receut nouuelles de la rebellion des Gueldroys. Parquoy ayant assemblé tous les Sei-

L'aduersité ne monte pas un homme meschant.

Duc de Gueldres rebelle.

gneurs & gentilz-hommes qui festoyent trouuez à Coloigne, alla par eau en Geldres, pour secourir les Brabantins, qui auoient mis le siege deuant Arnheim ville de Gueldres. Le Duc, entendu qu'il eut que l'Empereur venoit en bon appareil d'armes, recogneut sa faute, & rendit la ville sous certaines conditions: laquelle l'Empereur receut sans en rien offenser les citoyens, mesmes il deposa tout le maltalent qu'il auoit conçu alencontre du Duc, au moyen de quelque pacte qui fut fait. Delà il s'en vint à Coloigne en fort belle compagnie de grâdz Seigneurs & gentilz-hommes, où il fut reçu des citoyens fort ioyeusement.

ON voit ceste année vne comete terrible es terres du Côte Palatin, située entre l'Occident & le Septentrion, laquelle effraya plusieurs personnes par son aspect fort horrible.

L'AN 1506. ceux de Mulhusen se reuolterent de l'obeissance de la maison d'Austriche, pour se joindre aux Suisses, & signerent l'alliance & ligue que pour lors ilz feirent avec eux. Et en mesme temps les Hongres se rebellerent aussi: Ce qu'entendant l'Empereur Maximilian fit grande leuée de gens d'armes, en espoir d'assaillyr la ville de Presburg. Mais les Hongres, sachans que l'Empereur s'approchoit avec si grandes forces & volonté d'exploicter quelque cas, demanderent la paix: laquelle ilz impetrerent par le moyen de quelques Prelatz & Seigneurs, & ce avec certaines conditions. Or apres le decès de Mathias Humiades, Roy de Hongrie, Maximilian eut desir d'espouser la veufue du defunct, nommée Beatrix, fille de Ferdinand, Roy de Sicile: mais par-ce qu'il ne se hastoit pas assez, Vladislaus filz de Casimir, Roy de Poloigne, (qui alors auoit le Royaume de Boëme) luy couppa l'herbe sous le pied, tellement que sans contredict il fut appelé Roy de Hongrie. Mais il fit accord avec Maximilian, que s'il aduenoit qu'il decedast sans hoirs legitimes, le Royaume de Hongrie & de Boëme reuiendroient à luy & à ses successeurs. Si succeda à Vladislaus son filz Ludouic, la seur duquel, nommée Anne, a esté mariée avec bon & Catholique Prince Ferdinand, lequel n'a pas seulement esté Roy d'Hongrie, mais

*Vladislaus
us Roy de
Hongrie.*

aussi des Romains, & finalement Empereur. Or fut en cest an grande peste des pourceaux par toute la Suebe & autour du Rhin, de sorte qu'en plusieurs endroiçtz on n'osoit ne vendre n'acheter telles bestes.

EN cest an Loys, Roy de France, ayant obtenu le Duché de Milan par l'Empereur Maximiliã, comme beneficiaire de l'Empire, rompit la paix & alliance faicte avecques luy. Qui fut cause que nous ne demeurâmes, guerres en repos & tranquillité, pour les nouvelles causes des guerres qui suruenoiët de iour en iour.

IOACHIM, electeur de Brandeburg, homme non moins doiüé des excellēces de l'esprit que du corps, institua ceste année l'vniuersité de Fräcfort sur Odera, ce approuuant le Pape Iule second, & luy conferant certains priuileges. L'affiette de ceste ville est fort recreatifue, à cause qu'elle est lauée du fleuve Viagre, lequel aucuns appellent Odera: & y a plusieurs costaux de vignes, qui apportent merueilleuse delectation aux ^{Vniuersité de Fräcfort.} regardans, & en oultre on y vit à bon marché, & si les chambres ne sont guieres cheres, ce que regardent principallemēt les estudians. Vray est qu'ilz suyuent la doctrine de Luther, laquelle le Seigneur Ioachin a detestée tāt qu'il a vescu: & ne voulut iamais permettre qu'elle fust semée en ses terres ou seigneuries. Aussi fut ce Prince bien docte en langue Latine, & grand patron & fauteur des lettres & hommes lettrez.

AV mois d'April de la mesme année y eut à Lisbonne en Portugal vne grande sedition du peuple, alencontre des Iuifz fraischement baptizez, par-ce qu'ilz festoient faitz baptizer seulement par feintise & dissimulation: & ce nonobstant, ilz celebroyent la Pasque à la maniere Iudaïque. Ce que le peuple Chrestien ne peut oncques souffrir ny endurer, & partant ^{Trouble fort grand en Lisbonne pour l'amour des Iuifz.} il s'en vint complaindre au Roy: lequel commāda que six fusent prins d'entre eux, lesquelz nonobstant furent sauuez par apres. Ce voyant le peuple, murmura grandement contre le Roy & le Gouverneur, disant qu'ō leur auoit gressé les mains de quelque somme d'argent: & de faict, hommes & femmes vnanimement se banderent contre les Iuifz faulx-chrestiens. Et

auoiēt trois Religieux qui ne cessoiēt de les encourager, criās parmy la ville, misericorde, misericorde: quiconque aime la foy & la croix de Iesuf-christ, si nous suyue: à mort tous les Iuifz sacrileges, qui ont profané le sainct baptisme. Au moyen dequoy plusieurs hommes s'assemblerent en armes, & accoururent & femmes & enfans, comme il aduiant en telz tumultes: & courans tout à trauers la ville, tuerent de ces Iuifz nouvellement baptizez iusques au nombre de six cens, mesmes les bruslerent en la place S. Dominique. Finalement ceste esmeute sembla si biē, qu'en peu de iours en Lysbone & aux prochains bourgs furēt massacrez mille neuf cēs trente Iuifz. Durāt lequel tēps le Roy de Portugal seiournoit en vn lieu distant de Lisbone de quelques lieues, & n'eut pas si tost entēdu cest accidēt, qu'il en fut fasché extrememēt: & cōmanda q̄ les auteurs de ceste persecutiō des Iuifz fussent prins. Si en furēt prins enuiron deux cens, & menez en prison, desquelz les vns furent bruslez, les autres decapitez, & aussi quelques vns pēdus: mesmes plusieurs, (desquelz le bien fut confisqué) furent contrainctz d'abandonner le païs. Or le zeile, qui les esguillōnoit alencontre de la desloyauté des Iuifz, estoit veritablemēt fort loüable: Mais aussi ne doyuent-ils pas estre loüez en leur temerité, par laquelle sans autorité publique ilz les punirēt. L'ancienne loy au Leuitique commande, qu'en tout sacrifice on offre du sel: ce que signifie, que tout ce que nous faisons de bon, nous le deuons faire selon raison, prudemment & modérément, & non temerairement & à la volée. Car autrement, sans ceste moderation & sage discretion, les vertus se tourneroient en vices: ce qu'on a voulu declarer par le prouerbe, la rigueur du droit est vne extreme tort.

A v moys d'Aoust apparut quelques iours vne Comette entre le Septentrion & l'Orient, sous la petite Ourse: & occupoit deux signes, celui du Lyon & de la Vierge, & a semblé predire la mort de tres-illustre Prince Philippe, Roy d'Espaigne, & Archiduc d'Austriche. (Car apres le deces d'Elizabeth, Royne de Castille, femme de Ferdinand, Roy d'Espagne, laquelle mourut sans hoirs males, la successiō du Royaume de

Leuitic. 2. d.

Castille tomba à Iehanne sa fille aînée, laquelle estoit femme de Philippe.) Luy estant donc escheu ce Royaume, partit de Flandres pour s'en venir en Espagne par Mer, estant accompagné de plusieurs illustres & nobles Seigneurs. Mais estans sur Mer, se leua tout soudain telle tempeste & orage, que la flotte estant agitée quelque peu de temps, en fin fut dissipée ça & la, & les nauires iettez sur la coste d'Angleterre, l'un ça l'autre là. La nauire Capitainesse avec deux autres fut portée au port de Vuimmuth, ou le Roy Philippe, las & de corps & d'esprit, pour n'estre accoustumé à la marine, se ietta dans vn esquif & print terre. Le bruiet estant leué, que quelques nefz estrangeres estoient abordées, les habitans de là aupres accoururent incontinent celle part: & mesmement les gentils-hommes, deliberez de les repousser, si c'estoyent ennemis. Mais cognu qu'ils eurent que c'estoyent amis, Thomas Trencherd, Cheualier, s'en alla trouuer le Roy, & le pria bien fort qu'il luy pleust se retirer à son logis là pres. Et aussi suruint vn autre Cheualier, nommé Iehan Caroë, accompagné de quelques soldatz, lequel quād & le Seigneur Thomas supplia Philippes, qu'il ne s'en allast point sans saluer le Roy d'Angleterre, veu que dans deux ou trois iours il arriueroit en ce lieu. Ce que Philippe premierement refusa, alleguant la briefueté du temps, mais par apres il consentit. Parquoy le Roy Henry septiesme ayant sceu les nouuelles de la venue du Roy Philippe, fut grandemēt esioüi à cause de l'ancienne alliance, & enuoya plusieurs grans Seigneurs au deuant de luy pour le conuoyer iusques à luy. Mais le Roy Philippe ne faisoit plus de difficulté, & s'en alla trouuer le Roy au chasteau de Vuindesfor, où arriua peu apres la Royne Iehāne sa femme. Et apres auoir entremis quelques propos d'amitié, le Roy conduict Philippe iusques à sa ville capitale de Londres. Finalement apres que l'alliance d'entr'eux fut renouuellée, le Roy Philippe hauça les voilles pour aller en Espagne, d'autant que la flotte cy deuant esperduë s'estoit trouuée en Angleterre. Or venu que fut le Roy en Espagne, il fut receu d'une telle gaieté & faueur de toute la Noblesse que apertement ils lais-

*Philippe
Roy d'Espa
gne poussé
par tem-
peste en
Angle-
terre.*

*Mort du
pere de
l'Empe-
reur Char-
les.*

foyé Ferdinand son beau-pere, pour suivre ce nouveau Roy, aagé de 28. ans & florissant en toutes choses, plustost que le vieillard qui cōmençoit de-ia à rechigner. Ferdinand dōques apperceuant vne si grande legiereté es siens, print la route de Naples. Mais le Roy Philippe peu apres estant surprins d'une fiebure, à cause de la nouveauté de l'air, deceda au chasteau de la ville de Burges, au grand regret de tous les siens. Il laissa de Iehanne sa femme six heritiers: deux masles, Charles & Ferdinand: & quatre femelles, Eleonor, Isabel, Marie & Catherine. Au reste il fut de bonne stature, d'un visage plaisant, ayant le corps assez gros, & l'esprit gentil avec un fort grand courage. Icy pareillement on voit l'exemple de la fragilité & misere de l'homme, veu que un tel Prince en la splendeur & de sa vie & de ses estatz, en telle force & aage, fut osté de ce monde tant soudainement. En quoy les autres apprenent facilement, qu'il n'y a rien de ferme & stable soubz le ciel, & qu'à bon droit nous deuons mespriser tout ce que le monde nous peut offrir. Doncques enfans des hommes, (dit le Psalmiste,) iusques à quand ferez-vous de cuer pesant? à quoy faire aimez-vous la vanité, & cherchez le mensonge?

*Boloigne
occupée par
le Pape.*

*De la vil-
le de Bo-
loigne la
grasse.*

En ce mesme an le Pape Iules, estant aidé par les forces des François ietta hors de Boloigne la grasse le Seigneur Iehan Bentiuole, homme trespuissant. Et ia auoyent les François approché leur camp des portes, quand Bentiuole, aagé de septante ans, ne se fiant point au Pape, se rendit aux François: & en fin fina ses iours à Milan. Sa maison tant superbe & magnifique, bastie au milieu de la cité, fut renuersée de fond en comble par le peuple, desireux d'abbatre toute memoire de ceste abominable dominatiō. Ceste ville de Boloigne est vne des plus insignes, amples, & peuplées de l'Italie, laquelle autresfois fut de l'Exarchat: mais le Roy Pepin & Charlemagne la donnerent au Pape, à cause de quoy ell'est encores de present à eux. Elle a planté & foison de toutes choses, tant necessaires que commodés pour passer la vie, & dauantage elle est fort humaine & courtoise enuers les estrangers. En icelle la maison

maison des Bentiuoles estoit la premiere, & laquelle s'vsurpoit facilement la puissance souueraine, mais aujourdhuy, cōme nous auons dict, elle est subiecte aux Papes. Elle a quād & quand l'vniuersité fort renommée, de maniere qu'à bon droit on la peut nommer la mere des estudes.

L'AN 1507. ceux de Genes, aians chassé la Noblesse, remeirent sus l'estat populaire, esleuant par le suffrage de tout le peuple vn nommé Paulo Nonio en ce grand honneur, quoy qu'il fust du simple peuple. Mais Loys, Roy de France, les subiugua, & les contraignit d'estre obeissant aux François, & ayant fait ramener ce Paul Nonio de sa fuite, il le feit decapiter. Ceste ville a souuent changé de Seigneurs, laquelle est la plus belle & riche de toute la Ligurie, & autresfois bien puissante sur la Mer: de façon qu'elle a estendu son empire iusques à Pére bien pres de Constantinople: & a eu commandement sur plusieurs Isles. Elle est merueilleusemēt bien bastie, & a grandes richesses, & entre autres choses vn port fort commode.

IL feseut aussi vne fort grosse guerre entre l'Empereur Maximilian & les Venitiens, du costé des Alpes de Carniola, & sur le passage de Trente: & en premier lieu le Capitaine de l'armée des Venitiens nommé Liuian, desconfit plusieurs Alemans, & força quelques villes seigneurisées par eux, desquelles les Venitiens s'emparerēt delà en auant. Voiant doncq' Maximilian que ses affaires alloient mal en cest endroit, feit alliance à Cambray avec le Pape & le Roy de France, alencōtre des Venitiens: & ce si secrettement, que par apres, comme ceste aliance s'esclarcissoit peu à peu entre les hommes, les Venitiens mesmes ne se pouuoient persuader qu'elle fust faite. Maximilian auoit fait aussi auparauant ceste confederation vne Diète à Cōstance, où il se plainct beaucoup des Venitiens, de quoy ils auoient conspiré avec le François alencontre de ses estatiz. Parquoy deslors se resolut de mener ceste guerre, laquelle dura iusques en l'an 1517. au tres-grand dommage des Venitiens. Lesquels estans enflés d'ambition auoyent estendu leurs terres & seigneuries, plus qu'il n'appar-

L'AN M.D.VII. HISTOIRE DE TOUTES CHOSES

tenoit, en vsurpant quelques villes, dont ils auoyent encouru la haine de plusieurs. Si marcha le Roy de France avec son armée en Italie, & comme le Capitaine des Venitiens se fust

Le Roy de France vainqueur des Venitiens. présenté pour chocquer, commença la meslée en laquelle le Roy fut vainqueur, & mourut grand nombre des Venitiens, mesme le Capitaine y fut prins. Apres laquelle victoire ob-

tenuë, le Roy receut en fort peu de iours & sans aucune peine, les villes de Bergome, Cremone, Creme, & Brexe. l'Empereur d'autre costé eut Verone, Vicence, & Padouë: Et le Pape recouura Rimino, Fauence, Ceruie, & Rauenne. Quand & quād aussi le Senat de Venise restitua au Roy d'Espaigne les villes de l'Apouille: Sipōto, Trani, Monopoli, Brindes & O-

Le Turc offre secours aux Venitiens. tronto. Et faut sçauoir qu'en ceste aduerlité, & presque entiere ruine de la Republique de Venise, le grand Turc negarda pas seulement sa foy enuers eux, mais bien encores leur presenta-il fort grand secours. Mais quand à eux, il remercièrent le Turc de ce qu'il n'auoit aucunement rompu sa foy: & ne voulurent pourtant vser des moyens qu'il leur offroit, detestans, à mon iugement, la haine implacable que ce Roy barbare porte tousiours encōtre les Chrestiens, en quoy les Venitiens sont fort recommandables.

Gresle horrible. C E S T E année tōba vne gresle, qui apporta merueilleux dommage aux vignes & aux fruietz, principalement es terres circonuoisines de Vuittemberg. A Rotemburg, sur le fleue Neccar, cest orage de gresle fut si violent, qu'il rompit & les fenestres & le toict des maisons. Pareillemēt sur

Vent merueilleux. la fin du mois de Iuin vne nuit assez obscure, l'esleua vn tourbillon de vent si impetueux & terrible, qu'il arrachoit les arbres & les pouffoit loing de leur place, abbattoit la couverture des maisons, & faisoit trembler icelles de fond en comble. En ce mesme an Charles, Duc de Gueldres, rom-

Duc de Gueldres pillleur. pant l'alliâce qu'il auoit avec l'Empereur Maximilian, & faiseurāt sur le secours & gages des Frāçois, affligea grandemēt ceux de Brabant, & en amena grand proye & butin. L'an ensuyuant il en voulut encores faire autant, mais il trouua à qui parler, car comme ils s'en retournoyent chargez de

pillage, ilz furent attraintz & bien mal accoustrez par ceux de Namur.

L'AN 1508. l'esté fut fort pluuiex, de maniere qu'en plusieurs endroitz les bœufz & pourceaux mouroyent de certaine peste entre cuyr & chair. Et sur la fin du moys de Fevrier finit ses iours Philippe, Conte Palatin, apres longue & griesue maladie de gouttes & de la pierre, lesquelles maladies sont nombrées par les medecins entre les aiguës, par-ce qu'el les affligent & tourmentent les hommes au possible: de sorte que ceux, qui en sont saizys oultre mesure, sont quelquefois hors de leur bon sens. Ce Prince laissa sept filz & trois filles, la plus ieune desquelles print l'habit & religion S. Benoist, & vescu fort sainctement, & beaucoup plus heureusement, (ayant mis le monde sous ses piedz) que ses seurs mariées à hautz & puissans Seigneurs. Peu apres alla aussi de vie à trespas Albert Duc de Bauiere, ayant laissé trois enfans, & quatre filles. Or auoit-il eu à femme la seur de Maximilian l'Empereur, laquelle apres le decès de son espoux, quitta & abandonna tous ses biens, afin de se pouuoir plus librement rendre entre les mains de Iesuf-christ, espoux immortel. Et de faict elle print l'habit & profession de Religieuse à Monac, qui est vne des plus belles villes de Bauiere, donnant vn bel exemple de son amour enuers Dieu & d'vne constance fort grāde: par-ce qu'il est assez rare entre ces Princesses, que, le mode & les vanitez d'iceluy estans foulées au pied, elles ne desirent que de vacquer à Dieu. Mais aussi est-il de tant plus loüable, qu'il est rare: à cause que, comme dit Aristote en ses Ethiques, toutes choses excellentes & loüables sont fort rares. Le semblable fait autresfois Constance, fille de Constantin le grand, lors que priant au sepulchre de Sainte Agnes, elle fut miraculeusement guerrie de sa lepre, ainsi que tesmoigne S. Ambroise: & fut suyvie en cela de maintes vierges de haut lignage. Cela pareillement a esté faict par plusieurs filles de Roys & Princes, & par Dames fort insignes, chantans d'vn cueur addonné entierement à leur Dieu: j'ay mesprisé le Royaume du monde, & la beauté de ce siecle, pour l'amour de mon Seigneur

La Duchesse de Bauiere se met en religion: & la louange de ce faict

Iesus. Combien que les mondains & esclaves de ce siecle ont ceste profession de vie en grand horreur & mespris, desquelz l'Apostre parle quand il dict aux Corinthiens, L'homme animal & grossier ne cognoist point ce qui est de l'esprit de Dieu.

*Intemperie
de l'air.*

IL y eut grandz mouuemēs de terre en Alemaigne & Italie en ce mesme an: mesmes l'intemperie du temps fut si grande, qu'à grand' peine les arbres & arbrisseaux peurent fleurir, iusques à ce que par la benignité de Dieu ia inespérée, l'air doux & commode recompēsa ceste tardifueté. Or pour destourner ces miseres & perilz du printemps, on ordonna anciennement, (ce que font encores à present les Catholiques) certaines Litanies & supplications publiques à Dieu & à ses Sainctz, desquelles les Heretiques se moquent pour le iourd'huy, & plusieurs Catholiques n'en font pas tel compte qu'il appartient: dont vient, que Dieu nous ayme tant, que presque tousiours nous auons disette des choses necessaires, à passer le cours de ceste vie mortelle.

*Les biens
de l'Eglise
doyent
estre don-
nez aux
pauvres.*

A v moys de Septembre de l'année presente mourut l'Archeuesque de Maience, auquel succeda le Doyen de la grāde Eglise de la mesme ville. Bien peu apres aussi trespassa Herman, Lantgraue de Hesse, & Archeuesque de Coloigne, ayāt gouuerné ceste Eglise bien 28. ans. Ce Prince, entre autres rares vertus desquelles Dieu l'auoit doué, estoit fort bening & misericordieux enuers les pauvres, tellement qu'il n'en recontroit oncques pas vn, à qui il ne donnast quelque chose. Laquelle vertu conuient grandement aux Princes, & mesme ment à ceux qui sont Ecclesiastiques: lesquelz ne doyēt pas vser des biens de l'Eglise, (desquelz ilz sont seulement dispensateurs) en bobance & superfluité, mais en toute benignité & clemēce, comme le temps passé plusieurs sainctz Prelatz faisoient, mesmes encores quelques vns de nostre memoire. Au reste, à cest Euesque succeda Philippe, Conte d'Oberstein, lequel par sa prudence & dexterité a fait grand profit à l'Eglise de Coloigne.

*Rauine
d'eaux
fort estrā-
ge.*

SUR le commencement du moys d'Aoust de l'an present tumba vne merueilleuse rauine d'eaux à Stutgard, laquelle

emportoit murailles, maisons, & greniers, depuys le pied iufques à la cyme: noyoit auffi les hommes & bestes, & mesmes feit grand dommage aux vignes, à cause qu'elle les descouuroit, & emportoit la terre du pied d'icelles. Ceste ville de Stutgard est située en la seigneurie de Vuittemberg, guieres loing de la riuere de Neccar, où les Ducs de Vuittemberg ont vn fort beau & Royal chasteau. La plaine d'autour de ceste ville est garnie de vignes si fertiles, qu'à peine pourroit-on croire la grâde & prodigieuse abondâce de vins qui y croist.

L'AN 1509. y eut grand trouble & murmure à Erphord, à cause des empruns non accoustumez, & exactions: lesquelles le peuple disoit estre intollerables, veu mesmement qu'on les impoisoit chacun an. Et alla la chose si auant, que le peuple ^{Tumulte aduenu à Erphord à cause que le peuple estoit par trop foulé} priua tous les Senateurs de leurs estatz, & en remeit d'autres: lesquelz ayans biē reueu & fueilleté tous les papiers de comptes & tous registres, trouuerent que la ville estoit endebtée & obligée de bien six cens mille escuz: au moyen dequoy il falloit qu'ilz payassent par chacun an trente mille escuz d'interest ou reuenue. Et au reste, on apperceut, que la somme qu'ilz contribuoiēt toutes les années, excendoit la somme de l'interest de quelques mille escuz. Dont aduindrent grandz troubles & esmeutes, de sorte que le peuple estoit prest à emprisonner tous ceux, lesquelz il auoyt deboutez du Senat, s'ilz n'eussent gaigné vistemēt au pied. Et mesmes à cause de ce tumulte, il y eut quelque noise entre l'Archeuesque de Mayence & Frideric de Saxe, & fussent venuz aux armes, si Laurent Biberan, Euesque d'Vircibourg, ne se fust interposé, hōme certes de dextérité & accortise grande: lequel moyenna si bien cest accord, qu'il leur persuada d'attendre la resolutiō de l'Empereur. Et tandis ceux d'Erphord se proposerent de créer tous les ans nouueaux Senateurs, lesquelz leur rēdroiēt compte de toutes receptes & mises.

CESTE année alla de vie à trespas Henry, septiesme de ce nom, Roy d'Angleterre, le 20. iour d'April, en son logis de Richemond, où il auoit faict bastyr vn conuent des Cordeliers de l'Obseruâce. Il vescu 52. ans, & en regna vingt-trois.

Il eut de sa femme Elizabeth huit enfans, quatre masles & autant de femelles: mais il n'en y eut que trois qui luy suruecurent, Henry, Prince de Vualle, qui luy succeda au Royaume: Marguerite, & Marie. Il eut le corps fort mince & aligre, mais pourtant bien puissant & robuste: la stature vn peu haute, beauté en perfection, l'esprit subtil & aigu, le courage haut & constant en toute aduersité. Il se monstroit à tous humain & affable, & quand & quand il abhorroit tant la superbe & arrogance des hommes, qu'il se monstroit fâché & indigné alencontre de ceux, qu'il cognoissoit estre tachez de ce vice. Il laissa son Royaume augmenté de grandz biens, pourquoy faire il vsoit d'une assez bonne industrie, prestant quelquefois bonne sommes de deniers aux marchandz, afin que par ce moyen le trafic fust plus grâd en son Isle: & de fait il aduint, que grande abondance d'or & d'argēt estoit apportée en son Royaume, par les marchandz qui là venoient traffiquer. Il estoit grand obseruateur de la religion Chrestienne, & volontiers assistoit au seruice diuin: & falloit bien dire qu'il estoit grandement pressé des affaires & du temps, quand on ne l'y voyoit point. Chacun iour il oyot deuotieusement deux ou trois Messes, & bien souuent le sermon: & auoit tousiours son aumosnier qui distribuoit ses dons aux pauvres & indigens. Il portoit grand honneur aux gens d'Eglise, lesquelz il reueroit, aydoit, & augmentoit leur biens. Il prioit bien fort, & mesmes les iours de feste il disoit ses heures, que nous appellons Canoniales. Et ne se contentant de ses particulieres prieres, encores donnoit-il de ses biens aux bons & religieux Prestres, pour prier Dieu pour luy: & voulut aussi, qu'apres sa mort on priaist pour son ame par tout son Royaume en certaines Eglises. Il feit son testament, le premier article duquel estoit, qu'il vouloit que tout ce qui auroit esté porté en son Fisc iniustement, fust entierement restitué: & commanda que l'hostel Dieu, qu'il auoit commencé à bastir es fauxbourgs de Londres, fust paracheué. Certainemēt sous telz Princes les Royaumes florissent, & n'y a point de doubte que toutes choses ne succedent mieux lors que nous auons des Roys deuotieux

*Meurs
d'Henry
7. Roy
d'Angle
terre.*

& religieux: à cause que le bon Dieu les conserue & amplifie
dauantage. Or en ceste saison, pendant que l'Italie estoit tou-
te embrasée de guerres, les bonnes lettres s'en vindrent cam-
per & dilater en France, Allemagne, Angleterre & Escocce:
de sorte que les nations, lesquelles les Italiens estimoyent cy
deuant Barbares, non seulement les esgallent en hommes de
grand sçauoir & doctrine, mais encores les surpassent en plu-
sieurs. Les auteurs anciens, cōme ont esté Iule Cesar, Corne-
lius Tacitus, Seneque, Tite Liue & autres, ont si nonchalam-
ment escrit de la Germanie ou Allemaigne, que vous diriez
proprement, qu'ilz n'en faisoient aucun compte. Voicy ce
qu'en dit Cornelius Tacitus: la Germanie des le commence-
ment a esté horrible à cause des forestz, ou infertile au moyē
des paluz qui y sont, hideuse quād à l'air, à la veoir, & à l'habi-
ter: fort humide du costé des Gaules, veteuse du costé de Ba-
uiere & Hongrie, & ne peut porter d'arbres fruiçtiers: & si el-
le porte des animaux, encores sont ilz bien petitz: car les be-
stes mesmes n'y sont pas si belles & aduenantes, qu'ailleurs.
Ilz ne s'esioüissent qu'à en auoir vn grand nombre, & ne font
cas que de telles richesses: & au reste, (ie ne sçay si c'est par
bon-heur, ou par mal-heur) les Dieux ne leur ont donné ny
or ny argent, combien que ie n'oseroie affermer, qu'il n'y ayt
des mines d'or & d'argent en Germanie: car qui s'est iamais
peiné à en trouuer? Voicy pareillement ce qu'en dit Seneque
au liure *de gubernatione mundi*: les Germains, dit-il, n'ont point
de certaines demeures, l'hyuer y est tousiours, la terre est in-
fertile, il n'y a point de maisons, ilz ne viuent que de ce qu'ilz
prennent à la chasse: & en quelque lieu que la nuyt les puis-
se surprendre, ilz se couchent sous des arbres ou en quel-
ques cauernes. Ilz n'ont point de maisons, mais de petites ca-
ses couuertes de fueilles ou de chaume. Les habitans courent
sur la mer gelée comme font les danseurs, viuans de chair de
bestes sauuages: & au reste, ilz sont tous nudz, ou bien vestuz
de peaux d'animaux, & à cause de ce chacun la tient en mes-
pris. Voila doncq' l'opinion de ces anciens auteurs touchant
l'Allemaigne: laquelle si vous parangonnez à l'estat, auquel à
present elle est, sans doubte vous cognoistrez qu'ilz se sont

*Dictz des
anciens tou-
chant l'Al-
lemaigne.*

*Les lettres
honorées
deça les
montz.*

*Des hom-
mes doctes
qui abusent
de leur sa-
voir.*

vilainement trompez. Et le semblable est aduenü touchant la
cognoissance des lettres, lesquelles ont si bien commencé à
prendre pied en toutes les nations de deça les montz, que les
Italiens auront perdu toute honte, filz osent oncques les ap-
peller Barbares. Car en ce temps les grâds Princes, voire mes-
mes les Dames illustres, ont grandement promu & auancé
les lettres: & pour ne dire maintenant mot des autres, en An-
gleterre la Royne Marguerite, mere du Roy Henry huities-
me, a edifié deux colleges à Cantabriges, & a fondé certaines
rentes & reuenus pour les entretenir: & ce à l'instigation de
Iehan Fischer, Euesque de Rochester, homme non moins
grand en saincteté qu'en doctrine: lequel fut occis sous Hē-
ry huitiesme, à cause qu'il s'opposoit aux secondes noces du
Roy, la premiere femme viuant encores. Et mesmes plusi-
eurs Euesques d'Angleterre ont edifié des colleges en diuers
lieux, où tous hommes desireux du fruit des lettres, pour-
roient trouuer ce qu'ilz souhaitent. Et à la verité ces regions,
que les Italiens appellent Barbares, auroient grand' occasion
de se resiouir, de quoy les lettres & disciplines florissent main-
tenant en elles, si ce n'est que ceste resiouissance est amoin-
drie par vn accident mauuais, à sçauoir par les erreurs qui sont
venuz quand & les lettres, misere que nous ne sçaurions as-
sez deplorer. Les nouueaux Euangeliques de nostre tēps (les-
quelz se font valoir enuers la populace au seul nom d'enten-
dre bien les langues) ont de coustume d'employer tout leur
caquet sur les abus de l'Eglise Catholique, tellemēt qu'à cause
des abus, ilz veulēt que la doctrine soit arrachée, ce qu'ilz ont
faict en plusieurs lieux. Mais à mesme raison, que ne chassent
ilz de toute l'Europe les bōnes lettres, & la cognoissance des
lāgues? ne sçait-on pas biē, que plusieurs abusent auioürdhuy
de l'experience qu'ils ont aux langues? Si doncques ils ne veu-
lent point que les lettres & langues soyent reiettees, quoy
que plusieurs en facent mal leur profit: pourquoy crient-ils,
que pour l'amour des abus de l'Eglise il faut tout renuerser?
Plusieurs hommes fort doctes & lettrez errent bien lourde-
ment en ce temps, & semble que la seule erudition les ait
acheminez

acheminez à errer: mais toutesfois ce n'est pas l'erudition qui en est la cause, ains l'abus. Car comme les plus doctes & plus versez en toutes disciplines deuroient estre plus humbles & modestes, que les autres, maintenant ils s'enorgueillissent & enflent à cause de cela: & par le moyen de quelque cognoissance des langues, il leur semble qu'ils entendent mieux la Theologie, que toute la Sorbonne de Paris, voire-mais que toute l'Eglise: & cognoist-on en eux estre vray, que la science enfle, comme dit l'Apostre: & apres s'estre ainsi enflé, s'enfuit par vn iuste iugemēt de Dieu la punitiō, que le mesme Apostre exprime aux Romains: eux disans qu'ils estoient sages, ils ont esté faitz folz, & leur cueur mal-sage a esté obscurcy. Ne voyons-nous pas cela à l'œil aujourd'huy, en plusieurs qui sont doctes au possible? Quelz erreurs y a il si absurdes & abominables, qu'ilz ne proposent au peuple miserable, pour la verité & Euangile de Dieu? Et faut il donc reuoker la faulx de cela aux lettres? Non vraiment, mais à leur esprit enflé & depraué, qui abuse des bonnes choses. Parquoy comme à cause de l'abus de ces peruers il ne faut pas oster ny condamner les bonnes lettres, aussi pour abus quelconques il ne faut reietter & mespriser les constitutions, loix, & ceremonies del'Eglise Catholique. Ce que font principalement ceux, qui abusent des lettres, & pour eux & pour les autres. Mais nous auons dict cecy oultre le propos, combien que ce n'ait esté sans raison, à mon iugement.

EN ce temps Henry huitiesme, Roy d'Angleterre, aiant fait les obseques & funerailles à son pere, espousa Catherine, femme de son frere Arthus, ia decedé: lequel l'auoit prise en mariage estant encore fort ieune, & à cause de ce n'auoit eu aucune lignée d'elle, voire mesmes l'auoit laissée vierge: comme elle mesme iuroit, & le tesmoignoient plusieurs Dames fort honnestes & experimentées. Toutesfois, à fin que la conscience ne fust aucunement chargée, ce mariage fut permis au Roy Henry par l'autorité de nostre Sainct Pere. Or n'auoit Henry que dix-huit ans pour lors, à cause dequoy, voyant Madame Marguerite sa mere grand', femme

bien sage, qu'il ne pourroit pas bien regir son peuple pour estre encores trop ieune: elle feit en sorte, qu'il seroit gouverné par le conseil des meilleurs & plus sages Seigneurs, entre lesquels estoit Guillaume Varan, Archeuesque de Cantorbie, & Chancelier du Royaume, & plusieurs autres. Lesquels sçachâs bien qu'il auoit herité à plus de biens, que n'auoit iamais fait pas vn de ces predecesseurs: & desirans que ceste opulence n'effeminast point son courage, commencerent à l'accoustumer à estre soigneux des affaires, ausquels il sembloit n'estre encores gueres propre. Et le iour S. Iehan Baptiste il fut couronné avec sa femme Catherine, par l'Archeuesque de Cantorbie, avec vne merueilleuse ioye & liesse de tout le peuple: laquelle pourtant fut grandemēt troublée par la mort de Marguerite, Ayeule de cest Henry, mort fort dommageable, & pernitiense à ce Royaume.

EN ce mesme an deceda le Seigneur Guillaume, Lantgrau de Hesse, malade du mal S. Antoine, & de quelques autres maladies, ausquelles on ne peut remedier: & à iceluy succeda son fils Philippe, nay l'an 1504: mais ce fust quelque temps apres. Quelques Iacobins de Berne en Suisse, oppugnâs fort temerairement & incōsiderement l'immaculée Conception de la vierge Marie, se meirēt à vouloir defendre leur meschante opinion deuant le peuple, par quelques miracles & phātosmes. Ils auoiēt suborné pour ce faire quelque frere lay, lequel en fin descouurit le pot aux roses: & auoiēt pareillemēt fait quelques autres choses, qui ne sont gueres seantes à hommes graues & religieux. Mais par-ce que Dieu ne laisse gueres aller les iniures dictes à lencōtre de sa mere sans estre chastiées, les Bernois, estans esmeuz d'un zeile, & desireux d'estre les vengeurs des blasphemés dictz encontre la sainte vierge: prierēt l'Euesque de Lausanne, de faire inquisition sur eux. On feit inquisition, & descouurit-on la verité du fait, tellement que quatre des plus aūthorisez Iacobins furent degradez, & bruslez par apres. Il nous faut doncq' bien donner garde, que nous ne soyons par trop opiniaistres à soustenir nostre opinion: & impugner celle des autres: mesmement

Quatre Iacobins bruslez à Berne.

és choses, lesquelles ne contreuennent point à la foy. Or ceste sentence de l'immaculée Conception de la vierge Marie, est receüe de toute l'Eglise, & defenduë par plusieurs doctes & graues hommes, mesmes approuuée par quelques Conciles generaux. Parquoy que ces refractaires se donnent garde, que tandis qu'au scandale de plusieurs ilz derogent à l'honneur de la vierge Mere, ilz ne prouoquent le seure iugemēt de Dieu sur eux.

Povr quelque noyse & altercatiō meüe entre le Clergé & les citoyēs de Vuormes, il auoit ia dix ans que le clergé se re-
noit aux champs. Mais en cest an, par le moyē de Frideric de Saxe, de Vdalric de Vuittemberg, & quelques autres Princes de l'Empire qui se trouuerent à Vuormes, le tout fut pacifié: & le Clergé s'en retourna dans la cité, iacoit que l'Euesque protestast de ne iamais consentir à cest accord, qu'au preallable les citoyens ne luy restituassent tout entierement.

A v s s i y eut en Suebe vne grande tempeste de gresle, laquelle gasta tous les bledz, & dict-on qu'icelle durant, tombèrent des pierres de l'air, grosses comme vn œuf de poule.

L E quatorziesme iour de Septembre, & 18. iours ensuy-
uans de ceste année presente, aduint vn merueilleux & hor-
rible mouuement de terre sur la ville de Constantinople, du
costé de la mer, lequel ruina plusieurs maisons, iusques à em-
plire les fossez de la ruine & cheute d'icelles. Il abbatit vne
forteresse où estoient infinis thresors du grand Seigneur, en
cinq tours bien fortes & munies: & aussi vne bien belle mai-
son, où on nourrissoit les Lyons. Il brisa & meit en pieces les
conduictz, par lesquelz on faict venir l'eau, depuys le Danu-
be iusques à ceste ville, par fort longs chemins & mōtagnes,
faictz à grandz frais & despens: tellement que par nulles ri-
chesses ilz n'ont peu estre refaictz. La mer pareillement, qui
est entre Constantinople & Pēre, se desborda & enfla si furi-
eusement, qu'elle outrepassoit les murs de cēs deux villes, &
l'eau entroit au dedans des murailles. Les Tures receurēt en-
cores plusieurs autres dommages ce iour icy, de sorte qu'on
dict, qu'il y mourut bien treize mille hommes. Au reste, ce

dommage leur aduint le propre iour de la feste de l'Exaltation Sainte croix: pour monstrier la meschanceté de ces chiës barbares, cōtempteurs de la croix de nostre Seigneur. Et n'est pas nouuelle la solēnité de ceste feste, ains nous lisons, qu'elle a esté celebrée y a plus de douze cens ans fort religieusement, comme il appert par auteurs approuuez. Voy, si tu veux, Nicephore Calixte lib. 8. chap. 29. & 30. de maniere que noz sectaires & heretiques ont perdu toute honte, lesquelz ont abrogé ceste tres-ancienne solennité de l'Eglise, comme plusieurs autres: combien que ie sçache assez, que Nicephore confond la feste de l'Inuention & Exaltation Sainte croix: mais cela ne sert de rien, par ce que les heretiques n'approuuent ny l'une ny l'autre.

*Guerre
decretée
contre les
Venitiens*

L'AN 1510. les Estatz de l'Empire furent tenus à Ausbourg, en fort grand' assemblée de Princes, où aussi se trouuerent les Ambassadeurs de plusieurs Roys estrangers. Là fut ordonné de continuer la guerre alencontre des Venitiens, les fraudes desquelz furent pour lors descouuertes: qui furent cause en partie de prolonger ceste guerre, à cause qu'on descourrit, qu'il y auoit plus de 50. hommes subornez par les Venitiens, pour mettre le feu aux terres & appartenances de l'Empereur. Voyans doncq les Venitiens, qu'ilz ne pourroient resister à si puissant ennemy, delibererent de demander pardon au Pape Iules, & de le tirer à leur cordelle: & par vn Ambassade qu'ilz despecherent enuers sa sainteté, ilz tirerent de luy partie de ce qu'ilz souhaittoient. Mais ceste alliance engendra nouuelles guerres.

*Miracle
d'une ho-
stie perçee
par vn
Iuis.*

A v mois de Feburier de ceste année, au Marquisat de Brandeburg, en vn village nommé Cnobloch, y eut vn meschant homme, appelé Paule Form: lequel en vne nuit assez tenebreuse trouua moyen de desrober en vne Eglise la custode, où, à la maniere de l'Eglise Catholique, gisoit la Sainte Eucharistie. Or y auoit-il deux hosties en icelle, l'une plus grande, & l'autre plus petite. Le lendemain ce malheureux va trouuer vn Iuis, pour luy vendre sa custode: lequel sçachât bien à quoy ce vaisseau seruoit communement, luy respondit

qu'il luy en eust donné bien d'avantage, fil eust apporté ce qui estoit dedans. Alors ce pādard, qui auoit ia deuoré l'vne, imitant en cela Iudas, tira l'autre de sa poche, & la laissa appretier au Iuif: lequel pourtant ne luy en donna que biē peu d'argent. Lors ce miserable, bourrelé en sa conscience, & comme vexé de furies, s'enfuyt aux Vandales. (Car il y a encores au iourd'huy quelques reliques des Vandales, & mesmesle Marquis de Brandeburg s'intitule Seigneur des Vandales.) Mais le faict fut incontinent descouvert, & estant pris & mis à la torture, il confessa sa meschanceré. Ce pendant cest enragé Iuif se parforceoit de transpercer la S. hostie à grandz coups de dague: mais voyant qu'il ne pouuoit venir à bout de son desir, estant comme surpris de quelque rage & furie, s'escria, si tu es le Dieu des Chrestiens, monstre le au nom de tous les Diables. Lors l'hostie se partit en trois, & le sang decouloit alentour d'icelle. Dequoy le Iuif estonné, meit les pieces en vn drapeau, & les garda chez soy tout vn moys: & apres cela, il enuoya les deux parties à ceux qui sont à Brandeburg & Stédel, se reseruant la troy sieme piece, dans laquelle il ficha force coups de dague sur sa table, d'où sortirent de petites gouttes de sang. Luy effrayé, voulut manger ceste particule, mais il ne peut. Il la ietta dans l'eau, mais elle nageoit: encor' apres la ietta-il au feu, sans que cela nuyfist à l'Hostie. Finalement enuirō Pasques il meit cuyre des pains sans leuain, & posa ceste particule en vn petit morceau de paste, puy la ietta dans le four. Incontinent le four commença à resplendir, & ceste paste sauta aux yeux de ce Iuif. Estāt surprins de nouvelle crainte, enuoya ceste paste avec la particule à vn autre Iuif. Mais tout le monde en alloit deia à la moustarde, & le Marquis cōmanda, que tous les Iuifz de sa terre fussent amenez à Berlin, où ilz seroyent emprisonnez. Estans gehinnez en ce lieu, confesserent entre plusieurs autres crimes, que en bien peu d'années ilz auoient faict mourir sept petis enfans Chrestiens à coupz d'aiguilles & de poinçons. Au moyen dequoy ilz furēt condamnez, & furent quarante bruslez. Troys autres Iuifz reçurent le baptesme, mais le lendemain deux d'iceux

feurent penduz: le troysiesme, à l'instance de plusieurs, fut sau-
ué, & se feit Cordelier à Berlim. Quand à celuy qui auoit vé-
du l'Eucharistie, il fut tenaillé de fers chauldz, & en fin brulé.
Et quand & quand tous les Iuifz furent bannys des terres du
Marquis, & defendu de n'y iamais rentrer, sous peine d'estre
pendu & estranglé. En ce mesme an, en Lombardie cheurent
Pluye de
pierres. avec de la pluye fort grandes pierres, l'une desquelles pesoit
six vingtz liures, & estoient plus dures que cailloux, & sen-
toient le souffre.

L'AN 1511. Selym fut fait Empereur de Turquie, par le
moyen de quelques Baschatz & Ianissaires. Cestuy rauyst
le Royaume d'entre les mains de son pere Baiazer: lequel par
tant de Constantinople, & se retirant avec ses plus familiers
& fauoritz à Dimothéca, ville de Thrace, ia aagé de bien 76.
ans, fut empoisonné par vn medecin Iuif, nommé Hamon,
suborné par Selym: combien qu'autres disent qu'il mourut
Cruauté
de Selym
Roy de
Turquin. d'angoyssé & fascherie. Mais Antoine Vtrie, du pais de Ge-
nes, lequel a esté Maistre d'hostel de Baiazer, testifia qu'il a-
uoit veu & cogneu certains indices de poison, sur le corps d'i-
celuy ia haletant la mort. A quoy faire le filz auoit esté espoin-
çonné par beaucoup de choses. Car Baiazer auoit emporté
quand & soy infinis thresors & pierrerie: lesquelz thresors ce
cruel parricide ietta abondamment parmy les gens d'armes,
pour leur gratifier de ce qu'ilz l'auoient esleu Empereur. Mais
n'estât assoüny de la mort de son pere, encores comāda-il par
apres, par vne cruauté incroyable, que ses deux freres, & cinq
neueux qu'il auoit, fussēt occis: mesmes encores le Bascha Mu-
stapha, lequel s'estoit totalemēt estudié à l'esleuer à l'Empire.
Brief, si grande & horrible fut sa cruauté enuers ses parens,
que plusieurs en estans tous effrayez furent quelques iours,
qu'ilz ne se vouloient aucunement trouuer deuant luy. Mais
nous en dirons dauantage cy apres.

MAXIMILIAN l'Empereur feit vne Diete à Ausbourg
en ceste année, où luy fut offert vn homme de grandeur &
Glouton-
nie incre-
dible. grosseur totalement prodigieuse, & le plus gourmand qu'on
sçauoit croire: tellement qu'il mangeoit biē en vn repas tout

vn veau crud, ou bien vne brebis cruë, & encore disoit-il qu'il mouroit de fain. On dict qu'il estoit nayés parties Septentrionales, où les hommes sont communément plus gloutons à cause de l'extreme froid, combien que aussi on ne sçauroit presque adiouster foy à vne si grande gloutonnie.

Le Senat de Constance ayant gagné quelque populace, tascha en cest an de faire ligue avec les Suysses, & mettre la ville entre leurs mains. Mais ceux qui ne pouuoient souffrir qu'on se reuoltast de l'Empire y porterent empeschement, & mesmement les pescheurs, lesquelz par lettres admonnestèrent l'Empereur de ce que le Senat tramoit. Parquoy il arriva là de grande vistesse, & ayant entré dans la ville par le moyen des pescheurs, feit pendre tous ceux qu'il peut prendre des coniurez: car plusieurs s'en estoient fuyz.

En ceste année Bernardin d'Espagne, Cardinal de Sainte Croix, & Legat du saint siege Apostolic en Allemaigne, ayant attiré quelques Cardinaux à sa sentence & faction, publia d'une merueilleuse audace vn Concile general pour estre tenu à Pise: & là assigna le Pape Iule mesmes, sans compter les autres. De fait, quelques Cardinaux de France & de Lombardie ne faillirent pas de s'y trouuer. Mais voyans qu'ilz n'estoient pas gueres en seureté à Pise, ilz allerent à Milan, & de là, pour mesme cause, se retirerent à Lyon: auquel lieu furent tenuës quelques sessions de ce Concile, à la faueur du Roy de France, qui portoit vne dent de laict au Pape. Au demeurant, le Pape Iules voyant que de cecy pourroit bien sourdre vn grand schisme, admonnesta tous ces Cardinaux, par lettres qu'il leur escriuit, qu'ilz retournassent à la paix & vniõ de l'Eglise: & qu'en faisant autrement, il les forçeroit d'effectuer son commandement. Cest aduertissement fut cause, que troys Cardinaux se meirēt du party du Pape, lesquelz il reçeut fort humainement: mais sur ceux qui s'estoient monstrez reuefches & opiniaistres, il ietta vne assez terrible sentence, de laquelle ilz furent vn peu estonnez. Toutesfois par ce qu'ilz se sentoient bien estre appuyez du Roy de France, ilz demeurèrent encores en leur opinion: & mesmes le Roy, estant ad-

*Fidelité
des pes-
cheurs en-
uers l'Em-
pereur.*

*Du faux
Concile de
Pise.*

monnésté par le Pape qu'il ne leur prestast aucune faueur, n'en feit gueres de compte, à cause dequoy il l'excommunia. Pareillement, Maximilian l'Empereur panchoit assez du costé des Cardinaux, pource qu'il se sentoit bien offensé, dequoy le Pape auoit laissé son alliance pour se ioinde aux Venitiens: si est-ce queluy estant prudent & sage, & semond par quelques gens de bien, il se retira tout coy de ceste entreprinse. Vray est que le Pape, peut-estre, auoit quelque tort: mais pourtant ce n'estoit pas à ces Cardinaux d'exciter vn tel trouble, & rompre la paix de l'Eglise au grand scandale de tout le monde. Et toutesfois il en ya, qui presteront volontiers autorité à ce concile de Pise: mesmement pource que l'on y brassoit quelque chose contre l'estat du Pape, de l'iniure duquel plusieurs se delectent, comme Cham de la nudité de Noë son pere. Mais de quelque vie que soyt le Pape, (pour ueu qu'il ne soit point heretique) il doibt estre tenu en grand honneur & reuerence, pour le respect de celuy, duquel il est comme vicaire. Et d'auantage, pour abolir ce conciliabule de Pise, le Pape Iule publia le concile general pour estre tenu à Rome, lequel en fin fut paracheué sous Leon dixiesme.

*Trouble à
Spire.*

L'AN 1512. Il y eut quelque sedition à Spire à cause des exactions & impostz, lesquelz font sortir le peuple hors des gonds de raison, quand ilz sont trop grandz. Le peuple estant agité feit beaucoup de choses insolentes alencontre du Senat: mais estant intimidé des menaces de l'Empereur, il se porta vn peu plus modestement, restituant le Senat en sa dignité ancienne, de laquelle il l'auoit debouté parauant: & bannissant d'entre les Senateurs ceux qui s'en estoient fuyz.

*Maximilian laisse
l'alliance
du Roy.*

EN cest an l'Empereur Maximilian, sçachant que le Roy de Frâce, couuoit quelq cas alencōtre de luy, & q d'abondant il auoit incité le Duc de Gueldres contre les Brabātins, laissa l'alliance du Roy, pour prendre celle du Pape, faisant nouuel accord avec luy. Au reste, il defendit estroictement à tous ceux qui dependent del'Empire, & sous peine de la hard, de prendre les armes pour le Roy de France. Duquel commandement ne se souciant en rien Emicho, Conte de Lyningen, s'en alla

ſen alla en France, & ſe presenta au ſervice du Roy. Ce qu'ayant entendu l'Empereur, il le condamna, & conſiſqua tous ſes biens: au moyen dequoy les Seigneurs de l'Empire ruinerent & pillerent tout ce qui appartenoit au Conte. De maniere que eſtant de retour, & taſchant de ſ'entrér en l'amitié de l'Empereur par ſoy & par ſes amis, fut long tēps ſans rien effectuer. O que ſi telle obeiſſance des Princes, & telle ſeuerité enuers les refractaires & rebelles euſt touſiours demeuré, nous aurions bien vn autre Empire qu'il n'eſt pas. Mais lors que les Princes meſpriſent le ſouuerain Magiſtrat, auſſi leurs ſubiectz ne font compte d'eux, & par ainſi toutes choſes vont ſans deſſus deſſous.

A V S S I preſque en meſme temps on veit vn monſtre merueilleux à Rauenne, lequel auoit l'vn & l'autre ſexe, vne corne ſur la teſte, des eſles, & ſi n'auoit point de bras: n'auoit auſſi qu'vne cuiſſe, & vn pied, à la maniere d'vn oyſeau de proye, mais il auoit vn œil au genou, avec la lettre Y, & vn ſigne de croix à la poiſtrine. Sur quoy pluſieurs donnans interpretation diſoyent, que cela ſignifioit Superbe, Inconſtance, diſette de vertus, peché de Sodomie, trop grād amour des choſes de ce monde, l'oubly de Dieu, vne auarice inſatiable: leſquelles choſes ſeroient chaſtiées par le fleau de France. Ce qui aduint. Car le Roy voyant qu'on ſe bandoit de tous coſtez, feit de neceſſité vertu, aſſiegea Rauenne, laquelle il print & pillā, & l'endommagea de beaucoup. Toutesfois le Pape, ayant eu ſecours de l'Empereur & des Suiſſes, la recouura par apres, & chaffa les François de l'Italie. Mais deuāt que le Roy euſt fait ſi Rauenne, il y eut là vne terrible bataille, où moururent bien ſeize mille hommes.

*Monſtre
veu à Ra-
uenne.*

*La iour-
née de Ra-
uenne.*

L'AN 1513. à Coloigne ſur le Rhin, (qui eſt la plus illuſtre & renommée ville de l'Allemagne, & la plus conſtante en la religion Catholique) ſeſmeut vne groſſe ſedition, à cauſe que le peuple ſe reuolta alencontre du Senat, diſant qu'ilz eſtoient totalement eſpuiſez à force d'impoſts & exactions. Ce peuple ſedñieux ſen va en furie au palais, où eſtoient congregez les Senateurs: & requit à toute inſtance, que ceux

*Seditio à
Coloigne.*

qui osoient ainsi escorcher le peuple par trop d'impostz, fussent liurez entre leurs mains. De sorte que le Senat estant espouuanté de peril si soudain, commença de flatter & adoucir le peuple à belles parolles : & ayant impetré quelque iour de sursoy, promit de redre exactemēt compte de tout. Et parce que ceux qui rapportoyent ceste parolle estoient assez agreables au peuple, ceste populace ainsi agitée n'attenta rien dauantage pour ce iour là. Mais le lendemain, qui fut le iour de la feste des Roys, comme le peuple s'enflamma de plus en plus en ce tumulte, quelques Senateurs furent menez en prison : l'un desquels fut descapité des le lendemain, de quel supplice furent encores punis deux Consulz, l'onzième iour de Ianuier : & le douzième, deux senateurs, & plusieurs autres furent proscrip̃tz. Et par ce moyen la ville à la parfin iouit d'une trāquillité : mais certes ce fut avec vn exemple barbare & plus que brutal. Car le peuple temeraire ne se doit iamais vsurper cela contre son magistrat, veu que c'est contre le precepte de Dieu.

Seditiō de Vuormes. SEMBLABLEMENT les citoyens d'Vuormes exciterent quelque sedition alencontre du Senat : lesquels ayans ietté tous ceux qui estoient de l'ordre du Senat, en creerent & establirēt de nouueaux. Ceste entreprise fut fort dommageable, pourautant que plusieurs villes d'Allemagne attenterent de faire le semblable, à l'imitation de Vuormes. Et premierement le Senat, qui auoit esté debouté, en appella à la Chambre imperiale, mais les citoyens de Vuormes s'en rapporterēt à l'Empereur : lequel menaça terriblemēt ces galans seditieux, tellemēt qu'ils feirent vne paix feincte, laquelle ne dura pas lōg tēps. Ces citoiēs d'Vuormes auoiēt au parauāt eu q̃lque debat avec le Clergé, lequel leur a mal cedé en fin par le iuste iugemēt de Dieu. Ceste année Maximiliā Sforce, Duc de Milan, recouura sur les François la ville de Milan, par le secours & aide des Suisses : ce qu'aduint en ceste maniere.

Siege de Nouare par les François. Les François assiegerent la ville de Nouare, en laquelle estoit Maximilian Sforce, non sans grande crainte, avec quelques enseignes de Suisses. La auoit le François faict

bonne bresche, & les citoyens trembloient de peur par la ville: mais les Suysses n'en faisoient cas, ains prouoquoient & agaçoient les François qu'ilz entraissent par la bresche: & estoient si terribles, qu'ilz ne faisoient qu'y pèdre des linceux avec des piques sur la breche. Tellement que les François, quoy que l'entrée fust ouuerte, n'y voulurent point mordre, ains leuerent le siege de deuant Noüare, & allerent camper en vn village qu'on appelle Riotte, à vne lieüe & demye de la ville. Et cependant vindrent quelques compagnies de Suisses, de renfort à ceux qui estoient dans Noüare. Où aduint ce que s'ensuyt. Les chiens des François laissant là leurs maistres entrèrent en grand troupe dans Noüare, & lechoient les iambes aux Suysses qui estoient à la garde, leur faisoient feste de la queue, & applaudissoient comme si ia ilz eussent esté leurs maistres: ce que sembla aux Suysses prognostiquer, que sans doubte ilz emporteroient la victoire sur les François. Quelques iours apres les Suysses, neuf mille en nombre, sortans de la ville vindrent au camp des François: & estoit avec eux le Duc Maximilian, lequel ilz contraignirent de se retirer à la ville, de peur qu'il ne veint es mains des ennemys. Approchez qu'ilz eurent du camp des François, ilz se ruerent si brusquement & impetueusement sur eux, que ayans tout mis en route, en vne heure & demye ilz donnerent vne aspre bataille, & quand & quand paracheuerent ceste guerre. Car il mourut du costé des François huit mille hommes tout estant compté, & des Suysses treize cens. Et par ce moyen Maximilian recouura Milan. Pour dire verité, tant que les Suysses ont gardé constamment & fermement la foy Catholique, & qu'ilz ont esté studieux & bien-vueillans au siege Apostolicq, comme leurs ancestres auoyent tousiours esté: certainement ilz ont esté estimez preux & vaillans en toutes nations. Mais ceste vaillance s'est de beaucoup abastardie par la mutation de religion, mesmement es Cantons qui suyuent l'erreur de Zuingle. Car d'abandonner la vraye religion, c'est vne macule trespassee, & laquelle on ne scauroit presque effacer par apres: ce que à la mienne volonté que plusieurs le pèlassent diligè-

*Bataille
de Noü-
are.*

*Perte de
Milan.*

Des Suysses.

ment, qui par vne inconstance plus que puerile se laissent encheuestrer d'une nouvelle doctrine. Si est-ce qu'il y a encore quelques Cantons qui suyuent la religion Catholique, & ne degenerent nullement de leur ancienne vaillance.

Il y eut aussi en cest an fort grosse guerre entre le Roy de France, & celui d'Angleterre: pourautant que le Roy d'Angleterre, pourpensant que c'estoit chose loüable & magnifique de defendre le Pape, (lequel il honoroit souverainement en ce temps là) & aussi la cause de la religion, auoit fait leuée de grand nombre de gens, tant de ses pais que d'Allemagne: & aussi le Roy de France de son costé auoit amassé vne bien belle armée. Les Anglois partans de Calais, qui estoit pour

*La prise
& ruine
de Terou-
enne.*

lors à eux, veindrent planter le siege deuant Terouienne, ville forte & bien munie: & là arriva le Roy Henry avec nouvelles forces, au moyen desquelles on assiegea de toutes forces ceste ville: & encores bien peu apres l'Empereur Maximilian s'y trouua avec sa gendarmerie. Mais la nouvelle estant venue que le Roy de France s'estoit resolu d'aitailler les assiegez, l'Empereur s'en va au deuant du Roy avec quatre mille cheuaux, & venoit derriere l'Anglois, avec l'Infanterie: tellement

** La iour
née des es-
perons.*

que les François furent cōtrainctz de *fuyr, & pour lors la ville de Terouienne se rendit, laquelle fut mise en cendre, fors les Eglises, le 21. iour d'Aoust. Voyant doncques le Roy Loys que ses affaires alloient mal, incita couuertement Iacques, Roy d'Escocce, à mener nouvelle guerre à l'Anglois. Lequel n'y estoit guieres prompt à cause de plusieurs raisons, sçauoir est, que l'Anglois ne se doutoit rien moins que de cela, veu qu'il auoit espousé la sœur d'iceluy: & qu'encores il estoit fort estroitement confederé avec luy. Toutesfois prenant le pire conseil, il commença à guerroyer l'Anglois contre toute expectation: & mesmes le Roy Henry l'auoit admonesté, que fil ne se hontoit point de iouer vn si lasche tour, au moins qu'il se meist deuant les yeux le iugement de Dieu, qui a de coustume de se venger de ceux, qui ont esté violateurs d'une paix & alliance iurée. Ceste guerre donc encommencée contre tout droit & raison, réussit si mal à l'entrepreneur, que la

premiere armée Escossoise retournant en ses terres chargée
 de butin, & apres auoir fait mille maux, fut toute mise au trā-
 chant de l'espée par les Angloys. Ce nonobstant l'Escossois *Desconfi-*
 met sus vne nouuelle armée, avec laquelle il se deliberoit de *ture des*
 ruiner l'Angleterre: & s'estant campé en vn lieu bien fort, & *Escossois*
 par art & par son assiette, fut toutesfois desconfit, & mis à vau *par les*
 deroupte par l'Anglois: où il receut vne perte incredible. Car *Anglois,*
 le Roy Iacques y perdit la vie, & avec luy demeurerent sur le *où le Roy*
 champ vn Archeuesque, deux Euesques, quatre Abbez, & de *mesmes*
 grandz Seigneurs, Cheualiers de l'ordre, & autres sembla- *mourut.*
 bles, iusques au nombre de 34. & encores furent tuez huiet
 mille Escossois, & autāt de prins: toutes les enseignes, & vingt
 & deux pieces d'artillerie, veindrent entre les mains de l'An-
 gloys. Ceste bataille fut faicte à Tyle, le dixiesme iour de Sep-
 tembre, où mourut presque toute la noblesse d'Escocce. La
 nouuelle fut bien tost rapportée au Roy Henry, & à cause de
 ceste si excellente victoire, il approcha son armée pres la vil-
 le de Tournay, laquelle les François auoient vn peu aupara- *Tournay*
 uant eüe par composition. Et premierement les habitans se *prins par*
 defendirent assez bien & courageusement: mais ne pouuans *les An-*
 resister à la force du canon, furent contrainctz de se rendre à *glois.*
 l'Anglois. Plusieurs ont laissé par escrit, que ce Roy Iacques
 d'Escosse fut vn fort bon Prince, & qu'estant chatouillé de
 dresser guerre à l'Anglois, il feit le restif longuement: iusques
 à ce que par importunité & mauuais conseil il s'achemina, (à
 son damp) d'attenter contre l'Angleterre. Mais ce Roy deuoit
 considerer à par soy, deuant que rien remuër, que premiere-
 ment il estoit beau-frere de l'Anglois, & qu'il estoit confe-
 deré avec luy: ce qu'ayant mesprisé de faire, il a faict toucher
 au doigt par sa calamité & meschef, à tous Roys & Princes,
 qu'ilz soient tousiours memoratifz de la foy promise: & qu'il
 y a vn Dieu tout-puissant au ciel, qui peut, & qui veut pren-
 dre vengeance de ceux, qui violent leur foy. Dequoy & les
 histoyres saintes & les profanes nous donnent assez d'ex-
 emples.

QUELQUES Cardinaux, qui auoyent suiuy le Concile
 L.ij.

L'AN M.D.XIII.

HISTOIRE DE TOUTES CHOSES

*Le Roy
Loys abro-
ge le Con-
cile de Pi-
se.*

de Pise, demanderēt pardon de leur faute en cest an au Pape Leon, & l'impetrerent facilement. Mesmes le Roy de France, cogitant en soy mesme que tant de necessitez & calamitez luy pourroient bien estre tumbées sur la teste, à cause qu'il auoit porté faueur à ce faux Concile en son Royaume: le declara nul & de nulle vigueur, & tant luy que les siens s'arrestèrent au Concile de Rome.

*Deffuite
des Veni-
tiens.*

EN mesme an l'armee des Venitiens fut mise si bas, & si affoiblie par les gens de l'Empereur, qu'il en mourut cinq mil le pour vn iour: entre lesquelz furent quatre cens hommes armez & munis de toutes pieces, ce qu'on n'auoit encores point veu: & d'auantage, on emporta vingt-quatre gros canons des leurs, & toutes leurs enseignes, sans qu'il y eust grāde perte du costé de l'Empereur.

*Milan vñ
du à Ma-
ximilian
Sforce.*

LE chasteau de Milan ceste année fut reduict en l'obeissance de Maximilian Sforce, par composition, lequel auoit esté aux François 14. ans, & quelque temps apres le chasteau de Cremona fut aussi rendu. Certainement ce Duché de Milan a esté cause que infinis hommes y ont laissé la vie en diuers temps, & mesmes la Republique Chrestienne en a esté grandement opprimée & affoiblie, pendant que les Turcs se mocquoient de ces belles guerres de Chrestiens, & augmentoient leur Empire, tandis que les Chrestiens sont acharnez & aheurtez les vns contre les autres. Et a bien dit vray Saluste, que par concorde petites choses croissent, & par discorde les grandes vont en decadence.

*Mort du
Pape Iu-
le, & de
ses meurs.*

CESTE année alla de ce siecle en l'autre Iules second, Pape de Rome, aagé de septante ans, lequel quelques vns surnomment, le liberateur & cōseruateur de l'Italie: pource que à l'ayde des Suysses il feit tant, qu'il chassa les François d'Italie. Je sçay bien que plusieurs affermeront qu'il estoit vn peu trop Martial, & se mesloit trop des batailles, voire mesmes quelques vns l'ont reprins & blasmé de cela. Mais quand à moy i'ayme beaucoup mieux en laisser le iugement à Dieu, que d'affecter à le reprendre, & mesdire de luy. Son successeur fut Iehan de Medicis, Florentin, qui fut appellé Leon

dixiesme, & l'auoient tenu les François prisonnier auparavant: mais s'estant despestré de leurs mains par ie ne sçay quel moyen, à la fin il paruint au comble des honneurs.

LVDOVIC & Frideric freres tous deux Contes Palatins, ^{Alliance entre le Conte Palatin, & le Duc de Vuittemberg.} en ceste année feirent alliance & confederation perpetuelle & hereditaire, avec Vdalric Duc de Vuittemberg, avec le cōsentement de l'Empereur Maximilian. Car on ne peut nyer, que telles alliances ne portent avec soy fort grande oportunité & vtilité, moyennant que la Loy d'amitié soit gardée de point en point: laquelle dict, qu'on ne doit demander à vn siē confederé sinon que choses honnestes: &, comme dict Ciceron en son liure d'amitié, que toutes choses soient faictes & entreprises pour les amis honnestement, & qu'ilz ne s'entre-demandent rien, qui ne soit legitime & droicturier.

CESTE année mesme l'Empereur Maximilian souldoya les Suisses, qui ne vouloiēt guieres de bien aux François, à fin qu'ilz rauysent la Bourgongne d'entre les mains du Roy. Et estoit avec eux Vdalric, Duc de Vuittemberg, qui estoit du party de l'Empereur, & mettoit grand' peine à bien auitailler toute ceste armée. Les Suisses doncques meirēt le siege deuāt Diion, & feirent vne grand' bresche, tellement que filz se fus ^{Diion assiegé par les Suisses en vain.} sent efforcez, peut-estre eussent-ils entré dans la ville. Mais les assiegez donnerēt le croc aux iambes aux Suysses, leur promettans mons & vaux, & sçeurent si bien iouër du plat de la langue, qu'ilz leuerent le siege à leur grande honte: ayans arresté quelques conditions, lesquelles le Seigneur de la Trimouille, General de l'armée François, accepta à la necessité: mais le Roy Loys les refusa planierement. Ce qui aduint fort bien aux Suysses inconstans & legers, combien que par apres ilz furēt plus irritez cōtre les François: & faut sçauoir q̄ ceux de Berne estoient les principaux Suysses qui parlerent de cest accord à Diion. Or ceste inconstance des Suysses rendit l'Empereur & le Roy d'Angleterre fort irrité contre les Suysses: & l'experience les enseigna, qu'il ne se falloir pas fier de ces affaires en hommes, lesquelz, selon l'occasion qui se presente, changent de conseil & d'aduis: veu mesmement que la plus-

L'AN M.D.XIII.

HISTOIRE DE TOVTES CHOSES

part regarde plustost à faire son prouffit particulier, qu'à procurer l'vtilité publique.

*Grand
hyuer.*

L'HYVER de ceste année fut terriblement aspre, de maniere qu'à Coloigne sur le Rhin par quelque temps le Rhin demeura tout gelé: & la glace portoit non seulement les hommes, mais les plus pesans chariotz, laquelle commença à fondre le iour S. Antoine de l'année ensuyuant.

*Embrase-
ment de
Venise.*

L'AN 1514. comme les Venitiens eussent assez d'affaires de tous costez, & fortune eust descoché assez de fiesches contre eux, tout soudain se leua vn grand feu au milieu de la ville de Venise: lequel consuma grand nombre de maisons & plusieurs Eglises, & mesmes les boutiques des orfeures & changeurs. Si ne fut aucunement offensée la Chapelle S. Iacques, l'vne des plus anciennes de Venise, edifiée lors que la ville fut fondée: combien que le feu eust ia grimpé aux costez d'icelle. Dauantage la mer estoit pour lors enflée & agitée de vens, de sorte qu'on pensoit que Venise s'en deust aller sans dessus dessous: mais le feu fut esteint des le lendemain. Voyla les calamitez de ceste cité de Venise, qui sont assez pour nous semondre, qu'il n'y a rien en ce monde parfaitement heureux & perdurable. Aucuns soupçonnerent, que cela auoit esté fait par quelques Alemans boute-feux, pour ce que le bruiet couroit, que par la fraude des Venitiens l'an precedent deux villes d'Allemagne auoient esté brulées. Mais

*De la vil-
le de Ve-
nise.*

c'estoit plustost vn fleau de Dieu pour chastier les Venitiens, ou pour les admōnester de ne s'enorgueillir point. Icy nous pourrions dire (si le lieu le permettoit) beaucoup de choses de ceste cité, laquelle est fort grande & riche, & dit-on qu'elle a de circuyt quatre lieües. Elle est assise sur la mer, mais quād la mer se courrouce, elle a de nature vn répar pour luy resister, par leq̃l les nauires peuuent passer en cinq endroiçtz. En icelle y a 62. parroisses, 41. monasteres, & y voit-on 400. pōs publicz, sans cōter les particuliers. Elle a sō Magistrat, fort singulier en grauité & prudēce. Leur Duc est esleu par sort, & l'ambition ne peut rien en cela, ambition, dis-ie, vraye peste du genre humain. Ce Duc gouuerne la Republicque tant qu'il

*Du Duc
de Venise*

vit,

vit, mais il ne faiët rien sans l'aduis du Senat, comme aussi le Senat ne faiët rien sans l'aduis du Duc: & mesmes a certains limites en l'administration des affaires, lesquelz il ne peut outrepasser en sorte que ce soit. Il est vestu presque à la Royale, & vse communémēt d'une robe d'escarlate ou tissue d'or, & si porte sur le chef vne mitre Royale, faicte de lin, avec vn petit chappron de pourpre brodé d'or tout autour. Quand il va au Senat, il se sied au siege Royal, & tant les Senateurs que les citoyens parlent à luy la teste descouuerte, & se tiennent debout deuant luy comme deuant leur Prince. Les mandemens du Senat sont escrits en son nom, & seellez de son seau, mesmes les Loix sont publiques en son nom. Mais cōbien qu'il semble qu'il ne differe guieres d'un Roy, si est-ce qu'on ne luy lasche pas trop la bride. Car il ne faiët rien sans l'aduis de six Conseillers, lesquels sont choisis de dix Colleges des tribus, pour luy estre immédiatement Conseillers. Mais c'est assez dict de cela.

A v demeurant, il n'y ent point de guerre ceste année en Italie, ny presque en tout l'Occident, lesquelles guerres auoyent duré ia long temps: & la flamme d'icelles alla brusler l'Orient & Septentrion, estédant son embrasemēt en maints Royaumes & prouinces. Mais combien qu'en l'Occident la puissance d'un chacun fust si affoiblie, que par vn consentement vniuersel les armes furent laissées: neantmoins par apres on les reprint plus furieusement. Et ce que ie ne puis dire sans larmes & angouisses de cuer, les Princes & peuples Chrestiens estoient si bien acharnez les vns cōtre les autres, qu'il sembloit que ny les massacres, ny les pilleries, ny les bruflemens ne prendroyent iamais fin: iusques à ce que l'un ou l'autre eust tout perdu, ou bien qu'ils se fussent si bien frottez, que l'un ne se pourroit iamais releuer. O cruauté plus felon & barbare que celle des bestes! Car ce pendant la force & le courage des barbares croissoit: & les choses vindrent bien souuent iusqu'à tel paroxisme, que peu s'en fallut que tout l'Occident ne veint en la puissance du Turc, & payast la folle enchere de sa temerité, si Dieu par sa bonté ne nous

Paix en l'Occidēt.

M. j.

L'AN M.D.XIII. HISTOIRE DE TOUTES CHOSES
eust deliuré de ceste calamité.

*Pilleries en
Hongrie.* EN ceste année se leua quelque guerre en Hongrie, par-ce
que Vladislaus, frere de Sigismond de Poloigne, qui auoit
succedé à Mathias Coruin, n'estoit pas tant soigneux & dili-
gent es affaires cōme il appartenoit. Mesmes plusieurs grāds
Seigneurs du Royaume, voyans qu'il ne se mesloit plus des
affaires, à cause que sa grande vieillesse & la pesanteur de
son corps l'empeschoient, commencerent à piller le Royau-
me qui ça qui là, & faire leur main particulièrement, vexer
les subiets d'exactions intollerables, & faire beaucoup de
choses semblables: tellement que les richesses du Royau-
me estans dissipées, les nerfs de la guerre, c'est à dire l'argent,
defaillirent.

*Rebellion
des paysans
en Hon-
grie.* OR en ce téps grande multitude d'hommes, & mesmemēt
les païsans s'assemblerent, pourautant que le legat du Pape a-
uoit faict de grans pardons à tous ceux qui porteroient les
armes en Croatie, alencontre du Turc. Mais cester racail-
le d'hommes, quoy qu'on leur eust faict commandement
de se retirer, pour-ce qu'ils estoient trop grand nombre,
commencerent à songer les moiens pour n'estre plus sub-
iectz aux Seigneurs. Et de faict, ils créent vn Capitaine,
nommé George Sichel, homme fort audacieux, à la con-
duite duquel ils tuerēt quelques gentils-hommes, violerent
les Dames & filles de maison, meirent le feu dans la ville
de Cinadie, qui estoit de matiere assez combustible: où
tous les citoyens seruirent de pasture au feu, sinon ceux que
la fumée estouffa. Ils massacrerent felonement le Sei-
gneur George, Euesque de ce lieu: & feirent mourir le plus
cruellemēt qu'ils peurent tous ceux, qui estoient remarqua-
bles ou par lignée, ou par richesses, ou par estat en l'Eglise. De
maniere qu'il fut force aux Seigneurs de se defendre en gran-
de diligence, & en meilleure troupe qu'il leur fust possi-
ble: & soubz le capitaine Bornemissa ils en hacherent vne
grand' partie, & peu apres en diuers lieux ils les passerent
presque tous au fil de l'espée. Ce-neâtmoins George ne per-
dit point cuer pour cela: ains ayant amassé encore quelques

gens il teint la campagne : mais à son damp. Car ses gens ay-^{Supplée} ans esté tous mis en pieces, il fut prins par Iehan Vaiuode, &^{horrible} fut lié & garroté, tourmenté, couronné d'une couronne ar-^{d'un ve-} dante, faicte d'un soc de charrue: fut encores crucié des plus belle. cruelz & horribles supplices, desquelz on se peut aduifer, tellement que quelques vns ont dict, que lon se monstra vn peu trop cruel, tant enuers luy que enuers son armée. Et en ceste maniere fut esteincte la guerre contre ceste multitude: laquelle durant longuement, toute l'Hongrie en eust grandement esté endommagée.

EN mesme temps Sigismond, Roy de Poloigne, eut guerre avec les Moscouites, la region desquelz est fort ample & vaste, comme celle qui contient selon aucuns, cinq cens lieues Alemandes de long & de large: & peuuent mettre aux champs cent cinquante mille cheuaux. Pour lors y auoit sur les frontieres de Moscouie vne ville appellée Smolench, laquelle n'est pas assise sur la riuiera de Rubo, comme l'ont mis ceux qui ont adiousté les tables du pais incogneu, à Ptolomée: mais bien dela le fleuve Borysthene. En ceste ville y a vn chasteau situé sur le bord du fleuve, faict & basti de gros poultrés, dans lequel on voit force maisons, de maniere qu'on le prendroit pour vne Ville. D'un costé il a le fleuve Borysthene, & de l'autre il est bien remparé & fossoyé contre l'ennemy. La Ville est située en vn vallon, & de tous costez est enuironnée de collines fertiles, & de forestz tres-espesses: d'où viennent plusieurs & diuerses peaux. Toutes les maisons sont presque de boys, & y a vn faulx-bourg, où apparoissent plusieurs masures de Monasteres edifiez de pierre. Ceste ville d'ocques, ou chasteau si vous voulez, auoit esté assiegé l'année precedent par Basile, grand Duc de Moscouie: mais il fut brauement defendu par la garnison de Poloigne, de sorte que le Moscouite fut contraint de s'en retourner sans riens exploicter: & encores laissa-il plusieurs machines de guerre, & y perdit grand partie de son bagage. Mais sur le Printemps, ayant assemblé iusqu'à quarante mille cheuaux, il print la ville par la trahyson de quelques vns de la garnison, & ce faict, il

entra dans Lituanie rauageant tout. Si enuoya le Roy de Pologne au deuant de luy vne armée de 35. mille hommes, de laquelle fut chef le vaillant Capitaine Cōstantin: & quoy que les Moscouites fussent en beaucoup plus grand nombre, si est-ce que les Polonois se sçurent si bien ayder de leur artillerie, (oultre l'expectation des autres) que Basile eut grand' ioye de se pouuoir sauuer à la fuyte: & furent noyez tant de Moscouites sur le courant de certaine riuere, ainsi qu'ilz fuyoient, que le cours du fleuve en fut empesché. Aussi auoit le Polonois en son armée quelque nombre de gens d'armes, qui ceste iournée feirent de haultz faictz d'armes. Les Capitaines & Gouverneurs de l'armée ennemye furent prins en ceste bataille, desquelz les vns furēt enchesnez à Vilne, & les autres furent distribuez par la Lituanie.

En cest an, Selym Empereur de Turquie, ayant passé les frontieres de la grande Armenie avec vne grosse & puissante armée, & quelquefois ayant esté redigé en necessité extreme, pour faute de sçauoir bien les chemins: à la parfin n'estât plus guieres loing de la ville capitale de Perse, Tauris, trouua en barbe Ismaël Sophi, avec vn camp de trēte mille cheuaux. Toutesfois ce n'estoit rien au pris du Turc, qui auoit plus de cent cinquante mille hommes, que de pied que de cheual, & grand nombre d'artillerie: ce que defailloit aux Persans. Et neantmoins les Perses attaquèrent si brusquement les Turcs, que apres grāde deffaicte il sembloit que la victoire fut à eux, n'eust esté que leur Roy, blessé de quelque coup de mosquet, se retira de la bataille. Si est-ce que Selym estant victorieux, entendu qu'il eut que le Sophi s'approchoit en bataille ren-gée tout de frais, partit d'Armenie, où il auoit deliberé de passer l'huyet: & comme il retournoit, le Prince du mont Taurus luy feit mille algarades: & ne cessoient les Perses de le pour-suyure en l'endommageant de beaucoup, iusques à ce qu'il fust sorty hors des terres du Persan. Et certes on pouuoit ha-cher en pieces tout ce camp du Turc, si le Roy de Perse eust sçeu vser de la victoire ia presque obtenüe. Mais peut-estre que Dieu nous reseruoit ce fleau, pour chastier noz pechez.

*Le Turc
deffaict le
Perse, qui
s'en reuan-
che apres.*

Aureste, bien trente mille Turcs laisserent là la vie, & encores des meilleurs & principaux qui fussent.

OR pour contenter le lecteur, ie diray quelque chose de ces deux grandz terriens, Selym & Ismaël: afin que il puisse veoir, comment par la permission de Dieu a esté faict, que ces deux grandz Princes se soient ainsi entre-battuz, de peur que filz se fussent coniointz & vniz, ilz n'extirpassent entieremēt le reste de la Chrestienté. Tous deux estoient esgaux en gloire, & en amplitude de terres à eux subiectes: mais leurs coustumes & discipline militaire estoient bien differentes, d'autant que l'un suyuoit Homar, & l'autre Halys, comme nous auons dict cy dessus* & quoy qu'ilz fussent tous deux Mahometains, si ne s'accordoient-ils point. Vous eussiez recogneu en Ismaël vne pieté singuliere, & en Selym vne barbare cruauté. Ismaël leuoit son armée des plus nobles & segnalez hommes qu'il auoit: Selym à la coustume de la maison des Othomans, des plus vilz & abietz. Ismaël estoit d'un visage plaisant & vermeil, les yeux estincellans, la barbe rousse, & le nez aquilin, & la faconde fort belle: ce qui estoit de l'ancienne forme des Roys Persans. Mais Selym auoit un sourcil triste, les yeux grandz & trahystres, le visage blesme à la maniere des Scythes, la barbe herissée depuys les leures iusques sur le col, & noire iusques à espouuēter les regardans. Quand à Ismaël, il estoit fort accostable & affable à chacun, ayant à sa table les plus grandz Seigneurs, & aimant ses femmes grandement, si elles estoient seondes, à la maniere des Perses. Au contraire, Selym faisoit tout à cachette, se contentant d'estre seruy par ieunes iouuenceaux & Eunuques, & mengeant tout seul, defendant l'entrée de son logis à ses femmes, & au reste se contentant d'un seul heritier Solyman, lequel il eut de certaine fille d'un Roy Tartare. Quand à la guerre, il faut sçauoir que les Perses se delectent fort de gens de cheual, lesquelz sont armez de pied en cap, de prepoins à l'escaille, de bōs haubertz, de bourguignotes, de morions avec vne belle cresse, & aussi de boucliers dorez sur leur rond: comme ainsi soit que les Turcz ne se soucient guieres d'estre armez. Les Perses vsent

* L'an
1500.

Descriptiō
du Sophi,
& de Selym, Roy
de Turquie.

L'armure
des Perses
& des
Turcs.

de lances de fresne, & les Turcs de picques, faictes de sapin fort aysé à rompre, d'espées recourbées, & de masses de fer. Les cheuaux des Perses ont des frontaux de fer, & sont bardez de cuir bouilly, lequel ilz accoustrent si bien avec des lames entre-lassées, ou bien du bourre & coton, qu'il n'y a dard ou sagette qui le sceust penetrer. Ismael ayant obtenu la couronne de Perse remist tout le tribut, ne voulut plus du peage, & ne festudioit guieres à amasser des thresors: & n'vsa iamais de monnoye marquée, pour-ce qu'il auoit toutes choses nécessaires à planté & foison de tant de Royaumes, ausquelz il commandoit. Combien que en cest endroict il cedast à Selym, lequel n'auoit gendarmerie ny à pied ny à cheual, qui ne receust certains gages par ses Thresoriers & Contrerolleurs. Et quoy qu'il eust merueilleux nombre de gens à soul-doyer, si est-ce que l'argent ne manquoit iamais: pourautant qu'il auoit tant recueilly d'or & d'argēt par ses tributz & impostz, qu'il luy en restoit encores la quatriesme partie, tout estant payé, & fraié. Il y a trois sortes de gens d'armes en Perse: les vns sont de l'hostel, les autres sont leuez, & les troisiemes sont estrangers, qui viennent au secours. Ceux de l'hostel, ou bien de la garde, tirēt leurs gages, & le Roy s'en sert tousiours en sa Cour, pourautant qu'ilz sont braues & addroictz. Que si quelque guerre s'esleue, on leue tous les gentilsz-hommes qui sont en fort grād nombre par toutes les prouinces & terres du Roy, pour luy venir faire seruice: les plus braues desquelz sont ceux qui sont amassez en Perse, & en la ville Royale, nommée Scyras. Ceste ville est fort renommée par tout le leuant à cause des belles armes qui y sont forgées: & aussi pour-ce qu'elle faict des espées & des pointes de lance, de si bonne trempe qu'il est possible: tellement que les Turcs les achètent quoy qu'elles coustēt, & est la force de ce fer si grande, qu'il penetre incontinent noz morions, sans qu'il se reboufche aucunement, & la pointe de la lance transperce incontinent le plus fort harnois qui soit. Quand au secours, il leur vient des Hiberiens & Albanois. Or Selym, selon l'institution de la maison des Ottomans, quoy qu'il commande à tant de

*Thresor
du Turc.*

*Trois
sortes de
gens
d'armes
en
Perse.*

*Bonne
trempe
en
Scyras.*

peuples & nations occupées par tyrannie, il n'a presque autres forces, pour retenir & conseruer vn tel Empire, que celles des serfz: en propofant grand guerdon & falaire à ceux qui se feront monstrez preux & vaillans à son seruice. Et porte grand enuie & maltalent aux Turcs, extraictz d'ancienne noblesse: & principalement à quatre maisons, lesquelles on recognoift estre auffi nobles & anciennes que celle des Ottomans: ſçauoir est, les Michalogles, Ebrens, Turacains, & Malcofis, lesquelz quoy qu'ilz ſoient vertueux & dignes d'exercer grandes charges, ſi eſt-ce que les Ottomans ne leur permettent iamais d'eſtre Baſchartz ou Coneſtables, de peur qu'ilz n'aſpirent à l'Empire. Ce neantmoins ces maisons ont belles & grandes charges, comme les Michalogles, lesquelz ſont Capitaines des gens de cheual qui viennent de leur bon gré, & ſont bien ſouuent cent mille: & les appellent Acanzes, c'eſt à dire auant-courcurs. Quand aux gouuernemens, les plus beaux ſont donnez aux autres trois familles: celui de la Morée aux Turacains, celui de Boſne aux Malcofis, celui de Samandri que es Triballes aux Ebrens. Et faut entendre qu'il y a plus de 48. gouuernemens, chacun deſquelz peut pour le moins fournir deux mille hommes à cheual, & les meilleurs ſix ou ſept mille, & tous ces gens icy ont certains gages par chacun mois. Auffi la principale puiſſance des Ottomans conſiſte en ceſte cauallerie, veu que en bien peu de iours les gouuerneurs, ſelon le mandement fait, peuuent amener en vn meſme lieu plus de ſeprante mille cheuaux. Or ſont Colomnelz de ceſte cauallerie deux Coneſtables, qu'ilz appellent en leur langue Bellerbeches, c'eſt à dire Maîtres des Maîtres, l'vn deſquelz reſide à Cutheia, ville de la petite Aſie, ou ſi tu veux Turquie: & l'autre en Europe, en la ville de Sophie. Au demeurant, il n'y a Turc, ny Chreſtien ſoubs le ioug du Turc, qui poſſede ny ville, ny chaſteau, ny village comme font les Perſes, ny ne baſtiſſent maiſons fortes: pourautant que la loy defend cela. Parquoy la condition de ces pauures Chreſtiens eſt fort miſerable, veu qu'ilz n'ont aucun bien, & ne ſçauoient en forte que ce ſoit ſe deſpeſtrer de leur ſeruitude, encores que les

*Le grand
Seigneur
vent mal
aux anciens
Seigneurs
de Tur-
quie.*

*Quarante
huit gou-
uernemens
en Tur-
quie.*

*Deux Co-
neſtables.*

*Miſerables
ſont les
Chreſtiens
ſous le
Turc.*

Chrestiens leur portassent secours d'ailleurs : pourautant que les Turcs en tous endroiçtz ont la Caualerie preste, & ceux qui seront surpris, peuuent bien s'asseurer d'estre fort mal accoustrez. Les plus vaillans hommes d'armes que les Turcs ayent, sont ceux de la garde, lesquelz sont plus nobles & mieux en conche que les autres. Ceux qui sont de cest ordre, sont choisis de toutes les prouinces, mesmes quelques vns ayans renoncé à la religion Chrestienne des leur enfance, & ayans esté honnestement entretenuz és lettres & armes par les Eunuques, paruiennent quelquefois à grandz honneurs.

Mutpharaques.

Il en y a qu'on appelle Mutpharaques, lesquelz on recerche par toute la terre: & pour-ce qu'ilz sont vaillantz & addroiçtz, ilz peuuent seruir avec telle religion que bon leur semblera. Au moyen dequoy plusieurs se retirent vers le Turc, non seulement d'entre les nations barbares & payennes, mais bien d'entre les plus nobles Chrestiens: faisans plus de conte d'un honneur transitoire & si fresse, que de la gloire eternelle. Et telz ont sous eux plusieurs seruiteurs, qui sont accoustrez fort richement & brauemēt : de maniere qu'il n'y a guiere de difference entre eux & leurs maistres, combien que ilz ayent leurs deuises diuerfes. Ce Selym ne cherissoit ny n'admiroit riē plus que deux legiōs assemblées des Ianizaires, lesquelles

Les quatre Baschatz.

se sont mōstrées inuincibles des ses predecesseurs. Or y a-il en Turquie quatre Baschatz, lesquelz president quand il est question de consulter de choses d'importance: & se treuuent toutes les semaines à la Cour, où ilz demeurent quatre iours cōtinus: pendant lesquelz ilz respondent à toutes requestes, ilz iugent des proces, & ce pendāt l'Empereur escoute tout cela par vne petite fenestre couuerte d'un voyle. Le plus anciē de

Le Vesir.

cest ordre iouist de l'escrin & du cachet de l'Empereur, & l'appellent le Vesir: aussi dicte-il ce qu'a esté ordonné, aux secretaires & greffiers: Cela fait, les Baschatz disnēt, & donne-on à māger a tout le peuple qui se treuve à la Cour, ascauoir du riz, du mouton, & du pain avec de l'eau claire. Il y a à la Cour du Turc des Ianizaires, qui sont de la garde du Roy qui portent au lieu d'un morion un bonnet rouge avec un rubā d'or

Ianizaires de la garde.

au deuant

au deuât, & vn panache: lequel bônet ne sçauoit estre percé d'aucun glaïue, & ce font- ilz par vne prerogatiue particuliere, comme aussi ilz portēt vne sorte de souliers defenduē aux autres. Leurs armes sont vne pistolle & vn arc, comme sont aussi de la plus- part des autres: vne pique vn peu plus courte que celle des Alemans, & vne espée recourbée avec vne petite hache. Ce sont ceux qui combattent le plus opiniastrēmēt & courageusēmēt que tous autres, soit par mer, soit par terre. Mais nous auons trop parlé d'eux: toutesfois ce que nous en auons fait, n'a esté que pour monstrier aux Chrestiens combien leur ennemy, lequel ilz accroissent par leurs guerres intestines, est fort & puissant. Certes les Turcz sçauent à la verité tout ce qui se fait entre nous, & quand le moyē s'offrira, il viendront baigner leurs cousteaux en nostre sang, & lors finalement la seule calamité donnera entendement à l'oüye.

En ce mesme an alla de vie à trespas Anne, Royne de Frā-
 ce, mere de Madame Claude & Madame Renée, l'aînée de-
 quelles fut puy apres espousée avec François de Valoys, Duc *Mort d'Anne, Royne de France.*
 d'Angolessme, ieune homme parfaict & accomply. Alors le
 Roy Loys, voulant mettre bon ordre à ses affaires, demanda
 par Ambassade Madame Marie, seur du Roy d'Angleterre, la-
 quelle il eut avec grande esiouyssance & congratulation de
 son Royaume. Et faut penser, que pour beaucoup de raisons
 le Roy Henry d'Angleterre fut esguilloné à consentyr à ce
 mariage, quoy qu'il ne voulust guieres de biē aux François.
 Mais le Roy Loys estât ia fort chargé d'ās, apres qu'il eut cele-
 bré ses noces à Paris le 9. iour d'Octobre, il mourut au moys *Mort du Roy Loys.*
 de Ianuier ensuyuāt, ne laissant aucūs hoirs masles procrez
 de luy. Ce Roy Loys teint en prison fort estroicte Loys Sfor-
 ce Duc de Milan, en son Royaume de Frāce, de maniere que
 Sforce n'auoit moyen ne d'escire ne de lire, & en telle sorte il
 fina ses iours. Et est vrai- semblable que le Roy auoit fort es-
 branlé son Royaume si florissant, lors qu'il se monstra fauo-
 rable par trop aux Cardinaux, lesquelz estoient autheurs du
 Concile de Pise.

GRAND debat & contention se leua ceste année entre
 N.j.

*Debat en
tre les
Ducs de
Baviere.* Guillaume & Ludouic, Ducs de Baviere, pourautât que Guillaume s'emparoit de tout le Duché selon la dernière volonté ou testamēt de son pere, & d'autre part Ludouic auoit gaigné le cueur du peuple, si biē qu'il ne pouuoit endurer d'estre priué d'une partie de ce Duché. Toutesfois l'Empereur Maximilian selon sa dexterité mania ce different, & l'accorda en donnant à l'un & à l'autre ce qui leur appartenoit, de sorte que par ce moyen ces Princes meirent à part toute rancune & hayne.

*Conqueste
de Mala-
cha ex In-
des.* Et enuiron ce tēps ou bien peu deuant, le trespuissant Roy de Portugal Emmanuel, enuoya un de ses plus braues Capitaines, nommé le Seigneur Alphonse, avec une puissante armée de mer, en Malacha és Indes, que les anciens appelloient la Chersonese dorée, à cause d'une abondance merueilleuse d'or, de pierres precieuses, poyure, & autres choses semblables, qui se treuuent là. Quand à Malacha, c'est une fort grande ville, laquelle pour lors obeïssoit à un Roy Maure de religion Mahometaine. Si meirent les Portugalloys le siege deuant icelle, & y eut assez cruelle bataille: toutesfois le Portugalloys fut le maistre, & donna le pillage de la ville aux soldatz, en laquelle il entra sans grand' perte de ses gens & au grand dommage des ennemis, à cause que le Roy avec le reste des Maures se mit en fuyte: dont les Chrestiens remporterent grande proye, & entre autres choses sept Elephantz, & bien deux mille pieces d'Artillerie. Et incōtinēt apres on y feit bastyr une forteresse, & feit-on alliance avec les marchans de diuerses nations: tellement que de là en auāt le traffic y fut plus renommé & exercé que parauant, & auourd'huy mesmes nous en receuons force espiceries. Si furent en ces lieux plusieurs autres choses dignes d'admiration, lesquelles nous deuons recognoistre auoir esté plustost faictes par la puissance diuine, que par l'humaine: & de ce on peut veoir une epistre, que le Roy Emmanuel escriuit au Pape Leon dixiesme touchant cecy.

Prodige. Il ne faut pas oublier, que durant cest an 1514. furēt veuz trois Soleils à Vuittēberg, chascū desquelz auoit un cousteau ensanglanté. Et en un autre lieu on veit le Soleil le plus horrible qu'il scauroit estre, à cause de plusieurs rondeaux de di-

uerfes couleurs qui l'environnoient, & par deux fois on veit trois lunes.

L'AN 1515. apres que le Roy Loys fut decedé, François de Valoys succeda au sceptre de France, au grand contentement de la noblesse & de tout le Royaume, par-ce que bien qu'il fust ieune, si estoit-il ia monstre vaoureux & magnifiq en plusieurs endroictz. Or n'eut plustost la iouissance de la couronne, qu'il commença à desseigner en soy-mesme la guerre de Milan, vsant en cela d'un chemin non iamais vité, à sçauoir par le milieu des Alpes, à cause que son camp ne trouuoit rié difficile à surmonter. Vray est que ceste puissance eust peu estre grandement amortie, n'eust esté que quelques Suisses se mostrerent alors par trop importus & refractaires, lesquelz toutesfois on fait venir aux mains, par quelque finesse, & de premiere rencontre se ruerent sur les François fort courageusement: mais avec grand perte des leurs, & le lendemain furent vaincuz à plain par les François, de sorte qu'ilz se retirerent à Milan, duquel lieu ilz partirent bien tost apres, laissans Maximilian Sforce en grande destresse & à son grand creueueur: lequel presque hors du sens fut contraint de rendre & la forteresse & soy-mesme aux François, avec certaines conditions.

En cest an le Roy Emmanuel de Portugal fait vn fort gentil spectacle d'un Elephant & d'un Rhinocerot, cōbatans ensemble, qui sont deux animaux fort grandz & gros, mais l'Elephant a les iambes vn peu plus hautes que n'a le Rhinocerot: & ont ces deux bestes vne hayne naturelle entre elles deux, & ce à cause de la meilleure pasture, laquelle elles taschèt de se destrober l'une à l'autre, comme quelques vns assurent. Le Rhinocerot, selō que dict Pausanias, a deux cornes, l'une fort grande & desmesurée, laquelle luy sort des narines: l'autre qui luy vient vn peu plus haut, & quoy qu'elle soit petite, si est elle de merueilleuse force. Ceste beste fut apportée viue d'Indie au Roy Emmanuel, l'an 1513. de couleur de bouis, couuerte de coquilles à la façon d'un bouclier, & armée de toutes partz. Et quand ceste beste veut combattre l'Elephant son ennemy naturel, comme dict Plin, elle aiguise sa corne aux grosses pier-

*Le Roy
François.*

*Prise de
Milan.*

*Tombe
d'un Ele-
phant &
d'un Rhinocerot, & de
la nature
de ces deux
bestes.*

res, & ne cherche que le ventre, lequel elle peut penetrer, comme elle sçait bien. L'Elephant à tout ses dentz grandes & robustes deschire la peau du Rhinocerot, bien qu'elle soit dure grandement & à peine puisse estre offensée d'une fiesche. Toutesfois en ceste iouste qui fut faicte à Lisbonne, l'Elephant fut vaincu. C'est chose pleine de grãde admiration, que l'Elephant entend le langage de son païs, & a memoire du biẽ qu'on luy a faict: & n'y a animal qui approche plus pres des sens de l'homme, que cestuy-cy. Et iacoit qu'il soit fort lourd & grand, toutesfois il se laisse si bien appriuoiser à l'homme, que en Indie, où il s'en trouue grand nombre, il tire la charruë, & portẽ tout des champs à la maison. Soit doncques nostre Dieu loüé en ses creatures: & son amour ineffable enuers les hommes (lequel nous pouuons toucher au doigt par le ministere de tant de diuerses bestes créées pour l'usage de l'homme) nous occasionne à le haut-loüer.

Ce mesme an deceda Philippe d'Orbestain, Archeuesque de Coloigne, homme certes digne de plus longue vie: au lieu duquel fut substitué Herman d'Vuede, lequel à la par-fin fut seduit & enchanté par quelques cauteleux ministres de Satan, & à cause de son Heresie fut priué de sa Prelature, comme nous dirons ailleurs.

Inondations d'eaux

A V S S I furent merueilleuses inondations d'eaux durant le cours de ceste année, & ce presque par toute l'Europe, de maniere qu'elles abbatoïẽt & arbres & maisons. Mesmes quelque fleuve, lequel auoit fort y l'an 1513, d'une mōtagne au païs de Suisse, s'enfla & augmenta ceste année tellement, qu'il sembloit vne mer: & si bien que les habitãs de celle contrée, tous effrayez de cecy, furẽt cōtrainctz de recourir au sommet des montaignes: & peu apres ce grand amas d'eaux, ayant impetueusement rompu les rochers & chauffées, & engloutissant tout ce qu'il rencontroit, s'alla descharger dans la mer.

Ce fut en ce tẽps que Selym, Empereur de Turquie, ayant par vne fort grande dexterité & vistesse recueilly son camp, (lequel auoit esté grandement affoibly l'esté precedẽt en Arménie) marcha droit alẽcontre d'Ismaël, Roy de Perse. Si pẽsa

que deuant qu'il tiraſt plus outre en la profonde Armenie, il ſeroit bon de ſubiuguer Aladole, Roy de Taurus & Contre-taurus: à cauſe q̄ par ſes ruzes & fraudes il auoit faiſt vn grād eſchec de ſes gens au retour de Perſe. Or dit-on que les peuples, leſquelz ceſtuy Aladole ſeigneurie, ſont fort belliqueux & en fort grand nōbre, mais qu'ilz ſont barbares, iuſqu'à eſtre pour la pluſ part dediez à la chaſſe & à volleries. Et tient-on qu'ilz ſont ſortis des Galates, Cappadociens, Armeniēs, & des anciens habitans de la petite Aſie, leſquelz ſe retirerēt en ces lieux montaigneux comme les plus paiſibles, à cauſe du malheur des guerres du temps paſſé: & principalement lors que ce grand Tamburlan de Scythie bouleuerſa tout par le Leuant: & diſent qu'en ces lieux ilz baſtirent premieremēt quelques villages, & par apres de bonnes petites villes. Doncques Selym attaquāt Aladole de toutes ſes forces, le meit à vau de route avec ſon camp, combien que ce ne fut ſans grande perte des ſiens: & à peine auoit il acheué ceſte victoire, qu'il corrompit le Lieutenant d'iceluy, nommé Saxonarogles, à force d'argent. Lequel n'eſtant guieres affectionné à Aladole, ſe rēdit à Selym avec vne grande partie de la Cauallerie, meſmes quelque peu apres amena à Selym Aladole captif: lequel fut occis tout ſur le champ, & furent toutes ſes terres reduytes en l'obeiſſance de Selym. Mais la nouuelle eſtant venuē que les Hongres couroiēt quelque ſienne terre, de ce pas il retourna avec bien peu de gens à Conſtātinople: & ayāt faiſt vn beau camp, attaqua par deux fois les Hongres, & les feit retirer biē toſt. Ainſi ce cruel & barbare Tyran ſe trouuoit en perſonne ſi facilement & en l'Aſie & en l'Europe en lieux ſi diſtans l'un de l'autre, & meſmes ſ'en alloit touſiours vainqueur. Et voyla comment les Chreſtiens ont vn ſecond Nabuchdonosor en le Turc, lequel les encheueſtrera d'un ioug, pire que de fer.

ENVIRON ce tēps y eut vne fort belle aſſemblée à Viēne, c'eſt aſcauoir de l'Empereur Maximilian, d'Vladiflaus Roy d'Hongrie & de Boēme, & de Sigifmond Roy de Poloigne. Laquelle aſſemblée donna aſſez à penſer à Selym, pourautāt qu'il eſtimoit que tous ces Roys ſe leuoient vnanimement

*Selym gai-
gne la ba-
taille en
l'Aſie, &
fait mou-
rir Ala-
dole.*

*Selym fait
retirer les
Hongres.*

L'AN M.D.XVI.

HISTOIRE DE TOUTES CHOSES

*Assemblée de
Rois pour
un mariage.*

alencontre de luy. Mais cogneu qu'il eust qu'on n'y auoit point traicté de cest affaire, meit toute peur à part, & se soucia des affaires del'Orient, laissant toutesfois fort bonnes garnisons en l'Europe avec son filz Solymen. Or auoit esté telle la cause de ceste assemblée. L'Empereur Maximilian tâchoit à ce que Anne, fille vniue d'Vladislaus Roy de Hongrie, fust donnée en mariage à l'un de ses neueux, enfans de Philippe Roy d'Espagne. Et d'autre part le mesme party estoit fort pourchassé par Iehan Zapolitan, filz d'Estienne, Conte de Scepusen: à quoy l'aydoit merueilleusement sa mere pour lors veufue, l'estant acquis la faueur des plus grandz Seigneurs. Vladislaus sembloit porter plus grande affection à Maximilian: mais pour ce qu'il ne sceut iamais rien effectuer, à cause de ceux qui fauorisoient ledict Iehan, Maximilian se delibera de s'emparer de l'Hongrie par voye de fait. Et lors vint à naistre un filz à Vladislaus nommé Ludouic, au moyen dequoy on feit treues, & de ces treues vne bonne & seure paix: laquelle fut de rechef confirmée, lors que à la priere de Maximilian, Vladislaus avec son filz ia couronné & sa fille, se trouua à Vienne quand & Sigismond Roy de Pologne, toutes rancunes & simuletez foulées aux piedz: mesmes ces Princes feirent vne alliance perpetuelle ensemble, & s'engendra vne tres-estroicte amitié entre Maximilian & Sigismond. Si fut ceste Anne par apres espousée avec Ferdinand arriere-filz de Maximilian du costé de Philippe, & tres-chrestien Empereur.

L'AN 1516. Selym estant resolu de faire guerre au Roy de Perse, comme il mettoit sus son armée, il entendit que Campson, Soltan d'Egypte, estoit du party du Persan avec grosses forces: & qu'il auoit deliberé de ne permettre point, qu'il assaillyst les Perses. Cela donna grandement à penser à Selym, & feit tout deuoir pour tirer le Soltan à sa cordelle, mais pour neant: & à cause de ce decreta de luy monstrer ce qu'il scauoit faire. Tellement que la fortune luy dit si bien, qu'en fort peu de temps il subiugua la Syrie, l'Egypte, & la Iudée. Ce Campson auoit vne belle & grosse

armée de Mamelus, mais il y auoit ia long temps que les Egyptiens se faschoient fort de la superbe & intollerable domination de ces Mamelus, lesquels sont tous deserteurs & apostats de la religion Chrestienne, & sont imbus de la superstition de Mahomet si tost qu'ils sont en seruage, aians renié la religion de Iesuf-Christ. Il y en a aussi qui prennent des enfans à la mamelle des meres ou autrement, & les vendent par apres aux marchans: lesquels fils se montrent excellens en force de corps ou en gentillesse d'esprit, on les meine à Alexandrie, & de là au Souldan d'Egypte. Lequel ne les a pas si tost achetez, qu'il les fait bien soigneusement enseigner par les escrimeurs & precepteurs. Venus qu'ils sont en aage, & qu'ils sçauent dextrement manier les armes, & aller à la guerre, ils commencent d'estre souldoiez, & sont choisis pour estre du nombre des gens de la garde: mais ceux qui seront nyais & ignares, seruent perpetuellement aux vaillans. Or sont-ils tous de religion Chrestienne au commencement, laquelle faut necessairement qu'ils abiurent. Car quiconque est né d'un Mahometain ou d'un Iuif, ne peut auoir cest honneur que d'estre du nombre de ces gens de cheual: si bien que mesmes les enfans des Mamelus ne succedent point à l'estat de leurs peres, & le Soltan ne leur sçauroit gratifier en cela. Plusieurs Chrestiens de vie par trop meschante, ou bien qui ont esté condamnez à mourir, se retirent là, & si tost qu'ils y sont, renient nostre Seigneur, & prennent la Circoncision: de maniere que s'ils sont adroits à la guerre, quelques bons estats ne leur peuuent faillir. La cruauté de ces gens estoit ia par trop grande & intollerable aux Syriens & Egyptiens, & le tort que ordinairement ils faisoient à chacun, les auoit rendus odieux à tout le monde: ce qui vint bien à point pour le grand Turc. Et en ce temps il y auoit trois cens ans, que l'Egipte estoit detenué sous la tyrannie & ioug de ces malheureux hommes. Selym donques estant à grande diligence, & outre l'expectatiō de tous, arriué pres de Cāpson, trouua que Caierbei, Lieutenant general de Campson, tramoit quelque trahison contre son maistre, & estoit prest de se rendre

*Quels hom
mes sont les
Mamelus.*

*Bataille
entre le
Turc & le
Soltan d'E
gypte.*

à luy avec la plus saine partie de l'armée. Le choc commen-
ça des deux costez, & les Mamelus assaillirent viuement &
& brusquement les Turcs, tellement que les choses estoient
fort esbranlées: iusqu'à tant que par l'impetuosité de l'artille-
rie, & par quelque Cauallerie, laquelle se rua sur eux tout frai-
schement, la victoire leur fut ostée des mains: à quoy profitta
fort la trahison de Caierbei. Campson estant tumbé, fut tant
foulé de ses gens qui se sauuoient à la fuite, qu'il y rendit l'a-
me, aagé de septente & sept ans. Et pourroit sembler esmer-
ueillable, que Selym obtint ceste victoire au mesme iour, au-
quel deux ans au parauant il auoit vaincu les Perses. Les Ma-
melus, (ce defastre aduenu) meirent Tomumbei, vaillant
homme, en la place de Campson. Et ce-pendant Selym, a-
iant faisi toute la Syrie, bouilloit de desir des richesses d'Egi-
pte, souffrant toutesfois en ces quartiers beaucoup de dom-
mage des Arabes, qui vexoient son armée. Or deuant que
Selym s'acheminast vers Egipte, il sen alla en Hierusalem, &
ayant adoré les sepulcres des Prophetes anciens, donna ar-
gēt pour nourrir l'espace de six mois les Prestres Chrestiens,
qui tenoyent le saint Sepulchre. Et de là ayant subiugué la
ville de Gaza, marcha droit en Egipte: & peu sen salut qu'il
ne s'enueloppast d'un tresgrand peril, que luy auoit basti le
Soltan: mais lors vindrent quatre hommes de cheual de l'ar-
mée de Tomumbei, lesquels luy exposerent tous les conseils
& desseings de Tomumbei, qui fut cause que luy & son camp
eschapperent. Et bien tost apres les armées veindrent aux
mains de si grad' fureur & hayne, que des deux costez en de-
meura sur la place vn grand nombre. En fin, voyant Tomum-
bei qu'il ne pourroit iamais auoir le dessus de Selym, fait son-
ner la retraicte, & sen fuit au grand Caire: & fut donnée la-
dicte bataille le 23. iour de Ianuier 1517. Le lendemain on cō-
mença à combattre de rechef en la ville mesme, & dura cest
effort deux iours: les Mamelus se defendans si opiniastre-
ment, que Selim, desesperant d'auoir la victoire, commenda
qu'on meist le feu dans la ville si grande & si fort peuplée,
lequel toutesfois il feit estaindre par apres, ayant sceu que les
siens

*Bataille
en Egipte.*

siens estoient maistres en la ville. Et voila comment ceste cité fut prinse, & Tomumbei se sauua à la fuite: lequel ayant souuentefois esté vaincu, & mesmes Selym luy ayant offert la paix, meit encores sus vne armée toute fraiche. Mais il fut prins luy mesme, & apres auoir esté ignominieusement traicté des Turcs, on le feit mourir: ce qui aduint le treziesme iour d'April, l'an 1517. Par là nous voyons l'instabilité des choses de ce monde, de maniere qu'il n'y a aucun si puissant ny si abundant en toutes choses, qui ne puisse de grand venir petit, & de tres-heureux fort miserable. Ce que la providence Diuine a ainsi ordonné, à fin que les hommes peussent plus aisément ne tenir conte de ceste moqueuse fortune, & adherer plus fermement à Dieu leur souuerain bien. Car vn peu deuant la puissance des Soltans d'Egypte estoit fort redoutable: & toutesfois en moins de rien fut si bien abatuë, que Selym par ce moien estedit son Empire iusques aux frontieres d'Ethiopie, quoy qu'il fust cruel & barbare, & indigne de si grande prosperité en ses affaires. Sinon que nous disions que par les victoires si insignes des Turcs, Dieu preparoit vn fleau terrible & espouuantable aux Chrestiens. Au reste Selym donna le Gouuernement d'Egypte à Caierbei, proditeur de Campson: & celuy de Syrie à Gazel, & emportant quand & soy plusieurs beaux ornemens tant du public, que d'un chacun particulierement de la ville du Caire, s'en retourna à Constantinople, passant toutesfois l'hyuer suiuant en Syrie. Et faut considerer que tandis que toutes ces guerres & menées se faisoient en Syrie & Egypte, les Princes Chrestiens n'attendent rien contre le Turc, ains selon leur coustume, ils dissipoyent leurs forces par guerres intestines: & signamment en Italie.

*Prinse du
Caire en
Egypte.*

*Accroisse-
ment des
forces du
Turc, l'E-
gypte con-
quise.*

L'AN 1517. Selym Empereur de Turquie, print la cité du Caire, comme nous venons de dire, & par mesme moien s'empara de tout le Royaume d'Egypte. Tomumbei Soltan, se pësant sauuer par fuite, se mussa en quelque marescage, entre des ioncz & des roseaux: & quoy qu'il fut caché sous l'eau iusques à la poictrine, si fut il prins, & amené à Selym. Le-

quel commanda en premier lieu qu'on luy donnast la torture, à fin de luy faire dire, où estoient allez les thresors de Cam
Ignominie
Et mort du
Soltan.
 pson: mais on ne peut rien tirer de luy au milieu de si grands
 tourmens, sinon que complaints & souspirs. Le lendemain
 il commanda qu'il fust monté sur vn chameau, & vestu d'un
 habit tout deschiré, les mains liées derriere le dos, & qu'à cest
 equipage il fust mené par tous les quarefours du Caire &
 les plus belles places: & ce faict, qu'on l'estranglast. Et à fin
 que tous les passans s'en mocquassent, il le fait attacher avec
 vn crochet de fer en vn lieu eminent & le laisser là. Ce qui
 esmeut plusieurs à compassion: & pleust à Dieu que les Prin
 ces Chrestiens y aduisassent vn peu de plus pres, attendu que
 autant, voire pire, leur en pend à l'œil. Car il n'y a per son
 ne qui sceust assez exprimer, combien la puissance & la for
 ce du Turc est creüe par l'accession de tant de nations puis
 santes, & singulierement d'Egypte. Attendu que non seule
 ment l'Egypte obeissoit aux Soltans, mais bien encores tou
 te la Syrie, Palestine, Phoenicie, Iudée, & plusieurs autres pro
 uinces: lesquelles, les Soltans estans abatus, vindrent en l'o
 beissance du vainqueur. Mais y a-il homme, qui sceust assez
 declarer l'excellence & opulence d'Egypte seulement? Pom
 ponius Mela au liure premier chap. 9. dict, que c'est vne
 contrée où la pluie ne tombe point, neantmoins merueil
 leusement fertile, & meretref-seconde, non des hommes
 seulement, mais aussi des bestes: & que cela vient à cause du
 Nil, qui est le plus grand fleuve de tous ceux qui se desgor
 gent dans nostre Mer, c'est à dire Mediterranée. Et dit, que du
 temps du Roy Amasis il y auoit vingt mille villes en Egypte,
Vingt mil
le villes en
Egypte.
 & mesmes quelques recens autheurs asseurent, que pour l'in
 signe fertilité de ceste terre, & pour la grande abondance
 des hommes, on peut conter dix-huit mille belles villes, les
Du Caire.
 quelles ont esté basties en icelle. Ceste grand'ville du Caire
 est peuplée merueilleusement à ce qu'on dict, sans que pour cela
 il y ait disette d'aucunes choses necessaires, sinon que de
 bois, lequel on y vend à la liure. Car on ne fait qu'une ville de
 Méphis & du Caire (lequel on appelloit autresfois la Babilone

d'Egypte) bien que le Nil passe entre les deux, & qu'il n'y aye point de pont pour aller de l'une en l'autre. Et d'abondant, ceste ville semble beaucoup plus grāde à cause des fauxbourgs, qui contiennēt vne infinité de ruēs. Pomponius Mela au lieu cy dessus allegué, entre autres choses décrit ainsi le Labyrinthe d'Egypte : le Labyrinthe, basti par Psammetichus, contenant en vn mesme circuit de muraille mille maisons & douze maisons royales, couuert & basti tout de marbre, n'a qu'un lieu par lequel on y puisse entrer: & au dedans a presque vne infinité de voyes, lesquelles retournent ça & là, mais fort douteuses, à cause du destour cōtinuel qu'il faut faire, & des pourmenoirs entrelassez, lesquels meinent d'un circuit en vn autre: & le destour est aussi grand comme le chemin pour y aller, de maniere que c'est vn erreur duquel on ne se scauroit despestrer. Et vn peu apres: la ville de Thebes, dict-il, a cent portes, selon Homere, & selon que disent les autres, cent salles, qui estoient la maison d'autant de Princes par le passé: & dit-on qu'elles pouuoient chacune fournir dix mille hommes en armes, quād le cas le requeroit. Voyla ce que dit l'auteur. Quelques vns estiment, que ceste ville de Thebes est Helio-
polis, laquelle, selon Strabon, estoit autrefois la demeure des Prestres, hommes consacrez & dediez à la Philosophie & Astronomie: & iouissoient de plusieurs beaux priuileges, comme mesmes l'Ecriture sainte nous fait foy. Nous pourrions dire en ce mesme lieu plusieurs choses de l'admirable structure des Pyramides, si ce n'est que c'est vne chose pleine de grāde sottise & vanité. Tant y a que Solin en a escrit ainsi: les Tours, lesquelles ont esté dressées en Egypte, ont esté haugées outre toute hauteur qu'il seroit possible de faire de main d'homme. Les Pyramides d'Egypte, (dict Plin) sont vne mostre & ostentation inepte du thresor des Roys &c. On trouue par escrit, que la plus grande Pyramide fut bastie par trois cēs soixāte mille hommes, par l'espace de vingt ans. Et quoy que ceste structure soit vaine & ridicule, si est-ce que par la on peut prendre grande coniecture de la merueilleuse richesse des Roys d'Egypte. Et dauantage l'Egypte seule a mainte-

*Du Labyrinth
d'Egypte.*

*Pyramides
d'Egypte.*

*Calamité
de nostre
temps.*

nant la noble & soëfue liqueur du baume, lequel ne nous est gueres apporté que gâté & corrompu. Or à present le Turc possède toutes ces choses, (ce que nous deuroit estre vn grand creueceur) & la Judée mesme, en laquelle nostre Sauueur a vescu, est occupée par ces Turcs: & les Chrestiens ne se soucient de rien moins, que de l'arracher de leurs mains. Veritablemēt si les Chrestiens assembloient vnanimement leurs forces, ilz recouvreroient facilement ce dequoy ces barbares se sont emparez. Mais ô mal-heur! nous nous plaçons à estre miserables! Car afin d'apporter ce qui restoit au comble de noz calamitez, de iour à autre on forge nouveaux erreurs, & la religion Chrestienne est tous les iours de plus en plus obscurcie par quelques meschans, sous le voile de la parolle de Dieu, & du nouveau Euāgile. Mesmes nous ne voyōs aucune correction & amendement de vie entre les Catholiques: qui est ouurer la porte à toutes heresies & erreurs, & les heretiques apres feront place aux Turcs & barbares.

*Les Commentaires
de Sleidan
sont fort
pernicieux
à tous le-
cteurs.*

Ce fut en cest an, que Martin Luther, de l'ordre des Augustins, commença à espandre par l'Alemaigne vne doctrine nouvelle, & controuuer plusieurs choses fort preiudiciables à l'estat de l'Empire Chrestien. Or il nous faut vn peu plus librement esgayer sur ceste matiere, afin que la posterité puisse entendre à la verité, quel galand a esté ce Luther, & les faictz pleins de tres-grande audace, lesquelz il a attenté. A quoy faire ie suis d'autant plus incité, que ie voy Iehan Sleidan auoir escrit ses Commentaires de l'estat de la religion & Republique, durant l'Empire de Charles le quint, (à fin que ie ne touche rien des autres auteurs) esquelz il fauorise si dextrement à la cause de Luther & ses disciples, qu'il entre-mesle le faict de la religion avec plusieurs autres affaires, par vne douce & emmiellée eloquence: de maniere que retenant le lecteur par la delectation & variété de l'histoire, il luy faict par mesme moyen gouter la poison des erreurs pieça condamnez, sans faire quelquefois conscience de mentir impudemment. Mais encores à fin qu'il donnast quelque lustre & couleur à son histoire, (laquelle il scauoit bien estre farcie de lourdes men-

teries en plusieurs lieux) il perd toute honte, & par vné grande calomnie picque Paule Ioue, & Iehan Cochlée, sans toutesfois inserer leur nom en sa preface: combien que certainement ces autheurs ont eu la verité en bien plus grande recommandation, que n'a Sleidan & ses semblables: lesquelz on voit à l'œil auoir despouillé toute honte & constance, & en dictz & en faictz, si tost qu'ilz ont abandonné la foy Catholique. Et neâtmoins c'est chose si pernicieuse, voire execrable, de mentir en ce qui concerne l'histoire de la religion: qu'à mon aduis on ne doit croire à aucune chose, que celuy aura escrite, lequel n'auroit menty qu'une fois à escient, de ce qu'il scauroit bien estre autrement. Au moyen dequoy ie suis tout esmerueillé comment plusieurs Catholiques se delectent tant à lire Sleidan: ce qui aduiēt, pour-ce que chacun desire de lire toutes choses escrites, mesmes par autheurs suspectz: & nous semble que nous sommes si resoluz, & auons le iugement si meur & aigu, que nous pouons aysement cognoistre toutes choses, & discerner le vray d'entre le faux. Et à cause de ce plusieurs d'entre nous se laissent precipiter puerilemēt és erreurs les plus absurdes du monde, desquelz non seulement les hommes graues auroient honte, mais bien encores les plus grossiers de tout le monde. Si est-ce pourtant qu'il nous semble que nous soyons illustrez de la lumiere de l'Euangile, & que nous voyons plus clair que noz ancestres, bien que nous n'esgallions pas ny leur grauité & integrité, ny leur prudence & constance. Et bien souuent les femmes à demy-yures, & les plus sotz & ineptes qui soient parmy la populace, se ventent de bien pouoir interpreter les saintes Escritures, & opiniastrément se iactent de mieux entendre tous les pointz de la religion, que les plus doctes Theologiēs que nous scaurions presenter. De maniere que les choses sont ia venues à telle extremité, que, pendant que tous ceux qui ont fait banqueroupte à la religion Catholique, se iactent d'auoir le pur Euāgile, & la pure doctrine, & qu'à toute outrance & d'esprit & de corps ilz ne cessent de prescher & souffler leur erreur: nous voyons que pour la plus part ilz sont tumbez en vn hor-

rible atheisme, & vn tres-certain paganisme: de sorte que le miserable peuple en maintz endroictz, diuisé en plusieurs & repugnantes sectes, ne sçait desormais qu'est-ce qu'il doit suyure & tenir, & peu s'en faut qu'il ne desespere de tout salut. Mais pour-ce que parmy le discours de ceste nostre histoire l'occasion se presentera de discourir sur cecy plus commodément, ie reprendray mes erres, & viendray à parler de Luther.

*Luther né
à Islebe.*

Lequel nasquit à Islebe au Conté de Mansfeld, l'an de grace 1483. la veille S. Martin, le nom duquel luy fut imposé au baptisme. Premièrement estant encores petit garçon, il alla à l'eschole à Islebe, & delà à Magdeburg: mais l'an paracheué, il alla estudier quatre ans à Ilenac, ville de Thuringe: & apres il se transporta à Erphord, qui est vne des plus belles villes de Thuringe, & renommée à cause de l'Vniuersité, en laquelle il passa maistre és artz l'an 20. de son aage. Et de ce pas s'estant rué sur la Iurispudence, aduint, que se pourmenant quelque-fois aux champs vn coup de tonnerre emporta son compaignon, dont il fut si bien estonné, que(à l'admiration de plu-

*Il se rend
Augustin.
fin.*

sieurs) il renonça au monde, & s'en alla rendre Augustin. Ce qu'ayant faict seulement d'une crainte seruille, comme il est tout manifeste, certes il s'est appuyé sur vn fondemēt fort debile: veu que Ciceron mesmes dict, que telle crainte ne nous enseigne pas longuemēt à faire nostre deuoir. Combien que celuy n'est à blasmer ou vituperer, qui est esmeu à correction de vie par ceste crainte seule: mais aussi se faut-il parforcer de plus en plus à auoir charité, laquelle chasse telle crainte. Tant y a, que quelque raison que ait induict Luther à se mettre en religion, il demeura fort constamment en icelle l'espace d'un an deuant qu'estre profes, comme est la coustume: & apres il se feit entierement moyne, mesmes quatre ans continuez il fut assez deuot & ardent és exercices spirituelz, combié qu'il s'apperçeust de quelques choses, dont on le soupçonnoit d'auoir conuersé avec le Diable. Principalement quand certain iour, auquel on chante à la Messe l'Euangile du demoniacle sourd & muet, il tumba tout soudain à terre, & s'escria, ce n'est pas moy, ce n'est pas moy: voire luy-mesmes confesse par ses

*Luther
hante avec
le diable.*

escritz & en plusieurs lieux, qu'il cognoist fort bien le diable, & qu'il a mangé avec luy vne bonne mesure de sel, ce qui est horrible à dire. Bastie & ordonnée que fut l'Vniuersité à Vuittemberg par Frideric Duc de Saxe, Luther y fut enuoyé l'an 1508. où il leut publiquement la Logique & Physique d'Aristote. Trois ans apres il alla à Rome, pour accorder quelque proces: ce qu'ayant fait, il retourne à Vuittemberg: & estant passé Docteur en Theologie, à cause qu'il estoit assez vehement en dispute, il commença à se monstrier premierement à Vuittemberg, & dela à Heidelberg, en proposant nouuelles Thefes & matieres. Or Sleidan commence son histoire au temps de Leon dixiesme, & ment gentiment tout à l'entrée de son histoire: en telle sorte toutesfois, que cela luy est commun avec tous ceux qui sont de telle farine que luy: & pourtant non moins vituperables sont-ilz, entât que cela touche la religion: des decretz & ordonnances de laquelle personne ne sçauroit mentir, que fort pernicieusement. Voicy les motz de Sleidan: Leon dixiesme, Pontife de Rome, issu de la maison de Medicis de Florence, selon la puissance, laquelle il pensoit auoir sur toutes les Eglises de la Chrestienté, par l'vsurpation de ses ancestres: & ce qui ensuyt. Premierement Leon Pape (que Sleidan appelle Pontife, & auroit honte de l'appeller grand Pontife) ne pensoit point auoir le soin de toutes les Eglises: ains il sçait certainement, & par l'Euangile, que Dieu a laissé telle charge à S. Pierre, luy disant, pais mes brebis: & n'ignoroit pas que le Pape de Rome ne fust le vray successeur de S. Pierre. Peut-estre que Sleidan n'auoit pas leu S. Ambroise, sur le 3. chapitre de la premiere epistre à Timothée: le mōde est appelé la maison de Dieu, (dit-il) & si est bien aussi l'Eglise, de laquelle Damase est maintenant le recteur & gouverneur. D'auantage les Papes ne se sont pas vsurpez celle autorité, comme Sleidan les poind en passant avec vne grāde iniure de plusieurs saintz Papes: ains l'ayans receuë de nostre Seigneur, l'ont exercée sur tous les pais Chrestiens, quand il en a esté besoing. Sleidan adiousté encores, que le Pape enuoya par tout les Royaumes des bulles, par lesquelles il pro-

*Calomnie
de Sleidan
alencontre
des Papes.*

mettoit l'expiation de tous pechez, & le salut eternal, pour-
 ueu que chacun donnast de l'argēt selon les moyēs. En quoy
 cest ennemy iurē des Papes laisse plusieurs pointz, pourau-
 tant que les Pardons ne se publiēt pas en ceste facon. Le Pa-
 pe demandoit deniers pour le bastiment de l'Eglise S. Pierre
 Prince des Apostres: & à ceux qui donneroient de leurs biens
 à ceste intention, il donnoit indulgences, lesquelles toutes-
 fois ne se donnent iamais sinon à ceux, qui seront vrayz peni-
 tens & repentās, & qui cōfesserōt leurs pechez legitiment:
 car ainsi porte la teneur de tous pardons. Et ne faut pas pen-
 ser, que le Pape, (qui n'estoit pas trop ignare) ait autrement
 escrit en ses patentes, combien que (peut-estre) quelques im-
 portuns prescheurs de ces indulgences, esguillonnez d'un ap-
 petit de gagner, ayent dit quelque chose assez temerairement:
 laquelle faute Sleidan ne deuoit pas attribuer au Pape. Et
 voyla comme cest homme de bien commence sa gentille hi-
 stoire par iniures & calomnies alencontre du Pape, & ment
 en choses de grande importāce. Que s'il auoit enuie de blas-
 mer l'abus lequel tumboit par fois à la publication des in-
 dulgences, il se deuoit abstenir de detracter des Papes, du-
 quel luy mesmes escrit par apres, que Luther a soubmis tous
 ses escritz, sa vie & salut à son arbitre & puissance: & qu'il a
 escrit, que tout ce qui viendrait de la part du Pape, il l'auroit
 en telle reuerēce, comme s'il estoit proceddē de Iesuf-christ:
 lesquelles parolles de Luther font rougir de vergongne &
 Luther & Sleidan. Mais retournons à l'histoire.

*L'occasion
 des schis-
 mes de ce
 temps.*

EN CE temps le Pape Leon feit publier des indulgen-
 ces & pardons assez larges: & quand à l'Allemagne, il
 donna la charge de cest affaire à Albert, Archeuesque de
 Maience, lequel esleut pour publier ces indulgences Ie-
 han Tetzel, Iacobin. Ce que faisoit grand mal à quel-
 ques Augustins, & principalement à vn Iehan Staupice,
 Vicaire general de cest ordre par l'Allemagne, homme no-
 ble, de grande eloquence, & fort aimé du Prince Frideric: &
 aussi à Martin Luther, lecteur ordinaire à Vuittemberg. Et
 pour ce que quelquefois certains abus auoient accompa-
 gné la

gné la publication de telles indulgences, cela occasionna Luther à crier tant qu'il luy fut possible, contre ceux, qui recommandent les Pardons à l'appetit du gain fordide & deshonneste: enuoiant sur ce quelques lettres à l'Archeuesque de Maïence, esquelles il escriuit tout autrement, touchant la certitude du salut, qu'il ne fait vn peu apres en sa captiuité de Babilone, & autres liures. Car il dit entre autres choses, que nostre Seigneur monstre en tous endroits la difficulté de nostre salut, & que l'Apostre commande, que nous facions nostre salut en crainte & treneur: & plusieurs choses semblables, lesquelles Sleidan a omises, à cause qu'elles sont repugnantes entierement aux plus recens escrits de Luther. Or vn peu apres Luther proposa publiquement 95. Theses, par lesquelles il oppugnoit les indulgences. Tetz el d'autre costé en proposa 106. lesquelles estoient diametrallement opposées à celles de Luther: & voila d'où est sorty l'embrasement de l'heresie lutherienne, lequel a presque deuoré & gasté l'Europe vniuerselle. Au commencement du ieu de ceste Tragedie, plusieurs hommes, voire d'entre les doctes & graues, estimoient, que Luther faisoit cela esmeu d'un bon zele: & que son dessein ne tendoit ailleurs qu'à la reformation de l'Eglise, pour autant que plusieurs gens de bien se douloyent de ie ne sçay quels abus, lesquels auoient esté introduits. Mais vn peu apres, asçauoir lors que Luther ouurit tout ce qu'il auoit caché dans son estomac, il n'y eut si petit, qui ne cogneust assez, que Luther ne se soignoit de rien moins, que de la reformation de l'Eglise. Ce neantmoins plusieurs furent lourdement deçeus, par la feinte & dissimulée humilité de Luther, & par la reuerence qu'il sembloit porter au Saint Pere: de laquelle il luy falloit vser necessairement, iusqu'à tant qu'il se fust acquises forces, par lesquelles il pourroit resister à l'autorité de tous ennemis, qui luy viendroient courir sus. Doncques il escriuit certaines lettres au Pape Leon, esquelles entre autres choses estoient contenuës ces parolles: Parquoy, Pere tres-heureux, ie me iette aux pieds de vostre beatitude, avec tout ce que ie suis, ou ie puis auoir. Faites moy viure,

P. j.

Luther oppugne les indulgences.

La feintise de Luther, touchant l'autorité du Pape.

tuez moy: appelez, ou reuoquez moy: approuuez ou reprouuez, comme il vous plaira. Car ie connoistray vostre parole comme celle de Iesuf-Christ, qui preside & parle en vous. Cela estoit coloré de quelque espee de pieté: mais il ne tarda gueres à monstrier, combien il estoit ruzé. On trouuera assez d'anciens heretiques fort insignes, & lesquels ne cederoyent en rien à la doctrine & erudition de Luther: mais vous n'en scauriez trouuer vn seul, qui puisse estre esgalé à luy, quand à vne audace brutale & effrenée, & vne importunité tres-grande. Il se sentoit estre des fauoris de Frideric, Duc de Saxe, lequel en ce temps là estoit vn des plus autorisez, puissans, & courtois Seigneurs de toute l'Allemagne. Et au moyen de ce, Luther ne faisoit aucun conte des menaces & dangers: ains se fourroit indifferemment parmy les Magistrats, tant Ecclesiastiques que ciuils, & mesmes ne cessoit iamais de dire mille iniures & conuices contr'eux: ne se souciant au reste de chose du monde, pourueu que ses fables feussent trouuées bones du peuple, & qu'il peust auoir bonne part en la faueur & bonne grace d'iceluy. Et par-ce que plusieurs vices regnoient entre le Clergé, lequel il taschoit de faire haïr au peuple par quelque moyen que ce fust, il se meit à descouurir ces vices fort aigrement, à les aggrandir & amplifier: mesmes il en controuua la plus grand part, & proposoit tout cela au peuple. Brief, en peu de iours il sceut si bien trafiquer de sa lague, qu'en plusieurs lieux les Ecclesiastiques estoient reputez vrais loups des gens laiz: de maniere qu'en maints endroits ils faisoient peindre en leur maisons les Prelats, Prestres & Moines en la forme & effigie d'un Loup, & les haïssoient & contemnoient au possible. Au reste, cest chose trop certaine, que le Clergé pour lors estoit enyuré d'une infinité de vices: & à cause que les predicateurs ne les retranchoyent point par le cousteau de la parole de Dieu, Dieu a permis, que les desseings de ce faux & meschant apostat soyent venus à ce qu'il pretendoit, & que le Clergé fust mesprisé d'un chacun, à fin que par ce moyen ils se recogneussent. Et pleust à Dieu que la seule ve-

Luther
crie contre
les gēz d'E
glise.

xation eust donné ouïe à l'intellect. Certes c'est vne chose di-
gne de grande commiseration, qu'il y ait des Ecclesiastiques
si fort aueuglez, qu'estans comme stupides & priuez de tout
sentiment, il semble qu'ilz ne s'apperçoient en rien de leur
extreme calamité: & quoy qu'ilz soient enuironnez de dan-
gers, tant de l'esprit que du corps, si est-ce qu'ilz passent leur
vie, cōme estans asseurez de toutes partz. Et à la verité, ceste-
cy est vne des causes principales; pour lesquelles les erreurs
& forçenez desseings de Luther & ses disciples, ont eu vn suc-
ces si heureux, comme l'on a veu quelque temps: pourautant
asçauoir, que les Catholiques (& principalement encore les
Ecclesiastiques) ne se sont point mis en deuoir de reformer
leur mauuaise vie: de maniere qu'à bon droict nous deurions
auoir honte de nostre lascheté & impudence, veu que nous
sentons, & touchons au doigt, que ces miseres & calamitez
nous sont suruenues par vn iuste iugement de Dieu: & toutes
fois estans au feste de tous mal-heurs, nous dormons, & ne fai-
sons contēte de destourner l'ire de Dieu, par vne bonne repur-
gation de nostre conscience. Car, pour dire en vn mot ce qui
en est, ces bastisseurs d'heresies & blasphemes n'ont aucune
force ny valeur, sinō celle q nous leur dōnōs par la corruptiō
de nostre vie peruerse & deprauee, Mais c'est assez dit de cecy.

*Esaie 28.**Mauuaise
vie entre
les Chre-
stiens, plaiſt
aux hereti-
ques.*

EN c'est an 1517. il y eut vn maistre escumeur de Mer, natif
de Phrise, lequel avec cinq cens hommes, perduz & desespe-
rez, faisoit mille maux sur la mer: & vexa & tourmenta au pos-
sible toutes les villes Septentrionales, assises sur la Mer. Ce ga-
land de Pirate vouloit estre appellé le vastadour de Danne-
march, le vengeur de ceux de Breme, l'attrapeur de ceux
d'Ambourg, & la croix des Hollandois. Ses enseignes, & la
deuise de ses accoustremens, estoient des gibertz, & des roües
peintes: deuises certes, dignes d'un tel pendar. Au reste, on
veit aussi en ceste année quelques armées, rangées en bataille
en l'air, au païs d'Italie, lesquelles s'entre-chocquoient mani-
festement.

*D'un mes-
chant pi-
rate.*

CESTE année presente, Christierne, Roy de Dannemark
& Noruege, desireux de reduyre en son obeissance la Suede,

*Le Roy de
Dane-
mark
court les
terres du
Roy de Su-
ede.*

voyant qu'il ne pouuoit faire cela par force, il se promet de le faire par finesse, & de ce pas commença à suborner quelques vns des principaux du Royaume à se reuolter contre leur Prince. On tient que Gostau, Euesque d'Vpsalie, se rendit du costé de Christierne avec quelques autres. Mais cest Euesque, ayant esté cohibé & reprimé par Stenon, Gouverneur de Suede, Christierne print les armes, & assiegea la ville de Stocholmie, chef de tout le Royaume: mais tout cela fut en vain. Au moyen dequoy il demanda treues, lesquelles luy furent accordées: & voyant que son ost par ce moyen estoit iam grandement refraischy, (combien que par deuant il fust en di sette & necessité tres-grande) demanda à parlemeter dans son camp avec Stenon, donnant ostages pour ceste fin. Mais le Senat de Stocholmie, preuoyant assez le danger evident qui y estoit, ne voulut oncques permettre que Stenon se transportast celle part. Nonobstant cela, il s'aduise d'une autre meschanceté: & promet d'entrer en leur ville, moyennant qu'ilz donnassent ostages, aduenant qu'il y receust aucun mal. Parquoy on luy enuoya quelques ieunes Seigneurs de grand' maison, entre lesquels estoit Gostaue Erichson, qui fut par apres Roy de Suede. Mais ilz ne furent pas si tost arriuez à ses nauires, qu'il leur feit mettre des cepts aux piedz, & se retira en Danemarck. Ce faict, il demeura quatre ans sans remuer aucune chose, apres lequel temps, il assemble vn camp, & va planter le siege deuant Stocholmie pour la seconde fois. Tellement qu'apres que Stenon fut occis en champ de bataille, le Senat rendit la ville à l'ennemy, soubz certaines conditions. Lequel ne viola oncques la foy promise, iusqu'à tant qu'il fust paisible possesseur, & de la gendarmerie & du chasteau. Mais voyant qu'il estoit hors de toute peur, il fait assembler ses gens, il leur ouure l'intention qu'il auoit de massacrer tous les habitants: & tout d'un coup leur demande, par quel moyen il pourroit venir à bout de ses desseings, de sorte qu'il semblast qu'il n'y auroit iamais consenty. Ses gens luy donnerent aduis sur cela, & delibera de suyure leur conseil. De maniere qu'on dresse vn beau & magnifique banquet, auquel furent inuités

*Desloyau-
té d'auant
Roy.*

*Cruauté
& felonie
du Roy
Christi-
erne.*

tez les plus grands de Suede, & quelques autres. Quand au Danoy, il se monstre ioyeux & gaillard: ce que font aussi les Suedes, ne pensans point à leur mal futur. Car apres qu'on eut bien festoyé trois iours entiers, ceux qui estoient venus au banquet, furent mis en prison. Et des le lendemain on ferme les portes de la ville, on met des gens-d'armes par tous les quartiers de la ville, qui effrayerent tout le monde: & sans tarder on tire hors du logis du Roy deux Euesques, celui de Scarque, & celui de Strengen, lesquelz furent posez par ces bourreaux en la place deuant l'hostel du Roy, & leur treucha lon incontinent la teste. Autant en feit-on aux autres grandz Seigneurs, & apres eux au Senat de la ville: & ce faict, on se rue sur le menu peuple: & à cause que plusieurs se cachotent, il feit crier publiquement, que desormais chacun seroit en seureté.

A cause dequoy ce pauvre & desolé peuple sort dehors, & fut aussi tost mené à la boucherie par ces forcenez gens-d'armes. Brief, ce carnage dura quelques iours continuz, durant lequel temps ce Roy Christierne vfa d'une felonie & tyrannie non iamais ouïe. Aussi par apres fut-il chassé hors de toutes ses terres par vn iuste iugement de Dieu, & comme vn pauvre vilain & necessiteux fut long temps exilé en pais estrāge. Ce neantmoins il meit sus quelques forces, avec lesquelles il se meit en peine de recouurer son Royaume: mais il fut prins & emprisonné, & demeura captif iusques au dernier soupir de sa vie. Quelques vns assurent qu'il fina ses iours, ayant prins vne forte poison, laquelle luy fut donnée par quelques vns des siens. Durāt le regne de ce Roy barbare, fut grādemēt persecuté George de Schotborch, Archeuesque de Lunde, pourautant qu'il ne luy vouloit pas laisser l'Isle de Bornholme. Et en fin deceda cest Euesque banny & de son siege & de son pais (pour la defence de la Iustice) à Coloigne sur le Rhin, apres vne infinité d'angoysses & calamitez, lesquelles il aimamieux endurer constāment par beaucoup d'ānées, que de trahyr son Diocese à la maniere d'un mercenaire & non vray pasteur. L'ay demeuré quelque temps en son logis, lors que l'e-

studiois à Coloigne, & veritablement i'ay veu en cest homme quelques rares exemples de vertu. Car le plus souuent il portoit la haire sur son corps, & ne cessoit iamais de prier Dieu. Avec ce il estoit doué d'une prudence esmerueillable, & d'une fort grãde grauité de mœurs. Lors qu'il veint en exil à Coloigne, il fut reçu au logis de Iehan Rinck, Patrice de Coloigne, homme certes tres-illustre & entier: lequel avec sa femme, l'a traité le plus courtoisement & humainement qu'il seroit possible. Mesmes Rinck auoit de coustume de dire par apres de cest Euesque: il a seruy d'exemple à moy & aux miés. Mais i'aime mieux ne dire pas tant de choses de cest Euesque, que d'ennuyer par trop le lecteur.

*Tournée
d'Aus-
bourg.*

L'AN 1518. l'Empereur Maximiliã teint les estatz de l'Empire à Ausbourg, où tous les Princes Electeurs se trouuerent. Aussi fut là enuoyé le Cardinal Caietain, homme de fort singuliere doctrine, pour publier les thresors de l'Eglise, à ce qu'on dressast vne forte guerre au Turc. Et en ce mesme an l'Empereur certiora le Saint Pere, des troubles suscitez par Luther: & supplia sa sainteté, qu'elle y remediast en bref: car quand à luy, il promettoit de faire executer entierement tout ce que le Pape en ordonneroit.

*Luther se
soubmet
au Pape,
par finesse.*

Et en ce laps de réps Luther feit imprimer vn liure, le til-
tre duquel estoit tel: les resolutions de la dispute des indulgences, & de leur efficace. En la preface d'iceluy il se soubmet merueilleusemēt au Pape. Mais pourquoy? pour par ce moyē s'acquiescer quelque faueur, & hayne à ses aduersaires. De sorte qu'il deçeut & enchantra quelques personages d'autorité non vulgaire: & ceux qui auoient quelque eloquence, ou bōne veine pour escrire en vers, defendirēt la cause de Luther, disans mille pouilles des Prelatz & Theologiēs. Et voyla cōment peu à peu Luther gaigna place entre le peuple, & ses aduersaires tumberent en mespris. Or ce pendant Luther est cité à Rome, lequel s'excuse tresbien. On donne charge de ce au Cardinal Caietain, lequel Luther alla trouuer à Ausbourg, quoy que biē enuis. Et auoit-on delegué certains iuges à Rome pour ouïr Luther: mais il n'eut pas faute d'excuses, disant

*Luther
s'excuse
d'aller à
Rome.*

tantost que c'estoient Iuges suspectz, tãtost qu'il n'auoit moy-
 ens pour aller si loing, & quelquefois alleguoit, qu'il pourroit
 bien estre malade, si qu'il impetra (à la faueur du Duc de Sa-
 xe) que les iuges l'examineroient en Allemagne. Comme ie
 viẽ de dire, le Cardinal Caietain estoit pour lors à Ausbourg,
 lequel à la verité se peina bien fort de guerir cest homme de
 sa phrenesie: mais il ne gaigna riẽ. Encor en ce temps n'estoit
 Luther en la sauuegarde de l'Empereur Maximilian: mais me-
 antmoins auoit-il quelques lettres de faueur de Frideric, Duc
 de Saxe, par-ce que, sa conscience le bourrelant, il ne pouuoit
 estre qu'il ne fust tousiours en crainte. Le susdict Cardinal
 luy proposa troys pointz au nom du Pape, à sçauoir qu'il se
 desdiroit, & maintiendrait le contraire de ce qu'il auoit sou-
 stenu: Qu'il promettrait, q̃ desormais il ne retourneroit plus
 à ses premiers erreurs: & qu'il mettroit sous le pied tout ce
 qui pouuoit troubler l'Eglise. Mais il ne voulut iamais cõfes-
 ser qu'il auoit failly, & nonobstãt requist quelque delay pour
 s'aduiser, lequel il impetra. Le lendemain estãt retourné pour
 parlementer au Cardinal, il le trouua avec quatre Seigneurs,
 tous Conseillers de l'Empereur. Ce fut là que ce ruzé galland
 ne voulant aucunement estre soupçonné d'heresie par ces
 personnages, deuant le Cardinal recita ceste protestation
 escrite: Le Martin Luther, Augustin, prõteste, que i'honore &
 suis la sainte Eglise Romaine en tous mes faictz & dictz, pre-
 fens, passez & aduenir. Que si i'ay dict, ou dis par-cy apres,
 quelque chose au contraire, ie ne le veux aucunement sou-
 stenir. Et pleust à Dieu qu'il eust dict cela synceremẽt & sim-
 plement. Si ne puis passer ce lieu sans faire recit d'un tref-im-
 pudent mẽsonge de Sleidan, afin q̃ par cest eschantillõ on fa-
 ce iugement de toute la piece de son histoire. Il escrit que ce
 Cardinal (personnage fort sçauant) prescha en ce temps, la di-
 gnité du Pape de telle sorte, qu'il la mettoit deuant toutes les
 Escritures & les Cõciles. Car qui pourroit croire, que ce tant
 docte Cardinal ayt osé affermer, que le Pape doit estre prefe-
 ré mesmes aux Escritures saintes: veu qu'il est trop certain,
 que le Pape est tenu de faire ou euitier, tout ce qui est com-

*Protesta-
 tion Ca-
 tholique de
 Luther, de-
 uant le
 Cardinal
 Caietain.*

mandé ou defendu és lettres saintes? A la verité ie n'aurois
 iamaïs faict, si ie vouloy noter telle sorte de menfonges, des-
 quelles cest historië a farcy son histoire: afin que par ce moy-
 en il acquiere quelques fauoris à Luther & aux sectes, & qu'il
 face hayr comme poisons tous les Catholiques. Au demeu-
 rant, le Cardinal ayant ouy vne si belle protestation de Lu-
 ther, & estant d'autre part bien assçauanté, qu'il auoit escript &
 dict maintes choses assez repugnantes à l'Eglise Catholique,
 il insista à ce que dans peu de iours il meist en effect les trois
 choses à luy proposées. Et lors Luther de rechef proteste, qu'il
 ne se souuenoit point d'auoir iamaïs soustenu chose, laquelle
 contreuient ou aux saintes lettres, ou aux Peres, ou aux de-
 cretz des Papes, & à la vraye raison. Comme si ce compaignõ
 eust mis en oubly, ce qu'il auoit dict des indulgences & de
 l'authorité du Pape, contre la doctrine de l'Eglise, non seule-
 ment en ses resolutions, mais encores au dernier colloque.
 D'où on voit combien il est meschant & cauteleux. Car de
 deux choses l'une: ou bien il a protesté feintement de suyure
 l'Eglise Romaine en tout & par tout, ou bien il ment impu-
 demment, disant qu'il n'a rien soustenu contre les epistres de-
 cretales des Papes. Fort bien luy pouuons nous adapter ce
 qu'a dict l'Apostre S. Iacques: vn homme double en son es-
 prit, est inconstant en toutes ses voyes. Mesmes lors qu'il se
 presenta deuant le Cardinal, il disoit encores, puy qu'il se sen-
 toit bien pouuoir errer, (entant qu'il estoit homme) que vo-
 lontiers il se submettoit au iugement de l'Eglise, voire de l'V-
 niuersité de Basle, Friburg, Louvain, & singulieremēt de celle
 de Paris: laquelle il appelloit la mere des estudes, & de toute
 antiquité fort Chrestienne. Toutesfois ce n'estoit pas peu de
 cas, qu'il attribuoit tant à Messieurs les Theologiens de Paris,
 desquelz quelque peu apres il escriuit tout au rebours, selon
 sa maniere accoustumée. Car voyant que plusieurs d'iceux
 auoient reprouué ses articles, cest homme, arrogant & super-
 be au possible, le trouua de fort mauuaise digestion, & mon-
 stra qu'il auoit dict le premier par fraude, comme les autres.
 Le Cardinal ne cessoit de le presser, à respõdre à ce que nous
 auons

*Luther est
 pressé de
 respondre:
 mais il n'y
 veut enten-
 dre.*

Iac. 1.

*Que dict
 Luther de
 la Sor-
 bonne.*

auons ia proposé: tellement qu'il requist, qu'il luy fust permis de respondre par escrit. Cela luy fut ottroyé, & ainsi mōstra- il cōbien il estoit ruzé & non apprentis. Car il dit mille baïes contre l'Extrauagante de Clement sixiesme, des indulgences: contre l'autorité des decretales des Papes, contre les merites des Saints, contre les indulgences, & contre le merite des bonnes œuures. Et voyez sil luyuoit en tout l'Eglise Romaine. A cause de quoy le Cardinal le menaçoit de l'excommunier, sil n'amendoit ces erreurs: de sorte que luy voyant que le Cardinal le pourroit bien faire encoffrer, & estât pour ce en grand angoisse, il impetra vn sauf-conduit de l'Empereur, par quelques siens amis. Si ne demeura gueres qu'il s'en fuit de cachette d'Ausbourg: & bien finement il appella du Cardinal au Pape, & feit afficher cest appel publiquement. Mais, ie vous prie, si Luther se soucioit beaucoup de la sentence du Pape, luy qui avec tous ses cōpaignons n'a iamais prins plus grand peine en toute sa vie, qu'à dire mal du Pape. Ce neantmoins il faisoit tant par ces finesses, qu'il sembloit qu'il auoit bon droit, & attiroit tousiours quelcun à son party. Mesmes par-apres il escriuit quelques lettres fort douces, au Cardinal, par lesquelles il hault-loüoit sa clemence & debonnaïreté fort grande: combien qu'aux autres il escriuoit tout le contraire du mesme Cardinal, & ce publiquement, l'accusant de tyrannie & autres cas. Et comme i'ay dit, par ces ruzes il ne faugmenta pas de peu, Dieu permettant cela pour le chastiment de son Eglise: combien que peu de gens y aduisassent pour lors, & n'en y auoit gueres qui considerassent, que par vne si petite scintille deuoit sembrafer vn si grand feu en brief temps. Bien est vray que quelques doctes Theologiens respondirent à Luther, mais il n'en tenoit conte, à cause qu'il estoit embabouiné de ie ne sçay quels ignorans-superbes, lesquels mesprisent la doctrine des Theologiens, à cause qu'ils ne se soucient pas d'auoir leur oraison bien Ciceronienne, comme si la cognoissance des choses consistoit en l'ornemēt des morz.

EN CE mesme an, Charles, Roy d'Espaigne, feit forte guer-

Q.j.

Luther ap-
pelle au
Pape, du
Cardinal
Caretain.

Doctrine
sans elo-
quence.

L'AN M. D. XIX.

HISTOIRE DE TOUTES CHÖSES

*Deffaitte
des mar-
rhanes.*

re aux marrhanes, & ayant prins par force vne de leurs meilleures villes, en deffait plus de quarante mille: & de la proye de ceste victoire enuoya deux fort riches estandarts à l'Empereur Maximilian, son Ayeul paternel.

*La mort
de l'Empe-
reur Ma-
ximilian.*

L'AN 1519. L'Empereur Maximilian rendit l'ame à Dieu, le douziesme iour de Ianuier, en l'an 63. de son aage, comme il eust prins quelque medecine d'efficace incertaine, pour obuier à vne maladie laquelle il pensoit luy estre prochaine: & fut cest Empereur comblé de toutes perfections du corps & de l'esprit. On dit que l'an soixante troisieme est vn an de reuolution, tellement qu'Aule Gelle au liure 15. chap. 7. tesmoigne, auoir esté obserué & experimenté de tout temps, qu'il y a bien peu de vieillards, lesquels en cest an 63. de leur vie, ne rumbent en quelque peril & misere: ou de leur corps, ou de quelque dāgereuse maladie, ou de la mort mesme, ou de quelque grand' angoisse d'esprit. Mais posons le cas qu'ainsi l'ayēt obserué les aueugles payens. Quand à nous Chrestiens, il n'y a iour ny an lequel ne nous doie estre douteux, selon ce que nostre Seigneur nous a appris disant: Veillez, car vous ne sçavez ny le iour ny l'heure.

*Ekius es-
crit contre
Luther.*

EN CE temps Iehan Ekius, fort docte & renommé Theologien, taxa les premieres propositions de Luther, touchāt les indulgēces, par quelques annotatiōs qu'il appella obelisques, ou effaceures. Ce qui causa grād ennuy & fācherie à Luther, & à André Carolstad, Archidiacre de Vuitēberg. Sleidan dit que Luther respōdit à Ekius, qu'il n'amenoit rien extraiēt ou de l'Escripture ou des Peres anciens: mais seulement quelques siens songes, receus ēs escholes par vne fort mauuaise coustume. Mais ou bien Sleidan cōtrouue cela de Luther, ou il faut que Luther ait esté de deux parolles: attēdu qu'il est trop euident, que Luther escriuoit au Lecteur, que vrayement Ekius vsoit bien des mots de l'Escripture & des Anciens, mais non pas ainsi qu'il falloit. Au reste, telle estoit la doctrine & erudition d'Ekius, que Luther n'y est aucunement parangonnable. Et toutesfois ne nous esmēruillons, si Luther l'a tenu en mespris, considéré qu'il a bien osé reietter & les anciens

Peres & tous les Cōciles, comme nous monstrerons cy apres. Luther sçauoit tresbien, que Eckius par frequentes & continuës disputes, par luy tenuës en plusieurs Vniuersitez, estoit reputé pour vn personnage de foit rare eruditiō: & à cause de ce Luther eust biē voulu luy desrober ceste loüange. Parquoy fut accordé qu'ō disputeroit, & fut assigné le lieu de la dispute à Lipsie, où ne faillit de se trouuer Eckius, & quāt & quāt Luther & Carolstad. Doncqs les premiers coups furēt entre Eckius & Carolstad, lequel estant ia lassé, Luther succeda en sa place. Là fut admonesté par qlques Cōseillers du Prince George, (qui le voyoient ia en cholere, & hors des gonds de raison) qu'il se portast modestement & courtoysement. A quoy il respondit, que cest affaire n'auoit esté encommencé, ny ne seroit paracheué à l'honneur de Dieu: voix certainement barbare & fort estrange. Toutesfois, durant la dispute il soustenoit quelques pointz beaucoup plus Catholiquement, qu'il n'a escrit par apres. Il ne vouloit pas qu'on derogeast aucunement à l'autorité de l'Eglise Romaine, ny au Pape: & disoit tant en latin qu'en son Aleman, qu'il n'entendoit point, & que personne ne pouuoit impugner cela en Chrestien, que l'Eglise Romaine n'eust la préeminence & autorité sur les autres. Si est-ce pourtant que Sleidan a escrit assez cautelement de ceste dispute, & dict, que Luther nya la primauté de l'Eglise Romaine. Ce que faict Sleidan, voyant bien que c'est l'ignominie de Luther de dire maintenant vne chose & tantost l'autre, ce que neantmoins il a faict fort souuent. D'abondāt il condamna les Boëmiens, comme schismatiques: & dict que non seulement il croyoit, mais qu'encores il sçauoit bien, qu'il y a vn Purgatoire. Mais il escriuit bien autrement apres, & calomnia Eckius enuers tout le monde, mais encore principalement enuers le Pape. Il monstra aussi son impudence en ce qu'il escriuit alencontre de Hierosme Emser, & auoit de coustume cest homme de bien, d'accabler par iniures, conuices, & calomnies ceux, qu'il ne pouuoit auoir autrement: en quoy l'ont tresbiē imité tous ces ministres, & trompettes du nouveau Euangile.

*Responce
barbare de
Luther, en
disputant.*

*Propos
Catholi-
ques de
Luther.*

L'AN M.D.XIX. HISTOIRES DE TOUTES CHOSES

*Electio de
l'Empe-
reur Char-
les.*

EN cest an s'assemblerent à Francfort tous les Princes Electeurs, & au lieu de l'Empereur Maximilian decedé, esleurent Charles d'Austriche, grand & puissant Seigneur. Le Roy François (comme on dict) se peina beaucoup pour attaindre à ce comble d'honneur, & mesmes en y auoit qui le fauorisoient grandement en ceste part: & neantmoins Charles l'emporta. Ceste election faicte, Frideric, Conte Palatin, fut enuoyé en Espagne, où alors estoit Charles, & ce pour inuiter l'esleu Empereur à receuoir l'honneur à luy offert, & par cōsequent venir en Allemagne le plustost qu'il luy seroit possible. Si fut reçu fort honorablement, & renuoyé selon que requeroit sa Seigneurie. Or estoit en ce tēps l'Empereur aagé de dix-neuf ans: & m'a semblé bon, si ie parloy quelque peu plus prolixement de la lignée de ce Charles. Comme le Duché de Bourgongne fust escheu entre les mains de Charles cinquiesme, Roy de France, (lequel fut surnommé le Sage) il le donna à Philippe son frere en apennage. Cestuy Philippe eut en mariage Marguerite, vniue fille de Loys, Comte de Flādres: de laquelle il eut vn filz nommé Iehan: & de ce Iehan yssit Philippe, pere du Duc Charles le preux, lequel en fin fut tué à la iournée de Nācy. Si fut espousée Marie, fille de cetuy Charles, & heritiere de plusieurs belles terres, à Maximilian, filz de l'Empereur Frideric, troisieme de ce nom, duquel est yssu Philippe, pere de cetuy nostre Charles cinquiesme. Car Philippe eut à femme Iehanne, fille de Ferdinand Roy d'Espagne, comme ia cy dessus auons recité, de laquelle il procrea Charles & Ferdinand, lesquelz à la fin ont esté tous deux Empereurs des Romains, trespuissans & debonnaires: par la vailance & pieté desquelz l'Empire Romain a esté si bien defendu iusqu'icy, que bien souuent ce grand Turc, fouldre de la terre, a esté reprimé, & mesmes quelquefois cōtrainct de senfuyr. Au demeurant, Ferdinand, Ayeul maternel de l'Empereur Charles, fut Roy de Sicile & d'Arragon, & eut pour espouse Elizabeth, fille heritiere de Iehan second, Roy des Espaignes. Aussi eut-il par apres le Royaume de Naples: & engendra d'Elizabeth, Iehan, Isabel, Iehanne, Marie & Catheri-

*Genealogie de
Charles
cinquiesme, Empe-
reur: & cō-
ment il a
seigneurie
toute par.*

ne. Iehan & Isabel estans decedez sans hoirs, toute la succession de ce Royaume escheut à Iehanne, leur seur la plus aînée, comme porte la coustume de ce pais là. Et voyla comment toutes les terres & Seigneuries tant de Ferdinand Roy d'Espagne, que de Charles, Duc de Bourgongne, sont deuoluës à Charles le quint, Empereur des Romains, filz de ladicte Iehanne: de maniere que long temps a que l'Allemagne n'a esté regie d'un si puissant Empereur. Combien que pourtant en vne si grâde affluëce de biens, ce Prince a rousiours retenu vne singuliere & incredible modestie, afin q pour le present ie ne touche à plusieurs autres vertus, desquelles il a esté doué.

OR s'attendoit bien Luther & plusieurs de ses partiaux, *Constance de l'Empereur en la religion.* que ce ieune Empereur se feroit du tout Lutherië: & ne douta point Luther de luy escrire lettres, par lesquelles il luy donnoit à entendre son innocence, & calomnioit grandemēt ses aduersaires. Mais cest Empereur a esté comblé des ses tendres ans d'une prudence singuliere, tellement que Luther ny autre quelconque ne luy ont oncques peu faire discōtinuër son premier chemin. Ce pendant d'un costé croissoit de iour en iour l'enuie contre le Clergé, les Theologiens, & les Moynes: & d'autre part s'augmentoit la faueur de plusieurs, & principalement des Poëtes & Rhetoriciens, enuers Luther. Si escriuit Luther quelques lettres au Pape Leon, desquelles Sleidan a faicte mention, recitant à son ignominie & celle de Luther) le contenu en icelles. Car il tesmoigne, qu'entre autres choses Luther dict, qu'il est si fort affectiōné enuers l'Eglise Romaine & enuers le Pape mesme, qu'il ne voudroit pour rien du monde brasser quelque chose au preiudice d'icelle: veu qu'entre les choses humaines il n'y a rien de plus excellent & singulier, que l'autorité de ceste Eglise apres Iesuschrist. Et vn peu apres il dict, que certainement estant espoingonné par ses aduersaires, il s'estoit aduancé vn peu trop alencōtre d'elle, mais qu'il estoit deliberé d'aduertyr le peuple, à ce qu'il n'ensuyuist point son exemple. Voyla que Sleidā nous certifie auoir esté couché par Luther en ceste epistre. Parquoy par la confession mesmes de Luther nous tenons cecy, sans que Sleidan l'im-

pugne, qu'après Iesuf-christ il n'y a rien plus excellent que l'Eglise Romaine. Toutesfois bien peu deuant cecy, (comme tesmoigne & refere Sleidan) appelé qu'eut Luther du Legat Caietain au Pape, & ayant entendu par les lettres de Caietain que sans doute il seroit condamné à Rome, il appella gaillardement du Pape au Concile. Et apres cest appel, ayant Sleidā interposé quelque chose, il nous insere l'Epistre de Luther au Pape Leon, en laquelle est contenu ce que nous auons ia recité de l'excellence de l'Eglise Romaine. Mais, ie vous supplie, qui ne se mocquera en ceste part, & de la prodigieuse inconstance de Luther, & de la sottise de Sleidan: lequel souhaitant de recommander son Luther, faict que nous nous mocquions de luy. Cela est commun, voire necessaire à ceux qui font mestier de mentir. Et au surplus, Sleidan escrit qu'en la dispute de Lipsie cōtre Eckius, Luther n'ya tout à plat la primauté de l'Eglise Romaine. Et dictes si cela s'accorde bien: qu'excepté vn seul Iesuf-christ il n'ya rien plus excellent que l'Eglise Romaine, & que toutesfois icelle n'est la premiere ny la plus principale. Je prie le lecteur, qu'il vueille croire, que si ie voulois toucher toutes telles absurditez en Sleidan, i'auroy plus affaire de temps & de papier, que de matiere pour escrire. Car Sleidan s'efforce de defendre la cause de Luther par tous moyens: mais en ce faisant, tantost il controuue ce qui ne fut iamais, tantost s'estant oublié il escrit de telle sorte, que nous pouuons aysément remarquer l'extreme sottise, legere-té, impudence & inconstance de Luther. Aussi quand il est sur ce que Caietain, Eckius & plusieurs autres ont faict avec Luther, il se garde bien d'y aller à la bonne foy, taschant de les rendre en mespris, & d'acquiescer gloire & bonne reputation à Luther: & par ceste fraude il empiete tousiours quelcun, mais ceux qui ont leu quelque cas, s'aduissent incontinent de ceste piperie. Et quant & quant il passe sous silence maintes choses de Luther, par lesquelles nous verrions son maltalent, entre lesquelles est ce que Hierosme Emser a ouy de sa propre bouche, & le luy a par apres brauement obiecté, sans que iamais Luther le sceust nyer: asçauoir que durant la dispute de

Lipsie avec Eckius il dict, Ceste chose n'a point esté commē-
cée selon Dieu, ny ne s'acheuera aussi. Et à la verité, si Luther
eust eue telle affection enuers Dieu & la religion qu'il appar-
tenoit, il se fust bien monstré autre. Mais à fin que ie ne face
recit de ses autres vices, il fut si incōstant en ce qu'il escriuoit,
que celuy qui entreprend de defendre, soit luy, soit sa doctri-
ne, ne sçauoit faire, qu'il ne meure de hôte luy-mesme, s'il ne
veut aussi bien mentir. Et encores faut bien obseruer en Sleidan, *Comment*
que volontiers il allegue le Concile de Constance & de *Sleidan se*
Basse, & mesmes Gerson, & les Theologiens de Paris, lors *porte à re-*
qu'ilz semblent plaider pour Luther: afin qu'on pense qu'il a *citer quel-*
donné quelque grand coup pour diminuër l'autorité du *que chose*
Pape, & que gentiment il passe tout ce qui faiët en quelque *des au-*
chose contre Luther: ç'a esté le chemin que Luther a aussi suy *teurs.*
uy, se soubmettant au cōmencement au iugement des Theo-
logiens de Paris, par-ce qu'il esperoit qu'ilz se rendroient par-
ties alencontre du Pape, & qu'ilz se mettroient de son co-
sté: mais voyant que les choses alloient tout autrement, il les
accoustra à sa maniere. Mais qu'est-il besoin d'estre si ruzé &
caut, en faiët de religion? Ne doit pas vn homme Chrestien
abhorrer telles fraudes? Sleidan se peine à ramasser quelques
choses, pour esbranler l'autorité du Pape, & les ceremonies
& institutions ia receuës de l'Eglise Catholique: & se plaist à
alleguer en cest endroiët le Concile de Pise, tenu assez teme-
rairement contre Iules second. Il produiët aussi Guillaume
Okam, Cordelier, lequel a escrit contre le Pape Iehan vingt-
deuxiesme. Finalement il n'y a rien si maigre que Sleidan n'a-
meine, pourueu qu'il soit contre le Pape. Mais qui croira ia-
mais, que celuy recite à la bonne foy les affaires des Papes &
le faiët de la religion, lequel brusle d'enuie & hayne contre
les Papes? Toutesfois ie suis content que ceux qui se veulent
damner à credit, ayent telz auteurs, & qu'ilz en vsent tant
qu'il leur plaira.

En cest an à Zurich en Suyffe, Vlric Zuingle commença *De Zu-*
à oppugner celuy, lequel auoit esté là enuoyé par le Pape *ingle.*
pour prescher les Indulgences. Et ce fut luy qui renouuella

L'AN M.D.XX.

HISTOIRE DE TOUTES CHOSES

l'erreur iadis condamné de Berengarius, touchant la sainte Eucharistie: & eut pour compaignons Carolstad, & Oecolampade, apostat Brigittan.

*La mort
de Selym:
& des re-
uoltes a-
pres icelle.*

L'AN 1520. Selym Empereur de Turquie, finit ses iours à Ciurle, (qui est vn village en Thrace) par vn vlcere pestilentieux, lequel le print autour des reins par vne manifeste vengeance de Dieu: & au grand auantage de tout l'Occidēt, lequel il auoit resolu de fouldroyer tout à plat. En ce mesme lieu quelques années auparauant il estoit venu aux mains avec son pere, digne certes de clorre son dernier iour en iceluy lieu. Or laissa-il pour heritier de tāt de Royaumes qu'il auoit, son filz vnique Solymā, lequel il auoit eu de la fille du Roy de Bosphore: & parlerons de ce Solymā en son endroit. Si tost que Gazel, Gouverneur de Syrie, eut entendu la mort de Selym il se reuolta, & eut pour compaignons les Syriens & Arabes.

MAIS Caierbe, Lieutenant en Egypte, ne voulut oncques suyure cest entreprinse, ains feir mourir vn Legat qui luy auoit esté enuoyé: de sorte que Solymā despescha celle part le Bascha Frahate de Cilice, lequel, quoy que l'autre & ses gens combatissent fort vaillamment, les tailla neantmoins tous en pieces. Et Solymā se sentant regaillardy par ceste si insigne victoire, meit ses desseings à enuahyr l'Hongrie de toutes ses forces.

*Sacre de
l'Empe-
reur Char-
les le quint*

EN ceste année, Charles, esleu Empereur, partant d'Espaigne, print la volte du païs bas, pour delà s'acheminier à Aix la chapelle, & illec prendre la couronne à l'ancienne coustume. Mais pour-ce que la peste estoit pour lors fort grande à Aix, les Electeurs proposoiēt à Charles, qu'il choysist quelque autre lieu pour estre sacré. Toutesfois il ne peut oncques estre esbranlé en son opinion, disant qu'il ne pouuoit changer la loy de Charles quatriesme, que fort temerairement. Parquoy les Electeurs de l'Empire, Ecclesiastiqs, avec plusieurs grandz Seigneurs, & les Ambassadeurs de Saxe, & de Brandeburg, & quelqs autres, se trouuerent là: & toutes choses requises en ce faict estās paracheuées, les Electeurs, & par apres l'Empereur mesmes,

mesmes, veindrent à Coloigne, où fut arrestée l'assemblée de l'Empire, & fut cōmandé que tous Seigneurs se trouuassent à Vuormes le sixiesme iour de Ianuier. Or ie lairray presentement maintes choses icy descrites par Sleidan, touchant la confirmation de l'Empereur par les Electeurs de l'Empire, & plusieurs autres, à fin que ie ne soye trop ennuyeux au Lecteur. Certes tous bons & puissans Empereurs, Roys, & Princes qui oncques furent, ont tasché d'amplifier la dignité & autorité du Pape de Rome, tant s'en faut qu'ils l'ayent voulu diminuer en rien: par-ce qu'ils honoroient nostre Seigneur en son vicaire, quoy q̄ Sleidan bauarde tout son saoul.

CE fut en ce tēps que Luther escriuit à l'Empereur Charles, & à toute la noblesse d'Allemagne, plusieurs choses fort seditieuses: mais principalement maintenoit-il que non seulement il ne falloit pas obeir à la puissance du Pape, mais qu'encores luy falloit-il resister, & de corps, & de biens, & de toutes noz forces: que le Pape & les Euesques sont subiects au glaue imperial. Et autres telles choses, lesquelles monstrent assez, combien Luther estoit forcené, attendu qu'il n'y a rien plus expressement contraire à l'Ecriture sainte que cela: icelle nous admōnestant en plusieurs lieux, de prester obeissance à noz superieurs. Vn peu deuant, comme nous auons dit cy dessus, Luther auoit escrit au Pape Leon, qu'il n'y a rien plus excellent que l'Eglise Romaine, & auoit merueilleusement loüangé la puissance d'icelle: & maintenāt il veut, qu'on n'obeisse point à la puissance du Pape. O le beau Euangeliste, qui d'une mesme bouche souffle tantost le chaud, tantost le froid! Il approuue maintenant vne chose, maintenant il l'a reprouue! Ce meschant & enflé apostat ne s'estant encores contenté de cela, meit le feu publiquement à Vuittemberg au droit Canon, & à toutes les bulles des Papes, & les redigea en cendres. Acte, selon mon iugement, non tant digne de correction, que de verges, veu qu'un homme, n'ayant aucune autorité, osa s'vsurper iusqu'à là. Et toutesfois se trouuerent aucuns, lesquels ne connuerent pas seulement à vn tel forfait & si exorbitant, mais encores le loüerent. Mesmes

Ecrit seditieux de Luther.

Luther bruste le droit Canon.

Luther, ia desespéré, & ayant atteint le comble de meschanceté, escriuit vn liure pour defendre ce sien faict, farcy de plusieurs iniures fort atroces. Et bien souuent appella du Pape au prochain Concile, comme sil estoit possible, que ce luy voulust obtemperer à vn Concile, lequel estant hors de son sens, brusle le volume des Decrets: volume remply d'innombrables sentences des plus anciens Conciles. D'auantage, il enhorta les Princes, qu'ils se ruaissent par tous moyens sur le Pape & les Cardinaulx, & qu'ils lauassent leurs mains dans leur sang. Parolles, à mon aduis, non gueres sortablees à vn homme Euangelic, mais bien à vn sanguinaire. Et les Prophetes ou Apostres, ny mesmes Iesuf-christ ne planterent oncques leur parole de ceste façon: & par tant quicôque s'est laissé deceuoir par cest homme, est totalement inexcusable.

OR ayant entendu, que premierement les Theologiens de Louvain, & puis apres ceux de Coloigne auoyent condâné ses escrits, quoy qu'autresfois il eust demadé ceux de Louvain pour ses iuges à Ausbourg, il n'y eut iniure qu'il ne dist aux deux: s'attribuant plus à luy tout seul, qu'à tant de doctes & sçauans hommes. Autant en feit-il contre quelques au-

*Luther est
condamné
par le Pa-
pe.*

tres, de sorte que le Pape Leon, autrement fort doux & debonnaire homme, voyant que ce phrenetique tournoit tout sans dessus dessous en Alemaigne, & qu'encores ne tenoit-il compte d'aucune admonition qu'on luy eust sçeu faire, fut cōtraint de le retrancher cōme vn membre pourry du corps de l'Eglise, par le cousteau d'anatheme. Au moyen dequoy il veint si forcené & hors de foy, & se desbrida si fort alencontre du Pape, qu'il n'y a oreille Catholique qui le sceust ouïr.

*Il escrit sa
captiuité
de Baby-
lone.*

Et ce fut aussi en ceste saison, qu'il escriuit sa captiuité de Babylone, en laquelle entre aultres choses il defend les Boëmes & les Grecz: & soustient, que non les Grecz, ains les Romains, doiuent estre reputez pour heretiques. Ce neantmoins vn peu deuant, à la dispute de Lipsie, il festoit senti fort iniurié, dequoy Eckius auoit diét, qu'il soustenoit l'opinion des Boëmes: & lors il diét, qu'en tout temps il les auoit hays au possible. Et maintenant il les louë,

estimant les Latins estre heretiques. Qui a-il plus esuenté, que cest homme? Certainement ceux là sont fort aucugles, qui ne s'aperçoquent de cela. Au reste, entendu qu'eut l'Empereur, que par la sentence du Pape les liures de Luther auoient esté condamnez, il cōmanda tref-expressément qu'on les passast par le feu. Ce que fut faict en Brabant, & en quelques villes de l'Empire.

L'AN 1521. Il y eut tref-belle assemblée des grāds Seigneurs de l'Empire à Vuormes, où fut appellé Luther ayant le sauf-conduit de l'Empereur. Premier que ceste assemblée se feist, il auoit faict imprimer ie ne scay combien de liures: en plusieurs desquelz il couuroit fort industrieusement la malignité de son esprit, ne taschant que d'auoir le bruiet des lecteurs en pieté & doctrine. Si eussiez veu en ces liures plusieurs choses qui auoient espee de grande pieté, esquelles il interpretoit la sainte escriture, & tantost enhorroit, tātost blasmoit les hommes: mais c'estoit pour mieux palier ce qu'il machinoit. Quelques hommes de grande autorité iugeoiēt, apres auoir leu beaucoup de telz escriptz, que son but & scope estoit seulement le zele de repurger l'Eglise, de remettre sus la discipline Ecclesiastique, & d'exciter les hommes en l'honneur & dilection de leur Dieu. Telz liures estoient, l'Exposition des dix preceptes, & des sept Psalmes, que nous appellons Penitentiels, & aussi l'interpretation de l'Oraison dominicale, de la liberté Chrestienne, vn Commentaire sur l'epistre aux Galates, & plusieurs autres. Mais toutes choses dissimulées ne peuvent estre de longue durée, & les Mores ne changent iamais de peau. Parquoy fut bien tost decouuert ce, à quoy pretendoit ce bon homme. La Diete estant encommencée, se trouua là Hierosme Aleander, Nonce du Pape, lequel entre autre grande erudition estoit fort expert en la langue Hebraique, & depuys fut faict Archeuesque de Brindes, & Cardinal. Dōcques en pleine assemblée de tous les Estatz de l'Empire, vsant de l'eloquence de laquelle il estoit doüé, discourut amplement sur la sedition, rebellion, impieté, blaspheme & heresie de Luther. Mais encore que tout son narré fust vray, si est-ce que

plusieurs n'auoient pas encore bien feuilleté les liures de Luther: & pensoient que ceste remonstrance fust plustost sortye par quelque affection de maluëillance & enuie, que par vn bon zeile de Iustice: tellement que pour vn temps ceste harangue ne les persuada pas beaucoup. Mais apres que le mesme eust recité enuiron quarante chapitres, extraictz de la Captiuité de Babylone, nouuellement composée, esquelz y auoit plusieurs choses pour amorcer, & instiguer le peuple à sedition: les Princes, qui ce escoutoient, & n'auoient encore leu le liure, ny n'eussent oncques pensé que cela fust sorty de la boutique de Luther, commencerent à se regarder l'un l'autre: & de faict s'enaignirent fort contre Luther & les sectateurs d'iceluy. Ce voyât Frideric, Electeur de Saxe, qui fauorisoit fort à Luther, dist qu'on imposoit ces articles faugement à Luther. Parquoy comme l'un affermast que cela estoit de Luther, & l'autre le nyast, la commune deliberation & aduis des Princes fut, que Luther viendroît luy mesme. Pourquoy faire l'Empereur luy donnoit plain faufconduit, duquel neantmoins les partizans de Luther ne se contenterent point: par ce qu'il craignoit que luy estant arriué, l'Empereur le liurast au Pape, ou bien que, pour ce qu'il estoit heretique, on ne luy garderoit point la foy. Qui fut cause que les Princes disputerent & consulterent longuement ensemble, à quel faufconduit il estoit expedient de le faire venir: tant il y auoit d'affaire pour vn moine, ia conuaincu d'heresie. Plusieurs trouuoient fort mauuais, dequoy on ne se vouloit point contenter de la promesse publique de l'Empereur: mais Luther en auoit ia encheuestrez plusieurs par ses escriptz, & les espritz des hommes estoient enflammez contre le Clergé par toute l'Allemagne: de maniere qu'il sembloit, q̄ quelq̄ sedition sortiroit de cecy. Dont l'Empereur tres-humain, permit que quelques Princes prometteroient leur foy à Luther, outre la sienne. Toutesfoi, afin qu'il ne feist sourdre, par ses violens & picquas sermons, encore quelque plus grand trouble, l'Empereur luy feit defence d'escrire ou prescher par tout le chemin. Parquoy fut enuoyé vn commis de l'Empereur pour amener Luther, le-

*On arreste
que Lu-
ther vien-
dra en per-
sonne.*

quel ne veint point seul, mais avec le Prieur Ionás, Scurffe Iurifconsulte, & Amſdorff Theologien. Par tous les chemins on eust veu vne grande multitude d'hômes, qui accouroient celle part pour voir Luther: on le careſſoit aux hoſteleries: & euſſiez veu ce moyne, qui portoit encores le froc, prendre vn Luth en ſa main, chacū regardant ce prodige cōme ſi ce fuſt eſté vn Orphée. Car il falloit cōmencer ce tāt plaſant Euāgile, par ces gentils exercices & recreations du monde: & non pas par penitence, comme diſoit Jeſus-chriſt par ſa predication. Venu qu'il fut à Erphord, oultre la defence à luy faiſte par l'Empereur, il preſcha publiquement vn Dimāche, & feit im-^{Luther}primer ce ſermon: ne deſirant autre choſe, ſinon que ſa doctri-^{preſche}ne contre le merite des euures bonnes, contre le Pape, con-^{malgré}tre le Clergé, & contre les loix humaines, fuſt cogneuē à vn^{l'Empe-}chacun. Dequoy l'Empereur n'eſtoit aucunement aduertty, à^{reur, par} cauſe que ſon commis ne l'en certioroit point: en quoy il fa-^{les chemins}uorifoit à Luther, en choſes repugnantes totalement à la volonte de l'Empereur. Eſtant ia bien pres d'Vuormes, on dict que quelcun l'admonneſta du dāger qui luy eſtoit prochain, mais qu'il n'en feit point de compte. Ce qu'a inſeré Sleidan, à fin de nous faire accroire, que c'eſtoit vn homme fort conſtant & vertueux: mais il n'y auoit riē à craindre, veu la foy à luy promiſe ſi pertinēment. Et vn peu deuant il auoit aſſez montré, cōbien ſa conſciēce ſentoit d'algarades en elle, lors qu'eſtant à Ausbourg avec le Cardinal Caietain, & craignant d'eſtre prins, il impetra par ſes amys vne ſauuegarde imperialle, & ſoſta delà. En fin doncques il arriua à Vuormes, le ſeiziefme d'Apuril. Le lendemain on le preſenta à l'Empereur, aux^{Luther} Princes & Eſtatz de l'Empire, & luy fut enioinct de ne parler^{propoſe à} point, ſinon comme il ſeroit interrogé: & puyſ on luy com-^{l'Empe-}manda qu'il euſt à confeſſer publiquement, ſil n'auouoit pas^{reur.} pour ſiens, les liures qu'on luy nomma à l'inſtant, & encore ſil auoit point deliberé de ſe deſdire de certains pointz en iceux contenus. Quand au premier, il confeſſa volontiers ſes liures: mais quand au ſecond, il requiſt quelque delay pour deliberer, à fin de pouuoir reſpondre, à l'honneur de Dieu &

sans le peril de son ame. Lesquelles parolles estoient masquées
 de religion, veu que sil eust à bon escient recogneu ses er-
 reurs, il les eust detestez sur le champ, & de prinſaut il se fust
 reposé sur la sentence de l'Eglise Catholique. Les Princes ad-
 uiferent sil estoit besoing de luy octroyer ce delay, attendu
 que long temps deuant il estoit certioré, à quelle occasion on
 l'auoit là appellé: toutesfois l'Empereur fut si courtoys, qu'on
 luy donna vn iour d'aduis. En cest endroit, Luther se vante
 soy mesme, & escrit que quelques vns l'encouragerent, & en-
 tre autres choses luy dirent: bien heureux est le ventre, qui t'a
 porté. Mais toute l'Europe a ſceu à son damp & mal-heur,
 combien ceste parolle estoit veritable, & l'experimente de
 iour en iour. Toutesfois il n'ya point de doubte, qu'il ne se ré-
 dist plus glorieux par telles loüanges & acclamations. Le len-
 demain doncques, enuiron les six heures du soir, il fut admis
 en la presence de l'Empereur & des Princes: & luy fut en-
 ioinct de dire, sil ne cognoissoit pas telz liures pour ſiens, &
 sil ne se vouloit point dedire. Lors il tergiuersa, & veint à di-
 ſtinguer ſes liures en trois sortes. Mais on luy respondit tout
 court, que ſans aller chercher cinq piedz de mouton, où il n'e-
 y a que quatre, il respondist en vn mot. Alors il feit telle res-
 ponce. Si ie ne ſuis conuaincu par tesmoignages des escritu-
 res, ou par raison euidente, (car ie ne croy ny au Pape, ny aux
 Conciles, par-ce que c'est chose notoire qu'ilz ont ſouuent
 erré, & ſe ſont contredictz) ie ne puy, ny ne veux, reuoker
 aucune chose, moy ayant esté vaincu par les passages que ie
 cite, & ma conſcience appuyée ſur la parolle de Dieu: & n'est
 pas bon ny expedient de rien faire contre icelle conſcience.
 Vous voyez la conuenance qu'il y a entre ces parolles, & la
 proteſtation qu'il feit deuant le Cardinal Caietain, par laquelle
 il proteſte, qu'il ſuyt & en dictz & en faietz l'Eglise Romaine.
 Au moyen dequoy les Princes, ces parolles ouyès, & apres
 auoir interietté quelque deliberation, respondirent par l'Ora-
 teur de l'Empereur: O martin, vne responſe ſi peu modeſte
 ne t'estoit gueres ſeante. Car qu'appartient-il de retracter ce
 que iadis a esté bien traicté? & reuoker de rechef en doub-

*la lance
de Luther*

*La prote-
ſtatio que
feit Lu-
ther deuant
tous les
Princes.*

*Responſe
de Luther.*

te, ce que & l'Eglise, & le Concile de Constance ont ia condanné, ce que ores tu fais? Veux-tu estre conuaincu par escritures? Tu t'abuses en cela, attendu que iadis l'Eglise a prononcé la sentence d'icelles. Luy disant encores que sa conscience estoit là liée, respondit qu'il ne le pouuoit reuoker. Et pour ce que les tenebres de la nuyt s'approchoient, le Conseil se leua incontinent.

LE iour ensuyuant, l'Empereur escriuit de sa main aux Estatz del'Empire, en langage Bourguignō: lequel nous pouuons mettre de ceste sorte en François. Il n'y a celuy d'entre vous, qui soit ignorāt, que ie suis issu des Empereurs tres-chrestiens, de l'illustre natiō d'Allemagne, des Catholiques Roys d'Espagne, des Archiducz d'Austriche, des Ducz de Bourgogne. Lesquelz tous se sont declarez fideles à l'Eglise Romaine, iusques au dernier soupir de leur vie, & ont tousiours esté les defenseurs & propugnateurs de la foy Catholique, des saintes ceremonies, decretz, & ordonnances, pour l'honneur de Dieu, augmentation de la Foy, & pour le salut des ames. Lesquelz estans de ce monde allez en vn autre plus heureux, nous ont laissé par vn instinct de nature, & comme par droit hereditaire, les saintes constitutions Catholiques, que nous venons de dire: afin que nous suyuiions leur trace, & en icelles defendant nous endurions la mort. De maniere que nous desirans d'estre imitateurs de noz ancestres, auons iusqu'à present (graces à Dieu) vescu en telle sorte. Au moyen dequoy ie suis resolu de defendre & soustenir, tout ce que & mes predecesseurs ont obserué, & moy iusqu'à ceste heure: & singuliere ment ce qui a esté arresté, au consentement de mes maieurs, tant au Concile de Constance, que és autres. Comme doncq' chacun cognoisse qu'il n'y a qu'un moyne qui refuse, de ceu de sa particuliere opinion, laquelle diametralement combat contre la sentence des Chrestiens, qui ont vescu y a plus de mille ans, & de ceux qui sont encore pleins de vie: & laquelle soustient que tout le temps passé les Chrestiens ont esté en erreur. A ceste cause ie me suis totalement deliberé d'exploier mon Empire, Royaumes & Prouinces, mes amys & alliez, mō

*Epistre
Catholi-
que de
l'Empe-
reur aux
estatz de
l'Empire.*

“ corps & mō sang, iusqu'à la perte de ma vie : à fin que cest ef-
 “ fort ne passe plus outre, veu qu'en faisant autrement, & vous
 “ & moy encourrionsvne ignominie perpetuelle : vous, dis-je,
 “ qui estes l'excellente & renommée nation d'Allemagne, &
 “ qui auez pour priuilege d'honneur, autorité & prerogatiue,
 “ que vous estes estimez obseruateurs de iustice, & defenseurs
 “ de la Foy & Eglise Catholique.

“ **Q**ue si de nostre temps, ie ne dy pas heresie, mais biē en-
 “ core loupçon d'heresie, où quelconque imminution de la re-
 “ ligion Catholique s'enracine és espritz des hommes: sans fau-
 “ te cela sera tourné à perpetuel vitupere à toute nostre poste-
 “ rité. Et par ainsi, puy que nous tous ouïsmes hier l'opiniaistre
 “ responce de Luther, c'est auiourdhuy que ie vous manifeste-
 “ ray ma pensée, asçauoir que ie me repēdz beaucoup, de quoy
 “ i'ay tant demeuré à proceder alencontre de cest homme &
 “ de sa fauce doctrine : & que desormais ie ne l'escouteray ia-
 “ mais, quoy qu'il puisse alleguer. Et si commāde, que de ce pas
 “ il soit ramené selon que porte le mandemēt, & qu'il se don-
 “ ne garde selon le sauf-conduit à luy donné, de prescher pu-
 “ bliquement, & d'instiller ses peruerfes opinions en l'esprit du
 “ peuple: & finalement qu'il regarde soigneusement, à ce que
 “ par son moyen quelque trouble ne s'esmeue. Car ie me suis
 “ deliberé, (comme i'ay deia dict) de proceder contre luy, cō-
 “ me estant notoirement heretique : & vous requiers par mes-
 “ me moyen, qu'en ceste cause vous arrestiez chose conuenā-
 “ te à bons Chrestiens, & comme vous auez promis de faire.
 “ Escrit de ma main, le dixneuuesme d'April, 1521. Ceste epi-
 “ stre tant Catholique fut pour lors leüe à Vuormes, deuant tous
 “ les Seigneurs de l'Empire, & le dixiesme de May, par le com-
 “ mandement du Pape Leon, fut recitée à Rome en plein con-
 “ sistoire deuant tous les Cardinaux : & en ces deux lieux fut
 “ merueilleusement admirée la constance, le zele & l'integrité

*L'Empe-
 reur est re-
 puté enfāt
 par les he-
 retiques.* de l'Empereur. Toutesfois les Lutheriens disoient, qu'il estoit
 vn enfant, lequel estoit tourné par les Papistes de leur costé:
 & n'eussent pas ainsi dict, s'il eust voulu estre Lutherien. Pour
 le moins luy faisoient ilz fort grande iniure, quand toutes les
 nuyctz

nuictz ils escriuoient aux portes : mal-heur à la terre, qui a vn ieune Roy. Car certainement l'Allemagne n'estoit pas digne (veu si grande ingratitude) d'un si bon & catholique Prince. Et pleust à Dieu qu'il eust cōtinué & perseueré en ce que pour lors il auoit conclud, & que les Princes Catholiques ne luy eussent point soufflé aux oreilles, qu'il ne falloir pas proceder si viuement contre Luther, de peur que les choses ne s'enaignissent, & que trouble ne s'en ensuyuist. Il sembloit que pour lors c'estoit vne chose bien expediente: mais les occurrences des affaires ont monstré, combien est vray ce que dict le poëte.

Obuie au mal des le commencement:

Car quand il a par demeure prins force,

En vain remede y donner on s'efforce.

CE n'est pas cruauté de retrancher vn membre pourry, à fin que la contagion ne glisse plus auant, & que tout le corps n'en soit infecté. Or Luther estant party de Vuormes, ses amis le prindrent par grande finesse: qui fut cause que le bruiet courut incontinent par tout, que contre la foy publique à luy promise, il auoit esté prins. Tellement qu'il ne s'en fallut de rien, que sedition ne s'ensuyuist de ce, & principalement à Vuormes, iusqu'à tant qu'on sceut la verité. Car Luther fut mené selon le vouloir de Frideric son Seigneur, à Alstad, cōme l'on dict, lequel lieu ses fauoritz appellerent *Path * à cause mos, à cause de l'euenement: sçauoir est, qu'estant en seureté que Sainct Iehā escriuit son Apocalipse en Pathmos. En ce chasteau il escriuit plusieurs choses dignes d'un tel homme. Et entre autres il exhortoit les ieunes hommes à fuir la Philosophie, & Theologie Scholastique, comme la mort de l'ame, & afferme que Sainct Thomas d'Aquin a escrit plusieurs choses heretiques. Qu'ay-ie affaire (dit-il) que l'Euesque des bulles l'aye canonizé. Ainsi appelle-il le Pape, lequel auoit mis Sainct Thomas au nombre des Saincts, de meilleur iugement, que Luther ne l'arguë d'heresie. Car comme Mahometh prohibe en son Alcoran, que ceux de sa secte ne disputent avec les Chrestiens, de peur qu'ils, qu'on recognoisse & reiette ses inepties trop lourdes, refus-

L'AN M. D. XXI.

HISTOIRE DE TOUTES CHOSES

tées par vifs argumens : ainsi Luther prohibe aux siens la lecture de la Philosophie & Theologie Scholastique, sçachant assez, que quiconque est versé en icelles, facilement cognoistra ses erreurs, & aisément les refutera. Au reste, quand à ce qu'il assure de Saint Thomas, cela est vne pure & fauce mensonge, dicté impudemment d'un si docte & si saint personnage: & tous les doctes recommandent fort ses liures, quoy qu'il n'ait la diction gueres pure, à cause que cela ne couroit pas de son temps.

LUTHER estant en ce mesme chasteau escriuit son liure, pour abroger la Messe priuée, à ses freres les Augustins de Vuittemberg: lesquels premier que nuls autres auoyent faict cesser les Messes. Et les en-horte, que contre leur propre conscience ils persistent en ceste leur emprise, tout ainsi qu'il dict auoir faict en quelques choses. Dont ie m'esmerueille comme se peut faire, que ceux qui viennent à lire cecy, ne

*Luther as-
se desueloppent
incontinent de
ceste doctrine
Lutherienne.
Certes c'est
chose trop
manifeste, que
ceux se damnent
à escient, qui
escoutent vn
si meschant
homme, asser-
mant de se-
estre porté en
plusieurs
choses contre
sa conscience.*

se desueloppent incontinent de ceste doctrine Lutherienne. Certes c'est chose trop manifeste, que ceux se damnent à escient, qui escoutent vn si meschant homme, assermant de se-estre porté en plusieurs choses contre sa conscience. Car de combattre contre sa conscience, qui nous destourne de mal faire, qu'est-ce autre chose, que d'estre rebelle à la lumiere, & ne vouloir obtemperer à la verité, ains(icelle mesprisée) faire tout ce qu'on conuoite? Au reste, Luther fest parforcé par tous moyens à luy possibles d'abroger la Messe, & de priuer l'Eglise de ce saint sacrifice: de maniere que nous pouons nous assurer, que ç'a esté vn auant-coureur de l'Antechrist, qui esteindra totalement ce perpetuel sacrifice.

*La Sorbon-
ne condam-
ne Luther.*

En ce mesme an les Theologiens de Paris condânerent les escrits de Luther en pleine assemblée, iagoit que Luther & ses fauoris ne s'attédissent pas à cela. Tellemēt que Philippe Melāthon, estat encore ieune, escriuit contr'eux vn liure qu'il intitula: cōtre le furieux decret des Theologastres de Paris, &c. Et c'est la modestie qui a accompagné tousiours & Luther & tous ses sectateurs, laquelle ilz n'ont point apprise en l'eschole

de Iesus Christ, mais bien de celuy, qui est Roy sur tous les superbes. Luther escriuit pareillement contre eux en l'ague vulgaire, & ie dis fort furieusement: afin qu'il encourageast le peuple alencontre d'eux. Mesmes ses amis feirent imprimer vn liure de bayes & fornettes, sous le nom de la faculté de Theologie de Paris. Car ceste sorte d'hommes ne scait communément qu'alleguer contreses aduersaires, que des mensonges, iniures, conuices, contumelies, brocardz & autres telles choses: & ce pendant ilz s'appellent les gens de bien & Euangeliques, & qui ont remis en lumiere la pure doctrine.

EN ceste année l'Empereur estat à Vuormes feit vn Edict fort seuer contre tous nouateurs de la religion Catholique: *Edict de l'Empereur contre les Lutheriens.* auquel entre autres choses il dict, que Luther n'est point vn homme, ains vn diable incorporé, lequel a ramassé toutes les heresies iadis condamnées, pour corrompre & gaster tout le genre humain. Ce qui est si vray, qu'à tout iamais l'Allemagne portera sur le front l'ignominie & confusion d'auoir permis, que ceste nation (iadis si constante & entiere) ait tant attribué aux fables de cest homme. Sleidan en ceste part confesse, que l'Empereur dict, que cest Edict estoit fait par le commun conseil des Princes & des Estatz: mais il adioust incontinent: on dict que cest Edict auoit esté composé par quelques vns: voulant en cela conuaincre de mensonge ce bon & Catholique Empereur, de peur que, l'impieté de Luther estant condamnée par l'vniuerselle ordonnance d'un si grand Prince, & des Estatz de l'Empire, la cause de Luther ne recoiue vn grand eschech. Mais aussi, qui pourra souffrir ceste impudence d'un homme, lequel pour defendre la partie de Luther, veut que nous soupçonnions de mensonge vn si puissant Empereur? Ne se contentant encore de cela, il adioust ie ne scay quoy en passant contre l'Archeuesque de Mayence: & me doute fort, qu'il le veut accuser d'estre menteur: car il a escrit cela fort couuertement. Toutesfois, ie n'ay garde de croire plus aux piperies de Sleidan, qu'à des Seigneurs si vertueux.

L'AN M.D.XXI.

HISTOIRE DE TOUTES CHOSES

*Saxe des-
bauchée
par Lu-
ther.*

À LA vérité c'est chose digne d'estre admirée, comment Luther a peu si aisément flectir & tourner à son opinion la belliqueuse & courageuse nation de Saxe: nation que Charlemaigne a bien trauaillé l'espace de trente ans à faire Chrestienne. Et depuis n'a oncques forligné de la Foy, ains a tousiours perseueré constamment, estant fort officieuse enuers l'Eglise Romaine. Mais ce fin rustre, ayant assez expérimenté, qu'en ce temps la plus part de ceste contrée est adonnée par trop aux voluptez de boire & de manger, les voulant empieter, de quel moyen a-il vlé? il leur a lasché la bride, il leur a faict accroire que ieusner, prier, veiller, se confesser au Prestre, & faire autres exercices de pieté, c'estoient les inuentions des Papistes & moynes. Ce qu'estant de soy assez plausible à des hommes imprudens & mal sages, & qui ne s'apperçoient pas de la premiere foys de la ruzé d'un imposteur, ilz ont esté facilement seduitz sous le masque de la parole de Dieu, & ruinez par mesme moyen, de façon qu'ilz ont laissé la trace de leurs ancestres, lesquels ont demeuré en l'Eglise Catholique constamment, comme il appartenoit à leur constance naturelle.

*Le Turc
prend Bel-
grade en
Hongrie.*

EN ce mesme an le Turc Solymán print par force la ville de Belgrade, située où le fleuve Sauo se desgorge dans le Danube, pendant que les Princes Chrestiens estoient enyurez aux cogitations des guerres intestines: & estoit ceste ville la plus belle forteresse de toute l'Hongrie. De sorte qu'Amurathes & Mahometh, ses predecesseurs, Roys de Turquie, festans aheurtez à la prendre, n'y peurent oncques rien faire, & furent contrainctz leuer le siege à leur courte honte. Or ce que facilita les moyens de ce faire à ce Tyran, fut, que le ieune Roy Louys & les grandz Seigneurs du país ne s'accordoient gueres bien, & partant ne sceurent mettre en barbe grande puissance contre ce barbare.

CE mesme an Ferdinand, Archiduc d'Austriche, espousa Anne fille du Roy d'Hongrie: & Loys, Roy d'Hongrie, la seur de Ferdinand, nommée Marie.

ET ce fut en ce temps, hélas! que la guerre commença

entre l'Empereur Charles & le Roy de France, & ne pense point qu'aucun sceust assez exprimer combien elle a esté dō-<sup>Guerre entre l'Em-
pereur & le Roy.</sup>mageable & preiudiciable à l'estat Chrestien : quand bien il n'y auroit raison, sinon que ce-pendant Luther & ses compaignons auoient le moyen & l'opportunité de respandre leur poison comme ilz desiroient. Que si ces deux Monarques ne se fussent point entre-guerroyez, les heresies eussent aussi tost esté esteintes comme elles pulluloient. Mais noz pechez irritoient de iour à autre l'ire de Dieu, laquelle en fin a permis à Satan de troubler & persecuter son Eglise: & plaie à Dieu que nous n'y retournions plus pour le prix.

PAREILLEMENT en ceste année les François perdirent Milan, & peu apres l'an 1522. le Pape Leon ayât esté em-^{Mort du Pape Léon}poisonné, passa de ceste vie en l'autre : & fut crée en son lieu Adrian florent, Hollandois, homme de non moindre doctrine que de sainte vie, & qui par le passé auoit esté precepteur de l'Empereur Charles. Puy apres, estant Cardinal, auoit fort dextremēt manié les affaires d'Espaigne en l'absence du Roy, & l'auoit remise en tranquillité. Car Charles estât sur le point de partyr pour venir en Allemagne, l'auoit laissé Gouverneur avec puissance Royale es Espaignes.

L'AN 1522. Christierne, Roy de Dannemark, payant ses <sup>Christierne chassé de son Roy-
aume de Danne-
mark.</sup>forfaitz & cruautéz, fut chassé de ses terres, & vint avec Isabeau, sœur de l'Empereur, à Malignes. Si ne vescu guere ceste Isabeau par apres, & fut son corps enterré à S. Pierre de Gand. Lors que Christierne quitta & abandonna Dannemark, George Scotborch, Archeuesque de Lunde, fuyant sa tyrannie, l'auoit deuançé, comme nous auōs escrit cy dessus. Si aduint, que luy seiournant à Amsterdam, qui est vne ville fort riche & marchande en Hollande, Christierne se trouua au mesme lieu : & rencontrant l'Archeuesque en exil, (lequel par deuant il auoit persecuté fort felonémēt) parla à luy fort humainement, en vn pais estrange, dont l'Euesque estoit fort esmerueillé, & esbahy d'une si soudaine mutation du Roy. A quoy doiuent regarder ceux qui s'enorgueillissent, & s'enflent quand ilz ont le vent de fortune en poupe : abusans de leur

puissance en toute tyrannie & cruauté, comme si Dieu ne se soucioit nullement des choses humaines.

*Henry
Roy d'An
gleterre
escriit con
tre Luther*

DURANT ces menées de la religion, Henry huitiesme, Roy d'Angleterre, composa quelque liure contre Luther: au moyen dequoy le Pape, en plein consistoire des Cardinaux, luy donna le tiltre de Defenseur de la Foy.

*Refuerie
de Melan
cthon &
Carolstad
touchant
l'estude.*

A V S S I enuiró ce temps, Luther laissant sa retraicte, qu'il appella Pathmos, retourna à Vuittemberg: mais deuant qu'il fust de retour, estoit aduenü à Vuittemberg vne chose memorable, pour la folie de laquelle elle est pleine. Car Carolstade & Melancthon estans persuadez par les escritz de Luther, comme les meilleurs & plus synceres disciples de son escole, remonstrerét à la ieunesse qu'il ne falloit aucunement estudier à la Philosophie: que Platon, Aristote, Ciceron, & semblables autheurs, n'auoient escrit que songes friuolles, impostures & choses controuuees: & partant qu'il falloit passer tout cela par le feu, s'addonner & appliquer seulement à la leçon de la sainte Bible: & qu'au reste, il n'estoit loysible à vn Chrestien de passer sa vie en l'estude des lettres, ains que chacun estoit tenu d'effectuër ce qui est dict en la Genese, tu viuras de ton pain en la sueur de ta face. Or qui doute maintenant, que ces braues Catons, pour estre agitez d'une arrogance & hautaineté, ne soient tumbez en vne si grande refuerie, que les vieilles auroient honte de soustenir? Car il n'y a celuy qui ne sçache les commoditez & vsages, que nous receuons des artz liberaux, pourueu que nous en vsions modérement & sobrement. Luther auoit escrit au liure à la noblesse d'Allemagne, qu'on deuoit totalement abolyr la Physique, Metaphysique, & Ethiques d'Aristote: & c'estoit la fontaine, où Melancthon

*Carolstad
laboureur
& Melancthon
boulenger.*

& Carolstade auoient puyté ceste tant gentille doctrine. Mais ce n'est encore rien, si Carolstade ne se fust fait d'Archidiacre de Vuittemberg, laboureur au dict pais de Vuittemberg: & si Melancthon ne se fust fait boulenger: de façon que maints ieunes hommes, faisans brusler les liures des artz liberaux, embrasserent les mestiers mechaniques. Et encores les choses allerent si auant par l'ourecuydee temerité de ces in-

senſez, que par quelques années les eſcoles furent fermées en pluſieurs lieux. Mais de retour que fut Luther à Vuittéberg, il tença aſprement Melancthon de ceſte folie: & chaſſant Carolſtade de tout le païs de Vuirtemberg, par vn ſien liure afferma, que la Philoſophie eſtoit bonne de ſa nature. Car iamais n'y eut homme plus inconstant en ſes eſcritz, que Luther, & bien ſouuent eſtoit contraire à ſoy meſme, ce que ne pourrôt oncques nyer ſes amys & flatereaux, ſil ne ſont totalemēt eſfrontez. Et quand il n'y auroit autre argument, cela monſtre aſſez de quel eſprit il eſtoit pouſſé. Car en ce temps, en plein ſermon il deſapprouua ce qu'auoient faiēt ſes freres les Auguſtins, en l'aboliffement de la Meſſe: bien qu'auparauant il l'eueſt aduouié. Mais luy, ſuperbe & hautain, ne trouuoit pas bon qu'on l'eueſt faiēt ſans ſon cōmandement. Il eſcriuit auſſi fort ſeditieufement, & en grande moquerie, contre la bulle de Pape Leon dixieſme. Mais ſe deſpouillant de toute modeſtie & vergongne, il meit toutes ſes forces à eſcrire alencontre du Roy d'Anglererre, où il ſe desborde à meſdire au poſſible, à cauſe que ſon mal-heureux Euangile auoit reçu vne grand' eſcorne par ce liure du Roy, tourné en Aleman par Hieroſme Emſer. Luther ſe hauçant, & enflant en ce ſien liure d'vne incroyable ſortiſe & arrogance, diēt entre autres choſes: Quand à moy, j'oppoſeray alencōtre des diēt des peres, des hommes, des anges, des demons, non point l'ancien vſage, non point la multitude des hommes: mais là parolle de la maieſté eternelle, l'Euangile qu'eux-meſmes approuueront. Je ſuis là, ie m'arreſte là, ie demeure là: c'eſt icy que ie me glorifie, que ie triōphe, que ie me mocqueray des Papiſtes, Thomiſtes, Henriciſtes, & de toutes les portes d'enfer, non ſeulement des diēt des hommes (quoy qu'ilz ſoient ſainctz) & d'vne fauce couſtume. La parolle de Dieu eſt ſur tout: la diuine maieſté faiēt tāt, que ie ne me ſoucie, encore que mille Auguſtins, mille Cyprians, & mille Eglifes d'Henry fuſſent bandées contre moy. Je vous prie, ces parolles ne ſont-elles pas monſtres & prodiges? Et toutesfois ce miſerable a trouué ie ne ſçay quelz hommes, qui penſent & croient fermement, que

Luther
deſaduoue
ce qu'il auoit
aduouié.

Il eſcrit
contre le
Roy d'An-
glererre.

Intolera-
ble arro-
gance de
Luther.

tout ce qu'il disoit ou escriuoit estoit l'Euangile. En ce mesme
 liure il se iacte d'auoir triomphé de la Messe, & quant & quāt
 de toute la Papauté. Mais certainement il est impossible qu'il
 ayt dict cela, agité d'autre esprit, que celuy de l'Antechrist, le-
 quel pour vn bref temps triomphera de la Messe, lors qu'il o-
 stera ce sacrifice quotidien : qui est la chose la plus sainte &
 plus profitable, qu'aye l'Eglise. Et pouuons biē dire sans nous
 tromper, que malheureux est nostre siecle, qui a peu souffrir
 vn si grand blaspheme & meschanceté. Ce neantmoins lors
 que Luther escriuoit si desesperément, il n'auoit pas encores
 laissé son froc, & dict au mesme liure : mes sentences & opi-
 nions demeureront, mais le Pape tresbuchera. Toutesfois il a
 menty vilainement, attendu qu'en cetuy nostre temps bien
 peu d'heretiques suyuent en tout & par tout la doctrine de
 Luther : & nonobstant la dignité Papale est encor' en estre, &
 Luther pieça estouffé & esteinct, avec les resueries en plusi-
 eurs lieux. D'abondant, au mesme lieu il a inseré certaines
 choses, lesquelles denigrent grandement l'hōneur & renom-
 mée tant de l'Empereur que des princes d'Allemagne : i'ay,
 dit-il, déia comparu par trois fois deuant eux. I'ay entré dans
 Vuormes, bien que ie sceusse que l'Empereur auoit rompu
 mon sauf-conduit. Car à present les Princes d'Allemagne,
 (natiō par le passé fort louée & remarquée en la foy) ne sça-
 uent rien plus que de rompre leur sermēt, puy qu'ilz se sont
 asseruys à l'Idole Romaine : ce qui sera à l'ignominie perpe-
 tuelle de la nation. N'est-ce pas cela dire, que & l'Empereur
 & les Princes sont pariures & desloyaux? N'est-ce vn prodi-
 ge, d'estre si desbordé? A la verité si ie voulois icy denommer,
 tout ce que ce faux moyne & apostat a vommy en ce sien liure,
 (choses intolerables à toutes aureilles bien nourries) ie n'en
 sçauroy iamais trouuer la fin. Toutesfois ie ne m'estonne pas
 tant comme il a escrit cela, que ie m'esmerueille comment on
 luy a adiousté foy. Sleidan se baigne en plaisir, quand il peut
 reciter quelque chose, que les Papes du temps passé ont fai-
 cte contre les Empereurs, afin de les faire hayr aux Princes,
 & d'aiguiser & en-courager leurs espritz alencontre d'eux.

Mais

*Prophetie
faue de
Luther.*

*Luther ac-
cuse l'Em-
pereur de
desloyauté*

*Façon de
faire de
Sleidan
bien fine.*

Mais quand ce basteleur de Luther viét à mesdire impudemment, & à fouler l'honneur de l'Empereur, des Princes, & mesmement du Roy d'Angleterre: cest homme de bien se garde fort sagement de le blasmer, ains disant qu'il a brauement respondu à l'Anglois, semble qu'il le louë. Dequoy sert donc ce que chante l'Escripture, tu ne mediras point du Prince, ou Gouverneur de ton peuple? Mais Sleidan avec son Luther s'en aille, où il est digne. Si composa Luther en cest an vn liure, intitulé de ceste sorte: Contre l'estat fausement nommé des Ecclesiastiques, du Pape & des Euesques: auquel il se dict estre vn Euangeliste & Ecclesiaste de Dieu, & encores escrit ce que s'en suit au Prologue: ie ne veux pas, qu'aucun iuge de ma doctrine, ny mesmes les Anges. Car puis que i'en suis certain, ie veux paricelle estre & vostre iuge (dit-il au Pape & aux Euesques) & iuge des Anges &c. Mais qui scauroit deüement expliquer, combien de fois le galand à changé tout soudain sa doctrine (de laquelle il se dict estre tant assuré) maintenant affermant ce qu'au parauant il auoit nyé, & maintenant nyant ce que deuant il auroit approuué? Car s'il estoit si certain de sa doctrine comme il se vante, pourquoy la-il si souvent chagée? Vous semble il pas bien fin, disant qu'il ne veut auoir aucun iuge, à fin que par ce moyen il luy soit loisible d'escrire ce qui luy viédra en teste? Je suis tout estonné, comment les hommes Chrestiens ont suiuy vn babillad, si prodigieusement euenté. Au mesme liure il escrit fort seditieusement cōtre les Euesques: ce que ne scauroit estre recité sans grādissime offence, tant cest homme estoit hors de son bon sens, & si iracundieux, qu'il ne se pouuoit moderer. Vous pouvez voir s'il n'estoit pas en la puissance de Satan, duquel il estoit miserablement tourmēté, quand il escriuoit plus que barbarement au mesme liure: il vaudroit beaucoup mieux que tous les Euesques fussent massacrez, que tous les monasteres & colleges fussent renuersez de fond en cōble, que si vne seule ame, ie ne dis pas toutes, se perdoit pour ces badineries. Et toutesfois vn seul Luther a plus precipité d'ames, qu'on n'en scauroit conter: & faut penser que par ces parolles si fort seditieuses, il a grande-

*Luther s'a-
pelle Euan-
geliste &
iuge des
Anges.*

*Voix im-
pie de Lu-
ther.*

Il traduisit mal le nouveau Testament en Allema.
 mēt occasionné les rustiques au trouble qui s'ensuiuit peu apres, auquel moururēt plus de cēt mille païsans. Aussi fut ce en ce temps qu'il tourna le nouveau Testament en Aleman, mais fort mal & infidèlement: pour-ce qu'il y changea, osta, ou adiousta maintes choses: & ne sçauoit-on estimer cōbien ceste versio a esté nuisible & pernicieuse, au peuple principalemēt. Car quelques femmes, à cause de cela, s'estimerent & enflerēt tant, que sans faire conte d'aucuns Theologiens, elles ne doubterent de prescher publiquemēt, & partant enfreindre le com

mandement de S. Paul. Et d'auantage Luther se vantoit avec ses fauorits, que iamais l'Allemagne n'auoit ouy sinceremēt

Deuāt Luther on n'auoit point ou l'Euangile, à ce qu'il dist.
 la parolle de Dieu le tēps passē, & que luy seul produisoit en auāt le vray Euāgile. Mais serons nous si despourueuz d'entēdemēt, que nous estimions noz ancestres auoir esté priués de l'Euangile, qui ont appris & receu la verité de ceux, lesquels

Luther ne seroit pas digne de deschauffer? Et n'a pas l'Allemagne pieça experimenté par vn dommage irrecuperable, combien fructueux & excellent a esté l'Euangile que nous a apporté Luther? C'est icy que les Alemans, & nommément les Princes, se deuroyent mordre les points: de voir que cest impudent ait osé dire si contumelieusement des bons & fidel les Princes, leurs predecesseurs, qu'ils n'ont point eu l'Euāgile. Car si ainsi est, ne s'ensuit-il pas que tous leurs progeniteurs & deuanciers ont esté idolatres? Et que pourroit-on dire plus cō

La nature de l'Euangile nouveau.
 tumelieux q̄ cela? Sans doute l'Euāgile de Luther est si plaisant & bō, que si nos maieurs l'eussent ouy prescher, ils eussent plu stost enduré dix mille morts, que de permettre, que cest Euangile eust cours en leurs cōtrées. Car il ne rēd à autre scope, qu'à troubles & seditiōs: en tous lieux où on luy dōne entrée il engēdre merueilleux debats, si que les subiets ne veulēt plus dependre de leur Magistrat: & celuy d'entre eux qui est le plus seditieux, c'est luy qui est le plus Euāgelique. Car Luther leur

Luther se resjouit des seditiōs & guerre.
 en donne la reigle, disant, que de tāt plus est vray l'Euangile, qu'il engendre de tumultes: & ne se hontoya point de dire à Vuormes en presence de l'Empereur & de tous les Estats de l'Empire, qu'il estoit fort ioyeux & recreé au possible en ce

qui touche les affaires, de voir, que pour la parolle de Dieu il y auoit dissention & discord. Or que la parolle de Dieu ne soit pas cause des estrifz, ains d'une ferme concorde & consentement d'espritz, il appert par ce que dict l'Apostre: Dieu n'est point vn Dieu de dissension, mais bien de *1. Cor. 14* paix. Et d'auantage, nous lisons es actes des Apostres, qu'il n'y auoit qu'un cueur & vne ame en Dieu entre ceux qui croyoient. Mais au contraire, le Diable est homicide des le commencement, & ceux qui excitent troubles & seditions sont *Ioh. 8.* infalliblement de son troupeau. Or doncques combien de tempestes & troubles effroyables ont trauerse l'Europe, depuis que cest Euangile sanguinaire a pris pied en icelle? l'ayme mieux en dire moins, & reprendre mes erres. Lors se trouuoient plusieurs en beaucoup d'endroitz, lesquelz offroient *Allegref. se des Lutheriens, à dilater leur heresie.* volontiers leur seruice pour prescher, & dilater plus ample-ment les erreurs de Luther, & ce sans rien prendre. Mesmes les imprimeurs imprimoient à leurs propres despēs les liures des Lutheriens, fort correctz & bien agencez: mais non pas ceux des Catholiques, lesquelz ilz corrompoient & depra-uoient incroyablement. Et ce fut en cause, que la doctrine de Luther s'amplifia grandement en biē peu de temps, & aduint, qu'un chacun estimoit estre beau ieu, que de se mettre de ceste partie.

EN cest an, comme nous auons cotté cy dessus, Adrian, du pais d'Hollande, fut installé au siege de Rome: lequel *Adrian Pape.* Adrian estoit lieutenant de l'Empereur es Espaignes, & les Cardinaux de Rome le cognoissoient plus par sa vertu & preudhomme, que pour l'auoir veu ou hanté. Il estoit issu de parés de fort petit lieu en la ville du Treict: mais il auoit si bien & diligemment estudié à Louvain, que delà en auant il estoit renommé sans doubte le Prince des Theologiens de Louvain. Au moyen dequoy, & pour-ce aussi qu'il auoit vn maintiē & grace fort singuliere, on l'esleut pour precepteur de Charles cinquieme, tellement qu'estant allé en Espaigne, il y fut faict Euesque & Cardinal: & par apres, se maintenant fort industrieusement en la charge des affaires d'Espaigne en l'absence de

Charles, fut esleué en la dignité Papale, par vn merueilleux accord des Cardinaux. Toutesfois il reteint son ancien nom de Adrian Florent.

*Genes
prise des
Imperiali
stes.*

EN cest an les Imperialistes prindrent l'excellente & superbe cité de Genes, laquelle ilz despouillerent de ses plus belles richesses: de sorte que le Pape Adrian estant venu d'Espagne prendre port en icelle, ne fut reçu si honorablement qu'il eust bien esté, si les habitans n'eussent esté tant affligez. Car Adrian, instigué des instantes prieres du peuple Romain, & de l'exhortation du Senat, vint ceste année surgir à Rome, ayant eu tousiours la mer bonace.

*Prise de
Rhodes,
par les
Turcs.*

OR venu que fut à sa cognoissance, que Rhodes estoit assiegée de deux cent mille Turcs, & battue incessamment, il eut bien bon desir de la secourir; mais la disette d'argent retardoit sa bonne volonté. Doncques les Rhodiens destituez de tout secours & ayde, apres auoir vaillamment & courageusement defendu la ville par quelques mois, & apres auoir passé au fil de l'espee plusieurs milliers de Turcs, furent en fin forcez de rendre l'Isle au barbare, par composition. Et faut scauoir, que le Turc n'auoit entrepris vne si forte & fascheuse guerre pour autre occasion, que pourautant qu'il voyoit les Princes Chrestiens s'entre-battre, & estre acharnez l'un dessus l'autre. Au reste, il n'y a si petit qui ne sçache, que la Republique Chrestienne a reçu vn des plus grandz soufflerz & ignominie en la perte de ceste Isle, qu'elle feit iamais: & faut considerer qu'en mesme cours de temps Dieu estoit si irrité contre nous, que par le dehors les barbares enuahyssoient les terres des Chrestiens: & par le dedans la fauce religion vouloit supplanter la vraye. Et faut bien dire aussi, que nous estiõs fort endormys, puy que tant de miseres & calamitez ne peurent oncques nous esveiller.

*Les liures
que Lu-
ther a re-
iettez du
nouueu
Testamēt.*

PENDANT ce laps de temps, quelques Princes Catholiques, voyans que le peuple estoit alliché & amorcé à l'heresie par la version du nouueu Testament, faicte par Luther, par Ediçtz publiez prohiberēt à tous leurs subiectz de lire lediçt Testament. Car Luther auoit retranché du Canon des escri-

tures, l'epistre aux Hebreux, l'epistre de S. Jacques (laquelle ce meschant osoit bien appeller epistre de foerre) l'epistre de S. Iude, & l'Apocalypse S. Iehan: lequel liure contient autant de sacremens, c'est à dire mysteres cachez, comme il comprend de mortz, di& Saint Hierosme. Si aduint que cinq ans apres Luther changea plusieurs choses de sa premiere version: de sorte que quelques vns ont remarqué trente-six lieux, seulement de l'Euāgile S. Matthieu. Et qui vouldra sçauoir en combien de lieux Luther a depraué la Sainte escripture en la mal tournant, quelques hommes doctes ont employé le temps à les noter. Mesmes Hierosme Emser, homme & religieux & fort docte, tradui& apres Luther le nouveau Testament en Aleman, à fin qu'on veist certains indices de la deprauiō de Luther: & cotta en la marge plusieurs lieux, que Luther auoit mal tourne. Pour lors le pauvre peuple prenoit cōme à l'en-
 uy le nouveau Testament de Luther entre ses mains, & le li-
 soit fort auidement: mais à son damp, comme les occurrēces
 des choses en feirent foy par apres. Car pōuraunt que Lu-
 ther vouloit qu'on ne reçeust autre chose que les escriptures, &
 icelles estoient par luy corrompuēs: ces hommes miserables
 tumboient d'un erreur en vn autre, à cause qu'un chacun for-
 geoit vne interpretation de l'escripture à sa poste. Et de là est is-
 suē vne si grande multitude de sectes, qu'il seroit bien diffici-
 le de les mettre toutes par ordre. Et le mal est, que combien
 que ce soit chose fort calamiteuse, de veoir le peuple porté,
 qui ça qui là, de tout vent de doctrine, & receuoir les songes
 d'un chacun pour vray Euangile: routesfoys ce peuple ainsi
 ruiné, pense que cela ne soit rien. Mais c'est que Dieu les pu-
 nist de celle sorte, à cause que par trop legerement ilz ont pre-
 sté l'aureille aux songes & bourdes de Luther, comme s'il eust
 esté vrayement le premier qui nous eust communiqué l'Euā-
 gile, comme il se vantoit: combien qu'au contraire il a chan-
 gé la lumiere de l'Euangile en tenebres tref-espeffes, au for-
 uoyement & perte manifeste d'ames innumerables. Aussi en
 ce temps Luther escriuit vn fort vilain liure de la vie con-
 iugale, où il maintient entre autres choses fort impudemēt,

*Comme le
 peuple a
 esté trōpé
 en lisant le
 nouveau
 Testamēt
 Lutheriē.*

*Il est ne-
cessaire
d'acointer
les femmes
selon Lu-
ther.* qu'il est totalement necessaire à tous hommes, qui qu'ilz so-
ient, d'acointer les femmes: voire plus necessaire, que n'est
de boire, de manger, & de dormyr. Et partant que tous Reli-
gieux & Religieuses sont tenuz de rompre leur vœu, & de se
marier. Mais faut noter, que lors qu'il escriuoit cecy, il portoit
encores le froc, & par ces paradoxes destrischoit chemin à ses
belles noces, lesquelles il auoit ia arrestées dans son cerueau.
Où estoiet donc l'esprit & les yeux des hommes, lors qu'ilz li-
soient choses si execrables parmy les liures de Luther! Certes
c'est vne horrible vengeance de Dieu, quād les hommes sont
si fort aucuglez.

*Combien
Luther a
osé desbor-
dé contre
l'estat des
Princes.* L'AN 1523. Luther s'estant apperceu, que quelques Sei-
gneurs Catholiques auoient defendu & condamné son nou-
veau Testament, il escriuit contre eux son liure de la puissan-
ce seculiere: mais si aigrement & tempestueusement, que au
respect de ceruy-cy il estoit modeste escriuant contre les Ec-
clesiastiques. Ce qui l'esperonnoit à estre si desbridé en parol-
les, estoit qu'il demouroit chez le puissant & opulent Duc de
Saxe: & a osé escrire en ce sien liure, que pour la plus part les
Princes estoient ou folz principaux, où les plus meschans be-
listres. Mais ie vous prie, y a-il Catholique qui osast coucher
cela par escript, sans offencer & agaçer vn chacun? Et toutes-
fois cest opprobre de Luther touchoit l'Empereur mesmes,
& les Princes: & croy qu'il est impossible de dire, cōbien cest
homme monstreux se plaisoit à detracter & mentir, veu que
vn seul Docteur Iehan Dietenberge, (sans faire mention des
autres) l'a conuaincu en deux confutations seulemēt, de huiet
cens septante quatre mensonges. Ce que sembleroit incroia-
*874. men-
sanges de
Luther.* ble à ceux qui n'ont pas leu les escritz de Luther, & si vn hō-
me desbordé entierement ne se ruoit sur toutes choses. Au
mesme liure que nous venons de dire, de la puissance seculie-
re, il point soubs main quelques Princes fort contumelieuse-
ment en ces parolles: les Tyrans (car ainsi appelle-il les plus
loyaux obseruateurs de la religion Catholique) ont publié vn
Edict en Misnie, Bauiere, & la Marche, qu'on portast tous les
nouveaux Testamens aux bailliages. Mais voicy que doiuent

faire les subiectz en cest endroit: Qu'ilz n'en donnent pas vn
 fueiller, ny vne lettre, sous peine de damnation. Car quicon-
 que le fera, il liure le Christ entre les mains d'Herodes: & ces
 Princes sont comme meurtriers de Christ, tout ainsi qu'He-
 rodes. Voyla les tiltres d'honneur que Luther donne aux tres-
 illustres Princes, lesquelz communément ne vouloient pas
 permettre la version de Luther, à cause qu'ilz voyoiēt, q̄ tous
 les lecteurs en venoiēt plus meschans. Et en ce ilz faisoient le
 deuoir & office de bons Princes: & quoy qu'ilz meritaissent
 grand' loüange pour ce faict, ce pēdard, le plus insolent q̄ fut
 iamais homme, leur a dit les plus atroces iniures qu'on scau-
 roit excogiter. Et en ce faisant, il ne soubliē pas de mesler plu-
 sieurs choses, propres pour exciter sedition: de maniere que
 cest homme agité de quelques furies, ne souhaitoit ny n'auoit
 soif d'autre choses que de meurtres & saccagemens. Ce ne-
 antmoins Sleidan se taist bien en ceste part, selon que j'ay peu
 apperceuoir: & peut-estre qu'il se hontoit luy-mesme, d'es-
 crire iniures si exorbitantes contre les Princes, afin que par
 cela il ne gastast toute la cause de Luther. Mais nous scauons
 bien les traitz & finesse de Sleidan.

*Luther en
 rage de-
 quoy son
 Testamēt
 est cōdam-
 né.*

*Finesse de
 Sleidan.*

En cest an François Sickinge, homme noble, rendit l'es-
 prit en son chasteau de Caustal, estāt frappé d'un coup de bou-
 let: & estoit des plus grandz amis & fauteurs de Luther. Ce-
 stuy auoit denoncé la guerre à l'Euesque de Treues, iusqu'à
 assieger la ville: mais l'Euesque, qui pour lors estoit dans ladi-
 cte ville, la defendit si valleurusement, que l'autre n'y peut
 mordre. Et quelque temps apres, l'Euesque accompagné de
 quelques Seigneurs ses confederez, alla assaillyr Sickinge, si
 qu'ilz luy feirent payer la folle enchere de sa temerité. Au pa-
 rauant il s'estoit acquis vn bon & grand renó, à cause de quel-
 ques bons succez de fortune, lesquelz luy estoient auenuz. Car
 il auoit grandement endommagé le Lantgraue d'Hesse, en-
 core ieune enfant: & si auoit contraint la riche & florissante
 cité de Metz à venir en composition fort desauantageuse. A
 cause dequoy Luther esperoit beaucoup de luy, & s'y appuy-
 oit plus que sur nul autre Prince, qui qu'il fust, comme Luther

*Mort de
 François
 Sickinge:
 & de sa
 vie.*

mesme escriuit en cachette à Vlrich de Hutten.

DEUX Augustins furent ceste année bruslez à Bruxelles (qui est vne fort belle ville en Brabant) à cause qu'ilz suyuoient l'heresie de Luther. Au moyen dequoy les Lutheriens les recognoissent pour Martyrs, comme ilz font Iehan Hus, & autres semblables heretiques, à cause que le diable ne veut pas estre sans auoir des martyrs. Toutesfois, comme tref-biē dict sainct Augustin, ce n'est pas le supplice qui faict les martyrs de Iesuf-christ, mais c'est la cause. Et, comme encores discourt fort bien S. Cyprian au liure de l'vniō de l'Eglise, quelle paix

Qu'un heretique ne scauroit estre martyr, p. r. S. Cyprian.

se peuuent promettre ceux qui hayent leurs freres? Ceux qui portent enuie aux prestres, quelz sacrifices croient-ilz qu'ilz peuuent celebrer? Estiment ilz qu'eux estans congregez, Iesuf-christ soit avec eux, veu qu'ilz s'assemblent hors de l'Eglise de Iesuf-christ? Quoy que telz hommes soient occis pour la confession du nom de Iesus, si est-ce que le sang mesme ne scauroit nettoyer ceste macule: & la coulpe tref-griefue de discorde, ne scauroit estre purgée par le supplice. Pourquoy? pourautant que nul ne peut estre martyr, sil n'est en l'Eglise. Et vn peu apres, Ceux-là, dit-il, qui n'ont voulu estre vnanimés & accordans en l'Eglise de Dieu, ne peuuent demeurer avecques Dieu. Quoy qu'ilz soient rostys és flammes, quoy qu'ilz perdēt leur vie ou au feu ou pour estre deuoré des bestes, toutesfois cela ne sera pas la coronne de foy, mais le supplice de desloyauté: ny ne sera pas vne loüable fin d'une vie religieuse, mais bien vne mort de desesper. Brief celuy là peut estre tué, mais il ne peut estre couronné. Voyla que dict S. Cyprian martyr.

Du Sieur de Bourbon.

CE fut en cest an que Charles, Duc de Bourbon, quitta le Roy de France, & s'alla ioindre avec quelques gentilz-hommes du Royaume au party de l'Empereur, au grand preiudice & dommage du Roy François. Ce Bourbon se parforça, à son grand deshonneur, de prendre la ville de Marseille: & fut contraint de se retirer delà, à sa courte honte & ignominie.

Luther de fend vn r. uisseur de Nonnains

CESTE année vn citoyen de Torgauie rauist neuf Nonnains, toutes de noble maison, du monastere de Nymice: & les emmena

les enmena couuertement à Vuittemberg, de façon que quel que tēps apres Luther print l'une d'elles en mariage. Et combien que ce fust incestue, si est-ce qu'il composa vn liure pour defendre ledit citoyen, & ce sien mal-heureux acte. Encores escriuit-il deux autres liures, l'un aux Pighars, l'autre aux Hussites, netaeschât de faire autre chose que le pis qu'il pourroit à l'Eglise Romaine : attendu que quelques années deuant cecy, il les auoit fort aigrement reprins par quelques liures, escrits contre eux, comme heretiques & schismatiques. Mais entre plusieurs choses que Luther escriuit ceste année, *Le fise & mis de Luther.* il composa vn liure du Fise commun, & en iceluy il adiugeoit à ce commun Fise tous les biens des Ecclesiastiques. Car il cognoissoit bien, qu'il gagneroit le cueur, & s'insinueroit en la bienueillance des Princes, & Magistratz civilz, sil leur adiugeoit les biens des Ecclesiastiques. Combien que à la verité, il semble que plusieurs ne se soyent gueres enrichis en occupant iceux biens, ains on voit, que pour ce plusieurs ont esté appauuris. Car on ne scauroit oncques tourner en vsage profane ce qu'une fois a esté votié & consacré à Dieu, sans encourir vn fort grand peril. Ne lisons nous pas es histoires, que Marcus Crassus, Capitaine general des Romains, lors qu'il alloit guerroyer les Parthes, fut si bien dompté par sa trop effrenée concupiscence, qu'il osa piller les thresors du temple de Hierusalem? Et quelle vengeance en feit la prouidence diuine? *Mort de Crassus, ancien Romain.* Telle, qu'estant vn peu apres desconfit en bataille par les Parthes, il y mourut luy & son fils, & les ennemis en reproche de ceste auarice & meschanceté, trouué qu'eurent son corps, ietterent de l'or fondu dedans sa bouche.

Ce mesme an fut faicte la Diete à Noremberg, & se trouua à la iournée François Cheregate, Legat du Pape Adrian. Et quoy que le Pape fauist de tous les moyens à luy possibles à tranquillier l'Allemaigne, comme estant sa patrie tres-aimée, toutesfois les Lutheriens s'enuenimerent encores plus par ceste humanité. Ce fut lors que vint en lumiere le liure des cent charges ou griefz d'Allemaigne,

lequel les Lutheriens auoient composé, à fin de ne rien laisser pour faire haïr le Pape & les Ecclesiastiques. Au reste, il fut arresté en ceste iournée, que les prescheurs Catholiques, pour rembarer les nouuelletez de Luther, viseroient des Docteurs reçus en l'Eglise, & des expositions approuuées: ce que Luther sceut si bien desguiser, que le peuple pensoit que les Princes fussent de leur costé, combien que cela fust tres-faux.

Voys auez entendu cy dessus, comment Luther n'auoit laissé espee de contumelie, qu'il n'eust dict contre le Roy d'Angleterre, qui auoit oppugné sa captiuité Babylonique. Doncques le liure du Roy fut par-apres defendu par quelques personnes fort doctes, comme en Alemaigne par Eckius, & Murner, & en Angleterre par l'Euesque de Rochestre, & Thomas Morus. Et bien que les Catholiques eussent souuent conuaincu Luther de plusieurs mensonges, neantmoins il fut si effronté, qu'en son liure contre le Roy il afferme, n'auoir oncques usé de mensonge. Voicy ses mots: ie me suis, dit-il, toujours bien gardé de mesdire & de mentir, desquel-
les choses le liure du Roy est tout farcy. De sorte que les nostres, voyans vne mensonge si horrible & impudente, la remarquerent en mettant à la marge vne couronne: & Murner recueillit de ce liure contre le Roy cinquante mensonges de Luther. Et d'abondant, ce que dict Luther, (asçauoir que le liure du Roy est remply de menteries & iniures) contient en soy certaine iniure intolerable, attendu que nous deuons grandement respecter la dignité Royale, quand bien il n'y auroit que le droit commun nous semonnât à cela. Et quand au liure du Roy, il estoit planierement Catholique, & comme j'ay dict, beaucoup d'hommes sçauans le defendirent. Lors florissoit en Angleterre Jean Fischer Euesque de Rochestre, homme fort renommé & excellent tant en pieté qu'en sçauoir, comme celuy qui entendoit fort bien les trois langues. Estât doncques instigué d'un desir de repousser les calomnies de Luther, dictes alencôtre de son Seigneur, il escriuit vn liure pour soustenir ce que le Roy auoit affermé: mais il vsoit d'une singuliere modestie enuers celuy, qui l'auoit entierement

L'Euesque de Rochestre escriit contre Luther.

perdue avec la honte: & alleguoit les sentences & de l'Escripture & des Anciens, combien qu'à la verité (estant espoingonné d'une iuste douleur) il s'enaignrist en la preface vn peu plus que de coustume, mais non tant toutesfois, que l'insolence & peruersité de Luther n'en meritaist bien d'auantage. Car d'ainsi mesdire à tort & à trauers contre le Pape & les Euesques, contre l'Empereur, les Roys & les Princes, & ne cesser iamais de dire conuices & opprobres, certes c'est le faict d'un homme perdu & desesperé, & qui doit auoir la reprimende, non de paroles seulement, mais bien de coups de fouet. Comment s'est porté Sleidan à cecy? A ce que ie voy, il n'a iamais dict vn mot de ceste insolence de Luther, homme sans autorité: mais il babille à plaisir, s'il est eschappé aux Papes, (qui se doiuent soigner de l'Eglise vniuerselle) quelque faict ou parole, qui puisse denigrer l'estat des Emperours, Roys ou Princes, quoy que sans raison: veu qu'il y procedde par hayne, & non pas à la bonne foy. Mais tant plus que l'impudence de Luther a esté grande, tant moins d'excuse auront ceux qui se sont laissez empieter de ses erreurs. Or outre l'Euesque de Rochestre, Thomas

que docte, print la cause du Roy d'Angleterre en main, laquelle il defendit en vn liure, mais sous le nom de Guillaume Rosse. Et fut ce liure si doctement composé, qu'il ferma le passage à l'arrogance & contumelie de Luther: de maniere qu'il n'osa oncques groumeller par apres, & à cause de ce i'ay bien voulu inserer en cest endroit quelques motz du liure. Il dict doncques en la personne de Luther: Pourautant que le Pape, l'Empereur, les Roys, les Euesques, prestres & hommes laiz, & finalement tous les meschans s'opposent à mon opinion, il me sera loysible & permis d'anathematizer, selõ la maiesté de mon Dieu, & le Pape, & l'Empereur, & les Roys, & les Euesques, prebstres, gens laiz, brief tous les bõs: mesdire d'eux tant que ie pourray, & me sera licite de cracher de ma bouche contre la couronne & le chef de tous, boüe, voirie, fiente, &c. Et au dessus il dict aussi de Luther: Mais qui scauroit endurer vn tel garnement, lequel nous faict toucher au doigt

*Thomas
Morus es-
crit contre
Luther.*

*Le vray
iugement
que Mo-
rus a faict
de Luther*

par l'infinité de ses vices, qu'il est possédé & agité d'une légion de diables: & toutesfois il se iacte sottement, en disant: Tous les saintz Peres ont erré: l'Eglise vniuerselle a bien souuent erré: ma doctrine ne peut errer, pour ce que ie suis tref-certain que ce n'est pas ma doctrine, mais celle de Christ. Lors si quelcun luy respond, ton tesmoignage n'est pas vray, à cause que tu tesmoignes de toy mesme: incontinent il aura recours à une nouuelle escripture, ie suis certain que j'ay des opinions du ciel. Tellement que vous ne le sçauriez oncques desargonner de ce sien principe: c'est son fondement si inuincible, que tous les Papes, Roys, Docteurs, ny mesmes les Anges ne le sçauroient abbatre. Il est dōc certain, voire tref-certain, qu'il a ses opinions du ciel, tout ainsi comme ceux qui dorment sont certains & tref-certain, que tout ce qu'ilz songent est vray: voire mais il est certain, & plus que certain, qu'il mēt en veillant, que ses opinions viennent du ciel, lesquelles sa conscience luy dicte auoir esté forgées par les prestiges des Diables. Il maudict & les hommes & les Anges qui s'opposeront à sa doctrine, & crie, que ceux nyent la verité, polluent les choses sacrées, blasphement Dieu, qui s'osent ingerer à reprendre ses blasphemes intolerables. Le mesme Morus adioust ce qui s'ensuit à la fin du second liure: Il est vray, cest homme-cy tesmoigne qu'il s'est tousiours abstenu de mensonges & paroles outrageuses: combien qu'il n'a rien au bout de sa plume que calomnies, mensonges, & detractions: rien au dedans de son ame qu'outrage, arrogance, enuie: qui ne conçoit rien en son cerueau que des sottises, fureurs & folies: qui a tousiours à la bouche les lattrines, la voirie, la fiente, desquelles il se sçait mieux ayder, que ne sçeut iamais plaissanteur. Voyla qu'a escrit entre autres choses ce grand personnage, & ne deuōs pas faire peu de conte de son iugemēt. Car tout cé qu'il escrit est si vray, qu'écōres qu'il se fust teu en cela, les parolles & escritz de Luther nous en feroient foy abondamment. Et comment est ce que les hommes ne se veulent donner garde de ce miserable, considéré que si excellens hommes le detestēt & abhorrent? Car mesmes l'Euesque de Rocestre en la preface,

de laquelle nous auons faict mention cy dessus, l'appelle chié enragé, loup rauissant, ours tref-cruel. Et pour le moins il me semble, que nous deuons attribuer quelque peu d'auantage à la sentence & iugement de si segnalez personages, qu'aux bourdes de Sleidan & ses semblables: lesquelz peu s'en faut qu'il n'esleuent cest homme iusques au ciel, comme vn Dieu, quoy que les plus doctes & vertueux hommes l'aient en horreur, comme vne horrible peste de toute la terre. Mais Sleidā ne parle aucunement des escritz de Roffensis, ou de ceux de Morus, sçachant bien qu'ilz estoient merueilleusement preiudiciables à l'Euangile de Luther & à toute sa cause, sil eust recité le tout à la bonne foy.

P E V de tēps apres alla de vie à trespas le Pape Adriā, hōme *Le Pape Adrian meurt.* certes digne de bien plus lōgue vie: & fut son successeur Clement septiesme, issu de la maison de Medicis.

L'AN 1524. le Roy François assembla vne grosse & puissante armée, pour defendre son païs de Prouence, que les Imperiaux festoient en vain parforcez d'occuper. Mais cogneu qu'il eut que le camp de l'Empereur festoit retiré sans rien exploicter, il brassa son desseing de recouurer Milan: & la fortune *Le Roy recouure Milan.* ne luy disant, il ne faillit pas à le recouurer. Mais il n'eut pas si bon succez en ses affaires, quand par quelques moys il meit le siege deuant Pauie, sans rien faire qui soit memorable: à cause que dedans la villey auoit bonne garnison d'Alemans, souz vn vaillant Capitaine, Antoine de Læue, Espagnol.

C E S T E année le 26. iour de Ianuier les Suysses s'assemblerent à Lucerne, & illec arresterent qu'on garderoit inuiolablement l'ancienne religion, les ceremonies, decretz & ordōnances de l'Eglise. Car Zuingle commençoit deia à faire partializer ce peuple, combien que pour lors il n'y eust encore que ceux de Zurich, qui suyussent sa doctrine. Or entre autres choses Zuingle enseignoit, qu'il falloit abolyr les images des Eglises, & qu'il falloit aussi abolyr la Messe comme chose impie. En quoy il faisoit l'office de l'auant-coureur de l'Aptechrist, lequel nous priuera pour quelque temps de ce quotidien & perpetuel sacrifice, qui se faict à la Messe. Tant Luther

que toute la posterité par l'instigation des Diables, se sont parforcez le plus qu'ilz ont peu, de faire, que chacun eust la sainte Messe en mespris, horreur & abomination: de maniere que cela leur a bien succédé en l'Europe, ce pendât que les nations barbares, qui sont aux Antipodes & régions par le passé incogneues, embrassent de grande ioye & alegresse l'ancienne religion, & le tres-sainct sacrifice de la Messe. Et au reste, qui voudra sçauoir ce que nous a profité d'auoir ainsi abrogé la Messe, les choses ia aduenues l'ont assez monstré, & la posterité l'experimentera bien plus aigrement, si elle ne se recognoist & fait penitence.

*Les reli-
ques de S.
Bennon
sont vene-
rées, dont
Luther en
rage.*

CE fut enuiron ceste saison, que les ossemens & reliques de S. Bennō, iadis Euesque de Misne, lequel n'agueres le Pape Adrian auoit canonizé, furent en grand honneur esleuées de leur ancien sepulchre, & fut en son honneur institué vne feste annuelle. Il ne faut pas dire si cela feist enrager Luther, voyant bien que par ceste obseruation de l'ancienne pieté & religion son Euangile seroit grandement descrié. Parquoy il ne tarda gueres, qu'il composa vn liure intitulé, contre le nouueau idole & l'ancien Diable, qui doit estre esleué à Misne. En quoy vous voyez, comment il est si hors de soy, qu'il ne veut pas pardonner de mesdire des Saintz, qui iouissent de l'immortalité avec Iesuf-christ. Je n'oseray certainement produire les iniures & outrages, que Luther vomist en ce liure contre S. Bennon, & quelques autres Saintz: par-ce que i'offenceroiy toutes aureilles bien nourries: & suis estonné de nostre siecle, comme il a peu produire vn tel môstre. Car autresfois, comme on vouloit contraindre les Chrestiens à sacrifier aux faux Dieux, & ilz refusoient de ce faire, disans qu'ilz n'estoient pas Dieux, ains qu'ilz auoient esté hommes tresmechans & abominables: les Magistratz ne pouuans endurer qu'on dist telles iniures de leurs Dieux (cōme ils estimoient) ne laissoient aucun genre de tourment, qu'ilz n'appliquassent aux Chrestiens. Et toutesfois les Lutheriens & semblables dogmatistes vomissent mille blasphemés insupportables, & contre le saint Sacrement de l'autel, & alencontre des bien-

heureux Saintz, non seulement sans estre punys de ce forfait: mais encores y en a, qui leur tiennēt la main à cela. Je ne ſçay que faire, ſinon que me conſoler en ce que Dieu à l'aduenir vengera & ſon iniure & celle de ſes Saintz.

En ce temps, Zuingle ne ſe contentant pas d'eſtre appelé Lutherien, ains brulé d'un appetit de créer vne ſecte nommée de ſon nom, commença à aſſaillir non ſeulement les Catholiques, qui afferment la Tranſſubſtantiatiō: mais auſſi Luther, qui nous veut perſuader que le vray corps & ſang de noſtre Seigneur eſt en l'Euchariftie, le pain demeurāt pain. Cela fut cauſe que Luther monta ſur ſes grandz cheuaux, & de là eſt venu le commencement de ce grand eſtrif & altercation, laquelle dure iuſqu' à preſent entre les Lutheriens & Zuingliens. Ce que Dieu a voulu permettre par ſa bonté, à fin que l'arrogance & ſuperbe de Luther fuſt chaſtiée par ſon diſciple: & à fin que chacun aprint deſormais, combien eſt vray le dire de Saint Hieroſme, que les Eſcritures ne conſiſtent pas en liſant, ains en entendant le ſens. Car ces deux ſortes d'heretiques ſ'arment de la parole de Dieu, & produyſent force eſcritures, & quoy qu'il ſoit impoſſible que tous deux enſeignent la verité, pource qu'ilz ſont contraires, toutesfois l'une ne veut ceder à l'autre: & par vne fauſſe interpretation de l'eſcriture ilz damnent ceux qui les ſuyuent. Mais l'Egliſe Catholique les a iadis condamnez, ſelon laquelle nous croyons conſtamment, que apres les paroles de Jeſus-chriſt proferées, le vray corps & ſang d'iceluy eſt ſubſtantiellement contenu ſoubs les eſpeces du pain & du vin, voire meſme encore que lon ne le reçoynie pas: & ne ſçauoit eſtre fait ce ſacrement, ſans vſer de la toute-puiſſante parole de Dieu. Or en ceſte matiere il y auoit ia lōg temps, que Carolſtade ne ſ'accordoit pas avec Luther: au moyen dequoy eſtant reprins à Iene par Luther, de ce qu'il troubloit les Eglises, aſcauoir Lutheriennes, il reſpondit brauement qu'il eſcriroit contre luy & ſouſtiendroit ſon opinion. Dequoy eſtant irrité Luther, qui ſe plaiſoit aſſez à conteſter, luy donna vn eſcu ſ'il faiſoit ce qu'il diſoit. De maniere que par apres Carolſtade ſeit imprimer quel-

*Zuingle
forge vne
nouuelle ſe-
cte, ſur la
maniere de
la Cene.*

ques liures à Basle: le sommaire desquelz estoit, que le corps de Iesuf-christ n'est pas naturellement en l'Eucharistie, sans toutesfois dire ce que dict Zuingle. Mais voicy sa nouvelle interpretation, que quand nostre Seigneur disoit, Ceci est, il monstroït son corps assis à la table, non pas qu'il dist estre contenu sous l'espece du pain. Quelques Anabaptistes embras-
 soient ceste opinion, ne faisans conte de celle de Zuingle & Luther. Et Zuingle disoit, que veritablement Carolstade cognoissoit bien la verité, mais par-ce qu'il ignoroit les figures, il ne dispoit pas biē les parolles. Toutesfois Zuingle estoit fort ridicule, qui se recreoit quelque peu d'auoir vn compaignon si inepte. Les autres reiettoient l'exposition de Carolstade, comme estant trop violente & trop dure, de sorte que le Senat de Zurich defendit, qu'on ne vëdïst point dans leur ville les liures de Carolstade.

*Les hereti-
ques nou-
ueaux ne
s'accordent
point.*

QUAND à Luther, il confuta l'opiniō de Zuingle par vn sien liure. Et voyla comment l'esprit de folie & de resuerie, coulant dedans Luther & ses beaux enfans, leur a faict vomir des interpretations tres-absurdes touchant les parolles de la Cene de nostre Seigneur, lesquelles barailent & entre elles, & contre l'Eglise Catholique: & par mesme moyē a pris pied vne sanglante guerre entre ces folz & testus, lesquelz se iactent tous d'auoir produict l'Euangile en lumiere, & si ne scauroient s'accorder nullement d'vn si grand faict, ayans vne fois forligné du vray chemin de verité. Et ce pendant deschirent le pauvre & miserable peuple en diuerses ligues & opinions, de sorte que plusieurs ne scauroient déia dire, lequel est celuy qu'ilz suyuent en vne si grande varieté d'opinions. Qui scauroit assez deplorer les ames innombrables, que Iesuf-christ a rachetées de son trespretieux sang, de les veoir auïourd'huy se precipiter en vn peril trescertain, & horrible damnatiō du feu eternel, par l'arrogance & temerité de ie ne sçay qu'elz es-
 pritz importūs & seditieux? A la verité, ces hommes perdus & ministres de Satan ne s'en font q̄ rire, & pourueu qu'ilz pussent faire parler d'eux, ne se soucient en rien filz sont renō-
 mez pour heretiques.

EN ceste saison Luther escriuit vn liure en Aleman, des v-
fures & marchādises, & pouuons assez cognoistre par le faict *Luther es-*
mesme, quel estoit son but en cela. Car en ce liure il surhauf- *crit sediti-*
se les charges, lesquelles sont en Alemaigne à cause du traffic *en semēt, cō-*
de marchandise. Et en cela il sembloit qu'il n'en vouloit *tre les Prin-*
qu'aux marchāds, & que d'un bon & entier esprit il reprenoit *ces & mar-*
leur avarice & iniques deportemens. Mais en verité il tas- *chands.*
choit de gagner le cueur du peuple, & l'agaçer alencontre
des Seigneurs. Toutesfois ie n'en veux pas estre creu, & pour
ce i'allegueray ce qu'il a couché au mesme liure: il falloit, dit-
il, que les Rois & Princes se louciaffent de cecy, & qu'ils l'in-
terdisfent selon la seuerité de la Loy. Mais comme ie voy, ils
ont le chef & les parties en cecy, & est accomply ce que dict
Esaie. Tes Seigneurs sont compaignons des larrons. Ce pen-
dant si quelcun desrobe vn escu, incontinent on le faict dan- *Esaie, 1.*
ser sur la corde, & quand à eux ils trafiquent avec ceux qui
pillent toute la terre, & desrobent plus que tous les autres: de
sorte que bien leur conuient ce qu'on dict cōmunément, les
grāds larrons font pendre les petis. Quand à moy, ie croy que
cela monstre euidentement, combien il a occasionné par les li-
ures le tumulte des Rustiques, quoy que Sleidan connille de-
ça dela, pour monstrier que ce n'est pas Luther, ains Muncer,
qui a esté cause de ce trouble: & si l'eust esté hōme de bien, il
eust reuocé tout ce mal à Luther, comme celuy qui en a esté
la vraye source. Car Muncer a puisé l'occasion dans les li-
ures de Luther, si bien que si Luther ne luy eust defriché le
chemin pour entreprendre toutes choses, iamais il ne se fust
hazardé iusqu'à là.

PAR EILLEMENT Luther escriuit vn liure en Aleman,
de la sortie de quelque nonnain hors son Conuent: & ne dou-
te point de nombrer ceste sortye entre les miracles, à cau-
se qu'il est entierement possédé du Diable, & par consequent *Il defend*
aueuglé. Entendez qu'à Islebey auoit vn beau monastere de *vne non-*
Religieuses, auquel entre autres demouroit vne nommée *ne in sortie*
Florentine, mais Florentine de corps tant seulement, & *de son con-*
non d'esprit. Or estoit-elle ia allichée des attrayantes parol-
X. j.

les de Luther, par lesquelles il chatouille les Religieuses à fuyre les plaisirs de la chair, comme si les vœux ne nous obligeroient point, & qu'il fust loisible (apres auoir promis à Dieu vne continence perpetuelle) se ioindre à femme: mesprisant tout vœu, despouillant toute honte, & foulant aux pieds toute honnesteté & religion: & repudiant Iesuf-Christ, espoux immortel, se prostituër à vn homme mortel, pour l'appetit de ie ne sçay quelle tant fresse volupté. Ceste femme doncques feit ses pleintifs à quelcun de son parentage, disant que la vie monastique ne luy seroit point, & que partant elle vouloit l'abandonner. La chose est communiquée à l'Abbesse, laquelle s'aduisa de tous moiens propres pour luy arracher ceste volonté: mais voyant qu'elle ne faisoit rien, elle commanda que selon les statuts des Monasteres elle fust enfermée. Mais il aduint, que celle qu'on luy auoit donnée pour garde, laissa quelquesfois par mesgarde la porte de la prison ouuerte: tellement que Florentine s'apperceuant de cela, feit tant qu'elle sortit, & s'en vint rendre à Luther, cōme à vn bon conseruateur & defenseur de chasteté. Et incontinent il fait courir vn liure contre les cōplaintes de l'Abbesse, laquelle accusoit ceste fuyarde de pariure, & d'auoir rompu son vœu: & Luther en ce liure, (comme vn nouveau Euangeliste, nourrissant non de Iesuf-Christ, ains de Iouinian, ou encore d'un plus meschant) nous veut faire accroire, que Florentine, est sortie d'enfer par vn grād miracle du Dieu tout-puissant. Car ce bon hōme estimoit, qu'un monastere estoit l'enfer, & n'y a personne qui ne puisse aisēmēt cognoistre l'humeur du cōpaignon par ce trait, cōme nous cognoissons quel est le lion en voyāt son ongle. N'estoit-ce pas grād miracle, de fuir la porte estant ouuerte? Or en ce liure il se gaudist des miracles qui se font es demoniacles, & dit qu'ils ne sōt nullemēt tourmētez par l'eau beneiste: mais q̄ les Diabes feignēt cela, tout ainsi qu'autres fois (selon Saint * Hierosme) Porphyre & Eunome disoient lors que les Diabes estoient tourmentez par les cendres des martyrs, que c'estoyent ruzes diaboliques, & qu'ils ne crioier pas vrayement. Et ainsi Luther (lequel quelque Zuinglien

*Des miracles
des & de
l'eau benei-
ste.*

** Contre
Vigilius*

a fort bien nōmé gros estourdy) veut que nous croyons estre vn grand miracle, de ce qu'une femme lasciue a fuy, trouuant la porte ouuerte: mais que les Diables soyēt cruciez par l'eau beneifte, il diēt que c'est leur feintise. Le semblable font Mathias Illyricus & ses compaignons, architectes de l'histoire de Magdeburg, en laquelle ilz se moquent de ceste solēnelle ceremonie de l'Eglise à consacrer l'eau beneifte: & veulent qu'Alexandre, Pape tref-anciē, ne l'ayt pas instituée, ains quel que Pontife des payens. En quoy nous voyons que telz hommes sont poussez du mauuais esprit, entant qu'ilz ont en mespris tout ce, dequoy l'Eglise Catholique se sert cōme de bou-leuers, pour chasser toutes les embusches & machinations du Diable. Certes l'usage de l'eau beneifte est si ancien en l'Eglise, & a on si souuent experimenté sa vertu aux miracles fort grandz, que ceux qui l'oppugnent se deuroient aller cacher de hōte. N'agueres sont venuz en lumiere huit liures des Cōstitutions des Apostres, que S. Clement, Pape de Rome, a es-critz, & en iceux est contenuē l'oraison que voicy: Dieu des exercites, Dieu des vertus, createur des eaux, & donneur de l'huyle, qui es doux & bening, qui as donné l'eau à boyre & à nettoyer, & l'huyle pour embellyr la face en exultation de ioye: roy doncques par Iesuf-christ sanctifie maintenant ceste eau & ceste huyle, au nom de ceux qui l'ont apportée: & donne puissance qui cause la santé, qui repousse les maladies, qui chasse les Diables, & qui soit aduerfaire à toutes embusches par Iesuf-christ, qui est nostre esperance, avec lequel & le saint Esprit te soit donnée gloire à tousioursmais. Je ne veux alleguer rien que cela pour la confirmation de ceste matiere. Et me suffit de monstrier, que l'esprit de Luther ne peut endurer ceste eau, & que volontiers il voudroit persuader aux hommes, que ceste fretilarde femme, souhaitant de sacrifier à Venus, n'a pas sorty de son Conuent sans vn bien grand & estrange miracle, la porte estant ouuerte. Mais le miracle est bien plus admirable, comment il s'est peu trouuer homme qui ayt voulu adiouster foy à vn si grand gauceur, & prodigieux menteur, qui ne se hontoye point de de-

* Cela se
trouue en
la premiere
epistre d'Alexandre.

Ancien
usage de
l'eau be-
neifte.

L'AN M.D.XXIII. HISTOIRE DE TOUTES CHOSES
fendre les plus meschans actes qui soient.

*Seconde
iournée de
Noréberg*

EN cest an fut faicte de rechef vne iournée à Noréberg, où le Pape enuoya le Cardinal Campege son Legat, homme veritablement doué d'une singuliere erudition, & qui estoit prudent & bien experimenté és affaires. Aussi s'approchant de la ville, fut recueilly honorablement de presque tous les Princes: mais toutesfois ilz le supplierent, qu'il ne feist point son entrée solemnellement & obseruant les ceremonies accoustumées, à cause (disoient-ilz) que plusieurs abbreuuez de la doctrine de Luther s'estoient ia estrangez du Pape: ce qu'il leur octroya. Aussi arriua à la iournée l'Ambassadeur du Roy Loys d'Hongrie, apportant fort piteuses nouvelles des inuasions & courtes du Turc, & partant demandoit secours. Mais le Turc pouuoit bien faire ses besongnes, à cause que les Alemans estoient en piques pour la religion.

*Iniures de
Luther, cō
tre les Pri
ces: pour
exciter se
dition.*

Rem. 13.

ENVIRON ce temps, Luther escriuit contre deux mandemens de l'Empereur, par si grande fureur & felonnie, que vous eussiez dict qu'il vouloit atterrer de coups mortelz & l'Empereur & tous les grandz Seigneurs: & dict que le Turc est dix fois meilleur & plus sage qu'eux, & à tout propos les appelle bestes, fatz, insensez, furieux, folz, badins. Mais à la verité, si luy-mesme ne fust esté fol & hors de son bon sens, il ne se fust pas si fort desbordé à lauer la teste aux Seigneurs, contre le commandement de l'Apostre: faictes honneur, à qui il est deu. Aussi en ce temps l'Empereur estoit si pressé d'affaires, qu'il luy estoit impossible de faire taire ce galand. Quand à Sleidā, il dissimule à sa maniere accoustumée iniures si atroces contre les Princes, à fin que nul lecteur (trouuant estrange les iniures barbares de ce furieux) ne se desueloppast de sa doctrine, ou que pour le moins il ne la soupçonnast. Au reste, cecy estoit vn esperon bien piquant pour aduancer les seditions, tellement que les fauorits de Luther ne le scauroient excuser, qu'il n'ayt causé le trouble des Rustiques, qui peu apres sensuyuit. Car en tous ses escritz il crie l'alarme, sans que pourtant le miserable peuple s'aduist quel hōme il suyuoit. Car parmy ses parolles seditieuses il entremesloit quelque

chose colorée de pieté, si que par ce moyen il couuroit son appetit sanguinaire.

ENVIRON ce temps, l'Empereur Charles escriuit d'Espaigne lettres aux Princes, par lesquelles il reprenoit fort aigremēt ce qui auoit esté arresté à la iournée de Noremberg: & defendoit qu'on ne feist pas l'assemblée ia resoluë à Spire, en laquelle on auoit proietté d'auiser quelque accord sur le faict de la religion, iusqu' au temps du Concile, disant l'Empereur, que cela n'estoit pas de leur gibier. Or deuant que ces lettres fussent venuës en Allemagne, Campege, Legat du Pa^{Ligue des}
pe, Ferdinand d'Austriche, l'Euesque de Salisburg, Guillaume ^{Catholiques.}
& Louys, Ducs de Baniere, & quelques cōmis des Euesques s'estoient assemblez à Ratisbope: & là auoiēt faict ligue, pour faire teste à l'heresie Lutherienne, & aussi auoient esté plusieurs choses fort sainctement ordonnées pour la tuitiō de l'Eglise Catholique, & pour extirper l'heresie de Luther. Voyant ^{Reformation des}
d'autre costé le Cardinal Campege, que la vie mauuaise & dis ^{Ecclesiastiques.}
soluë du Clergé occasionnoit plusieurs à se faire heretiques, publia certaines ordonnances pour reformer les meurs des Ecclesiastiques, & pour oster tous abus, ce que tous les autres Seigneurs eurent pour bon & agreable. Car les Lutheriens n'auoient chose plus souuent à la bouche, que la mauuaise vie des gens d'Eglise: & à force de la mettre par les rancs, & de la faire encor plus grande qu'elle n'estoit, ilz agaçoiet plusieurs contre le Clergé, sans qu'ilz fussent en rien esmeuz de la vie & exemple des bons, qui estoient en bon nombre: pourautāt que leur but ne tendoit à autre fin, que de faire hayr & detester le Clergé au peuple.

A Anuers y eut le Prieur des Augustins, nommé Henry Zutphan, lequel estant recheu en l'heresie de Luther, (qu'il ^{Vn apostat est}
auoit ia vne fois abiurée) & partant estant bien pres d'estre ^{brulé & canonisé}
pendu, rompit les prisons, & s'enfuyt de Brabant à Breme. ^{par Luther & Sleidan.}
En fin toutes fois ceste année il fut puny à Meldorp, au païs de Thietmar, & fut brulé. A cause dequoy Luther escriuit vne epistre fort lamentable à ceux de Breme, lesquelz cest Héry auoit renduz de Catholiqs Lutheriēs, qui neāmoins se sont

L'AN M.D.XXV.

HISTOIRE DE TOUTES CHOSES

n'agueres faictz Zuingliens ou Caluinistes. Sleidā escrit qu'il fut occis à cause de l'Euangile, afin qu'il le puisse mettre au Catalogue des Martyrs: mais qu'il aille où il voudra avec telz martyrs. C'est apostat taschoit d'infecter le belliqueux pais de Thietmar de la poison Lutherienne, à cause dequoy ilz le feirent mourir, non comme martyr, ains comme heretique, lequel s'estoit parforcé merueilleusement à exciter quelque trouble entre le peuple & le Clergé, tant à Anuers, qu'à Breme & Meldorp. Luther escriuit son histoire, & dit que les Tyrans le chasserent d'Anuers, & s'en vint à Breme. Ce qui est faux, par-ce qu'il ne fut pas chassé, ains rompit la prison pour fuyr, autrement il eust payé sa folie d'estre retombé en heresie. Mais c'est ainsi qu'ilz mentēt à l'enuy, de sorte que tu peux veoir, qu'eux estans destituez de la vraye vertu, ilz n'ont rien digne de louange.

*Prinse du
Roy Fran
çois à Pa
vie.*

L'AN 1525. le Roy François ayant en vain employé quatre mois à assieger Pavie, & nouvelles forces de l'Empereur estans suruenues, fut contraint de liurer la bataille: la fin de laquelle fut telle, que tous les plus nobles & preux Seigneurs de France estans demeurez sur le champ, le Roy, combattant valleurousemēt, fut prins prisonnier par l'ennemy. Et furent les Espagnolz & Alemans moult resiouis de ceste victoire, à cause qu'elle auoit esté gaignée le iour S. Mathias, auquel l'Empereur Charles prit sa naissance. Sur la primeuere le Roy fut mené de Genes en Espagne par Charles de Lanoy, lequel luy donnoit bonne esperance, pour solacier son esprit, fesché à cause de ceste calamité. Mais arriué qu'il fut en Espagne, l'Empereur ne le voulut point voir: ce que le Roy print si fort à contrecueur, que mise à part son esperance, il tomba en vne maladie qu'on pensoit luy deuoir accourir ses iours, si l'Empereur ne l'eust consolé de parolles, & promis de le deliurer bien tost. Car à la verité le Roy François auoit le cueur & le courage fort haut: & pleust à Dieu qu'o eust peu lier luy & l'Empereur d'une sincere & asseurée amitié: pourautant que l'un & l'autre estoient fort puissans, & fort obseruateurs de la foy Catholique. Mais c'est chose trop vraye, que noz pe-

*Il tombe
en mala-
die.*

chez ont esté cause, que ces deux monarques se sont presque tousiours entre-guerroyez.

V o v s auez ia entendu quelque chose de Carolstade, Archidiacre de Vuittemberg. Ce fut luy qui le premier de l'estat Ecclesiastic espousa vne femme, ou plustost vne paillarde. Et à ses noces fut celebrée vne Messe, l'office de laquelle fut entierement composé par les Lutheriens: mais si horrible, que sans toutes les autres choses, il y auoit assez de cela pour embraser l'ire & indignation de Dieu sur nous. Et pouuoit-on à bon droit dire de ceux qui celebrerent celle Messe, que leur oraison soit faicte en peché. Or Luther estât retourné de son * Pathmos, le miserable Carolstade ne pouuoit librement se-mer ses songes à Vuittemberg, à cause que Luther ne le vouloit pas permettre, qui vouloit tenir le premier ranc. Tellement que Carolstade partit de là, & vint à Orlamūde, ville du Duc de Saxe, où estant, appuyé sur la faueur du peuple, il blasma Luther publiquement. Ce qu'ayant entendu Luther, il fit tāt par ses menées, que Carolstade fut chassé de tout le païs de Vuittemberg, quoy que n'agueres il eust esté grand cousin de Luther. Et bien qu'il alleguast la pure parolle de Dieu aussi biē q̄ Luther, si fut-il cōtrainct de quitter le dé & de viure miserablemēt avec sa paillarde, qui estoit de noble maison. De sorte qu'en fin il fut contrainct d'implorer l'ayde de Luther sa partie aduerse, & estant aydé par ses prieres il retourna en Saxe: mais avec condition, qu'il ne diroit rien publiquement alencontre de Luther, n'y n'escriroit aussi. Luther a escrit contre luy fort aigrement, & l'a rendu fort suspect de la sedition rustique, en laquelle plus de cent mille villageois ont perdu la vie. Aussi Carolstade auoit parauant escrit contre Luther, & non sans salaire. Parquoy sur le commencement de ceste année Luther luy respondit en vn liure intitulé, contre les prophetes celestes. Aussi maintz autres Lutheriens escriuirent cōtre Carolstade, du nombre desquelz fut Vrbain le Roy: & l'Apostat Oecolampade en son volume contraire, (qu'il appelle antisyngramma) dit des escritz de tous ces Lutheriens, qu'ilz ont plus confirmé, qu'infirmé la cause de Carolstade. Telle-

*Carolstade
de se marie*

** Voy l'2^e
1521.*

*Luther le
chasse hors
de Saxe.*

*Satan con-
tre Satan.*

ment que ce seul tesmoignage d'Oecolāpade, quoy qu'il soit infame, est de grande aūthorité enuers les Sacramentaires, biē qu'il soit contraire au Lutheranisme.

*Zuingle
dedie son li-
ure au Roy
de France.*

A v moys de Mars de ceste année presente, Zuingle ne doura point de dedier au tres-catholique François, Roy de France, son liure qu'il auoit escrit de la vraye & fauce religiō.

En la peface duquel nous lifons ce que s'ensuyt: le Diable nous tente par hommes obstinez, lesquelz voyans que la verité de la Cene du Seigneur est produyte en lumiere par autres que par eux, ilz commencent comme hommes folz à calomnier les autres, & à les accabler d'iniures. Par lesquelles parolles il iette vne pierre au iardin de Luther & ses compaignons, lesquelz il afferme apertement estre agitez du Diable, & que partant ilz disent mal des autres. Que dōcques ces miserables & aueuglez hommes considerent, si l'Eglise Catholique n'a pas condanné Luther à bon droit, attendu que ses propres disciples ont si mauuaise opinion de luy. Et toutes fois Zuingle n'a pas esté meilleur garçon que Luther, ains pire en maintz endroitz. Voire mesmes en ce temps il se peina grandement avec tous ses adherans & ministres de l'Eglise de Zurich, en plein Senat de ladicte ville, à ce que la Messe & l'adoration de l'Eucharistie fust abolie. Quelque bon Catholique s'opposa à cela tout vn temps: mais pourautant que la doctrine de Zuingle estoit fort plausible, comme celle qui ostoit la confession des pechez, les ieufnes, les labours de penitence & choses semblables, il fut arresté au Senat, que desormais la Messe seroit bannie, & (comme quelque sot a dict) incontinct s'ensuyuit vne publique ioye & congratulation de l'Eglise de Zurich. Car les heretiques se réiouyssent lors qu'ilz ont mal fait, & se delectent es choses tres-meschantes: & quand les Catholiques viennent à lire toutes telles choses, ilz ne scauroient que plourer & gemir, de quoy l'aueuglement des hommes est si grand & prodigieux. Ces Chrestiens, voire plustost faux-chrestiens, conçoient ioye, voyans que la Messe est ostée, & sont si miserables, qu'ilz n'apperçoient pas que cela appartient à l'Antechrist: l'organe & instrumens duquel sont

*La Messe
abolie à
Zurich,
par Zuingle.*

Prover. 2

tous

tous Turcs & Tartares, & les heretiques de ce temps les auat-
coureurs. Or Zuingle a escrit, que pour estre plus affermy &
corroboré, en ceste impieté, il a esté admonnesté en vn son-
ge. Tellement qu'en chose de si grande consequence, il a de-
feré merueilleusement au songe de son esuété cerueau, quoy
qu'autrement il ne vüille receuoir que la pure escriture. Et <sup>Zuingle
est admon-
nesté en son
geant d'a-
bolir la
Messe.</sup> encorés deuôs nous bien aduiser, que Zuingle afferme, qu'il
ne scauroit dire, si cest admonnesteur ou touchement qui
luy apparut en songeant, estoit blanc ou noir. Ce que nous
monstre, comment ces fols se iouent en choses si grandes, &
ne se soucient pas de quelle fontaine ils puissent leur doctri-
ne soit bonne soit mauuaise. Aussi à la verité il est bien rai-
son, que ceux qui attribuent plus à leur iugement qu'à ce-
luy de tout le monde, soyent ainsi mocquez & trompez.

IE veux icy escrire certaines ceremonies accoustumées
d'estre obseruées à la Cene, & inuentées par l'esuété cer-
ueau de nos gens; à fin que les Catholiques cognoissent, <sup>Comme la
Cene est ce
lebrée à Zu-
rich, & les
ceremonies
y obseruées.</sup> que ceux-cy sont venus iusqu'aux faux-bourgs de l'Alcoran.
Doncques voicy la coustume abominable à tous hommes fi-
delles, & neantmoins obseruée à Zurich, ville des plus belles
de Suisse. Le presche finy, on apporte vne table, laquelle on
couure d'une nappe bien blanche. Et sur icelle on colloque
vne corbeille pleine de pain sans leuain, & quand & quand
quelques plats & gobelets de bois, (car il n'y a icy nul dan-
ger, attendu que ce n'est le sang du Seigneur, ains du vin seu-
lement) lesquels on remplist de vin. Le Ministre de l'Eglise
auec les Diacres s'approche de la table, & excite toute l'as-
semblée à donner audience. Ce faict, l'un des Diacres reci-
te l'institution de la Cene du Seigneur, extraicte de l'epistre
aux Corinthiens; & l'autre recite quelque partie du chapitre
sixiesme de S. Iehan. Et ne voyent pas, ny ne se peuuent ad-
uiser, (pour-ce qu'ils ont esté mis en sens reprouué) que l'Apo-
stre parlant en ce lieu là de l'institution & maniere de fai-
re la Cene, adioust: ie disposeray le reste quand ie seray
venu, signifiant que plus amplement il monstreroit aux
Corinthiens la celebration de la Cene. Incontinent apres on

recite le symbole de la Foy, & le Ministre admonnesté que chacun s'examine, à fin qu'en s'approchant indignement, il ne soit fait coupable du corps & sang du Seigneur. (Mais comment peut estre coupable du corps & sang de Iesus-Christ, celuy qui ne l'a pas reçu veritablement?) Apres chacun se met à genoux, & disent l'oraison dominicale suyuant le Ministre. Icele acheuée, le pasteur prend du pain, ie dis du pain vray, pourautant que ces pasteurs ne sont pas Prestres, où à tout le moins ils n'ont pas intention de faire ce que fait l'Eglise: & de rechef il recite l'institution de la Cene du Seigneur à haute voix, & apres il distribue le pain aux Ministres & leur presente les coupes: lesquels Ministres portent le pain es paniers, & le vin es coupes, & ainsi le presentent au peuple assistant. Chacun prent de ce que le Ministre offre, il en mange, & donne partie de ce qu'il a prins à celuy qui est le plus pres de luy, & quand & quand luy presente la coupe. Et est merueille, puis qu'ils craignent tant, comment ils ne craignent de prendre la verolle ou la peste de leur compaignon, ou chose semblable: & suis assuré qu'ils ne voudroyent pas recevoir de telle sorte le corps & sang de nostre Seigneur, si l'Eglise Catholique leur commandoit. Or pendant qu'ils prennent de ce pain, & qu'ils boyuent à la coupe, quelque Ministre recite de l'Euangile Sainct Iehan les parolles de nostre Seigneur allant à sa passion, commenceant à l'ablution des pieds: laquelle, quoy que nostre Seigneur en donne en ce lieu commandement expres, ceux-cy ne daignent observer, & toutesfois ils contraignent de prendre le calice, bien qu'ils n'en sçauoient monstrier vn commandement expres. Que fil y a quelque reste du pain & du vin, (ce que, peut-estre, aduient bien rarement, les freres & sœurs Evangeliques beuuant d'autant) l'Eglise se met de rechef à genoux, & rend graces à Dieu pour le benefice de redemption par Christ. Au reste, ie n'en veux escrire d'auantage, pour ce que c'est vne chose ridicule & execrable, inuentée par des testes mal sages, au mespris & desdain de l'Eglise Catholique.

Toutesfois i'ay escrit la mode de Zurich. Car alentour d'icelle ville le ministre seul recite tout ce qu'il faut, & chacun viert à la table: ce qui est bien meilleur, entant qu'ainsi a semblé à Zuingle. Oecolampade, grand amy de Zuingle, a voulu qu'on procedast à Basse en ceste maniere, à fin que chacun aille en ses inuentions. Estant assis en la chaire il lisoit tout iusqu'aux parolles de la Cene, lesquelles il recitoit deuât la table. Apres l'oraison finie, & chacun s'approchant, s'ensuyuoit la communion, & pendant icelle, le peuple chantoit les Psalmes en la langue du pais. La communion paracheuée, il laissoit aller les assistans avec vne exhortation. Mais ie n'auroy iamais fait, si ie vouloy reciter toutes les ceremonies diuerses d'un chacun, par lesquelles le peuple a esté despiécé en mille & mille opinions contraires, pendant que ces trompetteurs du nouveau Euangile ne s'en font que rire & gaudir, à cause qu'il n'y a celui d'eux qui n'ayt ses sectateurs, lesquels se nomment de son nom.

EN ce temps, quatorze Docteurs Lutheriens s'assemblerent à Hale en Suaube, & comme Lutheriens qu'ilz estoient, condamnerent la sentence d'Oecolampade Zuinglië, par vn liure qu'ilz intitulerent syngramma, ou bien Conscription, lequel on pense auoir esté composé par Brèce, qui estoit grand Lutherié. Or Oecolampade ne perdit pas courage pour cela, ains il respondit brusquement à ces Suaubiens par vne Conscription contraire. Bucer, qui iadis auoit esté Iacobi, (à fin que tous les Capitaines & Port'enseignes du nouveau Euangile soient moynes apostatz, & encôre des plus infames & detestables) escriuit à quelques vns de ces docteurs, les aduertissant que c'estoit chose fort laide, que ceux qui annoncent vn mesme Christ eussent picques par-ensemble. Ces apostatz cognoissoient trop bien, que par ces menées & altercations mutuelles chacun se strangeroit d'eux, & eussent bien souhaité qu'on se fust accordé: mais ilz ne cherchoient pas la gloire de Dieu, ains la leur, & partant enflés de superbe, ilz ne vou-

a permis que les langues des bastisseurs de la nouvelle tour de Babylone, fussent confuses. Et combien que par ce seul argument on pouuoit aysément cognoistre, que ces hommes icy n'estoient pas poussez de l'esprit de Iesuf-christ, amateur & autheur de paix, mais bien de celuy de Satan, qui est Roy sur tous les filz de superbe, & faict tous ses sectateurs semblables à soy, cest à dire ennemys de la paix & concorde Catholique: si est-ce que le miserable peuple, pensant auoir trouué la lumiere de l'Euangile, s'est volontiers sequestré de l'Eglise Catholique. Et neantmoins n'a oncques sceu trouuer quelque certaine doctrine qu'on seroit tenu de suyure, ains, selon que chacune nation d'Allemagne & des prouinces qui l'auoyssinent, a eu ses ministres & prescheurs addōnez à telz ou à telz, s'est pareillement faicte de ceste secte ou de celle là: de maniere qu'à la fin les choses ont esté reduytes à telle extremité, qu'en plusieurs lieux il y aura autant de sectes, qu'il y a de personnes en vne maison, qui est vn des plus grandz fleaux que Dieu nous pourroit enuoyer. Toutesfois quiconque abandonne l'vniō de l'Eglise Catholique, sans faute il se verra enuelpé de toutes ces incommoditez.

Le liure des Suaubiens cy dessus mentionné fut traduit en Aleman par Iehan Agricole, qui pour lors estoit du party de Luther. Luther approuue ceste version par vne Preface, & tesmoigne qu'il abhorre & deteste les Sacramentaires. Oecolampade ne faillit pas de respondre à ceste preface en Alemā. Or disons maintenant, si la doctrine de Luther est deriuée de Iesuf-christ, comme tant luy que tous ses sectateurs se vantēt, pourquoy ceste sentence sienne, par laquelle il a en abomination les Sacramentaires, n'est par eux receuē & authorisée? Pourquoy tant d'hommes laissent le camp de Luther pour se ioinde à celuy de Zuingle? Ou si Luther erre en vne si grande chose, pourquoy ne croient-ilz, qu'il a esté poussé à escrire ses resueries, non pas de l'esprit de Dieu, ains de mensonge? Aussi y eut vn autre moync desfroqué, lequel s'appelloit Iehā Pomeran, qui escriuit en ce temps vne epistre en Latin & Aleman alencontre des Zuingliens, & eut si bonne part en la

*Luther de
teste les
Sacramen
taires.*

bonne grace de Luther, qu'il le fait pasteur de l'Eglise de Vuittemberg. Mais plaïse à Dieu de chasser telz pasteurs de son Eglise.

LES ministres Euāgelīqs de l'Eglise de Strasbourg enuoient en ce tēps leur legat à Luther, pour l'induyre à cōcorde, à fin q' r'alliās & assemblās leurs forces de toutes parts, ilz enuahyslēt le Royaume du Pōtife Romain. Et certainemēt ce sont leurs propres parolles, & n'ont point de honte de monstrier à la posteritē leur folie & deuoyement de sens, quoy que chacū puisse facilement entendre, quand il n'y auroit que ceste hayne & poursuyte du Pape, qu'ilz estoient ministres de Lucifer. Car S. Cyprian, tref-cloquent & tref-ancien Martyr, a fort biē escript en la troyiesme epistre du premier liure, disant: *Quelz* ^{Beau pas- sage de S. Cyprian, monstrant l'origine de tō^s schismes en l'Eglise.} *pen- ses-tu estre ceux-là, qui estans ennemys des prestres & re- belles à l'Eglise Catholique, ne sont aucunement intimidéz ny de la menace du Seigneur les admonestant, ny de la vengeance du iugement futur? Car les heresies ne sont issuës d'ail- leurs, ny les schismes d'ailleurs sortis, sinon pourautant qu'on n'obeist pas au Prestre de Dieu, on ne cogite point qu'il y a en l'Eglise vn prestre pour vn tēps, & vn iuge pour vn temps au lieu de Iesuf-christ: auquel si tous les Chrestiens obeïssent selon le commandement diuin, il n'y auroit personne qui rien attentast contre les Prestres: personne apres vn iugement diuin, apres le suffrage du peuple, apres le consentement des autres Euesques, ne se feroit Iuge ie ne diray point de l'Euesque, mais de Dieu: personne ne diuiferoit l'vnion de l'Eglise par schisme, personne outrecuydé & superbe ne feroit à part & dehors vne heresie nouuelle. Ce sont les morz de ce saint Martyr, lesquelz en vain on remonstre aux heretiques, à cause qu'ilz sont subuertys & condamnés par leur propre iugement. Or Luther ne faisant guere de conte de l'aduertissemēt de ceux de Strasbourg, admonnest au contraire Zuingle & Oecolampade, qu'ilz desistēt de plus seduyre les ames: & afferme planierement, que ou il est ministre de Satan, ou ilz le sont. Luther voyoit bien qu'il faisoit son deshonneur en leur cedant, & partant il l'attendoit que tous s'accordassent à son*

opinion. Doncques que pouuoient ce pendant penser ceux, lesquels s'estans mis à l'eschole de Luther, voyoiēt qu'on amenoit vne nouuelle opinion de l'Eucharistie, ce qui ne se pouuoit faire sans grande reprehension de Luther? Ne conceuoient-ils point quelque repentance d'auoir quitté l'Eglise Catholique, pour se ranger à Luther, attendu qu'ils aduisoient bien, que par vne si grande diuersité d'opinions ilz encourroiēt vn grand peril de leur salut, & ce en bien peu d'années? Parquoy à bon droit tu estimeras heureux ceux, qui se sont tousiours tenus au parc de l'Eglise Catholique.

Trouble

*des paisans
vis cent mil
le furent
occis.*

DURANT ce temps y auoit vn prestre nommé Thomas Munzer, homme seditieux & merueilleusement audacieux, lequel prenāt occasion sur les escrits de Luther, incita le peuple trop credule & peu experimenté, à seditions en plusieurs lieux d'Allemagne: & l'enflamma premierement alencontre du Clergé, & puy contre les Seigneurs. Parquoy en ceste année les paisans & rustiques s'assemblerēt en maintz endroitz, desireux de se mettre en quelque nouuelle liberté, tellement qu'ils feirent mille outrages & indignitez incroyables, & de faict massacrerent Loys Conte d'Heluestein, qui auoit espousé la bastarde de l'Empereur Maximilian, & si bruslerent plus de deux cens que Chasteaux que Monasteres au seul pais de Franconie. Et c'est chose trop manifeste & cogneüe à chacun, que ce tumulte eust ruiné de fond en comble & l'Allemagne & les prouinces voylines, si les Seigneurs n'eussent incontinent pris les armes, par lesquelles ilz meirent à neant tous les efforts de ces rustiques. Car, comme j'ay cy deuant noté, le bruit commun est, que plus de cent mille paisans y perdirent la vie tant par l'Allemagne que par Lorraine. Ce Munzer auoit animé & encouragé plusieurs, d'autant qu'il disoit entre autres choses, qu'il receuroit tous les coups d'artillerie dans sa manche. Mais mal basta pour luy, pource que bien tost il fut prins à Francuse, & donné en garde à Catholique Seigneur Ernest, Conte de Mansfeld. Si fut prins pareillement son compaignon nommé Phifer, moyne apostat, mais cetuy-cy fut obstiné en son erreur, à cause dequoy on le feit mourir sur le

champ. Car quand à Munzer, on dit que vrayement il se repentir, & reuoqua ses erreurs, & qu'après auoir fait Confession de ses pechez, il reçut l'Eucharistie soubz vne espee seulement: quoy fait on le fait passer de ce monde en l'autre. Luther doncques voyant que les Princes, (ausquelz comme vn Apollo il auoit prophetizé mille malheurs & desconuenues de fortune deuoir aduenir) auoient par leur puissance dompté & mis à sac ceste pauvre & miserable populace, ne tarda gueres à changer de propos: & comme fin & cauteleux qu'il estoit, escriuit vn liure contre les rustiques pour gaigner le cueur des Seigneurs, comme ainsi soit que par ses escritz trespistilens il eust donné occasiō & esguillon fort piquât pour exciter ceste sedition, comme on peut monstrier au doigt. Bref la haute Alemaigne souffrit plus de miseres, degast, meurtres & pillerie en vn seul moys de May, que l'Italie ne fait en ce temps par l'espace de dix ans & des François & des Espaignolz. Antoine Duc de Lorraine en deffait luy seul en Alsace plus de vingsix mille. Sans doute c'estoit pitié que de voir l'Alemaigne, & signamment la haute, en ce temps là: pourautant que les subiectz ou apertement ilz menaçoient d'assassiner leur Seigneur, où souz main ilz tramoient quelque rebellion. Et c'est le fruit que l'Euāgile de Luther a produit & germé, pourautant que les espritz, abandonnans toute religion, & appelez par Luther à la liberté de la chair, ne pouuoient endurer aucun commandement.

Les villes ne furent exēptes de ceste misere, ains en plusieurs se trouuerent hommes seditieux & hautz à la main, qui s'esleuerent contre le Clergé & le Senat. Le tumulte commença bien grand à Francfort sur le Mein, & delà fut à Mayence, & quelque peu apres il se planta mesmes à Coloigne sur le Rhin: mais les auteurs de ces troubles se veirent en telz termes, qu'ilz eussent souhaité n'auoir iamais commācé. Quand à Coloigne, les Lutheriens ne sçurent oncques faire par toutes leurs ruzes & machinations, qu'ilz eussent le presche publiquement. Pareillement quelques villes Imperiales furent contraintes de tenir gensdarmes à leur solde, afin que le peu-

*Luther e-
scrit contre
les rusti-
ques, flat-
tant les
Seigneurs.*

*Trouble
dedans les
villes en
Allemai-
gne.*

ple ne se mutinaſt, & qu'ẽ tel cas aduenant, ilz ſe peuſſent defendre.

*Trouble à
Fräcfort,
Coloigne
& Ma-
ience.*

LE iour de Paſques, deux belifres de la ville de Fräcfort furent auteurs de tout ce meſchef & ſeditiõ, dont l'un eſtoit cordonnier, & l'autre couſturier. De prinſaut le peuple eſtant en armes ſe rua ſur le Conuent des Iacobins, mais encores ſe modera il iuſqu'à là, qu'il ne demanda qu'à boire par commandement, & au reſte il ne pillà ny ne gaſta rien. Ce pendãt les portes de la ville eſtoient tenues cloſes, le peuple ſeditieux caſſoit les Senateurs, & donnoit la charge & adminiſtration de la ville à vingt-quatre hommes, choiſis d'entre le peuple. Bref, ilz faiſoient pluſieurs choſes fort inſolemment: & cõ me ſilz fuſſent eſté quelques Dictateurs, ilz faiſoient des Edictz, & ne ceſſoient de menager le Senat & le Clergé. Ceux, qui par leurs eſcritz & parolles embabouinoient les miſerables hommes d'Allemaigne, auoient Luther pour leur auteur. De maniere que ces hommes deleguez à Francfort eſcriuirent quarante ſept articles, extraictz des paradoxes prodigieux de Luther, & ſi vouloient, qu'ilz fuſſent obſeruez & entretenuz comme loix. Or pour auoir quelques complices de leur peruerſité, ilz enuoyerent ces quarante ſept articles à ceux de Maience, & de Coloigne. Dont le peuple de Maieçe eſtãt deceu, & encouragé auſſi bien q̃ celui de Francfort, feit pluſieurs algarades au Clergé, & demeurèrent les portes fermées par trois iours, le peuple eſtant toujours en armes. Ainſi fut contrainct le Clergé d'appointer quoy qu'à ſon grand deſauantage & deſhonneur, à cauſe principalement que les ruſtiques, trouble-feſtes, augmentoient grandement l'audace de ces gens perduz. Mais quand vn peu apres ceſte racaille d'hommes fut paſſée au tranchant de l'eſpée, auſſi ceſſa l'eſfort temeraire tant de ceux de Francfort, que de ceux de Maience, & tout ce qu'on auoit extorqué du Clergé par force & violence, fut mis au neant. Or Sleidan employe beaucoup de langage à reciter, ce que Luther eſcriuit en ceſte ſaiſon du trouble des paĩſans, mais neantmoins il eſcrit pluſieurs choſes ſans y penſer, dont & luy & Luther deuroient mourir de vergongne.

*Que Lu-
ther a eſté
le motif
du trouble
des paĩſans
& qu'ẽ dit
Sleidan.*

vergongne. Il afferme, que Luther escriuit aux Seigneurs, que les hommes ne pouuoient, ny ne vouloient, ny mesmes ne deuoient plus endurer leur domination: que Dieu cōduy-
soit l'affaire de ce peuple, qui se reuoltoit contr'eux, & que Dieu leur faisoit la guerre, les punissant de leur impieté. N'estoit-ce pas cela armer les hommes alencontre des Princes? N'estoit-ce pas approuuer le faict de ces seditieux & mutins, quand il asseure, que Dieu en estoit l'autheur? Et toutesfois Sleidan adioust par-apres, que Luther a escrit, que des le cō-
mencement il a enseigné modestement, & qu'il auoit en grā-
de horreur les seditiōs: & que mesmes il auoit enhorté le peu-
ple, à ce qu'il portast patiemment la tyrannie & felonnie domi-
nation des Princes. Et ie vous prie quelle bestise est-ce, que ce braue Sleidā tesmoigne en vne mesme page, Luther auoit
escrit choses si contraires & repugnantes, à sçauoir qu'il auoit
toufiours enseigné modestement, & neantmoins qu'il appel-
le la tyrannie & impie domination des Princes? Vn peu apres
il produist encore l'escript de Luther aux Princes contre les
rustiques, & dit qu'il sonna l'alarme, & qu'il les admonnesta
de se ruër sur les païsans, comme ilz feroiēt sur des bestes bru-
tes & outrageuses. Et, tesmoing Sleidan, Luther confesse, qu'ē
ceste part il deuoit necessairement chāger de style. Mais que
Sleidan s'en aille avec son Luther. Ce peruers veut charmer
le lecteur, afin que s'il list les contrarietez & euidens menson-
ges de Luther, il ne les apperçoyue pas. Nous auons ia cy des-
sus exposé, que Luther a appelé noz Seigneurs grossiers, fu-
rieux & folz insensez, & que le Turc estoit dix fois meilleur
qu'eux, & plusieurs choses semblables dictes fort aigrement
contre les Princes. Ne prouoquoit-il pas les subiectz contre
leurs Superieurs, en tenant telz propos? Ne persuadoit-il pas
par cela, qu'il valoit beaucoup mieux à ces miserables, d'en-
durer la tyrannie du Turc, que le legitime commandement
de l'Empereur & de ses Princes? Et toutesfois, comme Sle-
idan nous faict voir, cest Euangeliste sanguinaire n'a point
honte de dire, qu'il a toufiours enseigné modestement, &
qu'il a grandement abhorré toutes seditions. Mais quoy que

Luther dit de soy-mesme, ou que Sleidan escriue à la defense de Luther, cela demeure certain & par trop clair, que Luther a esté seditieux au possible, & que par ses furieux escriptz & predications, il a mis les armes au poing de la populace à demy-folle, alencontre de ses Superieurs legitimes. Toutesfois il se sçauoit fort dextrement accommoder au temps, & lors qu'il faisoit estat, que les troubles & seditions reüssiroient à prouffit, il dist tout ce qui luy venoit à la bouche contre les Princes: & au contraire, voyant que la temerité & folle hardiesse des rustiques estoit opprimée par la vaillance & prudence des Seigneurs, vous ne sçauriez croire, combien il approuua le faict d'iceux, & les enflamma à ruiner entierement ces pauures gés, du mal-heur desquels il auoit esté le premier motif. L'an mil cinq cés vingt & trois il auoit escrit vn liure de la puissance seculiere, auquel il soustient que le plus souuent les Princes ou ilz sont les plus grandz folz, ou les plus meschans pendartz, & que de leur costé peut venir beaucoup de mal, mais bien peu de bien: il se iacte aussi, que le peuple simple commence à venir sage, & bien entendu, & qu'il y a bien peu de Princes, qui ne soient estimez fatz & belistres. Doncques à qui faut-il attribuer cecy, qu'à Luther? Vray est que peu apres Thomas Munzer fest esuertué de mettre ceste folie de Luther en ceuvre, & prenant son patron sur les escriptz de Luther, se monstra diligent coadiuteur d'iceluy à susciter la reuolte du peuple. Toutesfois on chassoit fort honteusement ce Munzer au commencement, & ce en plusieurs villes, comme à Prague en Boheme, à Gutterbach en la Marche, à Zuiccanie, ville de l'Electeur de Saxe, à Halles, au Conté de Tyrol, & à Alster, d'où Luther le feit fort bien chasser, quoy qu'il luy eust presté assez de matiere pour attéter tous ces remuemens de mesnage, voire mesmes l'eust au comencement excusé & defendu enuers ledict Electeur, esperant que l'affaire sortiroit son plain & entier effect. Bref, les parolles escrites par
” Munzer aux rustiques, declarent assez celuy qu'il a ensuiuy:
” ne vueillez plus, dit-il, flatter ces folz, peruers & meschans:
” commencez, & guerroyez la guerre du Seigneur: en voicy le
”

temps propre &c. Luther n'a-il pas aussi appelé les Seigneurs folz & belistres? Pareillement Munzer, accompagné des rustiques, gastoit les Eglises & monasteres, donnoit la chasse aux moynes, fouloit aux piedz les Sacremens, & faisoit plusieurs autres semblables indignitez. Aussi Luther n'a-il pas enseigné le semblable, & les Lutheriens & sectaires n'en font ilz pas tout de mesme? C'est doncq' vn point vuydé, que Luther a esté la source, de laquelle les troubles & seditions sont issusés és villes, c'est luy qui a donné l'alarme en ses liures, c'est luy qui a esté la cause principale de maux innombrables.

OR toutesfois, pendant qu'en ceste année l'Alemaigne estoit toute esplourée, que les choses estoient en si grande perturbation, & calamité non iamais ouïe, Luther, picqué de ie ne sçay quelle furie, celebra des nopces fort ioyeuses & gail- lardes, espousant vne nonnain, pour monstrier à la par fin à tout le monde, ce que si long temps il auoit couué en son esprit. O malheur! qu'un Docteur en Theologie, qui a publiquement voüé perpetuelle continence, pauureré & obedi- ence, & qui de long temps estoit prestre, se soit si fort oublié soy-mesme, & despoüillé de toute vergongne, que ce que les espritz bien nourris & instituez en la religion Catholique, ne sçauoient mesmes ouïr, sans le detester, ce miserable & perdu apostat l'ait osé faire & executer. Je veux bien que les Lutheriens suyuent leur Euangeliste, & tous ceux qui ont quit- té le party de l'Eglise Catholique: si est-ce que tât que le mon- de sera, ilz auront vne note d'ignominie engraüée sur leur front, pour auoir suyuy vn homme si meschant & abomi- nable. Et à la verité, il faut bien inferer, que ceux auoient per- duz leur esprit & tous leurs sens, qui ne sçeuient oncques s'aduiser d'une impieté si enorme. Les heretiques du temps iadis souloient se masquer de quelque honnesteté de mœurs, & sainteté de vie: mais Luther s'est lasché la bride, & à tous les siens, pour suyure toute ordure, si qu'il leur seroit permis de faire tout ce qu'il leur plairoit. Ses escriptz sont en lumie- re, ses faictz enormes sont par trop euidens à vn chacun, par

*Luther se
marie au
milieu des
troubles
d'Ale-
maigne,
& la dete-
station de
ce s'est fait*

lesquelz on peut faire voir à l'œil ce mien dire. Et toutesfois, au contraire de ce que la conscience nous suggere au dedans, vn tas d'hommes suyuent ce Capitaine, qui permet tout facilement, pourueu qu'ilz aient la foy, laquelle il maintient estre seulement necessaire à salut. Il a en mespris & desdain les decretz de l'Eglise, les ieusnes, prieres, veilles, & finale-

* En l'as-
sertion de
l'artic. 32.
Toutes au-
tres sont
pechez à
Luther.

ment toutes bonnes choses: mesmes il a osé escrire, * vn bon ceuvre, tant bien soit-il fait, estre vn peché veniel selon la misericorde de Dieu, mais estre peché mortel selon le iugement de Dieu, & plusieurs autres choses encores plus absurdes, lesquelles l'Eglise Catholique condamne incontinent. Mais ce qui nous doit rair en plus grande admiration, est que comme Luther se iactast d'auoir le premier communiqué la vraye lumiere de l'Euangile à l'Allemagne, de laquelle elle auoit esté priuée fort long temps, & ce neantmoins iettant le froc aux horties, rompant son vœu de continence, foulant aux piedz le droit diuin & humain, espoulast vne nonnain publiquement: les hommes ne furent point pour lors irritez d'vn si horrible forfait, mais bien prindrent cela pour exemple d'vne vertu singuliere, & vn fait fort Euangelic, lequel depuys & prestres, & moynes, & religieuses ont imité avec loüange, & applaudissement incroiable des hommes. Qui pourroit assez admirer vn si grand auuglement des personnes? Iadis y eut à Rome, du temps que viuoit Sainct Hierosme, certain homme appelé Iouinian, lequel

* Auli-
ure des he-
re, es, en
l'heres. 82

De l'here-
sie de Ioui-
nian.

Sainct * Augustin escrit auoir esté moyne. Cetuy osa bien enseigner, comme tesmoigne le mesme Sainct Augustin, que la virginité des religieuses, & la continence des hommes, qui ne s'accointent iamais des femmes, n'auoient non plus de merites, que la continence chaste des hommes mariez. Pourquoy confirmer il alleguoit quelques lieux de l'escriure, mal entendus, selon l'ordinaire des heretiques. Mais sa resnerie ou heresie, comme l'appelle Sainct Augustin, ne tarda gueres à estre suffoquée & esteinte, & ne sceut oncques seduyre aucun prestre. Toutesfois il y eut quelques filles lasciuies, qui auoient fait vœu, & mesmes quelques

vnnes assez aagées, lesquelles estans chatouillées de ces parolles, fort plausibles à la chair, meirent leur honneur en proye: mais quand à luy, il ne se maria iamais, ny n'en eut oncques volonté. Doncques ceste folle opinion, procedée d'un cerueau peu sage, ne sceut iamais esmouuoir auc un homme Ecclesiastic à se marier, pourautant qu'on voyoit aysément la grande absurdité qui y gisoit: mais en ceruy nostre malheureux siecle, vn Luther, beaucoup plus ennemy de continence, & inuitant vn chacun, voire ceux qui se sont consacrés à Dieu, à prendre femme, & donnant la bride à toutes voluptez illicites, a trouué tant d'hommes, qui ont ioyeusement approuué sa sentence & impieté, qu'on ne le scauroit dire, ny excogiter sans horreur bien grande. Ce grand Sainct Hierosme escriuit deux liures fort graüement contre Iouinian, par lesquels il le confuta: mais Luther, ia donné en sens reprouué, n'a peu estre esmeu par ces escriptz, quoy qu'en ce temps là plusieurs furent retenuz & confirmez en la saine foy, & en vn saint vouloir de continence. Aussi l'escriture est vraie, qui nous chante: considere les ceuures de Dieu, que *Eccle. 7.* personne ne scauroit remettre celuy que Dieu a abandonné. Ce n'est pas chose si esmerueillable, que Luther soit venu iusqu'à si grande impieté: mais cela surpasse toute admiration, qu'il a eu tant d'approuueurs de si grande meschanceté, & qui l'estimoient & l'honoroient comme quelque Apostre, quoy qu'il eust choppé si lourdement. Les payens auoient iadis leurs vierges Vestales, & si quelcune d'icelles auoit eu compaignie d'homme, on l'enterroit toute viue, & la faisoit on mourir de ceste sorte. Luther au contraire rapporte grand' louänge d'un mesme forfait. O temps, ô meurs! Qui est-ce maintenant, qui pourroit douter, que ce dit d'Esaie ne fust accompli: L'enfer a dilaté son ame, & a ouuert sa bouche sans aucun terme. Y a-il chose si absurde, qu'on ne puisse persuader aux hommes de nostre temps, considéré qu'eux estans persuadez par cest apostat, qui a commis vn acte si lasche & vilain, estiment, que cest inceste d'un moyne renié, & que ceste couche sacrilege, a esté vn mariage tres-chaste &

treffainct: Que reste-il, sinon que nous rendre disciples de la doctrine de Mahometh, qui a merueilleuse sympathie avec celle d'Epicure, & d'embrasser les resueries & folies, contenues en l'Alcoran? Certainement c'est le seul scope de l'Euangile de Luther. Car qui recherchera, pourquoy Luther a acquis tant de sectateurs, qu'il considere, que seulement il a enseigné ce qui estoit blandissant à la chair & au sang, & aux vices de nostre nature corrompue. Aussi a fait de mesme le meschant Mahometh, & c'est pourquoy sa superstition, quoy que sotte & inepte, s'est dilatée de tous les quartiers de l'Vniuers. Au contraire, l'Euangile de Iesuchrist nous reuoque à vne vie estroicte, & à faire fructz de penitence. Luther a escrit quelque epistre, laquelle il a voulu estre nommée, la fidele admonition à tous Chrestiens. En ceste epistre est inseré ce que s'ensuit: Regarde biē que tu exerce le saint Euangile, enseigne, parle, écris, & presche, que les loix humaines ne sont rien, deffends & dissuade, que personne ne se face prestre, religieux, ou religieuse, & que mesmes ceux qui sont en tel estar, le delaissent &c. Nous voyons qu'il nous priue des loix humaines. Et que scauroit-il dire plus ioyeux & favorable aux larrons, voleurs, & adulteres? Il oste la prestrie, il chasse loing tout estude & soing de continence: & qu'est-ce autre chose, sinon que, Boy, mange, recrée toy, il n'y a point de volupté apres la mort? Par ces paradoxes il a creu & par icelles a corrompu le peuple trop credule. Il veut, que ceux qui ont fait profession de la vie monastique, la quittent. Que deuiendront doncq' les vœux, qu'on a faitz à Dieu? Il respond, qu'il ne se soucie des vœux. Mais l'Escripture sainte le desment, tous les anciens peres luy contredisent, le perpetuel consentement de tout le monde s'y oppose, & finalement la raison est au contraire. Or est-il que Luther veut, qu'on adioute plus de foy à luy, qu'à toutes ces choses. Toutesfois, nous croirons plus volontiers vn seul Saint Augustin, que cinq cens Luthers, lequel escrit ainsi: * Ce qui estoit loisible à quelcun, deuant qu'il eust voué, ne luy sera pas loisible, sil a

Abominables paroles de Luther, icy refutées.

** Aulieu premiere des*

voüé vne fois qu'il ne le fera point: au moins s'il a voüé ce ^{faux ma-}
 qu'il falloit, comme est la virginité perpetuelle, ou la conti- ^{riages, ch.}
 nence, apres auoir eu le plaisir du mariage. Telles choses qu'on ^{24.}
 peut voüer fort honnestement, si les hommes les ont vne fois ^{Beau lieu}
 voüées, par nulle condition elles peuuent estre rompuës, veu ^{de S. Au-}
 que sans condition elles ont esté voüées. Car Dieu la com- ^{gustin tous}
 mandé, quand il est dict, Voüez & rendez à vostre Dieu voz ^{chant les}
 voeux. Tellement que l'Apostre; parlant d'aucunes, lesquelles ^{voeux.}
 les voüent continence & apres se veulent marier, (ce qu'elles ^{Psal. 75.}
 pouuoient faire ains que de voüer) dit ainsi: elles ont damna- ^{cc}
 tion, pource qu'elles ont rompu leur premiere foy. Voila ce ^{1. Tim. 5.}
 que dict S. Augustin, auquel s'accordent tous les Peres de l'E-
 glise Catholique. Luther donc aille où il luy plaira, & qu'il
 trompe tant qu'il voudra, quand à nous, vn apostat ne nous
 sçauroit deçeuoir.

CESTE année il escriuit le plus horrible & execrable li-
 ure, qu'on sçauroit voir, ainsi intitulé: de l'abomination du Ca- ^{Luther es-}
 non de la Messe. Certes c'est merueille, qu'un homme aiant ^{crit contre}
 esté fort longuement institué en la religion Catholique, soit ^{le Canon de}
 cheu en vne si extreme impieté. Doncques celuy qui est de- ^{la Messe,}
 bout, se donne garde qu'il ne tombe: mal-heur à tout super- ^{& plu-}
 be, pour-autant qu'il est bien pres de sa ruine. Au reste, qu'a ^{sieurs au-}
 l'Eglise de plus sacré, que ces misteres redoutables, & le Ca-
 non de la Messe? Vraiment cest homme insensé se peinoit
 beaucoup, à applanir le chemin à l'Antechrist. Il y eut quel-
 cun appellé Sapidé, regent au à Strasbourg, qui meit en lu-
 miere quelques vers contre le Canon de la Messe, dignes non
 de reprehension, mais bien du foüet & du feu, lesquels neant
 moins le docte Arnoul de Vesalie; (qui depuis a esté Chanoi-
 ne de la grand' Eglise de Coloigne) tourna fort ingenieuse-
 ment à la loüange de la Messe. Il faut adiouster à ces sornet-
 tes le dialogue fait en Tudesque, de la maladie & trespas
 de la Messe, à fin que Satan espuisast tout son venin pour le
 ietter alencontre des saints mysteres de la Messe, par ses mi-
 nistres & procureurs. Ce neantmoins, que l'Allemagne &
 toutes les autres nations qui se delectent à tels blasphemes,

faisseurent, que indubitablement le Dieu tout-puissant se vengera de si grandes iniures, dictes de sa Maïesté, cōme il a quel quefois monsté euidemment le temps passé.

En ce mesme temps Luther escriuit aux Liuoniens, & au Duc de Sauoye, qui ne fait guere de conte des coquilles de Luther. Il escriuit aussi à ceux d'Anuers, & aux Chrestiens espars en Hollande, Brabant & Flandres: & Iehan Pomeran escriuit aussi vne epistre aux Saincts estans en Angleterre. Ce qu'ilz faisoient si alaigrement, à fin que de long & de large ils espendissent leur poison, & se peussent glorifier de l'augmentation de leur secte entre les Alemans. Or Luther, par son liure auquel il encourageoit les Seigneurs à punir fort rigoureusement les rustiques, auoit offensé plusieurs, à cause qu'il sembloit estre par trop vehement & sanguinaire. Ce qu'ayant entendu, ne tarda gueres à escrire vn troisieme liure des Rustiques, auquel il maintient, que ceux doyuent estre reputés pour seditieux, qui accusent son liure premier de cruauté, ou bien qui ont tant soit peu de commiseration sur la tuërie des Rustiques: & defendit quant & quant, qu'aucun ne se formalisast au contraire, si ne vouloit finer ses iours: car il dict, que c'est chose equitable, que tout ce qu'il enseigneroit ou escriroit, demeurast, quoy que tout le monde deust rompre pour cela. Et que pourroit dire Lucifer plus arrogamment? Où est-ce qu'il y a tant de contrarietez, si frequentes & si soudaines mutations de doctrine & enseignemens? Veritablement si le trouble des païsans eust succédé heureusement, personne n'eust esté plustost de leur party que Luther: mais la chance estant tournée, Luther n'a pas failly de tourner par mesme moyen son style. Au parauant il auoit escrit en sa faulce exhortation à la paix: vous Messieurs (parlant aux Seigneurs) pensez vous que ce soient les rustiques qui s'opposent à vous? c'est Dieu mesme, qui se bande contre vous, pour visiter vostre tyrannie. Or les païsans desfaits, que dit-il en vn autre liure incontînét? Le tēps est si merueilleux maintenant, qu'un Prince peut plus aisément acquerir Paradis par effusion de sang, que les autres par prieres. Voyez vous si ce

monstre

*Mentes
des hereti-
ques en plu-
sieurs
lieux.*

*Arrogan-
ce & muta-
tion mer-
ueilleuse de
Luther,
touchant le
massacre
des rusti-
ques.*

monstre se change en plusieurs formes?

A v mois d'April de ceste presente année, l'Empereur Charles espousa Isabel, fille du Roy de Portugal. Et en mesme an Albert de Brandebourg, trente-quatriesme Maistre ^{Le Maistre de Prusse se marie, & se fait le premier Duc.} de l'ordre des Teutoniques, (ou Cheualiers de la Vierge Marie) embrassant l'heresie de Luther, espousa Dorothee, fille du Roy de Dannemark, & changea le nom de Maistre en Duc, au moyen dequoy il estrangea de soy tout cest ordre, si qu'ils esleurent en son lieu Vualter Cromberg. Auourd'huy les Ducs de Prusse sont vassaux du Roy de Poloigne, bié que par le passé les Maistres de cest ordre ont bien souuent guerroyé contre les Polonois, & ont deliuré ceste contrée des infidelles, pour-autant que ceste region estoit encor' addonnée à la superstition des payens.

L'AN 1526. pourautant que Luther par ses escripts pernecieux auoit accouragé, non seulement le vulgaire, mais bien encore plusieurs grands Seigneurs au mespris de l'ancienne ^{Misere de la Chrestienté.} religion & du Clergé, & que les esprits estoient fleschis, qui ça qui là, il n'y eut pas vn des Potentats d'Alemaigne, qui donnaist secours à Loys, Roy d'Hongrie, contre qui s'approchoit le Turc avecq' puissance effroyable. Et ce-pendant aussi, plusieurs sans en faire semblant, redoutoient la force de l'Empereur en Italie, à cause que le Roy de France auoit esté prins, & incontinent allié par quelques conditions. De façon qu'il n'y auoit lieu, où l'estat des Chrestiens ne fust troublé & vexé, soit par guerrès intestines, soit par nouuelles heresies. Dequoy le Turc estoit assez certioré, qui auoit l'œil à regarder comment il feroit bien ses besongnes, & pour trouuer occasion de destruire & atterrer les Chrestiens. Au moien dequoy il denonça la guerre en ce temps au ieune Roy d'Hongrie, & qui n'estoit encor' experimenté aux affaires de la guerre, à cause de sa ieunesse. Ce neantmoins la noblesse d'Hongrie ^{Le Turc enuabist l'Hongrie, & le Roy pert la bataille, y laissant la vie.} pour lors mesprisa par trop la puissance du Turc, selon qu'il semble, à cause que iamais elle n'auoit veu l'armée des Roys Ottomans. De sorte qu'ayans assemblé à toute peine vingt-cinq mille hommes, que de pied q' de cheual, allerét attaquer

le Turc par grãde temerité, veu que ses forces estoient huit fois plus grãdes. Aussi quãd ce fut à chocquer, les Turcs meirrent aisément les Chrestiens en route & desarroy, de sorte que le Roy mesmes, qui vouloit se sauuer à la fuite, túbant en vne fondriere fut là suffoqué, duquel lieu toutesfois on tira par apres son corps, & fut inhumé à Albe Regale, cõme sont communément les Roys. On dit que Solyman, aiant emporté vne si segnalée victoire, & aiant saisi vn nombre incredible d'artillerie, se gaudist de la folle hardiesse des Hongres, de quoy ils n'auoient fuy plustost, que de venir aux mains avec vne si puissante armée. Marie, femme de Loys, & sœur de Charles l'Empereur, aiât euité à toute peine les mains de l'ennemy, se retira à Vienne. Solyman aiât occupé Bude, alla voir la forteresse, & la loüa merueilleusement, & n'emporta rien de là, sinõ que trois statuës de bronze fort grãdes, qui auoient esté au Roy Matthias. Or apres le deces de Loys, fut esleu premieremēt par les Boëmes, & puis par les Hongres, Ferdinand, bon & Catholique Prince & frere de l'Empereur, pour estre Roy d'Hongrie. Mais à fin que de tous poincts le Royaume d'Hongrie cheust en ruine & perdition, Iehan Vayuode, Conte de Cilie, fut par quelques vns esleu Roy d'Hongrie, lequel n'a iamais cessé de persecuter & vexer par tous moiens à luy possibles le legitime Roy Ferdinand, iusqu'à tant que le Turc s'est emparé de presque toute l'Hongrie: de maniere qu'on peut dire, (& par trop veritablement) que le Turc ne croist, sinon comme les guerres intestines, haines & partialitez des Princes Chrestiens luy donnēt moyen de s'amplifier: ce qui est si miserable, qu'il vaut beaucoup mieux le lamēter, que d'ē dire d'auātage. Encore n'estoit-ce pas assez si Luther n'eust preparé la voye au Turc pour enuahir l'Alemaigne, esguillonnant par ses seditieux liures les subiects à se soufleuer contre le Magistrat, & les Princes seculiers contre le Clergé. Et voyant qu'il y auoit quelques Seigneurs, enuers lesquels il ne pouuoit rien gagner, ny par menaces, ny par opprobres, ny pour exciter seditions, il tascha de les empicter par flatterie & douces parolles. George Duc de Saxe,

*Ferdinand
est declaré
Roy d'Hō
grie, dont
s'ensuit
grãd trou-
ble.*

*Luther se-
ditieux.*

Prince digne de louage immortelle, s'estoit tousiours opposé à l'heresie de Luther, de maniere qu'elle n'estoit point en ses terres: qui auoit occasionné Luther à dire mille iniures & cōuices de George, mais en vain. Au moyē de quoy il luy escriuit ceste année des lettres fort emmiellées, lesquelles sembloient pou- uoir fieschir & amadouër vne ame biē cōstante, tant gracieuse mēt cest importū & boute-feu escriuit à ce Prince. Mais veritablemēt il reçeut de luy telle respōce, q̄ meritoit vn apostat. Et pleust à Dieu q̄ les autres Potentatz d'Allemaigne, eussent tenu telle cōstance: sans point de faute tāt le bien public q̄ le leur, ppre s'en fust mieux porté. Entre autres choses q̄ ce Prince Catholiq̄ rescriuit à Luther, c'estoit cecy: Nous pouuons affermer, q̄ nous ne tenōs guerēs de cōte de tō Euāgile, pour autāt q̄ les chefs de l'estat Chréstien l'ont condāné, au moins nous nous sommes biē fort estudiez, à ce qu'iceluy ne glissast point dās noz terres, voyās les fruietz qui en ressortēt. Car ny toy, ny autre quelcōque, sçauriez dire, qu'autres fruietz soient proceddez de ta doctrine, q̄ des blasphemés contre la saincte Eucharistie, contre la sacrée vierge Marie, & tous les Sainctz. De ta doctrine, & de celle de tous tes complices & sectateurs, renaissent toutes les heresies iadis condamnées, & tout le ser- uice hōneste de Dieu est abastardy. Quand iamaiz furēt faictz plus de sacrileges des hommes cōsacrez à Dieu, qu'on a faict souz ton Euangile? En quel temps la rebellion contre le Magistrat a esté plus frequente, que durāt ton Euangile? Quand a on veu plus de pilleries des Eglises, plus de larcins & vol- leries? En quel temps est-ce, qu'Vvittemberg a eu plus de moynes deffroquez & de religieuses, qu'en ce temps icy? Quand est-ce qu'on a osté les femmes à leurs maris, pour les donner à autres, comme on faict en ton Euangile? Quand est-ce qu'on a commis plus d'adulteres, que depuys que tu as osté escrire: Que si vn homme ne peut engendrer de sa femme, qu'il aille à vn autre, de laquelle il puisse engendrer, & que le mary soit tenu de nourrir l'enfant qu'il aura d'icelle procrée, & que la femme en face autant enuers son mary? Voyla quel- ques motz de ce que cest illustre Prince escriuit contre Lu-

*Luther ta-
che de pi-
per Geor-
ge de Saxe,
qui luy
faict sa le-
çon fore
naifuerēt.*

ther, luy mettant deuât les yeux ses forfaitz execrables, pour voir sil pourroit estre r'adressé au vray chemin. Et Sleidan ment impudemment, disant que ce Seigneur a escrit ces choses par hayne.

*Luther in-
cite vn
Archeues-
que à se
marier.*

LUTHER doncques estant ainsi escondit par le Duc George, escriuit lettres à l'Archeuesque de Maience, frere du Marquis de Brandebourg, l'exhortant de permuter ses Eueschez en Principautez seculieres: & qu'espousant vne femme il fust porte-guidon des autres Euesques, pour conseruer si gement chasteté. Car il n'est pas possible qu'un apostat Epicurien conseillast à autrui de faire, sinon ce à quoy luy-mesme se plaist & delecte. Ainsi Luther eust fort souhaité, que tout le monde se cōsacrast à Venus, à laquelle il festoit ia vouié, quoy que Iesuf-christ aye commandé son Euangile en preschant la penitence. Mais ce Prince ne daigna oncques faire responce à ces lettres, bien qu'elles fussent imprimées. Car il scauoit tres-bien, que mesmes en l'Eglise Grecque il n'est pas loysible à vn Prestre, & par consequent beaucoup moins à vn Euesque, de prendre femme, apres qu'ilz sont Prestres. Voyant doncques Luther, que cest affaire ne luy succedoit pas selon son espoir, entreprit d'esprouuer & sonder le Roy d'Angleterre, duquel il auoit dict mille maux auparauât. Aussi y auoit deux Anglois apostatz, qui ne laissoient moyen quelconque, pour reduire ce Royaume au Lutheranisme, quoy que ce fust malgré le Roy. De maniere que poursuyuans l'affaire, ilz taschoient de faire imprimer à Coloigne la version du nouveau Testament, faicte par Luther, estant au preallable tourné en Anglois: mais il y eut quelques gens de bien, qui r'apporterēt cela au Senat de la ville, lequel feit inhibition & deffense tout incontinent, que les imprimeurs ne poursuyussent plus outre ladicte impression. Et fut mandé le semblable au Roy & aux grandz Seigneus d'Angleterre: ce que retarda de beaucoup les effortz & machinations de ces apostatz. Au reste, le Roy d'Angleterre respondit à Luther pertinemment, rebutant le fard & mignotise de ses parolles, & en ces siennes lettres il luy reproche entre autres choses, qu'il a espousé vne nō-

*Aguez
des hereti-
ques sur
l'Angle-
terre.*

naid par grand inceste. Iadis les payens faisoient mourir dans vne fosse leurs vierges Vestales, aduenāt qu'elles eussent souillē leur honneur par stupre, & le paillard estoit fouēttē iusqu'à la mort. Mais entre les Chrestiens du temps present, vn Luther & plusieurs autres apostatz, tant religieux que religieuses, se font esclaves à vne orde paillardise sans en estre aucunement punys, le monde leur applaudissant, & nombrant vn si lasche tour, entre les plus excellēs & illustres faictz. Toutesfois cy dessus a esté assez traicté de cecy, combien qu'on n'en scauroit oncques dire assez.

EN cest an y eut iournée à Spire, où quelques Seigneurs Lutheriens requirent, qu'ilz eussent quelque Temple, pour en iceluy prescher & exercer la religion à leur mode. Mais George, Euesque de Spire, Prince de Bauiere & du sang des Contes Palatins sy opposa. Au moyen dequoy ilz feirent commandement à leurs prescheurs, de prescher tous les iours deuant le peuple en la basse-court de leurs logis, à cause que pour la misere du temps, les Princes Catholiques conuiuiēt à plusieurs choses. Iadis durant l'Empire d'Arcade, vn nommé Gainas, Colomnel de la gendarmerie Romaine, demāda au susdict Empereur, que luy & les prestres de sa secte eussent vn temple dans Constantinople, & estoit ceste secte des Arriens. L'Empereur aduertit de ce Saint Iehan Chrysostome, qui estoit Euesque de Constantinople, lequel sy opposa en toutes fortes, disant entre autres choses: il ne faut pas qu'un Prince entreprenne rien contre l'honneur de Dieu, au moins s'il a la vraye pieté en recommandation, mais plustost il doit faire garder & entretenir les bonnes loix, & singulierement celles, qui ont esté faictes contre les heretiques. Or au commencement de cest an Luther escriuit vne epistre à ceux de Reuling, en laquelle il diffame Zuingle & Oecolampade, cōme enfans bastardz, & qui degenerent: & mesmes Urban le Roy escriuit quelque epistre contre la sentence & opinion de Zuingle. Voyant doncques Zuingle que les Lutheriens le restōnoiet si fort, il leur l'aua la teste tout de mesme: & de faict encore, Martin Bucer, apostat Iacobin, par vn siē liure se desēdit

*Des anciē
nes Vesta
les à Rome*

*Iournée
de Spire.*

*Que les he
retiques ne
doient a
voir Tem
ples.*

*Piques des
heretiques.*

*Plaisant
discours
sur la vie
de Bucer.*

alencontre de Brence Lutherien. Plusieurs hommes dignes de foy afferment touchant ce Bucer, qu'au commencement de ce nouveau Euangile il alla trouuer Luther, luy requerant qu'il fust colloqué en certain lieu, où il peust auancer de toute son estude le saint Euangile. Sur quoy Luther luy va demander, si sa conscience n'estoit pas totalement en tranquillité en ce qui concerne ce negoce: à quoy il respondit, qu'il n'estoit pas encore bien resolu & arresté en sa conscience, pour ce qu'icelle luy tesmoignoit, que la doctrine Catholique estoit bien meilleure que n'estoit la nouvelle. De maniere que Luther oyant ceste responce, adiousta, S'il est ainsi que tu dis, tu n'es pas encores propre à cest affaire. Va t'en donc, & bataille contre ceste tienne conscience, iusqu'à tant que tu l'ayes du tout surmôtée, & alors tu me pourras seruir commodément. Bucer feit cela tres-instamment, & retourné qu'il fut à Luther, luy assura, que deormais sa conscience ne le remordoit plus, & que de ce pas il faisoit estat de viure & mourir au nouveau Euangile: au moyē dequoy Luther, le voiāt biē apte à sa doctrine, le feit predicant en quelque lieu. Car Bucer n'estoit pas des plus asnes du monde, outre ce qu'il auoit fort bon naturel pour desguiser vn affaire, & pour dissimuler, lequel toutesfois se teint du costé de Zuingle pour quelque temps sur le faict de l'Eucharistie: mais par apres, on dict que pour gratifier à Luther il quitta Zuingle. Il fut donc long tēps faisant du ministre à Strasbourg, & en fin fina ses iours en Angleterre par vne mort merueilleusemēt horrible, sil faut croire au bruiet, pour ce que ie n'oseroiy assurer pour le vray, comment il mourut. Quand à ce qu'il a resisté & combattu contre sa propre conscience, ce n'est pas chose estrange, considéré que Luther confesse bien l'auoir faict: & Bucer n'estoit pas si grüē, qu'il n'apperceust bien, que celle doctrine ne pouuoit estre bonne, laquelle estoit tout à contrepoil de la Catholique. Et n'est pas vray-semblable, que sa conscience ne l'ayt depuys tenaillé en son cueur: mais telz hommes deplorez & aueuglez du tout, nō seulement mesprisent la cōsciēce, mais bien encore Dieu mesme, selon que chante l'Escriture,

*Mutation
dudit Bucer.*

Quād le meschāt est venu au profond des pechez, il contēne. *Pro. 18.*

L'AN 1524. Iehan Pomeran auoit faict imprimer quel- *De Iehan Pomeran.*

ques Commentaires sur les Psalmes, ausquelz Luther & Melancthon auoient mis epistres en recommandation de l'e- *Bucer & autres ven-*

ure, de sorte que les estudians les achetoient comme à l'enuy. *lent persua-*

Ce voyant Bucer, il s'aduifa d'un grand cas. Car desireux de *der que*

persuader aux hommes, que l'eschole de Vuittemberg estoit *Luther est*

d'accord avec les Sacramentaires, il traduiēt ces Commentai *Zuinglien*

res, & sur le Psalme troysiesme depraua la sentence de l'au- *en fa'is'siō*

theur, laquelle il auoit fort bien tournée au Psalme precedēt, *les liures.*

si que les parolles sembloient conuenir à l'opinion de Zuin- *gle.*

Doncques Pomeran ceste année escriuit à Brence & Ie- *han Agricole,*

leur mandant la desloyauté du traducteur. Or *à fin*

à fin que le bruiēt fust semé par tout, que ceux d'Vuittemberg *ne discordoient*

ne discordoient point d'avec les Zuingliens, les Sacramentai- *res meirent*

res meirent tout soudain la version de Bucer en Latin, & la *feirent courir*

feirent courir deça delà, par tout où ilz pouuoient. Et certai- *nement*

nement Bucer fait tant par ceste fraude, que Zuingle & Oe- *colampade*

colampade se vantoient publiquement dans leurs liures, que *Luther avec*

Luther avec tous ceux de Vuittemberg s'estoit rengé à la do- *ctrine des*

ctrine des Sacramentaires. Et en la traduction des Commen- *taires de*

taires de Luther sur l'epistre aux Hebreux, lediēt Bucer a vſé *de mesme*

de mesme artifice, cōme Luther mesme s'en est plaint grande- *mēt à l'Im-*

mēt à l'Imprimeur par vne sienne epistre. Car Bucer raschoit *encore*

encore par ceste autre version faire accroire, q̄ Luther s'estoit *joint au cāp*

joint au cāp de Zuingle. Disons donc maintenāt: fil est ainſi *qu'ilz vſent*

qu'ilz vſent de ſi grand' & intollerable fraude en la versiō de *ceux qui*

ceux qui sont encore pleins de vie, q̄ ferōt ilz, en tournant les *escripiz*

escripiz des Anciens, ou bien quād ilz les citēt ou imprimēt?

EN ce temps Conrad Pellican, qui de Cordelier s'estoit *Erasmus*

faict Zuinglien, & qui demeurant encore à Basle auoit quel- *est calomnié*

quefois confessé Erasme de Rotterdam, estant à Zurich com- *comme s'il*

mença à dire entre ses amis & familiers, qu'Erasme sentoit *fust esté*

l'opinion de Zuingle: laquelle calomnie Erasme se parforça *Zuinglie,*

beaucoup d'esteindre. Encores y eut-il quelque Zuinglien, *dont il se*

nōmé Leon Iude, qui feit imprimer vn liure en Aleman sans y *purge.*

mettre son nom, par lequel il tasche de monstrier, que tant Erasme que Luther auoient autresfois esté en mesme sentence que Zuingle. Ce qui fut vn grand creue-cœur à Erasme: & aussi auoit-il, peut estre, donné quelque occasion par ses escriptz assez temeraires, qu'on estimast ainsi de luy. Toutesfois les Zuingliens ne l'ont oncques peu attirer à leur party, quoy qu'il ayt demeuré longuement à Basle, où le Zuinglianisme a grand vogue. Or en cest an il escriuit vne epistre aux Suisses, qui festoient assemblez à la dispute de Bade, par laquelle il se purge de ce qu'on luy obiectoit. Au reste Erasme sera à iamais reprehensible, de ce qu'il n'a escrit contre les Zuingliés de telle ferueur & zele, comme vne chose si grande le requeroit.

*Zuingle
contre les
Lutheriē,
& iceux
contre luy.*

ENVIRON ce temps Zuingle escriuit aux Lutheriēs de Noremburg, les enseignant, que l'opiniō des Lutheriens touchant l'Eucharistie estoit nouuelle, & repugnante aux saintes escritures: mais que la sienne auoit esté dōnée par Christ, les Apostres, & ce qui s'ensuit. Les Lutheriens escriuent tout au contraire de Zuingle, sans que pourtant ceux qui ont esté enchantez par ces mal-heureux, s'apperçoiuēt, que cest estrif monstre euidentement la vanité de ce nouveau Euangile: & pouuons dire, qu'à bon droit ceux perissent, qui ayans les yeux ouuers ne veulent pas voir. Pareillement Zuingle escriuit vne epistre à ceux d'Esling en Aleman, en laquelle il fouët terriblement Luther & tous les sectateurs d'iceluy, lesquels il appelle furieux & insensez.

*Dispute
entre les
Catholi-
ques &
Sacramen-
taires.*

CESTE année les Catholiques & Sacramentaires disputèrent à Baden en Suisse, où vindrent pour les Catholiques Iehan Faber, Ekus, & Thomas Murner. Quand à Zuingle, quelque sauf-conduit qu'on luy promest, il ne voulut oncques venir, mais Oecolampade s'y trouua. L'effect & euene-ment de ceste dispute fut tel, que tous les Cantons de Suisse, hors-mis Zurich, arresterent de tousiours demeurer en la religion Catholique, & n'admettre, qu'aucune nouuelle doctrine prind pied en leur contrée. Cela fut conclu sur la fin du mois de Iuin. Or Iehan Faber auoit colligé plusieurs contradictions

dictions dans les escriptz de Zuingle, par lesquelles il se contredit, & destruit sa doctrine, & mesme celle de Luther. Si estoit deliberé ledict Faber de les proposer en barbe à Zuingle, mais il garda la chambre. Je dy donc que par ceste raison, (asçauoir en monstrant que Luther & Zuingle & tous autres heretiques de ce siecle ont enseigné choses repugnantes) on peut euidemment & plus clairement que n'est le iour, monstrer, que leur doctrine ne procedde pas du Saint Esprit, ains du diable, pere de mensonge. Et vueillent ou non, il faut necessairement que ceux qui veulent soustenir & suyure leurs erreurs, se hontoyent & facent les muetz, attendu qu'il n'y a plus inuincible argument pour monstrer la fauceté d'une doctrine, que quand elle est variable, inconstante & dissemblable à soy-mesme. Car y a-il personne si priué de bon sens, qui vueille adiouster foy à la parole de celuy, qui voire en vne chose profane & de nulle consequence ores dict d'un, & ores de l'autre: tantost la nye, tantost la prouue? Pour ceste cause fort iustement seront damnez tous ceux, qui ont laissé le party de l'Eglise Catholique, (laquelle par tout le monde enseigne vne mesme chose) pour se ioindre aux heretiques, qui ne s'entre-accordent pas eux-mesmes.

En cest an le Roy François estant deliuré vint d'Espaigne en son Royaume. Et pour-autant que quelques Potentatz d'Italie conçurent vne opinion, que l'Empereur estoit d'accord avecques luy, ilz enuoierent de toutes partz leurs Ambassadeurs, pour congratuler au Roy de ce qu'il estoit remis en liberté. Si feirent ligue ensemble pour estre assurez de tous costez, le Pape Clement, les Venitiés, & le Roy d'Angleterre, avec le Roy François, par laquelle ilz resisteroient de toute leur puissance aux desseings de l'Empereur, qui selo que le bruiet estoit, affectoit l'Empire de toute l'Italie. Mais combien faux estoit ce bruiet touchant l'Empereur, les occurrences des faitz suyuant le monstrent assez, quand l'Empereur par vne largesse incredible restitua le Duché de Milan à François Sforce. Tant ya neantmoins que la guerre glissa encores en Italie, pendant que les Turcs faisoient beau mes-

*Des contradictions
des heretiques.*

*Le Roy
François
hors de prison.*

Ligue contre l'Empereur.

nage en Hongrie, se gaudissans de la folie des Chrestiens : & les heresies par ce moyen se renforçoient en Allemagne, à cause que les Princes Catholiques, empeschez aux guerres ciuiles, ne les pouuoient pas esteindre, bien qu'ilz en eussent bonne volonté.

Prinse & sac de la ville de Rome.

L'AN 1527. le Pape Clement (vaincu par les douces & humaines lettres de l'Empereur, à la venue de Dom Charles de Lanoy, lieutenant de la maiesté Imperialle) l'accorda avec l'Empereur, & feirent nouuelle alliance par ensemble, moyennant que le sus-dict de Lanoy destournast le Seigneur de Bourbon de prendre & saccager la ville de Rome. La sache-minoit de Lanoy à empescher les desseings dudit de Bourbon, qui s'approchoit fort de la ville avec grosse gendarmerie d'Alemans & Espaignolz, mais il ne sceut iamais rien obtenir du Seigneur de Bourbon, pour ce que son armée ne vouloit point de paix, conuoiteuse de la proye & butin de Rome. Car entre les Alemans plusieurs estoient Lutheriens, & pour ce hayssoiēt le Pape iusqu'à l'extremité. On se ruē doncques sur la ville denuēe & de canon & d'aitaillemēt, le sixiesme iour de May. Le Sieur de Bourbon voulant escheller la ville fut frappé d'un coup d'arquebouze par l'eine de la cuisse droicte, tellement qu'il mourut sur le champ. Ce-neantmoins ses gendarmes n'estans aucunement effrayez, entrent dans la ville, dont le Pape Clement & ses Cardinaux furent contrainctz de se retirer à grand' haste au chasteau Saint Ange. Ilz s'emparent premierement de celle partie de la ville qu'ilz appellēt le Bourg, & fōt fuir à vau de rouverte toute la multitude qu'ilz rencontroiēt. Là fut fait horrible boucherie des pauvres hommes, qui ruans leurs armes bas requeroiēt d'estre prins à mercy par les Alemans & Espaignolz : & la cruauté & felonnie fut telle, que grande effusion de sang fut faite dans le saint temple de Saint Pierre, voire mesmes iusqu'aux autelz de ladicte Eglise, & monumens des Apostres & autres Saintz, & furent par mesme moyen tous les ornemens du Temple pilez, avec tous les sacrez vaisseaux. Ceste partie de ville estant assez rauagée, passerent à la grand' Rome, qu'ilz appellent, au

La mort du Sieur de Bourbon

*Inhumani-
té des sol-
dats*

moyen des murailles ruïnées par trop grand' antiquité entre la porte d'Aurele & Septimiane, & ne laisserent espee de cruauté ou auarice, qu'ilz n'exerceassent en ce quartier, iusqu'à assaillir le chasteau, & faire des tranchées tout à l'entour, de peur que le Pape ne gaignast au pied. Il ne faut pas douter que ceste gendarmerie, en partie Lutherienne, ne respecta non plus les choses sacrées, que les profanes, ne pouvant oncques assouvir sa soif, ne pardonnant à habitant quelconque de la ville, fust-il Italien, ou Aleman, ou Espagnol: de façon que plusieurs furent si fort vexez, qu'ilz moururent au milieu des tourmens, & mesmes plusieurs furent prins & cruciez à l'extremité, tantost par les Alemans, tantost par les Espagnolz, si qu'il ne leur demeura pas l'obole, qu'ilz ne donnassent pour sauuer leur vie. La plus grande furie fut sur les calices sacrez, sur les saintes custodes, lesquelles les soldatz enragez pilloient, ruans la Sainte Eucharistie en terre: sur les ornemens de l'Eglise, desquelz ilz se gaboient & gaudissoient: sur les reliques des saintz, sur les filles religieuses, desquelles ilz abuserent fort ignominieusement. Or est-il trop certain que tout ce fut fait au desceu de l'Empereur & malgré luy, veu mesmes qu'il n'approuua ny ne voulut ratifier ce, que la gendarmerie auoit par force & crainte extorqué du Pape & des Cardinaux: & ne furēt plus tost les nouvelles de la prise de Rome apportées en Espagne, qu'il feist cesser les jeux & tournois, qu'il faisoit faire pour la naissance de son filz Philippe nouvellemēt né, & meir toute peine à faire mettre le Pape en liberté. L'une des plus grandes incōmoditez qui suruint à la ville de Rome en ce sac, fut que ces gendarmes folz & barbares gasterent la plus grande partie de la bibliotheque de S. Pierre, laquelle estoit remplie d'une infinité de beaux liures, & fut ce dommage inestimable & irreparable aux hommes amateurs des lettres. Au parauant y eut à Rome quelque Italien, vestu seulement d'un sac, & au reste preschant qu'une horrible vengeance de Dieu tonnoit de pres les Romains, filz ne faisoient penitence. Et comme il ne cessast de poursuyure ce sien propos en public, il

Bb.ij.

*Sacrileges
comis par
les soldatz.*

*Excusatio
de l'Empe
reur.*

*Oratio du Roy
à Philippe.*

*La Biblio
theque tou
te gastée.*

*Predictio
de la ruine
de Rome.*

fut mis en prison, iusqu'à tant que la ville estant prise l'effect mesme declara qu'il disoit verité. Sa vie estoit fort austere, & son nom Iehan Baptiste. Or apres que le Pape Clement eust soustenu le siege par sept moys, en fin il capitula, & eschapa. En quoy il est impossible de dire la ioye & plaisir, que Luther & ses compaignons reçurent de la calamité de ceste ville, combien que Dieu tourna tout soudain sa face debonnaire sur nous, entant que le Pape & l'Empereur s'allierēt peu apres fort amiablement.

De l'heresie des Anabaptistes.

ENVIRON ce temps accreut grandement l'heresie des Anabaptistes, à laquelle Luther auoitourny de matiere par ses escriptz. Ce-nobstant les Lutheriens & Zuingliens sont leurs ennemys mortelz, quoy qu'ilz alleguent la parolle de Dieu aussi bien qu'eux, & se glorifient d'auoir la pure doctrine, de sorte que plusieurs d'eux semblent estre de beaucoup meilleure vie, que n'est Luther ou Zuingle, ny aucun de leurs adherans. Mais ie demande, y a-il chose plus ridicule, que quand Luther se vante de ce qu'il apporte l'Euangile & parolle de Dieu, & q̄ neantmoins il cōdamne les Anabaptistes, qui ne se iactent moins du mesme Euāgile? L'Eglise Catholique faict bien mieux, laquelle sans s'esmouuoir en rien de la vanterie de ceux-cy les condamne tous esgallement: & reiette Lutheriēs, Zuingliens, Anabaptistes, comme ceux qui n'apportent pas l'Euangile, ains leurs particulieres opinions, avec des interpretations detorquées de l'escriture, lesquelles sont contraires totalement au sens & consentement Catholique de tous les Chrestiens. Quand aux Anabaptistes, ilz ont des erreurs fort pernicieus, ilz nyent le baptesme des enfans, & les baptizent estans ia grandz, ilz veulent que toutes choses soient communes, voire les femmes, comme iadis Platon en sa Republique, & les Nicolaites. Ce sont ceux d'entre qui les vns disent, mon esprit conuoite ta chair, vien done, & faisons merueilles. Iceux sont diuisez en plusieurs & repugnantes sectes, comme sont les Lutheriēs & Sacramentaires, de maniere que personne ne peut douter de quel esprit ilz sont poussez. Ce sont hommes à demy-folz, & merueilleusement ob-

Erreurs des Anabaptistes.

stinez en leur erreur, de façon que bien souuent ilz vont à la mort fort gaillardement, dont les infirmes se sont quelquefois scandalizez, & ont esté tentez grandement, ne regardans point, que ce ne proceddoit pas d'une saine constance, ains d'une opiniaistreté satanique, & d'un cueur enragé. Sainct *Des Do-*
Augustin nous a laissé par escrit plusieurs choses horribles des *natistes,*
Donatistes, en son epistre cinquantesme, declarant cōment i- *qui se tu-*
ceux, en yurez d'une folle cupidité de mourir, s'obiettoient & *oient eux-*
aux payés & à autres pour tout soudain finir le cours de leur *mesmes.*
vie. Mesmes, comme il dict au mesme lieu, ilz se tuoyent par precipices, par le feu, & par les eaux, à quoy ilz s'esbatoient ordinairement. Car le diable leur auoit enseigné ces trois sortes de mort, si que ne pouuans assez irriter quelcun pour estre occis par luy, & toutesfois desireux de mourir, ilz se iettoient des lieux hautz en bas, ou se precipitoient dans le feu, ou dās les riuieres.

IL y a vne chose digne en cecy de consideration, sçauoir *L'impudi-*
est que & Luther, bien qu'il fust moyne & Theologien, & *cité de noz*
tous les sectaires, yssus & fortys de luy comme d'un cheual *heretiques*
Troyen, ont en merueilleuse recommandation d'auoir quelque belle fille entre leurs bras, de maniere que chacun, tant soit-il ignorant, peut facilement apperceuoir, que le principal but de ce nouveau Euangile, est de se vouër entierement à Venus: comme si desesperez de leur salut, ilz n'attendoient autre chose à l'aduenir, que le supplice infernal, qui ne leur peut manquer: & peut-on veritablement dire d'eux ce passage de l'Apostre, le Dieu desquelz est le ventre, & leur gloire en leur confusion. Car Luther a osé permettre en quelque lieu aux hommes mariez, que si leur femme les esconduit, ilz aillent à leur chambriere: Voicy ses parolles mesmes, * Si la *Philip. 3.*
femme ne veut, que la seruante vienne. O malheur, que les *Accoin-*
hommes soient venuz si folz & brutaux, qu'ilz ne peuuent *ter sa chā-*
cognoistre, qu'ilz se sont mis en l'eschole d'un Sardanapale! *briere.*
Et ce-pendant Luther avec toute sa troupe Lutherienne, *cc*
deschire furieusement les vices du Clergé, & ne parlent pres- ** Au ser-*
que d'autres choses en leurs sermons, que de l'orde & sale vie *mon du*
mariage.

de quelques vns : & quand ilz la veulent raconter, Dieu sçait comment ilz prennent le Pape & tous les Catholiques à belles dentz, quoy que de leur costé ilz soient heretiques, couuertz de toutes sortes de crimes, & partant indignes de blâmer les autres.

Les Lutheriens punissent les Zuingliens.

COMME en ce temps nouvelles heresies sectes & diuisions germassent de iour à autre, non seulement les Catholiques festudierent à les esteindre, ains encore quelques Seigneurs & escriuains Lutheriens y prindrent peine. L'Electeur de Saxe, tuteur & defendeur de Luther, cōstitua certains supplices sur tous Sacramentaires & Anabaptistes. Et Luther escriuit vn liure fort prolix à Zuingle & Oecolampade qui estoient sortys de son eschole, auquel il se glorifie que luy & les siens ont eu grand' peine & travail pour se mettre en liberté, reietans les commandemens des hommes. Mais au reste, qu'il n'a oncques leu heresie plus orde, que celle de Zuingle, comme celle qui a esté diuisée en infinies sectes si tost qu'elle a esté née. Il tesmoigne que les Alemans embrassent toutes choses nouvelles, & qu'ilz s'y aheurentent comme farz : que le Diable ne sçauoit proferer chose si fort inepte & absurde, qu'il ne trouue des disciples: que les Alemans sont vrais pourceaux: que le Magistrat ciuil deuroit faire bonne iustice des Suermeres, ainsi appellant les Zuingliens comme blasphemateurs, & les nommant encore pourceaux & asnes. Et finalement inferé plusieurs choses en ce liure, lesquelles ne cōuiennent moins à luy qu'aux Zuingliens. Car il a esté autheur & le motif principal par ses escrits pestiferes, de tous les troubles & discordz aduenus en Alemaigne. Mais il luy faisoit grand mal de voir que plusieurs le quittoient, pour se ranger à la nouvelle doctrine des Sacramentaires. Et à la verité Zuingle & Oecolampade luy respondirent, en luy donnant son change.

Folie des Anabaptistes.

CE fut en cest an ou enuiron, que trois cens Anabaptistes en Suisse monterent en vne haute montaigne, esperans d'illec monter au ciel en corps & en ame. D'abondât, le diable les auoit si bien priuez de leur esprit, que comme bestes

brutes ils exerçoient la volupté charnelle, iusqu'à honnir les filles vierges. Car Luther auoit escrit, qu'il estoit plus neces-
 faire à l'homme & à la femme de s'accointer l'un de l'autre, *Vilenie d'i-
 cenn.*
 que de boire & de manger, aussi se trouua homme en Suaube, qui enseignoit, que la fin de la loy Chrestienne estoit venuë, *Fin de la
 loy Chre-
 stienne.*
 & que bien tost vne autre seroit mise en sa place. Et plusieurs autres choses impies & absurdes estoient pour lors semées parmy le peuple, desquelles l'Euangile de Luther auoit esté cause, comme celuy par lequel il appelloit vn chacun à la liberté de la chair, & Luther mesme par son exemple prouuoit plusieurs à attenter quelque chose de nouueau.

PRESQVE en mesme temps quelques Anabaptistes furent condamnez à mort à Rotemburg, sur la riuere de Neccar, tellement que neuf hommes furent bruslez, & dix femmes precipitées en l'eau. Le Capitaine & docteur de ces pauures abusez estoit vn nommé Michel Sellier moine apostat, lequel fut puny comme il auoit defferruy, par ce que premierement on luy trancha la langue, & puis on le tenailla de fers chauds, finalement son corps fut redigé en cendres. Car ce pandard auoit semé plusieurs opinions par le peuple, les plus absurdes & meschantes qu'il est possible d'imaginer. Semblable punitiõ fut faicte des Anabaptistes en plusieurs endroits d'Allemagne, mesme par les autres heretiques. Entre autres qui escriuirent contre les Anabaptistes Melanthon fut du nombre, lequel disputât cõtre les Catholiques crie à pleine teste, qu'on produise les escritures: & neantmoins ce contempteur de traditions n'a oncques peu refuter les Anabaptistes, quãd il dispute cõtr'eux du baptesme des enfans, sinõ que par la tradition Ecclesiastique. A la verité ceste faction des Anabaptistes est merueilleusement execrable, & plusieurs de ceste sorte d'hommes, comme j'ay deuant dict, semblent naïuement à des fols & hommes qui courent les rues, estans hors de leur sens. De maniere qu'il en y eut vn à Saint Gal en Suisse, qui en la presence de ses pere & mere trancha la teste à vn sien frere, alleguant que cela luy auoit esté reuelé diuinement. Mais par la sentence du Magistrat il fut puny tout de mesme qu'il auoit

Anabapti-
 stes execu-
 tez.

Melan-
 thon est con-
 trainct
 d'user des
 traditions.

D'un qui
 tua son fre-
 re, par re-
 uelation.

faict à son frere. Plusieurs d'entr'eux sont fort moderez & reiglez en leur façon de viure, dõt plusieurs ont esté deceus, mais ils tiennent des erreurs les plus absurdes du monde. Car Satan est fin & cauteleux iusqu'à là, qu'il ne se soucie point quoy qu'on viue fort bien par actions exterieures, moiennant qu'il aie corrompu la foy en telle sorte d'hommes, sçachant
Hebr. 11. bien que sans la foy il est impossible de plaire à Dieu. En ce temps y eust pareillement quelque apostat des Premonstrez, qui publiquement affermoit, n'y auoir point d'enfer: & que
Qu'il n'y a point d'enfer, quand Iesus-christ dist, mon Dieu, mon Dieu, pourquoy m'as-tu laissé, il se desespera, & partant fut damné. D'autres osoient
que Iesus-christ n'estoit Dieu, dire que Iesus-christ n'estoit point Dieu, mais seulement prophete, & qu'entre les Chrestiens il ne deuoit point estre de
et qu'il estoit damné. Magistrat: & mille autres absurditez & blasphemes. Voila doncques comme tous les diables estoient descheinez, & par leurs instrumens de perdition, ascauoir Luther & autres prestres & moines reniez, desgorgeoient mille & mille blasphemes horribles; par lesquels plusieurs se laissoient perdre ordinairement.

En ce mesme an fut arresté, que les Catholiques disputeroient contre les Zuingliens à Berne en Suisse, ce que bras-
Dispute de Berne, dont la fin fut malheureuse. soient Zuingle & quelques autres apostats. Mais ceste dispute n'estoit pas bien ordonnée: dont nul des docteurs Catholiques ne s'y voulut trouuer, hors mis Conrad Triger, Prouincial des Augustins. L'occasion de ce estoit, que le Senat de Berne auoit faict quelques loix fort iniques pour les Catholiques, & fort auantageuses pour les sectaires. De sorte que l'Empereur mesme comanda par ses gens, que les Bernois ne permissent point ceste dispute en leur ville: & les quatre Euesques, sous le diocese desquels sont comprins tous les Suisses, dissuaderent fort que ceste dispute ne fust faicte: & sur tous huiet Cantons de Suisse Catholiques escriuirent fort longues lettres pour empescher le mesme faict, esquelles ils ramenteuoyent entre aultres choses aux Bernois, qu'ils eussent esgard à la dispute de Baden, faicte n'y auoit que deux ans, laquelle eux-mesmes auroient approuuée, & ratifiée par leur serment & lettres

& lettres scellées. Ce neantmoins ils demeurèrent opiniaîtres en leur opinion, & aussi fut telle la fin de la dispute, que bien tost apres & eux & quelques leurs voisins abolirent la Messe, casserent autels & images, & feirent mille aultres insolences, lesquelles nonobstant ils croyent estre faictz Euangeliques: & se veulent grand mal, de quoy cy-deuant ils ont esté en tenebres, sans considerer qu'en ce faisant ils comdamnent tous leurs ancestres, lesquels n'ont pas esté si stupides, qu'ils n'ayent bien cogneu, que la vraye religion estoit celle que ces galans reiettent. La fin de ceste dispute fut le 26. iour de Iâurier 1528.

Au reste, au liure que Tertullian a escrit des prescriptions a-
lencontre des heretiques, y a vne sentéce fort remarquable,
laquelle il m'a semblé bon d'adiouster icy: de disputer contre
les heretiques des escritures, il ne profite en rien, sinon que
quelcun desire de se rompre ou l'estomac ou le cerueau. Que
gaigneras tu toy, qui es bien exercé es escritures, veu que si
tu allegues quelque chose, on le nyera: & si tu n'yes rien, on le
defendra? Vrayement tu ne perdras rien, sinon ce que tu crie-
ras, aussi ne gaigneras tu rien, sinon que cholere des blasphem-
mes. Or celuy avec qui tu viés en dispute pour les escritures,
à fin que tu le confirmes en son doute, sçais-tu s'il se tournera
plustost aux heresies qu'à la verité? Certainemét il s'en ira plus
incertain d'une altercation pareille, ne sçachât qu'est-ce qu'il
doit estimer estre heresie. Voyla ce qu'il dict:

L'AN 1528. pour-ce que chacun parloit mal de Luther,
à cause des diuerfes sectes qui naissoient l'une icy, l'autre là,
de celle de Luther cōme de leur fontaine, il escriuit vn liure
en Aleman cōtre les Anabaptistes. Auquel entre aultres cho-
ses il blasme & reprent les Seigneurs, de ce qu'ils punissoient
les Anabaptistes, comme si le temps passé il n'y auoit eu cer-
tains supplices cōtre ceux qui rebaptizoient. Mesmes Luther
auoit n'agueres escrit, que le Magistrat ciuil deuoit punir les
Zuingliens. Si les Zuingliens, pourquoy ne doit-il punir les
Anabaptistes, veu mesmes que le Duc de Saxe les auoit ia pu-
nis terriblement? En ce mesme liure il confesse qu'en la Pa-
pauté il y a plusieurs bonnes choses & fort Chrestiennes, &

Cc.j.

Beau lieu
de Tertul-
lian, de la
dispute a-
uec l'here-
tique.

Luther
change sa
chanson, de
punir l'he-
retique.

que de là elles estoient venues à eux. Il dict d'auantage qu'en la Papauté est la vraye sainte escripture, le vray baptême, le vray sacrement de l'autel, les vrayes clefs pour remettre les pechez, le vray ministere de la parolle, le vray Catechisme, & choses pareilles. Et toutesfois il se souloit vanter, qu'en la Papauté l'Euangile estoit caché souz le banc, & qu'il l'auoit fait sortir de là en lumiere, tant cest homme estoit inconstant en tous ses faits & parolles. Doncques voyât le Duc de Saxe, que mesme en ses terres maintes choses se faisoient contre la religion par vne licence effienée, il fut contraint d'instituer vne

Visite des Lutheriens. visite: laquelle par-apres fut faicte si orgueilleusement, & à si grâds frais, que iamais les synodes des Euesques, ou les communantez des Archidiaques, ne sembloient auoir esté de si grande charge. Melancthon meit ceste visite en Latin, mais il n'est pas Lutherien par tout, pour-ce qu'il semble attribuer d'auantage à la penitence & à la doctrine de la loy & de la crainte de Dieu, que l'Euangile de Luther ne porte, iusqu'à confesser la liberté de nostre arbitre, laquelle il auoit refusée en ses lieux communs, ensuiuant Luther. Encor' y a-il d'auantage: c'est que Luther s'accorda à cela & à choses semblables, en l'edition de ceste visitation en Aleman, quoy que cela repugnast diametrallement à ce que parauant ils auoient enseigné. Et voyla comme ces beaux Theologiens prenoient l'hardiesse de nyer ou approuuer choses de merueilleuse conséquence, disans tout ce qui leur venoit à la bouche. Ce q seroit chose digne de fort grande reprehension en hommes Alemãs, si ce n'estoit que puis n'agueres ils ont fait bancqueroute à la cōstance de leurs predecesseurs, nō sans leur grande cōfusion.

*Charles
Duc de
Gueldres.*

LE Duc de Gueldres, nommé Charles, fut cōtraint ceste année, apres auoir perdu plusieurs de ses villes, se rēdre à l'Empereur Charles, defendant ce-pendant vne forte ville nommée Tile sur le Val. Ce Prince estoit allié du Roy de Frāce, & pour autāt qu'il estoit proche voisin des terres Imperiales, il les endommagea bien souuent, comme l'an precedent changeant d'enseignes, il enuahist Hague, riche & opulēte bourgade en Hollande, & saccageāt tout ce qu'il y trouua, s'en alla chargé

de butin. Au reste il estoit tresconstant en la religion Catholique, & comblé de beaucoup d'autres perfections bien seantes à vn grand Seigneur, & mesmes il fut mortel ennemy des heretiques. En ce mesme an, l'Euesque du Trekt ^{Le pays du Trekt se rend à l'Empereur.} fit transport de toute sa seigneurie & domination au Duc de Brabant & Comte d'Hollande, qui pour lors estoit l'Empereur Charles, ce qu'il fit tant par la commune voix & consentement de tout le peuple, que à la licence du Pape. Car le Duc de Gueldres vexoit grandement tout le plat païs, iusqu'à auoir déia mis le peuple du Trekt en discord avec l'Euesque, & ne pouuoit-on s'aduiser d'autre remede en cela, que de se mettre en la puissance des Ducs de Bourgongne: par la force desquelz outre ce que le Gueldrois seroit rébarré, le peuple du Trekt seroit chastié & contenu en son deuoir. Il est vray que ceste contrée est fort opulente, mais le peuple estoit tous les iours en trouble & sedition, iusqu'à tât qu'il s'est rendu audict Duc. Car à present ilz sont en bonne paix, & ne les a-on chargez iniquement, non plus que les Gueldrois, depuys qu'ilz se souz mirent à l'Empereur Charles. Toutesfois la iurisdiction spirituelle ou Ecclesiastique demeura à l'Euesque du Trekt, & quelques bonnes rentes annuelles:

CESTE année y eut fort grande famine en Italie, & principalement en Piemont & es terres de la seigneurie de Venise. Les trois Soleilz qu'on auoit auparauant veuz à Zurich, sembloient signifier la famine, laquelle par-apres fut si grande en ce quartier, que pour le soustien du peuple il fallut amener des bœufz depuys Hongrie.

CESTE année aussi aduint à Basle vne chose fort Tragique. Il faut entendre qu'un citoyen assez loüable & riche, nommé Christoffe Bongartner, conçeut opinion que sa femme estoit adultere. Laquelle opinion s'augmenta de beaucoup, quand certain iour il trouua des aiguillettes de soye au pourpoint de son seruiteur qu'il soupçonnoit, scachant bien que ces aiguillettes estoient siennes. Il tasche donc d'arracher de sa femme, si elle auoit compaignie de son seruiteur: promettant de luy pardonner, si elle le confessoit, & de la tuer tout

sur l'heure, si elle le nyoit. Tellement que la femme confessa ce qu'elle n'auoit point fait, & incontinent se retira chez vne sienne seur aux champs. Toutesfois, reconciliée qu'elle fut à son mary par la priere & intercession de ses amys, elle retourna à son premier logis, & dit-on que celle nuit ilz ne firent qu'un liêt. Mais le iour ensuyuant, qui estoit le Dimanche, il chassa hors le logis la seruante & les enfans, qu'il auoit euz de sa premiere femme, & premieremēt meurdrist sa femme enceinte, & apres vne sienne fille aagée enuiron de quatre ans. Ce fait, il escriuit vne missiue au Senat, & inuocant le nom de Iesus par trois fois, se ietta du feste de sa maison contre-bas, si qu'il se rompit le col. Son epistre contenoit ce qu'il auoit fait, & pourquoy. Toutesfois il fut puny, quoy qu'il fust mort, & fut froissé sur la rouë. Il y auoit assez de cest exemple pour degouster les hommes de l'adultere, lequel comme plusieurs autres crimes horribles, sembloit estre vn ieu entre les Euangeliques, comme certain homme bien renommé a laissé par escrit.

*De Paccius faus-
faire, & au-
teur d'un
grand trou-
ble.*

EN cest an vn nommé George Paccius, des premiers Cōseillers de Catholique Prince George de Saxe, quoy qu'il fust homme noble, si feit-il vn tour fort lasche & deshōeste, pourautant qu'il fauorisoit souz main à Luther, à cause que pour la crainte d'estre chassé de la maison de son maistre, il n'osoit pas se manifester. Pour lors il faisoit l'office de Chancelier du Duc George, & à ceste occasion ayant prins le cachet d'iceluy, il feit vne coppie de certaine ligue, que faisoient plusieurs grandz Seigneurs Catholiques alencontre de l'Electeur de Saxe, & du Lantgraue de Hesse, afin qu'il feist prédre les armes contre les Catholiques, ce qu'aduint. Il cacheta ceste coppie contrefaite du cachet du Duc George, & la donna à lire au Lātgraue: lequel voyant le scel estre apposé, pensa que ce fait contenoit verité, de façon qu'ayant sur ce communiqué avec le Saxon, ces deux Seigneurs leuerent grosse gendarmerie, les autres Princes estans bien fort estonnez de cela. Or ce pendant le Lantgraue exhorte le Duc George par lettres, qu'il eust à renoncer à ceste ligue. Le Duc ayant leu

les lettres, & voyant la coppie à luy enuoyée par le Lâtgraue, ^{Le Duc George s'excuse.} ne fut iamais plus esmerueillé que lors, & incontinent rescrivait au Lantgraue, se purge fort honnestement, demandant tres-instamment entre autres choses, qu'on luy monstrest l'homme qui leur auoit rapporté ceste affaire, l'appellant meschant, infame & pariure. Semblablement les autres Princes, qu'on estimoit estre confederez, s'excuserent, combien que les trois plus prochains Euesques, à sçauoir de Mayence, de ^{Euesques rançonnez en Allemagne.} Vuircibourg, & de Bamberg, ne sçeuient oncques se despestrer de ceste guerre, qu'au preallable ilz ne liurassent cent mille escus. Car eux n'ayans rien d'appareillé, voyoient en barbe vne grosse armée, à laquelle ilz ne voulurent obiecter leurs terres pour estre pillées & rauagées. Et afin qu'il ne semblast, que le Lantgraue eust controuué ceste fable, il manifesta l'auteur, & assigna certain iour, auquel se trouueroient les deputez du Roy Ferdinand, de l'Electeur de Brandebourg, & du Duc George, pour accuser l'homme filz auoient quelque chose à dire contre luy. Ilz ne faillirent pas de s'y trouuer, & fut conuaincu Paccius de plusieurs forfaitz, & signamment d'estre faulsaire. ^{Paccius conuaincu.} Car apres qu'il auoit despensé tout le sien, en plusieurs sortes indignes d'un homme de bien & honneste, il amassoit deniers de tous costez, & à ceste cause il auoit contrefait plusieurs lettres, lesquelles il fermoit du cachet du Duc. Tellement que le Lantgraue luy donna de pur don quatre mille escus, pour luy auoir reuelé ceste ligue, combien que ceste somme ne suffisoit pas pour payer toutes ses debtes. Brief, luy ne pouuant respondre pertinemment aux crimes que les deputez des Potentatz luy obiectoiēt, il fut par apres tenu en ignominie perpetuelle. Et quoy que le Lâtgraue luy sauua la vie alors, si est-ce que iamais depuis il ne fut à son aise, ains alloit vagabond deça delà, come fait Cain, & estoit presque tousiours aux villes voy fines de la mer. Finalement, comme les crimes si enormes ne demeurèrent gueres impunis, ^{Paccius pendu.} il fut prins à Anuers l'an 1536. où apres auoir demeuré longuement & fort pauurement en prison, & apres auoir eu la question fort roy dement, au mois de Februrier de l'an suyuant on

luy leua la teste de dessus les espauls; & fut mis à quatre quartiers. Toutesfois, la paix qui de là sortit, n'eust guerres demeuré en son entier, (pour-ce que les allies de la ligue de Suabe se plaignoient du Lantgraue, comme ayant fait tort & iniure à leurs confederes) si le Conte Palatin ne s'en fust meslé, qui accorda tout à Vuormes.

*Siege de
de Naples
par les François.*

ENVIRON le mesme temps l'armée François se assiegea si dextrement la ville de Naples, que peu s'en fallut qu'elle ne fust forcée, bien que les compagnies Alemâdes & Espagnoles, lesquelles estoient dedans, mesprisassent tousiours les François, qui leur offroient fort honnestes conditions, s'ilz eussent voulu rendre la ville. Mais sur le mois de Iuillet la peste se meit au camp François, tellement que le Seigneur de Lautrec, Capitaine General, & plusieurs autres de grande vertu & prouesse y moururent, & disent quelques vns, que de soixante mille qu'ilz estoient à peine en y eut-il quatre cens, qui soient retournez en leurs maisons. En ce siege de Naples alla aussi de vie à trespas le Seigneur de Vaudemont, frere du Duc Antoine de Lorraine, qui combattoit au nom du Roy, souz esperance de reconquerir le Royaume de Naples, pour autant qu'il estoit de la maison d'Anjou, laquelle s'attribue ce Royaume. Son pere René, Duc de Lorraine, fut celuy qui occist Charles Duc de Bourgogne à la journée de Nacy. Le corps du Sieur de Vaudemont fut honorablement inhumé dans la ville de Naples, en l'Eglise Sainte Clere. Car les Roys d'Anjou, predecesseurs du Seigneur de Vaudemont, ont edifié ceste Eglise fort magnifiquement.

*La reuolte
d'André
d'Orie,
fort dom-
mageable
aux François.*

CESTE année André d'Orie se reuolta de l'obeissance du Roy François, lequel d'Orie estoit homme de grande auctorité, & prenant le party de l'Empereur ne luy apporta pas moins de proffit, qu'au Roy de France de dommage en le quittant. D'Orie tenoit prisonniers deux des plus vaillans & illustres Capitaines qui fussent au camp de l'Empereur, asçavoir Alphonse du Guast & Ascaigne Colonne, lesquels le Roy François voulut luy estre enuoyez: mais d'Orie refusa de ce faire, dōt le Roy fut fort desplaisant, & dist quelques cho-

ses au preiudice du Seigneur d'Orie. Tellement qu'iceluy li-
ura entre les mains d'Antoine de Léue, les Sieurs du Guast &
Colonne, & par ce moyen gaigna la faueur & bonne grace
de l'Empereur. Encore ne tarda-il gueres d'oster la ville de *Genes o-*
Genes aux François, & la remettre en sa liberté ancienne. *stée aux*
Aussi est le bruit, quel'vne des principales causes, par lequel *François.*
les le Seigneur d'Orie fut esmeu à quicter le Roy, estoit vne
iuste douleur & creuecueur qu'il auoit, de voir sa patrie de
Genes estre en la puissance du François estrangier, lequel tra-
moit quelque chose fort desauantageuse à ceste noble ville
de Genes. Et d'abondant, il se persuadoit que le Roy faisoit
acte d'hostilité enuers luy, en ce que le Seigneur de Barbessi-
eux, Capitaine des Galleres du Roy, luy dresseoit quelques
embusches. Parquoy il renuoya son ordre au Roy, par laquel-
le ceremonie il vouloit estre absouls de la foy militaire, & par
mesme moyen fait oster les fleurs de lis, qui estoient sur la
poupe de sa nauire, comme les armoiries du Roy de Fran-
ce, & ainsi se va rendre à l'Empereur, esperant y auoir party
plus honorable & auantageux. Ce voyans le Pape Clement
& le Roy François, vserent de tous moyens à eux possibles
pour luy addoucir son maltalent, & auoir cest homme si
puissant sur toute la mer en leur amitié & party: mais ilz ne
peurent oncques venir à bout de leurs desseings. Messieurs de
Genes offrirent par-apres au Seigneur d'Orie la principauté *Ceux de*
& seigneurie sur leur ville, mais il ne la voulut accepter, mon- *Genes of-*
strant vn esprit fort modeste en cest endroit. Aussi certaine- *frent leur*
ment cest homme a faict choses esmerueillables, & principal *ville à An-*
lement sur la mer, alencontre des Turcs & pirates, lesquelz il *dre d'Orie*
a chassés de tout le Ponant. Les Geneuois luy decernerent
vne statuë de hauteur prodigieuse, toute de marbre de Lune,
à cause qu'il auoit mise sus la liberté, & au base d'icelle statuë
estoit escriptz ces motz: A André d'Orie Prince tref-bon, &
auteur bien-heureux de la liberté publique, le Senat & peu-
ple de Genes a erigé ceste statuë.

S V R ces entrefaictes en plusieurs lieux d'Allemagne, & *Le Zuin-*
notamment en Suisse & à Strasbourg, l'heresie des Sacra- *glianfine*
croist en
Suisse.

mentaires & secte de Zuingle print merueilleux accroissement : & quoy que nous n'ayons rien de plus saint que la Messe, si est-ce qu'ilz l'abolirent, & abbatans les images des Eglises les meirent au feu : ce que fut faict à Basle le premier iour de Quaresme, auquel les Chrestiens ont accoustumé de commencer à faire penitence. Toutesfois cela ne se fait pas tout à vne fois, ains en plusieurs années, tantost en vn lieu & tantost en l'autre, de sorte qu'on eust dict que tout le monde se vouloit faire Mahometain, ou que la calamité de l'Antechrist estoit ia venue: combien que ces Sacramentaires reputoient le Pape estre le vray Antechrist, & au contraire receuoient les moynes reniez, & qui publiquement s'estoient mariez, comme les vrais Apostres de Iesuf-christ. D'où à mon iugement on peut cognoistre l'horrible vengeance de Dieu, & seure punition des pechez des hommes. Doncques Luther fut contrainct pour rembarrer ces Sacramentaires, escrire vn liure assez long contre eux, à sçauoir sa confession de la Cene, auquel il affirme plusieurs choses lesquelles parauant il auoit nyées, & nyé ce qu'il auoit affirmé. Car il nyé qu'en la Cene du Seigneur le vin demeure vin, ce qu'il auoit confessé en sa captiuité Babylonique, & beaucoup d'autres que nous ne mettrons point en ce lieu, pour n'ennuyer le lecteur par prolixité. Biē est vray qu'au mesme liure il asseure, qu'il a la Messe en grande abomination, bien qu'il ne fust ignorāt que tout le temps passé la Messe a esté celebrée entre les Chrestiens par toute la terre. Car mesme nous auons la Messe de S. Iacques l'Apostre, frere de nostre Seigneur, imprimée en Grec & en Latin, & aussi celle de S. Basile & S. Chrysostome, à fin que ie ne parle point pour ceste heure de l'Eglise Latine. Encor' en mesme année Luther escriuit vn autre liure tout plein de fornettes & iaeries, asçauoir contre la cōcomitāce: (c'est à dire q̄ le corps de Iesuf-christ est tousiours accōpaigné du sang) duquel liure certain docteur Catholique a ramassé 134. calomnies. Toutesfois tāt fust-il absurde & plein de badineries, Luther plaisoit merueilleusement aux hommes aueuglez. La confession de Luther de la Cene du Seigneur ne fut plustost venue

Luther
contre les
Sacramen-
taires.

Les Sarra-
mentaires
contre Lu-
ther.

nuë entre les mains de Zuingle & Oecolampade, qu'ilz luy respondirent tout au long. Car les disciples aymeroient mieux mourir que de conceder tant soit peu à leur maistre, attendu que leur scope n'est pas que la verité ayt le dessus, laquelle ne se trouue ny dans Luther ny dans Zuingle, ains leur seul but tend à ce que l'un semble auoir bië surmonté l'autre.

Qui penseroit que Bucer se fust teu en ceste cause, il seroit bien abusé. Car en vn dialogue, auquel parloient Sebalde & Arbogast, il monstra bien à Luther, qu'il n'estoit pas vn apprentis à ce mestier. C'estoit vrayement, & est encores, chose fort ridicule, que ces grandz & demesurez geantz, qui se vantoient auoir apporté l'Euāgile en Alemaigne, duquel elle auoit esté priuée par tant de siecles, s'entrebattoient si opiniaistrement & d'estoc & de taille. On ne scauroit icy amener excuse peremptoire. L'Apostre dict cleremēt, que Dieu n'est point Dieu de dissension, ains de paix. Et comment ceux-cy me pourront enseigner la verité, veu qu'en choses graues & de grande importance ilz s'accusent l'un l'autre d'estre mensongers? A la verité ce discord & estrif si ardent entre les Zuingliés & Lutheriens, a occasionné plusieurs de considerer les choses vn peu plus diligemment, & ont en fin necessairement conclu, que ceux qui enseignent choses contraires ne peuuent estre prescheurs de la verité. De sorte qu'ilz se sont retirez & reünis à l'Eglise Catholique, mesprisans les sottis opinions de ie ne say quelz lunatiques, comme ilz s'appellent eux-mesmes, lesquelles ilz changent de iour en iour à leur plaisir, comme il est force d'aduenir à ce qui est tousiours accompagné de mensonge, lequel est inconstant & variable.

L'AN 1529. courut par l'Allemaigne vne maladie pestilente, laquelle meit à mort infinis hommes, en 24. heures, ains que les medecins eussent trouué remede propre. On l'appelloit la sueur d'Angleterre, pource que mesme maladie auoit couru en Angleterre l'an 1486. du regne de Henry septiesme. Si tost que plusieurs eurent sué ce mal, ilz reuindrent à conualescence. Et par cela nous voyons, que comme de iour à autre naissoient diuers monstres d'heresies & meschancetez, aussi

Aduertissement de l'inconstance des heretiques.

La maladie de la sueur.

Dieu nous mōstroit son visage fort courroucé, veu qu'en mēme temps l'Allemagne estoit fort opprimée par la cherté des viures, & par la guerre. Car ce fut en ce temps que Solymā, ce grand Empereur de Turquie, vint assieger furieusement Vienne en Autriche, comme nous dirons peu apres. Luther auoit escrit vne epistre à vn moine apostat, nommé Vencef-laus de Linc, predicant à Noremberg, par laquelle il luy fai-
Luther ca soit entendre, q̄ sans doute le bon Duc George de Saxe estoit
bonnie Ge consentant de la ligue, que Paccius auoit forgée de son esprit.
orge de Sa Aduint donc qu'une coppie de ladiſte epistre tumba quelque
ne & mē jour entre les mains du Seigneur George, lequel meit de re-
dit de luy. ches la main à la plume, & se purgea encore mieux par ses let-
 tres, que parauant il n'auoit fait. Car la puissance de Luther
 estoit deia venue iusqu'à là, qu'il ioüoit des Princes à son plai-
 sir sans encourir aucune punition. Se sentant donc maintenāt
 forcené en son esprit, il feit vn liure en Aleman des lettres par-
 ticulieres & desrobées, & en iceluy il entre si auant sur les cō-
 tumelies & opprobres de ce Prince treslouable, que plusieurs
 des Lutheriens mēmes se sentoient offenzés d'une indignité
 si effrontée. Toutesfois ilz estoient si bien aueuglez & deia en-
 durcys, que Luther ne perdit point son autorité pour cela,
Psalm. 9. ains le pecheur estoit loüé és desirs de son ame. Si quelque
 Catholique escriuoit si tēpestatiuemēt contre les Seigneurs
 Lutheriens, cōme cest importun a fait, & contre l'Empereur
 & contre les Roys & Princes, quel trouble, quelle sedition
 n'exciteroient ces dogmatistes? A la mienne volonté que les
 grādz de ce monde cōsidérassent le fait vn peu de plus pres.
Tourné de CEST E année fut la iournée Imperiale tenuē à Spire pour
Spire. beaucoup de raisons, mais principallemēt pour-ce q̄ le Turc,
 ayant dompté & mis souz le ioug l'Hōgrie, & prins Bude, ve-
 noit encore plus terriblement se ruër sur la Germanie: & que
 d'autre costé les sectes estoient ia venues en si grande augmē-
 tation, qu'elles estoient redoutables nō seulemēt aux Catho-
 liques, mais biē les vnes aux autres. Car en Suisse & quelques
 bonnes villes d'Allemagne la faction de Zuingle mettoit le
 pied souz la gorge à celle de Luther, & les Anabaptistes re-

muoiēt tant de choses, que & tous ces sectaires & les Catholiques en estoient en grand' peur. Au reste l'assemblée partit de telle sorte, que Ferdinand nauré en son cueur d'auoir perdu l'Hongrie, & craignant q̄ pis n'aduint à ses autres seigneuries, ne peut impetrer aucun ayde ou secours de la part des Protestans, si l ne les laissoit viure en leur heresie. Au moyē dequoy <sup>Opiniaſtre
té des Hē-
retiques.</sup> il fust permis par arrest public, que touchāt le faict de religiō ilz se gouuerneroyent en sorte, qu'ilz pourroient quand à leur vie respondre à Dieu & à l'Empereur, & qu'au reste ilz n'inno-
ueroient rien iusqu'au Cōcile. Car il faut entēdre qu'ilz pro-
testerent en ceste iournée, qu'ilz ne pouuoient accorder cer-
taines ordōnances emanées du Magistrat, à cause dequoy ilz <sup>D'oū est
venu le nō
des Prote-
ſtans.</sup> en appellerēt à l'Empereur. Et voila d'oū est sorty le nom des Protestantz, lequel fut aussi reçu par quelques villes libres.

A v moys de Feburier de ceste année presente, les citoyēs de Basle excitent vn trouble, cassent douze Senateurs de leur place, & cōme nous auōs touché cy dessus, brisent les images des Eglises, cōme si ce fussent esté idoles, pourautant qu'ainsi <sup>Images
bruslées à
Basle.</sup> les auoient enseignez leurs gētilz docteurs, comme si c'estoit mesme chose des images des Chrestiens, & des idoles des payens au temps passé. Ilz abolissent quant & quant la Messe, ne voulans desormais que ce sacrifice nō sanglant de l'Eglise fust célébré entr'eux. Or le premier iour de Quaresme ilz distribuerent toutes les images & statuēs de bois aux pauures gens, à fin que plus-que barbaremēt ilz en feissent bouillir leur pot. Si fut la presse si grande, & le desir qu'vn chacun auoit d'en retirer, qu'en fin il fallut venir aux coups, & à cause de ce on les meit en neuf mouceaux, & les feit-on routes brusler deuāt la grand' Eglise: & estant faict ce beau chef d'œuvre, passerent tout le iour en ioye & recreatiō. En plusieurs autres lieux on se gouuerna de mesme façon enuers les Images & la sainte Messe, pour-autant que le principal but de ce recēt Euangile estoit, q̄ tous les fauoritz & partizās n'obmettroient rien à ex-
cuser de ce qui seruoit pour preparer le chemin à l'Antechrist.

L'AN precedēt, l'Empereur, vsant en ce de l'Euesque d'Hildeshein & l'Euesque mesme de Strasbourg & plusieurs autres

*Change-
ment à
Stras-
bourg.*

auoient impetré de ceux de Strasbourg, qu'au fait de la religion ilz ne changeroient encore rien, ou qu'ilz attendroient ce qu'en arresteroit le Concile. Toutesfois estans seduitz & enchantez par le conseil pestifere de ces boute-feux de predicás, ne voulurent pas estre des derniers à remuer les choses. Tellement que les hommes d'Allemagne, nation iadis si noble & excellente, se laissans enuolopper les vns apres les autres en des erreurs par trop absurdes & déia cōdamnez, se sont faitz moquer à pleine gorge aux autres nations. Certainement on dict que le grand Seigneur Solyman auoit en detestation les Lutheriens, pource qu'ilz ne pouuoient viure huit iours sans nouvelle sedition. Ce neant-moins ceux qui déia auoient quité l'Eglise Catholique, se sentoient fort heureux d'auoir secoué le ioug du Pape, & d'auoir à la par fin trouué la vraye lumiere de l'Euangile. Car on ne leur scauroit faire entendre, que le Pape ne soit vn Tyran, & que la doctrine de l'Eglise Catholique ne soit Papistique & pures tenebres. Combié que ce-pendât ilz sont à la fuyte de telz Capitaines, q̄ sont prestz à s'entretuer en affaires de cōsequēce merueilleuse, & lesquelz enuoloppēt les pauures miserables des pl⁹ p̄fondes tenebresq̄ puissēt estre, ce qu'à leur dāp ilz cognoistrōt lors q̄ l'ame sera partie du corps.

*Trouble
en Suisse.*

EN Suisse les querelles & altercations sur la religion furent si ardantes, que peu s'en fallut qu'on ne vuydast le differēt par le glaue. Car les Bernois & ceux de Zurich se confiās à leurs forces, vouloient vexer quelques Cantons Catholiques: mais quelques arbitres les accorderent, si bien toutesfois que l'accord ne dura gueres. Et quoy que les conditions de ceste paix fussent grandement preiudiciables aux Catholiques, toutes-fois on laissa les armes pour ceste fois.

*Assemblée
à Mar-
purg, des
Lutheriens
& Zuingliens.*

PHILIPPE Prince de Hesse estant fort desplaisant que Luther & Zuingle auoient si grādes picques entre eux, estoit fort desireux de les accorder, & partant fait assembler quelqs hommes des deux costez à Marpurg. Ilz veindrēt bien, & mesmes afin qu'ilz ne perdissent totalement leur peine, feirēt imprimer quelques articles, lesquelz ilz accorderoient tous deux à l'encōtre de l'Eglise Catholique. Mais au point principal de

l'Eucharistie ilz ne peurent oncques s'accorder, non plus que le temps passé, & ainsi s'en allerent sans rien faire. Or le Lantgraue & quelques doctes hommes desiroient fort, que bien qu'ilz ne se peussent accorder en ce qui cōcerne la Cene, toutesfois ilz s'entr'aimassent comme freres & amis: mais iamais Luther n'y voulut consentir. Au reste plusieurs pensent, que les Lutheriens & Zuingliens n'ayēt que ce point de l'Eucharistie en different, & quelques vns l'ont escrit: mais il n'ya rien plus faux, ains sont ennemys mortelz en plusieurs autres choses. Et, qui est bien d'auantage, ilz sont venus iusqu' à là, q̄ les Zuingliens ont differēt avec les Zuingliens, & les Lutheriēs discordēt avec les Lutheriēs: de maniere qu'ilz escriuēt liures les vns contre les autres, où ilz s'iniurient à qui mieux mieux.

EN ceste saison sortit en lumiere vn liure, des'actes du Cōcile de Constance cōtre Iehan Hus, & ne sçait-on qui est l'auteur, mais ce fut par Iehan Islebe, cōpaignon & amy de Luther. En la preface du liure, Islebe appelle Iehan Hus bō amy de Dieu, & le Concile de Constance la synagogue de l'Antechrist. Mais nous disons beaucoup mieux avec le sus-diēt Cōcile, que Iehan Hus à bon droit a esté condamné, que ne faiēt Islebe qu'il estoit hōme de bien. Au reste ce liure là ne prouffite en rien aux Lutheriēs, pour ce que apertement il cōfesse, que Iehan Hus au lieu mesme de son supplice à Constāce n'ya les articles, lesquelz les Lutheriens d'auourd'huy approuuēt.

COMME les nouuelles du Turc, qui s'approchoit d'Allemagne, fussent déia esparfées par tout, Luther escriuit quelque traicté de la guerre cōtre les Turcs: mais en iceluy il destourne plus les Princes Chrestiens, qu'il ne les encourage à luy faire teste. Et est vray-semblable, que luy n'hayssant rien plus q̄ le Pape, eust volōtiers souhaité, que le Turc se fust emparé de l'Allemagne, à fin que se ruant sans relasche sur l'Italie, il en chassast le Pape: mais Dieu a esté si misericordieux, q̄ les barbares n'ont eu encore tāt de puissance. Au mesme escrit il blasme merueilleusement le Pape, les Euesques, l'Empereur, les Roys & Princes, & singulieremēt la Cour de Rome: & entre autres choses il diēt, q̄ l'Empereur n'est pas le chef de la Repu-

Liure contre le concile de Constance.

Qu'a dit Luther de la guerre du Turc.

Luther contre les Roys, & Magistres.

blique Chrestienne, ny le defenseur de l'Euangile ou de la Foy. Car il faut bien, dit-il, que l'Eglise & la foy aye d'autres protecteurs que l'Empereur & les Roys, veu que le plus souuēt ilz sont les ennemis diamettraux du Christianisme, comme nous voyons au Psalme second, & que l'Eglise s'en plainct de mesme par tout. Voila les eaux desquelles ce bon homme lauoit le bon Empereur & tous Magistratz, pourautant qu'il ne craignoit rien, estant souz l'aile du Duc de Saxe. Si est-ce que l'Euangile ne luy auoit pas appris à se licencier si fort à mesdire, ains auoit puisé cela des fontaines de l'Antechrist. Voyons de rechef sa prodigieuse inconstance. En ce liure il degoute les hommes d'aller contre le Turc, disant que c'est contre la doctrine de Iesuf-christ, laquelle nous enseigne de ne point resister au mal: combien que n'agueres en la Visite de Saxe il eust laissé par escript, que ceste parolle estoit seditieuse & intolerable, & eust prouué par S. Pol, que noz magistratz ont le glauiue pour resister au Turc, & que nostre Seigneur ne defendit iamais, q̄ nous ne repoussions la felonnie & tyrannie du Turc. A la verité il n'y a homme qui sceust assez deplorer ceux, qui n'ont eu honte de suyure en vn faict si grand, qu'est celuy de la religion, vn hōme si inconstant, & plus variable que ne fut iamais Protée. On peut dire maintes choses de cecy, mais encore n'en scauroit on dire assez.

*Luther
nous degoute
de d'aller
contre le
Turc.*

*Origine de
la guerre
du Turc
en Hongrie.*

A v moys de Septēbre de la presente année Solymā, grād Empereur des Turcz, vint avec vne armée infinie en Allemagne, & meit le siege deuant Viēne, ville capitale d'Austriche. L'origine de ceste guerre fut telle, que ie la vay bresuiement escrire. Ferdinand, frere de l'Empereur, auoit faict perdre le Royaume d'Hongrie à Iehan Vayuode, lequel se voyant reduict en vne si grande calamité & desconuenue de fortune, s'en va en Poloigne vers Hierome de Lasco, hōme non moins noble que docte & scauant. De Lasco se reiouyssant grandement d'auoir vn tel hoste, luy fait toutes les courtoysies du monde, ce dissimulant le Roy Sigismond, à cause qu'il auoit espousé la seur de Vayuode. Ce pendant de Lasco, qui estoit homme ruzé & d'esprit excellent, & qui de long temps sca-

uoit manier vn affaire dextrement , donna conseil à Vay-
uode, qu'il promeist à Solymán d'estre son vassal & tenancier,
fil pouuoit reconquerir son royaume par le moyen d'iceluy.
Or ce conseil, quoy qu'il semblast estre fort bien excogité &
pour l'auantage de Vayuode, eu esgard à la felicité de ceste vie,
si est-ce qu'il estoit fort pernicieux, & defauantageux à l'estat
de Chrestienté, comme l'euenement des choses le monstra
par-apres. Doncques de Lasco à la requeste instante de Vay-

*De Lasco
fait venir
le Turc.*

uode, fait vn Ambassade par deuers le grand Solymán: & ve-
nu qu'il fut à Constantinople, il fin sinua aisément en la bon-
ne grace & faueur des Conseillers, qu'on appelle Baschatz, au
moyé de quelques presens qu'il leur fait. Et fait rât par iceux,
que Solymán promet tout aide & secours sur cest affaire, &
qu'en briebs iours il seroit en Hongrie. Apres cela, Ferdinand
enuoya aussi son Ambassadeur à Constantinople, mais quoy
que Solymán l'eust reçu fort accortemēt, & que les Baschats
eussent ouy sa demåde patiemment, toutesfois on luy fait re-
sponce fort superbe & insolente, & au lieu de paix & amitié
eut commandement de denoncer à son maistre toute guerre
& hostilité, & tout soudain vuidier de Cōstantinople. En mes-
me temps Ferdinand estoit à Spire, lequel entédant si piteuse
responce fut merueilleusement estonné, sçachant bien que le
Tyran persisteroit tousiours en son desseing, & voyant d'autre

part, que l'Empereur son frere estoit assez empesché aux guer-
res d'Italie. Doncques Solymán assemble son camp, le faict
marcher en bataille, & party qu'il fut d'Adrianopoli, vint en
quinze iournées à Belgrade, & delà tira droict à Bude. Vay-
uode alla incontinent au deuant de Solymán, accompagné

*Discours
sur le siege
de Vien-
ne par le
Turc.*

des grands Seigneurs d'Hógric, & entr'iceux estoit de Lasco.
Solymán le reçut de grande accortise & humanité, promet-
tant de luy rendre tout ce qu'il pourroit prendre ou conque-
rir en ceste guerre à force d'armes. Estant arriué à Bude, il ne
trouua presque personne dans la ville, à cause que les habitās
tous effrayez s'estoient retirez à la fuitte aux prochaines vil-
les. Le chasteau d'icelle estoit encore tenu par vne garnison
d'Alemans, mais Solymán delibera de le miner, ce qui donna

*Bude en
Hongrie
prise.*

telles affres aux Alemans, q̄ malgré le Capitaine du chasteau, ils capitulerent avec l'ennemy qu'ils s'en iroient leurs bagues sauues. Solyman s'y accorde, mais comme les autres s'en alloient, il en chargea les Janissaires de les passer tous au fil de l'espée, rompant en cela sa foy: quand au Capitaine, il le renuoya tout doucemēt. Prinse que fut la ville de Bude, il s'achemina vers Vienne, faisant marcher deuant quelques vastadours, lesquels seroient pour prendre les Chrestiens: & aussi en prindrent infiny nōbre de toutes sortes, & mettant le feu par tout où ils passoient, firent des courses fort lamentables iusques à Linci. Or estoient déia entrez dans Vienne enuiron

Nombre de ceux de dedans. vingt mille hōmes, que de pied que de cheual, entre lesquels y auoit plusieurs braues & preux Capitaines, le chef desquels estoit Philippe Conte Palatin. Les Turcs estans deuant la ville se camperent si au large, qu'à voir l'estendue de leur armée seulement on eust eu grand' peur. Si firent incontinent for-

Victoire des Chrestiens. ces mines souz la ville, & où il auoient fait tomber quelque pan de muraille, là ils donnoient l'assault viuement, & à plusieurs fois, mais neantmoins les Alemans se monstrerent si gaillards à la deffendre, que durant cette guerre demeurerēt bien sur le champ quatre vingtz mille Turcs, & fut en fin cōtrainct Solyman de leuer le siege à sa courte hôte, & de se retirer en Thrace. C'est sans doute que Dieu mōstra bien sa misericorde singuliere, en donnant ceste victoire aux Alemans, la force desquels n'estoit nullement parangōnable à celle des Turcs. Or comme le Turc s'approchoit, on auoit fait sortir de la ville les femmes, enfans, prestres, moynes, bref tous ceux qui estoient inhabiles à porter armes. Mais ô malheur! La plus grand' partie de ces pauures gens tomberent es griffes de ces barbares, qui trancherēt les enfans par le milieu: les vieillardz & femmes, qu'ils ne daignoient emmener en seruage, partie furent fichez sur des paulx, partie percez à coups de broche, & partie taillez en pieccs. Et dit-on qu'en cest orage Turques-

Soixante mille captifs. que furent emmenez plus de soixante mille Alemans en captiuité: On n'eust sceu regarder le pais à l'entour de Viēne sans effusion de larmes, à cause qu'il n'y auoit ny vignes ny arbres

quels-

quelsconques. Solyman estant de retour à Bude, ^{Vaynode}establit Vaynode Roy, l'appellant son amy & vassal. Mais veritable-^{estably,}ment c'est chose mal-heureuse, & qui fort abhorre de la pieté ^{Roy.}Chrestienne, de recouurer son royaume par telz moyens. O aveugles espritz des hommes! y a-il chose si dure que plusieurs n'executent volontiers, pour estre heureux en ceste vie, & qui ne voudroient faire la moindre chose, pour gagner la vie eternelle?

EN cest an l'Empereur vint d'Espagne en Italie, & quel-^{Biē-ueil}ques vns ont escrit, que lors qu'il estoit sur les termes de par-^{lance des}tir, les grandz Seigneurs d'Espaigne, pour-ce qu'ilz le cheris-^{Espagnolz}soient merueilleusement, luy promeirent plus d'argent & de ^{enuers}gendarmerie, qu'un autre n'eust sceu auoir à toute force. Car ^{l'Empe-}il y eut quinze cens hommes, lesquelz de leur bon gré offri-^{reur.}rent à sa Maiesté chacun mille ducatz pour quatre ans, sans aucun gaing ny recompense. Plusieurs Princes promettoient bonne troupe de gens de pied & de cheual, lesquelz ilz entretiendroient vn an entier à leurs despens.

MAIS deuant que l'Empereur eust prins la volte d'Italie, le Roy François considerant qu'il auoit perdu vne grāde armée deuant Naples, & qu'il estoit frustré d'André d'Orie, ^{La paix}personnage incomparable, fut facilement induict à traicter paix. ^{de Cam-}Ses enfans estoient encores hostagers en Espagne, & estoit ^{bray.}fort desireux de les racheter. Au moyē dequoy la paix fut fai-^{Meſchan-}cte à Cambray, où se trouua Madame Marguerite, Tante de ^{ceté de Slei-}l'Empereur, & Madame Loïse, mere du Roy François. Il ne prouffiteroit rien de mettre icy au long les articles de ceste ^{dan.}paix: bien donna le Roy, pour le rachapt de Messieurs ses enfans, deux miliōs d'or. Et c'est, peut-estre, la grand' proye que l'Empereur craignoit de perdre, (dit Sleidan) fil fust adueni quelque encombre au Roy, estant encores captif en Espaigne, & veut Sleidā que ce ayt esté la cause, pour laquelle l'Empereur condescendoit de iour à autre plus volontiers à la paix. Vous voyez que Sleidan est si meschant, que ce que l'Empe-

tant est gentil & courtois cest historien. Nous dirons ailleurs quelle opinion l'Empereur a eu de Sleidan. Lequel Seigneur estant venu en Italie fut reçu fort gayement par tout, & par sa presence r'affermit l'estat d'Italie, qui s'en alloit en decadence, hors mis les Florentins, lesquelz festans en-orgueillys pour conseruer leur liberté, comme ilz disoient, furent guerroyez par le Pape & l'Empereur.

*Année
malheu-
reuse.*

CESTE année fut fort dommageable & calamiteuse à toute l'Alemaigne, pour beaucoup de raisons. Car les barbares Turcs l'enuahyssoiēt, les heresies & nouuelles sectes s'augmentoient de iour en iour, la maladie d'Angleterre faisoit aller plusieurs de ce monde en l'autre, & en outre y auoit si grande cherté, que iamais on auoit veu. Et d'auantage, en la basse Alemaigne la grand mer se desborda sur Flandres, Hollande & Zelande, si que le dommage en fut incomparable, & quelques lieux furent entierement abysmez.

*Assemblée
à Suabach, de
nul effect.*

IL y eut en cest an vne assemblée de ceux qui s'appellent Euangeliques, à Suabach, mais pour-autant qu'ilz ne sceurent iamais s'accorder touchant la Cene du Seigneur, (car ainsi appellent ilz le saint sacrifice de la Messe) on arresta qu'il y auroit vn autre assemblée à Smalcalde. Voyla comme ce tant gentil Euāgile ny pour lors ny oncques depuis n'a sceu qu'arrestar d'vne chose de si grand' importāce, ains ce discord s'est augmenté de iour en iour, comme necessairement il adueint à ceux, qui laissent la tres-constante lumiere de verité, pour s'aller engouffrer aux tenebres incertaines & variables du iugement humain. Ce-neantmoins quelques effrontez ont osé escrire, qu'ilz s'en allerent d'accord de Marpurg, où le Lantgraue les auoit mandez, combien que, comme nous auons dict cy dessus, Luther ne voulut iamais reputer les Zuingliens pour ses freres, quoy que le Lantgraue y meist bonne peine, & aujourd'huy mesme ne cessent de s'entre-dire iniures & opprobres fort atroces: & les Zuingliens confessent, que Zuingle obiecta trois cens argumens à Luther, lors qu'ilz estoient à Marpurg.

COMME l'Empereur fust party de Genes, & s'achemi-

nast vers Plaifance, le Pape Clement enuoya au deuant de
 luy trois Ambaffadeurs, pour receuoir de luy le ferment ac-
 coustumé d'estre faict, par celuy qui veut entrer en la terre de
 l'Eglise: par lequel ferment il promet, qu'il ne violera ny dimi-
 nuera iamais la liberté Ecclesiastiq. L'Empereur doncqs iura ^{serment}
 solemnellement, mais de telle sorte qu'il donnoit assez à en- ^{solemnel}
 tendre, qu'il ne vouloit rien quicter de son droict: & estime- ^{de l'Empe}
 on qu'il disoit cela, à cause qu'il demandoit Plaifance & Par- ^{reur, pour}
 me, iadis attribuées au Duché de Milan, & que ledict Duché ^{la terre du}
 a tousiours esté dependant de la Maiefté imperiale. Or enten- ^{Pape.}
 du qu'eut l'Empereur que Solymán s'estoit retiré à sa honte &
 dommage, conçeut vne ioye indicible, & ayant ia seiourné
 deux moys entiers à Plaifance & à Parme, tira droict à Bolo-
 gne, où le Pape estoit arriué sur la fin du moys de Septembre.
 Si dirons de l'entrée de l'Empereur, ce que nous en a apprins
 Paolo Iouio.* L'Empereur, dit-il, fut reçu à Boloigne pom- ^{* C'est au}
 peusement, honorablement, & en grande lieffe. Il estoit en ^{27. liure}
 cotte d'armes, & par tout couuert d'armes, fors que d'armet ^{des histoi-}
 sur teste, monté sur vn beau cheual blanc, capparaçonné à la ^{res.}
 Royale, & ainsi fut mené de la porte de Modene à la place.
 Deuant luy estoient passez quatre estandartz de gens de che- ^{S'en suis}
 ual Flamens, lesquelz estoient tellement differens de sayons, ^{l'entier dis}
 de pennaches, & de liurées, qu'à voir les compagnies on co- ^{cours de}
 gnoissoit aysément à quelz Capitaines elles estoient. Apres ^{l'entrée de}
 eux marchoit la Fanterie tant de foyz victorieuse, non tât pa- ^{l'Empe-}
 rée des despouilles des ennemys, que terrible par la lueur des ^{reur à Bo}
 armes, & hydeur du regard, marchant superbement au son ^{loigne.}
 des tabourins & phifres, souz enseignes deployées. Le Re-
 cteur de l'Vniuersité, & les plus celebres professeurs des artz,
 vestuz de robes longues de foye, portoient deuant sa person-
 ne vn ciel quarré, écartelé de drap d'or & de veloux cramoisi.
 Autour de sa personne estoit la plus noble ieunesse Bolo-
 gnoyse, non pour garde, mais pour honneur. Suyuoient apres
 le Podesta, les Anciens, & le Gonfalonnier de la ville, les plus
 magnifiques du magistrat des Quarante, & des gentils-hom-
 mes. Au milieu de la place s'arresta Antoine de Léue, malaisé

de ses piedz, mais neantmoins presentant contenance d'un grād & preux Capitaine: & pour estre mieux veu d'un chacun, à cause de ses faictz bellicueux, de la gloire qu'il auoit acquise, il estoit porté en vne chaire haut esleuée, costoyé d'un costé des vieilles bendes des Lansquenetz, & de l'autre de la Fanterie Espaignolle, si bien dressez en bataillon, & l'artillerie assise en front, qu'il sembloit que ce fust vne armée preste à chocquer. Iouxté l'Empereur estoient quelques illustres Seigneurs, parez de vestemens à grandes bendes d'or battu, ou assis par l'esguille en broderie, & d'auantage leurs cheuaux estoient parez fort richement. Ioignant eux estoit portée l'Aigle Romaine, peinte en un estendard de drap d'or, & encor' vn autre estendard blanc, semé d'une croix rouge, souz lequelz suyuoient l'Empereur, la noblesse de la Cour, choisie de toutes nations, & les plus nobles Cheualiers d'Espaigne, vouëz à religion. La garde ordinaire de son corps, (chacun estant souz son enseigne, comme les Alemans & Flamens souz la leur, & les Espaignolz souz la leur) suyuoit pour dernier esquadron, portant hocquetons de couleur iaune, & occuperent tout ce qui restoit d'espace en la place. Sur l'entrée de l'Eglise de Saint Petronio estoit esleuée vne platte-forme de bois, de tous costez couuerte de belles tapisseries, & là estoient assiz les Cardinaux, Euesques, & autres moindres Prelatz, tous solennellement reuestuz: & au milieu d'eux le Pape attendoit l'Empereur en vn fort haut siege. L'Empereur donc n'ayant retenu avec soy que les plus nobles de sa Cour, & les Ambassadeurs des Princes, descendit de cheual, & fut mené monter les degrez de la platte-forme par deux Cardinaux. Passé qu'il fut, chascun ietta les yeux sur ces deux personnages, les plus grandz Seigneurs du monde, & espioient tous les assistans, si pour raison de la vieille dissension & de la nouuelle amitié, leur visage, qui à peu pres monstre les affections interieures, ne changeroit point. Le visage de l'Empereur estoit meslé de certaine amiable douceur, avec vn maintien fort graue & militaire: & la face du Pape s'esgaya tout soudainement à la rencontre, si qu'on le

*de l'empereur
de l'empereur
de l'empereur*

voit de beaucoup esiouy, pour voir l'Empereur plus doux & humain, qu'il n'eust pensé. Car plusieurs auoient rapporté maintes fauces choses d'Espaigne, touchant l'Empereur, de sorte que quelques vns assez craintifz se le peignoient comme vn Ariouiste ou Rotomalcé, c'est à dire vn personnage de visage Cimbrique ou Gothique, & finalement semblable en ferocité à ses gens-d'armes, lesquelz en tant de batailles & sacs de villes auoient tenu aussi peu de conte des choses diuines, que des humaines. Mais il auoit déia esté reçu à Genes, cogneu à Plaifance, salué à Parme, Rege & Modene, où il auoit esté grandement festoyé, comme celuy qui par tous lieux laissoit ample preuue de sa debonnaireté, pieté & iustice, sans aucune marque d'orgueil, ny de cruauté. Car comme ainsi soit, que donner l'entrée vers foy, & prester les oreilles à tous, soit le vray moyen d'attirer le peuple à foy, il auoit tousiours obserué cela, & donnoit des responces pleines d'equité, qui satisfaisoient assez aux articles, à luy presentez és requestes. Il auoit pareillement si bien cohibé l'exces de ses soldatz, en faisant punir ceux, qui par voye de faict prenoient ce qu'on leur auoit amiablement présenté, ou qui auoient demandé leurs payes auant le terme, qu'il estoit estimé digne de ce grand Empire qu'il tenoit. D'auantage, bien qu'il fust en la fleur de son aage, nulle volupté ne l'empeschoit de consulter perpetuellement sur tres-grandz affaires, de maniere qu'il estoit estimé courtoys, Martial, plein de bon conseil & de iugement exquis, sans aller demander l'aduis à autre qu'à soy-mesme. Car iamais la trop grande cholere n'auoit maistrisé son noble & excellent esprit, & n'auoit onc esté vaincu d'appetit de vengeance ou de delicatesse. Sa face estoit (à fin que les curieux ne s'enquierent plus de chose qui soit) reluyfante de certaine paleur agreable, les yeux azurez, non hydeux, accoustumez à vergongne & modestie. Son nez s'esleuoit gra cieusement par le milieu, signe anciennement de haut courage entre les Perfes. Vray est que son menton ne correspondoit pas entierement au reste, couuert d'une barbe crespée & blonde, & estoit sa cheuelure tonduë à l'entour, à la mode

*Pol Ioue
s'esbat à
descrire
l'Empe-
reur.*

des Empereurs Romains. La stature de son corps estoit ferme, & montrant la fleur de l'age en laquelle il estoit constitué. Il auoit aussi les mains amples, & propres pour empoigner les bastons de guerre. Ses iambes estoient proportionnées au reste du corps, avec les greues mignonement apparentes. Ce qui se voyoit mieux quand il estoit à cheual, pour autant qu'il estoit si expert à bien manier vn cheual, soit à luy donner carriere, soit en contour, gardant tousiours sa dignité, qu'il estoit estimé vn des meilleurs cheuaucheurs qu'on eust sçeu trouuer. S'estant donc ietté aux piedz du Saint Pere, flechissant le genou, & incontinent releué par la dextre d'iceluy tout souzriant, luy dist ces motz, en langage Espagnol: ie suis venu à voz piedz, tres-saint Pere, ce qu'auois maintes-fois desiré, à fin que par-ensemble nous secourions les affaires de la Chrestienté. Et partant ie supplie le Seigneur Dieu tout-puissant, qu'il bien-heure noz conseilz, & que ceste mienne venuë soit salutaire à tous Chrestiens. Auquel le Saint Pere respondit. Certainement Dieu & les Saintz me sont tesmoins, que chose ne me fut oncques si chere que ceste assemblée, & louë Dieu de ce que ie vous voy à present venu heureusement, esperant que par vous nous pourrons mettre les choses en bonne paix & cōcorde. L'Empereur offrit par-apres dix liures d'or monnoyé, & par le Pape fut mené solennellement à l'entrée de l'Eglise, où estans, l'Empereur s'en alla deuant le grand autel faire ses oraisons à Dieu, & le Pape s'en retourna incontinent en son Palais avec tout le Clergé. Bien tost apres l'Empereur fut trouuer la Saincteté au mesme Palais, où il fut reçu si commodément, que de ses chambres à celles du Pape il n'y auoit qu'une parois, garnie d'un petit huis, pour entrer de chambre en chambre, & auoir le moyen de deuiser familièrement de grandes affaires, iour & nuict, & au desçeu d'un chacun. Ainsi doncques ils s'entre-descouuroient leurs pensées, & reietans l'origine de leur hayne sur les destinées, & sur leurs mal feaux Conseillers, trouuoier la voye, (à ce aydant Dieu) par laquelle il sembloit, qu'on pouoit r'entrer en vne bonne paix, &

*Propose
tre le Pa-
pe & l'Em-
pereur.*

mettre fin à tant de calamitez. Les Venitiens proteſtoient par leur Ambaſſadeur Gaſpar Contarin, perſonnage docte & induſtrieux, qu'ils n'auoient point pris les armes contre l'Empereur, pour eſtendre leur Seigneurie, ains pour la liberté publique ſeulement. Et partant eſtoient contents de rendre à l'Empereur ou au Pape, les villes qu'ils tenoient en la Pouille & en la Romaigne, & meſmes ayder l'Empereur d'argent, ſ'il vouloit liberalement vſer de clemence enuers Francisque Sforce. Le Pape pareillement auoit inſtamment prié l'Empereur des le commencement de la guerre, à faire le ſemblable. Mais tous les deſſeings de l'Empereur tendoient à la pieté & à la vraye gloire, à ſçauoir à repouſſer les forces Turqueſques. Or ia auoit eſté repouſſé en grand' perte & ignominie Solyman, Empereur des Turcs, de deuant Vienne en Auſtriche, à l'occaſion dequoy il voulut appaiſer le reſte. Parquoy Francisque Sforce vint à Boulongne, ſe ietta aux pieds de l'Empereur, & luy rendant les patentes, par leſquelles l'Empereur commandoit qu'il fuſt ſauf & ſeur en quelque lieu qu'il fuſt, remeit le tout à la douceur de l'Empereur, ſoy fiant au reſte à ſon innocence. Sur quoy l'Empereur mōſtra qu'il ſur-paſſoit la fortune meſme: Car premierement il auoit combattu pour le Duché de Milan, eſtant abandonné de ſes allies, & quoy que la fortune luy fuſt quelquefois ennemie, ſi auoit-il neâtmoins refusé tout accord, de peur qu'en accordant, on ne péſaſt qu'il feiſt de laſcheté de courage, ce qu'il eſtoit reſolu de faire par magnanimité & cōſtance. Et faut cōfeſſer, que l'aduerſe fortune ne l'abbatoit point: comme auſſi l'heureux ſucces de ſes entrepriſes ne l'enorgueillifſoit point. Ainſi donc il reçeut le ſuppliant en ſa bonne grace, le nomma Duc de Milan, & luy ſeit lettres ſur ce authentiquement à la mode des Empereurs, & ne le chargea point de plus grand tribut, que de celui qu'il auoit delibéré de luy impoſer, deuant toutes leurs diſſenſions.

Le premier iour de Ianuier fut ſolennellement chantée la Meſſe, & fut lors, que le tant deſiré mot de paix par toute l'Italie fut reçu par incredible frequēce d'hommes. Illec le

Francisquesforce remis au Duché de Milan.

Pape Clement & l'Empereur furent appelez Conseruateurs de la Chrestienté, par la voix de Romulo Amaseo, qui haren-gua fort eloquemment. Sur quoy à peine pouuoient tenir les larmes sortans de ioye, les Magistrats, les Citoyens, les Prelats, & les Ambassadeurs des Roys de France, d'Angleterre, de Portugal, d'Escocce, d'Hongrie, de Poloigne, de Dānemarc: de la Seigneurie de Venise, du Duc de Sauoye, de Ferrare, de Mantouë, d'Vrbin, & des villes franches de Gēnes, de Sienes, & de Lucques: finalement tous Princes & Barons, & singulierement Francesque Sforce, qui eut place entre les derniers Cardinaux, pour-ce que ce iour sembloit mettre fin à toutes les miseres de la terre. Ce pendant l'Imperatrice Isabel acoucha d'un fils, qui fut nommé Ferdinand, pour la memoire de l'ayeul paternel.

*Ferdinād
filz de
l'Empe-
reur.*

VOYLA ce que dict Paule Ioue à l'honneur de l'Empe-reur Charles, vray seruiteur de l'Eglise Catholique, pour la-quelle il a faict tout ce qui estoit en sa puissance: & en eust-on veu les effects beaucoup plus grands, si on l'eust laissé faire à l'aise tout ce qu'il entreprenoit, sans luy dresser aucun de-stourbier. Or les choses estans ainsi pacifiées en Italie, (com-bien que les Florentins faisoient des reuesches & opiniaistres) les affaires d'Allemagne alloient tousiours en empirant. Car ceux qui s'appelloient Protestans s'estoient assemblez à Smalcalde pour la seconde fois: où estans, ilz tascherent fort de s'accorder, & conioindre vnanimement leurs forces à l'encon-tre des Catholiques: mais neantmoins tous leurs effortz s'en allerent en fumée, pourautant que les Lutheriens ne vouloiēt admettre ceux qui reiettoient certaines opinions de Luther, & semblablement les Zuingliens eussent mieux aymé mourir, que de consentir à cela, estimans que la pure parole de Dieu faisoit pour eux, non pour les Lutheriens. Le Lantgraue feit du moyēneur entre les deux parties, mais le tout en vain, pour-ce que l'esprit de paix & concorde est seulement en l'E-glise Catholique, de laquelle toute ceste vermine d'hereti-ques s'estoit sequestrée. Et partant les Zuingliens ne pouuoiet estre induictz à consentir aux opinions de Luther, de l'autho-rité

*Assemblée
des Prote-
stans à
Smalcalde
pour s'ac-
corder.*

rité duquel ilz tenoient aussi peu de conte, que Luther faisoit de celle du Pape. Pourquoy doncques nous esmerueillons nous, que Luther se soit separé de l'Eglise Romaine souz pre-
 texte de la parolle de Dieu & de l'Evangile, veu que souz mes-
 me pretexte ses disciples mesmes l'ont abandonné, quoy qu'au-
 cuns l'estimassent vn grád Prophete? Car Zuingle & ses trou-
 pes ne prennent pas moins la parolle de Dieu pour leur bou-
 clier & pauois, que font tous les Lutheriens: & neantmoins il
 faut necessairement que les vns ou les autres errent. Ce n'est
 pas donc assez d'alleguer les escritures, desquelles tous les he-
 retiques, tant absurdes puissent-ils estre, ont accoustumé de
 se targuer: mais il faut d'auantage fournir de vraye interpreta-
 tion à l'escriture, laquelle ne se peut puyser ailleurs qu'en l'E-
 glise, qui est gouuernée du Saint Esprit: ce que nous ramen-
 teuons maintesfois, & non sans cause. Or Sleidan traictant
 des choses de ceste année, faict mention d'un liure, qu'Eras-
 me auoit composé contre ceux qui faucement se nommoient
 Euangeliques. Dont Sleidan se sent bien picqué, & voudroit
 bien donner quelque bonne attainte à Erasme: mais il s'en
 passe, quoy que bien enuis. Il dict que pour euitier tout soup-
 çon Erasme quicta la ville de Basle, & s'en alla à Fribourg, &
 qu'au liure cy dessus mentionné il accoustra bien mal tout
 l'ordre, à sçauoir des Euangeliques. Car, comme dict Sle-
 dan, Erasme proteste en ce liure, qu'il ne cognoist personne
 des Euangeliques, lequel ne se soit faict plus meschant qu'au-
 parauant. Desquelz motz Sleidan s'est tres-bien contenté,
 combien qu'Erasme en ce liure die vne infinité d'autres chō-
 ses contre les nouueaux heretiques. Mais ce fidelle historien,
 qui a coustume de farcir tout son liure des escritz de Luther
 & autres, quand ilz s'attaquent à l'Eglise Catholique, n'auoit
 garde de faire le semblable du liure d'Erasme, sçachant bien
 qu'il n'estoit pas expedient à luy, à cause du bruiet qu'Erasme
 auoit en ce temps. Tant y a qu'Erasme ne parla iamais mieux
 que quand il dict cela: & vous puyz asseurer, si Erasme l'eust
 dict à l'encontre des Catholiques, que Sleidan en eust rem-
 ply les pages de son histoire.

*Ligue de
ceux de
Strasbourg
avec les
Suysses.*

L'AN 1530. ceux de Strasbourg ayās succé l'heresie de Zuingle, sans faire conte de l'opinion de Luther quād au poinct de la Cene, & partant ne pouuans estre confederez avec les Lutheriens, se liguerent avec ceux de Zurich, de Berne, & de Basle, tous Sacramentaires. Ce qu'entendant le Senat imperial, auquel presidoit alors Federic Palatin, se parforça d'empescher ceste ligue, à cause qu'estans subiectz à l'Empereur ilz sembloient ne la pouuoir faire sans son consentement: mais neantmoins ils passerent outre.

*Le cate-
chisme de
Luther.*

LUTHER voyant que ses predicans ne s'accordoient nullement en doctrine, il feit imprimer ceste année vn Catechisme, auquel il expose le Decalogue, l'oraison Dominicale, & le Symbole des Apostres, bien autrement qu'il n'auoit faict dix ans deuant. Là il enseigne l'usage du Baptisme & de l'Eucharistie, ne receuant que ces deux Sacremens, iagoit que l'Eglise en aye sept, desquelz les peres de l'Eglise primitive, comme S. Denys Areopagite, font mention. Depuys ce temps on n'a veu

*Innumera-
bles cate-
chismes he-
retiques.*

autre chose q̄ les Catechismes des heretiques, desquelz on ne scauroit presque trouuer deux en tout semblables. Ces Catechismes ont gaste toute la ieunesse, pour-autant que noz predicans vsoient de paroles fardées & emmiellées le plus qu'ilz pouuoient, afin de faire gouter leur poison aux lecteurs. Et delà est venu, que les cherchiers, les cordonniers, & les vieilles edetées ont osé interpreter les escritures à leur mode: & chacun des nouveaux Euangeliques est venu si effronté, qu'il pense pouuoir mieux redre resolution de tous les poinctz de l'Escriture, tant obscurs puyssent ilz estre, que ne pourroient faire les mieux entenduz Docteurs des Catholiques. Voyla pourquoy bien souuent vous verrez entre ces heretiques les plus asnes faire des ministres, les bourreaux, les sergēs, les cousturiers & autres telz hommes s'vsurper l'office de prescher & administrer les Sacremens, dont fort vne confusio indicible & incroyable. Car Luther voulant donner vn grand coup à noz prestres, & faire vne chose fort plaisante au peuple, a dict que tous Chrestiens estoient prestres sans distinction quelcōque: de maniere que les moins sages ont comencé à auoir en mes-

*Confusion
entre les
heretiques
pour-ce
qu'ilz sont
tous pre-
stres.*

pris les prestres Catholiques & les religieux, de quoy Luther se vante arrogamment en celle epistre tant orde, qu'il escriuit au Cardinal & Archeuesque de Maience, voulant luy mettre en teste de se marier. Car voicy les mots desquelz il vse: le peuple a appris & entend maintenant, que l'estat Ecclesiastic n'est rien, ce qu'on voit à l'œil par les châsons qu'on en faict, par les moqueries & risées du peuple, par les peintures qu'on faict d'eux en tous les parois, es papiers, & ailleurs: de maniere qu'on estime estre vn monstre, si d'adventure lon voit ou lon entēd vn moyne ou vn prestre. Je te l'accorde, Luther: mais c'est ta meschâte langue & plume qui en est cause. Il t'eust beaucoup mieux valu d'enseigner aux ignorans, comment Dieu en l'ancien Testament punissoit asprement ceux qui s'ingeroient à l'office des Prestres: & que Dieu disoit à ses Apostres, q vous escoute, m'escoute, & qui vous mesprise, me mesprise pareillement. Il te falloit plustost enseigner, que nostre Seigneur au nouveau Testament a institué les Apostres & les 72. disciples, & que les Apostres ordonnerent par apres des Euesques, prestres & diacres. Mais pour ce que tu desirois de cevoir vn chacun, tu as mieux aimé dire ce qui estoit le plus plaisant.

A v moys de Feurier de l'année presente, à mesme iour q l'Empereur estoit né, & auoit gagné la bataille si renommée de Paue, à sçauoir le iour S. Mathias, il fut couronné à Bologne par le Pape Clement: ce que nous escriuons tout ainsi qu'on le treuve dans Paule Ioue, Euesque de Nocere, qui semble auoir esté present à tout ce qui y fut faict. L'Empereur, dit-il, fut couronné à Bologne, combien que par auant il eust proietté de prendre la couronne à Rome, à la maniere des Empereurs ses deuanciers, comme au saint siege des choses sacres, heureux domicile des nations, ville tres-renommée par son ancien Empire, par ses triōphes, & par ce qui luy reste de sa splendeur ancienne. Mais la ruine toute recente de la ville, laquelle n'auoit peu en si brief temps se remettre sus, & la disette des ornemens en destournoient l'Empereur, combiē que les Romains à l'esperance de cest auenement sembloient retourner à leur ancienne magnificence. Parquoy ayant conuoqué tous les

*Des trois
couronnes
des Empe-
reurs.*

Princes & Barons, fut esleu pour le sacre le 24. iour de Feburier, qui estoit la feste S. Mathias, cōme nous auons dict. Depuis les fenestres du milieu du palais, y estāt l'entrée ouuerte, fut estendu vn pont en l'air sur des pieux, ayāt sa longueur recourbée par la place & par l'Eglise S. Petronio iusqu'au grand autel, & estant richement paré: aussi auoit-il esté faiēt, afin que le Pape & l'Empereur passans là dessus peussent estre veuz de tout le peuple sans foule ny tumulte. Or estoit l'anciēne coustume des Empereurs de prendre la couronne de fer à Monza pres Milan, laquelle signifie que l'Empire Romain est tenu ferme par fer & par gens de guerre. Sçachez dōc que les Empereurs ont trois couronnes. La premiere est d'argent, pour le Royaume d'Allemagne, laquelle l'Empereur auoit prise dix ans deuant à Aix la Chapelle. La seconde est de fer, pour le Royaume de Lombardie, & la tierce d'or, pour l'Empire Romain. Partant se presenterēt les Ambassadeurs de Monza, lesquels pour retenir leur ancienne prerogatiue, apporterent vne couronne de fort antique ourage, avec des Annales fort anciennes. Ceste couronne estoit sans creneaux fleuronnez, ayant son fer deuant pour enuironner la teste: mais au dehors estoit ornée d'or & de pierres precieuses. Deux iours deuant qu'il receust la tierce couronne, apres la Messe finie fut sacré Empereur en sa chapelle domestique, y assistāt le S. pere. Puy print la couronne de fer & les autres paremens royaux, avec telles ceremonies que nous mettrons cy dessous. Pour honneur souuerain Aluaro Oforio, Marquis d'Astorga, porta deuant l'Empereur le sceptre d'or: & Diego Paceco, Duc d'Ascalon, l'espée & son fourreau garny de pierrerie. Alexādre de Medicis, Duc de Penna & gēdre de l'Empereur, porta le mōde d'or avec la croix fichée dessus, & enrichie de ioyaux: & Boniface, Marquis de Mōtferrat, la courōne de Monza. Ces choses ainsi acheuées, vint le iour destiné pour prendre la couronne d'or, lequel fut beau & clair, encore qu'il eust pleu la nuit precedente. Estant donc tout l'ordre des Cardinaux & Euesques en mittres & en chappes, avec le reste des autres Prelatz en robes violettes, passé par dessus le pont en pompe

solennelle, le Pape par-apres fut porté sur vn siege haut esleué,
 & ainsi entra en l'Eglise souz vn poisse. Or auoit déia Antoi-
 ne de Léne amené sa Fâterie, & auoit disposé ses soldatz pour
 la garde des lieux, braquant ses artilleries sur toutes les allées,
 & asséant ses enseignes au milieu. Ce-pendât vin blanc & clé *Vin versé.*
 ret se versoit par des tuyaux sortans de quelques cuues, faictes
 fort ingenieusement sur la voulte du portique du Palais. D'en- *Vn beuf*
 haut on iettoit force pains sur les soldatz d'embas, & rostissoit *rosty.*
 on vn beuf entier sur vn instrument à tour, farcy au dedans
 de moutons, de cheureaux, & de plusieurs sortes d'oyseaux,
 afin que les soldatz, qui estoient debout en ordonnance, eus-
 sent dequoy se réiouyr durant telle ioyeuse feste. Iamais plus
 grand nombre d'hommes de qualité n'aborda en vne ville,
 au bruiet d'un triomphe celebre, ou de spectacle non encores *Nombre*
 ouy. Tellement que tous les lieux qui respondoient sur la pla- *d'hommes.*
 ce estoient tant pleins, que plusieurs regardoient de loing par
 des guettes suspenduës en haut, & les autres sur les larmiers
 des maisons en lieux fort perilleux, & au grand estonnement
 de ceux qui les voyoiët, & peu s'en failloit que les maisons ne
 rompiissent pour la pesanteur de ceux qui montoient dessus.
 Or le Pape estoit déia vestu en Pontificat, & s'apprestoient-on à
 vne solemnelle Messe, quâd l'Empereur arriua souz vn poisse
 à l'entrée de l'Eglise, accompagné d'un grand nombre de Sei-
 gneurs: en sorte qu'à peine estoit-il passé, quand le plâcher du *Le plan-*
 pont se rompit pour la trop grande pesanteur des soldatz de *cher du*
 sa garde. Dont plusieurs tombans en ceste foule s'enfermerët *pont rom.*
 de iauelines & de halebardes, entre lesquels fut Albert Pighi
 us Theologien de Flandres, grand aduersaire de Luther. Tou-
 tesfois le dommage fut petit au respect du tumulte: & neant-
 moins on pouuoit coniecturer aysément, en quelle fureur fus-
 sent venuz les soldatz Alemans, qui sont de leur nature inap-
 paisables, si quelque desconuenue de fortune fust lors tum-
 bée sur la personne de l'Empereur. Lequel regardant derrie-
 re luy se print à souzrire, comme cognoissant la fortune, qui
 iusques alors ne luy auoit oncques failly au besoin. Toutes
 choses auoient esté ordonnées à la representation de celle de

*Eglise re-
presentant
S. Pierre
de Rome.*

Sainct Pierre de Rome, & nouveaux noms imposez aux cha-
pelles, à fin qu'il n'y eust rien qui ne respondist à l'ancienne
coustume selon les liures du Pape. Aussi y furent presens les
prestres de Rome, qui souloient officier en l'Eglise de Sainct
Pierre. Ceux-cy reçurent l'Empereur deuant vn autel, & luy
vestans vn surplis de lin l'associerent au college de leur cha-
noinerie. Le Cardinal Saluati luy feit prester le serment, se-
lon les parolles solemnelles contenuës au liure du Pape, &
protesta d'estre à tousioursmais defenseur de l'Eglise. De cest
autel, nommé des deux tours, le mesme Saluati & Ridolfi,
Cardinaux diacres, tous deux arriere-cousins du Pape, le me-
nerent à la porte de l'Eglise. Où ayant deuotement fait son
oraison, Piccolomini, prestre Cardinal, ayant prononcé sur
luy certaines prieres, le mena iusqu'à la chapelle Sainct Gre-
goire. Là luy fut osté son surplis de lin, & luy chaussa-on des

*serment
solemnel
du Pape.*

*Les san-
dals & la
tunique.*

sandalz, semez de perles & d'autres pierres precieuses, & fi-
nalement on le vestit d'une tunique en maniere de Diacre,
& d'une chappe. Ainsi qu'il marchoit en-auant avec cest ha-
bit, le Cardinal Pucci estant mitré, l'alla rencontrer à la rouë
de porphyre, qui est sur le milieu de l'Eglise Sainct Pierre.
Lors s'estant l'Empereur tourné vers le grand autel, par vne
autre solemnelle priere fut reCOMMANDÉ à Dieu (en la main
duquel sont les Royaumes) à ce qu'il luy pleust faire son Em-
pire stable, plein de victoire & de pieté. Car il y a plusieurs
choses, anciennement composées par des espritz excellens &
deuotieux, qui sont toutes prises en vn liure sacré, & leuës sur
le front de l'Empereur selon les determinées ceremonies des
choses & des lieux: toutes lesquelles choses on pourra voir es
liures des Papes déia imprimez. Delà on monta vers le grand
autel, là où ayant le Cardinal Innocent Cibo commencé les
Letanies, tous les Sainctz & Sainctes furēt inuokez en ayde.
Le Cardinal Cāpege assista à l'Empereur faisant ses oraisons
sur vn agenouilloir, & par escrit luy recita vne petite oraison
pour estre couronné souz bon-heur. Tost apres l'Empereur
fut mené à la chapelle S. Maurice par le Cardinal Farnese,
pour-ce qu'il estoit le plus ancien des Cardinaux: où luy estāt

debouclée sa tunique, fut oingt sur les espaules & sur le bras droit, avec des oraisons fort deuotes. Ces choses deuément accóplies, fut la Messe commencée, le Pape officiant, & l'Empereur mesme luy ministrât en habit Ecclesiastic: & fut cette Messe dictée avec tant de ceremonies, & avec vne si grande grauité des Prestres, que les plus curieux la trouuoient bien longue. Au demeurant, le sommaire de la solennité fut, que les paremens de l'Empire furent liurez à l'Empereur par les mains du Pape. Parquoy le Pape (non sans prieres solennelles) luy donna le sceptre d'or enrichy de son coupeau fleuronné, par lequel il seigneuriait debonnairement les nations: semblablement l'espée nuë, pour faire teste aux ennemys de la foy Chrestienne: aussi la pomme d'or, representant toute la terre, qu'il doit gouverner en toute vertu & pieté: & finalement luy meit sur le chef la tiare (plustost que couronne) à deux fourchons, enrichie de plusieurs diamans, & lors l'Empereur baïsa les piedz du Pape. Estant par-apres l'Empereur affublé du manteau triomphal, enrichy de tant de ioyaux & pierres, fut mené s'asseoir à la main gauche du Pape, non loing d'iceluy en vn siege couuert de drap d'or, mais vn peu plus bas que l'autre, & lors fut appellé Empereur de Rome. Ce qu'estant rapporté aux soldats en la place, Antoine de Léue feit descharger toutes les artilleries, en sorte qu'il sembloit par ce terrible son, que le ciel fesclast, & que la terre tremblast. Vn peu apres le Pape reçut reueremment & deuotement la sainte Eucharistie, & suyuant la communia à l'Empereur confés & absouz de tous ses pechez. Apres que le seruice fut acheué, on sortit de l'Eglise. Les Prelatz, les Ambassadeurs, & les autres Seigneurs coururēt çà & là vers leurs cheuaux appareillez, & aussi tost furēt ouïes les acclamatiós, le son des trompettes, & le bruiet des tabourins. Quand le Pape voulut monter à cheual, l'Empereur demeura sur piedz à sa main gauche, prest à presenter l'estrier au Pape: mais l'humanité & la courtoisie du S. Pere surmōta le debonnaire seruice de l'Empereur. Estans dōc eux deux montez sur chacun son cheual (desquels celuy du Pape estoit Turc, & celuy de

L'Empereur est oingt.

L'Empereur reçoit le sceptre d'or, l'espée nue, la pomme d'or, & la couronne.

L'emateu triomphal.

Artilleries deschargées.

L'ordre tenu au retour de l'Empereur couronné, & co-royant le Pape.
 l'Empereur Genet d'Espagne) entrèrent coste à coste souz le poisle, lequel estoit porté par hommes de dignité souueraine. Deuant eux alloiét en merueilleux ordre de pompe les mai- sons tant des Cardinaux que des Barons de l'une & de l'autre Cour: & derriere eux estoient les enseignes de ces voyageurs qu'on appelle Courriers. Celles-là estoient suyues de sept

notables personages, qu'il faisoit bon voir pour leurs harnois, cotte-d'armes, cheuaux de guerre, & suyte à pied, & qui portoient autant de bien grands estendars. Outre ce furent menées quelques hacquenées blanches sans cheuaucheurs, en-harnachées de harnois dorez. Quelques ieunes gentils-hommes porterent aussi quatre chapeaux rouges du Pape, attachez sur des bastons: & bien peu apres suyuoit la S. Eucharistie, enclosée en vn tabernacle de Crystalin souz vne custode de drap d'or, & posée sur la selle d'un cheual genereux, & toutesfois paisible: au deuant de laquelle estoit portée vne grande lanterne, & dix torches à l'enuiron. Par-apres chacun des plus honnestes personages de toutes nations marcherent pesse-messe, parez merueilleusement, comme il appartenoit en telle resiouissance. Car en toute l'Italie n'y auoit homme quelque peu illustre, qui n'y fust venu, si l'estoit empestché de maladie. Les Espagnols, les Italiens & les Flamens esblouissoient les yeux des regardans, par leurs sayons d'or broché, ou de drap de soye, brauement accoustrez, ainsi que le plaisir & les fantasies le portoient. Les Alemans estoient en robbes plus obscures, & toutesfois somptueuses: mais ils reluysoient par leurs chaisnes d'or. De pas en pas l'on voyoit des cheuaux genereux de toutes nations, cherchez à despée excessiue par tout le rond de la terre. Il y auoit tant de Seigneurs, nobles & puissans, que si ie les voulois tous nommer, i'ennuyerois par trop le Lecteur. Apres lesquels suyrirent diuers Ambassadeurs, & puis Messieurs les Cardinaux: & non

Le Pape & l'Empereur souz le poisle.
 gueres loing de là le poisle, souz lequel estoient le Pape & l'Empereur, avec leurs couronnes de prix totalement inestimable, & sur cheuaux marchans si reglément l'un quand & l'autre, qu'ilz sembloient sentir & cognoistre quelz cheuaucheurs

cheurs ilz portoient. Deuant le poisse marchoit le Marquis de Montferrat, en manteau solemnel & avec vne couronne ornée de pierrerie: & ainsi portoit le sceptre de l'Empereur. Apres luy estoit Francesco Maria, Duc d'Vrbain, & General des Venitiens, qui portoit l'espée nuë toute droicte. Philippe Conte Palatin (qu'une bien-seante hauteur de corps, & le siege de Vienne vaillamment soustenu contre les Turcs rendoient fort notable) porta la pomme d'or. Le dernier estoit Charles, Duc de Sauoye, portant vn petit chapeau tout reluyfant de perles, d'esmeraudes, & d'escarboucles, qui portoit, quand il falloit, la couronne ostée de dessus la teste de l'Empereur. Entre ces Princes du souverain rang & entre le poisse mesme marchoit vn Thesorier de l'Empereur, lequel Thesorier, pour reculer la tourbe & en signe de liesse, dispersoit sur le peuple par chacune ruë, en certains interualles de pas, monnoye d'or & d'argent, marquée de l'Image de l'Empereur. Suyuant le poisse fut donnée place à deux Chambellans, & à deux Médecins. Apres lesquelz suyurent quelques Prelatz excellens, qui estoient ou Ambassadeurs des Roys, ou Conseillers de l'Empereur, ou ceux qu'on nōme assistans du Pape. Puys suyuant marchoient tout le reste des Euesques en robes longues violettes, & les autres gens d'Eglise de moindre dignité apres eux. Les hommes d'armes Flamens diuisez par troupes & compagnies, fermerent la derniere queue, suyuant en tel ordre avec l'armet sur la teste & la lance sur la cuisse, qu'ilz ne sembloient pas estre seulement pour escorte à telle pompe, ains encore pour ornement. Estans, comme nous auons dict, partys de l'Eglise, & marchantz en-auant, tournerent à la main gauche vers le milieu de la ville, là où est la tour des Asinelz, qui n'est seconde en hauteur à aucune d'Italie. Delà on passa tousiours plus auant entre les acclamations du peuple, par vne ruë couuerte de draps blâcs & azurez, laquelle meine iusques à la porte de la Romagne, estâs les portiques de chacun costé tous pleins d'Illustres Dames regardâtes, en sorte que toute la pompe se pouuoit voir fort paisiblement. En-apres l'Empereur s'estant departy du Pape à vn canton de

*Par qui
estoit por-
tez les pa-
renies Im-
periaux au
couronne-
ment.*

*Or & ar-
gent semé
par les rues*

*Hommes
d'armes
Flamens.*

L'Empereur receu en l'Eglise qui representoit S. Iehan de Latran de Rome. Il fait des Cheualiers.
 ruë, s'en alla à l'Eglise S. Dominique: là où les Chanoines de S. Iehan de Latran à Rome le receurent reueremment, & l'af-
 focierent en leur College, comme ceux de S. Pierre auoient
 fait par-avant. Puyt fait l'Empereur humblement son orai-
 son deuant l'autel de Sainct Iehan, & fait plusieurs Cheuali-
 ers, leur touchant legerement les espaules avec vne espée: &
 puis s'en retourna au palais par vn autre chemin que n'auoit
 fait le Pape. A la plus grande salle du palais couuerte de ta-
 pifferies pour faire le festin, estoit conioincte la chambre du
 Cardinal Hippolyte de Medicis, dedans laquelle l'Empereur
 se retira tout couronné, laissant dehors presque toute la trou-
 pe de ses domestiques: & là despouilla le manteau triomphal,
 deschaussa les sandalz, & prit vne robbe de drap d'or, luy trai-
 nant iusques aux talons: puyt se reposa quelque temps, estant
 allegé de ce tant grand faix du manteau, & de la couronne
 fort pesante. Ce-pendant on commença à seruir sur table par
 merueilleux ordre & silence des officiers, avec haubois &
 trompettes sonnans deuant. Parquoy assisterent incontinent
 à l'Empereur les quatre Seigneurs sus-nommez, chacū en son
 vestement solemnel pour porter deuant luy les paremens im-
 periaux, & d'autres illustres Seigneurs aussi pour le conuoyer
 iusques à la table. L'Empereur souppa seul, estans tous les pa-
 remens de l'Empire colloquez sur sa table, qui estoit esleuée
 de quelques degrez en hauteur: au dessouz desquelz s'assei-
 rent en vne autre (toutesfois vis à vis de l'Empereur) le Duc
 de Sauoye, le Conte Palatin, le Duc d'Vrbain, & le Marquis de
 Montferrat. Quand aux autres Barons, on leur donna le bāc-
 quet en vne autre salle. Les tables leuées, l'Empereur prit de re-
 chef l'espée, & fit plusieurs Cheualiers. Voila ce qu'il nous a
 semblé bon de prendre de Paule Ioue, pour vous faire enten-
 dre par le menu des choses, que plusieurs sont fort curieux
 de sçauoir.

*La celebre
 iournée
 d'Aus-
 bourg.*

PENDANT que l'Empereur estoit encor' en Italie, il pu-
 blia la iournée de tous les Princes & estatz de l'Empire, pour
 estre tenue à Ausbourg le huietième iour d'April: à quoy
 faire deux choses fort necessaires l'auoiet tousiours inuité. La

premiere estoit la dissension qui estoit en Alemaigne pour le faict de religion, dissension si grande, qu'elle menaçoit tout le pais de sa derniere ruine, si lon n'y mettoit quelque souuerain remede en bref. L'autre estoit la guerre du Turc, pour à laq̃lle obuier il estoit fort expedient de considerer meurement tous moyens, conseilz & aydes. En assignant ceste iournée, l'Empe-
 reur vſa de sa clemence & debonnaireté accoustumée, pro-
 posant plein sauf conduict à tous ceux qui s'y vouldroient trou-
 uer, & mesmes exposer leur confession de foy. Car les affaires
 d'Allemaigne estoient ia venuës à tel poinct, que desormais
 la seuerité les eust plustost empirées, qu'emmeliées: à cause
 principalement que la puissance du Turc si redoutable con-
 traignoit l'Empereur de caller la voile contre quelques opinia-
 stres, lesquelz il eust puny selō leurs demerites, si les Turcs &
 quelques autres luy eussent donné loysir de respirer. Or fut
 ceste iournée d'Ausbourg vne des plus celebres qui oncques
 furent, à cause que la douceur de l'Empereur conuioit chacū
 à s'y trouuer. Les Lutheriens doncques offrirent alors leur cō-
 fession à l'Empereur, bastie par ce reuerend architecte Philip-
 pe Melancthon, premier disciple de Luther: lequel auoit bien
 quelque cognoissance des bonnes lettres, mais en fait de reli-
 gion il estoit si variable & inconstant, (chose coustumiere à
 ceux qui foruoient de la verité) que depuis il a changé ceste
 confession en mille façons: ce qui pouuoit de foy assez semon-
 dre tous espritz bien nez, à se retirer d'une doctrine si incertai-
 ne, & laquelle d'heure à autre prend nouuelle forme, selon
 qu'il plaist à celui qui l'a inuentée. Car sans alleguer tant de
 choses, es sacremens mesmes, qui sont comme les bouleuers
 de nostre religion, ce Protée de Melancthon s'est monstré si
 inconstant, que premierement il en constituē deux, puis trois
 en vne autre edition, finalement il nous octroye qu'il y en a
 quatre. Or faut-il encore diligemment noter ce que quelques
 vns ont escrit pour chose asseurée, à sçauoir q̃ quelques grādz
 Lutheriens ont donē tant d'autorité à ceste confession d'Aus-
 bourg, qu'ilz eussent plustost douté de ce qu'a escrit S. Pol, q̃
 de la doctrine de Luther & de la confession d'Ausbourg. O

*La clemē-
ce de l'Em-
pereur.*

*La confes-
sion d'Aus-
bourg tant
chaudée.*

*Melancthon
vray Pro-
tée.*

*La confes-
sion d'Aus-
bourg esga-
lée à S.
Pol.*

grand' indignation de Dieu: ceux qui se moquent des decretz des Conciles & des Papes sont tumbéz en tel déuoyemēt de sens, qu'ilz preposent l'autorité de Luther & Melancthon à S. Pol, c'est à dire à Iesus- christ parlāt par la bouche de S. Pol. Mesmes vn des principaux articles de l'Vniuersité de Vuitte-berg prohibe expressément, que nul ne soit hardy iusqu'à là, que de soustenir vne opinion repugnante à la doctrine de ceste Confession. Bref il a fallu, que tous ministres & professeurs des Eglises Lutheriennes ayent iuré de ce obseruer inuiolablement. Ce que quelques Lutheriens mesmes escriuent & asseurent de ceste confession, lesquelz toutesfois confessent, que souuentefois elle a esté changée, corrigée & augmentée. S'il est donc ainsi que souuent elle a esté changée, il faut que necessairement vous confessiez, messieurs les Lutheriens, que vous auez iuré vne chose fauce quelquesfois. Parquoy vn chacun peult entendre, que le forgeur d'icelle n'estoit en son bon sens quand il la composa premierement, ny quand il l'a si souuentefois remise sur l'enclume: & par consequent que c'est vne doctrine purement humaine. Neantmoins plusieurs sectes s'aduouent estre de ceste Confession, voire les Caluinistes mesmes: qui ont esté à ce acheminez par Melanctho, recuyfant tant de fois la confession, de sorte que quelques Lutheriens en veulent grand mal à Melancthon, & ne veulent souffrir aucunement, que les Zuingliens, Caluinistes & quelques autres soient admis à icelle confession, pour-autant que leur doctrine ne conuient pas avec icelle. Ia Dieu ne plaïse qu'ilz nous puissent persuader, qu'ilz nous ont apporté les premiers l'Euangile, veu qu'entr'eux ilz ne sçauent pas lesquelz suyuent le vray Euangile, & lesquelz non. Bien est vray que la plus part des sectes de ce siecle adorent ceste cōfession d'Aufbourg, comme celle grand' putin descrite en l'Apocalypse de S. Iehan: & toutesfois il n'y a rien en icelle dequoy les Confessionnistes mesmes ne s'entre-battent, pendant que l'un la tire en vn sens, & l'autre en vn autre. Et ceste leur dispute & contention ne consiste pas en choses de nulle importāce, ains ez choses les plus necessaires & de plus grande consequence.

*Les sectes
s'aduouent
estre de la
Confessio.*

*La Cōfession
vraye
putin de
l'Apoca-
lypse: 13.
14. 16.
17.*

*En quelles
choses les se-
ctaires sont
différens.*

Ce que voulans dissimuler le plus qu'ilz peuuent, ces ministreaux sont si effrontez, que si en bonne compagnie vn Catholique leur demande, pourquoy toute leur doctrine est si differente, ilz respondront impudemment, que le principal fondement n'est aucunement reuoké en doubte: & ce persuadent-ilz à la miserable populace, laquelle ilz ont amadouée, & la tiennent iusques icy empietée par leur hypocrisie. Iacques André Smidelin, vn des meilleurs combattans que iamais Luther ayt eu dans ses troupes, a osé affermer en quelques siens escriptz, que les sectaires de nostre temps ne different nullement és poinctz de la religion. Mais il n'est point besoin que nous refutions vn mensonge si prodigieux, veu que les autres heretiques l'ont tres amplement refuté: pour quoy prouuer, il ne faut alleguer autre argument que l'experience: car on ne voit & on ne list autres liures, que ceux qui sont composez par diuers heretiques, taschans de refuter l'heresie opposée à la leur. Et à fin que la posterité puisse cognoistre l'impudence de ces mal-heureux, qui par leurs calomnies ont mis le feu de dissension par toute l'Alemaigne, voire par toute l'Europe, ie vay vous raconter vn faict fort segnalé, executé par le mesme André Smidelin, bon predicant. En certain colloque tenu à Vuormes, plusieurs doctes hommes estoient assemblez pour les affaires de la religion: durant lequel temps nostre maistre Smidelin desirieux de faire vn gentil sermō à toute la troupe, mont en chaire. Mais en quel habit, à vostre aduis? Il estoit vestu d'un casaquin de courtisan, avec la manche brodée de couleurs tout à l'entour de l'espaule, les bras hors du casaquin, & ayāt vne espée à son costé. N'estoit-ce pas l'habit d'un honneste predicateur? quand à moy ie prendrois tousiours vn tel hōme plustost pour vn soldat ou vastadour, que non pas pour vn ministre de l'Euangile.

OR deuant que reprendre noz erres touchant la Confession d'Ausbourg, ie diray vn mot en passant de l'etrée que feit l'Empereur en la ville d'Ausbourg, & des choses qui s'y passerent. Il arriua donc à Ausbourg la veille de la feste-Dieu, qui fut plus tard qu'il ne proiettoit, pour autant que par les che-

*Habit
d'André
Smidelin
enpreschāt*

*Entrée de
l'Empe-
reur à Aus-
bourg.*

L'AN M.D.XXX.

HISTOIRE DE TOUTES CHOSES

*Vne belle
piece d'ar-
gent.*

mins on luy faisoit force entrées, mesmes les Venitiens. En la Conté de Tyrol, où il y a de fort belles mines d'argent, on presenta à sa Maïesté vne piece d'argent vallant mille sept cens ducatz, & representoit ceste piece toute la lignée de l'Empereur fort naïuement. Semblablement les Princes de Bauiere le festoierent quatre iours à Monac, avec son frere Ferdinand & le Cardinal Campege, de maniere que nulle sorte d'honneur & de courtoisie ne fut lors espargnée. Comme donc il fust desia assez pres d'Ausbourg, tous les Princes & Estatz de l'Empire l'allerent recueillir en tres-grande reuerence, & n'estans plus loing de luy que de cinquante ou soixante pas ilz

*L'Empereur est re-
cueilly des
Seigneurs
du Senat,
& de l'E-
uesque.*

meirent tous pied à terre. Ce que voyant l'Empereur & son frere Ferdinand, feirent le semblable, aymans mieux donner preuue de leur douceur, que tenir leur grandeur. Albert de Brandebourg, Cardinal de Maïence, qui estoit vn des plus remarquables Electeurs, receut alors l'Empereur avec vne harangue merueilleusement bien faicte & recitée, & ce au nom de tous les Estatz. Ce qu'estant faict, il entre dans la ville, où il fut accueilly du Senat & du peuple au plus grand honneur qu'il leur fut possible. Entré qu'il fut dans la ville, voicy l'Euesque qui le reçoit avec le Clergé, & le conuoya souz vn poisse iusques à la grand' Eglise. Lesquelles choses ainsi faictes, les tenebres de la nuit approcherent, tellement que l'Empereur se retira à l'Euesché, qu'ilz appellent le Palais, & les autres qui çà qui là. Si trauailla beaucoup l'Empereur ce soir là, & le ma-

*De la pro-
cession, le
iour de
la feste
Dieu à
Ausbourg.*

tin ensuyuant, à ce que le Duc de Saxe & les autres Seigneurs Lutheriens assistassent à la procession, en laquelle on deuoit porter le sacré corps de nostre Seigneur, selon la coustume de l'Eglise. Mais cōbien qu'il n'eust cessé de practiquer cela avec eux iusques sur le midy, si perdit-il sa peine, pour ce que leurs predicans leur faisoient accroire, que quiconque assistoit à la procession estoit idolatre, à cause que lon y adoroit l'Eucharistie. Car ilz disent que le corps de nostre Seigneur n'y gist point, sinon à l'instant qu'on le prend. Toutesfois l'Empereur feit ce qui estoit en luy, & assista enuiron midy à la procession fort deuotieusement, suiuy d'un grand

nombre de Seigneurs, & des Barons Espaignolz & Flamens. La sainte Eucharistie estoit portée par le Cardinal de Maiëce, qui estoit costoyé du Roy Ferdinand à la main droicte, & du Prince Ioachim de Brandebourg à la gauche. Deuât l'Eucharistie marchoient les Princes seculiers, & le Clergé avec plusieurs autres. Mais apres icelle suyuoit l'Empereur, tousiours la teste nuë, combien que la chaleur du Soseil fust fort aspre : & portoit en sa main vn cierge à quatre fourchons, ce que faisoient aussi tous les autres Seigneurs y assistans. Apres l'Empereur marchoient d'ordre tous les Archeuesques & Euesques. Le poisle, souz lequel estoit la sainte Eucharistie, estoit porté par six Princes seculiers, qui faisoient cela par tour. Or estans toutes choses deuément faictes & accôplies, l'Empereur fut outrément fasché du refus qu'auoient fait les Seigneurs Lutheriens, de sorte qu'il commanda que des le lendemain ils eussent à vuyder la ville d'Ausbourg : mais toutesfois quelques Seigneurs Catholiques empescherent que ce commandement de l'Empereur ne fust effectué. A la verité ^{Pieté de l'Empereur.} cest Empereur ayma son Dieu sur toutes choses, de façon qu'on cognoissoit assez, qu'il estoit beaucoup plus appuyé sur la faueur du haut Dieu, que sur toutes ses forces, quoy qu'elles fussent grandes & fort redoutables. Aussi a-il tousiours expérimenté le secours diuin en toutes ses entreprises, de maniere que ce grand Solymã de Turquie redoutoit beaucoup sa prospérité. Car vn homme Chrestien ne doit iamais referer l'heureux succès des Princes à vne destinée fatale, cōme font ie ne sçay quels hommes plus à la payenne que chrestienne-ment: veu que toutes choses dépendent de la prouidence diuine, & que Dieu promet souuent ez saintes escritures, qu'il glorifiera ceux qui le glorifient. Que si le contraire aduient quelquefois, il ne s'en faut pourtāt esmerueiller. Car il est besoin que les bons ayent certaines fois quelques desastres & desconuenues de fortune, à fin que leur trop grande prospérité ne les rende orgueilleux. Ayant donc l'Empereur ouy les raisons alleguées par les Seigneurs Catholiques, il passa son maltalent: & estant deliberé de commencer la iournée le 20.

L'AN M.D.XXX.

HISTOIRE DE TOUTES CHOSES

Le jour de Iuin, il commanda que tous les Seigneurs & les deputez pour les Estats se trouuassent à la grand' Eglise, où le Cardinal Electeur de Maience celebra la Messe. Ce voyant l'Electeur de Saxe, il demande à ses Theologiens s'il luy estoit loisible d'assister à la Messe quant & les autres: lesquels luy respondirent que rien ne l'en pouuoit empescher, pourautant qu'il n'estoit pas là appelé pour la Messe, mais seulement pour le deu de son office. Car l'estat de l'Electeur de Saxe est de porter l'espée deuant l'Empereur. Voyla comment ces mignons de Theologiens flattoient les Princes. Au moyen dequoy l'Electeur assista à la Messe, combien que Luther l'eust detestée autant qu'il est possible au liure de l'abomination du Canon de la Messe: & George de Brandebourg Lutheran alla aussi à la Messe. Icelle dictée, on comence à entrer en conseil. Si auoient ceux d'Ausbourg leuë huit cens soldats pour la defense de la ville: mais l'Empereur les licentia, & luy-mesme en donna mille, qui estoient pour obuier à tous tumultes & seditions. Pour lesquelles empescher fut pareillement defendu à tous prescheurs, tant Catholiques que heretiques, de prescher publiquement, iusqu'à tant que les affaires de la religion fussent decidées: & neantmoins l'Empereur ordonna quelques predicateurs en la grand' Eglise, qui ne nommoient personne en chaire: ce qui fut fort sagement ordonné. Car il y auoit vn nombre infiny de predicans de toutes sectes, chacun desquels se parforçoit d'attirer le peuple à ses opinions, dont il y auoit danger que sedition ne s'en ensuyuist. Or deuant toutes autres choses l'Empereur voulut qu'on traitast de la religion, sçachant bien que ce point estât vne fois vuydé, le reste ne pouuoit qu'auoir bonne issue. Pourtant fut permis aux Lutheriens de reciter publiquement leur Confessiō, laquelle ils presenterent à l'Empereur escripte en Latin & en Aleman. Deux sortes d'articles estoient en icelle contenuz: par les premiers ils declaroient leur foy, & par les seconds ils exposoient quels abuz ils auoient ostez de l'Eglise. Quand aux premiers, ils dissimulent maintes choses, que par-avant ils auoient autrement enseignées: mais es seconds ils mentent bien

Les Lutheriens assistent à la Messe.

Comment on obuie à la sedition en ceste iournée.

Sommaire de la Confession d'Ausbourg.

bien plus ouuertement, disans qu'ilz celebrent la Messe en grand honneur & reuerence, qu'ilz obseruent les ceremonies accoustumées, & qu'ilz n'ont point abrogé la Cōfession. Voyla les mensonges de Melancthon aussi clairs qu'est la lumiere du iour, lesquelz toutesfois il a diuersifiez depuys en maintes sortes. Luther n'auoit-il pas au-parauant escrit vn liure pour faire cesser la Messe? n'auoit-il pas dict mille maux du Canon de la Messe? Semblablement l'imposture quand à la Confession est si grosse, qu'on la palpe avec les mains: car il y auoit ia long temps qu'on ne parloit plus de la Confession au Lutheranisme. Auquel propos Sleidā dit, que les Catholiques sont en opinion, qu'il faut nombrer tous les pechez quand on se confesse: & tant est-il fin, qu'il se garde bien de dire que cela s'entend des pechez mortelz, non des venielz, lesquelz ne doiuent ny ne peuuent estre tous denombrez.

ENVIRON ce temps Madame Eleonor, seur de l'Empereur, vint d'Espagne en France: & avec elle vindrent Messieurs François & Henry, lesquelz auoient demeuré quatre ans hostagers en Espagne. Si fut toute ceste troupe receüe par les villes de France en fort grāde lieſſe de tout le peuple.

LA ville de Florence ayant fort opiniaſtremēt ſouſtenu le ſiege du camp de l'Empereur & du Pape onze moys entiers, en fin ſe rendit ceste année ſouz quelques conditions. Car il faut entendre que les meilleurs citoyens, & principallemēt ceux de la maiſon de Mēdicis, auoient eſtē pouſſez hors de ceste citē, de maniere que l'entiere adminiſtration de la choſe publique eſtoit tumbēe entre les mains de quelques vns, qui ne ſe ſoignoient rien moins que de la ſauuetē publique. Et ſi eſtoit celle libertē, qu'ilz auoient propoſē de maintenir iuſqu' à l'extremitē, plus moleſte & pernicieuſe que tyrannie quelconque: toutesfois ilz ne vouloient ouyr parler d'aucune capitulation, iuſqu' à tant que la famine les dompta ſi bien, qu'ilz mangeoient & chatz & ſourys, dont leur opiniaſtretē & arrogance fut abbatuē, au grand contentement du Pape, à cauſe que c'eſtoit ſa patrie bien-aimēe. L'Empereur feit à ſon plaisir de celle Republique, & remeit la maiſon de Mēdicis au

Hh.j.

L'AN M.D.XXX.

HISTOIRE DE TOVTES CHOSES

rang qu'elle tenoit par-auant. Et pour-autant qu'à grand' peine peut-on viure paisiblement & sans troubles en vne ville, où le peuple dispose des choses à sa fantasie, & où il n'y a point de cheffouuerain, il installa à la principauté de la ville Alexandre de Medicis, qui auoit espousé sa fille naturelle. Voyla donc quelle fut la fin de ceste tant opiniastre rebellion, laquelle estant commencée plus par temerité que par bon conseil, a tant affligé les Florentins, qu'à la par-fin (quoy que trop tard) ilz ont cogneu combien estoit dangereux vn populaire commandant en vne ville. Or en ce siege & prinse de Florence l'Empereur manifesta combien il estoit soigneux de l'auancement du Pape, & ce non sans grosse perte de son armée, à cause qu'il y perdit plusieurs vaillans hommes: l'un desquelz fut Philibert, Prince d'Orenge, lequel en l'aage de Trente ans reçeut deux coups d'harquebuze, vn peu deuant que la ville se fust rendue.

*On donne
la Confes-
sion d'Aus-
bourg à ex-
aminer
aux Ca-
tholiques.*

OR pour reuenir à ce qui fut fait à Ausbourg, l'Empereur ayant reçu la Confession des Lutheriens, il la donna aux Theologiens Catholiques pour estre examinée & refutée. A quoy ilz s'emploierent fort diligemment, & par les meilleurs moyens desquelz ilz eussent peu vser: mais les Seigneurs Catholiques, qui ne souhaittoient que la paix, furēt d'aduis qu'il falloit laisser tout ce, en quoy les Catholiques monstroient, que les Lutheriens auoient autresfois eu opinion diuerse, & refuter seulement ce qui estoit couché en leur Cōfessiō. Je sçay bien que cestuy leur aduis ne procedoit que d'un bon desir qu'ilz auoiēt de voir les differens pacifiez: mais c'est sans doute, qu'il n'y a plus facile ny assuré moyen pour destruyre l'erreur de nos Heretiques, qu'en monstrant comment ilz sont incōstans en leur doctrine, chose qui ne leur aduiēdroit point filz enseigner la verité. Parquoy comme les Catholiques se fussent accommodez au vouloir des Seigneurs, quelques iours escoulerent: & estant ia faite vne refutation fort briefue, suruint vne seconde difficulté, à sçauoir au nō de qui ceste refutation seroit recitée: & sur cela quelques semaines passoient tousiours. Au moyē de quoy les Lutheriens se vantoient

publiquement à Ausbourg, & ailleurs par lettres, que les Papistes n'auoient que respondre à leur Confession. Mais la refutation ayant esté leuë en presence de tous les Princes, l'Empereur & tous les Catholiques l'approuuerent, & à l'instant l'Empereur pria les Lutheriens qu'ilz feissent le semblable, mais il ne le peut impetrer. Voyans donc les Princes Catholiques, que l'Empereur se pourroit bien en-aigrir d'auantage contre les Lutheriens à cause de leur opiniastrété, ilz supplierent sa Maiesté, qu'elle leur permist de faire ce que bon leur sembleroit pour acheminer les Heretiques à quelque cōcorde. Dequoy l'Empereur ne les voulut esconduire, tant il estoit *Ont tasché de s'accorder par tous moyens avec les Lutheriens.* humain, & permit qu'on feist avec eux ce qu'on voudroit. Et partant furent choisis dix-sept Seigneurs d'entre tous les Estatz de l'Empire, q seroiēt pour r'amener à quelq accord les Lutheriēs, cōme on estimoit qu'il seroit fort facile. Si assignerent les Lutheriens à se trouuer tous ensemble, au lieu où se tient le chapitre de la grand' Eglise d'Ausbourg, à quoy ilz ne feirent faute. Estans donc tous assis à leurs places, Ioachim Electeur de Brandebourg, homme fort eloquent, leur remonstra par vne harangue faicte au nom de tous les deputez, qu'il leur falloit s'accorder avec l'Empereur & les Estatz de l'Empire quand au faict de la religion: & qu'en faisant autrement, il y auoit fort à craindre que plusieurs maux, guerres, & dissensions n'en sourdissent. A quoy ilz respondirent deux iours apres, disans qu'ilz estoient bien marrys, dequoy on les aduertissoit de sorte, que souz l'aduertissement estoient cōprises les menaces. Et puis ilz distribuēt leur faict en quatre parties, alleguans premieremēt que l'Empereur ne les auoit assez ouïs. Secondement, que la refutatiō des Catholiques ne leur auoit esté donnée assez librement. (Car l'Empereur ne leur auoit voulu donner la coppie de la refutation, sinon en condition qu'ilz la garderoient chez eux, sans la pouuoir communiquer à autres, si ce n'estoit par son commandement: laquelle condition ilz n'auoient voulu receuoir.) Troisiēsmement, que leur conscience les empeschoit de consentir à vne refutation, qu'ilz n'auoient encore bien espluchée. Quatriēsmement,

L'AN M.D.XXX.

HISTOIRE DE TOUTES CHOSES

qu'en la dernière iournée de Spire on leur auoit promis vn Concile, mais qu'on n'en auoit rien fait. Où il faut prendre garde, comme ie diray encore par-cy apres, que par vne grande ruse & finesse les ministres persuadoient à leurs Seigneurs Protestans de requerir vn Concile, iacoit que Luther eust pie ça reietté tous les Conciles, & que les Lutheriens n'eussent moindre desir d'aucune chose, que de la congregation d'un legitime Concile, sçachans trop bien, qu'en plusieurs sainctz Conciles generaux presque toutes leurs opinions auoient esté condamnées le temps passé. Mais par ce moyen ilz vouloient donner à entendre, que leur cause estoit appuyée sur l'équité: ce qu'ilz ont bien monsté depuis, quand ilz refuserent le Concile ia assigné à Trente, & quand ilz ont reietté tous les decretz & ordonnances d'iceluy. D'auantage il nous faut considérer vn fin traict de Sleidan: lequel dict que les Princes Protestans remonstrent à l'Empereur en ceste iournée, si on ne pouuoit venir en accord, qu'ilz ne refusoient point le Concile si souuent promis: à sçauoir pour estre tenu en mesme façon que tous Conciles generaux ont esté tenuz iadis. Et puy il adioust, que les Protestans dirent à l'Empereur durant ceste iournée, qu'ilz demandoient vn bon & libre Concile en Alemaigne. Car ces deux motz, bon & libre, emportent avec eux, que les Protestans pouuoient reietter tous Conciles celebrez à la coustume des Catholiques. On sçait bien, que iamais Sleidan & tous autres heretiques ne confesseront qu'un Concile soit bon & libre, sinon celuy auquel les sectaires auront toute puissance & autorité de faire telles loix que bon leur semblera, & annuler tout ce qui leur semblera mauuais. Mais comment sera-il possible qu'ilz arrestent iamais quelque chose certaine, veu que tous les iours ilz ne font que se battre de leurs principales opinions? Sleidan dict d'auantage, que les Princes Lutheriens remonstrent à l'Empereur en ceste iournée, qu'ilz n'auoient rien de commun avec les sectes, qu'ilz ne vouloient forcer personne à prendre leur religion, & qu'ilz n'auoient oncques permis, que les Sacramentaires, contempteurs du corps de Iesus-christ, eussent vn pied

Du Concile bon & libre, que les Protestans demandoient.

de terre en leurs provinces. Ce qu'ilz entendent des Zuingliens, hommes que Luther haysoit tres-fort, iacoit qu'il ne fust pas meilleur qu'eux. Que Sleidan doncques nous respon-
 de, s'il luy plaist: Luther poursuyuoit il si ardemment Zuingle
 selon la parolle de Dieu, ou non? Si c'est selon la parolle de
 Dieu, il est bien fol luy mesme d'estre heretique, & se dam-
 ner ainsi à credit: car Sleidan estoit Sacramentaire. Si cela n'e-
 stoit selon la parolle de Dieu, comment n'apperçoit-il, qu'il
 ne se faut point fier à ce maling esprit, qui resuoit si vilaine-
 ment en choses de grande consequence, veu mesmement
 qu'il proteste, que sa doctrine n'estoit point de luy ains de
 Christ? Mais ie lairray ce menteur, pour retourner à mon hi-
 stoire.

*Dilemme
 contre Sleidan
 Sacramentaire.*

APRES que les Protestans eurent respondu ce que nous
 auons dict cy-dessus, les deputez leur repliquerent par Io-
 achim de Brandebourg, disans pour preface de leur responce,
 qu'ilz estoient fort scrupuleux où il n'estoit nullement be-
 soin: & que où il estoit question d'estre fort conscientieux, ilz
 ne le vouloient point estre. Car leur conscience estoit offen-
 cée, dequoy on les admonnestoit de se réunir à l'Eglise: & au
 contraire icelle ne se sentoient aucunement greuée, de ce qu'el-
 le suyuoit plustost le iugement des apostatz, que de l'Eglise,
 dont on n'auoit veu que mal-heur iusqu'icy. D'auantage Lu-
 ther ne tenoit conte des Conciles & auoit escrit plusieurs
 choses, pour diminuer leur autorité enuers le peuple: A ces
 choses voulurent respondre les Protestans, & tascherent
 fort de monstrier qu'ilz ne s'estoient point separez de l'Eglise,
 qu'ilz n'auoient point mesprisé l'Empereur ny ses comman-
 demens, & qu'ilz donnoient aux Conciles l'autorité qu'ilz
 meritoient. Tellement qu'on s'aduifa à la par-fin de choisir
 sept hommes de chacun costé, lesquelz consulteroient par-
 ensemble des moyens pour reuenir en concorde. Lors on
 s'accorda sur le different de quelques articles de la confession
 d'Ausbourg, de sorte qu'on pensa que le semblable se feroit
 touchant tout le reste: & partant les Estatz de l'Empire esleu-
 rent trois hommes de chacun costé, pour traicter ensemble

*Replique
 des Catho-
 liques aux
 Lutheriens.*

de ces choses. Mais on ne peut rien faire, & en fin fut-on contraint de ietter le manche apres la coignée. Quand à l'Empereur, il y feit tout ce qu'il peut: mais ses effortz furent sans nul fruit, à cause que les Lutheriens estoient deliberez de retenir opiniastrément l'Euangile, qu'ilz auoient receu de Luther. Et combien que de cecy s'ensuyuoit la totale ruine de l'Allemagne, neantmoins ilz estoient si bien aheurtez en ceste opiniastrété, qu'ilz aymoient mieux voir leur patrie & l'Empire ruiné, que de s'accorder avec l'Empereur & les Princes Catholiques, qui les valloient bien & en nombre & en autorité. Cecy estoit fort desplaisant à ceux qui preuoioient l'entiere ruine de l'Allemagne & de l'Eglise, (si Dieu n'vloit de sa toute-puissance) mais neantmoins il falloit piller patience, & à par-soy admirer le caché & iuste iugement de Dieu, par l'ire duquel estoit aduenue, qu'on faisoit plus de cas de l'esuété cerueau d'un apostat, que de la sentence & autorité de toute l'Eglise. Ayant donc esté disputé longuement entre les Princes, Theologiens, & iurifconsultes deputez des deux parties, l'Electeur de Saxe ne pouvant plus attendre demanda son congé à l'Empereur, & s'en alla avec ses gens. Et voila comment l'assemblée se rompit, sans nul fruit de tout ce qu'on y auoit traité, au grand regret de l'Empereur & des Princes. Cependant Luther feit imprimer plusieurs petitz liures esquelz il blasmoit l'Empereur: & iceux se vendoient publiquement au logis de l'Electeur de Saxe à Ausbourg. Entr'iceux estoit l'epistre au Cardinal de Maience, en laquelle il expose le Psalme second, pourquoy les peuples ont fremy &c. comme si les Princes se fussent assemblez à Ausbourg en intention de combattre l'Eglise & l'Euangile. Plus y auoit un liure intitulé, Aduertissement aux Ecclesiastiques congregez à Ausbourg à la iournée Imperiale: auquel liure il recommande si fort sa doctrine, & reprend si aigrement les Euesques & les ceremonies de l'Eglise, qu'il est impossible d'escrire chose plus propre à exciter sedition. Et pour allicher d'auantage les Euesques à son opinion, il se vante de les auoir affranchis du ioug des Papes & des importunités des moy-

*L'Electeur
de Saxe
s'en va.*

*Liures de
Luther
fort sedi-
tieux.*

nes. Je confesse qu'il auoit ia tant fait, que plusieurs hay-
soient merueilleusement le Pape & toutes les ceremonies
& decrets de l'Eglise: mais se glorifier d'un tel forfait, & par
telle meschanceté desirer honneur & loüange, cela certes
me semble digne d'estre tres-bien puny, & non refuté par
escriit. Au mesme liure il dit mille maux de la Satisfaction,
troiesieme partie de Penitence, disant que c'est le vray esgout
d'enfer, & que ceste tant abominable doctrine ne sera onc-
ques remise aux Euesques, & mille autres blasphemies, que les
esprits bien nourris ne scauroient iamais lire sans horreur, veu
que la doctrine de la Satisfaction est celle mesme, qui nous
est enseignée par l'Escripture. Or aduint fort commodement,
que lors que des deux costez furent deputez sept homes pour
moyenner quelque accord, comme vous auez déia ouy, &
eux estans tumbez sur le douziesme article de la Confession
d'Ausbourg, où estoit parlé de la Satisfaction, des le premier
soir fut donnée ceste matiere à decider entre Coclée & Me-
lancthon. Au moyen dequoy le lendemain matin Coclée va
produire vn passage de Luther extrait du *Sepriceps*, liure que
Luther auoit composé contre les Indulgences pour confir-
mation de ses 41. articles: le quel passage estoit tel. Nostre me-
re l'Eglise voulant deuancer la main & ire de Dieu, chastie ses
enfans par quelques satisfactions, à fin qu'ils ne soient punis
par les fleaux de Dieu: comme iadis les Niniuites deuancerēt
le iugement de Dieu par leurs œuures. Ceste pêne, dit-il, est
arbitraire; non pas totalement, comme ils veulent, mais tou-
tesfois necessaire. Car les pechez sont punis ou par nous, ou
par les hommes, ou par Dieu: ce qu'ils veulent abolir par les
indulgences, au lieu que s'ils estoient bons pasteurs ils leur
enjoindroient des pénes, & à l'exemple de l'Eglise deuance-
roient Dieu, comme fait Moysé, en tuant les enfans d'Israël
qui auoient adoré le veau d'or: mais le meilleur est que nous
mesmes nous punissions.

Luther dit
mal de la
Satisfa-
ction.

Luther se
coupe la
gorge de
son cou-
steau.

ECKIVS ayant recité ces parolles en vn bordereau, les
Lutheriens commencerent à rougir, de maniere que Melan-
cthon, qui mouroit de honte, dist: Je scay bien que Luther a

Les Luthe-
riens men-
rēt de hôte

escriit cela: & comme il n'alleguoit autre chose, le Duc Iehan Federic adiousta, peult-estre que Luther a escriit cela il y a plus de dix ans. Auquel les Catholiques respōdirent: que s'enfuyt-il par cela? ne nous suffist-il pas de monstrier qu'il a esté en diuerse opinion? Tellement que Brence & Sneppe n'ayās que repliquer dirent pour le dernier mot, qu'ils n'estoient pas là venuz pour soustenir les escripts de Luther, mais seulemēt pour defendre leur Confession. Et voyla l'arrest donné contre Luther par ses disciples mesmes, qui eussent beaucoup mieux fait de le quitter avec toutes ses folles opinions, (changées en mille façons selō que sa phantasie luy dictoit, & pieça condamnées par l'arrest definitif de l'Eglise) que de se monstrier mauuais disciples d'un, qui presque estoit estimé prophete & Apostre. Car ceux qui ont suyui vn tel & si monstrueux heretique, n'auront que respondre au grand iour du iugemēt, auquel ils seront condamnez pour auoir esté tant temeraires.

*Luther tra-
duist mal
le point de
la iustifica-
tio, par pu-
re malice.*

CESTE mesme année quelque amy de Luther luy alla demander, pourquoy en traduisant le troisieme chappitre de l'epistre aux Romains il auoit mis, que l'homme est iustificié par la seule foy, veu que cela n'estoit contenu au texte, & qu'en ce faisant il occasionnoit les Papistes à calōnier sa version. Alors il respondit d'un visage furieux & rebarbatif, que volontiers il se fust aydé des Papistes en sa version, si eust estimé, qu'eux estans congregez tous ensemble ils eussent peu bien traduire vn seul passage de toute l'escriture sainte, en son Aleman. Et vn peu apres il adiousta pour toute resolution: si ton Papiste se veult tant arrester sur le mot de seule, responds luy hardiment, nostre maistre Martin Luther veult qu'il y ait ainsi, & dit qu'un Papiste & un asne n'est qu'un, il le veult ainsi, il n'a autre raison de cela que son vouloir. Car il ne veult pas estre disciple des Papistes, ains leur maistre & leur iuge. Voyla ce que luy respondit Luther, estant tumbé en phrenesie: & ceste seule responce deuroit suffire pour semondre les hommes, à ne suyure point vn tel babillard & esuenté. Si les Catholiques escriuoient de telle façon, voire mesmes si les Papes s'attribuoient autāt, ya-il espeece d'iniure que les heretiques ne dis-
sent

*Monstruen
ses parolles
de Luther.*

sent à l'encontre d'eux? Mais ores que Luther l'a dict, c'est le pur Euangile, la pure parolle de Dieu.

APRES la Confession des Lutheriens, fut présentée à *La Confession des villes Zuingliennes.* l'Empereur la Confession de quatre villes, & icelle recitée devant tous les Estatz de l'Empire: & estoient les villes de Strasbourg, de Constance, de Memming & de Lindaue, lesquelles suyuoient l'heresie de Zuingle. L'Empereur la donna pour refuter aux mesmes Theologiens, qui auoient refuté celle des Lutheriens: & fut leur refutation leuë deuant tous les Estatz de l'Empire. L'Empereur tascha fort à leur oster leur opiniastrété, & à les réunir à l'Eglise: mais ilz demurerent tousiours en leur opinion, ne voulans s'accorder ny avec les Catholiques ny avec les Lutheriens, pensans auoir plus clereimēt cognéu les saintes escritures, que n'auoient faict tous autres hommes, qui qu'ilz fussent. Or en ce temps-là messieurs de Strasbourg suyuoient le Zuinglianisme, tant hay de Luther: *Ceux de Strasbourg plus legers que le vñ.* mais ayant Bucer vn peu apres incliné à l'opinion de Luther, les choses ont esté tellement changées, que les ministres prechans auourd'huy à Strasbourg defendent opiniastrément l'opinion de Luther quand à la Cene, reietans Zuingliens & Calvinistes, quelques braues qu'ilz soient. Parquoy il faut necessairement, que ou ceux qui par auant estoient Zuingliens en ceste ville soient damnez, ou ceux qui pour le iourd'huy sont Lutheriens. Et ce sont les labyrinthes, où tombent sans y penser tous ceux qui se foruoient du vray chemin de l'Eglise.

CESTE année le Tybre se desborda si fort à Rome à *Inondatiō d'eaux à Rome, & au pais de Flandres.* cause des pluyes perpetuelles, que l'eau estoit haute d'vne lāce au champ de Flora, de maniere que plusieurs maisons furent ruinées, & ez lieux circonuoyins moururent quelque douze mille hommes. Ceste calamité aduint le 8. iour d'Octobre, & dura 24. heures, combien qu'aucuns affermēt, que ceste inondation dura l'espace de quelques iours. Quelque peu apres la mer se desborda pareillement au pais de Flandres, Zelande, Hollande, & en celle contrée de France qui est voy sine aux prouinces sus-nommées: partie pour ce que la mer

auoit miné & rompu les digues ou chaussées qui empeschent l'inondation de la mer: partie aussi pource que l'eau auoit outre-passé la hauteur des-dictes chaussées de trois ou quatre piedz. Par ceste inondation moururent infinis hommes, & du bestail innombrable, sans faire mention du dommage des edifices, voire mesmes des villes, qui fut inestimable.

Vn peu apres, à sçauoir le premier iour de Decembre, alla de vie à trespas en la ville de Malignes Madame Marguerite, fille de l'Empereur Maximilian, & Gouvernante de Flandres.

*Conclusion
de la iour-
née d'Aus-
bourg.*

PENDANT que la Diete d'Ausbourg n'estoit encore rompüe, comme les Lutheriens estoient sur leur departement, l'Empereur leur feit proposer publiquement certains articles, lesquelz toutesfois ilz ne voulurent receuoir: & partant ilz s'en allerent sans aucune concorde. Quand à l'Empereur, sur la fin de la iournée il arresta avec tous les Princes Catholiques, de demeurer constamment en celle religion qu'il auoit receüe de ses predecesseurs, à laquelle sentence chacun s'accorda le 19. iour de Nouembre. Ce qu'estant fait, chacun deslogea: l'Empereur & son frere Ferdinand prindrent la volte de Coloine, & les autres se retirerent ailleurs.

*Ligue en-
tre le Lant-
graue &
les Zuingliens.*

POURAVANT que l'Empereur portoit fort impatiemment, que tant de nouuelletez se feissent touchant la religion, desquelles les Lutheriens & Zuingliens estoient les principaux auteurs: le Lantgraue aduisa de plus pres à ses affaires, & feit ligue pour six ans avec ceux de Strasbourg, Zurich & Basle, qui neantmoins estoient Zuingliens: & portoit ceste ligue, qu'ilz se deffendroient tous vnanimement, aduenant que l'Empereur ou les Catholiques les voulussent guerroyer. Ceux de Constance & les autres de Suisse estoient pieça confederrez ensemble, pour mesme occasion que ie vien de dire: & appelloient ceste ligue entr'eux la sainte cité. Mais personne n'aura desir d'estre citoyen de telle cité, sinon celuy qui voudra estre priué de la iouissance de la cité celeste.

*Melanchton
enfrainct
ce qui a-
uoit esté
ordonné.*

NOUS auons déia dict cy dessus, que les predicans Lutheriens & Zuingliens s'estoient assemblez à Marpurg: où auoit esté ordonné, qu'on n'escriroit plus l'un contre l'autre, afin que

les Catholiques n'eussent occasiō de les blasmer, & de se mocquer de leurs guerres. Nonobstant cela Melancthon feit imprimer ceste année quelques sentēces des anciens peres touchant la Cene, pour monstrier que Luther disoit mieux que Zuingle quand à ceste matiere. Dequoy estant fasché Oecolampade, qui estoit bon Sacramentaire, feit imprimer vn Dialogue, auquel il monstroie que les Anciēz tant Grecz que Latins auoient esté de son opinion quand au faict de l'Eucharistie: adioustant encore, que Melancthon armoit les enfans contre la mere, c'est à dire ces bons Anciēz contre la sentēce de l'Eglise. Ainsi donc ilz ne se pouuoient si bien contenir, qu'ilz n'enfraignissent ce qui auoit esté entr'eux arresté à Marpurg. Mais à la verité ny Melancthon ny Oecolampade ne citoient à la bonne foy les sentences des Anciēz, ains leur faisoient vn nez de cire, selon que leur folle phantasie leur commandoit, veu que c'est chose trop certaine, que les Peres anciens n'escriuirent iamais chose repugnante à la sentence de l'Eglise, quand à ce qui concerne le faict du S. Sacrement. Toutes fois il estoit fort facile à ces finetiz de persuader à vne indocte populace, que les Peres anciens estoient pour eux, sçachans bien que le peuple n'auoit leu, ny ne pouuoit lire ny entendre les liures des Anciēz. Encor est-il plus esmerueillable, comment ces hommes veulent citer les Peres, veu qu'ilz les ont en si grand mespris quād bon leur semble. Mais cela donne grād lustre à leur fauce opinion, & pense-on qu'ilz ayent beaucoup leu, lors qu'ilz alleguent ainsi les anciens Peres, qui semblent s'accorder avec eux. Que doncques ilz s'en aillent d'icy avec leurs calomnies contre les Anciēz, lesquels silz estoient encore pleins de vie, sans point de faute ilz employeroient toutes les forces de leur doctrine & eloquēce, pour les cōuaincre.

ENVIRON ce tēps Carolstade, qui auoit laissé Saxoigne pour venir habiter en Suisse, fut faict Diacre de l'Eglise de Zurich, ayant premierement esté Archidiacre de Vuittemberg, & partant descendāt (comme lon diāt) des cheuaux aux asnes: & fut grandement irrité Luther de ce faict. Or apres que Zuingle fut mort en la bataille, comme nous dirons cy

apres, il s'en alla à Basle, où il finit sa miserable vie aussi miserablement, au ministration de l'Eglise Zuinglienne. Les Lutheriens escriuent, qu'il excita quelques troubles à Basle, & qu'il mourut mal-heureusement, mais les Zuingliens semblent le dissimuler, pour autant que, bien qu'ilz ne reçussent entiere-ment l'opinion de Carolstade touchant la Cene, si l'aimoient ilz beaucoup à cause qu'il estoit grand aduersaire de Luther.

*La ligue
de Smal-
calde entre
les Prote-
stants.*

APRES la journée d'Ausbourg l'Empereur manda à l'Electeur de Saxe qu'il veint à Coloigne, & fait le semblable l'Electeur de Maience, estant cela du deu de son office, que lors qu'il faut créer vn Roy ou Empereur des Romains, il les cōgrege & assemble. Le Saxon ne trouua pas cela bon, & se parforça de monstrier à l'Empereur par son filz Iehan Federic & quelques autres, que celuy de Maience n'auoit pas fait son deuoir en citant les Electeurs: & de ce pas pria le Lantgraue & autres Princes & citez Protestantes, de se trouuer le vingt-deuxiesme de Decembre à Smalcalde. Estans doncques là congregez, fut faicte vne grand' ligue, de laquelle quelques Seigneurs & citez voulurent estre, & les autres differoient de s'y mettre iusqu'à vn autre temps. Ce fut doncq' de ce lieu que la ligue de Smalcalde fut nommée, à laquelle plusieurs Potentatz & citez se conioignirent par succession de temps: ce que toutesfois estoit au preiudice de l'Empereur & des Catholiques, contre lesquels ilz sembloient coniurer, comme l'occurrence des choses nous fait scauoir, ainsi que par-cy-apres nous traicterons. Or disoient-ilz tousiours, & faisoient courir le bruiet, qu'ilz ne s'estoient point ainsi assemblez pour aggresser aucun, ains seulement pour se defendre. Et ce fut lors que le vaillant Luther, qui par-auant auoit enseigné, qu'il ne falloir point resister aux Turcs, ennemys diametraux des Chrestiens, monstra par escript, & consentit, qu'à bon droit on pouuoit prendre les armes contre l'Empereur & les Catholiques. Si escriuirent les Protestans, congregez à Smalcalde, lettres à l'Empereur, par lesquelles ilz taschoient grandement de se destourner de faire son frere Ferdinand Roy des Romains. Et pour luy persuader cela, alleguent force raisons,

*Luther e-
stime plus
meschant
l'Empe-
reur que le
Turc.*

mais si bien, qu'icelles cōsidérées ont fait, que le bon Prince Ferdinand fut en fin déclaré Roy des Romains, comme nous dirons cy apres.

L'AN 1531. la veille de la feste des Roys, p^{ar} la voix des Prin- ^{Ferdinand}
ces Electeurs fut Ferdinand créé Roy des Romains, en la ^{créé Roy}
grand'Eglise de Coloigne, en laquelle sont les corps sainctz ^{des Ro-}
des bien-heureux Roys qui vindrent adorer nostre Seigneur: ^{mainz.}
& fut coroné à Aix la chapelle, l'onzieme iour de Ianuier. Le
Saxon protesta par son filz Federic, que ceste election n'e-
stoit vallable, & eut quelques autres Seigneurs, & principal-
lement des Lutheriens, qui luy feirent espaule. Toutesfois
l'Empereur, qui seigneurioit en maintes terres, & ne pouuoit
pas tousiours demeurer en Allemaigne, estima que ce seroit
chose fort vtile d'auoir en son lieu quelcun pour l'Empire, le-
quel commanderoit en son absence.

Le mois de Ianuier suruint en Portugal vn horrible & ^{Grand}
espouuentable mouuement de terre, de maniere que plusi- ^{mouuemēt}
eurs hommes furent accablez souz les ruines de ce qui tom- ^{de terre en}
boit par ceste violence, & nommémēt à Lysbone, où la perte ^{Portugal.}
& dommage fut incomparable. Aussi aduint que quelques
vaisseaux furent engloutys aux gouffres, que la mer, pleine
d'orages, faisoit: & d'autant que la terre s'esbrâloit si fort, peu
d'hommes y auoit en tout le Royaume, qui demeurassent à
leurs maisons. Le Roy & la Roynie dresserent des têtes en vn
lieu fort ouuert hors la ville, & à leur imitation plusieurs des-
logerent de leurs maisons, pour habiter aux champs souz les
tentes: combien que ce-nonobstant ilz n'auoient pas faute de
peur, craignans d'estre deuorez & abyfmez par quelque fou-
daine ouuerture de la terre. Ce mouuement de terre dura hu-
ict iours, mais par fois seulement. Le bruiet courut qu'à Lyf-
bone estoient tombées quinze cens belles maisons, & toutes
les Eglises de fond en comble. Encores à ce mouuement suc-
ceda vne grand' peste.

A v mois de Feurier de l'année presente, les Protestans es ^{Lettres}
criurent aux Roys de France & d'Angleterre, & par leurs let- ^{des Prose-}
tres taschoient fort de faire trouuer leur cause bonne. Là ilz ^{sans aux}
^{Royz.}

parlent des vices du Clergé, & des indulgences, & partant alleguent Gerson, qui de son temps blasmoit les Ecclesiastiques fort aigremēt. Mais Gerson a si biē repris les meurs du Clergé, que pour cela il n'a pas fait banque-route à l'Eglise, & n'a point allumé le feu de sedition. Encore faut veoir qu'ilz citēt volontiers Gerson pour cest affaire: mais ils se donnent bien garde de reciter, que le sus-dict Gerson a escrit merueilleusement bien contre ceux qui soustiennent, que necessairement les lays doiuent communier souz les deux especes, ce que defendent les partiaux de nostre temps, lesquelz Gerson appelle Heretiques tout à plat. Dont on voit biē q̄ les Princes Luthériens n'escriviēt point ces lettres, ains les predicās dogmatizās, & pleust à Dieu q̄ les Princes eussent apperceu leur piperie.

*La ligue
des Prote-
stants.*

LE 29. iour du moys de Mars fut faite vne autre congregation des Protestās à Smalcalde, pour deliberer les moyes de se defendre, en cas qu'ilz fussent assaillys par les ennemis, à sçauoir les Catholiques. Or auoiēt ilz sollicité par lettres Federic Roy de Dannemark, & les citez de Saxe & autres situées pres de la mer, à se mettre de ceste ligue: mais le Danoys refusa de ce faire, entāt qu'il estoit Roy. Henry de Megelbourg, Bernin Duc de Pomeran, aussi ceux de Lubec & Lunebourg & de q̄lques autres citez ne voulurent estre compris en ceste ligue & confederation. Quand à Luther, il l'approuua, & dict que la ligue pouuoit estre faite, aduenant que l'Empereur, ou autre pour sa maiesté voulust faire guerre aux Protestās. Ce Protée de Luther auoit escrit au parauant tout autrement; ce que Sleidā n'a pas osé nyer: mais il dict en ce lieu, qu'il fut admōnesté par les Iuriscōsultes, q̄ quelque fois il estoit loysible de resister, & que le cas estoit presentemēt venu, auquel les loix permettent cela, & qu'à ceste cause Luther confessa tout honnestement, qu'il n'auoit pas bien entendu cela iusqu'à lors, & par

*Luther
vray Pro-
tée.*

*Inconstan-
ce ocuiaire
de Sleidā,
& de Lu-
ther.*

tant il approuua la ligue. Ce Sacrametaire de Sleidan se peine beaucoup de defēdre en tous poinctz l'opiniō de Luther, sinō en ce qu'il est different d'auec Zuingle touchāt la Cene: mais Sleidan se porte si finement & cauteleusement en cest affaire, que le lecteur simple & non ruzé à peine s'en pourra aduiser.

Toutesfois il ne peult si bien faire, que pendant qu'il se par-
force de defendre Luther cōtredisant à soy mesme, il ne tom-
be en vn deshōneur bien grand: comme il luy est aduenu en
cest endroiçt, disant que Luther auoit au-parauant enseigné
qu'il ne faut point resister au Magistrat, & que neantmoins
ayant apprins le contraire des Iuriconsultes, il enseigna tout
l'opposite, estant cela puisé des loix politiques. O Sleidan, où
en es tu? les loix politiques ont-elles déia tant d'autorité en-
uers Luther & toy & tes semblables, en vne si grande chose,
consideré que vous auez tous apprins de Luther, qu'il ne faut
rien receuoir qui ne soit mot à mot cōtenu és escritures sain-
ctes? Tu n'ignorois point que Luther auoit escrit & presché
choses repugnâtes, & partât desireux de couurir cela de quel-
que masque, tu confesses qu'il a apprins des loix politiques ce
qui estoit licite. Et n'as tu point de hōte de toy & de Luther?
Est-ce icy que les loix politiques ont place, encore que Lu-
ther reiette tout ce qui n'est exprimé es lettres saintes? Com-
bien vous est-il deshonneſte de suyure vn Docteur, qui n'a
point vergongne de finalement apprendre d'un Iuriconsul-
te, s'il est loysible de resister au Magistrat: veu que long temps
au-parauant il auoit escrit qu'il estoit certain, que sa doctrine
n'estoit point sienne, ains de Christ? Puis doncq' qu'au-para-
uant il auoit enseigné, comme tu es tesmoing, qu'il ne faut pas
resister au Magistrat, & ceste doctrine n'estoit pas de luy, ains
de Christ: de quel front, de quel esprit a-il peu enseigner le cō-
traire, ou vous autres auez peu croire à luy se contredisant
ainsi? Vne arrogance aneuglée & folle temerité se precipite-
elle si auant? Vrayemēt il valloit beaucoup mieux ouurir syn-
cerement la verité aux Princes, à sçauoir qu'ils n'estoient au-
cunement occasionnez à faire ceste alliance, consideré que
l'Empereur ne leur requeroit rien qui ne fust iuste, leur de-
mandant seulement qu'ils eussent à demeurer quant & luy en
la religion Catholique, d'où dependoit tout le salut de l'Alle-
magne perduë par cest altercas de faulce religion. Les rusti-
ques auoient par-auant fait vne telle ligue contre les Sei-
gneurs, & pensoient fort bien faire, mais les Seigneurs leur

*L'auteur
parle bra-
uement à
Sleidan.*

monstrerent qu'ils estoient trop escruelez.

Deux li-
ures de Lu-
ther.

LUTHER ayant entédu qu'en la dernière journée d'Ausbourg l'Empereur & tous les Estats Catholiques de l'Empire auoient ordonné inuiolablement, qu'il falloit perseuerer en l'ancienne religion, & ne rien innouer deuant la definition du Concile: se voyant aussi fauorizé & supporté par ceux qui estoient renduz à la ligue de Smalcalde, meit ceste année en lumière deux liures en Aleman: l'un estoit la glosse sur le decret putatif de l'Empereur, & l'autre fut vn aduertissement à ses bien-amez les Alemans. En iceux deux il ne fait autre chose que donner l'alarme à sa maniere accoustumée, & eschauffer chacun à sedition: & toutesfois par vne meschante dissimulation il proteste, qu'il ne souhaitte rien moins. Encore ne se contente-il pas de picquer impudemment le Pape & tous les Prelats, mais aussi appelle l'Empereur & les Princes Catholiques trahystres, belistres, & meschans. En la glosse il veut persuader que l'ordonnance d'Ausbourg est controuuée, & que à faulx on l'attribue à l'Empereur: mais plusieurs euidens argumens refutoient facilement l'impudence de cest esuieté. Car, à fin d'omettre toutes autres choses, ce decret fut scellé par si grand nombre de Princes Ecclesiastiques & seculiers, que si leurs seaulx eussent esté mis ensemblement dans la bouche de Luther, ie m'assure que le galand eust bien tost rendu l'ame à celuy qui la possédoit. Mais il n'y auoit rien si incredible, que ce prodigieux homme n'osast escrire. A ce decret auoient subzigné, soit par eux-mesmes soit par leurs deputes, l'Empereur & cinq Electeurs, 30. Potentats Ecclesiastiques, 23. Seculiers, 22. Abbez, 32. Comtes & Barons, & 39. citez libres. Telle fut donc l'ordonnance que Luther range si rudement, appellât l'Eglise Catholique putain, & disant mille sottises de la communion souz les deux especes: bien que es Assertions en l'article 16. il soustient, que ny l'une ny l'autre ne sont necessaires, ains qu'en cest endroit la foy est seulement necessaire. D'auantage estant enyuré de certaine rage, il dit qu'il ne faut ny croire ny obeir à l'Eglise, si elle dit ou institue quelque chose oultre la parolle de Christ: & n'apperçoit point que

Impieté
de Luther
contre l'E-
glise.

que Iesus-christ a dict, si il n'oit l'Eglise, qu'il te soit comme vn ethnique & publicain: & que l'Apostre afferme, que l'Eglise est la colomne & firmament de verité, & partant ne peut errer. Et tref-bien a escrit ce saint & ancien martyr Irenée au ^{Passage d'Irenée, de l'Eglise} 40. chap. de son 3. liure, disant ainsi: où est l'Eglise, là aussi est le S. esprit, & où le S. esprit est, là est l'Eglise & toute grace, & le S. esprit est verité. Parquoy ceux qui ne sont participans d'iceluy, ne sont point nourrys à la vie par les mammelles de la mere, & ne reçoient point la fontaine tref-claire qui proced de du corps de Iesus-Christ, ains ilz fouissent pour eux de vieux lacs en fosses terrestres, & boient vne eau pourrie dans la bouë, fuyans la foy de l'Eglise afin de n'estre point changez. Voyla ce que dict le S. martyr. Au reste, comment se peut faire que l'Eglise ordonne quelque chose outre la parolle de Dieu, veu que elle a l'esprit Saint, demeurant avec elle eternellement, & l'induyant à toute verité? Certes ç'a esté la cause pour laquelle Luther souhaitant d'estre seul entendu, a desnüé l'Eglise de toute son autorité, voyât qu'icelle enseignoit & ordonnoit tout le contraire de sa fauce doctrine. Ayant ce fait, il vomyst plusieurs choses fort contumelieusement contre la Messe & les ceremonies, & ne craint nullement de comparer les Princes Catholiques aux pourceaux: Dont on voit à l'œil, combien est faux ce que les Lutheriens attestent en leur confession d'Ausbourg, à sçauoir qu'ilz reçoient la Messe & presque toutes les ceremonies vñtées, veu que Luther en ce sien liuret se gaudist du canon de la Messe & des ceremonies. Or apres estant venu à ce passage de l'ordonnance, auquel il est contenu, que par-apres personne n'enseigne que la seule foy sans charité & bonnes œures nous iustifie, c'est là où il se plonge és conuices, & dict les motz suyans, aussi arrogans & insolens que le grand Lucifer en sçauoit proferer. Le Martin ^{Arrogance intolérable de Luther.} Luther Docteur, indigne Euangeliste de nostre Seigneur Iesus Christ, afferme, que cest article (la seule foy iustifie deuant Dieu sans nul œure) doit estre reçu pour ferme & constant par l'Empereur de Rome, l'Empereur de Turquie, de Tartarie, des Perles: par le Pape, les Cardinaulx, Euesques, prestres,

moynes, nonnains: par Roys, Princes, Seigneurs, & tout le monde avec ses demons, & auront le feu d'enfer sur leurs cheffz.

Contradiction manifeste de Luther. Tel est l'instinct de moy Docteur Luther, du Saint Esprit, & le vray & saint Euāgile. Et toutesfois le mesme Luther escrit en son liure de la Visitation, que sans penitence il n'y a nulle remission de pechez, & que mesmes on ne scauroit entendre la remission des pechez sans penitēce. Or où il n'y a point remission de pechez, certainement il n'y peut auoir iustificatiō.

Lequel est-ce donc des deux qui est du S. esprit, cestuy-cy, ou l'autre cy dessus mis? O bō Dieu: qui est-ce qui charmoit ainsi l'esprit des hommes de sorte qu'ilz n'ont doubté de commettre leurs ames à vn tel monstre, comme si ce fust esté vn Apostre & Euāgile de Iesuchrist? Quel prophete, ie vous prie, quel Apostre a oncques vŕé de mortz si prodigieux? Apres cela il produict certaine prognostication de Iehan Hus condamné pour heretique, & dict que ceste prediŕtion doit estre entendue de luy. Mais ces deux bons hommes, Hus & Luther, experimentent maintenant le guerdon de leur mesdisance, & quoy qu'ilz ayēt assailly l'Eglise de tous costez, si est-ce qu'ilz sont mortz, & l'Eglise vit encores, & viura iusqu' au iour du iugement. En l'autre liure intitulé, l'aduertissement, il est encore plus immodeste, mesdisant, & blasphemateur: mais ie ne veux

Les Catholiques respondent aux folies de Luther.

ennuyer d'auātage le lecteur de ses blasphemés. Les Catholiques luy respondirent tout ainsi qu'il appartenoit, mais pour autant qu'il auoit ia en main plusieurs Princes, & le peuple quand & quand, il ne fait aucun conte de toutes ces responses: & enflé d'une superbe insupportable, mesprisā tout tant qu'il y auoit de Princes & Magistratz, tāt Ecclesiastiques que seculiers, de maniere que iamais l'Empereur n'eust enduré vne si extreme meschāceté, si l'eust esté empesché à des guerres dangereuses. Iehan Coclée, homme fort docte & de bonne vie, & qui s'est employé fort affectueusement au seruice de l'Eglise Catholique, respōdit en vn petit liure Alemā à cest escrit de Luther, auquel entre autres choses il parle fort cōstammēt, comme il auoit ia fait plusieurs fois: se souzmettant à perdre la teste pour disputer avec lequel des Lutheriens on voudroit, deuant vn iuge, sur la doctrine & actes de Luther. Mais

ny alors ny oncques depuys ne voulurent les Lutheriens presenter homme, pour faire teste à Coclée, & venir avec luy en dispute legitiment. Car pourautant que Luther & tous ses coadiuteurs sont conuaincuz par leurs liures mesmes, d'estre & heretiques & seditieux, & contreuenir à tout droict tant humain que diuin, de bouche vous diriez qu'ilz sont bien asseurez & constans, mais ilz n'osent se renger au dicton de la loy, ne voulans ny ne pouuans souffrir vn iuge. Or estat la verité inuincible, elle peut facilement estre defendue, & nostre Seigneur assiste tousiours à ceux qui la soustiennent: & de-là est venu que plusieurs Catholiques ont présenté les mains à combattre pour la verité à l'encontre de ses ennemys de ce siecle, avec le peril de leur vie & deuât le Magistrat. Mais la meschanceté craintive, agitée des esguillons de mauuaise conscience, n'ose pas se ruer sur vn danger si certain, mais seulement se defend par escriptz enuers la populace, criant & vomissant mille blasphemés. Or me semble qu'entre tous les mensonges de Luther, il n'en y a point de plus pestilent & impudent, que celui qui est contenu au mesme aduertissemēt: à sçauoir que les Papistes sçauent fort bien, & que volontiers ilz confessent, que la doctrine de Luther est le vray & pur Euangile. Ce qu'il faisoit, afin que les Seigneurs & le peuple luy adioustassent foy plus volontiers, comme s'il eust dict vray. Certain homme lay de Dresde escriuit contre ces propos si superbes & insolens fort doctement, auquel Luther respondit encore plus felonément à sa maniere accoustumée, laquelle n'est Euangelique, ains purement Satanique. Le tiltre du liure est, Contre l'estaffier de Dresde, auquel entre autres choses est contenuë ceste-cy: il ne me chauld de ce dequoy ce galand se plaint, que dans mon liure on ne voit que les diables & plusieurs sortes de conuices estre posez. Aussi doit cela estre ma gloire, & mon honneur. Je veux estre estimé tel, & souhaite que désormais on dise de moy, que ie suys tout farcy de mesdisance, de conuices & opprobres à l'encontre des Papistes. Je fay estat de m'exercer cy après iusques au dernier iour de ma vie, par execrations & iniures contre ces pendartz, & n'orront

Les Lutheriens n'osent accepter la dispute.

Prodigeux mensonge de Luther.

Luther se iacte d'estre ennemy mortel des Papistes.

» iamaïs vne bonne & auantageuse parolle de ma part . Et par
 » ce moyen ie les veux tellement ietter hors des gonds de rai-
 » son, qu'eux-mesmes se meffacent . Voyla que dict ce pauvre
 miserable, agité de l'esprit de Satan . Qui a-il en ces parolles,
 qui ne soit planierement barbare, farouche, & plus-que dia-
 bolic? y a-il oncques eu vn homme de biẽ, qui ayt ainsi escrit?
 Veritablement Luther a continué de mesdire des Catholi-
 ques iusqu' à la fosse, bien que l'Apostre nous admoneste du
Rom. 12. contraire, disant, ne mesdisez point. Luther certainement a es-
 té digne, de tomber en vne si extreme folie & impieté, par
 vn iuste iugement de Dieu.

*De la Roy-
ne d'Hon-
grie.* ENVIRON ce temps Madame Marie, seur de l'Empe-
 reur, & iadis femme de Louys Roy d'Hongrie, (celuy qui es-
 tant deceu par le faux conseil des siens, osa donner le choc
 avec vne poignée de gens contre vne grosse & puissante ar-
 mée des Turcs, où il mourut miserablement) veint au país de
 Flandres, pour succeder au gouuernement de tout le país
 appartenant à l'Empereur en la basse Alemaigne, au lieu de
 Madame Marguerite Tante de l'Empereur, n'agueres dece-
 cedée.

*Assem-
blee à
Fräcfort.* LES Protestans s'assemblerēt derechef à Francfort, com-
 me il auoit esté accordé: & ce fut là que les deputez des villes
 monstrerent, que leur intention n'estoit pas de reprouuer l'e-
 lection du Roy Ferdinand. Mais si ledict Ferdinand attentoit
 quelque chose preiudiciable au faict de religion, que volon-
 tiers ilz employeroient & corps & biens pour s'opposer à tel
 effort, selon le cõuenu de Smalcalde. Les Princes rescriuent à
 l'Empereur & au Roy Ferdinand, que quand à eux ilz ne pou-
 uoient approuuer ceste election, comme estant contre la cou-
 stume & liberté du país. Et voyla comme les villes & les Sei-
 gneurs estoient discordans sur le faict de ceste election. Les
 mesmes villes taschoient fort de faire, que les Suisses se meis-
 sent de ceste ligue, mais le Saxon ne le voulut iamaïs permet-
 tre, alleguant qu'ilz n'estoient pas d'accord avec les Lutheri-
 ens au poinct de la Cene. Car il ne vouloit auoir aucune alli-
 ance ou accoinctance avecques ceux, qu'il scauoit bien estre

aduersaires de son Luther. Ce voyas l'Archeuesq de Mayēce ^{pour par-}
 & Louys Côte Palatin assignerēt le penultime iour du moys ^{ler d'ac-}
 d'Aoust, auquel seroient proposées plusieurs choses pour paci ^{cord.}
 fier tout cecy entre les Protestans. On se rendit à Smalcalde,
 où les Ambassadeurs des deux parties se trouuerent, mais on
 ne sceut rien arrester, à cause que les deputez des Protestans
 s'excusoient par trop. Or ce discord de volonte, signamment
 en la religion, estoit assez cogneu au grand Turc, qui s'en ve-
 noit en Allemagne avec vne puissance incroyable. Sembla-
 blement l'Empereur essaya tous moyens pour venir d'accord
 avec le Saxon, par ses moyenneurs les Comtes de Nansau &
 Nuenare: mais iceluy respondoit, que iusqu' au dernier souf-
 pir de sa vie il demeureroit en la religion, qu'il auoit professée
 à Ausbourg, & estoit cela estre bon Lutherien. A la mienne
 volonte que ce Prince se fust monstre aussi constant à main-
 tenir la religion Catholique.

EN cest an ceux de Zurich & de Berne Zuingliens, & de ^{Guerre en-}
 grand' autorité entre tous les Suysses, empescherent que vi- ^{tre les Su-}
 ures ne fussent portez aux Suysses qui demeurent es Cinq ^{isses Catho-}
 Cantons, à sçauoir de Lucerne, Vri, Zuitz, Vnderuald, & Zug, ^{liques &}
 pourautant que tous ceux-cy estoient grandz zelateurs de la ^{heretiques.}
 religion Catholique. Cela affligea & effroya merueilleuse-
 ment les cinq Cantons, de maniere qu'ilz furent contrainctz
 de denoncer la guerre à ceux de Zurich & de Berne. Et on
 voit par leurs lettres les causes fort legitimes & peremptoires
 pour les semōdre à se defendre par voye de faict, & se deuroit
 hontoyer Sleidan, lequel assure qu'ilz leuerent gendarme-
 rie souz main, à fin qu'il reuoque la cause de toute la guerre
 sur eux. Toutesfois ce n'est pas chose fort absurde en Sleidan,
 de narrer vn faict à la mauuaise foy. Ceste guerre doncques
 fut denoncée à ceux de Zurich & leurs alliez le quatriesme
 iour d'Octobre, & ainsi se preparerent des deux costez à bien
 chocquer. Ceux de Zurich estoient sans doute les plus fortz,
 si on regarde les forces humaines, mais les cinq Cantons a-
 uoient le droict de leur costé, & se fioient totalement à l'e-
 quité de leur cause.

L'ONZIEME iour d'Octobre ceux de Zurich assaillent aupres le monastere de la Chapelle ceux de Zuitz, Zug & Vnderwald: les Catholiques font semblant de vouloir fuir, afin d'amener l'ennemy iusqu'au lieu où ilz auoient preparé embusches. Et ainsi sortans desdictes embusches se ruerent impetueusement sur les heretiques, lesquelz ilz meirēt à vau de routte. Brief quinze cens du costé de ceux de Zurich demeurèrent estendus sur le champ, & entr'iceux fut le boute-feu & chef de toute la sedition Zuingle, lequel fut trouué estāt aux aboys de la mort: & estant interrogé par les Catholiques s'il ne vouloit pas se confesser, feit le mort & ne respondit rien. Or ceux icy ne cognoissoient point le galland. Tellement que quelque autre estant là suruenu, voyant ce mal-heureux luy donna vn coup propre pour luy auancer ses iours, & l'emmena aux Chefz de l'armée, lesquelz commanderent par arrest public qu'il fust brulé comme conuaincu d'heresie & rebellion. Quelques autres des plus segnalez apostatz feirent compagnie à Zuingle en ceste tuerie, & dit-on que ceux de Zurich enleuerent les cendres de Zuingle, & les porterent en leur ville. Et pourquoy non? Veritablement il conuenoit bien que ceux qui ne portent aucun honneur ou reuerence aux cendres & reliques des saintz, gardassent chez eux les cendres d'un heretique damné. Or Oecolampade, moyne Apostat, fut si fasché de la mort de son compaignon, que bien peu apres vne femme, laquelle il auoit accointée incestueusement, le trouua royde mort dans le liēt. Car ceste sorte de moynes reniez est si froide, qu'il y a danger qu'ilz ne trespasent de froid, filz n'ont pour compaignes quelques belles filles pour les solacier & eschauffer: par les embrasemens desquelles ilz conçoient non l'ardeur & charité de Iesus-christ, ains celle flamme que l'ennemy de nature humaine a enuoyée sur la terre. Or ceux de Zurich ayans reçu vn tel eschec, ne demurerent gueres qu'ilz meirent sus de rechef vne plus grande armée que deuant, & fallians des Bernois meirent aux champs iusqu'à trente mille combatars. Les Catholiques se presentent à eux, & n'estoyent de

*Mort de
Zuingle
en la ba-
taille.*

*Mort
d'Oecolā-
pade fort
terrible.*

nombre fait que dix-huict mille. On donne le choc pour la seconde fois, les Zuingliens sont desconfis par les Catholiques, ils fuyent tous, la riuere en engloutist cinq cens, & sept cens furent occis en champ de bataille, laquelle fut donnée le 17. iour d'Octobre. Les Bernois & habitans de Zurich penserent mourir de despit, voyans qu'un si petit nombre de gens auoit mis en route & desarroy vn si grand nombre. Au moyen dequoy ils appellerent à leur secours ceux de Basle, de Schaffuse, de Sainct Gal & Mulhuse, deliberez de courir sus vne nuit aux Catholiques, comme ils n'y penseroient point. Les cinq Cantons de ce aduertys, commanderent que tous leurs gens portassent vne chemise blanche sur leurs har-noys, à fin que par cela on les peust cognoistre la nuit entre les ennemis. Venuz doncques qu'ils furent aux mains, le choc fut fort impetueux & royde, de maniere que les Catholiques ayans perdu beaucoup de leurs gens commençoient à estre fort debilitez, iusqu'à ce que Dieu, qui ne laisse iamais les gens de bien en telle peine, les encouragea si bien, que les ennemis furent contraincts de monstrier le dos, & demurerent plusieurs de leurs gens pour les gages. Cela fut le 24. d'Octobre. Aucuns escriuent qu'on liura la quatriesme bataille le dernier iour d'Octobre, & qu'en icelle plusieurs de ceux de Zurich rendirent l'ame. Il y a en Suyse vne Eglise fort renommée, & venerable à cause de plusieurs miracles, dediée à la vierge Marie, & vulgairement appellée l'hermitage. Or les cinq Cantons auoient arresté, qu'une procession generale seroit faite à icelle Eglise, par tous les vieillards, enfans, femmes, filles, & tous hommes inhabiles à porter armes. Les Zuingliens cuyderent creuer de despit sçachans ceste deliberation, & de ce pas ar-resterent entr'eux d'abbatre ceste Eglise, & de reduire en cendres l'image de la vierge Marie. Mais leur effort si felon & barbare, & si fort esloigné de la pieté Chrestienne leur cousta bien cher, sans que pour cela ils ayent eu l'accomplissement de leur desir. Or puis qu'en cest affaire les Zuingliens estoient beaucoup plus forts & d'armes & de gens, que les Catholiques, Dieu monstra assez euidentement de quel costé il estoit,

Secōde bataille.

Troisieme bataille, oū les heretiques perdent tous iours.

attendu les insignes victoires obtenues par les Catholiques sur les heretiques. Car les Catholiques auoyent en leur camp des prestres, ausquels ils cōfessoient leurs pechez, & asistoient deuotieusement à la Messe, durant laquelle ils ne cessoient d'implorer l'aide de Dieu, pour monstrer qu'ils auoyent mis leur espoir non aux armes, ains en Dieu seulement. Aussi auoyent ils choisi dix-huict femmes veufues, desquelles les six estoient les vnes apres les autres incessammēt en celle Eglise de nostre-dame de l'hermitage, prians Dieu pour la conseruation de leur armée. Finalement la paix fut faicte entr'eux avec quelques conditions. Au demeurant, tant que le monde sera, ces inuincibles fauteurs de la religion Catholique serōt louez pour auoir monstré vne constance si grande, veu que pour le soustien d'icelle religion ils n'ont fait aucune difficulté, de se ietter quāt & tous leurs biens au danger euidēt & oculaire, n'estans point effrayez ny de la multitude ny de la puissance des ennemis : sçachans bien qu'ils prenoient les armes pour vne querele iuste, laquelle ordinairement est bien-heurée de Dieu tout-puissant.

*Louange
d'eux.*

*De Bullin
ger, succes-
seur de Zu-
ingle.* EN la ville de Zurich succeda Henry Bullinger à Zuingle, lequel pour monstrer son opiniastrēt, ne doura vn long temps de defendre tout seul l'heresie Zuinglienne par ses liures, pēdant que les autres ne sonnoyēt mot de crainte qu'ils auoient, & peu à peu se laissoiēt couler en l'heresie de Luther. Car ceste dessaiete des Zuingliens par nous mentionnée, fut cause que plusieurs Suisses abandonnerēt le Zuinglianisme, & estoient les affaires de ceux de Zurich venuës en grande decadence. Quelque Zuinglien a esté si meschant, qu'il appelle ces deux bōs champions n'agueres morts tout soudain, comme nous auons dit, (à sçauoir Zuingle & Oecolampade) deux excellentes lumieres de l'Eglise, lesquels neantmoins ont esté reputez heretiques, non seulemēt par l'Eglise Catholique, mais bien encore par Luther. Et quand à ce que ceux qui ont esté diuertis & deçeus par iceux les ont en si grand' estime, cela leur augmente le supplice qu'ils souffrent en enfer, & vaudroit beaucoup mieux n'en dire iamais vn seul mot, que

que de les louer tant peu que ce soit. Certainement c'est chose prodigieuse, que ceux soient haut-louez comme lumieres de l'Eglise, qui ont apporté vne calamité inestimable à l'estat vniuersel des Chrestiens. Oecolampade fut inhumé à Basle au circuit de la grand' Eglise, & luy fait on vn gentil epitaphe comprins en ces mortz: Cy gist Maistre Iehan Oecolampade, *De l'Epitaphe d'Oecolampade, à Basle.* Theologien de profession, fort docte és trois langues, le premier restaurateur de la doctrine Euangelique en ceste ville, & vray Euesque de ceste Eglise, non moins excellent en sainteté de vie, qu'en grande erudition. Voyla comme vn moyne renyé, qui a longuement vescu en mariage incestueux, duquel il a laissé enfans, & encor' a remply toute la terre de mille blasphemés, est estimé & saint & docte, voire le vray Euesque de Basle: comme si de son temps Basle eust commencé à receuoir l'Euangile de Iesus-christ, ce qui denigre fort l'honneur de celle ville. O quel deshonneur & ignominie rapporteront ceux cy au dernier iour de ce siecle, lesquelz apres auoir commis plusieurs horribles meschancetez, encore sont-ils louez apres leur mort. Aucuns ont laissé par escript que Oecolampade se parforça de se meffaire premierement par glaiue, & apres par poison, mais qu'estant empesché de ce faire par ses amis il trespassa de mort soudaine. Les Zuingliens nyent cela, mais leur tesmoignage est fort suspect, considéré mesmement que ces nouueaux Euangeliques ne font aucune conscience de mentir tres-impudemment. Et quoy que ce soit, pourueu qu'il soit mort comme les Zuingliens confessent, à sçauoir obstiné en son erreur, il est mort le plus mal-heureusement qu'il est possible. Thomas Morus, Chancelier d'Angle-*Thomas Morus sur la mort de Zuingle & Oecolampade.* terre, ayant entëdu par les lettres de quelque sien amy la mort de Zuingle & Oecolampade, luy rescriuit ainsi: i'ay esté ioyeux de sçauoir que Zuingle & Oecolampade ne soient plus en ce monde. Car bien qu'il nous ayent laissé assez de matiere pour nous abysser en tristesse, à cause de plusieurs choses, lesquelles ie ne sçauroy dire sans horreur, & sont par trop cogneuës à vn chacun, tellement qu'on n'en sçauoit tenir propos aux Chrestiens sans fondre tout en larmes: si est-ce que à bon

« droit nous pouuons nous reiouir, dequoy les ennemys si fa-
 « rouches de la foy Chrestienne, si bié appareillez à la ruine de
 « l'Eglise, si attentifz de tous costez à chercher les moyes pour
 destruire toute pieté, ont esté ostez de ce bas monde. Voila ce
 qu'escriit ce grand personnage, la sentence duquel a, & aura à
 tousioursmais, bien grande authorité à l'endroit des bons Ca-
 tholiques.

*Source de
 l'heresie en
 France.*

*Les Luthé-
 riens se
 moquent
 des Zuing-
 gliens vain-
 cus.*

*Zuingle
 & Oecola-
 mpe con-
 damnez
 apres leur
 mort.*

Q V E L C V N des fauorits de Zuingle escrit, qu'en ce tēps
 furēt quelques semences déia espanduës parmy la Frâce, pour
 y faire germer l'Euangile, mais qu'une longue & horrible per-
 secution estoit faicte des fidelles, & principalement des Zu-
 ingliens. A la verité le grand Roy François ne sera iamais assez
 loué de la diligence qu'il a faicte, pour exterminer ceste ver-
 mine d'hommes avec ses opinions hors de son Royaume. Or
 ayans les Zuingliens reçu vne telle escorne par les Catholi-
 ques, les Lutheriens se gaudissoient des vaincus par leurs ser-
 mons ordinaires, liures, epistres, & vers: disans que à bonne &
 iuste cause ilz auoient payé l'iniure par eux faicte au saint Sa-
 crement. Cela estoit bien vray, mais neantmoins il ne falloit
 pas que les Lutheriens reprochassent cela aux Zuingliés, veu
 qu'ilz s'estoient entre-promis à Marpurg, de s'abstenir d'un co-
 sté & d'autre de mesdire, & les Lutheriens n'estoient pas mo-
 ins conuaincuz d'heresie que les Sacramentaires. Mais com-
 ment seroit-il possible, que ceux gardassent inuiolablement
 leur foy aux hommes, qui n'ont douté de rompre la foy pro-
 mise à Dieu? comme ceux lesquelz apres auoir faict veu solé-
 nel de chasteté perpetuelle, se sont mariez publiquement: les-
 quelles nopces S. Augustin au liure du bien de viduité, estime
 estre plus meschantes que n'est l'adultere. Lors plusieurs fai-
 soient banqueroute au Zuinglianisme, & peu à peu se faisoient
 Lutheriés, de sorte que les sectaires mesmes eurent en si grand
 execration le nom de ces deux heretiques, Zuingle & Oeco-
 lampade, qu'ilz condamnerent tous leurs liures. Et fut la cho-
 se reduyte à tel point, que le ruzé apostat de Bucer escriuit aux
 predicans de Zurich, que la sentence de Luther touchant le
 Sacrement luy sembloit tolerable, cōbien que les autres l'ex-

horterent au contraire, à ce qu'il n'abandonnast la clere verité de la doctrine Sacramentaire, pour se rendre à Luther. Car ^{Bucer} Bucer auoit cy-deuât approuué la sentēce de Zuingle en plu-^{vray A-} sieurs sortes, mais tellement toutesfois, qu'il ne sembloit auoir ^{theiste.} aucun soucy de ce qu'on tiendrait du Sacremēt, fust bon fust mauuais : moyēnant qu'il luy fust licite de viure gaillardemēt avec sa paillarde, & iouir des voluptez de ce monde. Car quelle autre opinion faut-il conceuoir d'un moyne desfroqué, qui se souilloit y auoit si long temps en vne couche incestueuse? Et à mon iugement ce fut par les finesces de ce compaignon, que ceux de Strasbourg ayans plus amplement exposé la confession par eux présentée à Ausbourg, furēt peu apres reęus à la ligue de Smalcalde. Car il semble que Bucer a interpreté ceste Confession si cauteleusement, qu'à la par-fin on la pensée n'estre aucunement differente de celle des Lutheriens, ou pour le moins bien peu. Ce qu'il tascha fort de persuader aux Suisses à belles parolles forgées finemēt, mais neantmoins ilz ne voulurent oncques ouir cest homme par trop ruzé.

LE 19. iour de Decembre les Protestans s'assemblerent ^{Assemblée} encor' à Francfort, pour deliberer plus amplement sur la de-^{blée à} fense de leur ligue. Ilz estoient veritablemēt fort soucieux de ^{Francfort,} leurs affaires, & si fort, que peu s'en fallut qu'on ne les estimast ^{par les Pro-} proceder à la mauuaise foy, comme si ilz n'eussent peu defen-^{testans.} dre leur Euangile autremēt que par voye de faict, encore que Luther les eust apprins qu'il ne falloit pas resister mesmes au Turc. Aussi exposerons nous cy apres à quelle fin ceste damnable alliance reüssit, combiē peu elle prouffira aux liguez, & quel dommage elle leur apporta. Car le Sage a tres-bien dict, ^{Pro. 22.} qu'il n'y a prudence, sagesse ou conseil contre le Seigneur.

CESTE année, bien pres d'Harleim, ville assez belle en ^{Poisson} Hollande, fut iecté sur la coste de la mer vn poisson esmerueil-^{merueil-} lable, long de 68. piedz, & gros de 30, la gueule si desmesurée, ^{leux.} qu'elle estoit ouuerte de douze piedz.

L'AN 1532. L'Empereur auoit assigné la Diete Imperiale ^{Paix en} à Spire, mais à cause que le Turc vouloit enuahyr l'Austriche ^{Allemai-} avec grosse armée, il changea de lieu, & la publia à Ratisbone, ^{gne pour} ^{crainte du} ^{Turc.}

qui est plus pres d'Austriche. Ce-pendât quelques Seigneurs Catholiques par la permission de l'Empereur tascherent fort à moyenner vne paix avecques les Protestans, qui pour lors tenoient leur assemblée à Suintfurt. Iceux requeroient plusieurs choses leur estre permises, tellement que ne pouuant la paix estre faicte avec eux en sorte que ce fust, ilz assignerent iour pour se rendre tous à Noremberg. Or ia les forces incroyables du Turc talonnoïent l'Alemaigne de si pres, qu'on n'eut le loisir de differer l'affaire plus longuement. A raison dequoy l'Empereur consentit, voyant la difficulté des choses estre si grande, que la paix fust establie pour toute l'Alemaigne: & fut ordonné qu'on ne feroit aucun tort ou grief à personne iusqu' au Concile, pour le faict de religion: ce qu'il accorda, esperant qu'en brief le Concile seroit tenu. Et voyla comme ce bon Empereur estoit contrainct de dissimuler maintes choses, à cause de la calamité du temps, ce que vrayemēt il n'eust faict oncques, si l'Alemaigne n'eust esté exposée aux courtes & inuasions des Turcs, dont fust procedée la ruïne de toute l'Europe. Aussi les Protestans n'eurent plustost entendu ceste ordonnance imperiale, qu'ilz luy presterēt obeïssance & deuoir, & promirent en-oultre secours alencontre du Turc. Et sur ces entre-faictes Luther & les nouveaux dogmatifans leuoient les crestes, voyans qu'ilz auoient euité vne fort grand peur, estant l'Empereur empesché aux preparatifz de la guerre du Turc.

*Le Roy
Christier-
ne meurt
en prison.*

C E S T E année Christierne, Roy de Dānemarc, chassé de ses seigneuries y auoit ia dix ans, à cause de sa cruauté & tyrannie, leua quelques troupes de gēs, deliberé de recouurer son Royaume totalement perdu pour luy: mais venu qu'il fut en Noruege & Dannemarc, il fut prins tout soudain & assez desloyalement, pourautant qu'on l'auoit asséuré par lettres. Et de-là estant emprisonné, demeura captif iusqu' au dernier iour de sa vie: iusqu' à rāt, comme l'on diēt, qu'il s'empoisonna luy-mesme, le peuple estant adonc assez enclin pour le receuoir de rechef. A la verité sa cruauté & felonnie auoit esté insupportable, & encore cheut-il en l'heresie de Luther, & en icelle fi-

nit sa vie. Au demeurant, il peut seruir à tous Roys & grandz Princes de mirouer, à fin qu'ilz voyent que premierement il leur faut domter leurs passions & concupiscences, filz veulēt sagement gouverner leurs subiectz. Mais * cy dessus nous auons dict quelque chose de ce Roy.

TANDIS que l'Empereur & les Princes estoient à Ratif-
bone, nouuelles tref-assurées vindrent, que Solyman estoit *Solyman*
déia en la Mesie avec vne armée qu'on n'eust sceu nombrer. *vient en*
Ce barbare Tyran creuoit de rage qu'il auoit, d'auoir esté n'a- *Allemai*
gueres chassé de Vienne ignominieusement, & couroit le *gne.*
bruiet, que à ceste cause il auoit renforcé son armée, & venoit
en Allemagne pour mettre le siege plus fort deuant Vienne.
Car il pensoit que à luy seul appartenoit de bon droit l'Em-
pire Romain, veu qu'il auoit occupé le siege de ce grand Cō-
stantin Empereur de Grece. Tellement que quand on luy te-
noit propos de l'Empereur Charles, ou qu'on luy escriuoit let-
tres, il souloit par vn orgueil barbare l'appeller seulement Roy
d'Espaigne. Il estoit au reste bien assuré de retourner victori-
eux des Alemans, sçachant bien les partialitez d'iceux tou-
chant la religion, ce qui luy hauçoit grandement le courage.
Aussi certes c'estoit fait de l'Allemagne, voire de l'Europe, si
par vn consentement d'un chacun, on n'eust decerné secours
pour l'Empereur. Ce qui aduint tout au contraire de ce que
ce cruel Tyran pretendoit, lequel desireux d'estendre les fi-
nages de ses seigneuries tousiours plus auant, à la maniere des *La guerre*
Ottomans ses deuanciers, auoit ia deuoré par phantasie toute *des Otto-*
l'Allemagne. Car les Ottomās ont accoustumé d'ourdir nou- *mans.*
uelles guerres les vnes apres les autres pour exercer la gendar-
merie, pour ne les laisser point corrompre par paresse & faict-
neantise, & par ce moyen conquerir par force d'armes tous
les peuples à eux voyfins, comme ennemys formelz. Et ainsi
en mettāt aux chāps toutes les années vn beau camp, ont sur-
monté en guerre maintes natiōs, & ont adiousté à leur Empi-
re plus de vingt Royaumes, que de l'Asie que de l'Europe.

ESTANT doncques le Roy Ferdinand assez certioré de
la grosse armée Turquesque, enuoya trois Ambassadeurs avec

certain presens par deuers Solymans, lesquelz il receut assez humainement, mais ilz ne sceurent rien impetrer sinon qu'ilz suyuroient le camp. Ce pendant l'Empereur remonstra en la iournée de Ratisbone, de quel danger l'estat Chrestien estoit enueloppé, si les espritz estans réunis en concorde, on ne faisoit teste vnanimemēt à ce fier ennemy. Adonc tous les Princes & Ambassadeurs promirent tres-volontiers, qu'ilz defendroient de toute leur puissance le salut public, & la commune reputation de tous, & principalement de l'Empire, comme leurs predecesseurs auoient faict. Et par-aincy chacū se retira, pour mettre sus telles forces qu'il pourroit. L'Empereur feit venir d'Italie des compagnies d'Italiens & Espagnolz, merueilleusement bien en conche: & manda au Seigneur André d'Orie son Amiral, qu'il prinst les galleres & nauires, pour singler en Grece à l'encontre de la flotte Turquesque. Le Pape Clement contribua grandes finances pour vne si iuste guerre, & en ce declara apertement son affection vraiment paternelle enuers la Republique, iacoit que les impostz mis sur les benefices & sur le Clergé, semblaissent estre par trop excessifz. Les Roys de France & d'Angleterre avec les Suisses furent seulement spectateurs oyisifz de ceste expedition: mais sil fust aduenu quelque chose de sinistre ou chatouilleux à l'Alemaigne, sans doute leurs affaires s'en fussent pareillement ressenties. La Saincteté despescha pour son Legat le Cardinal Hippolyte de Médicis, ieune homme doué de toutes les perfectiones de nature & de fortune, qui deuoit assister à ceste guerre: & aussi fut sa venuë fort ioyeuse non seulement à l'Empereur & au Roy Ferdinand, mais bien encor' à tous les Alemas. Car outre vne grande somme de deniers qu'il apporta, il amena aussi plusieurs vaillans guerriers avec force cheuaux de guerre, & avec cela il ne tenoit aucunemēt son rang de Cardinal. D'une partie de cest argent on soudoya huit mille cheuaux Hongres, lesquelz le Roy Ferdinand auoit promis, & auoit ledict Sieur quand & soy deux tres-illustres Capitaines entre autres, ausquelz deux le Cardinal donna de sa main propre à chacun vne enseigne pour honneur; esquelles estoit peinct

*Allegres
se de tous
les Prin-
ces.*

*Le Pape
donne finā
ces pour la
guerre.*

*Le Cardi-
nal de Mé-
dicis en-
uoyé par le
Pape.*

vn Crucifix, si bien que voire vn cueur de fer eust esté se-
mond à pieté. Enuiron ce temps le Vayuode donne charge à
Loys Griti, que le Turc luy auoit laissé pour compaignon,
d'assaillir le fort de Strigonie tenu par la garnison de Ferdi-
nand. Les soldatz Alemans soustindrent quelque temps <sup>Compai-
gnies Chre-
stiennes.</sup> cest assault fort vaillamment, encore qu'ilz eussent faulte
presque de toutes choses, & que ceux qu'on leur auoit en-
uoyez pour secours, eussent combattu en bataille nauale
auec les Turcs assez desauantageusement. Tandis vindrent
en Autriche force compaignies d'Italiens & Espagnols, tel-
lement que Alphonse du Guast, braue Capitaine de l'Empe-
reur, fut contrainct de licentier plusieurs Italiens, à cause que
le nombre des gendarmes croissoit par trop: il feit toutesfois
cela enuis, mais tel estoit le vouloir de l'Empereur. Sur cela
l'Empereur descendit de Ratisbone à Lincy par la Dunoye,
accompagné des troupes du païs bas, qui estoient tres-bel-
les, si que depuis les Romains la Dunoye ne porta oncques
plus de nauires & d'hômes de guerre. On eust ouï de toutes
parts l'acclamation de ceux qui s'entresaluoyent, & l'harmoni-
e des tabourins, fifres & clerôs. Aussi estoient les deux bords
de la riuere si couuers de gendarmerie, qu'on ne voyoit rien
que fanterie & caualerie. Ce-pendant Solymen estant venu
iusqu'à Belgrade, feit faire plusieurs ponts sur le Sauo, & par
ce moyen mena dans Hongrie vn nombre incroyable de gës
à cheual, & marcha droit en la prouince Valeriane, q̃ main-
tenât lon appelle Stirie. Et cogneut-on par-apres par les Am-
bassadeurs du Roy Ferdinand & quelques captifs, q̃ le camp <sup>LeTurca-
uer 500000
hommes ne
peult pren-
dre vne pe-
tite ville.</sup> de Solymen estoit bien de cinq cens mille hommes, desquelz
trois cens mille estoient gens de cheual. Le barbare donc cō-
tinuant son chemin rencontra la ville de Guince, laquelle le
preux Nicolas Lurix avec vne poignée d'hommes oza de-
fendre contre vne si grande multitude d'ennemis. La ville est
enceinte incontinēt de toute ceste armée, on tasche de la mi-
ner, on fait son deuoir des deux costez fort vertueusement:
mais estant les choses reduites à telle extremité, que l'ennemi
fier & cruel estoit prest d'entrer dans la ville, le cry des fem-

mes & enfans fut si grand, que quelque felon que fust l'ennemi il demoura sur cul, & fut l'effort des Turcs courageusement repoussé. Ce voyans les sur-intendans de l'armée Turquesque, & de parolles & de coups taschoyent de faire marcher auant les soldats, mais ils se monstrerent si froids au ioindre, que de lors l'assault cessa.

*Espée nue
venue par
les Turcs
en l'air.*

Et disoient les Turcs, que sans point de faulte ils auoyent veu en l'air vn cheualier, lequel avec vne espée nuë les menaçoit comme ils vouloyent forcer la ville: & plusieurs creurēt que c'estoit Sainct Martin, qui auoit accoustumé de secourir les Sabariens, fort prochains de la ville de Guinçe, toutes & quantes fois qu'ils estoient tombez en destresse: bien que les heretiques se gaudissent de cecy, l'impieté desquels nous doit d'auantage semondre à implorer l'ayde & faueur des Saints. Car nous sommes par trop assurez, qu'iceux estans cōioincts avec Dieu, peuuent aisément impetrer de luy toutes choses. Nous deurions rougir & mourir de dueil, que de nostre aage les erreurs pieça condamnez & en Vigilance & es autres architectes d'heresies, sourdent encore comme d'un enfer: & que les Chrestiens ne se hontoyent point de receuoir l'opinion de ceux, la memoire desquels est execrable en l'Eglise Catholique. Or Solyman demeura 23. iours au siege de ceste petite ville, & ne la pouuant forcer, (ce qui à la verité estoit fort merueilleux) capitula avec le Gouverneur Nicolas souz quelques conditions, & ainsi se retirāt à sa courte honte veint sur les frontieres de Carinthie. Mais estat encor deuāt Guinçe, il feit present aux Ambassadeurs du Roy Ferdinand d'une robe longue de drap de soye & d'une coupe d'argēt, & ainsi les renuoya à l'Empereur & à Ferdinand chargez de ses lettres, lesquelles estoient escrites en lettres d'or & d'azur sur vn rouleau de papier, en langue Arabique. Si estoient cachetées du cachet du Roy, & encloses en vn sachet de veloux, monstrans assez tant de fermeures la superbe d'un fier Tyran. Le contenu des lettres estoit, qu'il seroit venu en Hongrie pour vëger le tort fait à Iehan Vayuode son amy & vassal, delibéré de gaster avec son camp toutes leurs terres & seigneuries, & leur

*Lettres de
Solyman
à l'Empe-
reur.*

leur liurer vne bataille, pour ſçauoir à qui ſeroit l'Empire de tout le monde. Voyla comme il parloit haultainement, ſans faire mention du reſte, ce que neantmoins il n'eſſectua point par apres, & ſignamment touchant la bataille. En ſon armée il auoit enuiron trois cēs artilleries de fonte toutes ſur rouës, le camp eſtoit plein de route opulence, ſeureté, ſilence & diſcipline militaire: tous les genſ-d'armes viuoyent de mouton & de ris. Toutesfois il ne fut ſi hardy, que de marcher auant à lencontre de l'Empereur, l'armée duquel attendoit ſa venue à Vienne en bonne deuotion. Luy neantmoins deſireux de ne point retourner ſans endommager l'Alemaigne, enuoya vn ſien braue & vaillant Capitaine, nommé Caſon, avec quinze mille cheuaux, pour rauager tout par où il paſſeroit, & par ceſte cruauté ruiner l'Allemaigne. Caſon feit fort volontiers le commandement de ſon maiſtre, grande tuerie d'hommes eſtoit faiſte par tout ſur les champs & bourgades, on ne voyoit rien en vn grand traict de chemin que feu & fumée, les pauures & caſſez vieillards eſtoient menez en ſeruage, & les femmes tirées avec des cheſnes & liens eſtoient contrainctes de ſuyure le train des cheuaux, & quand aux petitz enfans ilz eſtoient brullez avec les maiſons. Ceſte rage & felonnie des barbares veint iuſqu' à Lincy, où adonc le Roy Ferdinand eſtoit. Mais eſtans aſſez chargez de butin, & partant reprenans preſque le meſme chemin pour retourner, qu'ilz auoient tenu en venant, tomberent entre noſtre Cauallerie & Fanterie, qui les attendoit deçà delà quand ilz retourneroient. Les barbares voyans qu'ilz ne pourroient ayſément emmener tant d'eſclaves, en feirent mourir quatre mille par les chemins. Et Caſon marchant plus outre ſe trouua ſurpris du Palatin, qui feit belle boucherie de ces hommes, & y perdit la vie le Capitaine Caſon combattant courageuſement. Le reſte peu apres, ſeſtant embarrasſé parmy les troupes de Londron & Ioachim de Brandebourg, fut tué comme beſtes, & en print-on quelques vns pour les vendre comme eſclaves. Ceux qui ſe peurent ſauuer à la fuyte, rencontrerent les Hongres plus furieux, qui les pourſuyuirent de pres bien quatre lieues, en fai-

*Le Turc
n'oſe don-
ner la ba-
taille.*

*Deça ſe
fait par
les Turcs
en Ale-
maigne.*

*Deſſaiſte
des Turcs.*

fans demeurer quelques vns, si que en diuers lieux huit mille y finerent leurs iours, combien que les autres en mettent d'auantage. Ia estoit venu Solyman iusque à Grace, & l'Empereur se campa à Vienne, estant resolu de chocquer avec cest ennemy si outrecuydé, mais en vain attendoit-il qu'il s'approchast. On dict que quelques grandz Princes Chrestiens l'aduertirent qu'il ne se hazardast pas de donner la bataille, pour ce que toute Allemagne estoit en armes: & non seulement alors, mais encor' autresfois il appert, que les Turcs ont esté admonnestez par les Chrestiens de se donner garde, lors que quelque grand encombre ne leur pouuoit manquer. Mais certainement telz hōmes sont seulement Chrestiens de nom, & nullement de faict, attendu qu'ilz fauorizēt beaucoup plus aux ennemys iurez de la Chrestienté, qu'aux Chrestiens mesmes. Parquoy bien que Solyman eust plus grand nombre de cheuaux que les nostres, & qu'il fust tres-conuoiteux d'une gloire de guerre, si est-ce qu'il ne voulut iamais hazarder ses forces: mais (ce qui nous doit estre vn grand creue-cœur) emmenant, ainsi qu'on dict, plus de trente mille Chrestiens en captiuité, outre ceux que Cason & autres Turcs auoient miserablement occis en diuers lieux, s'en retourna à Constantinople avec vne honte perpetuelle d'auoir fuy, mais si bien que de fois à autre il prenoit garde, si l'Empereur ne le talonnoit point. Ainsi doncques ce Tyran en bien peu de temps s'est retiré d'Allemagne avec vne ignominie empraincte sur son front, pour-autant que nostre Dieu batailleoit pour ces bons Princes, l'Empereur & le Roy Ferdinand que le barbare eust voulu voir massacrez: ce qui doit seruir à toute la posterité d'un rare exemple de pieté, & pour semondre les grandz Seigneurs à faire le semblable. Car encore que l'Empereur eust en ceste guerre nonante mille hommes de gens de pied, & trente mille de cheual, ne contant point plusieurs autres qui vindrent à ceste sacrée guerre d'une gentillesse de cœur, & outre les seruiteurs ou aydes des gēs à cheual & à pied, qui estoient assez fortz & bien experimentez aux armez: toutes-fois nous deuons attribuer toute ceste victoire si insigne, non

*Le Turc
est aduer-
sy par les
Chrestiens.*

*30000.
Chrestiens
captifs, &
fuyte de
Solyman.*

*L'armée
de l'Empe-
reur.*

tant à la force humaine, qu'à la faueur & secours du haut Dieu. Et veritablement comme l'Empereur auoit vne singuliere pieté & deuotion enuers son Dieu, aussi a-il presque tousiours iouy d'une singuliere benignité & faueur de nostre Dieu. Voyant donc le-dict Sieur que Solyman s'estoit retiré, *L'Empereur retourne de la guerre.* delibera de retourner avec quelques troupes d'Alemans & Espaignolz en Italie, quoy que Ferdinád le priaist tres-instamment d'accabler Vayuode avec ceste armée, lequel Solyman auoit estably Roy d'Hongrie. Car l'Empereur demeura tousiours en son opinion, voyant qu'il auoit l'hyuer à dos, & que la peste eschauffée tant dans le camp que parmy la Cour, en faisoit mourir plusieurs ordinairement: mais toutesfois il feit en sorte, qu'il laissa les compagnies Italiennes lesquelles iointes à celles d'Autriche feroient la guerre en Hongrie. Si aduint neantmoins, que pour quelque sedition suruenüe les Italiens plierent leurs enseignes, & retournerent en leur país, au grand regret du Roy Ferdinand.

TANDIS que l'Empereur s'acheminoit pour venir en Italie, André d'Orie avec vne bonne & grosse flotte vogua contre les Turcs, lesquels sans point de doute eussent esté ruinez par ceste si soudaine venue de ce grand Capitaine, si ce n'est *Succes d'André d'Orie contre le Turc* qu'ilz furent aduertys par quelques Venitiens de l'entreprendre de ce Seigneur, dont ilz se sauuerent à la fuyte. Ce-nonobstant André d'Orie print plusieurs villes de Grece, en donnant la chasse aux Turcs, & eust infalliblement donné vn plus grand eschec à Solyman, qui en ce temps guerroyoit en Alemaigne bien loing de Constantinople, si les Venitiens qui auoyent fort belle armée de mer, eussent voulu ioindre leurs forces avec celles de l'Empereur. Mais ilz alleguoient qu'ilz ne pouuoient faire cela, à cause de la paix qu'ilz auoient avec Solyman. C'estoit lors, c'estoit lors, que les moyens se presentoyent de bien faire & à Constantinople & ailleurs, veu *Les Chrestiens perdent l'occasion de bien faire contre le Turc.* mesmement que les Grecs souhaittoient la venue des Chrestiens & la deliurance de leur miserable captiuité, & que Solyman estoit grandement esloigné de Constantinople, si les Chrestiens eussent assemblé leurs forces pour courir sus aux infi-

deles. C'est donc vn point vuidé, que la force & puissance des Ottomans n'est plus accreuë par aucuns moyens, que par les guerres intestines des Chrestiens, haynes & rancunes, lesquelles bien souuent nayssent de choses fort friuoles, pendant que l'un veut exceller plus que l'autre, & ne se contentans pas de leurs terres enuahyssent celles des autres, & à l'appetit d'un mien & d'un tien sement tousiours quelque nouuelle guerre.

*De Seruet
& Cam-
panus, Tri-
nitaires.*

C E P E N D A N T que la iournée Imperiale se tenoit encor à Ratisbone, certain liure fort abominable se vendoit publiquement, ainsi intitulé, Sept liures des erreurs de la Trinité, par Michel Seruet Espagnol. C'est œuvre cōtenoit des blasphemies fort detestables, & encore non ouïs, tellement que le Confesseur de l'Empereur feit en sorte qu'il fust supprimé. Mais en mesme temps vn Aleman de la terre de Iuliers, nommé Iehan Campanus, qui auoit esté deux ans disciple de Luther à Vuittemberg, ne douta point de soustenir les mesmes erreurs de la Trinité. Et combien que Luther ayt escrit contre luy, si est-ce qu'il a ouuert la porte à vne si grande impiété, ayant osé escrire au liure contre Iehan Latomus qu'il abhorroit le mot de Consubstantiel, disant que plusieurs, voire des plus doctes, ne l'auoient oncques voulu receuoir, & que mesme Sainct Hierosme escrit, que quelque venin est caché és syllabes & lettres: mais il ment fort meschammét de Sainct Hierosme. Car iceluy en quelque epistre escrite à Damasus doute bien de ce mot hypostase, mais non de Consubstantiel: ains au contraire il prie Damasus par la Trinité Consubstantielle, qu'il luy vueille respondre. Et Luther doit necessairement confesser qu'il approuue les Arriés, qui n'ont voulu approuuer le Consubstantiel, disant luy-mesme que c'est vne voix profane. Or quand à ce que Sainct Hierosme doute du

*Du mot
de Consub-
stantiel.*

mot d'hypostase, il le fait (à mon iugement) à cause que ce mot signifie substance en Grec: & les Theologiens parlans de la Trinité le prennent pour personne, & sont trois personnes diuines, bien qu'il n'y ayt qu'une substance de diuinité. A raison dequoy ce mot d'hypostase estoit subiect à la calom-

nie des malueillans, lesquelz pour son ambiguité le prenoient & de la substance & de la personne. Et par mesme raison S. Basile en l'epistre 64. escrite aux principaux de Neocesarie, blasme & reprent ceux, qui, pour establir l'heresie de Sabellius, abusoient des motz de S. Gregoire Neocesarien, esquelz en disputant contre vn payen il auoit vsurpé le mot d'hypostase pour substance, au contraire de la coustume des autres Peres. Il fest trouué quelque Theologien poëtique, lequel estât prouoqué par l'audace de Luther, a osé appeller la sainte & sacrée Trinité, trois Chimeres.

CESTE année Iehan Bugenhage de Pomeran, moyne qui auoit ietté son froc aux horties, escriuit vn liure en Alleman contre les Catholiques, lequel il intitula, Contre les larons du calice: & ont ceux d'Vvitemberg appellé cest apostat leur pasteur & sur-intendant. Ce liure là est tout plein de mesdisance, de mensonges & calomnies, de maniere que tu y peux facilement veoir l'esprit de Luther, le cinquiesme Euan geliste. Il dict maux infinis des Euesques, pourautant qu'ilz n'ont permis au peuple le saint calice: condamne aussi le sacrifice de la Messe, comme si l'Eglise Catholique deuoit apprendre de ces belistres d'apostatz, en quel maniere & ceremonies les Sacremens se doiuent celebrer. Ce mesme apostat sen estant vne fois allé en quelques belles villes, & principalement es maritimes, espandit l'heresie de Luther par-my le peuple conuoiteux de nouuelletez, mais non sans tumulte & sedition, de laquelle le nouveau Euangile est ordinairement accompagné: & en ce faisant, confirma les Eglises Lutheriennes de l'esprit duquel il estoit remply. Or luy retournant de Dannemarc, & ayant passé, non sans grand peril de la tempeste, la mer Balthique, aborda au riuage de Gotthie, où estant ne doura point de parler en ceste façon: ô Dänemarc, ie veux bien que tu ayes mon Euangile, & moy ton argent: & à la verité il retourna à Vvitemberg chargé de bien grandes richesses, où il se donna du bon temps avec ce qu'il auoit acquis si gaillardement. Aussi paracheuée que fut la guerre de Smalcalde, (de laquelle nous parlerons cy deffouz) il feit imprimer.

Mm. iij.

*Pomera-
nus escrit
contre ce
que les lays
n'ysent du
calice.*

*Gaing de
Pomera-
nus en pres-
chant l'E-
uangile.*

mer vn liure, auquel ce vieux refueur declare assez ouuertement la fraude de son auarice. Au reste, contre ce sien liure intitulé, contre les larrons du calice, M. Michel Vehus Docteur en Theologie, & Iacobin de profession qui fut Conseillier du Cardinal & Archeuesque de Mayence, escriuit fort grauelement & doctement. Premièrement il obiecte à ce maudit apostat sa langue desbordée en iniures & opprobres: „ apres cela il luy monstre ce qu'il faut qu'il prouue. Il dit „ donc: En tout affaire la verité est le meilleur fondement qui „ soit, laquelle ce galland mesprisant, a commencé son liure par „ menteries. A raison de quoy nous le r'enuoyons avec ses men- „ songes, iusqu'à tant qu'il les ayt prouuées. Que si il est igno- „ rant de ce qu'il luy faut prouuer, vrayement ie suis content „ de le luy monstre. Car il doit prouuer, que le calice doit estre „ prins par tous necessairement selon le commandement de „ nostre seigneur, ce que ne luy ne les siens n'ont encores peu „ faire, ny ne feront oncques. Neantmoins ie luy donneray par „ hardiesse que ces parolles, Beuez tous de cecy, ayent esté di- „ ctés à tous par Iesus-christ: mais encore luy faudra-il ensei- „ gner, que ces parolles contiennent vn precepte necessaire. „ Or si sur cela il se conseille aux siens, il trouuera que les plus „ grandz de sa secte le nyent, & disent que Christ n'a point com- „ mandé de prendre ny l'vne ny les deux especes. Au fort, si „ nous concedons que ces parolles comprennent vn precepte „ necessaire, encore faudra-il qu'il prouue, qu'elles ont esté di- „ ctés specialement à vn chacun, & non generallyment à tous, „ comme sont celles là, croissez & multipliez. Encore d'a- „ bondant, posé le cas qu'elles ayent esté dictés specialement „ à vn chacun, il luy restera de prouuer que tous les mortz „ de ce precepte appartiennent à vn chacun. Car en ce lieu „ y a beaucoup de choses, consacrer, offrir, manger, boire, „ faire en sa memoire. Ce qu'il ne pourra oncques faire, sinon „ qu'il vueille que l'office de consacrer appartienne à chacun „ des rustiques. Bref, cela luy estant encores concedé, cecy de- „ meurera à prouuer, que en cas de necessité & peril Iesus-christ „ ne nous a point laissé ce precepte libre: & que l'Eglise en vn

*Figure
dispute du
S. calice,
denyé aux
lays.*

tel accident n'a pas la puissance de faire constitution & ordonnance, pour euitier ce peril. Voyla ce que le sus-dict a subtillement & doctement escrit au commencement de son long œuvre contre Pomeranus apostat, à quoy toute l'eschole de ces dogmatifans ne pourra oncques satisfaire.

EN ce mesme an, oultre ce qui auoit esté accordé à Marpurg, Luther escriuit non point à cachettes, ains publiquement, à Albert Marquis de Brandebourg, exhortant ce Prince de se donner garde de la doctrine Zuinglienne, & de bannir hors de ses terres tous les Zuingliens. Dont les ministres de l'Eglise de Zurich furēt fort marris, & escriuirent au mesme Seigneur, le supplians bien fort pour leurs adherans: & avec ce luy enuoyerent le liuret de Bertramus prestre, escrit du corps & sang de Iesuf-christ: lequel certain Zuinglien auoit traduit en Alemā, à fin que toute l'Alemagne cogneust cōbien ancienne estoit leur heresie. Ce Bertramus viuoit l'an 830. ou bien peu apres: & bien qu'il ne soit gueres ancien, ny d'autorité aucune, toutesfois les Zuingliens le nous obiectent comme vn autheur d'antiquité esmerueillable, & d'autorité irrefragable, ayās ce-pédant en mespris vne infinité de Saincts Peres, quoy qu'ils en alleguent quelques mots falsifiez, à fin que par cest apast ils en prennent tousiours quelcun. Car ils ne les produisent iamais syncerement, ains ils les tordent & font venir où ils veulent: iusqu'à dire que bien souuent ils ont escrit contre leur propre conscience, ce que toutesfois ils n'escriuirent ny n'estimerent oncques. Parquoy y prenne garde qui vouldra se sauuer.

ENVIRON le temps que chacun s'armoioit pour faire teste au Turc, alla de vie à trespas Iehan, Duc de Saxe, grand amy & fauteur de Luther, lequel feit deux oraisons funebres à ses obseques, qu'il feit tout soudain mettre en lumiere. Et adonc certain Catholique les confuta si bien, qu'il monstra à l'œil, que l'inconstance prodigieuse de Luther deuoit suffire, pour destourner tous hommes sages & bien aduisez de prendre la faulce doctrine d'iceluy. Je ne scaurois auoir la patience de mettre icy les folies, par lesquelles il compare le Saxon

*Du liure
de Bertra-
mus, alle-
gué par les
heretiques.*

*Iehā Duc
de Saxe
meurt,
loué par
Luther.*

avec Iesuf-christ, comme s'il fust mort deux ans deuant à Ausbourg pour tous, c'est à dire tous Lutheriens, combien que quand au corps il ne mourut pas lors à Ausbourg. Sinon qu'il vueille dire que ce Prince mourut alors selon l'ame, laquelle mort est la plus horrible qui soit: & n'y a point de doute qu'il ne soit mort en ceste maniere, ayant souz-signé à la cōfession d'Ausbourg, qui apporte celle mort à quiconque l'approuue.

*Comment
Luther se
contre-dit
en l'innoca-
tion des
Saints.*

Son successeur fut Ichā Frederic son fils, qui ne fut pas moins fauorable à Luther, qu'auoit esté le pere. Or fault-il icy considerer, que deuant quelques années Luther faisant son ap-
prêtissage, auoit escrit entre autres vn liure des dix preceptes: auquel il rembarre brusquement les Vuaudoys ou Pighards, qui appelloient les Alemans idolatres, pourautant qu'ils honoroient & adoroient les Saints. Et pour-ce que sottement ils alleguoient pour eux les lieux de l'escriture, esquels il est commandé d'adorer vn seul Dieu, il les appelle depraueurs de l'escriture sainte, & trahystres calōniateurs de nostre pieté: lesquelles parolles nous pouuons à bon droit retorquer & contre luy & contre tous autres sectaires. Au mesme liure
" il adioust ces mots: tous les saints peuent toutes choses, &
" Dieu te donne autant par iceux, comme tu te persuades en pouuoir receuoir. D'abondant il a redigé par escrit certaine harengue de la preparation à la mort, en laquelle il en-horte le patient d'inuoquer tous les Anges, & signamment le sien propre, inuoquer aussi la vierge Marie, les Apostres & tous les Saints, & nommément ceux ausquels il se sentiroit estre plus affectiōné. Et neantmoins vn peu apres il escriuit des Saints en fort grand mespris, disant entre autres choses, q̄ les Saints estans en ceste vie mortelle estoient comme pierres precieuses, mais qu'apres leur mort ils sont comme quelques bois, voire vrayes idoles, & pareillement tous ceux qui leur font quelque honneur. Or maintenant ce tres-inconstant homme en l'vne des oraisons funebres, se parforce de monstrier à la loüange du defunct Saxon, combien precieuse est deuant la face du Seigneur la mort de ses Saints, & qu'il tient en bien plus grand honneur les saintz decedez, que lors qu'ilz iouis-
soient

*Blasphé-
me des
Saints.*

soient de ceste vie. Qui est-ce donc qui pourroit lire cela, sans se mocquer de la bestise de cest homme? Qui ne s'esmeruillera d'un tel monstre?

CE mesme an vne nouvelle rage & furie de la mer Ocea- *Inondatiō d'eaux.*
ne fait dommage inestimable au païs de Phrise, Hollande, Ze-
lande, & Flandres. Un peu deuant le Roy de France & d'An-
gleterre feirent nouvelle alliance à Boloigne & à Calais, la-
quelle suffisoit pour dōner martel en teste à l'Empereur pour
plusieurs raisons, lesquelles ie ne veux icy adiouster, n'y estant
point necessaires. Tant y a que bien peu apres, comme il sera
dict cy-dessouz, nouveau feu de guerre s'embrasa entre le
Roy & l'Empereur, à la mocquerie des Tures & heretiques,
ausquelz ces guerres des Princes Chrestiens estoiet fort pro-
pres pour mettre à chef leurs desseings.

ESTANT l'Empereur arriué en Italie, parlamenta souuēt *Entre- uenü des Pape & de l'Em- pereur.*
avec la Saincteté à Boloigne, & comme il auoit promis aux
Protestans, luy teint propos de faire publier le Concile. Mais
les predicans des Protestans ne desiroient rien moins que le
Concile, quoy qu'ilz feissent beau semblant d'en estre mer-
ueilleusement conuoiteux. Car ilz vouloient auoir un Cōcile
tenu à la mode, que iamais Concile ne fut tenu en l'Eglise Ca-
tholique. Aussi l'experience nous a assez appris, combien peu
de conte ilz font des Cōciles, mesprisans l'autorité & decret
du Concile de Trente, lequel toutesfois a esté tel, qu'à bon
droict on le peut conferer avec quelque Concile que ce soit,
celebré de puyz mille ans en ça. Mais en son lieu nous en par-
lerons plus amplement.

L'AN 1533. Henry, huictiesme de ce nom, Roy d'Angle- *Repude de Catherine femme du Roy d'An- gleterre, d'oü sont sortis les troubles audict Royaume.*
terre, à l'instigation de quelques flatereaux de sa Cour, repu-
dia Madame Catherine, fille de Ferdinand Roy d'Espaigne,
& seur de la mere de l'Empereur Charles, avec laquelle il a-
uoit demeuré en mariage plus de vingt ans, comme Royne de
fort rare chasteté & debonnaireté singuliere: & ainsi espousa
Anne de Boulen, laquelle auoit esté nourrie & entretenüe à la
Cour. On dict que quelque grand Seigneur d'Angleterre, a-
pres auoir eu les mains gressées de quelques presens & argent

L'AN M.D.XXXIII. HISTOIRE DE TOUTES CHOSES

de France, meit en teste à ce Roy Henry, que à bonne & iuste cause ceste Catherine pouuoit estre repudiée, voire qu'elle le deuoit estre. Et le but de cecy estoit, que l'Empereur eüst inurié de ce tort faict à luy, le Roy d'Angleterre quitteroit l'alliance dudit Sieur, & se ioindroit avec le Roy de France par amitié fort grande. Ceste cause de repude ayant quelque temps esté debattuë à Rome, le Pape Clement fut à la fin induict de donner sentence à l'encontre d'Henry, si bien qu'il le menaçoit de le fouldroier de son excommunicatiõ, s'il ne reprenoit dans certain temps Madame Catherine, quittant la nouuelle Anne de Boulen. Mais il fut impossible de persuader au Roy, qu'il quittast sa premiere deliberation. Et ç'a esté la source des calamitez & mal-heurs suruenuz à ce iadis tant florissant Royaume Anglois, de maniere que iusqu'à present l'estat d'iceluy est fort mal-heureux & plein de troubles. Le Roy auoit eu de Madame Catherine vne fille, qui fut nommée Marie, laquelle bien qu'elle ayt esté forcée de renoncer au droit du Royaume, celle de Boulen ayant ia engendrée vne autre fille à Henry: toutesfois estant par vne providence diuine & par la voix des Princes esleuë Royne, restitua la religion Catholique presque déia esteinte, & exploicta maintes choses dignes de louange en ce sien Royaume, comme lon verra cy apres.

*George de
Saxe enne-
my des Lu-
theriens.*

CESTE année, George, Prince de Saxe, ne pouuant souffrir que quelques vns de Lipsie accourussent les Dimanches en vn village appartenant aux Electeurs de Saxe, pour illec celebrer la Cene, qu'ilz appellent, avec les deux especes, prietta en soy-mesme de chasser ceste peste bien loing, de peur qu'elle n'infestast ses subiectz. Ce qui engendra merueilleux desplaisir aux Lipsiens ia imbuz de ceste heresie, & pour-ce qu'il n'y a que sept lieues d'Allemagne de Lipsie à Vvittemberg, ilz demanderent conseil à Luther, comment ilz se deuoient gouverner sur cela. Lequel sans gueres tarder leur feit responce, qu'en cecy ilz ne feissent rien contre leur conscience, laquelle neantmoins il sçauoit trop bien estre peruerse, & deuoir estre corrigée selon la sentence & decret de l'Eglise

Catholique. En ces lettres ce meschant apostat appelle le tref-
 deuot & vrayement Catholique Prince George, ennemy de
 l'Euangile, Apostre de Satan, homicide & rauisseur. Le Senat
 de Lipsie craignoit grandement vne sedition le sacré iour de
 Pasques, auquel ceste lettre arriua, laquelle plusieurs transcri-
 uoient à l'instant: toutesfois le Senat Catholique y meit si bõ
 ordre, que nul trouble ne suruint. Le Prince George ayant en-
 tendu cecy, s'en plaignit fort à l'Electeur de Saxe, & sembloit
 menacer Luther s'il ne se purgeoit: mais tant s'en fallut, que
 plustost Luther esguilloné de cela dist encore plus de mal &
 d'opprobres de ce bõ Seigneur. Ce qu'il feit sans encourir au-
 cune punition, pourautant que les Seigneurs estoient si bien
 encheuestrez de ses folies, qu'ilz estimoient que Luther ne
 pouuoit ne dire ne faire chose, qui ne fust entierement Euan-
 gelique. Tellement que ce monstrueux Euangeliste a iniurié
 tref-audacieusement plusieurs Seigneurs Catholiques tant se-
 culiers que autres, estant assuré en son nid de Vvittemberg à
 cause des guerres continuës, pour l'amour desquelles l'Empe-
 reur estoit contrainct d'appliquer & son esprit & tous ses des-
 seings ailleurs, qu'à la reprimende de Luther. Il est impossible
 de declarer combien il se iacte, d'auoir luy entre tous instru-
 iet, confirmé & consolé merueilleusement bien les conscien-
 ces des Magistratz ciuils & autres Estatz, & ce par vne singu-
 liere grace de Dieu, si que ny Saint Augustin ny Saint Am-
 broise ne pourroient estre comparez avec luy quand à cela.
 Et à la verité il a tasché tant qu'il a peu de persuader aux Prin-
 ces & Magistratz ciuils, qu'à bon droit ilz pouuoient saisir
 tous les biens & appartenances du Clergé & des monasteres:
 mais l'experience tesmoigne assez combien cela a accru les
 richesses des Princes. Que si cela est instruire & consoler la
 conscience des Magistratz, (ce qu'un homme bien aduisé ne
 dira oncques) vrayement Luther ne dict que par trop verité,
 comme celuy qui n'eut iamais son pareil en cest affaire. Luy-
 mesme escrit en vn autre lieu, * que son Euangile est plus cler
 & euidet qu'il n'estoit du viuant des Apostres, & que les
 Alemans n'auoient iamais gousté le vray Euangile, deuant

*Epistre de
Luther
fort sediti-
euse.*

*Iactance
de Luther
insolente.*

** Ausser
mon de la
destruction
de Ierusa-
lem.*

qu'il les eust enseignez : mais ces parolles prodigieuses nous font toucher au doigt la bestise du compaignon, entant que l'Allemagne ne fut oncques plus enucloppée de tenebres, que puy le temps qu'elle a reçu l'Euangile de Luther. Ce qui se verifie assez par les sectes si diuerses & monstrueuses, lesquelles croissent tousiours de plus en plus. Au demeurant, le Prince George ayant sceu par vne diligente inquisition, qu'il y auoit septante hommes à Lipsie, qui ne se contétoient pas de l'espece du pain, commanda tres-expressément que dans certain temps ilz changeassent d'opinion, ou de demeure. Au moyen dequoy l'Euesque de Mersbourg & quelques autres Prelatz & Docteurs trauaillerent fort de les reduyre au chemin de verité, ce qu'ilz faisoient à la priere du Seigneur George : mais à peine en y eut-il deux, qui voulurent recevoir meilleur conseil : les autres vuyderent la ville, lesquelz Luther selon la coustume consola bien fort, mentant cependant tout à son aise, comme il estoit bien seant à vn si noble Euangeliste. Car entre autres choses il a osé escrire, qu'à Lipsie on prohiboit l'Euangile & Sainct Paul, & quant & quant toute l'escriture sainte, & que lon y contraignoit les hommes à la renyer, donnans à ce leur foy & serment. Bref ce debonnaire Prince a enduré plusieurs choses semblables de ce meschant garnement : & certainement c'est vn grand creue-cueur, que ce desesperé ayt eu la puissance de detracter si superbement d'vn personnage de tel calibre & si entier, non seulement sans punition aucune, ains encor' au plaisir & contentement de plusieurs. Et toutesfois vous en verrez qui treuvent mauvais, si les Catholiques font quelque-fois la barbe de mesme à Luther, & à ses semblables imposteurs. Je voy bien qu'on veut, que tout ce qu'ilz souhaitent leur soit permis, & que les Catholiques ne puissent pas seulement dire le mot pour defendre la verité, à l'encontre des conuices, mensonges, & impostures de ces eshontez predicans. Que s'il en y a quelques vns si fort addonnez à Luther & à ses satellites, qu'ilz ne sçauoient souffrir qu'on les testonne quelque peu, ie croy fermement qu'ilz se despouilleroient de ceste leur opi

*George de
Saxe fait
vuyder la
ville aux
Lutheriens.*

*Mensonges de Lu
ther.*

nion, filz auoient leu quelz beaux tiltres d'honneur ilz se donnent les vns aux autres.

CE fut enuiron ce temps qu'il y eut grand discord & altercas entre l'Electeur de Saxe & le Prince George, non seulement à cause de la religion, mais encore pour quelques autres affaires ciuils. Mais pour-autant que Ernest, ayeul de l'Electeur, & Albert, Pere du Seigneur George, auoient entremeslé leurs terres & seigneuries au partage, si bien que l'un ne pouuoit faire guerre à l'autre sans endommager ses propres terres, ceste noyse fut vuydée par arbitres: & tout ce discord assez prudemment appointé par eux eut telle fin, qu'il fut enioinct & à Coclée & à Luther & autres, de ne point mesler le nom & la cause de ces Princes & des villes de leur appartenances, en leurs menuz debatz, qui concernoient seulement le faict de la religion.

CESTE année peu à peu les reliques des Donatistes, à sçauoir les Anabaptistes, se coulerēt en Vvestphalie, la secte de laquelle est diuisée en plusieurs parties, tout ainsi que iadis estoient les Donatistes, & à present les Lutheriens & Zuingliens: combien que tant ceux-cy que autres heretiques de nostre memoire, ont puisé la plus grande partie de leurs erreurs és fontaines de Luther. Il y a en Vuestphalie vne fort belle ville nommée Monster, & pour-ce qu'elle est merueilleusement forte, ceste racaille d'hommes perduz se retira en icelle, comme en vn port de salut & cité de refuge, deliberez d'y constituer vn Capitole ou vne Sion. Or cy-apres nous exposerons tout à l'aïse ce qui en aduint. L'adiousteray seulement, que ceste année à Anuers l'Eglise nostre-Dame brussa, sans qu'on peust sçauoir comment cela se feit.

APRES que l'Empereur eut ouuert le propos au Pape en Italie de celebrer vn Concile, & eut prins la volte d'Espaigne des le moys de Mars, le Pape despecha incontinct son Legat avec l'Ambassadeur de l'Empereur par deuers les Protestans pour les aduertir du Concile general qui deuoit estre. Venu que fut le Legat chez le Prince de Saxe, iceluy avec les autres Protestans requit quelque temps pour deliberer, ce

L'AN M.D.XXXIII. HISTOIRE DE TOUTES CHOSES

qu'il impetra aysément : mais par la responce que firent les Protestans par-apres, on cogneut trop clerement quel Concile ilz demandoient, & combien esloigné de la coustume des siecles passez. Car ilz ne vouloient pas que l'autorité du Pape, ny les loix des Pontifes, ny les opinions des escholes (comme ilz parlent) eussent voix ou autorité en cest affaire: ains vouloient qu'on agist contre le Pape mesme, comme coupable de ce qu'il auoit condamné Luther, & plusieurs autres choses par lesquelles ilz declaroient apertement, qu'ilz ne vouloient admettre aucun iuge au Concile, hors-mis l'escriure sainte, & encore de telle sorte, qu'il leur seroit loysible de l'interpreter à leur poste. Et voila comme ces dogmatizans Euangeliques se targuent à tous propos de la sainte escriure, bien qu'ilz ne veulent rien moins que la vraye & sincere intelligence d'icelle, laquelle il ne faut pas prendre du depraué iugement de ie ne sçay quelz meschans, mais du consentement Catholique de toute l'Eglise. Et combien que l'Apostre ayt tres-vrayement dict, que la lettre occit, mais que l'esprit viuifie, toutesfois ceux-cy s'aheurent sur la lettre, laquelle le plus souuent ilz violentent pour la tirer à leurs fau-ces opinions, mesprisans ce-pendant le sens & intelligence d'icelle. D'où est-ce doncques qu'ilz refuteront les heresies toutes repugnantes à la leur, veu qu'icelles ne se couurent pas moins de l'escriure qu'ilz font? Luther assure qu'il nous apporte vne pure doctrine, vn pur Euangile. Les Zuingliens, Anabaptistes, Zuencfeldians, Seruetiens en disent tout autant, lesquels neantmoins sont differens avec Luther en maintes choses. Qui sera le iuge legitime en ce proces, qui pourra bien decider cest affaire? Veritablement ce n'est pas le texte nud de l'escriure, lequel tous ceux icy tirent deuers eux, & se le desrobent à l'enuy: ains le vray sens de l'escriure, lequel nous prendrons beaucoup plus seur & certain du consentement Catholique de l'Eglise, que de ces folz cerueaux des heretiques. Que s'ilz ont en si grande abomination l'autorité & sentence du Pape de Rome, laquelle l'Eglise Catholique a tousiours cogneuë & reuerée,

Le Concile des Lutheriens.

D'où il faut pescher le sens de l'escriure.

combien plus iustement auons nous en execration Luther & semblables pestes, qui r'ameinent sur la terre les heresies pieça condamnées, & ne doutent (à la grande iniure du Dieu Eternel) de les appeller la pure parolle de Dieu & pure doctrine de l'Euangile? Certainement ç'a esté vne grande finesse de Luther & aultres dogmatizans, de ce qu'ils ont peu persuader aux Princes & Magistrats, qu'ils ne desiroient rien plus que le Concile: & neantmoins voyans que le Concile estoit pres à estre celebré, leur persuader encore q̄ ce n'estoit pas vn Concile legitime. Ce sont les fraudes par lesquelles ils ont deceu la miserable Alemaigne, & ont horriblement enchanté plusieurs, pouraultant que les hommes enyurez d'imprudēce se ruoyent par tout és precipices de la mort eternelle, où ils estoient conduicts par ces assassineurs d'ames, bien que ce-pendant ils pensoient auoir trouué la vraye vie & lumiere, & quant & quant auoir euadé les liens & impostures du Pape. Telles choses se lisent ordinairement és commētaires de Sleidan, duquel le principal soing est d'espandre l'opinion de Luther & autres heretiques de ce temps par toute la terre, & en infecter plusieurs, pendant qu'il amadouë les lecteurs par la volupté de l'histoire, mentant tousiours assez impudemment, & n'ayant pas tant de soing de dire la verité que de fauorizer à sa cause. En quoy faisant il a gagné cela enuers tous hommes sages & biē aduisez, que ses histoires n'ont plus d'autorité enuers eux, qu'ont celles d'un hōme qui n'a point de honte ny ne s'espargne de mētir de fois à aultre. Mais aussi fait-il cela par la liberté Euangelique, laquelle permet à ceux-cy toutes choses, pourueu qu'ils puissent croire que la seule foy les iustifie enuers Dieu. Et cela est par trop euidēt, que ces gallans ne se hontoient nullement de mensonge quelcōque, moyennant qu'ils puissent defendre leurs opinions deuant le peuple, & rēdre les Catholiques en la plus grāde hayne que faire se peult.

OR ay-ie voulu traicter cela vn peu plus prolixement, à fin que le Lecteur sçache, que les Protestans ont bien souuēt demandé le Cōcile, mais qu'ils ont esté induicts par leurs pre-

*Finesse de
not heresi-
ques.*

*Le but &
la vanité
de Sleidā.*

*Le Concile
que les he-
retiques de
mandent.*

dicans de repudier vn vray & legitime Concile, & d'en vou-
loir vn, lequel leurs ministres iugeroient estre fort propre &
commode à leur cause. Car comme ainsi soit qu'en tous les
Conciles generaux la premiere authorité ait esté cōcedée au
Pape de Rome, ces beaux predicās veulent ranger à leur plai-
sir le Pape, & veulēt qu'il soit deffendeur de ce qu'on luy met-
tra sus: ce qui s'ourd d'vne insolence tres-impudente, n'estans
ignorans que tousiours il a esté fait le contraire de cela es Cō-
ciles legitimes, quoy qu'ils ayent fait accroire tout l'opposite
à leurs Princes & Magistrats ciuils. Qui plus est, ils ont faict
hayr & mespriser le Pape si fort, que tous ceux qui se sont en-
roolez souz l'enseigne de Luther & de tous ses complices &
adherans, ne l'estiment point autre que le vray & propre An-
techrist. Car il est expedient à ces Euangelistes, que le siege
Romain perde tout son credit & authorité, sçachans bien que
par icelle toutes les heresies du temps iadis ont esté totalemēt
renuersées & esteintes.

*Diuers chā-
gement en
Angleter-
re.*

A v moys de Septembre de ceste année presente, Anne de
Boulen, femme du Roy Henry d'Angleterre, enfanta Eliza-
beth, pendant que Madame Marie estoit contraincte de qui-
cter le tiltre du Royaume: laquelle neantmoins par vne mu-
tation admirable reueint à la couronne, & feit *cōstituer pri-
sonniere ceste Elizabeth, pourautant qu'elle estoit soupçon-
née d'heresie, & n'eust, peult-estre, euadé la mort, si elle n'eust
esté sauuée par les prieres du Roy Philippe, lequel pour lors
auoit en mariage la sus-dicte Marie. Mais Marie demeura biē
peu de temps Royne, & ayant remise sus la religion Catholi-
que en Anglererre par ie ne sçay quelle vertu heroïque, alla
de vie à trespas, empoisonnée, comme lon pense. Au moyen
dequoy Elizabeth luy succeda, laquelle de rechef chāgea la
religiō, emprisonna quelques Euesques Catholiques, & sema
l'exécrable doctrine de ce Sacramentaire Calvin par tout le
Royaume. Toutesfois ceste heresie n'a pas vogue en Angle-
terre toute seule, ains vne prodigieuse confusion de diuerses
heresies destruisit ce pauvre Royaume Angloys.

** Il parle
de ce qui
s'est faict
beaucoup
depuis.*

C E S T E année, le Pape à la priere du Roy François festāt
rendu

rendu à Marseille, celebra les nopces de Madame Catherine sa niepce, fille du Seigneur Laurent de Medicis le ieune, laquelle il auoit au-parauant fiancée avec Henry de Valoys, filz du Roy François: ce qui fut fait à la grand' ioye & allegresse de tout le peuple François, & parlementoit le Pape fort souuent & fort familièrement avec le Roy. Dont l'Empereur conceut quelque mauuaise opinion, pensant que cela fust le cōmencemēt de quelques nouueaux troubles. Mais le Pape, qui deuoit auoir la fille naturelle de l'Empereur à sa maison, * pensoit estre chose à luy fort auantageuse, fil pouuoit enter son sang sur vne plante Royale & tresnoble: & pensoit d'auantage, qu'il luy failloit beaucoup priser l'alliance de l'Empereur & du Roy pareillement, comme il appartenoit au Vicaire de nostre Seigneur en terre, qui doit se monstrer pere commun à tous, & doux & debonnaire à vn chacun, selon ce que la raison nous dicte. Outre quelques villes du costé de la mere situées en Auvergne, Henry Duc d'Orleans eut pour douaire cent mille escuz, avec vne infinité de perles, pierres precieuses, & force meubles de prix inestimable. Ces nopces eussent peu sembler à quelques vns n'estre pas d'assez haut calibre, mais ce ne fut sans cause que le Roy prefera aux soupçons des hommes l'alliance du Pape, lequel auoit chez soy vne corne de Licorne haute de deux coudées, enclose sur vn bāse d'or, fort richement elabouré, & la donna au Roy François pour oster la poison de toutes viandes. Car on diēt que ceste Corne suē, si on apporte quelque poison sur table. Le Roy luy fait aussi present d'vn tref-riche tapis, fait à la façon de Flandres. Pareillement il donna au Cardinal Hippolite de Medicis vn Lyon appriuoisé d'vne grādeur desmesurée, lequel luy auoyt esté enuoyé par Hariaden Barberousse de Mauritanie, avec Ambassadeurs. Or de retour que fut le Sainct Pere à Rome, comme la coustume est que chacun die ce que bon luy semble d'vn autre en vne cité libre, aussi lors aduint qu'vn interpretoit ces nopces d'vne façon, & l'autre de l'autre. Ce-pendant l'Empereur receuoit aduertissement par ses amys & allies, qu'il se dōnast garde du Roy François, qui sembloit à quel-

*Mariage
d'Henry
Duc d'Or
leans avec
Madame
de Medi-
cis, depuis
Royne de
France.*

** Il entēd
celle qu'es-
pousa A-
lexandre de
Medicis.*

ques vns ne pouuoir demeurer en repos. Car ce Roy auoit le courage haut, & ne pouuoit bonnement digerer la perte qu'il auoit reçeuë à la bataille de Pauie, & depuys estant mené en Espagne: aussi verrons nous, que l'estat Chrestien ne demeurera pas long traict de temps sans estre affligé de guerre. Luther ne tenant conte du pacte faict à Marpurg, escriuit ceste année à ceux de Francfort, qu'ilz n'eussent aucune communication avec les Zuingliens. Sur cela Bucer s'en va à Zurich, où il se purge d'auoir quitté leur party, & ce pendant ce caut & fin compaignon taschoit de persuader aux ministres de Zurich, que Luther ne discordoit qu'en paroles avec Zuingle, & non de faict, ce que neantmoins ilz ne voulurent oncques croire. Dites moy donc si cela ne procedoit pas d'une audace prodigieuse, que luy sçachant trop bien que Luther abhorroit les Zuingliens, toutesfois il voulut persuader aux Zuingliens, que Luther n'auoit aucun different avec eux, sinon que de paroles. Y a-il chose que ceux cy n'entreprennent, qui par quelques enchantemens se parforcent de faire, que les hommes pensent ne voir point ce qu'ilz voyent à yeux ouuers? Or telz hommes sont ceux, qui par vne temerité incroiable n'ont point douté d'affirmer, que deuant eux l'Allemagne n'auoit point eu le vray Euangile, & qu'ilz l'ont apporté les premiers. Et combien que ce mensonge si impudent, accompagné d'une merueilleuse bestise soit aliene de toute raison, toutesfois plusieurs l'ont embrassé comme la vraye lumiere de l'Euangile. Mais la posterité en sera le iuge, & ne pourra oncques s'esmerveiller assez, comme les espritz cauteleux ont si bien peu de ceuoir les Chrestiens.

*Bucer
veut per-
suader que
Luther &
Zuingle
s'accorder.*

*Chroni-
que de Se-
bastien Franc* QUELQUE Zuinglien, nommé Sebastien Franc, escriuit vn grand liure en Aleman, intitulé les Chroniques, diuisées en trois parties. La premiere desquelles contient ce qui a esté faict depuys Adam iusqu'à Iesus Christ: la seconde ce qui s'est passé depuys Iesus-christ iusqu'au sacre de l'Empereur Charles: & la troisieme plus meschante & proluxe que nulle des autres, ne faict autre chose que combattre contre la religion Catholique. Aussi fut si grande l'impieté, vanité, & mesdisance de

cest œuvre, que Messieurs de Strasbourg bannirent l'auteur de leur ville, & prohiberent à l'imprimeur de vendre aucuns de ses liures. Neantmoins on s'y porta si finemēt, que plusieurs exemplaires furent espars d'un costé & d'autre, lesquels les hommes lisent à leur plaisir, & quant & quant à leur damp.

CESTE année les Lutheriens, desireux d'acquiescer l'opinion d'estre prophetes, respondoient plusieurs choses parmy le peuple du dernier iugement, non seulement qu'il deuoit estre tout incontinent, mais encore remarquoient ilz le propre iour auquel il deuoit estre: quoy que Iesus Christ die, quand à ce iour & à l'heure, personne ne le sçait, nō pas mesme les Anges, mais seulement le Pere celeste. De maniere que plusieurs citoyens ne vouloiēt point bastir, ny les laboureurs semer les terres, & plusieurs gentils-hommes cuydās passer de ce siecle en l'autre ce iour propre qui deuoit estre le dernier, receurēt leur Cene. Toutesfois ceste folle persuasion des faux prophetes s'en alla en iaserie, & l'experience monstra qu'ilz estoient fort gentils prophetes: ce qui aduint à Vuitteberg & en quelques autres villes. Les Anabaptistes se sont fort seruis de ceste sorte d'espouuantes, par lesquels ilz deceuoient volontiers les moins deniaizez. L'ancien heretique Manes fut bien plus ruzé, lequel ne voulant estre repris de mensonge en ses prognostications, qui eussent faict mentiō des choses aduenir, controuua mille bayes & mensonges des choses du tēps iadis.

L'AN 1534. au mois de Ianuier les Anabaptistes s'emparerent de la ville metropolitaine de Vestphalie, dictē Munster, en laquelle l'heresie Lutheriēne n'auoit eu place que biē tard, pour ce qu'en icelle il y a plusieurs hommes Ecclesiastiques. Mais icelle sy estāt vne fois coulée, pareillemēt ceste vermine des Anabaptistes, qui faisoient des plus modestes du monde, sy insinua. Lesquelz voyans que leur troupe s'estoit grandement accreuē peu à peu, ilz font vne sedition, & occupent le palais, les autres ne resistās pas beaucoup, soit pour ne vouloir respendre le sang humain, soit qu'ilz craignoiēt que par ceste occasiō l'Euesque n'entraist dans la ville, qui n'en estoit gueres loing avec bonnes forces de Cauallerie & Fanterie. Mais les

Anabaptistes cassent tous les Magistratz, & premierement ilz permettent que ceux qui ne se vouloient point ioindre à eux, s'en allassent leurs bagues sauues, sans toutesfois rien emporter des viures à eux appartenans, lesquelz ilz retenoient: mais apres ilz pillerent totalement tous ceux qui refusoient de se mettre de leur costé, & ainsi les chassoient hors la ville, iusqu'à oster le corail aux enfans, & iniurier les pauvres habitâs qui vuydoient, les appellans payens. Car ceste peste d'hommes s'est mis cela en teste, qu'il faut auoir tous ceux qui ne veulent estre de leur secte, pour payens & mescreâs. A raison dequoy non seulement les Catholiques, ains bien encore les Luthériens furent contrainctz de se sauuer à la fuyte, les Anabaptistes occupans la ville, lesquelz se mettent és maisons des Chanoines, Senateurs, & autres Magistratz: & ne se fussent arrestez là, sans proiecter quelque malheur pour la terre vniuerselle, si Dieu n'eust redigé en fumée leurs sanglans desseings. Cela dōna belles affres à l'Euesque de Munster, & à bō droict l'occasionna de chercher meurement les moyens, pour couper chemin à vne audace si desbordée. Il y eut lors en la ville vn cousturier Hollandoys, lequel ces miserables enchantez par luy, créèrent leur Roy. Car le meschant fin & cauteleux leur persuada, que Dieu luy auoit enioinct par vn esprit, qu'il fust faict Roy d'Israël & de iustice, comme Daud, & qu'il entendist sa domination & ses droitz par toute la terre, & qu'e ce faisant il feist mourir tous ceux qui refuseroient d'embrasser la loy, & d'estre subiectz à iustice. Or il n'y a chose plus clere que ceste-cy asçauoir que les Anabaptistes ont puisé l'occasion de cetuy leur erreur si pestilente és escriptz de Luther, quoy que ses disciples se peinent beaucoup à l'en-purger. Car qu'est-ce qu'il enseigne qu'une tres-laide liberté de la chair, sans se soucier aucunement des loix humaines? Ce cousturier doncques estant estably Roy, ne laissa occasion quelconque pour s'en-yurer en toutes les voluptez qu'il seroit possible d'excogiter. Car comme la plus part de ces Euangeliques sont fort conuoireux de cela, de peur que couchans tous seulz il ne mourussent de froid, ce que leur grād maistre Luther leur

*Leur cru-
auté &
meschan-
ce.*

*Vn coustu-
rier est
leur Roy.*

*Meurs &
habillemēts
du Roy.*

a enseigné : aussi nostre cousturier espousa plusieurs femmes. il institua sa Court Royale & ses Princes, chacun desquelz auoit certaine charge & office en sa maison, & les auoit habillez tous de robbes faictes d'or & d'argēt, comme il estoit luy-mesme, ce qu'il auoit desrobé és Eglises. Sur le chef il portoit vn Diademe à trois couronnes, faicte du meilleur or qui se peust trouuer, & si auoit vne chesne d'or toute garnie de pierrierie, & vne pomme d'or où estoit engrauee vne petite croix avec ceste inscription, *Roy de Iustice sur la terre*. Finalemēt son espée estoit de prix inestimable. Il ne s'oublia pas d'accoustre fort richement la Roynie, qui fut celle laquelle estoit la plus *La Roynie* autorisée entre ses femmes, & quant & quant toutes ses seruantes. Encores constitua-il certains iours de la semaine, esquelz il oyoit les faictz & doleances des citoyens. Quand il *Comment il alloit en public.* sortoit hors du logis, il estoit tout enuironné des grandz & officiers de sa Court : incontinent apres luy suyuoient deux pages montez à cheual, dont celuy qui estoit à dextre portoit la Bible & la couronne, l'autre l'espée desguesnée. Car il faut entendre que les Anabaptistes ne font pas moins bouclier de l'Euangile & esécriture, que les Lutheriens, de sorte que Melancthon escriuant contr' eux, ne les a sceu conuaincre que par la Tradition Ecclesiastique : quoy qu'autrement tous les Lutheriēs ne facēt q̄ crier, qu'il ne faut riē admettre q̄ l'escriture expresse. On luy auoit dressé à la place vn haut throne embelly d'vn tapis de drap dor, où il failloit que ceux q̄ venoient *Son tilivame.* playder leur cause, pour honorer le Roy fleschissent deux foys le genou, & puy se prosternassent entieremēt en terre. Brief il seroit trop lōg de mettre par estat toutes les resueries de ceste audace admirable, qu'o voyoit en celle ville. Or à fin que leur heresie fust espandue de long & de large, le Roy voulut qu'o enuoiaist quelques vns aux villes voy fines : ce qui fut aussi tost effectué. Vn des prophetes à son de trompe conuoque tout le peuple en la nef de la grand' Eglise, tellement qu'ilz vindrent iusqu' à quatre mille hommes armez, lesquelz trouuerēt le soupé prest, où il y auoit platé de toutes viādes, & fassierēt tous, le Roy & la Roynie les seruans. Sur la fin du sou-

Cene admirable. pé, le Roy presente du pain à chacun d'eux, disant ces motz: Prenez, mangez, annôcez la mort du Seigneur. La Royne pareillement presente la coupe, disant, beuvez & annoncez la mort du Seigneur. Car pourquoy ne s'attribueroient ilz l'office de prestre, attêdu que Luther les a enseignez que tous hommes sont prestres? Mais à la verité ceux qui ne veulent acquiescer à la sentence de l'Eglise Catholique, & pensent que tous doiuent necessairement recevoir le S. Calice, sont dignes d'avoir vn tel & si entier sacrement souz les deux especes. Ceux que nous auons desia dict ayans bien soupé, quelques mille autres qui auoient esté cepédant à la sentinelle, vindrēt souper. Acheué que fut le soupé, le susdict prophete seant en vn lieu haut demande si tous ne vouloient pas obeir à la parolle de Dieu. Iceux respondēt qu'oui: & lors il adioute, que la volôre du Pere estoit, qu'on enuoiast certains hommes de la ville pour semer la doctrine qu'ilz auoient embrassée. Et apres on en recita en vn rouleau vingt & huiet, dont les six furent deputez pour Osnaburg, & autant pour Cossfeld: huiet autres furēt enuoyez à Susat, & les autres huiet à Vvarendorp. Et ce faict, le Roy & la Royne, avec tous les autres seruans & les Apostres deleguez, allerent souper à leur tour. Comme le Roy estoit à table, il se leue de prinsaut, disant que le Pere luy commâdoit quelque chose: de faict il met sus à vn soldat qu'il estoit trahyste, & luy tranche la teste. Il retourne à la table, & commēça à tenir propos de l'acte si sanglant & horrible qu'il auoit commis, qui rendoit le soupé encore plus execrable. Apres cela, on despesche messieurs les Apostres, à chascū desquelz le Roy feit donner vn escu, outre ce qu'ilz auoient pour acheter toutes choses necessaires, à fin qu'ilz le laissassēt és lieux où on ne voudroit recevoir leur doctrine, en tesmoignage de perdition. Ces choses sont pleines d'admiratiō & de resuerie, & qui serōt peu croyables à la posterité: mais y a-il choses que ceux n'excutēt volontiers, qui sont priniez de la lumiere de verité, & de leur bō sensaussi par le breuuage des diables? Ces folz doncqs s'en vont selon le cōmandemēt, & crient horriblemēt és lieux à eux assignez, admonestans les hommes de faire penitence,

*Apostres
esleuz, &
enuoyez
pour pres-
cher.*

*Le Roy
tue vn ho-
me par re-
uelation.*

*Les Apo-
stres de
Munster
preschent,
& sont
penduz.*

filz ne vouloient bien tost perir. Ilz s'en vont aussi au parquet
 des Iuges, ils espendent en terre vne robbe deuant le Magi-
 strat, sur laquelle ils iettent l'escu par nous mentionné, & as-
 seurent qu'ils sont illec enuoyez du Pere pour leur signifier
 la paix, laquelle receuant, il leur falloit mettre tous leurs biens
 au cōmun: & s'ils refusoient de ce faire, ils tesmoignoient par
 cest escu, qu'ils auoient repudié la paix à eux présentée. Car
 ils disoient que le temps predict par les Prophetes estoit ia ve-
 nu, auquel Dieu vouloit que Iustice fust exercée par toute la
 terre: & alors que le Roy, faisant son office, auroit semé & es-
 pandu la Iustice par tout le monde, que Iesuf-christ dōneroit
 le Royaume à son Pere. Les Anabaptistes ont quelque chose
 & en leurs parolles & en leurs façons de faire, qui semblent
 estre de grande religion, mais à verité dire ce sont hommes
 saisis de Satan, qui les bouleuerse çà & là comme il luy plaist:
 de maniere qu'ils monstrent assez, que leur religion accom-
 pagnée de tant de crimes & meschancetez, n'est pas sortie de
 pieté, ains d'une pure folie & illusiō des diables. Si furent prins
 ces Apostres, & premierement on les interrogea sans suppli-
 ce, & puis apres en y adioustant la torture, à sçauoir sur leur
 foy, sur la fortificatiō de la ville, & sur choses semblables. En-
 tre autres ils respondirent, qu'eux seuls auoient la vraye do-
 ctrine, ny plus ny moins que tous les Lutheriens, tous les Sa-
 cramentairés, & tous autres heretiques de ce siecle se iactent.
 Or comme ces Apostres, que nous auons dict, ne peussent e-
 stre desarçonnez de leurs phrenesies, ils furent condamnez à
 la mort: mais vn d'eux eschapa. Ce-pendant la ville de Mun-
 ster estoit assiegée de tous costez, & fut le siege si estroit,
 qu'ils estimoient iouir de grandes delices, quand ils trouuoient
 quelques rats & souris, iusqu'à vser de cuir & peaux cuites au
 lieu de pain: & neantmoins le Roy n'auoit indigēce de chose
 quelconque. Aduint que cōme plusieurs mouroyent de faim,
 vne des femmes du Roy esmeuē de pitié enuers ces pauvres
 hommes, dist aux autres, que la calamité de ces miserables ne
 luy sembloit pas estre agreable à Dieu. Ce qu'ayant le Roy
 entendu, il la meine quand & ses autres femmes à la place, &

*Munster
est assiegée*

*Le Roy de
celle la Roy
ne pour a-
voir esté
pitoyable.*

luy auale la teste de dessus les espaules: sur quoy les autres se mettent à chanter, & rendre graces au Pere celeste, de façon que le Roy mesme mena la danse, & persuada au peuple de faire le semblable, bien qu'il n'eust pas de quoy mettre sous la dent. En ce temps Luther escriuit contre ces Anabaptistes de Munster, desquels nous parlons, & ce qu'il auoit enseigné, il le reprend en eux par vne merueilleuse finesse & dissimulation: escriuant entre autres choses, qu'il n'y auoit erreur si absurde & mal assaisonné, que le diable ne meist en teste aux hommes. Ce que veritablemēt nous voyons estre vray en Luther mesme, qui a & dict & fait en ses mœurs & en sa doctrine choses si laides, honteuses, & absurdes, qu'il n'y a rien au monde plus admirable, que comment il a peu trouuer vn homme qui l'aye creu: ce que non sans cause ie repete si souuent.

La ville est prise par trahison. LA disette de toutes choses fut si extreme en la ville durant le siege, que deux hommes s'en fuyrent à l'Euesque, desquels il apprint par quel costé la ville estoit forceable: & lors l'Euesque en-horta les assiegez, qu'ils se rendissent, pourautāt qu'il vouloit pardonner au peuple, la plus part duquel eust biē voulu estre hors de là: mais l'Euesque auoit esleu douze Capitaines, qui y prenoient si bonne garde, que le peuple ne se pouuoit remuer. Les habitans de la ville en presence de leur Roy, respondirent par Bertrand Rotman, lequel auoit premierement esté Lutherien & puis Anabaptiste, que iamais ils n'abandonneroient leur premiere apprehension. Ainsi doncques mille cinq cens hommes conduicts par le fuitif se rendirent par le fossé au bouleuert, où ayans tuez les gardes, trouuerent le guichet ouuert, entrerēt dans la ville, & ayans quelque peu combatu avec les citoyens ouurirent la porte de la ville au reste de l'armée. Lors toutes les troupes entrerent à la foule, & icelles passoyent tout au fil de l'espee, pardonnans toutesfois à quelques vns qui requeroient pardon. Le Roy & Cuipperdolling furent adonc prins. Ce meschant belistre de Rotman, qui auoit esté le premier autheur de changer la religion Catholique en celle ville, se rua tout desesperé au trauers des ennemis, desquels il fut massacré sur l'heure, & enuoyerent

uoierent son ame à tous les diables. Apres cela, le Roy & ses ^{Le suppli-} Conseillers Cnipperdolling & Crechting, ayans esté en pri- ^{ce du Roy} son quelque moys à la mocquerie de tout le monde, furent ^{& des au-} punis l'an 1536. d'un supplice qu'ilz meritoient fort bien. Car ^{tres.} estans liez à quelques troncs, ilz furent tenaillez longuemēt, & apres, d'un coup d'espée au trauers du corps on leur osta la vie. Finalement ilz furent tous enfermez en des cages de fer, & penduz au sommet de la plus haute tour de la ville, le Roy estant au milieu & plus haut que tous les autres. Et ceste fut la fin de ces meschans, qui certainement machinoient quelque chose comme iadis les Goths & Vandales, si la prouidence diuine, qui assiste tousiours aux choses humaines, n'eust rompu & brisé leurs desseings. Toutesfois l'heresie ne fut pas esteinte pour cela, ains encor' aujourd'huy en plusieurs lieux ceste sorte d'hommes se voit sans estre punie aucunemēt, mais neantmoins au grand peril de ceux entre qui ilz conuersent.

A v moys de Decembre de ceste année les pasteurs Euan ^{Synode} geliques feirent vn Synode à Constance, duquel Bucer auoit ^{des Euan} esté le motif ie ne sçay de quelle autorité: & en iceluy fut ^{geliques à} traité diligemment par quelz moyens on pourroit conuenir ^{Constance,} avec Luther sur le faict de l'Eucharistie. Or il n'y a personne ^{sans prouf} qui sçeuſt assez dire les ruses & finesſes, par lesquelles Bucer se parforça de faire venir d'accord les Lutheriēs avec les Zuingliens, tellement que ce ne fut sans en encourir la reprehension de ceux de Zurich. Ce qu'il faisoit, voyant bien que ce discord estoit subiect à la mocquerie d'un chascū. Il auoit appellé à ce synode les ministres de Zurich, mais ilz ne voulurent point venir: neantmoins ilz declarerent par escrit ce qu'ilz sentoient touchant la Cene, & monstroient le chemin pour estre d'accord avec Luther. Cest escript fut receu & approuué par les predicans de Basle, Scaffusen, de Saint-Gal, & quelques autres de Suaube: mais messieurs de Berne y trouuoient quelque chose à redire. Que dirons nous en vn mot? Il n'y a point de paix entre les meschans, dict le Seigneur: aussi ^{Isaie. 57.} iamaïs ne peut estre faict accord entre ces sectaires dogmatifans. Bucer fut euoqué de ce colloque par les lettres du Lant-

L'AN M.D.XXXIII. HISTOIRE DE TOUTES CHOSES
grauē & de Melancthon, à fin qu'on aduifast plus meurement
les moyens pour establir quelque concorde, mais tout cela se
pratiquoit en vain. Car les deux parties soustenoient leur sen-
tence opiniaistrement, & ceux de Zurich ne vouloient ad-
mettre les enchantemens de Bucer.

*Luther cō-
tre la Mes-
se angli-
caire.*

*Pro. 2.
Pro. 18.*

*Luther
dist que le
diable luy
a enseigné
à escrire cō-
tre la Mes-
se.*

LUTHER meit enuiron ce temps son liure de la Messe
anglicanaire & de la consecration des prestres en lumiere. En la
preface d'iceluy il menace de chasser bien loing le chresme,
& les couronnes des prestres, & aussi se vante que par la parol
le de Dieu les indulgences ont esté abolies, le Purgatoire es-
teint, les pelerinages supprimez, & plusieurs semblables ido-
latries des Papistes, & honneurs du Dieu d'Auarice. De ma-
niere qu'on peut à bon droit adapter cōtre luy ce passage de
l'escriure: qui se resiouyssent lors qu'ilz ont mal-faict, & se de-
lectent és choses tres-mechantes: & celuy là aussi, quand le
meschant est venu au profond des pechez, il n'en faict plus de
conte. Mais par-ce qu'il a foudroyé en maintz endroitz de
l'Allemagne plusieurs choses des dessus-dictes, non par la pa-
rolle de Dieu, ains à l'instinct & suasion du diable, il voulut
que tout le monde l'entendist. Au moyen dequoy il afferme
en ce sien liure, qu'il vint en dispute avec le diable touchant
la Messe & choses semblables, & qu'en fin il fut surmōté par ses
raisons, & qu'il les approuua comme estans inuincibles: de
maniere que horsmais il n'y aura p̄rsonne si stupide & gros-
sier, qui ne puisse palper de ses mains, que la doctrine de ce
mal-heureux n'est pas issue de Iesus Christ, comme il se van-
te, ains de Satan. Il confesse en ce lieu-là, que le diable luy est
quelque-fois apparu de nuit, & qu'il l'accoustra si mal, qu'il
luy sembloit deuoir mourir sur l'heure. Il adioust pareille-
ment qu'il est asseuré, qu'Oecolampade & quelques autres
de telle paste ont esté poussez à mort soudaine par les dardz
& lances enflammées du diable. Or il ne faut iamais entrer en
dispute avec le diable, & quand bien il diroit la verité, si ne le
faut-il pas croire. Et neantmoins Luther l'a approuué, comme
il disputoit contre la Messe. Je veux bien, p̄uys que Luther n'a
douté d'escrire cela, que tous ceux qui marchent souz son en-

seigne, aillent en tenebres avec leur Euangeliste enseigné du diable, & qu'ilz se iactent de la pure doctrine de Luther. Quand à nous, nous voulons estre enseignez non pas du diable, mais de Iesuf-christ. Au mesme liure il appelle le Pape le Roy des ratz, laquelle iniure redonde à l'Empereur, à tous Roys, Princes, & magistratz Catholiques. Il diét que les Euefques sont les larrons de Dieu & sacrileges: les prestres, angulaires & damnez.

IL appelle la Messe abomination, l'espouuantable sacrifice de l'autel, fient, boué, ordures: ce que le diable mesme à peine oseroit dire, & appelle les ordres sacrez, le chresme rançeux & puant. Toutes lesquelles choses sont si vaines qu'il ne les faut point refuter par argumens, mais bié les punir fort rigoureusement. Car y a-il homme en son bon sens, qui puisse douter que cela n'a peu proceder, sinon que d'un cueur, qui estoit le retraict de toute ordure & infection? Las! où est allé ce zele qui honoroit le siecle de noz ancestres, lesquels certainemēt n'eussent pas permis qu'un si execrable blasphemateur eust vescu vne minute d'heure. Neantmoins nostre aage miserable a embrassé de grande gayeté tous les dictz & faictz d'ice-luy: & combié que nous cognoissons par trop de iour en iour le mal qui en est issu, toutesfois i'ay grand peur que la posterité l'experimentera bien plus aigrement. Mais, reuenans à nostre propos, par-ce qu'il sembloit que Luther en ce sien escrit de la Messe angulaire, eust conueni avec les Zuingliés & les Vvaudoys, il escriuit vne epistre en Aleman, en laquelle il par le encore plus honorablement de la Messe, & entre autres il y a cecy: plaife à Dieu d'enuoyer cest esprit aux hommes, que quand ilz oyent ce nom de Messe ilz tremblent, & qu'ilz se remparēt du signe de croix comme contre l'abomination de Satan. N'est ce pas cela souhaitter, que le perpetuel sacrifice de l'Eglise fust aboly, qui par tous les siecles passez a esté honoré, & en fin sera esteinct par l'Antechrist? Plustost deuroiēt les Chrestiens s'armer du signe de croix, toutes & quantes fois qu'on dit le moindre mot du monde preiudiciable à l'honneur de la sainte Messe. Au reste, vn peu deuāt Luther auoit escrit

Blaspheme de Luther.

Faire le signe de la croix, cōtre la Messe.

*Luther ap-
prouue &
reproue
la Messe.*

quelque chose à la louange de la Messe, en la Visitation de Saxe, & auoit dict qu'elle estoit principalement vtile aux vi- uans. Pareillement les Lutheriens confessent en la Confessio d'Ausbourg & en l'Apologie, qu'ilz celebrent la Messe en grã de reuerence. Mais Luther s'oubliant de tout cela, se prend à la Messe, monstre à tout le monde quel il est, & nous faict ve- oir qu'il ne se faut pastrop fier à sa doctrine, veu qu'il n'a point de honte d'escrire en si peu d'années choses si diuerses de la Messe. Et toutesfois ces contradictions & opinions repugnã- tes sont si frequentes és escriptz tãt de Luther que de tous ces gaste-papiers d'heretiques de nostre temps, qu'il n'y a hõme qui les sçeust nombrer. Or puy que Luther confesse, que Sa- tan luy a appris ce qui faict pour la contumelie de la Messe, nous deuons estre plus certains que la Messe est vne chose fort agreable à Dieu, veu que le diable ne l'eust iamais op- pugnée s'il eust sceu que c'estoit chose à luy plaisãte. Car cest esprit damné ne se bande iamais à l'encontre de ce qu'il sçait bien n'estre desplaisant à Dieu, ains seulement cõtre ce qu'il sçait estre faict selon sa volonté, & à son honneur.

*Il est bon
que le dia-
ble ayt par-
lé contre
la Messe.*

*Sage edict
du Roy de
Poloigne,
pour les e-
studians.*

ENVIRON ce temps le bon & Catholique Sigismond Roy de Poloigne, par vn sien edict assez seure cõmanda, que tous les estudians à Vvittemberg, qui seroient de ses terres de Poloigne, eussent à retourner en leur païs, & defendoit quãt & quant aux autres d'y aller. Car ce tressage Prince preuoyoit bien, si la ieunesse desbauchée suçoit vne fois l'erreur de Lu- ther, qu'à grand' peine pourroit elle estre guerie, ains que tout le Royaume de Poloigne, qui encor' en ce tẽps là estoit tref- catholique, seroit en danger d'estre infecté de ce poison. Et à la mienne volonté que tous les autres Princes eussent vsé de telle seuerité en leurs terres: sans faute les erreurs de Luther ne se fussent espandus si auant.

*Zeile du
Roy Fran-
çois, contre
les hereti-
ques.*

CESTE année furent affichez certains placardz sentans l'heresie de Zuingle, à Paris tant à l'hostel du Roy qu'ailleurs en la ville, & autres lieux du Royaume, par lesquelz on disoit mille iniures & indignitez de la sainte Eucharistie. Dont le Roy François fut fort marry, & pour remedier à vn tel crime

& scandale feit faire vne procession generale, en laquelle il alloit à pied & la teste descouuerte, portant en sa main vne torche, accompagné de la Roynie Eleonor, de Messieurs ses enfans, & de rous les grandz Seigneurs de sa Court, avec vn peuple innombrable. L'aprèsdinée il feit vne harague au peuple, par laquelle il exhortoit vn chacun à extirper ceste execrable heresie, & dist haut & clair, qu'il voudroit couper volontiers celuy de ses membres, qu'il scauroit estre entaché de ceste peste. Et pareillemēt furent punis certains heretiques, afin qu'ilz seruissent d'exemple aux autres. La sorte du supplice estoit léte & fort terrible. On les lioit à vne potence, & estoient guindez en l'air, puis ilz estoient deualez dans le feu, & soudain remontez, iusqu'à tant que le bourreau couppoit la corde, & les laissoit tomber dans la flamme. A la verité ce Roy fut fort soigneux, de conseruer & retenir inuiolée la religion Catholique en tout son Royaume: & eussent peu estre aysemēt esteintes toutes les heresies deriuées des fontaines de Luther, n'eust esté l'inimitié & guerre qu'il a eu presq̃ tousiours avec l'Empereur Charles, laquelle a esté cause de la ruïne incredible de toute la Chrestienté. La processio generale, de laquelle nous venons de parler, fut faicte le moys de Ianuier 1535. Laquelle Sleidan a fort malicieusemēt escrite, comme plusieurs autres choses, disant entre autres motz que les Parisiens & peuples de France ont recours à la vierge S. Geneuiefue en leurs plus grandes destresses, comme à la derniere ancre & seul port de salut. Et c'est la coustume que les Lutheriens & semblables trouble-festes blasonnent meschamment les Catholiques envers les ignorans & simples hommes, comme si nous honorions les Sainctz pour Dieu, & que nous les inuoquissions non comme intercesseurs, ains comme Dieux. Combien que encores ne nous veulent ilz pas permettre, que nous inuoquions les Sainctz, ou que nous leurs demádions ayde: car ainfi parle Melancthon en sa Confessio tant de foyz recuyte. Neátmōins ilz sont discordans en ceste matiere. Car Oecolapade, * (pour
laisser les contradictions de Luther cy dessus par nous alleguées en partie) dict que les Sainctz bruslans au ciel de leur

*Sleidan ca
lomme l'hô
neur de S.
Geneuief*

** Sur la
fin de l'an
1532.*

De l'inuocation des Sainctz.

charité, ne cessent de prier pour nous. Pourquoy doncq' nous veulent ilz defendre l'inuocation des Sainctz, lesquelz Oecolampade tesmoigne prier incessammēt pour nous: Est-ce chose deshonneste de leur demāder, ce qu'ilz ne doutent faire pour nous? Certainement l'inuocation des Sainctz est prouuée par tant d'exemples, & tesmoignages des l'antiquité de l'Eglise, que personne ne sçauoit assez detester l'impudence de noz gens, en ce qu'ilz la veulent blasmer & brocarder. Et maintenant que l'inuocation des Sainctz est abolie en plusieurs lieux, Dieu nous est si fauorable, & ce siecle si doré, que homme du monde ne pourroit denombrez les pertes, calamitez & maux innumerables que les prouinces souffrent. Or iadis quand telz malheurs suruenoiēt, on faisoit des litanies publiques, & pour plustost apaiser l'ire de Dieu, on imploroit les Sainctz, tellemēt qu'on auoit repos: mais les nouueaux Euan-geliques ont chassé cela, afin que leurs effortz n'eussent aucun empeschement.

Calomnie des heretiques sur les œuvres.

SEMBLABLEMENT ilz ont mis en teste à plusieurs ignorans, que nous donnons telle force & efficace à noz bonnes œuvres, que par icelles seules nous pouuōs meriter la grace de Dieu & estre iustifiez, cōme si nous reiettiōs Iesu-christ & sa grace: laquelle calomnie est merueilleusement grossiere & absurde, & toutesfois creuē de plusieurs, tant bien ilz ont presché ce mensonge. Et c'est la cause pour laquelle on deteste si fort tous les professeurs de la vie monastique, cōme s'ilz sappuyoient seulement sur les œuvres, & non sur la grace de Dieu, dont ilz les appellent communément les sainctz ouuriers. Car quand à eux, ilz n'attribuent aucune efficace aux bonnes œuvres, en quelq' grace qu'elles puissent estre faictes, ains soustiennent que nous sommes iustifiez par la foy seule. Or puy que l'escriture nous assure, que celuy qui n'a charité demeure en la mort, c'est chose trop euidēte que la foy sans charité ne peut iustifier. Car la vie de la foy c'est la charité. Parquoy toutes & quantes fois que la iustification est attribuée à la foy, il est necessaire d'entendre celle foy, laquelle est coniointe avec esperance & charité. Oste la charité, certaine-

I. Io. 3.

Vraye doctrine des bonnes œuvres.

ment la foy demeure morte, laquelle ne peut iustifier & donner vie. Voyons doncques le fruit qui est issu, depuis que ceste foy sans œures a eu vogue. Certes le fruit est, qu'ils n'ont aucun soucy de faire bonnes œures, ains font grand' chere incessamment, & lors principalement, que le temps nous semond & inuite à continence, à manger peu, à penitence, à reformation de mœurs & toute pieté: à sçauoir la sainte semaine, durant laquelle l'Eglise a accoustumé de celebrer la memoire de la passion de nostre Seigneur par tout le monde. O quantes fois les a-on veuz en ceste semaine, & mesmes le iour du Saint Vendredy (lequel pourroit esmouvoir les pierres pour la piteuse mort du fils de Dieu) courir çà & là avec les mômons, banqueter, haüzer les gobelets, pailarder, exercer toute sorte d'immondicez & petulances: & qui pis est, se glorifier de ces faicts heroïques comme seans fort bien à l'Euangile & à liberté d'icelle? Mais, peult-estre, parlons nous trop amplement de cela.

Ce fut ceste année que le Roy d'Angleterre prenant trop à contrecœur, que le Pape auoit ietté sentéce contre luy touchant le diuorce de Madame Catherine, Tante de l'Empereur, se souzleua entierement de l'autorité & obeïssance du Pape de Rome, & sappella le Chef de l'Eglise Anglicane au colloque qui fut tenu à Vuesmestre: & quāt & quāt vsurpa les annates ou reuenus des vaquans, se feit payer les decimes, & feit plusieurs choses semblables, par lesquelles il denigra tout le los & honneur qu'il auoit acquis par le passé en defendant la religion Catholique, cōtre les aboys de Luther & autres de semblable farine. Aucuns escriuent que ce Roy laissa le chemin de ses premieres vertuz, par la flatterie & persuation d'un grand Seigneur de sa Cour. Et en cela nous voyons l'instabilité des choses humaines, de maniere que nous deuons bien retenir l'aduertissement de S. Paul, qui est debout, ou qui le pēse estre, se prēne garde qu'il ne tombe. Au demeurant, il n'y a rien plus detestable & pernicieux que ces flatteurs, lesquels desireux de s'aggrandir, font des chatemites, & le plus souuēt sont ceux qui enseignent à mal-faire souz le masque de quel-

*Le Roy
Henry
d'Angle
terre est
heretique.*

*Les fla-
teurs ga-
sent les
Princes.*

que honesteté, tellement que ceste maniere de rongeurs a corrompu bien souuent les Roys & Princes addonnez à vertu.

*Mort du
Pape Cle-
ment.*

PEU de temps après le Pape Clement alla de vie à trespas d'un mal d'estomac qui ne le laissoit gueres, le 26. iour de Decembre, en l'an 57. de son aage, & l'onzieme de son Pontificat. On pensoit que le grād Roy François deust faire guerre au Seigneur François Sforce, Duc de Milan, mais on estime aussi que la soudaine mort du Saint Pere empescha ceste deliberation. On dict pareillement que ce Pape changea de maniere de viure par le conseil de quelque medecin, & que cela fut cause d'abreger bien fort ses iours, quoy qu'il fust fort de mēbres, & de bon temperament: mais il ne creut que trop au conseil de ce medecin. Or le Cardinal qui pour lors estoit respecté plus que tous les autres, estoit Alexandre Far-

*Electio du
Cardinal
Farnese
au Papat.*

nese, natif de Rome. Et d'auantage le Pape Clement l'aimoit & cherissoit vniquement, de sorte qu'il fouloit dire, que si le Pontificat se laissoit par heredité, il le luy eust laissé tres-volontiers: & en oultre pria grandement le Cardinal Hippolyte de Medicis, qu'il trouuast moyen que Farnese luy succedast au siege. Ce qui aduint. Car si tost que le Pape Clement fut decedé, trente-cinq Cardinaulx entrerent au Conclauē, & fut par eux esleu vnanimement, par grande concorde, simplicité & religion, Alexandre Farnese, qui estoit Doyen des Cardinaulx. Aduint que ce Pape ne fut point esleu à la maniere des aultres, à scauoir par voix escrites en vn billet cachetté & ietté dans vn calice, ains fut déclaré Pape par le suffrage & consentement de tous les Cardinaulx: & estant sacré le quatriesme iour de Nouembre, se feit appeller Paul troisieme de ce nom.

*Le Lant-
graue re-
met vlrich
en ses ter-
res d'Vuit-
temberg.*

CESTE année le Lantgraue de Hesse, ayant conuenu avec le Roy François, feit assembler vn camp, & mena guerre au Roy Ferdinand, qui s'estoit emparé du Duché de Vuittemberg, en ayant chassé le Prince Vlrich. Le Roy Ferdinand estoit content de decider ce different selon les loix, mais cestuy-cy faisoit cependant marcher sa gendarmerie, tellement qu'ayāt mis en route les troupes de Ferdinand, desquelles Philippe Conte Palatin estoit superintendant, aupres de la ville de Lau-
fein,

fein, le Prince Vlrich fut remis en ses terres. Finalement la paix fut faicte avec quelques conditions, entre le Roy Ferdinand, le Lantgraue, & Vlrich. Restitué que fut le Duc Vlrich, il chassa tous les Catholiques, & receut les predicans Lutheriens & Zuingliens. Car il y auoit vn ministre Lutherien à Stutgarde, & vn Zuinglien à Tubinge. Dont sourdit quelque debat entr'eux, lequel ce cauteleux Bucér voulut accorder, & s'y peina grandement: mais le Duc voulut que la Confession d'Ausbourg fust entierement receuë, & ainsi le Lutheranisme chassa le Zuinglianisme en ceste contrée. En mesme temps aussi l'Archeuesque de Mayence & George Prince de Saxe, moyennerent la paix entre Ferdinand & l'Electeur de Saxe, lequel iusqu'alors se faschoit de recognoistre Ferdinand pour Roy des Romains.

DVRANT ce temps l'Empereur ayant belle peur que le Roy François n'attentast quelque chose contre luy, à cause principalement de ce que ledict Sieur auoit estably des legionnaires par tout son Royaume de Frâce, à la maniere des anciens Romains, & qu'il auoit quelque intelligence avec certains Potentatz d'Allemaigne: meit tout son esprit à pacifier l'Italie. Car desia estoit escheu le terme des treues faictes à Bologne avec le Pape & quelques autres, auquel temps la gendarmerie Espaignole sortit d'Italie à la priere du Pape, & se retira en diuers lieux, au grand auantage des François, filz eussent voulu faire guerre. En quoy faisant, il semble que l'Empereur Charles aye plus faict pour le Pape, que sa dignité & ses affaires ne permettoient: mais il faisoit le tout pour auoir paix & tranquillité, & neantmoins ne satisfaisoit pas à quelques vns, qui ne se reioysoient gueres, dequoy sa puissance augmentoit avec son bon-heur. Donqués pour lier plus estroitement Francisque Sforce à soy, il luy donna en mariage Christine sa niepce, & fille de Christierne captif, Roy de Dānemarc, laquelle il feit venir de Flandres: & furent les nopces celebrées à Milan royalement, & en telle magnificence que le peuple la pouuoit à peine supporter, mais toutesfois on endura tout, pour l'esperoir qu'on auoit que la paix ne se rom-

L'Empereur pacifie l'Italie

Les nopces de François Sforce

L'AN M.D.XXXIII. HISTOIRE DE TOUTES CHOSES

L'Empereur retira ses amys, proit pas de long temps. Il feit pareillement de beaux presens à tous les grands Seigneurs d'Italie, & donna à André d'Orie la Principauté de Melphe, & si augmenta les gages aux parens d'iceluy, & à tous les Capitaines des galleres. Car à vray dire toute la force du pais de Genes, & le faict de la marine gisoit és mains & au conseil de ce grand guerrier. Et ainsi l'Empereur aduisa de pres à ses affaires, apres auoir confirmé l'alliance des Princes & grandz Seigneurs.

Beau discours de Gritti, filz du Duc de Venise, faisant pour le Turc. PRESQUE au temps que le Pape Clemēt finit ses iours, Loïs ou Luigi Gritti, filz d'André Gritti, Duc de Venise, ayant déia acquis la faueur & bien-ueillance de Solyman Empereur de Turquie, & prest d'obtenir quelques grandz estatz, fut enuoyé avec commandement & autorité de Solymā en Hongrie, pour assister à tout ce qui seroit deliberé pour la guerre ou pour la paix: mais il fut tué par les Hōgres: afin que les hommes apprennent comment la fortune faict tourner la chance en vn instant, & que partant ilz appliquent toutes leurs forces à acquerir les grands honneurs du Royaume celeste. Enuiron la saison que Solyman s'acheminoit pour aller en Armenie, & que Hariaden Barberousse prenoit la route d'Italie & d'Afrique avec vne grosse flotte de vaisseaux Turcs, Gritti estant party de Constantinople avec plusieurs Turcs à pied & à cheual, & mesmes avec quelques Italiens & Hongres, passa le Danube & vint en Valachie, laquelle anciennement estoit appellée Mœsie la haute, & maintenant est diuisée en la Moldaue, & Transalpine. Delà, s'estant premierement acquis l'amitié de Pierre, qui adonc estoit Gouverneur en Moldaue, alla en Transsylvanie, en laquelle estoit Gouverneur Americ, Euesque de Váradin, duquel nous parlerōs cy apres d'auantage. Gritti estant là, faisoit accroire, & vouloit que tous les differentz fussent rapportez à luy comme lieutenant de Solyman. Il faut entendre qu'il auoit eu vne belle maison és faubourgs de Constantinople, où il y auoit vn fort plaissant & delicieux iardin: laquelle il auoit donnée gratuitement à Abraïm qui estoit le plus grand Bascha, tellemēt que par le bon rapport de cestuy-cy, Solyman portoit fort bonne

Gritti s'en orgueillist en Transsylvanie.

affection à Griti: & Abraïm l'ayât laiffé en Hongrie, auoit defendu la ville de Bude contre l'armée de Ferdinand, voire auoit-il esté estably Threforier general du Royaume d'Hôgrie par Iehan le Vayuode: & son filz Antoine auoit eu du mefme Sieur l'Euefché d'Agrie fort riche & de merueilleux reuenu. Mais se mescognoiffant par tant de faueurs & prosperitez, il attenta certaine chose au preiudice du Gouverneur de Trans ^{De l'Euef} sylvanie, qui fut cause de luy accourir fes ans. Celuy-là estoit, ^{que de Va} comme nous venons de dire, Americ Cibach, Euefque de Va ^{radr, Gon} radin, homme de noblesse & de puissance grande, de vertu ^{uerneur de} loüable, le fecond apres le Roy en ce temps là, & qui auoit grand credit. Or estoit-il fâché de voir, que la force du Turc ^{Transsyl-} f'augmentoit de iour à autre en ce Royaume si opulent, apres ^{manie.} y auoir niché vne fois, & au moyen de ce lon estimoit qu'il ne pourroit iamais endurer ce Griti. Mais Griti fut bien plus fin, ^{Cruauté} faisant mourir ce Gouverneur par vn Hongre, combien qu'o ^{de Griti.} ne fçache pas à la verité s'il luy commanda de l'occir, ou seulement de le happer & l'amener à soy, afin de l'enuoyer enchesné à Constantinople. Quoy que ce soit, l'Hongre aualla la teste à Americ, qui ne pensoit à rien moins qu'à ceste trahyson, & fut apportée à Griti, qui feit semblant d'estre marry de cest acte & de sen repentir, pour-autât que Hierosme de Lascoco, qui estoit là present, ne trouuoit cela gueres bon: & disoit que vrayement Americ n'auoit esté occis qu'à bonne & iuste cause, mais neantmoins il eust voulu que plustost il eust esté prins, que tué. Le massacre du Gouverneur estât paruenue aux oreilles des hommes, ilz conçurent aussi grand desplaisir de cela qu'il est possible, & tous ensemble desseignerēt valeureusement la vengeance d'un acte si lasche & meschant. Plusieurs ^{Griti est} hommes se ioignirent, & en peu de iours s'assemblerent qua ^{tué par le} rante mille que de pied que de cheual, desquelz le principal ^{peuple.} Capitaine estoit Maïlat, qui auoit esté grand amy d'Americ. Ce-pendât Griti fut delaiiffé de tous ceux à qui plus il se fioit, cōme coustumierement les hommes ne se monstrēt pas beaucoup constans en temps d'aduersité, & sayfy d'une angoyffe & amertume d'esprit tomba en maladie. Finalemēt esperāt auoir

recours aux Moldaues, il se meit à la fuite : mais ne trouuant point les Moldaues, il tomba és mains de ses ennemys, & en fin on luy trancha la teste. Les grandz Seigneurs & parés d'Americ, selon la coustume qu'on dict estre en ce païs-là, trempèrent leurs cottes d'armes au sang d'iceluy, afin d'engrauer plus auant la memoire de si iuste vengeance, combié que ceste coustume a ie ne sçay quoy de barbare. Quand à celuy qui auoit faict le coup du Gouverneur, il fut miserablement defaict & taillé en pieces. Apres cela, on fouilla par les accoustremens de Griti, & fut trouué en ses chausses vn sachet où il y auoit des perles & pierres precieuses inestimables, de maniere que ceste proye estoit estimée quatre cens mille escutz. Aucuns estiment que Griti fut né à Constantinople, & nourry tousiours entre les Turcs, & que Solymen en faisoit grand cōte à la recommandation d'Abraïm, qui estoit le plus authorisé en la Cour du Turc, de sorte que Griti eust peu estre installé és grandz honneurs, s'il eust voulu renier la religion Chrestienne, & que partant il estoit à demy esbranlé pour ce faire. Mais cela n'est pas beaucoup vray-semblable, principalement pour ce que son pere estoit desia sur ses vieux ans, lequel il n'eust voulu par vn acte si detestable mettre en vne angoisse d'esprit, & peut-estre le conduire à la fosse : & qu'aussi il auoit porté en Hongrie tous ses biens & richesses, afin de viure entre les Chrestiens bien loing de Constantinople. Conclusion, par sa mort si soudaine quiconque iouist à plaisir des succés de la fortune, est admonesté de ne s'y plonger par trop : car lors qu'icelle nous semble embrasser & cherir, c'est lors que d'un seul coup elle nous renuerse du haut en bas. Neantmoins on ne sçauoit persuader à vn tas d'hommes, qu'il est ainsi, lesquelz cherchèt la foelicité en ceste vie miserable : & toutesfois quand ilz pensent qu'ilz sont au cōble & feste de bō-heur, c'est lors que la plus extreme calamité les surprend. Il y a infinis exemples de cecy, mais les espritz des hōmes sont si fort enchantez, qu'ilz n'y aduisent point. Nous auons recité cy dessus, cōment Hierosme de Lasco Polonois feit tant à Constantinople, que Solymen veint en Hongrie avec vn ost infiny, pour restablir le

*Coustume
barbare.*

*Richesses
que Griti
auoit sur
luy.*

*Admo-
nition.*

Vayuode en son Royaume. Cestuy de Lasco apres la mort de *Hierosme de Lasco en peise.* Griti aiant esté par le Vayuode appelé à Bude, fut tourmenté miserablement, pour descourir les desseings de Griti. Mais à l'instance priere de Sigismond Roy de Poloigne, il euada la mort, & se retira en Poloigne. Voyla doncques la misere qui le talonna de pres, pourautant qu'il n'auoit douté appeller en Hongrie les Turcs ennemys diametraux des Chrestiens : qui n'estoit autre chose, que, pour l'appetit de gratifier à Iehan le Vayuode, amener en Hongrie l'entiere ruine des Chrestiens.

A v mesme réps que Griti alla de Constantinople en Hongrie, Solymán le grand Empereur de Turquie, bruslant d'un *Desseings de Solymán* desir de reduyre en son obeissance l'Empire de tout le môde, (ce qu'il pensoit faire, s'il pouuoit vne fois subiuguer les Persans & Africains) meit sus deux grosses armées pour cōquerir ces deux nations. Car il scauoit bien qu'ayant surprins l'Afrique, il auoit l'entrée facile en Espagne, Sicile & Italie. Celuy qui luy souffloit pour lors aux oreilles, & l'esguillonnoit à cōquerir l'Afrique, estoit Hariadé de Metelin Barberousse, Roy d'Alger en Numidie qui auoy sinela Mauritanie: lequel pour *Hariaden & Horuc freres Mahometains* ses frequentes victoires estoit fort estimé en la Cour de Solymán, de maniere que l'ayant appelé à soy il le feit Bascha, & son Amiral. Cest Hariaden auoit vn frere nommé Horuc, lequelz deux estoient filz d'un Mahometain de l'Isle de Metylyn: & prenans vn vaisseau feirent l'estat d'escumeurs de mer, foubz le grand corsaire Camal. Ce-pendant se voyans augmētez grandement en forces, nauires, gens, & butin, prindrent la volte de Mauritanie, pour d'illec emporter quelque proye. Alors deux freres cōtestoient pañ-ensemble, à qui demeureroit le Royaume d'Alger, dont l'un appella à son ayde (mais à son damp) ce pirate Horuc. Lequel le feit volontiers, mais souz main il prenoit garde à l'esprit & aux forces de ceste nation: tellement que s'apperceuant de l'inconstāce & du discord des Maures entr'eux, il ne laissa eschapper ceste occasiō, ains chaf *Horuc se fait Roy d'Alger.* sant plusieurs hommes s'empara du Royaume d'Alger. Apres il exploicta maintes choses fort heureusement, mais ce ne fut pas pour long temps, par ce qu'il fut prins par la cauallerie Es-

paignolle & More, & incontinent mis à mort. Son chef fut porté en Espagne, dont plusieurs s'esjouirēt au possible, mais ceste ioye fut changée en grand' tristesse, quād son frere Harriaden luy succeda, qui auoit ia deuoré en sa phantasie l'Empire d'Afrique, & qui depuys donna bien des affaires aux Africains & mesmes aux Chrestiens: emportant des Chrestiens, des *Barberous se va vers Solyman.* Africains, & des Espagnolz victoires fort insignes, dont ilz estoient fort au bas. Estant doncques Solyman retourné d'Hôgrie, esmeu du los & renom de cest homme, (cōme nous auōs desia dict) il le manda querir, dont le Barbare fut fort ayse, & sans delay se mit à chemin avec quelques presens pour offrir à Solyman, lequel fut merueilleusement esiouy de sa venue. Le Barbare discourut fort grauement maintes choses, & signāment des Chrestiens, remonstrant les partialitez qui estoient entr'eux. Proposoit aussi de chasser Muleasse Roy de Tunes, duquel il disoit mille maux. Or n'auoit-il faute d'enuieux, qui se faschoient de voir qu'il auoit l'oreille de l'Empereur, de facon qu'on ne le laissoit plus entrer si souuent chez Solyman, lequel en fin luy commanda d'aller trouuer Abraim, lequel estoit lors en Syrie avec armée. Et combiē que l'autre s'apperceust que cela tendoit à son ignominie, estant toutesfoys desireux de commander, il se rendit à Abraim par terre, duquel il fut bien fort caressé, & en escriuit le sus-dict fort auantageusement à Solyman: tellement qu'estant de retour à Cōstantinople, il fut receu fort gayement pour la recommandatiō qu'en auoit faicte Abraim, & de rechef discourut amplement de la guerre qu'il falloit faire en Afrique, principalement contre Muleasse. Or auoit-il avec soy Roscer, frere du Roy Muleasse, chassé quelques années au-parauant de sa maison, lequel il monstroït aux Baschaz, pour leur faire entendre l'occasion de guerroyer en Afrique. Solyman ayant meuremēt consideré les propos que Barberousse luy auoit tenuz, le constitua Bascha, le fit son grand Amiral, luy donna de sa main propre l'eseigne, le sceptre, & le glauiē, l'exhortāt d'effectuer ce qu'il auoit narré. Il haūça doncques les voiles, ayant vne flotte de quatre-vingts galleres & quelques fustes, chargé d'argēt prins

*Il va en
Syrie trou
uer Abra
im Bascha*

*Il est fait
grand A-
miral &
nuyt aux
Chrestiens.*

sur l'espargne: & costoyât l'Italie il feit vn merueilleux degast sur les ports, mesmes il print & saccagea quelques villes, tua & emmena plusieurs Chrestiens. Et delà il tourna de si grande vistesse vers l'Afrique, qu'il y fut plustost arriué, qu'on ne le pensoit auoir laissé la coste d'Italie. Il ne faut pas dire si Rome eut belles affres, & si Dieu n'eust ietté les yeux de sa misericor de sur les Chrestiens, sans faulte ceste horrible beste les eust bien d'auantage endommagez. Or singla-il si legerement en Afrique, qu'il surprint le Roy Muleasse en desarroy.

MAIS devant que de vous raconter ce qui en aduint, ie vous reciteray quelque chose d'Afrique, de Muleasse & de son Royaume, pour recreation. Iadis l'Afrique fut peuplée en maints endroits par les Romains, qui y enuoyoit habiter le peuple pour la fertilité du païs, apres que ceste enuyeuse de l'Empire Romain, Carthage, fut destruicte. La prouince estoit gouvernée par les Vice-consuls iusqu'au temps que les Vandales y entrerent, lesquels Bellisaire desconfit. Apres cela, elle vint en la puissance des Empereurs de Grece, lesquels y enuoyoit tous les ans des Capitaines & Gouverneurs. Finalement les Sarrazins en chasserēt les Chrestiens par force d'armes, & y planterent la superstition de Mahomet: & qui plus est, les Mores establirent leur siege en la contrée que maintenant on nomme Grenade, & constituerēt vne eschole à Cordouë avec vne Bibliotheque fort belle, où lon enseignoit les lettres Arabiques à la ieunesse, tellement qu'en ce lieu-là y a eu plusieurs bons esprits, & hommes de singuliere doctrine. Toutesfois on ne s'amusoit pas tant aux lettres, qu'on ne se souciait de la guerre, de sorte que les Sarrazins subiuguerēt presque toute l'Espaigne. Mais six cens ans apres, presque de nostre memoire, Ferdinand Roy d'Espaigne, par vne singuliere faueur de Dieu tout-puissant chassa les Mores de toute l'Espaigne, & signamment de Grenade. Or aujourd'huy les plus puissans Roys d'Afrique sont ceux de Tunes & de Fez, toutesfois ceux de Tunes sont beaucoup plus puissans, & d'ancienneté de Royaume, & de noblesse de sang: de sorte qu'on souloit leur demander les loix & choses sacrées. A trois iour-

*Discours
des terres,
& mœurs
des Afri-
cains d'au-
jourd'huy.*

*Mores chas-
sez d'Es-
paigne.*

*Roys de
Tunes &
de Fez.*

*La ville
de Caruē-
ne.*

nées au dessus de Tunes est la ville de Caruēne, en laquelle y a vn Temple fort ancien, & vn college des plus saints Prestres de leur faulce religion : au moyen dequoy celle ville est libre & iouist de plusieurs franchises, & apporte-on les corps des grands Seigneurs Alarabes & Mores pour estre inhumez en icelle, par-ce qu'ils estimēt que ces prestres peuuent beaucoup, pour impetret la beatitude celeste à ceux qui y sont enterrez. Les terres du Roy de Tunes ont d'estenduē quatre cēs lieux sur la coste de la mer, en venant du Ponant au Leuant.

** C'est le
pays de
Maroc
Ducal,
Tesserec.*

Quand aux Roys de Fez, ils ont leurs terres en la * Mauritanie Tingitane, & bataillent sans cesse avec les Portugallois, comme estans bien munis d'armes & de cheuaulx. Les autres prouinces & villes, & nommément celles qui sont au bord de la mer sont seigneuriees par quelques Roytelets, qu'ils appellent Sceques. Et quand aux prouinces qui sont au cueur de l'Afrique, elles sont habitées par les Numides dictz cōmune-ment Arabes, lesquels sont vagabonds, & bataillent contre les

Arabes.

Africains, nourrissent quelques querelles, s'addonnent à la guerre perpetuellement, remettans tout le soing du labourage & de la nourriture des bestes aux seruiteurs, principalement les Ethiopiēs, pour-aultant qu'ils s'estiment tous estre fort nobles, comme ceux qui se iactent d'estre issus de ce vieil estre des Carthaginois. Ces pais prennent depuis le fleue du Nil iusqu'à la grande mer Atlantique, auquel espace ils sont diuisez en plusieurs parties, & quoy qu'ils soyent vagabonds, toutesfois ils ont certains limites de leur Empire en quelques villages. Ils viuent fort maigremēt, à sçauoir de figues seiches, de dattes, de bouillie, & de lait aigre. Que s'ils peuuent prendre quelque chose à la chasse ou par les faucōs, c'est lors qu'ils sont grand chere. S'il y a quelque cheual qui court vistement & plus que les aultres, ils l'acheteront à pris fort grand, bien qu'ils soient à demy-nuds & tres-pauures : aussi est-ce le plus beau patrimoine qu'ils ayent. Car s'il n'ont point de guerre, ils ne font autre chose que desrober & aller à la chasse. Les femmes y sont fort subiectes, iusqu'à faire les offices plus abiects à leurs maris. Les gens de cheual, aussi biē en esté qu'en hyuer, vsent

*Le viure
des Numi-
des.*

vsent d'une longuerobbe faicte de peaux, pour ce qu'elle les ^{Leur vestement.} garde du vent, & si les garde de l'ardeur du Soleil. Tant y a qu'ilz ont ceste persuation, bien qu'il nous semblast estre assez ridicule de se couvrir de peaux en temps d'esté. Ilz se frottent le corps, ilz se plient les membres & les estendent, & par ces exercices ilz ferment le chemin aux maladies, & se preseruent du tourment des medecines, & si viennent fort vieilz, tellement que bien souuēt ilz rendent l'ame sans aucune doulleur au milieu de leurs amis & familiers. Doncques de ceste nation fut issuë Lentigesie mere de Muleasse, Roy de Tunes, par l'en-hortemēt de laquelle Muleasse vsurpa le Royaume. Car de vingt & deux freres qu'il auoit, il en tua quelques vns fort felonément, aux autres il creua les yeux d'un fer chaud, ^{Cruauté merueilleuse de Muleasse.} & si meit à mort aussi barbarement quelques siens neueux: & plusieurs autres choses executa-il cruellemēt contre son sang, contre les amis de son pere, & mesmes ses belle-meres, de maniere qu'à bon droit il encourut la hayne de tout le monde, & en fin à cause de sa cruauté intolerable il fut priué de son Royaume. Son frere Roscet estoit son aîné, lequel à la poursuite de plusieurs Capiraines Numides, feit guerre à Muleasse: mais n'ayant gueres bien faict ses besongnes, se retira à Barberousse, lequel peu apres le mena deuant Solyman à Constantinople, où il fut enfermé, quoy qu'en prison libre, & feit-on courir le bruiēt qu'il seroit remis en son Royaume par le secours & puissance de Solyman. Car comme Muleasse estoit hay de plusieurs, aussi Roscet estoit aimé à l'opposite. Parquoy Barberousse se seruant de ceste occasiō s'empara de quelques lieux des appartenances de Muleasse, faisant acroire aux peuples que Roscet estoit en la flotte, lequel on attendoit en bñe bonne deuotion en la ville de Tunes, & croissoit ce desir à mesure qu'on voyoit la flotte Turquesque s'approcher, qu'on descouuroit desia de la tour de la ville. Sur ces entrefaictes on conseilla à Muleasse, que pour sauuer sa vie il eust recours à vne legere fuyte, ce qu'il feit. Et lors Barberousse fut ^{Les Turcs s'emparēt de Tunes.} regen dans la ville à merueilleuse ioye de tous les citoyens: mais iceux scachans que Roscet n'y estoit pas, se mutinerent,

Rr.j.

& de ce pas voulurent r'appeler Muleasse: de fait, ilz prirent les armes, & se ruerēt brusquement sur les Turcs, mesmes coururent au chasteau, lequel ilz voulurent forcer, mais en vain. Car les Turcs feirent vne faillye sur ces Africans qui ne sçauent rien de l'art militaire, & sortans par deux portes du chasteau feirent grand carnage des citoyens, tellement qu'à grand' peine Muleasse peut eschapper: n'eust esté le Roytelet Dorac, la seur duquel estoit mere de Muleasse, qui le reçeut en sa fuyte, le garda, & le defendit fidellement, & le teint en sa maison, iusqu' à la venue de l'Empereur Charles, qui le remeit en son Royaume, en ayant chassé Barberouffe, comme il sera veu cy apres. Or voyant ce Barberouffe que la diserte des viures estoit grande, & esmeu encore de quelque autre raison, capitula avec les habitans de Tunes, & sçeut si bien iouer du plat de la langue, qu'il les feit iurer d'estre obeissans à Solyman. De maniere qu'ayant bien assure ses affaires à Tunes, il amadoia facilement les grandz Seigneurs Numides, comme l'esprit de ces hommes est fort venal & inconstant & ainsi en uoyant des Turcs ça & là, reçeut les villes du Royaume par composition, voire les maritimes mesmes en bien peu de iours. Et voyla comment le Royaume de Tunes veint en la puissance de Solyman, par l'industrie de ce grand pirate Barberouffe. Et n'y a point de doute que les voy fines prouinces des Chrestiens n'eussent esté beaucoup endommagées de cest accessoire des Turcs, si l'Empereur n'eust vn peu apres chassé les Turcs de ceste place, comme nous dirons incontinent.

*Solyman
s'apreste
contre les
Perse.*

CE fut aussi en cest an, que Barberouffe partant de Constantinople, Solyman feit marcher son armée en Perse, pour faire guerre au Roy Tammase. Car ia estoit allé de vie à trespas Ismaël Sophi, qui pour ses proïesses fut surnommé le grand, laissant quatre enfans ses heritiers, desquelz Tammase, comme estant l'aisné, eut le Royaume, les autres eurent quelques belles prouinces selon le vouloir du pere, pour leur appennage. Tammase se souuenant de l'iniure que son pere auoit reçeue par Selym, haïssoit la race des Ottomans

comme peste, & desseignoit déia en son esprit la guerre qu'il luy faillloit faire contre Solyman. Les nations subiectes à present à l'Empire Persan, sont maintenant appellées Agiamiens, & pour la plus part suyuent vne superstition differente de celle de Mahometh, * dequoy nous auons parlé lors que nous faisons mention d'Ismaël Sophi. Ce pendant on faisoit tousiours quelques escarmouches des terres du Turc sur les Per-
* Au cō
mencemēt
de ce liure.

Abraïm estoit pour lors celuy qui tenoit le premier rāg entre les Bascharz, qui esguillonnoit fort Solyman à guerroyer les Persans, quoy qu'a son damp, (comme ie diray incontinent) & auoit cestuy-cy plus de faueur & d'autorité enuers Solyman, que nul des autres. Or me semble-il bon de dire vn mot de cest Abraïm, afin que ceux qui ont tousiours le vent de fortune en pouppes, apprennent par son exemple à venir sages, & qu'estans recors de la condition humaine, ilz puissent voir qu'il n'y a rien de stable, rien de certain, rien de permanent en ceste vie miserable. Abraïm doncques né en vn meschant village d'Epire, fut esclau des sa premiere enfance d'vn grand Seigneur de Turquie nommé Scander Bassa, où estant imbu de la superstition de Mahometh (bien qu'aucuns estiment, qu'il ne fust iamais Mahometain de cueur & d'affection) apprint incontinent à lire & à escrire en Arabe, comme celuy qui estoit doué d'vn grand & subtil esprit. Il apprint aussi quelques autres choses, au moyen desquelles il plaisoit fort à son maistre & à la troupe de ses femmes, de maniere que Solyman estant encore bien petit, on le luy enuoya pour present d'vn plaisant, accort, & ingenieux esclau: & ainsi fut tousiours nourry avec Solyman, tellement que peu à peu il le poussa es plus grands estatz & richesses. Et en fin il fut Ve-

*Discours
sur la vie
d'Abraïm,
qui fut
tres puis-
sant en
Turquie.*

*Le credit
qu'il auoit*

fir entre les Baschartz, qui est le plus grand estat qui se treuve. D'auantage Solyman luy donna le scel du secret royal, & non seulement l'auoit-il pour son Conseiller, ains encor' en table & ailleurs ne se pouuoit passer de sa compaignie, de façon que voire les plus grandz & puissans l'honoroient comme vn second Empereur de Turquie. Mais ceste trop grande faueur seruoit d'arre pour son mal-heur futur. Se sentant ainsi fauorisé du Roy, il l'incitoit à faire guerre aux Perses, disant qu'on ne deuoit point guerroyer les Alemans, peuple tousiours demeurant inuincible, & qu'iceux estans bigarrez & partialisez entr'eux se defferoient eux-mesmes, tellement que les Turcs en viendroient à bout fort aysément par ce moyen. Brief il meit si bien le feu en teste à Solyman, qu'il se delibera d'aller faire la guerre au Leuant, ce qui cedit au grand prouffit de

** Aucuns
disent le
contraire.*

la Chrestienté. Aussi estoit cest Abraïm fort *debonnaire & courtoys enuers les marchandz Chrestiens, & leur faisoit beaucoup de bien & de faueur en tous endroiçz, dequoy les Turcs monstroient bien qu'ilz en estoient desplaisans. Solyman estoit dissuadé de mettre cecy en execution & de sa mere, & de sa femme Roxolaine, lesquelles vouloient mal à Abraïm, & l'appelloient souuent Turc Hypocrite, & Chrestien de cueur. Toutesfois Solyman feit plus de cas du conseil d'Abraïm, que de l'aduis de ses femmes. Au moyen dequoy il il faict leuer gens en toutes partz, & les meine en Perse, suyuant le chemin que luy monstroit Vlaman, lequel quittant Tammase s'estoit venu rendre à Solyman, & tendoit ceste armée en Armenie. Venu qu'il fut iusqu'à Caim ville d'Armenie, les Turcs estoient fort estonnez, dequoy en vn si grand traict de chemin les Perses ne s'estoient point encore mon-

*Tammase
Roy de
Perse fuyt*

streuz pour leur tenir teste. Mais le desseing de Tammase estoit de laisser les villes, & se retirer és montaignes, iusqu'à tât que les Albanois & Iberiens ses cheuaux legers fussent venus, qui auoient accoustumé d'aller deuant les Perses armez de pied en cap. Ce qu'ayant Solyman entendu par ses espions, feit marcher son ost tout à l'encontre de luy. En ce chemin il entra dans la grand' ville de Tauris sans aucun sien domma-

Tauris.

ge, & en sortit incontinct, s'en allant en Sultanie guerres loing *Sultanie.*
 delà, laquelle iadis estoit vne des principales villes des Per-
 ses, mais estant saccagée par ce grand Tamburlan Tarrare, re-
 tient encore ses anciens ornemens des temples. Comme So-
 lyman seiournoit en ceste ville, soudit vne tempeste & orage *Orage sor-*
 des prochaines montaignes, qui sont toutes couuertes de nei- *tant des*
 ges en toutes saisons, & cela aduint vn peu deuant le iour S. *montai-*
 Gregoire, en Mars. Ceste orage faisoit, que le vent pouffoit la *gues cou-*
 neige de la cyme des montaignes, sur les champs esquelz So- *uertes de*
 lyman attendoit Tammase, & estoit si grand qu'il abbatoit les *neige.*
 tantes des Turcs, tuoit le bestail & principalement les cha-
 meaux, faisoit mourir plusieurs gendarmes, de maniere que
 Solyman y pensa demeurer pour les gages. La calamité estoit
 d'autant plus grande, que c'estoit la nuit, & craignoit-on l'en-
 nemy, combien qu'il fust assez loing de là. Aucuns affer-
 moient que cela estoit aduenü par l'enchantement & char-
 me des Magiciens. Le lendemain les rayons du Soleil qui luy
 soit profiterent beaucoup à plusieurs, qui estoient effrayez &
 du froid & de la peur. Ayant Solyman refraischy vn peu son
 ost, il marcha vers l'Assyrie suyuant le conseil d'Vlaman le
 fugitif, & sans labeur aucun iouyst de la ville de Babylone ou *Les Cali-*
 Bagdet, en laquelle est le siege des Caliphes, qui sont maistres *phes.*
 des choses sacrées, & partant grandement respectez de tous
 les Roys Mahometains: & est la coustume ancienne que le
 Caliphe confirme les Roys d'Assyrie, de sorte que Solyman
 voulut bien receuoir les deuises & ornemens de ce Royaume
 par la main d'iceluy. Ceste ville est sans doute plus grande *Quelle*
 que toutes autres, si vous regardez l'ancien bastiment, & vou- *ville est*
 lut Solyman hyuerner en icelle, mais à present elle est assez *Babylone.*
 despeuplée: on y voit de grandz iardins ioignant les maisons,
 de grandz champs labourables, & des parcs pour tenir be-
 stes captiues & encloses. D'icelle en nauigue communement
 iusqu'en la ville d'Ormus fort excellente, & située sur le goul- *De la vil-*
 phe de Perse, en laquelle le Roy de Portugal a maintenant vn *le d'Or-*
 Lieutenant, & y croist la religion Catholique merueilleuse- *mus.*
 ment, par les moyens de ces bons Roys, qui en cela suyuent

la trace de leurs predecesseurs, lesquelz ont esté grandz zela-
teurs de la foy Chrestienne. Or semble-il que ce que les anci-
ens escriuent des iardins pendans, de l'admirable structure de
la maison royale, & de la desmesurée grandeur des murailles
de Babylone, merite quelque foy, veu les vestiges fort grandz
de tout cela, qu'on voit encor' auiourd'huy. Solyman fut fort
gayement receu par les Assyriens & peuples de Mesopota-
mie, de façon que les gens d'armes alloient hyuerner qui ça
qui là par les villes du pays. Si raconterons en l'année suyuan-
te ce qui aduint, tant à Solyman que à cest Abraïm.

L'AN 1535. Solyman adioustât foy à ce que luy alleguoïent
Abraïm & Vlaman, refait son armée, & la feit marcher con-
tre Tammase, esperant apres tant de trauaux emporter quel-
que segnalée victoire des Perses. Parquoy il reprend le che-
min vers Tauris, fessant Tammase retiré de celle ville aux
Coraxains pour la soudaine venue du Turc, lequel donna ce-
ste florissante cité en proye à sa barbare gendarmerie, quoy
que les habitans fussent prestz de faire ce qui leur seroit com-
mandé: & Solyman mesme emporta à Constantinople plusi-
eurs beaux ornemens qu'il print au logis du Roy, outre les
artisans de soye, les seruiteurs, les plus beaux enfans & filles
de la ville, qui estoient en grand nombre. Estant chargé de ce
butin, le bruit suruint que Tammase s'approchoit bien fort,
dont il tourna bride vers Mesopotamie, & n'eust faict ce che-
min sans tomber en grand peril, n'eust esté que les Perses fu-
rent espouuantez des coups d'artillerie & harquebouzes. Or
estoit ia arriué Tammase à Tauris, & s'estoit proposé de pour-
suiure le Turc, mais les Perses pesamment armez ne pouuoient
bonnement tenir le train des cheuaux Turcs armez à la lege-
re. Ce-pendant Delimenthe, vn vaillant Seigneur, demanda
à Tammase certain nôbre de caualerie qu'il choisiroit, avec
laquelle il suyuit les Turcs par certains sentiers à luy cogneus,
se rua sur eux de tous costez n'attendans rien moins que cela,
& les meit en desarroy, de sorte qu'à peine les Baschats se peu-
rent sauuer. La tuerie fut si grâde, qu'en bien peu de batailles
les Turcs ont receu si grande perte que lors, veu qu'ils y per-

*Tauris est
saccagée
par le grâd
Turc.*

*Defaite
des Turcs,
par sur-
prise.*

dirent toutes leurs tentes, tout leur bagage, tous les vaisseaux & instrumens du camp, & encore y demeura plus de la moitié de la cavalerie: Ce qui aduint le troisieme iour d'Octobre, que les Perses ont depuis célébré pour ceste cause. Solymán ayant fait vne telle perte fut moult fasché, & soudain proietta de se retirer vers Constantinople, conceuant sur cela vne haine extreme, mais neantmoins dissimulée contre le Bascha Abraïm, qui auoit esté le motif de tout ce voyage si mal-heureux & plein de desastre. Retourné qu'il fut à Cōstantinople, les grands Seigneurs qui ne pouuoient plus supporter la puissance incredible du Bascha, coniuèrent à l'encontre de luy, si bien que chacun l'enuoyoit, & perdit tout d'un coup le credit qu'il auoit enuers Solymán. Or auoient la mere & femme de Solymán tramé ceste haine si forte contre Abraïm, pour autant qu'elles ne pouuoient endurer, qu'un si grand Monarque fust si familièrement gouverné par un seruiteur. Car c'est chose trop certaine, que bien peu d'hommes ont si entierement iouï d'aucun Prince, que faisoit Abraïm de son maistre: mais ceste faueur fut en un cleing d'œil chagée en haine mortelle, de sorte qu'on veit que le Psalmiste nous a bien admonestez, en disant, ne mettez point vostre esperance es Princes, ny es fils des hommes esquels il n'y a point de salut. Ce qui descrioit le plus le credit d'Abraïm, estoit qu'on auoit à veüe d'œil descouuert, qu'il fauorisoit souz main aux Chrestiens, & que pour ceste cause il auoit destourné Solymán de guerroyer l'Empereur, le Roy Ferdinand, & les Venitiens, pour appliquer ses forces à l'encontre des Perses. Car à la verité Solymán auoit en merueilleuse haine les Venitiens, & ne vouloit pas moins de mal à l'Empereur Charles, ayant entédu qu'il auoit traité quelque chose par Ambassade avec le Persan: & soupçonnoit aussi, qu'il enuoyoit de l'artillerie à Tammase par les Portugais qui estoient assez pres es Indes. Parquoy estant Abraïm conuaincu d'estre ingrat & desloyal enuers son maistre Solymán, & estant enuiron le quinzieme de Mars admis à l'hostel de l'Empereur, fut blasmé grandement de parolles fort outrageuses: & quoy qu'il se prosternast aux pieds de So-

*Abraïm
Bascha
perd tout
son credit.*

*Psalm. 145
La cause
de cela.*

lyman & fondist tout en larmes, si ne peut-il iamais fieschir son cruel & felon esprit. La nuit ensuiuant comme il dormoit en sa chambre, on luy couppa la gorge d'un cousteau que Solymann mesme auoit donné pour faire ce coup. Le lendemain tous ses meubles & son argent furent confisquez au Roy, & la femme ne cheuist presque de rien sinon que de son douaire. Voyla donc quelle fut la fin de cest homme, que la fortune auoit esleué iusqu'au sommet de felicité. Que ceux qui s'estudient par trop à auoir credit enuers les hommes, contemplent cecy, & ceux qui feront volontiers toutes choses pour acquerir la faueur des grands de ce monde, à fin que par ce moyen ils ayent dignitez, honneurs & richesses. Certain * hōme docte a escrit quelques beaux vers sur ceste matiere, lesquels i'ay bien voulu inserer en cest endroit:

* Ange
Politian.

*Heureux celui, & tressemblable à Dieu,
En qui l'orgueil n'a oncques trouué lieu.
Qui point ne bruste au dedans de son cuer
D'un appetit de gloire & grand honneur.
Ains vit paisible avecques son mesnage,
Laisant couler le doux fil de son aage.*

Mutation
de religion
en Angle
terre.

CESTE année fut faicte en Angleterre vne mal-heureuse & horrible mutation de religion, pourautant que le Roy y conuiuait, à cause que le Pape n'auoit pas voulu consentir à son mariage, bien qu'au-parauant il eust combattu en homme de bien à l'encontre de Luther. Cecy pareillement nous seruira pour vn exemple de la mobilité des hommes, à fin que celuy qui est debout, voye qu'il ne tombe. Or en ce temps y auoit en ce Royaume, entre autres, deux excellens personnages, non moins illustres en doctrine, que religieux, à sçauoir Iehan Fischer Euesque de Rochestre, & Thomas Morus Chancelier d'Angleterre, qui est le plus grand Estat du Royaume. Ceux-cy comme hommes sages qu'ils estoient, ne vouloient pas approuuer le diuorce de Madame Catherine, ny consentir à la sentence du Roy, par laquelle il se disoit estre le Chef de l'Eglise d'Angleterre. Ce que le Roy ne pouuoit nullemēt supporter, & print encores à plus grand cōtreceueur l'Euesque de

de Rochestre, voyant qu'iceluy estant en prison auoit esté fait Cardinal par le Saint Pere. On voit quelques liures singulièrement beaux, composez par ce reuerend Prelat, par lesquels il refute l'heresie Zuinglienne & Lutherienne si grauement, qu'à peine s'en est-il trouué pas vn qui luy ait osé respondre: combien que les aduersaires semblent auoir assez d'excuse pour ne luy auoir respondu que bien maigrement, à sçauoir que ses liures sont escriptz en langue Latine, & parât le peuple ne les entend pas. Car tous les heretiques de nostre temps ont eu cela pour l'un de leurs principaux soings, qu'ilz eussent le los & bruiet parmy le peuple, ne se soucians que de viure bien à leur ayse sans ennuy & fâcherie, & ne faisans aucun conte de ce qu'ilz ont ietté vne infinité d'hommes simples & ignorans, és lieux où on ne sçauoit que pescher sa damnatiō. Ce que nous pouuons si euidentement prouuer & par leurs escriptz & par leur ordinaire coustume de viure, que ceux qui taschent de persuader le cōtraire, (ce que quelque politiques & gens seruans Dieu par quartier se sont parforcez de faire) font veoir à tout le monde leur extreme impudence. Et faut entendre cecy principalement des predicans & inuenteurs de sectes, lesquels preschent & escriuent bien souuent contre leur propre conscience, contre leur cueur, & contre ce qu'ilz sçauent estre autrement. Car le plus souuent ilz mentēt comme arracheurs de dentz, ce qu'ilz ne feroient, s'ilz ne s'estoiēt resolz à leur escient de demeurer en leur erreur. Mais reuenons sur noz brisées.

LE Roy d'Angleterre voyant que ny l'Euesque ny Morus ne vouloient condescendre à sa volonté, les feit iuger par ses officiers estre dignes de mort. Et partant l'Euesque de Rochestre fut decapité le vingtdeuxiesme iour de Iuin, & Morus le septieme de Iuillet en eut autant. Cest Euesque auoit merueilleusement bien fait l'estat d'un pasteur long temps, estant fort soigneux de son troupeau, administrant les sacrements, ne cessant d'enseigner tāt par sa voix que par sa plume, se montrant liberal enuers les necessiteux, & debonnaire enuers les estudians, si bien que sa maison sembloit proprement

Sf. j.

*Liures de
l'Euesque
de Roche-
stre contre
les hereti-
ques de no-
stre tēps.*

*Comment
l'Euesque
de Roche-
stre fut
desfaict
pour s'op-
poser à la
tyrannie
du Roy.*

estre vn monastere. Et ne douta point de s'opposer aux effortz du Roy & par escrit & à belles parolles, voulant en cela acquiescer sa conscience, n'estant ignorant du desastre qui luy en deuoit aduenir. Car il ne vouloit laisser aller le Roy selon sa folle fantasie, ains comme vn bon Euesque il a dict la verité iusqu'au dernier soupir de sa vie: de maniere qu'estant condamné au supplice des trahystres, & sçachant que la sentence de sa mort estoit prononcée, il demeura neantmoins constant & sans changer de visage. Mais pourautāt qu'il estoit ia courbé de vieillesse, & matté de veilles & estudes, ceste sentence si cruelle fut moderée en vne plus douce, à cause qu'on craignoit, que, deuant que sur vne claye il peust estre mené iusqu'au lieu du supplice, il ne rendist l'ame. Parquoy estant mené le vingdeuxiesme de Iuin à la place, il parla au peuple avec vne face riant & constante, & premierement pria pour le Roy & pour le Royaume, & puis il se recommanda à Dieu, quoy fait il se prepara à recevoir le coup de doloire. Car en Angleterre on ne tranche pas la teste aux criminelz d'un coup d'espée, ains d'une doloire, la teste appuyée sur vn tronc de bois. Et telle fut la fin de ce docte & illustre Prelat, apres auoir longuement enduré la misere d'une estroite prison.

*Discours
fort beau
sur la mort
de Morus,
Chancelier
d'Angle
terre.*

DE semblable mort fut executé Thomas Morus, lequel auoit quitte de son plain gré son Estat de Chancelier, voyant que le Roy vouloit tout faire selon ses appetitz desreiglez. Et comme homme tres-prudent qu'il estoit, il voyoit bien à quel but tendoient tous les desseings du Roy, & parrant ne voulāt estre contrainct de condamner les pauvres innocens, il aimamieux quitter ce grand & si excellent estat. Comme doncques à cause de la religion Chrestienne il refusa d'approuuer les nopces du Roy, il fut priué de tous ses biens, & condamné à prison perpetuelle. Or ceste année au moys de Iuliet estant tiré des prisons de Londres, il fut amené deuant les iuges deputez par le Roy. Il alloit tout tremblant, tenant vne baguette en main, mais neātmoins avec vne face qui ne mostroit point vn homme troublé en soy mesme. Venu qu'il fut en ce lieu là, on commença à le prescher & enhorter de chan-

ger d'opinion, mais adonc il pria le Dieu eternal, qu'il luy pleust le confirmer en sa sentence. Ce faict, il respond à ce qu'on luy mettoit sus, bien que son corps ia cassé fust fort debilité par la prison & maladie, dont les iuges s'aduiferent de luy faire apporter vne chaire, tandis qu'il continuoit à se purger. Ces choses ainsi faictes, on feit venir selon la coustume du païs les Douze officiers, afin qu'ilz deliberassent entr'eux, si Morus auoit malicieusement offensé contre l'arrest du Parlement. Ceux-cy ne demeurans pas beaucoup à consulter, & retournans vers les iuges, dirent que sans faute il auoit deservuy la mort. Et lors la sentence fut prononcée al'encontre de luy. Si dist deuant tous ce qu'il luy sembloit de l'arrest du Parlement, qui disoit que le Roy deuoit estre tenu pour Chef de l'Eglise Angloyse, affermant d'auoir demeuré sept ans à esplucher diligemment les escriptz des Anciens, & les Conciles, & que toutesfois il n'auoit oncques trouué, qu'un homme lay ou seculier peust estre Chef de l'Eglise és choses Ecclesiastiques: mais quelques vns murmuroient là dessus, & quoy que sa harangue fust solide & vraye, si est-ce qu'ilz ne peurent estre esbranlez. Apres cela on le faict reconduire en prison, & lors aduint vn piteux & miserable spectacle, deuant qu'il fust venu à la Tour. Car Morus auoit vne fille nommée Marguerite, belle au possible, honneste, & douée de fort grand sçauoir. Or entendu qu'elle eut que son pere estoit condamné à la mort, estant esmeuë de l'amour enuers son pere, & saisie d'une extreme angoyssse de cuer, se fourra virilement parmy les satellites: & à force venant embrasser son pere, par l'abondance de ses larmes qui ruysseloient aual la face, tesmoigna assez ce qu'elle ne pouuoit exprimer de bouche, estant vaincuë de trop grande tristesse, à sçauoir le creue cuer & marrison qui pour lors luy bourreloient son ame. Mais le pere, par la permission des gardes, l'arraisonna constamment, la priant de laisser ces sanglotz, & de porter patiemment ceste desconuenue de fortune. Car, disoit-il, Dieu l'a ainsi permis, & de longue main tu entendz bien le secret de ma conscience. Le pere estant ia esloigné de la fille de dix ou douze pas, elle cedant

*Harangue
de Morus*

*La fille de
Morus se
rue sur son
pere.*

*Le pere la
console.*

à la passion qui luy ferroit le cueur, & la tenailloit à cause du
 peril de son tref-amé pere, accourut de rechef à iceluy, l'em-
 brassant estroitement: mais le bon-homme sans aucune effu-
 sion de larmes, sans fronçer les sourcilz, sans signe de dou-
 leur, luy respondit seulement ce mot, va t'en, ie te supplie, &
 prie Dieu pour mon ame. Certes c'estoit vne des grandes ten-
 tations qu'on scauroit dire, mais celuy qui estoit desia resolu
 d'espandre son sang & sa vie pour soustenir la verité, ne feit
 tant de conte de l'amour des siés, que de celle de Iesus Christ,
 desireux d'estre vray & inuaincu martyr. Nous ne scaurions
 auoir autre opinion de ce grand personnage, lequel pouuant
 iouir de toutes choses qu'il eust peu souhaiter en ce Royau-
 me, toutesfois il aima mieux perdre la vie, qu'offenser son
 Dieu. Aussi lors que son Roy defendoit encore la religiō Ca-
 tholique, & qu'il estoit Chancelier, il punissoit les Lutheriens
 & sectateurs de tous nouueaux dogmatifans, comme il appar-
 tenoit. La teste luy fut auallée le septieme iour de Iuillet.

QUEL CUN a escript ce qui s'ensuyt de la mort d'iceluy,
 & semblablement de celle de l'Euesque de Rochestre: le se-
 cond iour de Iuillet, (les autres le septieme, comme cy dessus)
 Thomas Morus fut descapité en Angleterre, qui ne monstra
 pas moins de constance au parquet des Iuges & au supplice,
 que feit le philosophe Socrates condamné par vn tref-inique
 iugement des Atheniens. Vn peu deuant luy auoit esté mis à
 mort le bon Euesque de Rochestre, lequel le Roy n'hayissoit
 pour autre cause d'auantage, que pour autâr que le Saint Pere
 luy auoit donné n'aguères le chapeau rouge. Mais escoute vne
 chose, qui surpasse toute cruauté. Le chef de l'Euesque fut mis
 sur vne potence, & exposé long temps aux yeux de tout le
 monde, & dit-on que tant s'en faut que ce chef se gastaist ou
 deffeist, que au contraire il sembloit plus venerable. De sorte
 que le bruiçt courant déia de cecy, on osta la teste de ce lieu.
 Et à fin qu'il n'y eust rien au chef de Morus, qui inuitast le peu-
 ple à penser quelque cas, entendz, ie te prie, vn faict par trop
 barbare. Car on y renouuella la fable de Thyestes, & deuant
 que sa teste fust fichée sur vne lance, on la meit bouillir lon-

Constance
de Morus

Cruauté
apres la
mort des
deffuncts

guement dans vn pot, à fin que l'humeur s'en allast plustost.
 Voyla ce qu'il en dict.

LE 15. iour d'Apuril de l'an present, Regnauld, Docteur
 en Theologie, & non moins vertueux que docte és trois lan-
 gues, & en la cognoissance de toutes choses diuines, de l'or-
 dre de Sainte Brigide, fut tiré d'une Abbaye de Londres
 nommée Sion, & avec quelques autres religieux & seculiers
 fut amené deuant les iuges, comme ceux qui ne vouloient
 approuuer l'arrest du Parlemēt. Adonc le Docteur Regnauld
 dist hautement & deuant tous entre autres choses: si le Roy
 sçauoit combien mal il a esté cōseillé par quelques Seigneurs
 de sa Cour, ie m'a sseure qu'il leur montreroit à bon escient
 qu'ilz sont fort mauuais Conseillers. Lors on luy commanda
 de se taire, pourautant qu'il y en auoit à qui ces motz sem-
 bloient estre appropriez. A la verité c'est grand pitié, que bien
 souuent les meilleurs & mieux nez Princes qu'on sçauroit
 trouuer, sont desbauchez par le meschant conseil de quel-
 ques pestes qu'ilz ont autour d'eux: & quelquefois sont cho-
 se que iamais ilz n'eussent attenté, filz n'eussent esté circon-
 uenez par la fraude de telles gens. Apres cela on commanda
 au Docteur de respondre à quelques poinctz: mais voyans
 qu'il y respondoit pertinemment, on luy imposa de rechef si-
 lence. Et ayant entendu qu'il estoit condamné à la mort, c'est,
 dit-il, la sentence de ce monde. Si demanda deux où trois
 iours pour se preparer à la mort: mais il luy fut respondu que
 cela ne gisoit pas en la volonté des iuges, mais en la clemence
 du Roy. Et alors, ie m'attendz, dit-il, de voir les biens de Dieu
 en la terre des viuans.

EN mesme temps les Chartreux de Londres encouru-
 rent l'ire & indignation du Roy, parce qu'ilz ne le vouloient
 pas recognoistre pour chef de l'Eglise Angloise. En ceste
 Chartreuse y auoit plusieurs bons religieux, & principale-
 ment le Prieur du couuent, Iehan Houhrhon, la pieté duquel
 estoit merueilleuse. Or ce-pendant que cest orage agitoit
 ainsi l'Angleterre, & que les pauvres Chartreux n'estoient
 gueres esloignez d'un grand peril, par cas fortuit vindrent à

St. iij.

Condam-
 nation du
 Docteur
 Regnauld,
 pour mes-
 me cause
 que Mo-
 rris & l'E-
 uesque.

Psal. 26.

Discours
 du supplice
 prins de
 trois Char-
 treux, à
 Londres,
 surpassant
 celuy de
 Phalaris.

Londres deux autres Chartreux Prieurs, à sçauoir Robert Laurent, & Augustin Vuebster. Le Prieur Iehan Houhthon accompagné de ces deux, alla trouuer Thomas Cromuël Chancelier du Royaume, esperant de pouuoir impetrer de luy, que ne luy ne ses compaignons ne seroient point contrainctz à suyure la volonté du Roy. Mais apres qu'il eut humblement proposé sa requeste au Chancelier, il ne luy en veint autre prouffit, sinon que incontinent il fut mis en prison comme rebelle au Roy, avec les deux autres Prieurs ses compaignons. Ayans là demeurez toute vne semaine, le Chancelier & quelques Conseillers du Roy y vindrent, les enhortans de renoncer le Pape de Rome, & de confesser que le Roy estoit le Chef de l'Eglise, tant en ce qui concerne les choses Ecclesiastiques, qu'en l'estat seculier. Mais pour-auint que ces religieux n'auoient pas apprins tel langage en l'Eglise Catholique, ilz ne le voulurent oncques faire, & partant on les feit encor' enfermer dans la prison. Certain iour apres ilz furent produictz en l'assemblée, où estans de rechef admonnestez de consentir, respondirent qu'en la moindre chose qui soit, ilz seroient bien marrys d'enfreindre la sentence de l'Eglise Catholique. Et adonc on feit venir les Douze officiers, ausquelz on commanda de consulter par-ensemble, si les Peres qui ne vouloient pas obeïr à l'arrest de la Court, ne deuoient pas estre condamnez à la mort. Les officiers demurerent iusqu' au lendemain à consulter sur cest affaire, & pour-ce qu'ilz estoient assez loyaux, ilz auoient deliberé de les prononcer estre innocens de tout crime. Mais le Chancelier se doutant bien de ce qu'il y auoit, leur enuoya demander par quelques vns, à quelle occasion ilz tardoient si fort à prononcer la sentence: ausquelz ilz feirent responce, qu'ilz n'auoient pas osé condamner à mort des hommes, qui ne l'auoiēt pas deseruie. Le Chancelier ayāt receu ceste responce, fut tout embrasé de cholere, & soudain leur renuoya dire, q'en cas qu'ilz ne trouueroiēt rien suffisant pour les condāner, qu'eux-mesmes seroiēt punis cōme criminels. Neantmoins cela ne les esmouuoit point, iusqu'à tāt que

Les Chartreux contrainctz.

luy-mesme s'y transporta, & à belles menaces les contraignit ^{Les Juges} de les condamner comme criminelz de maïesté lese. Et ayās ^{les cōdam-} ce fait le lendemain, les Juges ietterent la sentence à l'encon- ^{ment.} tre d'iceux, telle qu'on iette contre ceux qui sont auerez estre criminels de tel crime. Ce fait, on les r'ameine en la prison, où ils demeurèrent encore cinq iours en toute sorte d'affliction. Apres on les mena au supplice le 4. iour de May. Parquoy on ^{Ils sont} les met sur vne claye, & estoient là liez ayans le ventre ren- ^{mis sur v-} uersé en hault, & ainsi les cheuaulx les trainerent par toute la ^{ne claye.} ville, & par des bourbiers & lieux rabboteux, iusqu'au gibbet distant de la prison enuers vne lieuë de France. Estans là arriuez, le Prieur de Londres fut deslié le premier. Et lors le bourreau feschissant le genoil, comme est la coustume d'Angleterre, luy demāda pardō de ce qu'il l'alloit faire mourir cruellement. Ce qu'il feit fort affectueusement, embrassant l'hōme, & priant Dieu tant pour luy que pour les autres. Si luy fut cōmandé de monter en l'eschelle, ce qu'il feit sans tarder. Alors l'un des Cōseillers du Roy qui estoïet là presens avec vn million d'hommes, luy va demander, s'il ne vouloit pas consentir au Roy & au Parlement. Mais il respond, que pour la craincte ^{Le suppli-} de Dieu, & non pour vouloir estre desobeïssant au Roy, il ne ^{ce incredi-} pouuoit ny ne vouloit faire cela: ains que plustost il endure- ^{ble prins} roit mille maulx, que d'enfreindre le moindre point ordōné ^{du Prieur} par l'Eglise Catholique. Au reste, dit-il, priez pour moy, & ^{de Lōdres.} ayez pitié de mes freres, desquels j'ay esté le Prieur, bien qu'en estant indigne. Ayant ce dit, & impetré encor' vn peu de réps, il leut les six premiers versets du Psalme 30. Apres on luy donna le fault, & demeura en l'air attaché d'une grosse corde, de peur qu'il ne fust estouffé. Et tout soudain quelque autre coupa la corde deuant qu'il eust rendu l'esprit, tellement que tōbant en terre, & tremblant, en fin il reueint à foy. Lors sans delay on le traine en vn lieu prochain, & le despouillāt à grād force de tous ses habillemens, on l'attacha de rechef tout nud sur vne claye. Premieremēt le bourreau luy couppa les genitoires, & puis il luy fendit le vêtre, & luy ayant percé le cueur, il ietta tous les boyaux dās le feu. Or il endura tout cela si pa-

tiement & constamment, que les Presidés & tous les autres assistans estoient grandement estonnez d'une telle constance.

*Autres
chartreux
deffaits.* Ce fait, on luy tranche la teste, & met-on son corps à quatre quartiers. Tout semblable supplice souffrirent les deux autres Prieurs, & le Docteur Regnault, & un prestre seculier appelé Jehan Hail, avec une admirable constance. Il n'y eut aucun d'eux à qui le visage changeast, ou qui tremblast en parlant, ou en qui vous eussiez cogneu indice d'une mort si cruelle. Si demurerent aussi en mesme habit durant cest horrible supplice, auquel ils auoient vescu en prosperité, à cause que l'esprit de verité les corroboroit. Or c'est autre chose de ceux qui meurent pour leurs demerites ou erreurs en la religion, quelque ioye & alegresse qu'ils facent semblant d'auoir. Car cela n'est pas constance, ains opiniastrété conceüe d'un esprit confit en erreur, & non de bon iugement: & puis que ce n'est pas le supplice qui fait le martyr, ains la cause, les sectaires de ce temps sont fort ridicules, voire fols, qui font de grâds Martyrologes pour ceux, qui ont esté punis non pour la maintenance de la religiō Catholique, ains pour leur maudite heresie: comme si la memoire d'iceux deuoit estre honorée par la posterité, & non plustost vituperée. Mais laissons les là, & reuenons aux nostres, lesquels au milieu des tourmens supplioient les Princes & autres assistans, de viure constamment iusqu'au dernier iour de leur vie, & qu'en tout & par tout ils fussent fidelles au Roy & luy obeissent en ce, qui ne seroit preiudiciable aux ordonnances & de Dieu & de son Eglise. Les membres de leurs corps, apres auoir esté * cuités, furent exposez en diuers endroits de Londres, & furent leurs testes fichées sur des potences.

* La cause de cecy a esté cy dessus mise

Supplice d'autres trois Chartreux.

A PEINE trois semaines estoient passées depuis l'indigne mort de ces religieux, quand quelques meschans demanderent permission au Châcelier de vexer quelques autres Chartreux de Londres, laquelle ils eurent aussi tost impetrée que demandée. Au moyen dequoy ils coururent à la Chartreuse, prennent le Vicair Hunfride Middelmor, Guillaume de Meue, & Sebastien Nendegate prestre: lesquels les meschans

chans bouillonnans d'ire amenerent ignominieusement en vne puante prison, où l'espace de quatorze iours ilz eurent de gros ceps aux piedz & au col, de maniere qu'ilz demeuroient tousiours debout, sans pouuoir vuyder leur ventre, dont ilz estoient fort molestez, tant pour la puanteur que pour la vergongne qu'ils auoient de l'un à l'autre. Apres cela ilz furent amenez chacun à part au parquet, où ilz respondirent qu'ilz auoient intention de demeurer tousiours en l'Eglise Catholique, & si monstrerent par viues raisons & par l'escriture sainte, que le Roy ne se pouuoit vsurper l'autorité Ecclesiastique: qui fut cause qu'ilz furent punis de mesme supplice que les precedens, le seziesme iour de Iuin. Ces trois icy estoient ieunes d'aage, mais vieilz d'esprit, issus de nobles maisons, & de grand'erudition. Celuy qui s'appelloit Sebastien, auoit esté nourry à la Cour du Roy, mais iceux nous monstrerent par leur exemple, comment il faut mespriser & abandonner toutes choses pour l'amour de Iesus-Christ, & de la verité.

L'AN 1537. ensuyuant, dix autres Chartreux de Londres furent mis en prison hydeuse & puante, de sorte que tous y finirent leurs iours, hors-mis vn, qui vescu là dedans quatre ans entiers, mais en fin il fut payé de mesme monnoye que les autres. Brief, durant quelques années on s'aduisa de tous moyens propres pour faire consentir les Chartreux de Londres au Roy, tantost par mignardise, tantost par menaces & tourmens. Aucuns, mais bien peu, deçeus par les ruses & belles parolles des hommes, y consentirent par gestes exterieurs, & en leur conscience ilz detestoient & abhorroiét de le faire. Mais la peu sage simplicité d'iceux a gaigné cela, que comme ilz pensoient par ce beau semblant qu'ilz feirent pour le Roy, empescher que leur Chartreuse ne fust destruiete, ce fut celle qui fut la premiere ruinée, & tous les religieux chassés d'icelle. Pareillement deux autres Chartreux de Londres furent, l'onzième iour du mois de May en l'an 1537, estachez avec des chesnes, & demurerent si long temps à la potence, que tous les os leur tomboient. Leurs noms estoient Jehan Rochester, & Jacques Vvannert. Pour mesme cause & raison furent

Tr.j.

*Autres
meurent
en prison.*

*Deux an-
trespèdes.*

La mort de deux Docteurs pour la foy executez Iehan Trauerfi, Theologien d'Irlande, & Iehan Stoné, Augustin de Cantorbie en Angleterre. Stoné demeura loüement en prison, où ayant recours aux armes Chrestiennes, ne faisoit que prier Dieu, & ieusnoit incessamment. Estât ainsi enclos il entr'ouit vne voix, bié qu'il ne veist personne, laquelle l'appella par son nom, & luy enioignit de souffrir la mort constamment pour la sentence qu'il auoit soustenuë. Dequoy il fut confirmé grandement, se qu'il demeura constant, & ne peut oncques estre esmeu ny par menaces ny par crainte, de sa premiere opinion, de sorte qu'il ayma mieux mourir pour la iustice que d'obeïr à la volonté du Roy. Quand à Trauerfi, il auoit maintenu par quelque sié liure l'authorité & puissance du Pape, dont il fut accusé, & estant mené deuant les iuges, ne le voulut oncques nyer, ains en estendant les doigtz, voyla, dict-il, dequoy ie l'ay escrit, & ne m'en suys point encore repenty, ny ne m'en repentiray iamais, Dieu aydant. Au moyen dequoy il fut condamné à mort, & puny à la rigueur, comme portoit la coustume d'alors. Or aduint adonc vne chose admirable, laquelle ceux qui y estoient presens ont racontée. Le bourreau ayant couppé ceste main, & ietté qu'elle fut dans le feu, le reste de la main brusta bien: mais encore qu'on augmēta le feu de plus en plus, si est-ce que le pouce & les autres doigtz, desquelz nous tenons la plume en escriuant, ne peurēt oncques estre consumez. Par lequel miracle si insigne, Dieu voulut monstrier, que ce martyr mourut pour defendre vne cause iuste & equitable: car, comme dit Sainct Augustin, le supplice ne faiēt pas le martyr, ains la cause. Outre tant de massacres, ces bons Cordeliers, qu'on appelle vulgairement Observantins, furent fort vexez & tous emprisonnez depuis le premier iusqu'au dernier, pour autant qu'iceux ne vouloient pas consentir au Roy, qui se maintenoit estre le Chef de l'Eglise Angloyse. Toutesfois ie ne vous sçauroy pas dire si quelques vns d'iceux en perdirent la vie. Tant y a que telle a esté la recompense de ceux, qui en soustenant vne bonne cause ont monstrier telle constance, que la religion Catholique & l'equité de la cause requeroient. Encor' est-il aduenü, que

Constance d'iceux.

Miracle.

Cordeliers tourmentez pour mesme cause.

ceux qui auoient esté les auteurs des meurtres si execrables, *Le Chan-
cellier here
tique est
pendu.* n'ont gueres demeuré sans en estre deuément punis. Car ce-
tuy Thomas Cromuël Chancelier, deux ans apres que la mai-
son des Chartreux de Londres fut saccagée & gastée, fut de-
collé, & monstra qu'il ne se faut pas fier aux grandz de ce
monde. Aussi à dire vray, c'est chose trop damnable, pour l'ap-
perit d'auoir la faueur des Princes, faire banqueroute à tou-
tes loix diuines: & ceux qui sont telz, à bon droict sentent-ils
à la fin, que la volonté de ceux qu'ilz ont idolatrez, est chan-
gée en leur endroict. Les autres endurerent quelques autres
calamitez, & ne iouïrent gueres de ce vent de fortune à leur
gré. Quand à celle belle Chartreuse, elle fut changée en vne
boutique de meschancetez, où on ne vaquoit à autre chose
qu'à puteries, ieux & esbatz. Ce que, & choses semblables, *Misere de
la ruine
des mona-
stieres.* ont grande sympathie avec l'Euangile de Luther: mais les lou-
anges diuines, prieres, veilles, ieufnes, castigations de la chair,
qu'on auoit accoustumé de faire en ce lieu-là, cest Euangile
les hait comme poisons. Aussi est-ce la cause pour laquelle
tât d'hommes aueuglez se font enrooller souz ceste enseigne,
à sçauoir que tout ce qui y est dict est plaissant & agreable à la
chair, tant est grande l'astuce de Satan. Neantmoins ilz doiuent
craindre ce que dict Iob, ilz passent leurs iours en ioye, & en
vn moment ilz descendēt en enfer: & ce que Iesuf-christ crie
en son Euangile, mal-heur à vous qui riez, car vous pleurerez. *Iob 21.
Luc. 6.*
L'Euangile de Luther a si bien proffité en plusieurs lieux, que
les monasteres ou ont esté ruinez de fond en comble, ou chā-
gez en vsages profanes, qui ne tend à autre fin qu'à esteindre
le seruice diuin, & introduyre le Mahometisme, ou, comme ia
il est adueni en quelques lieux, vn paganisme. Certainement
il fault bien dire que l'esprit n'est pas de Dieu ains de Satan, *Quel es-
prit est de
Satan.*
qui ne peut endurer les loüanges de Dieu, l'affection d'vne
continence perperuelle, le mespris du monde & de routes vo-
luptez, les veilles, les ieufnes, les prieres, vne pauureté volon-
taire, vne abiection de sa volonté propre: lesquelles choses &
exercices semblables de pieté, florissoient és monasteres bien
reiglez, si en autre lieu quelconque. Mais à la suasion de Lu-

*La Char-
treuse chā-
gée en un
chasteau.*

ther ilz ont esté profanez & destruietz, tellement que Luther
sest emparé du Conuent des Augustins, où les religieux au-
parauant souloient seruir à Dieu. Semblablement la Char-
treuse de Londres, de laquelle nous parlons maintenant, fut,
par-apres donnée à certain gendarme, qui en feit vne bel-
le maison, & de l'Eglise en feit vne belle grand' sale, abbatant
la plus grand' part du monastere. Vn peu deuant on y mettoit
les tentes du Roy & les munitions de guerre comme dans
vn Arsenal. Ilz meirent en pieces les images des Saintz, &
mesmes les Crucifix, qui nous deueroient espoingonner à cha-
rité, & meirent tout souz les piedz. Ilz sauterent, & iouèrent
aux dez sur les autelz, ilz dansoient dans l'Eglise, & feirét plu-
sieurs choses de mesme esprit, que les Ariens feirent le temps
passé. Et quand bien ceste ruine & destruction des monaste-
res n'auroit apporté autre mal, que la perte qu'en ont receuë
innumerables hommes necessiteux & mendians, lesquelz y
auoient de belles aumosnes, encore seroit-ce vne calamité
tres grande. Car à present depuys que les gentilz-hommes
ou autres seculiers y ont mis les piedz, tu y aurois plustost vn
coup de fouët, que vne aumosne. Il y a encor' vn autre point,
dont les marchādz, quoy que infectez de ce poison Lutheriē,
font bien marrys, & voudroient fort que plusieurs monaste-
res fussent en leur entier, bien qu'ilz ne sçauoient souffrir
aucun Ordre des mendians. Quelquefois i'en ouy la raison
d'un homme qui estoit Lutherien à vendre & engager, si que
toutes & quantes foys qu'il parloit de Luther, il mettoit la
main au bonnet en signe d'honneur. Il disoit doncques, qu'il
estoit marry de quoy les monasteres auoient esté ruinez, à cau-
se que iadis les nobles souloient y mettre leurs enfans, & par-
tant laisser tous leurs biens à ceux qu'ilz retenoient à la mai-
son, & qu'en ce faisant les gentilz-hommes estoient riches, &
n'auoient que faire de desrober & de tuer. Mais maintenant
que les monasteres sont tous destruietz, il n'y a enfant ne fille
qui ne se marie, dont sort vne multitude infinie de petis gen-
tilz-hommes & cadetz: lesquelz quoy qu'ilz ayent leur portio
du bié paternel distribué par testes, si est-ce que cela ne suffit

*Plaisante
doleance
d'un mar-
chand Lu-
therien, de
ce que les
monasteres
ont esté
ruinez.*

pas à entretenir le train qu'ont accoustumé vn tas de gentilhomm^{es}: & partant ilz se ruent sur nous autres pauures marchandz allans sur les champs, (disoit-il) nous volent nostre marchandise, & s'en vont avec tout ce que nous portions sur nous. Voyla les plaintes que ce Lutherien faisoit de la ruine des monasteres, non pour l'amour de Christ, ains pour leur propre & particulier prouffit. Mais si c'est chose entierement mauuaise qu'il y ayt des monasteres, comme dict l'Euangile de Luther, certes pour gaing ou vilité quelconque qui en ressorte, on ne les doit endurer. *Ruse de Satan pour faire de- struyre les Conuens.* Que si ce n'est point mal d'en auoir, pourquoy n'endurera lon aussi bien les Conuens des freres Mendians, veu que bien souuent on en reçoit grande consolation & secours spirituel, soit en se confessant à eux, soit par leurs predications, & autres exercices? Et c'est cela, de par Dieu, que le diable hayt, & pource a-il employé toutes ses forces à renuerfer & esteindre l'Ordre des Mendians, en tous lieux esquelz l'Euangile de Luther a eu la vogue. Tous les autres monasteres sont pareillement destruietz, où pour le moins miserablement pillez & gastez, si que le seruice diuin n'y est plus celebré: sinon que noz Euangeliques nouueaux, tant hommes que femmes, s'assemblent le Dimanche au temple, où ilz chantent quelque Psalme en Aleman ou autre langage vulgaire: celebrans leur Cene, qui ne differe en rien d'un banquet profane, pour-ce que le plus souuent ceux qui leur administrent ceste gentille Cene, ne sont pas prestres, & partant ne peuuent consacrer le corps & sang de Iesus-Christ. Et fil en y a quelques vns prestres, & qui facent ceste Cene, encore nient-ilz que le corps & sang de Iesus-Christ demeure apres la reception. A raison dequoy il aduient souuent que le secretaire r'apporte en sa maison le reste du vin, & en fait grād' chere avec ses compaignons, non sans grande contumelie & iniure d'un si grand sacrement. Car bien qu'ilz ne veuillent admettre que ce soit le vray sang, il ne laisse pas toutesfois de l'estre, sil a esté legitimement consacré. Mais reprenons noz erres.

LUTHER voyant que les choses alloient selon son souhait.
Tr. iij.

*Luther
s'enst tous
iours.*

hait en Angleterre, ce qu'il n'eust oncques pensé, commença ceste année à s'en-orgueillir encore d'avantage. Il escriuit fort aigrement & malicieusement, comme estoit la coustume, à l'encontre des Princes & Estatz Catholiques de l'Empire, les appellât entre autres nōs seditieux & rebelles à l'Empereur, & larrōs de Dieu, cōme ceux q ne daignēt obeir ny à Dieu, ny à l'Eglise de Christ, (c'est à dire à la Lutherienne) ny à l'Empereur ou autre puissance quelconque. Mais certes il n'y a gens au monde à qui cela conuienne mieux, qu'à Luther & à tous ses semblables, qui ont si dextrement secoüé le ioug du Pape, que ce-pendant ilz ne veulēt obeir à aucune puissance. Apres il se ruē seditieusement sur le Cardinal de Maience, disant ces propos en son Aleman: Si les citoyens de Halle, & les subiectz de l'Archeuesché de Magdebourg, chassoient ou massacroïēt l'Euesque & Cardinal de Maience leur Tyrā, certes ilz ne feroient que iustement. Et en quelle part Iesus Christ dit iamais aux Iuifz, si vous tuez les Pontifes, voz Scribes & Pharisiens, vous ferez bien? N'a-il pas au contraire dict, les scribes & Pharisiens sont assis sur la chaire de Moysse: faictes doncques tout ce qu'ilz vous disent? Que si les Catholiques escriuoient aux subiectz des Princes Lutheriens, vous ferez fort bien, si vous mettez à mort voz Seigneurs tyrans, bon dieu quelles Tragedies feroit Luther! combié se tempesteroit-il? Or qui auroit-il assuré en toute la Chrestienté, s'il estoit loysible aux subiectz de chasser ou massacrer les Seigneurs, de leur priuée autorité? Certainement Luther meritoit d'estre payé en seditieux, lors qu'il en-hortoit les subiectz du Cardinal de Mayence à commettre vn crime si horrible. Et est de merueilles, comment les hommes n'ont peu apperceuoir, que Luther n'auoit rien de commun avec l'Euangile de Iesus-christ, combien il est inconstant & variable, & qu'autant d'argumens qui s'offrent pour escrire, autant de fois change-il de doctrine. Ce que ie repete si souuent, & ne me plaindz de le repeter, estant desireux que la posterité soit sage à nostre dommage. Si faut entendre, que la cause qui auoit mis Luther hors des gonds de raison parlant contre ce Cardinal, e-

*Luther dit
que c'est
bien faict
de tuer son
Euesque.*

estoit, que cestuy Sieur auoit commandé que tous ses subiects qui seroient Lutheriens prissent leurs biens & vuydassent ses terres, de peur qu'ils infectassent le reste. Laquelle ordonnance n'estoit nullement tyrannique, ains fort tolerable, si ce n'est qu'on die, que tout estoit permis de dire à Luther. Les Magistrats Lutheriens ne punissent-ils pas les Anabaptistes? Pourquoy doncques Luther ne blasme-il point cela?

Le Cardinal de Maïe chasse les Lutheriens.

ENVIRON ce temps y eut vn homme, citoyen de Halle en Saxe, & subiect du susdict Cardinal, qui auoit nom Gaspar Querhamer, homme lay, mais qui auoit l'esprit gentil & bien né. Cestuy poussé de Dieu, & vlsant d'un grand labour & subtilité, colligea dans les liures de Luther, trente-six sentences contraires & repugnantes sur la communion de l'Eucharistie souz vne ou deux especes, & les meit toutes par ordre en vne grand' table, qu'on pouuoit attacher aux parois. N'est-ce pas chose tres-laide, estre si inconstant & ne dire iamais vn mesme propos, en vne affaire de si grande conséquence? Nous venons de dire comment il a esté inconstant en cest article: & és autres articles il se contrarie si souuent, q' personne ne le pourroit exposer. Les Euangeliques voyās ce qu'auoit fait ce lay, luy rēdirēt son change par-apres en la guerre de Smalcalde. Car on dit qu'on l'estacha à vne corde par ses genitoires, & qu'ainsi on le descendit en vn puis, où on le tourmenta longuement, mais on l'en tira voyant qu'il demeueroit tousiours constant en sa religion. Aillent les adherans de Luther où il leur plaira, & qu'ils nous recommandent tant qu'ils voudront l'Euangile de Luther: pour le moins viendra vn iour, qu'ils se repentiront cent & cent fois de n'auoir abominé de tout leur cueur vne doctrine si inconstante, mais ce sera trop tard: & n'auront rien dequoy ils se pourroient targuer ou excuser, à cause que ceste seule inconstance en la doctrine estoit suffisante pour leur faire cognoistre, que l'auteur de l'Euangile Lutherien n'a esté autre que Satan, pere de mensonge, comme nous auons dit bien souuent.

36. Sentences repugnantes sur vne matiere, d'ās Luther.

Tourment d'un Catholique.

Inconstance en vne doctrine.

LE iour S. Iehan de l'année presente fut prise la ville de

Munster, qui est la metropolitaine d'Vuestphalie. Voyez ce qui y fut fait, cy dessus, (au commencement de l'an 1534.)

Anabaptistes des faits.

CESTE année les Anabaptistes meirent tous leurs efforts à prédre par dol & fraude celle tant belle & riche ville d'Hollande, Amsterdam: mais en vain, & mesmes à ceste occasion ceste peste d'hommes fut chassée du pais de Frise. Les Anabaptistes rascherēt de s'emparer de la ville sus-dicte la nuit, tellement qu'ils prirent le Palais, & tuerent quelques vns du Senat & de la garde. Neantmoins ils furent rembarrez, & punis selon leurs demerites, qui fut bien griesuement. Ils auoient esleu vn Euesque entr'eux, la teste duquel fut tranchée, & posée sur les Tours de la ville au bout d'un long boys. Vn peu de uant ils s'estoient emparez d'un beau monastere en Frise, qui estoit tout enuironné d'eau, & encor' autremēt bien fort: mais le Gouverneur de Frise les trouua bien à point, & fait bouche rie de tous ceux qui se meirent en deuoir de resister, duquel nombre estoient quelques filles, qui n'en eurent meilleur marché que les autres. Plaise à Dieu eternal que ceste peste d'hommes ne s'augmente iournellement de plus en plus, par la negligence & fait-neantise des Superieurs, en quoy faisant ils pourroient apporter vne insigne misere & calamité à tout l'estat Chrestien. Car en plusieurs lieux d'Allemaigne on leur a permis de viure, sans estre nullement punis, & peu à peu se meslent parmy les Catholiques es grandes villes, de maniere qu'ils s'assemblent & augmentent au grand dommage de la Republique.

Deces de Madame Catherine, Roynne d'Angleterre.

LE iour des Roys de l'année presente alla de vie à trespas en Angleterre, celle tant vertueuse & constante Dame Catherine, laquelle le Roy Héry huitiesme, embabouiné par ie ne sçay quels, auoit repudiée, l'ayant eue à femme l'espace de vingt ans. Or apres ce tant mal-heureux diuorce, elle s'estoit retirée au Conté de Betford, en vn chasteau Royal nommé Kymbalton, & situé en vn lieu assez humide & maladif. Elle y vescu fort sainctement, & endurant fort patiemment ce repude, combien qu'elle sentoit en son cueur grand' angoyffe & passion, dequoy le Roy mesprisant le chemin de son salut l'auoit

l'auoit repudiée, pour s'acointer d'Anne de Boulen. Si cheut ceste année & en ce moys en grosse maladie, tellement que le Roy luy enuoya ses recommandations par quelques gentilhômes. Mais le sixiesme iour apres sentant déia les approches de la mort, appella à soy vne sienne seruante, qui n'estoit pas des plus grües, à laquelle elle commanda d'escire vne missiue au Roy, dont la teneur estoit telle: Sire, mō trescher espoux, l'heure de ma mort est ia venue, & en ce momēt de tēps l'amitié me semond à vous admonnester sommairement du salut de vostre ame, lequel vous deuez preferer à toutes choses mortelles, & ne tenir aucun conte du corps au respect d'iceluy: pōur l'amour duquel corps vous m'auiez iectée en grande misere, & vous vous estes precipité en vne infinité d'agoiffes. Mais ie vous pardonne cela, & prie Dieu qu'il vous le vueille pardonner. Au demeurant, ie vous recommande nostre fille, & vous supplie de vous monstrier affectiōné pere enuers elle, comme i'ay tousiours desiré de vous. Ie vous supplie d'auantage, de vous souuenir de mes seruantes, & de les marier honnestement lors que le temps le requerra, ce qui n'est pas grād cas, attendu qu'elles ne sont que trois. En-oultre de payer les gages à mes seruiteurs, & tout ce qu'ils gagneroiēt en vne année, par vostre douceur & liberalité, afin qu'ilz ne soient delaissez ou indigēs. Finalemēt ie vous puy assseurer de ce mot, & le proteste, que mes yeux ne desirent que vous. A dieu. Ces lettres escrites, elle rendit l'ame à Dieu le mesme iour. Or est-il assez euidēt, qu'elle a estroitement obserué les loix de mariage durāt le diuorce mesme, cōsideré qu'elle proteste, qu'elle ne souhaitte autre que Henry. Aussi le Roy ne se peut tenir de pleurer rendrement, lors qu'il veint à lire ces lettres. Le corps de ceste bonne Princeesse fut porté au bourg S. Pierre, & fut honorablement enterré au Conuēt des mōynes de S. Benoist. Certain hōme tref-docte a noté vn dict fort remarquable de ceste vertueuse & sage Royne, lequel m'a sēblé digne d'estre mis icy. Elle disoit donc qu'elle aimeroit mieux vne conditiō moyenne & moderée, qu'une ou tref-miserable ou tref-fortunée: & q'en cas qu'il luy faudroit eslire l'un des deux, elle esli-

*Epistre
qu'elle e-
scrut au
Roy qui
l'auoit re-
pudiée.*

*Apo-
thegme
d'elle.*

roit plustost la mal-heureuse que l'heureuse, pour-ce que ceux qui sont mal fortunez ont tousiours quelque consolation, mais ceux qui sont trop heureux, perdent l'entendement. Laquelle parolle, comme dist le mesme auteur, estoit digne d'une femme chaste & bien sage.

CE mesme an l'Empereur voyant bien que quelques nations d'Europe estoient plus soigneuses de son mal que de son avantage, aduisa diligemment à ses affaires, & comme prudent Prince qu'il estoit, deuança ses ennemys, si qu'ilz auroient plus à craindre, que d'entreprendre guerre contre luy. A raison dequoy il dressa vne armée pour aller en Afrique, & donner quelque escorne à Barberousse, induit à ce par raisons fort honestes & utiles à la chose publique des Chrestiens. Et sur cela les François ne se remuerent point, & sembloit qu'ilz eussent vne dent de lait alencontre de l'Empereur, quoy que le Roy fust son beau-frere. Dequoy estans informez les Italiens, les Genevois & Alexandre Duc de Florence, se meirent sur leurs gardes au meilleur point qu'ilz peurent, pour n'estre surprins si le François attentoit quelque cas de nouveau. Quand au Pape Paul, il enuoya à l'Empereur pour parfaire son armée d'Afrique quelques vaisseaux à trois rames pour banc, ne voulant pas en cecy mespriser le salut public & l'utilité Chrestienne. Et cependant chacun s'apprestoit en Espagne pour ce voyage, de maniere que le bruit qui auoit couru du Roy de France, du Roy d'Angleterre & des Suisses, fut esteint en moins de rien. Et quand à Messieurs les Venitiens, à cause de l'alliance que trente ans deuant ilz auoient faicte avec Baiazet, Roy de Turquie, ilz ne profiterent en rien à ceste guerre, ains furent seulement les spectateurs, & non les coadiuteurs de ceste sacrée expédition: & fut cecy vn accessoire des calamitez de la chose publique ia assez affligée. Ce fut l'Espagne, qui se monstra allegre & courageuse à mener ceste guerre. Le Seigneur André d'Orie ayant esté certioré de tous les desseings de l'Empereur, à cause de sa fidelité & son experience au faict de la mer, mit sus vne grosse flotte de vaisseaux, entre lesquels y en auoit vn à quatre rames pour banc pour porter l'Empereur, les matelots duquel estoient

Preparatif de l'armée de l'Empereur, pour mener en Barbarie.

tous habillez de soye, & estoit le vaisseau paré & accoustré magnifiquement avec plusieurs banderolles & fanons. Le Pape ^{Presens} Paul enuoya au Seigneur d'Orie l'espée qu'on sacre solemnellement, les gardes de laquelle estoient enrichies de maintes pierres precieuses, & enuoya aussi plusieurs ornemens fort exquis du mesme glaue. Aussi luy fait present la Saincteté d'un chapeau de soye tout garny & enrichy de perles, lequel present a accoustumé d'estre donné aux grandz Roys: & neantmoins à bon droit fut-il donné à André d'Orie, les prouesses duquel estoient par tout cogneuës, qu'il auoit faictes sur mer contre les Turcs, Mores, & pirates. Ce qui esguillonna le bon vieillard à monstrier plus gayement sa vaillance & dextérité. Ce pendant l'Empereur laissa le Seigneur Antoine de Léue pour l'estat de Milan, homme qui n'auoit gueres son second au faict des armes, & deuoit par sa prudence empescher, que rien ne branlast en Italie. Le S. Pere fut à Centi-celle, où il beneist l'armée qui alloit en Barbarie. Loys, frere ^{du Roy de Portugal.} du Roy de Portugal, & la seur duquel estoit femme de l'Empereur, se veint ioindre à l'armée imperiale avec vingt-cinq nauires, esquelz outre les matelotz & comites y auoit deux mille bõs soldatz. Or aduint vn cas qu'on n'eust iamais pensé, tandis qu'on voguoit en plaine mer. La nauire Capitaineſſe, en laquelle estoit l'Empereur, heurta dans le sable, ce qui estoit bien d'agereux, ^{L'Empereur en d'at ger sur mer.} si André d'Orie n'eust mōstre ce qu'il ſcauoit faire, tirāt d'une legereté & industrie merueilleuse ceste nef ia enfoncée dans le sable. L'Empereur eut belle peur de cela, ramenteuant en soy que son pere Philippe enueloppé d'un mesme peril, n'en eust iamais peu eschaper, si par vn grand miracle les flotz de la mer n'eussent emporté la nauire outre les monceaux de ce sable. Si estoit ceste armée de l'Empereur presque de 700 voiles ^{700. vaisseaux sur mer.} de maniere que Barberousse entendant q̃ l'Empereur venoit en personne, fut grandement effrayé. Car le Barbare n'eust iamais faict estat, que l'Empereur eust entrepris vne guerre si difficile & perilleuse en vn lieu si sterile & sablonneux, & où il n'y auoit presque point d'eau, principallemēt au temps d'esté: & partant il s'attendoit que l'Empereur feroit ceste guerre par

ses Lieutenans & Capitaines. Neantmoins il enhortoit les gēs de se monstrier braues & vaillās, & qu'ilz ne doutassent point qu'ilz emporteroient la victoire, & que leur principal soing & diligence fust à defendre la Goulete, laquelle est vn fort, & vne tour de brique, remparée de tous costez, & garnie d'artillerie que Barberouffe y auoit fait mettre. La flotté estant arriuée, & les ancrs iettées en mer, l'Empereur commāda que les soldatz se meissent en des esquifz, & qu'ilz prinsissent terre.

La Goulete.

Comment les Chrestiens prindrent terre en Barbarie.

Ce qui fut executé si dextremēt, q̄ soudain les Barbares sans attendre le choc abandonnerent le port, n'osans attendre l'artillerie des Chrestiens. L'Empereur mesme mit le pied en terre, plein d'esperoir & de courage, comme celuy qui ne s'appuyoit que sur la puissance de Dieu, qui certainemēt estoit le protecteur & defendeur de sa personne. Lors les Numides, qui sōt gens d'armes gaillardz, rusez, & de grand labeur, attaquoient les nostres brusquement, les endommageoient, & en bleçoient plusieurs griefuement à tout leurs flesches, dardz & pierres qu'ilz iettoient sur les nostres. Nonobstant l'Empereur n'estāt nullement espouuanté de leur barbarie, les alla descouurir avec bien peu de gēs, quelque deuoir que les plus grandz feissent de luy arracher ceste volōté de la teste, à cause q̄ les Numides voltigeoient de toutes partz, lesquels il mesprisā courageusement. Ce-pendant on s'entre-chocquoit quelquefois, par-ce que les Barbares venoient agaçer les nostres, & maintenant eux, maintenant les nostres estoient les vaincueurs, ius-

Maladie des soldatz.

qu'à tant qu'en fin l'Empereur proposa de forçer la Goulete de toute la puissance qu'il auoit amenée. Car les soldatz commençoient déia à venir malades, pourautāt que la chaleur du iour par trop vehemente les brusloit, & la nuit estoit si fresche, à cause de la rosée, qu'ilz pensoient mourir de froid. Outre ce, Barberouffe attendoit de iour à autre grandes forces des Numides qu'il auoit souldoyez, la venue desquelz l'Empereur vouloit fort deuançer. Et quoy que l'Empereur se tra-uillaist beaucoup pour les malades, en leur dōnāt toutes choses necessaires au mieux que faire se pouuoit, neantmoins on ne pouuoit auoir d'eau douce en ces lieux si sablōneux, de fa-

Disette d'eaux douces.

con que tant les malades que les sains estoient cōtrainctz d'estancher leur soif avec des pōmes aigres, ce qui offensoit beaucoup leur santé. Au moyé dequoy le 15. iour de Iuillet l'Em-
 pereur commanda, qu'on braquaſt toute son artillerie pour *On bat la*
 battre le fort de la Goulete. Le Seigneur d'Orie eut la charge *Goulete.*
 de la battre du costé de la mer. Lors des la pointe du iour
 iusqu' au midy celle forteresse fut tant batuë, q̄ non seulement
 il sembloit que la terre tremblast, mais encore qu'elle fondist
 en abyſme, & la mer au-parauant calme & bonace s'enfloit
 merueilleusement, & estoit pleine d'orages, & la fumée de l'ar-
 tillerie estoit si espeſſe qu'ō ne pouuoit veoir le ciel. Tellemēt
 qu'ō abbatit celle tour & tous les bouleuers, & partāt il estoit
 assez facile aux nostres de la forçer. Encor' afin de leur hauger
 le courage, certain religieux leur monstroit le chemin, portāt
 en ses mains vn crucifix esleué en haut. Alors dōcques L'Em-
 pereur commanda qu'on se ruaſt sur les barbares, ce qu'ilz fei- *On la*
 rent valeureusement, ne se ſoucians en rien de leurs dardz, ny *prend.*
 des potz & lances à feu, qu'ilz iettoiēt fort dru sur les nostres.
 Parquoy les Barbares, estans de ce tous effraiez gaignerent au *Perte des*
 pied, non ſans que plusieurs mouruſſent par le chemin, & que *Barbares.*
 les autres fuſſent iettez dans les eſtāgs. Et ſans que l'Empereur
 perdiſt gueres de ſes gens, il gaigna à ce coup toute l'artillerie
 de Barberouſſe, & tous les nauires & vaiſſeaux q̄ Barberouſſe
 auoit fait venir sur le deſtroit de la Goulete, ce q̄ rēuſſit à autāt
 de proffit & volupté à l'Empereur, q̄ Barberouſſe & les autres
 felons pirates en eurent de dōmage, à cauſe q̄ par ce moyē ilz
 perdirent toute leur flotte & leurs forces ſur mer, dequoy ilz
 creuoiēt de deſpit. Ceux qui ſe peurēt ſauuer de la Goulete, ſe
 retirerēt à Tunes, où estoit Barberouſſe, lequel premierement
 les tença, mais apres mettāt ſon ire à part, les enhorta de ſe mō-
 ſtrer vaillans & plus courageux delà en-auāt, leur remonſtrāt
 que le ſecours des Africans & Numides n'estoit pluſt gueres *Le Roy*
 loing. Or ſur ces entre-faictes Muleaſſe, Roy de Tunes, veint *Muleaſſe*
 au cāp de l'Empereur, lequel auoit eſté chaſſé de ſon Royau- *demande*
 me par Barberouſſe. Cestuy estoit d'afſez bōne hauteur, noy- *ſon Royau-*
 raud & d'vn viſage viril, mais fort louche estoit-il. Baifé qu'il *me de Tu-*
 pereur. *nes à l'Em-*

eut les mains de l'Empereur, il se meit à terre à la maniere accoustumée en son païs, & fassoit sur vn rapis, demãdant humblement à l'Empereur par vn truchement, que son Royaume paternel luy fust restitué, promettãt en cas que cela fust faict, toute loyauté, seruice & choses sēblables à sa maieſté. A quoy l'Empereur luy respondit en concedant tout ce qu'il demandoit, pourueu qu'il teinst ce langage du bon du cuer, & non par feintise, vſitée entre les Africãs des le temps iadis. Ce Roy Barbare & Mahometain de profession estoit fort expert & adextré au faict de la guerre, & outre il auoit grande cognoissance des choses celestes selon la doctrine d'Auerroïs. Si com manda l'Empereur qu'on luy dressast vne tête, & qu'on le traitast en toute courtoysie & humanité. Mais le Roy admiroit au cãp de l'Empereur sur toutes choses le nombre & l'assiette des canons, & vne incroyable abondance de toutes choses venales au marché, & d'auantage la modestie & tràquillité des gēdarmes qui achetoiet quelque chose qui leur faisoit besoing. Les Chefz de l'armée imperiale luy sçeurent si bien tirer les vers du nez, qu'ilz entendirent beaucoup de choses proffitables à deffaire les forces de Barberouſſe. Forcé que fut le fort de la Goulete, l'Empereur print la volte de Tunes: mais tandis qu'il desseignoit maintes choses en son esprit, & qu'il pouruoyoit à son cãp, on eut plusieurs escarmouches avec les Numides. Car iceux ont accoustumé de se ruer furieusement sur l'ennemy, & filz voyent qu'il n'y fait pas bon pour eux, ilz rebrouſſent chemin cōme rusez qu'ilz ſōt, afin de faire marcher les autres plus auant: & lors filz voiet leur bon, ilz s'en viennent tous sur ce peu qui les suit, & aysément les mettent en route. Voyant l'Empereur en certaine dure rencontre que les Espaignolz auoiet du pire, print qlques cheuaux avec soy, & attainit les Barbares si cheualeureusemēt, qu'il les meit en defarroy, & ce iour la nō seulemēt feit-il l'estat d'un vaillãt Capitaine marchant le premier en la bataille, mais bien encore d'un bon soldat, si qu'il gaigna la couronne que iadis meritoient ceux qui auoient sauué vn citoyen, à cause qu'il sauua par sa prouesse André Ponce, gentil-hōme, enuironné des ennemys.

*Costume
des Barba-
res en ba-
taille.*

*Prouesse
de l'Em-
pereur.*

LORS y eut quelques personnages de conseil, qui tascherent de persuader à l'Empereur, qu'il estoit temps qu'il se retirast d'Afrique, attédu qu'il y auoit déia conquis assez de loüange & honneur, consideré que la Goulete estoit prise, & que le Barbare estoit assez dompté. Mais l'Empereur aussi prudent en cecy que ailleurs, leur feit vne belle remonstrance au contraire, & commanda de rechef que la Goulete fust renforcée, ^{On renfor} de maniere qu'on y méit plus de mille Espaignols en garni- ^{ce la Gou} son. Et ce fait, tout l'appareil de guerre marcha vers la ville de Tunes. ^{lette.}

L'EMPEREUR auoit déclaré que le Seigneur du Guast ^{Remonstrā} estoit General de l'armée en ceste guerre, & nommément au ^{ce aux sol-} iour qu'on deuoit venir aux mains avec l'ennemy. Les Italiés, ^{dats faite} Espaignols & Alemans auoient bien chacun leurs Chefs & ^{par l'Em-} Capitaines, qui les incitoient à bien faire: toutesfois l'Empereur voltigeoit par tous les rangs, enhortant vn chacun de se monstrier preux & vaillant en ceste guerre, & combattre de bon courage à l'encôtre des ennemis de Iesus-Christ, qui n'estoient point armez, & en ce faisant auroient vne belle ville pour leur proye & butin. On ne scauroit penser, combien ceste allegresse & courage de l'Empereur enflâma tous les gēf-d'armes, de maniere qu'ils meirent en oubly toutes leurs angouisses, & le mal qu'ils souffroient à cause de la soif: combien que plusieurs feirēt des restifs à se ranger, lesquels neârmoins par la presence & seuerité de l'Empereur furent contraincts de faire leur deuoir comme les autres. Car cōme il estoit naturellement doux & debonnaire, aussi quand le cas le requeroit il se monstroit aussi seuer, comme il appartenoit à vn tel Empereur. L'armée estoit déia fort approchée de Tunes, quād on s'apperçeut des forces que Barberousse auoit à la campai- ^{Bataille} gne, qui montoient plus de cent mille hommes. Alors le Sei- ^{contre les} gneur du Guast, lequel (comme nous auons dit) auoit esté de- ^{Barbares.} claré sur-intendant en ceste guerre, ains qu'on dōnast le choc au Barbare, teint tel langage à l'Empereur: Je veux icy vser de ^{L'usage te} ma puissance, & commande que vous vous retiriez d'icy au ^{nu a l'Em} cueur de la bataille où sont les enseignes, de peur q̄ d'vn coup ^{pereur.}

de boulet ietté fortuitement, toute ceste armée & la vie d'un chacun ne soit mise en grâdissime d'anger par la mort de vous seul. L'Empereur oyant ce propos se meit à souz-rire, le priant de n'auoir point de peur, attēdu que iamais Empereur ne mourut de coup de boulet: neātmoins luy obeissant modestemēt, se retira la part ou son Lieutenant auoit commandé, sans aucun delay. Adonc sonnerent les trompettes & clerons pour

Les Barbares des-fuils.

l'alarme, & se ruerēt les nostres si impetueusement sur les Barbares, que ains qu'ils fussent venuz au ioindre, ils en ruerent trois cens, & meirent tous les autres en route, se saisissans de toute leur artillerie & cariage, dont Barberouffe grinçoit les dens de despit, & s'en fuit vistemēt à Tunes. Or y auoit-il dans icelle ville plusieurs Chrestiens captifs, lesquelz ce selon & enragē Barbare voulut faire mourir & brusler en vne Tour, l'ayant enuironnée de pouldre à canon: mais à la suasion de

Prinse du chasteau de Tunes.

quelque segnalé pirate, il changea d'opinion. Si estoit ia couru le bruit de ce furieux desseing dans la prison, par la misericorde de deux affranchis, vn nommé François, Espagnol, & l'autre Vincent, de Dalmatie: lesquelz quoy qu'ils fussent des gens de Barberouffe, toutesfois esmeuz de ie ne sçay quelle pieté ouurirent la porte, & donnerent à ces pauvres miserables des instrumens pour rompre les chesnes auxquelles ils estoient attachez. Lesquelles ne furent pas plustost rompuës, que eux estans nuds prenans des pierres & quelques autres choses se ruerēt de si bonne façon sur les Turcs, que iceux furent contraincts d'abandonner la place, laquelle veint en la puissance des Chrestiens, qui meirēt à mort quelques Turcs, & saisirent tous les thresors du Roy, toutes les armes & munitions, & au sommet de la Tour du chasteau planterent l'enseigne iadis prinse sur les Chrestiens, desireux de donner à cognoistre par ce signal à l'Empereur & à son armée, que le chasteau estoit en leur puissance. Barberouffe retourne au chasteau tout forcené, disant mille maux de ses Dieux, tellement qu'estant surpris d'une fureur extreme, ouurant sa porte prioit humblement les Chrestiens de le vouloir laisser entrer là dedans avec les siens, promettant à tous de les affranchir. Mais

Barberouffe se fuit à Bonna.

ils

ils prindrēt des pierres & les ietterēt sur luy, de maniere qu'estāt outré de cholere & desesperé en ses affaires, gaigna la garrite avec sept mille Turcs vers Hippone, (maintenant dicte Bonna) où iadis ce grand Docteur S. Augustin estoit Euesque. L'Empereur ayant entendu ceste nouuelle, approche son ost bien pres de la ville, & vindrent les Magistratz luy donner les clefz de leur cité, mais ilz le prioient à maintz iointes de leur faire tant de bien, que de ne laisser entrer la gendarmerie dās la ville. Sur quoy l'Empereur demeurant vn peu à respondre, les soldatz murmuroient, & furent si impatiens, qu'ilz entrerent à la foulle dās la ville, quoy que l'Empereur ne l'eust voulu, & que Muleasse requeroit instammēt qu'on ne le feist pas. A la verité l'Empereur à bon droit soupçonnoit la foy de ces *Comment on entra dans Tunes.* Africans, & ne fut sans cause qu'il fut si lent à respondre à la requēste des habitans de Tunes. Car ilz differoient cautelement la solde promise par Muleasse, pour veoir quelle issue auroient les affaires de Barberouffe. Le Seigneur du Guast accompaigné de bien peu de gēs alla le premier iusqu' à la porte du chasteau, lequel fut reçu par les Chrestiens cy-deuāt captifz, en toute ioye & gayeté, de façon que s'estant emparé du chasteau, les soldatz entrerēt dans la ville à la file. *Sac de la ville de Tunes.* Quand aux Italiens & Espagnolz, ilz ne faisoient que piller, mais les Alemans assouuiffoient leur soif en tuant ces Mahometains comme bestes brutes, n'ayans respect aucū ny à l'aage ny au sexe, dont l'Empereur feit crier sur la peine de la hart, qu'aucun ne feist tort ou violēce aux habitans de Tunes. Entrée que fut sa maiesté dans le chasteau, il promet aux Chrestiens captifs nefz & victuailles pour retourner en leur païs. Aux deux hommes de Barberouffe, François & Vincent, qui auoient esté cause q' les esclaves auoient rompu leurs ceps, il feit donner argent & accoustremens. Or Muleasse regretta principalement trois *Ce que regrettoit le Roy de Tunes au sac de la ville.* choses à la prinse de ce chasteau de Tunes. Premièrement des vieux liures Arabes, qui contenoient l'interpretation non seulement de toutes disciplines, mais bien de toute l'histoire des Roys precedens, & de la religion Mahometaine, ce qui luy faisoit plus de mal que tout le reste. Secondement des vn-

guens & drogues d'odeur tressoëf, de l'ambre, du musc, & autres, lesquelles estoient encloses en certains coffretz de plomb, & boëtes d'yuoire, de valeur inestimable. Troysiemement il regrettoit fort du fard, & quelques couleurs fort pretieuses, lesquelles les soldatz auoient foullées aux piedz.

*Armes
des Fran-
çois à Tu-
nes.*

Il y auoit là beaucoup de lazur, de safran, & choses venues d'Inde, dont Muleasse estoit bien desplaisant. Aussi trouua-on au chasteau les armes & bottes des Cheualiers François, lesquels trois cens ans au-parauant auoient mis le siege deuant Tunes avec le Roy S. Louys.

*Barberous
se eschappe*

TANDIS que les choses se passoient ainsi à Tunes, Barberousse arriua en santé à Bonne, où il tira quatorze galleres qui estoient là demeurées sur les vases, & se réforce le mieux qu'il peut. Or ceux qui furent enuoyez de nostre camp pour luy

coupper chemin, ne sçauoient que c'estoit de la marine, dont aduint que sans faire chose memorable ilz s'en retournerent au camp, & ce-pendant le meschant & felon pirate eut loysir de se retirer premierement à Alger, & delà à Constantinople, au tres-grand dōmage des Chrestiens. Dequoy André d'Orie

*Prise de
Bonne.*

penfa mourir de despit, & toutesfois estimât qu'il pourroit encore r'attaindre l'ennemy, marcha droict à Bonne: mais ayant sçeu que Barberousse auoit gagné au pied, il print la ville, demâtella les murailles, & meit garnison au chasteau, lequel neantmoins l'Empereur voulut par-apres estre abbatur de ter

*Muleasse
est reinstal-
lé Roy.*

re. Apres cela, sa maiesté declara Muleasse estre Roy de Tunes, & pour hommage annuel ledict Muleasse estoit tenu de donner à l'Empereur deux faucons, & deux cheuaux legers sortis de Numidie, en condition qu'il seroit amy des Chrestiens, ennemy des Turcs, & loyal à l'Empereur: & payeroit au par-sus la solde de mille soldatz ou plus, que sa maiesté laissoit en garnison à la Goulete.

*L'Empe-
reur part
d'Afri-
que.*

CEs choses ainsi faictes, l'Empereur feit haüger les voiles à toute sa flotte, & vint surgir en l'Isle de Sicile, en laquelle il fut reçu fort pompeusement, & en tous lieux il receuoit argent, iusqu'à tant qu'il arriua à Naples. Sur le chemin on luy apporta nouuelles de la mort de Frâcisque Sforce, qui n'ague-

res auoit espouſé Chriſtine, fille de Chriſtierne, Roy de Dan-
 nemarc. La mort de ce Seigneur cauſa nouueaux troubles &
 tref-piteuſes tragedies en l'eſtat Chreſtien, pour-autât que les
 François demandoient tref-inſtamment leur Milan: & neant-
 moins les heretiques ne demandoient pas meilleur, voyans
 bien que l'Empereur ſeroit ſi bié empreſſé ailleurs, qu'il n'au-
 roit pas loyſir de les manier & traicter côme il ſouhaittoit bié.

Sy R la fin de ceſte année, côme l'Electeur de Saxe retour-
 noit d'Auſtriche (où il auoit parlemēté avec le Roy Ferdinād)
 à ſa maiſon, fut mādē venir à Prague par Pierre Paul Vergier,
 Legat du Pape: lequel luy expoſa le uoloir du S. Pere touchāt
 l'indiction du Cōcile, & en quel lieu il ſeroit tenu: luy declara
 quant & quāt l'aduſ & uolonté de l'Empereur & du Roy Fer-
 dinand, qui ne trouuoient pas mauuais ce q̄ le Pape auoit ad-
 uiſé, de tenir le Concile en la ville de Mantouē. A quoy le Sa-
 xon ſeit reſponce, qu'il en conſulteroit plus diligemmēt avec
 ſes alliez de la ligue de Smalcalde. Dōcques le 26. iour de De-
 cembre les Proteſtans reſpondirent entre autres choſes, que
 Mantouē ne leur plaſoit pas, & qu'ilz n'endureroient iamais
 que le Pape vſaſt de ſon autorité au Concile, alleguans qu'il
 eſtoit leur aduerſaire, & que c'eſtoit luy qui auoit condamné
 leur religion. Et partant qu'il ne pouuoit eſtre leur iuge com-
 petent, ains qu'il failloit eſlire & deputer quelques hommes
 ſuffiſans par la uolōté de l'Empereur, des Roys & Princes, les-
 quelz cognoiſtroient de ceſte cauſe, & la decideroient ſelō la
 parole de Dieu. Mais ſçauiez-vous quelz hommes ilz appellēt
 idoines & ſuffiſans? Certes c'eſt Luther, Melancthon, Bucer,
 Pomerā, & ſemblables moines renyez, leſquelz au ueu & ſçeu
 de tout le monde eſtoient conuaincuz eſtre heretiques, & par
 conſequent deuoiet eſtre au rang des coupables, & nullemēt
 admis à decider ceſt affaire, ou en ietter la ſentence. Au moyē
 dequoy les Proteſtans dirent q̄ veritablement ilz ne deſiroiēt
 rien d'auātage que le Concile: mais eſtans amadoiēz de leurs
 gentilz predicans, le Concile qu'ilz demandoient eſtoit tel, q̄
 nul ſiecle n'e veit oncques le ſemblable, au moins qui fuſt le-
 gitime. Et puis q̄ Luther expoſe la parolle de Dieu à ſa poſte,

*Source de
nouueaux
troubles, &
cauſe de
Milan.*

*Le Legat
du Pape
traicte a-
uec le Sa-
xon du Cō
cile.*

*Les ſuffi-
sans des
Proteſtans.*

*Du Cōci-
le que les
heretiques
demādoient.*

Zuingle, les Anabaptistes, les Zuenfeldians, & Seruet chacū à la leur: qui est celuy, s'il n'est totalement fol, qui puisse croire, que par la seule parolle de Dieu on puisse rien resoudre en vn Concile, sans s'ayder de l'interpretation de l'Eglise Catholique. Par telles ruses & tergiuersations de noz nouueaux Euangeliques & dogmatifans est aduenū, que les Magistratz & sur-intendans des Protestans ne veulent admettre aucun Concile, auquel le Pape preside selon la coustume de tous les siecles passez, & ne font cas du Concile de Trēte, auquel les plus doctes & entiers personages qu'on scauroit trouuer, ont esté presens. Mais il ne faut point se rompre la teste, iamais l'Eglise ne procedera autrement à tenir le Concile, qu'elle a reçeu & retenu des Apostres & leurs successeurs, quoy q̄ les sectaires en murmurent. Que si on change la maniere de celebrer les Conciles selon la phantasie des nouueaux heretiques, vrayement ie leur donne leur cause gaignée, & impetrerōt tout ce qu'ilz demandent. Neātmoins vn Cōcile Lutherien arrestera vne chose, & vn des Anabaptistes vne autre, & ainsi des autres.

*Le Roy de France s'al-
lie avec les
Protestans.*
Au reste, en ceste assemblée des Protestans à Smalcalde fut present l'Ambassadeur du Roy de France, lequel vouloit bien auoir l'amitié des Potētz d'Allemagne, qui luy pourroit seruir aux guerres d'Italie. Et neantmoins tous ceux qui estoient soupçonnez de Luthererie ou autre heresie en son Royaume, estoient punis tout ainsi qu'il appartenoit à telles gēs. Parquoy il faut bien dire que ce qu'il feist en salliant des Protestans, il le feist seulement pour estre plus fort à l'encontre de l'Empereur, non pas qu'il approuuast aucunement leur religion: comme pour mesme occasion les Lutheriens taschoient de s'insinuer es bonnes graces de ce grand Monarque, combien qu'autrement ilz ne voulussent guere de bien aux François, à cause de la diuersité de religion. Car & l'un & l'autre redoutoit bien fort la puissance de l'Empereur, & partant ilz se renforçoient par tous moyens à eux possibles.

*Synode
des Zuingliens.*

EN ce temps les Zuingliens de Zurich se sentans offensez de quelques liuretz de Luther & ses adherans, signamment à cause que Luther auoit escrit qu'Oecolampade estoit mort

soudainement, estranglé par le diable, assemblerent vn synode des ministres de leur Euangile, tant de ceux de la ville de Zurich, que de tout le païs, le 6. iour d'Aoust: où fut arresté, q'on feroit imprimer vne Apologie cõtre Luther & contre les calomnies de tous ses partiaux, laquelle seroit en Latin & Aleman. Mais ce decret d'vne si honorable assemblée fut empêché par Vuolfang Capito, ministre Zuinglien à Strasbourg, toutesfois pour bien peu de temps. Ce-pendant Luther escriuit lettres à Messieurs de Strasbourg le 5. iour d'Octobre, disant par icelles, qu'il auoit bõne affectiõ de venir en cõcorde, & partât qu'ilz aduissassent où se pourroit tenir quelque synode pour traicter de ceste matiere. C'est grand cas: ilz ne veulent pas que le Pape ayt l'autorité d'assigner le concile, & neantmoins eux qui n'ont autorité aucune assemblent concile sur concile. Le simple peuple par trop indocte ne s'apperçoit pas de cela, les Princes ailleurs occupez ne le considerent pas assez meurement, & ainsi les nouveaux dogmatistes sont sans contredit tout ce qu'e bon leur semble. Parquoy cinq ministres Zuingliens s'assemblerent à Arau, qui est vne ville au païs de Berne, lesquelz aduiseroient quelque bonne forme & maniere pour venir en concorde avec Luther. Las! que l'Europe est miserable, ne voyant point ce que les faux Euangeliques de ce temps s'efforcent de faire souz le masque & voile de la parole diuine. S'il est ainsi qu'ilz sont enuoyez de Dieu, (comme ilz se vantent) pourquoy n'enseignent ilz mesme chose? pourquoy s'entre-battent ilz de ceste façon? Ceux qui suyuent telz hommes, ne se damnent-ilz pas à credit?

PAR EILLEMENT les Protestans se peinerent beaucoup ceste année, de faire tât avec l'Empereur & le Roy Ferdinad, qu'il ne seroit pas loysible aux Iuges de la Chambre de defendre la cause des Catholiques, les biens desquelz auoient esté tous pilliez & rauagez souz pretexte de l'Euangile. Veritablement c'estoit chose fort dure, & qui sentoit plus le barbare que le Chrestien, de piller les biens des monasteres & de tout le Clergé: & que neantmoins les pauvres miserables fussent forclos d'en former pleintifz aux iuges de la châtre Imperiale,

*Luther
veut s'ac-
corder a-
vec les Zu-
ingliens.*

*Les Prote-
stans ven-
lent faire
des iuges à
leur plaisir*

par l'autorité desquelz ilz eussent peu obtenir leur droict. Au reste, qu'y eussent sceu faire l'Empereur & le Roy Ferdinand, attendu que le Roy François se vouloit remuer, & que la puissance des Protestans estoit déia venue si grande, qu'il y auoit danger qu'ilz voulussent auoir par l'espée, ce qu'ilz n'auroient peu impetrer par prieres. Ce-pendant les Euāgeliques se plaignoient au possible, si les Iuges de la Chambre ordonnoient quelque chose preiudiciable à leurs desseings, & neantmoins ne vouloiēt pas souffrir, que les Ecclesiastiques se plaignissent des tortz & griefz faiēt à eux, ou qu'ilz repetaissent leurs biēs. Et c'est cela proprement, & choses semblables, qui s'appelle le pur Euāgile, la pure doctrine, la pure parolle de Dieu. On list que iadis Iulian l'Apostat dist à certain Chrestie qui estoit fort riche: vostre Iesus-Christ commande en l'Euangile que vous laissiez toutes choses, fay donc ce qu'il commande & me donne tout ce que tu as. Le Chrestien respondit alors: mais il commande qu'on donne son bien aux pauvres, & non aux riches. Quand à l'Euangile de Luther, il n'exhorte pas que tu laisses ton bien, ains il permet, voire commande que tu vsurpes le bien d'autrui. N'est-ce pas cela vne prodigieuse metamorphose de toutes choses? Le temps passé les Princes d'Allemagne, voire les Empereurs mesmes fondoient par tout en Allemagne des colleges, des Eueschez, des monasteres, & leur assignoient de bons & grandz reuenuz: mais à present vous les verrez en plusieurs lieux destruiēt, ruinez, & saccagez, sans qu'il soit permis aux pauvres affligez de pourfuyure la reddition de leurs biens.

Malice des Protestans.
Metamorphose du vieux tēps
Mariage du Comte Palatin. CESTE année Dorothée, fille de Christierne Roy de Dannemarc, fut donnée à femme en la ville de Bruxelles à Frideric Comte Palatin, lequel à ceste occasion pretendoit quelquesfois auoir droict au Royaume de Dannemarc: & neantmoins il ne le pourfuyuit pas, à cause que l'Empereur auoit assezt où s'emploier ailleurs, lequel sembloit auoir bonne intention de secourir Frideric en ce sien droict, s'il eust eu le moyē & commodité de ce faire.

IL y eut ceste année vn hoste au Duché de Vvittemberg,

qui dóna à mager à ceux qui estoiet venuz loger chez luy, de la chair d'un pourceau q auoit esté mordu d'un chien enragé. Les hostes n'eurent pas plustost gousté de ceste chair ainsi infectée, qu'ilz vindrent enrager, & s'entremordoient l'un l'autre.

APRES le deces de Francisque Sforce, le Roy François demanda ceste année à l'Empereur, que son Duché de Milan luy fust rendu. Mais l'Empereur, qui scauoit bien le profit & vtilité qui luy venoit de ceste piece, & qui craignoit merueilleusement que le Roy de France, si puissant Monarque, iouissant de ceste opulente contrée d'Italie, ne se contéast pas de cela, ains se ruast sur les terres d'autrui, & nommément sur les siennes, ramenteuant aussi en soymesme, que les Roys predecesseurs d'iceluy auoient fait le semblable: ne peut oncques estre persuadé de dōner le Duché au François, chose qui engendra mille troubles & nouuelles partialitez, comme nous auons dit cy dessus. Or à fin qu'il ne semblast que le Roy François print le premier les armes à l'encontre de l'Empereur, il veit qu'il estoit bon de s'emparer des terres & seigneuries du Duc de Sauoye son Oncle, à fin qu'ayant cela à son commandement, le chemin luy fust aysé & facile pour aller en Italie. La femme de ce Duc estoit sœur propre de la femme de l'Empereur. Le Roy n'intentoit ceste guerre sans cause & occasiō, alleguant que le Duc ne luy vouloit rédre sa ville de Nice en Prouence, en luy donnant la somme de l'argent, pour laquelle les François l'auoient iadis engagée.

L'AN 1536. sur la prime-verre, les François enuahirent avec grandes forces les terres du Duc de Sauoye, & forcerent plusieurs places dudit Sieur destitué de tout secours & ayde: & si Antoine de Léue vaillant Capitaine pour l'Empereur ne leur eust fait teste avec son armée, ils eussent aisément prins Verceil, qu'ils assiegeoient, & plusieurs autres lieux des appartenances du Duc. Encore sa calamité n'estoit pas assez grāde, si les Bernois de Suisse ne se fussent emparez de tout ce qui estoit au Duc iusqu'au lac de Losanne: & ce à ceste occasion. Ceux de Geneue s'estoient faits Lutheriens, laquelle ville est presque au cueur du païs de Sauoye. Au moyen dequoy le

Hommes
venuz en-
rager.

Le Roy de
māde Mi-
lan.

Le Roy
fait guerre
au Duc de
Sauoye.

Les Fran-
çois courēt
les terres
du Duc de
Sauoye, et
les Bernois
aussi.

Duc, tant pour chasser ceste peste Zuingliène, que esmeu de quelques autres raisons, meit le siege deuant Geneue. Sur cela Messieurs de Geneue demandent secours & ayde à leurs voisins de Berne, lesquels prenans ceste affaire à cueur, feirent guerre au Duc, & vsurperent plusieurs places sur luy. Estant donc le sus-dict Sieur assailly & des François & des Suisses, se retira vers l'Empereur, lequel, comme encore fraischemēt retourné d'Afrique victorieux, estoit alors reçu magnifiquement & honorablement par toute l'Italie. Or auoit-il hyuerné en celle gentille & plaisante ville de Naples, où furent célébrées les nopces d'Alexandre de Medicis avec sa fille naturelle : en quoy il s'acquit grande loüange, pour-autant qu'il gardoit inuiolablement sa foy, promise au Pape Clement, quoy qu'il fust ia decedé : sans estre aucunement esmeu des prieres de quelques Patrices de Florence, qui promettoient de luy donner tous les ans grand' somme de deniers, s'il vouloit chasser Alexādre, & remettre la ville en sa liberté anciēne.

ENVIRON cēt temps Hippolyte de Medicis, cousin germain d'Alexandre, depraué par l'adulation de quelques vns, commença d'aspirer à l'estat de Florence & Duché de Toscane, quoy qu'il fust Cardinal, & assez riche de benefices : & pour venir à bout de ce qu'il proiettoit, il machina la mort d'Alexandre, en quoy on dit qu'il vſa du moyen d'un grand Seigneur. Mais Alexandre s'apperçeut de ces embusches, & en aduertit le Pape Paul, qui feit prendre quelcun de la maison du Cardinal, à qui ce proietté forfait estoit cogneu. Tellement que Hippolyte estonné de ce cas aduenu, partit de la cité : & apres se recognoissant, & se repētant d'auoir voulu exécuter vn si grād crime, tascha de r'entrer és bōnes graces d'Alexandre. Parquoy il delibera d'aller trouuer l'Empereur qui pour lors estoit en Barbarie, mais le Vice-roy de Sicile ne luy voulut pas donner de vaisseau, dont ne ſçachant que faire & destitué de tout conseil, se retira en vne ville és quartiers de Fundi, où estant surpris d'une fièvre pestilentielle, il rendit l'ame le sixiesme iour. C'estoit vn des plus aduenans & riches hommes qui fussent, quoy qu'il fust ieune : pour monſtrer aux hommes,

*Les nopces
d'Alexā
dre de Me
dicis.*

*Le cardin
al de Me
dicis affe
cte le Du
ché de To
scane.*

*Du Car
dinal Hip
polyte.*

hommes, qu'ils ne se doiuent pas fier aux forces de l'aage & du corps, ny à quelque honneur qu'ils puissent auoir, ny aussi aux voluptez mondaines: ains se doiuent consacrer entiere-ment à leur Dieu, veu que tout nous est si fressle & incertain en ce monde, que nous ne sçaurions nous vanter d'estre certains de viure vne heure. Au demeurât, l'Empereur estant encore à Naples entendit pour l'asseuré, que Barberousse ayant ramassé quelque vaisseaux à Alger, & s'en retournant à Constantinople, auoit pris les enseignes des Chrestiens passant pres le port de Mangon, & que par ceste ruse il auoit surpris tous ceux de Mangon, lesquels il auoit emmenez esclaves en Afrique. C'estoit le creuecueur que ce barbare auoit d'auoir esté si bien frotté, & de la prise de Tunes, & partant il s'en vouloit reuancher sur les Chrestiens.

CEPENDANT l'Empereur mettant ordre à ses affaires, fait alliance avec les Venitiens. Or ce qui mouuoit les Venitiens à ce faire, estoit principalement, qu'ilz esperoient que l'Empereur dōneroit le Duché de Milan à quelqu'un. Car ilz eussent volontiers souhaitté, qu'une si opulente & puissante region d'Italie n'eust esté ny à l'Empereur ny au Roy de France: mais ilz en eussent bien voulu auoir vn plus foible, la puissance duquel ne leur seroit nullement redoutable. Ce faict, l'Empereur fait leuer de la gendarmerie en Allemagne par son frere Ferdinand & ses amys. Et tandis il arriua à Rome le 5. iour d'Apuril, où il fut reçu en grand triomphe & du Clergé & du peuple. Le iour de la Cene de nostre Seigneur il lava les piedz à douze pauvres fort humblement, & à l'admiration de tous ceux qui y assisterent. Et lavez qu'ilz furent, il leur donna vn beau present, sçauoir est son buffet d'argent duquel on l'auoit seruy en table, & ainsi il les r'enuoya. A la verité ce Prince estoit humble & modeste autant qu'il est possible d'estre, & ceste humilité est fort agreable à Dieu tout-puissant, qui resiste aux superbes, & donne grace aux humbles. Or seiourna-il quatre iours à Rome, & ains que d'en partir fait vne harangue deuant le Pape, les Cardinaux, & les Ambassadeurs de plusieurs grandz Princes, laquelle estoit d'un style ardent, &

*Esclaves
emmenez
en Barba-
rie.*

*Alliance
de l'Empe-
reur & des
Venitiens.*

*L'Empe-
reur lavez
les piedz
aux pau-
vres.*

*L'Empe-
reur blas-
me le Roy
deuant le
Pape.*

entièrement à l'encontre du Roy François, remontrant qu'il auoit rompu l'alliance, & qu'il auoit irrité presque toute la terre contre luy. Et fut la fin d'icelle harangue telle, que l'Empereur se disoit estre prest de combattre le Roy corps à corps pour le droit par luy pretendu és Seigneuries litigieuses, à fin que le sang Chrestien ne fust respandu d'auantage. Car l'Empereur estoit alors nauré d'extreme douleur à cause de la calamité du Duc de Sauoye, & ne voulut oncques tenir propos au Cardinal de Lorraine, qui estoit enuoyé par deuers luy pour traicter la paix, & auquel il parla depuis à Siene: à cause qu'il estoit resolu de faire la guerre, quoy qu'il en aduint. Le S. Pere embrassa l'Empereur, le priant d'auoir plus d'esgard à la douceur & pieté, qu'à vne iuste & extreme douleur. Apres cela, l'Empereur ne voulant parler aux Ambassadeurs de France, print la volté de Siene, où il fut receu triomphamment: & les clefz luy estans presentées, fut conduict en hymnes & cantiques iusqu'à la grand' Eglise. Ce faict, il alla à Florence, où il fut festoyé de son gendre, lequel il aduertit de se donner garde, & de considerer qu'il dominoit en vne ville, laquelle, impatiente de tout ioug, auoit tousiours aspiré à la liberté par conuoitise fort grande. Et pleust à Dieu qu'Alexandre eust emprinct ceste admonition d'un Monarque si graue & experimenté, au thresor de sa memoire: car il ne fust pas mort si horriblement qu'il mourut, ce qui sera exposé en son lieu. Apres, l'Empereur demeura trois iours à Luques, où il fut festoyé, courtié, & chery des citoyens merueilleusement, & ne fut sans esprouuer leur liberalité. Iusqu'à tant que sa maiesté vint au lieu où estoit Antoine de Léue, qui, poussé de quelque mal-heureuse destinée, conseilla à l'Empereur d'aller guerroyer les François en Prouence, quoy que le Sieur du Guast, & le Seigneur Ferdinand Gonzague ne fussent pas de cest aduis. L'occasion de cela fut, que le Sieur de Léue auoit déia practiqué quelques vns, qui deuoient rendre Marseille à l'armée Imperiale, mais il fut frustré de son attente. Et vindrent les affaires à tel excès, qu'estant arriuez vingt mille Suisses au camp des François à l'improuiste, & la peste s'estant

Il va à Siene, Florence, & Luques.

Il fait la guerre en Prouence, à son damp.

mise au camp de l'Empereur, ledi^t Sieur fut forcé de se retirer quand & ses bendes à Genes, sans rien exploi^ter, & cependant Antoine de Léue veit son dernier iour en Frâce. Au me^sme temps, l'armée que Madame Marie seur de l'Empe-
 reur, (femme qui ne ressen^toit point la mignardise de son se-
 xe) auoit leuée en Flandres, & estoit venuë assieger Perōne en
 Picardie souz le Seigneur Henry de Nansau, retourna d'où
 elle estoit venuë à sa courtte honte. Si eurent les Parisiens belle
 peur, voyant que tant de milliers d'hommes abordoient de
 tous costez en France, & partant remparerent quelque peu
 leur ville. Mais ce- pendant les François amassans quelques
 nouuelles troupes en Italie, tascherent de surprendre la ville
 de Genes par merueilleuse astuce, neantmoins ilz ne vindrēt
 pas à chef de leur entreprise. Le Pape Paul deputa alors quel-
 ques Ambassadeurs d'entre les Cardinaux, lesquelz il enuoya
 vers l'Empereur & le Roy François pour moyēner vne paix,
 & quoy qu'il ne la peut impetrer, si est-ce qu'en cela il feit
 vn tour de bon pasteur, & monstra sa bonne & entiere af-
 fection.

O R tandis que le feu de la guerre estoit embrasé par- my
 la France, Monseigneur le Dauphin filz aîné du Roy, & por-
 tant le me^sme nom, mourut soudainement, au grand pleur &
 creueceur de tout le Royaume, pourautant que n'estant en-
 cor' aagé que de dix-huict ans, il estoit doué de toute sorte de
 perfections: & comme ain^si soit qu'alors il fust en la fleur de
 son aage, & que la fortune luy semblast estre si fauorable, on
 voit que par vn accident si soudain il semond vn chacun à se
 cognoistre, & que estans recors de leur condition (cōme di^t
 S. Augustin) ilz estiment que chacū iour est le dernier de leur
 vie, & qu'en ce faisant ilz vivent bien iusqu' à l'article de la
 mort. Toutesfois on ne sçauoit persuader cela aux hommes.
 Aucuns disoient que ce ieune & vaillāt Seigneur estoit mort
 de poison, & à ceste cause vn nommé Sebastien de Montecu-
 cullo eut la torture, durant laquelle il confessa d'auoir com-
 mis le crime, & partant il fut tiré à quatre cheuaux. Mais on
 luy imposoit ce forfait, & vaincu de douleur (comme aucū^s

*Siege de
Peronne à
l'honneur
des Fran-
çois.*

*La mort
du Dau-
phin de
France,
tant re-
grettée.*

tiennent) il confessa en telle sorte ce crime, qu'il affermoit que les Sieurs Antoine de Léue & Ferdinand Gonzague estoient auteurs d'un si meschant & lasche tour. Néanmoins ces deux Seigneurs se purgerent d'un acte si detestable, principalement à cause qu'on ne remarqua nul signe de poison sur son corps, & que plusieurs affermoient, qu'il s'estoit trop eschaufé à iouer à la paume, & que sur sa sueur il auoit beu de l'eau par trop, & que par ce moyen sa chaleur naturelle fut corrompue, dont la mort s'ensuyuit.

*Les predi-
cans tas-
chent de
s'accorder.*

POVR AVANT que les ministres tant Lutheriens que Zuingliens estoient gabez par tout, à cause qu'ilz estoient si fort differens, de rechef ilz tascherent de s'accorder ceste année: mais où? Au logis du patriarche & Euangeliste Luthér, à Vvitemberg. Or le Sage ne ment point quand il dict, il y a

Prov. 13.

toujours des noyes entre les superbes, & partant ceste concorde ne fut point vraye, ains dissimulée. Mesmes elle ne peut sortir aucun effect, à cause qu'ilz n'oserent rien refoudre ny arrester pour l'absence des autres, & aussi sans le consentement de leurs Magistratz: & ne furent pas si hardys, que de mettre en lumiere les actes de ceste gentille assemblée, iacoit qu'ilz fussent redigez par escrit. C'estoit proprement vne telle paix

*Costume
des Can-
diotz.*

& alliance mutuelle, qu'auoient iadis de coustume les Candiortz d'observer, lesquelz ne cessoient iamais de s'entre-battre les vns les autres, sinon que quand l'estranger les venoit guerroyer: car alors ilz se rallioient, pour faire teste à l'ennemy. Et en ceste façon les Zuingliens faisoient semblant d'estre bien d'accord avec les Lutheriens, à fin que se bendans vnaniment ilz esbranlassent plus fort les Catholiques. Ilz ne furent d'accord que d'un point, à sçauoir qu'en l'Eucharistie il n'y auoit point de mutation quand à la substance du pain & du vin: ce qu'ilz faisoient pour vexer les Catholiques, & les appeller

*Transsub-
stantiatio.*

idolâtres à pleine gorge, à cause qu'ilz tiennent cela. Mais l'Eglise de Iesus-Christ, qui ne fait cas des calomnies des heretiques, adore avec toute l'antiquité nostre Seigneur, qui est le Dieu viuant, en l'Eucharistie: & ne veut croire à autre parole, qu'à celle que Iesus a proferée, disant, Ceci est mon corps.

Cecy est mon sang, ſçachant pour vray qu'il n'y a rien impoſſible à Dieu. Et à la verité en ce ſacrifice eſpouventable, il faut que tous les argumens de l'eſprit humain aillent ſe pouruoir ailleurs, & faut que la foy face eſpreuue de ſoy, laquelle eſt d'autant plus meritoire, qu'elle ne ſ'appuye ſur aucunes raiſons.

CESTE année les Zuingliens ſoiſonnerent en ſynodes: car ilz en eurent quatre à Baſſe, vn à Zurich, & vn general (ſi *Foiſon de ſynodes le* ainſi le faut baptiſer) à Berne, auquel aſſiſterent trois cens pre- *retiques,* dicans moins quatre, r'amaſſez de toutes les villes & villages, *tous ſans* & penſez combien il en y auoit de moines renyez. Il n'y a *aucun ac-* point de doute, qu'on n'ayt plus adiouſté de foy aux decretz *cord.* de ces conuenticules de Satan, ie diſ par les ſotz & abuſez, que non pas au S. Concile de Trente, auquel tant de doctes hommes furent, ny à autre quelconque celebré par les Catholiques. Or y eut-il encore vn autre Synode des Zuingliens de Suiſſe à Arau, auquel fut ordonné, qu'aucun miniſtre des eglifeſ de Suiſſe ne ſeroit enuoyé au Synode general des Euāgeliques, lequel on deuoit tenir à Iſenac le 14. iour de May: mais, comme nous auons ia deduiſt, il fut tenu à Vvittemberg. Je croy bien que Luther ſ'eſtoit vſurpé l'autorité d'aſſigner ce Synode, & pour ceſte raiſon les Suyſſes ne voulurent permettre que leurs predicans y allaſſent. Et ſuis tout esbahy, comment Luther, vſant de ſa prerenduë autorité, ne tempeſta & ne fouldroya contr' eux, & qu'il ne donna ces refractaires à tous les diables: mais les Zuingliens ne recognoiſſoient pas encor Luther pour leur Pape, & neantmoins n'ont peu euader ſes foudres. Ce ruſé & mauidict Bucer ſe peina grande- *Du ruſé* ment, à ce qu'on feiſt quelque concorde, ne fuſt elle que diſſi- *Bucer.* mulée: mais ce n'eſt rien de nouueau, ſi iamais ilz ne peurent ſ'accorder, veu que l'eſprit Sainct, duquel les ſectaires ſe ſont ſequeſtrez, ne leur aſſiſtoit pas, qui eſt le ſeul recteur & conducteur de l'Egliſe Catholique. Et à la mienne volonté que les predicans ſeulement ſe fuſſent entre-hays, & que par meſme moyen ilz n'euffent precipité le miſerable peuple en pluſieurs ſectes, leſquelles ne ſ'accordent non plus que font

les chiens & les chatz. Iamais Bucer ne sceut tant faire avec toutes ses ruses, declarations, & machinations, que les Zuingliens de Suisse se persuadassent iusqu' à là, que de souzcrire à l'opinion de Luther ou aux fictions & refueries de Bucer. Car iceluy se rompoit la teste pour leur faire accroire, que le discord n'estoit qu'és parolles, & que quand à la sentence ilz estoient en mesme opinion: comme si ces deux sentences n'estoient diametrallement opposées, Christ est present en l'eucharistie substantiellement, & Christ n'y est pas substantiellement. Et voyla comment Bucer ne gagna rien à se tant travailler, lequel, comme i'ay dict quelquefois, ne se soucioit pas beaucoup à quelle opinion on s'arrestast, quoy qu'en ses escriptz il faisoit beau semblant d'estre fort religieux, & en ses parolles aussi: & ce fut l'apast duquel il empoisonna plusieurs, qui n'estoient pas assez cler-voyans.

De Ioachim Vadian.

EN mesme temps Ioachim Vadian, Consul de Saint Gall, qui estoit des plus segnelez Sacramentaires, escriuit six liures d'Aphorismes sur la consideration de l'Eucharistie, esquelz il enseigne euidemment combien il y a de difference entre Zuingle & Luther. Fy donc, si de ceux qui soustiennent, qu'onques y a eu vne syncere concorde entr'eux. Iusques à present ilz sont en grandissime discord, & de iour à autre produysent de leurs escholes des monstrueux architectes de nouvelles heresies, par lesquelles ilz perdent le pauvre & simple peuple.

La mort d'Erasme.

EN mesme temps Erasme de Rotterdam rendit l'esprit à Basle, qui veritablement fut vn personnage excellemment lettré, mais qui en plusieurs de ses escriptz a occasionné & Luther & tous homes marquez de mesme coing, à exciter quelques troubles & opinions sur le fait de la religion. Que veut on d'auantage? Ses liures en font foy. Et luy mesme confesse librement en vne sienne epistre à Albert le Pie, Prince de Carpy, qu'il auoit fait & escript certaines choses, qu'il n'eust ny faictes ny escriptes, si l'eust peu deuiner qu'un tel siecle deuoit aduenir. Cela est bien vray, mais neantmoins il semble qu'il n'a rien corrigé en ses colloques, où il a escrit

Temerité d'Erasme.

plusieurs choses non seulement à la vollée, mais encores fort pernicieusement. Et qu'est-il besoing de mettre si souuent en ses liures choses, d'où la ieunesse folle ne peult apprédre sinõ que à mespriser ou reuoquer en doute les constigutions, ordonnances & ceremonies de l'Eglise Catholique? Le ne veux point dire en combien de lieux il se gaudist des moynes & Theologiens, lesquels autrement ne sont gueres plaisans ny agreables à ces nouueaux Euangeliques. C'est chose trop certaine, qu'il a escrit maintes choses, qu'il seroit besoing de n'auoir oncques esté escrites. S'il estoit mestier de mōstrer en combien de lieux il a resué puerilement en ses Censures, si-^{Faulces Censures d'Erasme.} gnammēt à celles qu'il a faites sur S. Augustin & S. Hierosme, ie m'asseure que ie le fero y veoir apertement. Il y a certaine epistre es œures S. Hierosme, laq̃lle il afferme n'estre point de S. Hierosme, ains de Tertullia ou de quelcun plus ancien: & toutesfois en icelle est faite mention de S. Ambroise Euesque de Milan, & des corps de S. Geruais & S. Prothais, qu'iceluy trouua. Sur S. Augustin, il donne volontiers l'œure des cinquante homilies au sus-dict S. Augustin: & ailleurs il nye qu'une homilie d'icelles, inserée parmy les œures de S. Augustin, soit d'iceluy. Au reste, ce n'est pas grand merueille si l'erre si souuent, à cause qu'il attribué trop à son particulier iugement, & veut mesurer tout selon le style seulement, lequel est fort dissemblable en S. Augustin, pourautant que souuent il s'accommode à la portée du simple peuple, duquel il deuoit auoir esgard comme en estant l'Euesque. Ces anciens Peres de l'Eglise ne polissoient pas si fort leur diction, qu'ils ne laissent quelquesfois les couleurs de bien-dire, pour estre plus intelligibles à ceux, ausquels il parloient ou escriuoiet: ce que S. Hierosme confesse de luy-mesme en quelque lieu assez à l'œil. Si ie ne pensoy qu'on estimast, que i'escriroy plustost par animosité, que pour le zeile de verité, ie fero y maintenant cognoistre à vn chacun, cōbien de dommage ses escrits ont apporté aux amateurs, ou si vous voulez, aux contempteurs de la vie monastique, & quels sont deuenuz plusieurs à ceste occasion. Car il conseille que personne n'embrace aucune sorte

*L'utilité
des mona-
stères, con-
tre Erasme* de vie monastique, ains que d'auoir attainct l'a 28. de son aage, & ameine plusieurs autres choses, lesquelles fussent pour degouster la ieunesse de suyure l'estat de vie contemplatiue. Si es monasteres il n'y auoit aucune vie monastique, ains toute ordure & dissolution, veritablemēt ie confesse qu'il seroit bō de ne les hanter point. Mais aussi, si lon y vit religieusement, y a-il aucune raison suffisante pour empescher les hōmes de s'y rendre, deuant qu'ils soient aagez de 28. ans? le voy bien qu'ils se rendront religieux lors qu'ils seront confits en vices, ou bien apres qu'ils auront esté mariez, ce qui aduiet bien souuent deuant l'aage sus-dict. Quand à nous, nous affermōs avec toute l'Eglise, que les monasteres ont esté bien & saintement instituez, & que ceux-là prennēt vn bon & aisé chemin pour se sauuer, qui se mettent en iceux des ce qu'ils ont vsage de raison, pour illec seruir leur Dieu, non enuys, ains librement & d'vne franche volonté: attendu mesmement que les vices sont à present si frequens & si horribles entre les hōmes, que l'aage encore tendre peult aisément estre fleschi & desbauché à leur exemple. On sçait bien que personne n'est forcé de faire profession de la vie monastique, ains on donne assez bon espace de temps pour deliberer sur ce, pendant lequel vn chacun peut experimenter ses forces, & en fin resoudre ce qu'il verra estre expedient pour son salut. Que si Erasme a laissé le froc, pour habiter avec les hommes & cōuerser mondainement, non sans scandalizer plusieurs, neantmoins nous aimons mieux euitier la frequence des hommes comme dangereuse, imitans en ce ces bons anciens Peres S. Basile, Gregoire de Nazianze, S. Hierosme, Gregoire le grand, & autres infinis: ou bien si la reigle monastique a cela, qu'il faille conuerser avec les hommes, nous aimons mieux viure à l'arbitre d'vn autre, que nō pas au nostre propre, à cause qu'il n'y a plus mauuaise liberté, que lors que nous pouuons viure tout ainsi qu'il nous plaist. Ce que i'ay voulu bien dire en cest endroit, à fin que personne ne donne plus grande autorité aux escrits d'Erasme, qu'il appartient, ains qu'il se souuienne qu'il a esté homme, & qu'il a lourdement failly en plusieurs de ses liures,

liures, comme peu à peu l'experience le monstre, & le mon-
strera tousiours plus cléremēt. Les heretiques font grand côté
d'iceluy s'il semble leur estre en rien fauorable, aussi le reietēt
ilz toutes & quātes fois qu'il n'est pas de leur opiniō: & pleust
à Dieu qu'il ne se fust oncques mellé de la Theologie, ou qu'il
l'eust traitée plus religieusement & modestemēt. En l'epistre
au Prince de Carpy cy-dessus alleguée il cōfesse, qu'il a le pre-
mier senty, que l'esprit de Luther auoit esté nauré d'ambition: *Erasme*
n'a pas
escriit cōme
il deuoit.
mais à la mienne volonté qu'il se fust monstre aussi diligent &
allaigre à combattre Luther, comme l'affaire le requeroit biē.
Quand à moy, ie ne sçauroy bonnemēt alleguer la raison, qui
l'a esmeu à ne soustenir point la cause de la religion de toutes
ses forces à l'encontre des nouveaux dogmatifans: & nonob-
stant il n'y a point de doute, qu'il n'eust de beaucoup profité
à l'Eglise Catholique, s'il eust voulu employer gayemēt sa do-
ctrine & eloquence, ne fust-ce que pour la bonne opiniō que
plusieurs auoiēt de luy. J'ay ouy dire à vn personnage de grād
sçauoir & autorité, qu'il se treuve vne epistre de Thomas
Morus escrite à Erasme, laquelle neantmoins n'est pas imprī-
mée, & en icelle il l'exhorte de retracter & corriger ses liures,
disant que sans cela l'Eglise ne faudra pas à les censurer. On
voit que cest homme n'a pas esté trop mauuais prophete, attē-
du le iugemēt que l'Eglise faict à present des liures d'Erasme.
Or combien que, selon que i'ay déia dict, il a escrit maintes
choses à la vollée de la vie monastique, si est-ce qu'on peut
monstrer par plusieurs lieux, qu'il n'abhorroit pas trop ceste
maniere de viure. Nous auons vne sienne epistre qu'il escriuit
à quelque Chartreux, en laquelle il dict entrē autres choses: *Erasme*
n'a point
abhorré la
vie mona-
stique.
J'ay peur que quelques vns te deçoyent par leurs enchan-
temens, qui se vantent auourd'huy de la liberté Euangelique
à pleine gorge: croy moy, si tu sçauois micux cōment les cho-
ses vont, tu te repentirois encore moins de ceste vie. Je voy
qu'une sorte d'hommes commence à issir, laquelle i'abhorre
bien fort, pourautant que ie n'en apperçoy pas vn qui vienne
meilleur, ains tous sont pires, au moins de ceux q'ie cognois:
de sorte que ie me rependz d'auoir quelquefois escrit si à l'a-

*Parolles
notables
d'Erasmus.*

uantage de la liberté d'esprit. Et vn peu apres: certaines citez d'Allemaigne sont remplies de moines renyez, de prestres mariez, qui sont si belistres qu'ilz meurent de faim: on n'y voit au tres choses que dancier, boire & manger: ilz n'apprennent ny n'enseignent: bref il n'y a ny sobriété ny syncerité aucune. En quelque lieu qu'ilz se fourrent, toutes bonnes disciplines y prennent fin quant & la pieté. Je t'en escriroy bien d'auantage, si ie l'osoy mettre dans mes lettres seurement. Encore dit-il de rechef: Quelle liberté est ceste-cy, où il n'est pas permis de dire ses heures, il n'est pas loysible de sacrifier, ny de ieusner, ny de s'abstenir de viandes? Regarde, ie te prie, si il y a rien de plus fascheux en ce monde. En-ouure il adiouste cecy: ie veux mourir, si ie n'aymerois plustost viure & demeurer avec toy, si mô corps auoit tant de force qu'il peust seulement viure, que d'estre le premier & le plus grand au palais de l'Empereur. Parquoy, amy trescher, ie te supplie & par nostre ancienne amitié, & pour l'amour de nostre Seigneur Iesus-christ ie te voudroy prier humblement, que tu arraches cest ennuy enraciné en ton esprit, & que tu ne prestes point l'oreille aux pernicieuses fables des hommes, qui ne te proffiteront iamais rien, ains plustost se gaudiront de toy, quand ilz t'auront faict choir dâs la fosse. Voyla ce qu'a escrit Erasmus autresfois à certain Chartreux, lequel semble auoir esté instigué & chatouillé par quelques meschans (biē qu'il fust ia assez vieux) à ietter le froc aux horties, dequoy Erasmus se parforce de le retirer. Or puis que Sleidan r'apporte en ses cōmentaires fort volontiers, ce qu'Erasmus pourroit auoir dict contre les Catholiques, sans faire mention du reste, ou bien en le mesprisant: il m'a semblé bon de vous donner la lecture d'un seul passage d'Erasmus, auquel il parle de Luther & de tous les complices d'iceluy. Voicy doncques ses parolles du troysiesme liure du libre arbitre: Certainement plusieurs disciples de Luther sont si reuesches, & si fort estrangez de la tranquillité publique, que le bruiet est que le Turc mesme hayt leur secte, à cause de leurs seditions, combien qu'il laisse viure les Chrestiens qui ne s'accordent pas avecques luy. A-quoy faire vous reciteray-je, quelle

*Jugement
d'Erasmus
de nos heretiques.*

dissension il y a entre les Euangelistes, (car ainsi se nomment ilz) quelle hayne, quelle altercation, quelle inconstance, considéré que Luther a si souuent changé ses opinions, & que de iour à autre nouueaux paradoxes germent en abondance? Mais c'est trop parlé de cela: & toutesfois il me semble, qu'il sera bon que Luther nous apprenne quelle opinion il nous faut auoir quand à ceste dissension, afin qu'on couppela gorge à l'heretique de son cousteau mesme: Par vn seul moyen (dit-il sur le 5. P(salme)) le Christ combat contre les heretiques, à sçauoir en faisant qu'il y ait entre eux vn orgueilleux esprit de dissension. Car de leur discorde, s'ensuyt aussi leur ruine & perdition. Or reuenons maintenant à l'histoire.

CESTE année le Roy Henry d'Angleterre feit décoller Anne de Boulen, laquelle il auoit espousée apres auoir repudié la Royne Catherine, & le iour d'apres il se maria avec vne certaine fille nommée Ianne de Semery. Nous vous auons icy-dessus recité, que quelque grand Seigneur auoit persuadé au Roy d'Angleterre, qu'à bon droict il repudioit Madame Catherine à cause qu'elle auoit esté femme de son frere Arthus. Mais comme Arthus n'ayant encore que quatorze ans auoit espousé Catherine vierge, aussi mourant au mesme aage il la laissa vierge: ce que le Roy Henry confessa luy-mesme à l'Empereur & à d'autres. Et c'est ce que obiecte entre autres choses en quelque liure le Cardinal Polus au Roy d'Angleterre, lequel Sieur estoit du sang Royal dudit Royaume, homme tres-docte & tres loyale: & veux bien aduertir le lecteur en cest endroict, que Sleidan, comme impudent menteur qu'il est, blasonne & trahyst le los de ce personnage, comme s'il auoit fauorisé aux resueries de Luther. Car il n'y eut oncques homme plus graue, ny plus constant en la religion Catholique qu'il a esté, & croit on que pour ceste raison il fut par-apres empoisonné en Angleterre dont il mourut. Si fut deffaicte Anne de Boulen, pour la cause que vous orrez. Elle voyant bien qu'elle ne sçauoit auoir d'enfant masle du Roy, attenta vne chose si execrable, qu'elle ne meriteroit pas d'estre escrite. Car elle pria George son propre frere, de la co-

*Anne de
Boulen est
decapitée.*

*Sleidan ca-
lonnie le
Cardinal
Polus.*

*Paillard
se execra-
ble d'An-
ne de Bou-
len, Royne
d'Angle-
terre.*

gnoistre charnellement, taschant de faire par ce moyen que personne ne se douteroit de ceste couche adultere. Neantmoins elle ne sceut en auoir ce qu'elle souhaittoit, & ainsi ayant en vain commis cest inceste, ceste paillarde femme inuita quelques grandz Cheualiers de l'ordre à auoir sa compaignie: bref elle se prostitua à vn maistre Marc, musicien. Si aduint qu'elle chastia par apres vne sienne damoyelle, qui se iouoit familièrement avec son amoureux: dont la damoyelle estant faschée, exposa au Roy comme toutes choses alloiēt: lequel faisant gehenner les autres, les fist mourir quant & quant, & les iuges aussi condamnerent ceste Dame de Boulen à perdre la teste, entre lesquelz iuges fut Thomas de Boulen, pere de la criminelle.

*Victoire
és Indes.*

LE puissant & Catholique Roy de Portugal, nommé Iehan, gaigna vne belle & segnalée victoire és Indes ceste année: tellement qu'il meit en sa puissance la ville de Cambaie, riche, puissante, & plantureuse en toute sorte de grains. Si y fist edifier vn fort chasteau, & peu à peu la religion Chrestienne s'espendit grandement en ces regions là, tandis que les heresies croissent l'une sur l'autre en nostre Europe, lesquelles les hommes esuentez embrassent pour la parole de Dieu.

*Indiction
du Concile.*

CESTE année aussi le Pape Paul 3. à la sollicitation mesme de l'Empereur Charles, assigna le Concile vniuersel en la ville de Mantouë en Italie, desireux d'apporter quelque repos par ce moyen à la desolation de l'Eglise: mais ce lieu-là ne pleut pas à messieurs les Protestas d'Allemagne. Ilz alleguoient plusieurs dangers, & quoy que le Pape en alleguast de plus iustes & de plus grandz, si ne voulurent ilz oncques ceder, à cause de leurs predicās, qui ne cessoient de faire hayr & mespriser le S. Pere.

*Feu issu
du Mont-
gibel: & de
l'Isle de
Sicile.*

L'AN 1537. au moys d'April, le mont-gibel en Sicile (dit anciennement Aetna) plein de matiere de souffre, engendrée d'une humidité, vomist vn grand monceau de feu, lequel passant par tout embrasa les collines, forestz, rochers, & deux villages assis en ladicte montaigne: & si endommagea grandement les arbres, hommes & bestail. Ce feu en souffré de la

montaigne se montre de iour obscur & noir, mais de nuyt fort horrible. Les philosophes naturelz apportent ceste cause d'un si terrible feu: à sçauoir que l'Isle de Sicile au dedans & en ses entrailles est toute pleine de cauernes, de souffre, d'alum, de feu, d'eau, & choses semblables qui nourrissent le feu. Or le feu ne peut estre sans quelque souspirail, ains il se iette hors en quelque lieu qu'il soit. Et c'est pourquoy on voit en Sicile plusieurs baings chaudz. Le feu qui est és cauernes, excite vne flamme, laquelle se parforce d'issir hors, & en ce faisant elle vomist de la fumée & des boules de feu, & en plusieurs lieux elle cherche telz souspiraux par lesquels elle puisse sortir. Quelquefois és entrailles de la terre la violence du feu est si grande, qu'il iette des pierres bruslées & de l'arene, quāt & la flamme & les monceaux de feu. Trogus Pompeius au 4. liure de ses histoires parle de Sicile en ceste maniere: la terre de Sicile est cauerneuse & pleine de tuyaux, à cause dequoy les vens y'entrent facilement, d'où est engendré le feu. Au dedans elle a du souffre & du bitume, c'est à dire terre limoneuse & visqueuse: & apres que le vent est entré par le trou des cauernes, il combat longuement, & en fin engendre du feu. Et c'est pourquoy l'embrasement du mont-gibel dure: & faut dire, que le mouuement des vens est cause de ce feu. Strabo afferme qu'il a esté au sommet de celle montaigne, & qu'il a contemplé toutes choses fort diligemment. On dict qu'à la cyme y a de terribles mutations, à cause que par foys il sort comme vn fleuve de feu, & par foys de la flamme ou vne fumée obscure. Or il n'y a rien plus admirable, que cecy: asçauoir q la chaleur de ce feu ne peut estre temperée par aucun froid, & si ne peut repousser le froid. De nostre memoire on n'auoit rien veu sortir de celle montaigne sinon vne vapeur espesse & obscure, iusqu' à cest an 1537. auquel elle vomyst le feu que nous auons déia exposé. Il est assez vray-semblable, quoy que les philosophes disent, qu'en ces lieux y a quelques portes d'enfer, ou des lieux destineez pour punir les ames: comme en l'Isle d'Ilande, laquelle est située en la mer Oceane, (& au solstice d'esté elle n'a nulle nuyt, comme elle n'a point de iour au sol-

L'AN M.D.XXXVII. HISTOIRE DE TOUTES CHOSES

stice d'hyuer) il y a vne montaigne du costé de Ponant, dicté Hecla, gueres loing de laquelle y a des mines de souffre, & en charge-on de pleins nauires en ce lieu là. Or quand cest mōtaigne est en sa fureur, elle faict vn bruiet comme les tonnerres, iette de grandz pierres, vomyst le souffre : & de la cendre qu'elle iette, elle couure si bien la terre tout à l'enuiron, qu'on ne la sçauroit labourer presque à vne lieuë delà. On y voit des gouffres si remplys & couuers de cendres, qu'à peine les peuvent euitier ceux qui s'approchèt pres de celle mōtaigne pour rechercher la nature de cest embrasement, les vns desquelz sont quelquefois engloutys dās les gouffres. Là croist vn feu, qui consume l'eau, & ne sçauroit consumer des estoupes. On y voit aussi les espritz des trespassez, lesquelz se presentēt souz vne figure cogneuë aux familiers colloques des hommes, & ce à fin que ceux qui ne sçauent pas qu'ilz sont mortz dans la mer ou par quelque autre mort violente, croient qu'ilz viuēt encores : car telz hommes apparoiſſent le plus souuent. Et quand leurs amis ou familiers les prient de retourner à la maison, ilz disent avec vn tendre gemissement qu'ilz s'en vont à la montaigne Hecla, & s'esuanouissent tout sur l'heure. Si a voulu Dieu tout-puissant que telz lieux apparussent dans la terre, à fin que les hommes ne puissent douter quelz tourmens auront les meschans apres ceste vie, & que pour ceste raison ilz apprennent à aimer Dieu, & euitier le feu eternal.

A Y A N T l'Empereur seiourné quelque temps à Genes pour confirmer sa santé, voulut mettre ordre aux affaires d'Italie, auant que d'aller en Espagne. Au moyen dequoy comme il y eust trois grandz Seigneurs, lesquelz tous demandoient les terres de Mont-ferrat, & pour prouuer leur demande alleguoient certaines raisons, l'Empereur séant au liēt de iustice l'adiugea au tref-illustre Seigneur, Frideric de Gōzague. Car il auoit espousé la seur de Boniface, laquelle indubitablement deuoit estre heritiere de defunct son frere, qui estoit mort à cause que son cheual estoit cheu soudainement. Quand au chasteau de Milan renommé entre tous ceux de la terre, il y establit vn Espagnol pour Capitaine: & ce faict, la mer estāt

Mont-ferrat adiugé à Frideric de Gōzague.

bonace, print la route des Espaignes, à ce faire l'instiguant André d'Orie, remonstrât qu'il estoit bon de partir deuât l'hyuer.

A v moys de Ianuier de ceste année aduint vn fait terrible & plein de lascheté, qui peult seruir à tous hommes d'esguillon pour sauancer à leur salut eternal, & mesmes au temporel: & signamment les Princes & grands Seigneurs, qui ne sçauoient se tenir trop sur leurs gardes à cause des embusches de plusieurs, lesquelles neantmoins ils pourront plus aisément euitier, en gagnant l'amour & faueur de leur Dieu par leur bonne & loüable vie. Il y auoit à Florence vn Duc, nommé Alexandre de Medicis, gendre de l'Empereur, ieune homme gaillard & puissant, aagé de 26. ans ou enuiron, & qui se monstroient moderé & equitable en pacifiant & accordant ses citoyens. Mais en vne affluëce de telles choses, ioint à ce l'ardeur de la ieunesse qui ne cessoit de l'espoinçonner, il n'est de merueille s'il se laissoit trop aller aux femmes, de maniere que ne se contentant pas de sa couche nuptiale, il n'auoit esgard ny à sa dignité, ny à sa santé, & moins à son salut. Or le Seigneur Laurent de Medicis, qui luy estoit le plus prochain de tous ceux du sang de Medicis, se sceut si dextrement insinuer en la familiarité de ce Prince, que luy qui n'estoit pas des plus fins de ce monde, luy attribuoit presque plus qu'à nul autre. Laurent donc, comme le Duc Alexādre estoit à Naples, (auquel lieu pareillement estoient les bannis de Florence) estoit si meschamment rusé, que presque tous les iours il se vantoit deuât les exilez de tollir la vie au Duc, disant mille maux de luy, & de rechef il rapportoit à Alexādre tous les desseings des bannis. Ce qu'ayans quelquefois apperceu les bannis, conçurent vne merueilleuse haine contre luy, & semblablement admiroient la bestise d'Alexandre, qui se delectoit d'vn homme si desloyal que cestuy-cy. Sur ces entrefaites quelcun aduertist Alexandre de tout cecy, lequel appellant Laurēt à soy, luy declare ce qu'on luy auoit r'apporté. Le galland, à qui on n'eust sçeu tirer les vers du nez, confessa qu'on luy auoit dict chose vraye, mais qu'il faisoit cela, pour-autant que c'estoit le vray moyen de sçauoir toutes les entreprinſes des exilez, en

*Discours
sur le meur-
tre d'Alexādre Duc
de Florēce,
par Laurēt de Mé-
dicis, son
parent.*

diffimulant deuant eux de vouloir grand mal au Duc: ce que l'autre print pour argét content, & à son mal-heur. Aduint cependant, ayant ia Laurent plus d'un an & demy proietté la mort d'Alexandre, qu'il promet au Duc de luy amener sur la minuiet vne Dame belle au possible, & qui estoit fort soigneuse de sa chasteté, mais neantmoins il disoit qu'il l'auoit gaignée. Le pauvre Duc creut à ce mal-heureux rapport, & alla volontiers à la maison de Laurent, laquelle estoit ioincte au logis du Duc. Estant donc là dedans, on fait sortir de la chambre deux hommes qu'auoit amené le Duc, & reposant sur le liét du trahistre, fut prié de sommeiller vn peu, iusqu'à tant que la Dame fust illec venuë. Et pource que l'espée l'empeschoit de reposer à son aise, on la luy fait laisser. Cela fait, Laurent enuoloppa si bien la poignée de l'espée, que si d'auenture le Duc l'eust voulu tirer, il ne l'eust sçeu faire qu'à toute peine. Et ainsi estant le Duc tout préparé pour receuoir le coup, (coupeur de sa vie) il se met à dormir sans songer au mal-heur qui luy pèdoit sur le chef. Voyez vous donc si les hommes sont bien auenglez, veu que pour rassasier leur glout appetit d'une briefue & dommageable volupté, le plus souuent se precipitent en vne sempiternelle mort & de l'ame & du corps? Apres cela Laurent sort de la chambre, prend l'espée, & attire vn ieune homicide à soy, auquel le Duc auoit sauué la vie à la supplicatiō de Laurent: & luy fait promettre de le seconder en ce desseing, comme il fait aussi à vn autre meschant: combié que d'autres

escriuēt, qu'il n'auoit qu'un homme avecques luy quand cest assassinat fut fait. Accompagné de ceux-cy il entre tout bellement dans la chambre, & voyant que le Duc dormoit déia, luy enfoncea la dague dans le corps, & comme il se vouloit remuer, il le fait acheuer de tuer à ses gens. On oyoit bien dās la maison vn grand bruit & vn grand cry, mais toutesfois personne ne se bougea, à cause que Laurent auoit accoustumé de faire tels tintamarres dans celle chambre long temps au-parauant, comme se iouant avec ses amis & familiers, à sçauoir pour ourdir le filet duquel il se seruit ce iour. Or si le Duc eust esté massacré si horriblement par ce meschant & infame homicide,

*Comme le
Duc fut
tué dans le
liet.*

micide, ayant l'ame en bon lieu & pleine de grace : bien que l'acte fust par trop detestable, si est-ce qu'on le porteroit plus moderément, pourautant que ce meurtre nuyroit au corps tant seulement, & non à l'ame. Mais qu'un cousin aye massacré son cousin si inopinément & à l'improuiste, estant le Duc en mauuais estat quand à l'ame, & que celuy qui auoit receu beaucoup de biens d'un Prince liberal, l'aye tué, certes cela outrepasse toute cruauté & felonnie. Neantmoins il n'y a per-
Paillardie se punie en ce Duc.
 sonné qui puisse douter, que la desbordée paillardise de ce Prince n'ayt esté punie de ceste façon, par un iuste iugement de Dieu. Car à la verité il deuoit garder la foy promise à son espouse, il deuoit craindre l'horrible iugement de Dieu, qui n'a aucun respect ny de Roy ny de Prince, ains punist fort aigrement les vices des hommes sans respecter personne. Et pour-ce que le Duc ne regarda pas à cela, il cheut en vne sorte de mort si espouuëtable, à fin q par son exemple il aduisast les hommes, à se donner garde de tomber en mesme encombrer. Car iasoit que plusieurs meschans vivent longuement en leur ordure & vilennie sans encourir nul meschef, si est-ce qu'on en voit un grand nombre qui sont meurtrys par cas fortuit au milieu de leurs meschancetez, & s'en vont tous couras aux supplices infernaux, pour y demeurer eternellement: chose la plus horrible qu'on scauroit imaginer. Si fut en grand es-
Le meurtrier s'enfuyt.
 moy l'execrable homicide apres auoir faict ce coup, tellement qu'en fin il se resolut de fuyr, quoy qu'au-parauant il eust desseigné en soy-mesme de remettre les Florentins en liberté, & s'acquérir grande loüange à ceste occasion. Parquoy la nuit mesme il sortit hors la ville, ce qu'on n'eust pas permis à un autre, mais on ne scauoit pas encore le cas aduenü: & piquant au grand galop, il vint premierement à Boloigne, & delà à Venise avec ceux qui l'auoient seruy au massacre.

Le lendemain la mort du Duc fut sagement dissimulée, iusqu'à tant qu'estans entrez quelques gens d'armes en la ville & au chasteau, Cosme de Medicis fut trois iours apres, &
Cosme Duc de Florence.
 ce par vne singuliere prouidence de Dieu, installé au lieu du defunct: car certes Cosme estoit de grand'esperance, lequel a

iouy de celle principauté au grand contentement & dilectiō de tout le païs, & a tousiours demeuré fort affectionné au seruice de l'Empereur Charles, qui s'estoit pareillement monstéré fort affectionné enuers luy, & mesmement en la confirmatiō de ses Estatz. Au demeurât, le desloyal meurtrier s'enfuit vers *Mort du meurtrier.* Solymen Empereur de Turquie: mais iceluy ayant entendu le forfait commis par Laurét, l'eut en horreur tres-grāde, de maniere qu'il auoit deliberé de le liurer entre les mains de ceux qui le poursuyuoient au nom du Prince Cosme: mais il fut bien tost de retour à Venise, où neantmoins il fut tué deux ans apres par deux gens d'armes de Volterre, qui estoient affectionnez seruiteurs du defunct Alexandre.

Guerre entre le Roy & l'Empereur au pays bas.

Les François se ruerent ceste année sur le païs d'Artoys, & prindrent en vn moys par composition la ville & chasteau d'Hesdin, qui est vne place bien forte, en laquelle ilz meirent garnison plus forte. Or ainsi q̃ les François s'en retournoient, les Imperialistes desireux de leur rendre la pareille, prindrent la ville de S. Pol, laquelle ilz saccagerent, & y eut grande tuerie, & puy ilz y meirent le feu. Encor' en firent-ils autant à Montreul, l'ayans receuë par composition: vray est qu'au par auant ilz laisserent aller les habitans de la ville. En la sus-dicte ville de S. Pol, laquelle le Roy François, y present, auoit bien munie & remparée, furent tuez durant vne heure cinq mille hommes de la fanterie Françoise, & y eut beaucoup de Capitaines prins, & mesmes le Preuost de Paris. Quād à Mōstreul, c'est vne bien grande & peuplée ville en Picardie, laquelle estant pillée, & à demy-bruslée, le camp s'achemina vers la ville de Terouënne. Les François, qui estoient dedans, commençoient déia à auoir grande disette de viures, quand deux vail-lans Seigneurs François, le Sieur d'Annebaud & de Pienez, trouuerent moyen de r'auitailler la ville: mais comme ilz s'en retournoient à leurs gens, la bataille se donna, & furent prins. Apres cela, on feit treues par le commandemēt du Roy, pour dix moys, (les autres disent pour trois) avec Madame Marie sœur de l'Empereur, laquelle licétia toute son armée, à ce faire esmeuë de l'espoir qu'elle auoit de la paix. Neantmoins on se

frottoit tousiours vers Turin en Piedmont. A v moys de Fe-
 urier de l'année presente les Protestans s'assemblerent à Smal-
 calde, où se trouuerent aussi leurs predicans, lesquelz, comme ^{Assemblée des Protestans.}
 lon deliberoit sur ce que le Pape auoit assigné le Concile à
 Mantouë, feirent profession, selon le mandement des villes &
 Potentatz suyans le nouveau Euangile, qu'ilz sentoient &
 enseignoient en leurs Eglises selon les articles de la confessiō
 d'Ausbourg, & de l'Apologie d'icelle. Ilz feirent bien accroire
 cela aux Seigneurs, & neantmoins il est faux: & d'auantage
 celle Confession a esté changée fort diuerfement. Il y eut quel
 ques vns de l'assemblée, qui tascherent de faire, qu'on arrestast
 quelque chose de la Cene & des coustumes Ecclesiastiques,
 & que chacū seroit obligé de le suyure: mais les Princes y en-
 uoyerent le Chancelier de Saxe & quelque autre gentil-hom-
 me, qui leur commanderent de deliberer seulement du Con-
 cile. Car aussi bien cognoissoient ilz, qu'il estoit impossible,
 que ces nouveaux souffleurs de l'Euangile feissent paix par-
 ensemble. Luther estant tombé en maladie fut conduict à Go-
 the par le Prince de Saxe, auquel lieu le furent trouuer, par le ^{Luther malade.}
 commandement du Prince sus-diët, Bucer & Boniface Lyco-
 sthene, pour l'encourager à respōdre aux Suisses. Mais Luther
 respondit que sa maladie l'empeschoit totalement d'escire,
 cōbien q̄ ce pendāt il ne laissa pas d'escire à Iacques Meyer,
 Consul de Basse, que les escriptz des Suisses luy auoient esté
 renduz. Tant y a que iamais on ne sceut tāt faire, que Luther
 cedast aux Suisses.

PAREILLEMENT les ministres Zuingliens eurent ce-
 ste année quelque noyse & riote entr'eux, touchāt la Cene du ^{Synode des Zuingliens.}
 Seigneur. Au moyen dequoy ilz assemblerent vn Synode à
 Berne le dernier iour de May, auquel fut faiët vn decret sacra-
 mētaire à pur & à plain, de maniere que ceste noyse fut estein-
 te, ou pour le moins assoupie à beau semblant. Car ces gentilz
 predicans ne font rien à la bonne foy & syncerement.

CESTE année la foudre tomba au moys de Iuillet à Pa-
 ris, sur la tour de Billy aupres de Seine, laquelle estoit toute ^{La tour de Billy foudroyée.}
 pleine de salpestre, de souffre & de poudre à canon, de ma-
 niere qu'elle fut renuerlée rez de terre.

*Du Le-
gat Polus
Anglois.* ENVIRON ce temps le Pape Paul enuoya Regnault Po-
lus, filz de Marguerite, niepce d'Edouard quatriesme, Roy
d'Angleterre, (& q. nouuellemēt auoit esté fait Cardinal) pour
son Legat en Angleterre, pour induyre le Roy Héry à suyure
meilleur conseil qu'il n'auoit faict par cy deuant. Mais le Roy
Henry auoit déia mandé au Roy François, qu'il luy enuoiaſt
en Angleterre ce Legat prisonnier. Dequoy eſtât bien infor-
mé le Cardinal Polus, alla de France en Flandres, & demeura
quelque temps à Cambray. D'illec ſ'en allât au Liege, le Car-
dinal Erard le feſtoya quelqs mois, apres leſquelz il rebrouſ-
*Calomnie
de Sleidan.* ſa chemin vers Rome. Or Sleidan faict icy, comme ailleurs:
interpretant ceſte legation malignement & à ſa calomnie ac-
couſtumée, comme ſi le legat Polus euſt eſté enuoyé vers le
Roy de France, pour l'enflammer à l'encontre de l'Anglois.
Mais c'eſt ainſi que les hommes meſchans & depraez meſu-
rent les autres ſelon leur humeur, ce qui eſt fort commun à
Sleidan & à tous autres de meſme farine, leſquelz ne ſ'eſtudi-
ent à rien d'auantage, que à faire hayr & enuier tant le Pape,
que tous autres Catholiques, quoy qu'en ce faiſant ilz n'ayēt
point honte de ſ'attribuer la vraye doctrine, le pur & ſincere
Euangile, & avec cela vne incroyable innocence de vie, par
vne auſſi incroyable impudence.

*Mort de
Ianne de
Semery.* A V mois d'Octobre Ianne de Semery, laquelle le Roy
Henry d'Angleterre auoit eſpouſée apres Anne de Boulon,
enfanta vn filz qui fut nommé Edouard: mais elle alla de ce
monde en l'autre douze iours apres.

*Guerres
en Pie-
mont.* T A N D I S que la guerre eſtoit embrasée vers le païs de
Fládres, comme nous diſions n'agueres, le Marquis du Guast,
ſur-intendant de l'armée Imperiale, print pluſieurs places de
Piemont ſur les François: & cōme il euſt déia mis le ſiege de-
uant la ville de Turin, & Pignerol, de ſorte que les François e-
ſtoient preſtz à endurer vne grande famine, au meſme temps
ſuruint à la bonne heure Monſieur Henry Dauphin de
France, avecques l'armée, qui ſoulagea grandement les affie-
gez de toutes choſes neceſſaires. Or apres cela on commença
à tramer vne paix, faiſans ce-pendant treues pour trois mois,

& puy icelles expirées encore pour trois moys, & continuans plus longuement. A quoy faire s'estudia fort le Pape Paul, qui se faschoit merueilleusemēt de ces guerres entre les Chrestiens, & taschoit le plus qu'il pouuoit à moyenner vne bonne paix entr'eux.

Lors que l'Empereur estoit encor' en Italie, les Protestans enuoyerent leurs Ambassadeurs deuers sa maiesté, lesquels il ouit volontiers: mais à cause que ses affaires de guerre le pressoient, il leur respondit, que son Ambassadeur leur feroit toute responce pour luy. Ce qu'estant annoncé aux Protestans, iceux publierent vne assemblée pour estre tenuë à Smalcalde le septiesme iour de Feurier de la presente année. Là se trouuerent les patriarches des heretiques, Luther, Melancthon, Bucer, Osiander, & plusieurs autres: lesquels estoient aussi d'accord par ensemble, quelque beau semblant & mine qu'ilz feissent, comme les geans du temps fabuleux. Et afin que le lecteur gouste quelque morceau de leurs predications, voicy vn loppin de ce qu'ilz preschoient au lieu susdict. Luther vouloit que le fondement de la iustification fust vne relation, qui participe le moins de ce qui est, & à bien dire, ce n'est rien comme porte mesme sa dispute imprimée. Osiander estoit diametralement opposé à ceste sentence, mettant pour le fondement l'essence de Dieu, qui contient toutes choses. Car il dict, que nous sommes iustes de mesme iustice, de laquelle Dieu est essentiellement iuste. Luther au contraire soustient que veritablement nous ne sommes point iustes, ains par imputation seulement deuant Dieu, tout ainsi comme le temps iadis les Lacedemoniens meirent Alexandre le grand au nombre des Dieux, en ceste maniere: Alexandre veut estre Dieu: bien, qu'il le soit. Vous voyez doncques combien ces choses sont diuerfes & repugnantes: neantmoins il sembloit aux Princes & Estatz, que ces rusez & maudictz apostatz preschoient la pure & sincere parolle de Dieu, & ne s'apperceuoient point par quelles fraudes ils les prenoient au piege. Aussi ce-pendant ilz haïssioient & le Pape & tous les bons Catholiques, comme ministres & satellites de l'Ante-

Assemblée à Smalcalde

Sentence repugnante de Luther & Osiander.

Deux blasphemes, tous deux contraires.

christ, (car ainsi parlent-ils) & ne voyoient pas que ceux qui leur auoient mis ceste réuërie en teste, estoient plustost les fourriers & auantcoureurs de l'Antechrist. Mais ce n'est merueille si les grandz Seigneurs ont esté ainsi prins à la pipée, attendu que ces rusez predicans ont donné quelquefois assez d'affaires aux plus doctes, pourautant qu'ilz entraissent l'un sur l'autre tout ce qu'ilz trouuent, & quand bien ce qu'ilz ont rencontré ne sert à leur cause que bien petitement, si est-ce qu'ilz le sur-haussent, & se vantent de cela, si que le plus souuent, de la vanité de laquelle leur cerueau est plain, ilz detorquent ce qui est totalement contr'eux, à sçauoir pour piper & amadouer le peuple ignorant par ce moyen. Et à la verité ie croy, si les Princes eussent peu apperceuoir telles bourdes, qu'ilz les eussent plustost deschirez à belles dètz, que de les suyure en la moindre chose du monde.

*Demande
des Prote-
stans.*

M A I S pour reuenir à l'Ambassade des Protestans, ilz demandoient principalement trois choses à l'Empereur: premieurement qu'il ne creust point au faux bruiet qui couroit d'eux, à sçauoir qu'ilz se fussent alliez des Roys de France & d'Angleterre: secondement qu'il empeschast la continuation des iugemens de la Chambre imperiale: finalement que ceux qui auoient esté admis à la ligue de Smalcalde apres la pacification faicte à Noremberg, peussent iouir des priuileges de celle paix. Or l'Empereur despescha deuers eux Mathias Helde Vice-chancelier, homme fort disert & eloquent, qui respondit tres-bien à tout cela le 15. iour de Feurier, en pleine audience. Entre autres pointz il les exhortoit de ne prescrire rien à la Chambre, & qu'ilz ne retardassent point le iugement, pourautant que incessamment on formoit des plaintifz à l'Empereur & à la Chambre, de ceux qui ayans esté pillez de tous leurs biens, requeroient que iustice leur en fust faicte: & que l'Empereur, Prince debonnaire entre tous les autres, ne pouuoit honnestement esconduire des requestes si iustes, combien que tandis les Protestans, instiguez par leurs predicans, estimoient faire chose à Dieu agreable, en chassant les Ecclesiastiques, & signamment les moynes. Que cela n'estoit

*Helde
Ambassa-
deur en-
uers les
Protestans.*

pas fondé en l'Euangile, lequel defend expressement, outre ce qu'en disent toutes les loix & ordonnances ciuiles, de n'vsurper le bien d'autrui de nostre autorité particuliere, ou de le donner à autrui selon nostre bon plaisir. Et c'est pourquoy les Protestans ne pouuoient souffrir les Iuges de la chambre, pour-autant qu'iceux ordonnoient bien souuēt, que les choses desrobées fussent restituées aux propriétaires. Autrement *Les Protestans ne veulent point estre iugez* il eust fallu qu'un chacun eust esté pillé & vollé, & que neantmoins il n'osast s'en plaindre à ceux qui sont tenuz de faire droit à vn chacun. Qui a enseigné cela, sinon l'Euangile Lutherien? Mais cest Euangile est condamné par toutes les loix, & par toute la terre Chrestienne, & mesmes par ceux qui ont plain pouuoir & autorité sur les Chrestiens, ausquels les loix tant humaines que diuines nous enioignent d'obeir, lesquels tous ont eu en execration cest Euangile. Or est-il qu'il faut plus attribuer au iugement de la terre vniuerselle, qu'à la teste d'un fol apostat, lequel ne merite pas seulement d'estre nommé entre les hommes de nom & d'honneur. Nonobstant les Protestans ayans bien estudié à l'eschole de Luther & semblables precepteurs, ne voulurent oncques souffrir, que les Iuges de la chambre ou de la maiesté imperiale peussent rien ordonner contr'eux, quoy que par iniure ils vsurpassent les biens des Ecclesiastiques. Car ils estimoient que les meschans & idolatres, sçauoir est (pour parler comme il faut) tous les moynes principallemēt, deuoient estre chassez, & qu'il falloit caresser & honorer les moynes reniez comme s'ils eussent esté Apostres de Iesus Christ, le prince desquels, qui fut Luther, a esté estimé par eux plus que nul autre: lequel quand bien il n'auroit fait autre chose, que de s'accoupler impudemment à vne fille ia consacrée à la diuine maiesté, encore meritoit-il pour cela d'estre brulé. Nous sçauons bien qu'il y a ia mille ans que *Loy de Iustinian Empereur* viuoit le bon & religieux Empereur Iustinian, lequel a fait vne loy en son Code, que quiconque auroit osé, ie ne di pas ravir, ains seulement pourchasser en mariage, ou œillader impudiquemēt vne fille religieuse, meritoit de mourir. On dit que le meschant & apostat Empereur Iulian coniuoit à telles no-

ces incestueuses, mais certes les Princes Chrestiens ne s'y doi-
 uent pas porter de ceste façon. Or le sus-dict Helde remōstra
 plusieurs autres poincts en icelle assemblée, & le lendemain il
 arraisonna priuément le Saxon, luy exposant la bien-ueillā-
 ce que l'Empereur luy portoit, mais que iusqu'à l'heure pre-
 sente il ne l'auoit peu monstrier par effect à cause de la diuer-
 sité de religion. Et partant il l'exhortoit à concorde, à aller au
 Concile ou y enuoyer ses Ambassadeurs, à donner secours &
 ayde contre le Turc, & à contribuer argent pour le iugement
 de la chambre. Sur quoy le Saxon respondit qu'il communi-
 queroit l'affaire avec ses amys. Et puis le 24. iour de Feurier
 tous les confederez respondirent prolixement à tous les arti-
 cles, laquelle respōce seroit icy adioustée si elle pouuoit prof-
 fiter à quelque chose. Conclusion, Ils ne vouloient point que
 la chambre procedast contr'eux, & ne vouloient point aussi
 qu'aucun fust forclos de leur ligue, iacoit qu'il eust esté arresté
 à Noremberg, que rien ne seroit innoué iusqu'à la definition
 du Concile: & estoit celle ligue seulement de Lutheriens &
 semblables hommes. Ils prioient la maiesté, d'interdire aux
 Iuges de la chambre, de les fouller, oppresser ou molester,
 & quelques autres choses: mais ces prieres estoient faictes de
 forté, qu'elles sembloient estre accompagnées des armes &
 main forte. Car ils disoient, que si on attentoit autrement, &
 qu'on feist aucune violence aux confederez, ils ne se mon-
 streroiēt paresseux à les defendre. Que si l'Empereur vouloit
 permettre que chacun suiuiſt la pure doctrine, (c'est celle de
 Luther, en leur langage) volontiers ils executeroient ce que
 sa maiesté mandoit quand à la guerre du Turc, & à la chābre.
 En apres ils disoiēt maintes choses du Concile, lequel ils vou-
 loient estre libre, & auquel Luther & ses cōpaignons auroiēt
 authorité & puissance pareille, sinon plus grande que le Pape
 de Rome, quoy que cela soit directement opposé aux coustu-
 mes anciēnes. Mais cela ne se disoit pas sans piquer aigremēt
 le S. Pere, disans qu'iceluy auoit inuēté & defendoit à present
 vne doctrine nō seulement contraire à la parolle de Dieu, ains
 bien encores aux anciens Conciles & Docteurs: combiē que
 au con-

*Responce
des Prote-
stans à l'Em-
pereur.*

*Ils piquēt
le Pape.*

au contraire ce ne soit pas le Pape, ains Luther & tous les patriarchaux, qui mesprisent & les Conciles & les Peres anciens, & qui par leur pestilente doctrine, surpassant en maints endroits l'impieté & resueries de l'Alcoran, ont precipité la florissante nation d'Alemaigne, voire presque toute nostre Europe, en tres-grandes calamitez, guerres, rancunes, haynes, diuisions, & finalement en tout genre de maux. Or tout ce que nous auons cy-dessus posé, quoy qu'il fust proposé au nom des Princes & confederez, neantmoins c'estoient leurs predicans qui auoient forgé toutes ces follies. Quand à ce qu'ilz obiectent, ie confesse qu'il y a des vices en l'Eglise, mais ilz ne pourroient oncques monstrier, bien qu'ilz soient assez calomniateurs, que la doctrine d'icelle repugne à la parole de Dieu, aux Conciles, & Docteurs anciens. Et eux-mesmes ne sont ilz pas remplis de toute ordure & de tous vices? Luther mesme ne confesse-il pas, que ceux de sa secte sont deuenuz dix foys plus meschans que les Sodomites? Ce que certainement doit estre imputé à ce maistre predicant, qui ne presche que la foy sans œures. Et faut bien dire, que ceux auoient entierement perdu l'usage de raison, qui en fin n'ont peu apperceuoir, qu'ilz auoient embrassé des monstres horribles, des tenebres espouuentables & prodigieuses, au lieu de vraye lumière: & des tigres & loups rauissans, au lieu de vrais pasteurs. Or apres que les Protestans eurent allegué tout ce que bon leur sembloit, Helde leur fait responce sans delay interposé, remonstrât entre plusieurs choses que cecy estoit intolerable: à sçauoir puy

*Remonstrā
ce de Hel
de aux
Protestāts.*

que quelques vns soustiennent que les affaires estimées par eux appartenir à la religion, sont profanes, c'est chose inique de ne vouloir point que les raisons & argumens de partie aduersé soient ouïs, combien que & les loix, & l'equité, & les lettres sacrées commandent, qu'en vne chose litigieuse les deux parties soient ouïes indifferemment, & qu'on n'arreste rien selon la deposition de l'une, quand bien elle auroit dict verité. D'auantage que nul droit permettoit, qu'aucun fust spolié de ses biens, soit pour religion soit pour autre cause. Quand au Concile, que l'Empereur seroit bien marry, silz vouloient

encore alleguer quelques excuses, attendu qu'ilz ne sont ignorans de la peine qu'il auoit prise iusqu' icy, pour obtenir que le Concile fust tenu. Au reste, que l'Empereur disoit, que le S. Pere, (cōme estant le chef de l'ordre Ecclesiastique) se porteroit fort chrestienement en cecy, & qu'il luy est impossible d'auoir autre opinion de luy. Toutesfois qu'il leur estoit loysible, filz sçauoient quelque chose à redire contre luy, de le proposer modestement au Concile, & aussi quand à la forme & maniere du Concile, veu qu'il ne seroit pas honneste ny equitable, qu'eux seulz peussent plus en cela que toutes les autres nations. Et semblablement, de penser que leurs seulz docteurs fussent bien entéduz, & que tous les autres feussent des asnes & pecores, ce seroit grand' simpleesse à eux, considéré qu'en tous autres lieux il y auoit bon nombre de gens & doctes & de sainte vie. Et c'est le sommaire de la remonstrance que Helde feit en celle assemblée, fort disertement.

*Legat du
Pape aux
Protestans.*

LE mesme iour l'Euesque d'Ast, legat du Pape, arriua au dict lieu: mais les Protestans n'en feirēt pas grand conte, combien que le Turc recoiue courtoisement les Ambassadeurs des Princes Chrestiens. Certain iour ce legat voulut parler avec le Lantgraue, lequel luy feit responce qu'il n'auoit pas loisir, & à mesme instant alla veoir Luther gisant au lit griefuement malade de la pierre. Ce que le Legat pouuoit aysement veoir de son logis: mais il luy estoit expedient de porter patiemment, qu'un belistre de moine apostat fust preferé au Pape, duquel il estoit Legat.

*Les Protestans
resentent le
concile, &
pourquoy.*

LE dernier iour de Feurier les Protestans respondirēt de rechef bien amplement aux pointz proposez par Helde, mais il me fasche de les vous reciter: & cecy, aussi bien que l'autre, fut composé non par les Seigneurs, ains par les predicans, qui eslargissoient quelquesfois leur conscience iusqu'à mentir apertement. Somme toute qu'ilz repudierent en ceste leur responce le Concile publié par le Pape. Car ilz alleguent que l'autorité de iuger n'appartient pas seulement au Pape & aux Euesques, mais bien encores à l'Eglise: en laquelle sont compris les Roys & Princes, & diroient en meilleur François les

rauauateurs aussi, sergens, drogueurs, apothicaires & autres. Comme si c'estoit l'estat & office des hommes lays, d'un cuyfinier ou bouvier si tu veux, de decider les questiōs & decretz de l'Eglise. Ne voyez vous pas, combien ces dogmatifans ont perdu de leur bon sens? Voyez vous, dis-je, comment ce sont les vrayz & sincerz annonciateurs de la pure doctrine, du pur Euangile? Veritablement ie m'estonne comment les Alemans se sont laissez si follement decheoir: c'estoit lors qu'il falloit auoir deuant les yeux l'ancienne constance de leurs deuanciers, & vser d'une grauité & prudence tresgrande, en vne affaire de telle importance, qui requeroit bien qu'on ne fust temeraire. A la verité les predicans estoient bien rusez, & les Alemans bien folz en ces affaires. Or ains que ceste assemblée fust rompuë, qui fut le 6. iour de Mars, les Protestans escriuirent lettres au Roy de France pour gaigner sa faueur. Ausquelz le Roy ne respondist que tout honnestemēt, iagoit qu'il fust ennemy mortel de ceste heresie: mais les choses sembloient les conuier à se munir de ceste façon, des deux costez.

ENVIRON le mesme temps le Roy d'Angleterre meit en lumiere vn sien liure, auquel il monstre le peu de cas qu'il faict du Pape de Rome, & qu'il n'ira, ny n'enuoyera ses Ambassadeurs au Concile publié par le Pape: & adiouste tousiours force traittz al'encontre du S. Pere, lequel les Catholiques doiuent d'autant plus reuerer & honorer, qu'ilz le voyent estre seulement assailly de ceux, qui ayment mieux estre parti-
Liure du Roy d'Angleterre contre le Pape
 aux avec Luther, que suyure l'Euāgile de Iesus-Christ. Ie sçay bien que tous les heretiques se complaignent fort de la tyrānie des Papes de Rome: mais ie sçay bien aussi que leur souhait est, que ceste autorité supreme, laquelle a esteinct toutes les heresies, fust ia esteinte.

CESTE année Solyman Empereur de Turquie par l'enhortement du Gouverneur d'Aegypte, meit sus vne grosse flotte de galleres & autres vaisseaux, laquelle il enuoya al'encontre des Portugais, qui sont és Indes, & illec ont basti quelques forteresses de grande consequence. Si vous voulez sca-
Le Turc prepare la guerre contre les Portugais, & pour quoy.
 uoir la cause de ceste entreprise, c'est que la puissance des Por-

Portugallois, qui de iour à autre augmentoit és indes, estoit fort preiudiciable à ses terres & prouinces, à cause qu'ilz fermoient le passage de la mer rouge, (autrement du goulfe d'Arabie) par laquelle on apportoit force marchadises, force drogues & espiceries à Alexandrie & au grād Caire, & delà estoient dispersées par l'Europe: au lieu que maintenant on sillonne presque tout l'Océan, & les apporte on en Portugal, & delà aux villes marchandes d'Angleterre, Flandres, Allemagne, & autres nations. D'auantage en la guerre qu'il feist assez mal-heureusement contre Tammase, Roy de Perse, il entendit que quelques harquebouziers & fondeurs d'artillerie auoient esté à la solde du Persan, dont il s'enaignit encore plus fort contre le Portugallois.

*Du mont
Sinai, &
des peregrina-
tions
Chrestien-
nes.*

OR en passant il m'a semblé bon de vous dire, qu'au bout de la mer rouge tirant vers Aegypte est le mont Sinai, lequel est plein de rochers, & s'esleue presque tout droit, tellement que ceux qui veulent venir à la cyme ont grande peine. Sur le sommet d'iceluy (duquel on voit la mer de toutes partz) y a vne chapelle dediée en l'honneur de Sainte Catherine, à laquelle vont les pelerins Chrestiens pour acte de religiō, quoy que ce ne soit sans grand danger. Mais il n'y a nul doute que ceux qui visitent ce lieu religieusement, ne recoiuent interieurement vne ioye & liesse tres-grande, non seulement à cause des sacrées reliques de la Sainte, mais encore par-ce que d'illec en iettant les yeux sur la circonference du païs & de la mer, on se souuiet, & à grand contentement, que ce fut en ce lieu que Pharaο fut submergé avec vne infinie troupe de gés, lors qu'il pourfuyuoit le peuple d'Israël, qui estoit eschappé de ses mains par vn grand benefice & miracle de Dieu: & que aussi ce fut le lieu, auquel la loy ancienne fut donnée de Dieu au peuple Hebreu. Ceux doncques qui blasonnent les peregrinations des Chrestiens faictes par vne deuotion & pieté d'vn chascun, sont plus à mespriser que ce qu'ilz contemnent, à cause qu'il a esté obserué fort religieusement entre tous les Chrestiens de l'Eglise primitiue. Je m'en rapporte à ce qu'en a escript S. Hierosme en la vie de S. Paule, dame Romaine, &

ie m'asseure que nos docteurs y trouueront que ce n'est chose nouuelle en l'Eglise de visiter les saintz lieux.

RETournant doncà mon propos, ie dis que Solymā ^{Galleres portees par terre.} apres auoir preparé vn grād nōbre de galleres qui se pouuoiet assembler & desassembler, les feit trainer aux chameaux iusqu' au port de la mer rouge, appellé Suece, par vn long traict de chemin: & feit aussi mener quelques autres vaisseaux, si bien que la flotte estoit de quatre-vingtz nefz, esquelles y auoit iusqu' à quarante mille hommes, avec lesquelz il enuoya le Gouverneur d'Aegypte pour guerroyer les Portugais. Or estoit Solyman en ce temps fāché grandement contre les Venitiens, tellement que rompant la paix, il commanda que les gal- ^{Hayne que le Turc portoit aux Venitiés.} leres Venitiennes, qui estoient à Alexādie, fussent prises par son autorité, & que plusieurs Seigneurs, marchandz, & nau- toniers Venitiés fussent emprisonnez. Et ne faillit pas le Gouverneur d'Aegypte de distribuer par ses vaisseaux, ceux qu'il veit estre propres à la guerre. Aucūns disent que certains Chrestiens esguillonnoient durant ce temps le Turc, & que delà il estoit plus enflammé contre les nostres: mais ce seroit chose par trop execrable d'auoir si fort à contrecueur la felicité d'autrui, que pour ceste occasion on voulust donner en proye les Chrestiens à leurs ennemys mortelz. Et c'est pourquoy ie ne veux dire mot de cela, pour vous exposer en continuant l'histoire, que le gouuerneur d'Aegypte nommé Solyman Eunuque, se ioignant avec le More d'Alexandrie, singla tant qu'il outre passa le destroit de la mer rouge, voire le goulphe de Perse, de maniere qu'il veint surgir iusqu' au fleuve Inde. Afin que le lecteur sçache mieux ce discours, il faut entendre quel chemin font ceux de nostre Europe pour aller par mer iusqu'és Indes. Premieremēt en partant d'Espaigne ou Portugal, on costoye toute l'Afrique & l'Ethiopie iusqu' à ce qu'on viēt aborder à la ville d'Aden en Arabie: & delà hauçant les voiles on vient à Ormus, ville fort marchande sur le goulphe de Perse, & d'Ormus on tire à Cambaie belle ville, & delà à Calicut, duquellieu on tire plus auant iusqu' à la presque-isle d'or, nommée à present Malacha, qui est vne cité de grandeur admira-

*Prise de Malacca
es Indes.* ble, ayant vn Roy More: car, hélas! la detestable secte de Mahometh s'est espanuë iusqu' en ce lieu-là. Les Portugais prirent ceste ville par force, & l'ayans saccagée meirent le feu dedans. Si fut la proye grande que feirent les Portugais, & outre les esclaves & sept Elephans, ilz y trouuerēt iusqu' à deux mille pieces d'artillerie de toutes sortes. Apres cela, le Roy de Portugal y feit bastir vn fort chasteau, & en peu de temps les marchandz de diuerses nations venoient en ce lieu, avec leurs richesses & drogueries de toutes sortes, si bien que par la permission du Gouverneur Portugais ilz y eurent des maisons: & par succession de temps est aduenü, que la ville est à present autant riche & marchande qu'elle fut oncques. Estant donc l'armée Turquesque venue au fleuve Inde, ilz employerent toutes leurs forces à prendre vne bien forte ville nommée Diu, en laquelle les Portugais tenoient vn chasteau presque imprenable. Aussi leur industrie fut si grande, leur prouesse si indomptable, leur constance si merueilleuse, que les Turcs estans honteusement repoussez laisserent leur entreprise, & furent contrainctz de reprendre la route d'Aden, qui est vne ville fort marchande en l'Arabie heureuse. Où estant arriué Soliman Eunuque, general de l'armée Turquesque, creuant de despit qu'une si audacieuse entreprise leur eust si mal reüssie, manda venir le Roy d'Aden, luy donnât sa foy, à cause qu'iceluy estoit tributaire du Roy de Portugal. Le pauvre Roy adiousta foy à ce meschant, & accompaigné seulement de quatre Seigneurs du Royaume, vint iusqu' aux vaisseaux, pensant par cecy faire chose agreable au grand & puissant Empereur de Turquie. Mais le desloyal Eunuque le feit pendre, & ses gentilz hommes aussi, en la nauire Capitainesse: & ce faict, print la ville, & en donna le pillage aux soldatz. Il feit parcillement mourir le Roy Zibitin, contre la foy par luy donnée, & quant & quant tous les grandz Seigneurs de sa Cour, quoy que le sus-dict Roy offrist plusieurs beaux presents pour arrester la fureur de cest ennemy: Partant delà il veint par terre à la Meque, où est le sepulchre de Mahometh, lequel est fort religieusement visité de ceux, que le

*Les Turcs
assiègent
Diu.*

*Desloyau
té du gene
ral de l'ar
mée Tur
quesque.*

meschant a enforcez à tout sa superstition. Or est ceste ville ^{La Meque & Medina.} de la Meque la plus renommée & belle qui soit en toute l'Arabie, à cause que les cendres de Mahometh y sont: combien que plusieurs auteurs de nostre siecle ont escrit, que le corps d'iceluy est en la ville nommée Medina el-nabi. Je ne veux point m'arrester icy à descrire la peine & le temps, que perdent les miserables homes à la mosquée de celle ville de Medine, lors qu'ils adorent ce damné Mahometh beaucoup plus que Iesus-Christ, lequel ils disent estre aux pieds de Mahometh. Je diray icy en passant, par-ce qu'il me semble estre digne d'observation, que quand les Turcs Mahometains veulent faire leurs sacrifices es Temples des Chrestiens, premieremēt ils demolissent les autels, & puis brisent toutes les images pour sanctifier le Temple, le tout à la façon de laquelle vſent maintenant les Zuingliens, Calvinistes & plusieurs autres heretiques: de maniere que tu peux bien voir, qu'ils n'ont pas puisé ^{Sympathie de nos heretiques & des Mahometains.} ceste façon de faire de l'escole de nostre Sauueur, mais bien de celle de Mahometh, comme plusieurs autres choses. Que si nous sommes tenuz de dire la verité, ie dis hardiment, que d'abolir les autels & images des Eglises, ce n'est autre chose, que d'arracher de l'esprit du grossier & simple peuple toute la memoire de nostre Redempteur, de ses benefices, & principalement de sa tref-griefue passion, & finalement tout estude de vraye vertu & pieté. N'est-ce pas cela vn fait entieremēt Turc & Tartare? Le peuple Chrestien n'est-il pas miserablement charmé de ces Euangelistes Mahometains, souz le masque d'une pieté insigne? Je veux tout court retourner à mon propos, pour ramentéuoir q̄ le succes de la guerre des Turcs ^{Les Turcs ne firent rien contre les Portugais.} contre les Portugais fut tel, que nous y deuons admirer la bonté ineffable de nostre Dieu, qui ne voulut permettre, que les efforts des Mahometains retardassent les bons & honnestes desseings du Roy Chrestien, par lesquels innumerables nations de ces regions Leuātines estoient de iour à autre reduites à la cognoissance de son saint & sacré nom, ayans auparavant esté enuēloppées d'une infinité d'erreurs, qui les empêchoient d'auoir la vie eternelle. Car ceux de Calicut & quel-

^{Le diable adoré en Calicut.}

ques autres adoroient le diable, & immoloient plusieurs hommes à son honneur & gloire.

L'ARMEE du Roy Ferdinand exploicta mal ses affaires durant l'Automne de l'année presente, comme ie diray maintenant: pour vous admonnester premierement comment la puissance du Turc est augmentée, lors que l'Allemagne (qui iadis ne peut estre domptée par les Empereurs Romains, & estoit espouuëtable à toutes les autres nations) a fait banqueroute à l'ancienne pieté & religion de ses deuanciers, & s'est laissée precipiter en des heresies prodigieuses, & qui d'auantage ne s'accordent nullement entr'elles. Car sans cela on pouoit à bon droit dire d'icelle,

*La cause
de l'aug-
mentation
des Turcs.*

*La loy antique, & les hommes vaillans
Gardoient l'honneur des peuples Alemans.*

Et n'auons point honte de dire, que pieça l'Allemagne seroit souz le ioug de captiuité, si nous n'eussions eu ces deux bons Princes, Charles & Ferdinand Empereurs, lesquels ont souuent fait teste aux Turcs, & les ont viuement repoussez, plus par leur zele enuers Dieu que par force d'armes, iacoit qu'à la verité leur puissance n'ait pas esté petite. Je sçay bien que les hommes ingrats ne voudrôt pas recognoistre cecy, qui ou bien ne voyent point, ou blasonnent à pleine gorge le danger de leur patrie qui s'en va estre perduë: pour-autant à sçauoir qu'ils n'ont pas encor' experimenté le ioug du Turc, souz lequel déia tant de nations Chrestiennes souspirent miserablement, & malgré leurs dents faut qu'ils l'endurent à leur mal, qui suffiroit pour nous semondre à deuenir sages. Et faut necessairement conclure, que ceste-cy est vne des plus grandes punitions & vengeance de Dieu, quand les hommes sont si fort aueuglez, qu'estans constituez en peril extreme, encore n'en font-ils point de conte, ou ne le voyent point du tout. Retournons maintenant à la guerre d'Exeche.

*Discours
de la guer-
re d'Exe-
che, au dō-
mage des
Chrestiens*

LES Turcs ayans pris la ville d'Exeche sur le Drau, estant Capitaine Mahometh Iahiagogle, y meirent grosse garnison, & la feirent comme bouleuert contre les efforts du Roy Ferdinand, d'où les Chrestiens estoient par trop vexez & endom-
magez,

magez, à cause qu'ilz se ruoient sur eux à l'improüiste fort impetueusement: quoy que tandis il y eust certaines treues, lesquelles sembloient en ces quartiers permettre les escarmouches & courses extraordinaires, desquelles on ne se peut iamais donner garde. De sorte que la paix n'estoit point rompue, qu'au preallable tout le camp ne marchast avec l'artillerie: & à raison de ce, le Roy Ferdinand se faschant de ces treues pleines de fraude, delibera de faire bonne guerre aux Turcs. Parquoy il met sus huit mille cheuaux, & seize mille hommes de pied, & avec cela bon nombre de toute sorte d'artillerie, si bié que ce camp estoit accomply de tout ce qui luy estoit besoing, si luy fust esté bien regy & conduit. Le Turc Mahometh entendant qu'on le venoit voir avec les armes, meit soudain son armée sus, laquelle n'estoit point inferieure à la nostre ny en nombre ny en force de gens. Car iamais les Turcs ne sont sans auoir gent-darmes tous prestz, & signamment de la Cauallerie: à cause que l'Empereur de Turquie a vne infinité de reuenu, au moyen duquel il les peult incessamment entretenir au preiudice des Chrestiens. Les nostres continuans, meirent le siege deuant Exeche, & quoy que bié souvent ilz presentoiert la bataille à ceux de dedans, si est-ce que iamais leur Capitaine ne voulut permettre qu'ilz sortissent sur les Chrestiens, à cause qu'il n'estoit pas ignorant que la famine commençoit à estre grande en leur camp: & que d'abondant il y auoit debat entre leurs Capitaines, desquelz les vns conseilloyent de faire cecy, & les autres cela. Et ce pendant le temps s'en alloit sans rien faire à prouffit, changeant quelquesfois l'affiette du camp, ce qui ne se faisoit sans recevoir dommage du costé des Turcs, qui espioient tousiours les occasions de ce faire. Mahometh donc ayant sceu que noz gens vouloyent desloger, commanda aux Janissaires & Martelloz de les deuançer, & nonobstant de ne leur dōner iamais bataille, ains seulement de les vexer sans cesse à coups de faucōneaux, & de flesches. Ce qui endommagea les nostres merueilleusement, à cause que les Turcs surprēnoient les Chrestiens par vne viffesse fort grande, de maniere qu'en vn instant

*Le camp
de Ferdin-*
nand.

*Debat en-
tre les
Chrestiens.*

*Ruse des
Turcs.*

ils eschappoient, quand ils leur vouloient courir sus: & quand vn petit nombre des nostres les pourfuyuoit en leur fuyte, ilz tournoient bride en grand nombre, tenans pied coy aux nostres, & en tuoient plusieurs. Et ce fut en ceste façon que Pierre Raschin, Marechal de Boëme, y perdit la vie, avec plusieurs Boëmiens, & par apres Paul Bachit vaillant Capitaine Hongre, avec plusieurs autres vaillans hommes de sa nation. Sur cela les Chrestiens consultent par-ensemble, qu'est-ce qu'il falloit faire, en quoy il y auoit du debat: de quoy Mahometh aduertit par ses espies, & partant faisant estat de les vaincre indubitablement, ordonna son camp en forme de croissant, si bien que par ce moyen les Chrestiens ne pouuoient aller auant sans tomber entre ses mains. Tellement que les Vsa-
Honteuse
fuyte des
Chrestiens.
 rons Hôgres, & quelques autres braues Capitaines, avec tous ceux de Stirie gaagnerent la campagne pour se deliurer de ce danger tref-certain. Apres lequelz le Chef mesme de l'armée se print à fuyr, tout des-armé qu'il estoit, laissant son logis, où il y auoit vn buffet d'argent & autres grandes richesses. Et ainsi il ne demeura que Ludouic de Londron, Colomnel de la fanterie, lequel mouroit de desplaisir de se voir delaisié presque de tous les hommes de cheual: & neantmoins encouragea les gens de pied à se monstret telz, que la necessité requeroit qu'ilz fussent. Si se rengerent souz luy tous ceux de cheual qui n'auoient oncques voulu se sauuer par vne fuyte deshonneste, qui estoient ceux de Carinthie, Saxe, Misne, Thuringe, Franconie, Autriche, & Boëme, lequelz tous le supplierent affectueusement de prendre la charge de ceste armée telle qu'elle estoit, promettans d'effectuer à leur possible tout ce qu'il luy plairoit leur commander, & que tant qu'ilz auroient force és bras ilz combattroient valeureusement contre les mescreans, pour la religion & pour leur bon Prince. A cela Londron respondit qu'il ne luy appartenoit pas d'estre si hautement appellé, mais neantmoins il executa la charge d'un bon Chef tant qu'il luy fut possible. Comme doncques ilz se vouloient mettre à chemin, voicy venir ces felons Turcs avec grandz vrlemés, qui se ruent impetueusement sur les nostres, les enuironans de toutes partz, si q la bataille se donoit en plu-

Don courage d'aucuns Chrestiens.

sieurs endroictz: qui fut cause q̄ les plus braues des Chrestiens
 demurerent sur le chāp, atterrez par la multitude des enne-
 mys. Et pour dire tout en vn mot, (chose par trop lamentable)
 il n'y eut presque aucun de ceux qui estoient demeurez au
 camp, qui ne furent alors taillez en pieces par ces enragez
 Turcs. Le Seigneur Londron, lequel accompagné de trois
 cornettes s'estoit retiré en vn lieu marescageux à cause de la
 foule des ennemis qui l'accabloiēt, apres auoir longuement
 faict le deuoir d'un vaillant Chef, en fin fut contrainct de se
 rendre à la mercy des Turcs: mais pourautant qu'il estoit na-
 uré, & qu'on ne pensoit pas qu'il peust aller en vie iusqu' à
 Constantinople, ceux qui le gardoient le massacrerent par les
 chemins, & enuoyerent sa teste à Solymā. Ceste deffaicte des
 nostres estant aduenue, les Barbares se meirent à amasser la
 proye, & poursuyuirent ceux qui auoient eschappé de vistes-
 se, desquelz plusieurs furent prins, & tenuz par-apres comme
 esclauues. Leur chef nommé Mahometh, prins qu'il eut tout le
 butin du camp, se voulut regaillardir, & partant se mit à ban-
 queter en vne prairie, laquelle premierement fut purgée des
 corps mortz. Où estant, il commanda qu'on luy amenast les
 Seigneurs prisonniers, & les plus riches despouilles, & signā-
 ment les enseignes: & alors il feit vne harangue à la loüange
 de ses Capitaines qui s'estoient monstrez preux & magnani-
 mes en ceste guerre, & donna de sa main propre or & argent
 aux soldatz en pur don, & en outre feit faire vn rolle des
 noms & Estarz des plus segnelez prisonniers. Apres cela, fu-
 rent presentées à l'Empereur Solyman les testes des troys
 principaux Chefz de l'armée Chrestienne, avec les enseignes,
 corselez, & morions dorez. Certainement ceste desconfitu-
 re des Chrestiens fut tres-laide & ignominieuse, laquelle plu-
 sieurs r'apportent à la coulpe & temerité du general d'icelle.
 Tant y a qu'elle pouuoit seruir de bonne semonce à tous les
 Chrestiens, à ce que mettans toute rancune à part, accordans
 le debat pour la religion, chastians rigoureusement les vices
 & pechez, (par lesquelz l'ire de Dieu est embrasée sur nous, &
 la puissance des infidelles s'augmente) ilz soignassent de res-

*Tuerie des
 Chrestiens
 par les
 Turcs.*

*Le Capi-
 taine Lon-
 drō massa-
 cre par les
 Turcs.*

*Toy de
 Turcs.*

*Aduer-
 tissement
 aux Chre-
 stiens.*

chir nostre Dieu à nous regarder en pitié & compassion. Car il n'est chose plus certaine que ceste cy, que la force & puissance des Turcs n'augmente sinon que par nostre mauuaise vie, par les guerres intestines, & par la diuersité de religion. Qui considerera bien la chose, il verra que les Turcs emporterent ceste victoire presque par nulle effusion de sang, au lieu que la fleur de la cavallerie & fanterie des Chrestiens y fut presque toute hachée à loppins. Et d'auantage, ces barbares couperent ignominieusement le nez à la plus grand' partie de ceux qu'ilz prindrent prisonniers, & les esclauèrent inhumainement.

Le Chef de l'armée deffuite fut puny. LE Roy Ferdinand receut vne grand' escorne à ce coup cy, mais le bon Prince ne pouuoit r'accoustre ce qui estoit aduenu par la temerité d'autrui. Vray est qu'il teint longuement prisonnier le General d'icelle armée, & neantmoins assez honnestement. Mais luy craignant d'estre condamné à la mort, à cause que plusieurs l'accusoient d'auoir esté trahyste, trouua moyen de sortir de prison, & vouloit s'en aller rendre au Turc. Or ne voulut-il pas se rendre à Mahometh, lieutenant de Solymán, sans quelque beau present: & partant il sollicita vn autre Roytelet à s'en fuyr quāt & luy. Lequel luy promeit, ou feist semblant de promettre de le faire, tellement que l'ayant à son logis il luy aualla la teste, & l'enuoya au Roy Ferdinand, qui luy donna de pur don les chasteaux & seigneuries du Capitaine par luy tué: & tel fut le loyer de sa desloyauté. Mahometh luy auoit déia promis maintes choses, esperant qu'il luy seruiroit grandement contre le Roy Ferdinād, mais nostre Dieu deuança ces tant mal-heureux desseings, par ce iuste meurtre que nous auons dict.

Solymán veut s'en parer de l'Italie.

SOLYMAN, grand Empereur de Turquie, delibera ceste année d'enuahyr l'Italie, à cause qu'il auoit vne armée de mer bien belle, & garnye de force gens de guerre. En quoy il vsa de si grande vistesse, qu'il eut plustost amené deux cens mille combattans à la coste de Macedoine, qu'on ne le pensoit estre party de Constantinople. Et pour mieux l'acheminer à ce faire, il n'auoit pas faute de Chrestiens qui se retiroient à luy.

& le certioroient du conseil des leurs. On ſçait bien que cinquante ans deuant, ſon ayeul, nommé Mahometh, print Otranto en Italie, d'où tout le païs fut merueilleuſement effrayé, & des lors c'eſtoit faiât de l'Italie, ſi Dieu n'eût prins la cauſe des Chreſtiens en main, en faiſant mourir ce Tyran qui ne pouuoit aſſouuir ſa ſoiſ du ſang Chreſtien. Solyma eſtant ia approché bien pres de l'Italie, il enuoya quelques vns pour eſpier comment ſe gouuernoient * ceux du païs d'Otrante. Et iceux prindrent la ville de Caſtro par compoſition, laquelle, nonobſtant le commandement des Capitaines, fut pillée des ſoldatz, & ceux que l'aage recommandoit en beauté furent emmenez captifz aux nauires. Cepédant quelques Turcs de cheual ſe mettans en des batteaux paſſerent de nuyt d'Aulone au païs d'Otrante & Salen, où ilz prindrent grand nombre d'hommes & emmenerent force beſtail. Mais ce n'eſtoit rien au pris du mal qu'ilz euſſent faiât aux Chreſtiens, ſi ce n'eût eſté la temerité d'un certain Capitaine de galleres Venitien, Dieu le voulant ainſi par ſa miſericorde. Car iceluy ayant reçu quelque tort des Turcs un peu au-parauant, rencontra certaines nefz Turqueſques, partie deſquelles il meit au fond de la mer, tant auoit-il conçu de maltalent contr'eux. Ce qui irrita bien fort le grand Solyma à l'encontre de la Seigneurie de Veniſe, quoy que le Senat d'icelle n'entendiſt rien de cela. Auſſi en meſme temps André d'Orie, Admiral de l'armée imperiale, aborda quelque petit nombre de vaiſſeaux, qui apportoitent toutes ſortes de viures & de la toy-le d'Alexandrie à Solyma, leſquelz il print tous, & meit tous ceux qui eſtoient dedans à ſa chiorme pour eſtre rameurs: poſant tout le butin dans ſes galleres, & mettant le feu aux nauires des Turcs, pourautant (peut-eſtre) qu'ilz ne luy ſembloient pas eſtre commodés. D'abondant il meit le feu à deux galleres Turqueſques, ſur leſquelles eſtoit venu Iunusbei, Ambaſſadeur de Solyma par deuers le General des Venitiens, qui eſtoit pour lors en l'Iſle de Corſou. Encor' aduint-il, que ceſt Ambaſſadeur fut mal reçu des Venitiens, & tomba en grand peril, de maniere qu'il fut contrainct de payer ran-

* Main-
tenant les
montz de
Cimeri.

çon aux brigandz des montz * Acrocerauniens, qui l'auoient prins comme il prenoit terre. Luy donc retourné vers Solyman, forma gros pleintifz contre les Venitiens, & l'enflamma grandement à leur faire la guerre, bien que le General d'iceux taschast bien fort à s'excuser de cela. Outre tout ce que nous auons dict, enuiron ceste saison d'Orie auoit prins en vne sanglante bataille douze galleres des Turcs, comme celuy qui ne cessoit de sillonner les flortz de la mer, & espier tous les portz & haures d'icelle: lesquelles galleres il auoit deffaites, combien que ce ne fut sans y perdre beaucoup de bons soldatz, rameurs, & pilotes. Car ces douze galleres des Turcs ne douterent point de soustenir l'effort contre trente-cinq bien munies, qu'auoit le Seigneur d'Orie: & iajoit que les soldatz Turcs fussent tous couuertz de playes, & mattez de labeur, neantmoins ilz aimerent mieux combattre vertueusement que de se rendre à la mercy des nostres. Si ietterent pareillement au milieu de la mer les espées recourbées, desquel les ilz font si grand cas, de peur que les Chrestiens s'en seruissent. Aussi ceux-cy estoient les Ianissaires qui sont de la garde de l'Empereur, & les gens de cheual d'esslite, appelez vulgairement Spaches: lesquelles deux sortes de Turcs sont merueilleusement hardies & opiniaftres à combattre l'ennemy. Ce que plusieurs Chrestiens ignorent, & partant font estat que les Turcs sont foibles & de nulle force en guerre, mais vrayement ilz s'abusent: car il y a entr'eux & hommes de cheual & hommes de pied de vertu & constance inuincible. D'auantage sçachans bien que mal leur baste, ils se sont monstrez aucunement paresseux ou timides à se mettre où est le plus fort du danger, cela fait qu'il n'y a peril si grand auquel ils ne se iettent courageusement. Alors Solyman enuoya son Barberousse avec quatre-vingt galleres contre d'Orie, mais iceluy emmenât quant & soy quelques nefz Turques se retira legerement. Doncques Solyman fut despité de ceste deffaire des siens par d'Orie, & de l'iniure à luy faite par les Venitiens: encore quelques grands Seigneurs de sa Cour l'esguillonnoiet de plus en plus, par la suasion desquels il chā-

Douze
galleres
prinses par
le Sei-
gneur d'O-
rie sur les
Turcs.

Vaillance
des Turcs.

gea d'entreprise, & laissant l'Italie, qui n'estoit pas si facile à subiuguer, feit la guerre aux Venitiens.

EN mesme temps les Bandoliers des monts Acrocerau-
niens, dictz de Cimeri, gés felons & barbares, & ne recognois-
sans aucun Dieu, furent si temeraires, qu'ils decreterēt ensem-
ble de tuer vne nuit l'Empereur Solymā. Mais cela estant
descouvert par le corps de garde de l'Empereur, leur entre-
prise leur fut fort dommageable, à cause que Solymā enuoya
des gens contr'eux, qui en tuerēt comme de mousches. Apres
cela son armée print la route de *Corfou, laquelle il se resolut
de forcer, cōme estant à Messieurs de Venise. Au moyen de-
quoy les Turcs descendirent en l'Isle, & assaillirent de toutes
leurs forces la ville de Corfou, mais en vain: tellement que a-
pres auoir rauagé toute l'Isle, ils emmenerent vne infinité de
Chrestiens en seruage, qui estoient de quinze à seize mille hom-
mes tant grands que petits, hommes & femmes, chose si mi-
serable & si triste que rien plus. En ce temps-là estoient gou-
verneurs de Corfou deux Patrices de Venise, lesquels voyans
qu'il estoit expedient pour le salut public de ce faire, demoli-
rent les faulxbourgs de la ville, ornez de plusieurs belles &
grandes maisons, de peur qu'iceux estans prins par les Turcs
ils ne leur seruissent de rempart contre la ville. Ce spectacle
estoit bien triste: mais neantmoins tolerable, à cause que tous
les edifices abbatuz pouuoient estre releuez. Le plus grand
creue-cueur du monde fut, que eux craignans que la ville ne
souffrist quelque famine, si les Turcs mettoient le siege deuāt,
feirent sortir hors la ville tous ceux qui estoient inhabilles à
porter armes, lesquels estoient cōtraints de passer la nuit dās
les fosses, dont aduint tant par l'indisposition du tēps que par
la crainte des Barbares, que plusieurs d'iceux & principale-
ment les petits enfans moururent miserablement penduz au
col de leurs meres. Tant y a que Solymā n'ayant point bien
fait ses affaires ny en la guerre d'Italie ny en celle de Corfou,
retourna honteusement & sans rien exploicter à Constātinop-
le, cōmandant ce-pendant aux Chefs de son armée de guer-
royer les Venitiēs en diuers lieux. Au reste, ains que de leuer

*Entreprise
des Bado-
liers sur la
personne
de Solymā*

** iadis
Corcyra.*

*Corfou ve-
née des
Turcs.*

*Misere in-
croyable.*

L'AN M.D.XXXVII. HISTOIRE DE TOUTES CHOSES

*Humani-
té, pour
mieux de-
cenoir.*

le siege il entédit que les habitans de la ville de Castro auoient esté emmenez en seruage cōtre la foy à eux promise: dequoy il fut si fasché & despité, (comme celuy qui ne vouloit pas auoir le bruiet d'estre cruel) qu'il feit mourir tous ceux qui auoient esté les autheurs de ce forfait, & ayans fait venir tous les habitans de Castro les r'enuoya en leurs maisons. Finalement Corfou fut deliurée de ces barbares sur la fin du moys d'Aoust.

*Les Guel-
droys se re-
uolent.*

Sur la fin de ceste année presque toutes les villes de Guel dres se souz-leuerent de l'obeissance de Charles d'Aiguemōt leur Prince, & se rendirent à Guillaume, Duc de Cleues & de Iuliers. Le motif de ceste reuolte estoit, qu'il sembloit que le Duc Charles eust deliberé de rendre ce pais merueilleusement fort au Roy de France, l'auancement duquel il cherissoit grandement: laquelle deliberation les Gueldroys ne peurent oncques endurer, de peur que les Alemās ne fussent forcez de seruir aux François. Ceux de Nimegen furent les premiers de ceste reuolte, lesquels saisirent le chasteau du Duc situé au pourpris de leur ville, renuersans tout le renfort qu'il y auoit fait de nouueau. Neantmoins, comme nous dirons cy apres, il semble que le Duc de Iuliers vsurpa ceste dominatiō à son damp & malheur.

*Trouble
des An-
glois, qui
n'ont point
bonne fin.*

PAR EILLEMENT y eut vn gros trouble ceste année en Angleterre, à cause que plusieurs milliers d'hommes leuerent les armes à l'encontre de leur Roy. Ceux-là furent les habitans du pais de Lincolne & d'Iorck, lesquels estoient faschez au possible de voir l'estat du Royaume & de la religion changé, & aussi des trop excessifs imposts du Roy. Ils furent bien cinquante mille hommes de nombre fait, appellans leur guerre la sacrée expedition. Mais estans amadouez de la belle mine des Capitaines du Roy, cōme ils s'attendoient d'auoir la paix & concorde que le Roy leur permettoit, ils poserēt les armes bas. Tellement que peu apres ils payerent leur temerité, & furent quelques chefs des leurs pendus & estranglez.

CESTE année le Pape Paul donna le chapeau rouge à quelques gens d'honneur & de sçauoir. Entre lesquels furent
Gaspar

Gaspar Contarein, Patrice & Senateur de Venise, Regnauld ^{cardinaux}
 Polus, Iehan du Bellay, Frederic Fregose : & successiuent ^{faictz par}
 furent faictz Cardinaux Sadolet, Alexadre Bembe, & autres. ^{le Pape,}
 Or Sleidan n'ayant rien que redire sur vn faict si loüable, il est ^{es la en-}
 si meschant qu'il va calomnier le desseing & intention du Pa- ^{lornie de}
 pe, combien que tout homme de bien soit tenu d'interpreter ^{Sleidan.}
 vne chose douteuse à la meilleure part. Croyriez vous bié que
 Sleidan peust voir les secretz desseings du Pape, cachez dans
 son cueur? Voyez vous pas combien ces galans sont mesdisans
 & desloyaux, quoy qu'ilz facent beau semblant d'estre euan-
 geliques? Il dict que le Pape vouloit faire de braues & vaillans
 Capitaines: comme si le siege Romain deuoit aller à val l'eau,
 si quelques hommes doctes & eloquens ne le soustenoient
 contre ces nouueaux heretiques: en quoy ilz sont bien abu-
 sez. Ce siege Romain, lequel n'a peu estre renuersé l'espace de ^{Du siege}
 plus de trois cens ans par les Empereurs de Rome, hommes ^{Romain.}
 payens, Roys puissans, qui ont esté iusqu'au temps de Con-
 stantin le grand, & lesquelz par la violence des supplices con-
 stituez sur les Chrestiens, se sont parforcez d'abolyr nostre fo y:
 ny aussi par plusieurs autres heretiques & tyrans, à cause q le
 Sauueur Iesus. Christ defendoit son Eglise à l'encontre de tous
 ces assaillans: ce siege, dy-ie, demeurera en son entier iusqu' à
 la fin du monde, quelque rage que les dogmatifans de ce sie-
 cle exercent contre luy, instiguez par Satan pour corrompre
 plusieurs, à fin qu'ilz defrichent bien le chemin à l'Antechrist,
 & qu'ilz facent damner innumerables ames, ce-pendât qu'ilz
 ne nuysent à aucû plus que à eux-mesmes, & à ceux qu'ilz de-
 çoiuent souz ce masque de l'Euangile.

L'AN 1538. l'Empereur & le Roy François parlemente- ^{Intention}
 rent ensemble. Car le Pape Paul voulant s'aquitter de sa char- ^{du Pape}
 ge, auoit entrepris de grand courage de faire, que ces deux ^{Paul.}
 Princes s'entre-ueissent à Nice: toutesfois il ne sceut jamais
 obtenir, que luy present ilz s'assemblassent. Ce nonobstant il
 impetra, qu'ilz auroient treues par ensemble pour neuf ou dix ^{Treues en-}
 ans. Et enuiron ce temps l'Empereur maria Marguerite sa fille ^{tre le Roy}
 bastarde au Seigneur Octauian neveu du S. Pere, laquelle a ^{& l'Em-}
 Ddd.j. ^{pereur.}

L'AN M.D.XXXVIII. HISTOIRE DE TOUTES CHOSES

uoit esté en premieres noces femme d'Alexandre, Duc de Florence. Or combien que l'Empereur & le Roy ne s'accointassent pas encores trop familièrement en ce temps là, & ce au grand desplaisir & mesaise du Pape: si est-ce que l'Empereur aduertit le Roy, que deuant qu'il print son chemin en Espagne, il voudroit bien le voir & luy tenir quelque propos. Ce qui fut cause, que ces deux monarques feirēt l'honneur & reuerence telle que les Chrestiens sont tēnuz de faire au souverain Pōtife, & à leur exemple plusieurs grandz Seigneurs feirent le semblable, baïsant tous les piedz du Pape: ce que toutesfois refuserēt de faire Chrestoffe, Duc de Vvittemberg, Guillaume de Furstēberg, le Marechal de la Marche, & George Gluch Ambassadeur pour le Roy de Dannemark, lesquels auoient esté occasionnez à ce faire par les escritz de Luther & telz autres garnemens. Mais s'il est ainsi que le filz du Dieu tout-puissant fest humilié aux piedz des pauvres pescheurs, & les a lanez & essuyez fort soigneusement & d'une grande beneuolence: quel peché y a-il si les hommes pour faire voir leur Chrestienne modestie, viennent à baïser legerement les piedz du S. Pere, ie ne dy pas nudz, mais couuers? O Dieu quelle difference il y a entre l'esprit diuin & du mode nostre seigneur n'a il pas chanté souuent, apprenez de moy que ie suys debonnaire & humble de cueur? Et Luther au contraire abhorre toute humilité Chrestienne, & en desgoute vn chacun: parquoy on voit de quel esprit il est poussé. Et certes i'ose bien dire, que la seule cause pour laquelle il se trouue tant de partialitez entre ses sectateurs, est, d'autant qu'ilz n'haïssent rien plus que la douceur de Iesuchrist, au moyen dequoy ilz ne recognoissent aucun superieur entre eux, ains opiniaistrement defendent leurs songes quoy qu'ilz soient absurdes, ne se soucians en rien dequoy tant de milliers de simple peuple se precipitent miserablemēt en leur malheur & damnation.

La peur
des gens de
l'Empereur
à Villefranche.
O R tandis qu'on tramoit les treuës à Nice, & que l'Empereur seiournoit à Villefranche sur la mer, aduint en certaine mestairie qu'un païsant vantoit quelques feues en son aire, d'ou sortoient quelques vapeurs & nuées comme si c'eust esté

fumée. Ce qui espouuenta fort tous les gens de l'Empereur, cuydans que Barberousse fust là venu avec sa flotte, pour surprendre le Pape & l'Empereur. Et nonobstant l'Empereur, pendant que les autres estoient si effrayez que rien plus, demeura sans aucune peur ou crainte, & iâ les Seigneurs André d'Orie, & du Guast vouloient auoir recours aux armes, tant le cueur d'eux tous estoit saisy de frayeur. Mais peu apres on cogneut que ce n'estoit rien, & la grand' crainte fut changée en vne extreme risée, bien que ce ne fut sans que les plus braues Seigneurs rougissent, de quoy ilz auoient si temerairement esté estonnez, l'Empereur demeurant tousiours constant & courageux. Ce faict, ceste grande assemblée de Nice se departit, & se retira le Roy François en son royaume. Si feit aussi le Pape, & en s'en retournant il fut reçu és meilleures villes le plus magnifiquement qu'il fut possible, pour induyre ces grands Princes à venir à quelque bonne composition. Quand a l'Empereur, il se retira à Aigues mortes, comme il auoit promis, & là arriva le Roy François, & se mit en deux gallions avec son filz Henry le Dauphin, & Charles Duc d'Orleans, & plusieurs grandz Seigneurs, qui furent tous bien venus & caresez le plus honnestement qu'on scauroit penser, par l'Empereur ^{Entre- uene du Roy & de l'Empereur.} qui les alla recueillir au bord de son vaisseau. Et pour lors André d'Orie par le moyen de l'Empereur, r'entra és bonnes grâces du Roy François, l'alliance duquel il auoit quittée y auoit ia dix ans. Apres cela le Roy & l'Empereur tindrent longuement propos tous deux seuls, tellement que chacun s'attendoit bien qu'ilz vuyderoient là ensemble tous leurs differens. Et sur ce point l'Empereur prenant congé du Roy fort humainement, le conduysit iusques à l'eschelle de son vaisseau. Si feit le lendemain proclamer par toute sa flotte, qu'il n'y eust aucun si hardy qui osast sortir de son vaisseau sans son congé, & prenant en sa compagnie quelques Cheualiers de la toyson d'or il entra dans quelque ville de France pour disner avecques le Roy: en quoy il monstra le cueur d'un bon & courageux Empereur. Or si tost qu'il eut mis pied sur terre, le Roy & la Royne avec Messieurs leurs enfans le vindrent

accueillyr & caresser, & le conduyrent iusques au logis du Roy: & sur le vespre sa maiesté aduertit le Seigneur d'Orie, lequel il auoit laissé aux galleres, qu'il passeroit la nuit avec le Roy, d'autant que & le Roy mesme & la Roynes sa sœur impetrerent cela de luy, quoy qu'il semblast que cela ne se peust faire sans grand danger. Mais l'Empereur auoit bien voulu faire sçauoir cecy à André d'Orie, afin qu'il ne pensast qu'il luy fust aduenue quelque meschef ou encombre. Si tost que le iour fut venu, l'Empereur accompagné de leurs maiestez & de plusieurs grandz Seigneurs, se retira à la mer, ou on se resioiuit grandement en beuuant & deuissant, sur la poupe du vaisseau de l'Empereur, & incontinent apres il fit voyle. Ce fut pour lors que le Roy fit certaine & assurée alliance avec l'Empereur, de maniere qu'il promit de faire la plus forte guerre qu'il pourroit tant par mer que par terre contre le Turc. Et à dire verité, l'Empereur tint grand propos de ceste amitié durant son chemin sur mer; à André d'Orie, luy ouvrant les moyens pour entreprendre la guerre en Asie, Grece, & Afrique: & assura encor' tous les Roys & princes Chrestiens de la paix faicte entre luy & le Roy. Toutesfois le Roy se tenoit assuré qu'on luy renderoit le duché de Milan: & ayant esté frustré de cela, il ne faut point s'esmerueiller s'il fut assez prompt à la guerre, ioint qu'il y eut beaucoup d'autres raisons qui l'esmeurent à ce faire.

L'Empereur se retire en Espagne.

La mort de l'Euesque du Liege.

Or environ ce temps passa de ce siecle en l'autre, Erard Cardinal & Euesque du Liege, qui n'auoit pas esté cousin des Lutheriens tant qu'il vescu: ce qui faict grand mal à Sleidan, & partant il n'a eu honte d'escrire, qu'il s'estoit faict faire son sepulchre, & ordonné ses anniuersaires long temps deuant qu'il mourust, & qu'il auoit faict tout cela pour vne ostentation plustost que par quelque pieté, à cause qu'il estoit fort conuoiteux de gloire. Voila comment Sleidan iette sa sentence sur les plus secretes pensées des hommes, lesquelles sont cogneuës à Dieu tant seulement, & combien que cecy ne soit permis aux Catholiques, si est-ce qu'il est licite à ceux qui embrassent la doctrine de Luther, pour autant qu'il

n'y a rien qui leur soit defendu . Et sans aucunement tergiverser, en quelque sorte que ce Cardinal aye passé sa vie, si est il impossible à Sleidan de sonder, de quel cuer & affection il voulut que ses anniuersaires luy fussent faictes voire deuant qu'il fust mort . Sleidan dict au mesme lieu , que les Papistes attribuent si grandz merites aux œuures des Prestres, que par iceux la vie eternelle leur est deuë comme vn guerdon, & ne faut pas estimer qu'il die cela pour autre fin, que pour calomnier les Catholiques , comme est sa coustume . Or que le saint sacrifice de la Messe aye merueilleuse efficace tant pour les vifz que pour les mortz , il est si asseuré par les euidens & oculaires tesmoignages des saintz peres , que tous ceux qui l'osent nier deuroient mourir de honte . Et quand aux bonnes œuures des Chrestiens, personne ne doute qu'elles ne procedent de la grace de Dieu , mais ce n'est pourtant sans la cooperation de nostre franc arbitre , pourautant que, comme dict l'Apostre , Dieu opere en nous & le vouloir & le parfaire . C'est-cy doncq' en quoy est la racine du merite des bonnes œuures, c'est à sçauoir en la grace de Iesuchrist. Car situ ostes la grace de Dieu aux œuures de l'homme, ie te confesse que nullement , ou certes bien peu , elles seront agreables à Dieu, comme il appert par les Turcs , Iuifz, & Payens , qui ne sçauoient iamais plaire à Dieu quoy qu'ilz fissent, d'autant que sans la foy il est impossible de plaire à Dieu. *Heb. 11.* Au demeurant si Dieu fait les œuures bonnes par nous, mais non toutesfois sans nous, sera-il indigne que la vie eternelle soit donnée à ses œuures, considéré mesmement qu'en mille lieux de l'escriture sainte il promet la vie eternelle à ceux qui feront bien ? Mais les Lutheriens crient que nous nous fions tant sur nos œuures, comme si nous pouuions par icelles meriter la vie eternelle sans la grace de Dieu . En quoy ilz mentent contre leur propre conscience . Car encore que nous nous estudions à faire bonnes œuures, nous ne disons pas pourtant que la vie eternelle soit deuë à telle ou à telle œuure, à cause que l'escriture tesmoigne, que nul ne sçait s'il est digne d'amour ou de haine. Et partant puis que nous voyons

*Des bones
œuures &
de la gra-
ce de Dieu,
de quoy
parle l'au-
teur par
occasion.*

Philip. 2

Heb. 11.

Eccle. 9.

que les meschans & peruers font quelquefois choses, lesquelles semblent estre colorées de pieté & charité, les gens de bien n'ont pas voulu se fier tant sur leurs œuvres, à cause qu'ilz ne sçauent pas pour certain, si icelles sont fondées & enracinées en l'amour de Dieu, hors lequel rien ne luy peut estre plaissant & agreable: & bien souuent voyons nous que telles œuvres procedent de quelque inclination naturelle, ou bien de quelque autre mouuement, ce que certainement ne merite pas la vie eternelle. Au moyen dequoy l'Apostre disoit graueement, quand bien ie parleroy la langue & des hommes & des anges, & que i'eusse la foy si grande que ie transportasse les montaignes, & que avec cela ie fusse desnudé de charité, cela ne me profiteroit de rien. D'où on voit à l'œil que la foy n'a aucun effect, si elle n'a charité pour compaignie, & toutesfois nos nouueaux Euangeliques sont si osez & outrecuydez, qu'ilz soustiennent, que celuy qui croira fermement que ses pechez luy sont remis par Iesuf-christ, ira droit en paradis, voye à la verité fort brefue & courte pour aller en enfer sans se foruoyer. Et partant les escritures saintes nous admonnestent fort souuent, de ne nous vestir point d'une telle temerité & si folle confiance, d'autant que les iugemens de Dieu & ceux des hommes sont grandement differens. Laquelle semonce n'engendre en nous aucun desespoir, mais bien nous semond-elle d'estre auisez & diligens, de peur que ne soyons surpris de nonchalance en tant de dangers de la vie humaine. Il est vray que nous conceuons une assurance non mediocre, quand d'une sincerité de cuer nous nous parforçons à faire bonnes œuvres: non point que ceste assurance depende entierement de noz œuvres, mais entant que la vie passée honnestement apporte avec foy un grand espoir, comme lon voit par plusieurs lieux de l'écriture, lesquels ie ne veux citer pour l'heure presente. Et en ceste façon S. Pierre nous exhorte, que par bonnes œuvres nous facions nostre vocation certaine. Mais toutes ces choses sont si manifestes d'elles mesmes, que l'impudēce & orgueil de ceux qui y veulent calomnier tant peu que ce soit, est totalement

intolerable. Qui est la seule cause que ie m'arreste quelquefois plus que ne porte mon dessein, à expliquer telles choses comme sont celles-cy, de peur que les moins doctes ne soient deçeus par Sleidan, lequel en tous ses beaux commentaires ne tasche à autre chose, que de respendre son venin par tout : & ne fait presque autre cas que colorer l'opinion de Luther & ses sectateurs, & par ce moyen deçeuoir le lecteur qui n'y prend point de garde. Presque en ce mesme lieu il recite tout au long la forme de quelque reformation, laquelle certains Cardinaulx auoient présentée au Pape. Et afferme, que Nicolas, Archeuesque de Capoue, estant impatient de ceste reformation, fut enuoyé souz main par le Pape, cōme chacun sçait, dit-il : & que cestuy-cy s'opposa de toutes ses forces à ceste reformation, & que par ce moyen tant le Pape que les Prelatz furent persuadez, qu'il estoit bon de ne rien changer ou innouer. De rechef ce menteur Sleidan dit, que le mesme Euesque meit en lumiere quelque liuret en Alemaigne, pour faire mocquer le Pape & tous les reformateurs, & dit que plusieurs le prennent ainsi : mais que les autres sont d'opinion, que ce liuret fut imprimé par l'aduis & consentement du Pape, à fin qu'on cogneust par la, qu'il n'abhorroit pas toute reformation. Qui est si aucugle qui ne voye, que Sleidan ne tasche en cest endroit qu'à calomnier le Pape : il dit que cela est certain, il dit apres que plusieurs l'interpretēt ainsi, & puis encore d'une autre façon. C'est ainsi que fait Sleidan, & ses semblables, detracteurs du Pape & de l'Eglise, lesquels pensent auoir fait vne œuvre euangelique, quand ils peuuent ietter quelque trait à l'encontre du Pape. C'est chose certaine qu'on presenta au Pape quelque espee de reformation, mais Luther & Iehan Sturmius s'opposèrent à icelle, & l'oppugnerēt de toute leurs forces. Et toutesfois vous voyez que Sleidan n'a point de hōre d'imposer au Pape, que à son instigation l'Archeuesque de Capuē fait tant, que ceste reformation ne reüssit point son effect. Car iagoit que pour lors toutes choses qui auoient besoin d'estre reformées ne l'eussent pas peu estre si tost, si est-ce vn mensonge trop impudent, de dire que le Pape voulut

*Ménierie
de Sleidan
de la reformation du
Pape.*

qu'il ne fust rien reformé. Et par tels mensonges & calomnies Sleidan s'est acquis cela, qu'on ne scauroit luy adiouster foy, si l'n'appert d'ailleurs qu'il ait dit verité. Quand à Luther, il n'a point espargné sa peine à traduire ceste reformation en Aleman, mesmes a adiousté des annotations à la marge, lesquelles certes conuiennent fort bien à leur autheur plus qu'à autre qui soit: & n'a point redouté d'appeller poiltrôs & belitres les reformateurs, lesquels selon le tesmoignage mesmes, de Sturmius, estoient douiez de grande doctrine & integrité de mœurs. Mais que feroit autre chose celuy, la bouche duquel est remplie de calomnie, de dol & de fraude? Sturmius pareillement ne s'est point espargné à dire force iniures & cōuices, ce qu'a repris en luy le tref-docte Cardinal Iacques Sadoler.

De Sturmius.

Les Lutheriens s'opposent au Concile.

Ce fut enuiron ceste saison que Luther & son troupeau assemblerent toutes leurs machines, pour rompre l'autorité du Concile cōgregé par le Pape Paul, à fin de tenir de plus en plus le simple peuple empiegé en leurs laz. Alors vous eussiez veu par tout de nouueaux Pasquils, des nouuelles epistres de Beelzebut, des legendes fabuleuses de S. Iehan Chrysostome, lesquelles ils attribuoient au Concile d'une impudence extreme, & avec cela quatre epistres de Iehan Hus, & le liure de la donation de Cōstantin le grand. Et en ceste sorte ils faisoient enuers leurs miserables sectateurs, que celle chose, laquelle a de coustume d'apporter souuerain remede, voire mesmes és plus grāds differens de la religion, estoit mocquée: & par consequēt le pauvre, peuple, diuisé en mille sectes tref-absurdes, ne pouuoit auoir ny sentir aucun allegemēt de son mal. Si attirerent aussi à leur party Henry Duc de Saxe, frere de ce bon Prince George, si grand zelateur de la religion Catholique, lequel Luther a tasché d'accabler à belles iniures. Et ainsi ilz faisoient imprimer des nouuelles ceremonies & nouueaux catechismes, & s'en trouua plusieurs alors, lesquels n'ayans iamais receu aucun ordre, prindrent la charge & administration des parroysses. En quoy ce sera chose vtile de considerer le secret iugement de Dieu, qui a permis que ceux qui s'estoient vsurpez le calice saint contre le commandement

ment de l'Eglise, & qui mesdisoient de noz prestres de ce qu'ilz ne leur offroient que l'espece du pain : ont receu telz hommes pour leurs pasteurs, lesquelz ne leur ont donné ny l'une ny l'autre espece, pourautant qu'ilz n'auoient nulle puissance de consacrer la sainte hostie, sans laquelle puissance il ne sensuyt aucun effect. Et c'est ainsi que deuoient estre punis ces opiniaistres & refractaires, lesquelz ont mieux aymé se laisser guinder au caquet de quelques moines reniez & seditieux, que prester obeissance au iugement & decret de l'Eglise vniuerselle. Sur ces entrefaites le Duc Henry par le moyé de quelques Visitateurs ou sur-intendans establit nouueaux articles, lesquelz il voulut estre obseruez de point en point tant par le Clergé que par les hommes laiz de ses terres & seigneuries, combien que lesdictz articles estoient beaucoup dif-
Articles ordonnez par le duc de Saxe.

semblables non seulement de la sainte escripture, mais bié encore de la confession d'Ausbourg, & de l'Apologie mesme d'icelle. Et Luther ne doute point de blasmer en son liure de la puissance seculiere les Princes, qui, cōme folz & peruers, veulent establis & ordonner loix à leurs subiectz, des choses qui concernent la foy. Ce nonobstant ceste sentence de Luther n'eut point de lieu en cest endroit, combien que ces articles n'yssirent pas tant de la volōté du Prince, que des Visitateurs. Voyla comme les choses alloient tousiours de pis en pis, & croissoit vne confusion incredible en matiere de religion, à cause que ceux qui n'auoiēt esté promeuéz par autorité legitime, se mesloient de faire tout ce qui estoit du ministere Ecclesiastiq'. Si est-ce pourtant qu'à leur iugement c'estoit le simple Euāgile, & la pure & nette parolle de Dieu, tandis que les diables, qui se delectent de telz remue-mesnages, se moquent de la sortise des hommes miserables.

En ce temps ceux de Strasbourg enforcelezz de la nouuelle opinion de Zuingle, donnerent vn temple de leur ville à ceux de France & du païs bas, qui estoient contrainctz d'abandonner leur païs, pour estre soupçonnez d'heresie. Maistre Jehan Calvin, qui depuys a esté l'un des Apostres de l'Eglise de Geneue, eut la sur-intendēce de ceste Eglise de Strasbourg

*Discours
de Calvin*

pour quelque temps. Et a lon escrit que ce Calvin fut bany de sa patrie pour sa maluerfation, & outre-plus quelcun afferme, que c'estoit le plus dissolu d'entre les dissoluz de son pais, & le plus inconstant d'entre les inconstans & infideles. Iceluy doncq' ayant son cerueau assez esuenté, controuua vne nouuelle opinion de la saincte Eucharistie, nyant quant & Zuingle la verité & essence du corps de Iesuf-christ en icelle, mais seulement y constituoit-il quelque energie & effect dudit corps. Car il faut penser que cela seoit bien à la grandeur de Calvin, asçauoir qu'il fust auteur de quelque chose aussi bié comme ses semblables, au moyen dequoy il enyura les hommes de ceste nouuelle & fauce doctrine. Et ne se contentant de cela, encor' escriuit-il plusieurs choses fort gentilles, lesquelles vous ne sçauriez lire sans conceuoir horreur, combien que ces bauarderies soient proposées au peuple sous le tiltre de la vraye parolle de Dieu. Et ie dis à la verité, que ses escrits sont remplis de blasphemes enuers Dieu pernicieux & intolerables, comme quand il afferme, que nostre Dieu opere en l'homme tous pechez & meschancetez, & que la loy & la volonté de Dieu se contrarient bien souuent, & quand il dict aussi, que le diable mēt es cueurs des hommes par la iussion & volonté de Dieu, & plusieurs choses semblables dignes d'estre vengées non de parolles, mais bien de la hart & du feu d'enfer. Et toutesfois il s'est trouué vn sien sectateur qu'on appelle Theodore de Bezze, qui n'a point eu honte de defendre si grandes absurditez. Hé pauures & miserables hommes que vous estes, au moins si vous estes hommes, & non plustost quelques dæmons sous l'effigie des hommes! Or afin que Calvin, qui commençoit ia à estre renommé & auoir grande authorité à Geneue, peust confirmer & sceller sa belle doctrine par quelque miracle, il executa chose digne certes de perpetuelle memoire, afin que la posterité cognoisse, de quelles fraudes & impostures se sont auisez, ceux qui ont tasché d'accabler & ruiner en nostre siecle l'Eglise Catholique, sous pretexte de vouloir remettre sus le vray euangile. Il amadoia si bien vn iour quelque pauvre miserable, qu'il luy meit en teste

*Le mira-
cle de Cal-
uin.*

de se faire porter au temple cōme mort : ce que feit le pauvre homme, sa femme en estant assez contente. Or estoit tel le des-
 feing de Calvin, qu'il commanderoit au veu & sçeu de tout le
 monde, que ce corps vint de rechef à vie, & partant que le
 peuple ayant veu l'homme se leuer debout, l'asseurerait cer-
 tainement par vn si grand miracle, que Calvin estoit enuoyé
 pour semer la sainte doctrine par toute la terre. Mais la cle-
 mence & benignité de Dieu fut touchée au doigt en ce faict
 icy, entant qu'il ne permit que la fraude de ce malheureux
 homme fust plus longuement cachée, afin que les abusez se
 retirassent de toute société qu'ilz auoient avecques luy. Le
 pauvre homme qui auoit esté porté au temple vif, en fut enle-
 ué tout royde mort. Car comme Calvin se fust approché pres
 de luy, & eust commandé que si sa doctrine contenoit verité,
 il se leuast sur piedz, l'autre ne se meut aucunement, à cause que
 tout soudain il fut surpris de la mort: de façon que Calvin fut
 trompé luy-mesme, & fut cogneu que ce qu'il vendoit pour
 parole de Dieu, n'estoit que mensonge & chose controuuée.
 Si fut la femme du pauvre mort toute espleurée de cest acci-
 dent, & à grandz cris & gémissemens testifioit assez sa douleur
 inopinée, n'eust esté que Calvin l'appaisa par belles parolles
 & promesses, de peur que cela ne s'espandist d'auantage. Et
 comme chacun apperceust sa meschanceté, on dict que tout
 aussi tost il monta en chaire, & remonstra au peuple qu'il n'a-
 uoit tenu qu'à l'imbecillité de leur foy, que cest homme n'eust
 esté resuscité, & peut-estre persuada-il cela à l'assemblée. Voy-
 la qu'on dict de Calvin avec beaucoup d'autres choses sem-
 blables, qui volent de ia par tout en François & en Latin. Or
 ay-ie escrit cecy, comme ie l'ay entendu par hommes dignes
 de foy, & espere cy apres reciter quelque segnalé miracle de
 Luther, ne differant pas beaucoup à cestuy-cy. Les hommes
 doncques ne dessilleront-ilz iamais leurs yeux charmez, pour
 voir qu'ilz ont trāsporté la charge de leurs ames, & leur salut
 entierement, à des pasteurs fort infidelles? ne considerent ilz
 point, que l'estude de telles gēs n'est point de les beatifier du
 Royaume celeste, mais plustost de les precipiter en enfer? Il ne

*Caluin
veut plai-
re aux Lu-
theriens &
Zuingliens.* faut pas aussi ignorer, que Calvin taschant à s'insinuer es bon-
nes graces des Zuingliens & Lutheriens, a esté fort fin & ad-
uisé en parlant de l'Eucharistie, tellement que quand il dispu-
te avec les Zuingliens, vous diriez proprement qu'il est des
leurs: & si aduient qu'il aye quelque chose à desmesler avec
les Lutheriens, il met si souuent par ses escritz la realité & la
substance du corps & sang de Iesuschrist, & autres morz sem-
blables, qu'il n'y a celuy qui n'en fust ennuyé, & ce faict il,
sçachant bien que les Lutheriens se plaisent fort à cela. Cepē-
dant il ne laisse pas à defendre vne nouuelle opinion, & quoy
que par vne ruse & finesse il face beau semblant de favoriser
aux deux, si est-ce qu'il les tient suspens & douteux, ce que il
n'a sçeu si bien desguiser, que quelquefois il n'aye esté surpris
à Berne sur cela. Car comme en pleine assemblée il eust opi-
niastrement disputé, & defendu l'opinion de Zuingle contre
vn Flaman nommé Zacharie, ce Zacharie tira de sa pochette
vne epistre de Calvin à M. Falese, & luy demanda, si il cognoif
soit bien son escriture. Calvin respondit que vrayement il a-
uoit escrit cela: au moyen dequoy Zacharie requist, que l'epi-
stre fust leuë publiquement, & estoit ladicte epistre farcie de
cent fois plus d'iniures cōtre Zuingle, qu'il n'en auoit dict de
louange en la presente assemblée. Et d'auantage Calvin a biē
osé escrire en vn liure, qu'il a faict imprimer soubz le tiltre du
sommaire qu'il faut tenir des sacremens, que ceux qui suyuent
la confession d'Ausbourg ne different en rien de ceux de Zu-
rich, lesquelz suyuent plus que nulz autres la sentence de
Zuingle. Mais les Lutheriens se sont employez à refuter cest
escript, ausquelz Calvin a brusquement respondu, de façon
que les Calvinistes & Lutheriens s'entre-haïssent cōme chiens
& charz, & toutesfois & quantes qu'ilz escriuent les vns con-
tre les autres, ilz se testonnent à belles iniures si gentimēt, que
vous iugeriez que ce sont lauandieres qui s'entre-pillent. Et
pource que nous n'aurions iamais faict, si nous voulions met-
tre icy tous les tiltres d'hōneur qu'ils se donnent, ie me contē-
teray d'ē apporter quelques vns, qui yssent de la derniere ad-
monitiō, q Calvin escrit à Ioachim Vvest-phal Lutheran, en

*Caluin est
pris au
trebuchet
en dispu-
tant.*

laquelle il vous peint de toutes couleurs, selon la modestie de son euangile, non seulement Vvestphal, mais bien encore certaines villes de Saxe, lesquelles auoient reprouué son opiniõ. Il dict qu'ilz sont tellement charmez & enorcelez en leur erreur, que quoy qu'ilz soient vieux Theologiens, si n'entendẽ ilz pourtant ce qu'on apprend aux petis enfans au catechisme: que ces hommes brutaux ne gousterent iamais qu'est-ce que la Cene, & qu'elle veut dire, qu'ilz sont totalement effrõtez, qu'ils sont par trop copieux en iniures & brocardz, cependant qu'ils reiettent les hyperboles de Luther, moyennant qu'ilz trompent le simple peuple & leurs freres, & qu'au reste ils se contentent d'estre prisez & estimez du peuple, & qu'ils ne se soucient en rien du iugement de Dieu ou des anges. Avec cela il leur attribuẽ vne audace furieuse, vne legeretẽ babillarde, vne yurongnerie aueuglẽe, vne meschacẽtẽ extreme, vne superbe diabolique: & si asseure, que l'arrogance leur sert de pietẽ, & que la cruautẽ les a despouilleez de toute humanitẽ, voire mẽmes que l'obstinatiõ est si bien enracinẽe en eux, qu'elle a chassẽ toute moderation. En oultre il les appelle Lunariques & demy-folz, Cyclopes, Geans seditieux & superbes, grãdscriards phrenetiques, bestes, reuesches, orgueilleux, opiniaftres, & mille autres fatratz. Puis apres il se complaint d'eux, de ce qu'ils crient que ny luy ny les siens ne sont pas dignes que la terre les soustiẽne, de maniere que s'ilz viuent vn peu plus longuement, on ne leur sçauroit faire mieux, que de les enuoyer en Tartarie ou en Barbarie. Finalemẽt qu'ils blasment la paresse des Princes, de ce qu'ils n'emploient leur glaiue à effacer enticremẽt la memoire des sacramentaires. Voyla que dict Calvin au lieu alleguẽ, & luy sied biẽ ce que dit l'Ecclesiastique, quand l'homme meschãt dir mal du diable, il dit mal luy mẽme de son ame. Car toutes les iniures & reproches que les heretiques obiectent aux autres, elles tombẽt sur eux-mẽmes, pourautant que le plus souuent il aduient qu'ilz sont pires, que ceux qu'ils accusent si violemment. Et à la veritẽ tout ce q Calvin au lieu cy dessus attribuẽ aux Lutheriens, cõuient fort biẽ à tous heretiques quelz qu'ils soient, lesquels

Ecc. iij.

Les iniures de Calvin contre les Lutheriens.

Eccle. 21.

estans reprouuez en leur sens, tombent facilement en toutes meschancetez par le precipice de faugeté & mensonge. Certes il semble que Calvin se veut peindre luy mesme, quand il a ainsi laué les Lutheriens, tant bien se trouuēt toutes ces choses en luy, lesquelles pourtant ne peuuent empescher, que les siens ne le reuerent presque comme vn Dieu. Et d'autant que iamais le mensonge ne peut longuement estre constant, Calvin parle si considerément, quand il vient à parler de la Cene, qu'il n'est ny Lutherien ny Zuinglien du tout, mais comme par quelques charmes il les embabouïne tous deux, disant que la chair naturelle de nostre seigneur est & n'est pas en l'Eucharistie, l'un desquelz les Lutheriens soustiennēt, & l'autre les Zuingliens: combien qu'il semble finalement que Calvin se rengē du costé de Zuingle, quand il afferme, que en la Cene est receüe quelq̃ vertu & efficace de la chair du Christ decoulante du ciel où elle est, & ce par la foy. Ce nonobstant, comme c'est la coustume de ceux qui ne suyuent pas la verité, il ne parle iamais de ceste matiere, qu'il ne se contredise oculairement, à cause dequoy les Lutheriēs l'appellent faiseur de passe-passe, & Sophiste: ausquelz il respond de telle sorte, qu'on peut veoir facilement qu'il est, & tasche d'estre vn imposteur. Ce miserable a aujourd'huy plusieurs sectateurs lesquels il a deçeus, & sont appelez par quelques vns les nouveaux Sacramentaires, pourautant qu'ils se forcent de diminuer la vertu du sacrement par quelque nouuelle ruse, comme il est dans la confession de Mansfeld. Si est-ce pourtāt que les hommes sont si fort aueuglez, qu'ilz ne voyent goutte en telles impostures: voire mesmes vn des plus folz disciples de Calvin, nommé Bezze, n'a point honte de dire en la vie qu'il a écrite de Calvin, qu'il n'ya eu iamais homme apres Iesuschrist & les Apostres qui aye si bien entendu le mystere de la Cene, que son Calvin. Lequel propos combien qu'il soit impudent, & le plus fat qu'on scauroit imaginer, si en a-il pourtant qui sont si folz qu'ilz y adioustent foy, pour tousiours cōfirmer l'Ecclesiaste disant, qu'il y a vn nombre infini de folz. Je scay que plusieurs hommes doctes ont colligé les contra-

La contrariété de Calvin en matiere de l'Eucharistie.

Blaspheme de Bezze.

rietez de Caluin, par lequel argument il n'y a celuy qui ne puisse cognoistre, qu'il estoit bien loing de la verité: mais chacun ferme les yeux. Or aduint en ceste année chose qui m'a semblé memorable.

A Vvittemberg y eut quelques vns des disciples de Luther, qui reiettoient totalement la loy des œuvres, & disoient que les Euangeliques n'estoient point obligez aux bonnes œuvres de la loy diuine. Et combien que Luther eust enseigné ceste doctrine au commencement, toutesfois pource qu'il estoit né à contentions & noises, & qu'il se païssoit en cela, quand il veit que les autres enseignoient ceste doctrine, il se fit partie à l'encontre d'eux, ne voyant ny ne considerant point, que tout ce qu'il pourroit escrire contre ces nouueaux dogmatistes, seruoit à luy couper la gorge. On dit que Iehan Illebius fut en ceste sentence, mais qu'il la quitta, estant sur ce aduertý & prié de la part de Luther. Voyla comme Luther auoit la puissance de defendre tantost vne chose, & tâtost l'opugner, & n'eust sçeu faire rien si ridicule, que ceux qui ont esté vne fois enchantez par luy, ne l'estiment comme la propre & pure parolle de Dieu.

A v moys d'Auril y eut vn colloque des plus doctes Zuingliens à Zurich, auquel assisterent Bucer & Capito à la priere de ceux de Basle. Illec se purgea Bucer le mieux qu'il peut, disant que ce qu'il auoit cy deuant tasché à faceorder, ne venoit pas de luy, mais que le tout auoit esté fait à la poursuite & instigation du Lantgraue & quelques autres. Et lors aussi on fut trois iours à deliberer sur la responce qu'on vouloit enuoyer à Luther. Ce que voyant Bucer, comme quelcun des Zuingliens a tres-bien dit, se parforçoit, en disant quelques choses ambiguës, d'arrester quelque bõ & seur accord, ce qui ne plaisoit aucunement à Messieurs de Zurich, & ne faisoient pas comme Bucer, ains disoient librement & apertement ce qu'ils auoient sur le cueur, craignans qu'une concorde fardée & pleine de tromperie, comme Bucer la desiroit, ne les occasionnast à plus grands debats. Aucuns estans persuadez par Bucer, que Luther & Zuingle n'estoient point differens sur la

*Aucuns
ont dit que
no^s ne som
mes point
tenus à biē
faire.*

*L'inconfiā
ce & fran
de de Bu
cer, icy Zu
inglien, &
la Luthé
rien.*

question de l'Eucharistie, quand à ce qui en est, mais seulement de parolles, (ce que toutesfois est faulx, comme Luther mesme tesmoigne en plusieurs lieux) sembloient n'auoir plus d'altercation avec Luther, mais l'euenement monstra assez le contraire de cela par-apres. Bucer mesme, qui auoit si fort sollicité ceste concorde, voyant qu'il n'auoit sceu impetrer de ceux de Zurich quelque responce à Luther telle qu'il la demandoit, ne leur porta plus delà en auant telle beneuolence qu'il auoit fait le passé, lors qu'il faisoit pour eux tout ce qu'il pouuoit. Il

*La factio
de Luther
gaigne.*

y en eut aussi quelques autres qui s'estrangerent beaucoup d'eux, qui toutesfois n'en faisoient pas le semblant. Tous ceux que nous venons de dire faconnez de la main de Bucer, vsoient de propos douteux & ambigus en ceste maniere, de peur que leur pipprie ne fust decouuerte, par quel moyen leur prodigieux Euangile a plus creu que par nul autre: de maniere que Bucer en ses interpretations sur S. Mathieu & S. Iehan, a retracté l'opinion de l'Eucharistie, qu'il auoit defendue par deuât fort opiniastrément, & ce pour le seul appetit de gratifier en cest endroit à Luther. Et toutesfois vous verrez des neutralistes ou tierceletz (c'est à dire qui ne sont ne Catholiques ne d'aucune secte) qui soustiendront, que ce Protée de Bucer a esté vn homme fort studieux & desireux de pieté & concorde, comme s'il estoit possible que celuy fust studieux de telles choses, qui defend tantost vne opinion & tantost l'autre, selon que s'offre l'occasion, voire mesme defenderoit-il l'Alcorā de Mahomet, si l'opportunité se presentoit.

A v resté quelques Zuingliens attribuèrent à cest accord de Bucer, par lequel il veult accorder les Zuingliens & Lutheriens, ce que nous attribuons à ceux lesquels sont si alterez de boire, qu'ilz boyuent vin & lie tout ensemble. Et personne ne peult douter, q̄ ceste ardente dissension n'ait agité les nouveaux euangeliques entre eux-mesmes, pour aduertir les Catholiques qu'ils regardēt de plus pres à leurs affaires, & qu'ils se donnent bien garde d'estre empietez par des esprits si superbes, inconstans & seditieux.

En cest an le Roy Henry d'Angleterre se monstra fort insolent,

solent, en ce qu'il feit des cendres & ossemens de S. Thomas martyr, en son viuant Archeuesque de Cantorbie. Ia auoient coulez plusieurs siecles, depuys que son corps auoit esté posé en vne chaste fort pretieuse, & estoiffée richement en or & pi-
Le Roy d'Angle terre brusle les cendres de S. Thomas de Cantorbie.

errerie, & estoit fort celebre la memoire de ce S. martyr, pour plusieurs & grandz miracles faictz à son tombeau par la puissance de Dieu. Ceste chaste estoit embellie de pierres lesquelles on ne scauroit nullement priser, & y en auoit qui estoient plus grosses qu'un œuf d'oye, lesquelles les Roys auoient là enuoyées, pour exorner les reliques du martyr. Mais le Roy Henry instigué de ce faire par le conseil de ie ne scay quelles gēs, ne se contenta pas d'auoir denué ce monumēt d'or & de pier-
 rerie, mais, qui plus est, il feit brusler les sacrées reliques de ce saint. En quoy c'est chose trop certaine qu'il n'a aucunement endommagé ce tres-saint martyr, mais c'est bien vn grand cas & tres-absurde, que ce Roy qui vn peu deuant auoit souste-
 nu par ses escritz la foy catholique, ayt esté tellement enchan-
 té & seduit, qu'il aye ietté au vent les reliques d'un Saint, qui enuiron quatre cens ans auparauāt auoit enduré la mort pour la foy & pieté. Combiē que cela est assez coustumier aux Lu-
 theriēs & autres telz heretiques, les temples desquelz ne sont pas beaucoup differens de quelque repaire d'animaux, ou de lieux desers & redigez en extreme solitude: ce qui signifie, que si en peu de temps nous ne nous tournons à la misericor-
 de de Dieu, tout son hōneur & seruice sera effacé en l'Europe.

COMME le Pape Paul pour certaines causes & raisons à ce le mouuans, eust ordonné que le Concile seroit tenu non point à Mantoüe, (lequel lieu auoit auparauant semblé estre le plus commode) mais à Vicence, Luther diuulgua certains articles, lesquels il entendoit estre proposez au concile en son nom. Mais ils estoient si detestables & absurdes, que plu-
 sieurs prioient à mains iointes les Alemans, que telz articles ne fussent veuz ny ouïs, sinon qu'ils voulussent rendre la na-
 tiō d'Alemaigne ridicule & ignominieuse à toutes les autres, veu mesmement que plusieurs d'iceux estoient opposez à la confession d'Ausbourg. Combien doncques que ce soit into-

Fff.j.

*Les arti-
cles que
Luther
voulut pro-
poser au
concile.*

lerable d'auoir double opinion en ce qui concerne la religion, & nyer tantost ce que vous auez approuué, & puy approuuer ce que vous auez nyé : toutesfois cela ne semble point laid ny deshonneſte à Luther & ſes compagnons, voire au contraire ce leur eſt choſe ordinaire & ſolemnelle, comme leurs eſcritz en font foy : quoy que le ſimple & ignorant peuple ne le puiſſe pas apperceuoir.

Les monaſteres deſtruits en Angleterre.

EN ce temps les monaſteres furent pilléz & ruinez par toute l'Angleterre, & furent contrainctz les pauures religieux de changer leur habit : pareillement pluſieurs grandz Seigneurs furent mis à mort, pourautant qu'ilz ne vouloient conſentir au malheureux & inique edict du Roy. Or a eſté beaucoup de ſang eſpandu en ce calamiteux Royaume, & quelques ſectaires compilerent vn martyrologe, où ilz enregiſtrèrent la vie de ceux qui furent punis comme heretiques, ſoubz la Royné Marie, de laquelle nous parlerons cy apres. Mais qui ſera ſi fol, qu'il vueille appeller martyrs de noſtre ſeigneur, qui eſt la verité meſme, ceux qu'on fait mourir, non pas pour leur pieté, mais bien pour leur doctrine pernicieuſe, à fin que d'icelle peſte ilz n'infectent le reſte du troupeau ? Vrayement nous voyons aujourd'huy à noſtre damp, que bien mal nous eſt aduenü de n'auoir puny les heretiques au commencement, comme la raiſon le requeroit. Car quelz monſtres d'heresies ſçauriez vous excogiter, qui ne ſe trouuent preſentement ? Il n'y a riē plus certain, qu'au païs de Lituanie y a pluſieurs Arriens & Neſtoriens, qui ont occupé maintes Eglises, quoy que ce ſoient hommes execrables & athées, comme ceux qui appellent la Sainte Trinité Cerberus ou bien chien à trois teſtes, & n'appellent plus le ſymbole d'Athanaſe mais Sathanaſe, & autres ſemblables blaſphemes. Vous voyez doncques que ſi on euſt faiſte bonne punition de ces gens au commencement, le mal ne ſe fuſt pas tant augmenté, comme ainſi ſoit que maintenant vous n'y ſçauriez apporter aucun remede.

Barberouſſe perd ſes gens ſur mer.

EN ceſt an Barberouſſe perdit beaucoup de vaiſſeaux ſur la mer, & y perirent vingt mille hommes des ſiens, leſquelz

il conduisoit pour venir chocquer à l'encontre de nous. Ses galleres furēt brisées par vne tempeste & orage de mer qui se leua & les ietta aux rochers qui sont sur la coste de la mer dictz anciennemēt Acrocerauniés, * & eussiez veu vne infinité <sup>* Main-
tenant les
monts de
Cimeri.</sup> de pieces de ces vaisseaux rompus, que la mer auoit iettées sur la Dalmatie. Cela aduint vn peu apres que le Pape Paul, & l'Empereur avecques les Venitiens, dresserent vne fort belle armée sur mer à l'encontre de ce Barberousse, en laquelle estoient capitaines generaux André d'Orie, & Vincent Capelli Venitien. Ceste armée estoit de plus de deux cens cinquante nauires, tellement qu'on ne se souuiēt gueres de plus belle flotte, que les Chrestiens ayent faiēt en celle mer, qui est entre Sicile & Candie, si que Barberousse mesmes, qui estoit vn des plus hardiz & vaillans de son temps, la craignoit beaucoup. Mais tout alla mal, pourautant que les Venitiens ne vouloient pas auoir les Espagnolz en leurs galleres, & d'autre part André d'Orie ne se vouloit pas fier aux vaisseaux des Venitiens: combien que les Venitiens en attribuēt la faute à quelque autre chose, comme font coustumierement ceux qui ont mal faiēt leurs besongnes. Tant ya que sur cest estrif se leua vne grosse tempeste, & tous les nostres furent contrainctz de se sauuer à force de ramer, pendant que Barberousse les talonnoit de pres en se moquant d'eux, comme ainsi soit, selon qu'aucuns afferment, que les nostres eussent peu entierement deffaire toute l'armée de Barberousse. Aussi ayans vn peu repris leurs espritz delibererent d'assaillir viuement Barberousse par quatre endroictz, mais pource qu'ilz s'alentissoient trop en cela, Barberousse trouua moyen de se retirer tout coy au goulphe Ambracien. Voyla l'ignominie que reçurent les Chrestiens pour lors, ayans perdu si belle occasion de bien faire, voire mesme n'ayans douté de fuyr laidement. Toutesfoi comme ie vien de dire, peu apres les Turcz firent merueil leuse perte de leurs galleres, & n'ya point de doute que Dieu ne fait cela pour ayder aux Chrestiens. Combien que Solyman eut bien tost réparé ceste perte, faisant en vn moment vne aussi belle armée qu'estoit la precedente, & s'eslouyssoit

L'AN M.D.XXXVIII. HISTOIRE DE TOUTES CHOSES
au possible dequoy son Barberouffe auoit chassé les nostres
de toute la mer, quoy que ses forces ne fussent à comparer
aux leurs.

*Vistors ter-
ribles.* EN plusieurs lieux d'Allemagne furent veuz en cest an
des hommes armez en l'air, & fut veüe aussi vers la partie d'O-
rient vne estoille de grâdeur espouuentable, laquelle espan-
doit des rayôs sanglans, & iouxte icelle l'on voyoit vne croix
sanglante avec vn estandart voletant parmy l'air.

A v commencement du moys d'Octobre, le Roy de Frâ-
ce alla trouuer Madame Marie, Gouvernante du païs bas &
sœur de l'Empereur, à Cambray, & sortans de celle ville en
grand' pompe & magnificence, vindrent à Saint Quentin: &
par tout où passoit la Royne elle estoit receüe avec vn fort
grand appareil. Seize iours estans passez, elle s'en retourna en
De Milan Hainaud par vn autre chemin. Le Roy François feit tout ce
qu'il peut pour recouurer le Duché de Milan, mais l'Empe-
reur fin & prudent n'y voulut oncques consentir, craignant
que s'il augmentoit les forces des puissans Roys de France en
leur donnant ceste domination si grande en Italie, ils ne se
contentassent de cela. Aucuns disent que l'Empereur se mon-
stroit si opiniastre à rendre le Duché de Milan aux François,
pour vne conuaitise qu'il auoit de regner par toute l'Italie:
mais ilz sont assez temeraires de dire cela, veu que peu d'an-
nées auparauant, il auoit bien rendu le mesme Duché, qui luy
auoit tant cousté à subiuguer, à François Sforce, estant seule-
ment prié de ce faire par le Pape Clement. Voyre mesmes ré-
dit-il Florence à Alexandre de Medicis, laquelle pourtant il
auoit reduyte en son obeïssance.

PENDANT que le Pape, l'Empereur & le Roy François
estoyent à Nice, Ioachim Electeur de Brandebourg mada par
*Nouvelles
des Turcs.* vn sien Ambassadeur à l'Electeur de Saxe, que sans faute il a-
uoit reçu nouuelles, comment le Turc venoit assaillir l'Alle-
magne, & que mesmes le grand Seigneur l'auoit ia signifié au
Vayuode. Au moyen dequoy il le prioit d'auiiser tous les moy-
ens qu'il vouldroit pour faire paix ensemble, & qu'au reste il
feroit tant, que le Roy Ferdinand moyenneroit leur accord

avec l'Empereur. Ce prince de Brandebourg auoit tellement embrassé la doctrine de Luther, que ce neâtmoins il retenoit plusieurs ceremonies Ecclesiastiques, & pource qu'il estoit desirieux de faire seruice à l'Empereur & au Roy Ferdinād, il n'auoit iamais voulu estre de la ligue faicte à Smalcalde. Sa femme estoit la fille du bon & catholique Roy de Poloigne Sigismōd, laquelle iusques aujourd'huy a retenu la religiō catholique sans nullement varier. Si communiqua l'Electeur de Saxe ces affaires au Lantgraue, & d'un commun accord respōdirent au Duc de Brādebourg, que veritablement ilz voyoiēt bien qu'il falloit aller au deuant du Turc, avec les plus grandes forces qu'il seroit possible: mais neantmoins qu'ils ne voyoient point comment cela se pourroit faire, si au preallable ils ne faisoient vne bonne & seure paix tous ensemble. Or fondaient ilz ceste paix, en ce que la chambre imperiale n'auroit que voir sur eux en matiere de religion, en laquelle ilz vouloient que fust compris le rauage & pillerie des biens Ecclesiastiques, & que ceux qui apres la transactiō faicte à Noremberg estoient venuz ou viendroiēt à eux, pourroient iouir de ceste paix, & mesmes le Roy de Dānemark, qui n'estoit point des subietz de l'Empire. Ce qui estoit fort preiudiciable aux Catholiques: & ce nonobstant si on ne leur concedoit cela, ils ne feroient pas vn pas pour repousser le Turc qui aprochoit. Puy apres on aduertit tous ceux de la ligue de Smalcalde, q̄ au 24. iour de Iuillet ilz se trouuassent tous à Isenac. Où se trouuerent les Ambassadeurs, & non pas les seigneurs mesmes, & toutesfois ilz requirēt le mesme qu'auoiēt faict les Seigneurs, dont plusieurs se rengèrent de leur party. Les confederez de Gossaire auoiēt quelque cas pour lors à desmesler avec Héry Prince de Brunswic. Parquoy requirent les deputez des confederez, que le Roy Ferdinand demanderoit mandement à l'Empereur, par lequel le Prince Henry seroit contrainct de comparoir au iugement, cōbien que tous ceux cy ne vouloiēt pas que les Catholiques poursuyussent leur droit au grād cōseil de l'Empire. Et de faict les confederez de Gossaire adioustoient plusieurs menaces, si on leur refusoit ce qu'ils de-

*Les hereti-
ques d'Alle-
magne ne
sçauoient
faire paix
entr'eux.*

L'AN M.D.XXXVIII. HISTOIRE DE TOUTES CHOSES

mandoient. Voyla la misere en laquelle pour lors estoit plongée l'Allemagne, qui est certes plus digne d'estre pleurée, que d'estre escrite. Vn des plus forcenez ennemys que iamais les Chrestiens sentirent, asçauoir Solymán, menaçoit l'Allemagne : & neantmoins plusieurs estoient opiniastrés iusqu'à là, que si l'Empereur ne leur accordoit ce qu'ils demandoient, ils ne se soucioient pas beaucoup du ioug du Turc, attendu que par leurs seules forces il estoit impossible de faire teste à vn si puissant ennemy, qu'est le Turc.

*Le secre-
taire d'Hé-
ry de Brū
suit, pris,
& ce qui
en aduint.*

Le penultime iour de Decembre le Lantgraue de Hesse allant à la chasse pres la ville de Cassel, rencōtra sur le chemin le secretaire d'Henry de Brunswic, qui n'estoit de la ligue de Smalcalde, à cause qu'il estoit Prince Catholique: & si tost que le Lantgraue eut entendu que ce secretaire appartenoit à Hé-ry, il ne faillit pas de l'emmener prisonnier à Cassel. Or portoit le secretaire les lettres que son maistre escriuoit à l'Archeuef-que de Maience, & à Helde Ambassadeur del'Empereur, lesquelles le Lantgraue ouurit, & les leut: ce qu'il feit aussi de quelques memoires, retenant tousiours le secretaire en prison. Le demande maintenant si c'estoit faire tour de Prince, en commettant vn tel acte. Tant y a que ceste aduenture fut cause, que premierement Henry souffrit beaucoup de trauerses & mesaises, mais peu apres aussi le Lantgraue en eut bien sa part, à cause que cecy seruit d'allumettes pour enflammer les espritz de ces Princes, combien qu'il y auoit encore d'autres causes. Fut cause aussi, que Henry fut prins premierement par le Lantgraue, mais par-apres le Lantgraue fut contrainct non seulement de laisser aller Henry, ains encores aller en prison en sa place. Que si quelcun desire sçauoir qui estoient ceux qui seruoient d'esguillons à tant d'inimitiez & de-
batz, lesquels ont esté entre les Seigneurs d'Allemagne souz ce mal-heureux Euangile de Luther: ie respondz que c'estoient messieurs les predicans Lutheriens, lesquels se couvrans du voile de l'Euangile ont persuadé maintes choses à leurs Princes, contreuenantes totalement à la parolle de Dieu.

*Les mini-
stres so-
cause des
partialitez*

CESTE année alla de ce siecle en l'autre Madame Isabeau femme de l'Empereur Charles, durant qu'elle estoit en ges-^{Trespas du Duc de Gueldres.} ne: car elle rêdit bien son fruit, mais il ne vescu gueres apres. Alla aussi de vie à trespas Charles Duc de Gueldres, bon Catholique, auquel succeda Guillaume Duc de Cleues, mais peu heureusement, comme les occurrences des affaires le firent sçauoir. Les François s'efforcèrent de le tirer à leur cordelle, à fin que l'Empereur eust cest ennemy en barbe pres de ses païs, mais Dieu conduisoit si bien l'affaire, que le Duc prenant meilleur conseil se reconcilia avec l'Empereur, (comme il sera dit cy apres) lequel il auoit offensé, tât par-ce qu'il auoit occupé le païs de Gueldres, que pour s'estre allié avec les François.

L'AN 1539. les Protestans s'assemblerent à Francfort, où l'Empereur leur donna treues pour quinze moys: & fut ordonné d'auantage, que des deux costez seroiēt deputez quelques hommes doctes & bien entenduz, qui parleroient ensemble de tout le different qu'on auoit. Maintesfois tels colloques se sont faits, mais il n'en y a eu pas vn, l'issuë duquel ait profité en rien, à cause que les sectaires estoient trop opiniaftres, & que les Catholiques ne leur pouuoient rien cōceder au preiudice de ce que tient l'Eglise. Or ne se faut esmerveiller, si lors & quelques autres fois le bon Empereur a dissimulé beaucoup de choses enuers les Protestans, à cause qu'il n'y auoit presque autre ordre ny moyen de les tenir en leur deuoir. Car non seulement les forces des Protestans estoient augmentées par la ligue de Smalcalde, mais encores il sembloit, que par les seditieux escripts & sermons de Luther & ses ad-^{Pourquoy l'Empereur donna Treues.} herans ils eussent esté poussez iusqu'à là, que si l'Empereur ne leur octroyoit leurs requestes, ils estoient prests d'attéter quelque cas. L'Empereur n'estoit pas totalement desnüé de forces, mais il auoit tant à quoy les employer, & contre le Turc & cōtre les François, qu'il ne pouuoit mieux faire avec les Protestans: quelque marrisson qu'il eust de veoir, que la paix d'Allemagne estoit ainsi troublée par vn tas de flagorneurs, & predicans ignorans-superbes. Entre autres choses que l'Electeur

de Saxe protesta en ceste iournée, ce fut, qu'il ne recognoist point le Roy Ferdinand pour Roy des Romains: tant estoient toutes choses troublées en Alemaigne, à la suscitation de ces faulx prophetes, que se iouioient à leur plaisir des Princes de leur ligue. D'auantage les Princes se portoient des rancunes & dents de laiët les vns aux autres, toutes causées pour le fait de la religion: si bien que les forces d'Alemaigne iadis redoutables à toutes les nations, & pour lors si miserablement diuisées, estoient en peril euident d'estre entierement rompues, si Dieu n'eust en cela vsé de sa misericorde ineffable, pouruoyant aux affaires de ce monde. Car il en y auoit tousiours quelques vns, & encor' en y a de present en Alemaigne, qui abhorrent merueilleusement les sectes, ny ne sont pas si legers, qu'ils vueillent faire banqueroute à la religion, laquelle a duré en Alemaigne si pacifiquement par plusieurs siecles.

Debats & rancunes entre les Princes. LE vertueux & illustre Prince George de Saxe rédît ceste année l'esprit à Dieu, lequel auoit esté maintesfois molesté & iniurié indignement par Luther, sans que le pandard en fust puny. Ce Prince estoit de l'estoc des vieux Alemans, homme preux, qui ne peut oncques estre esbranlé de la religion de ses deuanciers, & qui tousiours a esté affectionné à la maiesté imperialle, digne certes pour plusieurs raisons d'estre haultloüé à tousioursmais. Et pourautant qu'il mourut sans hoirs, sa mort apporta grand dommage à la religion Chrestienne: entant qu'il auoit ordonné par testamēt ses heritiers estre son frere Henry, & Maurice & Auguste enfans d'iceluy, souz condition qu'ils ne changeroient la religion. Laquelle condition fut enuoyée à Henry par quelques vns, mais tandis le bon Prince trespassa, tellement que de ce pas Henry faist toutes les places de son frere decédé, & apporta quant & quant la poison Lutherienne en tous les lieux de Misne, Thuringe, & Saxe, lesquels le Duc George auoit seigneuriez. Car, comme cy dessus a esté déia dit, les Lutheriës auoient charmé ce Prince de leurs enchantemens. Cestuy par-apres eut pour successeur Maurice, & Maurice Auguste, cōme vous verrez en son lieu. En la ville de Misne iour & nuict on chantoit sans cesse prieres

Trespas de George de Saxe.

Henry Duc de Saxe, Lutheriën, luy succede

Mutation de religion à Misne.

prieres & louanges à nostre Dieu, estans diuerſes heures instituées pour psalmodier en ceste Eglise cathedrale, & à vn singulier exemple de deuotion: mais alors ce seruice continué par noz ancestres à l'honneur de Dieu, fut presque tout aboly, si que vous n'eussiez gueres bien cogneu l'ancienne Eglise Catholique. Ce que les Princes faisoient à l'instigation des predicás, pour ce que la vertu engrauee és espritz des Seigneurs Alemans n'eust oncques permis autrement de ce faire: combien qu'il ne falloit pas qu'ilz innouassent rié en choses si graues de leur autorité priuée, ains deuoient avec vne longue deliberation & exacte iugement attendre le consentement de la Chrestienté. Ce n'estoit pas assez que Luther leur dist, que cela & choses semblables pouuoient estre faictes selō la parole de Dieu, veu que ceste est la coustume de tous heretiques, que quelques absurdes & detestables que soiēt leurs erreurs, ils les afferment neantmoins estre conformes à la parole de Dieu: mais plustost il leur falloit attendre la sentence de l'Eglise vniuerselle, ce qui eust esté infiniment plus séant aux Princes & à tous les magistratz de l'Allemaigne. Or apres que le Prince Henry se fut emparé de toutes les terres de son feu frere, il manda venir Luther à Lipsie, où alla vn grand es-
Lipsie des
bauchée
par les mi-
nistres.
soin de predicantereaux avec le patriarche Luther, sortys d'un mesme receptacle. Lesquelz se meirent à prescher leur euangile qui deça qui delà, & à desbaucher ce peuple, que le Prince Catholique auoit retenu si longuement en la religion Catholique. Ceste ville de Lipsie est petite, mais gentille & bien troussée, renommée par ce qu'elle est marchande, & que lon y veit à fort bon marché, & encores à cause qu'elle est fort commode aux estudians en l'vniuersité qui y est. Vne chose la descrie, c'est que l'Euangile de Luther y regne, non pas toutesfois Lutheriennement, pour autant qu'ils ont quitté en partie ce qu'il a enseigné: & partant quelques Catholiques les ont appelez les doux Confessionistes, cōme les autres les Confessionistes roydes, à sçauoir ceux qui voudroient pour mourir defendre tous dictz & faictz de leur grand maistre Luther, tant forz & absurdes puissent ils estre, lesquelz pour ceste

occasion blasonnent tant qu'ilz peuuent ceux de Lipſie , qui ont abandonné Luther.

Icy Sleidan est refusé de plusieurs points de la religion.

SLEIDAN eſcrit que Luther compoſa ceſte année vn liure des Conciles & de l'Egliſe , auquel il monſtroit entre autres choſes que les Canons que nous diſons des Apoſtres portoient vn faux tiltre. Je ſçay bon gré à Sleidan , qui nous veut donner vn grand coup à tout l'autorité de Luther, lequel n'a pas reietté ces Canons ſeulement, mais bien encore pluſieurs liures de l'eſcriture ſaincte. Que ſi Sleidan faiſt ſi grand cas de l'autorité de Luther, ie le voudroy prier qu'il aduiſaſt ce que Luther a opiné des Zuingliens , & qu'il endure d'eſtre moqué de luy, veu qu'il eſt du nombre . Mais il ſe garde bien de toucher iamais mot de cela , tant il eſt meſchant . Le meſme allegue choſe par trop ridicule , que Luther au meſme liure a eſcrit quelque cas des opinions contraires, que les Docteurs, aſçauoir Sainct Auguſtin & Sainct Cyprian, ont eûs touchât le baptême. Mais qui a iamais nyé , que Sainct Cyprian n'a pas tenu telle opinion , que l'Egliſe Catholique tient du baptême ? Si eſt-ce que ce-pendant Sainct Cyprian , martyr treſſainct, ne reiettoit perſonne de ſa ſociété, quoy qu'il fuſt d'opinion differente , dont appert qu'il ne vouloit ſouſtenir ſon opinion par opiniſtreté . Je voudroy bien encore ſçauoir, pourquoy Sleidan diſt que Luther a eſcrit ceſte ſentence de Sainct Cyprian , contraire à celle de l'Egliſe Catholique . Ie me doute bien que par cela il veut qu'on prefere Luther à tous les peres, à cauſe que Sainct Cyprian a ſon opinion differente de celle des autres. Mais ſi cela eſt la raiſon pourquoy il faut moins attribuer aux Anciens , combien moins deuons nous attribuer à Luther ? ains encore, combien le deuons nous ſiffler, & cracher contre luy, veu qu'en choſes de grandiffime conſequence il eſt different avec ſoy-meſme ? Sleidan adioute d'auantage, que Luther recite en ce lieu là les quatre Conciles generaux ſi celebres en l'Egliſe . Neantmoins il n'y a ſi aſne qui ne puiſſe iuger , combien peu de conte Luther & ſes complices ont faiſt d'iceux meſmes Conciles generaux , ſ'il feuillette tant ſoit peu leurs liures. Car, pour dire en vn mot, il

n'y a Concile si sainct, que ceux-cy ne reiettent planieremēt, si l'n'est d'accord avec leur heresie. D'abondant Sleidan recite du mesme liure de Luther, combien les tenebres ont esté espesses souz les Papes de Rome, combien la religion a esté denigrée & enlaidie, & qu'on en estoit venu iusqu'à là, qu'on estimoit la robbe d'un moine proffiter beaucoup pour acquerir le salut eternel. Mais il y a bien autre chose: les miserables hommes experimentent par trop, combien espesses tenebres Luther a apporté avec tous ses adherans, à cause que maintes-fois le meschant a changé ses paradoxes: & a tant fait par ses escrits & par ses predications, que personne ne doutera maintenant de vendre au peuple ce qu'il aura songé vne nuict, pour le vray Euangile: & si amenera force passages de l'escriture, à laquelle seule Luther attribué autorité: de maniere que nous sommes venuz à ces termes, qu'il y a presque autant de sectes que de testes, & que de iour à autre le pauvre & ignorant peuple est precipité és plus miserables heresies du monde, bien qu'elles soient repugnantes à elles mesmes. *De censé qui ont pris à leur mort l'habit de S. François.* Je ne me soucie point de ce que Sleidan adioust, que quelques vns se sont faitz enterrer avec vn habit de cordelier. Rodolphe Agricole l'a fait, & a eu pour compaignons en cela Albert le Pie Prince de Carpy, & Chrestofle Longœil, personages de singuliere erudition. Que filz ont esté dignes de reprehension, (comme Sleidan pense qu'ilz sont) pour autant que, conduictz d'une bonne affection, ils ont voulu mourir en cest habit, non pas qu'ilz estimassent qu'iceluy seul les guindast au ciel, ains pour satisfaire à leur deuotion: combien plus devons nous reprendre Luther avec toutes ses bendes, considéré qu'ilz ont ietté leur froc aux horties, & se sont depouillez de toute honte & religion, dont ilz auront leur damnation certaine, à cause qu'ilz ont rompu leur premiere foy: La posterité croira aysement que plusieurs, prochains de leur mort, ont prins l'habit de Saint François, & ont voulu estre enseuelis avec iceluy, quoy que Sleidan pense q'iamais homme ne le pourra croire: mais à peine se pourra elle persuader, que quelques apostats les plus meschans du monde ayent peu

si bien tordre le nez aux hommes, que facilement ilz ont creu que tout ce qu'ilz gazouilloient, quelque absurde & impie qu'il fust, estoit le pur & vray Euangile. Car à la verité cela est si detestable, que iamais hōme ne le pourra assez admirer, ny deplorer assez. Mais ie m'en tairay à tant, à cause que paraduventure nous en dirons d'auantage à meilleure opportunité.

*Le Roy
d'Angle-
terre cōtre
le Pape.*

C E S T E année le Roy d'Angleterre publia certain escript, auquel il se moque du S. Pere, qui alors auoit assigné le Concile à Vicence, chose certainemēt des plus agreables que peuvent receuoir Luther & ses partiaux, tant qu'ilz sont. Car quel que cas qui aduint au Pape, moyenant qu'il soit à son deshonneur, ceste peste d'hommes le trouuoit le meilleur du monde: de maniere que tous ceux qui viendront apres nous considerans ceste peruersité, pourront conclure en bōne consequence, que telz hommes, qui ne cessoient d'agiter le souuerain pasteur de l'Eglise de nostre Seigneur, estoient menez d'un esprit Satanique. Mais pour donner contrepoix à ceste trop grā de liesse des Lutheriens, le Roy d'Angleterre considerant à par soy quelque peu apres les troubles, scandales, & seditions, qui germoient quant & le nouveau Euāgile de Luther en son Royaume: (car iceluy est tousiours accompagné de ces choses, si bien que en peu de lieux a-il esté receu sans trouble & sedition) & se faschant de veoir les choses aller si mal, fait tenir

*Estatz tenus en
Angleterre, où furent
decis six
pointz de
la religion
Catholique-
ment.*

les Estatx, qu'ilz appellent Parlement: où furent mises six questions sur le bureau, pour pacifier tous les differens sur le faict de la religion, desquelles a esté escript aux actes publiques ce qui s'ensuit: Finalement apres auoir longuement deliberé sur ces articles, apres maintes consultations, apres infinis argumēs amenez de tous costez, fut alors, & est maintenant, resolu, decisi & ordōné par le cōsentement vniuersel de la maiesté, des deux Ordres des Senateurs, & du peuple congrege à ces Estatx, en telle forme & maniere que s'ensuit. Premieremēt, Au saint sacrement de l'autel souz l'espece de pain & de vin est le naturel corps & sang de Iesus-Christ, conçu de la vierge Marie, ce qui se faict par l'efficace de la toute-puissante pa-

rolle de Dieu, si tost que le prestre l'a proferée sur les especes:
 & apres la consecration faicte il n'y a substance ny de pain ny
 de vin ny autre quelconque, sinon que la substance de Christ
 Dieu & homme. Secondement, Par droict diuin il n'est point ^{2.}
 necessaire à salur que tous hommes cōmunient souz les deux
 especes, & faut croire sans douter nullement, que le vray sang
 est avecques la chair souz l'espece du pain, & q la vraye chair
 est aussi avec le sang souz l'espece du vin. Troysiesmement, Si ^{3.}
 tost qu'un prestre est cōsacré aux Ordres, le droict diuin l'em-
 pesche qu'il ne se puisse marier. Quatriesmement, les vœux de ^{4.}
 chasteté ou viduité, que ou un hōme ou vne femme ont faits
 meurement à Dieu, doyuent estre obseruez par droict diuin,
 & iceux vœux les priuent de quelque liberté du peuple Chre-
 stien, de laquelle ilz pouuoient iouir à leur ayse, deuāt que de
 vouër. Cinquiesmement, il est bon, & si est necessaire, que les ^{5.}
 Messes priuées soyent celebrées en l'Eglise & congregation
 d'Angleterre, par lesquelles Messes les bons Chrestiens, viuās
 conformement à leur nom, reçoient grandz biens, consolations,
 & benefices de Dieu: bref, il appert par le droict diuin
 qu'il faut celebrer la Messe. Sixiesmement, il est expedient & ^{6.}
 necessaire, que la confession auriculaire soit retenuë en l'Egli-
 se de Dieu. Au moyen dequoy par l'autorité de la Maiesté *Catholi-*
 Royale, & par le consentement general des deux Ordres des *que Edict*
 Senateurs, & du peuple congrege à ceste assemblée, a esté fai- *du Roy*
 ctel'ordonnāce en la forme que s'ensuyt: Quiconque, ou en *d'Angle*
 ce Royaume d'Angleterre ou en quelque autre lieu des appar- *terre.*
 tenances du Roy, oséra depuys le 12. iour de Iuin prochaine-
 ment venāt prescher, enseigner, dire, affermer, declarer ou dis-
 puter autrement que cy dessus est dict, soit par parolle, soit par
 escript, soit en imprimant, soit en faux caracteres, ou en autre
 sorte quelconque, sçache que le Roy a ordonné & ordonne
 gros supplices contre ceux là, & cōtre ceux qui leur porterōt
 ayde & faueur par conseil, par effect ou autrement. Voyla ce
 qui aduint outre tout espoir qu'eust ou Luther, Pape de Saxe,
 ou tous ses partiaux forgerons du nouveau Euāgile, Dieu ne
 leur voulant pas lascher par trop la bride: comme iadis il con-

*Puissance
donnée aux
heretiques
pour nous
tourmenter.*

stitua certains limites à Satan qui tourmentoit le bien-heureux Iob, lequelz il ne pouuoit ny ne deuoit aussi outre-passer. Car c'est chose trop certaine, que Luther & toutes les troupes des nouveaux dogmatifans, ont par la permission diuine receu la puissance de vexer l'Eglise Catholique, mais neantmoins à certain temps: aussi n'ont ilz encore peu, ny ne pourront cy-apres exercer telle cruauté qu'ilz souhaiteroient bien. Et à la mienne volôté que les Catholiques corrigeassent leur vie: ie suis assuré q la puissance à eux donnée pour nous chastier, ne dureroit gueres de temps.

*Trouble à
Gand.*

C E S T E année suruint vn gros trouble à Gand, ville fort belle en Flâdres, & renommée par la naissance de l'Empereur Charles. Lequel trouble estât venu à la cognoissance de l'Empereur, qui alors estoit en Espagne, delibera de prédre la volte de ce sien país, de peur que par son absence les affaires n'épirassent. Et par-ainfi accompagné de bien peu de Princes, il

*L'Empe-
reur passe
par France
pour venir
en son país
bas.*

entra dans France par Baïonne. Car le Roy François l'auoit inuité par plusieurs Ambassades & missiues à prendre ce chemin, quoy que tous ses Conseillers ne luy cōseillassent pas de ce faire. Mais le bon Empereur ayant eu le saufconduict du Roy François, ne craignoit rien en ce long chemin: quoy qu'il ne fust sans peril. Car iaçoit que le Roy François ne portoit point d'inimitié alors à l'Empereur, toutesfois ce chemin ne luy pouuoit sembler que perilleux, pourautant que les hommes sont facilement esmeuz de ce qui se represente à eux facile. Or portoit-il en ce temps là des vestemens de dueil, & v-soit de cheuaux empruntez des François. Les Ambassadeurs de Madame Marie sa sœur, Regente au país bas, descourirét durant ces affaires, & non vne fois seulement, que l'Empereur tout couuert de vestemēs noirs prioit deux ou trois heures de nuit en sa chābre, les genoux en terre. Aussi aduint-il q Dieu le conserua sain & entier en vn si lōg traiēt de chemin, dont plusieurs estoient fort esmerueillez. C'est chose trop assurée, que lediēt Sieur pria à la façon sus-dicte durāt toute sa vie, en quelque temps & lieu que ce fust, & ce tous les iours. Car au matin il prioit enuiron deux heures, & autant le soir ou de

*Prieres
quotidiē-
nes d'ice-
luy.*

nuict. Quoy fait, il s'accoustroit, & alloit ouïr le matin la Messe. Mais nous en dirons ailleurs d'auantage. Pendant qu'il cheminoit à trauers le Royaume de France tirant droit la part où estoit le Roy, aduint que Mōseigneur Charles, Duc d'Orléas, ieune hōme fort accort, luy faulta derriere son cheual à l'improuiste. Quoy voyant l'Empereur le salua courtoisement, mais le Duc se meit à crier, rends toy prisonnier, Empereur, rends toy prisonnier. A quoy l'Empereur ne luy respōdit riē, mais seulement en souz-riant le regarda d'un œil ioyeux & debonnaire, tellemēt que tous deux monter sur vn mesme cheual arriuerent au lieu, où estoient assemblées les Princeses & Dames de France. Lors l'Empereur salua en passant Madame Eleonor sa sœur, espouse du Roy François, & apres teint plusieurs propos avec Madame d'Estampes. Quelquefois il aduint que l'Empereur deuisant en vne assemblée, laissa choir en terre vn anneau qui auoit vne pierre de prix inestimable, & sans y penser, (comme aucuns estimoient) lequel la sus-dite Dame leua de terre, pour le rendre à l'Empereur: mais iceluy luy donna la bague par courtoisie. Durant tout le chemin que l'Empereur feit en France, le Roy François & les Princes de sa Cour le feirent honorer comme appartenoit à sa Maiesté, & ne laisserent espee de courtoisie qu'ils n'exerceassent à son hōneur, de maniere que par quelque temps il vſa de puissance Royale planieremēt. Neantmoins il ne fallut pas beaucoup, qu'il ne luy aduint quelque desconuenue à Amboyse & à Paris. Car à Amboyse il fut presque estouffé de la fumée du feu gregeois, qui estoit en trop grande abondance en l'escalier d'une Tour. Et à Paris tōba quelq̃ chose d'un plancher sur luy, & du coup le sang fortit. Le bon Roy François estant esmeu de ce, & ayant fait prédre ceux par qui telles choses estoient aduenues, les voulut faire mourir sans delay: mais l'Empereur ne le voulut oncques permettre, ains leur sauua la vie. Car oultre ce qu'il ſcauoit bien que cela n'estoit fait à esciēt, encore ne vouloit-il pas que son passage par France causast quelque defastre à personne. Et ne tarda gueres à mander à Madame Marie, sa sœur, les hōneurs qu'il auoit receuz par-my

*L'Empe-
reur biē se
ſtoyé en
France.*

L'AN M.D.XXXIX. HISTOIRE DE TOUTES CHOSES

la France, & la certiora aussi de ces aduentures fortuites, à fin qu'elle ne prestast l'oreille au bruit qu'on faisoit courir fausement de sa personne. Si se portoit le Roy François vn peu mieux alors que de coustume, quand à son vlcere: dont il vint iusqu'à Loches au deuant de l'Empereur, prest de donner Messieurs ses enfans, Henry & Charles, en ostage audict Sieur, en cas qu'il ne se voulust pas fier à luy. Mais l'Empereur ne voulut point d'ostages, & parainfi, comme dict a esté, fut receu honorablement & pompeusement par tout le Royaume, tellement que Messieurs les enfans du Roy le conuoyerēt iusqu'à Valenciēnes au sortir du Royaume, où Madame Marie, sœur de l'Empereur ne laissa sorte aucune de courtoisie, laquelle elle n'employa pour festoyer son frere, & Messieurs les enfans du Roy, en quoy elle vouloit faire apparoiſtre la grande & indicible bienvueillance qui estoit alors. Bref, il ne restoit à faire vne bonne, seure & ferme paix entre ces deux monarques Chrestiens, que pour le Duché de Milan, duquel le Roy ne pouuoit oncques retirer son affection. Dont est aduenu, que ces Roys, nourrisſans ceste diuision si fort engrauee pour Milan, le courage a creu aux Turcs plus que iamais, & les heresies se sont si fort multipliées qu'on n'en ſçauoit dire le nombre. Toutesfois personne ne doit reietter la coulpe de cela sur les Roys temerairement. Car c'est la diuine iustice, laquelle estant prououquée par noz pechez, permet que maintesfois telles dissensions & plusieurs autres maux sourdent pour iceux punir, à fin qu'estans chastiez, nous venions à nous recognoistre, & à mieux viure, si nous ne voulons estre fouëttez de fieux beaucoup plus aigres & pernicioeux. Dequoy nous auons assez d'exemples és saintes escritures.

Grāde abondance de vin. CESTE année fut si grande & excessiue abōdance de vin, que lon ne pouuoit auoir assez de vaisseaux, tellemēt que plusieurs feirent de grandes fosses enuironnées de tables bien proprement, & en icelles ils mettoient leur vin.

Prinſe de Castelno ue par les Turcs. ENVIRON le moys d'Aoust de l'année presente, les Turcs marchans souz le Capitaine Barberouſſe, prindrent par force la ville de Castelno ue en Dalmatie, non sans grande perte de leurs

leurs gens, à cause de la bõne garnison d'Espaignolz qu'il y auoit. Et faut entendre que les imperialistes s'estoient d'icelle emparez, en chassant les Turcs, dont Solymá mouroit de despit, & ne cessa iamais qu'il ne l'eut ostée des mains des Chrestiens: à quoy luy seruit, ce que quelques vns escriuēt, que certains fugitifz de la ville se retirans aux Turcs, leur declarerēt le plus foible costé de la ville. Les Turcs portent ordinairement des espées recourbées, à tout lesquelles ils mettent en pieces les morions & halecretz des nostres: mais le pis qui aduint alors aux nostres fut, qu'ilz ne se peurent seruir de la scopetterie, à cause de la grand' pluye qui tomba durant le conflict, & cependant les Turcs ne cessoiet de ietter flesches dru & menu contre les nostres, si que plusieurs Chrestiens finirent illec leurs iours. Certes c'est vn grád mal, que ces enragez Mahomeraïns nous pressent si fort: mais il faut confesser que noz vices nourrissent leur puissance. Neármoins ie veux bien vous aduertir, que la plus part des Espaignolz qui moururent celle iournée, auoient esté presens au sac de la ville de Rome, souz Clement 7. de façon que ceste desconfiture semble leur estre deuëment aduenüe.

*Deffailte
des Chre-
stiens.*

ON pensoit en ce temps-cy, que les Sacramentaires estoient d'accord avec les Lutheriens, veu les colloques & synodes bien souuent faietz à ceste occasion, & que mesmes apres iceux ceux de Zurich sembloient ne vouloir plus de mal aux Lutheriens, pour le grand silence auquel ilz viuoient. Mais voicy Luther qui va escrire vn liure des Peres & des Conciles, & à fin qu'on ne pensast iceluy auoir esté composé contre les Catholiques seulement, au mesme liure il asseure que Zuingle a esté Nestorien, chose à luy fort honteuse. Ie vous laisse maintenant à penser, quelle lieffe eurent les predicans de Zurich, voyans que Luther traitoit si reueremment leur grand Pontife Zuingle: au moyen dequoy ne voulans laisser passer cest affaire si doucement, escriuirent à Luther, le prians de se souuenir du dernier accord, & que desormais il ne dist chose preiudiciable de Zuingle: à quoy Luther ne respondit pas vn mot. Y eut-il dõcques iamais paix ferme & sincere entre ces

*Luther ap-
pelle Zuin-
gle Nesto-
rien.*

L'AN M.D.XXXIX. HISTOIRE DE TOUTES CHOSES

sectaires? on voit assez par cela que non. Ilz ne se soignoient pas à ce que la verité gagnast sa cause, ains ilz souhaitoient seulement qu'un chacun d'eux semblast auoir apporté quelque nouvelle doctrine au peuple, & que par ce moyen ilz fussent tenuz en honneur & reuerence parmy les hommes. Et delà vient, que comme quelques predicans de Saxe louangoient Luther, de sorte qu'ilz ne doutoient point de le parangonner à l'Apostre Sainct Paul, & disoient que tous autres annonciateurs du nouveau Euangile ne deuoient nullement estre comparez à cestuy leur Elie & Sainct Paul, adioustans à

*Caluin ne
peut endu-
rer que Lu-
ther soit
appelé E-
lie, gardant
cela pour
soymesme.*

cela que le Thrason Gauloys les auoit forcez ribon ribaine à louer si magnifiquement Luther: (entendans Caluin par le Thrason) Caluin ne peut iamais endurer que Luther allast deuant luy, si qu'il dict mille maux de ces beaux ministres de Saxe, escriuant cecy entre autres choses: Embrasser les vices pour la vertu, certes c'est signe de folie & d'une affection mal conduyte. Encor' est beaucoup moins excusable l'ardeur de leur zele inconsideré, entant qu'ilz corrompent sans aucune vergongne l'escriture sainte, pour exorner Luther des despouilles de Sainct Iehan Baptiste. Car combien qu'ilz admettent, que ce que Malachie auoit prophetisé de la venue d'Elie a esté accompli en S. Iehan Baptiste, neantmoins ilz veulent que celle prophetie s'entende de Luther, à cause qu'il a esté celuy Elie, par lequel toutes choses deuoient estre restituées: & que ce qui fut fait vne fois en la personne de Sainct Iehan, tant le prophete que Iesus-Christ mesme ont assez déclaré, deuoir estre reperé en Luther. Par laquelle fauceté ilz n'ont pas moins deshonoré Luther, que les Aegyptiens Ieremie, adorant son corps & son sepulchre. Que si nous concedions que Luther peut estre nommé Elie, si seroit-ce chose intolerable de dire qu'il a esté le dernier Elie, comme si Dieu n'auoit plus de puissance d'en faire encores vn plus excellent que luy, ou au moins esgal. En quoy Caluin monstre assez, qu'il veut estre plus estimé que Luther, sans que toutesfois le monde s'en apperçoie estant totalement enchanté. Et aduisez bien, que Sleidan (qui a cité plusieurs choses pour donner force coups de

fouët à l'Eglise, du liure faict par Luther des Cōciles & de l'Eglise) s'est donné garde diligemment de mettre en son liure, que Luther appelle Zuingle Nestorien, à cause que selon la bonne foy, qui le guidoit à escrire, il raise frauduleusement ce qui faict contre luy & ses semblables.

L'AN 1540. le Roy Ferdinand veint d'Austriche à Gand où estoit l'Empereur son frere. Y veindrent pareillement les ^{Ambas-} Ambassadeurs des Protestans, lesquelz, outre maintes choses ^{sadeurs des} par lesquelles ilz se parforceoiēt à se purger finement, & ^{Protestas} mettre toute la faute des troubles sur l'espaule des Catholiques, ^{à l'Empe-} n'eurent point honte de dire en la presence de ce Monarque, si grand zelateur de la religion Catholique, que Dieu auoit excité en cestuy nostre temps la cognoissance de son Euangile: comme si par tout le passé l'Allemagne n'auoit gousté tant soit peu l'Euangile, & que finalement quelques apostatz & moynes reniez nous le deussent enseigner. En mesme temps aussi les Protestans rescriuirēt lettres au Roy de France, pleines de fard & flatterie, desireux de gagner le cueur de ce puissant Roy pour l'auoir conioinct avec eux, si d'adventure l'Empereur vouloit les rengier comme il appartenoit. Lequel ayant ouy le narré des Protestans, respondit qu'il y aduiferoit. Or les ^{Demades} Ambassadeurs insistoient de rechef, à ce qu'il ne fust loysible ^{des Prote-} aux iuges de la Chambre donner sentēce au proffit de ceux, ^{stans.} qui se plaignoient auoir esté despoillez de tous leurs biens & richesses souz pretexte du nouueau Euangile: lesquelz plaintifz estoient alors formez bien souuēt par les Ecclesiastiques & religieux, & presentez à Messieurs de la Chambre. Car les Catholiques alleguoient, qu'à tort & sans cause on leur auoit pillé leurs biens: les Euangeliques repliquoient au contraire qu'à bon droit on y auoit proceddé, par-ce qu'il suyuoient vne doctrine fauce. Si n'estoit pas permis aux Catholiques en telle pitié que celle-la estoit, appeller au supreme iugement de l'Empire, ains il aduenoit que telle sentence estoit donnée, que les apostatz & moynes incestueusement mariez persuadoient à leurs magistratz, estre bonne & purement Euangelique. Ce que estant miserable & calamiteux à l'extremité,

L'AN M.D.XL.

HISTOIRE DE TOUTES CHOSES

toutesfois ainsi le portoit la pure doctrine du recent Euangile. Sur quoy l'Empereur estoit forcé de faire bonne mine à cause de la difficulté du temps, & que ses ennemys ne luy donoient gueres bon loysir de respirer. Neantmoins il assigna vne iournée Imperiale à Spire, laquelle toutesfois fut remise à Haguenau, à cause de la peste qui regnoit à Spire. Le Roy Ferdinand presida à la diette d'Haguenau, pourautant que l'Empereur estoit occupé grandement ailleurs. Les Lutheriens qui s'y trouuerent ne voulurent pas, que l'accord fait à Aufbourg entre sept collocuteurs d'une part & d'autre sur certains pointz, eust autorité. Demanderēt aussi qu'ilz peussent tenir vn colloque à Vvormes, ce qu'ilz impetrerent, mais en iceluy ne fut pas fait grand cas. Et environ cest endroict Sleidan insere en son histoire vn long discours des Protestans fait à Granuelle, comme aussi en d'autres endroictz il raconte plusieurs choses superflues, voire sottes & pernicieuses, iusqu'à ennuyer beaucoup le lecteur: de maniere qu'à bon droit quelques doctes ont dict cest apophtegme de son liure, à sçauoir qu'il y auoit beaucoup plus de choses hors propos, que à propos. Et quand à l'escrit duquel est question, il appert assez qu'il est sorty de la boutique des predicans & dogmatistes. En iceluy ces messieurs taschent de toutes leurs forces à desguiser leur cause par parolles fardées, & si dextrement, que vous ne penseriez pas que les ministres parlent, ains que ce soient les Princes & magistratz. Mais nous cognoissans bien le Lyon par l'ongle, voulons prendre la peine à leur donner sur les doigtz, sur ce qu'ilz touchent la dedans. Ilz disent que les Catholiques exercent cruauté & felonnie sur les pauvres innocens. Par lesquelz motz sans faire semblant de rien ilz accusent de cruauté l'Empereur, le Roy de France, & maintz autres Catholiques Princes, qui ont fait tresbien punir les heretiques, lesquelz ilz appellent hommes innocens. Nonobstant cela les Protestans mesmes, instiguez par leurs chefz & ministres, ont seuerement puni les Sacramentaires & Anabaptistes, lesquelz ne se iactoient pas moins de leur innocence, que les Lutheriens. Mais ie demande quelle est celle inno-

*Tournée
d'Hague-
nau.*

*Responce
aux poëtz
couchez en
l'escrit des
Protestans.*

cence, par laquelle ilz arrachent les hommes hors du corps de Iesus-Christ, sçauoir est l'Eglise Catholique, & les vont precipiter en erreurs, qui ne peuuent causer qu'une damnation eternelle? On prend gros suplice des Larrons, à cause qu'ils coupent la gorge d'un corps humain: sera-il donc dict que ces assassineurs d'ames demeureront impunis de leurs forfaitz? Ilz confessent qu'ilz sont soupçonnez, comme filz ne souhaittoient pas la reformation de l'Eglise, ains leur particulier proffit seulement: & que telles calomnies d'eux courent par toute l'Europe, à fin que la vraye religion & eux-mesmes soyent hays d'un chascun. Sur quoy on ne sçauroit assez admirer leur impudence. Car posé le cas que leur intention fust de reformer l'Eglise, ne deuoient ils pas demeurer en leurs monasteres? pourquoy donc ont-ilz tiré du milieu des enfers des erreurs pieça condamnez? pourquoy ont-ilz diuisé l'Allemagne si horriblement par les debatz touchant la religion? Neantmoins ils osent baptiser ces tenebres d'erreurs du nom de pure doctrine, ils osent aussi dire qu'ilz professent le nom & l'Euangile du filz de Dieu. Mais de peur qu'ils n'encourussent le bruiet d'impieté, à cause qu'ils ont laissé leurs monasteres, & qu'ils ont vsé de mariages incestueux apres auoir voué à leur Dieu continence perpetuelle, ilz appellent la vie monastique vne vie meschante & pharisaïque. Car ainsi falloit qu'ils parlassent, s'ils estoient desireux de faire trouuer bonne leur cause. Mais, ô predicans, la posterité aura ceste vostre impudence en abomination, dequoy non seulement vous n'avez voulu recognoistre vn si execrable forfait, ains encore vous vous en estes glorifiez. Tout ainsi que iadis Iulian l'Apostat ayant fait banqueroute à la religion Chrestienne, se voulât gaber des saintes lettres, * escriuit aux principaux Euesques qui fussent de son temps: i'ay leu, entendu, & condamné les escritures. Auquel les nostres respondirent: tu les as bien leuës, mais non pas entenduës: car si tu les eusses entenduës, tu ne les eusses pas condamnées. Comme donc cest atheïste se mocqtoit des diuines lettres, ainsi ces hommes innocens & beaux Euangelistes se gaudissent de la vie

*De la vie
monasti-
que.*

** Nice-
phore liure
10. c. 25.*

monastique, laquelle a esté admirée & honorée en l'Eglise chrestienne par tous les siecles passez, comme il est par trop notoire. Mais pourautant qu'ils auoient abandonné ceste sainte maniere de viure, ils ne pouuoient moins faire qu'en dire & en escrire tout le pis qu'ils pourront, au moins filz vouloient qu'on eust bonne opinion de leur faict. Le sçay bien que plusieurs leur prestent l'oreille, & confessent qu'ilz ont bien faict: mais neantmoins il n'y a homme qui sçeuft assez expliquer les esguillons, qui de iour & de nuict ne cessent de leur bourreller la conscience, quoy qu'ils n'en facent pas le semblant en la presence des hommes. Car ilz ne sont pas tant priuez de bon esprit, qu'ils ne sçachent bien, que tous les peres anciens amenans les lieux de l'escriture sainte afferment constamment, que les vœux de continence & autres bonnes choses faictz vne fois au Dieu eternal, doyuent necessairement estre accomplys, & que ceux doyuent estre estimez meschans & desloyaux, lesquelz apres auoir voué continence à Dieu, ne doutent de se coupler en mariage. Iceux, dy-ie, n'ignorent point cela, mais ils n'en font cas, tant leur opiniastrété est desesperée: de maniere que soy voyans auoir perdu le moyen de leur salut, filz ne se repentent, ne se peinent à faire autre chose, sinon que à desbaucher plusieurs, & les faire cheoir en mesme fosse. Parquoy il les faut euitier comme vne vraye peste, de peur que par leur contagion ils n'en infectent d'autres. Toutesfois on ne sçauroit iamais persuader cecy à ceux, les yeux desquelz ont esté si bien charmez par noz predicans, qu'ilz ne sçauoient apperceuoir leur meschanceté & ordure. D'auantage, combien est intolerable & impudent ce qu'ils disent és mesmes lettres, qu'ils n'enseignent rien contre la formule de l'Eglise ancienne, attendu que c'est chose trop certaine & cōuaincūe par les nostres, que au lieu de l'Euangile & parolle de Dieu, ils ne presentent aux hommes que des erreurs grossiers & iadis condamnez par l'Eglise? Ne se contentans encore d'auoir si vilainement menty, ils adioustēt de rechef vn si insolent & oultreucuydē mensonge, qu'il merite non qu'on luy responde, mais bien qu'on le chastie avec le

*Impudēce
des Pre-
sesans.*

fceptre, & avec l'autorité du Magistrat. On enseignoit en l'Eglise, disent-ils, fort froidement & obscurément le fait de Penitence: mais de la grace receüe par Christ, & de la remission des pechez, on n'en disoit pas le mot. En vne chose doncques si apertement faulce, qu'on la palpe facilement du doigt, que pouuons-nous faire autre chose sinon que deplorer la malice d'iceux, & nous doulloir du miserable aueuglement, auquel sont tombez ceux qui leur ont adiousté foy? Car qui pourroit remedier à des hommes, qui volontiers se laissent conduire és boubiers d'erreur? Qu'on lise seulement les liures des Docteurs Scholastiques, & on verra qu'ils ont tât parlé de la grace du Sauueur Iesus-Christ & de la remission des pechez, qu'il est impossible d'en dire d'auantage. Dont il faut necessairement conclure, que les ministres feignent cela & autres semblables choses pour desbaucher le peuple, non point par vne imbecillité de iugement ou ignorance, mais par vne propre & deplorée malice. D'abondant ils adioustent, que la Messe priuée est vne chose nouuelle, & controuuée partie par auarice & partie par ignorance. Lequel mensonge est autât ou plus insupportable que les precedens: & eux-mesmes confessent en leur Confession d'Ausbourg, qu'ils retiennēt & celebrent en grande reuerence la Messe. Car ils ne scauroient alleguer differēce qui leur profite, entre la Messe publique & la Messe priuée. Mais quelque chose qu'ils puissent dire, cela demeurera pour trop auéré, qu'ils sont vrayz hay-messes: sur quoy les Catholiques leur ont respondu assez abondamment, & plus que la difficulté ne requiert. Ces bonnes gens poursuyuans leur propos, disent, que par tout on voyoit les fautes & excès qui se commettoient, à cause que les prestres ne se marient point. Toutesfois l'Eglise Orientale & Occidentale ne permettoit point le tēps iadis, que les prestres fussent mariez. A quoy ie ne veux qu'alleguer ce que tesmoigne S. Hierosme en l'apologie à Pâmache, pour euitier prolixité: les Apostres, dit-il, ou ils ont esté vierges, ou continens apres auoir esté mariez. Les Euesques, Prestres & Diacres ou ils sont esleuz vierges, ou veufz, ou pudiques à tout iamais. Auquel tous les anciens

*Mensonge
encore plus
appert.*

*Mensonge
de la Mes
se priuée.*

*Du maria
ge des pre-
stres.*

Peres s'accordent. Mais aujourdhuy souz le nouveau Euan-
 gile, nous voyõs que tout est plein de de mariages incestueux
 contractez par moynes apostats, & nonnains abâdonnées au
 plaisir du monde. Et comme ainsi soit qu'ils disent, selon qu'il
 a esté veu cy-dessus, qu'ils n'enseignent rien contre la reigle
 de l'Eglise ancienne, ie leur demande quelle Eglise ancienne
 a oncques permis le mariage aux moynes & religieuses?
 Qu'ils oyent maintenant le canon 15. de ce grand Concile re-
 nommé & reçu par toute la terre, ie dis celuy de Chalcedon:
 Si quelque vierge ou moyne s'est consacré à Dieu, il ne leur
 est pas permis de se marier: que fils se marient aucunement,
 qu'ils soient excommuniez. Mais se voyans condamnez si e-
 uidément, ils ont plustost fait de reietter ce sacré canon d'un
 Concile general approuué par tous les siecles. Car par-apres
 on a veu certain escrit contre la continuation du Concile de
 Trente publiée par le Pape Paul 4. auquel les nouveaux Euá-
 gelistes afferment, que le Concile de Chalcedon a lourdemēt
 failly en interdisant le mariage aux religieux & religieuses: &
 en mesme lieu ils reprennent le premier & plus ancien Con-
 cile general de Nice, disans qu'en iceluy est vn decret des
 gens-d'armes opposé à la sentence de S. Iehan Baptiste. Et cō-
 me fils estoient quelques braues Censeurs, ils condānent d'v-
 ne temerité incredible plusieurs autres Conciles de l'Eglise
 ancienne, disans entre autres choses du Concile 3. de Cartha-
 ge, auquel S. Augustin lumiere des Docteurs asista, ce que
 voicy, sentant l'ordure de leur bouche: Le Concile 3. de Car-
 thage (car il ne faut pas lire le 5. auquel il n'est rien touché de
 cecy) a apporté en l'Eglise les sacrifices impies, les oblations
 & intercessions pour les trespassez. Où ces impies appellent
 les sacrifices impies, & consecutiuelement mentent à pleine
 gorge, disans que ce fut lors que l'on commença à sacrifier:
 lequel mensonge ie refuteroy facilement & volontiers, si le
 lieu le permettoit. D'auantage parlans du Concile Mileui-
 tain, auquel pareillement ce grand Sainct Augustin fut pre-
 sent, ilz disent qu'en iceluy fut ordonné, qu'estant aduenu di-
 uorce par l'adultere commis par l'une des parties, il n'est pas
 loysible

*Blasphé-
 me contre
 les Conci-
 les.*

Ioyſſible à la partie innocente de ſe marier de rechef, ce qu'ils diſent eſtre iniuſte & par trop dur. Mais par conſequent il faut que * Ieſus- Chriſt ſoit iniuſte & trop dur, & l'Apoſtre auſſi, leſquelz ont dict le meſme. Voicy les motz du Canon allegué: il a eſté arreſté, que ſelon la doctrine Euangelique & Apoſtolique, que ny le mary delaiffé de ſa femme, ny la femme delaiffée de ſon mary ne ſe pourra remarier, mais ils demeureront ainſi, filz n'aiment mieux ſe reconcilier. Leſquelles parolles ſont extraictes de l'Apoſtre: & en cela ilz monſtrent leur beſtiſe. Voulans encore plus euidentement nous faire toucher au doigt leur deception, ils adiouſtent l'exemple de Fabiole noble Dame de Rome, laquelle apres le diuorce ſe remarria, ſelō ce qu'en eſcrit Sainct Ieroſme. Et veulent ilz dire par cela, que l'exemple de ceſte ſeule femme a plus d'autorité enuers eux, que la ſentence de Ieſus- Chriſt, que celle de l'Apoſtre, que celle de l'Egliſe vniuerſelle? Y a- il choſe au monde plus clere que ceſte cy proferée par l'Apoſtre: * Tant que le mary viura, la femme ſera appellée adultere, ſi elle eſt avec vn autre mari? Mais ſi ceſte reſponce ne leur ſuffit, ie leur voy monſtrer que l'exemple de Fabiole les deueroit faire mourir de honte, tant ſ'en faut qu'il leur ſerue. Car, comme dict Sainct Ieroſme en ſon Epitaphe, apres le trespas de ſon ſecond mary, elle reſcognoiſſant ſon forſaiet ſe veſtit d'un ſac, confeſſa ſa faute publiquement, deuant le iour de Paſques eſtant en l'egliſe de S. Iehan de Latran, au veu & ſceu de tout le peuple Romain, elle demeura au ranc des pœnitens, l'Eueſque, les preſtres & tous les aſſiſtans fondans en larmes, auſquelz elle ſouzmit ſes cheueux eſpars, ſon triſte viſage, ſes mains toutes craſſeuſes, & ſon col tout ſale. Leſquelles parolles eſtans eſcrites par Sainct Ieroſme, ie m'eſmerueille comme ils ſont ſi impudens que de les alleguer pour eux, & citer l'exemple de ceſte femme. Ce ſont vrayement les ruſes, par leſquelles ils en deçoiuent tant, qu'on ne les pourroit aſſez deplorer. S'ilz aiment tant l'exemple de Fabiole, qu'ils imitent ſa pœnitence, qu'ils prennent vn ſac, qu'ils confeſſent publiquement leurs erreurs, voire tres- execrables menſonges, & qu'ils inuoquent Dieu à toute for-

Blaspheme du diuorce, contre l'eſcriture & les conciles.

** Mat. 5.
Luc. 16.
1. Cor. 7.*

** Rom. 7.*

ce, pour le fleschir à auoir misericorde de leurs forfaitz, par
 lesquelz ils ont conduict en enfer vne infinité d'ames laüées
 du sang du fils de Dieu. Je voy bien que pour toute responce
 ils nous diront, que ceste pœnitence de Fabiole estoit impie
 & pharisaïque. Et vrayement ie ne scaurois assez admirer Me-
 lancthon, qui a * cité cest exemple, encore reprenât les sainctes
 peres, comme fils auoient trop sottement erré. Mais par ces
 fauces citations & semblables calomnies de ces peruers, nous
 cognoissons à l'œil leur esprit maling, comme le lyon en voi-
 ant son ongle: & à la mienne volonté que ceux le cogneus-
 sent aussi bien, qui pensent que ces predicans traictent les
 pointz de la religion à la meilleure foy qu'il est possible.
 Vrayement la meschanceté de ces galans nous contrainct de
 demeurer quelquefois sur ces matieres, plus que nous ne vou-
 drions, & que l'affaire mesme ne requiert: mais i'espere que le
 lecteur excusera aysément ceste necessité, à cause que le but
 auquel tendent mes propos n'est autre, que d'aduertyr sence-
 rement le lecteur, par quelles ruses & Luther & les autres dog-
 matifans de ce siecle ont deceu infini nombre d'hommes. Car
 sans cela ie prendroy beaucoup plus grand plaisir à discourir
 sur l'histoire, sans m'attaquer à personne: mais pourautant
 qu'ils farcissent leurs histoires & tous autres liures de tant de
 mensonges, la necessité nous force quelquefois de les mani-
 fester, ou aussi les refuter brefuement, à fin que ceux qui ne
 sont des plus cler-voyans en ces matieres, ne heurtent pas à
 tels escueilz & si dangereux. Toutesfois ie ne veux pas entre-
 prendre de descouurir tous les vices, desquelz l'histoire de
 Sleidan est pleine, à cause que cela demande vn ceuvre par-
 ticulier qui seroit assez proluxe: au moyen dequoy nous nous
 contentons d'en monstrier quelques pointz en passant, pour
 donner à cognoistre au lecteur, qu'est ce qu'il faut estimer de
 Sleidan, & de ses commentaires, voire aussi des liures de tous
 les partiaux du nouueau Euangile, lesquelz ne contiennent
 rien que pure fauceté. Et ce qui nous a occasionné à estre vn
 peu plus longs en cest endroiect, a esté Sleidan, quand il recite
 si prolixement les lettres des Protestans à Granuelle: ausquel-

* *Au-
li-
ure de l'E-
glise.*

*Intention
& but de
l'auteur.*

les cecy est encor' adiousté, que les Protestans se trouueront volontiers au Concile & où il sera question de parler d'accord : mais à tel si, qu'on ne suyue en cela que l'escriture, & que le seul Christ soit cogneu pour iuge. Laquelle chanson ces braues Theologiens ont incessamment à la bouche, comme si plusieurs autres heretiques du temps iadis ne se fussent fondez sur cela mesme. Il faut que le lecteur apperçoyue ceste finesse. Ils veulent que la seule escriture ayt autorité, mais de sorte qu'ils ayent quant & quant puissance de l'interpreter à leur poste. Et quelle heresie y a-il si execrable, laquelle ne demande bien pour iuge l'Escriture sainte, avec la condition des Protestans? Bon Dieu, que les espritz des Chrestiens sont simples, qui n'ont iamais pris garde aux finesse de ces rusez! Le different que nous auons avec eux ne consiste point és escritures, ains seulement au sens d'icelles, pour-aux tant qu'ils le veulent prendre de leurs cerueaux par trop esuentez, & nous le voulons puiser du consentement perpetuel de l'Eglise. A quoy ils ne veulent iamais venir, n'estans point ignorans, que leurs erreurs & particulieres opinions contreuientent entierement au consentement perpetuel de toute la Chrestienté. Et sur cela ils crient deuant le peuple à pleine teste, l'Escriture, l'Escriture: mais les doctes entendent bien que le sens propre des saintes lettres faict aussi peu pour eux, que peu s'accorde le mensonge avec la verité. D'auantage comment seroit-il possible qu'ils alleguassent l'Escriture en bonne conscience, attendu que maintesfois ils ont changé & leur confession d'Ausbourg & plusieurs autres leurs opinions: Ce qui est tant variable, peut-il oncques estre vray? ou l'immuable verité de l'Escriture sainte pourra elle auoir aucune conuenance avec vne telle inconstance? Or à tant nous retirons nous de ceste escarmouche contr'eux, de peur de fascher le lecteur en les poursuyuant plus outre, & pource aussi que la commodité se pourra presenter quelque autre fois.

ENVIRON ce temps les Ambassadeurs des Protestans enuoyez en Angleterre furent de retour, & se trouuerent à

*Nouvelles
aux Pro-
testans de
la part
d'Angle-
terre.*

l'assemblée de Smalcalde, que les Protestans faisoient alors, à laquelle furent presens les Capitaines & Port'-enseignes des Lutheriens, Jonas, Pomeran, Melancthon, Cruciger, Bucer. Iceux doncques exposerent audict lieu l'estat de la religion en Angleterre, & comment le Roy Henry deuisant familièrement avec quelques vns auoit dict, que les Theologiens Protestans estoient en maintes choses, des plus graues desquelles il fust alors question. Car iagoit que ce Roy la, à cause du diuorce par nous cy-dessus mentionné, s'estoit rebellé contre le Pape, qui n'auoit oncques voulu approuuer ce fait, si est-ce qu'il chassa hors de son Royaume plusieurs pointz heretiques de Luther. Dequoy les ministres Alemans auoient martel en teste, qui ne cessoient d'esguillonner les Princes par eux deceuz, à ce que se ioignans avec la force & amitié des plus puissans Roys, ils eussent dequoy faire teste au Pape & à l'Empereur, avec lesquelz ils sçauoient bien qu'ils auroient guerre, à cause du changement de religion. Quelques iours apres les Protestans mirent vn liure en lumiere composé par les ministres, qui contenoit en somme, qu'il ne falloit point sentir autrement que porte la confession d'Ausbourg & l'Apologie d'icelle. C'estoit le beau semblant que ces Theologiens faisoient, mais ils se desmentirent eux-mesmes, veu que Melancthon, forger & auteur d'icelle Confession, l'a quittée, & bien souuent l'a changée, si bien que plusieurs Lutheriens du temps present reprochent & à Melancthon & à plusieurs autres professeurs de la Confession d'Ausbourg, que sans cause & à leur honte ils l'ont abandonnée. Bref, ils ne cessent iamais de s'entre-guerroyer, de maniere que c'est chose admirable, que les Princes ne cognoissent pas telz hommes n'estre point conduits du Saint Esprit, lesquelz sont si impudemment inconstans en la doctrine de l'Euan-gile (qu'ils appellent) & si fort partialisez entr'eux. Car la Confession reçoit le franc arbitre, lequel toutesfois ny Luther ny Calvin ne veulent recevoir, comme plusieurs autres, disans en outre (ô chose tres-horrible!) que Dieu est auteur de toutes meschancetez. Icelle mesme Confession ne reiette point

*Ruse des
ministres
quant à la
confession
d'Aus-
bourg.*

*En quoy
les Calui-
nistes dif-
ferent de la
Confessio
d'Aus-
bourg.*

la Messe, bien que celle Messe soit plustost Lutherienne que Catholique. Mais les Sacramentaires estiment, que c'est vn ieu que de la Messe des Lutheriens, si ce n'est encore superstition, lesquelz neantmoins sont comprins souz ladicte Confession, ou au moins font accroire d'y estre compris. La Confession ne nye point la realité du corps & sang de Iesus-Christ au sacrement Eucharistique, mais les Sacramentaires se moquent de cela. Aucuns Lutheriens confessent le merite des bonnes œuures, & les autres le nyent. Melanctho, architecte d'icelle Confession, afferme en icelle, que le corps & sang de nostre redempteur est en la Cene du Seigneur, ainsi appellant l'Eucharistie: mais ce non-obstant il est depuis tombé en l'erreur de Calvin, ou, si tu veux, en la nouvelle heresie des Sacramentaires. Quelle opinion donc, ie vous prie, doit-on auoir de celle Confession, laquelle ceux mesmes qui l'ont composée ne suyuent pas, & toutesfois ils s'en vantent, ils nous en veulent battre, & mentent sans vergongne, affermans qu'ils la suyuent en tout & par tout? Conclusion: le but de ces peruers n'est autre, que de se iouer en ce qui concerne le salut eternel, & ce qu'on dict en autre sens des medecins, ils ne cessent de traffiquer les ames.

PRESQUE en mesme temps l'Empereur & le Roy François enuoyerent par deuers la Seigneurie de Venise vn Ambassade si pompeux & magnifique, que les Venitiens confessoient, que iamais ils n'auoient receu Ambassade plus honorable ny plus digne. Car pour l'Empereur fut enuoyé Alphonse Danal, Marquis du Guast, personnage de haute stature & d'un visage fort graue, renommé grandement pour ses faictz cheualereux, aussi estoit-il Capitaine general en Italie pour l'Empereur. De la part du Roy François fut député le Seigneur d'Annebaud, lieutenant de l'armée Françoisse en Piedmont: Lors estoit la Seigneurie de Venise fort affligée par le grand Turc, lequel n'auoit pas seulement vexé l'Isle de Corfou, de Candie & les Cyclades, ains aussi auoit faict mettre à la cadene les marchans Venitiens, à Constantinople, en toute la Syrie & Aegypte, & auoit faict confisquer toutes

Ambassade par deuers les Venitiens

Les Venitiens affligez par le Turc.

leurs denrées & marchandises : de maniere que les Venitiens ne pouuoient aller sur mer en seureté comme par auant, & d'auantage auoient grand' faute de viures, qui leur venoient aysément des païs de Macedoine & de Grece. Au temps que les sus-dictz Ambassadeurs vindrent à leur ville, ils auoient encore treues avec Solyman, mais elles expiroient bien tost. Au moyen dequoy le Marquis, Ambassadeur de l'Empereur, insistoit fort, à ce que r'allians les forces de son maistre & du Roy tres-chrestien avec celles des Venitiens, ils allassent enuahir le Turc: mais le Senat de Venise, n'estant pas encore bien assauanté de la solide amitié entre le Roy & l'Empereur, feit tout deuoir de caresser & honorer les Ambassadeurs: & neantmoins par-apres despescha le Seigneur Louïs Badoër par deuers Solyman, pour moyenner la paix, luy donnant par escrit certaines conditions pour traicter cest affaire avec le Turc. Or Solyman auoit ia entendu les conditions par quelques trahystres, néz pour corrompre les bonnes Republiques, tellement qu'il tença fort l'Ambassadeur Loïs qui dissimuloit quelques pointz, selon qu'il en auoit reçu commandement, & luy dist, qu'il scauoit bien ce que les Dix-hommes auoient arresté. Si bien que l'Ambassadeur espouuanté de celle menace, conceda plus à Solyman, que le Senat ne luy auoit permis de faire es articles de la paix. Laquelle Solyman accorda pour lors aux Venitiens, qui luy laisserent les villes de * Nauplia & * Epidaure en la Morée, & les chasteaux de Nadin & Labrane en la Dalmatie, au grand detrimet de la Seigneurie. Apres cela on feit inquisition diligemment des proditeurs, lesquelz furent en fin punys comme ils auoient deseruy.

Les Venitiens font paix avec le Turc.

** Maintenant Nauplia de Romania.
* Limera.*

Du Duc de Juliers.

L'EMPEREUR estant encor' à Gand, le Duc de Juliers le vint saluer, lequel tenoit déia les terres de Gueldres à luy offertes sans qu'il y pësast. A cause dequoy il voulut moyenner quelque accord de paix avec l'Empereur, mais il ne fut rien fait alors. Et ce pendant le Roy de France voyant qu'on ne faisoit conte de luy restituer son Duché de Milan, s'estrangea plus fort de l'Empereur, & feit paix avec le Duc de Ju-

liers, luy donnant en mariage (comme aucuns disent) Madame Iehan^e, sa niepce, de sa sœur Marguerite Royne de Navarre, fille des plus riches de toute France. Mais ceste alliance fut mal-heureuse au Duc de Iuliers, comme nous dirons cy apres, & mesmes ce mariage ne fut accompli.

CESTE année Thomas Cromuël eut la teste trenchée en Angleterre, lequel issu d'une petite maison auoit esté esleué par le Roy Henry huitiesme aux plus beaux Estats du Royaume. C'estoit luy qui auoit fait prendre si grieux supplices de Iehan Fischer, Euesque de Rochestre, de Thomas Morus, & de plusieurs autres personnes fort religieuses, pour-autant qu'ils auoient refusé d'approuuer le diuorce du Roy avec Madame Catherine, & quelques autres choses. Vous en verrez plusieurs qui s'estimeront bien-heureux, s'ils peuuent auoir la faueur des Roys & Princes, pour laquelle acquerir & conseruer ils ne craindront maintesfois de faire choses repugnantes à toute equité: mais aussi souuent il aduient, que par vn iuste iugement de Dieu tels hommes payent telle iniustice, quand le Prince vient à conceuoir quelque maltalent contr'eux. A ce propos nous lisons, que iadis y eut vn excellēt ouurier d'Athenes nommé Perille, lequel pour cōplaire à Phalaris, cruel & selon tyran, fabriqua vn Taureau d'airain, dans lequel ceux qui estoient enfermez, le feu estant allumé dessus, estoient tellement tourmentez, qu'ils ne sembloient pas auoir voix d'homme, ains le buglement d'un bœuf. Mais aduint quel inuenteur mesme fut ietté dans le taureau par le commandement du Tyran, & que le Conseil reüssit fort mal pour celuy qui l'auoit donné.

L'EMPEREUR publia ceste année vn Edict fort recommandable, par lequel il defendoit à tous habitans des païs à luy appartenās en la basse Alemaigne, de lire les liures de Luther & de tous autres heretiques, sur peine de la mort aux cōtreuenans à ce sien commandement. Ce que ie scay estre par plusieurs trouué mauuais, qui pensent qu'on doit permettre à toute sorte d'hommes la lecture de tels liures. Toutesfois cela a esté bien ordonné, & n'est nouveau en l'Eglise de Dieu. Car

*Cromuël
est decollé
en Angle
terre.*

*De Perille
le inuenteur
du Taureau d'airain.*

*Edict de
L'Empereur.*

Que les liures heretiques ne doiuent estre luez des Catholiques aucuns.

il y a plus de mille ans, ſçauoir eſt du temps que fut celebré le ſainct Concile de Nice, que le ſuſdict Concile commāda que les liures d'Arius & de tous les ſectateurs d'iceluy fuſſent brulez: & meſmes le tres-chreſtien Empereur Conſtantin ordōna, qu'on feiſt mourir tous ceux qui receleroient tels liures, & ne les auroient brulez tout ſoudain. L'Apoſtre S. Paul ne dit-il pas, qu'on doit euitier l'homme heretique apres l'auoir deux fois admonneſté, & que les parolles des heretiques gliffent comme le chancre? Certes bien peu en trouue l'on, qui ayent le iugement propre pour diſcerner le vray d'avec le faux, & pour iuger des hereſies: & neantmoins pluſieurs ſ'attribuent ce iugement, & liſent indifferemment tout ce qui ſe preſente: mais eſtans prins & enlāgez au piege de ces rufeſz heretiques, ils payent la folle enchere de leur oultrecuydance & temerité. Ce n'eſt donc pas ſans iuſte occaſion, que depuis mille années iuſqu'à auourd'huy le docte Pape Gelāſe condamna les liures heretiques, & iugea qu'il les falloir grandement euitier, & que pareillement les Papes de ce ſiecle defendent la lecture d'iceux, attendu le danger qu'il y a, que le lecteur mal aduiſé ne puiſe de là quelque meſchante poiſon: & que lors qu'il ne ſe peult deſpeſtrer des argumens propoſez par les heretiques, il n'embrace le faux pour le vray, & que par ce moyen il ſ'acquiere damnation eternelle. Conſiderons ce que Saint Irenée fort prochain du temps des Apoſtres, a laiſſé par eſcrit d'iceux Apoſtres & de leurs diſciples. Il teſmoigne au liure 3. contre les hereſies, que les Apoſtres ne vouloient meſmes parler avecques ceux, qui falſifient & corrompēt la verité: & ſans point de faulte les Magiſtrats, qui permettent qu'on vende publiquement les liures condānez & heretiques es lieux où leur puiſſance ſ'eſtend, ne ſont pas le proffit de leurs ſubiectz. Car il n'y a gueres de cauſes, par leſquelles plus de Catholiques ſe laiſſent prendre à l'hereſie, que par ceſte-cy: ſçauoir eſt qu'aiſément ils peuuent auoir tels liures pernicioeux, à cauſe que le Magiſtrat le diſſimule, lequel i'ay grand peur quil ſera comptable de telle perdition. Maintēāt bien peu d'hommes ſont cas de cecy, mais ce ne ſera pas temps d'en faire conte, lors qu'il

*Propos
fort nota-
bles.*

*Nicephore
liure 8.
chap. 18.*

qu'il nous faudra assister deuant le iuste iuge, nostre sauueur Iesus-Christ. N'est-ce pas grand pitié, que les Sectaires de ce temps en plusieurs lieux defendent aux leurs, de lire non seulement les liures des Catholiques, ains encore ceux des Sectaires qui ne s'accordent pas avec eux : & que les Catholiques ne fassent le semblable des liures heretiques ? J'ay bien voulu toucher vn mot de cecy en passant, à fin que le lecteur sçache, que nous deuons embrasser & cherir merueilleusement tous les Papes, Empereurs, Roys, Princes & Magistratz, qui bannissent hors de tous lieux où ilz commandent les liures condamnez, & qui defendent la lecture d'iceux à leurs subiectz : faisans en cela comme font quelques peres enuers leurs enfans, qui se soignent diligemment à ce qu'iceux ne mangent ou ne boyuent quelque poison, ou autre chose d'agereuse.

EN ce temps le Roy Henry d'Angleterre repudia la Royne Anne sa quatriesme femme, sœur de Guillaume, Duc de Cleues, & espousa pour sa cinquiesme femme Catherine Howard, niepce du Duc de Nordfolc. Ce Roy feit brusler à Londres trois nouueaux heretiques, desquelz Robert Barne Docteur fut l'un. Il feit aussi mourir de mesme supplice trois autres, qui approuuoient la primauté du siege Romain, & n'approuuoient le diuorce du Roy avec Catherine d'Espagne.

A v mois d'Aoust de l'année presente Guillaume Budé ^{La mort de Budé.} rendit son esprit à Dieu à Paris, qui certainement fut homme des plus doctes de ce siecle, & de grande autorité enuers le Roy de France. Tous ceux qui sont amateurs des bonnes lettres doyuent beaucoup audict Budé, à cause que par ses doctes escrits il les a releuez de grãde peine en maintes choses. Ce fut celuy, à l'instigation duquel le Roy François establit & gagea à Paris, ceux qui sont à present appelez Professeurs ^{Professeurs du Roy.} du Roy, lesquelz aussi font profession des bonnes lettres & langues, au grand auancement & honneur des lettres. Il voulut que son corps fust inhumé sans pompe quelconque, & qu'il n'y eust qu'une torche à le conduyre, faisant cela par modestie, comme ie pense.

LA mesme année alla aussi de vie à trespas le Roy Iehan d'Hongrie, laissant vn sien petit enfant souz la charge de George le moine, lequel contraignit toute l'Hongrie, que le Pere auoit seigneuriee, à prester foy & serment au filz estant encor' au berceau. Dont sortirent nouuelles guerres, lesquelles occasionnerent les Turcs à s'emparer d'Hongrie.

*L'année
des vins
rosin.*

L'ESTÉ de ceste année presente fut si sec, que la posterité s'en souuiet encores. On recueillit de merueilleusement bons vins, & de seille mediocrement: mais il y eut grand disette de foin, d'herbes, & d'autres choses necessaires à viure, & principalement aux plus pauvres.

*De l'Origine
progrez, & in
stitution des
Iesuytes.*

CESTE année le Pape Paul 3. approuua l'ordre de la société de IESVS, les professeurs de laquelle sont auourd'huy mocquez & calomniez de plusieurs, & signamment de ceux qui aiment beaucoup mieux s'appeller Euangeliques, que de faire ceuures d'hommes Euangeliques: quoy qu'iceux ayent de nostre temps fait vn merueilleux fruit à dilater la verité Chrestienne, tant enuers les payens, que Mahometains & Iuifz, & en la soustenant entre les Chrestiens. Au moyē dequoy il m'a semblé bon de vous en dire brefuement ce que j'en sçay, de peur que quelcun ignorât le fait se laisse tromper, ou presté l'oreille aux langues & escriptz des enuieux. Le premier autheur & inuenteur de cest ordre fut ignace Loyala de Cantabrie, * issu d'une illustre maison de Barons. Cestuy ayant le los d'estre bien prudent & fort magnanime, fut estably Gouverneur lors que les François assailloient de toutes leurs forces le chasteau de Pampelune, où il résista aux ennemys fort courageusement, iusqu'à tant que finalement les François le prindrent, ayant esté griefuement nauré es deux cuisses: lesquelles bleçures l'esguillonnerent par-apres à delibérer, de mener vne vie toute autre que par-auant. Car estant deliuré des François, & sentant iour & nuict vne douleur incredible de ses deux playes, commença à se recognoistre, cōsidera plus diligemment la brefueté de ceste vie, & la vanité du monde auquel il festoit quelquefois par trop addonné, si bien que de ce pas il commença à goustier & sauourer les choses celestes,

** Biscaie*

*Quel fut
Ignace
Loyala,
premier
Iesuite.*

desquelles il n'auoit pas tenu grand conte par le passé. Aduint cependant, que tandis qu'il demeura vn an & plus malade, il rencontra vne fois les Vies des Saincts, lesquelles il se mit à lire de grande affection, de maniere qu'un desir de religion le surprint, & quant & quant vne douleur des pechez par luy commis en sa ieunesse, finalement vne ardeur de passer de là en-
 auant sa vie en faisant bonne penitence. Estât donc guery de ses playes, il s'appresta tout ainsi que s'il eust voulu aller trou-
 uer le Capitaine Nagera, mais son dessein estoit, de laisser les voluptez & vanitez de ce monde, & renonçant à tous les biens qu'il pouuoit auoir, de marcher souz l'enseigne de Iesus-Christ: & de fait n'estant encore lors aagé que de 26. ans, il se trans-
 porta à ce tant renommé Monastere de Mont-serrat, où il des-
 pouilla ses beaux accoustremens de foye, les donnant à quel-
 que pauvre, & print les vestemens de ce pauvre tous deschi-
 rez, & mena long temps vne vie si royde & si studieuse de ver-
 tu, que par son exēple il enflāma plusieurs à cherir leur Dieu plus que de coustume. Il passoit quelque temps tout solitaire en vne cauerne, iouxte la riuiera qui passe à trauers les chāps de Manuesan, faisant fructz dignes de penitence, cōme nous exhorte S. Iehan Baptiste en l'Euangile. En ce temps-la il ne cognoissoit point les lettres, mais le S. Esprit luy esclercit l'en-
 tendement de sa lumiere, & si l'eschaufa d'une merueilleuse amour enuers son prochain. Apres cela prenant l'habit d'un pauvre pelerin il alla en Hierusalē, pour adorer les saintz li-
 eux, esquelz on voit encor à present les vestiges de nostre Sau-
 ueur. Aussi fut-il si rauy de la delectation qu'il prenoit en ces
 lieux-là, qu'il ne souhaittoit rien plus que d'y finir ses iours, ius-
 qu'à tant qu'il fut sommé diuinement de retourner en Occi-
 dent. A raison dequoy estant de retour en Espagne, il s'en alla
 premierement à Complut, & apres à Salamanque, où il estu-
 dia: & cōme en son habit, couuert d'un sac, il exhortast publi-
 quement les hommes à penitence, sans auoir eu permissiō de
 prescher par l'Euesque, & n'estant de doctrine suffisante pour
 faire cest estat, fut par deux fois mis en prison, & fut examiné
 par les inquisiteurs comme suspect en sa foy & doctrine, mais

*Ignace au
monastere
de Mont-
errat.*

*Ignace en
la terre
sainte.*

*il est en-
prisonné
en Espa-
gne.*

en fin on trouua qu'il estoit innocent & exempt de tout crime, si bien qu'estant sorty de prison il vint à Paris: auquel lieu, *Il estudie dix ans à Paris.* desireux d'enseigner les autres, & d'estre plus suffisant à les convertir à Iesus-Christ, il employa dix années aux estudes, quoy qu'il fust fort debile, & fort necessiteux, si qu'il ne viuoit que par la liberalité d'autrui & de ce qu'on luy donnoit pour l'honneur de Dieu: & fait si biē son deuoir à l'estude, qu'en peu de temps il fut passé maistre es artz. Et faut entendre que cependant il ne cessoit, & de faict & de parolle, de conuier les hommes à penitēce, de façon que quelques hommes fort doctes esmeuz de l'innocēce des mœurs d'iceluy, & de l'amour qu'il portoit à Dieu eternal, ne douterent point de se renger avecques luy desirans l'imiter.

A PRES il retourna en Espagne l'an 1536. & delà s'en alla à Rome, auquel lieu ses compaignons, personnages venerables, le suyurent pareillement, pour d'illec s'en aller ensemble peregriner en Ierusalem. Si furent à Venise, ains que d'aller à Rome, où ces hommes admirables se fondās sur vne humilité grande se logerēt es hospitaux des pauvres, esquelz ilz ne cesserent d'exercer œures de misericorde, en se peinant pour la guerison des malades, en consolidant les playes, en nettoyant l'ordure qui estoit sur les mēbres des pauvres: bref ils monstrent telz exemples d'une vertu & pieté singuliere, que chacun commençoit à s'en estonner. Apres ilz retournerent encor' de Rome à Venise, où ils cogneurent que pour la paix rompuē en ce temps-la entre les Venitiens & le Turc, il estoit impossible de faire le voyage aux sacrez lieux de Ierusalem. Qui fut cause qu'ils changerēt leurs premieres deliberations, & sept d'entr'eux prindrēt les ordres, iusqu'à tant qu'ilz furent prestres, mais de sorte que mesprisans les biens de ce monde ils vouērent de leur bon gré vne pauureté volōtaire, *Grande charité d'Ignace & ses compaignons.* aux piedz de Veral, Archeuesque de Roson, Legat Apostolic: ce qu'ils faisoient pour s'employer plus gayement à gagner seulement les ames. Et quant à la loy Ecclesiastique, par laquelle persōne ne peut estre promu aux sacrez Ordres, qu'il n'aye dequoy passer honnestemēt sa vie, le Pape Paul 3. les en

Sept d'entr'eux se font prestres.

dispensa . Si fut octroyée puissance à ces sept, de pouuoir en tous lieux ouir la confessiō des pechez. Lors doncques ilz cōmencerent à trauailler à la vigne de nostre Seigneur, preschās d'vn zele ardent la parolle de Dieu és villes des appartenāces de la Seigneurie de Venise. Apres quelque temps ils s'en allerent de rechef à Rome tous ensemble, où apres auoir monstré les fruietz singuliers de leur pieté, modestie, innocence, & doctrine, Satan se meit à leur faire la guerre, tellement qu'ils eurent beaucoup de peine & fascherie, ce que toutesfois fut cause que leur nom & leur ordre fut de plus en plus cognu & admiré. Et pourau-tant que durant ce laps de temps plusieurs se ^{Leur societé approuuée par le Pape Paul} venoient ioindre à leur societé, ilz demanderent la confirmation de leur ordre au Pape Paul 3. par le moyen du docte & vertueux Cardinal Côtarein. A quoy faire le S. Pere ne se monstra nullement difficile, voyant bien par plusieurs certains indices, que leur maniere de viure estoit merueilleusement propre pour profiter à la Republique Chrestienne: & neâtmoins afin qu'il ne semblast s'estre porté inconsidérément en cecy, il defendit au commencement, qu'ils ne s'assemblāssent point plus de soixāte en leur societé: chose ordōnée l'an 1540. Mais voyant le Pape sus-dict les fruietz issans de ces personnes, & ne doutant aucunement que le S. Esprit ne fust l'auteur & modérateur de cest ordre, de rechef il le confirma l'an 1543. & ce fut sans prescrire certain nombre en icelle societé, desirant au contraire de les veoir augmentez & multipliez . Et voyla les fondemens de cest ordre. Or si maintenant nous voulions ^{Dilatatio d'icelle societé.} discourir le progrez d'iceluy, combien il s'augmēta en peu de temps, & comment il se dilata par toute la terre iusqu'aux Indes, Aethiopiēs & Antipodes, avec vn merueilleux fruct des ames, comme ceux qui conuertissoiēt les nations barbares au Christianisme, reduyssoient les heretiques au sein de nostre mere l'Eglise, & amollissoient le cueur d'innombrables hommes ia deplorez & desesperez pour leur mauuaise vie: certainement ie ne le pourroy faire sans exceder les bornes de ceste miēne histoire. Et iagoit qu'en ceste societé de I E S V S il y ayt plusieurs hommes de sçauoir excellent & de vertu singuliere,

*Obedience
de ceux de
ceste socie-
té.*

toutesfois ils ne font pas comme nos freres Euangeliques du iourd'huy, qui courtent sans estre enuoyez de personne, & sans vergongne quelconque iettent leur faucille en la moisson d'autrui: ains ils dependent entierement du Pape, & de la volonte du General de leur ordre, & mettent en effect sans aucune tergiversation tout ce qu'iceux leur commandent, quoy que le danger de leur vie ne soit pas beaucoup esloigné, comme souvent il aduient. Et delà vient, qu'entreprenans maintes fois choses arduës & difficiles non pas à leur volonte, mais bien selon le bon-plaisir de leurs superieurs, neantmoins ils les effectuent d'une dexterite grâde, iouissans sans doute de la faueur du haut Dieu: comme il appert fort euidentement par l'exemple de ceux qui cy-deuât ont presché, & encor' à present preschent l'Euangile de Iesus-Christ aux nations barbares & brutales, lesquelz le plus souvent trauaillent plus que la nature humaine ne peut supporter & de iour & de nuict, à baptizer, prescher, confesser, administrer les Sacremens, & executer semblables labeurs de pieté, sans que toutesfois ils se lassent de ce trauail, ains plustost ils sont si sains & si disposz, qu'à peine plusieurs le pourroient croire. Aussi ont-ils fait en ces endroictz-là plusieurs miracles à la manifestation de la gloire de nostre Seigneur, à cause que Dieu y coopere, & confirme sa parole avec les signes suyuant. Or celuy qui a esté l'auteur que le fruit de ceste societé se soit respendu à foison en la nation d'Allemagne, laquelle iadis estoit tres-obeyssante au S. Siege de Rome,

Le College des Alemans à Rome, lequel les suites tiennent.

fut Iehan Moron Cardinal de la S. Eglise Catholique, qui a esté Legat du Pape au Concile de Trente: lequel moyenna avec Ignace, general de cest ordre, que à Rome seroit basti vn College, auquel vne grande multitude d'Alemans seroit honnestement & gratuitement enseignée es bonnes lettres & en la vraye pieté. Non pas toutesfois en intention que ces ieunes hommes se feroient Iesuïtes, ce que quelques vns ont fauement calomnié, ains que estans bien instituez par les doctes & religieux Peres de celle Societé, ils retourneroient en Allemagne, où par leurs predications & autres exercices de pieté ilz tascheroient à reduyre à la sincerité & vnité de l'Eglise

Catholique leurs Alemans, qui, deçus par les ruses des nouveaux dogmatifans, se sont laissez tomber en diuers & repugnans erreurs. Personne ne sçauoit aisément dire, combien d'argent & de labeur cela a cousté: & noz Alemans pourroient facilement recueillir par ce seul fait (s'ils vouloient) l'affectiō que le Pape & les Cardinaux portent à leur nation, considéré qu'ils ont fait edifier ce college à grands fraiz, & ont tant fait que les estudians d'Alemaigne seroient là entretenuz de toutes choses necessaires à poursuiure les estudes, & instituez en toutes bonnes lettres. Et mesmes le Cardinal Moron, qui sera à iamais louiangé pour vn si bon œuure, a employé tout son pouuoir pour soustenir & amplifier ce college, cōme il a fait pareillement à le bien instituër. Et c'est cela, & l'heureux progres de ceste societé en l'Alemaigne & plusieurs autres lieux, qui tourmente Satan premieremēt, & puis les noqueaux troyetteurs du faulx Euangile. Car ils voyent que de iour à autre leur heresie est fort esbranlée par les doctes de cest ordre, ils apperçoient bien que plusieurs se sequestrans de leurs sectes se vont rendre au troupeau de Iesuf-christ, & voyent encores, que plusieurs Catholiques laissans la mauuaise & deprauée vie que par-auant ils auoient suiue, retournent à l'estude de purité & innocence: finalement ils considerent bien, que la plus part de ceste societé sont remplis & d'vne si bonne vie, & d'vn sçauoir si profond & admirable, qu'ils ne peuuent mordre sur leurs mœurs, ce que toutesfois ils font impudemment quand ils parlent de nostre Clergé: & d'auantage, ne sçauoient desirer en plusieurs rien de ce qui appartient à vn sçauoir accompli. Et c'est pourquoy ils haïssent tous ceux de ceste societé plus que hommes de ce monde, c'est d'où sortent tant de conuices, d'où ils sont si desbordez à les iniurier: à sçauoir ne pouuās reprendre la façon de vie qu'ils meinent, si ce n'est par calomnie, maintenant ils les appellent Iebuzites, maintenant Suites en ostant la premiere syllabe, & mesmement Iesuider en Aleman, comme aduersaires de Iesuf-christ, & souuent aussi les Cheualiers noirs, pour-ce que communement ils vsent de robbes noires: mais ces cauillations ne denigrent

*Fructz
produictz
par les Ie-
suites.*

*Iniures
des hereti-
ques cōtre
les Iesuites*

point l'honneur des bons peres de celle société, ains montrée seulement la petulance des heretiques. Comme si nostre Seigneur auoit eu deshonneur d'auoir esté appelé demoniaque, seducteur du peuple, gourmand & yurongne par ceux qui s'opposoiēt à sa doctrine. Je sçay bien que quelques hommes honnestes & bien viuans se sont aucunesfois formalisés cōtre ceste société, mais cela leur aduenoit pour-autant qu'ils n'entendoient pas encore bien le but de ceste société. Car ceux mesmes qui ne sont point mal-vueillans, s'esmeuent quelquesfois par les sinistres soupçons, à cause que nous sommes hommes, & souuent faillons, comme estans hommes. Tant y a que ie m'asseure bien fort, que celuy qui cognoistra la reigle & les faitz de ceste société, n'en dira que grand bien. Et veritablemēt plusieurs cognoissent, qu'en ce temps si calamiteux, auquel les heresies pieça condamnées regermēt encores, plusieurs professeurs de ceste société se sont diuinement opposez aux nouueaux & variables dogmatistes, qui se vantent ordinairement de la cognoissance des bonnes lettres & des langues: & iceux, tant par leur solide doctrine, que par vne integrité de vie nullement dissimulée, font teste à tous leurs pernicieux efforts, ce que nous voyons estre aduenu en plusieurs lieux. Et à la mienne volonté que plusieurs hommes considerans leurs grands & infinis trauaux, que sans cesse ils portent pour auancer le proffit de la religion Catholique, les guerdonnassent comme ils l'ont bien meritē. Certes Ferdinand, tres-chrestien Empereur, a montré assez la bonne affection qu'il leur portoit, en faisant edifier plusieurs colleges pour les Iesuites, & en les rentant de plusieurs bons reuenuz, au moyē desquels les amateurs des lettres y seroient entretenuz: en quoy il a montré entierement sa liberalité Royale. Il seroit trop long à racōter, combien de colleges ont esté fondez par plusieurs Princes en toute l'Europe, pour ceux de ceste société, d'oū sortent fructs en grand' planté, fort vtiles à toutes sortes d'hommes, & vne douleur extreme au diable, & à tous ses supposts ministres de la mal-heureuse doctrine, qu'ils osent appeller Euangelique. Quelques vns de ceste sainte troupe ont

*Les Iesuites
sont les
fleaux des
heretiques.*

ont respandu leur sang pour l'augmentation de la foy, és regions barbares distantes incroyablement de nostre Europe: entre lesquels a esté François Xavier, lequel a fait plusieurs miracles, & estant remply d'esprit Prophetique, & doué de vertu admirable, a souffert maintz labeurs pour l'honneur de Iesus-Christ, non sans grandissime fruit proceddé de luy és Indes & autres regions Leuantes. N'agueres en y a eü vn autre l'ã 1561. issu de grand' maison au Royaume de Portugal, nommé Goncallo de Sylucira, lequel bruslant d'amour diuin, & se-stant conioinct avec quelques autres Portugais, partant de la cité de Mocambique tres-florissante en fait de marchandise, print la route du Royaume de Manomotapie, deliberé de cõ-uertir le ieune Roy avec tout son Royaume à la foy de nostre redempteur. Aduint que, apres auoir euité plusieurs perilz sur le chemin, de maniere que bien souuent il luy fallut passer de grandes riuieres à la nouë, mettant ce-pendant sur sa teste les ornemens avec lesquels ilz deuoient celebrer la Messe, finalement il paruint à la grande cité de Manomotapa, où ayã esté recueilly du Roy fort humainement, il leur annonça le saint Euangile si dextrement & de telle naïfueté, que soudain le Roy & la Royne & quatre cens des plus grands Seigneurs du Royaume se firent baptizer. A l'occasion duquel exemple, tout le peuple de celle si ample prouince estoit déia esguillon-né de faire comme le Roy & les autres, quand Satan, insti-guant à ce quelques Mores ennemys mortelz de nostre reli-gion Chrestienne, persuada au Roy que ce saint personnage estoit vn Magicien, & que son desseing estoit de mettre tout son Royaume en la puïssance du Roy de Portugal. Ausquelz meschans paillardz le ieune & mal aduisé Roy presta l'oreil-le, & repudiant la religion Chrestienne enuoya quatre siens satellites pour tuer Goncallo, qui ia auoit esté diuinement ad-monnesté de sa prochaine mort, & iceux le ietterent au beau milieu d'vn fleuve. Neantmoins la mort de cest homme n'a oncques sceu deterrer les autres de ceste Societé, d'aller en celle prouince, ains ne desirerent rien d'auantage, que de resti-tuer la lumiere Euangelique qu'on a desrobée à ces misera-

L'AN M.D.XLI.

HISTOIRE DE TOUTES CHOSES

*Desseings
des Iesui-
tes.* bles hommes, quoy qu'il y ayt grand danger pour eux. Mais peut-estre que ie suis vn peu plus prolixé à reciter ces choses, que ie n'auoy promis des le commencement. Pour donc elor re en vn mot ce discours, sçache le lecteur que les Peres de ceste Societé n'ont autre soing & intention, que de se sauuer eux-mesmes, que de gagner leurs prochains & les mettre au bon chemin, combattre viuement pour la religion Catholique, auancer la cause de Dieu, procurer le salut des hommes tant que faire se peut, par predications & leçons publiques, par exercices spirituelz, en instituant les enfans & hommes ignares à nostre religion, en oyant les Confessions, en administrât les Sacremens, en assoupissant toutes noises, en visitant les captifs, consolant les malades, bref en faisant telles & semblables choses concernantes la pieté, & ce gratuitement: de maniere que les gentils predicans, qui f'osent nommer Euangeliques, se deuroient hontoyer, qui s'attaquent à ces gens de bien, & font mestier de les blasonner deuant le peuple, n'ayans aucune iuste occasion de ce faire, mais vsans selon leur coustume de force calomnies, conuices, & mensonges controuuez. Or, comme ia cy-dessus a esté dict, le Pape Paul 3. a confirmé leur ordre & institution, & non seulement luy, mais bien encore consecutiuelement Iules 3. Paul 4. & Pie 4. D'auantage le saint Concile de Trente en la Session 25. au Canon 16. auquel lieu il parle des religieux, dit entre autres choses ce qui s'ensuit. Par ces choses le saint Concile ne veut point innouer ou prohiber en rien, que la religiō des Clercz de la Societé de Iesus ne puisse seruir à Dieu & à son Eglise, iouxte leur bonne & religieuse institution approuuée du S. Siege Apostolic. Maintenant il est temps de poursuyure le reste.

*La iour-
née de Ra-
tisbone, où
rien ne fut
accordé.*

L'AN 1541. au moys d'Apuril fut tenuë vne Diete Imperiale à Ratisbone, partie pour resister aux Turcs, partie pour accorder les differens touchant la religion. L'Empereur se trouua de bonne heure à ceste iournée, & attēdit la venue des autres fort longuement. Pareillement le Cardinal Contarein, homme fort insigne tant en doctrine qu'en pieté singuliere, y assista estant là enuoyé du Pape. Les Princes Lutheriens fus-

sent esté bien marrys d'estre absens quant & leurs predicans,
 qui leur annôcioient leurs songes és maisons priuées d'un cha-
 cun d'eux, & ne faisoient conscience de mespriser les institu-
 tions & ceremonies de l'Eglise Catholique, & semblablemēt
 le ieusne solemnel de Quaresme, lequel a esté continué de-
 puy les Apostres iusques à nous, comme l'on peut monstrier.
 Les mesmes predicans permettoient à quelques Seigneurs de
 leur ligue d'aller au deduyct de la chasse la sepmaine sainte, *Immode-
stie des
Protestans*
 voire mesmes le iour sacré-saint du vendredy, auquel le Sau-
 ueur Iesus Christ endura tant de maux pour l'amour de nous,
 qu'homme du monde ne les sçauoit tous conceuoir en son
 esprit, tant s'en faut qu'il les peust expliquer par parolle. Tou-
 tesfois cela n'est pas nouveau en ce beau Euangile, lequel en
 maintes choses est pire que l'eschole d'Epicure, tant licentieu-
 sement il permet les voluptez & plaisirs de la chair. Si aduint
 que quelques vns composerent vn liure, ausquelz Bucer se
 mella finement, & fut présenté ledict liure à l'Empereur, com-
 me propre pour accorder tout ce qu'on reuoquoit en doute,
 & assoupir tous differens. Or fut mis vn nouveau Colloque
 en ieu, si que des deux costez furent deputez trois colloca-
 teurs, & quelques auditeurs, avec deux Presidens, sçauoir est
 Frideric Côte Palatin, & l'illustre Seigneur de Granuelle. On
 meit ce-pendant le reste des affaires de l'Empire souz le pied,
 & se peina on merueilleusement pour venir à quelque con-
 corde: & mesmes il sembloit, qu'il ne restoit pas beaucoup à
 s'accorder en quelques articles, mais toutesfois on ne peut à
 la fin venir à aucun accord, à cause que ny les Catholiques ny
 les Protestans ne vouloiēt recevoir en tout & par tout, ce qui
 sembloit auoir esté assez accordé au liure présenté à l'Empe-
 reur. Et à la verité les Theologiens des Protestans meirēt par-
 apres en lumiere des interpretations des articles accordez, si
 broüillées, selon leur coustume, qu'il estoit besoing d'auoir vn
 Oedipe, pour apertement declarer ce qu'ils vouloient dire.
 Quand est des Princes & Estatz des Protestans, ils n'approu-
 uoient pas entierement le liure, ny les articles accordez, mais
 ils affermoient qu'ils vouloient acquiescer à la Confession

d'Ausbourg. Messieurs les predicans feirent aussi imprimer quelque escript, auquel ils accoustroient de toutes pieces le Cardinal Contarein, personnage tres-docte, & issu d'une lignée tresnoble: aux calomnies desquelz le docte Theologien Eckius respondit pertinemment. Bref, ceste iournée fut rompuë à la par-fin sans faire rien qui valust, & au grand detrimment de l'Empereur, qui auoit fait estat de faire encore vne course sur les Turcs en Afrique: dont ledit Sieur se retira en Italie, & dela print la route d'Afrique, ayant ia l'hyuer à doz.

*Vanité de
Sleidan en
traictant
ce qui fut
fait au col
loque de
Ratisbone.*

SLEIDAN traictant ce qui fut fait au colloque d'Vvormes, lequel par-apres fut continué à Ratisbone, ment en plusieurs pointz fort impudemment & à l'accoustumé: & purge si dextrement les Theologiens de sa faction, qu'il reiette toute la faute sur les Catholiques, lesquelz il dict auoir prolongé l'affaire de iour à autre, & auoir proposé nouuelles & estranges conditions. Comme ainsi soit, qu'au contraire ceux de l'autre costé proposoient les plus estranges conditions du monde, par lesquelles ils vouloient, que non seulement les sentences des collocuteurs, mais bien encore les argumens, raisons, & explications d'icelles, fussent redigées par escript, desirans par cela que iamais on ne veist la fin ny le bout du colloque. Et par-ainsi il est beaucoup plus vray-semblable, q̃ ceux qui requeroient vne si absurde forme d'escrire tout ce qui seroit dict, cherchoient des subterfuges & eschappatoires, & nō pas les Catholiques, comme Sleidan n'auoit garde de faillir à leur obiecter. Tellement que par là il appert, que ces hommes sont effrontez du tout, lors qu'il est question de controuuer quelque chose contre les Catholiques, & ne se soucient point comment ils puissent garantir leur cause, quoy que ce soit avec la perdition du miserable peuple. Et à fin que le lecteur n'estime, que temerairement j'accuse Sleidan de mensonge en tant de lieux, les liures des gens doctes sont en lumiere, par lesquelz il est fort aysé de conuaincre les bayes & mensonges de Sleidan. Voyre luy-mesme descouure si apertement les mensonges qu'il commet, q̃ veritablemēt il ne faut point appeller d'autres tesmoins. Et toutesfois ses pernicieux com-

mentaires font leuz d'un chascun, pourautant qu'ils se delectent d'estre miserables, & d'estre poussez en tous erreurs. Au lieu mesme où il parle de la journée de Ratisbone, il dict que les suppostz du Pape cherchoient des eschappatoires & subterfuges, prolongeant le temps, & amenant maintes excuses: & toutesfois s'estant oublié de cela, il dict que Eckius, (lequel il blasonne maintesfois, & à tort) se dist estre prest, lors q' l'Empereur eut deputé ceux qui deuoient cōtinuër le colloque de Ratisbone. Mais quelle cause y a-il que les Catholiques desirerent des eschappatoires, veu que nous n'auons presque affaire sinon qu'avec des moynes apostatz & autres leurs adherans, lesquelz ne font que souffler des heresies pieça condamnées, pour lesquelles viuement refuter il faut tant seulement les reuoyer à leur premiere origine? Je vous prie me dire, s'il y a grand affaire à venir en dispute avecques ceux, qui veulēt replanter des heresies arrachées de l'Eglise plus de mille ans: & ne se glorifient d'autre chose, sinon qu'ils ont attiré à leur party la simple populace, enchantée à force de mēsonges par eux amenez: laquelle si vne fois elle se pouuoit appercevoir de leurs ruses & tromperies, ie m'assure qu'ils ne tarderoient gueres à payer le suplice de leurs demerites. Mais pourautāt que ie pourroy encore demeurer sur ce propos à refuter les refueries de Sleidan, plus longuement qu'il n'est besoing, ie suis content de laisser ce propos, & passer outre.

CESTE année fut vne multitude incredible de sauterelles fort grandes, es regiōs qui auoy sinent le Royaume de Poloigne. Icelles premierement n'auoiēt point d'esles, mais elles sautoient bien auāt: peu apres elles en eurent quatre: & furēt veuës voler en si grande multitude, qu'elles occupoient deux mil de long & de large, & estoit l'espeſſeur telle, que la splendeur du Soleil ne pouuoit penetrer à trauers elles sur la terre qu'elles couuroient. Il est impossible de dire le dōmage qu'elles feirēt à toutes choses que la terre produiēt, à cause qu'elles gastoient tout, & rongeoiet iusqu' à la racine. Elles voloient à trauers les riuieres, les arbres, les maisons & tout cē qu'elles rencontroient. Lors que les esles leur estoient venuës, elles e-

*Sauterelles
en multi-
tude in-
croyable,
& le dō-
mage fait
par elles.*

stoient grosses cōme le doigt d'un hōme, & c'estoit lors qu'elles faisoient plus de dommage aux fruitz, & à tout ce qui sort de la terre pour l'usage de l'homme. On ne peut iamais ny par force ny par engin retarder leur furie tāt que l'esté dura, mais quand l'air vint à estre plus froid au temps d'Autōne, ellės furent esteintes, laissant vne semence noire, d'où l'année suyuate vne autre sorte de vermines nasquit. Il faut bien dire que c'estoit vne playe & vengeance, enuoyée de Dieu pour punir les pechez des hommes : toutesfois à fin que d'elles les hommes retirassent quelque profit, vous eussiez veu les bestes les deuorer auidement estans mortes, & principallemēt les pourceaux, qui s'en farcissoient à creuer, de maniere que le bestail sembla auoir la chair plus grossiere, pour auoir esté nourry de ces sauterelles. Le vulgaire les appelloit Zarances, & pēse l'on qu'elles n'estoient pas beaucoup dissemblables aux Aegyptiennes, desquelles le liure de l'Exode nous fait mētion. Ceste année elles furent premierement en Valachie, & deuorerent tout iusqu' à la terre enuiron soixāte mil de païs iusqu' à Leopoly. Ce sont les calamitez, par lesquelles Dieu a de coustume de semondre les hommes de faire penitence de leurs pechez, silz ne veulent sentir affliction plus grande.

*Ferdinād
delibere de
l'auoir ie
Royaume
d'Hōgrie.*

EN VIRON ce temps, sçauoir est l'année prochainement passée, Ferdinand Roy des Romains ayāt sçeu pour certain la mort de Iehan, Roy d'Hongrie, proietta en son esprit de reconquerir ce Royaume, à ce l'instiguans tous les plus grandz Seigneurs d'iceluy, & la plus part de la noblesse, lesquels remōstroient qu'il ne falloit pas laisser escouler vne si belle occasiō: ce qu'affermoiēt pareillement quelques Capitaines Alemās. Mais Hierosme de Lasco Polonoys, hōme fort illustre tāt par sa noblesse que par l'experience de maintes choses, meit en teste au Roy, que laissant à part tous ces desseings de guerre, il taschast de faire tāt par presens & prieres avec Solymā, Empereur de Turq̃e, qu'il luy permeist de tenir le Royaume souz droict de vasselage, comme auoit fait Iehā le Vayuode. Leq̃l conseil sembla bien bō à Ferdinād, & voulut q̃ Lasco mesmes feist cest Ambassade, à cause qu'il auoit grand' entrée en la

Cour de Solymā, de maniere qu'il partit de Viēne pour aller à *Ambassa*
 Cōstantinople. Neātmoins Ferdinand ne laissoit pas à dōner *de d'ue-*
 ordre à ses affaires, & s'apprestier à mener guerre. Au moyē de *luy vers le*
 quoy il enuoya vn Ambassadeur par deuers la Royne d'Hon- *Turc, &*
 grie, pour luy ramēteuoir le cōuenu fait nouuellemēt avec le *vers la Roy*
 feu Roy Iehan, le sommaire duquel estoit, que lediēt Iehan e- *ne d'Hon*
 stant decedé, le Royaume reuiendrait à Ferdinand: & partant *grie.*
 que de bonne volonté elle luy cedast le Royaume. En quoy
 faisant, Ferdinand promettoit de donner au fils d'elle la pro-
 uince de Sepuse, & bons & hōnestes reuenuz à la Royne. Ve-
 nu q fut l'Ambassadeur à Bude, à peine peut-il trouuer moyē
 pour parler à la Royne, à cause que quelques Courtisans tas-
 choient fort d'empeschier sa legation. Mais luy ayant esté dō-
 né pouuoir de proposer sa charge, la Royne, qui estoit encore
 toute esperduē de la fraische mort de son espoux, ne luy feit
 autre responce, sinon qu'elle communiqueroit toute l'affaire
 avec son pere Sigismond, Roy de Poloigne, & qu'elle feroit *Respōce de*
 tout ce que son-diēt pere auroit aduisé, la vertu & integrité *la Royne.*
 duquel n'auoit point esté incogneuē à Ferdinand iusques icy.
 L'Ambassadeur estant de retour vers son maistre, apres auoir
 recité l'estat du Royaume, & ceux qui y auoient la plus gran-
 de autorité & preeminence, sa harangue fut trouuée si bōne,
 que de ce pas le Roy Ferdinand resolut de reconquerir par
 force d'armes, le droict qui luy appartenoit au Royaume
 d'Hongrie. Par ainsi il met sus vne armée assez belle, & l'en- *Guerre en*
 uoye à Strigonie, ville fauorable à Ferdinād. Et delà elle mar- *Hongrie*
 cha vers Vicegrade, où il y a vn chasteau assis sur le coupeau *par le Roy*
 d'vne montaigne, fort plaissant & delectable à voir. Laquelle *Ferdinād.*
 ville les Alemans forcerēt par leur vaillance, si que sortans de
 Vicegrade, ils s'emparerent sans coup ferir des villes de Pest
 & de Vaccie: & delà tirerent droict vers Bude. Les Alemans
 auoiēt pour leur chef le Seigneur Leonard Velsie, lequel de-
 sirant de tenir plustost le siege deuant Bude, que de l'assaillir
 brusquement, se campa aux eaux chaudes. Mais ayant là de-
 meuré quelque temps, il rebroussa chemin vers Vicegrade,
 deliberé de prendre le chasteau par force, lequel quoy qu'il

L'AN M.D.XLI. HISTOIRE DE TOVTES CHOSSES

fust situé en vn lieu presque inaccessible pour sa hauteur, toutesfois il fut battu si fort que la bresche y fut faite. Pris qu'il fut, le camp s'achemina vers la ville d'Albe Royale, laquelle *Albe roy
ale prise
par Ferdi
mand.* sembloit estre inexpugnable & de sa nature & par les homes qui y estoient: mais si est-ce que par les cōseils de Percin, qui fauorisoit grandement le party de Ferdinand, elle fut aisémēt renduë audict Roy, qui y meit bonne & grosse garnison. Ce fait, Vellie retourna avec tout l'ost à Strigonie, certaines causes à ce le mouuās, & lors licentia l'armée pour hyuerner. Or

*Les Turcs
se mettent
en armes
pour secou
rir la Roy
ne.* ce-pendant les Turcs voyfins de ces païs commençoient à faire appareil d'armes, pour aller donner secours incontinēt à ceux de Bude: & neantmoins personne ne bougeoit encores, iusqu'à tant q̄ Solyman estant acertené par les Ambassadeurs de la Royne comme toutes choses alloient, commanda tres-expressement à ses Lieutenans en ces païs-là, que sans tarder aucunement ils secourussent la Royne. Dequoy les Ambassadeurs de la Royne conçurent vne liesse incroyable, ausquels en outre le grand Solyman auoit donné des presens de grād

*De Lasco
à Constan
tinople.* prix pour iceux presenter au ieune Roy. Si aduint que comme ils retournoient en leur païs, de Lasco entra dans Constantinople, où estant introduit pour parler à Solyman, il harangua si bien sur la puissance de l'Empereur Charles, qu'on luy commanda d'aller en prison: & mesmes aucuns disoient qu'il meritoit de perdre la vie, à cause qu'il demandoit paix, tandis que

*Les Turcs
guerroient
en Hon
grie pour
la Royne.* l'armée de Ferdinand rauageoit toute l'Hongrie. Pédant que les choses se passioient ainsi à Constantinople, les Turcs ayās amassé grosses troupes cōme il leur auoit esté enioinct, passerent les riuieres de Drau & de Sauo, deliberez de bien secourir la Royne. Venuz qu'ils furēt iusques à la Dunoye, malgré eux ils furent contraincts de seiourner, iusqu'à tant que la glace, qui estoit és extremitez du fleuue assez auant, fust fonduë par la chaleur du temps. Ce qui aduint sur le printemps de l'an 1541. auquel temps les Hongres, ayans les Turcs pour escorte, recouurerent Vaccie, en laquelle ils meirent le feu, apres auoir passé quelques vns au tranchant de l'espée. Apres cela, ils meirent le siege deuant Pest, mais en vain, à cause que les

les Alemans & Hongres, qui estoient là en garnison, feirēt es-
preuue contr' eux de leur magnanimité, tellement qu'en fin
sans rien y exploicter, les Turcs laissans l'Hongrie se retirerēt
en leur pais. Ce qu'ayant entendu le Roy Ferdinand estant à
la iournée de Ratisbone, persuada facilement à l'Empereur,
que Rochandulfe, grand-maistre du palais Royal, fust enuoyé
en Hongrie avec nouuelles forces. Iceluy donc s'estant ioint *Siege de-
uāt Bude*
aux vieilles bendes, delibera de donner l'assaut à Bude. Où e-
stāt, il enuoya quelques herautz pour sommer la Roync à se *par Ferdi-
nand.*
rendre, mais ils ne peurent rien impetrer d'elle. Au moyē de-
quoy la ville fut battuē en deux endroiētz à force coups de
canon, si bien que la bresche conuioit déia les assaillans à en-
trer dans la ville, quand la nuyēt estant suruenue, on laissa cou-
ler l'occasion de forcer ceste ville, à la grand' ignominie des *Occasion
mesprisee
par vn ca-
pitaine*
Alemans, & au dommage inestimable du Roy Ferdinād. Car
comme l'assaut fust differé iusqu' au lendemain, ce-pendant *fort dom-
mageable.*
ceux de dedans trauaillans sans cesse dressèrent vne nouuelle
platte-forme, si bien que quand les Alemans voulurent le len-
demain forcer les murailles, ilz trouuerent à qui parler, & ne
fut sans grande effusion de sang. Cela fut cause qu'on la vou-
lut auoir par mine, mais ce ne fut rien. Or adōc y auoit à Bude
quelque Hongre appellé Bornemisse, le quel esmeu de quel-
ques haynes particulieres promettoit avec quelques cōditiōs *Bornemiss-
se veut tra-
hyr la ville*
de rendre la ville à Ferdinād, pour-quoy faire il falloīt que les
Hongres, qui estoient au camp de Ferdinand, entrassent de-
dans la ville par vn lieu caduc & facile. Ce que Bornemisse a-
uoit aduise, desireux par ceste proditiō de pardonner au sang
innocent d'vn infini nombre de citoyens, se doutant bien que
les Alemans ayans receu plusieurs maux n'en auroiēt pitié ny
compassion. L'opportunitē estoit merueilleusement propre
pour surprendre la ville, mais le Capitaine Rochādulfe ne s'y
gouerna pas sagement, faisant entrer les Alemans dās la vil-
le, au contraire de ce qu'il auoit promis de faire. De façō que
Bornemisse cognoissant que ce n'estoient pas ceux qu'il de-
mandoit, ne voulut pas seruir d'auant-coureur aux Alemans: *La trahy-
son succede
mal.*
& sur ces entrefaictes la sentinelle de la ville commēça à def-

Mmm.j.

couvrir la trahyson, tellemēt que l'alarme sonnée, les Alemāns gaignerēt au pied, desquelz les vns furēt tuez, les autres prins, le reste se sauua à la fuyte. Lequel faict augmēta de beaucoup l'infamie de Rochandulfe, tellement qu'il ny auoit soldat au camp, qui ne l'accusast d'auoir perdu vne telle opportunité, & victoire par consequent. Et apres on consulte les moyēs pour bien assaillir la ville. Solyman aduertiy de tout cecy à la bōne heure, enuoya vne grosse armée en Hongrie, pour donner secours à la Roynē. Et tandis il temporisoit à Adrianopoly, ne craignant pas sans cause les forces de l'Empereur Charles & des Alemans, bien que ce fust sans raison en ce temps icy, à cause que l'Empereur n'y estoit pas. Les Alemāns ayās ouy les nouvelles des Turcs qui approchoient, consulterent longuement de ce qui estoit expedient de faire: & comme chascun proposoit ce que bon luy sembloit, l'opinion de Rochandulfe gaigna, lequel fut d'aduis à la mal'heure qu'on allast trouuer l'armée des Turcs quelq part qu'ils fussent. L'armée donc marcha auant, & vint camper vis à vis des Turcs, de maniere qu'il n'estoit iour qu'il n'y eust quelque escarmouche, mais de façō que par cela le courage croissoit à l'ennemy, & celuy des nostres s'alentissoit peu à peu pour beaucoup de raisons. Neantmoins les Turcs durant ce temps ne gaignerent guerres, & plusieurs des leurs demurerent sur le champ, iusqu'à tāt que les choses vindrent à tel point, (les nouvelles venuēs que Solyman venoit en personne avec des forces toutes fraisches) que le camp de Ferdinand laissant Bude se retira à Pest. Mais les Turcs ayans sceu ceste entreprinse, feirent grand carnage des nostres en ceste fuyte, conioinctz avec ceux de Bude. Et par apres les Turcs s'emparerent de la ville de Pest, les nostres s'en estans fuys, où ils feirent vn grād & horrible meurtre des pauvres Chrestiens. Somme qu'on dict, que plus de vingt mille Chrestiens perdirent la vie en ceste guerre, en quelque lieu que ç'ayt esté. D'auantage les ennemys gaignerent trente-six grosses pieces de batterie, & cent cinquante autres pieces plus petites, outre vne merueilleuse multitude de pouldre à canō, de boulerz, d'armes, de iauelotz, & de victuailles. Rochandul-

*Mauuais
Conseil du
Capitaine
pour aller
contre les
Turcs.*

*Fuyte du
camp.*

*Grande
proye des
Turcs sur
le camp de
Ferdinand*

fe, qui ne s'estoit pas bien gouuerné en ceste guerre, mourut tant pour la douleur d'un coup de boulet qu'il auoit eu, que d'angoisse & marriſſon. Solyman cheminant à grandes iournées arriua peu apres en Hongrie, où on luy amena enuiron huit cens prisonniers Chrestiens, lesquelz il feit tous massacrer cruellement, fors bien peu ausquelz il pardonna. Entr'iceux y auoit vn gendarme de Bauiere, de stature merueilleusement haute, lequel il commanda estre donné à vn nain, qui à peine luy venoit iusqu'aux genoux, pour estre par iceluy tué. C'estoit veritablement vn fort hideux spectacle, qu'un vaillant homme pour derision & mocquerie fust par la main d'un nain tre percé de tant de coups, qu'il tombast à terre, & en fin eust la gorge couppee n'en pouuant plus. Neantmoins c'estoit le passe-temps, auquel ces felons Turcs se delectoient grandement. Ces choses ainsi aduenues, Solyman enuoya de beaux presens au Roy infant, & aussi aux plus grandz Seigneurs d'Hongrie, & persuada à la Roynne de luy enuoyer son fils au camp, chose pleine de grand peril. Si fut l'enfant mené à Solyman, gisant en vn berceau Royal, & mis en vne listiere dorée, laquelle estoit suyvie de plusieurs grands Seigneurs, ausquelz nous auons dict que Solyman auoit enuoyé des dons. Venuz qu'ilz furent à la tente de Solyman, il festoya le petit enfant bien fort, & arraisonna sa nourrice courtoysment, & commanda à ses enfans Selym & Baiazet illec presens, d'embrasser l'enfant & le baiser: mais le rusé tyran se monstra tel qu'il estoit, faisant entrer quelques bendes dans la ville, tandis que les Seigneurs disnoient avec les Baschatz, par quel moyen il s'empara de Bude, si que sans tumulte aucun les habitans rendirent les armes au commandement du lieutenant du Turc. Bien est vray que les Turcs ne feirent tort qui soit aux habitans, à cause qu'ilz estoient là rengez par la ſeuerité de la discipline militaire: mais il n'y a doute, que ceux de Bude ne furent fort troublez en leurs espritz par vne si soudaine mutation de leurs affaires. La nuyct venue, Solyman r'enuoye l'enfant à la ville, mais il reteint les grands Seigneurs chez soy. Entre lesquelz estoit George Euesque de Varadin, sur

*Spectacle
de la cru-
auté Tur-
quesque.*

*Presens de
Solyman à
l'infant
d'Hongrie
& aux
Seigneurs.*

*Bude pri-
se par le
Turc par
grande ſi-
mpe.*

lequel on reiette principalement toute la cause de ce mef-
chef & defastre d'Hongrie. Les Baschartz, qui au-parauant se
monstroient doux & affables aux Seigneurs grandement es-
tonnez, commencerent lors à les examiner de quelques cho-
ses de bien grande importance, sans honte & clemence quel-

*La Royne
est bien es-
tonnée.*

conque. Si que la Royne estant toute effrayée de cecy, escri-
uit lettres de supplication à Solymán, par lesquelles elle luy
ramenteuoit la foy qu'il auoit promise, & le supplioit de luy
r'enuoyer ses gens. Ce-pendant on fut quatre iours à delibe-
rer du Royaume d'Hongrie, mais pour-ce que les Baschartz

*Sacrifice
des Turcs
en Bude.*

estoint differens en leur opinion, Solymán entra dans Bude
le penultime iour d'Aoust, & sacrifia en l'Eglise de nostre Da-
me, laquelle fut premierement purgée par les prestres Turcs
à la mode des Mahometistes, sçauoir est les autelz demolis, &
les images abbatuës: maniere de faire que noz nouveaux E-
uangeliques imitent à present de bien pres, si que nous pou-
uons facilement cognoistre, qu'il nous veulent apporter non
la religion de Iesus-Christ, ains celle de Mahometh. Ce faict,

*La Royne
perd ses
pays.*

il commande que la Royne vuide la ville & le chasteau, &
qu'elle s'en aille avecques son fils en Lippe outre le Tibisque,
où elle seroit Dame & maistresse. A quoy la miserable obeir,
non sans pleurer & lamenter son defastre, detestant l'infideli-
té du Tyran, qui luy auoit faict laisser toutes ses artilleries, ses
armes, & victüailles: & pour n'estre seule mal-heureuse, les Sei-

*Cause de
ce defastre*

gneurs luy feirent compagnie. Vrayement ceste descōuenüë
n'aduint pas totalement outre raison & à la Royne & aux Sei-
gneurs, qui auoiët faict venir les Turcs, ennemys diametraux
des Chrestiens, non au dommage seulement de l'Hongrie,
mais bien de toute la Chrestienté. Ilz deuoient certes accom-
plir le pact & conuenu, par lequel ils n'ignoroient pas, que le
Royaume d'Hongrie estoit proprement deu à Ferdinand,
Prince tres-catholique. Mais ô ambition & cōuoytise, en quel
les miseres ne precipites-tu bien souuent les mortelz! Je croy
bien pourtant que la Royne ne se fust mōstrée difficile à trai-
cter quelque paix & accord avec le Roy Ferdinand, si les cō-
seilz & aduertissemens des Seigneurs, qui aspiroient à quel-

ques grandes dignitez, ne l'eussent retardée de ce faire . Car ainsi faut-il estimer de la fille du bon & religieux Sigismond Roy de Poloigne , veu mesmement qu'elle ne se gouuernoit pas en cela selon sa volonté , ains selon que luy conseilloyent ses gens. Or pour continuer ce faict, apres que Ferdinand eut entendu par certaines nouuelles la desconfiture des siens & la victoire des Turcs, enuoya des presens nouueaux & excellens à Solyman, pour acquerir plus aysément ses bonnes graces . Si furent les Ambassadeurs honorablement receuz par les Turcs, & le lendemain quād ilz disnerēt avec les Baschatz, ilz veirent qu'on ne seruit autre chose pour mager, sinon q̄ du ris & du moutō. Et certainemēt celle réperance des barbares nous donne sur les doigtz , & monstre nostre gloutonnie, à cause qu'iceux mangent seulement pour satisfaire à nature, & non pour friandise aucune: mais les nostres estiment q̄ iamais ils n'ont bien traicté ny festoyé homme, sinon quand ils y ont employé tous les moyēs pour prouoquer l'appetit, & pour biē farcir le ventre, de maniere qu'à bon droict on peut dire des nostres, qu'il y en a plus de mortz par intemperance , que par glaiue. Toutesfois on voit que c'est la coustume de plusieurs, & assez derestable, qu'ilz demeureront à table 3. ou 4. heures, chose non seulement dommageable à l'ame , mais encor' au corps: & faut bien dire que telles gēs ensuyuent le dictō, boy, mange, iouē, car apres la mort il n'y a plaisir ny volupté. Apres cela les Ambassadeurs du Roy Ferdinand estans introduictz pour parler à Solyman, luy presenterēt les dons qu'ils auoiēt, dont il reçeut vne ioye fort grande. Les dons estoient vne haute coupe d'or, cōme ont accoustumé d'en vser les riches d'Allemagne, laquelle estoit enrichie de plusieurs belles & pretieuses pierres. Y auoit aussi vne admirable machine d'argent, laquelle vous eust exactement mōstré l'espace des heures, les mouuemens des estoilles erratiques, & la conionction du Soleil & de la lune par chascun moys: à cause que par le dedans d'icelle machine y auoit des rouēs dentées tout autour, & certains pois, qu'en vn moment designoiēt voire les plus petites mesures du temps, à plusieurs siecles . Ceste machine fut ap-

*disner des
Baschatz
Turcs, a-
vec les
Ambas-
sadeurs de
Ferdinād.*

*Ambassa-
de de Fer-
dinand au
Turc.*

*Machine
admirable
monstrant
tous les
mouuemēts
des cieux,
donnée
au grand
Turc.*

portée deuant Solymán sur l'espaule de douze seruiteurs, laquelle remplist d'admiration & Solymán mesme, & tous ceux qui estoient en sa Cour. Mais quand ce vint que les Ambassadeurs de Ferdinand eurent demandé, que leur maistre peust tenir le Royaume d'Hongrie en droict de vassellage, deux iours apres on leur feit respõce, que si Ferdinãd vouloit auoir paix, il falloit qu'il quitast toutes les places d'Hongrie, & que d'abondant il payast tous les ans certain tribut pour l'Austrie, aux Turcs. Telle fut la superbe & felonnie respõce de ce tyran en-orgueillly, & fut impossible d'impetrer autre chose, nõ pas les moindres treues du monde, pour ce pendant communiquer l'affaire à l'Empereur & au Roy Ferdinãd. Si veulx admonester le lecteur en passant, q̃ quãd les Ambassadeurs furent introduictz à Solymán, chascun d'eux fut conduict par deux Baschatz qui les prindrent au milieu du bras comme filz les eussent voulu honorer, & ainsi les meneret baïser la main dextre de l'Empereur. Car on n'entre point autrement où est le grand Seigneur des Turcs, que au preallable ils ne fouillent si vous auez point quelques armes souz les vestemens: & en prenant les bras en la sorte sus-dicte sans faire semblant de rien, ilz empeschent, que personne ne puisse rien attenter contre sa personne. Et d'auantage iceluy Seigneur estât assis, a tout aupres de soy vne espée recourbée, vn bouclier, vne masse de fer, vn arc Turquois & des flesches: & par là il monstre, que celuy qui veut estre redouté de tous, n'est iamais sans crainte. Ce faict, les Ambassadeurs furent despeschez, ausquelz Solymán feit donner plusieurs sortes d'accoustremens & force argent, par largesse Royale. Et ne tarda gueres qu'il enuoya quelques bandes de Turcs, pour rauager & brusler l'Austrie & la Morauie, lesquelz neantmoins furent empeschez grandement de ce faire, les riuieres estant enflées par les grandes pluyes. Finalement il establit pour Gouverneur à Bude vn Hongre, lequel ayant esté prins à la guerre des son ieune aage, fuyuoit alors la superstition de Mahometh. Pareillement de Lasco, legat de Ferdinand, fut deliuré de prison, mais peu apres il mourut en Poloigne. Solymán doncques s'en re-

*Terrible
respõce
des Turcs.*

*Maniere
de faire
des Turcs,
quand les
Ambassa-
deurs vont
parler au
Prince.*

tourna en Thrace, & comme il sy acheminoit, nouvelles ^{La Trans}
 luy vindrent que la Transsylvanie s'estoit renduë: laquelle ^{sylvanie se}
 nouvelle luy fut fort agreable, quoy qu'en fin il permit ^{rend au}
 que ceux de Transsylvanie prestassent foy & obeïssance au ^{Turc.}
 ieune Roy, auquel cy-dessus a esté dit que la region de
 Lippe fut concedée. A present ces felons Turcs & barbares
 occupent presque tout le Royaume d'Hongrie, chose que les
 hommes graues & bien entenduz deplorent par vne infinité
 de larmes. Ce Royaume fut tref-florissant & tref-puissant du
 temps de Mathias Huniades, lequel Roy par ses actes cheua-
 lereux ne fut pas seulement redoutable aux Turcs, mais bien
 encor' à ses voisins. Luy estât allé de vie à trespas, les Hongres
 sabastardirent par bobance, paresse, fait-neantise, & orgueil,
 premieremét souz Vladislas, fils de Casimir, Roy de Poloigne, ^{Abastar}
 abusans de la trop grande douceur & clemence de ce Roy: ^{dissent}
 & puis apres souz le Roy Loys, ieune, & qui n'estoit encore ^{de la ver-}
 guerres experimenté. Aucuns se plaignent merueilleusement ^{tu des Ho}
 de la pompe & magnificence de quelques grands Seigneurs ^{gres, &}
 du Royaume, à laquelle ils vacquoient, pendant que les fron- ^{leurs deli-}
 tieres du Royaume desgarnies de choses necessaires & de gar- ^{catesse.}
 nisons, estoient pillées & rauagées par les Turcs. Certes cela ^{propos fort}
 est vne chose admirable, voire qui cause vn grād creue-cueur, ^{notables.}
 estre si peu soigneux de ses affaires, que ayant l'ennemy si puis-
 sant à sa porte on ne face que se doner du bon temps, & mes-
 priser tous perils, quelques grands qu'ils soient. Et veritable-
 ment ayant vn ennemy si cruel en barbe, ce n'estoit pas la sai-
 son de rire & faire du magnifique, ains falloit addoucir l'ire
 de Dieu embrasée, corriger les mœurs, chasser tous vices &
 crimes, & réforer son Royaume par bonnes garnisons. Mais
 helas, les hommes sont aueuglez! noz Alemans ne font enco-
 re rien aujourd'huy! ils n'ont daigné apprendre par la calami-
 té & defastre des Hongres, comment ils se deuroient gouver-
 ner. Ains au cōtraire, à fin que l'ire de Dieu eternal s'embrase ^{Peril de}
 par tous les moyens qu'il est possible sur nous, il ne nous suffit ^{l'Alemai}
 pas de mener vne vie infecte de pechez, mais encore chacun ^{gne, à cau}
 iour nous controuuons des erreurs nouueaux, lesquels nous ^{se des dini}
 sont. ^{sions qui y}

adorons comme quelques idoles, souz le pretexte de la parole de Dieu. Je ne sçay quels lunatiques viennent l'un apres l'autre, voire plusieurs ensemble en mains endroits, lesquels fâydans de quelques prodigieuses menfonges & heresies condamnées, dissipent l'Alemaigne en mille sectes: & toutesfois chacun d'eux n'a faute d'auoir force sectateurs, qui les adorent & prisent ny plus ny moins que fils estoient Apostres de Iesus-christ. Qui est donc celuy qui peult douter, que les Alemans ne payent aussi bien leur temerité, qu'ont fait les Hongres? Et quand bien nous n'aurions aucun ennemy estranger à craindre, si est-ce qu'il est impossible que l'Alemaigne ne soit ruinée entierement, par la confusion horrible de la religion & de toutes choses, si Dieu ne nous monstre sa misericorde. On dit aussi que quelque Courtisan, voyant que par le Royaume d'Hongrie, comme nous auons dit, il n'estoit question que de rire, faire le pompeux, orgueilleux & insolét, dit que iamais il n'auoit veu ny ouïr parler d'aucun Royaume, lequel ait esté perdu en plus grande ioye & liesse, q̃ fut le Royaume d'Hongrie. Et faut sçauoir que les Chrestiens ont fait vne grandissime perte, quand ce puissant & opulent Royaume leur fut osté d'entre les mains. Mais ce fut vne vraye folie & sottise tres-grande, qu'estant en Hongrie vne telle confusion de vices & desespoir de toutes choses, toutesfois ils ne voulurent iamais demander paix au Turc Solymán, quand il vint à succeder à son pere, ains au contraire ils retindrent ses Ambassadeurs prisonniers. Car pour vray le Turc estant irrité de ceste iniure, enuahit hostilement l'Hongrie, & peu à peu a si bié gaigné pais, qu'à peine pourroit-il estre plus pres & prochain de l'Alemaigne. Personne ne peult nyer, que ce Royaume n'ait esté le vray bouleuert, & la meilleure garnison de toute la Chrestienté: chose que les desastres qui aduiénent maintenant tous les iours, tesmoignent assez. Et d'auantage ce Royaume est si opulent, que non seulement les Hongres, (combié que eux principallemēt, comme estant leur patrie) mais aussi tous les autres Chrestiens deuoient s'estudier à toute force de le conseruer: & l'ayant perdu, deuoient essayer tous moyens pour

Beautrait
d'un Courtisan.

Temerité
des Hongres.

Hongrie,
bouleuert
de la Chrestienté.

pour le reconquerir. Car vous ne scauriez dire chose, l'usage de laquelle puisse appartenir au soulas & commodité des hommes, que vous ne trouuiez aysement en iceluy, & mesmes ce qui se trouue és autres nations, est en Hongrie beaucoup plus excellent qu'ailleurs. Il y a grand'abondance d'or, d'argent, de cuyure, d'acier & de fer, non pas qu'on l'apporte d'estrange país, ains cela croist és mines du Royaume mesme. Vray est qu'il y a bien peu de plomb, & encores moins d'estain. La terre y produict du metal fort bon & fort pur, & y a des eaux propres pour conuertir le fer en cuyure. Il y croist de bons vins, non pas qu'en tous lieux ils soient excellés, mais aussi en quelques endroitz ils ne cedent gueres aux vins de Candie en bonté. Il y a tousiours planté des biens de la terre, & de fruitz: & est si abondante en sauuagine & en oyseaux, que c'est chose fort inusitée que de defendre la chasse aux rustiques, & mesmes les païsans & autres gens de vile condition y viuent aussi bien que les gentils-hommes, de lieures, dains, cerfs, sangliers, tourdz, perdrix, phaisans & autres viandes delicieuses. Le bestail y est en si grande multitude, qu'elle en fournit à foison à l'Italie, Boëme, & Alemaigne, de maniere qu'on a obserué, qu'en vne seule année sont entrez par le grand chemin de Vienne plus de quatre vingt mille boeufz en Alemaigne, iaçoit que le bestail entre par plusieurs autres chemins. Bref, ce país est si fertile en poisson, qu'on le vend là à fort vil prix, & le donne on presque pour rien: combien que, peut-estre, le prix des choses y est aussi bien creu qu'ailleurs, par la calamité de ce temps, & croy bien que Dieu estant irrité, les choses par nous mentionnées n'y foisonnent pas tant, que par le passé, comme aussi nous voyons que dans ceste Europe le prix de toutes choses a esté sur-haüssé en bien peu de temps: mais il faut plustost attribuer cela aux vices des hommes, que à la sterilité de la region. En la ville de Bude, Chef de tout le Royaume d'Hongrie, y a plusieurs baings d'eaux chaudes, les vns desquels sont affectez au Roy, & les autres sont communs, fort propres pour bien lauer & nettoyer les corps humains: & y en a d'autres, qui ne sont bons à se lauer, si premier on ne les fait

Nnn.j.

*Richesses
d'Hongrie.*

*Vertu des
eaux.
Bons vins*

*Bestes &
oyseaux.*

Abondance de bestail, & de poisson.

*Baings de
Bude.*

refroidir. Car les eaux y sont si chaudes & bouillantes, que si vous iettiez vn œuf dedans, il seroit cuit tout incontinent.

*Baigns ad-
mirables.*

Mais iouste icelles y a vne fontaine d'eau froide, si prochaine de la chaude, qu'en mesme place on peut puiser de l'eau froide, & de la chaude tout ensemble. Ces baigns que nous auons dict estre à Bude, sont appelez les vns hautz & les autres bas, à cause que les vns sont au dessus de la ville, & les autres au dessous.

*Les Turcs
se lauent
souuent.*

Les Turcs ont accoustre ces baigns fort proprement, comme ceux qui se plaisent fort aux baigns & lauoirs, & honorent grandement les eaux coulantes, desquelles ils se lauent maintesfois le iour, non seulement pour nettoyer les ordures du corps, mais bien encore celles de l'ame: & iouste iceux ont edifié certains lieux comme monasteres, esquelz les Deruises passent leur vie, hommes presque telz entr'eux, comme sont entre nous les mendiens. Car ces meschans idolatres de Mahometh ont aussi bien des moines à leur façon, comme les payens auoient leurs Philosophes, & les Indes leurs

*Les moy-
nes des
Turcs.*

Gymnosophistes à leur guise: & semble que ces Deruises soient quelques reliques de ceux-là. Car ils se bourrellent le corps, y imprimant des caracteres avec des fers chauds, ou en les couppant avec des rasoirs, & quelquefois en ces deux manieres, & c'est comme Satan possede des moines à sa poste. Et qui s'estonnera de cela, veu qu'il a bien des martyrs, comme les heretiques, qu'on a veu de nostre temps ayans esté con-

*Vn moy-
ne adoré
entre les
Turcs.*

dânez, aller à la mort ioyeux & alaigres? A Bude y a vne chapelle edifiée à l'honneur de quelcun de ces moynes, lequel estant encore plein de vie estoit honoré des Turcs, comme si c'eust esté quelque diuinité: & maintenant qu'il est mort, & enterré en ce lieu-là, ces pauvres abusez l'honorent fort religieusement, combien qu'autrement ils ne laissent images es

*La ville
de Bude.*

Eglises qu'ils ne demolissent. Et quand à la cité de Bude, c'est vne des belles villes de toute l'Europe, soit que vous consideriez le plan & assiette d'icelle, soit le bon air, soit la fertilité du terroir, soit l'abondance de routes autres choses necessaires pour passer la vie humaine, ou pour pompe & magnificence. Et toutesfois c'est ce Royaume si opulent, que les Turcs ont

osté aux Chrestiens, pendant qu'iceux ont appellé à leur secours & ayde, ceux qui sont ennemys mortelz des Chrestiens.

OR enuiron le temps que les Turcs s'emparoient d'Hongrie, deux Ambassadeurs du Roy de France, que sa maiesté enuoyoit en Turquie, estans aguerrez par les imperiaux, furent ruez sur la riuere du Po. L'un d'iceux estoit Antoine Rincon, Espagnol fugitif, lequel ayant esté condané à mourir, on estime que sans violer iustice il pouuoit estre tué, pouraurât qu'il festoit rendu aux ennemys. Tant y a que ce meurtre fut cause d'une tressanglâre guerre, quoy que le Marquis du Guast, Lieutenant de l'Empereur, s'excusast assez qu'il n'estoit pas aduenu par son moyen. Aduint que George d'Autriche, filz bastard de l'Empereur Maximilian, & Archeuesque de Valéce, venoit alors d'Espagne, lequel fut emprisonné à Lyon, pour venger le massacre commis, comme nous auons dict.

ENVIROn ce tēps François, fils d'Antoine Duc de Lorraine, print en mariage Christine, fille de Christierne Roy de Dannemarc. Ce q ne fut gueres agreable au Roy de France, qui scauoit bien, que ceste femme estoit fille d'Isabeau, sœur de l'Empereur, & espouse de Christierne. Pareillement enuiron ce temps le Roy de France feit alliance avec Christian & Gustaue, Roys de Dannemarc & de Suede suspectz de Lutherie: & ainsi il n'y auoit ordre aux affaires de l'Empereur, veu que tant de Roys conspiroient contre luy, si le bon Dieu ne l'eust prins en sa sauuegarde, attendu mesmement la grande perte qu'il feit ceste année en Afrique, comme nous allons dire.

PENDANT que l'Empereur Charles cōsumoit beaucoup de temps en vain, pour accorder les troubles de la religion à Ratisbone, vous auez veu que le Turc s'empara d'Hongrie. Ce que considerant l'Empereur, pour tenir le Tyran empêché en maintes guerres, meit sus vne armée pour la mener en Afrique: à quoy faire l'instiguoiet bien fort les plaintes & doléances des Espagnolz, lesquels souffroient maintes algara des par les Turcs sur la coste d'Espagne, que Asenague Lieutenant de Barberousse, né en Sardaigne, (mais qui auoit em-

brassé le Mahometisme en abiurant la loy Chrestienne) entre-
tenoit à Alger . Toutesfois ce ne fut pas fait sans que quel-
ques Seigneurs ne brocardassent assez l'Empereur, mais il n'e-
faisoit pas grand conte . Et quelque chose que peussent alle-
guer le Pape, André d'Orie, & le Marquis du Guast, lesquelz
pour diuertir l'Empereur de ce voyage d'Afrique proposoient
l'hyuer qu'il auoit ia à doz, non-obstant tout cela il demeura
stable en son opinion, & sceut si bien deduire deuant le S. Pe-
re les raisons qui à ce faire le mouuoient, que le Pape fut cō-
trainct de louer grandement son entreprinse. Lors que d'Ale-
magne il r'entra dans l'Italie, il fut en tous lieux receu fort ho-
norablement, mais nommément à Milan, combien que ce
grand Monarque, lequel chascun desiroit voir, se mōstra lors
au peuple affublé seulement d'un accoustrement noir, & ay-
ant vn meschant chapeau sur la teste : & voyoit-on à sa triste
contenance que quelque grād' amertume luy serroit le cuer,
comme s'il eust prognostiqué la descōfiture receüe à Bude le
iour deuant. Si parla avec le Pape à Luques, en quoy la
pieté de ce grand Pasteur cōsumé d'age est fort louable, veu
que plusieurs luy dissuadans de ne se mettre point à ce che-
min, comme fort perilleux pour sa vie, toutesfois on ne sceut
iamais faire qu'il ne se soignast du salut public des Chrestiens.
» Aussi disoit-il souuent: à quoy faire auons nous ceste vie, si nō
» pour faire ce deuoir à la Republique panchante déia à sa rui-
» ne, à la meilleure foy que nous pourrons? Et à la verité il vaut
» beaucoup mieux accomplir ce que tout le monde attend de
» nous, quand bien pour ce faire il nous faudroit mourir, que
» d'estendre vn peu l'espace de nostre vie par paresse desho-
» neste . Que si l'effect ensuyuant ne correspond pas à nostre
» volonté, toutesfois il ne sera iamais, que la bonne volonté de
mettre à chef vn honneste desseing, ne soit grandement lou-
ée. Pendant qu'on seiournoit à Luques, l'Empereur alla voir
le Pape par trois fois pour parler à sa sainteté, & le Pape fut
trouuer l'Empereur vne fois. Pareillement fut receu l'Ambas-
sadeur du Roy François, lequel demandoit Fregose & Rin-
con captifz, pour autant qu'il n'estoit pas encor asseuré qu'ilz

*Il est ve-
neu à Mi-
lan.*

*Le Pape
à Luques.*

*Abouche-
ment du
Pape &
de l'Em-
pereur.*

fussent mortz: & lors l'Empereur protesta publiquement, que tout ce qui leur estoit adueni auoit esté fait sans son commandement & à son desceu. Le Roy François requeroit le Duché de Milan pour Monseigneur Charles son filz, mais l'Empereur ne faillit pas à remonstrer son droit le mieux qu'il peut, & disoit que le Roy François estoit desplaisant de le voir ainsi prosperer en ce monde, & beaucoup d'autres choses qu'il n'est point besoing d'icy adiouter. Finalement fut arresté en ce Colloque, que le Concile seroit publié l'année prochainement suyuant, chose fort plaisante & agreable à l'Empereur. Or estoient toutes les forces que sa maiesté auoit leuées pour mener ceste guerre, de vingt & deux mille hommes de pied, & vn peu plus de mille cheuaux. Venu qu'il fut en Afrique, l'Empereur attendit deux iours les Espaignolz, au grand detrimment de la victoire presque assurée, & de son armée mesme. Et ce pendant il somme Asenague, Gouverneur d'Alger, de luy rendre la ville: mais quoy que l'Empereur luy feist tour de courtoisie & liberalité, le vilain luy respondit en mespris. Car l'Empereur l'exhortoit à receuoir la vraye religion, à cause que Asenague natif de Sardaigne, & initié en la religion Chrestienne, l'auoit abandonnée depuys. Estans doncques toutes choses necessaires preparées pour assieger celle ville, aduint que pendât qu'on attendoit l'artillerie, survint tout à coup vne pluye tref-froyde pleine d'orages, depuys la premiere veille suyuant apres toute la nuyct, dont nostre armée ayant esté toute nuict exposée à icelle, vous pouuez pēser quel dommage elle en receut: & encor' en mesme temps la tempeste tourmentoit tous les vaisseaux sur la mer. Les cheualiers Turcs & les soldatz Maures ne laisserent escouler vne si belle occasion en vain, ains se ruans sur les nostres fort impetueusement en tuerent plusieurs, mais toutesfois les nostres les repousserent brauiement. Lors les barbares s'acharnent encore d'auantage sur les nostres, & leur donnerent beaucoup d'affaires, lesquels non-obstant l'Empereur, non espouuanté de si grand peril & angoysses, alla secourir avec les Alemans à la bonne heure. Si continuoit touf-

*Le Roy de
mande
Milan.*

*Forces de
l'Empe-
reur.*

*Tempeste
terrible &
domagea-
ble à l'Em-
pereur.*

*Les barba-
res assail-
lent les
Chrestiens.*

*Nauires
enfance.*

iours l'horrible tempeste, & voyoient les gens d'armes deuant leurs yeux plusieurs nauires brisez aller au fond de l'eau, tellement qu'à bon droit chascun commença à craindre que les viures ne leur defaillissent: & c'estoit lors que l'Empereur demeurant constant, & portant vne face riante & gaye, resiouïssoit toute son armée, & ne laissoit aucun deuoir d'vne prouidence militaire, ny office d'humanité, iusqu' à tant que retirant son camp, & le ceignant de bonnes forces contre les courses des barbares, qui de tous costez venoient voltiger,

*Constance
& huma-
nité de
l'Empe-
reur en-
uers ses gē-
s.*

commanda que les Capitaines lassez du trauail se reposassent, & consola les pauvres naurez en la bataille, & les fait mener & bien traicter souz les tentes, lesquelles malgré l'opiniastreté des vens estoient demeurées entieres, luy-mesme cependant ayant le harnois sur le doz, tout mouillé qu'il estoit. En ceste iournée il perdit enuiron trois cens bons gens d'armes, & d'auantage quelques mariniers furent engloutys dans la

*Disette de
viures en
son armée.*

mer avec grand nombre de canons. Si estoient déia à grande disette de viures, si que l'Empereur fut forcé de sustenter l'armée de chair de cheuaux. Or fort-il obseruer en ce Prince, qu'estant enuironné de tant de perilz & calamitez, il ne fut toutesfois iamais agité des esguillons d'impatience, & ne parla iamais inconsidérément contre Dieu: ains au contraire, il s'estudia de l'appaiser par vne pure confession de ses pechez, & en receuant la sainte Eucharistie, prouoquant tout son ost à exercer telles œures de pieté. Et combien qu'il semblast aux chefs & aux gens d'armes que facilement la ville d'Alger pouuoit estre prise, neantmoins à cause que la fureur & ire des vens ne cessoit point, il commanda que la gendarmerie se retirast és nauires, disant qu'il aimoit beaucoup mieux cōseruer vn Chrestien, que d'occir mille Maures, Turcs & Africains. Ce

*Exemple
memora-
ble.*

*Cheuaux
iettez en
la mer.*

qu'il declara bien plus euidemment, quand il commanda que tous les cheuaux fussent iettez au fond des eaux, afin que toute la gendarmerie eust place és nauires qui restoient, lesquelles estoient en bien petit nombre, & ne suffisoient presque pas. Si voulut le bon Prince que les cheuaux perissent, plustost que les hommes, bien que la perte de plusieurs bons che

uaux ne plaisoit gueres aux maistres. Finalement apres auoir surmôté toutes les difficultez de la mer, iacoit que par vn autre orage plusieurs furent abysmez és eaux en retournant, & que le bruit courut vne fois que l'Empereur mesme auoit seruy de viande aux poissons, si est-ce que tous les gens-d'armes qui restoiēt sains chantoient par tout, l'Empereur a vaincu ailleurs les armées, mais à Alger il a vaincu soy mesme, & l'air & la mer. Car iamais tous ces defastres & desconuenus ne sçurent esbranler le cueur indomptable de ce Prince, combien que aussi il semble qu'il puisse estre reprins de temerité, à cause qu'en vne saison si importune il osa tenter le riuage d'Afrique, veu mesmement que plusieurs luy dissuadoient. Mais quelquefois le bon Homere dort, & n'y a si bon qui ne faille, & quoy que cela luy succeda mal, si doit-on louer sa bõne volonté.

*Patience
de l'Em-
pereur.*

EN ce temps le Roy Henry d'Angleterre feit trancher la teste à Madame Marguerite de Sarisbiri, issuë de George, frere d'Edouard quatriesme. Toutesfois ny l'ancienneté de sa noblesse, ny l'integrité en laquelle elle auoit passé toute sa vie, ny sa vieillesse extreme, (comme celle qui auoit plus de septante ans) ne luy peurent tant seruir, qu'elle ne passast le pas de la mort honteuse.

*Margue-
rite de Sa-
risbiri Roy
ne d'An-
gleterre de
collée.*

ESTANT enuiron ce temps allé de vie à trespas l'Euefque de Numbourg, les Chanoines esleurent pour luy succeder Iule Pflug, homme non moins plein de bon sçauoir, que illustre quant à sa maison. Mais l'Electeur de Saxe s'opposa à ceste election, disant qu'elle ne se pouuoit faire sans sa licence & cõgé: & repoussoit-il Pflug non pour autre cause, que pour autant qu'il estoit grand ennemy de Luther. Et par tant l'Electeur esleut au lieu d'iceluy Nicolas Amsdorf, grand Lutheriën, lequel toutesfois l'Empereur Charles debouta par-après, & réinstalla Pflug en son premier lieu. Or faut-il sçauoir que Luther consacra à sa mode lediët Amsdorf, mutation certes plaisante & gétille. Car vn meschant Apostat, ennemy du Pape, s'vsurpe la Papauté de Saxe, & n'estant autorisé aucunement, crée les Euefques.

*Dissentio
pour le sie-
ge de Nũ-
bourg en
Alemai-
gne.*

L'AN M.D.XLII.

HISTOIRE DE TOUTES CHOSES

*Guerre
renouvel-
lée entre
le Roy &
l'Empe-
reur.*

L'AN 1542. la guerre tres-calamiteuse entre l'Empereur Charles & le Roy François recommença & s'engregea. L'Empereur sillonnant les flots de la mer, donna grande occasion aux François de renouveler ceste guerre, & iceux redemandoient le Duché de Milan tres-instamment, iacoit que l'estat de Chrestienté fust lors fort affligé, à cause que les Turcs bouleversoient tout en l'Hongrie, & menaçoient d'en faire tout autant en Alemaigne: & d'avantage les heresies glissoient de plus en plus, & se transformoient en plusieurs sortes. Tant y a que les François diuisans leurs forces, se ruerent sur les terres de l'Empereur par cinq endroits, si bien que les affaires de l'Empereur alloient fort mal. Le Roy François prétendoit que le Duché de Milan luy appartenoit à bonne & iuste cause, & pour ne mespriser point ce sien droit, il fut contraint d'auoir recours aux armes. Et outre tout cela, il estoit impossible qu'il ne prinst vengeance du meurtre de Frégose & Rincon, ses Ambassadeurs. On dit qu'en ce tēps le Roy n'aima pas beaucoup Anne de Mommorancy, Connestable de France, & mesmes il le priua de son Estat, à cause q̄ les treues faites avec l'Empereur par son moyen ne luy auoient gueres bien cédé. Ayāt dōcques ses forces bien équipées de toutes choses necessaires, enuoya ses deux enfans conduisans de belles troupes pour enuahir les frontieres des terres Imperialles, à sçauoir Monseigneur Henry (qui depuis fut Roy) vers les Espagnes, & Monseigneur Charles au païs de Luxembourg. Monseigneur Henry tira droit aux mons Pyrenées, pour prendre la ville de Parpignā, mais ils trouuerent chausseure à leur pied, à cause que la place fut brauemēt defenduē: toutesfois aucuns estiment que la ville eust esté aisément prise, si l'on y eust vŕé de plus grande vŕesse. Ledit Sieur donc n'y ayant peu rien faire, en fin retourna vers le Roy son pere. Mais son frere Charles, homme ieune, & de qui on esperoit beaucoup, eut meilleut succes de ses affaires en forçant quelques villes au païs de Luxembourg: toutesfois si grande prosperité n'empescha pas, que peu apres son parlement l'armée de l'Empereur ne reprist tout en bref sur les François, hors mis Iuoy, laquelle

*Faits de
Messieurs
Henry &
Charles,
enfants du
Roy.*

laquelle estant bien munie & remparée demeura encore pour
 lors aux François. Durant ceste guerre ceux de France abba-
 tirent & bruslerent Danuilliers, avec le chasteau fort ancien
 & d'admirable structure, & encor' en feirent-ilz autant à quel-
 ques autres petites villes & chasteaux. Pareillement les habi-
 tans d'Arlun sestans renduz leurs vies sauues, leur ville fut de-
 struicte & rasée, quoy qu'elle fust fort bien bastie & assez peu-
 plée, comme aussi elle estoit bien riche. A Luxembourg ils
 meirent garnison de six mille Alemans. Semblablemēt vn au-
 tre camp des François, lesquelz Monsieur de Vendosme con-
 duysoit, entra dans le païs d'Artois & de Teroüéne, où il print
 quelques belles places. Le pauvre Piedmont n'auoit garde d'e-
 uoir meilleur marché, que les prouinces susdictes, à cause
 que le Seigneur Guillaume de Lâgey y gouuernoit quelques
 bendes Françoises, lesquelles y feirent plusieurs hautz faictz
 d'armes. Tant y a toutesfois que le conseil de ce grand Roy
 n'est pas guerres trouué bon, à cause qu'il departit ses forces en
 tant de parties, & assez à son defastre, comme les effectz ensuy-
 uans ont monsté. Or ne se contenta le Roy François d'auoir
 enuahy l'Empereur en tant de lieux, ains encore despecha le
 Seigneur de Longueual en Alemaigne, lequel ayant amassé
 du païs de Gueldres & des circonuoyfins quelque caualerie
 & fanterie, & ayant à soy attiré Martin Rosseim homme bien
 fort experimenté au faict de la guerre, se rua sur les païs bas de
 l'Empereur, où il feit plusieurs actes d'hostilité, pendant que
 la plus grande force des Alemans estoit allée en Hongrie, &
 partant on ne s'attendoit point qu'on guerroyast en la basse A-
 lemaigne. Or ne s'en fallut pas beaucoup, que ledict Sieur ne
 prinst d'emblée la ville d'Anuers, qu'on sçait estrevne des plus
 riches & marchandes de l'Europe, & que par mesme moyen il
 ne s'emparast de Louvain, ville fort recommandable pour la
 belle vniuersité qui y est. Toutesfois ceste armée n'exploicta
 pas grand cas, sinon qu'elle reduict à pauureté extreme les
 miserables païsans par le rauage qui fut exercé en maintes
 bourgades, & en fin s'alla ioindre à Luxembourg avec les for-
 ces de Monseigneur Charles, Duc d'Orleans. Et fut ceste tem-

Ooo.j.

*Guerres
de Luxem
bourg.*

*Guerre en
Piedmōt.*

*Grande
guerre au
païs bas
par les
François.*

peste de la guerre du pais bas d'autant plus estrange & calamiteuse, qu'icelle n'auoit point esté denoncée, & se iettoit-on sur ceux qui n'y pésoient point. Las! pleust à Dieu que les Princes aduisassent en eux-mesmes combien horriblemēt ilz pechent, quand sans aucun esgard ils exercent cruauté contre le bon-homme, & de tous costez endurent que leurs gens mettent le feu, & gastent tout: certainement ils ne seroient pas si ardans à entreprendre guerre. Car pendant que les pauvres innocens sont en telle affliction, il n'y a point de faute qu'ils n'inuoquent Dieu à leur ayde, & est impossible que Dieu mesme prise entierement leurs requestes & larmes.

*Deux as-
semblées en
Alemai-
gne.*

C E S T E année y eut deux assemblées des Princes d'Alemaigne, l'une à Spire, & l'autre à Noremberg, esquelles deux on delibera principallemēt de resister aux Turcs en Hongrie. Et feit-on leuée de beaucoup de gens pour ce faict par toute l'Alemaigne, lesquelz seroient souz la charge de Ioachim, Electeur de Brandebourg. Si est-ce pourtant que tout cela alla en fumée, & demurerent les villes de Bude & de Pest en la puissance du Turc comme au-parauant, outre ce que plusieurs hommes de l'exercite moururent de maladie. Le Pape Paul auoit enuoyé trois mille hommes de pied pour ceste guerre, lesquelz à la verité s'y monstrent preux & vaillans.

*Luther
braue con-
tre les Zu-
ingliens.*

Or fist Luther imprimer en ce temps vn liure, cōtre les Turcs, ou bien intitulé autrement, la predication militaire, liure planierement contraire à autres siens escriptz. Duquel Sleidan a mis plusieurs choses en son histoire, mais le fin & rusé qu'il est laisse à son escient, que Luther en iceluy liure constituë Zuingle entre les Anabaptistes & Thomas Monerarius, auteur du trouble des rustiques, & reuoque presque toute la cause de la cruauté & felonnie Turquesque sur les Zuingliens. Au mesme liure Luther a inseré vne priere contre les Turcs, en laquelle il conioinct le Pape avec le diable & le Turc: si que à bon droict nous pouons dire de luy ce verset du Psalme, *Psal. 108* que son oraison soit faicte en peché. Or plusieurs encourageoient ceux de Zurich, à repousser ceste calomnie de Luther tant d'eux que de tous autres Zuingliens, mais iceux se

contentans de s'estre excusé par leurs missiues enuers telles fortes d'amis, aimerent mieux ne fusciter point nouvelle guerre. Et puy que Sleidan en plusieurs lieux trouue plaisir à reciter prolixement les escriptz de Luther, ayant ceste discretion qu'il laisse ce qui faict cōtre luy & ses semblables, qui ne voit, qu'il y procedde cauteleusement & en intention de nuyre: ^{Comment Sleidan se porte à reciter quelque chose de Luther} Vrayement il auoit beau loysir, puis qu'il ne s'est espargné de lire & de transcrire tāt de blasphemés de Luther. Mais ce qui luy cause tel labeur, c'est le desir qu'il a de corrompre plusieurs du leuain Lutheriē. C'est pourquoy il ne se plainct point de farcir tout son liure des paradoxes & resueries de Luther. Le luy voudroy bien demander, qui l'a esmeu à n'insérer aussi bien la loüable memoire que Luther faict de Zuingle. Il voyoit bien, comme imposteur qu'il est, qu'icelle repugnoit aux Sacramentaires. Est-ce ainsi qu'il faut escrire l'histoire, & reciter le faict Euangelic sans fraude?

L'ARMÉE de l'Empereur ayāt recouuert les villes du païs de Luxēbourg, estoit presté d'entrer hostilement en France, ^{L'armée de l'Empereur au païs de Iuliers.} quand vne telle tempeste & orage de temps la surprint, & la traita si opiniaistrement: que plusieurs gens d'armes tant de pied que de cheual y perdirent la vie, soit par pluye soit par froid. Au moyen dequoy ils remeirent leurs desseings de gaster la France à vne autre fois, & tournans tout soudain vers Brabant, enuahyrent la contrée de Iuliers, & gastans tout par où ils passoient, subiuguerent les villes de Dure, Iuliers, Zittarde, Hinsberg, & plusieurs autres villes & chasteaux, mettans garnison aux lieux commodés. Les pauures habitans du païs sentirent lors quelle est la fureur de Mars, & y fist on telle proye & degast, que c'estoit iouer à la pareille. Aduint que les forces du Prince de Iuliers approcherent, & furent les Imperialistes forcez de gagner la garite, & toutesfois plusieurs demeurèrent à Hinsberg, les autres à Susterie & Dure. Ceux qui estoient dans Zittarde desmantelerent les murailles, & se sauuerent en quelques lieux plus fortz & asseurez. Sur le commencement du moys de Nouembre les Brabansotz emporterent dans Hinsberg plusieurs munitions & viures, deliberez

L'AN M.D.XLII. HISTOIRE DE TOVTES CHOSES

*Escar-
mou-
che entre
les Imperi-
aux & le
Duc de
Iuliers.*

de faire le semblable à Dure, filz n'eussent eu peur des forces du Prince de Iuliers. Or comme ilz se retiroient en quelques lieux assez tenables, l'ennemy les talonne de pres, si que durant les tenebres il y eut vne furieuse escarmouche faicte à l'improuiste, laquelle se departit, plusieurs demeurans sur le champ d'un costé & d'autre. Et sur le mesme temps le Prince Guillaume renforça la ville de Zittarde, y laissant quelques bendes de gens d'armes en garnison: & apres en faict autant à Iuliers. Finalement sur la fin du moys de Decembre il re-

*Dure re-
prise.*

*Les sixies-
mes noces
du Roy
d'Angle-
terre.*

couvra Dure sur les imperialistes, & pour ce qu'il l'eut par cõ-
position, il leur laissa les vies & bagues sauues.

LE Roy Henry d'Angleterre feit honteusement mourir Catherine Hauard, laquelle il auoit espoulee repudiant la sœur du Duc de Cleues, l'accusant d'auoir commis adultere avec quelques Seigneurs nommez Durance & Culpen: & pour sa sixiesme femme il espousa vne veufue, appelée Catherine Parie.

*Sauterelles
merueil-
leuses.*

CESTE année vne multitude infinie de grandes sauterelles endommagea beaucoup la Lombardie, & en l'Alemaigne la Silesie & Misne. Elles estoient lōgues comme le doigt, leur teste estoit grosse, le ventre gras & plein d'humeur. De maniere qu'estans mortes elles corrompirent l'air d'une puanteur merueilleuse, & telle que mesmes les corbeaux, corneilles, espreuiers & autres oyseaux, lesquelz volontiers suyuent les charongnes, ne la pouuoient endurer.

*Guerre
entre l'An-
glois &
l'Ecossois*

GROSSE guerre f'esmeut ceste année entre les Anglois & Escossois, tant par terre que par mer, & Iacques 5. Roy d'Escocce mourut, ne laissant qu'une fille, (qui ne faisoit encore qu'naistre) pour heritiere de son Royaume.

CESTE année aussi nasquirent plusieurs enfans monstrueux, & ce mesme aduint entre les bestes brutes.

*Le Duc
de Brun-
suic est
chassé de
ses terres.*

LE Pape Paul 3. publia ceste année le Concile general à Trente. L'Electeur de Saxe conioinct avec le Lantgraue de Hesse, & quant & quant les autres de la ligue de Smalcalde, despouillerent le Prince Henry de Brunsuic, homme autant Catholique qu'il est possible de l'estre, de toutes ses terres &

seigneuries, si qu'il fut contrainct se retirer en Espagne vers l'Empereur. Le Roy Ferdinand les empescha tant qu'il peut qu'ilz ne feissent point ceste guerre audict Prince, mais iceux expliquent leurs causes & raisons; & taschèt de prouuer qu'ilz ont bien faict. Il y auoit bien à craindre, que à ceste occasion il ne sourdist vne guerre ciuile en Alemaigne, chose certes la plus calamiteuse qui eust peu alors aduenir, à cause que pendant les effortz des nostres cōtre les Turcs ne succederēt point bien en Hongrie, ains le tout ceda à la grand' ignominie des Alemans. Car iaoit que le nombre de nos gens de cheual & de pied fust grād & puissant à merueilles, si est-ce qu'on ne fait rien totalement, & les Turcs se gaboient à leur ayse de la faict-neantise de nos soldats Alemans, prenās par cela certain & asseuré espoir, que quelque iour ilz leur mettroient aysēmēt le pied souz la gorge. Mais à dire verité l'Alemaigne n'eust oncques souffert tant de miseres & tant d'infamie de ces maistins Turcs, si la dissension de religion n'eust quant & soy apporté vne dissension entre les hommes de mesme país.

L'AN 1543. les ministres de la pretēduē Eglise de Zurich ne se contentans pas de la version de Luther, feirēt imprimer vne nouuelle translation de la Bible. Le libraire qui auoit imprimé ceste traductiō, nommé Christofle Froschouer, cuydāt gagner les bōnes graces du Pape de Saxe Luther, luy en enuoya vn exemplaire. Mais que pēseriez-vous de Luther? eust-il peu digerer vne si grande contumelie, de voir sa version taxée apertement par celle qu'on auoit de nouueau mise en lumiere? Il mādē à Froschouer, que desormais il ne luy enuoye rien qui fust sorty de la boutique des ministres de Zurich: car quand à luy il ne vouloit auoir nulle accointāce avec eux, & ne vouloit ny receuoir ny lire leurs liures, pourautant que les Eglises de Dieu ne sçauoient communier avec eux: que vrayement ils prenoient grand' peine, mais en vain, veu qu'ilz sont damnez & veulent faire dāner avec eux plusieurs autres: Partant il ne vouloit pas estre participant de leur dānation & blaspheme, ains il auoit deliberé les combattre tant qu'il viuroit, & par prieres & par liures. Si doncques les Zuingliēs ne

*Faict ne-
antise des
Alemans
contre les
Turcs.*

*Ceux de
Zurich
tournēt la
Bible, &
Luther les
cōdamne.*

se contentent pas d'estre cōdamnez par le Pape de Rome, au moins doiuent-ilz admettre la condēnation du Pape de Saxe, qui se glorifie auoir apporté le premier l'Euangile en Alemaigne. Mais il y a bien d'autres nouvelles. Quād Luther en veut au Pape de Rome & à toute l'ancienne religiō, c'est l'ors qu'il est Euāgeliste de Christ, le troyesieme Elie, & encore quelque autre chose. Mais quand il se prend aux Zuingliens, certes ce n'est l'esprit de Dieu, ains celuy de Satan qui parle par la bouche d'iceluy. C'est la responce de ceux de Zurich. Comme si c'estoit tort ou iniure de noter d'infamie ceux, q' r'enflammēt l'heresie pieça esteinte de Berégarius: & chose loüable & vrayement Apostolique d'inuectiuer contre le Pape, Pasteur de l'Eglise Catholique, bon gré mal gré les heretiques, veu qu'à iceluy Dieu parlāt à S. Pierre, a dict, pais mes brebis. Et cōme est-ce que les hommes ne cognoissent pas combien absurdes sont leurs maistres & docteurs, lesquelz bien qu'ilz ne fassent que crier cōtre les Catholiques, (Papistes à leur mode) disans qu'ils ne s'appuyent pas sur la parolle de Dieu, ains sur les cōstitutions humaines, chose toutesfois tres-fauce: neantmoins ils ne se peuuent endurer nullement, quoy que d'un & d'autre costé ils ne fassent profession que de l'escriture? Sleidan a fait icy comme dessus: il s'est bien gardé de mettre ce que Luther escriuit à Froschouer, qui condamnoit en arrest definitif les Zuingliens. Mais ainsi falloit-il faire, pour bien defendre la cause qu'il auoit entreprise. Et ce-pendant où irons nous chercher la fidelité de l'histoire, laquelle il promet si fort? Bō Dieu, combien de choses i'annoteroy de cest homme, si le temps & mon intention presente le permettoit. Que ceux qui ne font conscience de perdre le meilleur de leur temps, aillent lire Sleidan: ie suis asseuré que les hommes bien entendus detesteront l'impudence & finesse du galland.

*Les œu-
ures de
Zuingle
mises en
lumiere.*

OR auoient ceux de Zurich trop demeuré en silēce pour Luther: & partant ils r'amaissent les œuures que Zuingle auoit faictes imprimer en Aleman, & les font traduyre en Latin par son gendre Rodolfe Gualther, & mettent ce grand thresor en lumiere, à fin que toutes nations peussent cognoistre quel

personnage auoit esté Zuingle. Le mesme Gualther feist vne Apologie au front de toutes ces œuvres, en laquelle il defendoit Zuingle enuers l'Eglise Catholique, ainsi appellant leur synagogue, & encore respondoit-il aux obiections & calomnies des aduersaires. De maniere que les Lutheriens enragoient tous vifs de voir ces œuvres de Zuingle imprimées, comme quelque Zuinglien a escrit.

A v moys de Ianvier de l'année presente, tandis que l'Em-
 pereur estoit en Espagne, fut faite vne iournée à Noréberg,
 où mourut Christofle Euesque d'Ausbourg Legat de l'Em-
 pereur en celle iournée, & luy succeda Otto Trucesse, hom-
 me fort vertueux & sage, & qui depuis fut Cardinal. En ceste
 iournée les Protestans se purgerent deuant le Roy Ferdinand
 & les Ambassades de l'Empereur, de ce que le Duc de Brun-
 suic auoit esté chassé, disans que c'estoit à bon droit: & deman-
 derent que les iuges de la Chambre fussent cassez, & que d'au-
 tres fussent installez en leur place, & quelques autres poincts:
 adioustans, que si tout ce qu'ils requeroient ne leur estoit oc-
 troyé, ils ne pouuoient rien ordonner de ce qui concerne la
 guerre du Turc. Et faut entendre que le Duc Henry auoit ac-
 cusé les Protestans par deuant Messieurs de la Châbre, & par-
 tant ils refusoient les iuges d'icelle entierement. Le Roy Fer-
 dinand & les Ambassadeurs de l'Empereur leur respondirent,
 que le Concile estoit déjà publié, que l'Empereur venoit à
 grand' haste, que les iuges de la Chambre ne pouuoient estre
 cassez de leur lieu sans cause legitime & vallable, qu'on ne
 pouuoit moins que faire iustice au Duc de Brunsuic qui de-
 mandoit ses biens, & plusieurs autres choses. Mais les Prote-
 stans feirent à cela responce, qu'ils n'approuuoient pas le Cō-
 cile, & aux autres poincts tout de mesme. Non-obstant cela,
 Ferdinand avec les autres Estats de l'Empire feit vn decret de
 certaines affaires, auquel toutesfois noz Lutheriens proteste-
 rent qu'ils ne sy accorderoient point. Or ie pense qu'il n'y a ce-
 luy qui ne voye le danger & le defastre, esquels l'Alemaigne
 alloit cheoir par ces menées, si le bon Dieu n'eust eu plus d'es-
 gard à sa clemence qu'aux forfaites des hommes. Et telz sont

*Journée
de Norem
berg.*

*Les Prote
stans se de
fendent à
belles pa-
rolles.*

*Opiniafre
té d'iceux.*

L'AN M.D.XLIII. HISTOIRE DE TOUTES CHOSES

les fruits que l'Evangile de Luther nous a donnez, l'auancement duquel nous voyons combien il nous a esté déjà pernicious, & deuons bien craindre que la fin & progres nous sera incomparablement plus dommageable, iusqu'à tant que le Turc ou le Moscouite nous apprenne qu'il faut estre sages.

*Le Concile
est différé*

LE Pape Paul enuoya ceste année trois Cardinaux les Legats au Concile de Trente, mais pour-autant que les guerres entre le Roy & l'Empereur se r'enflammoient & embrasoient tousiours, il fut différé en vn autre temps. Car quel espoir y auoit-il, ie vous prie, de paracheuer ce Concile, pendant que les principaux Monarques de la Chrestienté sentre-faisoient la guerre à toute extremité?

*Mort d'Ec-
cius & Pi-
ghius.*

LA mesme année & au mesme moys passerent de cest infortuné siecle en l'autre deux segnalez personnages, Iehā Eccius & Albert Pighius, defenseurs inuaincuz de nostre religion Catholique. Noz ministres se gaudissent quelquesfois d'Eccius, mais i'ose bien dire, que quād ils seroient tous tant qu'ils sont fonduz en vn, à peine seroit celuy-là pareil & esgal à Eccius. Vray est qu'il en y a qui parlent mieux Latin que luy: mais aussi qu'il ait esté docte solidement, l'experience le nous fait toucher au doigt, & si ne fut pas ignorant de la langue Grecque & Hebraïque. Il auoit vne des bonnes & heureuses memoires qu'il est possible d'auoir, laquelle luy seruit beaucoup: & outre ce qu'il estoit fort versé à la lecture des peres anciens, encore n'estoit-il moins docte en la Theologie vul-

*Proffit de
la Theolo-
gie schola-
stique.*

gairement appelée scholastique. Je sçay bien que quelques vns, qui n'ont gueres plus de sçauoir qu'il leur en faut, ne font cas en cestuy nostre siecle des Docteurs de la Theologie susdicte, à cause que leur langage n'est pas prins de Ciceron, & n'est si poly que quelque autre: mais ils sont bien grands refuseurs de ce penser, veu que l'erudition ne doit pas estre mesurée d'une parade & mignotise de mots, mais bié de la vraye cognoissance des choses traitées. Aussi voit-on, que ceux qui de nostre temps ne manient autres liures que les Anciens, & mesprisent les Scholastiques, ne s'auancent gueres en la solide Theologie, ce que l'experience monstre que trop. Et n'est sans

raisons

raisons que les predicans hayssent si fort iceux Scholastiques, sçachans bien qu'ils nous seruent de carquois, duquel nous prenons les flesches pour les rembarrer. Car quand ils traictēt la Theologie par questions, ils font cela pour esguiser les espritz, à fin que puissions auoir plus facilement les argumens, pour conuaincre les heretiques.

LE Roy François escriuit lettres au Pape, par lesquelles il blasmoit grandement l'Empereur: & faisant estat de luy faire la plus aspre guerre qu'il est possible, imposa vn tribut extraordinaire sur son Royaume pour la solde de cinquante mille hommes de pied. Ayant doncques assemblé toutes ses troupes tant de pied que de cheual, marcha droict en haynault, print Landrecy, lequel il munit & fortifia grandement, & en donna la charge au Seigneur de la Lande, homme fort experimenté au faict de la guerre.

*Guerre
faicte par
le Roy.*

*Prinse de
Landrecy.*

EN ce temps Herman Eleeteur & Archeuesque de Cologne, s'estant laissé deçeuoir à quelques vns, fait venir Martin Bucer de Strasbourg à Bonne, esperant de commencer par le moyen d'iceluy, quelque reformation, ou plustost deformation de religion. A la verité c'estoit vn Prince bon de sa nature, & liberal enuers les pauvres & necessiteux: mais il n'auoit gueres de sçauoir: si que l'on ne doit pas beaucoup s'esmerueiller, si fut circonuenu par les ruses & charmes de Bucer. Estant doncques Bucer arriué à Bonne, il fait vn sermon au peuple par le commandement de l'Euesque. Dequoy le chapitre de la grad' Eglise se sentit fort offensé, & ensemble tout le Clergé & toute l'vniuersité de Coloigne. Et par ainsi ils exhortent leur Euesque de renvoyer ce moyne renyé de Bucer, disans que si l'n'auoit homme suffisant pour bien prescher, ils luy en fourniroient assez. Mais il s'opiniastra en sa premiere deliberation & dist qu'il vouloit reformer son diocese. Si luy obiecterent au contraire, que luy ayant ce vouloir & intention, il ne deuoit pas selon les canons entreprendre cela sans leur communiquer, & ne deuoit pas employer à celà des moynes apostatz. Au moyen dequoy Bucer meit vn liure en lumiere pour se defendre, plein & farcy d'iniures, de lourdz erreurs, de mē-

*L'Euesque
de Coloigne
fait de l'heretique.*

*Bucer à
Bonne.*

*Le Clergé
& l'Vniuersité
s'opposent à
l'Euesque.*

songes impudens, le tout contre les Catholiques: & aussi l'Vniuersité & Clergé de Coloigne y respondit brauement en vne contraire doctrine. Or neantmoins l'Euesque instigué par ie ne sçay quelz, manda à l'Electeur de Saxe qu'il luy enuoyast Melancthon, lequel ne vint pas seul, mais aussi vindrēt Boulenger & Sarcier, & plusieurs d'aussi bone paste que ceux là, lesquelz composerent vn liure pour instituer vne reformation, duquel Bucer fut le maistre forger. L'Euesque doncques enuoya ce liure au Clergé de l'Eglise Cathedrale, à fin qu'ils le refutassent, s'ils pouuoient: autrement, il les aduertissoit que le liure seroit publié à la premiere assemblée des Estatz de son diocese, laquelle estoit fort prochaine alors, & q sans point de faute on executeroit ce qui estoit porté par la sus-dicte reformation. Parquoy en trois semaines on escriuit contre ceste pestilente reformation vn Antididagma, ou bien contraire doctrine, & au nom de tout le Clergé fut enuoyée à l'Euesque avec tres-humbles prieres, par lesquelles ils requeroient qu'il luy pleust lire leur liure, puy qu'il auoit biē pris la peine de lire celuy de Bucer, qui ne deuoit estre nullement admis. Quand à la reformatiō dont est question, ils escriuoiet qu'ils ne la refusoient point, ains en estoient biē fort desireux, moyennant qu'elle fust legitime. Et finalement ils le prioient, de r'enuoyer vn tas de predicans non approuuez, qu'il renoit chez soy. Or faut veoir que Sleidan a couché ceste histoire, tout autrement que ne feroit vn homme de bien. Entre autres poincts il dict, qu'à la iournée de Ratisbone il fut enioinct & par le Legat du Pape & par l'Empereur aussi, q tous les Euesques feissent quelque bonne reformation chascun en son diocese. Comme si Sleidan estoit ignorant, qu'iceluy Legat & l'Empereur n'abhorroient rien plus, que si Bucer eust esté appellé à executer ceste ordonnance. Il adioust d'auantage, qu'à Coloigne il n'y auoit homme digne & capable, pour instruyre le peuple par le commandement de l'Euesque. O le mal-heureux menteur! comme si le diocese de Coloigne eust eu si grande disette de gens de bien, que pour cela il fust besoing de faire venir Bucer l'Apostat. D'abondant il nous veut

*Melan-
cthon &
autres viē
nent vers
l'Euesque.*

*Antidi-
dagma cō
posé par les
Catholi-
ques de Co
loigne.*

*Vanité &
pures calō-
nies de Sle-
idan tou-
chant ce
faict.*

faire accroire que ce tant illustre personnage, Iehan Gropper, a esté heretique, & qu'il a eu tousiours Bucer en grande recommandation & estime. Mais cest homme tant loüable monstra bien, que c'estoit vne pure calomnie qu'on disoit de luy, en vn liure qu'il dedia à l'Empereur Charles 5. & encor' en vn autre lieu il tesmoigne, que Sleidan (lequel il appelle ignorant malitieux des affaires de l'Empire) a fausement menty en son histoire pleine de mensonges, quand il dict telle chose de luy: & que Bucer se coula peu à peu dans le diocese de Colloigne, non seulement à son desceu & de tous les Catholiques, mais encor' en despit d'eux, & en mesme lieu il appelle expressément Bucer homme detestable & mal-heureux à iamais. Vrayement Sleidan n'eust pas dict vne telle iniure sans auoir son change, sil n'eust esté plustost mort, que Gropper ne peut le refuter par escrit, comme il s'estoit resolu de faire. Plusieurs autres mensonges y a dans Sleidan, mais ie ne les sçauroy tous icy mettre. D'une chose vous veux-ie admonester, que ledict Gropper estant de retour de la iournée & colloque de Ratisbone, duquel cy-dessus a esté faicte mention, il passa les yeux sur les liures de Bucer, & pour esprouuer la constance du compaignon, il les conféra avec les articles qui auoient esté accordez audict colloque. Lors il trouua vne infinité de pointz repugnans droitement à ceux que Bucer auoit receuz & approuuez en ce colloque, & partant il annota quelques vilaines repugnances d'iceluy Bucer, des erreurs, mensonges, & blasphemés si grandz, que iamais les Manichéens n'en dirent de pareilz. Que sil y a quelcun qui souhaitte de sçauoir cecy plus exactement, il faut qu'il lise ce qu'a escrit le docte Euerard de Billy, à la defence du iugement de l'vniuersité & Clergé de Coloigne, contre les calomnies de Melancthon, Bucer & autres, où il trouuera cecy traicté ample-ment. Il ne nous faut doncques plus arrester à monstrier, quelle opinion Gropper a eüe de Bucer, & combien meschamment Sleidan a escrit de Gropper: & voyons assez que ceste sorte d'hommes ne peuuent dilater leur Euangile par la terre, sinon qu'ilz mentent de foys à autre bien impudemment. Et

*Voy son li-
ure de l'Es-
charistie.*

*Gropper
de Colo-
gne, fort
sçauant
homme.*

*Repugnan-
ces de Bu-
cer.*

*Le mēteur
de Sleidan
mesdict o-
culai remēt* mesmerueille comme ce desloial historien n'a cōsidéré, que
fil pouuoit mentir à son ayle en recitant fausement certai-
nes choses, lesquelles sont paruenues à la cognoissance de

bien peu d'hommes, toutesfois il ne pouuoit mentir sans hon-
te & deshonneur fort grand, en recitant fausement ce qui e-
stoit trop cogneu tant par les liures qui de ce auoient esté com-
posez, que par le tesmoignage de plusieurs encore pleins de
vie. Qui est-ce doncques qui luy voudra adiouster foy en ce
qu'il recite des choses secretes & cachées, veu qu'il n'a point
honte de mentir en ce q est assez cogneu, & aussi clair que le
Soleil? L'ay bien voulu aduertir le lecteur de cecy, à cause de
ceux qui ont meilleure opinion de Sleidan qu'il n'appartient.
Et quand à ce que l'Euesque Herman a tant estimé Bucer, il
ne faut que s'en prendre à son ignorance trop grossiere, com-
me estant homme ne sçachant combien les anciēns Conciles
& les peres tref-anciēns, fondez sur l'escriture sainte, laquel-
le commande d'accomplir ses vœux, ont detesté les moyne

*Bucer,
moyne re-
nyé, s'est
marié trois
fois.*

Apostatz, & signamment ceux qui se sont polluez en quel-
ques nopces incestueuses. Or est-il que Bucer s'est contami-
né en trois mariages desquelz il a vsé, quoy qu'il fust prestre
& moyne: chose contre la foy à Dieu donnée, chose contre
les Canons & tous les Conciles, brief, contre la coustume de
toutes nations Chrestiennes de religion. Et neantmoins il
s'en est trouué, qui appellent ce garnement homme soigneux
de paix & de pieté: mal-heur donc à vous qui dictes le bien e-
stre mal, & le mal estre bien.

*Le Roy
Philippe.*

L'EMPEREUR voulant prendre la route d'Espaigne en
Italie, declara son filz Philippe, qui n'auoit encore que seize
ans, Roy des Espagnes, & toutes les villes du Royaume luy
feirent le serment accoustumé par hommes deputez à ce fai-
re. Lors que l'Empereur s'apprestoient pour aller à la guerre, on
luy donna plus de quatre cens mille escuz, & mesmes le Roy
Iehan de Portugal l'ayda d'une grande somme d'argent. Or
craignoit-on déia grandement, & non sans cause, la guerre
qui sourdoit, veu que cela facilitoit les occasions à Solymān
de s'emparer de toutes les terres Occidentales: chose certes.

*On craint
la guerre
entre les
Princes
Chrestiens.*

à luy fort aysée, si Dieu tout bon & debonnaire ne l'eust empesché d'accomplir sa tyrannie. Et à la verité ces sauterelles, lesquelles estoient venuës de Leuant en Italie par la Sclauonie à grandz monceaux & comme en esquadrons, & lesquelles auoient grandement endommagé le païs, en broutant les bledz, prairies & arbres, sembloient nous aduertir de la venue des Turcs, & non sans cause & raison, comme i'espere vous faire veoir cy-apres.

COMME l'Empereur s'approchoit bien pres de l'Italie, le Pape Paul abbattu & cassé de vieillesse se meit à chemin, delibéré de parlementer avec l'Empereur pour moyenner quelque paix. L'Empereur fut fort magnifiquement reçu à Genes, & logé à l'hostel du Seigneur d'Orie, & sembloit estre vn peu trop aspre, à cause que le Pape ne luy auoit donné secours ny ayde contre le Roy de France, tellement qu'à peine peut-on impetrer que le Pape & luy s'entre-ueissent. Car le Saint Pere, comme personnage se voulant monstrier vrayement Pere, se porta si bien en cest affaire, qu'il sembloit n'estre point plus d'un party que d'autre. Et l'Empereur se voyant prouqué, à cause que ses terres & seigneuries auoient esté miserablement traitées, ne vouloit point ouïr parler de paix, ny consumer en vain le temps à vn abouchement qui ne seruiroit de rien: à fin de paracheuer plustost la guerre entreprise contre le Duc de Cleues. Non-obstant tout cela, il voulut bien parlementer non avec le Saint Pere seulement, mais aussi avec Messieurs les Cardinaux en la ville de Buxer, auquel lieu le Pape n'oublia rien de ce qui pouuoit seruir à persuader à l'Empereur, qu'il traitast paix avec le Roy, & qu'il allast guerroyer le Turc. Ce que Messieurs les Cardinaux tascherent aussi de luy mettre en teste, mais l'Empereur demeura inexorable, si qu'il fut impossible de le destourner de la guerre par luy pourpensée. Car il se souuenoit lors de ce que ses ennemys auoient attenté en plusieurs lieux, & ce au temps que delibérant de bien froter le Turc, il auoit eu vne merueilleuse perte de munitions de guerre à Argere.

SUR ces entre-faictes Hariaden Barberousse par le com-
Ppp.iiij.

*Entre-
ueue du
Pape &
de l'Em-
pereur.*

*Le Pape
Paul 3.
moyenne
la paix.*

*On ne
peut induy-
re l'Em-
pereur à
paix.*

L'AN M.D.XLIII. HISTOIRE DE TOUTES CHOSES

mandement du grand Turc Soliman, vint avec cent-dix vaisseaux à trois remes pour banc, & quarante à deux, surgir vers le destroit de Messine, & si print la ville de Rezo, d'où il emmena esclaves environ septante hommes de guerre Espagnolz, & grand nombre des habitans d'icelle ville. Apres il tira vers Ostie, dont les Romains eurent telles affres, qu'il sembloit qu'il ne demeureroit personne dans la ville. Si demeura Barberousse trois iours audict lieu, à cause de la commodité de l'eau, & delà marcha vers Marseille. Puis il approche ses forces de Nice en Prouence, il met le siege deuant ladicte ville & la prend, & fut icelle pillée, & partie bruslée par les Turcs: duquel lieu & de toute l'Italie ils emporterent vne incredible proye de Chrestiens tant hommes que femmes, lesquelz ilz meirent en horrible seruage. On dict que le nombre estoit de cinq mille deux cens, & qu'entre iceux y auoit bien deux cens nonnains de beauté singuliere. Et d'auantage le reste du butin fut estimé presque six cens mille ducatz. Or Barberousse desireux de gratifier au Turc, enuoye à Solyman & les esclaves & tout le butin, qu'il meit en quatre nauires, & y en auoit vn autre pour leur tenir escorte. Si aduint que pendant Garfias, filz du Vice-roy de Naples, ioinct avec les forces de Iehan, neueu d'André d'Orie, alloit butiner sur les marches de Turquie avec ses vaisseaux, dont il remporta grosse proye. Comme doncques il singloit vers Sicile, voicy les nauires de Barberousse chargées des esclaves & de l'autre butin, lesquelles il rencontre sur mer. Tellement qu'ayant sceu que c'estoient les ennemys, il se ietta dessus, & les amena tous à Messine: non sans grande misericorde de nostre Dieu, laquelle feit que ces pauvres esclaves furēt arrachez des mains de ces cruelz barbares, & n'y a point de doute, que par vne si inespérée mutation de leur descouuene, ilz changerent leur douleur en liesse tref-grande.

Or falloit-il que les Chrestiens fussent mal accoustrez de tous costez. Et par ainsi pendant que Barberousse fait de l'escumeur de mer, Solyman avec grandes forces vint butiner l'Hongrie. Premièrement doncques il print Valpone, & puis

Barberousse butine l'Italie.

La peur des Romains.

Barberousse se prend Nice.

Esclaves emmenez par les Turcs.

Les Turcs perdēt leur proye par la vertu de Garfias.

Succes merueilleux des Turcs en Hongrie.

Socles, en laquelle ville y auoit en garnison plus de deux cēs preux gens d'armes tous Hongres, lesquels ayant longuemēt soustenu l'effort de l'ennemy, en fin toutesfois il leur fut force forcée de se rendre. Mais la composition estant faite, comme ils sortoient hors de la ville, les Turcs les hacherent tous en pieces. Apres cela, il met le siege deuāt Strigonie, à laquelle il donna trois fois l'assaut bien viuement, & les nostres soustindrent tousiours : toutesfois à la par-fin il la print par composition, principalement par le moyen d'un meschant fugitif Calabrois, lequel fut si mal-heureux que de luy declarer le lieu auquel la ville estoit plus forceable. Prise qu'elle fut par Solyman, il la fortifia de remparts & bouleuerts, si bien qu'il semble auoir osté de bonne heure tous moyens aux Chrestiens de la pouuoir iamais recouurer sur luy. Ce fait, il print la ville de Tatte, à cause que ceux de la garnison ne resisterent point, & la rasa rez de terre. Car c'est la coustume de ceste maison des Ottomans, de mettre garnisons en bien peu de lieux des prouinces par eux conquises, mais celles qu'ils y mettent sont grosses & fortes. Apres ces choses il alla avec toute son armée vers la ville d'Albe, laquelle est nommée Albe royale, pourau- tant que les Roys auoient accoustumé de toute ancienneté d'y estre sacrez, & si estoient communément illec inhumez. Or ces trois villes, Bude, Strigonie, & Albe, sont les plus belles & nobles villes de toute l'Hongrie, & à cause que ces trois sont distantes esgallement, elles font la figure d'un triangle. Ceste ville d'Albe est merueilleusemēt forte, & si y auoit lors vn nombre de bons & vaillans-soldats pour la garder, mais il semble qu'ils eurent faute de quelque bon conseil en vn si grād affaire. Solyman doncques ceignit toute la ville, & se cā- pa si au large & avec vne telle mōstre de son armée, que ceux de dedans en furēt bien fort espouuantez, de façon que cinq cens cheualiers quitterent la place, au grand dōmage de ceux qu'ils y laissoient. Quand ce fut à assaillir la ville à toute force, en peu de tēps les habitans de la ville furent là reduits, qu'ils delibererent sur le champ de rendre la ville. Au moyen de- quoy ceste ville vint en l'obeissance du Turc aussi bien que

*Les villes
prises par
le Turc en
Hongrie.*

*Prise d'Al
be Royale,
& d'oū el-
le est dictē*

L'AN M.D.XLIII. HISTOIRE DE TOUTES CHOSES

les autres, & finalement il establit Mahometh Iahiagogle pour son Lieutenât en toute l'Hongrie, lequel a fait plusieurs courses sur les places seigneurisées encore par le Roy Ferdinand, & y a porté du dommage incroyable.

O R comme les choses se passoient de ceste sorte en Hongrie, l'Empereur vint d'Italie en Alemaigne. Premier qu'il fust arriué, ceux qui estoient en garnison dans Hinsberg commencerent à sentir quelque famine, tellement que de ce pas ils en aduertirent les Brabâsots pour qui ils estoient là dedans. Lesquels avec vne bonne armée, & toute la fleur de la noblesse, passerent la Meuse, & le 21. iour de Mars r'auitaillèrent la ville & de viures & de toutes sortes de munirions. Ce sçachans les troupes du Duc de Cleues vont au deuant d'eux, & trouuâs à leur fantasie l'opportunité de bien froter les Brabanfots, à cause du vent, de la pluye & de la gresle, qui leur donnoient sur le deuant, les osèrent attaquer, quoy qu'ils fussent peu au prix des autres. La bataille doncques fut aspre, & la victoire incertaine, iusqu'à tant que la fanterie des Brabanfots estant rompuë & mise en route, la victoire inclina vers les Cleuoy. Là fut prise vne proye grâde & plus pretieuse qu'on ne pourroit croire, comme plusieurs bons canons & choses semblables. Si que les Cleuoy estans en-orgueillis de ceste victoire, enuahirent les terres de Limburg, où ils butinerent à plaisir, & quelquefois allerent au bourg d'Herle, où ils assiegerent le cimetiere fort & muni, auquel les habitans s'estoient retirez avec leurs biens: & aduint qu'ils se defendirent si bien, que les ennemis s'en allerent avec honte & dommage, comme aussi ils auoient fait quelques autres fois.

E N la saison que les fruiçts de la terre sont bons à cueillir, ceux d'Hinsberg faisoient des sorties dommageables sur les villages circonuoyfins, de maniere que les Cleuoy les assiegerent, & battirent si bien la ville qu'ils y feirent bresche. Neantmoins les assiegez ne s'effroyans point de cela, feirent des rampartz, & repoussèrent courageusement l'ennemy. Environ deux moys apres que le siege y auoit esté mis, les Brabanfotz remettent sus quelques forces toutes fraisches, passent la Meuse,

R'auitaill-
lement de
Hinsberg
par les Bra-
banfots.

Bataille
entre ceux
des Cle-
uoy.

Cimetiere
bien fort,
assiégé par
les Cleuoy

Siege de
Hinsberg

Meuse, & s'approchans peu à peu des ennemys, ores ils reculoient, ores ils marchaient auant, si bien qu'ilz feirent leuer le siege à l'ennemy: & comme ilz estoient campez l'un à l'opposite de l'autre, & se donnoient quelques escarmouches assez souuent, les chariotz de Brabant trouuerent moyen d'entrer par diuers chemins dans Hinsberg, chargez de toutes choses necessaires. Les choses vindrent à tel poinct, qu'on estoit prest de chocquer des deux costez, quand les Cleuois par le com-
Fuyte des Cleuois.
mandemēt de leurs chefs commencerēt à reculer peu à peu, & puis se mettans à fuyr donnerent occasion aux Brabanforz de les pourfuyure, & de les bien estriller comme ilz fuyoient. De laquelle fuyte les bons gens d'armes rougissans de honte, & reietans la faute de cecy sur les chefs, demanderent que Martin Rosseim, vn des plus braues Capitaines, leur fust liuré entre les mains. A quoy s'accordant le Prince Guillaume, Rosseim commença à rauager quelques petites villes du diocèse du Trecht, & print par composition Amssford, ville forte & ex-
Prinse d'Amssford par Martin Rosseim.
cellente, ayāt fermé les portes par merueilleuse astuce à ceux de la garnison, qui estoient sortys pour aller à la pecorée: & ce fait, meit vn impos sur les habitans, duquel il soudoya ses bandes par quelques moys. Le Prince d'Orenge vint pour donner secours à ceux de Amssford, mais ce fut trop tard. Au reste,
Autres villes prises.
Rosseim s'en alla sur les marches de Bossleduc, & y print & piller la les villes d'Helmunde, & Endouie. Et presque de mesme temps le païs de Limbourg, qui n'auoit point esté beaucoup gasté, fut pillé tout outre, avec toute la Daluie & le païs de Falkemburg.

DVRANT ce laps de temps l'Empereur vint à Spire, auquel lieu les Protestans luy proposerent quelques poinctz par leurs deputez, & leur fut faicte responce, qu'ilz estoient assez asseurez de la paix, qu'il estoit impossible de casser les Iuges de la Chambre pour son plaisir & sans cause, & quelques autres choses. Finalement on leur dict à Maience, (iusques auquel lieu les deputez auoient suiuy sa maiesté) que s'ilz ne rendoient au Duc de Brunswic tous ses biens, l'Empereur aduise-
L'Empereur respond aux Protestans à Spire.
roit les moyens par lesquelz il le pourroit luy-mesme remet-

tre en ses terres. Sur quoy on peut considerer la magnanimité de ce Prince, lequel estant en ce temps-là si fort oppressé des guerres de ses ennemys, ne se voulut toutesfois laisser oncques vaincre à pusillanimité. Aucuns semblēt escrire, que Gräuelle & de Naues respondirent aux deputez des Protestans, que le Duc de Brunswic chercheroit tous moyens pour r'entrer en ses biens, en cas qu'ils ne les luy voulussent restituer. Mais tout cela n'est qu'un, veu qu'il n'y a point de doute, que le Duc estant appuyé sur l'amitié & faueur de l'Empereur, ne se deust efforcer de r'auoir ses biens, & sans point de faute Granuelle ne vouloit signifier autre chose, quand il feit vne telle responce aux Protestans deputez. Car le Duc de Brūswic estoit lors trop foible, pour faire teste aux confederez Protestans, qui l'auoient chassé. Or l'Empereur estant encor' à Spire, l'Archeuesque de Coloigne le pria bien fort pour le Prince de Cleues; mais iceluy Sieur ne voulut qu'on luy parlât de paix, que premier le Cleuoyz n'eust cédé le Duché de Gueldres. L'Ambassadeur du Saxon le pria pour mesme chose au nom de son maistre, mais il estoit impossible de desargonner l'Empereur de son opinion.

L'Empereur loue ceux de Coloigne.

SA maiesté estant à Maience escriuit lettres au Senat de Coloigne, louant grandement leur fermeté & constance en la religion Catholique, à cause qu'ils n'auoient point presté l'oreille à quelques boute-feux de predicans, lesquels taschoiēt fort de les desbaucher de la religion Catholique, & les exhorter de perseuerer, & de contenir le peuple en son deuoir & religion. Le mesme leur fut escrit par le Pape Paul 3. Parquoy le Senat conuoquant tout le peuple, commanda que ces edictz fussent gardez & entretenuz par eux. On ne scauroit rediger par escrit tous les moyens, tromperies, & machinations maintenant ouuerres, maintenāt à cachettes, que Satan a inuētées par ses instrumens, sçauoir est les predicans, pour precipiter ceste tref-florissante ville, & si inuaincuē en la maintenue de la religion Catholique, es erreurs discordans de noz nouueaux Euangeliques, par lesquelz presque toute l'Alemaigne fest laissée perdre: mais par la grace de nostre Dieu, Satan

Les Heretiques ont fort tasché d'infecter Coloigne.

n'est encore venu à bout de ses desseings, à cause que le vigilant & tref-sage Senat s'est estudié par tous moyens de faire, que ces garnemens ne peussent iouir de leurs souhaits. Car à verité dire, le diable n'est pas destitué de ruses, & a tout content ses satellites, lesquelz voyans qu'à force ouuerte ils ne peuuent rien faire, ilz y procedent par embusches, & se transforment en anges de lumiere, ne font aucun semblant que de paix & de pieté: iusqu'à tant que par ceste si pernicieuse dissimulation ilz se soient acquis enuers les moins sages quelque los & opinion d'une pieté grande, & d'une integrité merueilleuse. Et ce faict, ilz commencent à respandre leur poison peu à peu, & avec vn masque de pieté qu'ils portent, maintesfois ilz supplantent ceux lesquelz n'auoient oncques peu estre esbranlez, ny par Luther, ny par tous les autres ennemys ouuers de l'Eglise Catholique. Il faut doncques auancer en grande diligence le salut de nos ames, & si nous voulons estre sauuez, il se faut donner garde que Satan ne nous deçoyue. Certainement tant que le monde sera, l'illustre ville de Coloigne ^{Louange de la ville de Coloigne.} sera louiagée, de ce qu'elle a demeuré ferme & stable, lors que presque toutes les villes d'Alemagne faisoient banque-route à la religion Catholique: & n'a iamais estimé qu'il fallust abandonner celle foy & religion, laquelle elle auoit receuë plus de mille ans au parauant, & l'auoit tousiours conseruée de main en main iusqu'à cestuy nostre siecle: quoy que bien souuent Satan luy a faict par ses soldatz toutes les algarades & embuscades, desquelles il s'est peu aduiser, pour la surprendre comme les autres. Il faut donc prier le bon Dieu, qu'il luy plaise la maintenir tousiours, comme il a faict cy-deuant, veu mesme-ment que Satan controuue incessamment nouuelles ruses, par lesquelles maintesfois il emporte la victoire des meilleurs combattans. Vn ancien autheur a dict ceste louange de Coloigne.

*Oncques depuys que toy, noble Cité,
Receus le Christ, tu ne l'as debouté.*

En ce temps Calvin feit vn liure contre les reliques, <sup>Calvin e-
scriit contre
les reliques
des Saints</sup> tant l'impieté de l'autheur à pleine bouche. Et quand nous

Qqq.ij.

luy aurions donné, que l'ignorance de quelques vns a esté si grande, que quelquesfois ils n'ont pas vſé des reliques comme il apartenoit, falloit-il pour cela estre si desbordé à les blasonner? Ils monstrent bien qu'ils sont fort cler-voyans à appercevoir voire les plus petites fautes des Catholiques: & quand à eux ils ne peuuent pas voir leurs impietez, leurs erreurs, leurs crimes detestables. Si Saint Hierosme viuoit maintenant, il eust & de son eloquence & de sa doctrine incomparable fermé la bouche à ce blasphemateur Calvin, beaucoup plus courageusement qu'il ne feit par le passé à Vigilance, lequel suyuoit les blasphemes de Eunome contre les reliques des martyrs, auquel s'est ioinct maistre Ian Calvin de nostre siecle. Et plaise à Dieu deliurer quelque iour son Eglise d'une telle peste & infection d'hommes.

L'Empereur est à Bonne.

Gaspar Hedio.

L'EMPEREUR estant arriué à Bonne, l'Euesque le traicta & festoya honorablement par quelques iours, & fut prié par sa maiesté de donner congé à Bucer, pourautant que Melancthon estoit déia party. Gaspar Hedio & Bucer estoient demeurez, mais peu apres ils retournerent à Strasbourg: & m'asseure que pour le moins ils eussent esté du nombre des martyrs de Satan, (puys qu'il en a aussi bien que nostre Seigneur) si les gens d'armes Espagnolz les eussent peu happer. Mais ilz se cachèrent si bien qu'ilz ne furent point en danger.

Prinſe de la ville de Dure par l'Empereur.

APRES que l'Empereur eut fait faire la monstre à tout son ost à Bonne, le vingt & vniesme d'Aoust il s'achemina vers Dure, où estant arriué il deſeſcha vn herauld pour les sommer à se rendre. Ayans refusé de ce faire, vn peu apres on commença à la battre si imperueusement, que la bresche fut incontinent faicte, & au cinquiesme assaut les imperialistes la forçerent. Si fut la boucherie fort grande dans la ville, tant des habitans que des autres, comme il aduient toutes & quantes fois que l'ennemy prent quelque place à la pointe de l'espée: les maisons furent gastées, les biens pillez, & plusieurs prins prisonniers, lesquelz furent contrainctz se racheter à grosse rançon. Le lendemain le feu se meit dans la ville, & ne

Dure bruslée.

ſçait-on par qui, de maniere que le feu acheua de conſumer ce que le ſoldat y auoit laiſſé. Ce que voyant l'Empereur, enuoya des gens pour eſteindre le feu à grand' haſte, mais toutesfois rien ne fut ſauué, que quelques maiſons & le conuent des Cordeliers. Et voyla comme ceſte calamiteuſe ville ayant eſté trois fois aſſiegée en vn an, en fin fut miſerablement deſtruite. Or comme le feu deuoroit la ville, ceux qui n'eſtoient mortz à la prinſe, furent amenez au camp: où les femmes & les enfans furent gardez ſains & ſauues ſouz les tentes de l'Empereur, & les hommes Eccleſiaſtiques ſouz celles des Eueſques, & le lendemain furēt r'amenez dans la ville. Le chef *Le chef S. Anne.* de Sainte Anne, mere de la ſacrée vierge Marie, lequel eſt en celle ville enchaſſé en or, & pour lequel honorer y auoit tous les ans vne multitude infinie d'hommes qui accouroient en ceſte ville, fut par le commandement de l'Empereur porté *Des reli-* fort religieuſement en l'Egliſe des Cordeliers, par quelques *ques & in* Eſpagnolz, à fin qu'il ne ſeruist de paſture au feu. Nos nou- *uocation des* *Sainctz.* ueaux Vigilantiens ne peuuent endurer, que nous facions tel honneur aux ſainctes reliques, quoy qu'iceluy redonde à l'honneur de celuy, duquel les Sainctz ont toute leur ſaincteté. Disons leur doncques ce que iadis Sainct Hieroſme (homme de doctrine admirable & d'une ſaincteté de vie inimitable) diſoit à Vigilance: Tu te gaudys, dit-il, des reliques des martyrs, & avecques Eunome, autheur de ceſte hereſie, tu calomnies l'Egliſe de Ieſus-Chriſt: & la ſociété d'un heretique ne te peut empelcher, que tu ne parles contre nous cela meſme, qu'iceluy obiecte à l'Egliſe. Et vn peu plus bas: ie voy bien, ie voy bien, dit-il, ce qui te deult, dequoy tu te faſches. Ce malin eſprit de Satan, qui te contrainct à eſcrire cecy, a ſouuent eſté crucié & tourmenté par ceſte vile poudre, (car ainſi appelloit Vigilance les cendres & reliques des Sainctz) voire meſmes aujourd'huy il en eſt tourmenté bien fort. Pluſieurs autres choſes eſcrit Sainct Hieroſme en ce lieu-là, leſquelles ſuffiſent pour abbatre l'orgueil & follie de noz heretiques, qui ſuyuans les anciens heretiques pieça condamnez, oppugnent les reliques & l'inuocation des Sainctz, & font accroire au

peuple ignorant, que quand nous les honorons nous comé-
 tons crime d'idolatrie. Il fut autresfois vn Empereur en Gre-
Impieté
de l'Empe-
reur Con-
stantin Co-
pronyme. ce nommé Constantin Copronyme, filz de Leon l'ennemy
 des images, & qui fut homme tres-meschant. Suidas auteur
 Grec en a dict ce qui s'ensuit : il vint si fol & des-espéré, qu'il
 „ fait vn edict public, par lequel il defendoit, que personne ne
 „ fust appellé sainct, ains que leurs reliques estans trouuées fuf-
 „ sent iettées au vent, & qu'on ne les inuokaft point, veu que
 „ de ce faire il ne proffitoit de rien. D'auantage, estant comme
 „ le patron & exemplaire des meschans, il osa commander que
 „ personne n'inuokaft la sacrée vierge mere de Dieu, disant
 „ qu'elle n'auoit puissance de nous ayder. Et vint iusques là cest
 „ Empereur qu'il adora Venus, & offrit les hommes en sacrifi-
 ces. C'est ce qu'en dict Suidas. Et voit-on que nos Euangeli-
 ques ont bien fort estudié en son eschole. Nous doncques a-
 uons à bon droit telle societé en abomination.

Succes de
l'Empe-
reur au
païs de
Gueldres. OR apres que Dure fut saccagée, l'Empereur tira vers Iu-
 liers, laquelle ville il trouua presque toute vuyde, fors vn pe-
 tit nombre de femmes & quelques hommes cassez de vieil-
 leffe. Apres cela, il marcha vers Ruremôde, ville de Gueldres
 bien munie, durant lequel chemin vindrent les deputez de
 toutes les villes de la contrée de Iuliers, demandans paix en se
 rendant. Ceux de Ruremonde sans attendre aucunement le
 siege, se rendirēt, eux, & leur ville à l'Empereur souz quelques
 conditions. Le second iour de Septembre l'Empereur fait son
 entrée dans la ville, dans laquelle il fut honorablement re-
 „ çeu par les citoyens, qui le saluoient ainsi à haute voix : Viue
 „ l'Empereur, viue Charles cinquiesme Duc de Gueldres. La
 „ ville doncq' de Ruremonde recongneut son seigneur & mai-
 stre, & luy presta le serment d'obeissance. D'illec il print son
Les villes
se rendi a
l'Empe-
reur. chemin vers Venlo, ville bien forte, les habitans de laquelle
 requirent premierement treues pour quelques iours, pendant
 lesquels ils demâderoient l'aduis du Prince Guillaume. Mais
 l'Empereur les aduertissant d'aduiser à leurs affaires, & qu'il
 les absoudroit bien du serment qui les obligeoit à leur Prin-
 ce, se rendirent quant & quant à l'Empereur. Ce que feirent

semblablement quelques autres villes de Gueldres, & aussi ceux de Zutphanie, par leurs deputez. Si aduint, que tandis que l'Empereur seiournoit à Venlo, le Prince de Cleues choisit meilleur conseil que deuant, & estant accôpaigné du Prince Henry de Brunswic & des Ambassadeurs de l'Archeuesque de Coloigne, vint saluer humblement l'Empereur, & l'entra en son alliance avec certaines cōditions: sçauoir est, qu'il garderoit, & feroit garder inuiolablemēt la religion Catholique en toutes ses terres, & s'il y auoit rien de changé, il le reſtabliroit: il seroit obeïssant à l'Empereur, au Roy des Romains, & à l'Empire. Il renonceroit à l'alliance des Roys de France, de Dannemarc, & de Suede: qu'il quitteroit planieremēt le Duché de Gueldres & le Comté de Zutphanie, & exempteroit le peuple du serment par luy presté: & quelques autres choses, qui ne seruiroient de rien en cest endroit. Pareillement l'Empereur deschargea le Prince de tout le dōmage, lequel auoit esté fait durant la guerre en ses païs, & toutes ses offenses luy furent pardōnées. Au reste, il se reserua pour vn temps les villes de Ziuarde & Hinsberg, des plus fortes du païs de Iuliers.

*Le Prince
de Cleues
recōcilié a-
vec l'Em-
pereur.*

ENVIRON ce temps, il pleut du sang au diocese de Munſtre au chasteau de Sassenburg, gueres loing de Vvarandorp.

*Pluie de
sang.*

CESTE année sourdit en Frise vn nouveau prophete appellé George David, lequel fut si hors de son sens, qu'il osa s'appeller le neveu de Dieu. Il parloit en quelque langage qu'on vouloit avec les bestes & les oyseaux, & receuoit d'eux de l'aliment, vsant sans doute des moyens & tromperies du Diable en cela. Il disoit que le Ciel estoit tout vuyde, & qu'il auoit esté enuoyé pour appeller les heritiers du Royaume, & plusieurs autres choses aussi absurdes & ridicules, ausquelles neantmoins plusieurs presterent l'oreille, comme vous voyez qu'on ne se peult saouler en ce mal-heureux siecle, de nouuelletez, quelques absurdes & impies qu'elles puissent estre. Cy-apres vous orrez quelle fut la fin de ce gentil prophete. L'Empereur Charles faisoit punir & de feu & de glaive tous ceux qu'il trouuoit estre de ceste farine en ses païs de la basse Alemaigne, tellement que mon George craignāt sa peau, s'en

*George
David he-
retique, &
de ses resus-
citions.*

L'AN M.D.XLIIII. HISTOIRE DE TOUTES CHOSES

fuyt avec ses gens à Basse, comme vous verrez cy-dessous.

*Luxem-
bourg re-
conuë.*

SVR la fin du mois de Decembre, le Roy François s'empara de rechef de Luxembourg. Le bruit courroit qu'il ayderoit le Prince de Cleues, & que pour ceste occasion il auoit amené sa niepce Iehanne, laquelle auoit esté promise au susdict Prince. Mais quand il eut entendu pour certain, que le Prince estoit d'accord avec l'Empereur, il fut troublé grandement, & neantmoins il feit bien fortifier Luxembourg.

*Siege de
Landrecy,
à l'honneur
des Fran-
çois.*

EN mesme temps le Roy Henry d'Angleterre enuoya vne armée au pais bas, laquelle vint mettre le siege deuant Landrecy, coniointe avec les forces de l'Empereur, lequel y arriva au mois d'Octobre avec vne armée tres-belle: & ne faillit pas le Roy François de s'y trouuer avec son camp. Or pësoit-on pour le vray qu'il se donneroit bataille, mais les François ayans dextrement r'auitaillé la ville, & mis des bandes toutes fraisches dedans icelle, se retirerent delà tout coy. Dequoy les imperiaux s'aduiferent des le lendemain, & se meirent à suyure les François, si que plusieurs de l'arriere-garde y laisserent la vie, & butinerent beaucoup de vaisseaux d'or & d'argent, & autres choses aussi. On pense que quelques vns aduertirent le Roy, que l'Empereur auoit volonté de donner la bataille, dequoy l'Empereur estant indigné à merueilles, leua le siege de deuant Landrecy, & print la ville de Cambray, où il feit bastir vn chasteau: quand au reste, (comme quelcun a escrit) il laissa la cité libre à l'Euesque, ne voulant rien changer de leurs anciennes coustumes. Il print pareillement quelques autres places, & licentia vne partie de son camp, l'autre il l'enuoya assieger Luxembourg: & quand à luy, il se retira.

*La ville de
Cambray
prise par
l'Empe-
reur.*

*La mort
du Roy de
Portugal.*

L'AN 1544. le 2. iour de Iāuier alla de vie à trespas le Roy Iehan de Portugal, fils du Roy Iehan 3. l'an 17. de son aage. Il auoit eu en mariage Iehanne, fille de l'Empereur Charles, laquelle il laissa enceinte, & icelle acoucha le 20. iour du mesme mois, du petit Prince Sebastien. Voyez vous donc comme plusieurs, gisans au feste de la fœlicité mondaine, partent tout soudain de ce monde, lors qu'ilz commençoient seulement à goustier la faueur d'iceluy? Et non obstant à peine en verrez

verrez vous vn , en vne si grande inconstance des choses , lequel n'espere de viure plus que ne fait oncques Nestor.

EN mesme moys nasquit Monseigneur François , filz aîné du Roy Henry , & qui succeda par-apres au Royaume de France. Aucuns ont escrit qu'il y auoit ie ne sçay quelz Docteurs es loix, qui permettoient au Roy Henry de faire diorce avec Madame Catherine de Médicis son espouse , disans qu'elle auoit demeuré long temps sterile , pourquoy confirmer ils alleguoient quelques exemples nouueaux . Mais & le grand Roy François, & le Roy Henry mesme , refutoient par viues raisons telles dangereuses permissions, & se fondans sur l'equité d'un iugement Chrestien , affermoient qu'il falloit garder la foy au Dieu eternal , quelque chose qu'il plaise à sa sainte maiesté de faire . Laquelle pieté & du pere & du fils, tous deux inuaincez Roys de France, merité d'estre louangée à tousioursmais.

A v commencement de ceste année, l'Empereur partant du pais bas s'en alla à Spire, pour se trouuer à la diete Imperiale par luy assignée . Ceste iournée fut fort belle & celebre, pour autant que tous les Princes Electeurs sy trouuerent , ce qui n'adiet gueres souuent, & le Roy Ferdinand aussi, & pres que tous les Potentatz. En ceste assemblée l'Empereur impetra grande somme d'argent de tous les Estatz de l'Empire, lequel luy seruiroit six moys contre le Roy de France : & s'accorda planierement avec le Roy de Dannemarc, qui s'estoit allié du Roy de France contre sa maiesté: & quât & quant l'Electeur de Saxe promet toute obeissance au Roy Ferdinand. En ce temps-là le Roy de France perdit beaucoup d'amis, pour autant que quelque bruiet courut, qu'il auoit fait alliance avec le Turc , dequoy le Roy mesme se purgea par escrit. Et combien qu'il eust enuoyé ses Ambassadeurs à la iournée de Spire, si est-ce qu'on ne permet pas qu'ils y vinssent.

LUTHER meit ceste année en lumiere ses annotations sur la Genese, esquelles il ne se peut tant commander, qu'il ne s'attaque bien souuent aux Sacramentaires : & de peur qu'on n'eust opinion qu'il n'auoit point l'esprit de prophetie, il pro-

Rrr.j.

*Naissance
du filz aîné
du Roy
Henry.*

*Journée
de Spire.*

*Sentéce de
Luther
des Sacra-
mentaires,
fort nota-
ble.*

phetise deuoir aduenir, que luy decedé de ce monde, les Sacramentaires cōbatteront contre sa doctrine tant qu'ilz pourront. Et non content de cela, vn peu apres, malgré Melancthon, il feit imprimer sa derniere confession de la Cene du Seigneur, en laquelle il asseure, que Zuingle, Oecolampade, & leurs disciples sont heretiques formez, ennemys des Sacramens, & damnez à tout iamais. Or faut sçauoir que ceste sentence de Luther a autant & plus d'autorité enuers tous les Lutheriens, que n'auroient mille Papes de Rome & autant de Conciles: & cela toutesfois n'empesche point les Zuingliens, de faire aussi peu de cas de Luther, comme du Pape. Lors plusieurs estoient d'opiniō, qu'on respondist à ce galland de Luther. Mais Bucer, qui vouloit estre es bonnes graces de l'un & de l'autre, fut d'aduis qu'on espargnast Luther, comme celuy qui auoit fait beaucoup de biens à l'Eglise Catholique. Philippe Melancthon escriuit en ceste saison vne epistre à Bullinger, en laquelle il appelle ceste confession de Luther, liure par trop atroce. Ce pendant ceux de Zurich penserent qu'il falloit vn peu restonner ce Luther, & partant mettent en lumiere vne Apologie, de laquelle nous parlerons cy-dessouz.

*Ruse de
Sleidan à
citer les e-
scriptz de
Luther.*

Maintenant il faut considerer, que Sleidan, qui a de coustume d'inserer beaucoup de choses des escriptz de Luther, quand il parle contre les Catholiques, fait bien mention de ce liure de Luther, duquel ie parle: mais il n'en dict qu'un mot ou deux, à cause que le bon-homme voyoit bien, que sans vne vergongne extreme il ne pouoit reciter quelle opinion Luther auoit des Zuingliens, consideré les loüanges que par-avant il auoit données à ce maistre compaignon. Mais bon gré mal gré Sleidan, il faut que la sentence de Luther des Sacramentaires soit vallable, ou que Sleidan confesse que Luther n'estoit pas homme de bien: & consecutiue-ment, que faulcement & par adulation il la loüé en son œuvre.

*Coffre de
marbre
trouué à* A v moys de Feurier de l'année presente, fut trouué à Rome vn coffre de huitz piedz de longueur, cinq de largeur, & six de hauteur, au mont Vatican assez pres du Tibre, comme

on faisoit les fondemens de la chapelle Saint Pierre. En ice-^{Rome, & ce qui estoit dedans} luy auoit esté inhumée Marie, femme de l'Empereur Honorius, laquelle mourut vierge, & deuant les nopces parfaites. Le corps estoit consumé, & ne restoit rien sinon quelques dentz, les cheueux & deux os de iambes: & d'auantage, vne robbe & vn manteau, esquelz vestemens il y auoit tant d'or, qu'on en tira trente. six liures. D'abondant y auoit vne boëte d'argent, longue d'un pied & demy, & large de trois paumes ou enuiron, dans laquelle on trouua plusieurs petitz vaisseaux de cristal, & quelques autres d'achate, richemēt estoffez. Plus y auoit quarante bagues d'or, ornées de diuerses pierres fort ^{Richesses} exquises. En outre y auoit vne esmeraude enclose en or, & en ^{fort grandes y trouuées.} icelle estoit engrauee vne teste, laquelle on estimoit estre à la semblance de celle d'Honorius l'Empereur. Ceste esmeraude fut prisee cinq cens ducatz. Outre ce on y trouua des aureillettes, des carquans, & autres ornemēs de femme, & entre iceux ce qu'on appelle à present, vn *agnus dei*, au tour duquel estoit escrit, *Maria nostra florentissima*: & avec ce vne lame d'or, sur laquelle estoit escrit en lettres Grecques, Michel, Gabriel, Raphaël, Vriel. Semblablement y auoit quelque chose faicte cōme vn raisin, composé d'esmeraudes & autres pierres, & certain instrument avec lequel les femmes accoustrent leurs cheueux, escrit d'un costé, à nostre Seigneur Honorius, & de l'autre, nostre Dame Marie. Y auoit d'auantage, vne souris faicte d'une pierre nommée chelidoine, & quelques vaisseaux de cristal: plus vn esteuf semblable à ceux desquelz on iouë, tout d'or, & se pouuoit mypartyr en deux. Brief, il y auoit maintes pierres fort pretieuses, lesquelles pour la plus part estoient gastées de trop grande vieillesse, mais quelques vnes retenoient leur beauté & valeur comme si elles eussent esté toutes neuues. Et c'estoit ce que le Capitaine Stilicon auoit donné à sa fille, en douaire.

TANDIS que la journée se tenoit à Spire, Loïs Prince & Electeur Palatin alla de ce siecle en l'autre, & eut pour son successeur son frere Frideric, qui eut à femme Dorothee, fille de

*De n'al-
ler point
au service
du Roy de
France.* Christierne Roy de Dannemarc. A là mesme diete fut enioinct souz grosse peine, que personne n'allast à la guerre pour les estrangers, & nommément pour les François. Et non-obstant plusieurs, ne faisans conte de telles inionctions, allerent au seruice du Roy de France. Desquelz fut le Comte Hubert de Bichling, Alemã, qui fut prins en Lorraine, & estât amené à l'Empereur à Merz, fut condamné à la mort. Sa femme pria tres-instamment l'Empereur de luy pardonner: & nonobstant toutes choses estoient prestes à le faire mourir, quand Maximilian, filz du Roy Ferdinand, addoucit le cueur de l'Empereur, & sauua la vie au Comte.

*Muleasse
Roy de Tu-
nes vient
en Sicile.* PREMIER que de parler comment l'Empereur partit de la iournée de Spire pour aller faire guerre en France, ie vous veux dire en passant quelques choses de ce qui aduint inopinément à Muleasse Roy de Tunes. Presque en ce temps, luy ayant entendu que l'armée de mer Turquesque s'apprestoit, & costoyoit l'Italie souz la conduyte de Barberouffe, il singla droit en Sicile, pourautant que non sans cause il craignoit Barberouffe, sçachant bien qu'il n'y auoit pas beaucoup que l'Empereur Charles l'auoit debouté du Royaume de Tunes.

*Amidas
fils de Mu-
leasse.* Or pour garder son Royaume, il y laissa les plus feaux qu'il pensoit auoir, Mahometh, pour gouverner la ville, & vn Corfesque nommé Fares, qu'il establit Capitaine du chasteau. Et constitua son fils Amidas chef de toutes ses forces, pour garder Tunes cõtre les Turcs & les Numides. Or partit il de Sicile pensant venir à Genes parler à l'Empereur, mais les vêts luy furent contraires, de maniere qu'il fut repoussé à Naples. Auquel lieu le Vice-roy le festoya honnestement, & estoit Muleasse en admiration à chascun, à cause de sa maniere de viure, de sa façon d'accoustremens, & des parfuns & senteurs tres-exquises. Car on farcissoit les viandes qu'on apportoit sur table avec des onguens de prix inestimable, selon la discipline de seruir le Roy, de sorte qu'o a remarqué, qu'un Paon

*De la di-
uination
par les as-
tres.* & deux Faisans, accoustrez à leur mode, reuenoient à cent escuts. Ce Roy estoit addonné à la superstition de Mahometh, & grand obseruateur des astres, qui fut cause de tout son mal-

heur. Car il luy sembla, que par vne necessité forcée des astres
 il deuoit perdre son Royaume, & mourir mal-heureusement.
 Au moyen dequoy il auoit quitté l'Afrique, mais par ce sien
 departemēt il fut cause, que le desastre, duquel il se craignoit,
 luy suruint. Pleust à Dieu que les Chrestiens mesmes cogneus-
 sent à la par-fin, que la diuination, qu'on prend des astres, est
 vne pure vanité, voire superstition, & partant illicite. Comme
 si Dieu auoit ordonné, que le franc arbitre dependist des
 astres, attendu qu'iceux ont esté faictz & creéz à l'usage
 de l'homme. L'écriture ne dit-elle pas euidemment, n'ap-
 prenez pas comme font les gentils, & n'ayez point crainte *Iere. 10.*
 des signes du ciel, lesquels les gentils craignent, car les loix
 des peuples sont vaines? Et, à fin que ie n'allegue autres au-
 theurs, S. Augustin en plusieurs lieux se formalise bien fort *Lib. 2. de
doct. Chri-
stiana.
cap. 21.*
 contre ceste superstitieuse diuination, & blasme grandement
 les Mathematiciens, disant qu'ilz sont bien bestes, quand ilz
 soustiennent, que nos actions, ou les euenemens de nos acti-
 ons peuuent estre prognostiquez par la disposition des astres: *Note la
sentēce de
S. Augu-
stin tou-
chant les
deuins.*
 & qu'en ce faisant, ils vendent aux hommes vne seruitude mi-
 serable, voire mesmes appelle-il ceste prediſtion, vne grande
 follie. Que si on voit quelquefois aduenir ce que ces refuseurs
 & diseurs de bonne aduenture predisent, le mesme Sainct *Cap. 22.*
 nous en donne la raison telle: il aduient par les illusions & pre-
 uarications des mauuais anges, qu'en ceste maniere de diui-
 nations superstitieuses & pernicieuses, on dit beaucoup de
 choses passées & aduenir, lesquelles viendront tout ainsi qu'o-
 les aura dictes: & ceux qui obseruent beaucoup, rencontrent
 quelquefois, de façon qu'estans ainsi embabouinez, il deuie-
 nent encore plus curieux, & s'embrouillent de plus en plus
 es laz de cest erreur. Mais retournons à nostre Muleasse, que
 nous auons laissé.

Comme il estoit encor' à Naples, où l'Empereur auoit
 commadé qu'il seiournast, apres que Barberousse eut en vain *Amidas
s'empare
du Royau-
me de son
pere Mu-
leasse.*
 assiegé le chasteau de Nice, il receut nouuelles certaines d'A-
 frique, que son fils Amidas auoit cotippé la gorge à ses amis
 & fauoritz, & s'estoit emparé de la ville & chasteau de Tunes.

Ce qui luy donna marrel en teste, & soudain ramasse quelques gens, de façon qu'en brestemps il eut mille huit cens hommes, lesquelz il fait embarquer, & prend la route de la Goulette. Car il auoit esperance de venir encor' au dessus de son filz, à cause qu'il n'auoit pas ses forces encore bien affermies, & d'auantage, ce conseil sembloit estre assez bon au Viceroy Dom Pierre de Tolete. Il faut sçauoir que quelques Seigneurs auoient corrompu Amidas, faisans courir vn faux bruiet, que Muleasse estoit mort à Naples, que, commettant vn horrible meschanceté, il festoit fait baptiser, ains que rendre l'esprit. Tellement que Amidas esguillonné de ce bruiet & de l'aduis des Seigneurs, s'en va à Tunes, mais alors il en fut repoussé, à cause que les habitans de la ville n'estoient encor' assurez de la mort de Muleasse. Ce-pendant il demeure ailleurs, & de rechef l'occasion s'estant présentée, il retourne à Tunes, appellé par quelques citoyens de la ville, ennemys de Muleasse: auquel lieu il fait massacrer quelques vns qui s'opposoient à luy, se retire au chasteau, & en bien petit de temps il iouit de la ville, du chasteau, & du Royaume quant & quâr.

*Muleasse
retourne
en Afri-
que.*

C'estoit donc la cause, pour laquelle Muleasse meit sus quelques gens à la haste pour singler en Afrique. Venu qu'il est à la Goulette, François Touarre, Lieutenant de l'Empereur, l'aduertit, que sans auoir premierement sçeu le vouloir & intention des habitans, il ne faisoit pas bien d'aller à Tunes avec si peu de compagnie. Mais quelques Africains, sortis de la ville, le deceurent, lesquelz posans le glaue sur la gorge, selon la maniere de faire du païs, luy donnent le serment, de bien le seruir en guerre, & l'assurent que Amidas l'ayant vne fois veu, abandonneroit la ville tout incontinent. Si que, sans faire cas des parolles de Touarre, il s'en va à Tunes, & estant de rechef aduerty par quelques gens de cheual Espaignolz, enuoyez sur le chemin par Touarre, à ce qu'il se donnast garde des embusches, lesquelles estoient pres de la ville, neantmoins il persista en sa premiere opinion. Aussi arriué qu'il est pres la ville, les Africains, sortans de la ville & des embusches, luy courent sus, de maniere que plus de treize

*Comment
Muleasse
fut prins
par les A-
fricains.*

cens de sa troupe y laisserēt leur vie, & Muleasse mesme s'en fuyt: mais estant cogneu, principallemēt à cause de ses odeurs & onguens, il fut prins. Son fils Amidas l'ayant fait venir deuant soy, luy fait creuer les yeux avec vn fer chauld, & ainsi il l'aveugla miserablement. Autant en eurent les deux freres d'Amidas, Nahafer & Abdalas, lesquels auoient esté prins avec Muleasse. Ce fait, il fait treues avec le Seigneur Touarre, & donna quelque somme d'argēt pour la solde des gens d'armes Espaignols. Luy donna pareillement son fils Schite, qui n'auoit que neuf ans, en ostage, avec condition qu'incontinent il luy seroit rendu, en cas qu'on ne feist certaine paix. Or quoy que ces treues semblaissent estre necessaires pour beaucoup de raisons, toutesfois scachant bien Touarre, que l'Empereur seroit merueilleusement irrité de la cruauté d'Amidas, il soigna à ce que Abdamelech, frere propre de Muleasse, lequel auoit longuemēt demeuré banny chez Anemschas Roy des Numides, s'emparast du siege de Tunes. Ce qui fut fait par vne diligence & vistesse admirable, r'enuoyant ce pendant l'enfant Schite, qui estoit en ostage, à Tunes, à fin qu'il ne semblast rompre la foy promise à Amidas. Doncques Abdamelech sans delay aucun s'en va à la Goulette, & de là à Tunes, & pourautant qu'il couurit sa face de mouchouers pour empêcher le chauld, les gardes de la porte du chasteau ne le recogneurent point: ains estant admis cōme si c'eust esté Amidas, print la forteresse, & fait mourir les gardes: lesquels estans apperceus que ce n'estoit pas Amidas, auoient crié l'alarme. De maniere que les citoyens de la ville venuz au chasteau, le saluerent Roy: mais, comme il n'y a rien en ce monde de ferme & stable, il tomba peu apres en maladie, de laquelle il trespassa le trente-sixiesme iour apres. En son lieu fut substitué Mahometh son fils, de l'aage de douze ans: mais pourautant que les grands Seigneurs, qui gouvernoient le ieune Prince, administroient le Royaume au rebours de ce que demandoiēt ceux de Tunes, & par-ce aussi que quelques autres choses n'alloient pas à leur phantasie, ils r'appellerent de rechef Amidas. Mais ce pendant on tire Muleasse de prison, & le

*Amidas
aveugle
son pere &
ses freres.*

*Autre
mutation
à Tunes.*

*Abdamelech se fait
Roy de Tunes.*

*Amidas
r'appellé
au Royau
me.*

L'AN M.D.XLIIII. HISTOIRE DE TOUTES CHOSES

meine-on en vne chappelle inuiolable de ie ne sçay quelle mosquée, & d'illec fut emmené à la Goulette, comme demandoit Touarre. Le mesme Muleasse auoit esté par-auant sauué par vne vieille, qui le feit mettre dans vne fosse toute couverte d'aulx, pendant que ceux de Tunes le cherchoient pour le faire mourir. Aduint doncques que de rechef Amidas s'empara du Royaume, & Muleasse à la par-fin fut par le commandement de l'Empereur amené en Sicile, pour illec estre nourry aux despens des Siciliens. Parquoy voyons en nous mesmes, que Claudian a tresbien dict ceste sentence:

Nul ne se doit fier en ses biens & grandeurs.

De Muleasse & de ses ancestres.

OR ce Roy Muleasse a esté vn homme assez docte, & principalement fut-il studieux d'Auerroïs. Au reste, il disoit que les Roys de Tunes de la race de Choreà, (de laquelle il estoit issu, & l'origine desquels il faisoit descendre iusqu'à Homar, parent & disciple du faux-prophete Mahometh,) auoient regné plus de neuf cens ans successiuement, & sans meslange d'aucune race estrangere: & que le Roy de Tunes pour vn fort grand tiltre d'honneur estoit appellé par vn surnom *Emir munemim*, c'est à dire, Prince des bien croyãs en fait de religion.

Guerre de l'Empereur en France.

LA iournée de Spire estant par-acheuée, l'Empereur voyant que son camp estoit venu iusqu'aux marches de Lorraine, se mit à chemin, & premierement recouura Luxembourg sur les François, & puis la ville & chasteau de Ligny: apres il met le siege deuant Saint Disier, pendant que Henry, Roy d'Angleterre, barroit Boloigne sur la mer, d'un autre costé. La ville de S. Disier soustint longuement tout l'effort des assiegeans, mais apres que le preux & vaillant Capitaine la Lande, qui estoit dedans, fut terragé ius d'un coup de canon, en fin ils furent contraincts de se rendre. Si mourut à ce siege René Prince d'Orenge, ieune homme parfait des dons & de fortune & de nature, lequel aussi estoit des plus fauorits qu'eust l'Empereur, de maniere que ledict Sieur l'embrassa en pleurant, comme il trespassoit. Prins que fut Saint Disier, l'Empereur tira plus auant, & meine toute son armée iusques sur la Marne, dont les Parisiens auoient vne peur inestimable, & non sans cause,

La peur des Parisiens.

cause, veu la puissance de l'ennemy, qui s'approchoit si pres de la grand' cité. Mais ce fut lors que Dieu nous enuoya sa paix, avec quelques conditions entre le Roy & l'Empereur, paix que les François souhaittoient bien fort : pour-autant que le pais n'estoit pas seulement gasté par l'armée de l'Empereur, mais bien encore fort miserablement par la leur mesme. Environ ce temps Boloigne sur la mer se rendit au Roy d'Angle *Prise de Boloigne.* terre, ville que iamais les predecesseurs d'iceluy Roy n'auoiēt peu prendre. Mais pareillement paix fut faicte entre ces deux Roys par apres.

O R tandis que la guerre bouilloit par my la France, Herman, Archeuesque de Coloigne, persista de haster la mal-heu *Discours sur le faict de l'Euesque de Coloigne, & du Clergé Catholique.* reuse & entierement Bucerienne reformation de son diocese. Auquel le clergé s'oppose, suppliant l'Euesque de differer cest affaire iusqu' à la cognoissance & decision d'un Concile general: & luy faisant autrement, ilz auroient recours au supreme Magistrat, & tascheroient de trouuer les moyens, par lesquels ilz pourroient satisfaire à leurs consciences. Non-obstant cela, le Prince amadoué de sa folle sentence, s'opiniastra en icelle. Au moyen dequoy le Clergé, & ceux qui luy appartiennēt s'assemblans vn huietieme iour d'Octobre, exposerent là entre autres choses ce qui auoit esté cōclu & arresté à Vvormes, passé auoit vingt & trois ans: auquel lieu Luther auoit esté cōdamné & par l'Empereur & par presque tous les Princes : & semblablement fut allegué ce que depuys auoit esté ordonné à Ausbourg & Ratisbone, & de fraische dattē à Spire: à quoy s'opposant malignement Herman, leur Euesque, auoit attenté quelques nouuelletez, & par-ainsi auroit faict venir de Strasbourg l'apostat Bucer, Sacramentaire, qui déia par deux fois s'estoit contaminé par nopces incestueuses, & que pour-suyuant, il auroit faict prescher le galād sus-dict, & quelques autres predicans esuentez: & que à la suggestion d'iceux on auoit couché par escrit nouvelle forme de reformation, laquelle le Prince auoit déia mise en lumiere. Quand à eux, chascun estoit assez aduerty comment ilz l'auoient voulu empescher de ce faire, & que neantmoins ils n'auoient rien gai-

gné: que des à present le Diocese se portoit fort mal, & que toutes choses sembloient les menacer d'un grand trouble. Et partant ilz estoient resoluz entr'eux d'en appeller au S. siege Apostolic, & à la sacrée Maïesté de l'Empereur. Comme d'ocques cela fust venu à l'oreille de l'Euesque, il tesmoigna par vn escript public qu'ils n'auoient eu aucune iuste occasion d'en appeller, & qu'il n'auoit fait que son deuoir, & partant qu'il reiettoit cest appel, & esperoit qu'ilz laisseroient leur premiere opinion. Et bien qu'ilz ne le fissent, si est-ce que quand à luy il continuera son entreprinse: & ce pendant il louë fort les escriptz de Luther & de Bucer, mais sans point de faute il auoit esté vilainemēt deçeu. Alors donc les Chanoines de l'Eglise metropolitaine conuoquēt tous les estatz du diocese de Coloigne, ausquelz ils proposerent les meschans desseings de l'Archeuesque, & aussi le mandement de l'Empereur, par lequel ils estoient aduertys de n'admettre aucune nouuelleré: & partant ils les en-hortoient tous de demeurer avec eux en la religion Catholique, laquelle ils auoient receuë par les Apostres, & conseruée iusqu'à present. Au reste, ils rescriuirent amplement au Prince, qui les encourageoit à desister de leur appel & à quelques autres choses, l'admonnestans en-outre d'attendre le iugement du Pape & de l'Empereur, ausquelz il estoit aussi bien subiect, comme eux: & maintes autres choses y estoient traittées, lesquelles ie ne veux point conioindre en cest endroict pour euitier prolixité. Si furent apposez à ces lettres les seaux de la grande Eglise, de S. Gereon, & mesmes de l'Vniuersité. Mais le pauvre Euesque croyant qu'il faisoit chose agreable à Dieu eternal, non seulement il n'osta les trompetteurs de la doctrine Lutherienne, ains encore permit-il, q̄ certaines villes changeassent leur religion, chose certainemēt pernicieuse à la foy Catholique, iniurieuse aux vrais & legitimes pasteurs, & fort dommageable au pauvre & simple populaire.

*Pierre
Bruli here
sique est
brulé à
Tournay.*

ENVIRON ce temps y eut vn François predicāt, de la secte des Sacramentaires, nommé Pierre Bruli, lequel partit de Strasbourg pour aller euāgeliser à sa mode en la ville de Tournay en Flandres. Auquel lieu il sema sa fauce doctrine, & puy

en vint autant faire à l'Isle en Flandres, faisant toutesfois son beau mystere en cachettes. Or retourné qu'il fut à Tournay, on commença à s'enquerir de ce compaignon, (car il ne pouuoit demeurer caché longuement) & voyans ses amis qu'il luy feroit impossible d'euaider le peril où il se trouueroit, ils le deuallèrent à val le mur avec vne corde. Mais pourautant que la vengeance diuine le talonnoit tousiours, tandis qu'il estoit à terre, quelcū qui estoit sur la muraille luy dist à Dieu tout bas: & à mesme instant tomba sur le predicant gisant à terre, vne pierre du haut de la muraille, qui luy froissa la cuyssse. Lors le pauvre homme, qui ne pouuoit endurer la douleur de la plaie & le grand froid, (car c'estoit le second iour de Nouembre) se met à se plaindre & lamenter: tellement que la sentinelle le descourrit, laquelle va là, & trouue nostre ministre, lequel fut mené en prison, & peu apres fut bruslé. Plus heureusement se sauua autresfois S. Pol pour communiquer l'Euangile à toute la terre. Ce que souhaittoit faire nostre Bruli, mais pour-autāt que sa cause n'estoit pas si bonne, Dieu ne bien-heura pas ses desseings, cōme il feit à S. Pol. Et à la mienne volonté q̄ plusieurs doctes Catholiques fussent aussi ardās à amplifier leur vraye religion, cōme vn tas de predicans bouillēt de desir de semer leur poison par tout. Sleidan recite assez prolixemēt la derniere Confession de foy de ce Bruli, laquelle pour vray est grandemēt impie, & en plusieurs pointz elle ne s'accorde pas à Luther, comme Confession plustost Sacramentaire que Lutherienne. Sleidan dict pareillement, que Bruli soustint sa doctrine iusqu' au dernier soupir de sa vie fort constamment, c'est à dire opiniastrément. Mais comment seroit-il vray, veu que vn peu deuant il n'auoit peu endurer la douleur de sa cuyssse, froissée de la cheute d'vne pierre? Je m'asseure que Sleidan en a auancé icy plus qu'il n'en y a, comme est sa bonne coustume en parlant des heretiques. Et quād bien seroit vray ce que dict Sleidan de Bruli, il n'importe de rien, ains rend sa cause plus mauuaise, pource qu'il aime mieux s'opiniastrer à soustenir vn erreur Satanic, que se recognoistre. Car il ne faut point qu'ilz nous produysent leurs martyrs, attēdu que hors l'Eglise

*Sleidan
loue Bruli*

*Où sont
les martyrs*

Catholique il n'y a nul vray martyr: & quand quelqu'un est sequestre de l'union d'icelle, quelque grand mal qu'il puisse endurer, si est-ce que cela ne le fait pas martyr, ains luy est cause & commencement de plus grandes peines, qu'il souffrira es enfers à tousioursmais. Car ceste sorte d'opiniastreté est vn crime horrible, & qui ne se peut effacer par sorte que ce soit.

*Ceux de
Zurich con-
tre Luther*

L'AN 1545. ceux de Zurich meirent en lumiere vne apologie contre la Confession de Luther, en langue Alemãde & Latine, en laquelle ilz respõdent brauement au crime d'heresie, que Luther leur auoit obiecté, & à d'autres iniures, quoy que Bucer se formalisast contre ceste responce, comme celuy qui vouloit tousiours nager entre deux eaux: mais ceux de Zurich penserent qu'il ne leur estoit pas feant d'endurer les propos d'un homme caut, captieux, & brouillé en ce qu'il traite. Et pleust à Dieu que Herman, Euesque de Cologne, se fust donné aussi bonne garde de ce regnardeau de Bucer.

OR sur cela, Luther fait aussi imprimer ses Theses contre les Theologiens de Louvain, theses certainement escrites par grande superbe: mais en icelles il mort gentiment les Sacramentaires. Car en la 15. These sont les motz suyans: au venerable sacrement de l'autel est, & y est receu veritablement

» & de fait, le corps & sang de Iesus-christ, tant par les dignes
» que par les indignes. Et en la these 27: A bon droit estimõs
» nous, que tous Zuingliens & Sacramentaires sont heretiques
» & estrangez de l'Eglise de Dieu, attendu qu'ilz nyent, que le
» corps & sang de Iesus-christ soit receu de nostre bouche charnelle, au saint sacrement de l'Eucharistie. Voyla donc les parolles, par lesquelles Luther se vengea son faoul de ceux de Zurich: lesquelz, entre autres choses mises en leur escrit cy dessus mentionné, auoient inseré ce gentil tesmoignage de Luther: Les prophetes & Apostres, disent-ilz, s'estudioient

*L'opinion
que ceux
de Zurich
auoient de
Luther.*

seulement à la gloire de Dieu, & non point à leur honneur propre, & moins encor à leur opiniastreté & superbe, ains leur soing n'estoit que de sauuer les pecheurs. Mais Luther cherche sa propre gloire & proffict, il est opiniastre, il est superbe, & donne incontinent les gens à tous les diables: (aussi estiez-vous dignes d'auoir vn si gẽ

til Pape, ayans secoué le ioug de celuy de Rome.) *Scauoir est ceux, qui ne veulent auoir telle & mesme opinion qu'il a, & en toutes ses admonitions vous y verrez tousiours vn esprit maling, & n'y a aucune affection d'amy ou de pere.* Or faut-il scauoir d'abondât, que Sleidan ne faiçt pas seulement mentiõ des Theses de Luther contre ceux de Louvain, ains encor' en prend plusieurs poinçtz qu'il adiousté à son histoire : mais ce-pendant il n'a garde de mettre vn seul mot de ce que Luther y diçt contre les Zuingliens. Voyez vous donc si Sleidan n'auoit pas l'esprit ^{*Ryse de Sleidã faisant ce que Luther diçt contre les Zuingliens.*} vraiment Euangelic? Le simple lecteur ne s'aduise pas de cela, & par-ainfi Sleidan veint à bout de ses souhairs, qui ne sont autres que de trõper le lecteur. Plus il adiousté, que les Theologiens de Paris & de Louvain ne font que proposer des axiomes nudz, (à scauoir aux heretiques) qu'ilz n'alleguēt pas vn passage de l'Escripture saincte, & que leur but n'est que d'enflâmer le bras seculier à punir les heretiques, Sleidã diçt qu'il est ainfi. Mais il est dementy (& deuroit en cela mourir de honte) par plusieurs liures d'iceux Theologiens, remplys des lieux de l'escripture saincte, contre ces amateurs de nouuelletez. Et certainement les Theologiens aimeroient beaucoup mieux, que les heretiques recogneussent leurs erreurs, que qu'ils fussent punis.

LES Lutheriens au contraire, accusent ceux de Zurich, disans qu'ilz ont par trop diçt contre Luther, lequel il falloit ^{*Opinion des Lutheriens de Zurich.*} traicter plus doucement, tant pour ce qu'il auoit beaucoup trauaillé pour l'Eglise, que eu respect à sa grãde vieillesse. Aufquelz ceux de Zurich respondent, qu'il falloit auoir plus de soing de la verité, que de Luther : & ce sont les beaux tiltres d'honneur, que nos Euangeliques s'entredonnēt. Aucuns d'eux ont escrit, q̃ les Papistes (c'est à dire les Catholiques) se delectoient bien fort à les voir ainfi en picques & altercas. Cõme si les Catholiques se resiouissoient de voir vne infinité d'ames aller de iour à autre au profond des Enfers, deçeues par les seditieux erreurs de ceux-cy : & de voir que la Chrestienté ^{*Des contē tions entre les heretiq̃s*} est toute brullée de la flamme de ces haynes, lesquelles les Euangeliques excitent par leurs presches, & par leurs liures,

pendant que les Turcs sy delectent, & attendent les occasions de bien faire leurs affaires, & que les diables suggerent tousiours nouvelles torches pour allumer le feu. Qui a le cueur si reuestu de marbre, qu'il ne se fasche de voir vne seule ame aller à damnation sempiternelle? Que si les Catholiques s'esioiussent du discord des heretiques, la cause est, que par cela les hommes peuuent veoir à l'œil la fauceté de leur doctrine, silz veulent: considéré qu'ilz sont si fort discordans ensemble, combien que l'Escripture nous die des premiers hommes de nostre religion, ceux qui croyoient n'auoient qu'un cueur & vne ame.

*Act. 4.
Iournée
d'Vvormes.*

CESTE année fut tenuë la iournée à Vvormes, à laquelle presque pas vn des Princes n'assista, sinon par Ambassade. Et combien que l'Empereur (quoy qu'assez tard, à cause qu'il ne se portoit pas bien) & le Roy Ferdinand sy trouuerent, toutesfoi on ne peut pas faire ny arrester grand' chose, à cause de l'absence des Princes. Au moyen dequoy vne autre iournée fut publiée pour tenir l'an suyuant à Ratisbone, vers la feste des Roys, à laquelle seroient tenus tous les Princes d'assister, sinon qu'ilz fussent malades. Au reste, à la iournée d'Vvormes entre autres choses les Ambassadeurs des Protestans tesmoignerent, qu'ilz ne receuoient pas le Concile de Trente (publié de rechef par le Pape) pour vn vray & legitime Concile. Et c'estoit vn chemin le plus court, pour annuler & mespriser tout ce qui pourroit estre arresté en iceluy. Et certes sil estoit permis à tous subiectz de ne recognoistre point pour loix ce qu'ordonneroit le Prince, vrayement ie croy que bien tost nous aurions vne gentille tranquillité & paix en la Republique. Ceste protestation n'a en rien imminué l'autorité de ce saint Cōcile, & les estatz des Protestās auoient achetés ces beaux mysteres en la boutiq des predicās. Par là il n'y a celuy qui ne puisse voir, de quelle affection ils estoiet poussez, quād à tant de iournées par-auant tenuës ilz persuadoient à leurs magistratz, de demander vn Concile general. Aussi estoient les affaires d'Alemaigne venues au dernier excès, & peu à peu on facilitoit le chemin à la guerre des Protestans à l'en-

Les Protestans reiettent le Concile publié à Trente.

contre de l'Empereur, de laquelle nous parlerons cy apres. Or iagoit que bien souuent on auoit tasché tant que faire se pouuoit, à accorder les differens de la religion, par quelques colloques faits par hommes doctes deputez des deux costez, ^{On assigne le colloque} & qu'on n'auoit rien fait iusqu'icy digne de memoire: si est-ce que l'Empereur, qui ne souhaittoit rien d'auantage que d'establiir vne bonne paix, & r'affermer tous les discords du faict de religion, s'accorda de rechef en ceste iournée, (quoy que les Estats Catholiques n'y consentissent point) qu'à la prochaine iournée de Ratisbone seroient euoquez les doctes de l'un & de l'autre costé, pour conferer de cecy par-ensemble.

LUTHER escriuit ceste année contre le Pape de Rome, ^{Ordres & detestables peintures du Pape, faictes par Luther.} estably par Satan: car telle estoit l'inscription de son liure. Et à fin que tous hommes bien entenduz cognoissent le cueur & le zeile du compaignon, ie diray la peinture qu'il feit peindre au commencement. Le Pape estoit assis en vn hault throne, ayant les mains ioinctes & estendues, vestu de ses ornemens solempnels, mais avec des oreilles d'asne. Tout autour y auoit force diables en diuerses figures, dont les vns luy imposoient le triple diademe, rehaussé d'excrement humain: les autres le deuallent par cordes en enfer, qui est là horriblement peint: les autres luy apportent des tisons, les autres comme officieux, luy esleuent les pieds, à ce qu'il descède plus à son aise: lesquelles choses n'ont point besoing d'estre refutées, à cause que du premier coup elles monstrent vn cueur & vne ame souillée de toute espece d'ordure & vilennie: & ceux qui ne l'apperçoient, sont veritablement dignes de demeurer tousiours en vn tel aucuglement. Encore ne se contentant pas d'un acte si heroïque, il feit imprimer vne autre peinture, plus au deshonneur des siens, que à l'ignominie du Pape. Le Pape vestu de ses habits cheuauche vne truye grosse, & qui a les tetins fort amples, à laquelle il donne des esperons. Ce-pendant il fait la benediction à ceux qu'il rencontre, estendant les deux doigts prochains du poulce de la main droicte, comme porte la coutume. De la fenestre il tient l'excrement humain encore tout chaud & fumant: & ce qui s'ensuyt. Or faut entédre, que dans

L'AN M.D.XLV.

HISTOIRE DE TOUTES CHOSES

*Beaux
mots sou-
uent en la
bouche des
heretiques*

les escripts de Luther & de tous les moynes Apostats, qui se sont rengez à son troupeau, on ne voit rien plus souuent escrit, que le diable & le fient: de maniere que chacun peult cognoistre, s'il a vn brin d'esprit, qu'ils se sont consacrez à Satan & à vne desbordée Venus. Et neantmoins, estans tels, estans si vilains & impudens, sont reputez comme fils estoient Apostres de Iesus-Christ. O combien est horrible l'ire de Dieu! Sleidan eust esté bien marry de ne mettre point ces peintures dans son liure, & tant s'en fault qu'il les blasme, (quoy qu'il die que plusieurs le feirent) que plustost il tasche de nous faire de Luther, vn prophete. Ainsi par le passé les Manichæens vouloient, que leur meschant & abominable Manes fust reputé pour le Saint Esprit. Mais vn iour viendra, auquel le vray iuge Iesus-Christ prononcera la vraye & infallible sentence, & lors apparoiſtra que Sleidan, paranymphe des loüanges de Luther, ne luy a de gueres seruy.

*L'Eues-
que de Co-
loigne est
cité.*

A v moys de Iuin de l'année presente, l'Empereur reçeut en sa proteſtiō & sauuegarde le Clergé & l'Vniuersité de Cologne, & commanda à l'Euesque venir par deuers luy, pour respondre à ce qu'on luy mettoit sus, dans trente iours. Le Pape Paul en feit autant au moys de Iuillet, le citant à soixante briefs iours.

*Charles,
fils du Roy
d'Espai-
gne.*

Q V A S I de ce temps nouuelles ioyeuses vindrent à l'Empereur, de la naissance de Charles, fils de Philippe, Roy des Espaignes: mais ceste ioye fut peu apres meslée d'amertume, nouuelles estat venuës de la mort de la belle-fille de l'Empereur, comme l'on voit n'y auoir rien heureux en toutes sortes, souz la concauité des cieux.

*Deffailte
du Prince
de Brun-
swic.*

A V S S I en ce temps le Prince Henry de Brunswic, pieça chassé de ses terres par les Protestans, feit leuée de gens pour r'auoir ses biens. Mais les Protestans, qui estoient beaucoup plus forts que luy, meirent sus plus grosses forces en bref, & prindrent le Prince Henry, & son fils Charles. Ce qu'ayant entendu l'Empereur, escrit au Lantgraue qu'il vſast modérément de ceste victoire, & qu'il tint les Princes prisonniers traictez en Princes.

Durant

DV RANT ceste année, voyant l'Empereur que les Prote-
stans ne vouloient rien cōtribuer pour faire guerre au Turc,
que premier ils n'eussent impetré ce qu'ilz requeroient quād
au Concile, & quand au iugement de la Chambre, despescha
à la iournée d'Vvormes Gerard Veltuuich, homme tref-docte
& bien entendu aux langues, & l'enuoya pour moyēner quel-
ques treues avec le Turc.

A v moys de Septembre de l'année presente alla de vic à *Mort de*
trespas Monseigneur Charles, filz du Roy de France, lequel *Charles,*
l'Empereur esperoit auoir pour son gendre, ou à tout le moins *filz du Roy*
pour son allié. Ce ieune homme estoit en la fleur de son aage, *François.*
renommé preux & vaillant, & partant aymé grandement de
plusieurs: mais Dieu l'appella à soy lors que sa ieunesse le con-
uioit à exploicter maintes choses: pour enseigner à tous hom-
mes, qu'ilz doyuent mespriser ce monde.

A Y A N T entendu Luther que le Prince Henry de Brun- *Luther*
suic estoit prisonnier du Lantgraue, il rescriuit à l'Electeur de *suade qu'o*
Saxe & au Lantgraue, & les en-horte de ne deliurer aucune- *ne deliure*
ment le captif. Car Luther dict que Dieu l'a chastié, & qu'il ne *point le*
peut estre absouz, que premier il ne face vraye penitence, & *Duc de*
entiere satisfactiō. En quoy nous voyons que Luther attribué *Brunsuic.*
beaucoup à la penitence & satisfactiō, laquelle ces nouueaux
Euāgeliques mesprisent si fort. Plusieurs autres choses met
Luther en ce sien liure, par lesquelles il se faiēt mocquer à plei-
ne gorge à tous ceux qui ne sont du tout folz: mais ce seroit
chose superflue de les reciter en cest endroiēt, à cause qu'il sē-
ble que le mōde souhaitte de tomber en erreur, & s'eslouir de
sa perdition. Sleidan, comme ie vōus ay dict cy dessus, attri-
buē à Luther l'esprit de prophetie, combien que Sleidan, com-
me estant heretique Sacramentaire, ne consentist pas avec
Luther, en ce qui concerne le Sacremēt de l'autel. Mais pour-
quoy ne seroit Luther appellé prophete, veu que les siens le
nomment bien le tiers Elie: les Turcs ont aussi bien leur grād
prophete, à sçauoir Mahometh.

L'AN 1546. les Protestans s'assemblerent au moys de Ian- *Assemblée*
uier à Francfort, où fut deliberé du Concile de Trente, de cō- *des Prote-*
stans à
Frācfort.
Tit.j.

tinuer la ligue, des fraiz & despens de la guerre contre celuy de Brunswic, & de n'abandonner point l'Archeuesque de Coloigne, lequel auoit changé la religion contre le mandement du Pape & de l'Empereur. Car les Ambassadeurs dudit Euesque auoient formé pleintifz en ceste assemblée, cōtre le Clergé, & touchant les citatiōs & mandemēs du Pape & de l'Empereur. A la verité l'estat d'Alemaigne estoit là venu, qu'il estoit permis de s'aller plaindre des souuerains Magistratz deuant bien peu des Princes de l'Empire, lesquelz disoient, qu'ils secoureroient l'Archeuesque de Coloigne, en cas qu'on attentast rien contre luy.

*L'heresie
commence
au Comté
Palatin.*

EN ce temps fut introduict le Lutherisme au Comté Palatin du Rhin: au moyen dequoy les Ambassadeurs des Protestans enuoyerent vn Ambassade, pour congratuler au Prince Palatin de ce faict. Car ils pensoient que la lumiere de l'Euangile fust communiquée aux lieux, ausquelz la doctrine de Luther n'apportoit que tenebres. Maintennāt en celle contrée le Caluinisme regne, & n'y a crucifix qu'on n'abbate, à fin que la memoire d'un si grād benefice de nostre Dieu soit arrachée de l'esprit des rudes & ignorans. Et si le Pape de Rome faisoit cela, il seroit appellé à pleine gorge Antechrist: ores que Caluin le commande, c'est l'Euāgile de Christ. Comme ainsi soit que l'Antechrist se parforcera d'oster de tous lieux la memoire de Iesus-Christ nostre Dieu: & maintenāt les sectateurs de la doctrine Caluinienne le deliurēt d'une partie de son labeur, tant de peine & plaisir ilz y treuvent. Toutesfois vne chose nous doit seruir de grande consolation: c'est que beaucoup plus d'images sont erigées ce-pendant, aux terres trouuées de cestuy nostre siecle, qu'il n'en a esté abbatu & demoly en Alemaigne, & en tous lieux frappez de mesme peste d'heresie.

*Discours
du colloq
de Ratis-
bone, entre
les Catholi-
ques &
Protestans.*

CE fut au mois de Ianuier en l'an present, que fut cōmen-
cé le colloque de Ratisbone, auquel on attendit longuement Melancthon: mais luy ne venant point, fut enuoyé en sa place George Maior. Le 27. iour du mois, la Messe du S. Esprit fut premierement chātée, & ce faict, on commença à poursuivre la matiere, au palais de Ratisbone. Le vous ay déia aduertiy cy-

dessus, que les Estatz Catholiques ne trouuoient pas bon ce Colloque, veu que le Concile de Trente estoit ia commencé: mais l'Empereur qui ne souhaittoit rien plus que practiquer vn bon accord, & voyoit bien toutesfois, que les Protestâs ne vouloient point s'arrester au Concile de Trente, permit que ce Colloque fust fait, non pas au preiudice du Saint Cōcile, (auquel il sçauoit bien que tous affaires concernantes la religion doyuent estre r'apportées) mais bien pour par ce moyen induyre les hommes à tranquillité publique. Les Presidens du colloque furent, Maurice Euesque d'Eystel, & Frideric Conte de Furstemberg. Il y auoit huit Catholiques collocuteurs & auditeurs, & autant des Protestans. Les Catholiques vindrent les premiers. Il y eut grand debat & altercas au cōmencement de ceste actiō, sur la maniere de laquelle on procederoit en ce colloque. Car les Protestans collocuteurs vouloient, que tous propos dictz d'un & d'autre costé fussent couchez par escript: ce qu'estant moleste autant qu'il est possible, & d'autre part moins conuenable à ce qu'on proiettoit de faire en celle assemblée, toutesfois les Catholiques furent contrainctz de condescēdre au vouloir des autres, & ce-pendāt perdre beaucoup de temps, de peur qu'ils ne donnassent occasion d'estre calomniez, cōme n'ayans leur cause bonne. Car tel bruiet firent-ils courir des Catholiques, iagoit que chascun puisse ay-sément cognoistre, qu'eux-mesmes cherchoient des eschappatoires, & d'employer le temps sans rien auancer l'affaire des-seigné. Finalement le 5. iour de Feurier fut commencé le colloque par Maluenda Theologien Catholique, lequel tāt pour luy que pour ses adioinctz, protesta, s'ilz disoient par cas fortuit durant le colloque, chose contreuenante aux escritures saintes, aux traditiōs Apostoliques, ou aux decretz de l'Eglise Catholique, qu'ilz vouloient que cela fust reputé pour nul: & puis, que ce qui pourroit estre arresté entrē les parties, n'auroit plus d'autorité, que vn deuis familier, & ne seroit tenu pour definition, ordonnance, ou determination. Ce que les Catholiques faisoient fort prudemment, à fin qu'ilz ne fussent veuz preiudicier au concile de Trente. Ce fait, Maluenda ex-

*Les collo-
cuteurs.*

*On com-
mence à
entrer en
matiere.*

hibe la Confession d'Ausbourg présentée à l'Empereur l'an 1530. & l'Apologie d'icelle, choses sorties de dessus l'enclume de ce grand forger de Melancthon: & va demander aux Protestans, filz ne vouloient pas acquiescer à icelles, & reietter tous autres escriptz contraires à celle doctrine, quand bien ce

*Bucer ap-
prouue la
confession
d'Aus-
bourg, con-
tre soy-
mesme.*

seroient les leurs mesmes. Bucer, qui tenoit le premier ranc entre les Protestans, fut assez estonné de cela, mais en fin il respondit, qu'il condamnoit les escriptz cōtraires: par cela coupant la gorge & à foy & à tous ses confreres, de son cousteau propre, attendu que ilz ont quitté ceste Confession en tant de poinctz, que encores à present les disciples de Luther ne cessent de s'entre-batre à bon escient, pour ceste occasion seule.

Or n'auroy-je iamais fait, si ie vous vouloy reciter tous les actes de ce colloque ou Conference. Tant y a que Bucer & ses compaignons monstroient aysement vne aigreur & amertume d'esprit, laquelle de foy à autre ilz exprimoiēt assez par parolles & par leurs deportemens, comme ainsi soit que les Catholiques se monstroient tousiours doux & paisibles, & concedoient presque plus qu'il n'appartenoit, à ces opiniaftres, pour venir à quelque bonne raison. Car à la verité Bucer & les siens ne rechignoiet à autre auoyne, que à trouuer occasion de rompre le colloque, moyennant que la faute de ce

*Celuy qui
est en pe-
ché mortel
perd toute
la foy, selon
Bucer.*

peust estre iettée sur les Catholiques. Aduint que le vingt & vniesme iour de Feurier, Maluenda disputant tout sur le champ, feit venir Bucer à telles extremitez, q̄ en vn colloque de tant de doctes hommes il ne se hontoia point d'affirmer, que celuy qui est en peché mortel, perd entierement la foy Catholique, ne croit point que Dieu soit vn & triple, que Iesus-Christ soit filz de Dieu, redempteur du genre humain, né, crucifié, resuscité. Brief, que tous pechez procedent d'incrudulité, & pas vn d'imbecillité ou ignorance, ains que tous sont commis par malice & contre la conscience. Car l'orgueil & superbé grande, qui remplist le cerueau de ces galans, les reduict à telz termes, qu'ilz ayment mieus soustenir opiniaftrement les plus absurdes opinions du monde, que confesser qu'ilz sont vaincuz. Et ce-pendant le bruiet estoit par tout

semé, que les Catholiques auoient esté vaincuz des Protestans, (& ce contre le serment du secret) & que Bucer auoit mis Maluenda à quia. Que feriez-vous à telle sorte d'hommes? Attendez-vous le soing de reformer l'Eglise, & de procurer le salut public, de ceux qui n'ont vergongne qui soit, de tant de mensonges & calomnies?

LE vingtcinquesme iour de Feurier vindrēt les lettres de l'Empereur, par lesquelles il declaroit l'ordre qu'on deuoit tenir à la poursuyte de ce colloque, à cause que les Presidens vouloient estre deuement aduertys sur cela par sa Maiesté. Bucer ne trouua pas bonne ceste forme: &, pour dire ce qui en est en vn mot, tous leurs subterfuges ne tendoient à autres fins, sinon que volontiers ilz obeïroient à sa sacrée maiesté, pourueu qu'il ordonnast du colloque tout ce qu'ilz demandoient, & moyennant qu'ilz feissent la loy à l'Empereur & à tous les Catholiques. Car on ne sceut iamais les induyre, à ce qu'ilz feissent le vouloir de l'Empereur, quand à receuoir la forme de laquelle il estoit question, comme nous auons dict: tellement que peu de iours apres ilz se retirerent tout coyement, & se ietterent presque hors la ville, de maniere qu'on eust plustost dict qu'ilz gaignoient au pied, que qu'ilz se retirassent en assurance. Ce qui despleut fort aux Presidens, ausquelz auoit esté déia adioint Iules Pflug, Euesque de Numbourg: lesquelz estans indignez de ce fait, tascherent de retenir les collocuteurs, mais en vain. Au moyen dequoy les Presidens meirent en lumiere certain escrit, par lequel ilz declaroient, qu'il n'auoit pas tenu à eux, que l'attente de l'Empereur & de tous les Estatx de l'Empire ne fust effectuée, attendu que par le consentement & aduis des Protestans mesmes, ilz auoient escrit à l'Empereur, la responce duquel ilz attendoient de iour à autre. Et par-ainsi encore à ceste fois il fut par trop auéré, q le vray moyen & chemin pour nous remettre en vne bonne & ferme concorde, ne gist pas en telles manieres de Conference, considéré mesmement que l'affaire de la religion merite bien d'estre traitée plus exactement, & ne doit pas dependre du cerueau de bien peu d'hommes, quoy

*Le colloq
rompu.*

*Les collo-
ques de
nul effect.*

L'AN M.D.XLVI. HISTOIRE DE TOUTES CHOSES

que doctes soient-ils: & aussi que l'opiniastreté de noz sectaires est en tel degré, que bien aisément on les peut vaincre, mais ils ne cederont iamais, & ne voudront oncques estre estimés vaincus.

Le concile se tient. SUR ces entre-faictes les Peres continuoient le Concile à Trente, où le Pape auoit enuoyé pour ses Legatz Iehan Marià de Monté, Marcel Ceruin, & Regnauld Polus, tous Cardinaux: mais pour-ce qu'il n'y venoit gueres d'hommes, on demeura quelque temps sans constituer grand cas.

La mort de Luther OR reçurent Messieurs les Protestans vne fort piteuse nouuelle sur la fin du Colloque de Ratisbone, à sçauoir la mort de leur saint Pere Luther. Iceluy ayant esté euoqué par les Comtes de Mansfeld à Illebe, pour illec pacifier quelque different, vint celle part en grand pompe, accompagné de ses trois enfans, qu'il auoit engendrez de sa belle nonnain. Au deuant de luy furent enuoyez cent treize hommes de cheual, pour luy faire honneur. Aduint que le dixseptiesme iour de Feurier ayant bien souppé & beu d'autant, ayant aussi gazouillé à son plaisir, comme estoit sa coustume, la mesme nuyct il passa de ce siecle en l'autre. En ce temps-là les Catholiques & noz Euangeliques ne recitoient pas la mort de Luther en mesme sorte. Ionas le Coc, qui se faiçt appeller iuste Ionas, fut present quand il mourut: mais il descript celle mort si à point, que ceux qui ont le cerueau bon, trouuent qu'elle est plustost faicte à son deshonneur, que à sa louange. Entre autres choses *La ridicule priere de Luther.* il escriit, que Luther dict à Ionas, Coelius, & autres assistans: „ priez pour nostre Dieu & son Euangile, à fin qu'il luy succede bien, pourautant que le Concile de Trente, & l'abominable Pape s'y opposent bien fort. Voyla la belle penitence qu'il feit ayant la mort entre les dentz. Mais ie m'estonne, comment il auoit si grand peur de son Euangile, veu que de luy-mesme il a faict ceste prophetie,

Ta peste, quand viuois, ô Pape, i'ay esté:

Ton regne par ma mort sera du tout osté.

Epitaphe de Luther QUE pourra dire la posterité, quand elle viédra à lire cecy? N'est-ce pas soy preparer dignement, pour comparoistre de-

uant le throsne du grand iuge? Le Pape n'est pas mort, cōbien
que Luther l'ait prophetisé. Les mesmes recitent sa derniere
oraison, de ceste sorte: Mon Pere celeste, Dieu & Pere de no-
stre Seigneur Iesus-Christ, & Dieu de toute consolation, ie te
rends graces, dequoy tu m'as reuelé ton bien-aimé fils, auquel
ie croy, lequel i'ay annoncé, confessé, aimé & loué, & lequel
est vituperé, poursuiuy & blasphemé, par le Pape abominable,
& tous les meschans. Voyla la plus horrible mort qu'il est pos-
sible d'excogiter: rendre l'ame, tenant en son cuer vne si ob-
stinée hayne à l'encontre du Pape & de tous Catholiques,
& en cest estat aller deuant le tref-iuste iuge. Mais quelle ca-
lomie est celle-là, quand il afferme, que le Pape, (lequel il ap-
pelle abominable) & tous les meschans (entendant les Catho-
liques) vituperent, persecutent & blasphement Iesus-Christ?
Bon Dieu, sil se fust recogneu alors, certes incontinent & pu-
bliquement il eust confessé, que plus que nul autre il auoit se-
lonnément vituperé, persecuté & blasphemé nostre Seigneur:
du troupeau duquel, luy seul par sa peruerse doctrine a des-
robbé tant d'ames, que sans douleur & horreur on ne le sçau-
roit exprimer. Et toutesfois il proteste, qu'il a aimé & loué
Dieu. C'estoit veritablement se glorifier en sa propre malice.
Si fut son corps enclos en vn cercueil de plomb, & puis fut
conduict en grand' pompe, & aux larmes de plusieurs, iusqu'à
Vvitemberg, accompagné de plusieurs hommes tāt de pied
que de cheual. Voyla donc comme il mourut: mais apres sa
mort, il laissa és plus belles & grandes prouinces de l'Europe,
vne desolation tref-grande, la religion estant miserablement
confuse & troublée, plusieurs Eglises destruites, les monaste-
res abbatus, les ceremonies de la sainte Eglise abolies, les sa-
cremens horriblement reiettez: de maniere que peu s'en faut,
qu'il ne nous ait laissé vn Mahometisme. Et à la verité en plu-
sieurs lieux où son Euangile regne, les hommes tombent or-
dinairement en athéisme & paganisme. Et tels sont les fruits
procedez de ceste plante, la plus dommageable qui fut onc-
ques, laquelle à la mienne volonté que iamais elle n'eust esté,
ou qu'elle fust perie toute seule. Or ne feit-il iamais miracle,

combien que sans flatter le dé, il n'y scauroit auoir plus grand miracle, que qu'un moyne renié, marié avec vne nonnain, instaurateur de maintes heresies condamnées plus de mille ans au parauant, confit en vices, audacieux, effronté, mesdisant, qui detraçoit de tout le monde, bref qui taschoit de mettre tout sans dessus dessous, ait peu acquerir tel bruit & los entre les hommes, qu'il fust réputé comme un vray Apostre & un troisieme Elie. Quelquesfois il fait tout son pouuoir pour chasser un esprit maling, mais ce fut en vain: ce que ie mettray icy pour gratifier au lecteur. L'an 1545 on amena de Misne à Vvittemberg certaine fille possédée du diable, à Luther, comme à un troisieme Elie, en esperance que Luther chasseroit le diable. Lequel, comme homme bourrelé en sa propre conscience, se monstra fort difficile au commencement: neantmoins il commanda à la par-fin que la fille luy fust amenée derriere le grand autel de l'Eglise parrochiale. Où estant il fait force charmes ou exorcismes à sa poste contre le diable, mais le diable ne s'en fait que mocquer. Dequoy estant Luther tout effrayé, mouroit de peur, si qu'il tascha de fuir de ce lieu-là. Mais le diable luy ferma si bien l'huy, qu'on ne pouuoit l'ouurer ny par dedas ny par dehors. Ce qui le meit encor' en plus belles affres, de maniere qu'il s'aduisa de se sauuer par la fenestre: mais il trouua qu'il y auoit des treillis de fer. Au moyen dequoy il fallut luy ietter vne grosse coignée par les treillis, à tout laquelle Luther romperoit l'huy pour sortir. Voila ce qui en aduint. Plaise donc à Dieu de conuertir tous ceux, lesquels ont esté deçeus par un tel homme, qui n'auoit ny integrité de vie, ny miracle qui soit, pour sceller aucunement sa doctrine.

*Des miracles
des saints
aux images
des saints.* IL n'y a celuy qui ne sçache assez, combien ce miserable a combattu les peregrinations qu'on entreprend de faire pour quelque deuotion, & mesme l'inuocation des Saints: de sorte qu'il a osé dire, que la sacrée Vierge ne pouuoit pas plus faire pour luy, par ses intercessions, que feroit quelque sien voisin. Toutesfois ceux qui amenerent la fille sus-dicte à Luther, se fussent mieux trouuez, filz eussent imploré l'ayde de la bien-

bien-heureuse Vierge, pour elle, veu les benefices, que ceux qui mesmes de ce temps l'ont inuoquée en bonne deuotion, en ont receuz. Pour doncques confirmer la pieté, & confondre l'impieté, ie veux icy conioindre ce qu'à escrit autresfois ce grand Thomas Morus, Chancelier d'Angleterre, homme d'un esprit diuin, de profonde doctrine, & qui a finé ses iours par martyre. Et par-ce qu'il a escrit en son Anglois, ie le vous diray en François. * Il afferme, qu'il pourroit reciter plusieurs miracles faictz de son temps, aux images que les hommes deuotieux vont visiter en pelerinage: miracles si certains, & si bien appuyez sur le tesmoignage de plusieurs, que qui en vou droit douter, deuroit estre reputé pour fol. Entre autres il en recite vn bien beau, faict diuinemēt sur quelques enfans d'un gentil-homme nommé Rogier d'Vventunorth, & principalement sur vne sienne fille de l'aage de douze ans, laquelle estoit possedée du diable, & tormentée grandement. La pauvrete estoit déia hors de son sens, & comme elle resuoit, elle tomboit maintesfois à parler de Dieu, & auoit en execration toutes choses sacrées: & est digne d'admiration, qu'elle les connoissoit fort bien entre les choses non sacrées, sans que personne luy en dist mot: chose certainement, que faisoit celuy qui la possedoit. Ce-pendant tant par sa volonté que par vne admonition diuine, elle fut esmeuē d'aller à Sainte Marie d'Ippisuuich, qui est vne ville en Angleterre. Aduint que sur le chemin elle vous eust dict ce qu'on disoit ou faisoit ailleurs, sans mentir en rien, & comme elle estoit rauie en ecstase, elle expliquoit maintes choses admirables & sublimes, quoy que la pauvre fille n'y entendist rien, de façon que les plus doctes hommes s'esmerueilloient comment elle pouuoit ce dire. Au lieu où ilz arriuerent, estoit l'image de la Vierge Marie, deuant laquelle la fille fut cōstituée, estās presens plusieurs Seigneurs & gentils-hommes. Lors le maling esprit la tourmenta merueilleusement, ses yeux & tout le visage vindrent les plus horribles du monde, sa bouche estoit torte & aggrandie, les yeux luy sembloient sortir hors de la teste, brief personne ne la pouoit regarder sans frayeur grande. Il y auoit là d'autres person-

Vuu.j.

* Au premier liure des dialogues c. 16.

Miracle aduenū en Angleterre.

Vne fille possedée du diable est guerrie, ayant esté en pelerinage.

nes, lesquelles estoient tormentées du diable par la permission de Dieu. Mais aduint que & icelles, & la fille dont est question, recouvrerent santé & guérison. A ce spectacle furent présents les parens de la fille, hommes de grand estat, comme estans Cheualiers, & avec ce fort riches: sans plusieurs autres assistés de grande dignité, prudence, & experience. Or n'y auoit-il moyen ny soupçon de feintise en cecy, tant par ce que la fille estoit encore ieune, que à cause que l'horreur & cruauté y exercée, surpassé toute dissimulation. Aussi voyant la fille qu'elle auoit esté deliurée, quitta tout soudain le monde, quoy que son pere n'y voulust pas consentir, & se faisant religieuse en vn honneste & bien reiglé Couuent, elle vescu sainctement toute sa vie. Voyla ce qu'a dict Morus, personnage si entier, que celui qui doute qu'il ne soit veritable en recitant ce fait, sans point de faute il est meschant. Je sçay bien que Luther & son troupeau voudroit bien dire que telle chose est controuuée, comme Brence n'a point eu honte d'escrire, que quand Iulian l'apostat, ayant ia abandonné la religion Chrestienne, & craignant d'estre desmembre par les diables, feit le signe de la croix, par lequel il les chassa: cela ne fut point fait par le signe de la croix, mais bien par la dissimulation de Satan, pour confirmer d'auantage la superstition & magie: disant d'abondant, qu'il ne profite non plus à faire le signe de la croix, que de faire vne figure ronde en l'air, parolles certes bien seantes à homme tel, qu'estoit Brence, asçauoir meschant heretique. Mais nous ne deuons point estre esmeuz par les parolles de relz galans, veu mesmement les spectateurs de ceste chose, & les tesmoins ausquelz il est impossible de contredire en sorte que ce soit. Au demeurant, j'ay bien voulu inserer ce miracle en cest endroit, à fin que le lecteur Catholique cognoisse, que de nostre temps mesme se font des miracles fort signalez en l'Eglise Catholique: & qu'à bon droit on peut dire, que les heretiques noz aduersaires ne sçauoient guerir vn chat de la toux. Et à fin que les hommes peussent aysément cognoistre, quel monstre ilz suyuoient en embrassant l'heresie de Luther, le Dieu eternal l'a voulu monstre par vn monstre fort admi-

*Impieté de
Brence cō
tre Pierre
Soto.*

*Faire le
signe de la
croix.*

table. Car deux ans apres l'Edict publié à Vvormes contre Luther, par l'Empereur Charles cinquesme & les Estatz de l'Empire, vne vache accoucha aux marches d'Vvittemberg, d'un veau qui auoit la teste chauue, & faicte comme le froc d'un moynes: monstre à la verité fort admirable, mais bien séant au temps qui couroit. On dict aussi que Luther voulut quelquefois, par ie ne sçay quelz enchantez motz, resusciter vn mort, sçauoir est Guillaume Nefene, noyé dans la riuere d'Alby: mais il luy aduint ce que dict le poëte, les montaignes doyuent enfanter, & lors sort vne souris.

CESTE année l'Empereur feit vne assemblée des Cheualiers de la toyson d'or, en la ville du Treict, auquel lieu il feit plusieurs Seigneurs Italiens, Espagnolz, Alemans & Flamans, Cheualiers dudit ordre. De là partant pour se trouuer à la iournée de Ratisbone, comme il passoit par Mastrich, les deputez de plusieurs Potentatz & citez d'Alemaigne luy vindrent au deuant, à fin d'entendre certaines nouuelles du bruiet qui couroit, que l'Empereur leuoit les armes. Aussi en mesme temps le bruiet estoit, que les Protestans ourdissoient quelque chose à l'encontre de l'Empereur, qu'ilz auoyent leurs conuenticules souuent, & autres choses suffisantes, pour semondre l'Empereur à faire leuée de gens d'armes. Mais voyans lesdictz deputez, que l'Empereur n'auoit rien en sa troupe que sa garde ordinaire, ilz changerent d'opinion, & s'en allerent de ce pas. L'Empereur auoit accoustumé de mener pour sa garde cinq cens hommes à cheual. Venu qu'il fut à Spire, le Comte Palatin, l'alla veoir avec sa femme, niepce de l'Empereur, & le semblable feit le Lantgraue de Hesse: mais l'un & l'autre n'y seiournerent gueres, à cause que l'Empereur ne leur sembloit pas estre de la façon qu'ilz demandoient.

TANDIS que la iournée de Ratisbone se tenoit, où l'Empereur estoit déia arriué, le Roy Ferdinand maria ses deux filles, Anne, avec le Prince de Bauiere, & Marie, avec Guillaume Prince de Cleues. Ce pendant aussi l'Empereur manda venir par deuers luy quelques Capitaines, mais souz main:

Vuu.ij.

*Monstre
d'un veau
qui auoit
le froc, si-
gnifiant
Luther.*

*Bruict de
guerre en
Alemaigne.*

*L'Empe-
reur fait
venir ses
Capitai-
nes.*

L'Empe-
reur fait
venir ses
Capitai-
nes.

chose neantmoins que les Protestans descourirent bien, comme ceux qui auoient tousiours l'œil au boys. Au moyen dequoy ilz vont parler à l'Empereur, desireux de sçauoir, à qui il vouloit faire guerre, que quand à eux ilz estoient prestz de luy obeïr. Ausquelz l'Empereur respondit, que veritablement il amassoit des gens contre les refractaires & rebelles, lesquelz il auoit bonne intention de dompter : mais qu'il seroit doux & clement à ceux qui le voudroient secourir, & qu'il reputeroit les autres pour ses vrayz ennemys. Ce qu'ayans ouy les Ambassadeurs, s'en retournerent. Et voyla vn des commencemens de la guerre d'Alemaigne : Car l'Empereur auoit longuement dissimulé, mais considerât qu'il auoit faict treues avec le Turc, qu'il auoit quant & quant paix avec le François & Angloys, estima qu'il n'estoit plus besoing de dissimuler, veu mesmement qu'il n'est pas vray-semblable, qu'il ne fust bien assçauanté de ce que quelques vns machinoient. Or en ce temps les forces des Lutheriens ou Protestans estoient grandes : & celles de l'Empereur bien petites, & d'auantage il y auoit grand empeschement & difficulté de faire ceste guerre au commencement, à cause que tous les des-

Commen-
cement de
la guerre
des Prote-
stans.
Les forces
de l'Empe-
reur.

seings de l'Empereur estoient rapportez aux Protestans. Ceux d'Ausbourg leuerent les armes tous les premiers, en telle moderation toutesfois, qu'ilz laissoient entrer les Imperialistes dans leur ville, & y acheter ce qui estoit besoing pour aller à la guerre. Si vindrent à l'Empereur cinquante enseignes de pietons Alemans, & attendoit-on enuiron trois mille Espagnolz de Hongrie, & de la Lombardie autât. Il feit enroller iusqu'à neuf mille hommes de cheual, mais en fort diuers lieux, choses fort preiudiciable à l'intention de l'Empereur. Ce-pendant les Protestans d'alentour d'Ausbourg, d'Vlme, & de la contrée de Vvittemberg, tirent droict vers Cluse, pour clorre le passage aux Italiens que le Pape enuoyoit. Le chef & conducteur des Protestans estoit Sebastien Schertelim, homme bien experimenté en guerre. Parquoy la ville de Cluse se rendit aux Protestans, & les autres disent que ce fut par trahyson. Apres ilz marchent vers Enipont, mais

Cluse prise
par les Pro-
testans.

ilz n'y peurent rien faire. Tellement qu'ilz s'en allerent, ayans mis bonne garnison à Cluse & à Fieffene, qui sont les deux chemins par lesquelz secours peut venir d'Italie en Alemaigne. Si Schertelim fust venu avec toutes ses bendes à Ratibone, où estoit l'Empereur desnüé de toutes forces, il eust mi-^{La première faute des Protestans.} eux fait pour ses compaignons. Mais Dieu le priua de ce conseil: & fut ceste la premiere faute qu'ilz feirent.

SUR ces entre-faittes le Duc de Saxe & le Lantgraue escriuent lettres à l'Empereur, par lesquelles ilz asseuroient qu'ilz vouloient faire bien leur deuoir, & reparer toutes iniures qu'ilz pourroient auoir faictes, moyennant qu'on y voulust proceder par iustice. L'Empereur ne leur feit responce qui soit, sçachant bien que toutes leurs forces s'assembloient en vn lieu. Aussi peu apres elles arriuerent toutes à Tona-^{Grandes forces des Protestans.} uert, avec le Saxon & le Lantgraue, & estoient de quatre vingt mille hommes de pied, & dix mille de cheual, & si y auoit cent trente pieces d'artillerie. L'Empereur n'auoit encore alors nulles forces. Tellement que ceste-cy est la seconde faute des Protestans, qui laisserent eschapper vne bonne oc-^{Secōde faute des Protestans.} casion & moyen qu'ilz auoient de chasser l'Empereur de toute l'Alemaigne, filz eussent marché droit à Ratisbone avec toutes les forces qu'ilz auoient. De maniere que par la on voit à l'œil, que nostre Dieu estoit du costé de l'Empereur.

Cependant le Roy Ferdinand vint à Prague, pour communiquer avec Maurice de Saxe, de la guerre qu'il falloit faire contre l'Electeur de Saxe. Maurice & l'Electeur susnommez s'estoient tousiours voulu mal, mais n'agueres leurs querelles auoient esté assoupies. Aduint toutesfois, que l'Empereur ayant prosript l'Electeur de Saxe & le Lantgraue, Maurice renouuella la querelle, & delibera se ioindre à Ferdinand, pour courir les terres du Saxon. Le Saxon doncques & le Lantgraue enuoient vn enfant avec vn trompetteur^{Guerre denoncée.} à l'Empereur, lesquelz luy porterent vne lettre attachée à la courroye qu'on met au milieu d'un dard, maniere des anciens Germains pour denoncer la guerre. Ilz sembloient meri-

L'AN M.D.XLVI. HISTOIRE DE TOUTES CHOSES

ter d'estre bien punis, mais ilz furent r'enuoyez avec des lettres de proscription, sans aucunes autres: & quant à l'Empereur, il ne voulut pas lire leurs lettres.

*Secours en-
uoyé à
l'Empe-
reur.*

ENVIRON le mesme temps le Pape enuoya à l'Empereur environ dix mille piétons, & quelques sept cens chevaux legerement armez. Ausquelz estoient conioinctz deux cens autres, que Cosme de Medicis, Duc de Florence, enuoyoit, & cent, que le Duc de Ferrare donnoit pour ayde.

*Armée
de l'Empe-
reur.*

Aussi vindrent quelques Espagnolz, tous braues, & des vieilles bendes. Somme que l'Empereur auoit déia seize mille piétons Alemans, dix mille Italiens, & environ huit mille Espagnolz: de caualerie, il auoit deux mille chevaux bien en conche, & mille autres chevaux legers: sa fanterie estoit toute d'eslite, & toutesfois les gens, que leuoit le Seigneur de Bure au

*Les deux
armées
aux chäps.*

païs bas, n'estoient pas encor' arriuez. Doncques avec cest ost que nous auons dict, & avec trentesix pieces d'artillerie, l'Empereur tira droit où estoit l'ennemy, qui estoit lors pres Ingolstad. Le Saxon & le Lantgraue marcherent lors vers Ratisbone, ce qui estoit bien aduisté, mais c'estoit trop tard. Car l'Empereur y auoit ia enuoyé de la garnison assez. Au moyen dequoy les Protestans rebroussent chemin vers Ingolstad, où l'Empereur s'achemina quant & quant. Si lors les Protestans eussent ioint leurs forces contre l'Empereur, ou qu'ilz luy eussent couppé chemin, quand il tiroit à Ingolstad, certes ilz eussent peu faire quelque beau coup: mais à la verité la victoire vient de la main de Dieu, & non de la force d'une armée. L'Empereur doncques saisit la ville d'Ingolstad, & se cam

*Assiette
du camp de
l'Empe-
reur.*

pa en vn lieu fort commode, l'assiette duquel estoit telle. Au costé gauche y auoit la riuiere & lieux marescageux, sur le derriere n'y auoit point de danger, pource que c'estoit la ville: mais à dextre & tout à la pointe du camp c'estoit vne belle plaine, laquelle neantmoins s'esleuoit quelque peu. Ces deux costez furent par merueilleuse viffesse remparez de bonnes tranchées, que fait faire le Duc d'Albe, lequel l'Empereur declara estre Chef en toute ceste guerre. Quelque peu apres les deux armées approcherent si pres l'une

de l'autre, qu'il n'y auoit que la portée d'un canon entre deux. Adonc l'Empereur cheuauchoit çà & là par-my son camp, en-hortant vn chacun à ne faire conte de la tempeste des canons des ennemis, à auoir bon courage, reduire en sa memoire les heureuses & sanglantes victoires par luy obtenues, & qu'en faisant teste à l'ennemy, homme n'abandonast son rang. Laquelle harangue encouragea bien fort toute l'armée, & fut vn chacun d'icelle fort esiouï. D'autre costé les ennemis ne faisoient que tirer coups de canon, & remplissoient de boulets toutes les trachées & le camp imperial: mais Dieu voulut que cest orage & fouldre de canons ne feist mourir beaucoup de gens. L'armée de l'Empereur se remua fort de place, & voletoiét les harquebouzades si dru autour de l'Empereur mesme, qu'il n'estoit gueres loing du danger. Tellement qu'une-fois il aduint, qu'un boulet, qu'on auoit expressement dressé contre sa personne, vint tomber si pres de ses pieds, que s'il eust fait le moindre fault du mode, à grand' peine en eust-il oncques eschappé: mais Dieu permet que le boulet samortit en mesme lieu. On dit q ceste pluye de boulets, qui dura enuiron huit heures, n'apporta autre dommage au camp de l'Empereur, sinon qu'un de sa garde en mourut, deux cheuaulx pareillemét, & vne enseigne en fut brisée, chose vraiment qu'il faut confesser estre venue de Dieu eternal, qui sauue les siens. Et faut icy admirer le cueur & la constance des imperiaux, dequoy nul d'eux n'abandonna oncques son rang, quoy que en ce iour-là seulement, les ennemis desfarrent sur eux neuf cens coups de Canon. Et l'autre iour ils retournerent encore à plus grande furie de canonnades, que par-deuant. Et lors l'Empereur voltigeoit alaigrement autour des siens, les encourageant à bien faire, & mesprisant luy-mesme le danger où il se mettoit. Brief, si quelcun doute de la furie que les ennemis exercerent à tirer coups de canon, il le pourra croire, par-ce que dans le camp seulemēt furent trouuez plus de mille neuf cens boulets, sans ceux qui ne tomberent pas dedans, ou qu'on ne peut pas trouuer. Mais pour-aunt que l'Empereur approchoit tousiours plus pres ses mu-

*L'Empe-
reur encoura-
ge les siens*

*Horribles
canonnades
ietées dās
le camp de
l'Empe-
reur.*

*Le danger
de sa per-
sonne.*

*Neuf cens
coups de
canon.*

Autre

nitions de leurs tranchées, & qu'ils auoient tousiours nouvelles incommoditez, ils furent contraints d'abandonner la place à leur honte, comme ceux qui auoient menacé de ietter en bref l'Empereur hors de toute l'Alemaigne.

*Forces am-
menées par
le Conte
de Bure à
l'Empe-
reur.*

ENVIRON ce temps le Conte de Bure, qui auoit amassé gens pour l'Empereur és pais bas, passa le Rhin avec ses troupes, par vne industrie grande, & malgré les ennemis. Apres cela, comme il estoit pres de Francfort, il y eut vne escarmouche, en laquelle plusieurs ennemis perdirent la vie, & le reste d'iceux eut telle peur, qu'ils ne laisserent de courir à vau de route, iusqu'à tant qu'ils se furent sauuez en la ville. Or l'Empereur aduertit le Conte, qu'il feist marcher son camp en assurance, pour-autant que les ennemis l'auoient laissé pour l'aller attaquer. Iceux marchans en auant, se camperent à Tonauert, & le Lantgraue allant au fourrage, trouua moyen de s'emparer de la ville de Lauginque en Bauiere, laquelle se rendit à luy, & ce fait, retourne à Tonauert. Aussi le Côte de Bure se porta si dextrement à la cōduite de son armée, qu'en peu de temps il l'amena saine & sauue à l'Empereur: & pour-autant que c'estoient hommes choisis, cela abaissa bien fort l'orgueil & la fierté des Protestans. Deux iours apres l'Empereur tire vers Nubourg, & estant accompagné du Duc d'Albe, il alla recognoistre l'assiette & nature de la ville, chose pleine de peril pour les canonnades & harquebuzades, que ceux de dedans iettoient dru & menu. Ayant ce fait, il retourne à Ingolstad. Le lendemain il fait marcher l'armée auant, & se campe vis à vis de Nubourg. Ce voyans ceux de la ville, despescherent pardeuers luy leurs deputez, & se souzmirēt à sa volonté: & encore feirent le semblable les Chefs & Capitaines de la garnison, qui auoit esté là laissée, ce qui aduint fort commodément à l'Empereur, pour la grande opportunité de ce lieu. Ledit Sieur sauua la vie à tous ceux qui y estoient en garnison, combien qu'il les eust peu faire mourir fort iustement, cōme ceux qui auoient porté les armes contre leur Prince legitime. Durant l'espace de ces trois iours, l'Empereur feit la monstre de son armée, comme l'on a accoustumé: & fut trouué, qu'il y auoit

*Prise de
Nubourg
par l'Em-
pereur.*

auoit enuiron neuf mille cheuaux, & quelques quarante cinq mille hommes de pied.

DE Nubourg, l'Empereur marcha avec son armée vers VVending, & comme il s'approchoit, le Senat luy vint au deuant, pour luy rendre la ville. Sur ces entrefaictes, l'Empereur entend que l'ennemy venoit l'attaquer avec toutes ses forces, & qu'il n'estoit plus gueres loing. Alors doncques il monte à cheual, encore qu'il eust la goutte à vne iambe, & fait en sorte, qu'il reposoit son pied à vn linge attaché à la selle du cheual: & en cest estat il ne cessa d'aller ça & là parmy ses gens toute la iournée, sans faire conte de l'extreme douleur de sa goutte. Mais l'ennemy s'aydant de la comodité que leur donnoit vne espesse bruine, qui estoit ce iour là, print son chemin vers Norling. Le Duc d'Albe vint lors dire à l'Empereur, que l'ennemy sembloit estre prest à combattre: à qui ledict Sieur respondit, qu'il ne tiendrait pas à luy de leur presenter la bataille, à l'ayde de Dieu. Et deslors il prend ses armes, estant à cheual, à cause que sa goutte l'empeschoit de descendre, & commande que l'armée marchast en auant. Mais les ennemis poursuuans tousiours leur chemin vers Norling, frustrerent les imperiaux de l'enuie qu'ilz auoient à s'entre-battre. Au moyen dequoy l'Empereur aduifa d'autres moyens pour ce temps là. Car il enuoya souz main Octaue Farneze avec les bendes d'Italie & celles de Schamburg, pour prendre d'emblée la ville de Tonauert assise sur le Danube. Laquelle entreprise succeda bien à l'Empereur, à cause que les habitans effrayez du soudain assaut des Imperiaux, se rendirēt, chose qui ne reüssit moins au dommage de l'ennemy, qu'au proufit de l'Empereur. Tellement que sa Maiesté fut là le lendemain, sans que ce-pendant les ennemis se remuassent. Et vn autre iour il vint à Diling, ville de l'Euesque d'Ausbourg, mais pour lors tenuë & occupée par les rebelles: lesquelz gaignerent lors au pied, & les citoyens receurent en grande ließe l'Empereur & leur Euesque. Apres cela, la ville de Laugingue se rendit quant & quant, combien qu'au commencement les habitans eussent faict vne responce fort superbe. Autant en fei-

*Nombre
des gens de
l'Empe-
reur.*

*Laueur
extreme de
l'Empe-
reur en ce-
ste guerre.*

*Les Prote-
stants fuys
la bataille*

*Tonauert
& autres
villes pri-
ses par les
imperiaux*

Diling.

rent ceux de Gudeling, si que les affaires de l'Empereur alloient de mieux en mieux, Dieu le conduysant en vn si saint proiect.

*Succes en
Saxe pour
les Catholi-
ques.*

ET sur cela nouuelles luy vindrent, que le Roy Ferdinand & Maurice faisoient bien leurs affaires en Saxe, que les Saxons auoient esté chassés, & que la meilleure part de celle cōtrée estoit reduyte en l'obeissance des Seigneurs sus-dictz. Ce qu'ayant entendu l'Empereur, feit dessarrer son artillerie en signe de ioye, & à fin que les ennemys sceussent, qu'il scauoit déia le faict à la verité. Or l'hyuer commençoit à monstrier ses forces, & ia plusieurs conseilloyent à l'Empereur de faire hyuerner son armée, veu mesmement qu'il estoit campé en vn lieu fort desauantageux. Mais ayant trouué vn lieu fort propre & commode pour y camper son ost, il se renga là, au grand contentement d'vn chacun, si que ce lieu estoit appelé les tranchées de l'Empereur. Estant donc là campé il affligea grandement son ennemy, enuoyant d'vn costé & d'autre des harquebuziers à cheual, & quelques cheuaux legers, qui les empeschoient d'aller au fourrage. Et delà vint qu'ilz furent si fort affamez, que cinq iours durans leurs gens d'armes n'eurent ny pain ny bled.

*Ilz veulent
la paix.*

ESTANS donc là reduictz les Protestans, le Saxon & le Lantgraue ayans trouué quelque commodité, feirent parler de paix à l'Empereur, par Iehan de Brandebourg, frere de l'Electeur de Brandebourg: mais par ce que l'Empereur ne vouloit pas entendre à ce qu'ilz demandoient, on ne peut rien faire. Et certes on doit estre bien marry, dequoy ces Seigneurs ont esté induictz par leurs peruers predicans, à estre si refractaires à l'Empereur, iusqu'à prendre les armes contre sa Maiesté, veu que rarement les choses succedent bien à ceux, qui attentent quelque cas à l'encontre du souverain Magistrat. Et en ceste guerre, combien que les Protestans fussent les plus fortz, si furent-ilz contrainctz par quatre fois d'abandonner le lieu où ilz festoient campez. Or ayant entendu sa Maiesté, que les gens de cheual & vne partie des pietons des ennemys, prenoient le chemin de Franconie, pensa qu'il seroit bõ

de leur couper le chemin, de peur que fourrageans vne si ri-
che prouince, ilz ne r'affermissent leurs forces, lesquelles e-
stoient fort debilitées. Au moyen dequoy, bien que la saison
fust fort difficile, si est-ce qu'il ne cessa iamais, qu'il n'eust gai-
gné la ville Imperiale de Rotemburg: & sur le chemin ceux
de Boffing, Norling, Dinkelspul, se rendirent. Ceux de Ro-
temburg ayans entendu, qu'il approchoit, sortirent le iour de-
uant, & se vindrent rendre entre ses mains: car ilz n'auoient
aucune societé avec les rebelles, ny n'estoient de la ligue. Or
entendu qu'eurent les ennemys, que l'Empereur tenoit Ro-
temburg, furent espouuantez au possible, si que chascun d'eux
s'en retourna à sa maison vn peu apres. Le Lantgraue estant
arriué à Francfort, les escheuins & citoyens luy vindrent de-
mander, qu'est-ce qu'il luy sembloit estre bon de faire: aus-
quelz il respôdit, qu'il n'y auoit rien meilleur, sinon qu'un cha-
cun des regnardz gardast bien sa queuë.

*Pouruy-
ance de
l'Empe-
reur con-
tre son en-
nemy.*

*Succes de
l'Empe-
reur, dont
les Prote-
stans se ré-
tirent.*

*Facetie
du Lant-
graue.*

SEMBLABLEMENT le Duc de Saxe ayant r'allié quel-
ques bendes dispersées ça & là, retourne à sa maison, & par le
chemin contraignit les gens d'Eglise à luy donner de l'argët.
Mais comme l'Empereur vouloit r'enuoyer le Conte de Bure
en Flandres, il l'exhorte à ce que par les chemins il induyse
ceux de Francfort à se rendre, ou qu'il les contraigne par for-
ce à ce faire.

L'EMPEREUR prenant le reste de l'armée, s'achemi-
noit vers les citez occupées par les Protestans, esquelles il sça-
uoit bien que toute la force des ennemys gisoit. Mais il n'en y
auoit pas vne, laquelle n'eust si belle peur, que la plus part se
rendirent à la Maiesté, abandonans le party des rebelles. Party
qu'il fut de Rotemburg, son rendez-vous fut à Hale de Suau-
be, ville que l'Empereur auoit n'agueres reduyte en son o-
beïssance. Auquel lieu comme il seiournoit à cause de sa gout
te, Frideric Conte Palatin le vint saluër, & suppliant avec vne
grand' abondance de larmes sa Maiesté de luy pardonner,
il impetra sa demande, quoy que l'Empereur se monstrest vn
peu difficile au commencement, & non sans cause. Car le Pa-
latin auoit enuoyé pour secours plusieurs gens de cheual aux

*Le Conte
Palatin
demande
pardon, &
ceux d'yl-
me.*

Protestans : Mais cela estoit admirable en l'Empereur, qu'il estoit beaucoup plus recors du bien-faict qu'il auoit receu, que de l'iniure faicte à sa Maiesté. En mesme tēps aussi, & au mesme lieu vindrent ceux d'Vlme, lesquelz estans introduictz en presence du Conte Palatin, qui assistoit à l'Empereur estant malade, se prosternerent aux piedz dudit Sieur en grande humilité, tellement que la clemence de l'Empereur leur pardonna, comme aux autres, & ce souz quelques conditions.

Le Duc de Vvittemberg fait sa paix. A P R E S cela, l'Empereur partant de Hale, enuoya les Espagnolz & quelques autres compagnies en la contrée de Vvittemberg, & incontinent il alla apres avec le reste de l'armée. Ce qu'ayant entendu le Duc de Vvittemberg, & ne pouvant souffrir le ravage de ses terres, voyant aussi quel'Empereur s'emparoit de toutes les villes, bourgades, & edifices, demanda paix à l'Empereur, laquelle il impetra, ne refusant point les conditions proposées par sa Maiesté. Ce-pendant il receut les lettres du Conte de Bure, narratives comment il auoit prins Francfort. Et le lendemain vindrent les deputez de sept villes occupées par les rebelles, pour traicter leur accord. Car ce qui les en-courageoit à bien esperer de l'Empereur, estoit vne douceur admirable, laquelle l'accompagnoit en vn si heureux succes de la guerre. Or estoient déia toutes les villes de Suaube en son obeissance, hors-mis Ausbourg, qui faisoit de l'opiniastre iusqu'au bout. L'Empereur doncques vint à Vlme, où il fut receu tref-honorablement & en lieffe fort grande, à cause q'les Alemans aimoient bien fort l'Empereur, iusqu'à l'appeller leur pere: & mesmes les natiōs estrâgeres, & ses ennemys propres luy portoiēt quelq' bonne affectiō. Car la vertu est de telle efficace, qu'elle inuite les meschâs & malings à l'aimer. Or comme l'ost Imperial s'approchoit d'Ausbourg, les habitans enuoyerent vers la Maiesté leurs Ambassadeurs, lesquelz neantmoins retournerent sans rien exploicter, pourautant qu'ilz propoisoient des conditions mal plaisantes à l'Empereur. Toutesfois delibetée que fut l'affaire, & voyans que Schertelim, vaillant Capitaine, s'estoit retiré de la

Francfort prin.

Amitié qu'on portoit à l'Empereur.

Ausbourg se rend à l'Empereur.

ville sans mot dire, retournent à l'Empereur, & feirent tant, que le bon Seigneur leur pardonna: si que selon la coustume, & qu'il auoit faict aux autres villes, il leur donna la main en signe d'honneur. Finalement ceux de Strasbourg voulurent estre de la partie, & obtindrent pardon de leur temerité. Voyla donc la fin de la premiere guerre d'Allemagne, faicte temerairement contre l'Empereur, & entreprise par les Estatz de l'Empire, à ce instiguez par des boute-feux de predicans, lesquelz apperceuoiēt bien que leurs affaires n'auroient pas leur progres à souhaiēt, tant que l'Empereur vseroit de son autorité. Et par le merueilleux discord qui est en leur religion, on peut voir par trop clerement, qu'ilz ne se soignent rien moins que du salut de la Republique & des Chrestiens, ains seulement de leur proufit particulier, quand bien toutes choses humaines deuroient aller sans dessus dessous. Luther mesme, en vn liure qu'il escriuit au Duc de Saxe & au Lantgraue vn peu deuant sa mort, sonne l'alarme pour enflammer l'Allemagne à ceste guerre, disant: Celuy qui ne leue les armes quand il peut, n'vse pas de ce que Dieu luy a mis entre les mains. Car que veut-il dire par cela, sinon que le subiect ne doibt point craindre à s'esleuer contre son souverain?

Luther a incité les Seigneurs à faire ceste guerre.

CESTE année fut faicte la paix entre les François & Anglois, à telle condition, que l'Anglois toucheroit certaine somme d'argent dans huit ans, laquelle payée, Boloigne seroit rendue au François, & ce-pendant les Anglois la tiendroient. Apres celle paix y eut en France merueilleuse cherté de toutes choses, à cause des guerres passées & autres calamitez.

Paix entre le François & l'Anglois

LE 6. iour d'Aoust aduint vn defastre memorable à Malines en Brabant. La fouldre tomba sur la porte du Sablon, où on gardoit force poudre à canon, laquelle estant enflammée de ce feu tombé du ciel, feit vn si grand bruiēt & tonnerre, que plusieurs estimoient que le dernier iour des hommes fust venu. Aussi à la verité ce fut vn spectacle des plus horribles & espouuentables qu'on scauroit dire. En vn moment de temps

Fouldre tombée à Malines.

L'AN M.D.XLVII. HISTOIRE DE TOUTES CHOSES

*Le dom-
mage qu'il
le fait.* la porte fut brisée, & non seulement la tour, mais encore les fondemens des prochaines murailles furent ostez de leur place, & iettez ça & là, si que les eaux des fosses seichèrent par la grand' ardeur qui estoit. On trouua plusieurs hommes, les vns mortz, les autres dangereusement blevez. Comme quelques vns iouioient aux quarts en vne tauerne, la foudre les accabla tout soudain: mais l'hostesse n'eut point de mal, pour ce que à la bonne heure elle estoit descendue en sa caue, pour apporter de la ceruoyse. Il y en eut vn qui trois iours apres sortit d'un trou, & va demander si le monde estoit encor en estre.

*L'electeur
de Saxe
arrache de
l'argent.*

L'ELECTEUR de Saxe ayant entendu que le Roy Ferdinand & Maurice luy couroient ses terres, & voyant qu'il ne pouuoit pas moyenner telle paix avec l'Empereur qu'il desiroit, ramassa quelques forces esparées par-cy par-là, & sur le chemin (comme nous auons déjà touché) il eut grosse somme d'argent des Ecclesiastiques. Il mit le siege deuant Gemunde en Suebe, & condamna les habitans, qui se rendirent, à luy donner argent: il eut neuf mille escuz de ceux de Francfort, & en demanda à l'Archeuesque de Maience quarante mille, & traita de mesme sorte l'Abbé de Fulden & quelques autres Catholiques, bien qu'il fust proscript & banny par l'Empereur.

*Siege de
Lipsie par
le Saxon.*

L'AN 1547. le 18. iour de Ianuier le Duc de Saxe rascha de forcer Lipsie, ville du Prince Maurice: mais pourautât que la ville fut brauement defendue, il fut contrainct de se retirer du siege, apres que la ville fut fort endommagée & difformée par les canonnades y iettées. Partant delà, il recouura ce qu'il auoit perdu en Thuringe & Misne, & d'auantage print les villes de Maurice, fors Lipsie & Dresde, & plusieurs autres places saisit-il, mais il ne les tint gueres.

*Herman
priué de son
Euesché,
et un an-
tre y mis.*

ENVIRON ce temps, pourautant que l'Archeuesque de Cologne ne pouuoit estre persuadé, de n'introduire point le Lutherisme dans son diocèse, par le commandement du Pape & de l'Empereur fut priué de son Euesché, & fut en iceluy installé Adolphe, de l'illustre & antique maison de Scauemburg.

Iceluy auoit esté quelques années coadiuteur de Herman, orné de plusieurs perfections, & grand zelateur de la religion Catholique. Estably qu'il fut en celle dignité, il restitua incōtinent l'ancienne religion par tout son diocèse, abolissant les refueries de Bucer, & se declarant estre vray pasteur. Chose certainemēt qui suruint à la bonne heure à ce diocèse, lequel estoit déia si auancé au chemin de l'heresie, que si Dieu n'y eust mis sa main, à peine s'en fust-il oncques retiré. Or fut le frere de Herman, nommé Frideric, despouillé de la Preuosté de Bonne, & en fut inuesty le bon Iehan Gropper, sans qu'il sy attendist aucunement. Lequel a tant trauaillé pour le soutien de la religion Catholique, non à Coloigne seulement, mais par tout le diocèse, que, ce veu & considéré, le Pape Paul 4. l'a voulu honorer d'un chapeau de Cardinal. Son eloquēce estoit admirable, sa doctrine rare, son courage inuaincu, veillant iour & nuict à la leçon des escritures saintes & des anciens Peres: & d'auātage, il auoit le concubinage (vice qui denigre aujourd'huy les gens d'Eglise bien fort) en si grād' horreur, que retournant certain iour à sa maison, & trouuāt qu'une chambriere faisoit son liēt, fut si esmeu, que tout soudain il fait vuyder la chambre à la seruante, & ietta le liēt par la fenestre de la chambre: declarant par ce fait, le soing & l'amour qu'il portoit à vne honneste cōtinance. Ce que j'ay bien voulu reciter, à fin que les Ecclesiastiques prennent exemple à vn si grand personnage, & qu'ils domptēt les sensualitez de leur chair en viuant sobrement, en estudiant & priant Dieu sans cesse, en veillant moderément, en euitant la compagnie des femmes, & en faisant semblables exercices de pieté, par lesquels ils addouciron t l'ire de Dieu eternal, & ne presteront plus occasion aux mesdisans heretiques, de calomnier l'ancienne & Catholique religion.

S v r la fin du mois de Ianuier, le Roy Henry d'Angle-^{Trespas du} terre trespasā en l'an 38. de son regne. Cestuy ne voulut pas ^{Roy d'Angleterre.} souffrir la puissance du Pape, à cause qu'il n'auoit pas voulu approuuer le diuorce fait avec Anne de Boulen: mais nonobstant il reteint l'anciēne religion en plusieurs choses. Edouard

*De Iehan
Gropper,
& de sa cō
tinance.*

L'AN M.D.XLVII. HISTOIRE DE TOUTES CHOSES

*Le Roy
Edouard.* son fils, aagé seulement de neuf ans, succeda au Royaume, qui fut cause que le Zuinglianisme fut par-apres semé en ceste contrée. Les Protestans auoyent enuoyé Ambassadeurs par-deuers le susdict Henry, pour luy demander secours contre l'Empereur: mais ils n'y gaignerent rien.

*La mort
du Roy
François,
grand ama-
teur des
lettres.* Vn peu apres, sçauoir est le dernier iour de Mars, le grand Roy François alla de vie à trespas à Rambouillet, en l'an 54. de son aage. Ce fut vn Roy entieremēt Catholique, & le vray fleau de noz nouueaux heretiques, comme aussi il fut le protecteur des bonnes lettres & des hommes lettrez, estant luy-mesme docte & sçauant: lequel sçauoir il festoit acquis, à cause que durant son repas il parloit fort volontiers des bonnes disciplines, & pour ce faire il auoit autour de soy les plus doctes de son Royaume, lesquels mettoient tousiours quelque matiere en auant, puisée dans les Poëtes, Historiens, Cosmographes & autres bons auteurs. D'auantage il auoit certains hommes en Grece & Italie, qui luy cherchoient les anciens auteurs, tellement qu'il en feit vne Bibliotheque fort belle & renommée, de laquelle quelques auteurs sortirent par-apres en lumiere. Bref, si Dieu n'eust permis à cause de noz crimes horribles, que ce grand Roy & l'Empereur se fussent presque tousiours entre-guerroyez, sans point de faute l'estat de Chrestienté eust esté tres-florissant en nostre siecle. Mais ceste guerre (Dieu le voulant ainsi) a causé l'augmentation de la puissance du Turc, & la diminution de celle des Chrestiens, a esté cause que les heresies ont pris grand accroissement, lesquelles ie ne sçay quels endiablez esprits ont de nostre temps apporté du profond des enfers, pour faire damner le monde, & bouleuerfer toute l'Europe. A ce Roy succeda son fils Henry, aagé lors de vingt-huit ans, lequel reinstalla Messire Anne de Montmorancy en son estat de Cōestable, duquel il auoit esté priué il y auoit déjà presque six ans: mais aussi il desappoīnta quelques autres grands hommes. Les Protestans estoient si forz, qu'ils esperoient que ces deux grands Roys leur donneroient secours contre l'Empereur, mais ils auoient beau attendre.

L'EMPEREUR estant encor' à Vlme, & ayant esté certioré

tioré par les lettres de son frere Ferdinand de tout ce que le Saxon auoit exploicté, & comment ce Prince practiquoit les Boëmiens, allichoit la populace, & auoit debouté le Roy Ferdinand de la vallée de Ioachim, fort abondante en arain, & en mines d'or & d'argent: proietta de s'appliquer totalement à ceste guerre de Saxe, quoy q̃ sa maladie l'en tiraft. Car il scauoit bien qu'il falloit vser de viffesse, deuant que l'ennemy se fust de beaucoup renforcé, & aussi attenté quelque chose de nouveau. Le Duc de Saxe auoit bien quatre mille cheuaux, & dix mille hommes de fanterie, & auoit déia si dextrement practiqué ceux de Boëme, qu'iceux furent osez iusqu'à là, que de tenir les filles de Ferdinād enfermées au chasteau de Prague. Au moyen dequoy l'Empereur, sans nullement respecter ny le labeur, ny le peril, ny sa maladie, outre les compagnies qu'il auoit, feit venir les Alemans & Espaignolz qui hyuernoient, & ayant prins quelques pieces de canon à Vlme, se meit à chemin.

OR le mesme iour que sa Maiefté deuoit partir d'Vlme, arriua là le Duc de Vvitemberg en vne chaire, à cause que sa goutte l'empeschoit de se tenir debout. Et estant introduict deuant l'Empereur, le pria humblement par le Chancelier, de luy pardonner confessant qu'il auoit mespris, & que d'ores en auant il se monstreroit fidelle & obeissant. Ce qui engendra grande frayeur & admiration à ceux d'Vlme, & à ceux qui estoient là venuz, voyans que le plus puissant de leurs voyfins se venoit humilier à l'Empereur. Lequel vsant de sa debonnaireté accoustumée, pardonna audict Prince, souz quelques conditions: & soudain partant d'Vlme, vint le premier iour à Gien, & le second à Norling. Et comme il estoit là, son mal de gouttes s'engregea, si qu'il sembloit que cela le deuoit retarder beaucoup. Mais il fut plustost guery, qu'aucun n'eust estimé. Cependant le Duc de Saxe print le Marquis Albert, que l'Empereur auoit enuoyé deuant, & ce par la trahyson d'une femme, à Rocliffe, & feit mourir quelques treize cens hommes de son camp, prenant presque tout le reste. Ledit Albert fut mené à Gothe, ville bien forte.

L'Empe-
reur con-
clud la
guerre con-
tre le Sa-
xon.

Insolence
des Boe-
miens.

Le Duc
de Vvittē
berg fait
sa paix de-
uant l'Em-
pereur.

Prise du
Marquis
Albert
par le Sa-
xon.

*Stras-
bourg se
rend.*

PENDANT que l'Empereur estoit à Norling, l'Ambassade de ceux de Strasbourg arriua là, lequel demâda pardō à la Maïesté. Et par-ainsi l'Empereur les print en son obeïssance, avec quelques conditions, l'une desquelles estoit, qu'ilz presteroient sermēt à l'Empereur, chose qui oncques n'estoit aduenue à aucun Empereur par-cy deuant. De ce lieu l'Empereur vint à Noremberg, où il fut reçu fort honorablemēt par les bourgeois, & y seiourna cinq iours pour mieux confirmer sa conualescence. Il estoit resolu d'aller à Egre, pour parler avec le Roy Ferdinand & Maurice. Et ce fut lors que les Boëmiens se monstrent ouuertemēt rebelles, lesquelz couperent force arbres pour par ce moyē empeschier, que le Roy Ferdinand ne peust se rendre à l'Empereur, ny Maurice aussi: mais eux prenans vn plus grand tour de chemin, se vindrent rendre au camp à trois lieuës d'Egre. Ilz auoient plus de deux mille cheuaux pesamment armez, & neuf cens cheuaux legers hongres, tous merueilleusement bien en conche. Les festes de Pasques estans passées à Egre, (citē laquelle iusqu' icy a demeuré ferme & constante en la religion Catholique) la Maïesté enuoye le Duc d'Albe au deuant, avec la fanterie & vne partie de la Cauallerie, & le suyuit incontinent, taschant au possible de chocquer contre le Saxō, premier qu'iceluy peust gagner ou Vvittemberg, ou Gotthe, ou quelque autre place bien forte. Le Saxon estoit lors à Misne, ville que n'agueres il auoit prise sur Maurice. Illec donc se transporta l'Empereur, & sur le chemin s'empata de maintes bonnes villes & chasteaux. Mais n'estant plus qu'à trois lieuës de Misne, il entendit que le Duc auoit prins la volte de Vvittemberg. Or estoit entre luy & le Duc la riuere tres-large d'Alby, laquelle il delibera de passer, de peur qu'iceluy Duc ne trouuast moyen d'eschapper en quelque lieu. L'affaire estoit fort difficile & perilleuse, à cause que le Duc estoit à l'autre costé du fleuue avec tous ses gens. Mais sur cela on aduertit l'Empereur, que la riuere estoit guéable, à l'endroiēt que les ennemys estoient, & où le fleuue estoit large de trois cens pas, si que à voir seulement les flots escumeux dudit fleuue, il y en auoit assez

*Le Roy
Ferdinand
se joind
ues l'Em-
pereur.*

*L'Empe-
reur suyt
le Duc de
Saxe.*

pour en desgouter chascun. Or estoient déia les ennemys descenduz en quelques batteaux sur la riuiere, mais ce voyans les imperiaux, se ietterent d'un courage merueilleux dans le fleuve, & bien qu'ilz n'eussent que les bras au dessus de l'eau, si ietterent ilz neantmoins force canonnades contre les ennemys, de sorte qu'iceux furent forcez de se mettre à bord, & de gagner au pied. Et à fin que plus commodément les gens de pied & le bagage peust passer, l'Empereur voulut faire vn pont de batteaux sur le fleuve. Mais ce qu'il auoit de batteaux & nacelles ne suffisoit pas pour faire vn pont sur ceste riuiere, dont il en-horta les soldatz à prendre le reste du pont des ennemys, qui s'en alloit à val l'eau. Lors dix soldatz Espaignolz laissent soudain leurs vestemens, & tenans leurs espées à bel-les dentz, nagerent à l'autre bord, & bien que les ennemys ne cessassent de tirer sur eux, si prindrent-ilz quelques nacelles sur eux, voire en feirent mourir quelques vns, & amenerent les batteaux deça le fleuve. Pendant que cela se faisoit, le Duc oyoit le presche: mais entendant que l'Empereur estoit là, le presche cessa, l'alarme fut sonnée, & fut commandé que le soldat allast au bord pour le defendre contre l'Empereur. Mais iceluy, par viffesse fort grande, feit voir où estoit le gué du fleuve, aux gens de cheual, & commande qu'on paracheuaist le pont de batteaux. Là se trouua vn ieune garson paisan, auquel les ennemys auoient osté ses cheuaux de charruë le iour deuant, & ce fut celuy qui monstra le gué à l'Empereur. Les cheuaux Hongres passerent les premiers, qui n'auoient que les espaulles & la teste sur l'eau, & quant & eux les cheuaux legers, qui portoient en croupe chacun vn soldat harquebuzier. Apres ceux-là suyurent les gens de cheual armez de pied en teste. L'Empereur cheuauchoit vn cheual d'Espaigne, capparassonné de soye rouge veluë, avec la frange d'or. Quand à luy, il auoit des armes dorées, vn hocqueton violet pourfilé d'or & de soye, vn morion à l'Alemannde, & tenoit en main vn dard semblable à vn espieu de chasse. Et estant ainsi monté, il entre dans le fleuve, le rustique allant deuant, & vint à bord sain & sauf, avec toute la Cauallerie, qui

*Hardiesse
& vertu
des Impe-
riaux sur
la riuiere
d'Alby.*

*Vaillance
merueilleuse
des Espaignolz.*

*L'Empe-
reur & sa
cauallerie
passent le
fleu u
d'Alby a
gué, ensei-
gné par vn
paisan.*

venoit apres luy. Le rustique eut pour son salaire cent escutz, & deux cheuaux. La fanterie ne pouuoit pas passer, à cause que le pont n'estoit pas encore paracheué, de maniere que l'Empereur cognoissant bien que le tout estoit de se haster, delibera d'affronter l'ennemy avec sa Cauallerie seulement. Et comme il s'acheminoit à la poursuyte de l'ennemy, il rencontra vn crucifix de bois, la poiétrine duquel estoit transpercée d'un coup de plomb. Ce que voyant le Catholique Prince, fut surpris d'une iuste angoyssé de cueur: & partant regardant vers le ciel, ô mon Dieu (dit-il) tu peux bien venger vn si grand forfait, si c'est ton plaisir: & ce dict, poursuyuit tousiours son chemin iusqu'à tant que le Duc d'Albe signifia à l'Empereur, qu'il alloit attaquer l'ennemy: & lors les imperiaux se ruerent courageusement sur les rebelles, de façon que leur Cauallerie estant mise à val de route, laissa les gens de pied en proye & au massacre. On estoit déia venu iusqu'à la forest de Lochane, laquelle on voyoit si couuerte d'armes, que les imperiaux en estoient empeschés par le chemin. Grand estoit le nombre des mortz & naurez, & encore plus grand le nombre des captifz, tellement que plusieurs des gens de l'Empereur auoient vingt ou trente prisonniers. Or comme les Imperialistes suyuoient legerement ceux du Saxon, fut apportée la nouuelle à l'Empereur, qui estoit environ le milieu de la forest, de la prise du Duc de Saxe. Iceluy estoit armé sur vn cheual de Frise, & venu qu'il fut deuant l'Empereur, il voulut mettre pied à terre, & tirer le gand de la main droicte, mais l'Empereur se môstra si courtoys, qu'il ne permit ny l'un ny l'autre. Lors le prisonnier ostant le chapeau, ie me rendz à vous, dit-il, tres-puissant & tres-clement Empereur. Auquel l'Empereur respondit, Tu m'appelles ainsi maintenant, ce que tu ne faisois pas cy-deuant. (Car il faut entendre, que durans ces troubles, le Saxon & le Lantgraue ne l'appelloient pas Empereur, ains Charles de Gand, soy disant Empereur.) Et adiousta pareillement, que à bon droict il estoit reduict à telle desconuenue. Ce qu'ayant entendu, il se teut, & baissant la teste, il souspira: & apres il demanda de re-

*Crucifix
transpercé.*

*Bataille,
en laquelle
le Duc de
Saxe re-
belle fut
pris.*

*Abouche-
ment de
l'Empe-
reur & du
prisonnier.*

chef à l'Empereur, qu'il luy pleust de le traicter, comme les Princes ont accoustumé d'estre traictez. Je te traicteray, dit l'Empereur, comme tu as bien merité. Et ce faict, il fut emmené au camp.

Ce mesme iour le Prince Maurice se trouua en grand danger. Car comme il poursuuyoit les ennemys, quelcun d'eux le prenant par derriere, luy voulut lascher vn coup de pistolle: mais elle ne fait point de feu, au moyen de quoy le galand fut incontinent haché en pieces par les gens de Maurice. En ceste bataille furent prinſes quinze pieces d'artillerie, & force munitions, & le lendemain furent encore prises six autres pieces de canon. D'auantage les imperiaux butinerent à souhait, prindrent le bagage, plusieurs enseignes & guydons. Ernest de Brunſuic fut du nombre des prisonniers. L'Empereur n'y perdit pas passé cinquante hommes de cheual. Ceste victoire luy escheut le vingtquatriesme iour d'April. Iadis quand Iules Cesar eut victoire aupres de la region de Pont, (aujourdhuy Mer maiour) il la declaroit en trois motz, ie veins, ie vis, ie vainqui. Laquelle sentence imitant ce grand Empereur, disoit de sa victoire obtenüe non tant par sa force, que à l'ayde de Dieu, ie veins, ie vis, Dieu vainquit. Le Saxon & Ernest de Brunſuic furent donnez à Alphonse Viues, pour en faire bonne garde. Si se rendit la ville de Torgue, & ce faict, l'Empereur marcha vers Vvittemberg pour la prendre, & l'auoit le Duc de Saxe si bien munie & renforcée l'espace de vingt-cinq ans, que facilement elle pouuoit endurer vn long siege. Mais ie m'oubluy de vous dire, que celle partie du fleuue d'Alby que l'Empereur auoit passé à gué, ne l'estoit nullement le lendemain: de maniere que quelques bons auteurs sont d'opinion, que ce fut vn vray miracle, comment l'Empereur y peut passer avec vne si grande armée, & ce sans danger. Et le iour mesme que le Saxon fut prins, le chaut fut tres-grand, & sembloit le Soleil estre sanguinolent, non en l'Alemaigne seulement, mais bien encor en France.

*Victoire
merueilleuse
de l'Empe
reux.*

*Dicton de
Cesar &
de l'Empe
reur en
leurs vi-
ctoires.*

*Le Soleil
sanglant.*

La estoit resolu l'Empereur d'assieger Vvittemberg, quād
Yyy.iiij.

L'AN M.D.XLVII. HISTOIRE DE TOUTES CHOSES

*Le Duc
de Saxe
fait sa
paix, & les
conditions.*

Le Duc de Saxe tout d'un coup il fut fleschy par les prieres de Ioachim, Electeur de Brandebourg, & du Prince de Cleues, la sœur duquel estoit femme du Saxon, & feirent tant, que sa Maïesté sauua la vie au Duc prisonnier, avec conditions telles: il est depouillé de sa dignité d'Electeur, de toutes villes & places appartenantes à l'Electeur. Il retient seulement quelques fortresses & seigneuries en Thuringe. Il liure à l'Empereur toutes armes, artilleries, avec toutes les munitions de guerre. Lequel nombre de l'artillerie estoit grand, de maniere que de Vvittemberg seulement on emporta six vingts canons, sans les autres menuës pieces. La ville de Gothe, qui estoit imprenable, fut desmantelée, en laquelle y auoit cent grosses pieces de canon, sans conter les petites: plus y auoit cent mille bouletz, & plusieurs autres choses. Il y auoit quelques autres conditions, que ie lairray pour euitier prolixité. Vvittemberg estant renduë entre les mains de l'Empereur, la femme du Saxon, accompagnée de plusieurs gentilsz-hommes, vint deux iours apres où estoit l'Empereur, aux pieds duquel elle se voulut ietter: mais l'Empereur la leua doucement, & l'embrassa, chose qui incita les espritz des assistans à fort grande commiseration. Apres que l'Empereur luy eut respondu courtoisement à toutes ses prieres, luy donna congé d'aller voir son espoux, & ce faict, elle s'en alla, & aduint que le lendemain l'Empereur la fut visiter en la ville.

*Secours
présenté
par les e-
strangers
Barbares.*

DURANT ce laps de temps, certain peuple de Tartarie habitant la coste du fleuve Borysthene, (nommé à present Neper) & le Roy de Tunes en Afrique, presenterent à l'Empereur huit mille hommes de cheual: mais l'Empereur s'excusa enuers les Ambassadeurs, pour-autant qu'il n'auoit plus d'affaire de tant de gens, la guerre estant presque finie.

*Le Lant-
graue moy-
enne sa
paix.*

LE Lantgraue ayant veu que le Duc de Saxe estoit prisonnier, & l'insigne victoire obtenuë par l'Empereur, fut à bon droit espouuanté: de maniere qu'il commença de moyenner sa paix par le Seigneur Maurice, auquel se ioignit Ioachim, Electeur de Bradebourg, Seigneurs qui pouuoient alors beaucoup enuers sa Maïesté. L'Empereur ne les esconduit point,

ains leur declara ce qu'il vouloit que le Lantgraue feist. Mais par-ce que le Lantgraue trouuoit tousiours quelque chose à redire sur les conditions, l'Empereur dist à la par-fin, qu'il n'auoit point d'affaire avec le Lantgraue, qu'il s'aduifast, comme il voudroit. Laquelle responce donna assez à penser au Lantgraue, tellement que, voyant bien que son salut depédoit entierement de la clemence de l'Empereur, il escriuit lettres à Maurice, esquelles il escriuit de sa main propre, & accepta les conditions présentées par l'Empereur, au moyen desquelles il fut peu apres retenu à Hale en Saxe.

OR premier que ces choses se passassent de ceste façon, le Roy Ferdinand se transporta legerement de Vvittemberg à Prague, avec trois mille cheuaux & six mille pietons, pendant que l'Empereur s'acheminait vers le Lantgraue. Le iour deuant, les Capitaines de la caualerie Hongre prirent congé de l'Empereur, & le prierent humblement de prendre les affaires d'Hongrie à cuer, veu que les Turcs l'opprimoient si fort. Aufquels l'Empereur respondit fort benignement, & à tous les Capitaines & Lieutenans il donna vne chesne de la valeur de trois cens escuz, & à chacun des gendarmes il donna le double des gages, qu'ils auoient ia gaignez: liberalité certes, qui fut louiagée de tous les gens d'armes. Et aux Espaignols, lesquels auoient prins leurs espées à belles dens, & auoient amené les basteaux des ennemis à la nage, donna à chacun vn casaquin de velours, tréte escuz d'or, & les feit monter en plus haut degré qu'ils n'estoient.

CE fait, l'Empereur prent le chemin de Hale, pour illec aboucher le Lantgraue. Et ce fut lors que grosse sedition s'esmeut entre les Espaignols & Alemans, laquelle pour vray fust venue à quelq grand esclandre, si l'Empereur ne se fust interposé entre les deux nations, bouillantes de fureur & maltalér. Or estoient encor' à la Cour les Ambassadeurs des Boëmiens, lesquels l'Empereur admonnesta de suyure meilleur conseil, qu'ils n'auoient fait, & q' autremét il ne faudroit de prester la main à son frere Ferdinand. Autant en escriuit-il aux Boëmiens.

SVR cela, le Lantgraue vint à Hale avec cent cheuaux, &

*Salair de
l'Empe-
reur aux
Hongres.*

*Sedition
militaire.*

*Comment
le Lant-
graue fut
reconcilié.*

fut le lendemain conduit par les Seigneurs Maurice & Joachim iusqu'à l'hostel de l'Empereur. A cela estoient presens plusieurs gentils-hommes, qui n'eussent oncques pensé que cela deust aduenir. Le Lantgraue doncques se prosterne aux genoux de la sacrée Maiesté, & au nom d'iceluy le Châcellier appella l'Empereur tres-honorablement, demande pardon, promet foy & obeïssance à l'aduenir, laquelle il confirme des à present par serment. L'Empereur respōdit par son Orateur, que combien qu'il eust esté griefuement offensé, neantmoins il luy vouloit pardonner, & partant qu'il estoit desormais absous de la sentence de mort, du bannissement, & de la prison perpetuelle. Ce dict, le Lantgraue se leue, mais l'Empereur ne luy donna point la main, ny luy mōstra aucun autre signe de bien-vueillance. A cela fut present Henry de Brunswic, que le

*Le Lant-
graue re-
tenu.*

Lantgraue auoit par-avant tenu prisonnier. Apres ces choses, le Duc d'Albe mena quant & foy le Lantgraue au chasteau, & inuita les Electeurs à soupper. Le souppé doncq' estât acheué, & les tables dressees, le Duc reteint chez foy le Lantgraue, chose qui luy aduint outre son espoir, à cause qu'il s'attendoit de iouir de plus grande liberté. Je vous diray seulement vne partie des conditions de cest accord. Le Lantgraue & tous ses subiects ou vassaux presteront sermēt à l'Empereur, & se souz-mettront à sa volonté. Il donne soudain quatre villes telles que sa Maiesté voudra. Il desmantellera certains lieux bien munis. Il donnera cent cinquante mille escuz. Il deliurera à l'Empereur toutes les grosses pieces d'artillerie, (& sçachez qu'il en y auoit plus de deux cens.) Il restituera Henry de Brūswic. La vie luy est sauuée de la grace de l'Empereur: & ne sera detenu en prison perpetuelle. Ceste derniere condition me semble n'auoir esté assez considerée ny par le Lantgraue, ny par les moyenneurs aussi, veu qu'il gisoit à la volonté de l'Empereur, de prolonger ou abbreger sa prison, par iceluy article. Le Lantgraue trouua au commencement fort mauuais qu'on le retenoit, mais apres qu'ō luy eut proposé son escriture propre, laquelle le conuainquoit de cela, il porta ceste desconueniē plus moderément. Et certainement, les meschans & detestables

*Conditions
de sa paix.*

restables conseilz de Luther & autres peruers predicans, auoient conduict & le Lantgraue & le Duc de Saxe à ceste calamité.

VOYLA donc quelle fut la fin de la guerre d'Alemaigne, laquelle ayant esté domtée & pacifiée par l'Empereur, (chose qui iamais n'estoit aduenüe aux Emperours des Romains) fut <sup>Titre de l'Empe-
reur, donné par le Pa-
pe.</sup> furnommé par le Pape Paul, en vne bulle qu'il reçeut à Hale, ^{tres-grand & tres-inuaincu.} Et non sans cause: veu que le grand Roy Charles, premier Empereur de ce rang, fut trente ans à domter les Saxons: & ce second Charlemagne contraignit presque en trois moys toute Saxe à luy obeïr comme il voudroit. Or apres que les forteresses des terres du Lantgraue furent desmantelées, l'Empereur feit mener à Francfort toute l'artillerie, qu'il auoit gaignée en ces deux guerres, laquelle il distribua en ceste sorte. Il en enuoya 50. pieces à Milan, 50. au- <sup>L'Empe-
reur distri-
bue l'artil-
lerie prise
en ces guer-
res.</sup> tres pieces à Naples, trois cens en ses pais de Flandres, & le reste en Espagne. Apres il print la volte de Noremberg, à fin qu'estât plus pres de son frere Ferdinand, il le peust mieux secourir contre les Boëmiens. Mais vn peu apres il sceut que les Boëmiens s'estoient recogneuz, & estoient prestz de faire ce qui leur seroit commadé. Comme il seiournoit à Noremberg, <sup>Ceux de
Lubec, de
Breme,
d'Ham-
bourg se
rendent.</sup> arriuerent les Ambassadeurs de la noble & illustre cité de Lubec, pour remonstrer qu'ilz n'auoient point esté liguez avec les rebelles, & n'auoiēt oncques rien attenté cōtre ses Estatz. Ceux de Breme pareillement suppliēt l'Empereur par le Roy de Dannemarc, à ce qu'ilz soient receuz en son obeïssance. Le semblable requirent celuy de Pomeran & de Lunebourg. Ceux d'Hambourg se rendirent les premiers de tous, enuoyans leurs Ambassadeurs à Noremberg par deuers la Maïesté, qui promettoient de payer grosse somme d'argent pour l'amēde, & rendre la ville au commandement de l'Empereur, choses non encor' aduenües par le passé. Voyla dōc comme l'Empereur dominoit sans contredict par toute l'Alemaigne, mais, comme il estoit naturellement debonnaire, il se monstra si <sup>Douceur
de l'Empe-
reur en sa
victoire.</sup> doux & clement aux ennemys qui se vindrent rendre à luy, qu'il s'en est trouué quelques vns, qui ont dict, que ce Prince

Zzz.j.

ne leur auoit pas monstré telle seuerité, comme il falloit. Mais il faut penser que ce Monarque ne feist rien à la volée, considéré qu'il sçauoit bien, qu'il n'auoit pas faute d'enuieux, & pésoit & balançoit les choses fort meuremēt. Tant y a, que puis que les ennemys estoient si fortz, & que sur le commencement de la guerre d'Alemaigne l'Empereur estoit si mal en point, qu'il sembloit ne songer à rien moins que à faire la guerre, & neantmoins qu'il a fort heureusement deffaict & aneanty toutes les troupes ennemyes, quelques fortes & outrecuydées qu'elles fussent, & a reduyt toute l'Alemaigne souz son obeïssance: cela doit demeurer pour indubitable, que nostre Dieu luy tenoit la main, & q̄ les ennemys n'auoient pas Dieu pour auxiliaeur, dont ilz ont esté vaincus, tant pource qu'ilz auoient faict banqueroute à la religiō de leurs predecesseurs, que pourauiāt qu'ils auoient leuē les armes contre leur Prince legitime.

A v temps que l'Empereur partit de Vvittemberg, & que Maurice ayant esté inuesty de la dignité d'Electeur, eut mis sa gendarmerie dedans celle ville, le docte Iules Pflug fut enuoyé pour succeder à la chaire de Numbourg, occupée pour lors par Nicolas Amsdorf, grandissime Lutherien. ç'a esté ce luy Amsdorf, lequel meit vn liure en lumiere, apres le colloque dernier d'Vvormes faict l'an 1557, auquel les heretiques ne se peurent accorder. En iceluy liure il accoustre terriblement Melancthon, Brence, & quelques autres, lesquelz n'auoient voulu condamner en ce colloque Zuingle & Oslander, & dict qu'ilz ont abandonné la Confession d'Ausbourg, pour-ce seulement, qu'ilz ont faict refus de condamner les sus-dictz & leurs sectateurs. Et au mesme escript il condamne apertement tous les Zuingliens & Adiaphoristes, (heretiques qui ont le baptesme & autres choses pour indifferent) le pere desquelz a esté le venerable Melancthon. Ce que i'ay voulu reciter en ce lieu, comme souuent ay faict cy-dessus, à fin que le lecteur sçache comment noz nouueaux Euangeliques s'accordent, & qu'il se donne garde de telz galans, au moins s'il a son salut en recommandation.

Nicolas
Amsdorf
fort grand
Lutherien.

COMME le Roy Ferdinand estoit à Letmeri en Boëme, <sup>Le Royan
me de Boe
me est pa-
cifié.</sup> l'Empereur luy enuoya secours de huit enseignes de pietôs Alemans. Or estans les nouuelles arriüées de la prinse du Lāt-graue, Ferdinand escript lettres à ceux de Prague, par lesquelles il les somme de comparoir deuant luy au chasteau de Prague le 6. iour de Iuillet. Ilz ne faillirent pas de venir, & demander pardon de ce qu'ilz l'auoient offensé, se souzmettans au reste à sa bonne discretion. Et faut sçauoir que Ferdinand, filz du Roy, & Auguste, frere de Maurice, moyennoient leur accord. Au moyen dequoy ilz impetrerent du Roy leur paix, mais avec quelques conditions: au reste, la sentence fut prononcée plus seuerement, à l'encontre de quelques gentilzhommes, qui n'auoient voulu comparoir au iour prefix. Pareillement se rendirent quelques autres citez & gentilzhommes, à l'exemple de ceux de Prague. Gaspar Pflug, que les coniuerez auoient esleu pour chef, fut condamné de lese maiesté, & cinq mille escuz ordonnez pour loyer à celuy qui le pourroit prendre. Et voila comme ce Royaume fut tranquillé & pacifié les auteurs de la sedition estans punis.

L'EMPEREUR estant à Bamberg assigna la iournée Imperiale & commanda que chascun se trouuast à Ausbourg le premier iour de Septembre. Il vint sur la fin de Iuillet audict lieu, avec le Saxon prisonnier, parce qu'il auoit laissé le Lant-graue à Tonauert. Et pendant que sa Maiesté seiournoit à Ausbourg, Gerard Veltvich fut de retour de Constantinople, auquel lieu il auoit moyenné avec le Turc <sup>Journée
d'Aus-
bourg assé-
gnée.</sup> treues pour <sup>Treues
pour 5. ans
avec le
Turc.</sup> cinq ans. Ceste iournée d'Ausbourg fut fort belle & celebre, bien que Sleidan dōne vne pinsade en passant, disant qu'elle se tenoit en armes, pourautāt que l'Empereur tenoit dehors & dedans la ville quelques bendes en armes. Tous les Electeurs y assisterent, & outre les Princes de l'Empire y fut Madame Marie, sœur de l'Empereur, & Regēte au pais bas: y fut aussi la niepce dudit Sieur, veufue de Lorraine. Maximilian d'Austriche feit vn petit mot de peface au nō de l'Empereur, & puy l'Empereur par sō Secretaire, (cōme est de coustume) proposa ce qu'il vouloit estre traicté en la presente iournée.

Zzz. ij.

Pierre Louys, filz du Pape, meurtry à Plaisance. LE dixiesme de ce mois de Septembre, Pierre Louys, filz de Pape Paul troisieme, fut meurtry à Plaisance en son logis: & tost apres l'Illustre Seigneur Ferdinand Gonzague, Lieutenant de l'Empereur en Lombardie, print la ville. C'est icy que Sleidan laue de toutes eaux non seulement Pierre Louys, mais bien encore le Pape mesme, lequel il afferme auoir esté fort adonné & à l'Astrologie, & à la Necromantie aussi. Mais telle est la coustume de nouveaux religieux, de ne cesser iamais de mesdire du Pape, l'office duquel ilz deueroient auoir en reuerence, filz ne veulent auoir la personne. Et veritablement plusieurs disent beaucoup de biens du Pape Paul, & loüant grandement ses vertuz. Et quel qu'il ayt esté, ce n'estoit pas à ce Sacramentaire Sleidan, de luy donner telles atteintes comme il faict. Car en l'ancienne Loy c'estoit crime digne de mort, de mesdire de celuy qui gouuernoit le peuple Hebreu. Et aujourd'huy noz Euangeliques n'ont rien plus cher ny familier, q̄ de brocarder le Pape, pasteur de l'Eglise de Dieu, & n'y a espee aucune de mesdisance, qu'ilz ne produysent contre iceluy. Mais ceux qui sont bien endoctrinez à l'eschole des Catholiques, portent honneur & reuerence au Pape, pour l'amour de Iesus Christ, & ne considerent pas tant les mœurs ou la vie, qu'ilz respectent la puissance & autorité, de peur qu'en blasonnant le Pape, ilz ne facent iniure à nostre Seigneur, de l'Eglise duquel le S. Pere est pasteur. Il y a plus de mille ans passez, qu'on presenta à Constantin le grand, Empereur, les complainctes & doleances de certains Euesques, qui s'entr'accusoient: mais il respondit sagement, que ce n'estoit pas à luy, de recevoir & cognoistre les accusations des hommes Ecclesiastiques. Et ayant ce dict avec quelques autres morz qu'il adiousta, il ietta dans le feu toutes les complainctes des Euesques, lesquelles il n'auoit pas voulu seulement lire: encor' adiousta-il, que s'il rencontroit quelque Euesque souillant la couche d'autrui, il couriroit ce forfait de sa robe, de peur qu'un spectacle si indigne d'un Prelat n'incitast à mal-faire les spectateurs. Mais à tāt auons dict ce propos pour les insolens.

Du Pape, inuirié par les heretiques.
2. Reg. 19

Faict louable de Constantin le grand, en Nicepho. liure 8.

EN ce temps les Anglois surmonterent en guerre les Escossois, souz la cōduyte du Duc de Somerset, Oncle du Roy, ^{Victoire, & insolence des Anglois.} & fut la bataille donnée à Musselburg. Le Chef des Escossois estoit Iacques Hamilton, Conte d'Arran, & gouuerneur du Royaume d'Escoffe. La victoire fut douteuse quelque temps, mais la plus part des grandz ayās esté atterrez, la victoire demeura aux Anglois. On dict q̄ le motif de ceste guerre estoit, pour-ce qu'on ne donnoit pas à Edoüard la femme à luy promise par les Escossois en certain accord. Ceste victoire feit, que les Anglois entrèrent auant dans le Royaume des ennemis: & retournez qu'ilz furent à leurs maisons, commencerent à guerroyer les images & statuës sacrées, lesquelles ilz abbatirēt des Eglises, & dōnerent permission aux prestres de se marier. Voyla donc les beaux fondemens de l'Euangile, fondemens, dy-ie, de la contumelie faicte à Dieu & à ses Sainctz, & cōmençans par vne orde paillardise. Mais nostre Seigneur vengera quelque iour & son iniure, & l'ignominie faicte à ses bien-heureux Sainctz, & si precipitera ces prestres mariez en vn lieu, auquel ilz n'auront pas enuie de rire si fort.

EN la iournée d'Ausbourg mētionnée cy-dessus, tous les ^{Tous les Princes} Princes se souzmirent aux decretz du S. Concile de Trente, ^{s'arrestent au Concile.} pourautant que tout le soing & scope de l'Empereur n'estoit autre, que de restituer la sincere religion en son entier, & bannir toutes heresies de l'Alemaigne. Mais par-ce que la captiuité du Lantgraue estoit aduenüe outre l'attente qu'on auoit, on se peina grandement en ceste iournée à le remettre en sa liberté. Sa femme vint à Ausbourg, & accompagnée de tous les Estatz supplia de ce l'Empereur: mais on ne peut rien impetrer pour lors. Or deuant qu'on priaist pour luy, l'Empereur ^{Du Lantgraue.} exposa en peu de motz deuant tous les Estatz le conuenu & accord faict avec le Lantgraue, de maniere qu'il n'y auoit personne qui n'approuast biē ce qu'il en faisoit, quoy que Maurice & celuy de Brandebourg alleguoient quelque chose. Si me semble, q̄ toute la faute de ce venoit, (comme ie vous ay déia dict) de ce q̄ ny le Lantgraue ny ces deux Princes ne cōfideroiēt pas assez l'article de la prisō perpetuelle du Lantgraue.

L'AN M.D.XLVIII. HISTOIRE DE TOUTES CHOSES

Different pour la Maistrise de Prusse, adiugée à Vvolfang
 L'AN 1548. le Roy de Poloigne auoit ses Ambassadeurs aux Estatz de l'Empire tenuz à Ausbourg, lesquelz declarerēt, audiēt lieu le droit que leur Maistre auoit au pais de Prusse, & requeroient, que la proscription faicte par la Chambre de Spire à l'encōtre de Albert, cy-deuāt grand maistre de Prusse, fust abolie. Cestuy Albert ayant changé l'ancienne forme de Prusse, s'estoit réduit vassal au Roy de Poloigne, & auoit chāgé le nom de grād-maistre en Duc. L'Empereur doncques ayāt ouy la requeste de l'Ambassadeur, donna la copie de l'harangue à Vvolfang, grand-maistre de Prusse, lequel respondit le 23. de Ianuier. Finalement ouyes les raisons de l'Ambassadeur & de Vvolfang, fut enioint à certains hommes de cognoistre de ce different, & fut arresté par l'aduis d'un chacun, que l'arrest donné par la Chambre à l'encontre d'Albert, deuoit estre executé. Mais pour-ce que l'execution en estoit fort difficile, la charge de ce fut donnée à l'Empereur.

Deces de Sigismōd, Roy de Poloigne.
 B I E N tost apres alla de vie à trespas le bon & Catholique Roy de Poloigne Sigismōd, ia cassé de vieillesse. Son pere fut Casimir: il nasquit le premier iour de Ianuier en l'an 1467. & fut sacré Roy l'an 1506. Car deuant luy regnerent successiuelement ses freres, qui le deuançoient en âge, Iehan, Albert, & Alexandre. Il mourut le premier iour d'April 1548. Son deces fut fort dommageable au Royaume de Poloigne. Car ice luy trespasé, les heresies abominables, comme est celle des Nestoriens & Ariens, repullulerent peu à peu dans ceste contrée. Son filz Sigismōd Auguste luy succeda, Prince de hault courage, & imitateur de son pere, quand au zele de la religion Catholique. Car le tref-illustre Cardinal d'Vvarme Stanislas Hosius, (la pieté & doctrine duquel est cogneue à tout cest vniuers) tesmoigne, que aux Estatz tenuz à Vvarshauie il fut prié de cognoistre le faict de la religion, mais il respondit, en ce refusant, que cela n'estoit pas de son gibier, comme estant Roy, & non pasteur de l'Eglise, & qu'il auoit assez d'affaire à traicter les causes profanes. De laquelle responce son pere Sigismōd trespasé auoit quelquefois vsé. Car il y en auoit qui requeroient de luy tref-instammēt, qu'il permeist que la pure

Responſes fort ſages & Catholiques du Roy de Poloigne.

doctrine de l'Euangile Lutherien fust annoncée en son Royaume. Ausquels il respondit d'un esprit entierement Catholique, que ce n'estoit pas son fait, de cognoistre de la pureté de doctrine, ains que c'estoit l'office des Prelats: au iugemēt desquels il vouloit se souz-mettre, & vouloit que leur iurisdiction fust sauue en toutes choses. Et pleust à Dieu que plusieurs autres Magistrats politiques eussent ensuiuy la constance de ce Prince, ausquels ces braues & ignorans-superbes predicans ont mis en teste, que leur puissance s'estendoit iusqu'à auoir la cognoissance de la foy & religion, chose certainemēt dont plusieurs maux & mal-heurs sont aduenuz en maintz endroits. Mais ces maistres souffleurs du pur Euangile leur ont attribué telle autorité, pour auoir leurs bōnes graces & leur faueur en ces affaires: & routesfois ces freres Euangeliques ne s'accordent pas en cecy, ains les vns suyuent vne sentence, & les autres vne autre.

De ce temps le Concile ne poursuiuoit pas d'un bō train, à cause que quelques Prelats s'en estoient allez à Boloigne pour l'incommodité de l'air, & les autres estoient demeurez à Trente. Ce-pendant l'Empereur craignant que ce Concile ne prinst plus long traict qu'il n'estoit expedient, & que la religion ne seroit pas si tost definie, en chargea à quelques vns de faire certaine formule, de laquelle on vseroit en Allemagne, iusqu'à la definition du Concile. Ceux-là furent Iules Pflug, Euesque de Numbourg, Michel de Sidoine, Suffragant de l'Electeur de Maience, & Iehan Islebe. Ioachim, Prince Electeur de Brandebourg, desireux de quelque bon accord, feit venir Bucer de Strasbourg. Luy arriué à Rachttes, ledict Prince luy donna la copie du liure composé par les trois sus-nommez, lequel il leut. Mais le Prince l'ayant prié de souzcrire, il refusa, disant que ce liure estoit plus Catholique, que l'Euangile de Bucer ne pouuoit porter. Dont le Prince fut fort irrité, & le galand s'en retourna tout court. L'Archeuesque de Coloigne chanta sa premiere Messe à Ausbourg, à laquelle l'Empereur assista, le Roy Ferdinand, & plusieurs Princes. Apres il leur feit vn festin fort magnifique.

*Comment
l'Interim
fut composé
à Ausbourg.*

*Muleasse
à Aus-
bourg.*

EN ce temps Muleasse iadis Roy de Tunes, & lors chassé, voire aueuglé par son fils, (comme il vous a esté raconté cy-dessus) vint à Ausbourg, & peu apres son autre fils y vint pareillement. Ce Roy sembloit en vne si grande calamité retenir sa magnanimité & hauteffe, comme celuy qui marchoit la teste leuée, & souuēt faisoit monstre de sa grandeur passée, par vne magnificence d'habits, & de son graue maintien.

*Deux poin-
cts non
Catholi-
ques en
l'Interim,
corrigez
par le Pa-
pe.*

A v liure, lequel nous auons dict auoir esté composé par le commandement de l'Empereur, estoit permis, que les prestres d'entre les Protestans, qui auoient espousé femme, ne seroient point contrainsts de les laisser iusqu'à la definition du Concile: & quant & quant, que ceux qui par le passé auoient vsé des deux especes de la sainte Eucharistie, ne seroiēt point encore priuez du S. Calice. Ces deux poincts ne pleurent pas aux Catholiques, à cause qu'il ne gisoit pas en la puissance de l'Empereur, de faire vne telle ordonnance. Mais le bon homme ne faisoit point cela, pour vsurper quelque nouuelle authorité, mais au mieux qu'il pouuoit il taschoit de remettre les affaires d'Alemaigne en quelque bon poinct, en gardant tousiours l'authorité inuiolable du Concile de Trente, & du S. Pere: & consideroit aussi, que s'il eust voulu proceder par voye de fait à faire obseruer ce qu'il vouloit, au lieu de repos fussent sortis des troubles plus grands que les premiers. Toutesfois ie ne veux rien affermer temerairement sur ceste matiere, ains m'en remets à ceux qui sçauent mieux que c'est. Tant y a que c'estoit chose insolente & intolerable, estans les affaires en tel estat, que, pourautāt que ce liure s'appelloit vulgairement l'Interim, (c'est à dire vn ce-pendant) les Protestans ne faisoient que s'en mocquer, & le brocardoient tant qu'il leur estoit possible. Il est vray-semblable, que deslors ils couuoient les moyens, par lesquels ils esperoient se remettre en leur ancienne liberté. Quand à Maurice, il remeit à Vvittemberg Philippe Melancthon, Pomeran, & Cruciger. Or faut sçauoir, que premier que le liure sus-dict fust diuulgué, l'Empereur l'enuoya au Pape, déclarant par ce fait son esprit totalement Catholique, veu que de sa teste il ne vouloit rien constituer

*Excuse de
l'Empe-
reur.*

stituer de ce qui concerne la religion. Le Pape doncques remarqua ce qui meritoit d'estre changé: & cōme le Pape manda, ainsi feirent les Catholiques dudict liure.

En ce temps le Prince Maximilian, filz du Roy Ferdinād, accompagné du Cardinal de Trēte, partit d'Ausbourg pour aller en Espagne. Or c'estoit en ceste saison que les predicans ^{Grande mutation des predicans.} Euangeliques auoient belle peur, de sorte qu'ilz ne sçauoient de quel bois faire fiesches: & telle estoit la metamorphose, que ceux qui s'estoiēt iusqu' icy entre-battuz incessamment, estāt venue la publique calamité de l'Eglise, (car ainsi parloient-ilz) meirent à part toutes les offenses & animositēz passées. C'estoit vn gentil spectacle, de voir quelques vns des plus fiers Lutheriens s'aller cacher chez les Zuingliens, & des autres escrire les plus amiables lettres qu'il est possible aux predicās de Suisse, combien qu'ilz n'eussent aucune concorde en leurs opinions, & que Luther eust pieça condamné les Zuingliēs, comme heretiques. Brence se voyāt chassé de Hale en Suabe, ^{Brence.} demeura quelque temps à Basse. Pierre Martyr estant fugitif d'Italie, apres auoir demeuré à Strasbourg, s'en alla de ce temps en Angleterre. Muscule quitta Ausbourg, & vint en Suisse à seureté. ^{Pierre Martyr.} Semblablement Osiander laissa la ville de Noremberg, & alla prescher son mal-heureux Euāgile en Prusse. ^{Muscule.} Erasme Sarcier quitta le Conte Guillaume de Nansau. Erard Sneppe, & quelques autres predicantereaux furent forcez de vuidier toute la contrée d'Vvittemberg. ^{Erasme Sarcier.} Brief peu s'en fallut, que le nouveau Euangile ne trespasast en Alemaigne, chose fort souhaitable, attendu que la terre ne fut oncques deliurée d'vne plus dangereuse peste, qu'elle eust esté alors. Or ne peut le Duc de Saxe captif estre persuadé, de souzcrire au Concile, & à la doctrine contenuē au liure ia mis en lumiere par l'Empereur, disant qu'il feroit cela contre sa cōscience, & qu'il commettrait vn peché contre le S. Esprit, lequel est irremissible. Ainsi auoient persuadé les predicans à quelques Princes d'Alemaigne. Mais nous deuons faire nostre proufit de cela. Car silz ont voulu estre si opiniastrs à soustenir les songes de quelques resueurs & forcenez espritz, combien plus constās

deuons nous estre à retenir celle religion, que l'Alcmaigne a tousiours retenuë, tant qu'elle a esté Chrestienne, & non seulement ceste nation, mais bien tout le reste du monde. Comme si c'estoit vn crime horrible, de laisser ce que quelques apostatz nous auront appris, & comme si c'estoit pieté, de quicter tout soudain ce que toute l'Eglise Chrestienne a tenu depuis les Apostres.

*La Messe
abolie en
Angle-
terre.*

A cause que les Anglois auoient en ce temps vn fort ieune Roy, ilz furent osez iusqu' à abolir la Messe en ce Royaume, & peu apres fut emprisonné l'Euesque de Vvinchestre, fort insigné personnage. Et au reste, le Concile de Trente continuoît tousiours.

*Sage edict
des Veni-
tiens.*

EN mesme tēps la Seigneurie de Venise feit vn edict, par lequel estoit commandé, que tous liures non Catholiques seroient mis entre les mains de quelques vns dans huit briefz iours, lesquelz passez, seroit faicte inquisition sur ce, & ceux qu'on auroit trouuez, ne demeureroiēt pas impunis: & ensemble estoit loyer promis à ceux, qui deceleroiēt les infracteurs de cest edict. Je sçay bien que plusieurs trouuent mauuais cela, mais filz estoient sages, ilz en sçauoient bon gré au Magistrat desireux de leur salut: & à la mienne volonté qu'en tous les lieux du mōde les liures heretiques fussent defenduz souz grosses peines, pourautant que, comme tresbien diēt l'Apostre, leur parolle glisse comme le chancre.

*Ceux de
Constance
reçoient
le decret.*

L'EMPEREUR bannit ceux de Constance, à cause qu'ilz ne luy vouloient pas obeir en certaines choses. Dequoy estans espouuantez, à cause que cela estoit plein de peril, consulterēt sur ce plus diligemment, & reçurent le liure de l'Empereur, & si permeirent que le Clergé n'entraist dans la ville. Quand aux ministres, le principal desquelz estoit Ambroise Blaurer, ilz se transporterent ailleurs. Ceux de Lindaue auparauant les plus opiniaistres du monde, voyans ce qu'auoient faict les Cōstantins, reçurent le sus-dict liure.

*Le Senat
depose à
Ausbourg,
Or à V.
me.*

LE 3. iour d'Aoust l'Empereur cassa le Senat d'Ausbourg, à cause que plusieurs du simple peuple en estoient, & en establi vn tout nouveau. Semblablement il casse toutes leurs bē-

des & quartiers, defend aussi que les citoyens ne feissent assemblées à l'accoustumé. Commande quant & quant au nouveau Senat de recevoir la religion, selon qu'elle estoit portée par le liure imprimé. Ce faict, il s'en va à Vlme, laissant bonne garnison à Ausbourg: où estant il casse le Senat pareillement, en cōstitué vn nouveau, & faict mettre en prison Martin Frecht & quelques autres predicans, qui refusoient d'accepter la doctrine nouvellement publiée par sa Maieité. Quand au Senat, il approuua le liure. Deux des predicans recogneurent leur faute, les autres quatre demurerent en leur opiniastrété.

CE V X de Strasbourg enuoyerent leurs Ambassadeurs à ^{Accord} Spire par deuers l'Empereur, lequel n'ayās trouué audiect lieu, ^{ostroyé à ceux de} le suyurent iusqu' à Maience: mais pour-ce que quelques Cō ^{Stras-} seillers estoient absens, cōmandement leur fut faict de le suy- ^{bourg.} ure iusqu' à Coloigne. Estans là ilz presentent leurs lettres à l'Empereur, ilz requierent que grace leur fust faicte du decret contenu au liure ia assez souuent mentionné, ou pour le moins qu'il fust mirigué, pourautant qu'ilz auoient grand soing de leur salut, & ne pouuoient rien faire contre leur conscience. Et c'estoit ainsi qu'on trembloit en l'Alemaigne, lors qu'il estoit question de s'entrer au vray chemin duquel ilz auoient forligné: combien qu'ilz n'eussent point tremblé, lors qu'impudemment ilz feirent banqueroute à l'ancienne & Catholique religion. Or c'estoit le contraire, de ce qui estoit expedient. Car il falloit aller lentement aux nouuelletez, mais il falloit hastiement & sans delay aucun retourner à la religion receüe & approuuée par tous les siecles passez. Parquoy ilz auoient frayeur, où il ne falloit craindre. En fin ceux de Stras- ^{Psal. 13.} bourg eurent responce, qu'ilz accordassent avec leur Euesque. Car ilz offroient de laisser quelques Eglises pour les Catholiques, de faire obseruer les iours de festes, & qu'on ne māgeroit de chair es iours defenduz.

NO V S vous auons dict, que ceux de Constance auoient ^{Ceux de} esté proscriptz. Au moyen de ce ilz estoient en grandes an- ^{Constance} goysles, & n'y auoit moyen de se sauuer, à cause que rien ne ^{se rendent} pouuoit resister à l'inuaincu Empereur. Parquoy estans vexez ^{à la mai-} ^{son d'An-} ^{siuicté.}

à toute extremité, comme il aduient à ceux qui sont exposez en proye, se donnerent à la maison d'Austriche à tousiours-mais. Ferdinand doncques les print en sa sauuegarde, souz certaines conditions, lesquelles ilz iurerent qu'ilz feroiēt obseruer. Ceste ville de Constance est assez renommée, quand bien il n'y auroit que le Concile de Constance pour cela: la ville est petite, mais gentille & bien trouffée. Il y a vn Euesque, le diocese duquel est aussi grand & ample que autre, qui soit gueres en Alemaigne, comme celuy qui contient plus de mille huiët cens parroisses, & quatre cens monasteres. Et sur ce propos ie vous veux reciter les epithetes, qu'aucuns donnent aux Eueschez qui sont sur le Rhin. Celuy de Chur est le plus haut, par-ce qu'il est à la source du Rhin. Celuy de Constance, le plus ample: celuy de Basle, le plus plaissant: celuy de Strasbourg, le plus noble: celuy de Spire, le plus religieux: celuy de Maience, le plus venerable: celuy de Coloigne, le plus riche: celuy de Treues, le plus ancien.

*Epithetes
des Eues-
chez qui
sont sur le
Rhin.*

*La seditiō
de Guy-
enne.*

EN ce temps il y eut fort grande sedition en la ville de Bourdeaux, chef de Guyenne, tant pour les salines, que pour le tribut extraordinaire. La chose sembloit venir à vne reuolte: mais le Roy Henry y manda assez à temps Messire Anne de Mommorancy, Connestable, lequel feit mourir les auteurs de ceste sedition, & chastia si bien les citoyens de Bourdeaux, qu'il leur feit prester tout deuoir & obeïssance. On leur osta toutes leurs cloches, afin de leur oster le moyen de donner signe à faire quelque esmeute. Puy tous les tiltres de priuileges & franchises de la ville passerent par le feu. Et pourautāt qu'ilz festoient en-hardys iusqu' à massacrer le Lieutenent du Roy, qui estoit le Sieur de Monnins, ilz reparerēt la faute, comme il appartenoit.

L'EMPEREUR finalement se retira en son païs de Flandres, menant le Duc de Saxe quant & soy, & enuoya le Landgraue à Aldernande, ville de Flandres. Vn peu deuant, sçauoir est le premier iour d'Octobre, il ordonna les iuges de la Chambre, il debouta trois aduocatz suspectz de luthererie, & aux autres il feit expres commandement de suyure en tout.

*L'Empe-
reur ordon-
ne la Cha-
mbre.*

l'Eglise Catholique, filz n'aymoient mieux estre deposez. L'Empereur estant audict pais, Madame Eleonor sa sœur se retira à luy, à ce consentant le Roy Henry.

ENVIRON ce temps Philippe Roy d'Espaigne aagé de ^{Venu du} vingt & vn an, laissant Maximiliã son cousin en Espaigne, ^{Roy Phi-} par ^{lippe en} tit de ses pais, & vint surgir à Gennes avec cinquante galeres, ^{Italie.} & presque autant de nauires de charge. Il fut receu en Italie fort pompeusement, à Gennes premierement, & puyés autres villes. Comme il vouloit faire son entrée dans Milan, vindrent au deuant de luy le Duc de Sauoye, les Venitiens, les Florentins, les Ambassadeurs de Ferrare & de Siene. Cependant Maximilian Conte de Bure trespassa à Bruxelles, de squi nancie.

LES Theologiens des Protestans demeurans à Vvittem- ^{Des Con-} berg & à Lipsie, selon la volonté du Prince Maurice s'assem- ^{fessionistes} blerent en certains lieux, & feirent en sorte qu'ilz s'accommo- ^{doux, &} doient beaucoup à l'escript de l'Empereur, & feirent imprimer vne formule de religion, laquelle deuoit estre obseruée en toutes les terres de Maurice. De cecy sourdit par-apres vne fort grande contention entre les Lutheriens, & furent appelez ceux qui auoient consenty à ce liure, les doux Confessionnistes, le Prince desquelz a esté Melancthon. Les autheurs de l'histoire de Magdebourg, qui sont les rigides Confessionnistes, en la preface de la septiesme Centurie parlent des deux ^{des rigides} Confessionnistes en cestemaniere: ne voit-on pas tous les ans des libelles diffamatoires, contenans des erreurs abominables, qui sortent des escholes, (à sçauoir d'Vvittemberg & Lipsie) esquelles les maistres heretiques presidēt, enuirónez des boucliers de ceux q̄ maniēt la police? Par iceux liures on voit assez les fruiets qui sortiront d'ores en auant, & quelle posterité aura le filz de Dieu, de maniere que venant iuger le monde, cōme il a dict, à peine trouuera-il aucune foy. Ce sont les louanges, q̄ les roydes Confessionnistes attribuent aux doux, lesquelles ilz repētēt encore ailleurs, cōme les doux n'en font pas moins cōtre les autres. Chose certainement, qui nous doit semondre à quitter la compaignie & doctrine de telz hōmes.

L'AN M.D.XLIX. HISTOIRE DE TOUTES CHOSES

*Le Roy
Philippe
au pays
bas.*

L'AN 1549. le Roy Philippe, filz de l'Empereur, vint voir son pere iusqu' au pais bas, accompagné entre autres du Cardinal de Trente. Comme il approchoit, l'Empereur luy auoit enuoyé au deuant vne braue Cauallerie iusques en Alemaigne. Le Prince Maurice luy alla au deuant iusqu' à Trente, & prioit le Roy Philippe, qu'il luy pleust moyenner quelque chose pour le Lantgraue, enuers son pere l'Empereur, auquel le Roy feit de grandes promesses pour le succes de cest affaire.

*Opinia-
streté de
ceux de
Magde-
bourg.*

*De Flac-
cus Illy-
ricus, &
ses com-
paignons.*

L'EMPEREUR auoit banny & exposé en proye ceux de Magdebourg, mais encore furent-ils plus mal vouluz, quand ils refuserent de ratifier le decret d'Ausbourg. Ceste ville a esté des premieres, lesquelles ont embrassé le detestable Euangile de Luther, & en ce temps illec estoient plusieurs bons soldatz Lutheriens, comme Nicolas Amldorf, (celuy qui auoit esté debouté de l'Euesché de Numbourg) & Mathias Flaccus Illyricus, qui auoit esté disciple de Melancthon. Mais lors que Melancthon, conuiuant avec ceux d'Vvittemberg & de Lipsie, sembla approuuer le decret de l'Empereur, & concéder beaucoup de poinctz, cestuy Illyric escriuit avec ses compaignons (tous opiniaistrez à soustenir les erreurs de Luther, quelz qu'ilz fussent) contre Melancthon, & ceux qui se rangeoient de son party. C'estoient donc ces galans qui enflammoient les citoyens de Magdebourg, à reietter le decret d'Ausbourg. Nicolas le Coc estoit de leur costé, lequel me semble auoir esté de ce temps à Magdebourg, mais apres il fut sur-intendant à Ratisbone. Brief, ceste animosité des doux & rigides Cōfessionistes (ainsi les appellēt quelques Catholiques) a esté si grande, qu'à la par-fin le miserable Illyrique, banny de toute Saxe, a esté contrainct se retirer à Ratisbone chez Nicolas le Coc. Car cest Illyrique est fort vehement, & en quelques requestes il prie & supplie tresinstamment, qu'en Alemaigne ou Saxe soit cōgregé vn Synode, auquel toutesfois n'assisteront que les Synergistes, Maioristes, & Adiaphoristes, (tous heretiques) disant qu'il n'a affaire qu'avec ceux-cy. Il se complaint pareillement de quoy l'on a fal-

fifié & depraué en maints endroits la Cōfession d'Ausbourg, & accuse en quelque lieu son maistre Melancthon, à cause qu'iceluy a depraué en plusieurs lieux la Confession d'Ausbourg, & les liures de Luther. En cela Illyricus ne ment pas: veu qu'il n'y a rien plus assuré, que Melancthon a maintesfois desguisé la Confession sus-dicte. Estans doncques tels les ministreaux de Magdebourg, ils s'opposerent opiniaistrement à l'Empereur, & mōstrerēt en cela vne rebelliō trop manifeste.

C E S T E année fut imprimé vn liure, portant le nom du Roy Charlemagne, composé à l'encōtre du Concile septieme, tenu à Nice. Quelque galand, qui se dict Eli Phili, fait vne preface sur iceluy, mais il nous faudroit vn Oedipus pour interpreter ceste enigme. D'auātage il n'y a mention aucune ny du lieu, ny de l'Imprimeur, à fin que le liure, estāt assez suspect de soy mesme, soit tenu pour plus suspect par ce moyen. Ce compaignon d'Eli Phili craignoit, que les Catholiques trouuassent quelque chose, par laquelle le liure seroit prouué estre à faux attribué à Charlemagne. Et c'est ainsi que la desloyauté se parforce par quelque moyē que ce soit, d'alleguer quelque cas contre la foy par fraude, quand elle ne le peut faire avecques verité. Il n'est besoing de discourir longuement sur ce liure, veu qu'il ne fauorise pas beaucoup aux dogmatistes, comme celuy qui confesse, que l'Eglise Romaine a esté preferée sur toutes autres par nostre Seigneur, & qu'il faut luy demander aduis & conseil, quand quelque question est proposée de la foy. Ce que le Roy Charles, à qui on a attribué ce liure, fait par le liure mesme. Car le fait est tel. Au temps que le Concile fut tenu à Nice contre les briseurs d'Images, quelques vns leurent les actes de ce Concile, &, comme il appert, ce que le Concile auoit arresté d'honorer les images, ceux-cy entendoient qu'il leur falloir donner l'honneur deu à Dieu. Au moyen dequoy ils oppugnent ce Concile, estans deceuz en leur opinion, & escriuent 4. liures, lesquels ils dedient à Charlemagne, comme il est vray-semblable. Charlemagne les enuoye au Pape Adrian, pour sçauoir s'ils deuoient estre approuuez. Iceluy les refute tres-bien, comme il appert par vne

*Du liure
des images
attribué à
Charlema
gne.*

*Liure 1.
chap. 6.*

*Poinct no
table pour
le susdict
liure.*

L'Epistre du Pape Adrian. sienne longue epistre escrite à Charlemaigne, laquelle est maintenant inserée és Tomes des Conciles, & l'ay veüe escri-

re fort bien en parchemin, venant de France, combien qu'il y eust quelques ratures. Voyla dōc comme la chose alla. D'a-

Que au Concile de Francfort ne fut rien arresté contre les images. uantage, comment est-il possible, (ce que afferme ce braue Eli Phili) que Charlemaigne ait condamné le Cōcile de Ni-

ce, ou qu'il ait fait escrire quelque chose contr'iceluy, au Cōcile de Francfort, auquel furent presens les Legats du Pape Adrian: veu que les mesmes Legats non seulement assisterent

Impudence des heretiques à citer les auteurs. audi& Concile de Nice, (où l'hōneur des images fut approuu-

ué) mais encor' y presiderent? Tout va bien, puis que nous voyons par escrit les confutations que le Pape Adrian feit du liure dont est question, & on peult voir que ce n'est pas Charlemaigne, qui en est l'auteur. Eli Phili ne se pouuoit garder de ce coup, & partant il a taillé son nom, & celuy du lieu & de l'Imprimeur, de sorte que bien luy conuient ce que di& l'E-uangile, celuy qui fait mal, hait la lumiere. Or Calvin & Illyric se vantent grandement de ce liure, & sont si stupides qu'ils ne s'apperçoient pas, que plus de choses sont en iceluy contenues, repugnantes à leur doctrine, que profitables à leurs opiniōs. Toutesfois c'est la coustume de tous heretiques, que de tous costez ils tirent occasion pour assaillir la sainte Eglise: chose manifeste en cest endroit. Car pour oppugner les images, ils nous veulent faire accroire que ce tres-catholique Prince ait esté quelque briseur d'images: & toutesfois ils ne considerent pas que c'est ce vertueux Roy, qui iadis edifia & fonda richement plusieurs Eueschez, monasteres, colleges, & autres lieux sacrez, lesquels ces pādarts destruisent à present: & si Charlemaigne viuoit, ie m'asseure que leurs sacrileges ne demeureroient impunis. Je vous ay voulu admonnester de cecy en passant, à fin que vous voyez la peruersité de noz heretiques, lesquels estans diametrallement opposez à la religiō de ce grand Monarque Catholique, toutesfois ils se targuent de son nom à l'encōtre de l'Eglise, chose surpassant toute impudence & peruersité. Et quand à ce qu'ils disent, qu'au Concile de Francfort fut condamné le S. Concile de Nice, qui

auoit

auoit approuué les images, c'est vn menfonge si clair & impu-
 dent, que personne ne le scauroit trouuer assez estrange. Car, ^{Probation}
 comme cy-deuant j'ay dict, les Legatz du Pape Adrian assi- ^{mesme que}
 sterent audiect Concile, (lequel Hadrian a refuté ce liure de ^{dessus, fort}
 Charlemagne) & iceux mesmes Legatz auoient presidé au ^{bien faicte}
 Concile de Nice: & n'est pas credible, qu'ils ayent arresté des
 sentences contraires & repugnantes. D'auantage, le decret du
 Concile de Francfort qu'ils alleguent, leur ferme la bouche.
 Car, selon qu'eux-mesmes produysent, il dict ainsi: On a pro-
 posé vne question du nouveau concile des Grecz, lequel ilz
 ont faict à Constantinople, pour adorer les images. Commēt
 est-ce que les heretiques se vantent tant, comment se glori-
 fient ils tant, veu qu'en ce lieu nulle mention est faicte du Cō-
 cile de Nice, ains de celuy de Constantinople: Car vn peu de-
 uant le Concile de Nice, auoit esté tenu vn faux & non legiti-
 me Concile à Constantinople, pour démolir les images, &
 c'est celuy qu'il faut entendre au lieu par nous maintenāt al-
 legué. Bon Dieu que ces compaignons sont vigilans à trom-
 per le monde, si la diuine prouidence ne retardoit leurs des-
 seings. Laquelle maintesfois descouure si bien leurs fraudes,
 que ie ne scay comment ils s'osent monstrier: & est chose di-
 gne d'admiration, que les hommes ne se donnent point gar-
 de d'eux. Ils citent aussi pour eux le tesmoignage de l'Abbē
 d'Vrsperg, mais ils deuoient aussi cōsiderer, que le nom est là
 exprimé non du Concile de Nice, ains de Constantinople.

Nous vous auons déia dict que le Roy Philippe estoit ^{Le Roy}
 venu en Flandres. Ce Prince fait son entrée à Bruxelles fort ^{Philippe}
 pompeuse & magnifique, de laquelle l'Empereur se réioüit ^{festoyé au}
 beaucoup. Dont l'esté suyuant fut employé à festoyer & hono- ^{pays bas.}
 rer ce Prince, pendant qu'il se pourmenoit par les meilleures
 villes, pour leur faire donner le sermēt. La liberalité estoit in-
 credible, de maniere q̄ quelques vns ont remarqué, que ceux
 d'Anuers seulement auoient employé pour luy faire hōneur
 plus de cent trente mille ducatz, & chacune ville s'efforça de
 faire le semblable selon sa puissance. Car ceste contrée est fort
 opulente, & affectionnée à son Prince.

*Entrée du
Roy à Pa
ris.*

CE-PENDANT aussi les François monstroient leur liesse, pompe, & magnificence, quand le Roy & la Roynie feirent leur entrée à Paris, de sorte qu'il n'estoit rien plus requis à vne bonne tranquillité de l'estat Chrestien, sinon que la paix fust confirmée entre ces grandz Princes, l'Empereur & son fils, & le puissant Roy de France. Mais nos pechez estoient si grands, que nous ne meritions pas vne telle concorde, tellement que nous auions besoin d'un fleau pour chastier nos demerites, ce qui aduint par la triste & sanglante guerre, laquelle s'embrasa par-apres entre les Princes sus-dits.

*Seditions
d'Angle
terre, &
l'Admi-
ral mis à
mort.*

EN ce temps les animosités & contentions bouilloient en Angleterre, & semblablement les discords & repugnantes opinions sur le fait de la religion, qui sont les beaux fruits produicts par l'Evangile, que nous ont presché quelques monstrueux esprits en cestuy nostre siecle, pour lequel amplifier tant de gens suent & travaillent aujourdhuy à leur damnation. Mais pourautant qu'ils sont destituez de l'esprit de verité, incontinent ils sont diuisez en maintes factions, chacune desquelles s'efforce d'alleguer quelques lieux de l'écriture, pour amadouer le simple peuple. Combien que la variété qui est entr'eux, les puisse aisément conuaincre de fausseté, veu que telle contrariété ne tombe point sur la verité. Je dy donc que le Parlement Anglois fut contrainct d'vser de main forte pour repri mer les seditions, & furent punis de mort les auteurs d'icelles. Fut mis à mort pareillemēt Thomas Semer, Admiral d'Angleterre, à cause que son frere, qui estoit protecteur du Royaume, & Oncle du Roy Edoüard, le soupçonnoit d'affecter le Royaume. Or tandis que les Anglois estoient en tel discord, le Roy de France s'aydant de ceste opportunité, meit en grād

*Places pri
ses sur les
Anglois.*

*Les Fran
çois pour
les Escos
sois.*

disette ceux qui tenoient la ville de Boloigne, & si print Ambletut & Monlambert, lieux voyzins de ladicte ville, que les Anglois occupoient. D'auantage, pour donner plus d'affaire à l'ennemy, il enuoya vne armée en Escosse, laquelle estant iointe avec celle du Royaume, donna la chasse aux Anglois, si que ayans gaigné vne bataille, ils recouurerent ce que les Anglois auoient conquis sur les Escossois.

LE Roy Henry estant à Paris, feit tref-biē punir quelques ^{Le Roy Henry trefcatholique.} heretiques, & si feit vne procession generale pour impetrer l'ayde diuine. Apres ce, il feit imprimer vn liure, par lequel il protestoit, qu'il vouloit prendre la protection de la Foy Catholique, de l'autorité du S. siege Apostolic, & de tout le Clergé: & declaroit ouuertement combien il detestoit les heretiques de nostre temps, & toutes leurs heresies, partie suscitēes des anciennes, & partie inuentēes par Luther, Carolstad, Zuingle, Oecolampade, Melanctho, Bucer, Calvin, & autres telz apostartz: toutes lesquelles il vouloit chasser de son Royaume, & griefuement punir ceux qui sy estoient aheurtez. Voyla l'esprit Catholique de ce Roy, qui parloit en Roy tref-chrestien: & en ce il s'est monstré imitateur du Roy François son pere, (que Dieu absolve) lequel n'hayssoit rien plus que ces monstreux heretiques. Aussi voyoient bien ces monarques, que les fructs du nouueau Euangile ne sont autres, que troubles & ^{Fructs du nouueau Euangile.} scditios, qu'un mespris des choses diuines & humaines, vne hayne du Magistrat, & plusieurs autres maux horribles. Et pouuons sans mentir appeller toutes Republiques heureuses, esquelles ces fauces opinions ne se sont point encore coulées. Car le temps nous apprendra, comme i'espere, que tout ce qui nous a esté vendu par ces architectes de nouuelle doctrine pour la vraye & pure parolle de Dieu, (titre fort chatouilleux pour nos ames) n'estoit q̄ piperie & choses fardées. Nous vous auons admonesté de cecy assez souuent, amys lecteurs, mais quand nous le dirions mille fois, ce ne seroit chose superflue, pourautant que telles semōces ne sont que prouffitables, & nous r'ameinent à la paix & vnion de l'Eglise, hors laquelle il n'y a point de salut.

A v moys de May Pierre Martyr, moyne renié, & fugitif ^{Dispute avec Pierre Martyr.} d'Italie, disputa avec les Theologiens de l'vniuersité d'Oxford en Angleterre. Les Ambassadeurs du Roy assisterent à la dispute, lesquelz par-apres feirent imprimer certain escript, auquel ils donnoient la victoire audict Martyr. Lequel autrefois auoit semblé consentir à Bucer, quand à la matiere de la Cene, comme ils parlent: mais pour-autant qu'il ne vouloit

L'AN M.D.XLIX. HISTOIRE DE TOUTES CHOSES

plus imiter Bucer, en sa dissimulation & feintise de ceste matiere, il aimo mieulx se monstrier Zuinglien tout d'un coup. Toutesfois Bucer s'en alla aussi en Angleterre, à fin que ce Royaume fust comblé de tout le mal-heur qu'il meritoit.

A v moys d'Octobre ceux de Strasbourg s'accorderent avec leur Euesque, permettant que les Catholiques eussent trois Eglises, & accordans quelques autres choses.

*Mustapha
fils du
grand Turc
se reuolte
contre son
pere.*

CESTE année le fils aîné du grand Turc Soliman s'enfuit en Perse. Cela venoit de ce que Soliman estoit plus enclin aux enfans de sa seconde femme, & sembloit qu'il voulust en preferer l'un à Mustapha l'aîné, estant à ce faire induit par la femme. Dequoy estant irrité Mustapha, s'aydant des troupes des Perses, surprint quelques places des plus proches du Royaume de Perse. Au moyé de ce Soliman avec cinq cens mille hommes luy alla au deuant, & meit les Persans en route: mais pour-ce qu'iceux mettoient le feu par tout, plus de cent mille hommes de l'armée Turquesque moururent de famine, si que Soliman fut contrainct de retourner à sa courte honte.

*La mort
du Pape
Paul 3.
& de ses
maux.*

LE Pape Paul troisiésme âgé de 82. ans mourut ceste année le dixiesme iour de Novembre. Sleidan accoustre ce Pape, comme il faict tous les autres, & à fin qu'il se saoule à mesdire du trespas, il cite un liure Italien d'un nommé Bernardin Ochino, fort iniurieux & calomniateur: de maniere que si nous disions en quelque liure autant de maux des heretiques, comme cestuy en dict du Pape, personne ne le pourroit endurer. Toutesfois il a semblé bon à Sleidan, de farcir son histoire de ce liure, pour plus à son ayse mesdire du Pape decedé. Et certainement ceux qui prennent plaisir à lire telz commentaires, se deleçteroient bien à lire l'Alcoran de Mahometh, & telz autres fattratz, & liures abominables. Ce Pape fut sobre à sa table, & n'y voit point de bobance ny de superfluité quelconque, dont il est venu à telle vieillesse. Et communément ceux qui s'addonnent aux esbarz de Venus, à faire grand' chere, & à viure fort delicieusement, à grand' peine paruiennent-ils à une si grande vieillesse, qu'estoit la sienne.

D'auantage le Pape sus-dict estoit fort sage & bien experimenté, & si estoit bien voulu & chery d'un chascun : de sorte qu'il deliura l'Italie de guerres, & la pacifia si bien, qu'il a esté appellé pere de la patrie, bon pasteur, & bon à la Republique.

L'AN 1550. La Messe fut celebrée à Strasbourg en trois ^{La Messe de nouue- au chantée à Stras- bourg.} Eglises, ce qui n'auoit esté fait vingt ans y auoir, & ce fut le propre iour de la Purification. En quoy descriuant Sleidan fait du plaissant, & à voir la description qu'il fait des ceremonies Ecclesiastiques, vous diriez que c'est vn Turc ou Tare qui parle. Or le mesme iour suruint vn nouveau trouble pour quelque occasion, & fut la chose si perilleuse, que le seruice diuin ne continua point deslors, iusqu'à la Pentecoste. Car la plus part des bourgeois detestoient le Clergé, & n'estimoient nō plus toutes les ceremonies Ecclesiastiques, qu'une pure Idolatrie: mais au contraire, vne horrible & incestueuse paillardise de Bucer, les blasphemés contre la S. Eucharistie, vne confusion plus que Babylonique de toutes choses tant diuines que humaines, c'estoit cela qui leur sembloit estre le pur Euangile. Ce qui nous apprend à ne trouuer point si difficile, ce que nous croyons que l'Antechrist doit faire en son temps. S'il doit auoir plusieurs adherans à son impieté, aussi ont nos nouueaux dogmatifans force gens, qui embrassent leurs opinions à l'enuy: & ce de telle sorte, que quelques vns ont osé escrire, qu'il ne faut point adorer Dieu, ny l'inuoquer à nostre ayde. Et c'est la sentence d'Ochin, sentence si abominable, que l'Antechrist n'en pourroit dire de pire. D'auantage ^{Blaspheme d'Ochin.} ceux qui abominent la S. Messe, & ne veulent souffrir que nous adorions Iesus-christ en l'Eucharistie, ne sont gueres plus tolerables, que ceux-là.

PAIX se fait entre le François & l'Anglois. Les François recourent Boloigne, pour laquelle ilz payent certaine ^{Paix entre le François & l'Anglois.} somme d'argent à l'Anglois. Plusieurs se sont esmerueillez comment les Anglois auoient voulu rendre Bouloigne. Tant y a, que pour confirmer d'auantage la paix, le Roy de Frâce print l'ordre d'Angleterre, & l'Anglois l'ordre de France.

L'AN M.D.L.

HISTOIRE DE TOUTES CHESOS

*Edict con-
tre les Lu-
theriens.*

LE Parlement de Bourdeaux fut r'estably ceste année au mois de Ianuier. L'Empereur en ce temps fait vn terrible edict à l'encontre des Lutheriens, qui pourroient estre en ses terres paternelles : mais premier que l'edict fust publié, il partit pour se trouuer à la iournée d'Ausbourg, avec son filz Philippe, menant avec soy le Duc de Saxe. Car quand au Lantgrauue, il fut laissé à Malines, ville bien forte en Brabant.

*Le Pape
Iules troi-
siesme.*

LE 7. iour de Feurier au lieu du Pape Paul n'agueres dece dé, fut esleu Iehan Marià de Monté, qui fut nommé Iules troi-siesme. Plusieurs hommes estoient allez de ce temps à Rome à cause du Iubilé, lesquelz, sans faire cas des blasphemés de Luther & ses semblables, visitoient les saintz lieux de Rome, & festudioient à estre participans des indulgences, par lesquelles on reçoit remission de la peine du peché. Je sçay bien que Luther, & ceux qui sont forgez à mesme coing, n'ont point affaire d'indulgences, à cause que, s'asseurans sur leur droicte foy, ilz s'en vont le droict chemin en Enfer. Or on pourroit dire plusieurs choses des indulgences, combien qu'on n'en sçauoit assez dire pour ces mescreans. Toutesfois filz daignent ouir, ie diray ce que le S. Concile de Trente en a ordonné, parlant ainsi en la session 25: Veu que Iesus-Christ a donné la puissance à l'Eglise de conferer les indulgences, & attédu que de tout temps icelle Eglise a vsé de ceste puissance à elle concédée diuinement: le Sainct Concile enseigne & commande, que l'vsage des indulgences est fort salutaire au peuple Chrestien, anathematissant ceux qui afferment icelles estre inutiles, ou que l'Eglise n'a la puissance de les concéder. Les Catholiques se contentent de cela: mais les sectaires n'ont affaire de cela ny d'autres choses, ains iront où ils sont dignes d'aller, avecques leur foy seule. Sleidan ne se prent pas seulement au Pape dece dé, mais bien encor' au Pape Iules, tellement q nous cognoissons bien qu'il parle d'affection & animosité. Pour le moins il deuoit respecter la honte du lecteur, s'il ne vouloit respecter la dignité de celuy qu'il repréd. Mais nous sommes en vn si malheureux temps, que ceux qui sçauent mieux calomnier le S. Pere, sont ceux qui sont les mieux venuz.

*Calomnie
de Sleidā.*

LE 26. iour du moys de Iuillet, l'Empereur commença la ^{Journée} Diette à Ausbourg, laquelle Sleidan dict pareillement auoir ^{d'Aus-} esté faicte en armes, pourautant que l'Empereur insistoit à ^{bourg.} quelques choses, lesquelles aucuns galans ne vouloient pas. Or le Prince Maurice, qui par-auant s'estoit souzmis à l'Em- ^{Du Prin} pereur, enuoya ses Ambassadeurs à ceste iournée, par lesquels ^{ce Maurice} il protestoit, qu'il ne receuroit point le Concile de Trente, si les Theologiens de la Confession d'Ausbourg n'y auoient puissance de definir, & que au preallable le Pape ne presidaist point en iceluy. Or auoit ledict Maurice aprins cela des nouueaux Theologiens. Car comment pourroient ceux qui sont condamnez de maintes heresies, auoir voix au Concile? Qui a iamaïs ouy telles absurditez? Il semble que Maurice tramoit déia la guerre contre l'Empereur, de laquelle nous parlerons cy apres.

SVR la fin du mois d'Aoust, alla de vie à tréspas Granuel- ^{Treſpas de} le, qui ia par vingt ans auoit esté le plus aduancé en la Cour ^{Grâuelle:} Imperiale. Antoine son fils (homme de grande erudition, lors ^{& de son} Euesque d'Arras, & depuis Archeuesque & Cardinal de Malines) succeda à son office, lequel pareillement estoit fort es- ^{fils.} bonnes graces de l'Empereur, & l'a esté du depuis enuers le Roy Philippe, pour sa merueilleuse prudence, à bien & dextrement conduire les affaires.

EN ce temps le Vice-roy de Sicile print d'affault la ville ^{Prise de la} d'Afrique en Barbarie, tenue par vn braue & renommé Cor- ^{ville d'A-} faire, nommé Dragut, qui escumoit si fort toutes les mers, qu'on ^{frique par} ne pouuoit l'endurer plus longuement. Les Imperiaux prin- ^{les Impe-} drent en celle ville, & emmenerent quant & quant environ ^{riaux.} huit mille esclaves, dont Solymán fut merueilleusement irrité, & fut cecy cause qu'il proietta de faire nouuelle guerre, à cause que Dragut s'estoit retiré à luy. L'Empereur ayant osté de ce lieu-cy tout ce qu'on pouuoit mettre es nauires, abbatit la ville d'Afrique rez de terre, pourautant qu'il sembloit, que la garnison qu'on y pouuoit mettre, ne seruiroit pas de beau-
coup.

PAR EILLEMENT en ceste saison ceux de Magdebourg

*Deffaite
et siege de
ceux de
Magde-
bourg.*

receurent gros dommage de George Duc de Megelbourg, & furent vaincuz en bataille, non sans grâd carnage, outre ceux qui furent prins, & outre les artilleries, chariots, & tous instrumens militaires qu'ils perdirent. Laquelle victoire estant obtenue sur ceux de Magdebourg, plusieurs se meirēt à leur faire bonne guerre, entre lesquels furent le Prince Maurice, l'Electeur de Brandebourg avec son cousin Albert, & aussi Henry de Brunswic: de maniere que la ville fut assiegée le 4. iour d'Octobre. Semblablement les Estats de l'Empire promeirēt secours pour ceste guerre, & en fut donnée la sur-intēdence à Maurice. On decerna pour les fraiz de la guerre soixante mille escus par moys, & cent mille pour les fraiz ia faits.

*Une partie de la
ville de
Magde-
bourg est
prise.*

Sur le commencement du mois de Novembre le Pape Iules, qui auoit succédé à Pape Paul 3. publia ses patentes pour continuer le Concile à Trente, & commanda que chacun à qui appartient d'y assister, s'y trouuast au commencement du mois de May. Et ce-pendant Maurice fait son deuoir contre ceux de Magdebourg, lesquels il endommage grandement, de maniere qu'il s'empara de la ville neufue, (car ceste ville est diuisée en trois) où il y eut grande tuerie des citoyens. Neantmoins il practiquoit tousiours avec celui de Bradebourg, de faire sortir le Lantgraue de prison. Ausquels l'Empereur respondit, que tant luy, que ses enfans & Conseillers se portoiēt de telle façon, qu'il ne pouuoit estre encore deliuré. Et d'auantage l'Empereur soignoit bien fort, à ce que son Edict de la religion fust entretenu par tout: de sorte qu'il sembloit, que toutes choses pouuoient estre reduites en Alemaigne en leur premier estar, veuë la felicité de l'Empereur, si la guerre de France n'y eust porté grand empeschement, de laquelle il fera parlé cy dessouz.

*Le Lant-
graue des-
seigne de
fuir, dont
mal luy en
vint.*

Le Lantgraue se faschāt de garder si long temps la prison, proietta de fuir, avec ceux qu'il auoit fait venir de Hesse, chose toutesfois pleine de peril, à cause q̄ les Espaignols y auoiēt tousiours l'œil. Non-obstant il s'en trouua deux, qui luy promeirent merueilles. Iceux doncques apprestērēt des cheuaux legers, par tous les lieux par lesquels on passe de Hesse iusqu'à Malines:

Malines: tellement que la chose estoit preste de sortir son effect, quand le Capitaine Espagnol en fut aduerry: & comme on vouloit fuir, deux des gens du Lantgraue furēt massacrez, quelques autres, qui furent prins, ne vescurent gueres apres, & le Lātgraue mesme fut tenu plus de court. L'Empereur scachant ces desseings, fut fort indigné du faict.

ON tient qu'à la iournée d'Ausbourg l'Empereur tascha fort de faire avec son frere Ferdinand, que son fils Philippe fust Roy des Romains: mais neantmoins il ne s'en fit rien. Le ne doute pas que l'Empereur, voyant la puissance de son filz & ses terres, ne voulust l'aduancer pour le bié de la Chrestienté, veu que grande puissance est requise pour faire teste au Turc & aux autres ennemys de l'Empire. Toutesfois ie ne vous scauroy dire pourquoy Ferdinand n'y voulut pas consentir, & ne deuons point nous enquerir si auant du desseing des Princes.

L'AN 1551. Osiander controuua de son cerueau vne nouvelle doctrine de la iustification, au pais de Prusse, à scauoir q l'homme Chrestien doit estre iuste de la mesme iustice, de laquelle Dieu est essentiellemēt iuste, & que ceste iustice est plantée dans l'homme. Au moyen dequoy, combien qu'il fust bō champion des Lutheriens, si est-ce que plusieurs predicās des grands Princes & des citez Lutheriennes escriuirent contre luy, mais de sorte qu'ils disent force iniures à Osiander, cōme Osiander en dict à eux par contr' eschange, & principallemēt à ceux de Vvittemberg, & à Melancthon sur tous. Voyla comme nos freres Euangeliques ne se contentās pas d'auoir troublé l'Eglise, ne cessent de s'entr'iniurier & calomnier. Or iaçoit que Osiander eust tant d'Euāgeliques, qui se formalisoiet contre luy, si est-ce qu'il attira de son party Albert Maistre de Prusse, lequel bannit de ses terres les aduersaires d'Osiander, desquelz Ioachim Merlin estoit l'vn. Qui dōcques ne se mocquera dequoy ces Euangeliques transforment si souuent leur doctrine en diuerses especes, & icelles si fort contraires entre elles mesmes? Le plus deplorable est, que ce pendant qu'ilz sont ainsi aheurtez l'vn contre l'autre, le simple peuple est se-

*Le Roy
Philippe
ne peut e-
stre Roy
des Ro-
mains.*

*Osiander
forge vne
nouuelle
doctrine
de la iusti-
ficatio: &
trouue des
opposans
Lutheriens.*

duict & est mal-heureusement conduict à damnation.

*De la
mort &
vie de Bu-
cer.*

LE 27. iour de Feurier alla de vie à trespas en Angleterre le galand Bucer, moine renié, & qui s'estoit marié trois fois, quoy qu'il fust prestre. Quelque homme de grand' autorité & erudition m'a dict qu'il auoit esté Iuif, & que ayât quelques fois tenu l'enfant de quelque femme, il le circoncist. Toutes-fois ie ne puy pas vous asseurer de la verité du faict, à cause que celuy qui me l'a communiqué, disoit le sçauoir seulemēt par ouir dire. Tant y a que Bucer a esté vn des meschans apostatz, qui ayent vescu de nostre tēps. Et ne puy escouter ceux qui afferment, que ce compaignon estoit fort desireux d'une paix & pieté, en quoy disant, ilz se mōstrent n'estre gueres bōs Catholiques, & ne se soigner pas beaucoup de la pieté. Si ce galand eust eu la moindre flammesche de pieté en son cuer, il n'eust iamais osé se monstrier deuant les gens de bien, apres auoir commis des faictz si ordz & horribles, comme quand il se maria apres auoir faict vœu de continence. Le leur cōcede bien, que peu de predicans du nouueau Euangile sont parangonnables à Bucer, quand à estre fin & rusé. Il s'est grandemēt parforcé à semer sa fauce doctrine par le diocese de Coloi-gne, & auoit déia le chemin bien defriché, si Dieu n'eust reduict en fumée tous ses effortz. Chacū parloit qu'il estoit mort fort horriblement, mais pour-ce que cela n'est assez manifeste, ie ne l'escriray point.

*Miracle
d'un Cru-
cifix.*

LE 14. iour de Mars, comme le sermon se faisoit en la ville de Bernbourg, aduint vn grand miracle, sçauoir est que le Crucifix de bois sua par quatre heures, & quoy que quelques vns en ostassent incontinent la sueur, neantmoins elle reuenoit encore plus fort. Veritablement en cestuy nostre siecle plusieurs telz miracles sont aduenuz, lesquelz pourroient suffire à nous persuader, qu'on ne doit pas faire si cruelle guerre aux images, comme l'on a faict de nostre temps : mais les meschans sont endurcis. Ilz pensent faire vn acte fort Euangelic, quand ilz auront osté toutes les images & de Iesus-Christ & de ses Sainctz, & ne s'en soucient point, encore qu'en cela ilz imitent les Iuifz, les Turcs, & autres Mahometains : mais

c'est vn moyen pour preparer la voye à l'Antechrist.

CESTE année deceda à Paris Robert Vvaucop Escossois, <sup>Deux a-
ueugles
tresdoctes,
vn nouue-
au, l'autre
ancien.</sup> lequel auoit esté aueugle des ses premiers ans, & non-obstant il estudia si bien, qu'il passa docteur en Theologie. Puy il fut prestre à Rome, & peu apres Archeuesque d'Armacan en Irlande, & Legat du Pape au temps de Iules 3. Il fut aussi present au concile de Trente. Sainct Hierosme faißt ample mention de Didyme d'Alexandrie, lequel il appelle son voyant. Il auoit esté aueugle toute sa vie, & neantmoins estoit venu fort docte, & si scauoit parfaitement la Geometrie, combien qu'il semble, que ceste science ne se puisse apprendre sans auoir bonne veüe.

EN ce mesme temps le Roy Henry reçeut en sa sauuegar- <sup>Garnison
françoise à
Parme,
vraye sour-
ce des guer-
res.</sup> de & protection Octauian Farnese, & meit dedás Parme garnison Fräçoise, malgré le Pape & l'Empereur. Ce qui a esté la source de la trescalamiteuse guerre, par laquelle l'Alemaigne, voire mesmes toute l'Europe, a esté empeschée de se remettre en son premier estat. Car le Pape implora le secours de l'Empereur contre Farnese, & ne peut l'Empereur luy denier ceste ayde, à cause que pour lors Parme appartenoit aux Papes.

SVR la fin du mois de May le Roy Philippe partit d'Ausbourg, & print la volte d'Italie, & de là la route d'Espaigne, accompagné de Maximilian, lequel auoit esté appelé à la iournée par l'Empereur son Oncle, & son pere Ferdinand.

LE 26. iour d'Aoust fust enchargé aux predicans d'Aus- <sup>Les predi-
cans chas-
sez.</sup> bourg, & ce par le commandement de l'Empereur, de vuyder la ville dans trois iours, & que desormais ilz n'eussent à prescher dedans les terres Imperiales. D'auantage fut commandé de ne faire aucun exercice de religion Lutherienne dans Ausbourg. Le pareil fut faißt à ceux de Meming, & à autres par le país de Suaube. Il y auoit vn maistre predicant entre autres, la garse duquel estoit presté à acoucher: au moyen dequoy il requist, qu'il luy fust loysible d'aller voir sa femme. Alors l'Euesque d'Arras se tournant à ceux qui là estoient, ce galád, dit-il, appelle vne putin sa femme. Chose par trop veritable. Car que scauroit-on moins dire des femmes, lesquelles s'aban

Ccccij.

donnent aux prestres ou aux moines ? Ce bannissement des ministres feit belle peur à tous les autres, craignans que la pareille ne leur aduint, & peu s'en fallut que lors le peuple ne retournast au vray chemin, duquel il s'estoit foruoyé. Or comme chacun estoit en ce tremblement, le Roy de France commença à guerroyer l'Empereur, & puy Maurice se ligua avec le Roy, recognoissant mal les biés & plaisirs que l'Empereur luy auoit faictz. Ceste guerre du Roy de France & de Maurice matta bien fort les forces de l'Empereur, principalement pour-ce que Maurice faisoit du bon seruiteur enuers l'Empereur par semblant, & le Roy Henry se hastia fort à cōmençer la guerre. Toutesfois ce Roy tres-chrestien ne laissoit pas à punir fort griesuement les Lutheriens & autres heretiques, qui se trouuoient en son Royaume.

Tripoly prise. Nauires des marchandz prises par les François, & par quelle ruse EN ce temps l'armée Turquesque n'ayant peu prendre la forteresse de Malte, força la ville de Tripoly en Barbarie. Sēblablement quelques nauires de Flandres & Brabant furent prises par les François, & quelques villes de Piedmont par iceux mesmes. Car, pour dire ce qui en est, le Roy estoit oultrément fasché, dequoy l'Empereur aydoit au Pape contre Ottauia, lequel il auoit prins en sa sauuegarde. Toutesfois l'Empereur monstra ses raisons par vn escrit public. Or ce que nous auons dict des nauires prises, est tel. Il y auoit vingt & deux nauires chargées de marchandise, lesquelles singloient de Flandres en Espagne. Poulin, vn vaillant François, certioré de cecy par vne nef qui alloit decouurer sur mer, se ioint ausdictz nauires, disant qu'il menoit en ses nefz la Roynne d'Escocce, & partant les prioit, que selon la façon ancienne & receuë, ilz la saluassent à coups de canon. Les marchandz font cela sans se faire tirer l'oreille. Et lors il se rua aysément sur les nauires, pour-ce qu'elles estoient desarmées, tellement qu'il ne s'en sauua que neuf, & ledict Poulin amena toutes les autres à Rouën, lesquelles estoient estimées valoir cinquens mille escutz, ce qui reüssit au grand dommage des marchandz.

LE premier iour de Septembre le Concile de Trente cō-

mença à continuer. Les trois Archeuesques Electeurs d'Allemagne y estoient presens, asçauoir de Maience, de Coloi-<sup>Continua-
tion du
Concile.</sup>gne, & de Treues, & quelques autres prelatz Alemãs. Le Roy de France y enuoya son Ambassadeur, & s'excusa enuers les peres du Concile, pourquoy à ceste fois il n'auoit pas permis, que les Prelatz de son Royaume se trouuassent à Trente. Ce qui procedoit de la guerre de Parme, mais en tout cela le Roy protestoit par son Ambassadeur, qu'il estoit syncerement Catholique, & qu'il le seroit à tousioursmais. A là verité ce Roy a<sup>Religion
sincere du
Roy Héry</sup> esté vn vray pilier & soustien de la foy Catholique tant qu'il a vescu, & si Dieu luy eust donné plus longue vie, ie croy que les heretiques n'eussent pas accoustré son Royaume de telle façon, qu'ilz ont faict luy estant allé de vie à trespas. Car mesme de ce temps, auquel il sembloit auoir vne dent de lait avec le Pape pour la guerre de Parme, il fit vn terrible edict pour punir les Lutheriens, & si donnoit gros guerdon à ceux qui les decelerioient.

Les rebelles de Magdebourg, se voyans assiegez y auoit<sup>Ceux de
Magde-
bourg se
rendent.</sup> ia long temps, au mois de Nouembre parlerent de se rendre avec telles conditions: Qu'ilz se souzmettront à l'Empereur, ne feront rien preiudiciable à la maison d'Austriche & de Bourgongne, se rangeront souz Messieurs de la Chambre, obeiront au dernier decret d'Ausbourg, payeront cinquante mille escuz pour les fraiz de la guerre ia faicte, donneront à l'Empereur les douze plus grosses pieces de canon qu'ilz ayent, & quelques autres conditions assez griesues. Or Sleidan presche icy leur constance, disant qu'ilz ont esté grandement louangez en toutes nations estranges, pour auoir si brusquement resisté à l'Empereur & à tout l'Empire. Mais ie croy<sup>Finesse de
Sleidan.</sup> que peu d'hommes sont si folz, qu'ilz vueillent louër ceux, lesquels estans bannis de l'Empereur à cause de leur rebellion, induysent les autres à se souzleuer. Mais c'est Sleidan, qui, en narrant vn tel faict à leur auantage, veut induyre les autres à les imiter. Maurice doncques remeit Magdebourg en la puissance de l'Empereur, & en la sienne, & y ayant laissé bonne garnison il partit delà.

*On moyen
ne l'accord
du Lant-
graue.* Si requirent humblement Maurice, l'Electeur de Brandebourg, & plusieurs autres Princes, partie par lettres & partie par Ambassadeurs, qu'il pleust à l'Empereur de deliurer le Lantgraue. L'Empereur doncques, qui n'auoit rien entendu de la ligue de Maurice faicte avec les François, & de tous les desseings d'iceluy, (tant finement Maurice auoit conduict ses affaires) respondit qu'il attendoit tous les iours Maurice, & qu'à sa propre personne il parleroit de cecy si à bon escient, qu'il pourroit voir combien il estimoit leurs demandes. Vn peu apres Guillaume, filz du Lantgraue, vint à Maurice, & dist que ceste responce de l'Empereur estoit douteuse: & que cependant son pere se consumoit en l'ordure de la prison, (mais ie croy que l'Empereur n'estoit pas si cruel, que cela) partant il le prie de secourir son pere. Maurice doncques, qui auoit fort bien celé ses desseings, ouy qu'il eut ceste responce de l'Empereur assez commode, se resolut de faire guerre, & n'attendoit que la bonne saison de ce faire. Il auoit déjà ceux qui auoient assiégué tousiours Magdebourg, avec lesquelz il ioignit ceux qui auoient defendu la ville, lesquelz hyuernoient par la Thuringe, & incommodoient fort les Ecclesiastiques, & signamment celuy de Maience, dont les trois Electeurs penserent de retourner à leurs maisons.

*Guerre cō-
tre l'Em-
pereur par
les Ale-
mans.* L'AN 1552. la guerre des Alemans à l'encontre de l'Empereur cōmença, à cause que Maurice se sentoit vn peu supporté du costé du Roy de France. Or l'Empereur n'estoit encor' asscauanté de l'entreprise de Maurice, comme celuy qui luy offroit tout son seruice par ses Ambassadeurs, & auoit enuoyé deux siens Ambassadeurs au Concile: & d'auantage faisoit accroire à l'Empereur, que c'estoient les gens d'armes qui se souzleuoient pour n'auoir reçu leurs gages. Ce qui denigre fort l'honneur & renommée de ce Prince, auquel l'Empereur estoit monsté fort affectionné. Car pour la deliurâce du Lantgraue, il n'estoit point besoing de faire vne si sanglante guerre, par laquelle plusieurs Princes d'Alemaigne ont beaucoup enduré, maintes citez ont esté affligées, & signamment Noréberg, à laquelle Albert de Bradebourg, ligué avec Maurice, a apporté

*Combien
pernicieuse
elle a esté.*

si grād dōmage, qu'à peine le pourroit-on croire: & finalemtē ceste guerre a esté cause, que Maurice y a perdu la vie, en la fleur de son âge. S'il eust parlé à l'Empereur, comme il auoit promis de faire, & l'Empereur le requeroit, sans point de faute il eust fleschy son courage, & eust plus aisément deliuré le Lantgraue. Mais ie voy biē: ce n'estoit pas la captiuité du Lantgraue seulement, qui l'incitoient à guerroyer l'Empereur si à l'improuiste, mais bien encore l'instance, qu'en faisoient les ministres dogmatifans.

OR estant venuës les nouuelles à Trête que la guerre commençoit, les Peres du Concile s'escoulerent peu à peu, pourautant qu'il estoit impossible de disputer de la religion en tel trouble: & par ce moyen tous les efforts, fraiz & labeurs de l'Empereur furent aneātis par ceste guerre. Maurice dōc-
Le Concile intermis.
 ques tenoit déjà la campagne avec ses gens, & deuant toutes choses il escriuit aux Estats de l'Empire, exposant ce qui l'auoit occasionné à se souz-leuer, & dōnant des attaintes courtes à l'Empereur, lesquelles n'auoient aucune place en ce Prince. Tellement que ie croiroy facilement, que le Seigneur Maurice ne composa pas ces lettres, ains quelque ministre & apostat, comme seroit bien Melancthon, & principalement quand à la premiere partie d'icelles. En la seconde il traite du Lantgraue, où de rechef il attribue à l'Empereur vne ambition desmesurée. Mais en verité quand il tient tel langage, il semble reprendre la trop grande clemence de l'Empereur: de laquelle fil n'eust point voulu vser, sans faute il luy eust esté bien aisé, d'imposer tel ioug aux Alemans, qu'ils n'eussent pas si facilement secoué. Il faut donc dire, que ceste marchandise est sortie de la boutique d'un des apostats, qui nous veulent faire accroire, que l'Empereur ait esté quelque ambitieux. Comme si l'Empereur Charles, & à present son fils Philippe Roy d'Espaigne, n'auoit eu vne si grāde & ample Monarchie
Maurice veut faire trouuer bō ne la guerre par luy intentée.
 es terres neuues, qu'à peine toute l'Europe y seroit parangō-
L'Empereur n'a point esté ambitieux
 nable. Puis apres il louē le Roy de France, avec lequel il confesse s'estre ligué, & dit que l'Empereur auoit proietté de faire le Roy tres-pauvre. Ce qui n'appert nullement, & qui lira les

gestes de l'Empereur, il ne le verra point. Mais, comme j'ay dict, Maurice escriuoit par vne plume empruntée.

*Albert
escriu cōtre
l'Empe-
reur.*

** sçauoir
est du Duc
de Saxe
qui l'auoit
pris.*

*Louys
d'Auila
historien.*

ALBERT de Brandebourg publia pareillement quelque escript, & iceluy estoit confederé avec Maurice, & auoit esté deliuré de prison * par l'Empereur. En cest escript il dit entre autres choses, que l'Empereur auoit fait venir en Alemaigne des forces estrangeres, lesquelles faisoient mille maux par le país, & exerçoient toute sorte d'insolence. Or si cela appartient plustost aux forces estrangeres, qu'à Albert mesme, qui a si diuersement affligé l'Alemaigne, plusieurs belles contrées le pourroient tesmoigner assez. D'auantage il donne force pinfades aux commentaires, que Louys d'Auila Espagnol a escrits de la guerre d'Alemaigne, & appellé iceluy Louys mēteur & meschant: iniure certes qui ne conuient nullement à l'auteur. Car combien que ledict Louys accuse quelquesfois Albert de negligence, & mesmement au temps qu'il fut prins, toutesfois il dict ailleurs beaucoup de bien & d'honneur de luy: & afferme, que l'Empereur fut grandement esiouí, quand il le veit sorty hors de prison, & qu'il le guerdonna bien honnestement.

*Le Roy cō-
tre l'Em-
pereur.*

*De l'escri-
t du Roy.*

SEMBLABLEMENT le Roy de France fait courir certain escript, qui exposoit les causes qui l'induisoient à entreprendre ceste guerre. De maniere que les armées estoient ia prestes & bien en conche de tous costez, que l'Empereur n'auoit encore rien de prest. Ce que veritablemēt est bien grief à l'esprit humain, & lisons que plusieurs se voyans estre tombez en des perils & inconueniens si inopinez, beaucoup moins que cestuy-cy, sont morts d'apoplexie ou de quelques autres maladies: si bien qu'il est assez vray-semblable, que ces algarades ayent bien fort accourcy les iours de l'Empereur, tout ainsi que nous voyons que les entrepreneurs ne vescu-
rent guerres apres. Cest escript du Roy de France fut imprimé en langue vulgaire, & tout au commencement d'iceluy estoit peinct vn bonnet entre deux poignards: & au dessouz estoit le tiltre du Roy, qui s'appelloit restaurateur de la liberté d'Alemaigne & des Princes captifs. Quelques vns disent que ceste
deuise

deuise a esté trouuée en certaines pieces anciennes, & que d'icelle vserent ceux qui assassinerent Iules Cesar. Les historiens pareillement font mention, que les serfz estoient appelez au bonnet, c'est à dire à la liberté, laquelle est demonstree par vn bonnet. Plusieurs s'esmerueilloient comment le Roy entreprenoit ceste guerre. *

POVR SVYVANT doncques Maurice avec ses compaignons, s'empara de plusieurs villes d'Alemaigne, deposa les Magistratz establis par l'Empereur, & en institua de nouueaux: & ne se contentans de cela, se faisoient donner de l'argēt & des pieces d'artillerie. Et puyz dites que c'estoit remettre l'Alemaigne en liberté, veu qu'ilz n'estoient pas Seigneurs d'icelles villes, ains faisoient la guerre à leur Prince, de maniere qu'ilz prindrent la ville d'Ausbourg, pource qu'il y auoit bien petite garnison. Ce pendant le Roy Henry avec vne armée fort belle, s'empara des villes de Toul, Verdun & Metz, occupa la Lorraine, & enuoya le Duc, qui n'estoit aagé q̄ de neuf ans, en France. On dict que ceux de Metz se trouuerent bien estonnez d'une telle mutation, & non sans cause, (comme aucuns estiment) veu qu'ilz auoient trop legerement presté l'oreille à la doctrine Lutherienne. Et voyla comment trois Eueschez vindrent lors en la puissance des François, à ce aidez par les Alemans mesmes. Il semble que le Roy voulut gaigner la ville de Strasbourg, mais ce fut en vain. Maurice chagea à Ausbourg tous les Senateurs, illec installez par l'Empereur, & remeit les anciens, quāt & les bendes des mestiers. Apres ilz meirent le siege deuant Vlme par six iours, mais tous leurs effortz ne seruirent de rien: combiē que Albert de Brandebourg brussa grande partie des villages & petites villes d'aupres Vlme, & si en tira de l'argent. Ceste ville d'Vlme est fort belle & puissante, située en la contrée de Suaube, & neantmoins il appert que iadis Charlemaigne la donna au monastere, qu'on appelle maintenant Auge la grāde. Et afin que le lecteur puisse voir le soing qu'auoiēt les anciēs Empereurs, Roys, & Princes à edifier les Eglises & monasteres, & à fōder de bonnes rentes pour iceux, il m'a semblé bon d'insérer icy

Dddd.j.

*Maurice
s'empare
des villes
d'Ale-
maigne.*

*Le Roy
prēd Metz,
Toul, &
Verdun.*

*Vlme as-
siegee par
Maurice.*

Lettres de Charlemaigne, par lesquelles il donne la ville d'Vlme: ce que l'auteur met icy par occasion.

vn fragment des lettres de Charle-maigne, par lesquelles il dōne ladicte citē d'Vlme au monastere cy-dessus nommē: en quoy nous verrons vne plus singuliere pietē qu'auoient ces bons anciens, que n'est la deuotiō des apostairz d'aujourd'hui à destruire & piller les monasteres. S'ensuit donc la teneur du dict fragment: Charles par la grace de Dieu Empereur, à tous ceux qui ces presentes verront, salut. Si maintesfois nous appuyons les lieux des saintz monasteres, de peur qu'ilz ne tombent, & si en les appuyant nous les enrichissons, non seulement par cela nous nous rendons Dieu propice, ains encore confirmons l'estat de nostre Royaume. Sçachent doncques tous presens & à venir, que nous donnons & octroyons nostre ville Royale d'Vlme, (pour le salut de mon ame & de celle de mes parens) avec toutes ses appartenances & dependences, au monastere, lequel est edifié & basti en vne Isle, laquelle est en Alemaigne, & s'appelle Sintlertefune, auquel dict monastere est maintenāt Abbē le venerable Hetton: & ce, afin que les religieux de ce lieu, qui ne cessent de prier Dieu iour & nuict, puissent impetier la misericorde de Dieu pour nous par leurs prieres & supplications, pendant que nous leur donnons honestement leurs necessitez. Et à fin que le susdict Hetton puisse desormais vacquer plus libremēt au seruice de Dieu, avec ses moines qui sont en ladicte Isle, sans point se soigner des choses de ce monde, nous, à ce consentant l'Abbē & ses religieux, constituons nostre bien-aimé cousin Adelbert, aduocat & protecteur en icelle citē d'Vlme, &c. Faict & passé l'an

Par incident l'auteur faict vn discours des moines & monasteres, non inutile.

de grace 813. Par lesquelles nous pouons cognoistre en passant le mensonge de nos heretiques, qui disent que les monasteres au temps passé estoient des escholes, esquelles les enfans des Chrestiens estoient enseignez. Car iagoit qu'en quelques monasteres y eust des moines doctes, qui enseignoient aux ieunes religieux les lettres tant diuines que humaines, toutesfois la principale occupation qui estoit aux monasteres, estoit de vacquer aux exercices spirituelz. Il me desplaist de vous exposer en ce lieu, combien sottement quelques vns de nos heretiques ont parlé des monasteres. Certain hōme nom-

mé Guillaume Raden a escrit vne epistre dedicatoire sur la Chronique de Iehan Trithemius Abbé, en laquelle il tasche de hault-louer cest Abbé, mais ce-pendât il vse de quelqs traictz fort mal cōuenans à la loüange: & si ie n'estoy point cōtrainct d'vser de grande briefueté, ie monstroy les sottises & follies de ce maistre cōpaignon, qui pense estre bien fort Euangelic. Il dict qu'il appert assez, que iadis les monasteres estoient des escholes Chrestiennes, esquelles la ieunesse estoit enseignée en toutes bonnes lettres & mœurs, iusqu' à l'aage plus parfait. D'avantage il estime, qu'iceux ayant esté deüement instituez, auoient puissance de s'en aller où bon leur sembloit: car il adiouste, lesquelz monasteres sont à present des prisons moult tristes. Mais l'asnerie du galand est assez refutée, par la Chronique mesme, de laquelle il nous veut rembarrer. Car ceux qui estoient enseignez és monasteres, auoient desia fait, ou deuoient faire profession de vie religieuse, combien qu'il peut estre, que quelques enfans des maisons honnestes estoient illec admis, à fin que viuans avec les religieux ilz apprinsent la pieté quant & les lettres. Mais ilz n'estudioiēt pas de telle sorte, qu'ilz ne feissent nulle autre chose. Ains au cōtraire, ce refuseur-cy pouuoit apprēdre des reigles de S. Benoist, (des moines duquel Trithemius parle principalement) q̄ les religieux ne pouuoient rien faire premier que les heures & autre serui-ce diuin ne fussent paracheuées, si cela n'estoit permis à quelcun pour quelques iustes occasions. Parquoy le principal but des monasteres estoit, qu'on vescuſt en iceux, selon les reigles de la vie monastique, en chasteté, pauureté & obediēce, qu'ō vaquast aux loüanges de Dieu, & qu'on emploiaſt tout le tēps religieusement, & ce selon les reigles & ordonnances du monastere. Lesquelles choses ces regnardz-cy appellent vne prison moult triste, ce qu'ils ne diroient s'ilz auoient vn brin de pieté Chrestienne. Car ceux qui se sont exercez en la vraye pieté, cognoissent quelle liberté & ioye spirituelle est engendrée par ce renoncement de sa propre volōté, & quelle misere c'est de suyure sa volōté propre, & d'exercer ses plaisirs & affecti-
ons, comme font nos apostatz Euangeliques: lesquelz festās

*Que les
monaste-
res n'e-
stoyent poi-
nt
ancienna-
ment des
colleges
des estu-
diants.*

ennuyez d'une bonne maniere de viure, obseruée es monasteres bien reiglez, sont retournez aux marmites d'Aegypte, c'est à dire aux plaisirs & vanitez de ce mode: & au lieu qu'ilz deuroient faire penitence tref-griefue pour vn crime si enorme, tout au contraire ilz calomnient la vie monastique, & incitent les Magistratz à raser tous les monasteres. Au moyen dequoy est aduenu, q̄ plusieurs monasteres ont esté ruinez, & les autres changez en escholes pour instruyre la ieunesse, contre la premiere institution & fondation des monasteres. Mais les rentes & reuenuz d'iceux sont mesnagez si dextrement, que noz predicans en tirent de bones pieces, & les ont si à souhaiet, que puy apres ilz en font grād' chere avec leurs commeres, tout au contraire de ce qui estoit obserué au commencement. Mais le iour viendra, qu'ilz vomiront les richesses qu'ilz ont deuorées, & Dieu les tirera hors de leur ventre.

Ilz payeront tout ce qu'ilz ont fait, & si ne seront point consumez, ilz endureront selon la multitude de leurs inuentions.

Zob 20. Mais demandes-tu pourquoy? Lis Iob tout ensuyuant: Pour-
 autant que par voye de fait ilz ont robé la maison du pau-
 ure, (car les moines sont pauvres de profession, & si quelques
 conuents sont riches, les biens sont employez aux necessitez
 des moines, & le reste es œuures spirituelles, de maniere que
 nul des moines n'en met vn denier en bourse) ilz l'ont pillée,
 & ne l'ont point edifiée, & leur ventre n'a point esté saoul. Le
 ciel reuelera leurs iniquitez, & la terre s'esleuera contr' eux.
 On voit comment Luther, premier pere de ces venerables,
 s'empara du monastere des Augustins, qui auoit esté fondé
 pour trête religieux, mais ie dis sans que d'iceluy il en feist vne
 eschole, ains il y vescu galamment avec sa Catherine, au ven,
 au sceu, & à la louange de cest aveuglé monde. Chose certai-
 nement tref- detestable. Car anciennement les bons Roys &
 Princes ne se pouuoient rassasier à fonder & enrichir infinis
 monasteres, & croyoiēt q̄ par ce moyen ilz se rēdoient Dieu
 fauorable, & corroboroient l'estat de leur Royaume, comme
 nous auons veu cy-dessus par les lettres de Charlemagne:
 mais à present à la suggestion des meschans apostatz on les

*Villicé
des mona-
stères.*

ruïne & destruiēt, ce qui veritablement cause l'euersion des Royaumes & prouinces. Car on ne cessoit de prier iour & nuict és monasteres, & Dieu exauçoit les prieres de plusieurs d'iceux, de maniere que la chose publique florissoit, les riches abondoient és Royaumes, toutes choses estoient à bō marché, nous auions tousiours foison de viures. Qu'on parangōne le temps durant lequel les monasteres auoient la vogue, avec cestuy nostre miserable siecle, auquel les monasteres sont tenuz en si grād mespris: ie m'asseure qu'on y trouuera de la difference bien grande & admirable. Mais les hommes ne veulent pas croire, que les affaires de ce monde succedent d'autāt plus heureusemēt, qu'on a plus de soing des choses sacrées & diuines. Je voy bien que Luther & ceux de sa troupe diront, que le seruice diuin faict és monasteres est meschant & plein d'Idolatrie. Mais que pourroient-ils dire autre chose? Biē diuerse opinion en ont eu les plus doctes & plus religieux hommes qui vescurent oncques, & mesmes les bons & inuaincuz Prelatz. Et si le diable ne sçauoit bien, que les moines deuotieux luy donnent souuent sur les cornes, iamais il ne leur eust tant faict la guerre par Luther & ses compaignons. Mais estre vituperé de telz garnemens, c'est estre purement loüé, attēdu qu'ilz ne vituperent pas seulement ce que tous gens de bien approuuent, mais encore mentent-ils maintesfois bien impudemment. Comme faict le bon homme Guillaume Raden, duquel nous auons faict mention cy dessus, adioustāt en son epistre ce qui s'ensuyt: maintenāt il n'y a personne, ou pour le moins fort peu, qui ayēt iamais gousté les sacrées lettres, tant s'en faut qu'ils en fassent profession, és monasteres qui ne sont encore purgez du leuain de l'Antechrist. Ains au cōtraire ilz ^{Les moines ne li-} sēt iamais <sup>l'escri-
ture,
dict vn
meschant.</sup> appellent celuy-là Lutherien, schismaticque & heretique, qui voudra lire l'escriure saincte & en faire son proufit. D'auantage il adioustē que les moines font brusler les bōs auteurs: car ie seroy trop long, si ie vouloy racōter toutes ses resueries. Je vous prie doncques, si telz hommes peuuent auoir aucune conscience ou vergōgne, puys qu'ils n'ont point honte de tāt mentir. Car sans parler des autres religions, les exercices des-

quelles ne me sont pas si entierement cogneuz, ie dy que en l'ordre des Chartreux (du nombre desquelz ie suis bien ayse d'estre) la Bible entiere est leuë tous les ans publiquemēt, icelle oyans tous les religieux, partie à l'Eglise, partie en autres lieux: le psautier y est tout recité par chacune semaine, à fin que ie raise l'estude qu'un chacun fait à son particulier: & toutes-fois ces meschans ne se hontoient point de dire, que la Bible n'est point leuë chez les moines, & qu'ilz appellēt heretiques ceux qui la lisent. Neantmoins ilz ont persuadé ces bayes & menfonges à plusieurs, quoy que ridicules: & leur suffit, pour-ueu qu'on pense qu'ilz disent la verité, combien qu'ilz mentent horriblement. Vous en verrez aujourdhuy qui controuuent mille sornettes, ou les prennent és liures des nouveaux Euangeliques, & puy les recitent, tellement qu'ilz s'estiment estre bien doctes, s'ils se peuuent gaber d'un moine. Comme fait encore ce braue Guillaume Raden, disant que quelques ordres defendoient expressement aux freres lays la lecture de tous liures, reigle qu'il dict auoir long temps duré. Ceste epistre fut escrite l'an 1559. à Magdebourg, ville où les predicans se sont tant formalisez à l'encontre des Theologiens d'Vvitemberg & de Lipsie, & croy que cestuy Raden fut du nombre. Mais si ie vouloy respondre à ces bauarderies qu'ilz objectent, ce seroit perdre autant de temps. Et veux bien qu'ilz sçachēt, qu'encor' à present il y a plusieurs moines és conuēts, qui s'estiment grandemēt, de quoy ces pestes du gēre humain leur veulent si grād mal. Plaise à Dieu d'illuminer les hōmes, qui ont esté deçeu par ces autheurs, à fin qu'ils voyēt quelles refueries d'hommes mōstreux ils ont suiuy iusqu'icy, & qu'ilz aimēt mieux estre semblables à vn Charle-maigne & à ces bōs anciens leurs deuanciers, que à ces miserables garnemens: de l'aueuglement desquelz la posterité s'esmerueillera d'autant plus, qu'ilz l'ont estimé estre vne lumiere d'Euāgile. Or ie sçay bien q' i'ay discouru maintenāt en vn lieu assez mal commode, mais le lecteur me pardonnera, si ie me suys prins à ces Euangeliques, lesquelz on refuse plus aysement en disant peu, qu'en vsant de beaucoup de langage: & partant ie n'en eusse

oncques parlé, si ce n'est pour l'amour du simple peuple, lequel maintesfois est circonuenue par ces beaux diseurs d'heretiques. Maintenant doncques, apres auoir vn peu extrauagué, nous reprendrons noz erres.

CE pendant que les choses alloient comme nous auons dict, fut faite vne assemblée à Linci, auquel lieu le Roy Ferdinand traicta de la paix avecques Maurice, & l'Empereur mesmes y estoit assez enclin : mais pour-ce q̃ Maurice alleguoit, qu'il ne pouuoit entierement receuoir les conditions à luy proposées, sans le consentement de ses compaignons, on se departit sur cela, & fut assignée vne autre assemblée à Passau. L'Empereur amassoit les forces : l'Euesque d'Ausbourg fut fort endommagé par les confederez de Maurice : les iuges de la Chambre quitteret la ville de Spire, & non sans cause : il n'y auoit que trouble & confusion en l'Alemaigne, pour la liberté de laquelle ils se vatoient qu'ils prenoient les armes, de maniere que plusieurs des Protestans mesmes en furēt bien fort appauuris. Or le Roy de Frāce reçeut l'onzieme iour de May lettres de la part de Maurice, narratiues de la paix qu'on traictoit avec l'Empereur, lesquelles reçeut le Roy, qui ne s'attendoit rien moins qu'à cela, retourna en Lorraine, ayāt fait vne infinité de fraiz sans fruit. Quand à Maurice, vn peu apres il s'accorda avec l'Empereur, & mena son armée en Hongrie à l'encontre des Turcs, laissant le Roy de France : lequel estant sur les marches d'Alemaigne, les Imperiaux, que conduisoit Martin Rosseim, enuahirent les Gaules, & feirent vn grand rauage par la Champaigne. Ce qui fut cause que le Roy aduisa à garder son Royaume.

MAVRICE estāt parti de Linci, gaigna vne victoire pres les Alpes, où il s'empara de la forteresse d'Ereberg, & peu s'en fallut qu'en ce lieu-cy il ne perdist la vie par les soldats qui demandoient leur payement, mais il se sauua à la fuite. L'Empereur dōc ayant ouï ceste nouuelle, partit d'Empont à grand haste, & quant & luy le Roy Ferdinand. Vn peu deuant il auoit remis le Duc de Saxe en liberté, mais iceluy ne voulut point abandonner l'Empereur, ains le suiuit iusqu'à Villac,

*Traicté de
paix.*

*Le Roy se
retire.*

*Peril de
Maurice.*

*Fuyte de
l'Empe-
reur.*

ville de Carnie. A peine estoit l'Empereur parti, quand Maurice arriua à Empont, & estant entré dedans à main forte, pillà tout ce qui estoit à l'Empereur ou aux Espaignols, & au Cardinal d'Ausbourg, sans faire mal à ce qui appartenoit au Roy Ferdinand ou aux citoyens. Vn peu apres ils publierent vn escrit à Ausbourg, par lequel il rappelloiēt les predicās pieça chassez par l'Empereur, & les rendirent absouls du iurement fait à l'Empereur. Et en ceste maniere fut enioinct à tous ministres du nouveau Euangile de retourner, pour confirmer & amplifier la religion Lutherienne: & le tout pour remettre l'Alemaigne en liberté.

ENVIRON ce temps Albert de Brandebourg feit gros *La perte de ceux de Noreberg* dōmages à Volphang, Maistre des Cheualiers Teutoniques, & si arracha de luy quelque argent. Ce que fait, il s'attaqua à ceux de Noremburg, & se monstra si cruel & felon en cest endroit, qu'il passa par le feu cent villages, & des chasteaux & mestairies des citoyens septâte: & en outre les temples, (à sçauoir apres les auoir bien pilléz) & ensemble trois mille iournaux d'vne forest qui appartenoit à eux. L'Euesque de Bamberg feit sa paix avecques luy, mais en fort piteuses cōditions. *Les Euesques affligez* L'Euesque d'Vircebourg fut contrainct de payer deux cens mille escuz, & si promettoit de l'acquiter de ses debtes, qui montoient bien trois cens cinquāte mille escuz. Les citez de Suaube, lesquelles pouuoient estre 26. en nombre, & entre icelles Ausbourg, exhortoient ceux de Noremburg à moyenner vne paix avec Albert, mais iceux ne voulurent oncques quicter le parti de l'Empereur & du Roy Ferdinand, outre plusieurs autres raisons. Au moyen dequoy Albert assaillit la ville plus viuement, de maniere qu'en fin ils furent forcez de s'accorder avec luy de ceste sorte: qu'ils payeroient deux cens mille escuz, quoy que au-parauant ils en eussent dōné à Maurice & à ses compagnons cent mille: qu'ils liureroiēt six grosses pieces d'artillerie garnies de tout ce qui leur faut: qu'ils seroient fauorables à tous les Seigneurs confederez &c. Et neantmoins ceste cité estoit de la confession d'Ausbourg. Albert doncques ayant ainsi le vent en pouppe, menaça pareillement

Merveilleuse perte de ceux de Noreberg

reillement ceux d'Vlme, mais ilz ne luy octroyerēt rien de ce qu'il demandoit. Or si quelque Pape de Rome, ou quelque prelat Catholique auoit exercé telle cruauté contre vne ville, il n'y auroit pas eu assez de papier pour Sleidan, à exag^{er}er ^{Finesse de Sleidan.} le fai^{ct}, tant il seroit enorme. Car iceluy est assez empressé à rediger par escrit les deniers qui vont à Rome, tant d'Alemai^{gne} q^e d'ailleurs, ce qu'il fai^{ct} pour faire hayr les Papes. Mais vrayement depuys que le nouveau Euangile court, l'Alemai^{gne} a tāt souffert, & a reçu si gros dommages, que au respect de cecy tout l'argent qu'on porte à Romme est moins que rien, outre ce que nous ne voyons encor' aucune fin de tant de calamitez. Ce que Sleidan ne fai^{ct} pas semblant de voir, ains cela luy demeure au bout de la plume: ce qu'il ne feroit, sil estoit apte pour en donner quelques attraits au Pape. Et telz sont tous ces sectaires, qui s'appellent Euangeliques.

LE Roy de France enuahit le païs de Luxembourg, où ^{degaſt au} fut fai^{ct} grand degaſt & rauage, la ville de Danuillier se ren- ^{pays de Lu} dit, & puy Luoy, ville bien forte, en laquelle estoit Ernest Cō- ^{xembourg.} te de Mansfeld, qui fut fai^{ct} prisonnier avec plusieurs autres.

QVAND à Maurice, il ne faillit pas de se trouuer à Passau ^{Assem- blée à Pas- sau.} au iour prefix, auquel lieu se trouuerent quelques Princes, & les Ambassadeurs de plusieurs absens, entre lesquelz estoit ce- luy du Roy de France. Maurice requeroit trois choses, la de- liurance du Lantgraue, qu'en ceste assemblée de Passau on aduifast tout ce qui pourroit estre contre la liberté d'Alemai- gne, finalement que nul ne fust molesté ou inquieté pour la religion, iusqu' à ce que toutes choses controuerses fussent bien accordées. Mais quand à Albert de Brandebourg, il con- tinuoit tousiours d'affliger & vexer les Archeuesques de Ma- ience, de Treues, & autres prelatz Alemans, lesquelz il endom- magea merueilleusement. Il requeroit que sa gendarmerie peust aller & venir dans Strasbourg en toutes saisons, & qu'il y peust tenir garnison, & quelques autres choses, mais il n'im- petra riē du tout. Aussi s'en fussent-ilz trouuez fort mal, n'eust esté que à mesme instant que Albert requeroit cela, le brui^{ct} ^{Les maux que fait Albert en Ale- maigne.} fut semé que Maurice estoit fort enclin à la paix. Or s'estoit-

Eccc.j.

il déia emparé de Spire & d'Vormes, & laissant garnison à Spire, il rebrouste chemin vers Francfort, de maniere que ne trouuant pas bonne la paix que Maurice auoit traitée, il ne la voulut point receuoir, & partant assiegea ceste ville. Bref il n'y a homme qui sceust dire le nombre de ceux, que ce fier & felon Albert vexa par-my les Alemaignes. Maurice ayât ia conclu la paix avec l'Empereur, mena vne partie de son camp (comme nous auons touché cy-dessus) en Hongrie à l'encontre des Turcs. On dict que le Roy de France trouua fort mauuaise la paix accordée par Maurice.

L'Empereur à Ausbourg.

OR auoit l'Empereur déia assemblé ses forces, & retournoit à Enipont, & le 20. d'Aoust entra dans Ausbourg, où il cassa les Senateurs ordōnez par les Princes, & réinstalla ceux que par-avant il y auoit estably. Or en ce mesme temps ceux de Siene en Italie s'aydans des François, chasserent les Espaignolz de leur ville. Le Lantgraue auoit esté deliuré de prison, mais comme il passoit par Mastrich, à cause que le Seigneur Rifeberg s'estoit n'agueres ioinct avec Albert, il fut de rechef arresté par les Espaignolz, iusqu'à tant qu'on attendist la volonté de l'Empereur sur cela. Albert de Brandebourg s'empara

Maux in finis cōmis par Albert.

premierement de Maience, & puy de Treues, & à Maience le feu fut mis à l'Archeuesché, & à quelques autres beaux lieux. Semblablement on passa au feu & au fil de l'espée plusieurs places de la contrée de Treues, & outre plusieurs monasteres fut brulé vn chasteau gueres loing de Treues, qui appartenoit à l'Euesque. Lequel estoit lors en vn fort chasteau à Confluence, où se retira pareillement l'Euesque de Coloigne: mais Albert l'eust peu aisément empescher de se retirer là, s'il eust voulu faire aller quelque gendarmerie sur le Rhin. Or en toute ceste guerre des Princes confederez, ceux d'Vlme sont tousiours demeurez obeïssans à l'Empereur, bien qu'Albert tint le siege six iours deuant leur ville, & les menaçast terriblement, comme nous auons dict.

A v mois de Septembre l'Empereur arriva à Strasbourg avec toutes ses forces, mais il y entra avec bien peu de gens, ce que le Roy de France ne peut impetrer: & ayant illec dis-

né, il en sortit incontinent. Si auoit déia l'hyuer à doz, & ne-
 antmoins les desseings estoient d'assiéger la ville de Metz, ce
 qu'il feit assez incommodément le vingt-deuxiesme iour du
 mois d'Octobre. Les François n'auoient rien omis de ce qui
 pouuoit seruir à soustenir vn long siege. Or en ce temps Al-
 bert de Brandebourg, ne s'estant peu accorder avec le Roy
 Henry, moyenna sa paix avec l'Empereur, & auoit cest Albert
 cinquante enseignes de gens de pied, & grosse caualerie. Ce-
 la entendu le tres-illustre Duc d'Aumale, frere de l'inuaincu
 Duc de Guise, fleau des heretiques, ne douta point d'aller at-
 taquer Albert, ayans ia les François retrâché sur luy vne legiõ
 de pietons, dont Rifeberg estoit Colomnel. Mais la fortune
 ne dit pas aux François, de maniere que le Sieur d'Aumale y
 fut prins, & enuoyé prisonnier en Alemaigne: ce qu'estant
 faict, Albert se veint ioindre avec les forces de l'Empereur,
 qui fut le quatriesme iour de Nouembre. L'Empereur arri-
 ua le vingtiesme iour dudiect mois en son camp. Et alors la
 ville fut battüe si impetueusement & horriblement, qu'on en-
 tendoit les coups de canõ à vingt & deux mil d'Alemaigne.
 Toutesfois l'Empereur n'y sceut mordre, tant pour la saison
 fort contraire, que pour la vaillance des defendans, si bien
 qu'il commença à leuer le siege sur la fin de Decembre. Plu-
 sieurs de l'armée imperiale moururent de froid, & les autres
 de peste. Le magnanime Duc de Guise, qui defendit la ville,
 monstra bien son humanité & debonnaireté, quand il reçeut,
 & ayda de toutes choses necessaires, tous ceux du cãp impe-
 rial, lesquelz estoient empeschez de desloger, fust par maladie
 fust par playes. Acte certainement digne d'un Prince Chre-
 stien, & que la posterité ne doit oncques mettre en oubly.
 D'auantage ce Prince s'est monstré le soustien de la religion
 Catholique, quand il a esté besoing: en quoy faisant il a esté
 occis, comme nous verrons cy deslouz.

D'v n autre costé quelques forces de l'Empereur prin-
 drent le fort d'Hesdin sur les François. Ce-pendant Maurice
 fut de retour d'Hongrie à sa maison. Pareillement Volrad,
 Conte de Mansfeld, affligea bien fort Henry de Brunswic, en-
 Eccc.ij.

*Du siege
de Metz
par l'Em-
pereur.*

*Albert
faict sa
paix, &
préd le Si-
eur d'Au-
male.*

*La piété
de Monsieur
de Guise.*

*Prinse
d'Hesdin
par l'Em-
pereur.*

uiron ce temps, & auoit ledict Sieur marché en guerre avec Albert, quand iceluy Albert suyuoit le party du Roy de France.

Vous voyez par ce que nous auons dict, quelles pertes & afflictions l'Alemaigne endura ceste année, des Alemans mesmes qui se disoient restaurateurs de la liberté du pais, outre-ce que trois Eueschez furent retranchez à l'Alemaigne.

*Les mayes
Lutheriens
recommen-
cēt la guer-
re cōtre les
Zuingliens,
par parol-
les.* Or sembloit-il déia que les predicans Euangeliques fussent restituez, quand Ioachim Vvestphal, ministre d'Hambourg, sonna soudain l'alarme, & esueilla les Zuingliens, qui commengoient ia à salentir & abastardir. Car il feit imprimer vn liure intitulé, *Meslange des confuses & repugnantes opinions de la*

Cene du Seigneur, recueilly des liures des Sacramentaires. Voyla vn grand coup, que donne Vvestphal à ceux de Zurich & leurs adherans, nommément à Calvin. Le but de Vvestphal est, de monstrier en ce liure, que les Zuingliens sont fort diuisez entr'eux, marque tref-certaine pour cognoistre qu'ilz sont deuoyez. Comme Luther mesme auoit nombré en sa petite Cōfession, huit repugnātes sectes des Zuingliens. Vvestphal admonnest les gens doctes, de combattre valeureusement à lēcontre de ce peruers erreur des Zuingliens. Bref, il dict que les blasphemés d'iceux meritent plustost d'estre tref-bien punis, que d'estre refutez par escript. Vn peu deuant Calvin auoit voulu monstrier à ceux de Zurich, qu'il suyuoit leur opinion: mais Vvestphal dict que cela n'estoit que feintise & dissimulation. Personne ne respondit ceste mesme année à Vvestphal, mais on luy monstra bien à la fin du ieu, qu'est-ce qu'il veult faire, quand il se prend à Calvin & aux siens. Où nous deuons considerer le iugement de Dieu. Car les heretiques estoient merueilleusement esiouïs, dequoy leur liberté leur auoit esté restituée, & que l'Empereur estoit assez empesché à ses affaires: mais lors que l'Empereur ne les peut plus guerroyer, ilz s'entre-font la guerre eux-mesmes, & se mordent & pinsent de si bonne sorte, que les Catholiques ne font rien au prix de cela. Tant y a, que tous ceux qui ont empesché l'Empereur, de remettre entierement la religion Catho-

lique dans les Alemaignes, ont porté vn fort grand domma-
ge à la Republique Chrestienne.

ON ſçait que les Portugais ont eſtendu leur Empire <sup>De l'Isle
de Giapā
nouuelle</sup>és na-
tions du Leuant fort loingtaines des noſtres. Ceſte année ilz
taſcherent de rendre Chreſtienne l'Isle de Giapan, ſituée és
dernieres parties de l'Asie. Ce peuple habite en vn meſme
parallele, que ſont tous les Alemans & François, mais ilz
nous ſont Antipodes, & ſi n'ignorent point les bonnes diſci-
plines. Au moyen dequoy ilz ſe monſtrent difficiles, & ne
veulent obeïr aux Portugallois, que premier ceux de Sinà ne
leur obeïſſent, leſquelz ſont en voye de ſe rendre tous à la
foy Chreſtienne, comme nous toucherons cy-apres. Le <sup>Du Roy
de Sinà és
Indes.</sup>Roy de Sinà faiſt inceſſamment la guerre avec les Tartares
de Cathaïe, l'Empire deſquelz eſt fort ample, & diſt on que
ledict Roy a edifié vn grand mur à l'encontre des Tartares,
ſur lequel il a touſiours cent mille hommes, qui empeschent
que les Tartares ne le puyſſent enuahir. Ceſte iſle de Giapan
tire ſur le Septentrion, & les Eſpaignolz content qu'elle eſt
diſtante des regions de Sinà ſix cens lieuës, en tirant vers le
Septentrion, & les habitans d'icelle reſſemblent bien fort aux
Alemans quand à la couleur, à l'accent de la langue, & à la
maniere de ſ'habiller. L'Isle eſt longue de ſix cens lieuës, &
large en certains lieux de trois cens.

L'AN 1553. les François, qui eſtoient à Metz, chercherent
diligemment les liures Lutheriens qui pouoient eſtre és <sup>Liures
bruſlez à
Metz.</sup>maïſons des citoyens, & les feirent tous bruſler par le bour-
reau. Veritablement c'eſt choſe digne d'admiration, veu que
les Princes d'Alemaigne, qui leuerent les armes contre l'Em-
pereur, alleguoient pour leurs raiſons, que ce faiſoient-ilz
pour defendre la doctrine Lutherienne, toutesfois ilz ſ'allie-
rent avec vn Roy, qui n'hayſſoit rien plus que les Lutheri-
ens: & d'autre part il y a dequoy ſ'eſmerueiller, comment le
Roy ſe voulut allier d'eux, veu qu'il les hayſſoit pour leur re-
ligion, & ſçauoit bien qu'ilz ne l'aimoient pas pour la meſme
raiſon. L'Eueſque de Metz retourna à la ville, & eſtablit vn
nouveau Senat.

Ligue con-
tre Al-
bert.

ALBERT de Brandebourg en ce temps reprit les armes, & au moyen de ce quelques Princes & Seigneurs se ben-
derent contre luy, pour eux defendre & maintenir. Maurice
pareillement feit alliance avec Henry de Brunswic, & pro-
meit tout secours & ayde aux Euesques d'Vircibourg & de
Bamberg, & quant & quant à ceux de Noremberg. Ce-pen-
dant Albert tenoit la campagne, & passant par la contrée de
Noremberg, pilloit & brusloit tout le pais, de maniere qu'il
sempara de deux bonnes villes, Bamberg & Suinfurt, esquel-
les il meit garnison: print aussi quelques villes & chasteaux ap-
partenans à ceux de Noremberg.

Pris de
Terouenne.

EN ce temps l'Empereur força, pilla, brusla, & ruina du
tout la ville de Terouenne, qui appartenoit aux François, & là
fut prins le filz du Connestable. Aussi enuiron ce temps l'ar-
mée Turquesque voguoit sur la mer de Grece & de Sicile.

* C'est
Sleidan.

Or *quelqu'vn a escrit que les François y estoient ioinctz:
mais ie croy que cela est faux, & n'est pas probable que telz
Chrestiens se soient vouluz ioindre avec les Turcs, au dom-
mage des Chrestiens mesmes. Si enuoyerent Maurice & ses
alliez des forces en Franconie, pendant que Albert y exerçoit

Tyrannie
d'Albert

sa tyrannie & felonnie. Mais Albert ayant amassé deniers, em-
menant aussi grand nombre de captifz pour ostages du pais
de Noremberg, s'en alla en Saxe à grand haste, & pilla plu-
sieurs villages des terres d'Erford. Maurice donc tout estonné
de sa venue si soudaine, somma vn chacun de prendre les ar-
mes. Mais Albert passa par ses seigneuries sās mal faire. Si tira
des Ecclesiastiques d'Halberstat vne grosse somme d'argent,
& brusla toutes les terres d'Henry de Brunswic. De maniere
que le Roy Ferdinand & Maurice luy denonçerent la guer-
re. Et sur cela ceux de Noremberg se ruerent sur ses ter-
res, & feirent imprimer vn liure à leur defence, auquel ils
luy obiectent, pour vne cruauté qui ne fut oncques ouyë, que

Cruauté
incroyable
d'Albert

ayant prins deux villes de leur iurisdiction, asçauoir Altorf &
Lauf, il enferma dedans les bourgeois, & les habitans du plat
pays avec les bestes, pour les brusler: de sorte qu'y ayant mis
le feu, plusieurs petits enfans, femmes enceintes, & person-

nes malades y finerent leurs iours.

LE sixiesme iour de Iuillet trespassa le Roy Edoüard d'Angleterre, aagé enuiron de seize ans, au grand regret des freres Euangeliques, qui esperoiet de se bien aduâcer souz ce Roy. Lesquels ne furent pas moins desplaisans, dequoy Marie, fille de celle Catherine, que le Roy Henry auoit repudiée, luy succeda, pourautant qu'icelle estoit fort studieuse de la religion Catholique. Or Sleidan deplore fort la mort d'Edoüard, disant que long temps y auoit que l'Europe n'auoit eu vn tel Roy, comme celuy qui aimoit grandement la doctrine du nouveau Euangile. Mais les loüanges de Sleidan seruent d'autant de vitupere, à cause qu'elles issent d'un heretique Sacramentaire, qui loüange tant seulement ceux qui luy ressemblent.

LE 9. iour de Iuillet fut donnée vne cruelle & sanglante journée entre Maurice & Albert au pais de Saxe, de laquelle Maurice emporta la victoire, mais il y fut tellemēt nauré, que peu apres l'ame partit de son corps, & Albert se sauua à la fuite. En ceste bataille moururēt les deux fils d'Henry de Brunswic, & plusieurs Contes, sans faire mention des autres. Brief le nombre des morts fut merueilleusemēt grand, à cause que ceux qui se vantoient de remettre l'Alemaigne en liberté, se dōnerent le choc fort courageusement. En mesme camp estoient rangez Maurice, le Lantgraue, Henry de Brunswic, & les Euesques d'Vvircibourg & Bamberg: & du costé d'Albert festoit mis Eric de Brunswig, quoy qu'il fust beau-frere de Maurice. On dict que Maurice endura beaucoup à sa mort, & qu'estant passionné de trop grande douleur il se plioit le corps, comme en s'entortillant. Mais ie n'en voudroy rien asseurer, comme de ce qu'aucuns escriuent, qu'il complottoit alors quelque chose de nouveau avec le Roy de Frâce. Quoy que ce soit, il affligea si fort l'Empereur, quand il se rendit inopinément du party François, & fit guerre à sa Maiesté, qu'il porta grand dommage à sa santé, quoy que l'Empereur ne se fust monstré enuers luy, que doux & fauorable. Or enuiron ce temps, on trouua des gouttes de sang sur les fucilles des ar-

*La mort
du Roy
d'Angle
terre.*

*Bataille
donnée en
Saxe.*

*Maurice
meurt.*

*Terrible
metamor-
phose.*

*Signes es-
pouuenta-
bles.*

bres, les chiens abayoient fort estrangement, & se deschiroiēt les vns les autres, les cheualx faisoient des hennissemens terribles, & oyoit-on bruit d'armes. Maurice & Albert auoiēt esté fort grands amis, mais voila quelle fut la fin de ceste amitié.

*Reprise
Et reprise
d'Heſdin.* NOUS auons dict, que les Imperiaux auoient prins l'an precedēt le fort chasteau d'Heſdin, mais les François l'auoiēt reprins. De rechef au moys de Iuillet de l'année presente, l'armée imperiale le print sur les François, ou fut occis le Seigneur Horace Farnese, gendre du Roy, & plusieurs faits prisonniers, desquels le Mareſchal de la Marche fut l'un.

*Auguste
Duc de
Saxe.* A MAURICE succeda son frere Auguste, lequel eut en mariage la fille du Roy de Dannemarc. Et enuiron ce temps y eut grand terre-tremble à Misne, ville d'Auguste. Si demandoit le Saxon, cy-deuant detenu prisonnier par l'Empereur, sa dignité d'Electeur & les terres qui luy auoiēt esté rauies: mais non-obstant Auguste en demeura tousiours inueſty.

LES Eueſques d'Vircibourg & de Bâberg ſeſtans ioints avec ceux de Noremberg, enuahyrent les villes d'Albert. Par la volonté & bon-plaiſir du Roy neuf heretiques furent executez à Lyon, & quoy que ceux de Berne ſupplierent pour eux, ils n'impetrerent rien.

*Iehanne de
Suffole.* COMME nous auons dict, Edoüard Roy d'Angleterre alla de vie à trespas ceste année. Iceluy auoit declaré Iehanne de Suffole, arriere-niece du Roy Henry du coſté de la ſœur, son heritiere, & exheredoit Marie & Elizabeth ſes ſœurs. A quoy plusieurs grands Seigneurs ſ'accorderent, mais le peuple & la nobleſſe print cela fort à cuer, à cauſe que Marie eſtoit fille legitime d'Henry, & le Roy Henry à ſa mort auoit voulu que elle ſuccedaſt à Edoüard. Si ſe parforcea le Duc de Northombrelant d'empeschier, que Marie ne ſuccedaſt au Royaume, mais neantmoins elle ſucceda, à l'ayde de Dieu, & au ſouhait des gens de bien. Iehanne fut miſe en ſeure garde, & le Duc de Northombrelant ayant eſté faiſy au collet, fut amené à Londres, au grand opprobre de tout le peuple. Avec luy furent prins ſes enfans, ſes freres, & quelques autres Seigneurs, meſmes Iehan Chic precepteur du Roy Edoüard, lequel

*La Roynne
Marie
d'Angle
terre.*

quel toutesfois fut deliuré par-apres. La Roynne Marie vint apres à Londres, & illec deliura & meit en leur estat les Euesques de Vvinchestre & de Dunelme, personnages fort doctes, & autant en feit du Duc de Nordfelc & de quelques autres Catholiques. L'Euesque de Vvinchestre fut fait par sa Maiesté Chancellier. Quand au Duc de Northombreland, il fut descapité le vingt-deuxiesme d'Aoust, & plusieurs sur-intendans des Euangeliques furent emprisonnez. Ledit Duc estant prest de clorre sa vie, confessa publiquement sa faute, & pour-autant qu'il auoit cōseillé au ieune Roy Edoüard de changer sa religion, il en-horta tout le monde à embrasser tous les pointz de la religion Catholique & Romaine: & n'oublia pas de reciter les troubles, qui ont accoustumé de sourdre des sectes, telz que l'Angleterre auoit ia experimentez par trop, & l'Alemaigne pareillement. Finalement il conclud, qu'il vouloit mourir bon Catholique: & ce dict, la teste luy fut auallée de dessus les espaules. Pierre Martyr, moine renyé, & grand Zuinglien, fut contrainct de vuyder le Royaume. Le premier iour d'Octobre Madame Marie fut couronnée Roynne, en l'aage de 38. ans.

HENRY de Brunsuic deffait Albert, qui taschoit de remettre sus nouuelles troupes rebelles. L'armée Turquesque s'empara de l'Isle de Corse, qui estoit aux Géneuois, hors-mis quelques villes. L'Empereur rasa le fort d'Hesdin, & comme il vouloit forcer Dorlans, son armée fut mise en route par les François, tellement que partie fut prise, partie demeura sur le champ. Les François doncques s'efforcèrent de prendre Cambray, mais en vain, & comme ilz se fussent si pres approchez de l'armée imperiale pres de Valenciennes, qu'il sembloit que le ieu ne se departiroit point sans bataille, neantmoins ilz s'en allerent le dix-huitiesme de Septembre avec quelque perte, & en retournât ils passoiēt tout à feu & à sang. En ce temps la peste estoit fort grande à Paris, & furent plusieurs heretiques deffaictz. Henry de Brunsuic marcha avec son ost à l'encontre d'Albert en Franconie, & combien que l'occasion se presentast assez de rendre la pareille à quelques Seigneurs,

Ffff.j.

*Euesques deliurez,**Vn Duc decollé en Angleterre.**Albert vaincu.**Guerre entre les imperiaux & François.*

desquelz il auoit esté molesté, neantmoins il se monstra doux & debonnaire, & passa son armée par leurs terres sans les endommager.

Caluin

*faict mou-
rir Seruet.*

CALVIN feist mourir ceste année à Geneue vn Espagnol nommé Seruet, qui auoit blasphemé cõtre la sainte Trinité. Chose bien fort esmerueillable, non seulement pour-ce que Caluin ne valloit pas plus que Seruet, mais encore pource que ces nouueaux religieux ne veulēt pas que les heretiques soient mis à mort. Or Caluin desireux de faire sçauoir à tout le monde ce sien faict, redigea par escript toute l'histoire, en laquelle il monstra que quiconque est heretique doit estre tresbien puny, tant est constante la nouuelle doctrine de nos Euāgeliques. Quand à Sleidan, il approuue ceste punition de Seruet, ce qu'il n'eust faict, si le Pape ou les Catholiques eussent puny cest heretique. Bref, tout ce que font Luther, Caluin, Zuingle, & semblables pestes, tousiours cela est Euangelic: mais si le Pape en faict tout autant, c'est vne cruelle tyrannie, & vn acte de l'Antechrist. Certainement Caluin meritoit aussi bien la mort que Seruet, quoy que ceux qui ont esté par luy seduit, ayent autre opinion. Et si les Lutheriens eussent peu happer Caluin, ie me doute fort qu'ilz eussent autant faict de luy, cõme il a faict de Seruet.

Guerres.

LES aduersaires d'Albert de Brandebourg s'emparerent de certaines villes à luy appartenantes. Et les François prindrent d'emblée la ville de Verceil, & ayant assez butiné, ils se retirerent, à cause que le Seigneur Gonzague, Lieutenant de l'Empereur, n'estoit plus gueres loing.

Soliman

*faict estrā-
gler son
fils Mu-
stapha.*

L'ARMEE de Solimā feist gros dommages aux Seigneuries de l'Empereur, lesquelles sont battues de la mer, comme sont Sicile & Calabre: & à Corse semblablement, de laquelle ilz s'impatroniserent, comme nous auons dict, aiant faict grād meurtre des Géneuois & Corsois. Mais Dieu se vengeoit de Soliman à sa maison mesme. Car il auoit vn filz aîné nommé Mustapha, lequel il soupçonnoit de vouloir s'emparer du Rõyaume. Et partant il le faict venir à soy à Alep en Syrie, où Soliman estoit alors. A quoy Mustapha ne faillit d'obeir tout

incontinent, & apporta plusieurs beaux presens. Descendu qu'il est de cheual, ne se doutant point d'embusches, il entre dans le logis de Soliman, où commandement luy est fait de laisser l'espée. Ce que fait, il s'approchoit pour baiser la main de son pere: mais iceluy fut si cruel, que deuant qu'il s'approchast, ses satellites luy meirent la main sur le col, & l'estranglerent tout deuant le pere, qui leur auoit enioinct de ce faire. Et à mesme heure fut deffait son guidon, issu de la noble famille des Michaëli à Venise. On dict que Soliman fut par-apres bien fâché d'auoir perdu ce sien filz.

LES iuges de la Chambre bannirent Albert de Brandebourg, comme perturbateur du repos public. La religion Catholique fut en ce temps restablie en plusieurs lieux d'Angleterre, & le Roy Philippe d'Espagne print en mariage la Royne dudit pais, de maniere qu'il n'y faisoit pas bon pour les heretiques. Aussi nos Euangeliques ont fait vne grande legende des martyrs d'Angleterre, & mesme Iehan Foxe (duquel nous dirons quelque mot cy-apres) en a fait vne histoire. Mais Dieu nous vueille deliurer de la société de telz martyrs. Car les Lutheriens mesmes ne confesseront pas qu'ils soient martyrs, à cause qu'ils estoient plus Zuingliens que Lutheriens. Quelcun dict que les bannis d'Angleterre enseignèrent priuément en Alemaigne, ce qu'il falloit tenir des motz de la Cene, donnant en cela vne attaincte non aux Catholiques seulement, mais bien encor' aux Lutheriens. Et aussi en ce mesme an Ioachim Vvestphal feit imprimer vn liure intitulé, la droicte foy de la Cene du Seigneur: lequel liure il afferme auoir dedié à l'Eglise d'Hambourg, pour les instruyre à l'encontre des Sacramentaires.

IEHAN de Lasco, Gentil-homme Polonnois, mais Sacramentaire, par la permission de la Royne Marie partit d'Angleterre, & avec deux nauires & plusieurs de ses compagnons sacramentaires vint surgir en Dannemark. Où il pensoit passer coyement l'hyuer: mais pour-ce qu'il vouloit vendre vne doctrine repugnante à celle de Luther, il ne trouua lieu pour heberger: car on sçait l'antipathie qui est entre les Luthe-

*L'estat
d'Angle-
terre.*

*Iehan de
Lasco Sa-
cramentai-
re chassé
des Luthe-
riens par
soud.*

riens & les Sacramentaires. Au moyen dequoy il vint prendre terre és villes maritimes de Saxe, addonnées à Luther, & par tant il en fut repoussé. Ce que les Sacramentaires disent auoir esté fait plustost à l'instigation des ministres, que par les Magistratz. A la par-fin apres maintz perilz & traux, ilz trouuerent vn petit nid en la ville d'Embe en la frise Orientale, au quel lieu les predicans de Saxe leur en voulurent tant, que par escriptz publicz ils se mocquoient d'eux, si que Iehan Vtenhoue fut forcé d'escrire vne histoire intitulée, De l'Eglise des estrangers, instituée en Angleterre, & de nouueau dissipée: Lequel liure toutesfois les Sacramentaires voudroient bien qu'il n'eust pas esté escrit. Car qui ne se mocqueroit de telles choses? Pareillement Iehan Stolzius meit en lumiere la defence de Luther à l'encontre des Sacramentaires, en laquelle il raconte à Luther, que les Sacramentaires estans endiablez le gaignent maintenant à escrire: & qu'il n'y a espee de risée qu'ilz n'vsurpent, pour se mocquer de ses commentaires & de sa version de la Bible: & que Calvin reiette à tout bout de champ ses sainctz Commentaires escriptz sur la Genese, s'en gaudissant à plaisir. Car entendez que Calvin auoit interpreté le liure de Genese, tout autrement que Luther. Bien miserables donc sont ceux, qui suyent telz conducteurs en choses si graues, & desquelles depend la saluation ou damnation des ames.

De S. Iehan putatif, à Paris. C E S T E année fut vn homme à Paris, qui se vantoit d'auoir l'esprit de Sainct Iehan Apostre & Euangeliste: & tant à Basle qu'à Paris fut veu vn autre, qui se disoit auoir l'esprit de Sainct Pierre pour conducteur. Encor'y en eut vn autre à Basle, qui osa affermer qu'il auoit l'Ange de Moyse, & predict que le Roy de France receuroit l'heresie des Protestans deuant le commencement du mois de Iuin. De maniere qu'il troubla plusieurs à cause de telles resueries: mais quand il veit que sa prophetie du Roy ne succedoit pas, il s'osta de-là sans mot dire, craignant de finir sa vie en vn gibet. Mais à la verité telz galans n'eussent point esté osez iusqu'à là, si n'eussent voyoyé les hommes si folz, qu'ilz prestoyent l'oreille à toutes resueries.

L'AN 1554. les Ambassadeurs de l'Empereur paracheu-^{Mariage}
rent entierement le mariage entre son filz Philipppe & la ^{du Roy}
Royne Marie, malgré quelques seditieux trouble-festes, qui ^{Philippes}
souz la conduyte de Viat auoient excité quelque tumulte. ^{de la}
Car la Royne appaisa fort dextrement la populace mutinée, ^{Royne}
si que Viat fut happé, & mené en prison. Le Duc de Suffolc, ^{d'Angle}
qui tenoit la main à ces partialitez, fut amené prisonnier à ^{terre.}
Londres. Guiltford, filz du Duc de Northombreland, & Ie-
hanne sa femme, laquelle le petit Roy Edoüard s'estoit substi-
tuée, furent descapitez, & peu apres mesme punition fut prin-^{Grandz}
se du Duc de Suffolc. A mesme iour, sçauoir le 21. de Feurier, ^{Seigneurs}
trespassa à Vinaire Sibylle de Cleues, femme du Duc de Sa-^{descapitez}
xe: & onze iours apres mourut le Duc Iehan Frideric son
espoux.

EN ce temps doncques la Religion Catholique fut re-^{La religio}
mise sus en Angleterre, & plusieurs Euangeliques furent con-^{remise en}
trainctz de gaigner au pied, qui s'en allerent demeurer par ^{Angle-}
l'Allemaigne qui ça qui là. On emprisonna Elizabeth, sœur de ^{terre.}
la Royne, pour-ce qu'elle estoit soupçonnée, de tenir la main
à la sedition sus-dicte. Or ceste mutation de religion fut fort
dommageable à noz Euangeliques, qui estimoient se pou-
uoir ilec retirer comme à vn port de salut, si mal leur bastoit
ailleurs.

EN ce temps Albert de Brandebourg fut chassé de routes ^{Albert}
ses terres, tellement que le Roy Ferdinand s'empara de Blaf-^{chassé.}
sebourg, qui est la principale de ses forteresses. Et ce-pen-
dant Henry de Brunswic amassa gros deniers par la basse Sa-
xe, de plusieurs Princes & villes, gentilz-hommes & autres
hommes de nom. Vn autre sien camp ioinct avec celuy des
Euesques & de ceux de Noremberg, rançonnerent quelques
autres en la grande Allemaigne, ayans repoussé Albert &
prins Suintfurt. Au reste, Charles Duc de Sauoye alla de vie à
trespas, laissant Philibert pour son heritier, qui auoit esté long ^{Guerres.}
temps au seruice de l'Empereur. Le Roy de France print les
villes de Bouines & Dinant sur l'Empereur, & les pillà, & de-
struisit aussi quelques forteresses, mettant garnison à Mari-
Ffff. iij.

embourg. L'Empereur venoit au deuant de luy, mais il tira en Hainauld, & print & pillà la ville de Bins & le chasteau, qui estoit le passe-temps de la Roynie Marie qui auoit illec retiré plusieurs beaux ioyaux. Mais en mesme temps les François eurent du pire en Italie, & furent ceux de Siene assiegez bien estroitement.

*Les nocces
du Roy
Philippe.*

LE Roy Philippe arriua en Angleterre le neufiesme iour de Iuillet, & quatre iours apres à Vvinchestre: où estant allé iusqu'à la grand' Eglise bien accompagné de la noblesse, il fut honorablement reçu par l'Euesque de Vvinchestre & quelques autres. Le lendemain il alla trouuer la Roynie. Et le iour suyuant, qui estoit la feste Saint Iacques, les nocces furent celebrées en magnificence royale. Or l'Empereur auoit despesché son Ambassadeur, pour inuestir son filz Philippe du Royaume de Naples en faueur de mariage. Ce fait, il feit son entrée triomphante à Londres avec la Roynie. Sur la fin du moys d'Octobre, l'Empereur luy donna quant & quant le Duché Milan par Ambassade. Et ce-pendant sa Maiesté faisoit bastir vn nouveau fort iouxte Hesdin, qu'il auoit prins & ruiné l'année precedente, pour par ce moyen tenir les François en bride.

*Les E-
statz d'An-
gleterre, où
les An-
glois furent
absoulz.*

LE douziesme iour de Nouembre les Estatz du Royaume d'Angleterre furent tenuz à Londres, ausquelz assistoient le Roy & la Roynie. Le Cardinal Polus y vint pareillement, lequel fut reçu honorablement en tous lieux. En vne sienne harangue publique il en-horta vn chacun à embrasser ardemment l'vnion de l'Eglise Catholique. De maniere que les Estatz du Royaume demanderent pardon du schisme par eux faict à l'encontre du Saint Pere, requerans d'estre absoulz des censures Ecclesiastiques, & estre receuz au sein de nostre mere l'Eglise. Le lendemain (pour vous le faire bref) le Roy & la Roynie avec tout le peuple se meirent à genoux, & le Cardinal donna à tous l'absolution. Je sçay bien que les nouveaux Euangeliques riront bien de cecy, mais qu'ils soient tant grands gaudisseurs qu'ils voudront: si est-ce que fils ne se dessient de ce lien d'anatheme sur

eux prononcé, ils ne verront iamais la gloire de nostre pere celeste. Iadis le diable le plus souuent possedoit ceux qui estoient excommuniez, & à cause que cela ne se fait pas maintenant, on ne tient cōte de l'excommunication, combien que ce soit vn supplice le plus redoutable qui soit. Car combien q̃ le diable ne semble pas occuper le corps, si est-ce qu'il s'impatronise de l'ame de celuy qui est excommunié. Et c'est pourquoy les heretiques veulent si grand mal aux Papes, sçachans bien que nostre Seigneur leur a donné les clefs du Royaume celeste, & l'autorité de lier & deslier en terre: laquelle ils ne luy osteront iamais, quād bien ils deuroient tous creuer pour cela.

1. cor. 5.

Mat. 16.

L'AN 1555. Joachim Vvestphal meit en lumiere vn liure nouveau contre les Sacramentaires, & estoit en la preface d'iceluy, que le Roy de Dannemarc & le Senat d'Hambourg auoient defendu, qu'aucun des citoyens n'hebergeast les Anabaptistes, Sacramentaires, & autres sectaires: & que cest edict auoit esté publié de fresche memoire, pour le danger auquel estoient tombées les Eglises Lutheriennes, par les Sacramentaires venus aux villes maritimes. Plusieurs autres villes de la mesme contrée prohiberent, qu'aucun Zuinglien ne fust reçu en hostellerie. Et certes cela estoit tref-bon, de chasser les loups du troupeau, sinon que Satan chasse Satan, quād vn Lutherien chasse vn Zuinglien. Et pleust à Dieu que les Catholiques eussent monsté telle seuerité enuers tous les sectaires, sans point de faute les affaires de religion se fussent mieux portées.

Vvestphal
contre les
Sacramen-
taires.

OR Calvin (violentant en cela son naturel) s'estoit longuement teu, mais maintenant il feit imprimer sa premiere defence contre Vvestphal. Vray est qu'il ne le nomma point, mais en intention, dit-il, que son ignorance ne fust cogneuë, si quelquesfois il venoit à se recognoistre. Mais à qui se prenoit Calvin? Vvestphal tout incontinent respondit à Calvin en vn liure intitulé, Contre la faulce accusation de quelque Sacramentaire. En mesme temps couroit vn liure d'un Lutherien nommé Tilman, predicat de Breme, intitulé, Le mes-

Caluin es-
crit contre
Vvestphal

L'AN M.D.LV. HISTOIRE DE TOUTES CHOSES

*Les Luthé-
riens cōtre
les Zuing-
liens.*

lange contre les repugnantes opinions des Sacramentaires. Telles fouldres des Lutheriens dōnoient fort à penser à Iehā de Lasco, grand Zuinglien. Au moyen dequoy il vint le mois d'Auril d'Embe à Francfort, où luy fut permis de constituer vne Eglise des estrangers. Car de tel nom voulut estre baptizée ceste synagogue, qui n'estoit pas grāde. Mais quel propos y a-il, de vouloir estre appelez estrangers à ceste occasion? N'auoient-ils pas meilleur moyen de se reünir à l'Eglise Catholique, pour estre delà en auant concitoyens des Saincts, & domestiques du hault Dieu? Or en passant il nous faut prédre garde au iuste iugement de Dieu eternal, par lequel il a permis, que ceux qui faisoient profession d'une secte, laquelle auoit chassé plusieurs Catholiques, & leur auoit fait maintes algarades, ne pouuoient à ceste heure trouuer lieu pour estre en seureté.

*La mort
du Pape
Iules 3.*

LE 18. iour du mois de Mars mourut Sebastian de Hensenstein, Archeuesque de Maièce, & luy fut substitué Daniel Brandel de Homburg, homme fort vertueux, & non moins docte. Le 23. du mesme mois alla de vie à trespas le Pape Iules, troisieme de ce nom. Ceste mort estant cogneuë, le Cardinal Moron, celuy d'Ausbourg & les autres allerent à Rome en grande vistesse, pour eslire vn nouveau Pape, & fut esleu Marcel Ceruin, qui retint le nom de Marcel, personnage fort infigne tant de pieté que de doctrine. Mais le mal-heur nous

*Marcel se
cond.*

*Siene ren-
due à l'Em-
pereur.*

*Pape
Paul 4.*

*Dissensio
entre les
Suisses.*

en vouloit tant, qu'il ne vescu que bien peu de iours. Le 20. iour apres le decès de ce Pape, ceux de Siene reduits à toutes extremitez, en fin furent contraincts se rendre à l'Empereur apres auoir enduré vn long siege. Au Pape Marcel succeda Iehan Pierre Caraffa, aagé pres de 80. ans, lequel fut nommé Pape Paul quatriesme.

SV R la prime-uere sourdit quelque dissension entre les Suisses, à cause que quelques subiects de ceux de Locarne, habitans delà les monts, auoient receu le Zuinglianisme. Ce que les cinq Cantōs & les autres Suisses Catholiques ne vouloient pas souffrir, & les autres, qui estoient Zuingliens, approuuoient le faict. Finalement ceux qui auoient changé de religion

gion, furent contrainctz de vuyder ce pais-là avec leur famille & leurs biens, la plus grand' partie desquelz fut reçue par Messieurs de Zurich.

Sur la fin du moys d'Octobre l'Empereur Charles, ayant ^{L'Empereur donne à son filz ses terres du pays bas.} à soy conuoqué tous les deputez des prouinces & citez de la maison de Bourgongne, donna à son filz Philippe plein pou- uoir & autorité de regir & gouverner toutes les terres à luy subiectes. Or cela se fait en sorte, que le Roy Philippe estoit à costé droit de l'Empereur, & sa sœur Marie à costé gauche, & sembloient presque estre assis en forme triangulaire. Or harangua l'Empereur en presence des assistans, déclarât ses traux & le temps qu'il auoit regné, assez eloquemment & grauemēt, mais de façon que les larmes luy couroient à val la face. Pareillement le Roy Philippe, & Marie Roine d'Hongrie, avec quelques autres Seigneurs, estoient fort tristes & dolentz, si que plusieurs, mesmes d'entre les Cheualiers de l'ordre, ne se peurent tenir de pleurer. Entre autres choses l'Empereur protesta, qu'il n'auoit oncques nyé iustice à personne à son esciement. Illec assista entre autres le Senneschal de Haynaud, vexé de la maladie de gouttes, & partant l'Empereur commanda qu'o luy apportast vn siege par deux fois, mais il le refusa fort modestement. L'Empereur ayant dict ce qu'il vouloit, partit de ceste noble assemblée, s'appuyant sur les espauls de Guillaume Prince d'Orange, & du Conte de Buren.

L'AN 1556. les principaux Capitaines des Sacramentaires ^{Les Lutheriens presque accablés d'ennemys.} respondirent brusquement aux Lutheriens. Car premieremēt Henry Bullinger fait vne Apologie, par laquelle il tasche de monstrier, que les ministres de Zurich demouroiēt en la vraye foy Catholique. Mais croyez cela si vous voulez. Apres Bernardin Ochin escriuit, & meit en lumiere vne defence contre Vvestphal. Et à fin que les Lutheriens fussent accrauantez d'ennemys, Calvin fait imprimer sa seconde defence des Sacramens à l'encōtre de Vvestphal. Si le Pape & toute l'Eglise, sans l'adueu des Zuingliens, eussent escrit si aigrement & courageusement contre les Lutheriens, telz escriptz seroient reputiez pour refueries Papistiques, par lesquelles ilz tascheroient

Gggg.j.

*Le profit
qui nous
vient de
cela.*

d'opprimer la lumiere de l'Euangile. Mais pour obuier à telle calomnie, & à fin que les hommes veissent que ces nouveaux Euangeliques ne preschent point la parolle de Dieu, comme ils se vantent, ains seulement soustiennent opiniaistrement les opinions de quelques vns: Dieu a permis par sa prouidence, que ces miserables & pauvres aucuglez hommes s'entre-battent à coups mortelz, à fin que ceux qui n'ont point encor esté prins à leurs filetz, se donnent garde d'y tomber, & à fin que ceux qui y sont enlaçez, taschent de s'en despestrer le plus tost que faire se pourra. Or pour d'auantage endommager les Lutheriens, aduint q̄ Iehan de Lasco escriuit vne epistre au Roy de Poloigne & à tous les Estatz, par laquelle il defend le Zuinglianisme: & afferme que les Lutheriens contreuient à l'Eglise Catholique & à la sainte escriture, de maniere q̄ leur doctrine ne peut estre receuë sans grandemēt offenser Dieu. Tant d'ennemys doncques pouuoient suffire aux Lutheriēs, mais quād des freslons sont vne-fois agacez ilz ne cessent pas si tost. Les Anglois qui estoient bannis, feirēt imprimer à Geneue vn liuret de la Cene du Seigneur, composé en Latin par Nicolas Ridé, lequel auoit esté brulé en Angleterre comme meschant heretique, & partant les Zuingliens le redigerent au catalogue des martyrs. Et voyla comme tous ces Euangeliques renouelloient la guerre, & d'une concorde dissimulée sortoit tant de dissention & d'opprobre. Il n'y auoit docte ny ignare des deux costez, qui ne feist imprimer quelques liures, harangues, dialogues, Cōfessions, epistres, theses, & prefaces: de maniere que iamais le choc ne fut si ardent qu'il estoit à ceste heure. Car les Lutheriēs faisoient hayr & enuier les Zuingliens, & cōgregerent plusieurs synodes ausquelz fut deliberé de rembarrer tref-bien les Sacramentaires. Ce que les Zuingliens ont escrit des Lutheriens, & adioustent que plusieurs Lutheriens se liguerent avec les Papistes, pour plus aysement leur faire teste. Or ie leur confesse bien, que maintz Lutheriens se feirent Catholiques, recognoissans leur faute: mais iceux ne sont pas moins bendez à l'encontre des Lutheriens, que contre les Zuingliēs. Car ainsi que les heretiques estoient

Les Lutheriens se defendent vaillamment.

si eschauffez à combattre les vns contre les autres, plusieurs se rendirent au troupeau de l'Euangile, & ne voulurent auoir aucune societé avec ceux lesquelz ilz voyoiēt n'estre pas moins differens entr'eux mesmes, qu'ils estoient avec les Catholiques. Les ministres de Saxe s'eslancerent plus fort que tous les autres en cest affaire, mais ceux de Suisse semblerent estre plus modestes parlans contre les Lutheriens. Car à dire vray, en Saxe on trouue de la ceruoyse fort propre pour mettre le feu en teste à celuy qui en vsera beaucoup: & est vray-semblable que les freres Euangeliques de Saxe ne s'espargnent pas à boire, non plus que les autres du païs. Et delà sortent tant de fumées qui entestent, & qui gastent le cerueau entierement, si que ces gens n'escriuent ny ne parlent gueres sobrement. Mais les Suisses boyuent de l'eau, pour faute de vin, le plus souuent: chose que les Saxons hayssent merueilleusement. Et à mon iugement voila pourquoy les Saxons ne se monstrent pas de tout si moderez que les Suisses. Mais tant y a que le Sage a sagement dict, il y a tousiours des querelles entre les superbes. Erard Spneff Lutherien meit en ce temps sa Confession de l'Eucharistie en lumiere, en laquelle il dōne force pinfades aux Zuingliens.

CEPENDANT mourut Conrad Pellican, qui de Cordelier s'estoit fait Zuinglien. En son lieu succeda à Zurich Pierre Martyr Florentin, qui estoit fugitif d'Italie. Erasme Albermeit aussi vn escript en lumiere, contre les Carolstadiens, Sacramentaires, Anabaptistes, & autres. Aduint que Calvin entra en dispute du liberal arbitre avec Iuste Velsius, à Frâcfort, lequel Velsius auoit peu heureusement presché à Coloigne, iusqu'à estre mis en prison. Or comme ce grand Prophete de Geneue vouloit conferer de la matiere des Sacremens avec les ministres dudit lieu, il fut reietté comme vn Zuinglien, crime qui seroit reputé de lese Maiesté, si c'estoit à Messieurs de Geneue à en decider. Aucuns escriuent que Velsius abiura tous ses erreurs, & retourna à l'Eglise Catholique. Ce que ie ne sçay pas encore pour certain: mais si ainsi est, cest homme docte doit recognoistre vn singulier & rare benefice de Dieu,

Gggg.ij.

Par ce
moyen plu
sieurs se
font Ca-
tholiques.

Pron. 13.

La dispute
de Cal-
uin avec
Velsius à
Frâcfort.

L'AN M.D.LVI. HISTOIRE DE TOUTES CHOSES

qui luy a faict la grace de quicter l'heresie . A la mienne volonte que plusieurs feissent le semblable , & retournassent au vray chemin, rādis qu'il est encore iour, ains que la nuyt les cōuure de ses tenebres.

*Les treues
rompues.*

ON auoit nouuellement faict treues pour cinq ans entre l'Empereur, le Roy Philippe, & le Roy de France, mais elles furent rompuës ceste année, & furent les armes reprinses à la grande calamité des pauures gens , qui n'auoient besoing de telle guerre. Semblablement alla de vie à trespas le 26. iour de Feurier Frideric Conte Palatin, & peu apres Iehan Archeuesque de Treues, des Contes d'Eisemberg. Auquel succeda Iehan de Lalen, hōme qui entre autres vertus, desquelles Dieu l'a doué, est fort constant en la religion Catholique. Le 5. de Iuillet mourut aussi le reuerend Euesque de Cyrene Iehan Nopel de Lippie, suffragant de l'Archeuesque de Coloigne, homme fort docte & eloquent, & qui meritoit de viure longuement, pour la bonté qui estoit en luy , & l'assiduité de ses doctes predications: au moyen dequoy Messieurs du chapitre de Coloigne le feirent inhumer en la grand' Eglise , pres de la chapelle, en laquelle reposent les corps des trois Roys.

*La mort
de plusieurs
grands
hommes.*

PAREILLEMENT Adolphe , Archeuesque de Coloigne, deceda le 20. iour de Septembre, & luy succeda son propre frere Antoine, de la maison de Contes de Scauenburg. Et voyla comment en fort bref temps les quatre Electeurs, qui ont leurs maisons sur le Rhin, allerent de ce siecle en l'autre. Au moys de Feurier on veit vne comete en l'air : ce que le plus souuent nous menace de quelque desastre.

*De Theodore de
Beze, Si-
moniaq,
& paillard
infame.*

OR sçachez que Calvin auoit vn braue disciple, qu'on appelloit Theodore de Beze . Cestuy-cy auoit esté quelques-fois licentié en droit, & viuoit gaillardement à Paris du reuenue des benefices qu'il auoit , d'où il retiroit plus de sept cens escuz tous les ans. Sa vie n'estoit que de paillarder & entretenir les Dames, sans faire mention de choses plus execrables. Ce qui estoit l'auant-entrée de son infidelité: & telles mœurs estoient le vray chemin pour le mettre au Labyrinthe de l'heresie, comme il aduint . Car en fin il vendit (commertant

vne Simonie abominable) ses benefices, & ce faict, se rendit à Calvin. Mais tout ainsi que Calvin & ses semblables, architectes de nouvelles heresies, sont inconstans & meschans tout outre, ainsi aduint il de nostre Beze, comme vous verrez par le faict qui s'ensuit. L'an 1556. ce galand s'en vint à Otton Henry Conte Palatin, homme fort grand Lutherien, & estoit le-
dict Beze accompagné de Farel, meschant garnement, qui auoit infecté la ville de Geneue: & les disciples duquel auoient esté Calvin, Seruet, Viret, & autres de mesme paste, & auoit esté banni de Basle pour crainte de sedition. Si presenta Beze audict Prince fort finement vne Confession, laquelle il disoit auoir esté faicte du consentement vniuersel de ceux de Geneue & de Suisse. Ce que faisoit le compaignon pour fin-
sinuer es bonnes graces de ce Seigneur, desquelles il auoit be-
foing alors, à cause que le Roy de France faisoit griefuement punir les Calvinistes, lequel ce galand de Beze appelloit Ty-
ran parlant à ce Prince, & le prioit de destourner le Roy de telz deportemens, & par prieres & par menaces. La Confessio par luy presentée contenoit, que realement & substantielle-
ment le corps & sang de Iesus-Christ estoient donnez & prins soubz les especes des signes visibles: de maniere que vous euf-
siez dict que les Calvinistes & Zuingliens estoient changez entierement en Lutheriens, tant ces meschans sont rusez. Le Prince & ceux qui estoient là presens s'esioüissoient de telle confession, & cuydans que les Sacramentaires fussent conuer-
tis, ilz l'enuoierent au Duc de Vvirtemberg pour le faire participant d'une si bonne nouvelle. Lequel s'estonna fort d'une si soudaine metamorphose des choses, & la loüoit grandement. Le bruiet courut tout aussi tost en Allemagne, & fai-
soit-on déia le triomphe des Zuingliens, ains qu'ilz fussent vaincuz. Mais ceux de Zurich ayans entendu telles menées, furent moult desplaisans d'une si grande imposture, & feirent tous leurs effortz à escrire contre ceste Confession, accusans Beze de faulxeté. Car ces Zuingliens n'haysoient rien plus, que d'auoir bruiet d'auoir quitté Zuingle pour se ioindre à Luther. Et combien qu'en quelques choses ilz soient d'ac-
Gggg. iij.

Farel.

Beze pre-
sente vne
Confessio
au Conte
Palatin,
se monstrant
grand Lu-
therien.Les Zuingliens s'en
fâchent.

cord avec Luther, toutesfois ilz maintiennent que Luther n'a pas esté asser cler-voiant au fait de l'Eucharistie, & qu'en cela il doit ceder à Zuingle. Mais retournons à Beze, qui ne ietta pas le manche apres la coignée. Escoutez donc la ruse de ce maistre homme. Il tasche de faire accroire à ceux de Zuingliens, rich que fraude sert quelquesfois de beaucoup, & faire autre chose qu'il ne semble pas. Et certainement telz sont les moyens, qui ont si fort auancé la cause de l'heresie de nostre temps. Ce que les hommes n'aduient pas si tost, & quand ilz s'en seront vne-fois apperceu, tous ces enchantemens de noz Euangeliques s'en iront en fumée. Tant y a doncques que ceux de Zurich ne se contentans pas de ce payement de Beze, ne le receurent iamais, que premier il n'eust confessé sa faute. Apres ce, il retourne à ses Suisses & Sauoyens, & pour recompenser la premiere fraude par vne seconde, & mon- strer qu'il auoit deceu les Alemans, il escriuit contre Vvestphal & Heshusius, & confessa que le corps de Iesus-Christ n'estoit point autrement present en la Cene du Seigneur, qu'il est au baptisme, à la predication, à la sainte escriture, & toutes & quantes foys que le fidele applique son esprit à mediter quelque chose de Iesus-Christ. Et toutesfois, à fin qu'il semble conuenir avec les Alemans, il confesse que le vray corps est contenu & receu en la Cene du Seigneur: mais il veut que la Cene ne soit pas ce que les hommes font selon l'ordonnance diuine, mais que la principale partie d'icelle est faicte au ciel, auquel nous sommes par Foy & esprit. Et voyla comme ces mal-heureux trompent par telles baliuernes, premierement eux-mesmes, & puy les autres, pendant qu'ilz se iouent en la matiere de religion comme dans vn eschaffaut, se changeans de forme en autre, de maniere que vous diriez qu'il y a plusieurs qui parlent, quoy qu'il n'en y ayt qu'un. C'est ce galand de Beze qui a faict si bien ses besoignes en France, emportant le plus beau & le meilleur de ce qu'il a peu empoigner, & non-obstant tout cela, c'est le grand Apostre & Prophete de noz heretiques. Dieu tout-puissant nous face la grace, d'estre à la parfin cler-voy-

*La ruse
par laquelle
le Beze se
purgea en
uers les
Zuingliens.*

*La senten-
ce de Beze
touchant
la Cene.*

ans, à fin que nous puissions cognoistre la fraude & l'astuce des heretiques, & que le moindre de leurs soucis est de se soigner de nostre salut.

LE Roy Ferdinand desirieux de se fortifier au mieux qu'il pourroit contre les courses des Turcs, demanda ayde pour ce faire à tous ses subiers. Ceux de la basse Autriche s'assemblēt à Vienne, & promettent de faire ce qu'il demandoit, moyennant que l'Euangile leur fust concedé: ce que leur estant octroyé, ils esperoient que tout iroit bien contre le Turc. Mais ils n'impetrerent rien, voyant bien le Roy, que les Turcs n'auoient oncques plus affligé les Alemans, que en cestuy nostre siecle, auquel les hommes ont voulu goustier l'Euāgile de Luther. Et à la verité, si l'Alemaigne ne remet sus l'ancienne religion, & si les heresies ne sont chassées de tout en tout, par lesquelles nous voyons tant d'inimitiez, guerres & partialitez estre aduenues, elle ne pourra iamais eschapper, qu'elle ne face ioug ou au Turc, ou au Moscouite, ou au Tartare, si que estant accablée en telle misere, elle sçaura que c'est de faire bāque-route à la pieré. Et pleust à Dieu que nous prinssions exemple à la calamité des Grecz. J'ay belle peur que l'ire de Dieu soit venuē sur nous iusqu'au bout, l'argumēt de laquelle peult estre veu en nostre follie, laquelle fait que nous ne contemplons point les gentils fruiets du nouveau Euangile. Il sembloit que Luther eust apporté vne nouvelle lumiere au monde, si que le peuple l'a embrassée à l'enuy, les plus sages l'ont examinée, & plusieurs l'ont totalement reiettrée. Or apres qu'on a veu que ses efforts s'augmentoient de iour à autre, à cause qu'ils ne furent empeschez des le commencement, incōtinēt sont sortis d'autres meschans garnemens, qui nous ont voulu communiquer vne autre lumiere, disans qu'il ont veu, ce que Luther n'auoit oncques veu. Et voila comme le peuple fut abreuué de plusieurs sortes d'Euangile, si que vous en verrez aucuns par l'Alemaigne, qui receurent l'opinion de Luther, les autres de Carolstad, les autres des Anabaptistes, de Zuingle, de Suencfeld, Osiander, & semblables hommes. Et sont si aucugles, que iamais ils ne peuuent voir, que depuis qu'ils se

*Le Roy
Ferdinād
ne veut
endurer les
heretiques.*

1. Theff. 3.

*L'aucugle
ment de ce
temps.*

*Misere grã
de pour la
religion,
en nostre
temps.*

sont sequestrez de l'vnion de l'Eglise Catholique, ils ont esté imbuz de tant d'opinions differentes les vnes des autres, que maintenant plusieurs sont logez aux faulx-bourgs de l'Alcoran, ne sçachãs que croire. Ce qui leur est aduenü à bon droit, pour-ce qu'ils ont temerairement presté l'oreille, & si ont creu legerement à quelques nouateurs, au lieu qu'il deuoient perseverer constamment en celle religion, laquelle auoit esté tenuë par tant de siecles & en l'Alemagne & en l'Eglise Catholique, & qui est encor' obseruée en plusieurs lieux. Et pédant qu'ils obeissent à des trompeurs & engeolleurs, qui ne practiquent que la perdition des ames, ils ont esté diuisez en bandes infinies, d'où sont sorties mille rancunes, animositiez, & inimitiez particulieres, qui causeront l'entiere ruine de l'Alemagne, si quelquefois les Alemans ne viennent à s'accorder par-ensemble. Et c'est ce qui haüce le courage aux Turcs, lesquels n'attendent que l'occasion de nous courir sus à leur commodité, & esperent de nous mettre en vne misere extreme, & de laquelle il sera impossible de nous releuer. Et y a grand danger qu'ils ne nous accablent, ce que iamais ils n'eussent peu faire, si nous estions tels obseruateurs de la religion Catholique, comme noz ancestres ont esté. Mais c'est assez parlé de cecy. Ferdinand doncques (à fin que ie reprène mon propos) ne voulut oncques permettre que la religion fust changée en ses terres, & neãtmoins il enuoya vne armée cõtre les Turcs, & obtint quelques heureuses victoires contr'eux, au moyen desquelles il amena grand butin.

*Vicloire
du Roy
Ferdinãd*

*Vne femme
deceue
dõne l'Eu
charistie à
vn Iuif.*

C E S T E année aduint vne chose fort memorable au Royaume de Poloigne. Vne pauvre femme, nommée Dorothee Lazezque, Chrestienne de profession, auoit serui long temps vn Iuif en la ville de Sachazeth, gueres loing du chasteau de Louitz. Or ce Iuif luy va mettre en teste, qu'ayãt prins le Saint corps de nostre Seigneur, à la maniere des Chrestiens, elle le luy apportast, & pour la recompense de ce crime le Iuif luy promet trois Dalles, & vne robbe à franges de soye. Vous verrez qu'est-ce que la faim d'auoir argent contrainct les hommes de faire. La femme consent à l'offre, quoy que le present

present ne fust gueres grand, & la vigille de Pasques elle se transporte en vn village appellé Cortzò, où estant elle s'approche de l'autel comme les autres, & reçoit la sainte Eucharistie : laquelle peu apres ostant de sa bouche, elle la meit sur vn linge, & le Mardy de Pasques elle la donne au Iuif son maistre. Qui fut visité de trois autres Iuifz voylins de la ville, nommez Michalec, Sachau, & Ioseph, lesquelz apporterent la sacré-sainte Eucharistie en leur sinagogue, & la perçerent à beaux coups de dagues & de cousteaux. Aduint que tout soudain le sang issit de la sainte hostie, lequel ces desloyaux iuifz recueillirent avec vn cuillier, & le meirēt en vn verre. Si ne peut longuement demeurer ce mal faict, sans venir à la notice des hommes. Et partant ceste maudicte femme fut prise à Sachazel, & puy le iuif son maistre, lesquelz deux confesserent le faict. En ce temps Sigismond Roy de Poloigne estoit à Vilne, qui est la capitalle ville de Lithuanie, & c'estoit en ce temps que plusieurs Polonnois disoient, que necessairement le peuple deuoit receuoir la sainte Eucharistie souz les deux especes. Le Roy donc estant assçauāt de tout ce que dessus, mande au Lieutenant de la ville, qu'il feist inquisition sur ce faict, & s'il trouuoit la chose estre telle qu'on disoit, qu'il feist griesue punition de tous ceux qui en estoiet coupables. Au moyen dequoy la femme & le iuif, ayans eu premieremēt la question, furent bruslez le vendredy apres le iour de l'Ascension de Iesus-Christ. Et le premier iour de Iuin tous les iuifz qui auoient esté consentans du crime, furent bruslez, hors mis vn qui s'en fuyt. Voyla comment Dieu a voulu monstrier par miracle, (comme maintesfois il est aduenü ailleurs) que ceux sont bien incredulē, qui veulent follement receuoir le saint calice, comme si Iesus-Christ n'estoit pas tout aussi bien souz vne espee, comme il est souz les deux : & si telz hommes estoient bien instruiēt en la religion Chrestienne, ilz scauroient que le corps de Iesus-Christ, depuys qu'il sortit hors du sepulchre, ne peult estre separé de l'ame, du sãg, de la diuinité : & partant ilz se contenteroient volontiers d'une seule espee. Or cecy aduint fort commodement en Po-

Hhhh.j.

*Icelle per-
cée rend
du sang.*

*Les iuifz
sont punis.*

*Ce mira-
cle seruit
de beau-
coup en Po-
loigne.*

L'AN M.D.LVI. HISTOIRE DE TOUTES CHOSES

Louys Lipoman Legat du Pape. loigne, pour-autant que plusieurs ne cessoient de demander le calice, & pour ceste cause le Pape auoit enuoyé pour son Legat, vn personnage fort docte & remply d'une pieté insigne, nommé Loys Lipoman, Euesque de Verone, lequel feit grandz fructz au Royaume de Poloigne. Le Roy mesmes fut fort confirmé en l'vniõ de l'Eglise Catholique par ce miracle, & reçeut beaucoup plus volontiers le Legat du S. Pere.

L'Empereur retiré en Espaigne, vacq. à religion. L'EMPEREUR Charles ayât inuesty le Roy Philippe son filz de toutes ses terres & seigneuries, print la volte de Zelande, & d'illec, ayant trouué la mer calme, print la route d'Espaigne avec ses deux sœurs, les Roynes Eleonor & Marie. Où estant arriué, il accomplit ce qu'il auoit pieça souhaitté, entant qu'il se rendit religieux en vn lieu fort plaisant & bien sain, appellé vulgairement Iuste, auquel y a vn conuent de l'ordre S. Ierosme. Estant là, il vacquoit seulement aux diuines meditations, viuant fort sobrement, chastement, & avec vne moderation de mœurs tref-admirable. Ainsi doncques cest Empereur monstra à tout le monde, qu'à tort & sans cause il auoit esté souuent calomnié d'estre ambitieux & trop desireux de gouverner en ce monde, veu qu'il se despouilla de tout ce qu'il auoit en maniment, quitta totalement le monde, & s'enferma en vn desert pour vacquer à Dieu à son plaisir. Peut estre que le monde ne meritoit pas vn tel Prince, & que partant, se complaignant d'une ingratitude trop grande, en fin il choisit de viure sans aucune domination ou commandement, pour courtirer son Seigneur comme il desiroit. Je sçay bien qu'aucuns estimeront, que c'estoit vne pure follie de choisir vn estat si vil & abiect, consideré que cest homme auoit esté vn grand Monarque: mais c'est le iugement des hommes, qui est encliné à choses terrestres. Car ceux qui ont plus gousté de l'amour de Dieu, ne sont ignorans que la vraye maniere de regner, est de seruir à Dieu: & que le plus grand honneur qui nous pourroit aduenir, est quand nous nous despouillons de toute la gloire de ce monde, pour l'amour de nostre Dieu.

ENVIRON ce temps Otton Henry Eleateur Palatin, &

Charles Marquis de Bade, chasserent l'ancienne religion de leurs seigneuries, & introduyrent la nouuelle. Or, comme i'ay dict quelquesfois, nul ne se doit esmerueiller si le peuple embrasse d'un grand desir ceste heresie: car elle est douce & plaisante à nos concupiscences naturelles. Ilz permettent de piller tous biens d'Eglise: ieufner, veiller, prier, mortifier la chair, mespriser le monde, estre chaste, sobre, pudic, & exercer vertus semblables, tout cela sont inuentions Papistiques: la seule foy nous iustifie. La Confession de nos pechez & la penitence, sont resueries inuentées par les Papistes pour bourreller les consciences. Vous voyez que tout cela plaist au monde. Et neantmoins l'escriure parle bien autrement; & quelque beau-semblant que nous facions, la conscience nous remord au dedans. Ceux qui appartiennent à Iesus-Christ, (dict l'Ap^{ostre}) ilz ont crucifié leur chair avec les vices & concupiscences. Fay cela, & tu seras sauué. N'aye aucune societé avec les heretiques. Lors que le filz de Dieu viendra iuger les vifz & les mortz, ilz experimenteront que bien lourdement ilz ont esté abusez.

A v moys de Septembre vne horrible tempeste sourdit à Locarne, par delà les Alpes sur les frontieres de Suisse. Vn tourbillon descendit des nuës grand matin, lequel ruïna quelques edifices. Et sur le midy la pluye, le tonnerre, & les esclairs durerent par quatre heures si impetueusement & horriblement, que les habitans de la contrée pensoient que le dernier iour du monde fust venu. De la pluye qui cheut s'amassa vn torrent si grand, qu'il emportoit arbres & maisons, & si n'y auoit lieu par lequel il se peust escouler. Au moyen dequoy il s'espendit sur toute la terre là prochaine, & fit vn lac. Mais en fin il trouua vne sortie, & passa si violemment, qu'il emportoit bestail & hommes quant & luy, tellement que le dommage qu'il feit là autour fut fort grand.

LA peste fut fort grande ceste année, & principalement sur le Rhin, comme à Strasbourg, tellement que Iehan Sleidan, qui a infecté tout le monde de ses pestilencieux commentaires, en mourut. Il y auoit deux fort excellens person-

Hhhh.ij.

*La religion
changée es
terres des
Conte Pa
latin: &
pourquoy.*

*Galat. 5.
Luc. 10.*

*Tempeste
terrible
entre les
Alpes.*

*Vn torrent
faict des
pluyes.*

*Sleidan
meurt de
peste.*

nages de Coloigne, Iehan Gropper esleu Cardinal, & Eberard Billic Prouincial des Carmes, lesquelz auoient delibere d'escrire contre ce Sleidan, mais ny eux ny Sleidan ne vescu-
rent guerres. Or ie veux bien qu'on sçache, que ce que i'ay
maintesfois dict contre luy, n'est point pour vne rancune, car
ie ne l'ay oncques veu: mais i'abhorre le mensonge, & son he-
resie. Il y a plusieurs qui cognoissent fort bien Iules Pflug E-
uesque de Numbourg, homme qui sçauoit sur l'ongle tout
ce qui s'estoit faict & passe en l'Empire, pour la vieillesse qu'il
auoit. Cestuy faisoit lire les commentaires de Sleidan à vn
homme de ma cognoissance, lequel pour lors estoit de la
maison de l'Euesque. Or comme on luy lisoit, voyant que Sle-
idan auoit falsifié les faictz qui luy estoient par trop cogneuz,
il s'escrioit de fois à autre, ha le pandard a menty en cest en-
droict-là. Semblablement l'Empereur Charles oyant quel-
quesfois lire les commentaires de Sleidan, il s'escrioit sou-
uent, le meschant a menty, le meschant a menty. De maniere
que sa Maiesté auoit donné charge à quelcun, de faire imprimer
syncerement tous les actes des iournées imperiales, à fin
de refuter Sleidan: mais ie ne sçay comment cela fut empes-
ché, & lesdictz actes furent tous enuoyez en Espagne. Con-
clusion, on ne doit iamais croire vn homme addonné à son
heresie.

*Jugement
de l'Em-
pereur &
de Iules
Pflug, sou-
ehant Sle-
idan.*

*Senfuit
l'histoire
de George
Dauid.*

C E S T E année George Dauid mourut à Basle, duquel
nous auons dict quelque mot cy dessus. On dict qu'il estoit
natif de Delphes en Hollande. Mais comme l'Empereur fai-
soit punir ceux qui suyuoient ses erreurs par la basse Alemai-
gne, il se retira à Basle le premier iour d'April mil cinq cens
quarantequatre avec quelques siens compaignons. Ayant là
diligemment consideré l'estat de la ville, il forma vne com-
plaincte au Senat, de ses aduersitez pour la querelle de l'Euan-
gile, demandant au surplus d'estre admis en la ville avec vne
assez ample famille, pour l'amour de Iesus & de son Euangile.

*Il est re-
seu à Bas-
le, fuyant
son pays.*

Le Senat luy feit responce fort honnestre, si qu'il luy permet
d'entrer en Basle avec ses gens. Il estoit d'une stature trappe,
la barbe rousse, les yeux estincellans, la parolle lente & gra-

ue, & tout son maintien estoit honnesté & loüable, si qu'on eust dict qu'il n'y auoit en luy que bonté & simplicité. Ayant donc receu la responce du Senat, le vingtcinquesme iour d'Aoust il retourna à Basle avec vn grand train, menant sa femme, ses enfans, ses seruiteurs, & autre belle compagnie, qui furent tous les bien venuz. Venu qu'ilz sont, ilz achetent ^{il achete} ^{maisons} vne maison en ville, & hors la ville ilz acquierent vn cha- ^{chasteau.} steau & beaucoup de belles mestairies, ilz traictent mariages, & taschoient par tous moyens à estre veuz gens de bien & religieux, à fin que personne ne soupçonnast mal d'eux. De maniere que ce galland commença d'estre grandement estimé entre quelques vns. Et ce qui donnoit grand lustre à ceste opinion ia conceüe, c'estoit qu'avec l'or & l'argent qu'il auoit, avec les richesses qu'on luy apportoit de iour en iour de la basse Alemaigne, il estoit traicté comme vn petit Roy, mais toutesfois cela se faisoit avec vne espee de modestie & tranquillité. Tous ceux de ceste ample famille auoient chacun ^{Sa maison} ^{estoit hon-} leur estat & vacation, & n'estoit personne contrainct de faire ^{table.} chose outre ses forces, & malgré luy. Mais le fin compaignon ne se faisoit pas nommer Dauid George, ains Iehan de ^{il change} ^{son nom.} Brucl, de façon qu'ilz auoient ces trois choses en grande recommandation. La premiere, de ne deceler point le nom de Dauid George. La seconde, de ne dire point quel mestier il auoit faict en son pais. La troisieme, ne descourir à personne de Basle ou de toute Suisse, ses opinions. Et cependant il augmentoit sa secte tant qu'il pouuoit és basses Alemaignes & autres lieux loingtains, par lettres, liures & messagers: & neantmoins il n'en disoit mot en Suisse. Mais que peult la finesse humaine contre le conseil de Dieu tout-puissant? Aucuns de ses plus fauoritz commencerent à douter de sa doctrine. Et partant il appelle le plus apparent d'entr'iceux, auquel il se fioit beaucoup, & luy va demander en cholere, ^{Vn de ses} ^{grandz fa-} ^{militers le} ^{quitte.} pourquoy il doutoit d'une chose trop certaine: fil ne croyoit pas, qu'il estoit celuy vray Dauid, enuoyé de Dieu pour restituer en ces derniers temps le Royaume d'Israël, & le tabernacle de Iacob. Mais toutesfois apres auoir parlementé lon-

guement ensemble, l'autre demeura en son opinion, de maniere qu'il quitta son maistre, & en-couragea plusieurs à n'adiouster plus de foy à ses bourdes. Oultre ceste separation d'un homme si fort son familier, aduint qu'une de ses maisons qu'il auoit en la ville fut frappée de foudre, & un autre qu'il auoit fait bastir superbement, brussa avec tous les meubles: & un peu apres le plancher de la maison, en laquelle il habitoit, tumba. Mais ce qui luy donna plus fort martel en teste, fut la venue d'un homme d'autorité venant des basses Allemagnes, lequel auoit dépeint de toutes couleurs & David & toute sa famille à Basle. Ceste nouuelle entenduë, premiere-ment la femme tomba en maladie, de laquelle elle trespassa, & luy-mesme, qui s'estoit fait immortel, la suivit peu apres: ce qui aduint l'an mil cinq cens cinquante six le vingt-cinquieme iour d'Aoust. Son corps fut ensepuely honorablement en l'Eglise Saint Leonard. Or sa mort donna fort à penser à tous ses disciples, qui auoient opinion qu'il ne deust iamais mourir, mais encore auoient-ils quelque esperance qu'il deust resusciter dans trois ans, comme il leur auoit promis, disant en oultre que lors il accompliroit ce qu'il auoit tousiours dict. Estant mort, on commença peu à peu à descouurer ses ruses: de sorte que plusieurs s'apperçurent, que celuy qui se faisoit nommer Iehan Bruel, ou Iehan Benningen, du chasteau qu'il auoit acheté à Basle, estoit David George, meschant garnement, qui s'estoit vanté d'estre Roy & le Messie. Au moyen dequoy le Senat de Basle voulut s'enquerir plus diligemment sur ce fait, de façon que le douzieme iour de May de l'an 1559. (car ie veux dire tout en un mesme lieu, sans despiecer ceste histoire) tous les enfans & toute la famille de David George, & mesmes ceux qui l'auoient cogné & fréquenté, furent tous conuozquez au Palais. Estans là venuz, le Preuost, ayant au preallable dict un mot de leur simulation & feintise, leur va demander, si le defunct s'appelloit proprement Iehan Bruel, si il auoit point quelquesfois enseigné soit en priué soit en public, & qu'est-ce qu'il auoit enseigné. Alors quelques vns respondirēt qu'ils n'auoient point de secte par-

*Dieu le
punist.*

*Luy & sa
femme
meurent.*

*On décou-
ure qui il
estoit.*

*On fait
diligente
inquisition
à Basle.*

ticuliere, & les autres dirent, que leur religion n'estoit autre, que celle qui estoit enseignée à Basle. Et qu'au demeurant ils ne sçauoient point, que le defunct fust appellé autrement que Ichâ Brucl, nom qu'il auoit prins de son pais: bien estoit vray, que quelquesfois il auoit dict certaines choses en particulier, plus pour exhorter, que pour enseigner. Or estoient-ils onze, desquels on ne sçeut rien arracher, & fallut les interroger separément: mais encore ne peut-on rien tirer d'eux. Au moyé *On trouue ses liures.* dequoy on les met tous en prison: & ce-pédant on fait fouiller par leurs maisons, pour voir si on pourroit trouuer aucuns escripts. L'Inquisition estât faite, on emporta plusieurs lettres & liures, avec le portraict de Dauid fait au vif, & furent donnez lesdicts liures aux Theologiens, pour examiner s'il n'y auoit rien contenu discordant de la religion ia reçeuë. Iceux feirēt fort bien leur deuoir sur ce qui leur auoit esté enioinct, & r'apporterent le tout au Senat. Parquoy furent enuoyez de par les Senateurs les sept hōmes qui cognoissent des crimes, lesquels ayans interrogé les emprisonnez, ils ne peurent tirer d'eux chose que ce fust. Toutesfois, pourautant que quelques *Quelques vns confessent le fait* vns sembloient chanceler, on s'enquiert encore plus diligemment: si bien qu'aucuns confesserent, que celuy qui se disoit estre Iehan Brucl, estoit Dauid George, qui auoit esté cause de tant de troubles és basses Alemaignes. Mais quand on leur proposoit certaines opinions contenues és escripts d'iceluy, ils disoient que iamais ils n'auoiēt ouy telles opinions de luy, ains qu'ils detestoient grandement vne telle doctrine. Que s'ils auoient erré en quelque chose, & estoient encor' à present en erreur, ils requeroient d'estre mieux instruitz. Tout cecy ayāt esté communiqué au Senat par les sept hommes, on enuoya certains predicateurs & Theologiens par deuers ceux qui estoient en prison, & à toutes les femmes de celle famille. Venu qu'on est à eux, tant les hommes que les femmes respondirent, qu'ils detestoient ce qui leur auoit esté proposé comme inuenté par Dauid George, & qu'ils ne receuoient autre foy, que celle qu'on receuoit à Basle. Ce fait, le Senat fait examiner quelques poincts de la doctrine dudit Dauid, à l'Uni-

*La doctrine
condam-
née par l'uni-
uersité.* uersité & aux prescheurs. Aduint dōcques qu'estans tous cō-
gregez par le Recteur de l'Vniuersité, ils condamnerent tous
les poincts d'icelle doctrine. Apres, le Senat deliure de prison

ceux qui y estoient: mais avec quelques conditions sur ce fai-
tes. L'une desquelles estoit, qu'ils apporteroient incontinent
& sans delay au Senat, tous liures imprimez ou nō imprimez,
qui resentiroyent la doctrine de Dauid George, & ne garde-
roient en leurs maisons aucuns liures escriptz en langue Hol-
landoise. Voyla le vray moyē pour fermer le passage à toutes
heresies, quelles qu'elles soient. Mais les Zuingliens & leurs
conforts ne voudroient pas cōfesser, que cela se doit faire de
leurs liurés. Deux iours apres les iuges Criminels consultent
de ce qu'il falloit faire du corps de Dauid George, de ses li-

*Les iuges
font brus-
ler le corps,
apres la
mort de
Dauid.*

ures, & autres choses à luy appartenantes. Et entre autres fut
allegué, que pour sa meschante doctrine plusieurs personnes,
& nommément sa propre mere, auoient perdu la vie en la bas-
se Alemaigne, & qu'il en eust eu autant s'il n'eust gaigné la vil-
le de Basle, quoy qu'il alleguast autres excuses. Puis il fust or-
donné que tous ses escriptz fussent bruslez, & que son corps
ou ses os seroient tirez hors du sepulchre, pour estre menez
par le bourreau au lieu du supplice hors la ville, avec ses li-
ures & son portraict tiré au vif: ce qui seroit redigé en cendres
audiect lieu, cōme on feroit de la personne mesme de Dauid,
si elle y fust esté. Et quand à ses biens, ils furent tous cōfisque-
z. Au reste, quiconque diroit ou feroit chose repugnante à cest
arrest, il encourroit la mesme peine. Voyla donc cōme la me-
moire de ce meschant fut abolie. Quand le bourreau voulut
faire brusler le corps, il le dressa premierement de telle sorte,
que ceux qui auoient cogneu cest homme quand il viuoit, le
pouuoient alors recognoistre, pourautant qu'il estoit encor

*Cōme son
corps estoit
vestu.*

assez entier avec sa barbe rousse. Son accoustremēt estoit tel
que vous orrez. Son chapeau estoit de soye veluē, garny de
velours, avec vn chappellet de rosmarin. La teste reposoit sur
des quatreaux fort riches, & le corps estoit vestu d'une robe
de camelot vndé, & enseuely en vn suaire biē blanc. Car ainsi
ses heritiers l'auoient faict ensepuelir. Grand peuple accourut
pour

pour le voir brusler quant & ses liures. Cest homme auoit eu vn grand esprit, bien qu'on estime son pere auoir esté vn plaisanteur, & luy-mesme estant encore ieune auoit faict mestier de peindre sur le verre: mais son esprit estoit meschant & malitieux, comme il est facile à voir par les liures qu'il a composez en langue Hollandoise. Au reste il ne scauoit que parler le langage de son pais. Sa doctrine estoit remplie de maintz erreurs & blasphemes, & partant ie me contenteray de vous en dire quelques vns. Il a osé escrire, que toute la doctrine de Moyse, des prophetes, & de Iesus-Christ mesme estoit imparfaicte, & inutile pour acquerir vne felicité entiere, & qu'elle auoit esté donnée en intention de contraindre les hommes comme petitiz enfans: mais que sa doctrine estoit parfaicte, & pouuoit beatifier les hommes. Il affermoit qu'il estoit le vray Messie, tref-cher filz du Pere, né non point de chair, ains du S. Esprit: qu'il releueroit la maison d'Israel & les vrayz enfans de Leui, & mesme le vray tabernacle de Dieu: & ce non point en croix, ny par mort & choses aduerses, comme vn second Christ, mais bien par clemence, & par l'amour & grace de l'esprit de Iesus-Christ, lequel le Pere luy auoit donné. Il se van- toit d'auoir la puissance de remettre ou ne remettre point les pechez, & qu'au dernier iour il iugeroit tout le monde: qu'il estoit bien plus grand que Iesus-Christ, attendu qu'il estoit né de femme en chair, mais que luy estoit né & oinct Christ celeste par le Sainct Esprit. Plusieurs autres choses aussi absurdes & detestables estoient de sa doctrine, & neantmoins il taschoit de prouuer toutes ces absurditez par tesmoignages des escritures saintes. Car il n'y a heretique si abominable, qui ne se targue de la pure parolle de Dieu. Et par tant ie m'esmerueille cōme les hōmes ne se despestrent horsmais des predicans du nouueau Euangile diuisé en tant de sectes, lesquels ne cessent de produire des erreurs fort horrible souz le voy- le de la parolle de Dieu, dont plusieurs ont ia seruy de pasture aux diables. Et d'auantage il nous faut noter l'arrest, par lequel le corps & le portraict de ce galand furent bruslez, & le supplice mesme prins de ceux qui auroient osé dire mot à

*Quelle doctrine
crime le
meschant
annonçoit.*

*Note que
les hereti-
ques punis-
sent ceux
qui leur
sont here-
tiques.*

l'encontre de ceste sentence. Car nous autres, qui par la grace de Dieu sommes Catholiques, sçauons assez qu'à bon droit tous heretiques sont punissables. Mais toutesfois quand le Pape ou les Magistratz Catholiques font executer telles pestes, Dieu sçait comme les sectaires les accoustrent à plaisir. De maniere que si les Zuingliens, Lutheriens, ou autres punissent vn heretique, cela sera fort bien fait: mais si les Catholiques font le mesme, c'est mal fait. Ceux d'Angleterre (comme cy deffouz sera dict) ont bruslé le corps de Bucer & de Fagius, dequoy Foxus & ses complices sont marrys. Mais ilz deuroient plustost se plaindre de leurs Messieurs de Geneue, lesquelz, comme on dict, feirent n'agueres pendre le corps de certain homme, qui auoit demandé qu'on luy administrast ses sacremens à la Catholique. Brief, tout est permis aux predicans Euangeliques, mais rien au Pape & aux Catholiques: & quand vne mesme chose est faite par Luther, Zuingle, Calvin & leurs semblables, c'est le pur Euangile & vne vertu grande: mais si les Catholiques font le mesme, c'est vn fait de l'Antechrist, meschant & execrable.

*La mort
d'Albert
de Brandebourg.*

L'AN 1557. le 8. iour de Ianuier deceda Albert de Brandebourg, celuy qui quelques années auoit esté le fleau de l'Allemagne. Premièrement estant allié avec Maurice il persecuta l'Empereur, & puis ceux de Noremberg, & d'auantage les Euesques d'Vircibourg & Bamberg. S'estant allié du Roy de France, il le quitta par apres, & print le party de l'Empereur, & ce fut lors qu'il print le Seigneur Duc d'Aumale. Apres cela, il donna vne cruelle bataille à Maurice, en laquelle fut faite grande tuerie des Alemans, & Maurice mesmes y mourut, avec les deux filz d'Henry de Brunswic. Et si Dieu ne l'eust osté de ce monde, on dict qu'il alloit faire terribles choses. Dieu quelquesfois chastie les pechez des hommes par telz meschâs, comme nous lisons que Attyla Roy des Huns, cruel & selon tyran, s'appelloit le fleau de Dieu, par lequel il chastioit les offences humaines. Cestuy Albert mourut aagé de 35. ans. Pareillement trespassa Bonne Sforce, mere du Roy Sigismond qui regne à present en Poloigne, s'estant par deuant

retirée à Bar en l'Apouille, à cause des heresies qui rampoient en Poloigne de iour à autre.

LE 21. iour de Feurier les Anglois bruslerent les corps de ^{Les corps de Bucer & de Fagius bruslez en Angleterre.} Martin Bucer & de Paul Fagius, tellement que l'Eglise, en laquelle ilz auoient esté inhuméz, fut consacrée pour la seconde fois, à la maniere Chrestienne. Et pourquoy est-ce que les Catholiques ne se porteront de telle sorte enuers les heretiques, attendu que ceux de Basle ont fait le semblable à Dauid George, comme cy dessus vous a esté recité? Les Chrestiens ne doiuent auoir aucune societé avec les heretiques, non pas mesme la terre en laquelle ilz sont enterrez. Saint Irene ^{De ne hater point les heretiques.} recite au troisieme liure chapitre 3. vne chose qu'il auoit apprise de Saint Polycarpe, disciple de l'Apostre Saint Iehan: que cest Apostre voulant certain iour aller aux baings, & y voyant l'heretique Cerinthe, il s'enfuit à grand' haste sans se lauer, disant, ostons-nous d'icy, ie vous prie, de peur que le baing, auquel est Cerinthe l'ennemy de verité, ne se rompe. Tu pourras voir, si tu veux, Nicephore au troisieme liure chapitre quatorzieme de l'histoire Ecclesiastique.

ENVIRON le mesme temps estant suruenue vne grande famine par tout le país bas, le Roy Philippe imitant la debonnaireté de son pere, fait venir des bledz de país estrange, qui seruirent beaucoup: & croit-on que durant ceste famine il nourrissoit plus de trois mille pauures à ses propres despens.

CE fut en cest an, que le Roy de France & le Roy d'Espaigne s'entre-feirent de plus beau la guerre. Car sçachez que ^{Occasion de la guerre du Roy de France & du Roy d'Espaigne} l'année precedente y auoit eu quelque querelle entre le Pape & le Roy Philippe, de maniere que le Duc d'Albe ayant fait grand amas de gendarmerie au nom du Roy Philippe, estoit déia emparé de plusieurs places en Italie, & entre autres d'Ostie, ce qui engendra grand trouble en la ville de Rome. Or en ce temps treues estoient entre les Roys de France & d'Espaigne. Neantmoins le Roy de France desireux d'ayder au Pape, enuoya deux mille hommes de pied à Rome, lesquels s'estans ioinctz avec la gendarmerie du Pape, meirent

*Le S. de
Guyse en
Italie.*

l'ost des Espaignolz en grand' disette . Ceste année doncques fut enuoyé l'inuaincu Duc de Guyse en Italie, avec douze mille hommes de pied & deux mille cheuaux, lesquelz ayans esté inquietez & prouoquez par ceux de Valence , ville confederée avec le Roy Philippe , ilz la prindrent, & y meirent puyz apres bonne garnison.

EN mesme temps vne autre armée du Roy de France estoit en Artois, si bien que vers la feste des Roys elle tascha, (mais en vain) de prendre la ville de Douay , & print la ville de Lense , de laquelle ilz emporterent gros butin . Et voyla comme les treues accordées pour cinq ans , ne demeurèrent gueres bien vn an sans estre rompuës, dont sourdit vne guerre fort cruelle & sanglante . Or tandis que l'armée de France estoit en Italie , le Roy Philippe gaigna la iournée de Saint

*Comment
le Duc de
Sauoye
gaigna la
renommée
victoire de
S. Quentin.*

Quentin sur les François . Il auoit enuoyé Philibert Duc de Sauoye avec son armée , lequel se ruant sur les terres Françoises, on fut tout esbahy qu'il fut pres la ville Saint Quentin, où il se campa , & assiegea la ville . Au moyen dequoy le Roy Henry despescha celle part Anne de Mommorancy son Connestable , avec trente-deux enseignes de pietons Alemans, que conduysoit le Conte de Ringraue , & vingt-deux enseignes de gens de pied François , & quatre ou cinq mille cheuaux, avec quatorze grosses pieces d'artillerie. Et cependant ledict Sieur Connestable faisoit faire quelques escarmouches à ses gens , pour trouuer moyen de r'aitailler la ville . Mais le Duc Philibert, Lieutenant general de l'armée du Roy Philippe, marche au deuant des François, laquelle armée estoit de bien dix mille Reistres, (sans faire mention du reste) chacun desquelz auoit quatre ou cinq pistolles, oultre leurs autres armes . Iceux donc avec le reste de l'armée allerent affronter les François , lesquelz ne pouuans soustenir vne si grosse cauallerie se meirent à fuir : & quand aux gens de pied , ilz furent tous mis en desarroy , si que grande boucherie en fut faicte, plusieurs furent prins, les autres se rendirent à la merci des ennemys. Les prisonniers furent en grand nombre, & estoient la plus part grandz Seigneurs . Le Con-

nestable mesme fut faict prisonnier avec son filz. Tous les captifz furent menez au Roy Philippe, qui n'auoit pas encor' atteint son camp. Toutes les enseignes, & presque toutes les pieces d'artillerie des François furent prises, & fut le butin fort riche. On dict qu'il ne mourut qu'environ cinquante hommes du costé des Espagnolz, & fut ceste iournée le dixiesme iour du moys d'Aoust. Quelques iours apres le Roy Philippe arriua au camp, & pource que ceux qui estoient dedans Saint Quentin ne se vouloient pas rendre, la ville fut assiegée plus rudement, de sorte qu'elle fut prise & pillée le vingtsixiesme iour d'Aoust, & lors fut constitué prisonnier Colligny Admiral de France. Or ie vous veux dire que deuant le sac de la ville le Roy Philippe feit prohibition & defence à tous les gēf-d'armes de ne violer les Saints Sacremens, & de ne point toucher aux reliques de Saint Quentin, lesquelles estoient gardées fort reueremment en ce lieu là, de ne faire aucun tort aux prestres ou aux vieillardz, aux religieux & religieuses. Et ayant la ville entre ses mains, il feit emmener le peuple en France avec des chariotz. Il feit accord avec les Alemans qu'il auoit vaincuz en ceste bataille, lesquels il feit conduyre en leurs païs avec bonne & seure garde, leur dōnant à chacun vn escu pour passer le païs. La victoire ainsi obtenue, on en rendit graces à Dieu. Et prise que fut la ville de Saint Quentin, le Roy Philippe print aussi Han & Chastellier. Le Roy Henry estoit lors assez pensif & troublé, de maniere que force luy fut de contremander sa gendarmerie qu'il auoit en Italie, & faire nouuel amas de gens.

Mais qui penseroit que les heretiques dormissent pour lors, il seroit bien trompé. Ce-pendant donc que les guerres estoient ainsi embrasées, & que le Roy auoit assez d'affaires ailleurs, ilz faisoient leurs assemblées secretement, de maniere qu'ilz semerent par ce Royaume tres-chrestien le poison de la doctrine Caluinienne. Or aduint que le cinqiesme iour de Semptembre furent prins plusieurs que hommes que femmes à Paris * en la maison d'un homme qui estoit alors ab-

*Le Comte
stable pri-
sonnier.*

*L'Admi-
ral Colli-
gny pri-
sonnier.*

*La pieté
du Roy
Philippe.*

*Les hereti-
ques peu à
peu s'aug-
mentēt en
France.*

** C'est de
uant le colle-
ge du Ples-
sis.*

L'AN M.D.LVII. HISTOIRE DE TOUTES CHOSES

sent, & estoient illec assemblez pour ouïr leur presche, lesquels furent tous menez en prison, hors mis ceux qui se peurent sauuer estans à ce aydez par la nuyct.

A v cōmencement de ceste année Iehan de Lasco, Sacramentaire de Poloigne, fait vn liure par lequel il tasche de prouuer, que la sentence de Zuingle ne differe point de la Confession d'Ausbourg. *La Confession d'Ausbourg souuēt chagée.* Sçachez que Philippe Melancthon a souuent chagée ladicte Confessiō, si bien qu'il a ouuert la fenestre aux Zuingliens pour grimper dedans: aussi bien auoit-il dict que l'opinion de Zuingle touchant la Cene du Seigneur luy plaisoit plus que celle de Luther, voire mesme s'est-il quelquesfois plaint de la tyrannie de Luther, & dequoy il l'auoit si long temps supportée. Toutesfois la Confession qui fut présentée à Ausbourg à l'Empereur l'an mil cinq cens trente, ne reçoit aucunement la doctrine des Sacramentaires.

Les martyrs heretiques.

LES Zuingliens fugitifz d'Angleterre, qui demeueroiēt à Embde, font imprimer vn liure de Sainct Christ martyr, & de reuerend pere Thomas Cranmer Archeuesque de Cantorbie, lesquels la Royne Marie auoit faict mourir à cause qu'ilz estoient heretiques. Car telles loüanges ont-ilz donné à ce meschant homme, martyr non de Iesus, ains de Satan, faux Euesque, & non Archeuesque. Mais ne nous esmerueillons point de cela. Nous lisons qu'autresfois quelques heretiques *ont adoré Cain & Iudas, voire mesmes Dathan, Coré, Abiron & les Sodomites. Regnauld Polus s'estoit beaucoup peiné à conuertir ce Cranmer, de maniere qu'ayant quelque esperance de sa conuersion, il impetra qu'il ne fust point puny, combien que la Royne Marie luy fust fort ennemye tant pour l'heresie, que pour son faict particulier. Mais apres qu'on eut descouuert sa feintise, de laquelle il auoit vſé tout le cours de sa vie (comme quelque graue personnage a escrit) il fut brulé. Premierement de Catholique il s'estoit fait Lutherien, & puis Zuinglien, tant il estoit inconstant & muable selon que les choses se portoient.

** Ces choses se lisent au premier liure d'Irenee, & en Epiphane.*

OR Ioachim Vuestphal meit en lumiere vne epistre cōtre

les iniures de Calvin, & vne briefue responce à l'escriit de Iehan de Lasco: en laquelle il monstre que Iehan de Lasco & les siens ^{Vuestphal contre les Zuingliens, lesquels se moquent des Lutheriens.} ne suyuent la Confession d'Ausbourg en matiere de la Cene, quelque belle mine qu'ils facēt. Le mesme Vuestphal recueilli la Confession des Eglises de Saxe, laquelle il feit imprimer contre Calvin. Et combien que les Eglises de Saxe defendēt constamment, & retiennēt au possible la doctrine de leur patriarche Luther, si est-ce que les Zuingliens appelloient leur liure, fait & composé par plusieurs epistres, les lettres des hommes incognez, se mocquans des Lutheriens. Est-ce ainsi que vous autres, Messieurs les Zuingliens, honorez les Lutheriens, qui ont premier que vous esté illuminez du saint Euangile? Tu es iuste, ô Seigneur, & droit est ton iugement. Car ceux ^{Psalm. 118.} qui ont osé deschirer & despiecer ta sainte Eglise, laquelle n'est qu'une, à bon droit se moquent & mordent par-ensemble, si que les hommes sages se peuuent à bon droit moquer d'eux.

A v moyen de ce Calvin feit imprimer au moys d'Aoust ^{Le liure de Calvin} vn liure intitulé, *La derniere admonition à Ioachim Vuestphal, à de Calvin* laquelle s'il n'obeist, ^{contre Vuestphal.} desormais il doit estre mis au ranc, auquel *S. Paul reuge les heretiques obstinez.* Au mesme escrit il refute les superbes césures des ministres de Magdebourg & autres, par lesquelles ils se sont parforcez d'accrauanter & ciel & terre. Voyla comme les freres Euangeliques monstrent à tout le monde quelle opinion on doit auoir d'eux, selon le iugement qu'eux mesmes font les vns des autres: & pleust à Dieu que nous eussions hôte de nostre aueuglement, entant que iamais nous ne voulons cognoistre, que ces brouilleurs nous deçoient souz le masque de la parole diuine. Quand le Pape condamne tels hommes comme heretiques, nous ne tenons compte de sa censure, & neantmoins eux mesmes s'entre-condament, & s'entr'appellent heretiques, si bien que les Zuingliens ne peuuent endurer les Lutheriens, ny ceux-cy les Zuingliens.

A v mois de Septembre Martin Micron Sacramentaire ^{Zuinglien} meit en lumiere vne Apologie, par laquelle il refute Vuestphal & les ministres Lutheriens de Suerine, defendant ses cō- ^{contre Lutherien.}

*Lutherien
contre Zu-
inglien.*

plices. Mais à contrepoil Paul Eizen, sur-intendant de l'Eglise d'Hambourg, escriuit vne defense de la vraye doctrine de la Cene, c'est à dire Lutherienne. L'occasion qui l'a esmeu d'escrire, est le desir qu'il auoit de resister à ceux qui s'opposent à la verité, & seduyssent plusieurs simples ames par leurs impostures, par lesquels il signifie les Zuingliens. Car il amene les mesmes choses, que parauant Vuestphal & Tilman auoient allegué contr'eux, comme quand il les appelle seducteurs & imposteurs. Ce voyant vn qui se fait appeller Adam Chrestié, fait vn liure par lequel il veult monstrier le chemin pour accorder les Euangeliques: mais il perd son temps, à cause qu'il

Prou. 13.

*Vuestphal
contre de
Lasco.*

y a tousiours querelle entre les orgueilleux. Je croy que Calvin pensoit auoir entierement vaincu Vuestphal par sa derniere admonitiō: mais Vuestphal fait vn liure tout nouveau, intitulé, La Iuste defense à l'encontre des mensonges de Iehā de Lasco. Et dedia ce liure au Senat de Francfort, & les enhorta à ne souffrir tant peu que ce soit les Zuingliens, & ne craint point d'appeller les Zuingliens qu'on a fait mourir, les martyrs du diable: tant peu auoit profité Calvin par sa terrible admonition.

*Du collo-
que d'Y-
ormes.*

CESTE année fut fait vn Colloque à Vuormes entre les Catholiques & les Lutheriens, où aduint vne chose, laquelle doit à bon droit paruenir à la cognoissance de la posterité. Il y auoit douze Theologiens du costé des Euangeliques: auxquels les Theologiens Catholiques vont demander, (à cause que plusieurs sectes veulent estre comprises souz la Confessiō d'Ausbourg, lesquelles neantmoins sont fort differentes entre elles) qu'il leur pleust declarer quelles sectes ils estimoient conuenir ou discorder avec la Confession d'Ausbourg. Ce qu'ils faisoient, pour ce qu'ils auoient arresté, que le colloque seroit fait entre ceux seulement, qui seroient de l'ancienne religion, ou de la Confession d'Ausbourg, toutes les autres sectes forcloses. Là dessus les Euangeliques ne peurent venir en accord iusqu'au seiziesme iour, à cause que les vns reiettoient des sectes, lesquelles les autres disoient deuoir estre retenues. Bref, cest altercas & dissension alla si auāt, que des douze Lu-
theriens

*Douze Lu-
theriens ne
peurent s'ac-
corder à re-
jetter les
sectes con-
traires à la
leur.*

theriens les cinq furent reiettez, qui ne furent oncques depuys admis des autres sept, pour adherans à vne mesme doctrine. Et partant ces cinq estans excommuniez de leurs confreres, laisserent là le Colloque, & se retirerent à leurs maisons. Or s'attendoit-on que quelque concorde seroit faicte entre les Catholiques & Euangeliques, mais ils furent si loing de cela, que les Euangeliques estans diuisez en deux parties presque esgales, les Catholiques auoient assez affaire de cognoistre, laquelle des deux parties suyuoit la cōfession d'Ausbourg. Le different qu'auoient les Euangeliques entr'eux, estoit de choses grandes, comme est la questiō du libre arbitre, de la iustificatiō, des œuures, des Sacremens, & signāment de l'Eucharistie. Au moyen dequoy les cinq Theologiens qui auoient esté chassez, escriuient lettres signées de leurs mains à nos Theologiens, par lesquelles ilz testifient, que cy-deuant plusieurs & diuerses sectes auoient esté controuuées, les auteurs desquelles s'estoient meslez souz la Confession d'Ausbourg, de laquelle se targuās ilz ont tasché de defendre leurs heresies, comme si icelles estoient conformes à ladicte Confession. Et partant eux cinq ayans voulu reietter toutes telles sectes de la Confession d'Ausbourg, & les condamner spécialement, ilz auoient esté forclos de la société de leurs compaignons. Les choses dōc se passans de telle sorte, & les sept, qui estoient demeurez à Vvormes, ne pouuans spécialement reietter les sectes repugnant à la Confession d'Ausbourg: ce fut force forcée de suspendre ce colloque pour ceste foys, de peur qu'on ne perdist d'auantage de temps & de peine si l'on y eust demeuré plus longuement. Apres ces choses, on veit des liures fort aigres & iniurieux, & nommément ceux de Nicolas Amldorf & Nicolas le Coc, par lesquels ilz accoustrent terriblement les sept, qui auoient chassé les autres cinq. Entre autres poinctz, ce qui s'ensuit est contenu au liure d'Amldorf, intitulé, la publique Confession de la pure doctrine de l'Euangile, & la refutation des Suermers de ce temps: Brence (dit-il) & les Adiaphoristes, (entendant Philippe Melancthon & ses compaignons) estans au colloque d'Vvormes, n'ont pas

Cinq Lutheriens
chassez, & escriuent
aux Catholiques.

”
Lutheriens
contre Lutheriens.
”

L'AN M.D.LVIII. HISTOIRE DE TOUTES CHÖSES

„ voulu condamner Zuingle & Osiäder, à cause qu'ilz sont bié
 „ entenduz és artz & aux langues : & neantmoins s'estans bien
 „ mocquez des nostres, qui n'auoient voulu consentir à ce col-
 „ loque, que premier iceux ne fussent condamnés, ilz les ont
 „ chassés du Colloque tout à plat. Quand à nous, nostre consci-
 „ ence ne permet pas, que nous embrassions l'heresie de Zuin-
 „ gle & Osiander. Et combien que les Theologiens, qui demeu-
 „ rerent au Colloque d'Vvormes apres le departement des no-
 „ stres, ont tesmoigné par leurs escriptz, qu'ilz ne vouloient pas
 „ suyure autre doctrine que la Confession d'Ausbourg, si est-ce
 „ qu'ilz font le contraire. Car tant qu'ilz souffriront les Zuin-
 „ gliens & Osiandrins, ilz ne pourront bien suyure la Confessi-
 „ on d'Ausbourg, &c. Apres ce, il condamne six Sectes, lesquel-
 „ les toutesfois se disent estre de la Confession d'Ausbourg. Ni-
 „ colas le Coc, predicant de Ratisbone, entre autres pointz dict
 „ nommément en ses Theses & demonstrations oculaires : le
 „ debat qui est entre nous autres Euägeliques n'est pas de cho-
 „ ses petites, ains des plus serieux articles de la foy Chrestien-
 „ ne, comme est la question de la loy & de l'Euangile, de la iu-
 „ stification & des bonnes œuures, des Sacremens & de l'usage
 „ des Ceremonies, desquelles questions nous ne pouuons ia-
 „ mais nous accorder. Voyla comme ilz escriuent d'eux mes-
 „ mes : & si quelcun veult sçauoir s'il est vray, le colloque de l'an-
 „ née presente le declare assez apertement. Pourquoi donc per-
 „ met Dieu tout-puissant, que ces erreurs & opinions particu-
 „ lieres, issues d'un orgueil tres-grand, engendrēt telz discordz,
 „ partialitez, & inimitiez sanglantes, sinon à fin que nous puis-
 „ sions voir presque malgré nous, que ces mal-heureux predi-
 „ cans ne nous annoncent pas la parolle de verité, (laquelle est
 „ tousiours à foy semblable) mais bien un pur mensonge, lequel
 „ est de sa nature inconstant, variable, & pere de diuision? Cer-
 „ tainement celuy est bien auéugle & priué de bon sens, qui ne
 „ s'apperçoit de cecy : & quiconque n'a compassion des ames,
 „ lesquelles seront eternellement damnées, pour auoir adheré
 „ à ces refueries, à peine se peult-il vanter d'estre Chrestien.

Note ce point.

Prouffit qui vient de la diuision des heretiques.

L'AN 1558. le Roy Henry considerant la perte qu'il auoit

faicte à la iournée de Saint Quentin, enuoya sa gédarmerie, qu'il auoit faicte retourner d'Italie, avec quelques autres bēdes toutes fraisches, à l'encōtre du Roy Philippe souz la charge & conduyte du Duc de Guyse : lequel sembloit au commencement faire mine d'assiēger la ville de Saint Quentin, ^{Prise de Calais par M. de Guyse.} combien que la saison n'y fust aucunemēt disposée. Mais ayāt esté aduertty qu'il n'y auoit gueres bonne garnison d'Anglois en la ville de Calais, sur ce pas il rebrouffe chemin, & tire celle part avec l'armée: de maniere que dans sept iours il força celle ville, laquelle on disoit estre imprenable, & la remeit en la puissance du Roy Henry le 9. de Ianuier, ayant demeuré aux Anglois l'espace de deux cens ans. Acte veritablement fort insigne & presque incroiable, attendu la saison de l'année ^{Autres victoires.} en laquelle la ville fut prise. Ce faict, il s'empara quant & quāt du fort de Guines, le pillā & le brussa, & ceste ville auoit esté pareillement aux Anglois plus de deux cens ans. Ces victoires si excellentes haugērent le cueur & le courage aux François, qui auoient par auant reçu vne terrible escorne. La ville de Calais fut battuē de l'artillerie fort impetueusement, & si ne se defendit la garnison tant de la ville que du chasteau comme il appartenoit, de sorte que les Anglois feirent merueilleuse perte à la prinse de ceste ville. Edoūard troisiēme ^{Dicte des Roys d'Angleterre, touchant Calais.} Roy d'Angleterre print l'an 1346. ceste ville de Calais sur Philippe sixiēme Roy de France, l'ayant assiēgée onze moys: & souloient dire les Roys d'Angleterre, qu'ilz portoiēt les clefz de France à leur ceinture, tant qu'ilz auoient Calais en leur puissance.

Le 24. iour de Feurier, auquel l'Empereur nasquit, & auquel mesme il auoit esté couronné Empereur par le Pape à Boloigne l'an 1530. ledict Sieur enuoya vn magnifique Ambassade aux Princes Electeurs, qui s'estoient assemblez à Francfort, par lequel il laissoit l'Empire à son frere Ferdinand, & prioit lesdictz Electeurs de ce vouloir auoir pour agreable. Au moyen dequoy les Electeurs octroierēt ceste dignité à Ferdinand le treziēme iour de Mars, & ce faict tant l'Empereur que les Electeurs retournerent à leurs maisons.

Kkkk.ij.

En cecy, comme plusieurs autres fois, l'Empereur fait preuve de son humilité & douceur, entant qu'il se despouilla de l'Empire, au contraire de ce qu'on luy auoit reproché l'ambition & conuoitise de dominer: & vescu en tranquillité quelques moys sans exercer autorité quelconque. Ce qui semble deshonnestes & malséant à plusieurs addonnez à ce monde, comme j'ay dessus dict, & toutesfoiſ c'est chose admirable & recommandable, d'auoir quicté de son bon gré vn tel Empire & tout ce qui est de ce monde. Car nous qui sommes Chrestiens de religion, ne deuons point nous esmouuoir d'vne telle opinion, qui ne sent que son payen & homme mondain: mais deuons plustost ficher nos yeux sur Iesus-Christ, lequel estant vray Dieu, s'est tant humilié que de prendre nostre chair.

Les Luthériens continuent contre les Calvinistes.

A v commencement de ceste année, Vvestphal ne voulant point ceder à Calvin, fait quelques Apologies, par lesquelles il maintenoit la doctrine de Luther touchant l'Eucharistie, & respondoit aux calomnies des Sacramentaires: car ainsi parle-il. Il fait aussi imprimer vne refutation des mensonges insignes & enormes de Iehan Calvin, laquelle il met deuant vne Apologie qu'il fait contre les fureurs d'iceluy. Et finalement suyuit son Apologie contre le dernier aduertissement de Calvin. Semblablement Ioachim de Magdebourg met en lumiere vn liure, du vieil & nouveau Christ, disant q les Luthériens annoncent le vieil Christ, & que les Sacramentaires preschent le nouveau, excogité par Berengarius. Or les Euan geliques ne scauroient dire, que ces choses soient controuuées par les Papistes, ains c'est la pure parolle de Dieu, comme l'vne & l'autre partie se vante. Comment donc ne cedent-ils l'vn à l'autre, & ne confessent-ils qu'ils ont erré: l'esprit, qui les pousse & agite, ne permet pas qu'ainsi ils se gouvernent.

L'Euesque d'Virchibourg tué.

LE 16. iour du moys d'April Melchior Zobel, issu d'vne maison fort noble & ancienne, Prince fort debonnaire, & Euesq d'Virchibourg, fut tué en la ville mesme d'Virchibourg sur le pont du Mein, par vn acte fort detestable.

LE vaillant & illustre Duc de Guyse print par force la ville de Thionuille pour le Roy Henry, mais il ne peut pas faire venir ceux de Luxembourg à telle raison. Le Seigneur Strozze fut frappé d'une harquebuzade à la prise de Thionuille, dont il mourut, & fut sa mort fort regrettée & du Roy & de toute l'armée Françoisise, pour la bonté & vaillance de ce guerrier. Mais vne autre armée Françoisise fut mise en route à Grauelines, par les gens du Roy Philippe, en laquelle bataille les François perdirent beaucoup d'enseignes, & presque toute l'artillerie qu'ilz auoient eüe des villes par eux nouvellement conquises. Quelques braues Capitaines, Comtes, & cinq Cheualiers de l'ordre furent lors faictz prisonniers. Vn peu apres Donquerque fut prise par force, & dit-on que trois mille François y perdirent la vie. Le Capitaine en chef de ceste guerre estoit le Conte d'Aiguemont, vaillant & expérimenté guerrier.

*Prise de
Thionuille.*

*La deffai-
cte de Gra-
uelines.*

LE 18. iour de Iuin alla de vie à trespas Antoine Archeuef que de Coloigne, qui estoit de la maison des Comtes de Scauemburg: son successeur fut Iehan Gebhard, de la maison des Comtes de Mansfeld.

SEMBLABLEMENT deceda en Espagne Madame Eleonor sœur de l'Empereur, & Royne de Frâce. Ses obseques furent celebrées à Paris les 13. & 14. iours d'April en la grande Eglise nostre-Dame. Et le 24. dudit moys le Roy Henry celebra en pompe & magnificence royale, à Paris, les nocces d'entre son filz Monseigneur François le Dauphin, & Marie Stuart, Royne d'Escocce.

*La mort
de mada-
me Eleo-
nor.*

*Les nocces
du Roy
François 2.*

LE 21. iour de Septembre l'Empereur Charles cinqiesme rendit l'esprit à Dieu son createur, ayant eu quelques iours la fièvre tierce fort aspre. Deuant qu'il trespaslast, il employoit tout le iour & la nuyct pour prier Dieu en la solitude où il estoit retiré, soy disant estre désormais inutile & à Dieu & aux hommes, & partant il souhaittoit de partir bien tost de ce monde, pour louer Dieu incessammēt en la gloire celeste. Quand il estoit espris d'ardeur à prier Dieu, il prioit souuent pour la paix & concorde de l'Eglise, disant, Seigneur, j'ay laissé ton E-

*Le trespas
de l'Em-
pereur
Charles.*

glise entre tes mains. Maintesfois il plouroit publiquement les offences par luy commises, & protestoit de n'auoir iamais en sa vie employé vn seul iour bien & deuément au seruice de Dieu. Ayant par plusieurs iours embrassé & chery l'image du crucifix, & ayant reçu tous ses Sacremēs, le septiesme mois apres qu'il se fut desuestu del'Empire, il trespassa fondant en larmes, en la presence de l'Archeuesque de Toledē, & ce fut estant aagé de cinquante neuf ans. Vn peu deuant qu'il mourust, ayant déia eu l'extreme vñction, il requist qu'il peust recevoir le corps de nostre Seigneur pour la seconde fois, disant, tu demeures en moy, Seigneur: & puisse-ie demeurer en toy. Voyla quelle fut la fin des iours de ce noble Empereur, & si m'a semblé bon de coucher icy en passant vn brief recueil de toute sa vie, à fin que pour les bons & agreables seruices qu'il a faitz à l'Eglise, pour le moins nous le guerdonniōs de cecy: & que la posterité puisse cognoistre, quel Empereur ce siecle a porté, quoy qu'autrement il fust tref-calamiteux à cause des heresies.

*Brief-
recueil de la
vie de cest
Empereur*

Nous vous auons dict au commencement, qu'il nasquit à Gād, l'an du Iubilé, l'an de grace. Or ie n'auois oncques acheué, si ie vous voulois exposer tout ce que les hōmes doctes & sages ont obserué en tout le cours de la vie de cest Empereur. Tant y a qu'on ne peut douter, que Dieu n'ayt enuoyé ce Prince à nostre aage si miserable, veu qu'il fut Empereur en vn temps, auquel l'estat Chrestien estoit en telle decadence par toute l'Alemaigne, que si ce Prince tant autorisé, tant redouté & fauorisé de Dieu n'eust eu le gouuernement de l'Empire, c'estoit fait entierement de l'Alemaigne: attendu mesmement que de iour à autre les sectes & erreurs croissoient, & à cause de ce les Turcs se fioient de s'emparer de l'Alemaigne. Car depuys que l'ancienne religion de noz predecesseurs a esté abastardie en l'Alemaigne, les forces de toute ceste contrée ont esté pareillement ancanties: de maniere que le Ture, le Moscouite, & autres plusieurs ont rauy plusieurs belles places sans difficulté quelconque, à cause des partialitez que le nouveau Euangile nous a apportées.

Il faut aussi considerer, qu'au temps de cest Empereur l'Italie, l'Alemaigne, la France, l'Espaigne, Angleterre, Escosse foisonnoient en gens doctes & lettrez, & pour ceste raison ce siecle auroit dequoy se reputer heureux, si la plus part n'auoit tourné le doz à Dieu, estans en orgueillis de leur sçauoir.

Quand au corps de cest Empereur, il auoit la peau blanche, le poil roux, les yeux pers & fort amiables, le visaige delicat, les bras & les cuisses fort charnues, le ventre petit, le doz rond, nerueux & bien composé, les iambes fort minces, le nez aquilin, les leures vn peu rouges, larges & grosses: ses pieds, ses mains & ses oreilles estoient courtes: toutesfois il auoit les doigts languets, le col nerueux, les espauls larges, la poitrine quant & quât, & le front aussi: le visaige plaissant, doux, & gracieux: & sa stature estoit moyenne. Si retint toute ceste forme & maintien iusqu'en l'an 40. de son aage, à l'admiratiõ de plusieurs. Son pere fut Philippe d'Austriche, Roy de Castille & de Leon: & sa mere fut Iehanne, fille de Ferdinand & Elizabeth Catholiques Roys de Castille & d'Aragon. Le pere de Philippe fut l'Empereur Maximilian, fils de Frideric troisieme, lequel fut fils d'Ernest, Ernest de Leopolde, Leopolde d'Albert, Albert de Albert Roy des Romains, le pere duquel fut Raoul, aussi Roy des Romains.

L'EMPEREUR Charles estoit d'un esprit doux & debonnaire, aimant les lettres, taciturne, traictable, deuot, honeste, courageux, amiable, non vindicatif, liberal, magnifique, prudent & sage, assez lent & non precipité, modeste, equitable, iuste, droicturier, plus souuent morne que trop ioyeux, mais tousiours constant & tranquil, tousiours semblable à soy, & qui tousiours monstroient son naturel.

IL fut nourry à Malines avec Madame Marguerite, fille de l'Empereur Maximilian. Son premier gouverneur & conducteur fut Vergiac Euesque de Besançon, & apres luy Guillaume de Croye Marquis d'Ariscot. Au reste, l'Empereur Maximilian ayeul & tuteur de ce Prince, desirant qu'il fust bien endoctriné & instruiet es bonnes mœurs, luy ordonna pour precepteur Adrian Florent d'Vtrech, homme graue & bon

Quel homme il estoit

Ses ancestres.

Ses mœurs

Sa nourriture.

Theologien . Lequel estant bien informé de l'esprit du ieune Prince, s'acquitta de son deuoir en conscience: de maniere q Charles luy obeissant honnestement, il s'appliquoit en diligēce à lire, à escrire, & autres exercices des lettres. Or Guillaume de Croye luy monstra ce qui concerne l'art militaire, comme de luiſter, tirer de l'arc, picquer biē vn Cheual, sauter, manier bien les armes, & chasser dextrement. En quoy il emportoit tousiours le dessus sur ses compaignons, mais pour ne les cōtrister il leur cōcedoit le prix de la victoire. On ne cessoit tous les iours de luy mettre deuant les yeux les prouesses & beaux faicts des anciēs, extraicts des saintes & profanes escritures, entre lesquels estoient les gestes de Maximilian son ayeul paternel, & de Ferdinād son ayeul maternel: au moyen dequoy les estudes des lettres refroydissoient fort en luy, disant Adriā Florent maintesfois, qu'un Prince deuoit plustost prēdre bōnes mœurs que bōne couleur, & ce disant il l'instiguoit à embrasser la pieté, à laquelle il estoit assez enclin . Et ce pendant Adrian s'en alla en Ambassade en Espagne, & Charles s'adonna à manier la chose publique.

*Il commēça
de au pays
bas à 15.
ans.*

Ayant attainct l'an 15. de son aage, il fust inuesty de la possession du pais bas, au grand esioiſſement de tout le peuple de la contrée, de sorte qu'ils luy feirent plusieurs magnifiques entrées & triomphes. Ce faict, il s'estudia grandement à s'acquérir l'alliance des Roys & Princes, sçachant bien q c'est vn des principaux poincts pour viure en repos . Ainsi donc il practiqua premierement l'amitié du grand Roy François, qui n'agueres auoit esté sacré Roy de France . Puis il maria ses sœurs: Eleonor au Roy de Portugal, Isabeau au Roy de Danemarc, & Marie au Roy d'Hongrie . Le Roy Henry d'Angleterre auoit déia espouſé Catherine sa Tante du costé de la mere, fille de Ferdinand Roy d'Espagne. Estant aagé de dix-sept ans, il alla premierement en Angleterre, & puis en Espagne, où il traita fort honnestement sa mere & tous les grands Seigneurs du Royaume, pendant qu'il fut sacré Roy d'Espagne. Et sur ce nouuelles vindrēt du deces de l'Empereur Maximilian, auquel quelques Princes desiroient fort que Charles

*Les allian
ces qu'il
feist.*

les succedast en l'Empire. Mais luy craignant d'offenser, en ce faisant, le Roy de France, lequel on pensoit deuoir estre esleu Empereur, luy rescriuit touchant cest affaire. A quoy le Roy ^{Il est esleu Empereur en Espaigne.} fit responce, qu'il n'en estoit non plus marry, que si eux deux pourchassoient vne mesme fille en mariage: qu'il y feist tout son pouuoir, & qu'au reste Dieu ayderoit au plus heureux. Par tât l'Empire fut deferé à Charles le 19. iour de Iuillet, & ce fut cause que plustost il retourna en Allemagne. Au moyen dequoy laissant Adrian ia Euesque de Dertuse, qui auoit esté autresfois son precepteur, & luy ayant donné le maniement de toutes les Espaignes, il retourna en Flandres, & fut sacré Empereur à Aix la Chapelle. Or en ce temps cest Empereur & le Roy François estoient bons amis. Apres ces choses, il se trouua en l'an 21. de son aage à l'assemblée d'Vvormes, où il condamna Luther, & fit vn excellent edict pour entretenir l'Empire en repos & tranquillité. Si estoient d'opinion quelques Princes, qu'on ne deuoir point garder la foy à Luther, quoy qu'il fust venu à Vvormes avec sauf-cōduict. Toutesfois l'Empereur voulut qu'il fust r'amené en Saxe, disant, qu'il deuoir accomplir les choses promises, bien que ceste fidelité ne fust plus obseruée en aucun lieu. Or comme l'Empereur estoit à ceste iournée, on luy commença à faire guerre au pais bas, en Italie, & en Espagne. Sur quoy il protesta qu'il prenoit les armes fort enuys, & qu'il laissoit tout cōduyre à Dieu: mais que le desplaisir qu'il en receuoit, estoit, que ce pendant on facilitoit les moyens au Turc pour empieter l'Allemagne. ^{On luy fait guerre.}

D V R A N T le cours de sa vie cest Empereur a fait beaucoup de guerres, lesquelles luy ont reussi si heureusement, que ceste felicité estoit redoutable non seulement à ses ennemys mais bien encor' au grand Turc. Mais ce qui a esté en luy fort singulier & admirable, est, que quand le Roy François fut prins à la bataille de Pauie, & quand la ville de Rome fut forcée, ce Prince ne fit aucun signe de ioye ou liesse, ains ordonna des processions de sept iours continuz: & pour deliurer le Saint Pere des effortz du barbare soldat, il fit faire prieres & supplications par quarante iours. Car il n'a pas seulement

aimé les Papes, comme Prince Catholique, ains encor' il les a cherys & reuerz, & pour ceste raison il contenta les furieux foldatz, qui ne cherchoient que la rançon du Pape. Quelque temps apres l'armée Françoisse assaillit la ville de Naples, mais la peste se meit de telle sorte au camp des François, qu'ilz y perdirent beaucoup de vaillans hommes sans rien faire. Or la chose qui seruoit de grande lieffe à ce monarque, durant tant d'anxietez entre les Chrestiens, c'estoit les nations des terres neuues, que ses gens reduysoiēt de iour en iour à la foy Chrestienne.

*Plusieurs
Rois vain-
cus en ces ter-
res neuues* CAR sans parler icy des autres, Ferdinand Cortez au Roy aume de Mexique, & François Pizarre au Peru, ont subiugué en quelques sanglantes batailles seize Roys, & autant de provinces, lesquelles se feirent Chrestiennes en partie, chacun y faisant fructifier son talent le mieux qu'il pouuoit. Or faut noter, que ceux de Temistitan és terres neuues n'ont aucunes lettres ou caracteres: tant seulement ont-ils noté les faictz de leurs ancestres par les images de quelques plantes & animaux: & ceux du Peru par les couleurs & nœudz des cordes.

*De la reli-
gion de
ceux du
nouveau
monde.* Ilz tiennent qu'apres quelque temps le ciel & la terre seront aneantis, & que les ames seront au ciel guerdonnées ou tourmentées selon leur merite ou demerite. Au reste, que deuant que le ciel & la terre perissent, le Soleil & la Lune ne seront plus veuz, lesquelz ce-pendāt ilz ont adorez comme Dieux. Ceux du Peru croient la resurrection: mais c'est chose fort barbare, que pour ceste cause les maris souloient estre inhummez avec leurs femmes & leur plus chere famille, ie dis en mesme instant & en mesme lieu, à fin que plustost ilz resuscitassent.

** Quel-
ques uns
escriuent
qu'à pre-
sent il y a
environ six
mille mo-
nafteres,
& 600.
Eueschez* OR le nombre de ceux, qui ont en ce mōde nouveau receu l'Euangile, est si grand, qu'il ne cede en rien au nombre de tous les Chrestiens de deça. Il y a ia long temps qu'au seul Royaume de Mexique y auoit * quatre vingtz monasteres, & sy en faict tous les iours de nouueaux. Car le peuple y est fort abundant, les villes belles, les edifices excellens, les palais bastys de brique & de marbre blanc, & avec ce, l'or, l'ar-

gent, le cuyure, & autres metaux y sont en abondance, comme aussi les biens de la terre y foisonnent. La seule ville de Mexique comprend six vingtz mille maisons, & les autres cir-<sup>L'ampli-
tude de la
ville de
Mexique.</sup> conuoylines ont les vnes sept mille maisons, les autres quinze mille, autres vingt, trente, quarante, soixante, septante mille maisons. Le palais du Marquis Ferdinand Cortez est si grand & ample, que luy, le Senat de l'Empereur, & plusieurs Lieutenans & Capitaines estans logez fort au large en iceluy, neant-<sup>Grand
logis.</sup> moins le reste dudit palais estoit loué par chacun an sept mille ducatz.

On peult aysément cognoistre combien grande a esté la puissance des Roys de Cusco au Peru, ains qu'ilz eussent esté subiuguez par les imperiaux, quand il n'y auroit autre argument que cestuy-cy. Car de la ville de Cusco les Roys auoiēt <sup>Merueilleuse
puissance
des
Rois de
Cusco.</sup> fait deux chemins royaux qui duroient sept cens lieues: l'un alloit par les montaignes, & l'autre par les plaines: & en iceux chemins de sept en sept lieues y auoit des palais, qu'ilz appelloient Tombotz, si bien garnys de toutes choses, que quand vne armée de quarante mille hommes ou plus y arriuoit toute desarmée & sans viures, elle y pouuoit estre vestue, armée, & nourrye vn long temps. Aussi Atapalibà dernier Roy de Cusco, qui auoit plusieurs Roys souz soy, estant domté par les <sup>Atapalibà
offre
70. mil-
lions d'or.</sup> forces imperiales, promettoit de donner dans septante iours septante millions de ducatz, si on vouloit le laisser aller à sa liberté. Mais le discord & l'auarice de deux Lieutenans de l'Empereur fut si grande, que apres auoir donné enuiron trois cens vaisseaux d'or, il fut massacré, ce qui tourna au grand preiudice de l'Empereur. Or combien que ces choses soient assez admirables, si est-il encore plus esmerueillable, que ces peuples sont maintenant bons & deuotz Chrestiens, ce qui n'a oncques esté fait sans la main & le secours du Dieu eternal: de sorte que nous auons assez ample matiere pour nous esiouir, voyans que tādīs que les Chrestiens de l'Europe se sont formalisez, & si vilainemēt diuisez que la plus part sont atheistes, au contraire la foy Euāgelique germe és pais nouueaux, où l'Idolatrie est presque déia toute esteinte.

A V S S I devons nous admirer, que en plusieurs lieux du Royaume de Mexique les habitans vsent d'un langage, lequel s'approche fort du Flamant, & principalement de ceux de Gand. Or ce n'a pas esté sans grandissimes labeurs & périls, que l'Empereur Charles s'empara de tous ces Royaumes, attendu les belles & grandes citez qu'on y voit, les hautes môtaignes, les roches inaccessibles, les fondrières & abysses espouventables, les forests tres-espeses, l'abondance des hommes, les monstreux animaux tant par mer que par terre: mais non-obstant tout cela Dieu a si bien aydé l'Empereur, & le soldat Espagnol s'est montré si vaillant en ceste conqueste, q̄ tout le país a esté reduict en l'obeissance des Roys Catholiques.

*Quarante
villes basti-
es par l'Em-
pereur au
Peru.*

L'EMPEREUR a faict bastir quarante villes neuues au seul país du Peru: & au Royaume de Mexique il a faict de nouveau edifier fort superbement la ville de Mexique, en laquelle nous auons dict qu'il y auoit six vingtz mille maisons, à cause que ceste cité auoit esté toute bruslée pour vne sedition suruenüe, & partant elle est appelée le palais de Charles. Pareillement (à fin qu'en passant ie die cecy) l'Empereur a faict faire de beaux bastimens en nostre Europe, comme Charlemont, Philippople, Hefdinert, qui sont bonnes villes: & à Cambray, Gand, & au Trest il a faict construire des citadelles, & en plusieurs autres lieux aussi.

*140. mil-
lions d'or
apportez
des terres
neuues.*

L'AN 1555. le Lieutenant de l'Empereur és terres neuues offrit à l'Empereur Charles vingt & vn million de ducatz, s'il plaisoit à sa maiesté annuler certaine ordonnance qu'il auoit faicte. Et puis apres vn autre Lieutenant a offert la mesme somme de ducatz au Roy Philippe. On tient qu'on a apporté en Espagne plus de soixante & dix millions d'or: & encor' autant de millions d'or des perles, & pierres precieuses qu'on a trouuées en ce monde nouveau: de maniere que si on considere de pres la somme sus-dicte, on la trouuera presque incroyable: mais neantmoins la richesse de ces país nous le peut persuader. Aussi à la verité les Roys Catholiques ont despendu vne infinité d'or & d'argent l'espace de quarante

ans, pour domter & reduyre en leur puissance ces nations, & les fortifier par-apres. Or quand nous disons vn tel nombre de millions, nous entendons du plus fin or de Castillans ou de ducatz.

ENCOR' a-on trouué vers les parties plus Septentrionales, (enuiron 350. lieuës par dessus le Cap de bonne esperance) des terres & païs merueilleusement grandz, lesquelz s'estendent du destroit de Magellan vers le Leuât & le Ponent: de maniere que de iour à autre on descouure des nouuelles terres sur la mer.

OR voulut l'Empereur, qu'au monde neuf y eust six Senatz, desquelz les vns s'appellent Chancelleries: à sçauoir à Sainct Dominique, à Mexique, à Guatimalà, à Nicaraguà, à la nouuelle Grenade, aux Roys, ville du Peru. En l'isle de Cuba y a vn Gouverneur, & en la nouuelle Gallice y a quatre Preuostz. Semblablement il constitua deux Vice-roys, l'vn pour estre sur-uoyant sur la mer du Midy & sur les terres qui sont en celle plage: & se tient cestuy-cy aux Roys en la prouince du Peru: l'autre pour dominer sur la mer du Septentrion & sur les costes d'icelle, & pareillement sur la terre ferme, la demeure duquel est à Mexique. D'auantage il y a plusieurs autres Gouverneurs & Lieutenans, comme à Boriquen, à Panamà, Cartagenà, Venuguclà. Il y a aussi des * Adelantadoz, qui president és prouinces. Il y a d'abondant des Lieutenans és villes, lesquelz demeurent és plus belles villes, & l'election d'eux appartient aux deux Vice-roys.

A Sainct Dominique y a vn Archeuesque, qui a souz soy sept Euesques, à sçauoir celuy de Xalifcon, de Mechauacan, Guaxacà, Tascalà, Guatimalà, Chiapà, & Nicaraguà. Aussi aux Roys, qui est l'vne des plus nobles villes du Peru, y a vn Archeuesque, qui a souz soy les Euesques de Cusco, Quitto & Charcas, & encor' en establir-on tous les iours de nouueaux. Or celuy qui confere les Archeueschez, Eueschez, dignitez & benefices Ecclesiastiques de ces terres neuues, c'est le Roy de Castille, & ce par la permission du Pape de Rome.

La longueur du monde neuf

CE monde neuf, si on le prend du Septentrion tirant vers le midy, en le mesurant selon la coste de la mer, tient sept mille lieuës communes de Flandres, dont les vingt & vne font vn degré de latitude. Ptolemée donne à chacun degré septante mille pas, qui font septante mil d'Italie. Or nostre terre contient trois cens soixante degrez, & les habitans du nouveau monde font leur an d'autant de iours, mais à iceux ilz entre-mesloient cinq iours, lesquels ilz celebrent solemnellement, comme nous faisons la Pasque.

La grandeur de nostre terre.

MAIS en la mer Australe la dimëtion du nouveau monde contient en soy trois mille cinq cens lieuës communes. Quand à nostre terre ancienne, en quelque lieu que la vueillez prendre, elle ne faict que sept mille lieuës communes: & c'est mille lieuës pour chacun climat, quand on en faict sept. Que si tu metz dix paralleles à chacun climat, & à chacun parallele vne centaine de lieuës, la terre contiendra septante paralleles, & septante fois cent lieuës. Et delà viennent les trois cens soixante degrez de Ptolemée, chacun desquelz contient 21. lieuë de Flandres, esquelz degrez ledict Ptolemée a distribué & diuisé toute la terre. Or il est fort vray-semblable & presque necessaire, qu'en celle partie du monde neuf qui est vers le pole Austral & destroict de Magellan, (auquel lieu ont esté faictes les colonnes de Charles le quint) il y ayt des terres amples & spatieuses merueilleusement.

Terrible nauigation de Sebastien de Cano.

IL s'est trouué vn nommé Sebastien de Cano, lequel ayant vne nauire nommée Victoire passa l'equinoxial, & voguant sur mer trois ans entiers, en fin il retourna en Espagne, ayant premierement ietté l'ancre és terres qui sont souz les deux poles. De maniere qu'il visita plusieurs costes de l'Asie, Afrique, & Europe, oultre-passant le cercle equinoxial, lequel les anciens estimoient estre inhabitable pour la trop grande chaleur & seicheresse: toutesfois il ne voulut ou ne peut en si peu de temps penetrer iusqu'aux fins des terres des deux poles, à sçauoir du Septentrional & de l'Austral. Aussi verrez vous des hommes fort doctes, lesquels assurent contre l'opinion commune des anciens, que le monde n'est

Toute la terre est habitable.

pas seulement habitable, ains encore qu'il est habité en tous endroits, ce qu'ils prouuent en plusieurs sortes : & disent pareillement que la plus grande nuysance qu'on trouue, est la disetie des viures, & qu'on ne peult pas passer aysément : non point l'ardeur du Soleil, ou le froid qui est vers les Poles : asseurans fermement au reste qu'il y a des antipodes, & ne doutent point de dire que toutes les terres neuues font le second hemisphere, lequel est esgal au nostre, & luy respond entiere-ment.

IL y a sept grandes ou cōsulaires prouinces en ces terres neuues, la plus Septétrionale desquelles est la Floride, les fins de laquelle abboutissent au fleue de Neuad, & aux terres de Labrador, & ne sont distantes de Grontlande & Islande que de deux cens lieuës. L'autre prouince est la nouvelle Espagne : la troisieme, la terre ferme : la quatrieme, la nouvelle Andelousie : la cinquieme, la terre de Bresil, laquelle appartient au Roy de Portugal, & toutes ces prouinces regardent la mer du Septentrion. En la mer du midy, il n'y a que la prouince du Peru, qui fait la sixieme, en laquelle sont Chile, Quitto, Cusco, les Roys, Platanà, Loxà, le Port-vieil, Guayaquilà, Guanue, Paix, Vallées, & autres villes & gouuernemés. La septiesme prouince est celle qu'on a de nouveau trouuée, opposée directemēt au Cap de bonne esperance, & vient respondre au destroiēt de Magellan, regardant tant les neuues que les vieilles terres.

OR ceux qui demeurent à Seuille en Espagne ont sept heures plustost le Soleil leuant, que n'ont ceux qui sont à Mexique : & mesmes les eclipses, les solstices & equinoxes apparoissent de sept heures plustost aux fins de noz terres, qu'au nouveau monde.

L'AN 1524. Frere Martin de Valence vint à Mexique avec douze religieux, estant là enuoyé par l'Empereur cōme vicaire du Pape avec l'autorité dudiēt S. Pere : & au mesme an iceluy prescha en terre ferme la foy de l'Euangile : si bien qu'il feit vn merueilleux fruiēt & auancement de la foy, ie dy de celle, laquelle plusieurs tāt d'Alemaigne que d'ailleurs re-

Sept gran
des prouin
ces des ter-
res neuues

Le leuer
du Soleil
en Mexiq.

Martin
de Valée
prescha la
foy en Me-
xique.

iettent comme Papistique, estans embabounez par Luther
 & autres heretiques. Aduint que plusieurs reçurent le saint
 baptesme: & comme vne question fust esmeue touchant plu-
 sieurs femmes que parauant ils auoient eues, à sçauoir laquel-
 le ils pourroient retenir, au mesme an fut fait vn synode solé-
 nel à Mexique, où Martin de Valence presida comme vicaire
 du Pape: auquel fut en fin arresté, que ceux qui estoient reso-
 luz de vouloir desormais viure à la maniere & aux ceremo-
 nies de l'Eglise Catholique, esliroient vne femme d'entre tou-
 tes les leurs, laquelle ils espouseroient, comme font les Chre-
 stiens. Ainsi toutes les idoles estoient demolies des temples,
 on mettoit en iceux des crucifix & des images de la vierge
 Marie, on monstroit la S. Eucharistie au peuple: Martin & ses
 douze compaignons celebroident la Messe, & si estoit l'Euan-
 gile presché purement & syncerement. Au moyen dequoy
 en peu d'années le nombre de ceux qui estoient baptisez estoit
 si grand, qu'aucuns ont escrit, que le nombre d'iceux au seul
 Royaume de Mexique fut de sept millions, & les autres, qu'il
 fut de quatorze millions d'hommes. Ce qui n'est incredible,
 veu l'abondance des hommes en ce monde nouveau, de sor-
 te qu'en l'Isle S. Dominique on dict qu'il y auoit bien quinze
 cens mille hōmes, & mesmes qu'en faisant procession Chre-
 stiēne on a veu quelques cent mille hommes se fouëtter pour
 penitence. Le mesme an 1524. Cortez enuoya à l'Empereur
 par Diego de Soto septante mille ducats d'or, & vne Coule-
 urine d'argent, qui fut estimée valoir quaranteneuf mille du-
 cats. O prouidence diuine, ò que Dieu est admirable en ses
 faits! Sept ans apres l'heresie de Martin Luther née en Ale-
 maigne, Martin de Valence a vescu au nouveau monde en
 sainteté & miracles, tellement qu'il a communiqué la synce-
 re lumiere de l'Euangile aux Gentils aueuglez, laquelle lu-
 miere a esté repudiée par l'Alemaigne à la suscitation de Lu-
 ther: dequoy quelques Catholiques ont escript les vers qui
 ensuyuent.

*Le fier Martin Luther, enflé d'une arrogance,
 En ce temps combattoit la foy à toute outrance,*

Et toutesfois n'a peu ses desseings accomplir.

Or vn autre Martin, bouillant d'un saint desir,

De douze hommes suyuy, a fait germer la foy

Es pais des Indois, qui n'auoient onc eu loy.

Luther sept ans deuant enseignoit le contraire,

Mais cestuy-cy monstroït la voye salutaire.

*Deux
Martins
fort diuers
en nostre
temps.*

IL n'y a rien plus certain, que les Indois & habitans de ce monde neuf se confirment de iour à autre en la religiō Chrestienne. Car on a veu és memoires de l'Empereur, qu'un prestre a baptizé sept cens mille hommes, vn autre trois cens mille, autre cens mille, les autres plus, les autres moins. Quelques bons autheurs escriuent qu'au seul pais de Mexique y auoit trente Potentatz, chacun desquelz auoit cent mille hommes souz foy, ou enuiron, & trois mille Lieutenans, qui auoient chacun souz foy quelques autres leurs Vassaux & beneficiaires. Or ces Potentatz ou Seigneurs en certaine saison de l'année nourrissoient leur famille à la cité de Mexique, qui estoit la Cour du Roy Moteczumà: de maniere qu'il ne leur estoit pas permis de se retirer de là en leurs prouinces sans le congé du Roy, & encore laissans ou leurs enfans ou leurs freres en la ville pour hostage: & (chose certainement horrible) tel iour estoit, qu'en ceste cité de Mexique on immoloit plus de mille hommes. Mais Dieu a voulu que toutes les Idoles ont esté brisées, les Diabes ont esté cōtrainctz de se taire avec tous leurs oracles & prestiges: ceux qui par-auant auoient plusieurs femmes se sont liez à vne, & pareillement on leur a donné les Sacremens de l'Eglise: ce-pendant que les Chrestiens de l'Europe se resiouissent d'auoir fait banque-route à la foy Catholique, & d'auoir suiuy les tenebres pour la lumiere. On voit cōme Dieu ne tenant conte de nous autres cōtempteurs, preste la main à ces pauures barbares, & encore, pour clorre la bouche aux heretiques, il les fait tous bons Catholiques & subiectz aux Papes Romains. Les nouueaux Euangeliques se vātent ordinairement, que leur but est d'incommoder le Pape de Rome tant plus qu'ilz pourrōt, & ne voyent point que le grād gouuerneur des cieux se mocque d'eux: lequel fait, que le S.

*Trente Po
tentatz au
pays de
Mexique.*

*Sacrifices
horribles.*

*Comme le
chrestianis
me s'estpād
de iour en
iour.*

Psal. 2.

Mmmm.j.

L'AN M.D.LVIII. HISTOIRE DE TOUTES CHOSES

Pere soit honoré & reueré és loingtains parties de la terre, de tant plus qu'il est mesprisé en ceste nostre Europe. Nous deuons obeir à noz superieurs, comme S. Pol nous admōeste, *Heb. 13.* demeurer en celle religion que noz ancestres nous auoient laissée, nous exercer en bonnes œuures, viure religieusement & iustement en ce siecle, & au reste abhorrer toute doctrine nouuelle. Mais pendant que nous ne faisons conte de cecy, nous auons veu que Iesus-Christ est allé visiter les Indois & *Mat. 21.* Antipodes, offrant le Royaume de Dieu au peuple qui en fera du fruit, & nous laissant icy en tant de diuisions & partialitez. Bien miserables sommes nous, qui nous estimōs estre bienheureux au comble de tous malheurs.

Or l'Empereur est à louanger, dequoy la foy de Iesus-Christ a esté dilatée de telle sorte au nouveau monde, veu que cecy a esté vn de ses principaux soings. Il disoit que noz pechez auoient meritē, que l'Eglise fust ainsi difformée, & en monstrant l'autheur de ceste diuisiō, il souloit dire qu'un seul homme auoit tout faict cecy en escriuant: signifiant par cela Luther. Car comme maintesfoisd'une petite estincelle de feu fort vn grand embrasement, ainsi Luther a seruy comme de torche pour mettre le feu par toute la Chrestienté: & ne faut point s'arrester à prouuer ce propos, veu que les choses parlēt d'elles mesmes. Or l'Empereur n'a pas seulement subiugué le nouveau monde, mais encore sa renommée estant semée par toute la terre à cause de ses gestes fort segnalez, il a receu Ambassades tres-honorables des Maures, Africāns, Tartares, & du Sophi Roy de Perse, voire mesmes de Prete-ian grand Empereur des Aethiopiens. Il fut fort sobre à son boire & son manger, iusqu'à boire quelques fois par mesure d'vnces, & manger aussi par certaine mesure. Il ne fut onc somptueux en vestemens, comme celuy qui n'vsoit point de pourpre, ny ne s'habilloit ordinairement d'habitz Royaux: ains vsoit d'habitz de drap noir, & principalement apres le deces de l'Imperatrice sa femme, à fin qu'il vst tousiours de celle mediocrité qui est tant recommandable. Il estoit tousiours seruy honnestement, mais non superbement: on ne luy faisoit point tant de

Ambassades des estrangers à l'Empereur.

La sobriété & humilité de l'Empereur.

parfums & odeurs, comme on faict à quelques vns: il n'vsoit gueres de viandes rares & singulieres, sinon en quelque cas ce requérant. Bien souuent il prenoit son repas tout seul & sans mot dire, de maniere que sa table estoit moderée, solitaire, honneste, & sans grande parade. Il n'employoit iamais l'argét sans cause & raison, & aduisoit diligemment sur cela, considerant bien qu'à faire la guerre on l'employoit assez tost.

L'INTEMPERANCE, vaine gloire, & les voluptez de la chair auoient si peu de place en luy, que ceux qui l'auoiēt *Louange de l'Empereur.* cogné des son premier aage, affermoient, que le mesme naturel & les mesmes mœurs qu'il auoit en son vieil aage, l'accompaignoient aussi en sa puerilité, adolescence, & ieunesse, reluy sant tousiours en luy vne vergongne loüable. Il estoit fort humain, doux & bening enuers chacun, & aimoit merueilleusement tous ceux de sa maison. Il estoit de sa nature fort affable & paisible, & telle fut sa debonnaireté, qu'autant a-il esté loué de ses ennemys mesmes, q̄ les autres Princes le sont de leurs amys & subiectz. Quelque fois vn Seigneur Chrestien s'en fuyt vers Solyman Empereur des Turcs, lequel l'interrogea *Le tesmoignage de Solyman pour l'Empereur.* pour quelles causes il auroit quicté son Empereur. A quoy il respondit qu'il l'auoit faict pour l'auarice, paillardise & iniustice de l'Empereur. Mais Soliman adiousta, qu'il ne pouuoit croire que Charles Empereur fust tel, attendu que iamais on ne luy auoit dict le semblable, quelque inquisition qu'il en eust faicte: & que celuy qui obseruoit si exactement les loix & ceremonies de Dieu & de ses predecesseurs, ne pouuoit loger telz vices avec soy. De maniere que Solyman ne voulut plus voir cest homme, & par-apres il le bannit seuerement de toute la Turquie. Ce tesmoignage est d'autant plus vallable, qu'il est de l'ennemy tref-felon & de l'Empereur & de tous les Chrestiens.

C'EST Empereur auoit la cognoissance de plusieurs langues, ce qui luy seruit beaucoup en maintz endroictz. Car cōme il auoit à sa folde gens de diuerses nations, il parloit aux Alemans en Aleman, avec les Espaignolz en Espagnol, avec la Cauallerie du bas païs en François, avec les Italiens en Ita-

Mmmm.ij.

L'AN M.D.LVIII. HISTOIRE DE TOUTES CHOSES

lien, avec les Napolitains en langage melle: & aux Hongres, Boëmes, & Dalmatiens il parloit en diuers langages. Il protestoient souuent, qu'il tenoit l'Empire & le diademe Imperial, non comme patrimoine, ains comme s'il estoit en cela Magistrat: aussi le rendit-il liberalement à ceux qui le luy auoient donné, comme il l'auoit reçu humainement & modestement. Il n'aimoit pas beaucoup à rire, ce que nous lisons aussi de Charlemagne, & neantmoins en ses apophtegmes ou dictz aiguz & ingenieux il fut fort elegant, si que sa parolle estoit fort ornée & semblable à l'eloquence de l'ancien Nestor. Car il parloit fort distinctement, & estoit son propos merueilleusement intelligible, orné d'une douceur, conioincte avec une modestie & gravité bien séante. Mais ses apophtegmes estoient iettez de telle sorte, que c'estoit ieu sans espece de ieu. Car de sa nature il estoit beaucoup plus enclin à se condouloir, qu'à se gaudir de la vie & des mœurs des hommes, vertu certes bien rare en ce siecle. Et partant les larmes luy couloient souuent à val la face, quand on luy presentoit quelque requeste pour hommes tombez en necessité, de maniere que quelquefois il pleuroit plus, que ceux pour qui on le supplioit.

Ses prieres ordinaires

IL ne failloit iamais à dire ses heures le matin, & les faisoit si longues, que bien souuent il en disoit deux fois autant que font les prestres ordinairement. Et si tost qu'il auoit souppé, il alloit prier Dieu, où le plus souuent il employoit deux heures, comme il faisoit à dire ses matines. Car il ne s'appuyoit point sur ses forces, ains il attendoit son secours d'en-hault, du Dieu souverain, lequel il taschoit d'auoir fauorable par ses prieres quotidiennes. Et c'est pourquoy il a vescu si heureusement, & obtenu victoires si insignes, de sorte que pour ses haultz faictz les François le parangonnoient à Hercules, les Alemans à Charles-Magne, les Italiens à Daud, les Siciliens à Scipion, les Espaignolz à Alexandre le grand, les Turcs à Iules Cesar, & les Africains à Hannibal. Plusieurs le voyans estre aussi assidu à prier Dieu en temps de guerre que quand il estoit à sa maison, disoient, *L'Empereur parle plus souuent à*

A qui on le compare.

Dieu, qu'aux hommes. Quand quelque nouuelle guerre luy suruenoit, luy-mesme compoisoit & escriuoit ses prieres, lesquelles estoient presque aussi longues comme sont les sept Pleaumes: & les donnoit premierement à ses Confesseurs pour sur icelles asseoir leur iugement, lesquelles par eux approuuées, il les disoit tous les iours au camp, & souuent se retiroit de son ost faisant semblant d'auoir affaire ailleurs, pour plus ardemment vacquer à ses oraisons.

Q V A N D il auoit ses forces à la campagne, il estoit tousiours au camp, demeurant à cheual quelques fois quinze heures & quelques fois plus, sans mettre pied à terre. En toutes expéditions de guerre il s'est montré fort courageux, de sorte qu'il sembloit ne craindre aucunement la mort: & se iettoit au danger si brusquement, que iamais il ne mouuoit la teste pour les coups d'harquebuzes, iamais ne mouuoit le pied, iamais ne pallissoit. Bref, estant au camp il se monstrois si preux & valeureux à l'encontre des ennemys, qu'il sembloit souhaitter de demeurer sur le champ: lequel courage il a retenu par tout le cours de sa vie. Bien souuent estant à la guerre, & bouillant en l'ardeur de sa ieunesse il disoit, ie desire de mourir & viure avec Iesus-Christ. Tel courage luy venoit en partie, de ce qu'il n'entreprint oncques guerre, sinon avec vn esprit moderé & vne conscience tranquille.

P L V S I E V R S bons guerriers souloient dire de l'Empereur, que vrayement il scauoit bien vaincre, mais qu'il ne scauoit ou ne vouloit pas vser de la victoire: ausquelz l'Empereur respondoit, que Iules Cesar, (qu'ilz luy obiectoient) & les autres anciens payens n'auoient qu'un but, à scauoir l'honneur: mais que nous, qui sommes Chrestiens, en deuons auoir deux, l'honneur, & le salut de l'ame. Aussi disoit-il souuent, que quand bien il eust subiugué tout le Royaume de France, il l'eust restitué au Roy, & eust seulement prins ce qu'il pretendoit luy appartenir. Il fut fort loyal & chaste en l'estat de mariage, & quoy qu'il eust assez d'objectz pour le chatouiller aux voluptez, si est-ce qu'il les combattit fort vaillamment: de maniere que souuent il fermoit luy-mesme sa

fenestre, de peur qu'il ne fust nauré en son cueur par le regard des belles femmes qui passoient : & mesme disoit souuent, que iamais il ne se fust marié, sil eust sçeu que son frere Ferdinand deuoit si bien foisonner en enfans.

IL ne se plaisoit point au bal & à la danse, si ce n'est avec tout respect d'honnesteté. On ne le veit iamais inuoker Dieu en iurant, sinon quand il promettoit quelque paix ou treues, ou qu'il prenoit possession des Royaumes.

Son bon entendement.

IL auoit vn esprit aigu, subtil & fort actif, de sorte que plusieurs doctes hommes admiroient grandement la subtilité de son iugement, sa sagesse & prudence. Il enuoyoit souuent à quelques siens Princes & Capitaines son opinion couchée par escript, & neantmoins il se souzmettoit à leur aduis, tant il estoit modeste: mais le plus souuent ilz s'accordoient à son opinion, confessans qu'elle estoit meilleure que la leur. Et

Titres d'honneur de l'Empereur.

c'est pourquoy on disoit de luy, qu'il estoit *le plus sage des Senateurs, le plus vaillant des Capitaines, & le plus equitable des iuges*: laquelle droicteure il a monstré souuent enuers quelques

Les nerfs de la guerre.

grandz Seigneurs, à qui on mettoit sus de grandz crimes. Il souloit dire qu'il y auoit trois nerfs pour bien mener vne guerre, la munition de viures, l'argent, les gens d'armes: que si il estoit contrainct de quicter quelqu'un des trois, il choisiroit volontiers les regimens des vieilles bendes, par la proüesse desquelz il espereroit auoir les autres deux de l'ennemy mesme. Lors qu'il estoit en sa chambre avec ses familiers & domestiques, il n'y auoit homme qui eust peu cognoistre à le voir, si on luy auoit apporté bonnes ou mauuaises nouuelles,

La constance de sa face.

si grande estoit la constance des yeux, de la face, & de tout le maintien de cest Empereur. Le matin il prioit Dieu à genoux trois quartz d'heure, estant affablé d'une robe de chambre, & lors personne ne pouuoit entrer où il estoit.

Comment il passoit la iournée.

Mais ce faict, on pouuoit entrer, & c'estoit lors qu'il disoit les heures Ecclesiastiques. Lesquelles dictes, il se vestoit, & apres il vacquoit aux affaires de la Republique. Puis il oyoit la Messe, laquelle il ouyt tous les iours de sa vie, sinon qu'une fois, comme il estoit à la guerre d'Afrique. La

Messe ouye, il s'en alloit dîner, & deuant il ne vacquoit point aux affaires, s'ils n'estoient fort vrgens. Comme on pouuoit estre au milieu de la Messe, on couuroit les tables, & comme il sortoit de l'Eglise, on commençoit incontinent à seruir. Il se delectoit naturellement à manger des harans, & autres choses salées, mais toutesfois de sorte, qu'il ne mettoit pas sa santé en arriere. Combié qu'en table il ne parlât que peu ou point du tout, neâtmoins quelquesfois il se plaisoit à ouyr quelque chose, & principalement l'escriture sainte. Ayant dîné, il oyoit volontiers toutes sortes de gens de quelque condition qu'ils fussent, & ne refusoit aucune requeste qu'on luy presentast. *Il oyoit vn chacun.*

TOUTE sa vie il fut fort misericordieux & charitable envers les pauures, si qu'estant encor' enfant, il donnoit quelquesfois plus de deux cens escuz, sans que ses Gouverneurs & despensiers en cogneussent rien. Mais ayant attainct l'aage d'homme & en sa vieillesse aussi, il a esté estimé le plus liberal Prince qui fust, à marier les pauures filles, à entretenir des escholiers & des pauures vieillards, à racheter les captifs, & à faire guerir les necessiteux detenuz de maladie. Or ce qu'il donnoit pour faire telles choses, c'estoit au desceu du monde, tant pour ne hontoyer point ceux à qui il faisoit telles aumosnes, que pour garder sa modestie. Sa principale liberalité estoit envers les Alemãs, qui auoient esté despouillez de leurs biens par les heretiques, fussent ils seculiers ou Ecclesiastiques: & ne donnoit gueres telles aumosnes sans fondre tout en larmes, à cause qu'il ne pouuoit subuenir esgallement à tous les pauures. Il auoit autour de soy des Thresoriers & despensiers bien aduisez, par la feuerité desquels ce Prince n'exerçoit pas sa liberalité envers ceux, qu'on estimoit n'estre point indigés. Finalement voyant que ses forces corporelles prenoient fin, il quicta le monde & tous les honneurs d'iceluy, & s'estant transporté du pais bas en Espagne, il se rédit en vne solitude. Où allant, nouvelles luy vindrent, que les Turcs & Afriquans auoient leué le siege de deuant Ouran, promontoire d'Afrique, & que les Espaignols auoient illec fait grande tuerie des

L'AN M.D.LVIII. HISTOIRE DE TOVTES CHOSES

*Les riches
ses venues
du monde
neuf.* ennemys : pareillement qu'on auoit du nouueau monde apporté à Seuille cinq millions de Ducats en or, & deux milliōs d'or en pierres precieuses. Encor' attēdoit-on grande somme d'or du Peru & de Mexique. En fin ce bon & vertueux Empereur rendit l'ame à Dieu fort heureusement, & croy que pieça nous n'auons eu Prince si bon en toutes choses que fut cestuy-cy.

*Mort de
la Royne
d'Hōgrie,
& de la
Royne
d'Angle
terre.* Ie sçay bien que quelques autheurs François dōnent force attaintes à cest Empereur, mais ils n'eussent que mieux fait de parler plus modestement : & croy que les hommes sages aurōt encore meilleure opinion de ce Prince par tels escrits. Or ie lairray ce discours, que i'auoy commencé à la louange de cest Empereur, en ayant (peult-estre) parlé trop prolixement. Vn peu apres qu'il fut mort, deceda pareillemēt sa sœur Marie, Dame magnanime & prudente, laquelle auoit esté lōg temps Regente en Flandres. Et sur la fin de Nouembre trespassa aussi la Royne Marie d'Angleterre, femme fort deuote, par la vertu de laquelle la religion Catholique auoit esté remise sus en bref temps. Elle s'estoit fort contristée de la prise de Calais, des guerres esquelles le Roy Philippe estoit enuēloppé, & aussi du deces de l'Empereur. D'auantage elle auoit vne hydropisie, laquelle ayant au commencement enflé son ventre, on pensoit qu'elle fust grosse du Roy Philippe: & puis on n'y appliquoit pas les remedes qu'il falloit, & elle mesme n'vsoit pas de la diete qui luy estoit necessaire. Au moyen dequoy elle tomba peu à peu en vne fieure, laquelle estant venuē en ses forces, en fin elle osta la vie à ceste Dame, qui meritoit de plus longuement viure pour ses vertuz singulieres. Elle auoit eu vn frere nommé Henry, mais il n'auoit vesçu q̄ trois mois. Et partant voyans le Roy Henry & Madame Catherine, pere & mere de ceste Marie, qui en ce temps-là s'entraymoient grandement, que ceste fille seroit leur heritiere au Royaume, ils la feirent nourrir, entretenir, & enseigner en toutes bonnes mœurs le mieux qu'il leur fut possible. Alors viuoit Madame Marguerite, niepce d'Edouard 4. Roy d'Angleterre, (mere de Regnauld Polus, comme nous auons cy dessus

dessus touché) laquelle estoit parente du Roy Henry, & fort renommée pour sa sagesse & pieté admirable : & pour ceste cause on luy donna ceste fille Marie à gouverner. Laquelle charge elle executa fort fidellement, de maniere qu'elle luy apprint toutes bonnes mœurs, vertuz, & deportemens, comme l'experience l'a monstre par apres. Mais neantmoins ayant esté depuis instiguée de quicter la religion Catholique, & ayant refusé de ce faire, elle n'eut autre loyer du Roy Henry, sinon qu'estant septuagenaire elle fut deffaicte, comme nous auons dict par auant: & non seulement elle, mais bien encore son filz aîné, & deux autres siens parens furent decapitez par le commandement du Roy, pour le faict de la religion.

ESTANT la Royne Marie allée de vie à trespas, au mesme an Regnauld Polus, Cardinal & Archeuesque de Cantorbie, homme fort sçauant, issu de l'estoc Royal, la suyuit de si pres, qu'entre le trespas de ces deux personnes il n'y eut que seize heures d'interualle. Or en ce lieu ie m'arrestera y vn peu à vous tracer le sommaire de sa vie & de ses vertuz, ce que ie fay volontiers, pourautant que Sleidan nous veut bien souuent faire accroire, qu'il a esté heretique, iniure certainement indigne d'un personnage si loüable. Il faut donc entendre que son pere fut Ricard Polus, qui fut cousin germain d'Henry septiesme Roy d'Angleterre, & sa Mere Marguerite, fille de George Duc de Clarence, qui fut frere propre d'Edouard 4. Roy d'Angleterre. Cestuy Edouard eut vne fille nommée Elizabeth, laquelle estant donnée à femme à Henry 7. luy engendra Henry 8. Roy d'Angleterre. Et delà vous voyez qu'il estoit issu de tref-noble sang, tant du costé du pere que du costé de la mere. Il nasquit l'an 1500. au mois de Mars, peu apres l'Empereur Charles, qui l'a aimé & estimé beaucoup, tellement que deuissant quelque iour de la Cour de Rome, il dict qu'il n'en cognoissoit point vn meilleur que Polus. Sa mere Marguerite fut fort soigneuse de luy, & estant petit enfant l'enuoya au college pres la Chartreuse, laquelle n'est gueres distante de Londres. Et puy il hanta l'vniuersité d'Oxford, si

Nnnn.j.

*La mort
du bñ Car-
dinal Re-
gnauld
Polus, An-
glois: &
par occasi-
on
l'auteur
descrie icy
sommaire-
ment la vie
d'iceluy.*

*La jeunesse
se passe
aux estu-
des.*

bien qu'estant aagé de 19. ans il alla à Padouë en Italie, estant déia bien auancé aux lettres. Où il auoit vn train assez honne-
ste selon sa maison, & tant estoit-il courtois & accort en tous
ses deportemens, que chacun luy portoit vne bonne affectiō.
Il entretenoit à sa maison quelques sçauans hommes, entre
lesquelz fut Christofle Longœil Flaman, qui mourut chez
luy, de maniere que communiquant à toutes heures avec ces
doctes personnages, il vint docte aux langues & aux sciences.
Ayant ia demeuré cinq ans en Italie, & luy prest de s'en re-
tourner en son pais, il alla voir premierement Rome, à cause
mesmement que c'estoit l'an du Iubilé, & ainsi il visita les
sainctz lieux de la sainte cité: ce que veritablement il n'eust
faict s'il fust esté infect de la poison Lutherienne. Estant par-
apres de retour en Angleterre, à cause que chacun le cheris-
soit pour ses louiables mœurs & rare doctrine, il impetra aysé-
ment du Roy la maison que Iehan Colet auoit edifiée iouxte
les Chartreux, & en laquelle Polus auoit demeuré estant pe-
tit, comme vous avez ouy. Auquel lieu il demeura deux ans,
se delectant bien fort de la compaignie & religion des Char-
treux: comme aussi en toute sa vie il a fort aimé les lieux soli-
taires & monastiques, estant plus enclin naturellement aux

*Comment
il vint à
Paris, &
retourna
incontinent*

lettres & à la contemplation, que à l'action. Mais voyant que
le Roy mal conseillé estoit aheurté au repude de la Royne Ca-
therine, il demanda congé à sa Maiesté, & alla à Paris, pour e-
uiter les troubles qui menaçoient l'Angleterre. Il n'y eut pas
demeuré plustost vn an, qu'il fut r'appellé en Angleterre, &
de rechef passa religieusement vn couple d'années en son pre-
mier logis. Ce fut lors que le Roy s'efforça de le faire consen-
tir au repude de Catherine, ce qui l'inquieta fort, & en fin il
pensa auoir trouué moyē, duquel vsant il ne desplairoit point
au Roy, & satisferoit à sa conscience: suppliant au reste la diui-
ne Maiesté, de le secourir en vn si grand peril de son ame.
Entré qu'il fut où estoit le Roy, pensant exprimer son ad-
uis, Dieu voulut qu'il perdit si bien la parolle, que de tout vn
long temps il ne dit mot. Car le moyen qu'il auoit forgé, n'e-
stoit pas tant appuyé sur vne verité solide, que sur vne prudē-

ce humaine . Ayant donc recourré la parole , il admon-
 nestâ modestement le Roy , sans nullement le flatter , qu'il
 ostast de sa teste le repude pourpensé , lequel denigreroit
 ses vertus & loüanges passées , & d'auantage seroit cause de
 sa damnation . Le Roy , qui s'attendoit d'auoir telle res-
 ponce de Polus qu'il souhaittoit , se voyant si loing de son
 attente , peu s'en fallut qu'il ne desseignast la mort d'ice-
 luy , quand il luy tenoit tel langage : & non seulement le
 Roy , mais encore plusieurs autres furent irritez de ceste
 responce . De sorte qu'apperceuant que mal pourroit baster
 pour luy , il impetra du Roy congé de vuyder le Royaume.
 Parquoy il vint premierement en Auignon , puys à Padouë :
 & combien qu'il se delectast de tous hommes doctes, toutes-
 fois il s'accoustoit plus volontiers de ceux , qui estoient de-
 uotz & religieux . Estant à Venise, il fut fort familier de Gas-
 par Contarein, & de Pierre Caraffe, qui depuys a esté Pape
 Paul 4. & qui auoit institué avec quelques vns vne sainte
 maniere de vie , les sectateurs de laquelle ont esté appelez
 Theatins. Vn peu apres, quoy qu'assez enuis, il fut fait Cardi-
 nal par le Pape Paul 3. l'an mil cinq cens trentesix . Il laisse
 plusieurs choses , à fin que ie ne soye trop long à faire ce dis-
 cours. Apres il fut enuoyé par la Saincteté Legat en France &
 en Flandres, & venu qu'il fut à Paris , le Roy & sa Cour le re-
 cueillirent comme il meritoit: mais toutesfois le Roy l'aduer-
 tit de partir des le lendemain , pour- autant que le Roy d'An-
 gleterre l'importunoit fort de le liurer entre ses mains: ce que
 le Roy feit, pour ne rompre point sa foy enuers le Sainct Pere
 en mal- traictant Polus, & pour n'agaçer point l'Anglois en le
 retenant longuement. Cela sembloit assez grief à Polus, & ne-
 antmoins il s'en alla à Cambray, non sans grand danger . Car
 ce- pendant le Roy d'Angleterre l'auoit fait proscrire, & dô-
 noit cinquante mille escuz à celuy qui le tueroit : & delà on
 voit qu'il n'estoit iamais sans crainte & peril . Lors donc E-
 rard, Cardinal & Euesque du Liege, l'appella à foy , & le trai-
 cta honnorablement l'espace de six mois. Et pourautant que
 l'Empereur & le Roy de France auoient guerre en ce temps,

Nnnn.ij.

*Il dissua-
de le repu-
de de la
Roynie.*

*Il va à
Venise.*

*Les Thea-
tins.*

*Il est Le-
gat du Pa-
pe en Fra-
nce.*

*Il est pro-
script &
banny
d'An-
gleterre.*

l'Anglois promettoit au Senat du bas païs, duquel est l'Euef-
que du Liege, de soldoyer dix moys quatre mille hommes de
pied pour l'Empereur, si on luy vouloit liurer Polus. Apres,
le Pape le rappella, & retourna à Rome. Le laisse icy la secon-
de legation, que le Pape luy enioignit de faire pour moyen-
ner accord entre l'Empereur & le Roy, ce qu'il ne peut effe-
ctuer. Or retourné qu'il fut de France & d'Espaigne pour ce-
ste legation, le Sainct Pere luy donna encoir vne autre com-
mission, mais beaucoup plus tranquille, à sçauoir celle de Vi-
terbe, en laquelle il vescu plusieurs années en grande loüan-
ge. Le Concile de Trente estant publié, le Pape l'esleut pour
son Legat avec deux autres Cardinaux, & pour presider au-
dict Concile: & cela fut fait deux fois par le Pape Paul troi-
siesme à cause que la premiere fois on n'auoit rien exploicté
pour l'absence des Prelatz. Ces Legatz s'entre-tenoient en a-
mitié & concorde fort grande, & chacun d'eux respectoit grâ-
dement Polus. Mesmes le Pape se seruoit volontiers de Polus
és affaires de la religion, comme quand il falloit traicter quel-
que chose avec les Roys & Princes, & escrire lettres sur cela.
Or Paul troisiesme estât allé de ce siecle en l'autre, la plus sai-
ne partie des Cardinaux esleut, plus de deux mois durant, le
Cardinal Polus, lesquels il admonnestoit (exemple certes
d'une modestie singuliere) de n'estre en cela poussez d'aucu-
ne affection humaine, ains de regarder seulement la gloire de
Dieu & l'vtilité de l'Eglise. Quelque Cardinal s'oublia iusqu'
à la, que de l'appeller ambitieux. Auquel il feit responce per-
tinente, disant que la charge du Pontificat ne luy sembloit
pas si legere, qu'il ne l'estimast plus perilleuse que souhaitta-
ble. Veritablement durant ce lapz de temps il feit espreuue
apparente de sa sagesse, entant que sa constance ne diminua
iamais pour l'election du siege Romain, ny pour les calomni-
es de quelques enuieux. Brief il estoit certain qu'il eust esté
lors Pape, s'il eust voulu permettre, que le Cardinal Farnese
& ses compaignons l'eussent adoré à la maniere accoustu-
mée. Car comme ilz fussent venuz à luy fort ardemment, il
les rebuta, disant qu'il n'auoit point affaire de la nuit: qu'ilz

*Il est Le-
gat au Co-
cile.*

*Il estoit
Pape, s'il
eust voulu*

différaissent cela iusqu' au lendemain , pourautant que Dieu n'aimoit pas les tenebres,ains la lumiere . A cause de ce le lendemain les Cardinaux auoient tous changé d'opinion , & ne craignoient point quelques vns. à imputer ce faict de Polus à vne cotiardiſe & faict-neantise . Iules troiſiesme eſtant crée Pape , & la guerre recommençant à l'encontre des François, Polus se retira coyement à Maguzan, qui est vn conuent de moynes de l'ordre Sainct Benoist, & vescu là en grande tranquillité d'esprit . Or apres que la Royne Marie d'Angleterre fut pacifique en son Royaume, le Pape y voulut enuoyer Polus incontinent , mais cela eſtant differé pour certaines raisons, le Sainct Pere luy enchargea d'aller traicter la paix entre le Roy & l'Empereur. Et partant Polus vint iusques à Dilinge vers le Cardinal d'Ausbourg: mais l'Empereur, par deuers lequel il auoit esté enuoyé , luy manda qu'il seiournast audit lieu, iusqu' à tant qu'il fust appelé. Ce que Polus ne differa de faire, mais ce-pendant il escriuit à l'Empereur, que c'estoit chose mal ſeante qu'un Legat du Pape fust ainsi arresté, & que ce faict pourroit ſeruir aux heretiques de mocquerie. Ce que l'Empereur en faisoit , n'estoit pas pour meſpriſer le Pape ou son Legat , mais l'occasion de ce estoit , qu'on tra-

*Sa legatio
vers l'Em-
pereur.*

*Il retour-
ne en An-
gleterre au
temps de
la Royne
Catholique.* pres Bruxelles. Et sur cela les nocces entre le Roy Philippe & la Royne Marie furent celebrées en Angleterre, de sorte que la Royne despescha vn Ambassade pour faire venir Polus, annullant tout ce que le Roy Henry auoit fait au preiudice d'iceluy, & auoit esté ratifié par le Roy Edoüard. A raison de-

quoy il print la route d'Angleterre l'an mil cinq cens cinquante quatre au moys de Septembre, estant licentié par l'Empereur. Arriué qu'il est en Angleterre, il fut receu par tout, & mesmes par le Roy & la Royne, si que le Roy alla au deuant de luy, & l'embrassa: & la Royne protesta d'estre aussi ayse de sa venuë, que lors qu'elle fut declarée Royne. Il demeura quel que temps à l'hostel du Roy, & puy il fut mené en vn logis paré & accoustré magnifiquemēt par le cōmandemēt de la Royne, estant suiuy de plusieurs grādz Seigneurs. Trois iours apres il alla trouuer le Roy pour parlementer avec luy de ce qu'il estoit venu faire, & reçeut d'iceluy plusieurs lettres de Rome, confirmatiues de l'autorité de sa legation, dequoy il fut grandement esiouy. Le lendemain le Roy le fut voir à son logis, auquel estant, plusieurs propos furent tenuz entr'eux pour reduyre le Royaume d'Angleterre à la religion Catholique. Parquoy le lendemain y eut belle assemblée au logis du

*Harangue
de Polus
aux An-
glois.*

Roy, estant present le Legat Polus, lequel y feit vne belle harangue, en langage du Royaume. En icelle il remercia l'assistance, dequoy on luy auoit permis de r'entrer au Royaume, à luy defendu par les lettres du feu Roy Henry: que sa venuë estoit pour les remettre à la crainte de Dieu & en l'Eglise Catholique. En outre il raconta les calamitez, qu'ilz auoient souffertes sestans sequestrez de l'Eglise, & leur proposa la bōne & sincere affectiō que le S. Siege de Rome leur auoit tous iours portée, les priant au reste de ne clorre point l'entrée à la grace qu'ō leur presentoit à present: & plusieurs autres choses dit. il en celle congregation, lesquelles chacun ouït avec vne affectiō merueilleuse sur Polus. Ce fait, l'Euesque de Vuinchestre Chancéllier du Royaume remercia le Legat, au nom de leurs maiestez & de toute l'assistāce, assurant qu'on deliberoit meuremēt sur ce q'auoit esté par luy proposé. De manie-

reque le Legat s'estant retiré en la prochaine chābre, le Chācellier repeta sommairement ce qu'auoit remonstré le Legat, & enhorta le peuple de ne mespriser point l'opportunité qu'ils auoient de s'entrer au vray chemin, duquel il confessoit auoir luy-mesme forligné. Et sur ce le conseil se leua. Le lendemain matin fut arresté par le consentement de tous, que ^{Comment les Anglois se reunirēt à la religiō Catholique, au moyen du Legat Polus.} desormais on embrasseroit la concorde & vnion de l'Eglise Catholique. Le iour ensuyuant, qui estoit la feste Saint André, la cōgregation fut derechef faicte au logis du Roy. Si enuoyerent leurs maiestez par deuers le Legat Polus six Eueques & six grands Seigneurs seculiers, entre lesquels estoit le Comte d'Arondel Grand-maistre, lesquels estoient enuoyez pour faire compaignie au Legat. Iceluy doncques y vint en habit de Legat, & fut reçu du Roy & de la Royne avec tout l'honneur qu'il estoit possible. Lors le Chancellier feit vne briefue repetition des choses sus-dictes, & demanda s'ils persistoient en leur vouloir precedent, à sçauoir de retourner à l'vnion de l'Eglise & à l'obeissance du siege Romain. A quoy chacun respondit, que ce vouloient-ils veritablement: & de ce pas le Chancellier presenta vne requeste à leurs maiestez, par laquelle chacun protestoit d'estre desplaisant du schisme passé, & de l'offense par eux commise contre le siege Apostolic: & prioient leus maiestez, qu'il leur pleust moyenner leur pardon enuers le Pape par le Legat, à fin qu'ils fussent receuz au sein de l'Eglise nostre mere. La requeste fut leuë deuant le Roy, & puis renduë au Chancellier, qui la leur publiquemēt. Leurs maiestez donc se leuans, vont vers le Legat, & comme il leur venoit au deuant, la Royne le pria qu'il luy pleust octroyer ce qui estoit porté par la requeste. Apres ce, chacun se remeit à sa place, & le Legat ayant remonstré ce qui luy sembloit estre expedient pour lors, se leua: & chacun se mettant à genoux, il leur donna l'absolution. Comme Polus pronōçoit les parolles de l'absolution, la Royne & plusieurs autres respādirent grande abondance de larmes de ioye qu'ils auoient. L'absolution estant donnée, chacun s'entr'embrassoit, & se conioiūssans ensemble, disoient, nous sommes aujourd'huy

nez pour la seconde fois. Ce fait, on chanta *Te Deum laudamus* en la chapelle Royale. Le lendemain, à la priere des Magistrats, Polus habillé en Legat feit son entrée dans Londres, & au deuant de luy accourut toute la cité, laquelle le conuoya iusqu'à l'Eglise de S. Paul, où la Messe fut celebrée solennellement, y asistât le Roy & toute la noblesse du Royaume. Puis on meit ordre à remettre sus la religion, on reuoqua les gens de bien : les heretiques, qui s'estoient illec retirez comme en vn lieu d'assurance, furent chassés : on installa des Euesques Catholiques, renommez pour leur doctrine & pieté singuliere. Pareillemēt la Royne enuoya trois Ambassadeurs par deuers le Pape, pour luy prester toute obeissance, au nom du Roy & de tout le Royaume. Ces Legats trouuerēt que le Pape Iules estoit n'agueres decedé. Marcel son successeur ne vescu gueres apres, dont Polus fut fort marry : & partāt ceste obeissance fut prestée à Pape Paul 4. Apres cela, la Royne donna l'Archeuesché de Cantorbic à Polus, quoy qu'il l'eust refusée au-parauant. En fin il la reçeut de telle sorte, qu'il manda au Pape comme toute l'affaire s'estoit passée : qui le loua grandement, & la Royne aussi, en plein consistoire des Cardinaux. Ces choses faictes, il reçeut les ordres, & ayant eu le manteau à Londres, il celebra en ce lieu sa premiere Messe. Laquelle estant acheuée, il feit le sermon deuant vne innombrable multitude de peuple, comme maintesfois il auoit fait.

On le contrainct de demeurer à la Cour. Or il pria la Royne, qu'il peust aller resider sur son Euesché : mais elle sçachant combien sa presence luy estoit necessaire, (à cause mesmement qu'il y auoit gens à sa Cour, qui brassioient tousiours quelques menées preiudiciables à l'Eglise Catholique, ausquels il falloir opposer la prudence & integrité de Polus) ne voulut iamais permettre qu'il s'en allast. Les Theologiens mesmes & autres gens de bien estoient d'aduis, qu'il ne pouuoit, (sans blecer sa consciēce) laisser la Royne, les choses estans encor' en si grand bransle : le Roy Philippes mesme voulant aller en Flandres, voulut qu'il teint compaignie à la Royne, & non seulement qu'il assistast au conseil du Royaume, mais bien encore qu'il y presidast. Ce qu'il refusa au commencement

mencement par tous moyens à luy possibles, mais leurs maie-
 stez continuans en leur volonté premiere, en fin il y consen-
 tit, moyennât que le Pape le voulust accorder, l'autorité du-
 quel il a eu tousiours en grande recommandation. Lors donc
 il traicta avec la Royne, qu'il falloit aduiser cōment on pour-
 roit restituer les biens que le Roy Henry auoit vsurpez sur
 l'Eglise, & en auoit fait comme de son propre domaine. A
 quoy la Royne se monstra tant honnestes, qu'elle permit au
 Pape & à Polus son Legat, en faire à leur bon-plaisir: tellement
 que Polus ayant consulté de cecy avec les Prelatz, il distribua
 iceux biens de telle sorte, que chacun des Ecclesiastiques eut
 la moytié du reuenu, qu'ilz auoient auparauant que la religiō
 Catholique eust esté changée en ce Royaume. Et le reste ne
 fut pour lors restitué, à ce consentant le Pape, pour-autant
 qu'on eseroit, que la religion venant à florir avec le temps,
 ceux qui detenoient iceux biens les restitueroient de leur bō
 gré. Or en passant il nous faut prendre garde à la finesse des
 nouueaux dogmatistes de ce temps, entant qu'ilz taschent de
 persuader aux Magistratz, qu'on peut à bon droit prendre les
 biens des Ecclesiastiques, & les conuertir à nostre vsage par-
 ticulier. Car ilz font cela, pour par ce moyen empestrer d'auā-
 tage les Magistratz, pourautant que c'est ce qui est le plus fas-
 cheux à desmesler, quād ceux qui s'estoient sequestrez de l'E-
 glise, viennent à se reünir à icelle. Car ilz n'ignorent pas, qu'ō
 n'ayt vsurpé de grandz biens sur les Ecclesiastiques, & toutes
 fois bien souuent nulz moyens s'offrent pour les restituer. Par
 quoy ceux la doiuent estre reputez pour sages & bien conseil-
 lez, qui ne prestent point l'oreille à telles fraudes, & ne veulēt
 oncques vsurper ce q̄ a esté vne fois dedié au seruice de Dieu.
 Mais reuenons au propos. Voiant Polus que pour les troubles
 precedens toute la discipline Ecclesiastique estoit abastardie,
 il feit vn Synode de tous les Prelatz d'Angleterre, auquel ā-
 pres plusieurs colloques & aduis sur ce dōnez en fin fut faite
 la reformation de l'Eglise Anglicane, telle qu'on pensoit estre
 la plus expediente en tel temps: laquelle toutesfois il ne vou-
 lut oncques mettre en lumiere, qu'au preallable le Pape ne

*Les biens
de l'Eglise
restituez.*

*La refor-
mation
Ecclesiasti-
que en An-
gleterre.*

l'eust approuuée. Et d'auantage il auoit beaucoup d'affaires avec les heretiques, desquelz il y auoit encore grand nombre en ce Royaume. Toutesfois il pensoit les auoir par douceur, mais pourautant que plusieurs estoient trop aheurtz en leur opiniastrété, il estoit impossible d'vser de misericorde. Tant y a qu'il en reduyt quelques vns à l'Eglise Catholique, entre lesquels fut Iehan Cic, homme docte & renommé en Angleterre, lequel demanda & impetra pardõ de son offense en presence de plusieurs grandz personnages de tous Estatz. Cestuy-cy auoit esté precepteur d'Edouard dernier Roy. Ce-pendant la religion Catholique refflorissoit en Angleterre, & estoient ia restituez quelques monasteres tant à Londres qu'ailleurs, par le moyen de Polus, & par la pieté de la Roynie. Bref les choses estoient en train d'estre reduites à leur premiere forme, sinon que les guerres estans suruenues & plusieurs autres incommodeitez, la Roynie abbatuë d'angoysse & toute consumée de maladies laissa ce monde, laquelle fut suyvie bien tost apres de Polus, comme nous auons dict. Lequel estant assailly d'une fièvre quarte, voiant que ceste maladie auroit en fin le desus de luy, feit son testament, auquel entre autres choses il exprima sa foy, & l'obeissance qu'il portoit au Siege Apostolic de Rome. La maladie croissant de plus en plus, il se munit des sacremens de l'Eglise, comme font tous les bõs Catholiques: & quoy qu'il fust cassé, & presque toutes ses forces espuisées, si voulut il ouïr la Messe tous les iours, cõme il souloit: & estât le prebstre prest à mōstrer la sainte hostie, les gens le leuerēt sur le liēt, si bien qu'il adora reueremment son Seigneur gisant en l'Eucharistie. Le iour de deuant son trespas, sans estre admonnesté de personne, il demanda que le Sainct Sacremēt de l'extreme onction luy fust administré, & demeurant toujours rassis & en son bõ sens iusqu'au dernier soupir de sa vie, Finalement il rendit l'esprit si doucement, qu'il sembloit plus tost dormir que mourir. Il trespassa doncques aagé de 58. ans, & six mois, en mesme année que deceda Charles le quint. Or de tout ce que ie vien d'escrire, ie croy qu'il n'y aura lecteur si peu consideré, qu'il ne puisse cognoistre, combien cest excel-

*La mort
du susdict
Polus en
Angle-
terre.*

lent personnage estoit loing de toute heresie, laquelle neantmoins Sleidan desire fort luy donner. En ce mesme temps mourut en Alemaigne Otton Henry Côte Palatin, & le Roy de Dannemarc en son Royaume.

CESTE mesme année le grand Seigneur des Moscouites ^{300000. M^oscouites v^o ennent en Liouvie.} enuoya vne armée de trois cens mille hommes, en la region de Liouonie dicté Torpat, lesquelz mettoient tout à feu & à sang par où ilz passioient, & en tout vn païs exercerent la plus grande felonnie & cruauté qu'il est possible. Ilz ne respectoiēt ny aage ny sexe. Ilz tuoient les petitz enfans qui ne passioient point dix ans. Ceux qui auoiēt de dix à vingt ans estoient vendus aux Barbares Tartares, mais ceux qui auoient plus de 20. ^{Cruauté des Barbares.} ans, passioient par le trenchant de l'espée. Ilz massacrerēt tout le bestail qu'ilz ne peurēt emmener en Moscouie, & estoit incredible la proye qu'ilz emporterent de ceste contrée. Ce ravage dura 40. iours, de sorte qu'il n'y eut que quelques chasteaux, & la cité de Torpat, qui eurent ceste rage. Ces Moscouites se monstroient terriblement felons contre les Alemans, & quand ilz prenoient vn masse, ilz luy tailloient les bras: si c'estoit vne femme, ilz luy couppoient les mammelles: voire mesmes en hacherent quelques vns à morceaux, & iettoient ça & là leurs membres. A raison dequoy grande multitude de gentils-hommes, voire vne infinie troupe de peuple se retira dans la ville de Torpat avec leurs femmes, enfans, & cheuance, & mesmes ceux qui en estoient loing de plus de 20. grandes lieues: mais pour ce qu'un si grand peuple ne pouuoit loger au dedans de la ville, plus de dix mille furent contrainctz se sauuer aux fossez d'icelle. C'estoit là qu'estoit le grand creuecueur, de voir les vns mourir de froid, les autres de faim, & les autres estre miserablement tuez par l'ennemy. Car ces enragez Moscouites ayās apperceu, que ces pauvres gens estoient cachez dans les fossez, ilz leur coururent sus, & en feirent vne grande boucherie: & pourautant que la multitude des ennemis estoit merueilleusement grande, ceux de dedans n'oserēt sortir pour secourir ces miserables: mais toutesfois ilz lascherent tant de coups de canon sur eux, que force leur fut se reti-

L'AN M.D.LVIII. HISTOIRE DE TOUTES CHOSES

Ravage fait par les Moscouites. rer. De ce lieu donc passans par les terres de Leïde, ilz allerēt au païs du Maistre des Cheualiers Teutoniques, où ilz feirēt mesme ravage qu'en Liuonie, & fut leur furie si grāde, qu'ilz ne laisserent maison ny buron entiere: ce qu'ilz feirent aussi en la region de Neruie, laquelle appartient au mesme Maistre. Finalement ilz s'en retournerent en Russie, chargez de proye & de butin inestimable, & n'y eut Seigneur de Liuonie qui les osast attaquer, tellement qu'ilz iouèrent à racler & bēder sans contredit.

Les Liuoniens rompent les treues. PAR QUOY toute la noblesse de Liuonie s'assembla en la ville de VVende, & apres auoir bien consulté, en fin il fut aduisé, qu'on donneroit soixante ou septante mille escuz à l'ennemy pour auoir la paix. Ce qui pourroit sembler fort lasche apres auoir esté si mal-traittez, mais ilz n'auoient rien meilleur pour eux en tel temps. Or ce-pendant que les Ambassadeurs de Liuonie estoient par les chemins pour aller trouuer le Moscouite, (car la ville de Moscouie est loing de la ville de Torpat bien 150. lieuës d'Alemaigne.) les Liuoniens rompās les treues faictes pour quatre moys, mal-traiterent les habitants de Neruie qui est aux Russiens, aians lasché deux coups de canon sur eux, & en ayans meurtry quelques vns. Et neantmoins les Moscouites, desireux d'entretenir les treues, ne se bougerent point, bien manderent- ilz à leur Prince comme ces choses s'estoient passées. De sorte qu'il aduint, qu'à mesme temps que les Ambassadeurs de Liuonie arriuerent, ce message arriua quant & quant. Les Ambassadeurs ne sçachans rien de ceste desconuenuë, vont trouuer le Prince pour luy parler de la paix. Mais il les rabroüa de parolles, leur reprochant d'auoir violé les treues, & leur maintenoit, qu'ilz auoient perdu toute honte, constance, & fidelité, depuys qu'ilz auoient embrassé l'heresie de Luther. Et partant il leur commande de retourner, & rendre l'argent au Maistre: qu'il iroit les voir bien tost, & leur montreroit à qui ilz se ioüioient. Sçachez que sur *Deux Neruies, l'une d'Alemaigne, l'autre de Russie.* les frōtieres de Moscouie & Liuonie y auoit deux villes avecques leurs chasteaux, & s'appelloiēt toutes deux Neruie, mais l'une estoit d'Alemaigne, l'autre de Russie, & entre les deux.

n'y auoit qu'une bien petite riuere. Aduint, comme i'ay dict, que les Liuoniens desfarrerent deux couleurines sur les habitans de Neruie Ruffienne, & comme quelques autres Liuoniens fussent illec accouruz, pensans les treues estre rompuës, il y eut quelques Ruffiës occis. Ce qui fut cause que le Prince de Moscouie ne voulut ouïr nullemēt parler de paix. Au moyē dequoy il remet sus vne grosse armée de Moscouites & Tartares, lesquelz de premiere abordée forcerent la Neruie des Alemans, & prindrent le chasteau par composition, tellemēt que les habitans de ceste ville presterent la foy au Moscouite. *Autre armée des Moscouites en Liuonie.* Prise que fut Neruie, l'armée de rechef pillā & saccagea tout le païs de Neruie iusqu'à quinze lieuës d'Alemaigne, & simpatroniserent de plusieurs fortes & bōnes places. Ce faict, ilz vindrent au diocèse de Torpat, où ilz assiegerent & prindrent par composition Nienhuse, chasteau appartenāt à l'Euesque, distant 18. lieuës de Torpat. Là ilz laisserent aller les hommes & femmes, mais iceux ayans ia cheminé deux lieuës, ilz tomberent en vne autre troupe de Ruffiens, lesquelz rauirent les filles & femmes, laissant aller les hommes spoliez de tout ce qu'ilz auoient. Le grand Maistre des Teutoniques auoit quelques troupes de cheual quant & foy, mais ayant entendu que le Moscouite s'approchoit avec toutes ses forces pour dōner le combat, il laisse là l'Euesque de Torpat, & fuit iusqu'à vingt-cinq lieuës de là. Les Ruffiens de cheual, qui faisoïēt le nombre de trente mille, poursuyuent outre, tuans tous les Alemans qu'ilz rencontroient. Pierre Sifegaleider estoit Chef de tout l'ost des Moscouites, avec lesquelz estoient trēte mille Tartares, & douze mille de scopetterie, somme qu'ilz estoïēt en tout trois cens mille, qui alloient assieger Torpat. Les Alemans que prenoit le sus-dict Chef, n'auoient pas bon marché de luy, par ce qu'aux hommes il aualloit les bras, & aux femmes les māmelles & narines, & ainsi les laissoit aller en la ville, *Cruauté Barbare.* mandant aux habitans, que s'ilz ne se rendoient, il leur en feroit tout autant. La plus part des habitans auoient abandonné déia la ville, & ceux qui estoient demeurez pour la garder, partie estoïēt Catholiques, & partie heretiques. Ceux qui e-

L'AN M.D.LVIII. HISTOIRE DE TOVTES CHOSES

stoient Catholiques , auoient leurs maisons dans l'enclos de l'immunité (comme ilz parlent) de l'Eglise Cathedrale, pour-
 autant que les citoyens de Torpat ne souffroient homme, qui
 n'eust entierement abiuré la religion Catholique. Estans dōc
 les Moscouites venus pres la ville , c'estoit chose horrible
 d'ouir le tonnerre des canonnades, qu'ilz iettoient par tout. A
 ce bruiet les femmes & enfans cōmencerent à crier & braire,
 & combien que les Catholiques promettoient de defendre la
 ville vaillamment, & enhortoiēt le Senat & les Lutheriens à
 estre constans, neantmoins peu apres ilz se rendirent aux Mo-
 scouites avec conditions fort deshonestes. Car moyennant
 que la vie leur demeurast sauue & les biens aussi, ilz renonce-
 rent au Pontife & Empire Romain, & deslors iurerent de vou-
 loir estre & appartenir au grand Duc de Moscouie. Voila l'or-
 dre de la bonne religion : de Catholiques ilz s'estoient faitz
 Lutheriens, & ores ilz se font Moscouites, lesquelz suyuent
 presque en tout la religion & les ceremonies des Grecz . Or
 les Catholiques ne voulurent oncques accorder telles con-
 ditions, lesquelz protestoiēt d'aimer mieux vaillāment mou-
 rir, que de rendre la ville à l'ennemy, ou quicter la religion de
 leurs peres. Ce qu'ayant sceu le Chef de l'ost des Moscouites,
 il mande aux assiegez, qu'il ne vouloit contraindre personne
 d'abiurer l'Empire Romain pour se rendre au Duc de Mosco-
 uie: ains que si quelcun refusoit de ce faire , il pouuoit seure-
 ment se retirer en Alemaigne. Et partant les Catholiques voy-
 ans les choses aller si mal dedans & dehors, quitterent la ville,
 & estoient quelques quatre cens, que hommes que femmes.
 Je vous laisse à penser la pieté que c'estoit, de voir le mary qui
 cter sa femme, le frere sa sœur, les enfans leur pere. Tous ceux
 qui resterent en la ville, quicterent tour à plat le Pape & l'Em-
 pire Romain, & espouserent le ioug du Moscouite . Je seroy
 trop prolix, si ie vouloy raconter le mal & la calamité, que le
 païs de Liuonie a souffert par les Moscouites : ce qui leur est
 auenu par le iuste iugement de Dieu, à cause que s'estans des-
 pouillez de la religion Catholique, Dieu les a quant & quant
 priuez de la constance & vertu que parauant ils auoient. Les

*La ville
 de Torpat
 assiegee
 par les
 Moscoui-
 tes.*

*La lasche-
 té des Lu-
 theriens, &
 la constan-
 ce des Ca-
 tholiques.*

*Misere de
 la Liuonie
 à pr. sent.*

Cheualiers Teutoniques estans autresfois Catholiques, encor' qu'ilz ne fussent que dix mille, meirent bien en route octante mille Moscouites : mais depuys que les vns sont Lutheriens, les autres Zuingliens, & autres Anabaptistes, les Moscouites les ont tousiours battuz. A bon droict endurent-ilz le ioug du Moscouite, veu qu'ilz n'ont voulu estre au Pape. Je m'estonne comme les hommes ne voyent, que eux s'estans separez de l'Eglise, ils tombent en mille partialitez, & delà sourdent les inimitiez: lesquelles sont cause de la ruine & destruction des plus excellentes Republiques: Car tres bien a dict l'historien Saluste, la concorde fait croistre les petites choses, & le discord abbat les plus grandes qui soyent. Je voy bien que nous n'entendrons iamais cecy, que le Turc ou le Moscouite ne le nous ait apprins.

L'AN 1559. le 15. iour de Ianuier les Angloys substituerēt Elizabeth au lieu de la Royne Marie decedée. C'estoit celle Elizabeth, que le Roy Henry auoit eue d'Anne de Boulenterrre. laquelle ruina entierement la religion Catholique, & voulut qu'il n'y eust q̄ le Zuinglianisme ou Calvinisme en son Royaume. Mais en contr'eschange d'un tel mal-heur, le bon Dieu voulut que les puissans & Catholiques Roys, Henry de Frâce, & Philippe d'Espaigne, accorderent la paix par-ensemble, avec plusieurs cōditions que ie n'exposeray point pour le present. Les terres & païs de ces deux Princes estoient lasses des guerres continuées y auoit si long temps, lesquelles ne pouuoient estre poursuyuies sans grandissime dommage de la religion Catholique, pourautant que les heretiques semoient leur poison couuertemēt, & en infectoient plusieurs. Or à fin que ceste paix & alliance fust ferme & inuolable à iamais, le Roy Philippe espousa Madame Elizabeth fille aînée du Roy Henry, & fut donnée Madame Marguerite, sœur dudit Roy, en mariage à Philibert Duc de Sauoye.

LE 24. iour de Feurier les obseques & funerailles de l'Empereur Charles cinquième n'agueres decedé, furent celebrées à Ausbourg, où s'estoient assemblez les Potentats de presque toute l'Europe: ce qui fut fait solēnellement & avec

Elizabeth
Royne
d'Angla-
terre.

Mariage
du Roy
Philippe
& du Duc
de Sauoye

Obseques
de l'Empereur.

L'AN M.D.LIX. HISTOIRE DE TOVTES CHOSES
toutes les ceremonies à ce requises, dont plusieurs sentoyent
merueilleuse angoisse en leurs cueurs.

*La mort
de Gropper.*

LE 14. iour de Mars alla à Rome de vie à trespas Iehan
Gropper, lequel nous pouuons appeller l'honneur & l'orne-
ment de Eglise de Coloigne à soustenir la religion Catholi-
que: & partant le Pape Paul 4. l'auoit fait Cardinal. Son corps
fut inhumé en l'Eglise des Alemás, aux pieds de ce bon Pape
Adrian sixiesme.

*D'une
croix qui
apparut en
vn tronc
d'arbre en
Angle-
terre.*

A v mesme moys aduint vne chose assez admirable, en
celle partie d'Angleterre que les anciens appellent Cambrie,
& à present est dicté Vuallie. Le vent abbatit vn vieux fresne,
& ne demeura que le tronc d'iceluy, esleué sept pieds sur ter-
re. Ce tronc estoit fendu par le milieu par l'imperuosité du
vent, & au dedans on voyoit vne croix fort merueilleuse vn
peu plus longue que d'un pied, & de couleur d'une noysette.
Le champ où cecy aduint, appartenoit à vn Cheualier de l'or-
dre: & est encore plus admirable, qu'en celle partie de l'arbre
que le vêt auoit iettée en terre, on voyoit encore la mesme fi-
gure de croix. Et à fin que cest accidēt si merueilleux paruint
à la notice de plusieurs, la croix demeura quelques années au
tronc de l'arbre, de maniere que plusieurs qui venoient voir
cecy, en estoient tous effrayez. Ceux qui n'auoient pas le moyē
ou la commodité de l'aller voir, prièrent les autres qu'ils fei-
sent peindre & pourtraire au vif la semblance de celle croix,
pour la voir au moins en ceste sorte: ce qui fut fait, de manie-
re que le pourtraict vola iusques és nations estranges. Eliza-
beth auoit déia succédé au lieu de la bonne Royne Marie, &
ceste-cy permit que les Calvinistes demeurassent, voire re-
gnassent en son Royaume. Or on sçait bien que tels garnemēs
brisent les statuēs & images tant qu'ils peuēt, & n'espargnēt
pas mesmes l'image de Iesus-Christ. Dōt le Dieu tout-puissāt
voulut aduertir ces instrumens de Satan, par vn miracle faict
par luy en ceste croix, q̄ desormais ils ne suyussent plus leur
impieté, & qu'ils desistassent de persecuter la Croix, laquelle
on peint & erige en maints endroicts, à fin que les hommes
ayent sans cesse engrauee en leur memoire celle charité ines-
fable,

fable, par laquelle Dieu a daigné souffrir cest horrible & ignominieux supplice de la Croix, pour effacer noz pechez. Le bruiet est, que la Roynie Elizabeth mesme, quelque murmure que les predicans en puissent faire, a vne croix ou crucifix en la chapelle de son hostel, & qu'elle est fort desplaisante quand les ministres debagoulent plusieurs contumelies à l'encontre d'icelle. Que veulēt-ils faire autre chose en abbatāt & brisant *La batail le cōtre les images en Angleterre.* les croix si barbarement, sinon que arracher de noz consciences la memoire de l'amour & beneuolence, de laquelle nous auons esté rachetez? On a fait en Angleterre telle barbarie & felonnie à l'encontre des Croix, que si c'estoient des Idoles des payens, ilz n'en eussent pas tant fait. Car ilz ne se sont pas contentez de les auoir demolies ez temples, mais encores les portans aux champs ilz les ont mis à la butte, & ont ietté les flesches contre icelles. Encore n'est-ce pas le comble de leur impieté. Ilz se iouioiēt par les plus belles villes à ietter dans le feu, non seulement les images des Saintz, mais bien encores les Crucifix. Les autres ont esté si folz, abestys, & priuez de raison, qu'ilz iettoient de petites flesches avec des sarbataines contre le costé de l'Image de nostre Seigneur, duquel sortit sang & eau pour nostre redemption: & estoient si fort enyurez à faire cela, qu'ilz s'entre-battoient à qui premier le feroit, ou qui premier lanceroit vn coup de fleche sur le crucifix: ce qu'un personnage d'autorité, & digne de foy, escrit auoir esté fait aux faulx-bourgs de Londres. O Seigneur Iesus-Christ, ta patience est bien grande ce-pendant, & croy que tu payeras bien quelque iour ces demerites: cōbien que ie ne voy aultre plus grand supplice, que quād tu priues si fort les hommes de ta grace, qu'ils se precipitent en toutes abominations.

Vn peu apres ce prodige adueni en cest arbre, enuiron la Pentecoste vne femme du païs de Cantie en Angleterre, trouua vne croix imprimée dans sa chemise. C'estoit vne damoyelle, & n'estoit point ceste croix peinte de main d'homme, ny tissüe de fil, ou faicte à l'esguille, ains on voioit bien qu'elle estoit née là par la volonté de Dieu. En vain les heretiques, iuifz & Mahometains se parforcent d'abolir la croix de no-

*Imposture
de nos mi-
nistres.* stre Seigneur. Et en passant ie ne me peu tenir, que ie ne vous descouure vne imposture de nos heretiques. Ilz produisent vn Edict de l'Empereur Valens & Theodose, pour ne faire point la croix de nostre Seigneur. La premiere fraude est, que iamais Valens ne fut associé en l'Empire avec Theodose: l'autre est fort commune entre les heretiques. Car Theodose ne dict pas seulement, qu'il ne fault point inciser ou engrauer la Croix, mais il adioust, en terre: laquelle particule ces heretiques ont omise. Ce bon Prince estimoit, que c'estoit chose indigne de la Maiesté de nostre Seigneur, que son image fust peinte ou incisée en terre, à cause qu'on marchoit dessus: & partant il defendit de ce faire. N'agueres encore, que Pape Pie quatriesme fait à Rome la mesme defence. Et voila comme ces meschans imposteurs deçoient le monde, & ne craignent nullement les supplices infernaux, qu'ilz sentiront eternellement pour auoir esté si impudens menteurs & faulxaires.

*La mort
du Roy
Henry,
fort dom-
mageable.* LE vingtdeuxiesme iour de Iuin les noces du Roy Philippe & de Madame Isabel fille du Roy Henry, furent celebrées en telle pompe & magnificence, que vous pouuez penser estre en telz mariages. Du costé du Roy Philippe estoient le Duc d'Albe, le Prince d'Orange, le Comte d'Eguemont & plusieurs autres grandz Seigneurs & gentilz-hommes. Or comme par-apres on celebrait les noces du Duc de Sauoye & de Madame Marguerite sœur du Roy, & on faisoit des ioustes & tournois, le Roy si porta si cheualeusement, que chascun admiroit sa prouesse. Le dernier iour des ioustes plusieurs luy conseilloyent de ne s'y trouuer point, & nommément la Roynie: nonobstant cela il courut, & furent les lances brisées, tellement qu'un esclat entra par la visiere de son armet, & penetra iusqu'au test. De ceste playe le Roy aagé de quarante ans, tres-florissant en honneur & gloire, deceda bien tost apres. Sa mort aduint bien mal à propos pour la France, pourautant que quelques vns tramoient choses nouvelles, & embrassoient l'heresie, ce qu'ilz n'osoient faire quand il viuoit. Et mesmes il auoit deliberé de ne laisser aucun hereti-

que, quel qu'il fust, en son Royaume, si Dieu luy eust octroyé plus longue vie. François son aîné filz succeda au Royaume de France. Or nous sommes admonnestez par ces exemples, qu'il n'y a rien de perpetuel souz le ciel: & que Dieu n'a point acception de personnes, veu que quand il luy plaist, il appelle à soy les grandz & petitz, les riches & les pauures. A quoy considerans diligemment, nous deuons estre tousiours en la grace de Dieu au mieux qu'il nous sera possible, & nous retirer de l'amour des choses mondaines & transitoires: car c'est ce qui nous peult octroier la conscience nette & tranquille.

LE dixhuietieme iour d'Aoust le Pape Paul quatriesme ^{Mort du Pape Paul 4.} deceda à Rome. Mourut aussi Hercule d'Este Duc de Ferrare: & pareillement Isabeau Royne d'Hongrie, laquelle fut ensemblement (chose qui aduient assez raremēt) fille, sœur, femme & mere de Roy. Il y eut en ce temps quelques gallans de predicans, lesquelz exciterent en Escoce quelque trouble ^{Predicans en Escosse} pour le faict de la religion, & iceux estans secondez par quelques Seigneurs, ont depuys mis ce Royaume en ruine & degast.

CALVIN ayant escrit son dernier aduertissement à Ioachim Vvestphal, estoit resolu de n'escire plus rien alencontre de cest opiniastre Lutherien. Au moyen dequoy Theodore de Beze, qui ne vaut pas plus que luy, escriuit ceste année cōtre les calōnies de Vvestphal. On veit quant & quant le liure de Pierre Martyr, composé contre le liure de Estienne Euesque de Vvinchestre, personnage fort docte, par lequel il refute les resueries des Capernaïtes, ainsi appellant les Sacramentaires. Ce liure de Martyr est vn des plus meschans qu'on scau ^{Beze contre Vvestphal.} roit voir, attendu qu'en iceluy il remplist les pages des lieux de la saincte escriture, des peres anciens, & des Conciles, le tout pour confirmer son heresie, laquelle n'a aucune conuenance avec tout ce qu'il cite. Mais ce sont moyens pour plus dextrement deçeuoir & circonuenir les hommes. Et la cause pourquoy il festoit tant peiné à ce faire, c'estoit que l'Euesque de Vvinchestre alleguoit à propos tant de passages des an- ^{Pierre Martyr heretique.} Pppp.ij.

ciens, que plusieurs Catholiques d'Angleterre s'en sentoient bien confirmez, & plusieurs Sacramentaires, ce lisans, estoient à demy esbranlez.

*Les Luthé-
riens con-
damnent
plusieurs
sectes.*

LES ieunes Seigneurs de Saxe firent ceste année imprimer vn liure escrit en Aleman & en Latin. Les Comtes de Mansfeld meirent en lumiere vn autre liure, auquel sont recitées onze sectes, lesquelles sont condamnées comme heresies execrables. Entre icelles sont comprins les Melancthonistes, Maioristes, Adiaphoristes, & les Sacramentaires aussi. Or s'ourdrit vne grosse contention à Heidelberg, entre Tilman Heshusius & Guillaume Clebire, touchant la Cene du Seigneur. Ce voyant le Prince Palatin, à qui appartient Heidelberg, demande à Melancthon qu'est-ce qu'il luy sembloit de ceste altercation. Auquel Melancthon respondit de telle sorte, qu'il sembloit auoir controuué vne nouvelle opinion des Sacramentaires. Et telle est la coustume des heretiques, qu'ilz vont tousiours de l'vne en l'autre, pire que la premiere. Or Nicolas le Coc, ministre de Ratisbone, respondit brauement à cest escript de Melancthon.

*Les Thiet-
marques
vaincus
par le Roy
de Danne-
marc.*

LE Roy de Dannemarc, ayant appelé à son secours les Princes ses voyzins, subiugua les Thietmarques, peuples libres ou pretendans estre libres. Ce peuple souloit estre subiect à l'Archeuesque de Breme, & estre fort addonné à la religion Catholique, & ainsi viuant il auoit tousiours esté inuaincu. Mais estant venu Lutherien, apostat de sa premiere religion, il paya la temerité de laquelle il auoit vsé : & c'est vn des fruictz du nouveau Euangile, lequel nous recommande bien soigneusement la liberté de la chair, & ce pendant il ne fault iamais d'envelopper ses sectateurs au ioug du Turc ou du Moscouite. Tu es donc iuste, Seigneur, & ton iugement est iuste à merueilles.

Psal. 118.

*Le Pape
Pie 4.*

L'AN 1560. le second iour de Ianuier fut esleu Pape Iehan l'Ange de Medicis, Milannois, & fut nommé Pie 4. Il se porta fort deuément en sa charge. Or en mesme année Iehan de

*La mort
de Me-
lancthon.*

Lasco mourut en Poloigne, grand Sacramentaire. Pareillement alla de vie à trespas Philippe Melancthon, fort grand

Lutherien, mais toutesfois plustost Zuinglien que Lutherien quand au faict de la Cene. Cest homme a faict grand dom-
 mage à l'Eglise Catholique, principalement pour ce qu'il fai-
 soit du modeste, & par ce moyen il acqueroit la faueur de
 plusieurs, laquelle Luther auoit perduë pour crier vn peu par
 trop. Mesmes on dict que Melancthon corrigea & addoucit
 quelques liures de Luther, pour-autant que filz eussent esté
 mis en lumiere en telle façon, que Luther les auoit premiere-
 ment composez, plusieurs se fussent separez de la doctrine y
 contenue. D'auantage Melancthon estoit grand compai-
 gnon des Sacramentaires, comme celuy qui s'accordoit assez
 avec leur doctrine. Il exhorta Iehan Crespin à imprimer les
 œuures d'Oecolampade pour la seconde fois, il escriuit fort
 familièrement à Calvin & à Bullinger de ses affaires, & con-
 seilla à plusieurs de s'en aller à Zurich & à Geneue, pour y
 puyser la vraye sentence de la Cene. Parquoy, comme quel-
 que Sacramentaire a escrit, ses disciples & nourrissons luy di-
 rent mille iniures & durant sa vie & apres sa mort, à cause
 qu'il auoit forligné du chemin monstre par Luther quand à
 l'Eucharistie. Mais pourquoy ses disciples ne le deschireroiēt
 ilz à belles iniures, veu que luy-mesme a bien faict le sembla-
 ble enuers l'Eglise sa mere?

*Il fauorise
 fort aux
 Zuingliens.*

OR il nous faut entendre, que les ministres de Magde-
 bourg auoient faict imprimer quelques volumes de leur hi-
 stoire Ecclesiastique, tellement que ceste année sortit en lu-
 miere la quatriesme Centurie de ladicte histoire. Mathias Il-
 lyric & ses compaignons, forgerons de ceste histoire, la de-
 dierent à la Roynne d'Angleterre, encore qu'ilz ne doutassent
 en l'epistre dedicatoire donner des attainctes aux Sacramen-
 taires, comme ceux qui veulent avec leurs raisons de Philo-
 sophie euacuër le Testament du Seigneur, tellement que,
 cōtreuenans aux expresses parolles de Iesus-Christ, ilz nyent
 que le corps & sang d'iceluy soient presens & soient receuz
 en l'Eucharistie, laquelle opinion ilz ne font qu'envelopper
 de mille refueries. Et combien que les Zuingliens se vantent
 que les peres anciens sont pour eux, si est-ce que ceux-cy le

*La cinq-
 iesme Cen-
 turie des
 Lutheriens.*

nyent, & maintiennent qu'ilz font plustost pour leur sentence. A qui des deux croirons-nous?

*L'auteur
par occasiō
se met à
parler des
Centuries
Lutherien
nes, refu-
sant les
pointz de
la religiō:
qui est un
traicté
fort neces-
saire.*

Sur ce propos nous auons pensé que ferions chose vtile, si nous touchions quelques pointz de ceste histoire de Magdebourg, & si nous monstrions au lecteur, de quelle fidelité ont vsé ceux qui l'ont composée. Ilz se vantent de ne dire rien que la pure & simple verité, ce qu'ilz font accroire au peuple: mais ceux qui ont bon iugement, ou ont leu quelque chose, y trouuent tant d'impostures, tant de cōuices intolerables des peres anciens, & plusieurs autres choses insupportables, qu'ilz colligent aysément, que leur but n'est pas de composer vne vraye histoire, ains plustost de corrompre les vrayes histoires & escriptz des Peres, pour decevoir les lecteurs. Je m'assure que les Catholiques leur respondront quelque iour assez au long, & produyront en lumiere toutes leurs impostures. N'augueres encore, que Alain Copus Anglois, homme fort sçauant, a mis en lumiere six dialogues, ausquelz il descouure plusieurs tromperies & fraudes d'iceux: le quel i'ay delibéré ensuyure en cest endroict, & delà ie puyseray quelques choses, que i'escriray comme bon me semblera. Et pour ce que ie ne puy m'arrester longuement sur ceste matiere, ie feray court, de sorte toutesfois, que le lecteur ayant leu ce que i'en auray dict, pourra aysément iuger quelle est l'histoire par eux distribuée en tant de Centuries.

*Alain
Copus.*

Vne des choses qu'il nous faut plus deplorer en ceux qui ont quitté l'Eglise Catholique, est, qu'ilz sont si ardans & intentifz à nuyre, qu'ilz ne laissent rien passer de ce qui peult seruir à endommager les hommes. Que si eux seulz perissoient, on diroit que la malice des hommes endureroit telle chose à bon endroit. Mais puy qu'ilz ne se contentent pas de se perdre, ains quāt & eux se parforcent de faire damner tous les autres, cela est si inhumain & barbare, qu'on ne le pourroit assez dignement expliquer. Et veritablement il y a danger, si Dieu par sa puissance ne brise leurs desseings, qu'ils ne corrompent tous les lieux des anciens Peres qui cōbattent contre leur heresie: attendu que Luther, premier au-

theur de ces troubles, a pieça corrompu & depraué la saincte
 escriture mesme, & que les Lutheriens reprochent aux Lu-
 theriens & Sacramentaires, & les Sacramentaires aux Luth-
 eriens, qu'ils ont falsifié les lettres saintes. Voyans ces hereti-
 ques, que les Papes de Rome leur ont tousiours donné sur les
 doigts, selon l'autorité qu'ils ont de ce faire, ils ne font que
 crier contre les Papes, & signamment ceux de Magdebourg,
 qui n'espargnent pas mesme ceux-là, qui ont souffert martyre
 pour Iesus-Christ, ou ont esté recommandables par leur eru-
 dition & pieté. C'est pourquoy ils osent reuoquer en doute, si
 S. Pierre fut oncques à Rome: & combien qu'ils citent plu-
 sieurs passages des anciens, par lesquels il appert que S. Pierre
 a esté à Rome, outre le consentemēt vniuersel de toute la ter-
 re sur ce, neantmoins ils ne se soucient pas beaucoup que tu
 croyes lequel tu voudras. Ils voudroient fort prouuer, que S.
 Pierre ne fut oncques à Rome, à fin que delà ils prouuassent
 que les Papes de Rome ne sont point successeurs de S. Pierre,
 & qu'ils n'ont point préeminence sur les autres Euesques.
 Calvin est en plusieurs choses, & en cecy nommément, fort
 variable. Au 4. liure de ses Institutions chap. 6. il dict, qu'il ne
 veut point debatre que S. Pierre n'ait esté à Rome, & qu'il
 n'y soit mort, veu le tesmoignage qu'en rēdent les Peres: mais
 escriuant sur l'epistre S. Pierre, Si S. Pierre (dit-il) n'a en vn clin
 d'œil volé par dessus les terres & les mers, c'est sans doute qu'il
 est mort bien loing d'Italie. Tu voys la constāce de ce Theo-
 logien, & peux voir aussi que l'esprit de mensonge a occupé
 leurs consciences. Et quand à ce que ceux de Magdebourg,
 Calvin & les autres heretiques veulent rengier le Pape, disans
 que l'Eglise Romaine n'a non plus de puissance que les au-
 tres, cela monstre bien leur pure desloyauté: veu qu'ils sçauēt
 trop bien, que de toute antiquité les principaux hōneurs ont
 esté deferez aux Papes de Rome, & que le liure * de Charle-
 maigne (duquel ils font si grand feste, pensans nous auoir at-
 terrez) afferme expressément, que l'Eglise Romaine n'a point
 esté preferée aux autres par quelques constitutions des Con-
 ciles, mais bien par l'autorité de Dieu nostre Sauueur. Si ce

*Les hereti-
ques voul-
droient fort
prouuer q
S. Pierre
n'a point
esté à Ro-
me.*

*L'opinion
de Calvin
sur ce.*

*De l'au-
thorité des
Papes.*

** liure 1.
chap. 6.*

liure leur semble si authorisé, que n'en reçoivent-ils ce passage & plusieurs autres? Ces gentils compositeurs des Centuries de Magdebourg, farcies de mensonges, racontent vn crime horrible de ce saint Martyr & Pape de Rome Cornelius, (car ainsi le traittent-ils) & veulent monstrier par le tesmoignage de S. Cyprian, que Cornille, contreuenant au precepte de Iesus-Christ, mettoit seulement de l'eau au calice que receuoit le peuple: adioustans autres blasphemes, Que le mystere d'iniquité a bien tost commencé à trauailler au siege de Rome, aussi bien en la Cene, que es autres poincts de la religion. On voit de prime face, que ces hommes bruslent d'hayne & d'enuie merueilleuse contre l'Eglise & les Papes Romains, & Dieu permet, que leur auenglement soit si grand, qu'ils se facent mocquer d'eux par toute la terre, sans qu'ils l'apperçoient. Car en premier lieu, ce qu'ils disent est apertement faulx: comme si ce tant loüable Euesque & martyr, tant recommandé par S. Cyprian, auroit esté si stupide & meschant, qu'il ne donnast que de l'eau au peuple contre le commandement de nostre Seigneur. D'auantage l'epistre de * S. Cyprian, qu'ils alleguent pour eux, ne fut iamais escrite à Cornille, mais bien à Cecile Euesque d'Afrique, lequel auoit esté present au concile de Carthage, où il fut traité de rebaptizer les heretiques: & nonobstant ces imposteurs sont osez iusqu'à là, que de mettre au lieu de Cecile, Cornille, au contraire de tous les exemplaires. L'enuie & hayne fait cela en eux, desquels vices (comme dit S. Hierosme sur l'epistre aux Galates) S. Cyprian a escrit vn beau liure, lequel ceux-cy deuoient plus tost auoir leu, & se corriger selon iceluy, que d'alleguer à faulces marques l'epistre à Cornille. Le lecteur donc assée son iugement sur la fidelité de ces escriueurs: & cognoisse, que ceux se trompent à veüe d'œil, qui pensent auoir trouué vn grand tresor, lisans ces histoires. Et à fin que le lecteur ne pèse point qu'à tort & sans cause ie me plains d'eux, au mesme 6. chap. de la troisieme Centurie, auquel ils attribuent cest erreur de la Cene à Cornille, ilz monstrent à tout le monde leur peruersité, disans que ceste epistre a esté enuoyée, non à Cornille, ains

*En la Cē-
turie 3. ch.
6. & 7.*

*Ils accu-
sent le saint
Pape Cor-
nelius d'he-
resie.*

** lib. 2.
epi 3.*

*Depraua-
tion intole-
rable d'v-
ne epistre
de S. Cy-
prian.*

*Impossi-
ble oulraire*

ains à Cecile, combien que ailleurs ilz maintiennent qu'elle fut écrite à Cornille. De maniere qu'en vn mesme chappitre ilz disent le blanc & le noir: laquelle imposture me semble si grande, qu'on ne la sçauoit suffisamment detester. Et ne deuons plus nous esmerveiller, pourquoy ces heretiques disent tant de mal des Papes de cestuy nostre siecle, & d'autres plus anciens: considéré qu'ilz ne font pas meilleur marché à cest ancien & tant celebre Euesque & martyr. Ceste iniure faiëte aux Papes redõde à la personne de Iesus-Christ, qui les vengera quelque iour fort terriblement, voire les venge des à present, permettant que ces imposteurs mesmes decelēt leurs fraudes, sans que autre le face. De mesme fidelité ont-ilz vſé maintesfois, en produysant les sentences de S. Cyprian & autres Anciens contre la Principauté du S. Siege Romain: & si leur puissance estoit aussi grande que leur volonté, pieça ce Siege fust entierement demoly & ruiné: mais les pauures gēs traouillent en vain. Si deuons encore cōsiderer, que biē qu'ilz n'ōstroient aucune autorité aux peres Anciens, quand l'occasion se presente, toutesfois silz peuuent trouuer vn pied de mouche seulement qui semble leur fauoriser, ilz le tournerōt tant, & tant le tireront par le nez, qu'en fin ilz le feront seruir à leurs menſonges. Et c'est pourquoy encore que S. Cypriā ayt esté si soigneux de l'vnion & concorde Ecclesiastique, qu'il ne vouloit pas reietter de sa cōmunion ceux mesmes qui ne suyuoiēt pas son opinion de rebaptizer les heretiques: ilz alleguent neātmoins plusieurs lieux d'iceluy, pour oppugner l'vnion Chrestienne, qui ne peult estre sinon avec l'Eglise Romaine, laquelle S. Cyprian appelle la principale, la racine, la mere, la source d'vnion, avec le consentement de toutes les autres Eglises. Et c'est encore pourquoy ilz reiettent ceste sentence de S. Cyprian, (sentence commune à plusieurs Anciēs) par laquelle il dict: il n'y a qu'une Eglise, laquelle ne peut demeurer vne dedans & dehors. Car si elle est chez Nouat, (heretique) elle n'a point esté chez Cornille: & de mesme, si elle a esté chez Cornille, qui a legitiment succédé au Pape Fabian, certes Nouat n'est pas en l'Eglise. Mais pourquoy font

Falsification des Anciens par les heretiques.

*Livre 1.
epist. 6.*

Qqqq.j.

ilz cela? A cause que là est faicte mention de la succession legitime, laquelle ilz hayssent comme poisons, pour-ce qu'ilz ne la sçauoient monstrier en leurs synagogues.

Les canons du Concile de Nice deprauez par les Papes, selon nos gens. ILZ se parforcent de monstrier, que les Papes Romains ont depraué les canons du Concile de Nice, à fin qu'ilz vsurpassent l'autorité sur les autres: & imputent telle impieté à Innocent premier, à Zosime, à Boniface, à Celestin, tous anciens & saintz Euesques: & disent encore, que Zosime, comme faulx tesmoing, mourut diuinement trois ans & neuf mois apres. D'abondant ilz louient bien fort le 6. Concile de Carthage, auquel Saint Augustin fut present, & l'appellent le Concile ample & excellent: disans que les Peres d'iceluy, ayans apperceu la desloyauté des Papes de Rome, arresterent, que delà en auant le Pape n'auroit que voir sur les Eglises d'Afrique. En quoy faisant, ilz deçoient tousiours quelque simple homme, mais ilz contraignent les hommes doctes à admirer leur peruersité & mensonge. Les Papes de Rome n'auoient que faire d'approuuer ou depraue le Concile de Nice, attendu que nous auons la parole de l'Euangile expresse, par laquelle Iesus. Christ attribué à Saint Pierre la puissance de paistre ses brebis, & de confirmer ses freres. Iamais les Peres Africains ne mespriserent l'autorité du siege Romain, iamais ilz ne luy dérogerent: & quand ilz l'auroiét fait, (ce que iamais les heretiques ne monstrent) nous auons le Concile de Sardes, lequel 300. Euesques signerent, & cestuy-cy sur-haue grandement la puissance du Pape. Que si nous voulons aduiser de plus pres au Concile sus allegué, il ne faict nullement pour nos aduersaires. Car combien que quelques Euesques doutassent, si ceux estoient les Canons du Concile de Nice que les Legatz du Siege Romain apportoiert, neantmoins ils protestoient de les vouloir garder, iusqu' à tant qu'o leur eust apporté les exemplaires entiers du Concile de Nice, d'Alexandrie, d'Antioche & Constantinople. Et les Legatz ayans sur ce dict, qu'il seroit bon d'en escrire au Pape, Aurelle

» Euesque de Carthage, avec le consentement de tous les autres, escriuit ainsi: il faut que par les lettres de nostre petitesse

S. Ioh. 21

S. Luc 22

nous certiorons planieremēt nostre frere Boniface (Pape) de
 tout ce que nous traictons. Par lesquelz motz ils monstrent
 l'obeissance qu'ilz portoient au Pape, ce que les heretiques
 ne font pas semblant de voir, pour empieter les moins sça-
 uans. Ils ne font pas si asnes qu'ils ne sçachent bien, que ce que
 les Legatz alleguoient au Concile de Carthage, n'est pas au-
 iourd'huy aux Canons du Concile de Nice, mais bien en ce-
 luy de Sardes, Concile certes fort authorisé, & auquel ce grād
 Hosius, qui auoit esté present au premier Concile de Nice, as-
 sista. C'est donc l'accoustumée malice de nos heretiques, la-
 quelle est si enuenimée, qu'à tort & à trauers elle veut defen-
 dre ses erreurs. Et c'est pourquoy ils font en cest endroit si
 grand cas du Concile de Carthage, combien qu'ils ayent cou-
 stume de reietter le Concile & de Nice, & de Chalcedon, &
 tous les autres, quand bon leur semble. Si au demeurant quel-
 cun veult sçauoir ce que les Euesques d'Afrique attribuent
 aux Papes, sans lire tant de choses, trois epistres inserées entre
 celles de S. Augustin, à sçauoir la nonante, nonāte deux & no-
 nantecinquiesme le deliureront de peine. En la nonante, les
 Euesques du Cōcile de Carthage escriuent au Pape Innocent
 en ceste sorte: Nous auons voulu aduertir vostre charité (fre-
 re saint) de tout ce faict, à fin que l'autorité du siege Apосто-
 lic soit adioustée aux ordonnances de nostre petitesse. Nos
 Centurions se sont bien donné garde d'alleguer ces parolles,
 se contentans de citer quelque loppin de texte qui semble ser-
 uir à leur opinion, pour tousiours attirer quelcun à leur cor-
 delle. Or ne m'arresteray ie plus longuement à refuter leurs
 bauarderies touchant les Papes, pource que cecy n'est pas
 mon but: mais ie diray encore ce mot, que Saint Augustin
 en l'Epistre cent cinquantessept afferme s'estre transporté en
 Mauritanie de Cesarée, ayant sur ce reçu commandement
 de Zosime, Euesque du siege Apostolic. Et par tant il appert,
 que Saint Augustin a recogneu la puissance du Pape Zosi-
 me, lequel neantmoins ces heretiques disent estre mort par
 diuine vengeance trois ans & neuf moys apres. En la mesme
 epistre (ce que i'allegue pour leur clorre encore plus la bou-

*L'opinion
 qu'auoient
 les Afri-
 cains du
 S. Siege de
 Rome.*

*De S. Au-
 gustin.*

che) Sainct Augustin dict, que Pelagius & Celestius ont esté condamnés par les Papes Innocent & Zosime comme heretiques, par toute la terre Chrestienne: motz qui declarent assez, que la puissance des Papes s'estend sur toute l'Eglise. Mais c'est trop parlé de cela: & pleust à Dieu que chacun cogneust la meschanceté de ces hypocrites à traicter les affaires de religion. Je laisse à part l'iniure que font ces Centurions à Leon premier, & à Gelase, Papes fort sainctz & lettrez: & com-
En la Cē. bien impudemment ils mentent, disans que les Peres du sie-
5. chap. 10 cle cinquiesme ont peu ou point parlé de la puissance des Pa-
Cent. 4. pes sur les autres Euesques: & que le Pape Iules, fort ancien
chap. 7. & de grande sainteté, a controuué les canons de sa puissance: lesquelz mensonges ne sont point preiudiciables à ces bōs Papes, mais descouurent seulement la hayne de nos heretiques à l'encontre d'iceux, & ensemble leur malice extreme, laquelle Dieu punira quelque iour comme il appartiendra, quoy qu'il attende maintenant. Voyons encor' vn acte digne de telz personnages. Ilz produysent de Socrate & Zozomene vn canon, lequel est corrompu, & ores avec Muscule ils disent qu'il signifie, que les Eglises ne soient point dediées sans le consentement du Pape: ores ils disent, qu'iceluy veut dire, que les Papes de Rome selon leur prerogatiue euoquent les causes des Euesques à leur siege, de quelque prouince qu'ilz fussent. Ces deux sentences sont en mesme centurie, & en vn mesme fueillet ilz se contrarient quand à ce canon. Au reste, le vray sens de ce Canō est, cōme l'a tourné l'ancien interprete d'Epiphane Scholastic, q̄ les Conciles ne doiuent point estre celebres sans la permission du Pape, ou qu'on ne doit faire ordonnances és Eglises, comme quelque docteur homme l'a tourné de puis. Et puy que ce canon est fort ancien, & qu'il donne tant d'autorité aux Papes de Rome, ces escriuains de Centurie ne le peuuent endurer, & neantmoins ilz le citent, pour boire ceste honte.

Les hereti- OR nous auons assez remonstré les mensonges des pre-
ques cōtre dicans contre les Papes de Rome: & partant nous viendrons
le celibat maintenant à parler de ce qu'ilz disent contre le celibat ou
des prestres

vie continente des prestres, dont le principal est vne epistre, laquelle ilz disent estre d'Vdalric Euesque d'Ausbourg.

Voyons donc la fable qu'ils alleguent de l'Epistre du dict Vdalric, Euesque d'Ausbourg. Ils luy attribuent certaine Epistre, (comme vous voyez qu'ils n'ont nulle honte) laquel-^{Imposure d'eux.} le il auroit iadis escrete au Pape Nicolas premier de ce nom. Mais ce mensonge est conuaincu aysément, en conferant le temps auquel ces deux personages ont vescu. Car tous les plus doctes escriuains afferment, que ce Pape Nicolas mourut l'an huiet cens soixantesept: & que Vdalric alla de vie à trespas l'an neuf cens septante trois. Et partant que le lecteur collige d'icy, comme ces Centurions de Magdebourg nous proposent des Chimeres au lieu d'histoires Ecclesiastiques. Qu'estoit-il besoing mettre en ieu Vdalric, la vie duquel a esté diametralement opposée aux heresies de ce siecle? Ils ont mieux aimé controuuer ie ne sçay quelle Epistre, & luy attribuer à faulx, que d'auoir esgard à la sainte vie d'iceluy, chose fort contumelieuse enuers vn si homme de bien. Car on dict communement ceste loüange d'Vdalric, qu'il a esté^{La vie de S. Vdalric, Euesq d'Ausbourg.} pasteur & docteur tres-fidelle de l'Eglise. Et à fin que le lecteur puisse mieux veoir la dyspathie & repugnance, qui estoit entre Vdalric & toute la troupe des nouveaux dogmatistes, iceluy fut nourry petit enfant au monastere Saint Gal, & puy ses parens le donnerent à Adelberon Euesque d'Ausbourg, qui l'aima fort à cause de ses bonnes mœurs. Estant fait Euesque d'Ausbourg, il passoit presque tout le temps à lire & prier Dieu, chastiant sa chair, s'abstenant tousiours de viandes, & avec cela celebrant fort souuent la Messe. Maintesfois il faisoit la visite sur tout son diocese, & s'enqueroit soigneusement, si le peuple obeïssoit à vne vraye doctrine & aux commandemens de l'Eglise. Il fut à Rome, d'où il apporta quelques reliques des Saintz, & luy-mesme feit plusieurs miracles vsant du saint huyle. Finalement il deceda aagé de octante quatre ans. Qui doncques ne s'esmeruillera, comme ces heretiques osent faire mention de cest homme.

*Pure fa-
ble de S.
Gregoire
premier.*

M A I S reuenons à nostre Epistre. Il est escript en vne partie d'icelle, que Sainct Gregoire premier, Pape de Rome, trouua en ladicte ville six mille testes de petitz enfans en vn viuier, lesquelz auoient esté tuez de leurs peres à cause du celibat que Sainct Gregoire leur auoit commadé, dequoy Sainct Gregoire se repentit fort par-apres. Bon Dieu, quelz mensonges? Où est-ce qu'on trouuera vne syllabe de ceste fable, escripte en vn bon autheur? Ce n'est pas Sainct Gregoire qui a inuenté le celibat: La terre vniuerselle le cognoissoit lōg temps deuant S. Gregoire. Il est vray qu'iceluy comanda, q̄ les souzdiacres en Sicile ne fussent pomez à cest ordre, sans premier auoir promis chasteté: mais les souzdiacres estoient tenuz à la mesme loy des le temps de Leō premier, voire deuant, comme il appert dans Epiphane au liure secōd, heresie cinquante-neufiesme & par le trentetroisiesme canon du Cōcile Eliberatin. Y a-il chose plus absurde que de croire, que en si peu de temps que Sainct Gregoire fut Pape, les souzdiacres de l'Isle de Sicile procréerent tant d'enfans, & apres les auoir meurtrys inhumainement, les apporterent en vn viuier de Rome, par tant de chemins de terre & de mer, comme si en Sicile il n'y eust pas eu assez de mers ou de fleues pour les noyer? Encor' est-il plus admirable, que les souzdiacres ayent trouué ce conseil si vnanimement, pour massacrer leurs enfans: & les ayent portez iusques à Rome si secrettement, sans que iamais personne decelast cest acte.

E T comme il n'y a rien en la vie par nous bresuelement recitée de ce Sainct Vdalric, qui leur serue aucunement, aussi filz veulent receuoir l'Epistre laquelle meschamment ils luy imposent, ilz seront contrainctz de se desdire & se desmentir eux-mesmes. Car icelle enioinct seuerement aux prestres & moynes de ne se point marier: & si recognoist le Pape Romain pour Euesque vniuersel, pour chef de toute l'Eglise, & pour vrayement Apostolic.

O R voulans prouuer en cest endroiect que le mariage des prestres est conforme à la parolle de Dieu, apres auoir bien trauaillé, ils voyent qu'ils n'ont perdu que leur peine, estans

accablez du perpetuel consentement & autorité de l'E-
 glise. Car les Grecz mesmes, estans ia initiez aux ordres, ne
 peuuent plus se marier. Leurs parolles sement à pleine gorge
 vn cueur l'ascif, esclau de Venus, & addonné à toute ordure.
 Ils taschent de defendre ceste leur vilennie, mais ils n'amei-
 nēt rien qui vaille. Car leur principale probation est fondée
 sur l'histoire de Paphunce, lequel ils disent auoir suadé aux
 Peres du Concile de Nice, de n'enioindre point continence
 aux prebstres: laquelle * histoire neātmoins est fort douteuse
 & incertaine, & depend presque toute de Socrates, qui sem-
 ble auoir esté Nouatiste, duquel Zozomene l'a extraicte, hi-
 storien que ces gentils Centurions font addonné à toute su-
 perstition, quand il dict quelque chose contre leur heresie. Et
 si nous venons à rechercher la sentence & doctrine des Pe-
 res anciens & de toute l'Eglise sur ceste matiere, nous trouue-
 rons que la continence des prebstres est si antique, que ceux
 qui taschent de l'oppugner, veulent faire voir à tout le mode
 qu'ils sont hors du sens. Mais ce n'est pas mon dessein d'alle-
 guer tant de choses, seulement ie citeray vn mot du Concile
 2. de Carthage, attendu qu'ils ont bien allegué du sixiesme, ce
 qui leur sembloit déroger à l'autorité du Pape, comme vous
 auez veu cy dessus. Voicy donc les mots inferrez au chap. * 2.
 de ce Concile: Nous auons ordonné, que les Euesques, preb-
 stres & diacres seroient continens en tout & par tout, comme
 faut que soient tous bons Prelats, tous prebstres de Dieu, tous
 Diacres, ou ceux qui seruent à l'autel: & ce, à fin qu'ils puissent
 mieux impetrer de Dieu ce qu'ils veulēt, & à fin que nous ob-
 seruions ce que les Apostres ont enseigné, & ce que toute l'an-
 tiquité a gardé inuiolablement. Voyla l'arrest de ces Peres, ar-
 rest qui n'est gueres autorisé par les Ceturions & autres pre-
 dicans, pour ce qu'un cueur serf de vilennie hait la doctrine
 de chasteté. Neantmoins ils citeront quelquesfois les Peres
 Africains pour eux, comme s'ils faisoient aucun conte des Pe-
 res anciens, qui qu'ils soient, si iceux ne sont conformes à leur
 ordure & impudicité. Mais cela leur sert de rets pour prendre
 le simple peuple. Peult-estre qu'ils diront, que ce canon doit

* Paphu-
 ce suada
 seulement,
 que les Ec-
 clesiastiqs
 mariez de
 uant qu'ils
 eussent les
 Ordres, ne
 fussent point
 cōtrainctz
 de laisser
 leurs fem-
 mes. Socra-
 tes li 1. ch.
 8. & So-
 zom lib. 1.
 chap. 22.

* En la
 distin. 82
 cum in pre-
 terito: &
 fut ce Cō-
 cile celebré
 deuant le
 premier de
 Nice.

estre entendu du temps du ministère, auquel on doit s'abstenir des femmes: mais tous les anciens leur fermēt la bouche, disans que ceux qui ont les saincts ordres doiuent garder perpetuelle continence, pourautant que (comme dit S. Ambroise sur le 3. chap. de la 1. à Timothée) ils doiuent & iour & nuit prier pour le peuple duquel ils ont la charge. Oyons S. Hierosme criant contre Vigilance. *Que font les Eglises d'Orient,*
dit-il, que font celles d'Egipte, & celles du siege Romain? Les
clercs d'icelles sont vierges, ou cōtinens, ou s'ils ont esté quel-
ques fois mariez, ils ne le sont plus. Que ces paillards donc-
ques sacrifient à leur Venus tāt qu'il leur plaira: quelque iour
viendra que nostre Seigneur leur donnera sur les doigts, & les
precipitera au profond des enfers pour auoir si ordemēt pas-
sé leur vie.

*Traicté de
la vie mo-
nastique,
oppugnée
par les he-
retiques.*

*En la Cē-
turie 2.
chap. 7.*

Ces composeurs de Centuries s'attaquent viuement à la vie monastique, mais ie dy si ardemment, que vous diriez que tout ce qu'on leur opposera, ne peult seruir de rien: disans que la vie monastique est contraire à la parolle de Dieu, est vne maniere de vie superstitieuse, & qu'on ne sçauroit trouuer vn tesmoing loyal de ceste vie iusqu'à trois cens ans apres nostre Seigneur: sinon les epistres decretales des Papes, & Vincent, qui fait mention d'un monastere en Alexandrie d'Egipte, quand il raconte la legende de Sainte Eugenie. Ie sçay bien que contester avec ces hommes, est perdre autant de bonnes heures: toutesfois, à fin que nous gratifions en ce au simple peuple, qui est miserablement deceu, ie vous vay descouurir leur imposture fort brefuement, pour ce que tous ces discours sont hors de mon propos. Le lecteur prēne garde en premier lieu, à quelle impieté ces hommes se sont precipitez: veu que combien qu'ils produysent des plus anciens auteurs force tesmoignages de la vie monastique, voire des miracles faicts par les moines, neantmoins ou ils s'en moquent, ou les diminuent malicieusement, ou les reiettent comme pures fables: & toutesfois ils nous pensent blecer à mort, quand ils nous obiectent vn loppin d'epistre de quelque Vdalric, qu'ils veulent estre S. Vdalric. De maniere que si le moindre mort du monde

monde leur semble fauoriser, & contrarier à l'Eglise Catholique, quelque obscur & debile qu'il soit, ilz s'en targueront, comme d'un bouclier impenetrable. Mais si le consentement perpetuel de tous les siecles, & toute la terre Chrestienne contreuient à leur opinion, ilz n'en feront conte, ils le reietteront, ou à tout le moins ils le detorqueront en un autre sens. Nous auons pour tesmoins de la vie monastique, Saint Denis Areopagite, les Saintz Athanase, Basile, Chrysostome, Hierosme, Augustin & autres innumerables: mais ce que ces Peres ont escrit des moines, noz heretiques veulent que ce soient fables, ou bien ne font que s'en moquer: & n'ont honte d'appeller prestiges des diables & transgressions des mandemens de Dieu, les miracles tres-euidens que Dieu a fait faire aux moines. Comme quand ils reiettent les histoires des moines escrites par des Anciens fort graués, comme fables controuuées & superstitieuses: quand ils disent, que Saint Gregoire a employé tout son sçauoir en ses Dialogues, à celebrer les folies des moines: & nommément ils estiment, que ce que ledict autheur a laissé par escript de S. Benoit, n'est pas digne d'estre leu, à cause qu'il est trop superstitieux: & cependant entre autres miracles, qu'ilz disent ressentir par trop à la superstition & idolatrie, ilz recitent en leurs belles Centuries vne chose extraicte de S. Gregoire, à sçauoir qu'estant vne bouteille de verre, où il y auoit un peu d'huyle, iettée sur des pierres par le commandement de S. Benoit, elle ne fut point rompuë. Plusieurs autres miracles tirez partie de S. Gregoire Pape, partie de Gregoire de Tours & autres autheurs, que les gens de bien lisent avec admiration & reuerence, sont illec recitez & ornez de ce beau tiltre: Des miracles qui sentent la superstition & idolatrie. Parquoy les religieux de ce siecle ne doiuent trouuer mauuais, si ces predicans du nouveau Euan-

*Des mira-
cles des
moines an-
ciens.*

*En la Cē-
tur. 6.
chap. 13.*

Rrrr.j.

*Cent. 4.
chap. 10.* si enuenez, qu'ils se moquent de Saint Ierosme, lequel témoigne en la vie du moine Hilarion, que ce bon homme suuant vne parfaite vie s'abstint de pain, l'an soixâtequatriesme de son aage, iusqu' à l'octantiesme, de maniere qu'en ce tēps il retourna comme tout nouveau au seruice de Dieu, auquel temps les autres ont coustume de viure plus sobrement. Voila comment ils contraignent Hilarion d'estre superstitieux, homme si excellent & si admirable selon Saint Hierosme, que si Homere eust entrepris d'escrire sa vie & conuersation, il n'eust pas esté bastant pour l'escrire, ou se fust trouué biē empesché.

De S. Hilarion.

CAR, comme recite Saint Ierosme, estant sur l'aage de quinze à seize ans, comme le Diable luy suggeroit des flammesches & esguillons accoustumez de volupté, luy se feschât
 „ à soy-mesme, & se battât la poitrine, hâ meschant asne (disoit
 „ il) ie t'empeschera bien de regimber : car ie ne te nourriray
 „ pas d'auoyne, mais de paille : ie te feray mourir de faim & de
 „ soif, ie te chargeray d'un tel fardeau, que tu auras plus le cuer
 „ à manger qu'à paillardise. Et pareillement il ne cessoit de
 „ prier Dieu & psalmodier, choses si estranges à nos aduersaires,
 „ qu'ils se mettront à crier, ô la superstition ! Toutesfois
 „ puis que l'Apostre confesse auoir chastié son corps, & l'auoir
 „ maistrisé, crieront-ilz aussi en cest endroit que c'est
 „ superstition ? Il faut veritablement brider & domter ceste
 „ chair par ieusnes, veilles, prieres, & autres exercices de pieté :
 „ laquelle doctrine n'est pas des diables, ains de Iesus-Christ & de
 „ ses Apostres, avec laquelle ces pourceaux du troupeau d'Epicure
 „ n'ont societé aucune, à cause que toute leur philosophie rend
 „ aux embrassemens & delicatesses de Venus, à laquelle ils font
 „ rage de sacrifier : de maniere qu'ilz peuuent à meilleur droit
 „ estre appelez Idolatres, que ces bons anciens moines qui se
 „ consacroient totalement à Dieu. Mais reuenons au propos. Ces
 „ maistres escriuains disent, qu'on peut remarquer les notes de
 „ l'Antechrist en S. Benoist, Patrocle, & autres plusieurs saints
 „ moines : disent aussi que Sainte Brigide, renommée par tout le
 „ monde, & nommé-

*En la Cité
6. cha. 10*

ment en Escoce, a esté Magicienne: ce qu'ilz afferment pareil-
 lement de Sainct Martin, qu'ilz confessent auoir esté premie-
 rement moine, deuât qu'il fust Euesque. Ces impostures sont
 par eux assurées si impudemment, que vrayement ilz ne crai-
 gnent point, que Dieu venge telles iniures de ses Sainctz, cō-
 me maintesfois il a faict. Nous deuons donc en ce lieu ra-
 menteuoir ce mot couché en l'Escriture: Pour-autant que la
 sentence n'est pas incontinent prononcée contre les mes-
 chans, les hommes ne craignent aucunement à faire mal: &
 toutesfois, de ce que le pecheur faict souuent des pechez, &
 neantmoins on l'attend par patience, i'ay cogneu (dit le Sage)
 que ceux qui craignent & aiment Dieu, s'en trouueront bien.
 Car telle impieté & si horrible auuglement d'hommes oc-
 casionne les gens de bien à estre plus soigneux, & s'appliquer
 d'auantage à l'amour de Dieu, de peur que pareillement ilz
 ne soient forclos de la grace de Dieu, & tombent en si horri-
 ble meschanceté.

Ces mal-heureux hommes calomnient l'admirable ab-
 stinence, l'austerité de vie, la sobriété d'Hilarion & plusieurs
 autres fort sainctz moines: & ne voient point, ou plustost dis-
 simulent de voir, que S. Iehâ Baptiste est hault-loué de nostre
 Seigneur, lequel viuoit de faulterelles & de miel sauage, &
 n'estoit affublé que d'une robbe faicte de poil de chameau,
 comme tesmoigne l'Euāgile. Ils disent que la vie monastique
 est contraire à la parolle de Dieu, comme ainsi soit que les
 principales reigles & constitutions d'icelles soient tirées de
 l'Euangile. Car les moines vouēt obedience, chasteté & pau-
 ureté, dequoy Iesus-Christ a monsté euidens exemples, en-
 tant que toute sa vie n'a esté qu'une grande obeïssance enuers
 son pere: & d'auantage il a esté tref-chaste, & tref-pauvre, af-
 fermant luy-mesme, que le filz de l'homme n'a pas pour repo-
 ser son chef. La vie des premiers Chrestiens, n'estoit elle pas
 vn exemplaire de vie monastique, attendu que tous viuoient
 souz l'obeïssance des Apostres, n'auoient riē de propre, & la plus
 part d'eux ne se marioit point? Tous les croyans, dit Sainct

Rrrr.ij.

Les moi-
 nes magi-
 ciens à nos
 heretiques.
 Cent. 5.
 chap. 10.

Eccle. 8.

Matt. 11.
 Matt. 3.

Matt. 8.

Luc, habitoient ensemble, ilz auoient toutes choses communes, & perseueroient en la doctrine des Apostres, communiquans en la fraction du pain & en oraisons. Telle estoit la vie des anciens moines, & telz se parforcent d'estre tous les bons moines de ce temps.

ILZ nous obiectent, qu'en vain les moines seruent Iesus-Christ par les commandemens des hommes : mais nous auons déia respondu, que les principaux poinctz de la vie monastique, à sçauoir l'obedience, pauureré & chasteré, n'ont autre autheur que nostre Seigneur. Je ne nye pas que les hommes n'ayent commandé plusieurs choses quand à l'obedience, mais pourquoy ne les obserueroient les moines, veu qu'il les auancement à toute pieté?

*Hiere. 35.
Exemple
des Rechabites.*

L'EXEMPLE des Rechabites pouuoit assez donner sur les doigtz à ces heretiques, lesquels pour ne boire point de vin par le commandement de leur pere Ionadab, non seulement n'ont point esté reprins, ains au contraire Dieu les a loüez par la bouche du prophete Ieremie. Voicy les parolles du grand Dieu d'Israël, dit le prophete: pourautant que vous auez suiuy tous les commandemens de vostre pere Ionadab, & auez fait tout ce qu'il vous auoit enioinct, à tout iamais il y aura homme issu de la race de Ionadab fils de Rechab, qui demeurera deuant ma face. Nos Centurions ne sçauoient nyer que cela ne soit la pure & simple parolle de Dieu. Qu'ilz cessent doncques de reprendre la vie monastique, & qu'ilz en hortent les moines & prestres renuez de leur benedice, à se recognoistre, & à se remettre souz le soësioug d'obedience: souz peine d'estre priuez de la vision de Iesus-Christ, qui s'est rendu obeissant au Pere iusqu'à la mort de la croix.

*Philip. 2.
Que dict
Philon le
Iuis des
moines.*

PHILON le Iuisa fait vn liure de la vie contemplative, plein de choses prouffitables à la defense de la vie monastique, mais nous sommes contrainctz d'estre brefz. Cest autheur viuoit du temps des Apostres, & monstre euidentement, que les Chrestiens, desquelz il parle, auoient des monasteres, esquelz ils viuoient saintement, separez les vns des autres: & d'auantage, ayans quitté tous leurs biens, ilz habitoient loing

de la ville, & s'abstenoient merueilleusement de boire & de manger, vaquans cependant à la contemplation des choses diuines. Mais nos braues Centurions ont passé ce tres-grand tesmoignage de Philon sans en dire presque mot. Car ce qu'a uoit dict Philon a esté accommodé aux moines par Eusebe de Cesarée, par Sainct Hierosme & Epiphane, ce que les Centurions ont aussi bien dissimulé que le premier, & font tousiours de ceste façon en ce qui concerne l'estat Ecclesiastic.

OR i'adiousteray encor' vn dict de Sainct Hierosme en ce lieu, à fin de clorre plus fermement la bouche à ceux qui mesdisent de la vie monastique. La fleur pretieuse, dit-il en l'Epistre à Marcella, & la plus pretieuse pierre qui soit entre les ornemens de l'Eglise, c'est la compagnie des moines & des vierges. Je pourroy alleguer plusieurs autres belles sentences, extraictes des Anciens, & pleines des loüanges de la vie monastique: mais que seruiroit-il? N'est-il pas assez appert, que ces historiens, auteurs du cinquiesme Euangile, monstrent leur conscience estre vn esgout de toute ordure, & qu'ilz se sont entierement sequestrez de la doctrine de Iesus-Christ & de ses Apostres, quand ils veulent combattre la vie monastique?

OR ces heretiques meinent dure & forte guerre en leurs Centuries contre l'inuocation des Sainctz, & voyans qu'ilz ne pourroient nyer, qu'il n'y ait beaucoup de tesmoignages de ladiete inuocation es escriptz des Peres, ils nyent, que les escriptz, (où est faicte mention si clere de ceste inuocation) soient ausdictz peres, ou bien disent que quelcū les a corrompuz & deprauez. Voyla bon & facile moyé de dire, que toute la Bible a esté corrompue, en tous lieux où elle ne cōuient pas avec leurs paradoxes. Cest erreur de l'inuocation des Sainctz est proceddé de leur asnerie, entant qu'ilz n'entendent pas, q̄ les anges & espritz des bien-heureux sont si inseparablement conioinctz avec Dieu tout-puissant, qu'ilz ne peuuent vouloir autre chose que veult Dieu, & Dieu ne veult rien leur refuser, attendu qu'ils sont déia vn mesme esprit avec luy, tellement que le vouloir & le non vouloir de Dieu & d'eux est

De l'inuocation des Sainctz oppugnée par nos heretiques.

tout vn. Ce que si ces Centurions entendoient comme il appartient, ilz ne reprendroient plus l'inuocation des Saintz, pour-autant que tout l'honneur que nous leur faisons, redonne à Dieu mesme, avec lequel ilz sont ioinctz, comme nous auons dict. Mais comme toutes leurs autres heresies ont esté puyfées dans les boubiers des anciens heretiques, aussi est ceste-cy: & sont osez iusqu'à là, que de se bender contre l'Eglise vniuerselle, n'ayans escorte que de deux meschâs heretiques, à sçauoir Eustache, qui fut condamné au tref-ancien Concile de Gangres, & Vigilance, que Saint Hierosme a deuement refuté, auquel toutesfois ces opiniaistres osent opposer leur Vigilance. Ils produysent quelques Anciens, sur les escriptz desquelz ils iactent que leur opinion est fondée: mais tât s'en faut, qu'iceux mesmes qu'ilz alleguent, leur donnent sur les doigtz, combien qu'ilz taisent la meilleure partie de ces bons Peres, tant ilz sont rusez.

*En la 4.
Cent. au
chap. 6.
& 8.*

Le chef de ces impudens est Philippe Melancthon, lequel a osé affermer en l'Apologie de la Confession d'Ausbourg, que Saint Gregoire Pape de Rome est le premier de ceux, qui font mention de l'inuocation des Saintz. Je ne me veux point arrester à citer les lieux des Anciens contraires à ce menfonge, pour-ce que plusieurs doctes hommes de nostre aage sy sont assez employez.

*Nos hereti-
ques bla-
sonnent les
reliqs des
Saintz.*

Nos Centurions oppugnent de toutes leurs forces les reliques des Saintz, & les miracles faictz à icelles. De maniere que si iamais on cogneut de quel esprit ilz sont pleins, on le voit icy assez euidentement, veu qu'ilz nombrent l'heretique Vigilance entre les docteurs approuuez, & disent que bien & doctement il a escript du superstitieux seruice des martyrs, (comme ils parlent) & que Saint Hierosme refute bien maisgrement les raisons d'iceluy: de sorte qu'il semble plus le vaincre à belles iniures, que non pas avec vne solidité d'argumēs. Ils adioustent, que vrayemēt Saint Augustin a descrit les miracles, qui se faisoient de son temps en Afrique aux reliques de S. Estienne, mais q'c'estoient illusions des diables qu'on a esti mées pour miracles. D'abondāt, ils disent que Theodorit ra-

*En la cē.
4. chap. 4*

*Centur. 5.
chap. 5.*

conte, que les payens ne tenoient conte de ces reliques des martyrs, estimans qu'ilz estoient polluz, en approchant de leurs sepulchres. Mais quoy ? Theodorit assure, que telle opinion est pleine de folie & d'ignorance. Il suffisoit pour monstrier leur bestise, d'alleguer ce qu'ils disent: à sçauoir que Vigilance merite d'estre loué, & S. Hierosme d'estre reprins, & que les miracles, recitez par S. Augustin, estoient pures illusions. Toutesfois ils sont si fots, qu'ils nous opposent l'exemple des payens qui mesprisoient les reliques des Saints, comme si les payens nous deuoient enseigner comment il se faut gouverner: Ils ont gagné en disant cela, que nous entendons infalliblement, qu'ils sont tombez en l'impicté mesme des payens. Saint Augustin nous assure, q de son temps plusieurs miracles estoient faictz, Dieu les faisant comme & par qui il vouloit: & les recite de telle sorte, qu'il veult que nous nous en seruions grandement pour confirmer nostre religion. Je vay vous donner le goust d'un miracle escrit par S. Augustin, à fin que ces galans créuent de despit. Estant certaine religieuse (dit ce grand Docteur) tombée en maladie, & ne sçachât plus que faire, on porta sa robbe aux reliques de S. Estienne, mais deuant qu'elle fust r'apportée, elle estoit ia trespassee. Toutesfois les parens de la defuncte couvrirent le corps, de ceste robbe, de maniere qu'elle fut incōtinent resuscitée. Parquoy quelque folie qui tienne noz heretiques, & quelque chose que brasse le diable par eux, lequel se mocque des reliques des Saints par ces apostats, comme iadis il s'en mocquoit (tesmoing saint Hierosme) par la bouche d'Eunome & Vigilance heretiques: si est-ce que les miracles, recitez par S. Augustin, ont esté faictz par la toute-puissance de celuy, qui par le passé guerissoit les malades à l'ombre de S. Pierre. Y a-il impudence au monde parangonnable à ceste-cy, à sçauoir qu'ils disent, qu'ils n'ont sçeu trouuer miracle faict par quelque saint apres sa mort, cinq cens ans apres nostre Seigneur, veu que Saint Augustin mesme leur en raconte plusieurs, lesquels il assure auoir sçeu pour vray, ou veu luy-mesme? Je laisse tous les autres Peres anciens, lesquels ils veulent desmentir, comme si S. Augustin

*Cent. 5.
chap. 15.*

*Au 22 li-
ure de Ci-
uit. Dei
chap. 8.*

*Au mes-
me lieu.*

Actes 5.

*Impudence
des hereti-
ques.*

& tous autres anciens auoient aimé l'imposture autant, que ces gentils Centurions sont hardis méteurs. Sainct Ambroise en l'épistre 85. recitant les signalez miracles faits aux reliques de S. Geruais & S. Prothais, sur lesquelles il tesmoigne qu'on iettoit des vestemens, pour les appliquer sur les malades, adiouste cecy. Nous te rendons graces, ô Seigneur, dequoy tu nous as excité tels esprits des Sainctz martyrs, principallemēt en ce temps, auquel ton Eglise a besoing de secours. Vous voyez qu'il n'attribuē pas les miracles des Sainctz aux illusions des diables, comme noz aduersaires, mais bien à nostre Seigneur, & luy en rēd graces. Bien sied à ces heretiques, ce que le mesme Docteur dict des Ariens au sermon 19: ils ne porteroient point d'enuie à leurs œuures, sinon qu'ils estimassent, iceux auoir eu vne autre foy qu'ils n'ot pas, ie dy foy appuyée sur la tradition de leurs ancestres, laquelle Satan mesme ne scauroit nyer. Je laisse plusieurs fraudes & impostures de noz Centurions, pour ce qu'il me seroit impossible d'en dire icy la milliesme partie.

De la translation des reliques.

*En la 4.
Cēt. ch. 6.*

LA translation des reliques des Sainctz les met presque hors des gonds de raison, laquelle ilz appellent superstitieuse, selon leur coustume: & combien qu'ils sçachent, que l'vsage de ce est fort ancien en l'Eglise, toutesfois ils disent que cecy est issu de la superstition des payens premierement, & qu'estāt confirmée par faux miracles, elle a creu comme l'on a veu, & voit-on encore. Lors qu'ilz calomnient, que les miracles faitz en l'Eglise sont illusions diaboliques, ilz symbolisent avec Eunuome & Porphyre athées. Nous lisons au liure de S. Hierosme contre Vigilance, que l'Empereur Constantin feit transporter les reliques de S. André, S. Luc, & S. Timothée à Constantinople, & que les diables fremissoient contre icelles: & pareillement que l'Empereur Arcade feit transporter les reliques de Samuel de Judée en Romanie, de sorte que les Euesques portoient les cédres d'iceluy en de la soye & vn vaisseau d'or. Tels & plusieurs autres exemples nous monstrēt la coustume de l'Eglise, laquelle doit auoir plus d'autorité enuers nous, que cent mille calōnies & blasphemés de noz heretiqs.

Or

Or nous faut-il prendre garde, que ces faiseurs de Centurie, faissent ou bien falsifient plusieurs miracles tres-euidés, faictz aux reliques de presque tous les saintz qui sont en l'Europe. Scachez qu'en l'Isle de Sicile y a vne Eglise de Saint Philippe, disciple de Saint Pierre, & enuoyé par iceluy en Sicile: auquel temple tous les ans plusieurs demoniacles sont guerys, le iour de Saint Philippe.

*Miracles
faictz aux
reliques
des Saints.*

L'AN 1541. environ deux cens femmes furent deliurées du mauuais esprit qui les possedoit, en ce temple. Noz Centurions ne font mention quelconque de ce Philippe. En la mesme isle de Sicile y a vne autre Eglise fort renommée de Saint Vit, auquel sont ordinairement guerys ceux qui ont esté morduz par vn chien enragé. On ne sçait autre chose en Espagne, que l'Eglise Saint Iacques de Complut, Cordelier.

OR dict M. Michel * Medina, theologien tresdocte, que par les merites & intercession d'iceluy, souuent plusieurs incurables maladies sont gueries, de sorte que Monseigneur Charles, fils vnique du Roy Philippe d'Espagne, (comme tesmoigne ledict Medina) apres auoir esté abandonné des medecins, apres le desespoir de toute la Cour d'Espagne, fut guery d'une froissure de teste.

** Au li-
ure 2. de
recta in
Dei fide
chap. 8.*

N'AST V iamais ouy parler des insignes miracles, qu'Eusebe tesmoigne auoir esté faictz à celle herbe, qui estoit venue iouxte l'image de Iesus-christ, colloquée à Paneade par la femme, que nostre Seigneur auoit guerye de son flux de sang? Ilz sont si meschans, qu'ilz appellent l'herbe mesme superstitieuse, & disent que la foudre abbatir ladicte image: comme ainsi soit que Iulian l'Apostat commanda qu'elle fust demolie, & qu'on y meist la sienne au lieu d'icelle: laquelle fut frappée d'un feu celeste si estrangement, qu'il la partit par le milieu. Et partant les Chrestiens porterent à l'Eglise l'Image que ce felon auoit ostée de sa place, de sorte que ie ne sçay comment ilz n'ont honte de mentir si vilainement. Toutesfois, à fin qu'ilz ne semblassent auoir controuué ce qu'ilz disent de l'Image de nostre Seigneur fouldroyée, ilz redoublent le mensonge, disans que Zozomene est autheur de cela: mais Zo-

*Au liure
7. chap.
14. de son
histoire.*

*En la C^{te}
4. chap. 13*

* Voyez
5. liure
chap. 20. zomene n'en dit pas vn mot, ô les fideses escriuains de l'histoire Ecclesiastique. Peut-il estre aucun lecteur, qui cuyde que ceux-cy traictent les histoires à la bonne foy, veu qu'ilz ne se hontoient point d'une si extreme imposture?

Si ie vouloy m'arrester à dire ce qu'ilz mettent des images en leurs Centuries, ie voy bien que ie seroy par trop prolix. Or Sainte Helene, mere de Constantin le grand, est picquée de leurs morsures veneneuses en ceste matiere, parce qu'ilz l'appellent femme fort superstitieuse, & nyent qu'elle ait trouué la croix de nostre Seigneur, contre le tesmoignage de plusieurs Peres anciens. Voire mesmes, eux ne practiquans pas la reigle, qu'un menteur soit recors de ce qu'il a dict, afferment le contraire de ce que dessus en la mesme Centurie, disans: Helene, femme superstitieuse, estant illec allée pour adorer, trouua la croix de Christ, & fait bastir deux temples. Cela leur est fort commun, & à tous autres menteurs. Car en la mesme Centurie ils nyent qu'Eusebe ait fait mention de l'invention de la Croix, horsmis en sa Chronique, ce que toutesfois ilz veulent auoir esté adiousté: & puy ils disent que cela est escrit au liure troisieme de la vie de Constantin. De mesme, en vn lieu ils appellent Theodelinde, Royne des Lombardz, forte & superstitieuse: & en vn autre lieu de la mesme Centurie ilz l'appellent femme de bien & fort vertueuse. Voyla comme l'aveuglée impieté se destruit & ruine elle mesme. Ilz sont donc du nombre de ceux que l'Apostre appelle ennemys de la croix de Iesus-Christ, veu qu'ilz ne veulent souffrir la veneration d'icelle, ensuyuans en cela le grand patriarche Luther: lequel dit en vn sermon au peuple, que s'il tenoit tous les loppins & parties de la croix de Christ, il les mettroit en tel lieu que iamais homme ne les verroit. Et combien que les Centurions citent Constantin, toutesfois ilz n'ont honte en la Centurie troisieme chap. 10. reuoker l'usage de la croix à l'erreur des Montanistes.

Au traitté 118.
sur S. Iehan. SAINCT Augustin dict vn beau propos, que ie veux icy escrire pour faire rougir les Centurions & autres souffleurs du cinquiesme Euangile: Le signe de la croix que tous co-

Impie
voix de
Luther.

gnoissent, dit-il, qu'est-ce autre chose que la croix de Iesus-
 Christ: lequel signe n'estant appliqué au front des fidelles, ou
 à l'eau baptismale, ou au saint chresme, ou au saint sacrifice
 de la Messe, il n'y a rien qui soit legitimement fait. Tertul- *Au liure*
 lian, qui estoit beaucoup plus ancien que Saint Augustin, dit *de corona*
 aussi: nous faisons le signe de la croix en toutes nos actions, *militie.*
 quand nous allons ou venons, quand nous entrons ou sor-
 tons, quand nous nous habillons, à la table, à la lumiere, au
 liect, à l'asseoir, & en autres telles actions. Mais nos Euangeli-
 ques n'ont societé aucune avec ceux-cy, ny avec l'Eglise de
 Dieu, de laquelle s'estans separez, ilz controuuent des fables.
 Comme quand Brence heretique maintient, que c'est vn a- *Brence co*
 cte de Magicien & homme superstitieux de faire le signe de *tre Soto.*
 la croix, & que cela ne sert non plus, que si tu faisois en l'air
 vn cercle avec les doigz. D'auantage, que le signe de la Croix
 ne vient point de tradition Apostolique, & que c'est vne pure
 folie: & que tant s'en fault que nous la deuions adorer, qu'il
 fault porter plustost cest honneur à vn asne qui l'a au doz:
 bref, que toutes ces choses sont magiciennes.

VERITABLEMENT ie suis d'opinion, qu'ils sont ou
 payens ou athées, veu que si grandz blasphemés ne leur font
 point de peur: mais Dieu punit de ceste façon ceux, qui pen-
 sent plus sçauoir que tout le reste des hommes: & mal-heur à
 ce siecle, dequoy il a porté telles pestes du genre humain.
 Quand ilz viennent à alleguer les Anciens Docteurs, com-
 me Saint Ambroise, Saint Augustin, Saint Chrysostome, *Les escrits*
 lesquelz on dict la verité du signe de la croix, ils ne craignent *des An-*
 point d'appeller leurs escriptz superstitieux, & grandement *ciens super*
 iniurieux au merite de Iesus-Christ. Vous auez veu la senten- *stitieux*
 ce, que i'ay alleguée de Saint Augustin. Ils la citent aussi, *aux here-*
 mais ils pensent qu'il ne la luy fault point attribuer. *tiques.*

OR encor' y a-il vne autre fraude entr'eux. C'est qu'en
 dérogeant à l'autorité de ces anciens Peres tant estimez, ilz
 esperent de faire, que ceux qui ont escript mille ans apres
 eux, n'auront aucune autorité en leurs escriptz. Mais ie croy
 que Dieu nous fera la grace, que l'imposture de ces Centu-

rions estant apertement descouuerte, ilz seront de tous reiettez, & exterminiez de la compaignie des hommes avec leurs gentilles Centuries. Et à la mienne volonté qu'ils se recongneussent, & qu'ilz se reconciliaissent à Dieu & à son Eglise. Pour conclusiō ie dis, que tout ce que tu as icy vëu, lecteur, n'a esté apporté pour autre intention, que pour monstrier la folie & l'imposture de ceux, qui de nostre temps oppugnent l'Eglise.

C'EST E année fut publié vn edict cōtre les Sacramentaires au Duché de Vvirtemberg, où Brence est sur-intendant.

*De Lasco
contre V-
vestphal.*

ON fait aussi imprimer à Basle vn liure de Iehan de Lasco, ainsi intitulé, *Responſe à certaine epiſtre de Ioachim Vvestphal, pleine de calomnies & mensonges, par laquelle il pense destruire la purgation des Eglises estrangeres de Francfort.* De Lasco est si mauuais, que apres sa mort il mort encore Vvestphal, lequel ne scauroit combattre que contre l'esprit des mortz. Au reste, les Theologiēs d'Iēne feirent requeste aux Princes & Estatz de la Confession d'Ausbourg, pour vn concile legitime, auquel il n'y auroit que les Lutheriens, qui condamneroient les Sacramentaires & autres aduersaires.

*Requête
de ceux
d'Iēne.*

OR il ne fault pas douter, que les decretz de ce gentil concile eussent eu plus d'autorité enuers le pauvre & simple peuple, (tant il est embabouiné de ces ministres) que n'eurent oncques les Conciles faictz par les Papes de Rome, quelques Saintz qu'ilz ayent esté.

*Hesufius
contre nos
Caluini-
ſtes.*

D'AVANTAGE Tilman Hesufius fait imprimer vn liure à Iēne contre les Sacramentaires, & des la Preface il se complainct, dequoy l'erreur de Zuingle & de Calvin touchant la Cene s'est tant respandu par la terre, de maniere que les plus grands en sont infectez: & en ce faisant il tasche de prouuer l'opinion de Luther, par l'Eſcriture & les Peres. Les Zuingliens feirent aussi tout l'opposite de cela. N'aguères que les sur-intendans de Heidelberg publierent vn tel edict: Les Catechismes de Luther & de Brence ſoiēt reiettez hors l'Eglise, & leurs escriptz n'ayent aucune autorité. Voyez vous comme celuy qui tonnoit contre le Pape est déia delais-

fé des siens ? Le semblable aduiendra à tous les autres bastif-
seurs de la tour de Babylone.

FRANÇOIS 2. de ce nom Roy de France, ayant esté sa- *Le tumulte d'Amboise.*
cré à Reims s'en alla à Amboise, où peu apres s'esleua vn gros
trouble, meu par quelques seditieux, de maniere que le Roy
& toute sa Cour se veirent en grand danger. Mais Dieu eut
compassion de ce bon ieune Roy, si que les auteurs du trou-
ble estans décelez, on les punit griefuement le yingtquatrief-
me iour de Mars.

GRAND trouble y eut ceste année en Escoce, pendant *Le Calui-
nisme en
Escosse.*
qu'on y introduysoit le Caluinisme, à ce fauorisans les An-
glois, qui pareillement estoient Caluinistes. La bonne Roy-
ne Marie, fille du feu Duc de Guyse, attendant secours du
Roy François pour appaiser ces troubles de la religion, fut
tant tourmentée de soing & d'angoyse, qu'elle mourut à E-
dimburg, chasteau Royal. Ce-pendant aussi plusieurs auan-
çoient le Caluinisme en France. Car sçachez que tandis que
le Roy Henry faisoit guerre çà & là, Calvin trouuant ceste
occasion la meilleure du monde, auoit faict courir par-my la
France ses liures, tant en Latin qu'en François, chose qui de-
çeut plusieurs hommes. Au moyen dequoy le Roy François,
desireux d'acquitter sa conscience, manda les trois Estatz de
son Royaume, pour pacifier le different de la religion. Mais *La mort
du Roy
François 2.*
Dieu le nous osta bien tost apres, mourant de maladie le qua-
triefme iour de Decembre. Son frere Charles, aagé de dix
ans, & en cest aage donnant grandz argumens de sa future
preud'homme, luy succeda au Royaume. On a imprimé le li-
ure de quelque François, auquel est cõtenu entre autres cho-
ses, qu'à Geneue on auoit deliberé de massacrer à la premiere
opportunité qui se presenteroit, le Roy, les deux Roynes, (la
mere & l'espouse du Roy) Messieurs ses freres, les grandz Sei-
gneurs, & tous les bons Magistratz : & que le Prince de ceste
coniuration estoit Bezze, Calvin l'autheur, Ottoman celuy
qui la signa, Spifame celuy qui la suada, & que tous brigans &
assassineurs de France en estoient coupables. Que si quelcun
en veult sçauoir d'auantage, qu'il lise la premiere defense de

*Signes es-
pouuenta-
bles.*

la religion & du Roy, contre la damnable coniuration de Calvin, Beze & Ottoman. On dit que ceste année on ne veit aultre chose, que prodiges & signes espouventables. En vn lieu le feu demeura en l'air par trois heures: ailleurs il plut du sang: on veit trois cometes à Fofan: en la plaine pres de Cental on veit grand nombre de gens à cheual: & plusieurs autres prodiges aduenus en France, Alemaigne, & Poloigne. Car puy que les hommes se laissoient tirer par le nez au nouveau Euangile, ils estoient dignes d'estre admonnestez par tant de prodiges.

*Assem-
blée à Nū-
bourg.*

L'AN 1561. les Princes de la Confession d'Ausbourg firent leur assemblée à Numbourg en Thuringe. Quelque Zuinglien escrit, qu'en ceste assemblée on traita diligemment, qu'il falloit condamner solemnellement & apertement les Zuingliens, mais que cela ne sortit point son effect, pour la debonnaireté d'un Seigneur. Le Pape Pie quatriesme enuoya à ceste assemblée son Nunce, homme fort docte, issu de noble maison à Venise, auquel l'Empereur Ferdinand auoit adioint aussi son Legat. Mais pouraultant que les Princes de la Confession adioustoient trop de foy aux ministres, nul fruiet ne sortit de ceste legation. Au demeurant, Iehan Calvin & Beze cōtre Hefusius Calvin fait imprimer vn liure contre Hefusius, pour luy faire vn peu sa leçon. Ce fait, Beze meit en lumiere deux dialogues contre les songes de Tilman Heshuse, l'un intitulé Cyclops, & l'autre Sophiste, à fin que tu voyes la douceur & fraternité de nos Euangeliques. Pareillement il fait imprimer le nettoiyement des aultres colomnies d'Heshusius contre Calvin. D'auantage vn nommé Boquin, se disant Theologien d'Heidelberg, diuulgua l'examen du liure composé par Heshusius. Mais Guillaume Clebice fait bien plus: ô acte heroic & memorable! il fait vn liure ainsi intitulé, La victoire de la verité, & la ruine du Papat de Saxe. Mais pouraultant que le Papat de Luther a esté sublime, il n'a peu déchoir sans se rompre le col: qu'il soit donc enseuely, & que désormais on n'en parle plus. C'est le desseing des Sacramentaires, mais les Lutheriens n'endureront pas qu'on mal-

*Ruine du
Papat de
Saxe.*

traicte ainsi leur Pape Luther. Enuiron ce temps aussi Iehan Sturm diuulgua quelques escripts de Bucer touchant l'Eucharistie, en la preface desquels il se cōplaint, dequoy les Lutheriens empeschoient le cours de l'Euangile par leur importunité & iniustice. Et finalement il dict, Si le Magistrat donnoit son glaue trois iours à tels hommes, qu'on ne verroit incontinent que fouldres & tempestes de condamnations. Il dict d'auantage, qu'ils approuuent ceux qu'ils veulent, & ce qu'ils veulent, & aussi qu'ils improuuēt ceux & ce qu'ils veulent, voire les condamnent, & tourmentent: & les brusleroiēt s'ils pouuoient.

*Sturm se
plaint des
Lutheriens.*

MARTIN Kemnice meit en lumiere à Lipsie la Repetition de la vraye doctrine de la presence du corps & du sang de nostre Seigneur en la Cene. Il estoit predicant à Brunswic. Brence pareillement fait voler vn liure de l'vnion personelle des deux natures en Iesus-Christ: auquel il se monstre Lutherien quād à la question de la Cene, dont les Zuingliens mouroyent de despit. A raison dequoy Pierre Martyr luy respondit, en maintenāt l'heresie de Zuingle. Brence escriuit encor' vn autre liure contre Bullinger, qui n'attendoit rien moins de Brence, que cela.

Les Lutheriens cōtra les Zuingliens.

CESTE année vn meschant blasphemateur, & indigne que la terre soustienne, nommé Lucas Sternberg, dist choses si abominables & execrables, que nul homme ne les scauroit ouir sans horreur. Il parloit contre la sacré-saincte Trinité, cōtre la diuinité de Iesus-Christ, & contre le S. Esprit, contre la sacrée vierge Marie: de celebrer plustost le iour du Sabbath q̄ le Dimenche, du sacrement de l'Eucharistie, & finalement du Baptisme, disant que c'estoit vne institution Satanique. Ce mesme homme voyant quelquefois, qu'il n'y auoit pas tant d'hommes à la Cene comme il eust bien voulu, appella les autres de ceste façon: Venez icy, car ie ne le pourroys deuorer tout seul. Il suyuoit Melancthon quand au fait de l'Eucharistie, mais quand est des autres Sacremens, il suyuoit Luther. Il enseigna entre autres choses, qu'il n'y auoit point de Trinité, mais vne seule personne, non point de Christ, non point de

Merueilleux blasphemés cōtre la religion chrestienne, dit par nos lie retiques.

S. Esprit. Or en Poloigne sourdit vne opinion diametrallement opposée à ceste-cy, comme celle qui disoit, qu'il y auoit trois Dieux, & toutesfois que le fils estoit vn peu moindre q̃ le Pere & le S. Esprit: au reste, q̃ le Symbole d'Athanasé estoit le symbole satanic. Si furent interrogez par quelques Seigneurs de Poloigne, d'où ils auoient recueilly ceste opinion. Lesquels respondirent, que c'estoit le pur Euangile, & qu'ilz auoient puyté ceste doctrine de leurs grands Docteurs, Caluin, Bullinger, Pierre martyr, & Muscule. Et que finalement Dieu auoit voulu reueler vn si pretieux thresor par ses seruiteurs. Mais qu'ils aillent avec leur thresor où ils ont merité d'aller. Tu voys, lecteur, l'impieté des hommes qui se sequestrent de l'Eglise.

Changement de religion en Transsylvanie &c ailleurs.

Les Lutheriens de Saxe s'assemblerent à Lunebourg, & condamnerent Albert de Hardemburg, comme heretique Zuinglien. En Transsylvanie aucuns reçurent l'heresie de Luther, aucuns celle de Zuingle quand aux Sacremens, d'où est venue la ruine de l'Eglise en ces quartiers, à la grande derision des Turcs. Mais ceux de Brême en Saxe, qui auoient esté des premiers Lutheriens, changerent de robbe, & se feirent Calvinistes, quelque crierie des Lutheriens qu'il y eust. Mesmes tous les Lutheriens furent contraincts de vuyder la ville. Semblablement plusieurs François se laisserent aller à l'heresie de Caluin, dont ce Royaume est encor' infecté.

Des premiers troubles de France.

L'AN 1562. le treschrestien Royaume de France sentit à son damp, combien mal-heureux & seditieux est le nouveau Euangile. Car ceste année les Calvinistes se monstrent plus felons que Turcs ou Tartares, contre la sainte Eucharistie, contre les choses à Dieu sacrées, contre les temples, les monasteres, les calices, les sacrez vaisseaux, & choses semblables. De douze predicans, qui vouloient estre appelez ministres de la parolle, il y en auoit huit ou neuf qui estoient moynes renyez, donnez en sens reprouué par nostre Seigneur. Leur Chef & grand Capitaine estoit Theodore de Beze, qui auoit par-avant fait bonne chere des biens qu'il tenoit en l'Eglise. Telz ont esté presque tous ceux, qui, ayans faitte banque-
route

route à l'Eglise, ont voulu estre les piliers de l'Euangile de Calvin. Et ce sont ceux, que le Diable trouue propres pour ^{Les ministres de France.} cheminer ses effortz à telle fin qu'il desire: & les trouuans marquez à son coing, il en vse comme de ses principaux instrumens pour seduyre le peuple. Ces satellites de Beze commencerent à semer leur semence diabolique entre quelques Seigneurs de la Cour, & à tous ceux qu'ils peurent tirer à leur cordelle ilz tascherent de persuader, que desormais il ne falloit plus faire conscience de mentir, de ceuoir, feindre, desrober & commettre sacrileges: & tout cela estoit voilé du masque de la parole de Dieu, de laquelle les plus abominables heresies de ce siecle se targuent, comme chacun voit. Et pour ^{Ils gagnent quelques Seigneurs.} autant que ceste doctrine estoit plaisante, ils gaignerent aysément le cueur de quelques Seigneurs: lesquelz gaignez, tout leur but fut d'effectuër leurs desseings, & delibererent de piller toutes les Eglises de France au moys de Ianuier, dequoy ils ne se sont gueres auancez, non plus que ceux qui iadis pillerent l'or de Thoulouse. Or à fin que cela fust fait comme il auoit esté proietté, ils feirent assembler la plus grande multitude qu'ilz peurent de ceux qu'ilz auoient ia deceuz, & feirent ^{Intention de piller toutes les Eglises.} retenir toutes les hostelleries des villes, à fin que plus facilement ilz peussent faire telle pillerie en vne nuyct, sans empeschement des citoyens. Et ce pendant ilz se iactoiẽt, que filz pouuoient atteinẽre où ils pretendoient, qu'on cognoistroit leurs bons & honnestes desseings deuant que le mois de May fust venu. Mais comme l'esprit heretique est caut & fin, il y en eut entr'eux qui aduiferent, que si telle pillerie & sacrilege des temples estoit fait sans l'adueu du Senat, les autres nations leur scauroient mal gré de cela, & que la plus part de la noblesse Françoisẽ ne le voudroit oncques endurer. Et partant qu'il valoit mieux de differer vn peu cest affaire, pour tandis trouuer moyen de deceuoir le Roy & son Cõseil, & en fin d'arracher vn tel mandement, par lequel il sembleroit que cela seroit fait par le consentement de sa Maiesté. Ce conseil sembloit bon à plusieurs, mais les heretiques de Guyenne ne pouuans plus attẽdre, commencerẽt la Tragedie en leur país.

*La nature
de nos here-
tiques.*

Car ces heretiques ont vn esprit audacieux & superbe, si qu'ilz entreprendront volontiers, ce qu'un homme de bien ne voudroit oncques attenter: pour-autant que leurs imposteurs de predicans leurs font accroire, que par le passé ilz ont marché en tenebres, & que maintenant la lumiere les est venue voir, tellement qu'estans enyurez de telle persuasion, ilz commettent les plus horribles crimes du monde, & neantmoins pensent fort bien faire, dont ils viennent encore plus audacieux & temerares. Ce qu'il faut entendre du simple peuple, car plusieurs pechèt de malice deliberée, & non d'erreur. Venans doncques à nostre propos, nous disons qu'en la ville de Paris se faisoient deux presches, où alloient plus d'hommes en armes qu'au commencement, & voyoit-on bien que le ieu ne se despartiroit pas sans trouble. Car ils menaçoient le peuple, & battoient ceux qu'ils rencontroient, sans que personne leur dist mot, & monstroient bien qu'ils brusloient d'appetit, de parfaire ce qu'ilz auoient ia pourpensé: toutesfois ilz auoient quelque crainte du peuple Parisien, bien qu'il fust desarmé. Car si quelque homme non Huguenot (ainsi s'appelloient messieurs les Calvinistes) estoit trouué en armes, il estoit incontinent prins comme seditieux, combien que les Huguenots portassent tous des armes.

*Les Huguenots
superbes
à Paris.*

Aduint doncques le iour Sainct Iehan l'Euangeliste, que les huguenotz feirent leur presche l'apref-disnée: lequel estant acheué, les Catholiques sonnoient vespres à l'Eglise Sainct Medard aux faulx-bourgs Sainct Marcel. Les huguenots se formalisent contre le son des cloches, disans que ce tintamarre empeschoit la predication de la parole de Dieu. Et trouuans là dessus occasion de mal faire, ils se ruent tous armez dans celle Eglise, portans en vne main l'espée, & en l'autre la pistolle, si que brisans les portes, ils enuahyrent le pauvre peuple comme si la guerre fust esté denoncée. Là y auoit vn prescheur Catholique avec le peuple, lequel se prepara deuant eux comme attendant la mort de leurs mains: mais comme ils luy vouloient oster la vie, ilz le bleçerent seulement, & puis du plat de l'espée le battirent tant qu'ils voulurent. Quelques

*Ce qui fut
fait à S.
Medard à
Paris par
les Huguenots.*

autres furent tuez, & autres naurez bien fort. Mais, ô chose abominable ! il prindrent la sainte Eucharistie, & la foulèrent à beaux piedz. Leur rage s'estendit iusqu' aux images, ausquelles ils coupperent la teste, comme si ce fust esté quelque chose animée. Les vitres de l'Eglise n'en eurent pas meilleur marché: car ils les briserent, comme ils demolirent aussi les autelz, emportans les reliques, les ornemens de l'Eglise, & tout ce qui pouuoit estre emporté. Quelque capitaine d'iceux allant à cheual iusqu' au grand autel, crioit à pleine teste, pilliez tout, compaignons, pilliez tout.

BREF, celuy qui estoit le plus audacieux meschant, emportoit le prix & la louange sur tous. Et ce-pendant les Catholiques de Paris larmoyoit ce desastre pour-ce qu'ils ont tousiours esté fidelles à Dieu & à leur Roy. Aussi voyoient-ils les prestres & autre sorte d'hommes estre menez deux à deux couuers de bleçures, lesquelz les heretiques alloient faire mourir d'une cruauté plusque barbare, sans que personne ostant se pleindre d'un tel forfait, non pas mesmes en grommeler. Car s'ils eussent apperceu vn Catholique qui eust taché de voir cela, il estoit battu comme tendant à sedition. Il y eut vne pauvre bonne-femme, laquelle sans penser à rien auoit dict en se lamentant, hélas, quelle misere ! cecy durera-il long temps ? Et pour ce mot les meschans la prindrent par les cheueux, la trainoient & battoient inhumainement.

Les huguenotz doncques alloient par bandes tât à pied qu'à cheual par la ville de Paris, les espées nuës, & crians à haulte voix, l'Euangile, l'Euangile : non pas de Iesus-Christ, non:ains de Calvin & de Beze, vrays auant-coureurs de l'Ante-christ. Ils disoient aussi, où sont ces Papistes idolatres ? & plusieurs choses, sentans la barbarie & felonnie de leur euangile. Or ne scauoit le peuple Catholique, quel ordre mettre là dessus, pour ce temps.

A v mois de Ianuier la Court de Parlement s'assembla, *De l'edict de l'auier tant re-* pour decider ceste question, si on deuoit souffrir en France *nommé.* deux religions, & donner des temples aux huguenotz. Finalement, comme quelques vns escriuent, il fut permis aux Cal-

uinistes de prescher à leur mode, de baptiser, & faire autre exercice, mais dehors les villes seulement. Et pour addoucir vn peu les Parisiens, ils disoient qu'on leur faisoit beaucoup de faueur, attendu que l'edict portoit, que les Caluinistes ne pourroient nullement bastir temples ou prescher au dedans des villes, combien qu'il leur fust loysible de viure & habiter dans icelles. Les Caluinistes se defendoient tousiours par cest edict puy apres, & osoient dire, que leur religion auoit esté approuuée par iceluy: combien que l'edict portast expressément, qu'on n'entendoit point pour cela approuuer deux religions. Si s'armoient les heretiques sans peur & craincte apres cela, & ce souz vn beau pretexte de vouloir executer cest edict. Le Roy estoit encore bien ieune, & ne pouuoit pas aysément pacifier son Royaume si troublé, veu mesmement qu'il y auoit des plus grandz de sa *Cour qui tenoient la main aux Caluinistes: ce que j'ay bien voulu dire, à fin que ** Il entēd ceux qui se déclarent par apres.* personne n'attribuē ceste confusion, qui aduint en ce Royaume tref-florissant, au Roy, fort vertueux & de grandissime esperance. On dict si le Roy François son frere eust vn peu plus longuement vescu, que les heretiques n'eussent pas si mal mené le Roy Charles son frere, comme depuys ils ont faict. Mais Dieu a permis pour les pechez des hommes, que Beze avec ses moines apostatz eust quelque puissance: & quand il semblera bon à sa bonté ineffable, il repurgera tout ce Royaume trefchrestien, de l'heresie.

OR comme les choses se passoient ainsi que nous venons de dire, la Cour de Parlement de Paris respondit sur ce tref-expressément: Nous ne pouuons souffrir cela, nous ne le voulons, nous ne le pouuons: par lesquelles parolles est assez monsté, que plusieurs auoient encore le cueur en bon lieu, ne communiquans aucunement de volonté avec ces seditieux. Toutesfois pour la crainte qu'on auoit que les choses allaissent de pis en pis, on souffrit encore que l'edict ne fust point aboly. Car tout estoit déjà plein de Caluinistes, & sembloit que l'alarme fust déjà donnée des futures guerres. Tant y a que les Caluinistes ne se contentoient pas de cela, pour-

ce que le principal but d'iceux n'estoit pas de prescher & chanter les psalmes : combien qu'ilz fussent ioyeux de ce, pour auoir moyen de tousiours faire quelques compaignons nouueaux.

Ainsi donc, voyans les ministres qu'ilz n'auoient pas puissance de bastir des temples, tascherent d'impetrer du Roy qu'ils eussent permission de faire exercice de leur religion es Eglises des Catholiques: en quoy ilz procedoient finement. Car ilz faisoient semblant de vouloir retourner à l'vniõ de l'Eglise Catholique, moyennant que certaines choses fussent retranchées que leur conscience ne pouuoit souffrir, desquelles ils vouloient estre ouïs par les Theologiens, & tous autres qui estimoient que cela ne leur deuoit pas estre oïstroyé, sçachans bien qu'en ce faisant, leurs affaires iroient de mieux en mieux. *

FINALEMẽT il fut arresté, que les Theologiens Catholiques disputeroient avec les ministres deuant la Royne. Au moyen dequoy furent sur le champ despeschées lettres à Messieurs de la faculté de Theologie, pour deputer quatre ou cinq d'entr'eux, lesquels respondroient à ce qui leur seroit proposé. En ceste dispute Theodore de Beze tenoit le premier rang pour les Calvinistes, lequel, comme vn excellent Theologien a bien diët, sçait fort bien cacqueter, pourueu que ceux deuant qui ilz parlent ne luy repliquent mot. Il y auoit aussi du mesme costé vn cordelier Apostat. Or il aduint bien pour ces heretiques, que Monsieur le Cardinal de Lorraine, docte comme chacun sçait, n'estoit pas present à celle dispute, estant assez empesché ailleurs: car par auant il auoit acculé ces maistres ministres au colloque de Poissy, deuant la Royne & la plus part des grandz Seigneurs de France. Cependant les freres Euangeliques se parforçoient de faire accroire aux Parisiens, que ce que les Catholiques enseignent sont inuentions humaines, repugnantes aux escritures saintes, & aussi que les Ministres auoient eu le dessus sur les Catholiques en la dispute. Aufquelz les Parisiens respondoient, que leurs Superieurs n'auoient pas moindre soucy du salut de

* Cery se
fit au mes-
me temps
que se te-
noit le col-
loque de
Poissy, à
sçauoir l'ã
1561. d'oũ
l'auteur
a esté mal
informé, et
ce priuè col-
loque fut
faict à S.
Germain
en laye p's
Poissy.

Les fran-
des des he-
retiques.

*Sage respo-
ce des Ca-
tholiques.* leur ame, qu'auoient les Caluinistes: & que iceux leurs Supérieurs & Pasteurs leur annonçoient vne doctrine venue à nous successiuellement depuys nostre Seigneur: tellemēt qu'ilz mourroient plustost pour la defencē d'icelle doctrine, & pour le seruice de leur Roy & legitime Prince, que de receuoir iamais la fauce doctrine de ces pretendus reformez, qui sembloient vouloir mesler le ciel avec la terre, & faire vn monde tout nouveau. Que sil est besoing qu'ilz rendent raison de la religion qu'ils suyuent, ils choisiront tels hommes qui en respondront plus que suffisamment. De maniere qu'ils pressoiēt quelques Theologiens, pour se trouuer incontinent où se faisoit la dispute. Or deuez sçauoir que ceux qui tenoient la main à la defence de l'Eglise Catholique, estoient principalement ceux-cy: tous ceux de la maison de Guyse, Monsieur le Connestable, Monsieur le Marechal de Saint André, & les bourgeois de la ville de Paris, lesquels ont tousiours fait reste aux Caluinistes, & sont ceux qui ont prins merueilleuse peine, pour en-horter & encourager les Princes & Seigneurs Catholiques, à rompre tous les effortz des heretiques.

De la dispute, & ce qui en aduint. En ce prinē colloque fut traicté, si la foy fait les choses promises presentes. Voyle traitté de M. Despençe. LE premier point de la dispute qui fut tenuē, estoit, que les ministres Caluinistes vouloient destruyre & abolir totalement les images, statuēs, reliques, & les ornemens des Eglises, & protestoiēt de ne retourner oncques à nostre religiō, que premier cela & autres choses à eux molestes ne fussent aneanties entierement: cōme si à l'appetit des apostatz il falloit faire banqueroute à l'Eglise Catholique, & s'accorder avec leur impieté plus q̄ Turquesque. Or leur fut abondamment respondu & satisfait par les Theologiens, mais ils furent aheurtez tousiours à leurs erreurs. Sur cela se trouuerent quelques vns du party des heretiques, qui disoient falloir proceder en cest affaire tout doucemēt, de maniere que toutes les images fussent brisées, hors mis les Crucifix. Mais les ministres ne voulurent pas s'accorder à cela, estans aussi grands ennemys de Iesus-Christ, que des Saints. Aussi les Catholiques ne le vouloient octroyer. Car si le Crucifix doit estre reueré, pour l'amour de nostre Seigneur qu'il nous represente, semblablemēt

il faut faire honneur aux images des Saincts, pour l'amour de ceux qu'ils nous representēt. Autres disoient pour lors, qu'on deuoit reuoquer tout ce differēt au Pape, ou attendre vn Cōcile general. Mais quoy? Les Calvinistes ne se soucians point de religion, ne cherchoient qu'un pretexte de piller les Eglises. Car lors ils feirēt imprimer certain liuret, auquel ils osent affermer, qu'ils auoient brisé les images par autorité Royale, à fin de reietter leur impieté sur le Roy, qui en estoit innocent, & le calomnier enuers tout le monde. Voire-mais en tous lieux où ils se trouuoient, ils disoient qu'en disputant ils auoient obtenu de faire la guerre aux images, & que la faculté de Theologie & les Euesques leur accordoient cela, sans qu'ils rougissent de mentir si vilainement.

Or ia quelques Princes Calvinistes faisoient souz main leuée de gens, & les autres commencerent à mal-mener les pauvres prestres. Car par tout aux champs les Curez estoient massacrez, on couppoit les oreilles à quelques gens d'Eglise, lesquelles ils portoitent à leurs chapeaux: les chefs & Capitaines heretiques auançoient fort leurs affaires, & eussent fort voulu s'emparer de la grande cité de Paris, sçachans bien qu'icelle prise les autres trembleroient, & se rendroient pour la plus part. Et en ce temps on voyoit aller au presche de sept à huit cens hōmes à cheual, outre les gens de pied, qui estoient en grand nombre. D'auantage, les Parisiens auoient conçu fort grande crainte, de ce que les principaux sectaires auoiēt remarqué enuiron neuf cens des plus riches & nobles maisons de la ville, pour les piller. Mais à temps arriva le tref-illustre Duc de Guyse, par la venue duquel les citoyens furent tous r'affermiss & encouragez, & ne peurent les heretiques venir au dessus de leurs machinations. Et voyla comme Dieu a coustume de secourir ceux, qui mettent toute leur confiance en luy. Noz heretiques doncques furent fort estonnez, voyans qu'on leur auoit presque osté le morceau de la bouche: & par tant sortans de la cité s'en allerent ailleurs, où estās en deliberation de ce qu'ils deuoient faire, ils entendirent que Monsieur de Guyse & quelques autres n'y estoient pas, telle-

*Mesbace
te des Cal
uinistes.*

*Anance-
ment des
Caluini-
stes.*

*Le peril
des Pari-
siens.*

ment que le lendemain de Pasques ils retournerent aux portes de Paris pensans surprendre la ville. Mais on les aduertit, que s'ils estoient sages ils ne s'approchassent plus pres, s'ils ne vouloient auoir des miches du conuent: qui fut cause qu'ils s'en allerent tous à Orleans, où il leur fut bien facile d'entrer. Car ils disoient, qu'ils estoient là venus mandez de par le Roy pour garder la ville, & pour empescher qu'aucun ne receust mal, & aussi pour faire viure chacun en la liberté de sa conscience selon l'Edict de Iâquier, par lequel estoit defendu qu'aucun temple ne fust pillé. Mais c'estoit filer doux pour pouuoir entrer dans la ville, & disoient cela avec telle fidelité, que les heretiques disent le reste: cōme ceux qui ont chassé de leurs cueurs la crainte de Dieu, & qui ne font conscience de mentir, se parirer, decevoir vn chacun. Estans doneques admis dans la ville d'Orleans, de iour en iour ils faisoient beau mesnage dans les Eglises, & ce contre la teneur de l'Edict, duquel il se iactoyent grands obseruateurs. Premièrement ils se ruèrent sur vne Abbaye, l'Eglise de laquelle ils profanerent, ils briserent les images, ils rompirent les vitres & les monumēs, meirēt au feu tous les bancs, & tout ce qui estoit de boys dans ladicte Eglise, & en feirēt autant des liures d'icelle, ne laissant blasphemie que leur bouche ne vomist. Puis de l'Eglise ils feirēt vne estable à leurs cheuaux, & exercerent leur rage si felonément contre ceste Eglise, qu'il n'y auoit mur qui ne s'en sentist. Ils prindrent aussi quelques moynes qui estoient là demeurez, & les emprisonnerent pour leur faire dire le lieu où ils auoient caché leurs reliques. Aucuns d'eux estoient assez ieunes, & estans allechez des belles promesses qu'ils faisoient, ils decelerent les reliques, lesquelles les heretiques bruslerent incontinent, pour martyriser deux fois ceux desquels elles estoient. En ce monastere y auoit deux vieillardz, aagez environ de 80. ans chacun. L'vn d'eux s'estant enclos dans vn grenier d'une maison pestilente, y demeura quatre moys, nourry par vn sien amy à cachettes. Il ne cessoit de prier Dieu, attendant la mort qu'il plairoit à son createur luy enuoyer. L'autre, qui auoit esté Pasteur en vne parroisse, s'estoit aussi retiré du monastere

*Comment
Orléans fut
surpris
par les heretiques.*

*Beau mesnage que
les heretiques feirēt
à Orleans.*

monastere en ce temps, pensant viure en vn petit lieu hors la ville. Mais les heretiques vont là, & ayans trouué ce pauvre vieillard, qui auoit déjà reçu son Createur cōme prest à mourir, ilz luy demandent, s'il estoit moine & prestre de certain monastere. Il confessa qu'ouy: & lors ils luy iettent la corde au col & dessouz les bras, & le trainent dehors tout nud. Mais voyans qu'il rendoit presque l'ame, ilz luy donnerent vn grand coup par la teste, si qu'ils luy feirent partir l'esprit hors du corps. Encore ne se contentans pas de cela, ils le pendirent à vn arbre, & le harquebuzerent. Ce monastere estant pillé, ils poursuuyirent aux autres Eglises, mais finement, comme ils font en toutes choses. Car ils feirent crier en la ville, que désormais nul temple ne seroit pillé ny gasté: mais neantmoins les aultres Eglises n'eurent pas meilleur marché que la precedente. Ils profanerent, voire bruslerent en fin les reliques de Saint Aignan, iadis Euesque de ladicte ville. Ils fouloiet aux piedz la sainte hostie, & s'esbatoient à ietter des coups de pistolles contre elle. Les marguilliers des Eglises estoient forcez de mettre tout entre leurs mains, & à faute de ce faire, estoient mis en prison, & souuent bien mal traictez s'ils ne sortoient par la porte dorée. Eux ayans ia mis le feu à la grand' Eglise Sainte Croix, le peuple esmeu de ce s'escria: ô bon Dieu, qu'est-cëcy? Car ils estoient tous esperduz, voyans le feu au temple. Ilz prenoient les chasses d'or & d'argent, disans qu'ilz les gardoient pour le Roy: mais tant s'en fault, que depuis ilz en ont fait de la monnoye, ilz rauirent tous les ornemens, desquelz ils abusoient en derision, & en blasphemant Dieu. Quelques fois ils faisoient vestir quelcun de leur troupe des vestemens sacerdotaux, cōme s'il eust voulu chanter la Messe: & le pourmenoiet par toute la ville avec vn grand triomphe, chantans par moquerie apres luy, *Te Deum laudamus, ou requiē eternam*: & commettoient plusieurs autres faitz abominables, indignes d'estre recitez d'une bouche Chrestienne. Ils ne laisserent rien d'entier és temples & és maisons des Ecclesiastiques, ils deschiroient & brusloient tant les liures que les images, horsmis toutesfois les simulachres de Venus &

*Cruauté
exercée cō-
tre des pau-
vres vieil-
lardz Ca-
tholiques.*

*Ruse de
nos Calui-
nistes.*

*Meschan-
ce d'i-
ceux.*

autres profanes, desquelles ce saint peuple se delecte beaucoup plus que des images de Christ & des Saints. Ils briserent tous les monumens qui estoient quelque peu esleuez de terre, & bruslerent les cendres d'iceux. Mesmes ils s'acharnerent sur le cueur du tres-chrestien Roy François second, qui estoit inhumé à Sainte Croix d'Orleans, declarans leur insatiable cruauté sur luy defunct, pour autant qu'ilz n'auoient pas eu moyen de ce faire luy viuât. Car il alla de vie à trespas lors qu'il aduisoit les moyens, pour remedier dextrement à toutes les calamitez & diuisions de son Royaume. Les Calvinistes poursuuans leurs erres, feirent des artileries des cloches & chandeliers des Eglises, rompirent les portes d'icelles, bruslerent les liures, deformerent tellement les Eglises, qu'elles ne sembloient auoir iamais esté Eglises. Ils faisoient des baptisteres vn retraiet. Ils feirent des celliers & arsenalz de quelques Eglises. Ils meirent leur poudre à canon dans l'Eglise des Cordeliers, mais le feu y tomba par apres. Le clergé & les religieux de la ville voyans ce piteux estat, commencerent à aduiser de pres à leurs affaires, & à se sauuer le mieux qu'ilz pourent. Car quand ils en trouuoient quelques vns, ils les accusoient d'auoir desrobbe les chasses des Eglises. Ce qu'ils faisoient pour auoir moyen de les tourmenter & tuer de coups, de maniere que personne de celle ville ne se pouuoit exempter de tel tourment, s'il n'abiuroit son baptisme & sa Confirmation.

*Vn fait
fort Euan-
gelic.*

ADVINT certain iour, qu'ils trouuerent vn prestre disant Messe en vn grenier, confirmant & consolant les Catholiques. Parquoy ils le prindrent avec ses vestemens de prestre, & le conduysans iusqu'à la porte de la ville, luy chargerent la teste d'un morion, & les espauls d'une hallebarde: & si le feirent demeurer tout le iour sans boire ny manger avec les pèdartz qui gardoient la porte, qui ne cesserent de se gaber & gaudir de luy à pleine gorge.

*Du Curé
de S. Pa-
terne à Or-
leans qui a
70. ans
est fort
loué.*

LE Curé de S. Patern en ladicte ville, homme aagé de 70. ans, mais qui ne vouloit oncques quicter ses brebis, les preschoit tous les iours, & les exhortoit à attendre patiemment.

la misericorde de Dieu. Or il fut prins quatre mois apres, & liuré entre les mains d'un President, qui luy vouloit grand mal y auoit long temps, pouraultant que s'opposant tousiours contre les Huguenotz, & signamment contre ce President & quelques autres iuges, il auoit maintenu la religion Catholique, & les auoit accusez de mal-verser en leur charge & office, si que par ceste raison il estoit estimé pour vn sot & gros refuseur: tiltres d'honneur, que les heretiques donnent à ceux qu'ils voudroient voir mortz. Et toutesfois, comme graues personnages ont escrit, si en ce Royaume tres-chrestien, & ailleurs aussi, les Presidents & Lieutenans des Prouinces eussent fait leur deuoir des le commencement, pour opprimer ceux qui tendoient à nouuelletez, & les eussent punis selon la rigueur des loix, à la verité les affaires se fussent mieux portez. Car telle est la nature de l'heresie, que si vous ne l'esteignez si tost qu'elle commence à germer, elle croistra grandement, & monstrera le dommage qui l'accompagne indiuifiblement. Et quand bien nous n'aurions exemples anciens pour faire foy de ce que nous disons, les maux que nous auons endurez en ce siecle, ne le preuuent-ils pas assez? Mais venons au propos. Les Caluinistes ayans prins ce vieillard, cōme dict a esté, ils le traictoient comme les satellites d'Herode feirent nostre Seigneur, se mocquans de luy, & luy mettans sus mille choses controuuées, comme qu'il auoit voulu trahyr son Roy, & qu'il estoit faiseur de faulce monnoye. Ce qu'ils luy iettoient aux iambes, pouraultant qu'en ce temps ils estoient fort empeschez à battre de la monnoye, faicte de l'or & de l'argent pillé par les Eglises. Finalement ilz luy promettoient de luy sauuer la vie, s'il vouloit quitter sa religion. Pour à quoy l'amener, ilz luy enuoyoit souuent leurs ministres pour le confondre en dispute. Mais le bon-homme estant ferme en sa sentence, se confirmoit de tant plus en icelle, que ceux-cy le molestoient. Et partant ils le tourmentent d'auantage, pour luy faire quicter sa foy: si bien qu'ayant respondu, qu'il aimeroit mieux perdre la vie, que d'abandonner ses parroysiens, ou les scandaliser si fort en se desdisant, les heretiques le con-

damnerent à estre pendu. Luy donc allant au supplice, il parloit de la passion de nostre Seigneur, & prioit Dieu pour son troupeau & pour la ville. Et estant ia monté dans l'eschelle, il feit plusieurs belles exhortations aux Seigneurs, à leurs ministres, & au peuple: leur remonstrant qu'ils estoient rebelles à Dieu, à l'Eglise, & au Roy tres-chrestien, & ensemble loüant Dieu de luy auoir faict la grace de pouuoir mourir pour la foy, & encourageant le peuple à soustenir constamment sa religion. Ceste liberté de parler faisoit creuer de despit quelques Seigneurs & predicans, & la plus part du simple peuple fondeoit en larmes, voyant ce vieillard souffrir la mort si constamment pour la religion. Les Calvinistes le semonnent de rechef à quitter sa religion, & auoir pitié de soy-mesme: mais ce vray martyr ne peut oncques estre esbranlé, & partant les Satanistes le feirent cruellement mourir.

*Terrible
cruauté
contre les
Ecclesiasti-
ques &
autres.*

OR iceux ayans assouuy leur meschâceté en la ville d'Orleans en tout & par tout, hors mis sur les bourgeois Catholiques, (ausquelz toutesfois ils feirent plusieurs maux) allerent aux champs à grandes bendes, où ils pillerent les Eglises tout de mesme. Quand ils pouuoient prendre quelque prestre, ilz l'estachent a la queuë de leur cheual, & estans saoulz de ce spectacle, ou ilz leur creuoient les yeux, ou leur couppoient le nez, les oreilles, les genitoires, & puy les lians à vn arbre les harquebusoient. A d'autres ilz couppoient la teste, aux autres ils escorchoient la face, ou bien leur couppoient les poulces. En certains lieux ilz pillerent tout, & feirent tel massacre, que les femmes & petitz enfans passaient par le fil de l'espée. En vn village pres d'Orleans ilz prindrēt enuiron vingtcing hommes, entre lesquelz estoient quelques enfans: lesquelz gaignerent le clocher de leur Eglise, pensans se sauuer là. Mais ces cruelz meirent le feu au clocher, de maniere que les enfans voulurent eschapper par vne fenestre, mais les bourreaux les prindrent, & les meirent de rechef au feu, & ainsi finirēt leurs iours.

*Le monu-
ment du
Roy Loys.*

EN vne autre Eglise, n'ayans trouué aucunes chasses, ils se ruerent sur le monument du Roy Louys onzième, &

coupperent les bras & les iambes de son effigie, & puy la iet ^{on ziefine} terent ayans brié la teste. Ce faict, ils rompent le monument, ^{deffait} & bruslerent tout ce qu'ils trouuerent dedans. On dict qu'ilz ^{par les he-} estoient si felons à l'encontre de ce Roy, pourautant qu'en son viuant les heretiques n'auoient pas bon temps autour de luy. De semblable cruauté vserent ilz en la chapelle de Longueuille, où estoient inhumez plusieurs grandz Seigneurs issuz du sang Royal, les corps desquelz furent iettez aux chiens. Mais n'ayans pas illec trouué la proye desirée, ny les Chanoines qui la leur enseigneroient, ils feirét sonner à son de trompe, que dans trois briefz iours ilz comparussent à Orleans, pour respondre à ce qu'on leur proposeroit: que filz faisoient autrement, on les feroit mourir en quelque lieu qu'ilz fussent trouuez. Bref, ilz feirent tant qu'ilz attrapperent les thresors, & en feirent comme des autres. Puy estans allez voir la Roynne de Nauarre, ilz feirent semblables actes deuant elle, faisans brusler le corps des parens & cousins du Roy de Nauarre. En quelque lieu ilz destruyfrent le sepulchre d'un Duc Iehan, qui est reputé Saint, & semblablement de tous ses successeurs, les corps desquelz ilz passerent par le feu.

THEODORE de Beze, autheur de tous ces troubles, ^{Theodore de Beze.} ayant faict sa main des reliques, delibera de s'en aller, à cause que le Roy auoit ia son armée aux champs pour dompter les heretiques. Or il feist accroire aux fideses qu'il alloit en Allemagne, pour amener des forces. Ce-pendant ayant presché deux ou trois fois en quelque contrée de France, & voyant que là on ne faisoit pas grand conte de ses coquilles, il les appella opiniaftres: & pour bien se venger d'eux, il feist massacrer tous leurs prestres, lesquelz il auoit faict rançonner par plusieurs fois.

ENTRE autres villes qu'ilz occuperent, ilz s'emparerent ^{Tours pil-} de la ville de Tours, de laquelle ilz prindrent grosses richesses, & grand nombre de pierreries, dommage certes qu'on ne reparera iamais. Certain iour de feste ilz entrerent en vne autre ville, lors qu'on chantoit *agnus dei* à la Messe: & inconti-

*Une autre
ville pillée*

nent entrent tous armez dans l'Eglise, criâs haultemēt, fuyez, fuyez prestres, si vous ne voulez estre taillez en pieces. Et les autres disoient, sacrifions icy des ceste heure, car ces galâs n'y diront plus leur Messe. Les Chanoines ce voyans gaignoient au pied, mais les Huguenotz les faisoient, & leur faisoient donner tout ce qu'ilz pouuoient auoir en leurs maisons. Et ce-pendant on ne leur oyoit dire autre chose, sinon qu'ils feroient saouler les chiens de leur sang.

OR y eut vn Chanoine qui ne peut endurer telle brauade, tellement qu'il dict à celuy qui amenoit ces brigandz à sa maison, qu'il n'y auoit que voir sans commandemēt du Roy. Non-obstant l'autre vouloit forcer la maison, si bien que le Chanoine prenant son espée, luy aualla la teste. Ce que voyans les autres, se ietterent tous sur luy, & l'ayans prins, le President le condamna à mourir, oultre tout droict & raison.

*Cruauté
incroyable
à tous hom-
mes.*

ILS feirēt encor' vn autre acte, fort memorable, pour l'incroyable cruauté de laquelle il est plein. Ils prindrēt vn moine fort aagé, auquel ils coupperent les genitoires, les feirent cuyre, & les luy feirent manger. Non contens de ce ilz le tourmenterent, & comme il souspiroit encores, ils luy arracherent les boyaux hors du ventre, pour voir où auoit demeuré ce qu'il venoit de manger. Que pourroient faire les bestes brutes, ou les cruelz Tartares, qui fust plus inhumain & abominable? C'est le fruit du cinquiesme Euangile, semé par Luther, & cultiué par le venerable Caluin.

*Rouen pri-
se & pil-
lée.*

A Rouen & par toute la Normandie ils bruslerent les Eglises & ce qui estoit dedans, hors-mis les Croix: & furent si endiablez à cela, qu'ilz ne vouloient iamais vendre les cendres qu'ilz faisoient en bruslant cela, ains les iettoient au vent.

*Guyenne
opprimée
par les he-
retiques.*

ILZ feirent bien des diables en Guyenne: mais ilz en eussent bien fait d'auantage en ce pais là, silz n'eussent trouué chausseure à leur pied. Car en ces quartiers ilz faisoient mestier de ietter les Catholiques dans les puy, de s'ier les petitiz enfans, d'éuentrer les prestres, & ietter leurs trippes aux chiens.

MAIS ce qui nous deuroit faire plus de creue-cueur est, qu'ils traicterent indignement la sainte Eucharistie, la foulant aux pieds, la iettant aux chiens, la mettât au feu, & la proposans à la butte. Or Dieu seul cognoist pourquoy il permettoit telles indignitez, & luy seul sçait de quelle monnoye il payera telles iniures par luy souffertes, non seulement en France, mais par toute l'Europe: & à la mienne volonté, que nous facions si bonne penitence de noz pechez, qu'il r'assereine sa face sur nous. Les hommes ne pensent point aux peines & tourmens qu'ils endureront eternellement, pour auoir si mal vescu, à fin que ie taife le supplice de la vie presente.

LA ville de Poictiers sentit & experimenta bien fort la felonnie heretique, veu qu'il n'y eut Eglise ny maison canoniale, qui n'esprouuast leur fureur. C'estoit la ville où reposerient les ossemens de S. Hilaire, Euesque de celle ciré: lequel Sainct Hierosme appelle la trompette des Latins, à l'encontre des Ariens. Là estoient aussi les reliques de S. Radegode, Royne de France, qui iadis fut femme fort sainte & religieuse: & de plusieurs autres saints. Ces saintes reliques furent par ces chiens enragez iettées au vent, ou bruslées, cōme furent semblablement les bibliothèques de ladicte ville. Car ils ne sçauoient endurer les escripts des anciens, par lesquels nous rembarrons leur fauce doctrine.

IE ne sçauroy raconter la centiesme partie des meschancetez, qu'ils feirēt à Lyon. Suffise vous qu'ils feirent beau mesnage aux Eglises, & bruslerent les ossemens de cest ancien & saint martyr Irenée, Euesque dudit lieu.

LE semblable feirent-ils du corps de cest Euesque tant saint & renommé par ses miracles, Sainct Martin de Tours. C'est la discipline qu'on apprend à l'eschole de Caluin & de Beze, ce sont les miracles que le nouveau Euangile enseigne de faire. Et non-obstant on ne cognoist pas encore la piperie des predicans, tant on est endurcy. Si les Turcs ou Tartares auoient fait telles inhumanitez, nous dirions que ce seroit vne felonnie incomparable: or maintenant est-il, que cecy a esté fait par des Euangeliques, pires que Turcs & Tartares.

L'Eucharistie indignement traitée.

La ville de Poictiers pillée: & les corps S. Hilaire, & S. Radegode bruslez.

Le corps de S. Irenée bruslé à Lyon.

S. Martin bruslé à Tours.

*Monsieur
de Guyse.*

LE tres-illustre Duc de Guyse auoit esté absent quelque temps de France: mais estans suruenuz tels troubles au Royaume, le Roy & la Royne le manderent venir de Lorraine, lequel certainemēt mōstra à la defence du Royaume vn cueur Catholique & genereux. Car par le commandement du Roy il meit sus vne armée, & feit que le Roy trouua gens au besoing, si que les vns alloient deça, les autres delà, pour recouurer les villes occupées par les heretiques: toutesfois on ne sceut pas esteindre totalement les desseings d'iceux, pour-ce que ces forces estoiet venuës vn peu trop tard. Venuës qu'elles furent à Tours, ceste ville se rendit, & autres situées sur la riuere de Loire. On leur osta Angers d'entre les dents. Car plusieurs se commençoient déia à fascher de telle cruauté & pillerie, de maniere que plusieurs villes furent aysément reduites en l'obeissance du Roy. Il y eut vn Capitaine en Gascogne, nommé le Seigneur de Monluc, qui feit belle boucherie de ces heretiques, nō vne fois seulemēt, ains plusieurs.

*Monsieur
de Monluc
en Guyenne.**De la ville
de Thoulou-
se.*

LA ville de Thoulouse estoit preste de seruir de proye à ces mal-heureux, & mesmes par l'espace de quelques iours on ne scauoit bonnemēt qui estoient les maistres, ou les Catholiques ou les Huguenots, mais par la venue de ce braue Capitaine, les Calvinistes eurent à la fin du pire. Ce Capitaine assiegea finalement la ville de Montauban, retraicte des heretiques pour la forteresse d'icelle. Je reciteroy ce qui en aduint, si ie n'auoy peur d'estre trop long, & aussi si i'estois vn peu mieux asscauanté des choses qui en ce temps furent faictes parmy la France.

*La prise
de Poitiers
par les
Catholiques.*

MONSIEUR le Marechal de S. André, homme preux & fidelle, meit le siege deuant Poitiers, ayant enuiron dix mille hommes avecques luy. Le siege fut planté le 25. iour de Iuillet. Et premieremēt il mōstra les lettres du Roy à ceux de dedās, par lesquelles sa maiesté les sommoit de rendre la ville, & qu'on ne leur feroit aucun mal, pourueu qu'ils le recogneussent pour leur Roy. Ce que leur estant maintesfois proposé, ils respōdoient tousiours, qu'ils vouloient obeïr au Roy, mais que le Sieur Marechal n'auoit aucun mandement du Roy contr'eux,

contr'eux, & que les lettres qu'il monstroir, n'estoient pas du Roy: & quand bien elles le seroient, que le Roy estoit encor' enfant, qu'il ne sçauoit pas comme les affaires se passoient, ains que Monsieur de Guyse faisoit tout à son plaisir. Et cela estoit la chanson des Caluinistes par toute France, quand on leur parloit de soy rendre au Roy. Ce-pendant l'armée estant deuant Poitiers, il n'y eut que des escarmouches, iusqu'à tant que l'artillerie fut amenée de Tours. Alors elle fut bracquée deuant la ville du costé de la porte Saint Ladre, & fut la bataille si furieuse, que le mesme iour la ville fut forcée, & vint en la puissance du Roy. Il y eut plusieurs heretiques tuez, mais les Chefz de la sedition se sauuerent ayans recours à vne soudaine fuyte. Mais, pour ne perdre point tant de temps, estant la ville de Bourges prise par les Catholiques, le fort de la guerre fut à Orleans. Et finalement, les heretiques n'ayans sçeu rien faire deuant Paris, par la vigilance de Monsieur de Guyse, comme ilz s'en alloient, les deux armées se ioignirent pres la ville de Dreux, si bien que la bataille fut donnée, en laquelle les Huguenotz eurent du bon au commencement, ayans tué le mareschal de Saint André, qu'ilz hayssioient plus que poysons, & estant prisonnier M. le Connestable, & plusieurs autres. Mais Monseigneur de Guyse ioua si bien son roolle, qu'il leur osta la victoire d'entre les mains sur la fin, & print le Prince de Condé, Chef des Caluinistes, estant leur fanterie toute hachée en pieces. Le nombre des mortz fut grand d'un costé & d'autre, & le Prince fut gardé par les gens du Roy. Les heretiques menerent leurs prisonniers à Orleans: & l'Admiral, qui estoit le Chef des heretiques apres le Prince de Condé, se retira en la ville d'Orleans, laquelle il fortifia bien fort.

*Ce fait, Monsieur de Guyse se preparoit pour assieger Orleans, & auoit déjà grand auantage sur les assiegez: mais durant le siege, comme vn soir il passoit le Loire, & alloit au cāp, vn Poiltrot (homme qui à ce faire auoit esté induict par les ennemys) luy lascha vn coup de pistolle sur l'espaule droite, dont ledi& Prince reçut vne playe mortelle, & de laquelle il alla de ce siecle en paradis bien tost apres. Sa mort a esté vne

Xxxx.j.

*Bourges reprise.**La bataille de Dreux.*** Ce propos a esté transporté icy en son lieu.*

L'AN M.D.LXII. HISTOIRE DE TOUTES CHOSES

*La mort
de M. de
Guyse.*

des plus dommageables au Royaume de France, que mort de Prince qui oncques aduint. Aussi fut elle au prouffit des Calvinistes, lesquelz il alloit mettre entre les mains du Roy, s'il eust vn peu plus longuement vescu. Comme il estoit au liect malade, il feit les plus belles remonstrances & exhortations à toute sa maison, qu'il est possible de faire: & finalement, mourant ioyeusement pour le soustien de la foy Chrestienne, il rendit son ame à Dieu. Iceluy mort, le Prince de Condé fut eslargy, & le Roy fut contrainct à la fin de faire vn edict de pacification par tout son Royaume, lequel les Theologiens ne pouuoient approuuer. Ainsi doneques les villes detenuës par les heretiques, se rendirent, comme Lyon & autres, ou la religion Catholique fut r'establie.

*Edict de
pacificatiō*

*Abdyssu
patriarque
d'Assyrie
vient a
Rome.*

ENVIRON ce temps, Abdyssu Patriarque des Assyriens Orientaux, vint à Rome pour voir & saluer le Sainct Pere, & pour estre par luy confirmé: aux piedz duquel s'estant prosterné, il promeit toute obediēce, & iura qu'il receuroit, garderoit & feroit garder à tous ses subiectz, les decretz & statutz de tous les Conciles generaux, & specialement de celuy de Trente. Or a-il plusieurs Euesques souz foy, & confessa, qu'il ne doutoit aucunement, que le Concile de Trente ne fust legitimement congregé, & luy-mesme fust allé audiect Concile, si certains vrgens affaires ne l'eussent appellé en sa contrée. Et pour-ce que par les chemins les Turcs l'auoient deualizé, le Pape le remonta avec tout son train, luy donnant tout ce qui luy faisoit besoing pour retourner en son païs. Estant absent il feit telle profession de foy au Concile de Trente l'an mil cinq cens soixantedeux le septiesme iour de Septembre: l'ay confessé de cuer pur & de foy syncere, deuant les reuerendissimes Cardinaux de l'Eglise Romaine, à sçauoir M. Michel, du tiltre de Saincte Sabine, Alexandrin, & M. Antoine du tiltre de Sainct Marcel, d'Amalie, en la forme qui s'ensuyt:

*La confes-
sion de Foy
font Catho-
liques.*

IE Abdyssu filz de Iehan de la maison de Mars, natif de la ville de Gezire sur le fleuve de Tigre, iadis moine de Sainct Antoine au monastere de Sainct Roc & Sainct Iehan freres, esleu Primat ou Patriarque de la cité de Muzal en Assyrie:

Iure, que ie croy & confesse la foy de l'Eglise Romaine, approuuant ce qu'elle approuue, & reprouuant ce qu'elle reprouue. Ce que ie veux garder & entretenir, & prometz de le faire garder & entretenir à tous les Euesques de ma iurisdiction. Pour confirmatiõ dequoy i'ay escript de ma main ceste profession de foy à Rome ce septiesme de Mars 1562. Estant prest de partir pour retourner en ses païs, il requist fort instamment, qu'on luy enuoyast la copie du Concile de Trente, lequel il obserueroit entierement. Estant maintesfois interrogé ^{Les liures de l'Escrivture & des Peres en Assyrie.} des saintes lettres, il respondit fort pertinemment. Il nommoit aussi, & disoit qu'il auoit tous les liures, que les Iuifz & heretiques reiettent du Canon: disoit en oultre, qu'il auoit leu diligẽment en Chaldée & Syriac, les autheurs anciens Grecz & Latins, presque tous ceux que nous auons, & d'autres que nous ne cognoissons point. Que luy & ses subiectz vsoient ^{Les sacrements, leur confession, & leur Messe.} des Sacremens presque comme nous faisons, mesme de la confession auriculaire, de la priere pour les mortz, du mesme Canon de la Messe, & de la consecration totalement comme nous: qu'ilz veneroient les images des Sainctz: qu'autresfois ilz auoient receu la foy des S S. Thomas & Thaddæe, & de Sainct Marc leur disciple, & qu'encor aujourd'huy icelle foy estoit gardée au païs où il habitoit. Voyla comme la dignité Ecclesiastique & la doctrine salutaire demeure tousiours ferme & semblable à foy depuys quinze cens ans en ça, és nations estranges, au lieu qu'en ces contrées elle est abastardie & presque déia esteinte.

A v mois de Nouembre de l'année presente, tous les Electeurs esleurent vnanimement à Francfort Maximilian Roy ^{Maximilian est fait Empereur des Romains.} de Boëme, fils de l'Empereur Ferdinand, pour Roy des Romains. Ce Prince est doué de perfections singulieres, & s'attend-on qu'il sera l'appuy de l'Eglise Catholique, comme a esté son Oncle Charles, & Ferdinand son Pere Empereurs tresloüables, dequoy il a fait esprouue déia assez souuent. Or pour-ce que ie ne veux estre trop prolix, ie me deporterai de dire en ce lieu tout ce qui fut fait lors par ordre: me contentant de vous dire, que l'Ambassadeur du Turc vint à Franc-

L'AN M.D.LXIII. HISTOIRE DE TOUTES CHOSES

*Les presens
du Turc à
l'Empe-
reur.* fort, lequel apporta lettres à l'Empereur Ferdinand, & donna au nom de son Maistre pour present, vne belle hacquenée & quatre chameaux. Il dict aussi, que Solimá son Seigneur auoit enuoyé pour present à l'Empereur les chrestiens captifz sans en auoir en rançon, & sans auoir esté de ce prié par aucun Prince Chrestien, suppliât l'Empereur de vouloir faire le semblable enuers les Turs captifz.

*Assem-
blée à Lu-
nebourg.* A v mois de May les Princes & Estatz de l'Empire, estans de l'enclos de Saxe, s'assemblerent à Lunebourg, & là fut principalement consulté de ceux de Breme qui caluinizoient, tellement qu'il fut fait vn arrest contre les Sacramentaires.

*Les ieux
de farces
de nos He-
retiques en
escriuant.* Car il y auoit déia danger, que Caluin gastant toute la Saxoigne, les Lutheriens ne perdissent leur autorité. Or Tilman Heshusius escrit vne saine defense de la presence du corps de Christ, contre les calomnies de Caluin, Boquin, Beze & Clebice. Le contraire fut escrit par Thomas Eraſt Medecin, abusant des tesmoignages de l'Euangile & des Anciens. Au reste Bullinger faisoit tousiours teste contre Brence. Le plus Tragique fut, que Illyric, Viande & Mathieu le iuge escriuoient, que les Princes de Saxe les auoient iettez de l'vniuersité d'Iéne, pour-aultant qu'ilz festoient opposez aux Sacramentaires.

Et si ie ne me trompe, Illyric est encor' auourd'huy banny, pour-ce qu'il est grand Lutherien. Finalement Brence meit son liure de la presence du corps & sang de Christ en la Cene, en lumiere, dirigé contre Pierre Martyr & Bullinger. Le Martyr se preparant pour respondre à Brence, rendit l'esprit le douziésme de Nouembre, au grand proffict de Brence. Ie ne prie point pour telz hommes, pour-ce qu'ilz ne vont point en purgatoire.

*Bullinger
contre
Brence.* L'AN 1563. Bullinger respondit à Brence, tant est l'hayne entre les Lutheriens & Zuingliens implacable, encore qu'ilz ayent l'Escripture pour eux. Ie m'esmerueille comment le Magistrat ne s'apperçoit de la vanité de ces dogmatistes, & que c'est chose fort dangereuse de leur adionſter foy. Mesme quelque Zuinglien escrit, qu'il a grande peur, que de cecy ne soude vne dissension & querelle Tragique. Ce qui

ne seroit point nouveau, attendu que par tout où ce cinquiesme Euangile glisse, les troubles & seditions ciuiles y prennent pied tout aussi tost. Ces Euangeliques se targuent tousiours de la mauuaise vie de nos gens d'Eglise, & la mettent sur nappes en quelque lieu qu'ilz se trouuent: mais quelques Catholiques par cas fortuit sont tombez sur les memoires des Visiteurs de nos Euangeliques, esquelles ils ont leu plus d'adulteres, commis par noz ministreaux mariez, qu'on ne scauroit trouuer de fornications faictes par nos Ecclesiastiques en tout l'Empire. Quelque Lutherien predicant, ayant par quelque finesse vsurpé vne parroisse, se maria incontinent. Mais ne se plaissant gueres à sa femme, il luy donne le bouquon, pour defricher le chemin à secondes nopces. Estant interrogé comme il auoit voulu commettre vn si meschant acte, il respondit, que la concupiscence d'vn Lutherien n'estoit point assouuie en se mariant. On pourroit monstrier par maintz exemples que son dire estoit vray, de maniere que ceux sont grandement à reprendre, qui veulent permettre le mariage aux prestres, contre toute loy & ordre Ecclesiastic. La paillardise ne s'esteint pas en accointant vne femme, ains plustost en resistant virilement, & en vaquant à estudes honestes.

A v mois de Mars de l'année presente, y eut vn tisseran aux faulx-bourgs de la ville d'Ausbourg, qui auoit vne fille aagée de vingt ans, tourmentée du mauuais esprit si estrangement, que ses parens ne pouuoient plus supporter vne telle calamité. Ilz estoient Lutheriens, & pour-ce ilz s'en vont vers les predicans Lutheriens de ladicte ville, pour leur demander conseil & ayde sur ce mal-heur. De sorte que quelques ministres vindrent voir la pauurette, pensans pouuoir ietter ce diable par la puissance de l'Euangile Lutherien: mais Satan ne faict point la guerre à Satan, & ainsi quelque chose qu'ilz feissent, le diable n'en tenoit cōte. Toutesfois pour n'estre mocquez, ilz aduertirent les parens de la fille, de la garder soigneusement, à cause que Dieu la pouuoit encore bien guerir, si cela luy estoit aduenue par sa permission. Aduint que quelque ieu-

*La vie or
de & disse
lue de noz
heretiques.*

*Miracle
d'une de-
moniaque
guerie à
Ausbourg.
auquel on
peut conse-
rer celui
qui aduint
au diocèse
de Laon
l'ā 1566.
cōme chas-
cun scait.*

ne femme nommée Anne, (fille d'un Mathias aultresfois chirurgien iuré d'icelle ville) ayant sa chambriere avec soy, esmeuë d'une charité Chrestienne, vint visiter la pauvre fille: & si tost qu'elle apperceut la misere en laquelle elle estoit constituée, pensant qu'elle ne viuroit plus d'un iour, elle feit tant enuers les parens de la fille, qu'ilz enuoyerent querir, à sa suasion, M. Simon docteur en Theologie, & qui prechoit catholiquement à Sainct Maurice d'Ausbourg. Iceluy estant prié d'auoir compassion de la pauvre creature, se mit à chemin, & venu qu'il fut assez pres du logis où estoit la demoniaque, elle commença à crier estrangement, à dire qu'elle se strangleroit, si on ne la laissoit aller, & se vouloit ietter hors du liçt à toute force. La Dame Anne ayant demandé qu'est-ce qu'elle vouloit, on luy dict qu'elle demandoit à boire. Lors elle luy donna de l'eau beneiste à boire dans un verre, & la fille en ayant beu, elle se tourmenta beaucoup plus fort: & se tournoit d'un costé & d'autre, & mettoit quelquesfois sa teste entre les piedz. Ce qu'ayans veu les assistans, ilz confessoient que ceste eau auoit quelque vertu & efficace. Car depuys qu'elle en eut beu, elle ne cessoit aucunement de s'affliger, & le diable la tourmentoit si fort pour cause de ceste eau, qu'un des quatre hommes qui la gardoient iura, que quand on luy donneroit tout Ausbourg, il ne demeureroit pas une nuyct avec celle fille, si les parens ne luy vouloient appliquer autre remede. Car elle auoit rendu de sa bouche une telle puanteur, que chacun en pensoit mourir. Comme doncques elle se vexoit en telle sorte, le sus-nommé Theologien estoit déjà à la porte du logis. Et lors elle commença à braire le plus horriblement du monde, à se rempester, à dire mille pouilles au Theologien: Laisse moy, prestre, disoit-elle, iete voy bien, tu me veux tuer, meschant, mal-heureux. Le Theologien ayant ouy cela, il dict au pere de la fille qu'il la laissast aller. Mais voyant qu'elle se mesfaisoit encore d'auantage, & qu'elle crioit, que le diable estoit maistre de son corps & de son ame, il feit encore mettre des ceps aux pieds de la pariente. Par-

*L'efficace
de l'eau
beneiste.*

*Grande
affliction
de la fille
possédée*

quoy son pere mesme luy enuoloppe les pieds avec vn manteau, & demande ce- pendant au Theologien, sil la lieroit biē serrée: non, non, dit-il, on ne gagneroit rien à la lier, si Dieu ne la veult lier. Alors la miserable leuoit les pieds iusqu'au plancher de la chambre, & se des- enuoloppa les pieds, se bat- tant de telle furie, que les quatre qui la tenoient, comme nous auons dict, furent contraincts d'en appeller encore deux au- tres pour la tenir: lesquels venuz, chacun crioit, Iesus, Iesus, se diable la nous emporte malgré nous. Le Theologien qui es- toir là, commence à inuoker l'ayde de Dieu: mais le diable de son costé tourmentoit encore la fille l'espace d'un quart d'heure, & ne cessa de demander & respondre plusieurs cho- ses parlant distinctement, avec la voix fort grosse. Au commē- cement il disoit, ha, ha, prestre, ie ne sorts pas encore de ce do- micile. Mais le Theologien ayant dit, le te commande d'en sortir au nom de Dieu, il respondit vn peu apres: Il m'en fault donc sortir: le Theologien adioust, le te cōmande de le faire au nom de Iesus Roy de gloire. Alors le diable demeurant vn petit, se plaignoit piteusemēt, & vouloit sortir, ores par le haut, ores par le bas, iusqu'à tant qu'on luy permet de sortir par la fenestre. Mais deuant qu'il feist cela, la fille se tourna la face contre son liēt, & cōmençoit à ronfler & se tourmenter avec cela, comme si elle eust voulu vomir: & ce- pendant elle tiroit vne langue longue, horrible & fort noire, & fut toute sa bou- che renduë noire comme charbon, & mesmes son col vint gros comme la teste, demeurant quelque temps en telle façō. Puis leuant les yeux vers le ciel, & ioignant les mains, elle di- soit, rēdant graces à Dieu le createur: le cognois & voy main- tenant mon Dieu. Elle mercia pareillement le Theologien bien honnestement, lequel luy demandoit souuent, si elle se sentoit bien deliurée: ie suis deliurée, graces à Dieu, disoit- el- le: mais ie voy quelcun qui a la teste rouge, la face horrible, la langue lōgue, qui me fait tousiours signe que i'aille à luy. Par- quoy le Theologien luy remonstra, qu'elle deuoit faire trois fois le signe de croix, & dire, Iesus de Nazareth Roy des Iuifs. Ce qu'elle feist, & puis elle dit au Theologien: toutes & quan-

L'AN M.D.LXIII. HISTOIRE DE TOUTES CHOSES

tes fois que ie fay le signe de la croix, le diable s'esuanouit, mais il reuiet incontinent. Lors le Theologien enseigna la fille de tout ce qu'elle deuoit croire & faire, luy disant qu'elle deuoit totalement renoncer à Satan, & se dédier à son Dieu. Ce qu'elle promeit de faire, & ayant reçu la sainte Eucharistie peu à peu elle reuint à sa conualescence. Or celuy qui viendra à lire ceste histoire sans affection, il verra que noz heretiques n'ont aucun pouuoir de chasser les diables, lequel néantmoins a demeuré en l'Eglise Catholique iusques à present. Et n'y a homme, tant impudent soit-il, qui olast nyer la verité de ce fait, veu que ceux d'Ausbourg confessent que la chose s'est ainsi passée.

La fin du Concile de Trente. A v mois de Decembre la fin desirée fut mise au Concile de Trente, auquel plusieurs choses ont esté saintement ordonnées, mais non-obstant on ne sçauoit desarçonner les dogmatistes de leur erreur. A ce Concile assisterent plusieurs Cardinaux, Archeuesques, Euesques, & hommes merueilleusement doctes. Le Pape Pie quatriesme y feit de grands frais, & pareillement l'Empereur Ferdinand.

L'Empereur, Roy d'Hongrie. MAXIMILIAN, Roy des Romains & de Boëme, fut ceste année sacré & couronné Roy d'Hongrie à Presbourg, avec toutes les ceremonies à ce requises.

Les Roy de Danne marc & de Suede. L'AN 1564. le Roy de Dannemarc & ceux de Lubec continuèrent à grands frais, la guerre par eux encommencée l'an precedent à l'encontre du Roy de Suede, dont s'ensuyuit gros dommage d'un costé & d'autre.

Staphylus au parauant heretique se reduit, & fait voir toutes les fraudes & contrarietez des heretiques. CESTE année, le cinquiesme iour de Mars, Frederic Staphyle, homme tres-docte, aagé de 51. an, alla de vie à trespas à Inglestad. Il auoit vescu familieremēt dix ans à Vvittemberg avec Luther & Melancthon, mais Dieu l'ayant conuertiy à la religion Catholique, il feit voir publiquement leurs fraudes, mensonges & repugnāces si à l'œil, que les heretiques l'hayssent mortellement. Il estoit fort versé en la langue Grecque & Latine, & si cognoissoit les mysteres des heretiques aussi bien qu'aucun autre, lesquelz il eust publié d'auātage, sil eust vescu plus longuement. L'an 1558. il feit imprimer à Coloigne l'Epitome

l'Epitome de la Theologie Lutherienne, en trois parties: lequel liure faisoit mourir de despit tous les heretiques, qui delibererent de ioinde leurs volontez & leurs forces pour rem barrer Staphyle. Ce qu'ils feirent, mais il leur respondit bra uement, de maniere qu'un Lutherien l'appella le grand dia ble, pour-aultant qu'il les combattoit virilement & avec leurs propres armes, monstrant leurs contrarietez, leurs dissensions & animositez, le tout extraict de leurs liures. Iaques Smidelin ministre de Goppinge estoit vn de ses ennemis, leq̃l se despou illant de toute vergongne pour vne bonne fois, osa dire, que les Euangeliques ne discordoient point en doctrine, combie que & Staphyle & les Lutheriens mesmes feissent ample preu ue du contraire. Mais qu'y a-il, que les heretiques n'osent? Sta phyle en voulut principalement à cestuy Smidelin, non pas qu'il meritaist qu'on luy respondist, mais pour fermer la bou che à sa vilaine impudence, & pour confirmer la foy Catholi que contre les calomnies d'iceluy. Or à fin que les lecteurs co gnoissent, combien monstrueux ont esté les dogmatistes de no stre siecle, ie veux monstrier ce qui aduint à vn ieune ministre Lutherien, comme recite le mesme Staphyle. Cestuy cy ayāt *Plaisant discours d'un mini stre, lequel erre ça & là par les Allemas gnes tant les sectes y sōt diuerses.* quelque temps presché à Misne en Saxe, voulut aller en vne autre contrée de Saxe, (car ceste prouince est fort grande,) & ce pour estre en quelque lieu ministre de la parolle. Si estoit ce predicant Adiaphoriste, c'est à dire suyuant Melancthon: mais le païs où il fut, estoit gouverné par vn sur-intendant suy uant Illyric. Car sçachez que combien que Mathias Illyric ait esté disciple de Melancthon, neantmoins en plusieurs choses il ne s'accorde pas avec son maistre, tout ainsi que Melancthon ne s'accordoit avec son maistre Luther. Estant donc nostre ieune ministre interrogé par ce sur-intendant de quelle reli gion il estoit, il respondit, qu'il suyuoit l'opinion de Melan ction & de George Maior. Tu es donc Mamelu, respondit l'autre, & apostat heretique. Encore luy va demander le sur-intendant, sil croyoit pas que les bonnes œures nuysoient à nostre salut: auquel le ministre respondit, que les bonnes œu res profittoient au salut de l'homme: de maniere qu'estant

L'AN M.D.LXIII. HISTOIRE DE TOUTES CHOSES
jugé pour heretique, il fut banny d'icelle ville & de toute la
prouince. Car les choses estoient là venuës, que Illyric, disci-
ple de Melancthon, ne vouloit pas souffrir vn autre disciple
du mesme maistre. Ce pauvre homme ayant esté ainsi refusé,
se transporta en Prusse, region fort fertile & opulente. Or en
ce temps la doctrine d'Osiander auoit vogue en ceste con-
trée. Aduint donc que le ministre ayant demandé quelque
ministere d'un Osiadrin, on l'interrogea, s'il croyoit que l'hom-
me estoit fait iuste de la iustice essentielle de Dieu, & s'il n'e-
stimoit pas ceux heretiques qui le nyoient. Auquel le pauvre
homme ayant respondu que Melancthon enseignoit autre-
ment, voire mesmes Illyric, incontinent il fut rebuté comme
heretique, & banny de tout le pais de Prusse. Au moyen de-
quoy il vint en Poloigne vers les Caluinistes, desquelz il fut
reietté semblablement, pour-ce qu'il ne vouloit pas dire com-
me eux, & quitter l'opiniõ de Luther. Et partant il s'en va aux
Pighardz, (heretiques descendus de Iehan Hus) estimant que
ceux-cy le receuroient tout honnestement en leur compai-
gnie. Mais iceux voulurent, qu'il abiurast toutes les autres se-
ctes pour suyure la leur: ce qu'ayant refusé de faire, il fut con-
trainct de se pouruoir ailleurs. Delà il vint se retirer chez vn
gentil-homme de Silesie, qui l'interrogea, s'il suyuoit l'opiniõ
de Zuencfeld, c'est à dire s'il croyoit, que le ministere exte-
rieur fust superflu: & q le verbe interieur, ou l'energie du verbe
presché, fust le filz mesme de Dieu: à quoy il respondit, que
celà estoit vne heresie ancienne, refutée en plusieurs liures
d'Illyric, de Melancthon, & de Caluin. De laquelle responce
estant indigné le gentil-homme, il aduança bien d'aller le mi-
nistre, qui s'en fuyt aux Anabaptistes, qui sont en grand nom-
bre en Moraue, non pas en intention d'y demeurer, mais
pour apprendre leurs mysteres & maniere de faire. Mais les
autres le cogneurent, & luy demandent sur le champ ce qu'il
croyoit. Sa foy ne fut point semblable à la leur, & partant il
fut repoussé comme vn heretique, quelque complainte qu'il
feist d'auoir tant circuy de pais. Neantmoins toutes les sectes
sus nommées se iaëtēt d'auoir le pur Euangile, & disent que

les autres ne l'ont point. Mais est-il possible, que la verité puisse habiter avec vne telle varieté ? On voit de tous quartiers de nostre Europe venir des dogmatistes nouveaux, qui crient, icy est le Christ: & toutesfois ils mentent tant qu'ilz sont, à cause que Iesus-Christ est seulement en l'Eglise Catholique. Mais pour reuenir à nostre ministre, il vint finalement à Vienne en Autriche, où ayant rencontré quelque Catholique, il luy exposa combien de chemin il auoit fait, combien d'aduersité il auoit souffert, cōbien d'heretiques il auoit trouués: le priant au reste de luy vouloir ayder à entendre la solide doctrine & la vraye interpretation de l'Euangile. Oeuvre veritablement procedant de la grace diuine, quand ce pauvre homme chassé de toutes synagogues heretiques, reuint à la parfin au troupeau de Iesus-Christ. Le Catholique donc luy conseilla de suyure l'interpretation receuë & approuuée de tous, & ne s'aheurter iamais à l'opinion d'aucū homme particulier. Car il n'est pas possible, dit-il, que les opinions particulieres s'accordēt avec le sens Catholique, & encore est-il moins possible qu'elles s'accordent entre elles. Car pour-autant qu'iceux ne sont pas entez au corps qui vit de l'esprit de Iesus-Christ, & est conduit par iceluy, ains sont comme branches couppees du corps de l'Eglise: ilz errēt vagabonds ça & là, & vendent aux hommes leurs miserables songes pour pure parolle de Dieu. Et pour-ce que les vns disent blanc & les autres noir, sans que l'un vueille ceder à l'autre, delà viennent les heresies si desformes, lesquelles neantmoins ils defendent opiniastrement. Ce qui est aduenū par vne iuste & redoutable ire de Dieu, à sçauoir que ces reuesches hōmes fussent ainsi embrouillez, & reçeussent le mensonge pour la verité, à cause qu'ilz ne veulent ouyr l'Eglise, & vivent en sorte qu'ilz meritent bien d'estre punis de telle façon. Doncques la verité de doctrine ne loge pas chez les heretiques: elle gist seulement en l'Eglise Catholique, de laquelle Irenée a tres-bien di: Ces choses estans pleines de grande ostentation, il ne faut point aller mandier la verité chez autrui, puy qu'elle est en l'Eglise, dans laquelle les Apōstres ont mis, comme dans vn thesor,

*Beau pas-
sage de l'E-
glise, ex-
trait de
S Irenée
liure 3.
chap. 4.*

» tout ce qui appartenoit à la verité, de sorte que quiconque a
 » soit, la peult estancher par ce moyen. Ceste-cy est l'entrée de
 » vie, tous les autres sont larrons : & partant il les fault eiter,
 » mais il fault soigneusement croire ce qui vient de l'Eglise, &
 » recevoir la tradition de verité. Car quoy? Encore qu'il ne fust
 » question que d'une chose de petite consequence, ne faudroit
 » il pas recourir aux Eglises anciennes fondées par les Apo-
 » stres, & d'icelles apprendre la resolution de ce qui seroit tom-
 » bé en controuerse? Et quoy? quand les Apostres ne nous au-
 » roient rien laissé par escript, ne faudroit-il pas s'arrester à la
 » tradition, donnée à ceux qu'ilz laissoient Pasteurs des Egli-
 » ses? Plusieurs nations barbares font ainsi, ie dy de celles qui
 » sont fidelles: elles ont, sans caracteres & sans ancre, le salut
 » escript en leur cuer, & gardent diligemment leurs ancien-
 » nes traditions. Voyla ce qu'escriuoit Irenée, Euesque & Mar-
 » tyr, il y a plus de treize cens ans. Pour reuenir à nostre Staphy-
 » le, il escript en quelque lieu, qu'il auoit ses coffres pleins de li-
 » ures & epistres, touchant les fraudes, impostures, mensonges
 » & falsifications de nos heretiques, ce que nous eussions veu,
 » si Dieu ne l'eust si tost appelé à soy.

*La mort
de l'Empe-
reur Fer-
dinand.*

LE iour & feste Sainct Iacques, au mois de Iuillet, l'Em-
 pereur Ferdinand trespassa : Prince des vertus duquel on ne
 scauroit assez parler, tant il a esté Catholique, constant & en-
 tier. Et combien que nostre siecle ayt esté vn des plus mal-
 heureux & calamiteux qui furent oncques, toutesfois il a e-
 sté beaucoup aydé de ces deux tres-Catholiques & tres-reli-
 gieux Empereurs, Charles le quint, & Ferdinand son frere,
 qui pour ceste raison seront hault-louez à tousioursmais. Ma-
 ximilian second, filz de Ferdinand, talonne leurs traces, & au
 grand esioüissement des Chrestiens, il gouerne l'Empire Ro-
 main à present.

*L'armée
du Roy
Philippe
enuoyée à
la coste
d'Afriq.*

CESTE année, le Roy Philippe enuoya Garfie de Tole-
 te, son Lieutenant general sur la mer, avec vne bonne armée,
 pour assieger vn fort qu'ilz appellent *el Penol di Velez*, situé
 sur le riuage d'Afrique, & seigneurie par les Turcs : d'où les
 barbares faisoient des courses sur la mer, & molestoient gran-

dement l'Espagnol, iniure que le Roy ne pouuoit ny ne de-
 uoit endurer. La flotte estoit de cēt galleres, outre les aultres
 vaisseaux, desquelz nous ne sçauons pas le nombre, laquelle
 estant arriuée à la ville de Malacà, elle se fournit de muniti-
 ons, de gens de pied & de cheual: & delà hauçant les voiles,
 la mer estant bonace, elle vint surgir audict fort le dernier
 iour d'Aoust. La gendarmerie meit pied à terre, & fut com-
 mencé à battre le fort sirué entre des rochers, & enuironné
 entierement de la mer, si que non seulement il estoit difficile
 aux hommes d'y aller, mais bien encor' aux oiseaux. Or com-
 me on ne cessoit de canonner, aduint oultre l'expectation de
 tout le monde, que le sixiesme iour de Septembre les Turcs,
 qui gardoient le fort, s'en fuyrent en vne nuyt: & ne demeu-
 rerent que vingteinq Turcs, pource, peut estre, qu'ilz ne sça-
 uoient pas bien nager, & vindrent ceux-cy en la puissance
 des Espagnolz, lesquelz furent merueilleusement ioyeux
 d'une si soudaine & inespérée victoire. Le General de l'armée
 avec toute sa gendarmerie confessoit, que Dieu auoit enuoyé
 vne peur & frayeur aux ennemys, qui les auoit faict si soudai-
 nement quicter la place, laquelle estoit de sa nature imprena-
 ble. Le fort estant pris, on y meit fort bonne garnison pour
 empescher les courses des barbares. Si aduint, que comme
 l'ost se retiroit aux vaisseaux, les Sarafins crians & vrlans à
 leur mode, vindrent impetueusement assaillir les Chrestiens,
 mais ils furent partie tuez partie naurez. Et il fault sçauoir,
 qu'en ceste armée y auoit quelques doctes & religieuses per-
 sonnes, lesquelz à l'adueu du General s'estoient illec trans-
 portez, pour administrer les Sacremens aux gens d'armes en
 cas requis: tellement que le General & les plus nobles de l'ar-
 mée auoient confessé leurs pechez, & auoient reçu des di-
 ctes personnes le corps de nostre Seigneur. Et c'est comme
 il fault aller en besongne, c'est pourquoy Dieu bien-heura
 l'entreprise des Espagnolz, reduysât en leur pouuoir vne pla-
 ce presq' imprenable, sans nulle effusion de sang de leur costé.
 Ce que ie dis, a esté escrit d'un personnage graue & digne
 d'estre creu, lequel auoit esté present à toute ceste expeditiō.

Yyyy.iiij.

*Elle préd
 vn fort
 presque di-
 uinement.*

*Plusieurs
Indoys se
font Chre-
stiens.* A v mois de Septembre de ceste mesme année, vindrent lettres des regions de Iapan & de Sina, où sont déjà quelques Peres de la société de Iesus, vulgairement dictz Iesuites. Ces

lettres portoient, que bien huit mille hommes infidelles, entre lesquels y auoit des Roys, Princes & grandz Seigneurs auoient embrassé la Foy Chrestienne. Je veux bien reciter ce qui aduint en la conuersion d'un Sinaïen, laquelle region est fort populeuse, riche, & porte de bons espritz. Cest homme dormoit, & en songeant, il luy sembloit voir un Iesuite, qui l'exhortoit à se faire Chrestien, le menaçant en cas qu'il ne le feist, de luy couper les cheveux avec des ciseaux qu'il tenoit en la main, ce qui est ignominieux & infame entr'eux: de maniere que le Iesuite luy en couppa quelques vns, pour ce qu'il refusoit. Il veit cecy par trois nuytz continuës, mais à la dernière on luy couppoit tous les cheveux, ce luy sembloit-il. Au moyen dequoy il pria les Iesuites de le vouloir baptiser, lesquels luy enseignèrent premierement un sommaire de nostre religion, & puy le baptizerent. Et par cest accident les Peres de la Société espererent delà en auant, de pouuoir conuertir ce peuple. Beneis sois tu, ô Dieu, qui as voulu illustrer ces pauures barbares de ta cognoissance, pendant que chacū abandonne ta foy en ceste Europe.

*Colloque
à Mulbrun
entre les
sectaires.*

A v mois d'April fut tenu vn Colloque à Mulbrun par quelques iours, entre les Lutheriens & Caluinistes. A ce colloque assisterent l'Electeur Palatin, & le Duc de Vvirtemberg. Les Theologiens de ces deux Princes disputerent fort longuement ensemble, mais estans opiniaistrez des deux costez, ilz ne peurent iamais venir en accord. Les Theologiens d'Vvirtemberg maintenoient, que avec le pain & le vin le corps & sang de Iesus-Christ estoit realement à la Cene, (car ainsi parloient Brence & Smidelin, chez desdictz Lutheriens) & que tant les bons que les mauuais prenoient le corps & le sang: au contraire, les Caluinistes nyoient & la presence de Iesus-Christ, & que les meschans le prinssent en l'Eucharistie. Smidelin s'efforça fort en ce lieu de prouuer, que le corps de Iesus-Christ estoit present en tous lieux,

tout ainsi que la diuinité est presente, laquelle opinion estoit forgée au cerueau de Brence son compaignon, ou pluystoit son maistre. Car ces heretiques se fians à leur esprit, tombent d'erreur en erreur, & s'efforçans d'accabler l'Eglise Catholique, ils faueuglent de plus en plus. Brence & Smidelin s'efforcent de monstrier, que le corps de Iesus-Christ est present à la Cene, mais comme ainsi soit qu'il le faille croire simplement sans vouloir comprendre chose si supernaturelle, ceux-cy inuentent vne prodigieuse heresie: que le corps de Iesus-Christ est aussi bié en tous lieux, qu'est la diuinité. Ce qui est vne resuerie d'un cerueau humain, non procedé de la doctrine de Iesus, & de son Eglise. Les Caluinistes donc ne pouuans comprendre en leurs grossiers entendemens, comment nostre Seigneur se peult exhiber corporellement à la sainte Eucharistie, disent à la mode des Capernaïtes: comment est-il possible que cestuy-cy nous donne sa chair à manger? & partant ils ont recours à des metaphores, & osent dire que les parolles, par lesquelles nostre Seigneur fait ce sacrement, comme l'Eglise le continué tousiours, doiuent estre entendues figuralement. Mais pourquoy tant les Lutheriens que Zuingliens n'oyent-ils le prophete disant, si vous ne croyez, vous n'entendrez point? Si tu demâdes comment il se peult faire, l'Eglise te remonstre, que Dieu tout-puissant le promet & le fait. Or l'impudence des Lutheriens & Zuingliens consiste en ce principalement, qu'ils disent que les anciens Docteurs de l'Eglise sont pour eux. Ce que vrayement ils font accroire aux ignorans, & qui n'ont pas leu les Peres, mais ceux qui ont passé par là, ne peuuent oncques assez admirer leur malice & impudence. Cependât les vns & les autres nous accusent d'Idolatrie, pour ce que nous adorons Iesus-Christ en l'Eucharistie: mais nous n'auons garde de laisser ceste foy pour leurs crieries. Saint Augustin respond pour nous sur le Psalme 98: Pour autant, dit-il, que nostre Seigneur a conuersé en ce monde, & nous a donné sa vraye chair à manger, & pour ce que personne ne mâge ceste chair que premier il ne l'ait adorée, voyla comment on peult

*Le corps
de Iesus-
Christ pre
sent en to
us lieux, à
Brence.*

*Propos no
table.*

Iohan. 6.

Isai. 7.

*D'adorer
Iesus-Christ
en l'Eucha
ristie.*

ce
ce
ce
ce

» adorer l'escabeau des pieds de nostre Seigneur : tellemēt que
 » tant s'en fault que ce soit peché de l'adorer, que plus tost c'est
 » peché de ne l'adorer point. Voyla ce que dict S. Augustin : &
 maintenant nous poursuyurons le propos du colloque de
 Mulbrun. Apres que les Theologiens eurent bien disputé, nul
 fruit issit de leur dispute, sinon vne plus grande hayne & en-

*Brence &
 Smidelin
 contre les
 Caluini-
 stes : &
 ceux-cy cō-
 tr'eux.*

uie que par-avant. Car au mesme an ceux d'Vvirtemberg fei-
 rent imprimer en Aleman les actes dudiēt Colloque, & ce fut
 avec vne epistre de Brēce, par laquelle il attribuē vne insigne
 impudēce & vanité aux Caluinistes. Ce que voyans ceux-cy,
 bien tost apres meirent vn gros liure en lumiere cōtenant les
 actes dudiēt Colloque, & monstrant le mensonge de l'escript
 des Lutheriens, qui est là abondamment refuté. Voyez-vous

Prou. 13.

si le Sage a bien dict, que les superbes sont tousiours en dissen-
 sion? Le plus admirable est, que Smidelin, qui auoit escrit qu'il
 n'y auoit aucune repugnance de doctrine entre les Euangeli-
 ques, maintenant combat tout seul (Brence se mettant à part
 pour ceste fois) contre les Caluinistes, & monstre à toute la
 terre Chrestienne, combien ils sont differens & contraires en
 doctrine: mais bien peu apperçoient telles impostures. Que
 si quelcun s'en aduise, & neantmoins adioust foy à tels hom-
 mes en matiere de religion, de laquelle depend tout nostre
 salut, i'estime qu'il est plus mal-heureux qu'homme de ce mō-
 de. Est-il vray qu'il n'y a nulle discorde entre noz heretiques
 quand à la doctrine, attendu qu'ils ne peuuent iamais s'accor-
 der, & ne cessent de s'entre-guerroyer à beaux liures impri-
 mez? Au mesme Colloque les Lutheriens appelloient les Sa-
 cramentaires sectaires, & les Sacramentaires disoient, que les
 Lutheriens controuuoient des erreurs nō iamais ouys. Ceux
 qui s'entre-donnent tels tiltres d'honneur, peuuent-ils estre
 d'accord? Si les Catholiques les nomment comme ils s'appel-
 lent eux-mesmes, cela ne les doit point fascher. En ce Collo-
 que vn Zuinglien nommé Boquin vint à dire, que leur diffe-

*Note le
 propos de
 Smidelin
 en disputāt*

rent n'estoit point de l'escriture, mais de l'intelligēce d'icelle.
 Là dessus Smidelin repliqua sans desguiser la matiere, disant
 que Boquin par cela se desarmoit, & n'auoit plus le moyen de
 combattre

combattre les Catholiques. Car c'est chose trop certaine, que les heretiques ne se r'apportēt point à l'escriture, pource qu'il le faict pour eux, mais pour-ce qu'ilz peuuent faire vn nez de cire aux escritures, pour les faire ressembler à leur opinion. De maniere que si tu les fais venir vne fois à l'intelligēce des escritures, laquelle il faut pescher du perpetuel consentement des Docteurs de l'Eglise Catholique: alors les heretiques n'orriē que nous obiecter. Et c'est pourquoy ilz ne font que crier l'escriture, l'escriture, quoy que sans propos: & sur ce reiettent tous les Docteurs anciens, voire les Conciles mesmes, pour-
 autant qu'ilz leur couppent la gorge. C'est aussi pourquoy Luther s'est auancé d'escire, que la Bible estoit le liure des heretiques. Et toutesfois c'est le rempar & le bouleuert de Luther & de tous les sectaires, combien que l'experience declare par trop, que les Lutheriens & les Zuingliens l'interpretent diuersemēt. Car quoy qu'il y ait, ils font venir l'escriture où ils veulent, non sans grād blaspheme enuers le Sainct Esprit. C'a esté la coustume de tous heretiques d'alleguer ainsi l'escriture sainte: & y en a eu, comme il y en a encor' à present, qui ont osé deprauer & corrompre les escritures. Et c'est l'occasion pourquoy ceux de Vvirtemberg Lutheriens, ap-
 pellent ceux du Palatin Caluinistes, faulxaires, disans qu'ils ont corrompu les mots de l'Euangeliste Sainct Luc. Ceux du Palatin disent pareillement, que les Lutheriens corrompent l'Escriture par leurs songes. A qui des deux croirez-vous? Les Caluinistes adioustent, que les Lutheriens disent tantost blāc tantost noir d'une mesme matiere: chose non esmerueillable, veu que Luther l'a bien faict, comme monstrent messieurs les Caluinistes. Au contraire, Luther & Ioachim Vvestphal Lutherien, monstrent que les Zuingliens ou Caluinistes se contrarient entr'eux. Nous receuons volontiers telz tesmoignages, & volontiers nous quittons l'accointance de tous telz dogmatistes: & à la mienne volonté que ceux qui se sont laissez piper & decevoir par les predicans de ce mal-heureux Euangile, feissent le semblable. l'espere que Dieu fera quelque iour telle grace aux hommes, qu'ilz verront ce qu'ilz

*De la 3.
escriture.*

*Gentil al-
tercasentre
les Luthe-
riens & Sa-
cramen-
taires.*

n'ont encore cognu : à sçauoir combien monstreux heretiques sont ceux , aux sornettes de qui ilz ont creu en ce qui concernoit leur salut. Si quelcun a appetit de rire, qu'il se souuienne, que quelque Zuinglien a obietté aux Lutheriens, qu'ilz ne sont pas encore d'accord entr'eux, quelz Tomes sont vrayment du Patriarque Luther. Car ils s'accusent par-ensemble, d'auoir depraué les escriptz de Luther. Ils adioustent encore, que les Lutheriens ont voulu faire de Luther vn Pape nouveau, à fin que quelque iour ilz fussent ses Cardinaux, & ses successeurs quant & quant. Dieu vueille que nous n'ayons iamais tel Pape ny telz Cardinaulx, veu que nos Euangeliques ne le recognoistroient point pour Pape, aymans mieux faire venir ceste dignité en leur secte. Pourquoy nous enuient-ils tant nostre Pape & nos Cardinaux, veu que ces sectaires s'entre-battent à qui aura vn Antipape & des Anti-Cardinaux ? Or à tant lairray-ie ce propos du Colloque de Mulbrun, pouraultant que, comme ie vous ay dict, les Zuingliens en ont faict imprimer vn liure de leur costé, & les Lutheriens vn aultre : à fin qu'ils feissent palper à tout le monde, quel discord estoit entr'eux, & que l'esprit Saint ne les conduist ny les gouerne en leurs altercas, attendu que c'est l'esprit de toute vnion & concorde.

L'AN 1565. fut commis vn acte fort meschant & horrible au Liege. Il y auoit vn Abbé de l'ordre des Premonstrez, qui pour certaine cause auoit donné congé à vn sien seruiteur. Lequel fut fort fasché de cecy, & ce-pendant demouroit quelques iours chez l'Abbé luy seruant d'homme de chambre, comme par-auant. Aduint que peu de iours apres l'Abbé alla soupper en ville, tellement qu'il estoit bien tard quand il retourna au logis : ce que voyant le seruiteur, il fut si cruel qu'il couppa la gorge à son maistre dans sa chambre : & prenant tout le thresor de son maistre, il accoustre le cheual de l'Abbé, & s'en fuyt monté dessus, faisant accroire des bayes aux aultres seruiteurs ses compaignons. Ce meschant acte nous doit assez semondre, à tellement passer tous les iours de nostre vie, que nous soyons prestz quand Dieu nous appel-

*D'un Abbé
tué par
son serui-
teur au
Liege.*

lera. Car c'est pour telles occasions, occurrences & perilz, que nostre Seigneur nous admonnest si souuent en l'Euangile de nous tenir prestz, & de veiller. Certainement c'estoit chose fort horrible, de mourir si à l'improuiste, & ce par les mains d'un seruiteur, à qui l'Abbé s'estoit fié de sa vie : mais toutes-fois fil est mort bien disposé & ayant l'esprit tendu à Dieu, l'Abbé n'a reçu que bien en ceste mort : seulement le cruel & barbare seruiteur s'est damné à tous les diables, fil ne faict penitence d'un tel forfait par luy commis.

CESTE année fut mis en lumiere vn escript fort long & *Marbach Brencien en rhigui-* proluxe de Iehan Marbach sur-intendant de Straßbourg, contre les Caluinistes & Zuingliens, lesquelz ne tarderent gueres à y respondre, mais en passant seulement : de sorte que quelque medecin Zuinglien, laissant ses recipez pour peu de temps, print bien la peine d'y respondre. Il semble que ce Marbach soit de l'opinion de Brencie, touchant la touté-presence du corps de Iesus-Christ, de maniere que les Caluinistes ne font pas grand conte de luy. A la verité il y a plusieurs folies dans son liure, & attribué tant à Luther, qu'il le préfère à tous les Peres Anciens, & le hault-loué pour ce principalement, qu'il a vaillamment combattu contre la Papauté : & ce qui est le plus intolerable, il dist que luy & les siens reçoient la doctrine de Luther comme le saint Euangile. *La doctrine de Luther & le S. Euangile, tout va* Combien qu'il soit plus cler que n'est le iour, que Luther a escrit mille & mille contrarietez, & qu'il n'a esté digne qu'on estimast, qu'il ne pouuoit errer, veu les erreurs qu'il a excitez de tous les enfers. O le prodigieux aueuglement des hommes de nostre siecle, qui ne peuuent iamais appercevoir, qu'ilz ont esté vilainement deçeu par ces imposteurs. Je plains ma peine à refuter des galans qui ne valent pas qu'on parle d'eux, & partant ie n'en dis plus mot. Seulement mesmerueille-ie de ce qu'escriit Marbach, que tant luy que ses coadiuteurs suyuent à Straßbourg la sentence de Luther & des *Inconstance de la religion de ceux de Straßbourg* Eglises de Saxe touchant l'Eucharistie. Car combien que de tout temps Messieurs de Straßbourg ayent esté grandz Zuingliens, toutesfois cestuy-cy les veult monstrer estre legers &

Zzzz.ij.

L'AN M.D.LXV.

HISTOIRE DE TOUTES CHOSES

inconstans, comme ceux qui auroient reietté le Zuinglianisme pour suyure le Lutherisme : ce que ceux de Strasbourg n'endureroient pas volontiers qu'on dist d'eux . Veritablement c'est grand' pitié de considerer la confusion qui est en Alemaigne, pendant que l'un de Lutherien se faict Zuinglié, vn aultre de Zuinglien se faict Lutherien, à fin que pour ceste heure ie taise les autres sectes: & ne cesseront oncques d'estre ainsi confus en matiere de religiō, pour la varieté des sectes, iusqu' à tant qu'ilz retournent à l'vniō de l'Eglise Catholique, gouvernée du S. Esprit, autheur de toute concorde. Cela est par trop vray, que le principal but des heretiques est d'abolir l'autorité du Siege Romain, mais il est fondé si seurement, que quand bien ilz se feroient rompuz la teste & les iâbes à le faire choir, neantmoins ils n'emporteroient qu'une courte honte de tous leurs effortz. Le siege Romain a continué depuys quinze cens ans en ça alencontre de tous les Tyrans & heretiques, sans estre aucunement esbranlé, & demeurera ferme & stable iusqu' à la fin de ce monde. Je sçay bien q̃ quelques parties de l'Europe se sont sequestrées de son autorité, mais au lieu d'iceux plusieurs grandes & amples nations se sont souzmes à sa puissance, lesquelles habitent en regions fort loingtaines des nostres. Et à fin que ie ne parle par cueur, & que ie ferme la bouche à vn tas de nos predicans, qui ne font que calomnier la puissance de ce S. Siege Apostolic, ie veux icy mettre quelque chose du tres-puissant Roy de Portugal, lequel ceste année mesme escriuit lettres aux Iesuites de Rome, desquelles la teneur estoit telle : Peres de la societé de Iesus, qui estes maintenant à Rome pour la congregation generale, ie vous supplie que vüilliez prier Dieu pour moy, qu'il me face filz & vray defenseur de l'Eglise Romaine, comme i'ay espoir d'estre avec l'ayde de Dieu. O que ie desireroy fort embrasser les piedz de nostre Sainct Pere le Pape! Telles font les parolles de ce tres-inuaincu Roy de Portugal. Semblablement y eut ceste année vn homme graue & venerable natif de Coloigne, qui fut enuoyé de la region de Thebaïde par le Patriarque d'Alexandrie, pour prester toute obeïssance

Du S. Siege de Rome calomnié par les heretiques.

Le Legat du Patriarque d'Alexandrie à Rome.

au Pape de Rome au nom dudit Patriarque. Et voila comme Dieu se mocque de la calomnie & arrogance de ces ignorās superbes, qui pensent pouuoir faire plus que ne feirent iamais les tyrans & heretiques, en la ruine de ce S. siege. Parquoy quand bien ils se romperoyent la teste contre les murailles, l'authorité du Pape demeurera en son entier : & au contraire tous ces grands trompetteurs du nouveau Euāgile iront tousiours en decadence.

LE mesme Catholique Roy de Portugal requist au Saint Pere, qu'il luy pleust enuoyer deux Euesques en l'Isle de Iappon, fort distante de nos terres, où la religion Chrestienne croist de iour à aultre, & quant & quant l'obedience enuers l'Eglise Romaine. Au reste, on dict qu'il y a en ces lieux des hommes fort subtils & grands Philosophes, pour lesquelz conuertir on trouuera assez de Docteurs Catholiques, reluy-sans tant en doctrine qu'en pieté & vertu. Ce que ie raconte fort volontiers, pour faire hontoier nos ministres & heretiques, qui pensent auoir donné vne grande escorne à l'Eglise Romaine, pendant qu'ilz ont corrompu quelques regions de l'Europe par leurs monstreuses heresies. Car les nations barbares & idolatres se rengent à la foy. Ce grād Prestre-Ian, Empereur d'Aethiopie, est amy & cōfederé du Roy de Portugal, & de iour en iour ilz prennent toutes nos ceremonies. Pareillement plusieurs nations Indiennes embrassent la foy Chrestienne, & voit-on des citez entieres estre baptisées. Et pourau-
 tant qu'un esprit Catholique & Chrestien sent en foy vn merueilleux plaisir, quand il oyt telles choses, ie veux icy demeurer pour vous en dire vn peu d'auantage. Apres que les Roys de Portugaleurent trouué moyen de nauiger és Indes, & y faire seiour, leur principal soing fut de reduyre ces nations barbares à la foy de Iesus-Christ. Pour quoy accomplir, ilz ont principalement vsé du labeur & de la doctrine de ceux, que nous appellōs Iesuites, la plus part desquelz ont vescu si saintement en ces natiōs barbares, & ont auancé l'hōneur de Iesus-Christ avec telle ardeur, que si ie vouloy le tout raconter comme il appartient, le lecteur, peut-estre, ne le voudroit pas croire.

Zzzz. iij.

Mais la main de Dieu est-elle accourcie? ne peult-il pas faire autant de miracles qu'il fei*t* iamais? Le principal de ces Iesuites estoit François Xavier, qui fut des premiers sectateurs du tres-celebre Pere Ignace, autheur de ceste religi*o*n. Cestuy enflammé d'un desir de rendre ces peuples Chrestiens, couroit ça & là par les Indes, & taschoit fort de penetrer iusqu'és regi*o*ns de Sina, non sans peril euid*en*t de sa vie, pour-aultant qu'il est defendu par la loy de ces barbares, qu'un estranger soit reçu: & celuy qui se seroit efforcé d'en amener un, doit mourir selon la loy. Mais la charité parfaicte chasse la crainte dehors, & ia auoit nostre Xavier accordé avec un marchand, qu'il luy donneroit du poiure pour trois cens escutz, s'il le vouloit mener és regions de Sina. Mais le bon-homme mourut bi*en* tost apres, ayant trauaillé merueilleusement pour l'auancement du Christianisme. Tellement que nostre Dieu voulant monst*re*r combien cest homme defunct luy auoit esté agreable, il fei*t* q*u'* son corps demeura l'espace de quinze mois si entier, si fraiz, & incorrompu, qu'il sembloit ne faire que de mourir: & mesmes il estoit soef-flairant, combien qu'il eust esté quelque temps couuert de chaux, laquelle consume les os, & aussi couuert de terre, qui fai*ct* communément pourrir nos corps. C'est ainsi que Dieu voulut honorer celuy, qui auoit annoncé aux barbares celle foy, que les sectaires de ce temps appellent Papistique. Je laisse à part les fai*ct*s de ce Xavier, pour n'estre trop long: ie laisse aussi la grace de prophetie, & les miracles par luy fai*ct*s. Nous auons fai*ct* menti*o*n des regions de Sina, lesquelles sont fort amples, & y sont les hommes ingenieux, desireux de sçauoir, & bien instruits: tellement que celuy qui est le plus sçauant entr'eux, est le plus autorisé: & toutesfois ils ne laissent pas de s'enrouler au nombre des enfans de Dieu, leur idolatrie quictée. On sçait bien qu'és regions Malucques, la plus part se sont fai*ct*s Chrestiens. Dequoy Satan estant enuieux, il a tant fai*ct* par menaces & par allechemens, qu'ilz ont de rechef retourné à leur superstition. Mais la vengeance diuine les a incontinent persecutez. Car leurs terres, iadis fort fertiles, ont esté rendues

*De Xavier
et Iesuite.*

1. Ioan. 4

*Un corps
demeure
quinze
mois incor-
rompu, quoy
qu'il eust
esté cou-
uert de
chaux.*

*Les Sina-
iens.*

*Des Ma-
lucques.*

steriles, tellement que tant qu'ils ont demeuré en leur apostasie, jamais leurs terres n'ont fructifié, bien qu'ils ayent semé souuentefois: & mesmes le riz qu'on auoit gardé pour semer, s'est pourry, & les eaux douces ont esté cōuerties en eaux salées. Et iacoit que cela ait causé la mort de plusieurs, toutesfois ces mal-heureux Mahometains n'ont iamais cessé de desrober à Iesus-Christ ceux qu'ils ont peu. Finalement ces barbares se sont assemblez en armes, pour repousser les Portugallois. Si aduint, que soudainement ils furent surprins de craincte & frayeur tref-grande, de maniere que les armes leur cheurent des mains, & tomberent tous en terre: le soleil, qui estoit enuiron le midy, fut si obscurcy, qu'à peine se pouuoient ils entre-recognoistre: la terre trembla, pierres ardentes tomberent du ciel, lesquelles ruinerent & accrauatèrent les lieux où les diables estoient adorez: les arbres furent si estrange-ment arrachez, qu'ils auoient la racine en hault, & les brâches en bas. Ceste tempeste venant à s'amoindrir, quelques Portugais se ruèrent sur les barbares, desquels plusieurs demeurèrent sur le champ, sans que personne des nostres fust nauré. De maniere que ces hommes desloyaux retournerent à la fin au Christianisme, & nō seulement eux, mais encore plusieurs autres, de sorte qu'en vne semaine on en a veu 15. mille se faire Chrestiens: & mesmes les habitans des Isles prochaines venoient iusqu'en ces contrées, pour receuoir la religion Chrestienne. Dieu aussi les regarda des yeux de sa misericorde: car leurs champs reuindrent en leur premiere fertilité, & les eaux reprindrent leur douceur. Ces peuples des Maluques sont merueilleusement distans de noz regions. Le Gariophyllum y croist: les Chrestiens y ont plusieurs forts, pour autant que les Mores & les Indoyz leur nuyssent fort. En Indie y a vn Royaume nommé Bifuagà, où est la ville de Chiromandel, où tous les habitans disent que S. Thomas l'Apostre prescha la foy Chrestienne, & y fut inhumé, & y est encor' à present son corps tout entier. Il y a vn sepulchre taillé en vne roche, où on voit vn corps de bonne longueur, fort odoriferant, lequel les habitans du païs reuerent & honorent encor' aujourd'huy

*Vengeance
diuine sur
les apostats*

*L'affliction
les fait re-
tourner à
Dieu.*

*Du sepul-
chre de S.
Thomas
és Indes.*

comme le sepulchre de S. Thomas. En ce lieu y a des Chrétiens, & tous les iours s'y en fait de nouveaux. Au commencement que François Xavier, duquel nous auons parlé cy-dessus, prescha l'Euangile en ceste contrée, les petits enfans luy seruirent de beaucoup pour conuertir leurs peres idolâtres. Car ces enfans enflâmez d'un zeile merueilleux tançoient & blasmoient leurs peres, & ce venerable Pere les ayant enuoyez au lieu où leurs Peres sacrifioient à la payenne, ces enfans renuersoient les idoles, ou les faisoient bruster: de maniere que delà en auant leurs Peres n'osoient plus celebrer tels sacrifices, sinon qu'en cachettes. Xavier souloit enuoyer ces enfans visiter les malades qui de ce faire le requeroient, pour-ce qu'il ne pouuoit pas les visiter tous: lesquels enfans conuoquâs leurs voisins & domestiques, recitoient plusieurs fois le symbole avec des prieres, leur asseurant qu'ils recouureroyent leur santé, filz croyoient en Iesus-Christ: si bien que plusieurs guerirent & des maladies corporelles & des spirituelles, croyans fermement en nostre Seigneur. Plusieurs telles choses assez miraculeuses ont esté faictes par les Catholiques en ces regions, pendant qu'en l'Europe les heretiques ont tout bouleuersé, lesquels quoy qu'ils se iactent d'auoir grande foy, ne scauroient toutesfois faire le moindre miracle du monde. Ils sont tousiours grand' chere, ils ont tousiours la eõmere avec eux, ils n'ont que faire de ieusner, ny de veiller, ny de prier Dieu: qu'est-il donc de merueille, s'ils ne font aucun miracle? Car ceux qui conuertissent les payens à la foy Chrestienne es regions Leuantines, & font plusieurs miracles, ne vivent pas si gayement comme noz fidèles. Que si on veult que i'en touche vn mot en passant, il est trop certain, que François Xavier (duquel nous ne scaurions parler trop souuent) a consumé bien souuent les nuits entieres en priant Dieu, & en meditant ce qu'il deuoit faire. Il ne faisoit que ieusner, il enduroit toutes sortes de traualx fort alaigrement, sentant vne douceur & delectation spirituelle, delectation nõ cogneüe à noz fidèles, qui n'en gousterent iamais. Souuent il se mettoit au peril de sa vie entre les mains des barbares, bref il n'auoit

*Le zeile
des petits
enfans In
diens cõtine
leurs peres.*

*La vie de
François
Xavier le
sainte, fort
admirable*

uoit soing que de gaigner des ames payennes à son Dieu . Il n'est donc point merueilles , si apres vne telle vie miracles sont ensuyuis , & apres telles consolations interieures : desquelles il se recreoit si fort au milieu des dangers , que maintesfois il s'escrioit, ô Seigneur , ie ne sens que trop grande volupté d'esprit . Bien souuent comme il dormoit , & sembloit songer, on luy oyoit dire, ô bon Dieu, ô Seigneur, ô mon createur, & plusieurs semblables choses . Il aimoit beaucoup plus ardemment les labeurs & difficultez, que les auares n'aiment l'or ou l'argent , vray indice d'une sainteté admirable : Il ne souhaittoit point de mourir lors qu'il se voyoit enuironné d'agoysses & dangers , tant bien il auoit appris de se glorifier en tribulation, comme l'Apostre faisoit . Aussi l'a Dieu guerdonné du loyer, qu'il donne à ceux qui ont fait fructifier leur talent le mieux qu'il a esté possible. En fin il deceda à Cantan és regions de Sina, ne souhaittant autre chose à sa mort , que de voir son Sauueur. C'a esté, comme i'ay dit, le premier des Peres qui ont presché l'Euâgîe aux Indois de nostre siecle, mais depuis plusieurs Iesuites l'ont suiuy, si bien qu'encor' auourd'huy ils font merueilleux fruct és Indes & Isles voylines, l'un desquelz a escrit en quelques siennes lettres ce qui s'ensuyt:

Quand ie vien à considerer le plaisir & volupté, qu'autresfois ie prenois à faire ie ne sçay quoy, dont ne sortoit vtilité quelconque, ie conclus que maintenant il ne fault differer aucun traual, pour l'honneur de Iesus-Christ . Et quand ie reduys a ma memoire mes offenses passées , ie ne me puy rassasier au seruice de Dieu & à l'amplification de la foy Chrestienne, veu que ie ne sçauroy tant faire que ie suys tenu de faire, pour-ce qu'aussi bien suis-ie seruiteur inutile . Voyla que dict cestuy-cy qui auoit demeuré trois ans à Ormus, qui est vne belle ville sur le goulphe de Perse , si chaulde par la vehemence du Soleil , que les hommes sont contrainctz de viure en l'eau : & qui ne dormoit le plus souuent que trois heures , qui demeura l'espace de deux moys ne dormant qu'une heure, estant seulement addonné aux exercices de pieté & charité , de maniere que par trop traualier il mourut

Aaaaa.j.

Rom. 5.

D'un autre Iesuite
és Indes.

Luc. 17.

Ormuz.

L'AN M.D.LXV. HISTOIRE DE TOUTES CHOSES

en peu de temps, au grand regret de tout le monde.

Du promontoire de Comorin. IL y a ia long tēps qu'il y auoit bien trois cens mille Chrestiens, selon qu'on dict, au promontoire de Commorin, & ne

D'un Iesuite qui fut martyrisé. fault douter que depuys plusieurs n'ayent augmenté le nombre. En celle prouince y auoit vn bon pere Iesuite, nommé Criminal, lequel visitoit tous les mois toute la prouince, studieux de leur salut. Aduint que les barbares le voulurent tuer, & pou

uoit escheuir ce danger s'il eust voulu singler sur mer, mais de peur que les enfans & aultres Chrestiens, qui estoient sur la coste de la mer, ne seruissent à la rage & contumelie des Mores, il voulut emporter aux nauires tous ceux qu'il peut. Mais finalement les barbares le naurent, si qu'il luy fut force de se retirer à l'Eglise où plusieurs Chrestiens festoient sauuez, & là fut martyrisé pres l'autel. Aussi auoit esté sa vie si bonne & religieuse, qu'elle meritoit bié d'estre close par martyre. Il auoit coustume de prier Dieu trente-fois par chacun iour. Aucuns de ses compaignons furent emprisonnez, les autres venduz aux barbares, & aultres bien fouëttez. A cestuy-cy succeda

Aultres Iesuites.

Henry henriquez, qui feit fort bien son deuoir à gaigner les ames à la foy de Iesus-Christ en ces pais-là: & auoit pour adioint Paul Vallée, homme de grâde saincteté & perfection, lequel demeura vn mois en prison, & ne mangeoit que du ris, & beuoit de l'eau. Je ne veux m'arrester à reciter tous ceux, qui ont bien acquitté leur conscience pour conuertir les barbares, la foy desquelz est ardante, au lieu que deça elle s'attie-

Constance de trente enfans.

dist de plus en plus. La fermeté & constance des Chrestiens nouueaux est veüe par l'exemple suyuant. Aduint que les Turcs prindrent quelque fois vn nauire, & en iceluy trente enfans des Indois oultre les Portugais. Ces enfans estoient si fermes en leur religion, que quelque supplice que les Turcs leur donnerent pour leur faire quicter la foy Chrestienne, ils

L'isle de Giapan, & des Chrestiens qui s'y font.

ne le voulurent oncques faire. D'auantage il fault sçauoir, qu'il y a vne isle tirant vers le Septentrion, appelée Giapan ou Iapan, assez pres des regions de Sina, laquelle les marchandz Portugalois ont n'aguères trouuée, & est longue de plus de six cens lieuës. En icelle sont quelques Roys & Princes, des-

quelz le Roy Bongan est le plus puissant, & pieça cestuy-cy a
 déclaré au Vice-Roy des Indes pour le Roy de Portugal, qu'il
 souhaitteroit fort de se faire Chrestien. On a fort trauaillé à
 conuertir ces peuples, & Dieu leur a tant faict de faueur, que
 depuys quelques années plus de quarante mille ont embrassé
 alaigrement la foy Chrestienne, & ne fault point douter que
 le nombre ne soit creu grandement, à cause que le nombre
 des ouuriers de telz fructz est creu pareillement, & leur la-
 beur aussi. * Les habitans de ceste isle sont fort obeissans, de-
 bonnaires, & d'un naturel courtois, de maniere que sans fa-
 ueur & sans crainte de personne, espoingonnez seulement
 d'un desir honnestes, ils se viennent rendre à la foy Chrestien-
 ne, graces à Dieu: & pouraultant qu'ils sont douez d'un esprit
 assez subtil, ils comprennent tout ce qu'on leur dit, & respon-
 dent à ce qu'on leur demande: & quand ils doutent en quel-
 que chose, ils requierent modestement qu'on leur enseigne
 quelques raisons. Baptisez qu'ilz sont, ilz ne cessent de dispu-
 ter avec leurs amys & familiers, leur monstrans leur erreur,
 & la verité de nostre foy, & sont au demeurant si constans,
 qu'ilz perdront plus tost la vie que la foy. Plusieurs Princes &
 Potentatz de ces peuples se font Chrestiens, & ce de tant plus
 facilement qu'ilz ont l'esprit meilleur, voyans que nostre loy
 est fort conforme à raison. Et voyla comme Dieu a tousiours
 hommes qui suyuent sa sainte foy par le monde, pendant
 que quelques ingratz, ignorans, & amateurs d'heresies la re-
 iettent bien loing d'eux. Et, comme j'ay déia dit ailleurs, les
 peuples Sinaïens se conuertissent aussi à la foy Chrestienne,
 le païs desquelz est si ample, qu'il peult estre bonnement
 comparé avec toute la terre des Chrestiens: & toutesfois ius-
 qu'à ce temps iamaïs Iesus-Christ n'auoit esté presché en ces
 nations de Sina & de Iapan. Que diront donc ceux, qui font
 banqueroute à la religion de leurs ancestres, hommes vene-
 rables & vertueux, pour se faire esclaués des plus absurdes
 heresies du monde? Plaise à Dieu qu'à la par-fin les deuoyez
 se recognoissent. L'Isle de Seilan est située en ces pays loing-
 tains, contenant en toute sa rondeur enuiron trois cens lieuës,

* Il fault
 lire pour
 les faictz
 des Iesui-
 tes en La-
 pan & ex
 Indes, &
 pour tout
 ce qui s'y
 est faict,
 deux to-
 mes d'epi-
 tres impré-
 mées nou-
 uellement
 en Latin
 à Coloigne

Les Sina-
 yens.

L'Isle de
 Seilan.

fort abondante en vraye canelle & aultres choses fort pretieuses, & au reste elle a l'air si sain, doux & plaisant, que les habitans croient que le paradis ne fut iamais ailleurs. En ceste Isle le Roy de Portugal a plusieurs forteresses bien munies, & n'y a faulte de gens de bien pour annoncer le saint Euan-gile, de maniere que pieça le Roy de ceste Isle s'est fait baptizer. Au Royaume des Malagiës y a vne ville dicte Malaccà fort populeuse, laquelle avec tout le Royaume obeist à l'Em-pereur de Xantan, qui semblablement seigneurie trois aul-tres Royaumes. En celle ville de Malaccà les Portugallois ont
ville de Malacca. vn fort, & les Iesuites vn College, comme ilz ont en plusieurs aultres lieux d'Indie, au grand prouffit des peuples y habitans. On voit par ces discours, combien d'hommes & de peuples n'agueres confictz en Idolatrie, ou bien enuoloppez d'erreurs tref-absurdes, viennent fleschir le col au Roy des Roys, nostre Seigneur Iesus-christ: ce que i'ay monsté brefuement à fin de n'oultre-passer point les limites de mon histoire. Que si quelcun veult auoir encore plus ample signe de la faueur de nostre Dieu, c'est que ceux qui se sont faitz de nouveau Chrestiens, n'ont point de repos, qu'ilz n'ayent faitz les aul-tres pareillement Chrestiens. Ceux qui de nostre temps se
Admoni-tion à nos heretiques sont opiniaistrement bendez contre le Pape & toute l'Eglise Romaine, deuroient soigneusement considerer ces choses, & recevoir l'autorité du Saint siege Apostolic, comme ilz voient que les barbares mesmes l'embrassent volontiers. Ilz deuroient mourir de despit, dequoy ilz sont en erreur, & tas-chent d'y enuolopper les aultres. Qu'ils se recognoissent viste-ment, pour-ce que le Seigneur est misericordieux, & ne veut point la mort du pecheur, ains qu'il se cōuertisse, & qu'il viue.
Exech. 18 Et quand ils se seront opiniaistrez encore plus fort, ilz n'endō-mageront nullement le Pape, mais feront grād plaisir aux dia-bles, qui leur mōstrerōt, & à ceux qui se sont laissez deçeuoir, de quelle monnoye Dieu paye les heretiques. Iesus-Christ en
Luc. 22. son Euāgile parle à S. Pierre en ceste sorte: I'ay prié pour toy, à fin que ta foy ne defaille iamais. Laquelle promesse appar-tient au S. siege de Rome estably par S. Pierre, auquel siege

encor' à present la syncere & vraye foy perseuere. Que si l'heretique est si rebarbatif qu'il ne le vueille croire, Iesus. Christ a assez d'aultres peuples, nouuellement cōuertis, qui le croiēt fermement. Dieu vueille reduyre au bon chemin ceux, qui se sont formalisez contre l'obeissance de ce Siege, pource que celuy ne peut estre brebis de Iesus-Christ, qui refuse d'obeir à celuy, à qui il a donné la charge de son troupeau. Mais c'est trop parlé de cela.

S V R la fin de l'an 1564. & au commencement de l'an suy-
uant, l'hyuer fut si grand, qu'en plusieurs lieux les vignes ge-
lerent iusqu'au pied, & mesmes les plus grands arbres vindrēt
secs & arides. Apres cela suyuit vne merueilleuse inondation
d'eaux, laquelle feit gros dommages aux champs & edifices
en plusieurs lieux, & signamment és regions que le Rhin & le
Danube auoy sinent. Pareillement toutes ces années la peste
feit grande boucherie d'hommes: & à fin que Dieu mōstrast
son courroux estre embrasé sur nous, oultre tout cela la fami-
ne fut si grande en plusieurs lieux de l'Europe, qu'on dict plu-
sieurs s'estre messaiēt de male rage de faim, & auoir tué quel-
ques hommes. Aduint encore, que pres de Nice tirant vers
Gennes, cinq villages furent si soudainement engloutys ez
entrailles de la terre, qu'on ne cognoissoit point où ilz estoiet
par- auant. Et pleust à Dieu que ces fleaux nous frappassent à
la conscience, comme ils deuroient: car veritablemēt ce sont
fleaux, par lesquelz Dieu nous semond à nous conuertir de
nos iniquitez, & nous enuoye ces supplices temporelz, à fin
que nous demeurans obstinez en nos pechez, ne soyons eter-
nellement punis. Nous voulons auiourdhuy embrasser des
heresies nouuelles, nous nous faschons de suyure la religion
de noz predecesseurs, nous cherissons tous moines renyez,
nous aimons ceux qui reuoquent tous les erreurs pieça con-
damnez, ne tenans conte de l'Euangile Chrestien: & sommes
si endurcys que nous n'apperceuons point, que Dieu a son
arc tendu sur nous, que tous les iours les mal- heurs nous ta-
lonnent, que toute foy, charité & bien- uueillāce (fruiēt con-
secutifz de l'heresie) sont esteintes ez cueurs des hommes.

Aaaaa. iij.

» N'est-ce pas grand cas, lecteur, que depuis quelque mois en
 » ça on a disputé, si Iesus-Christ estoit Dieu? Le chemin pour
 » paruenir à impietez si horribles, a esté defrisché par ceux qui
 ont quicté l'Eglise Catholique, par eux appellée Papistique.
 Que reste-il plus sinon de quicté Dieu tout à vn coup, & e-
 stre bons Mahometains? Est-il possible que ceux ayent aucu-
 ne bonne opinion de la religion Chrestienne, qui nyent Ie-
 sus-Christ estre Dieu? Ne nous esmerueillons donc plus, si ces
 architectes d'erreur blasphement les saintz Sacremens de
 l'Eglise, veu qu'ils en veulent à l'instituteur d'iceux.

*Beau dis-
cours de la
guerre de
Malte.*

CESTE année le grand Turc Soliman employa toutes
 ses forces pour reduyre en sa puissance l'Isle de Malte, laquel-
 le est distante de Sicile de septante mil, & son tour peult estre
 de soixante mil, sa longueur de 22. sa largeur de douze. En
 toute l'Isle y a quelques 45. que fortresses que bourgades. Le
 Turc estoit d'autant plus desireux de conquerir ceste isle,
 qu'icelle estant prise, le chemin d'aller en Sicile & Italie luy e-
 stoit beaucoup facilité. Parquoy il met sus vne grosse armée,
 garnie de gens & de munitions, pensant bien prendre sans dif-
 ficulté aucune toute l'Isle: mais le Sage dit tres-bien, il n'y a
Psu. 21. conseil, qui vaille contre le Seigneur. Cest ennemy iuré des
 Chrestiens veult mal mortel aux Cheualiers iadis de Rhodes,
 & à present de Malte, sçachant bien qu'ilz se sont consacrez
 pour defendre l'estat Chrestien contre tous ceux qui l'enua-
 hyssent, comme il faict. Il les chassa n'agueres de l'Isle de Rho-
 des, pour-ce qu'ilz ne furent pas secōdez des Chrestiens: mais
 Dieu n'a voulu permettre, que son entreprinse luy succe-
 dast si à propos à Malte. Comme donc il faisoit apprestier son
 armée de mer à Constantinople, le Seigneur de la Vallette,
 grand-maistre de Malte, est aduertý de ceste entreprinse
 par les espies qu'il auoit à Constantinople. Parquoy assem-
 blant ses gens, il delibere de bien se defendre, il fortifie
 les lieux qui auoient besoing de fortification, il faict ap-
 prest de tout ce qui estoit necessaire. L'armée Turquesque
*L'armée
du Turc.* estoit de cent soixantehuit galeres grandes, oultre les na-
 uires de charge, les fustes, galeotes, & plusieurs aultres vais-

seaux, tellement que tous iceux assemblez faisoient le nombre de 240. voiles. Ceste flotte vint premieremēt aborder au port de Marsafiroc, mais ne le trouuant pas commode, elle se transporta en vn autre, qu'ils appellent le grand port. Les Cheualiers de Malte auoient assez bonnes forces en l'Isle, aussi courageuses qu'il est possible de voir. En l'armée Turquesque estoient deux sur-intendans, l'un sur les troupes de terre, nommé Mustapha, l'autre sur la flotte, dict Pialis: lesquels ne s'accorderent pas tousiours en ceste expedition. Car Mustapha vouloit qu'on descendist l'artillerie des nauires deuant que Dragut fust venu, mais Pialis voulut que cela fust differé iusqu'à la venue de Dragut. Car ce Dragut estoit homme fort rusé, & experimenté à la guerre, de sorte que Soliman auoit commandé, qu'on le creust en tout & par tout en ceste guerre. Il amenoit treize galeres avec six cens hommes de pied. Mais déia les Turcs estoient descenduz en l'Isle iusqu'à vingt mille lors que l'armée auoit abordé au port de Marsafiroc, lesquels faisoient des tranchées & tentoires à force, quand le 23. de May le Bassa Pialis alla voir & recognoistre la ville S. Michel, accompagné de 7. mille pietons: mais pour-ce qu'on ne cessoit de le canonner, il n'en sceut iamais approcher. Or fut faite vne furieuse escarmouche, en laquelle on osta vne enseigne aux Turcs. Puy ayans consulté s'ils deuoient assieger le fort S. Elme ou le bourg, & s'estans resolz de battre premieremēt le fort: à cause qu'ils vouloient recognoistre la place d'un lieu fort eminent, de rechef fut faite vne escarmouche, en laquelle plusieurs Turcs, & bien peu de Chrestiens demurerent sur le champ. Ia auoient-ils dressé vne platte-forme pour battre le fort S. Elme, ce que faisoient pareillement quelques galeres: mais les canons du fort tiroient si dru cōtre les ennemis, que ceste platte-forme ne tint gueres long tēps. Ce-pendant les forces des ennemis croissoient tous les iours, de maniere que d'Alexandrie mesme arriuerent six galeres, avec neuf cens hommes. Le Sieur de la Valette sur cela enuoya dedans le fort S. Elme 400. soldats Espagnols, qui se monstrerent merueilleusement preux à soustenir l'effort de

*Les chefs
de l'armée*

*Escarmou-
che.*

*Les Turcs
battent le
fort S. El-
me.*

l'ennemy. Si auoit despesché ledict de la Valette certain homme vers le Vice-Roy de Sicile, pour l'aduertir du siege de Malte, lequel homme ayant fait sa charge, retourna (quoy qu'avec grand peril de sa vie) en l'Isle de Malte: mais la Valette le renuoya au Vice-roy la mesme nuit, pour le certiorer que l'Isle auoit besoing de plus grandes forces. Le iour & feste de S. Elme estant venu, les Turcs accoururent pour s'emparer d'un rempar de terre, & ne les sceut-on si bien repousser, que par leur infinie presque multitude ils ne prinsent un certain bouleuert, où ils se munirent contre les nostres. Mais comme ilz vouloient remplir les tranchées, qu'on auoit fait tout à l'opposite du grand bouleuert, huit cens y demurerent pour les gages, ie dis des plus à dextres, & plusieurs y furent naurez, qui depuis moururent. Aussi les Chrestiens y perdirent 45. hommes, outre les blecez, tellement que pour tousiours s'enforcer la place, le Sieur de la Valette y feit entrer deux cens soldatz, avec quelques gens à cheual. Or celuy que nous auons dict auoir esté en Sicile, estant pres de Sarragosse, trouua là deux galeres de Malte, ausquelles il enseigna le chemin par lequel elles deuoient entrer en l'Isle, avec 400. hommes de pied. Ce fait, il va trouuer le Vice-roy, lequel il supplia de secourir les affligez. Mais iceluy n'auoit pas encore armée bastante cōtre les Turcs: de sorte que les Maltoys attendans qu'il se fust bien appresté, se defendirent vertueusement à l'encontre de la furie Turquesque, & y fut la prouesse du Sieur de la Valette fort remarquable, se mettant où il estoit besoing de faire teste. Or ne suyuirent les galeres, desquelles nous venons de parler, le chemin qu'on leur auoit enseigné, ce qui aduint bien mal à propos aux Maltoys, qui n'en pouuoient plus à S. Elme.

*On amasse
gens pour
secourir les
Maltoys.*

ESTANT donc l'Isle de Malte en si grand danger, le Pape Pie 4. la secourut de son possible, faisant quelque amas de gens, & les soldoyant pour ceste guerre, donnant aussi grande prouision de poudre. Et à la verité les Princes Chrestiens auoient assez à quoy s'employer pour lors, & pouuoient bien penser que le Turc ne se contenteroit pas de Malte, s'il la pouuoit prendre. Parquoy six cens hommes, souz la conduite du

Seigneur

Seigneur Pompée Colomne, vindrent à Naples, & plusieurs hommes illustres y allerent de leur bon gré, desirieux de secourir la Repub. Chrestienne de tout leur pouuoir. Lors y auoit à Naples quelque nombre de galeres, lesquelles vindrēt à Messine avec la troupe sus-dicte, par-ce que l'armée du Roy Philippe s'assembloit à Messine. Les Turcs n'estoient point ignorans que les forces Chrestiennes s'assembloient, & partant delibererent de forcer S. Elme, quelque danger & peine qu'il y eust: car ce fort estant prins, ilz auoient bon moyen de forcer les aultres places de l'Isle, ce que ne pouuans faire pour cest esté, encore hyuerneroyent-ils en ce fort, & au port de Marsamuset. Parquoy ilz assiegent le fort de toute leur puissance, & furent trois iours qu'ilz ne cesserent de le battre, & au quatriesme relaschans ceste batterie, fut donnée vne escarmouche, en laquelle les nostres monstrent aux Turcs fraiz venus avec Dragut qui ilz estoient, tellement qu'ilz les meirent en route, n'estās mortz des nostres que sept ou huit. Dequoy estans les Turcs plus agaçez, la prochaine nuit ilz s'esuertuerent de prendre le fort, & lors les nostres furent prestz à l'heure, si bien qu'ils combattirent trois bonnes heures avec l'ennemy, & furent si vaillans, que les Turcs ne perdirent que leur peine, & plusieurs finirent leurs iours à l'assault. Cela fut cause, qu'ils recommencerent leur batterie, laquelle dura six iours continuellement, lesquelz finis, ils enuahyrēt le fort impetueusement, esperans bien le forcer, pour-ce qu'ilz auoient bien ietté treize mille coups de canon contre iceluy: de maniere que les nostres eurent fort affaire, à cause de l'incroyable multitude des Turcs. Il y auoit entre les Cheualiers vn vaillant homme, nommé Baragan, lequel feit teste aux ennemis, & sestans ioinctz à luy quelques aultres, ils en tuerent plusieurs. Toutesfois il estoit impossible de soustenir plus longuement, quand la Valette rafraischit ses gens de trois cens hommes, qui meirent le feu à vn pont que les Turcs auoient fait, de sorte qu'à la cheute d'iceluy 800. Turcs perdirent la vie, & y en eut 600. de naurez. En ce combat moururent deux mille, ou quatre mille selon les aultres, des plus vaillans ennemys:

Bbbbb.j.

Assaillie
des Turcs.Treze mil
le coups de
canon con-
tre le fort
S. Elme.

*Opinia-
steté des
Turcs à S.
Elme.* des nostres moururent cent, & aultât y en eut de blecez. Mais les Turcs ne se soucians pas de telle perte, battîrent la place plus furieusement, & ayans faict bresche donnerent l'assault si terrible, que peu s'en salut que les nostres n'abandonnassent la place. Toutesfois en fin ilz reprindrent courage, si qu'ilz combattirent cinq heures, & moururent 200. des nostres, & plu-

*La mort
de Dragut* eurs des ennemys. Dragut fut nauré à la teste en ce combat, de maniere que deux iours apres il trespassa. Les ennemys voulurent escheller la muraille la nuyt suyuate, mais ils trouuerent encore chausseure à leur pied. Dequoy estans irrités les Baschatz, ilz amenerent toutes leurs forces, & feirent estat de mourir tous, ou de prendre la forteresse: mais auant commencer, ilz preparerent force pontz, eschelles, & aultres choses commodés. Ce voyant le Sieur de la Valette, craignât que les assiegez n'eussent à la fin du pire, il consulta l'affaire avec ses gens, & enuoia trois signalez Cheualiers pour voir le fort, & considerer sil pouuoit encore tenir contre les Turcs, veu qu'il estoit presque tout desmantelé. Ilz y allerent avec grand danger de leurs personnes, & ayans bien contemplé la place, ayans aussi reçu respōce fort courageuse de ceux qui estoient dedans, retournerent au Maistre, dont deux maintenoient que la place estoit encore tenable, le troysiesme disoit que non, veu qu'il n'y auoit plus moyen de se defendre. Tellement qu'on resolut, qu'on deuoit encore tenir la forteresse, mais le

*Comment
le fort S.
Elme fut
pris des
Turcs.* conseil n'estoit pas bon, comme le faict le monstra. Car les Turcs ayans bien appresté tout ce qui leur faisoit besoing, battirent horriblement le fort avec trente-deux pieces de canō. Et sur la minuiet commença le combat qui dura iusqu'à trois heures du iour suyuant, & furent les nostres si courageux, qu'estans en si petit nombre, ilz se defendirent tousiours au grand dommage des Turcs. Mais quoy? l'artillerie auoit abbatu toutes les forteresses rez de terre, de sorte que bien quarante de ces vaillans hommes y perdirent la vie. Neantmoins les aultres estoient si courageux, qu'ilz deschiroient les enseignes que les ennemys auoient déjà plantées, & tuerent plusieurs Capitaines & port'enseignes des Turcs. Finalement, la

chaleur du iour estant venuë, les nostres estans recreuz de combattre, (car les forces du Turc se rafreschissoient tousiours, ce qui espuyfa toute la force de nos Cheualiers) furent tuez par les Turcs tant qu'ilz estoient, mais non sans vendre bien cher leur mort. En ce combat moururent treize cens des nostres, dont les 130. estoient Cheualiers. Il n'y a Chrestien qui doute, qu'une si vaillante & Chrestienne mort ne merite d'estre louïangée à tousioursmais. Les Turcs ayans prins la place, massacrerent felonnemēt trente pauvres Chrestiens, qu'ilz <sup>Merneill-
leuse crua-
auté.</sup> trouuerent à demy mortz. Premièrement ilz leur trancherent le ventre, puis arracherent le cueur, & apres leur couperent la teste, & encore meirent-ilz les corps en lieu, duquel ilz pouuoïent estre veuz des nostres. Mustapha n'estât pas assouuy pour tout cela, il les habille d'un cafaquin semé d'une croix blanche, & les icte en la mer, pour faire despit aux Maltoys. Dequoy estât trop choleré le Sieur de la Valette, il feit mourir tous les Turcs captifz, & commanda que ceux qui en prendroient les feissent mourir sur le champ, & puis ietta leurs testes vers le lieu où estoit l'ennemy campé.

APRES cela Mustapha enuoya demander au Sieur de la Valette, s'il vouloit point se rendre avec quelques conditions: mais iamais ledict Sieur ne voulut ouïr ceux qui luy venoient parler de ceste composition, dont le Bascha se sentit fort oultragé, & menaçoit de faire un million de maux aux Chrestiens. Au camp des Turcs estoit un Lascaris, issu de noble maison en la Grece, lequel estoit assez affectionné aux Chrestiens. De maniere qu'ayant ouy le maltalent que le Bascha auoit conçu contre les Chrestiens de Malte, il se rendit au grand-maistre, auquel il feit entendre tous les desseings de l'ennemy, & si se monstra par-apres fort vaillant à repousser les Turcs: de laquelle prouesse il fut recompensé par le Pape à Rome, apres que les Turcs se furent retirez. Estans les Maltoys en telles angoysses, vindrent en l'Isle quatre vingtz Cheualiers, & six cens hommes de pied de Sicile, quoy qu'assez tard à cause de la tormente de la mer. La venue de ces gens regaillardit fort les Maltoys, & requierent ces fraiz venus

*Vn Turc
se retire
vers les
Maltoys.*

*Secours
pour les
Maltoys.*

au Sieur de la Valette, qu'ilz fussent mis à la defence de la ville Saint Michel, laquelle les Turcs deuoient assaillir deuant les autres. Ce que ledict Sieur leur octroia, mais non-obstant il y laissa tous ceux, qui y estoient par-auant en garnison. Incontinent apres ces compaignons meirent à mort cent soixante Turcs, & en blegerent plusieurs. Aussi estoient les Turcs frappez communémēt de dysenterie en leur camp, Dieu bataillant pour les Chrestiens. Toutesfois ne relaschans en rien leurs premieres ardeurs, ilz braquerent soixante-dix Canons, desquelz il y auoit trois grands Basilics, contre la ville Saint Michel & le Bourg: & pour mieux battre les-dictes places, ilz esleuerent neuf platte-formes, sur lesquelles estoit l'artillerie, qui ne cessoit de tirer ny iour ny nuict. Or venoient déia de Sicile six cens Espaignolz, quelques Cheualiers de Malte, & trois cens hommes enuoyez par le Pape souz la charge de Pompée Colomne: lesquelles troupes estans assez pres de Malte, le grand-maistre leur feit signe de retourner, tant pour-ce que ledict Sieur n'en auoit pas beaucoup d'affaire, que pouraultant que les Turcs tenoient tous les portz de l'Isle, de maniere qu'à peine eussent-ils peu aborder. Le treziesme iour de Iuillet arriva le Roy d'Alger au cap des Turcs avec vingtsept galeres, & deux mille deux cens hommes de pied. Cestuy voulant faire quelque chef d'œuvre, requist au Bascha, qu'il luy fust permis de battre la ville de dessus la mer, ce qu'il impetra, & luy furent donnez encore deux mille Turcs fraichement venus. Ce-pendant la Valette feit tendre bien à propos vne chesne au lieu, par lequel les Turcs deuoient assaillir la ville, ce qui les empescha beaucoup à faire marcher leur gendarmerie. Non-obstant cela, ilz battent la ville par mer & par terre des le quinzième de Iuillet, mais ceux de la ville sçeurent si bien se seruir de leurs canons, qu'ils enfoncerent douze galeres Turquesques, & feirent noyer bien deux mille Turcs. Ceux qui assailloient la ville du costé de la terre, ayans combattu cinq bonnes heures avec les nostres, ilz perdirent beaucoup de gens, sans que les nostres y receussent gros dommage. Vray est que Malte

*Les Turcs
battent la
ville S.
Michel.*

*Secours
renuoyé
par les
Maltois.*

*Le Roy
d'Alger
au camp
des Turcs.*

estoit en grād danger , pour n'auoir iamais de relasche de ces felōs ennemys: qui fut cause que la Valette escriuit de rechef au Vice-roy de Sicile, le priāt de le secourir. Lequel y enuoya pour l'heure quelque secours, & y en eust enuoyē d'auantage, si ce n'est que les Turcs auoiēt embusches en tous endroiētz, si bien qu'ilz prindrent vne barque que le Vice-roy enuoyoit, en laquelle estoient force drogues & vnguens pour appliquer aux bleēz . Or les ennemys sur cela recommencent la batterie, laquelle fut si furieuse & estrange, que nos gens eurent beaucoup de peine à refaire les bresches faictes par l'impetuositē du canon . Pareillement les Turcs feirent vn pont, lequel les nostres voulurent brusler , mais leur entreprinse reüssit mal, de maniere que Nicolas Parisot, neueu du grand-maistre, y mourut entre aultres. Apres auoir encore longuement battu les murailles, ilz donnerent l'assault par trois fois, & commençoient les Turcs à forcer les murs en plusieurs endroiētz, mais les nostres furent si inuaincuz, que les Turcs furent en fin de ieu contrainētz de quitter l'assault , à leur gros dommage. Ce combat si vaillamment soustenu, remeit le courage aux nostres , & delà en-auant mesprisoient les Turcs, comme canaille . Lesquelz s'aduiserent de faire mines , mais nos gens y meirent si bon ordre, qu'ilz n'y gagnerent rien: & mesmes le premier iour d'Aoust les nostres bruslerēt le pont dressē par l'ennemy sur les fossez de la ville : Peu de iours apres les barbares donnerent encor' vn assault, mais ils y perdirent trois cens hommes , & leur peine . Or estoit alors la ville assiegēe si estroictement , qu'à peine les nostres pouuoient mettre le nez hors la muraille, que les Turcs ne les endomma geassent , avec leurs harquebuzes & canons , par lesquelz ilz donnoient beaucoup de facheerie aux assiegez. Et voyans les Turcs , que les murailles & de Sainēt Michel & du Bourg estoient si rasēes , que les charrettes y pouuoient presque entrer, ilz enuahyrent ces deux places furieusement , & avec tel bruiēt & horreur du canon, des harquebuzes, du cliquetis des harnois, & avec tel hurlement, qu'on eust dict que toute l'Isle fondonoit en aby sme . On se met aux murailles, mais tous les

*Assault
des Turcs*

gens de cheual sortans de la ville, feirent fuyr les ennemys qui gardoient l'eau, pour lesquelz secourir ceux qui assailloient la ville retournerent, mais ilz furent desconfitz és deux endroitz: de maniere qu'à ceste iournée les Turcs perdirent bien quinze cens hommes, & les nostres environ cent, & autant de naurez. Cest assault auoit duré cinq heures, & pour ce que Dieu auoit ouuré euidentement à ceste victoire, le Sieur de la Valette avec ses gens alla solemnellement à l'Eglise, pour rendre graces à nostre Seigneur. Le Bascha voulant rompre les nostres tout à fait, feir le mesme iour sonner l'assault: mais encore fut-il repoussé aussi bien que par-auant, non sans grande perte des siens. Et combien qu'il cogneust, que mes-huy la victoire n'estoit pas pour luy, si est-ce qu'il ne cessoit de liurer assaultz sans intermission, à fin que Soliman son Maistre ne l'accusast de paresse ou lascheté. Les Turcs donc commengoient à estre fort foibles, tant pour le nombre des occis, que pour ceux qui estoient naurez: dequoy estant as-
 sçauanté le Vice-roy par quelcun qui venoit de Malte, il delibera d'aller à Saragosse avec septante galeres, & delà à Malte avec dix mille hommes de pied. Sur ces entre-faites vn pandard sort de Saint Michel, & se rendant au Bascha, luy dict que tout sur l'heure il falloit donner l'assault, pour ce qu'il n'y auoit plus que quatre cens hommes pour defendre la ville. Les nostres ayans descouuert ceste trahyson, eurent bien de la peine à renforcer les lieux abbatus & démolis, toutesfois ilz feirét le mieux qu'ilz peurent. Les ennemys se mettent de rechef à miner secrettement, & pensoient bien par ce moyen venir à chef de leur entreprinse, mais nos gens contreminerent, & ne sçeut l'ennemy rien faire. Parquoy les Turcs s'assemblent, & consultent s'ilz deuoient poursuyure ceste guerre, ou retourner en leurs pais. La plus part disoit qu'il falloit retourner, mais le General de l'armée aduisa, qu'il seroit meilleur d'entendre le vouloir de Soliman, ains que rien mouuoir. Pendant doncques qu'ilz demeurent en l'Isle, ilz n'estoient iamais oiseux, ils ne cessioient iamais de bastir quelques ponts, de miner, de remplir les fosses, & faire autre

*La crainte
de diligence
qu'ils faisoient
les Turcs.*

exercice militaire. Et combien qu'ils fussent presque venuz à la fin de leur poudre, toutesfois ils battirent encore & la ville & le bourg plus furieusement que iamais, de sorte qu'ils meirent les murailles rez de terre. Leur trois basilicz leur seruoient beaucoup, attendu que le boulet de ces pieces pesoit bien deux quintaux, desquelles ils firent belles bresches. Lesquel-
 les faites, ils assaillirent la ville par trois diuerses fois: mais nos-
 gens furent si vaillans & inuaincus, que tousiours les Turcs *Merueilleuse vaillance & cōstance des Chrestiens.*
 estoient brauement repoussez. Les habitans de la ville se mon-
 strerent alaigres à defendre la ville à ceste fois, si bien qu'il n'y auoit pas les enfans & les femmes mesmes, qui ne trauaillaissent à faire du micux qu'il leur estoit possible, & à donner des affaires à l'ennemy, de maniere que les nostres n'y perdirent que 60. hommes, & les Turcs beaucoup plus. Lors y en eut quelques vns, qui conseilloyent au Sieur de la Valette, qu'il feist transporter au chasteau S. Ange tout le plus pretieux de ce qui estoit dās S. Michel, à fin que l'ennemy n'en iouist pas: duquel conseil la Valette fut merueilleusement irrité, comme si il eust fallu plus faire de côte des biens, que de la vie. Et à fin q̄ personne ne s'assuraist plus audict chasteau, qu'à la prouesse & vaillance des combattans, il feit venir au bourg tous ceux qui estoient à la garnison dudiect chasteau, hors-mis ceux qui seruoient à l'artillerie. Les Turcs vn peu apres assaillent encore la ville, mais ils y perdirent & leur peine & leurs gens. Ils retournent à leurs tranchées, & delà battent les murs plus
 que iamais, de sorte q̄ quelcun vint à la Valette tout effrayé, *Le peril des Mal-
toys.*
 disant, nous sommes tous perduz: car les Turcs auoient déia planté trois enseignes sur la muraille. Lors la Valette s'arme incontinent, & encourage les siens à se monstrier vaillans, si iamais ils l'auoient esté, & se fier au reste à la misericorde de Dieu, tellement qu'il fut secondé si alaigrement par les Cheualiers, par les ieunes hommes & les femmes, qu'ils repousserent les Turcs qui estoient déia sur la muraille, & empescherent ceux qui vouloyent monter. Le combat dura iusqu'à Soleil couché, auquel les nostres perdirent deux cens hommes, & les Turcs n'en eurent pas meilleur marché, de sorte qu'en

fin ils se retirerent à leur courtte honte. Or auoit le Vice-roy déia son armée toute preste, & ayant 72. bonnes galeres, avec dix mille hommes de pied, deux cens Cheualiers de Malte, & quarante Cheualiers de S. Estienne, print la route de Saragosse, enuoyant ce pendant vn brigantin pour espier la cōtenance des Turcs deuant Malte. Les nostres, qui estoient dās l'Isle, r'accoustrent soigneusement ce que les Turcs auoyent abbatu, à fin qu'ils leur peussent faire teste s'ils retournoient encore. Les Turcs, deliberez d'assaillir ce iour-là la ville & le bourg pour la dernière fois, se munirent le mieux qu'ils peurent, & feirent deux certaines machines pour se couvrir, faites dessus comme vn plancher: mais les nostres y meirent le feu, & repousserent viuement les Turcs tant de la ville que du bourg, & la nuit suyuant furent occis quatre-vingts Turcs.

*Vn nauire
des Turcs
chargé de
munitions
pris par le
Vice-roy.*

Or comme le Vice-roy estoit prest de descendre à Malte, il rencontra vne nauire de charge venant de Syrie au camp des Turcs, chargée de biscuit, de six mille caques de poudre à canon, & de plusieurs boulets, laquelle il renuoya à Saragosse, en ostant premierement soixante Turcs. Tandis les Maltoys trauailloient de leur costé, & les Turcs de l'autre pour s'emparer de la ville: laquelle peu apres ils enuahyrent si impetueusement, qu'il y auoit grand' apparence qu'ils la prendroient.

*Terribles
assaux des
Turcs.*

Mais combien qu'ils l'assaillirent par deux fois, neantmoins ils ne sceurent rien faire. Le lendemain Mustapha fait vne remonstrance aux soldats pour les animer à l'assaut le troisieme iour, leur promettant grands guerdons & honneurs, tellement que le 26. iour d'Aoust l'assaut fut terrible & perilleux, à cause que les Turcs se ruoient sur les bresches, sans faire cas de danger quelconque, si que l'on ne scauoit bonne piece de temps qui auroit du meilleur: mais estās ia morts de nostre costé 113. combattans, & du costé des Turcs quelque douze cens, l'ennemy fut cōtrainct se retirer. Car les nostres estoient si preux & courageux, que veritablement cela sembleroit estrange à plusieurs, si l'effect ne l'auoit monstré. Le premier iour de Septembre on reçut les lettres du Vice-roy, significatiues qu'e brezf iours il leur ameneroit secours: & ce pendant les Turcs trauailloient

travailloient incessamment les nostres, & les nostres faisoient actes de magnanimité esmerueillable, tellement qu'un iour vingtcinq Chrestiens assaillirent trois cens Turcs, lesquels ilz meirent en route. Le 5. iour de Septembre l'armée de mer Chrestienne vint surgir à vne fort petite Isle, gueres loing de Malte: & enuiron ce temps vn fugitif aduertit le Sieur de la Valette, que les Turcs auoient deliberé de mettre & employer toutes leurs forces pour prendre la ville, & filz ne la pouuoient forcer à ceste fois, se retirer, & que pour ceste occasion on promettoit de recompenser fort honnestement ceux qui feroient bien leur deuoir à l'assault. A la verité ce dernier acte de la Tragedie estoit merueilleusement perilleux aux nostres: mais Dieu ne voulut pas que son peuple seruist de matiere, pour executer la rage & felonnie de ces barbares. Par-
 tant il luy pleut, que le Vice-roy meit dans l'Isle de Malte bien huit mille hommes de pied. Et ce-pendant que ceux-
 cy alloient trouuer le Sieur de la Valette, le Vice-roy se meit dans vne galere, & avec toute la flotte singla vers le Leuant. Les Maltois voyans l'armée Chrestienne, desfarrent toutes leurs artilleries en signe de ioye: & semblablement le Vice-roy feit delascher par deux fois toutes les pieces d'artillerie, qui estoient en ses vaisseaux. Ce faict, il rebrouffe chemin vers Sicile, pour ramener le reste des forces, & butiner les Turcs. Il y auoit déjà quatre iours que les ennemys commen-
 çoient à remettre tout en leurs nauires: & cōme ilz vouloient liurer leur dernier assault à la ville, voicy vn Turc venant le grand galop, qui porta la nouuelle de la descente des Chrestiens en l'Isle. Au moyen dequoy les Turcs sonnent la retraicte,
 on amasse incontinent le reste du bagage, on remet le canon dans les nauires, & meit-on le feu au camp, de maniere qu'il ne demeura qu'un gros canon, qui portoit vn boulet pesant cent liures. On estime que les Chrestiens pouuoient gagner ce iour là grand nombre d'artillerie, filz eussent voulu courir sus aux Turcs. Pour fin de ieu, les Turcs festans hasardez de venir aux mains avec les troupes fraisches des Chrestiens, ilz perdirent quinze cens hommes & plus. Et finalement ilz

*Le secours
de Sicile
arrine à
Malte.*

*Les Turcs
quittent
Malte.*

L'AN M.D.LXV. HISTOIRE DE TOUTES CHOSES

*23 mille
Turcs
morts en
cette guer-
re.* abandonnerent l'Isle, qui fut le cimetiere de bien 23. mille de leurs compaignons : quand à eux, ilz meirent le feu par tout où ilz peurent, ilz rompirent maisons, ilz démolirent les murs des villes, & si feirent mourir plusieurs Chrestiens, de maniere qu'on pense que de nostre costé demeurerēt cinq mille combatans, desquelz il pouuoit auoir deux cens quarante Cheualiers de Malte. Leur los & renommée demeurera à iamais en la bouche des Chrestiens, veu qu'ilz se sont opposez aux effortz des ennemys de la Chrestienté, & ont enduré la mort pour la conseruation d'icelle. Quelcun a escrit, que les Turcs *70. mille
coups de ca-
non dans
Malte.* durant ce siege ietterent bien soixante-dix mille coups de canon dans l'Isle, & les Cheualiers mesmes cōfessent, qu'ilz ont souffert l'assault plus diuinement que humainement. Aussi ne deuons nous oublier le soing paternel de Pape Pie 4. qui, durant ce siege, publia fort amples indulgences par la Chrestienté, pour par ce moyen conuier les Chrestiens à prier Dieu pour le salut de Malte & de toute l'Eglise, & n'y a point de doute que les prieres des gens de bien n'ayent beaucoup faict enuers Dieu. D'auantage, il fault rēdre graces au Catholique & inuaincu Roy d'Espagne, dequoy il n'a espargné ny fraiz ny gens, pour secourir les Maltois en si grande necessité.

*Succes de
l'Empe-
reur Ma-
ximilian
en Hongrie.* SEMBLABLEMENT les affaires Chrestiennes succederent bien en ce mesme temps en Hongrie, l'Empereur Maximilian s'opposant aux Turcs & quelques aultres, souz la conduyte de Lazare Schuend, homme vaillant, instruiēt aux lettres, & fort bon Catholique. On diēt beaucoup de vertuz de luy, lesquelles seront escrites par aultres: car quād est de moy, ie ne le sçauroy encore bonnement faire, pour-ce que ie n'en ay pas entiere cognoissance.

*Le 5. liure
de Carion,
tout confit
en irapostu-
res & mes-
chancetes,
composé
par Peu-
cer.* CESTE année fut imprimé à Vvittemberg le cinquiesme liure de la Chronique de Carion, exposé & augmenté par Gaspard Peucer, gendre de Philippe Melanctho. Lequel estāt piqué de la rage Euangelique, ne faict que mesdire en ceste Chronique des Papes de Rome, taschant de les faire hayr aux Empereurs, Roys, & Princes Chrestiens. Quand à moy ie ne veux pas faire si bon marché de temps, que ie m'aïlle amuser à

lire ce mal-heureux liure tout entier : mais en ce que i'en ay leu, il m'esdit si fort de tous les Papes & de l'Eglise Catholique, qu'il est facile de colliger ce qui est contenu en toute l'histoire. Je pense qu'il n'y a personne qui puisse douter, qu'il n'aille à la mauuaise foy en traictant les choses, attendu qu'il est mal affectionné à icelles. En certain lieu il dict : Par les precedentes & suyuanes histoires il est euidentement monstré, que les Papes ont esté les pestes de l'Eglise & de l'Empire, comme fleaux de Dieu, tiltre qu'Attylas s'attribuoit le temps passé. Comment est-il possible, ô meschant, que tō dire soit vray, veu que plusieurs Papes ont esté admirablement Sainctz, iusqu'à estre honorez par les Empereurs & Roys, plus que iamais vous ne les auez hays ? Dieu donne puissance pour vn temps à ceste generation de viperes, de mesprendre enuers les pasteurs de l'Eglise, instituez par Iesus-Christ, & aussi quand il luy plaira, il leur fermera la bouche, & les punira griefuement, pour n'auoir fait penitence de tant de mensonges & blasphemés, & pour s'estre glorifiez en leur malice au beau milieu des tenebres, comme filz fussent esté illuminez de la lumiere diuine.

O R à fin qu'il semble, que Peucer n'en vueille pas seulement aux Papes, il dict en vn autre lieu contre les Euesques : les Euesques ont aneâty en plusieurs lieux le droict des Burgraues, lors que ne voulans estre maistrisez, ilz ont vsurpé le gouvernement politic, vsans à ce faire de la superstitiō, de laquelle tous ordres estoient lors embabouinez. ô meschant propos ! Est-il vray que iadis tous les ordres de l'Empire ont esté superstitieux, & que Luther avec son Peucer & aultres, nous ait premierement illuminez de l'Euangile ? N'est-ce pas faire vne intolerable iniure à tant de sainctz Empereurs, Roys, & Princes des siecles passez ? Je m'assure que Peucer crieroit bien, s'il auoit trouué vn tel traict dans mes liures, ou de quelque autre Catholique. Et croy que plusieurs Princes & Euesques, contre qui ceste iniure de Peucer est dirigée, monstrent, que ce n'est pas par le moyen de la superstition, qu'ilz ont le gouvernement de la chose ciuile. Que si i'auoy loysir, & si c'estoit icy le lieu, ie produiroy beaucoup d'aussi

*Au feuil
let 41.*

*Feuilles
56.
Calomnie
de Peucer.*

beaux passages de Peucer, comme est cestuy-cy. Mais ie ne veux pas perdre si mal mon temps.

Feuillet
24.

TOUTESFOIS il fault que ie monstre sa niaiserie, quand il appelle Philippe Melancthon son beau-pere, homme tres-sainct, veu que tous gens de bien l'ont en execration, & mesmes les Caluinistes se vantent, qu'il a quitté le Zuinglianisme pour adherer au Caluinisme. Je ne veux que Illyric & ses

Melan-
cthon
faul-
saire.

compagnons pour m'ayder icy, lesquelz tesmoignent, que Melancthon a corrompu la Confession d'Ausbourg, & les liures de Luther en plusieurs lieux. Or le crime d'estre faulçaire n'appartient pas à vn homme tres-sainct, veu mesmement que, selon les Lutheriens, la Confession d'Ausbourg & les liures de Luther n'ont que le pur Euangile. Et fil est ainsi, qu'y a-il plus meschant que falsifier l'Euangile? Mais c'est toujours la coustume de tous heretiques de ce faire, & l'ont fait tous

Calomnie
de Peucer
de S. Gre-
goire 1.

les heretiques de cestuy nostre siecle. Encore nous fault-il remarquer en Peucer, qu'il appelle S. Gregoire premier de ce nom Pape de Rome, architecte de la superstitiō: veu qu'il est trop apparent, que cest homme a esté fort sainct, deuot & sçauant. Quelque iour viendra, que les bons Papes, qu'ilz osent maintenant accuser, les accuseront au contraire, pour auoir blasphemé d'eux si impudemment.

Feuil. 16.
Peucer
contre les
Scholasti-
ques.

NOSTRE Peucer se prend aussi aux Theologiens Scholastiques, disant: On voit les liures des Scholastiques, lesquelz estans occupez à interpreter le Maistre des sentences, (comme si ce liure estoit vne reigle de la foy) bataillent souuent cōtre le ciel, preferans les decretz des Papes à l'escriture sainte, & accommodant icelle ausdictz decretz, nō les decretz à l'Escriture: & ce qui ensuyt. Vous voyez en ce passage plusieurs choses, lesquelles nous montrent l'appetit que ce pendard auoit de detracter & mesdire de tout le monde, choses si impudentes, que leur impudence mesme sert de refutation. Je croy que Peucer n'auoit iamais leu vn mot aux Theologiēs Scho-

Melan-
cthon
contre les An-
ciens.

lastiques, mais son saint beau-pere Melancthon luy auoit appris à parler ainsi des Scholastiques. Car tant s'en fault qu'il ait espargné les Scholastiques, qu'il son liure de l'Eglise il n'es-

pargne pas meſme les Peres anciẽs, diſant qu'ilz ont eſté heretiques: comme ſi c'eſtoit à luy à prononcer la ſentence à l'encontre d'eux. Peucer donc & ſon beau-pere ne valẽt pas plus l'un que l'autre. Et pourautãt que ie ne ſçauoy expoſer tous les blaſphemes contenuz en ſon liure, ie me veux ſeulement arreſter en ceſt endroiẽt, à examiner certains poinctz inferez en la preface dudiẽt liure: Mais ce-pendant ie veux bien que le lecteur ſçache, que ce que j'en fay eſt ſeulement, pour monſtrer à la poſterité, par quelz hommes l'Egliſe Catholique a eſté combatuẽ de noſtre temps: & à fin qu'elle les aye en telle reputation, comme nous auons aujourd'huy vn Simon le Magicien, Marcion, Cerdon, Valentin, Manes, Arius, Neſtorius, & Vigilance, leſquelz n'ont point eſté plus meſchãs que nos aduerſaires heretiques.

PAR VOY pour remarquer quelques lieux de ladiẽte preface, Peucer diẽt, que les hommes ſages ont ſouuent dõné *L'auteur examine quelques pointz de l'hiſtoire de Peucer.* aduertiffement, que ceux qui cherchent ſapiẽce ne doiuent auoir ſoucy aucun de la loüange & applaudiffement du peuple. Vrayement tu diſ vray, Peucer: car ſi Luther n'eũt point cherché l'applaudiffement du peuple, l'Europe ne ſe verroit point à preſent tant trauaillẽe, & pieça ſon hereſie fuſt eſteinte. Apres cela, Peucer veult que celui qui eſcrit vne hiſtoire, aſſeẽ touſiours ſon iugement & aduiſ ſur l'affaire qu'il traite: combien que le principal ſoing d'un hiftorien doie eſtre, de ſ'exempter de toute affection particuliere, pour mieux nous faire cognoiſtre la verité du faiẽt. Et en cas que les hiftoriens du paſſe ſoient variables en quelque point, il fault touſiours ſuyure l'opinion de ceux, qui ſont plus approuuez. Mais voulez vous ſçauoir pourquoi Peucer mettoit cecy en auãt? pour meſdire à ſon plaifir de tous les Papes, veu que ſon opinion & iugement d'iceux eſt tel, qu'ilz ont eſté & ſont vrayſ Antechriſts, comme ſon grand Luther les a baptifez. Quand il luy *Peucer cõtre les Papes.* fault dire quelque cas des Papes, il ne ſe propoſe aultres aultres que ceux qui ont eſté leurs ennemys mortelz, comme ont eſté en ce ſiecle Sebaſtien Franc, & Sleidan, oultre pluſieurs aultres. Et c'eſt pourquoy telz gentilz hiftoriens ſont ſi

fort enragez à calomnier Gregoire septiesme (afin que ie ne parle point des aultres) lequel toutesfois fut hōme fort sainct & de bonne vie, comme les bons auteurs nous assurent. Ce faict, Peucer se met à mordre & deschirer à belles dentz les Empereurs, Henry 4. Federic 2. & Louys de Bauiere, & que ceux qui ont escrit la vie des Papes dissimulent les vrayes machinations & effortz d'iceux. Ce qu'il afferme sans produyre aucun passage ou confirmation de son dire, estimāt qu'on luy doie adiouster foy sans probation quelcōque. Ce fondemēt de Peucer estant si bien appuyé, il crie à pleine teste, que par vne faulce proposition des Papes, on peult faire foy de toute leur tyrannie: à sçauoir quand ilz se maintiennēt estre armez par droit diuin du glaue spirituel & temporel, & estre chefz de l'Eglise & des Royaumes du monde, qui est vne calomnie si euidente, q̄ chacun la voit à l'œil. Car qu'est-ce que le Pape pretend auoir en tous les Royaumes, sinon que d'admonester vn chacun, selon le deu de son deuoir & office, comme estant Pasteur de l'Eglise, les nourrisriers de laquelle sont les Roys: & s'il voit quelcun conuertir sa puissance en tyrannie, de tascher à le corriger tant qu'il pourra? Les plus saincts Papes se sont portez de ceste façon en leur charge, & tant s'en fault que les Papes ayent vsurpé les Royaumes d'aultruy, que tout ce que les Papes possedēt auourd'huy, ilz l'ont eu par la deuotion des bons Empereurs & Roys du temps iadis. Peucer dict beaucoup de choses contre l'autorité du Pape, mais il n'est point besoing de respondre des pures & notoires calōnies: & ceux qui ont leu les bonnes histoires, descouurent aysement les impostures de ce compaignon. Il adiouste encore ce qui s'ensuit: le Pape de Rome n'a aucune prerogatiue sur les aultres Eglises par droit quelconque, ains seulement par la coustume de la tyrannie introduyte. Vous voyez qu'il ne produit aucune probation, ains il luy suffit de dire qu'il est ainsi sans le confirmer: & quand à moy, ie ne refuteray point icy ce mensonge, estans les lieux de l'Ecriture sainte par trop clerks sur ceste question. D'auantage Peucer veult estre plus Tyran à l'Eglise, que ne furent iamais les Roys ou Monar-

*Impudent
mensonge
de Peucer*

ques, disant qu'il ne veult point priuer l'Eglise de ses biens, mais bien luy veult-il oster les Royaumes, lesquels Iesus-^{Peucer & tre les biens des Euesques,} Christ ne donna ny ne presta iamais à l'Eglise. Or auoit-il déia escrit, que quelques Euesques tenoient des Royaumes. Y a-il homme de bon sens, qui ne vueille mal à soy-mesme, de voir ce garnement ainsi parler des Euesques, qui sont Princes de l'Empire? Peucer sera pourry deuant que les Euesques perdent si indignement leurs biens: & croy qu'il sonne l'alarme, pour faire piller les Euesques, à fin d'en auoir cuyssé ou ælle. Il dit, pour monstrier qu'il est bon Geographe & bien versé à l'histoire, que le Royaume de Cathaye s'estend iusqu'au Goulphe de Perse, & que les Russiens dominoient presque toute l'Europe, deuant la venue des Tartares: comme ainsi soit que les Russiens ayent occupé bien petite portion de l'Europe en ce temps-là, & que le sein Persic soit bien fort distant du Royaume de Cathaye. Mais cela pourroit sembler n'estre guere impudent, au prix de ce qu'il dict consecutiue-ment, à sçauoir que les disputes faictes au temps que Luther preschoit contre les indulgences, ont premierement incliné, & puis totalement ruiné le regne Papal: attendu que le Pape est autant autorisé qu'il fut iamais, & croist l'autorité d'iceluy de iour en iour ez regions fort loingtaines des nostres. Mais telle est la fidelité accoustumée ez escripts de noz Euāgeliques.

IL vint puis apres aux additions de la Chronique de Nauclere: mais ou il estoit yure, ou à demy-enragé quand il lisoit ceste addition. Car au lieu de Surius, il list Surrian, & puis de^{Peucer cō tre cest au theur,} Surrian il en fait vn scurra, c'est à dire vn plaiseur: comme si de Peucer tu en faisois vn Lucifer. Apres il se prend à belles dents au pauvre Surius, lequel il dict auoir impudemmet depraué la verité. Je croy qu'il m'estimoit semblable à son Melancthon (à fin que ie taise les autres) lequel Illyric son disciple, a conuaincu d'estre fauçaire, comme dessus a esté dict. Puis se prenant aux moines, il les appelle hōmes deplorables & malheureux, tellement que pieça le monde a detesté leur impudence & audace: lequel lieu suffit pour descrier toute l'histoi-

re de Peucer, veu qu'il est trop euident, que de tout temps les moines ont esté en l'Eglise, ie diz en grand'estime & recommandation. Il met vn distique de Pape Pie second, lequel cō- uient à Luther le mieux du monde:

*Quadrin
de Luther*

*La rage de Satan n'est point si effrontée,
Que ce dire il osast, qu'une vieille edentée,
Et l'Apostat Luther enflé de vaine gloire
Ont, sans punition, dict de nostre memoire.*

Cest homme si modeste, comme ie vous ay déia escrit, afferme que Surius a eu le diable precepteur en composant son histoire: ce qui est fort estrangé de la verité. Surius proteste deuant Dieu, que iamais il n'a mis la main à la plume pour mesdire de personne de ce monde: & qu'encore moins il a eu pour precepteur le diable, combié que Luther ait mangé vn boisseau de sel auecques luy, & qu'il le luy ait enseigné comment il falloit destruire la Messe: de sorte que ie m'esmerueille comment Peucer ne se va cacher, de hôte d'auoir eu vn tel maistre. Mais tāt s'en faut, qu'il appelle Surius ennemy du filz de Dieu, & blasphemateur, souhaitant qu'il s'estrange luy-mesme. Ie sçay bien où gist le Lieure. Il fait grād mal à Peucer, que Surius accoustre si bien noz grands-maistres d'Alemaigne, de ce qu'il fait toucher au doigt leurs vilaines contrarietez, dissensions & inimitiez: toutes lesquelles choses peuuent estre monstrées par leurs liures mesmes, de maniere que Peucer excède les limites de toute impudence, disant en son epistre liminaire, que la doctrine de Luther est irrefragable, plus euidente que nulle autre doctrine quelle qu'elle soit, & appuyée sur la parolle du Sauueur du monde. Cela peult-il estre vray, veu qu'elle s'est souuentefois changée en plusieurs sortes, & attendu que les sectateurs d'icelle sont à s'entretuer tous les iours? Il adioust, que les gens de bien (heretiques de ce siecle) purgent les calomnies à eux obiectées par leurs merites & innocence. Mais nous disons que Luther, Bugenhage, Bucer, & autres moines apostats, seront à iamais execrables, de ce qu'ils ont rompu la foy à Dieu promise, se marians incestueusement: auquel crime si nous adioustons encore leurs erreurs

erreurs & heresies, leurs sacrileges, la profanation des Sacre-
mens, & tous autres forfaitcs par eux perpetrez, il sera plus
cler que le iour, qu'ilz ne sont rien moins que gens de bien, &
mettrons Melancthon le premier en rang, & puy les aultres
dogmatistes, autheurs ou defenseurs des heresies nouuelles.
Que si Peucer ne veult admettre, que ceux-cy soient hereti-
ques, si est-ce qu'il ne scauroit oncques nyer, que les Lu-
theriens n'appellent les Zuingliens heretiques, lesquelz en
disent aultant des Lutheriens: & mesmes que plusieurs Lu-
theriens reiettent totalement les Melancthonistes & Adia-
phoristes. Or combien que ces choses aillent de telle sor-
te, neantmoins Peucer dict que la doctrine de ses Eglises
est la voix de Dieu: comme si nous estions si aueugles, que
nous ne peussions apperceuoir le contraire. Y a-il blasphe-
me plus enorme contre le filz de Dieu, que de luy attri-
buer celle doctrine, laquelle est mise en controuerse par les
Lutheriens mesmes? Le filz de Dieu est-il inconstant & varia-
ble, pour enseigner vne doctrine repugnante? Mais ie demeu-
re trop cy dessus: puy que le lecteur peult aysément compré-
dre le mal-heur de ce siecle, auquel les hommes sont venus si
abbestis, qu'ilz parlent contre le ciel & la maiesté diuine sans
horreur quelconque.

C A R ceste mesme année fut mis en lumiere vn grand li-
ure, composé directement à l'encontre du Concile de Tren-
te, publié par Pape Pie quatriesme, les autheurs duquel e-
stoient predicans heretiques, à qui i'en veux maintenant. En
cest escrit ilz se montrent si ardens à crier contre les Papes,
que ceux de leur secte mesme se peuuent à bon droict com-
plaindre de ceste trop grâde crierie. Le but principal de leurs
desseings, est d'abolir l'autorité du Pape & des Conciles, ce
qu'ayans gaigné, ils crieront ville gaignée à pleine teste. Et
partant en cestuy leur escript ilz se parforcent d'abbatre l'au-
thorité des Papes & des Conciles anciens & generaux, de fa-
çon qu'ilz osent reprendre les sainctz Conciles de Nice &
Chalcedon, voire trouuent-ilz ce langage de tous les Conci-
les qui oncques furent: les traditions des hommes, les Conci-

*Le liure
contre le
Cocile de
Trente.*

*Sentence
des hereti-
ques con-
tra les S.
Conciles.*

les, synodes, & decretz emanex d'iceux peuuent errer & fail-
lir, & ordonner choses repugnantes à la parolle de Dieu. Ce
qu'ilz taschent de prouuer par plusieurs Conciles: en quoy fai-
sant, ilz descouurent sans y penser leurs impostures & decep-
tions, pour-ce qu'ilz ne produysent que des synodes prouin-
ciaux, & aultres condamnez par l'Eglise: & par ce moyen se-
duysent le simple peuple, lequel n'a pas la cognoissance si cela
est feint ou vray. Ainsi font- ilz, quand ilz produysent en pre-
mier lieu le Cōcile de Carthage celebré du temps de Sainct
Cyprian, auquel fut arresté, que ceux qui auroient esté bapti-
zez par les heretiques, seroient rebaptizez: comme s'ilz ne sça-
uoient pas bien, que l'Eglise n'approuua iamais ce synode, &
qu'il a esté prouincial, non general. Et quand nous disons
qu'un Concile ne peult errer, nous entendons d'un Concile
general legitiment congregé, lequel represente toute l'E-
glise, colonne & firmament de la verité. Puy il adioustent le
sainct Concile de Nice premier, disans qu'en iceluy y a un
Canon contraire à ce que Sainct Iehan dict des gens d'ar-
mes: & qu'aussi il y a des Canons de penitence, desquelz gran-
de superstition est depuys sortie. Il n'est point besoing de mō-
strer l'impudence, la malice, & bestise de ces heretiques, les-
quelz osent mettre les dents sur l'irreprehensible Concile de
Nice premier, auquel sans doute le Sainct Esprit assista: de sor-
te que leur calōnie ne redonde pas rāt aux Euesques qui y as-
sisterent, qu'au Sainct Esprit mesme. Poursuyuons donc bref-
uement à examiner quelque aultre poinct pour l'amour du
lecteur, lequel ilz s'efforcent de tromper. Au mesme lieu ilz di-
sent, que le Concile de Chalcedon a grandement failly, con-
stituant que les moines & nonnains ne se pourroient marier.
En quoy disant ilz combattent apertement contre toute l'E-
glise, & contre les dictz des Peres, & mesme contre l'Eseritu-
re sainte, laquelle commande d'accomplir les vœux faictz à
Dieu. Il suffiroit à hommes qui ont quelque peu de foy & de
raison, de sçauoir ceste tant meschante & absurde opinion,
pour faire iugement de leur impieté extreme: toutesfois il ad-
uient par un secret iugement de Dieu, que plusieurs les suy-

uent plus que toute l'Eglise Catholique, combien que par trop impudemment ilz enfraignent l'autorité du Concile de Chalcedon & aultres, & permettent aux religieux & religieuses de se marier. Dieu, comme i'espère, permettra quelque iour que le simple peuple & aultres seduyctz par ces predicans, entendront quelle abomination c'est, qu'un religieux s'accointe d'une femme souz le masque de mariage, ayant voué à Dieu chasteté. Et suis assuré, si plusieurs auoient seulement mis le nez és Docteurs Anciens, qu'ilz detesteroyent ces meschans. En vain donc on dispute de la religion avec hommes venus à telle impieté, qu'ilz appellent un saint mariage, ce qui est une paillardise execrable. Dont ie me veulx mal, dequoy ie m'amuse tant apres eux, & à aduertir le peuple de se donner garde de ces folz heretiques: lesquelz certainement sont si ineptes & ridicules, qu'ilz n'auront rien gagné enuers tous hommes (qui ne seront pas du tout si folz qu'eux) ny enuers toute la posterité, sinon qu'ilz seront tenus pour opiniastrés: & en fin les Princes & aultres s'apperceuront de leurs desseings & impostures, si bien que quelque iour on leur donnera sur les doigtz: & quoy que pour un temps ilz ayent tourmenté l'Eglise, Dieu permettra qu'ils s'esuanouïront comme fumée. Mais examinons ce qu'ilz disent en la dixiesme page du mesme liure. Les tenebres d'ignorance ont esté si grandz en certain temps, (disent-ilz) que ceux qui estudioient en Theologie ont confessé, qu'ilz auoient ouï la Theologie soigneusement, & auoient fort diligemment employé le temps requis au cours de Theologie: mais que sans mentir ilz pouuoient affermer, que durant les cinq ou six ans de leurs cours de Theologie, ilz n'auoient iamais ouy parler à leurs Maistres du filz de Dieu: & qu'ilz estoient si empeschez à feuilleter le maistre des Sentences, l'Escot, Bonauenture, Alexandre des Halles, & Saint Thomas d'Aquin, qu'ilz n'auoient iamais loysir de lire les escritures saintes, & que mesmes on ne parloit point de la Bible en leur eschole. Je te prie, lecteur, regarde si le diable pourroit controuuer un mensonge plus vain, impudent, ou inui-

*Impudẽce
merueille-
seuse cõtre
les estu-
diants en
Theologie.*

rieux, qu'est celuy-la. Comment est-il possible, que dans cinq ou six ans ilz n'ayent iamais ouy parler de Iesus-Christ, veu qu'ilz confessent auoir leu & releu le maistre des Sentences, le troysiesme liure duquel ne parle presque d'autre chose que du filz de Dieu: Ilz osent appeller tous les Theologiens inep-tes, pour-aulant (ce sçay-ie bien) qu'ilz ne mignotisent point tant leur Latin, que font noz ministreaux: lesquelz pour sçauoir vn petit mot de Grec, ou lire en Hebreu seulement, veulent estre veuz sçauans. Mais les Theologiens Scholastiques ont bien aultres parties. Christofle Longueil a esté aussi desdaigneux du mauuais Latin, qu'ilz pourroient estre, & beaucoup plus docte qu'ilz ne sont: mais il affirme neantmoins, que tout homme qui a bon iugement, attribué aux Scholastiques vne bonne vie, & vne admirable cognoissance des choses diuines & humaines, dont nous les auons en si grand estime. D'auantage, quelle calomnie est-ce que d'asseurer, que par l'espace de cinq ou six années on n'a point ouï aucun lieu des saintes escriptures, veu qu'à tous propos icelles sont citées & alleguées par le Maistre des Sentences, lequel ilz fucilletoient si souuent? Le lecteur donc apperçoit, quelz hommes ont esté ceux qui ont voulu abbatre l'autorité du Concile de Trente, & qui se iactent d'estre grandz reformateurs de l'Eglise: & le monde sçait, & sçaura d'auantage, qu'ilz ne sont qu'imposteurs, prestz à seduyre les hommes.

Le croy qu'au mois de Decembre de l'année presente deceda le Pape Pie quatriesme, lequel certes s'acquitta fort bien de sa charge, & principalement en ce qu'il fut cause, que le Concile de Trente s'acheua de son temps.

*Electio
de Pape
Pie 5.*

L'AN 1566. le septiesme iour de Ianuier fut esleu Pape vn Iacobin, Cardinal d'Alexandrie, nommé Michel Gifeler, & fut dict Pie cinquiesme. Le matin de ce mesme iour on tenoit grand propos d'esslire vn aultre, & bien peu s'en falloit qu'il ne fust Pape: mais l'apref-disnée quelques vns des principaux meirent en ieux le Cardinal d'Alexandrie, de maniere que tous les Cardinaux y consentirent, oultre l'attente de tout le monde, & ainsi sortant en public il fut salué Pape. Per-

bonne ne doutoit, que cela ne se fust fait par faueur diuine, veu qu'il n'y auoit point là de brigue ny de ligue quelconque: & d'auantage, tout ce qui a esté iusqu'icy par luy fait, n'est digne que d'un Pape entier & fort recommandable, fil y en eut oncques. Deuant son coronnement, (lequel à mon iugement fut le dixseptiesme iour de Ianuier) il feit vne congregation des Cardinaulx (car ce qu'ilz appellent le consistoire, ne se fait point deuant le coronnement) apres laquelle, certain homme de grande & illustre maison luy vint demander vn Euesché. Auquel le Pape respondit qu'il desiroit luy faire tout plaisir là où il pourroit, mais qu'il ne pou-
Il refuse de donner vn Euesché à vn grand Seigneur.
 uoit luy donner l'Euesché, pour ce qu'il ne sembloit pas estre assez apte à ceste charge, comme n'estant pas si docte qu'il estoit requis. Luy voulant monstrier qu'il estoit plus versé aux lettres qu'on ne l'estimoit, point, point, dict le Pape, il ne me fault point de tesmoings en ce dequoy ie suis asseuré assez. Et ainsi il fut refusé. Les Cardinaux estoient là presens, vers lesquels se tournant il les en-horta à ne luy rien demander qui fust ou contre le seruice de Dieu, ou contre le Concile de Trente, ou contre l'ordre ia estably en l'Eglise. Il adiousta, qu'il proiettoit bien de fauoriser & gratifier aux Princes Chrestiens és choses licites, mais qu'il les esconduyroit tout à plat, filz luy demandoient chose non legitime.

CERTAINEMENT ceux qui contempleront sa vie, ses *La maison de ce Pape fort reglée.* mœurs, & sa maison, ils serot contrainctz de confesser, que sa vie est parangonnable à ceux, la saincteté desquelz nous honorons encor aujourd'huy. Il a vne maison si bien reglée & conduyte, que les aultres y peuuent prendre exemple, pouraultant qu'il a plus d'esgard à la bonne vie & integrité de ceux de sa suyte, qu'à leur nombre ou à leur brauerie. Il monstre qu'il a iustice en grande recommandation. Comme les Maltois se craignoient d'estre de rechef assiegez, il leur offrit tout le reuenu de l'Eglise, & estoit prest de leur enuoyer trois mille hommes de pied, fil n'eust esté aduertty que le Turc ne venoit point. Il n'a pas grandement fauorisé ses parens, de maniere qu'ilz n'ont pas acquis grands biens ny honneurs par le-

Pape, seulement à l'instance de plusieurs vn de ses neueux a esté fait Cardinal. Il est fort soigneux de la religion Catholique, & vacque incessamment aux prieres, lesquelles il dict estre toute la garde des Papes. Il a donné aux citoyens Romains les belles statuës, que ses deuanciers auoient à grandz fraiz colloquées aux iardins de Saint Pierre, lesquelles ont esté mises au Capitole. Il est sobre en beuuant & mangeant, & fort studieux à rendre graces apres le repas. Les gens de bien ont dequoy admirer sa vertu, & les peruers dequoy craindre sa seuerité, laquelle il monstre enuers les paillardz & aultres meschans abominables. Il a institué vne belle reformation, & si l'a practiquée luy-mesme, retranchant beaucoup de son train, pour auoir plus grandz moyens de subuenir à l'Eglise.

Ses meurs. Plusieurs Catholiques non demeurans en Italie, estans tombez en necessité ou maladie, ont senty sa largesse, & ses consolations par lettres. L'auarice n'a place quelconque en luy, ce qu'il a bien monstre en chassant de sa Cour tout ce dequoy il pouuoit faire grand amas d'argent: de façon qu'estant assez enuelpé d'affaires, quelcun luy ayant offert grosse somme d'argent pour impetrer vne dispence, il le rabroüa de parolles, & en fait aultant aux aultres, ne regardant pas tant au proffit qui luy en pourroit venir, qu'à l'equité & iustice. Quand on resigne simplement quelque dignité Ecclesiastique, maintesfois cela est fait au preiudice de l'Eglise: & partant il a deliberé de ne receuoir point telles resignations que bien considerément, de peur qu'en vsant de trop grande licence les biens de l'Eglise ne viennent comme propres heritages, estans conferez à hommes indignes & qui ne pourroient pas bien s'acquitter de leur charge.

QUELQUES FOIS vn grand Seigneur luy voulut faire present de trente mille escuts de rente, mais il ne voulut accepter cest offre. Vn aultre offrit sa fille en mariage au neueu du Pape, desireux d'estre allié de sa maison, presentant vn grand douaire pour sa fille: lequel le S. Pere remercia bien fort de sa bien-ueillance, mais il respondit, qu'il ne vouloit point que ceux de sa maison fussent Ducs, ny Marquis, ny

Barons, veu que par-auant ilz ne l'auoient point esté.

IL y auoit à Rome vn Iuif nommé Elie, riche entre les ^{Côme E-} siens, prudent, & bien versé aux lettres, déia maistre de la syna- ^{lie, docte} gogue, & grand Pontife. Lors que le Pape n'estoit encore que ^{Iuif, se} Cardinal, il l'auoit souuent exhorté & semond de soy faire ^{fait Chre-} Chrestien, & en fin le Iuif luy auoit promis de le faire, quand ^{stien.} il seroit Pape. Ce qu'estant aduenu outre toute l'expectation du Iuif, le Pape luy va dire: Tu vois que ie suis déclaré Pape, fay donc maintenant ce que tu as promis: & ce-pendant le Pape faisoit prier Dieu pour sa conuersion. Vn peu apres le Iuif va trouuer le S. Pere, & assure qu'il vouloit estre Chrestien. Le Pape l'aduertit de considerer cecy bien soigneusement, & si en auoit bonne volonté, qu'il la luy feist entendre. Incontinent apres il va dire au Pape, que desormais il ne pouuoit clorre la porte au S. Esprit & à la verité, & qu'il estoit resolu de soy faire Chrestien avec ses trois enfans, & vn neveu qu'il auoit. Dequoy le S. Pere fut fort esiouy, & rendant graces à Dieu, il le baptiza luy-mesme le troisieme iour de Pentecoste en presence de tous les Cardinaux, & de tout le peuple qui en ressentoit vne merueilleuse liesse: & baptisa par mesme moyen les enfans, leur concedant de grands priuileges, & si adopta l'un des enfans qui auoit enuiron sept ans, lequel il fit mettre au college des Alemans avec ses neveux. Cest Elie, qui fut à son baptisme nommé Michel, ne cessoit depuis ce temps à exhorter les Iuifs à se chrestienner, & Dieu le fauorisa tant, que peu de temps apres ils furent trente, qui se feirent Chrestiens.

LE iour & feste du corps de Dieu, combien qu'il fust fort debilité, & fust entre les mains des Medecins, neantmoins il ne voulut point estre porté en vne chaire, ny prendre la mitre Papale à la maniere accoustumée, ains allant à beau pied il porta le saint Sacrement par la ville, à la grande edification de tout le peuple.

LE Concile de Trente auoit ordonné, que le Pape aduiferoit à faire imprimer le Breuiare, le Messel & le Catechisme. ^{Le Cate-} Il a déia fait imprimer le Catechisme, & l'a fait traduire ^{chisme.}

L'AN M.D.LXVI. HISTOIRE DE TOUTES CHOSES
en François, Aleman, & Polonois. (depuis il a fait imprimer
le Breuiaire, & le Messel aussi.)

Plusieurs
femmes pos-
sedées du
mauvais
esprit sont
guerries par
le Pape.
COMME l'Empereur, qui vit encores, vouloit guerroyer
le Turc, le S. Pere enioignit de faire trois processions pour
l'heureux succes de ses entreprises, esquelles il assista, quoy
que cassé de vieillesse, allant à pied, & priant Dieu à joinctes
mains & la teste descouuerte, tout le lög du chemin. Plusieurs
Cardinaux & Euesques, Seigneurs & citoyens y assisterent
quant & quāt. A la premiere procession fut amenée au Saint
Pere vne femme possedée du diable, criant & hurlāt fort hy-
deusement: à grand' peine la pouuoit-on tenir, mais le Pape
luy ayant donné trois fois la benediction, elle cheut à terre,
comme si elle fust morte, & puis elle se releua saine & gaillar-
de. A la seconde procession on luy en amena trois autres, sur
lesquelles il feit trois fois la benediction, & furent guerries: cō-
bien que l'vne n'auoit oncques peu estre guerrie au-parauant.
Autant en feit-il à la troisieme processio, sur vne pauvre fem-
me possedée de Satan. Les hommes voyans la pieté du Pape
reluyre, & sa sainteté en chassant les diables, furent merueil-
leusement edifiez, & n'y auoit celuy q. ne se cōfessast au Iubilé.

EN ce temps fut prinse vne nef d'un grand pirate, en la-
quelle y auoit plus de quatre vingts esclauues Chrestiens, qui
estoit à la cadene plus de dix ans y auoit. Eux estans venuz
à Rome, sa sainteté les reçeut doucement, & si les remonta
d'accoustremens & d'argent.

Le college
des Cate-
chumins.
PLVSIEURS voyans le pasteur souuerain marcher par-
faictement, amendent leur mauuaise vie, de sorte que plus de
cent Iuifs, sçauans & riches, se sont faits Chrestiens. Et pour
entretenir les Catechumins, c'est à dire ceux qui sont fraiz ve-
nuz à la religion Chrestienne, le Pape a acheté vn logis ma-
gnifique, & l'a renté comme il appartenoit.

Sa libera-
lité envers
les mala-
des.
A v mois d'Aoust de l'année presente couroit vne terri-
ble maladie à Rome, de maniere que plusieurs gisoient au liēt
fort malades. C'estoit lors que le Pape faisoit deuoir de bon
pasteur. Car il aidait vn chacun d'argent, il faisoit visiter vn
chacun par les medecins, & leur faisoit toutes autres choses
qui

qui luy estoient possibles, commettât certains hommes pour les exhorter au salut de leur ame. Bref on ne sçauoit dire, combiën le Clergé de Rome s'est emmélioré depuys le temps de ce Pape: & quoy qu'iceluy Sainct Pere languisse déia de vieillesse, si veult il luy-mesme ouyr, voir, & cognoistre le différent d'un chascun. Il ne faict que prier, & ieusner, & dict tous les iours la Messe, combien que cela puisse estre trouué estrange veu son aage. Mais il asseure luy-mesme, que entre tant d'occupations & affaires il s'est si bien porté, que iamais il ne festoit mieux trouué de sa personne.

IL trouua moyen de racheter son neueu qui auoit esté <sup>De son ne-
ueu rache-
té des cour-
saires.</sup> prins des Turcs, pour bien petit d'argent: mais ie croy que les pirates ne sçauoient pas que ce fust le neueu du Pape. Il le voulut voir en tel habit, qu'il auoit esté mené par les escumeurs de mer, pour ramer à la chiorme: lequel habit estoit fort pauvre. Si l'admonnesta le Sainct Pere; que considerant la miserable vie qu'il auoit soufferte, il s'amendast, & seruist à Dieu. Puys il luy donna vn cheual, & le feit homme d'armes, dont il en tire cent escuts par an, & ainsi le renuoya. Par cela on voit, que le moindre de ses soucis est d'aduancer aux biens & honneurs de ce monde ses parens & amys.

LA coustume estoit de sonner des instrumens de musique, toutes & quantes fois que le Pape & les Cardinaux entroient au consistoire, laquelle coustume il aneantist. <sup>Plusieurs
bonnes choses
faites
par luy.</sup> Souuent il visite les Eglises, souuent il presche, il reforme sa maison, sçachant bien que les aultres Ecclesiastiques prennent exemplaire sur son train, & sur la police de sa maison. Au commencement du mois d'Octobre il conuoqua tous ses familiers, il leur feit vne remonstrance, & entre aultres choses qu'il les prioit de faire, il vouloit que chacun luy declarast son nom & quelz benefices ou offices il tenoit. Il leur enioignit aussi, que les prebstres celebrassent la Messe au moins trois fois la semaine, & que de quinze en quinze iours les aultres communiaissent, & signamment les diacres ou souzdiacres. Il commanda que ceux qui auoient quelque ordre en l'Eglise, ou qui iouissoient de quelques biens Ecclesiastiques,

portassent la tonsure & fussent habillez en gens d'Eglise, sans soy aucune sur leurs habillemens. Il n'endure point les grosses chausses. Afin que les officiers de sa maison ayent à quoy s'emploier, il leur faict ouyr leçon en Theologie, qu'on faict trois fois la sepmaine à son palais, outre celles qu'on faict en Philosophie. Il a donné des Docteurs anciens de l'Eglise à ceux qui le seruent, pour y estudier quand ilz n'ont aultre chose à faire. Il ne souffre point qu'aucun de ses gens porte habilement insolent, ou qu'il viue ou parle aultrement qu'il n'appartient: & à celuy qui a charge de sa personne, il a commandé qu'il soigne, à ce que ses soldarz ou Suisses viuent modérément & sans insolence.

*Les putins
chassées.*

IL a par edict public commandé que les putins vuydassent la sainte cité: dequoy plusieurs Romains estoient fort estonnez, disans que cela seroit cause qu'on perdrait de bon reuenu: mais le Pape leur respondit, que si telles damnables personnes n'estoient chassées, il mettroit le siege en vne autre ville que Rome, tellement que les Romains ne dirent plus mot. Toutesfois il en est demeuré quelques vnes aux meschantes rues pour euitier plus grand mal: mais par deuant elles occupoient les plus belles places, & les plus superbes palais de Rome. Quelques vnes des plus belles courtisannes, & qui pouuoient amorcer plustost les infirmes à commettre peché, que les aultres, ont esté bannies de toutes les terres de l'Eglise.

*Singuliere
clemence
enuers vn
faiseur de
Pasquils.*

PAR vn aultre edict il a prohibé à tous vrais habitans de la ville de Rome, qu'ilz n'allassent point tauerner & cabareter, & que ceux qui y iroient pour iouer, seroient bien chastiez: par lequel edict plusieurs pechez ont esté retrâchez, & est aduenü que les estrangers ont esté à leur aise à leurs logis. Or aduint qu'un meschant pèdard mesdit du Saint Pere en vn Pasquil, lequel fut en fin happé, & mené vers le Pape. Chacun crioit qu'il deuoit estre bien puny, mais le Pape luy feit reciter ses vers, & declarer par le conseil & instigation de qu'il auoit faict ce Pasquil. Le galand respondit, que le diable luy auoit soufflé cela aux aureilles, & lors le Pape dist: si tu auois

mesdit de moy, comme estant Pape, ie t'asseure que tu serois
deuement chastie: mais pour-ce que tu as seulement mesdit
de frere Michel, d'un moine, d'un Cardinal Alexandrin, va
t'en où tu voudras: tant que ie viuray, ie confesseray la bas-
sesse de ma maison, & seray vil & abiect en ma propre per-
sonne.

IL a tant fait, que les chemins de toutes les terres de l'E-
glise ont esté purgez de larrons & volleurs, menaçant de pu-
nir corporellement ceux, iouxte les maisons desquelz l'ho-
micide ou assassinat auroit esté commis. On luy dit que quel-
ques Seigneurs de Poloigne, par deuant heretiques, festoient
renduz Catholiques, dequoy il fut merueilleusement resiouy,
comme il est tousiours en telz accidens, & leur escriuit lettres
de conioissance.

IL feit vuyder tous ses parens de Rome, hors mis ses
deux neueux, l'un Cardinal, & l'autre estudiant au college
des Alemans: & commanda aux Cardinaux de reformer leur
train, le plus honnestement qu'il seroit possible. Certain iour
il manda venir par deuers la Saincteté les Cardinaux inquisi-
teurs, les auditeurs de Rome, (qui est le plus seuer & princi-
pal iugement de la ville) & aultres qui gouernent la cité: aus-
quelz il feit vne tres-belle remonstrance, à se monstrier entiers
& incorruptibles en leurs iugemens, menaçât de punir ceux
qui ne feroient bien leur deuoir.

IL commanda tres-estroitement aux femmes publiques, *Les putins*
lesquelles on auoit mises en vn coing de ville, qu'elles ne se *se recq-*
promenassent point par les ruës, sur peine du fouër: & leur as-
signa deux ou trois Eglises pour ouïr la Messe & la predica-
tion, & promettoit d'ayder de tout son pouuoir celles, les-
quelles se disoient contrainctes d'estre abandonnées, pour
n'auoir dequoy viure: de maniere que plusieurs se sont mari-
ées, les aultres souhaitent de rencontrer quelque condition,
pour se retirer de leur vie abominable. Le Pape veult & en-
tend, que celles qui meurent en leur ordure sans la reception
des Sacremens, soient portées à la voirie, dont plusieurs pése-
ront à se remettre au bon chemin, quoy qu'il couste.

*Autres
faits.*

IL y a à Rome vn college, qu'ilz appellent la Sapience, lequel estoit tombé pour la plus part, de sorte que quelques vns mettoient en leur bourçe le reuenu dudit college. Mais le Pape en feit faire restitution, & le feit donner aux Professeurs des artz & sciences.

IL commanda pareillement, (ce que le Pape Pie second auoit aussi ordonné) que ceux qui auoient exercé quelque Magistrat, rendroient conte de leur bon ou mauuais gouuernement. Il a deliberé semblablement d'enuoyer par toute l'Italie des Visiteurs, pour voir comment les Euesques, les chapitres, & monasteres se portent en leur charge & office.

IL soigne bien fort, à ce que la discipline monastique, laquelle s'est abastardie en plusieurs lieux, soit remise à sa premiere institution, & a terriblement excommunié tous moynes apostatz: neantmoins, pour les induyre à conuersion, il a en-horté tous les Generaux des ordres, qui qu'ilz soient, de s'enquerir diligemment des desuoyez, & de les reduyre au chemin de salut, si possible est. Mais ilz sont si opiniastrés, & si esclaués de leurs execrables paillardises, qu'ilz ne se soucient pas de cela, ains sont tomber en la mesme impudicité tous ceux qu'ilz peuuent: & encor' à la mienne volonté, que personne de ces pestes ne feist mestier d'enseigner, veu qu'il n'y a sorte d'hommes plus meschans, que ces apostatz estans heretiques, comme l'Alemaigne & les prouinces ses voyfines experimentent encor' à present.

VENONS de rechef à nostre Pape. Durant l'aduent de l'année presente, quoy que sa vieillesse extreme l'exemptast du Ieufne, si a-il tousiours ieufné, tousiours prié Dieu, tousiours donné aumosnes, tousiours assisté au sermon: par quel exemple plusieurs ont esté inuitez à passer ledict temps saintement, & ce-pendant il executoit tout ce qui est de sa charge, & à sa maniere accoustumée oyoit les differendz d'un chascun.

SOVENTES FOIS est aduenü, que les Cardinaux s'en debtent bien fort, & pour-aultant que leur dignité est si grande, personne ne les osoit poursuyure en iugement, ou bien

executer la sentence, qui auroit esté donnée contr' eux . De-
quoy estant aduertý le Pape , il commanda qu'on feist aux
Cardinaux , comme aux aultres , qu'on leur emportast leurs
biens & meubles, iusqu' à tant que les crediteurs fussent satis-
faitz. Et neantmoins il n'y auoit Cardinal, qui osast groume-
ler de ce seueré commandement.

IL a passé les festes de Noël de l'année presente fort sain-
ctement, de sorte qu'il fut aux matines de la nuit & à la pre-
miere Messe: puy il celebra la premiere & seconde Messe en
sa chapelle, donnant luy-mesme la communion à tous ceux
de sa maison, & le iour de Noël il celebra la grand' Messe so-
lemnellement à Saint Pierre, & l'apres-dinée il assista au ser-
mon. On pourroit dire plusieurs aultres choses pour la lou-
ange de ce Pape, mais par ce que nous en auons brefuement
dict, on peult estre assez certioré de ses qualitez & vertuz , &
est le tout si estrangé de vice, que noz aduersaires n'y ont que
mordre. Parquoy filz mesdisent de quelques Papes, au moins
qu'ilz admirent & celebrent les vertuz de Pape Pie cinquies-
me. Mais ilz sont si endiablez , qu'ilz aimeroient mieux cre-
uer , que de n'en dire quelque mal . Car leur coustume est,
quand ilz apperçoient les Catholiques , & principalement
les Prelatz & gens d'Eglise , viure en vrais Chrestiens , de les
appeller hypocrites, qui sont iniures à Christ, pensans meriter
par leur bonne vie: mais filz voyent qu'ilz viuent mal, ilz cri-
ent, ilz tonnent, ilz tempestent : de maniere que i'oseray bien
dire, si Saint Pierre & Saint Pol viuoient en ce tēps, à la ma-
niere qu'ilz viuoient estans en ce monde , que noz predicans
trouueroyent quelque chose à reprendre en leur vie , où ilz
mourroient de despit.

M A I S que fault-il s'esmerveiller, filz blasonnent les bons
Catholiques , quelque bonne & sainte vie qu'ilz meinent,
veu qu'ils s'entr'-iniurient bien eux-mesmes, comme souuent
i'ay monstéré: Les Lutheriens & Zuingliens ne cessent iamais
de combattre les vns contre les aultres , & voit-on les liures
par eux imprimez , de sorte que vous diriez qu'ilz se veulent
entr'arracher les yeux. Sçachez donc qu'il y a deux bons sol-

L'origine du débat entre Brence & Bullinger, l'un Caluiniste & l'autre Lutherien dartz par-my le monde, Bullinger Zuinglien, & Brence Lutherien, qui s'entrepillent à plaisir : mais Bullinger, comme estant Caluiniste, est plus fin que l'autre, à cause qu'il semble auoir le miel à la langue, mais il a le venin au cueur, & ne se peult tenir de ietter des iniures à sa partie aduerse. Brence auoit escrit vn liure contre Pierre Martir & Bullinger, de la maiesté de Christ, auquel liure Bullinger respondit. Brence replique par vn aultre escript, mais fort obscur & tenebreux, comme Bullinger luy reproche: & d'aultre part si prolix, que Bullinger pense, que Brence auoit demeuré vn an entier à le composer. Et combien que ledict Bullinger ayt consumé beaucoup de temps à lire ce liure, (dict-il luy-mesme) si est-ce qu'il y a respondu seulement par maniere d'acquit, mais toutesfois si naïfement, qu'il a donné à Brence son change en iniuriant: & non sans cause, veu que Brence ne faict aultre chose, si faut croire à Bullinger. Et à fin que le lecteur sçache de quel escript de Bullinger ie parle, il faut entendre que l'an mil cinq cens soixante quatre il auoit mis en lumiere vne repetition & vne plus clére explication, par laquelle il blasme le liure de Brence, intitulé la Recognition. Et dict, que tous gens de bien ont opinion, que Brence peche irremissiblement en faisant imprimer ses liures, & qu'il foule aux piedz la doctrine des Eglises Zuingliennes, que Brence ose appeller faulce. D'auantage, que Brence poussé du mauvais esprit estime, que Bullinger n'escrit que des bayes & choses inutiles, par lesquelles il gaste la vigne du Seigneur: & que celuy qui prendra garde à tout ce qui sort de la bouche de Brence, verra que ce ne sont que calomnies & iniures. Or Bullinger ne parleroit pas si sinistrement de Brence, si l'auoit donné les iniures qu'il luy donne au Pape ou aux moynes, mais il estoit bien raison qu'ilz feissent tresues d'iniures pour quelque temps. Voyons donc le reste. Pierre Martyr estoit ia decedé, & partant Bullinger l'appelle en son liure, homme de loüable memoire: comme il fait aussi Melancthon, duquel il s'aide contre Brence, pour ce que ledict Melancthon afferme, que le mot de transsubstantiation & le

mot de toute-presence estoient nouuellement inuentez. Ce qu'il dict de la toute-presence, (contre Brence) n'est que trop vray: mais il ment fausement en disant le semblable de la trāsubstātion, veu que S. Ambroise dict, que la nature du pain est changée en l'Eucharistie, & autant en ont dict tous les Peres: & partant ce n'est pas chose nouuelle. Bullinger ne nye pas, que Melancthon n'ait esté quelque temps ennemy des Zuingliens, tellement qu'à peine les eust-il recogneuz pour freres: mais aussi dict-il, qu'à la fin il les aima & cherist merueilleusement. *De Melancthon.*

IL sçait bien aussi, que les Lutheriens nyeront fort & ferme ce que ie vien de dire, à sçauoir que Melancthon se soit fait de Lutherien Zuinglien: mais il produira plusieurs fausses lettres pour le prouuer manifestement, & n'accompte pas cela à vne inconstance, mais bien à vn bon esprit soucieux de son salut, comme si c'estoit bien aimer son salut, de Lutherien soy faire Zuinglien. Bullinger souhaitteroit fort que Brence feist le semblable, & pour-ce qu'il ne veut pas, il l'appelle restu & irreconciliable: qui sont beaux tesmoignages d'un heretique parlant d'un autre heretique. Il reproche à Brence, qu'il abuse des lieux des anciens Docteurs pour cōfirmer son erreur, comme si Bullinger & tous apostats de l'Eglise Catholique n'en faisoient autant. Luy-mesme est vn fat, quand il reproche à Brence d'vser des tours de passe-passe, veu que ses Calvinistes disent, que Iesus-Christ demeure tout au ciel avec son humanité, & que toutesfois il donne sa chair à māger en l'Eucharistie. Il luy reproche pareillement qu'il ne fait que naistre, & qu'il vaut beaucoup mieux adiouster foy aux anciens Docteurs, qu'à Brence frais esmoulu. Si ceste sentence prononcée par Bullinger estoit obseruée, pieça seroit-il condamné avec tous ses partiaux heretiques: mais ils ne font cas des anciens, sinon comme il leur plaist, ou plustost n'en tiennent-ils aucun conte, quand ils ne sont pas de leur opinion. Bullinger poursuiuant contre Brence, dict qu'il cherche des subterfuges & eschappatoires, qu'il ne sçait bonnement qu'il dict, qu'il seduit le peuple, & qu'il le meine où il veut. Ce

Les pressiges des heretiques.

qu'est bien vray, mais il se coupe la gorge luy-mesme. Car le semblable disent les Zuingliens, affermans que le corps de Christ n'est pas substantiellement en l'Eucharistie, & que neantmoins nous viuons de sa vraye chair. Parquoy Brence est mocquable en sa toute-presence, & Bullinger aussi en sa m^aduction reale. Il se plainct encore de Brence, pour ce qu'il a escrit, qu'il a affaire avec vn serpent à plusieurs testes, avec des scorpions veneneux, avec vn effronté, vn sophiste le plus malicieux du monde, ce qu'il infere maintesfois en ses escrits.

*Brence de
Bullinger*

*Les fruitz
du nou-
ueau Euā-
gile.*

Finalemēt Bullinger enseigne Brence, qu'en traitant de sa toute-presence il deuroit dire: Par toute l'Eglise croissent & s'augmentent l'orgueil, l'auarice, l'vsure, les blasphemés, calōnies, vilaines parolles, yurongnerie, gourmandise, paillardise, incestes, rancunes, meurtres, contentions & debats. Voys-tu, Lecteur, les fruitz des heretiques expliquez par eux-mesmes? Ne sont-ce pas eux, qui ont ouuert la porte à tous ces crimes & vices, pendant qu'ils ne veulent que la foy, qu'ils mesprisent les Sacremens de l'Eglise, qu'ils preschent la liberté charnelle, & introduisent toutes les heresies iadis condamnées? Depuis que Luther & son troupeau a enseigné, que la seule foy iustifie, que la Confession de noz pechez n'est point necessaire, que le franc arbitre est contrainct à pecher mortellement, qu'on doit plustost aimer l'excommunication que la craindre, que le Pape ny l'Eglise ne nous peuuent enioindre loix sur la conscience, & autres semblables paradoxes: la dissolution & meschanceté des hommes a esté si grande, que Luther mesme a confessé, que ceux de sa secte estoient dix fois pires que les Sodomites. Car les hommes ayans ouï prescher si souuent la liberté Euangelique, ils se sont laissez maistriser à la chair & à toutes sortes de vices: de maniere qu'il est impossible de desraciner ces crimes, que premier on ne reuienne à l'vnion de l'Eglise Catholique, & que la discipline Ecclesiastique ne soit obseruée, ce que le Pape à present viuant se parforce de faire de tout son possible. Mais voyōs encor' vn mot de nostre Bullinger.

IL dict que Brence dict de Bullinger, qu'il se cholere & n'obiet

n'obiette que purs mensonges. Et partant il prouue que Bren-
 ce est Zuuencfeldiā, bien que ledict Brence ne le vueille ad-
 mettre. Voyla la concorde qui est entre ces deux Chefz des
 Lutheriens & Zuingliens: & voyez si le peuple est miserable,
 d'auoir telz dogmatistes. D'auantage Bullinger dict, que Bren-
 ce hayt Zuingle à merucilles, qu'il tonne, crie, & tempeste
 contre le pauvre Zuingle, qu'il le veult accabler à force de
 conuices, qu'il ne le veult admettre entre les fidelles, qu'il ap-
 pelle la doctrine Zuinglienne Impie, qu'il obiette entre aul-
 tres choses aux Zuingliens qu'ilz sont briseurs d'images: la-
 quelle derniere iniure Bullinger accompte à louange pour
 luy & les siens, disant qu'ilz aiment beaucoup mieux estre
 briseurs q̄ faiseurs d'images. Parquoy de ce passage, (lecteur)
 tu colligeras, que les Zuingliens condamnent les images, &
 non les Lutheriens: qui est vne des dissensions de l'Euangile.
 Or Brence reprend principalement Bullinger en ce, qu'il ap-
 pelle de Luther, (comme estant forcené & trop cholere) à vn
 homme paisible & qui parle plus modérément. Nous voyons
 donc, que les heretiques mesmes ont bien cogné la fureur
 de Luther, & puy qu'il a esté forcené & enragé, comment
 n'ont-ilz honte de suyure vne telle furie? Puy que les Luthe-
 riens recoiuent Luther pour le tiers Elie, & que Bullinger ad-
 mire plusieurs beaux dons qui ont esté en Luther, n'estime-il
 point, que ce soit vn des plus grandz dons de Dieu, d'estre fu-
 rieux en matiere de religion? Bullinger nous fera rire deuant
 que de partir, disant que les sectateurs de Luther, voulans ex-
 cuser la trop grande furie & rage de leur maistre, disoient pu-
 bliquement, que les espritz excellens & diuins estoient sou-
 uent poussez de fureur, non pas de fureur poetique, mais bien
 d'vne fureur diuine & Theologienne. Luther a eu donc vne
 diuine fureur, si ses flatteurs disent vray. Bullinger poursuyt,
 racontant que Brence le vouldroit déia voir mengé des vers.
 Puy il expose les contrarietez & sentences repugnantes de
 Brence, comme celuy qui a quelquesfois escrit, que le Verbe
 porte au pain ce qu'il contient, à sçauoir le corps de Christ: &
 maintenant il soustient, que celuy est forcier à la Papiste, qui

*Brence est
Zuuenc-
feldian.*

*Quelz he-
retiques
sont rom-
peurs d'i-
mages.*

*La fureur
diuine de
nos crieurs*

*Contra-
rietez de
Brence.*

*Erreurs
nouveaux
de Brence* pense que le corps de Iesus-Christ est amené estans quelques parolles recitées: combien que, tesmoing Bullinger, Luther a souuēt escrit, que les parolles de la Cene sont le corps & sang de Iesus-Christ, de maniere que Brence appelle en cest endroit son grand Luther Magiciē: ce qui aduint tousiours aux heretiques. Tout cela ne sont q̄ blasphemes, lesquelz ilz payent quelque iour à bon escient, & Brence des premiers. Bullinger dict q̄ Brence maintiēt, que le ciel auquel Iesus-Christ monta, n'est point vn lieu, ny le nom d'un lieu. O folie des hommes! Brence se tairoit-il point estant ainsi picqué? non hardiment. Il dict, (selon Bullinger) que les Zuingliens oppugnent la verité manifestée par les aultres: mais Bullinger repliche, se
 *Bullinger
de Brence*
 „
 „ Brence est contrainct d'endurer partie aduerse ainsi escriuāt:
 „ la diuine prouidence a permis, que Brence parlast si ineptement, à fin que par ce seul moyen les lecteurs fuyssent vn Do-
 „ cteur, lequel apres auoir bien sué & trauaillé, confesse à la par-
 „ fin, qu'il ne sçait où il en est, tant il est brouillé en son cerueau.
 „ Voyla que Bullinger dict de Brence, mais il conuient aussi bien à l'accusateur qu'au defenseur, comme il luy conuient pareillement, que luy & Brence abusent des lieux de la sainte escriture & de Saint Augustin, coustume fort recommandée à tous les heretiques anciens & modernes.

*Erreur de
Brence
quand à
l'enfer.* BYLLINGER produict encor' vn aultre erreur de Brence, à sçauoir qu'il tient, qu'il y a bien vn enfer, mais que ce n'est point vn lieu. Voyla comme Brence nye & le ciel & l'enfer, tout ainsi que Bullinger nye la presence du corps de Iesus-Christ au sacrement de l'autel. On ne sçauoit endurer (adiouste Bullinger) la licence que ce Brence s'est vſurpée a detorquer les escritures saintes, & a quicter les expositions reçues vnanimemēt en l'Eglise. Vrayemēt on ne doit pas souffrir cela en Brence, mais aussi ne le doit-on pas souffrir en Bullinger, qui ne le fait pas moins que Brence, qui a excommunié Bullinger: mais le vaillant champion en tient aussi peu de conte, que de l'excommunication du Pape. Bullinger afferme aussi qu'il n'y a presque pas vne page à la Recognition

de Brence, qui ne soit toute farcie de conuices & iniures : & ^{Brence se} que sur la fin de son liure il recommence à crier, que la sen- ^{ne contra} tence des Zuingliens est diabolique & pleine d'impieté, & ^{les Calui-} que tout ce qu'ilz alleguent ne sont que fauçetez, impostu- ^{nistes,} res, & calomnies: que leur erreur de la Cene du Seigneur n'est pas petit, mais qu'estant fertile (comme il est) il en engendrera vne infinité d'autres, le tout faict par l'instigation de Satan : de maniere qu'en bref il faudra combattre à l'encontre de l'heresie de Nestorius, & sommes en danger de veoir vn athéisme par toute l'Eglise, ou pour le moins vn Mahometisme.

VOYLA les tiltres d'honneur que Brence, qui est maintenant le soustien de tous les Lutheriens, donne aux Zuingliens. Mais Bullinger sur la fin de son liure luy rend la pareille, disant que pour ses particulieres opinions il vient furieux, il tempeste, & rompt toute concorde & amitié. Or ay-ie bien voulu iusqu' icy vous reciter ce que Bullinger auoit escript en son liure contre Brence, à fin que les hommes cognoissent, quelz conducteurs ilz suyuent ez choses, qui causent leur sal- ^{L'auteur} uation ou damnation. Mais comme ie vouloy mettre fin à ^{traicte icy} toutes ces dissensions heretiques, & paracheuer le reste de ^{choses fort} mon histoire, i'ay encor' esté vn peu arresté. Et pour-ce que ^{viles &} ce qui s'ensuyt peult semondre tous bons espritz à se retirer ^{notables,} de l'heresie, i'ay bien voulu en faire participant le lecteur. Au ^{prenant} mois de Ianuier de l'année presente on meit en lumiere vn ^{l'occasion} aduertissement des biens & des maulx d'Allemaigne, com- ^{sur le liure} posé par Iehan Vvigand, lequel me semble estre vn des archi- ^{de Vvi-} ^{gand des} ^{biens &} ^{maux d'A-} ^{lemaigne.} rectes des Centuries de Magdebourg. Car il est des roydes & Stoiques Lutheriës, comme est Matthias Illyric. Il promet en son aduertissement, d'expliquer les benefices de Dieu enuers l'Allemaigne depuis l'an mil cinq cens dixsept, lesquelz il distribue en Ecclesiastiques, politiques, & communs. Le premier benefice de Dieu est, que la Bible a esté cognue à vn ^{La Bible} ^{cognue} ^{d'un chaf-} ^{cun.} chacun, comme ainsi soit que par-auant on ne scauoit que c'estoit: & a presque esté perduë pour-faulte de la maniere, à cause que le peuple n'oyoit parler aux prescheurs q̄ de la legende

des Sainctz, & pouraultant que les estudians en Theologie ne fueilleroient que ces Scholâstiques. Voyla le premier benefice, ou le premier mensonge d'Vvigand. A mesme propos il reprend nostre Bible, & recommande tant la version d'icelle faicte par Luther, qu'il assure, que le Sainct Esprit l'a dictée, & qu'elle est meilleure que toutes aultres versions, en quelque langue qu'elles soient. Mais plusieurs hommes doctes ont monsté infinis lieux corrompuz par Luther, & de faict les Alemans en ont esté si peu contents, que ceux de Zurich en ont faict imprimer vne aultre. Il n'y a fille ny enfant, (adiouste nostre Lutherien) qui en lisant la Bible en Aleman ne l'entende facilement, sans recourir à aucuns commentaires. Vrayement l'Alemaigne a expérimenté à son damp, si chacun entend si aisément la Bible, veu les monstrueuses sectes sorties depuis la Bible Alemande: les auteurs desquelles les veulent confirmer par texte de l'Escripture, tant puyssent-elles estre absurdes.

LE second benefice de Dieu conferé aux Alemans est, (dict Vvigand) que les articles de la foy sont plus clers, qu'ils n'ont esté depuis le temps des Apostres iusqu'à nostre temps. Il n'y a homme lisant ceste impudence, qui n'appelle ce galand vray refuseur, ou agité des furies infernales, de sorte qu'il ne pense point à ce qu'il dict. D'auantage il vient à calomnier les sainctz Peres & les Theologiens Scholastiques, disant que la difference de la loy Mosaique & du nouveau Testament n'a point esté cogneuë depuis les Apostres, iusqu'à tant que Luther y a mis la main. Voyla les principales fleurs de ce liure, comme est aussi celle qui s'ensuyt: que durant la Papauté on a si bien conuert y l'inuocation de Dieu à l'inuocation des Saincts, qu'à peine y eut-il iamais plus grande idolatrie entre les payens. Ce blaspheme appartient à vn vray disciple de Luther, & à vn Vigilance heretique. A iceux nous opposerons Sainct Augustin au liure vingtiesme contre Fauste Manichéen chapitre vingt & vniesme disant: le peuple Chrestien celebre solennellement la memoire des martyrs, partie pour imitation d'iceux Sainctz, partie aussi pour estre

De la version de Luther.

Les articles de la foy plus clers qu'au temps des Apostres

Blasphemes d'Vvigand.

S. Augustin.

participans de leurs merites , & pour estre aydé par leurs prieres. Il suffit de ce passage. Or ne veux-je icy reciter la moquerie des ceremonies du baptesme, des clefz de l'Eglise , & plusieurs aultres parolles Lutheriennes , à fin de ne scandalizer point le lecteur honneste. Certes il est euident, que ce mesdisant n'auoit rien d'homme , ains estoit tout occupé du diable. Car voicy que nostre Vvigand adioust: tu trouueras plus de bonnes choses sur vn commentaire de Luther sur vn prophete ou vn psalme , que tu ne sçauois faire en plusieurs liures des anciens . Et par-aini tu vois que tous leurs liures sont pleins de blasphemés.

Le troisieme benefice, selon Vvigand, est, que le Pape, *Contre le Pape.* Antechrist, a esté abbatu de Luther par l'esprit de Iesus Christ. Je luy concede bien , que Luther a fort rasché de chasser les Papes de Rome, mais il n'est oncques venu au bout de ses desseings . Et Vvigand deuroit auoir honte d'auoir proferé ceste parolle: & suis asseuré que ses compaignons n'approueront pas ses blasphemés, pour-ce qu'ilz sont trop impudens : comme est cestuy-cy , que le Pape s'est voulu vsurper la puissance de destruire les articles de la foy , & d'en faire de nouueaux: qui est vne calomnie qui ne merite pas d'estre refutée, seulement il declare, qu'il ne se soucie point qu'il die, moyennant qu'il picque le Pape de Rome.

Les aultres benefices recitez par Vvigand, sont, que les *Aultres biens recitez par Vvigand.* moines ont esté chassés, que l'Idolatrie (c'est à dire l'inuocation & veneration des Sainctz) a esté aneantie , que le Pape a esté vaincu avec sa tyrannie, que de nostre aage plusieurs doctes hommes ont illustré la foy Chrestienne , entendant les Lutheriens ses compaignons, & qu'ilz ont mis en lumiere de fort beaux liures: benefices à la verité telz , que celuy qui les estime beaucoup, se declare trahyste de son propre pais. Car sans parler des aultres benefices de Dieu, puy qu'on a imprimé plus de liures Lutheriens qu'on ne fait iamais d'aultres, (en quoy neantmoins Vvigand s'abuse) ie vous laisse à penser les fraiz qu'il a fallu faire pour imprimer ces ordures, qui ont gasté toute l'Alemaigne: Car leurs liures ont plus cousté à im-

primer, qu'on ne porte d'argent tous les ans à Rome: dequoy toutesfois ilz crient si fort.

*Quelz hō-
mes sont
heretiques
à Vvigand*

LE septiesme benefice est appellé par Vvigand, la repri-
mende des heretiques, à sçauoir des Anabaptistes, Sacramen-
taires, Antinomes, Enthusiastes, & de ceux qui veulent loger
en mesme lieu Christ & l'Antechrist, entendant les Melan-
cthonistes & Adiaphoristes. En quoy le lecteur apperçoit,
que ce grand Lutherien n'excommunie pas seulement les
Sacramentaires, mais aussi les Melancthonistes & Adiapho-
ristes, qui sont leurs compagnons. Car les vrais Lutheriens
ne peuvent endurer les sectateurs de Melancthon & les in-
differentes, pour-ce qu'ilz ne suyuent pas totalement l'opinion
de Luther: de maniere que les aultres ne les poursuyuent pas
moins, que les plus vrais & formelz heretiques du monde.
Mais notons diligemment ce que nostre Vvigand adiousté,
à sçauoir que luy & les siens doiuent necessairement con-
fesser, que quelque Eglise, (quelque petite qu'elle soit) de-
meurera iusqu'au dernier iour de ce monde. Les Lutheriens
donec deuroient auoir grand peur, veu que les aultres se-
ctaires les ont si bien acculez, qu'ilz ne sçauent maintenant
où ilz en sont. Autant en aduiendra à la fin à tous aultres he-
retiques, & la verité les confondra tous par succession de
temps.

*Note ce
point.*

APRES cela, Vvigand se met à nombrer les benefices de
la police, auquel lieu il flatte les Magistratz, mentant neant-
moins à l'accoustumé: comme celuy qui dict, que depuis les
Apostres personne n'a si bien esclarcy l'autorité & puissance
du Magistrat, que Luther. Et finalement, s'oubliant de sa do-
ctrine Lutherienne quand aux merites, il dict que les Magi-

*En l'arti-
cle 32. &
35. de ses
assertions.*

stratz par leurs infinis labours meritent le Royaume celeste.
Où est allé maintenant l'axiome de Luther, qu'un bon œuvre
est peché veniel selon la misericorde de Dieu, & peché mor-
tel selon le iugemēt d'iceluy? & un aultre semblable, que cha-
cun doit sçauoir qu'il peche tousiours mortellement, si on
compare sa vie au iugemēt de Dieu? Dy donc, Vvigand, puy-
s qu'on peche tousiours veniellement ou mortellement, com-

ment pourront telz Magistratz meriter la vie eternelle. Or ie ne veulx reciter les aultres benefices d'Vvigand, quād à la police & aultres choses, à fin den'ennuyer point le lecteur.

V VIGAND nous veult monstrier par-apres les maux que l'Alemaigne a receuz, & premierement il met deux genres de schismes qui sont en Alemaigne, les Sacramentaires, & les Interimistes. Il dict que tant que Luther a vescu, les Sacramentaires n'occupoient que quelques montaignes en Suisse, mais que luy estant decedé ils se sont espanduz en plusieurs lieux. Les Sacramentaires donc sont semeurs d'yuroye à Vuigand, lequel afferme que les Sacramentaires n'estoient point adjoincts à la Confession d'Ausbourg, quand elle fut présentée à l'Empereur l'an 1530. combien qu'iceux ayent coustume de le dire: & mesmes il dict que depuis ils n'ont iamais esté de celle Confession. Ce qui seroit bien vray, si Melancthon n'auoit tant reforge & remis sur l'enclume celle Cōfession, qu'en fin il l'a fait venir à l'heresie des Sacramentaires. Encore faut-il noter, que (selon Vuigand) les Sacramentaires n'ont pas seulement erré contre l'Euangile en la matiere de l'Eucharistie, mais en plusieurs autres poincts d'importance.

S'ESTANT Vuigand despesché du premier schisme, il se prend au second beaucoup plus dangereux que le premier, à cause que les Interimistes sont bien Lutheriens, mais non pas des roydés. Souz cestuy sont comprins les Melancthonistes & Maioristes, bien qu'ils n'y soient point specifiez, & leur attribué des parolles ambiguës & pleines de fraude: disant en oultre, que mal-heureusement ils maintiennēt ceste proposition, les bonnes œuures sont necessaires à salut: & neātmoins ils sont si impudens, (dict Vuigand) qu'ils se vantent de suyure la doctrine de Luther autant qu'hommes du monde. La cause de ce reproche est, que Vuigād est de ceux qui reprouuent entierement les bonnes œuures, & veulent voler avec leur foy Lutherienne iusqu'au ciel.

LE troisieme mal semble estre bien grand à Vuigand, à sçauoir que depuis la mort de Luther on ne fait point la guerre au Pape, de fait & à toute outrance. Est-il pas meschant d'e-

Deux genres de schismes en Alemaigne.

Les Interimistes Lutheriens.

Vvigand est marry de quoy on ne fait point bone guerre au Pape.

stre marry, qu'on n'oppugne le Pape plus que iamais à belles iniures & conuices? Escoutez comme il se declare bien plus apertement: il faut necessairement, dit il, combattre contre cest Antechrist Romain plus alaigrement, & toutes noz forces r'alliées en meilleur ordre, qu'on n'a fait depuis quelque temps. O mal-heureux heretiques, combien desplaisans serez-vous quelque iour d'auoir eu la lague si prôpte à mesdire!

Le quatriesme mal de Vvigand est, que les pasteurs de l'Eglise (entends les roydes Lutheriens ses compagnons) sont vn peu trop paresseux à refuter les heresies, comme des Sacramentaires & autres. Aucuns estiment que les Lutheriens & Zuingliens ne sont differens qu'au fait de l'Eucharistie; mais plusieurs sectaires, & signamment Vvigand en cest endroit, montrent, qu'ils sont discordans en plusieurs des principaux points de la religion Chrestienne. Il y a bien d'auantage. Les Lutheriens mesmes ont de bien grands differens, de sorte qu'Vvigand appelle icy soubz main les dogmatistes de Lipsie (Lutheriens neantmoins) Pelagiens de nostre siecle, & imposteurs. Quand est des Calvinistes, ils ont (dict Vvigand) des mots si fins & rusez, que quelque chose que vous vueilliez dire, ils y feront venir leurs mots, & ne sçauriez par aucun moyen les prendre. De maniere que tout estant bien considéré, Vvigand est d'aduis, qu'on bannisse tous ces Pelagiés & nouueaux Sacramentaires. Nous en sommes contents, mais il faudra qu'Vvigand, qui donne l'arrest, leur tienne cōpaignie.

Note cecy Le sixiesme mal est vne pernicieuse mixtion de la philosophie avec la Theologie. Auquel lieu il blasme les dogmatistes d'Vvirtemberg & de Lipsie, & les Sacramentaires: de maniere qu'il dict, que les loups deuorent les pauvres brebis. Il nôbre plusieurs choses extraictes de la philosophie, que ceux cy soustiennent contre la verité de l'Euangile. Il dict mesmement, qu'il a ouï vn predicant reciter en sa presche plus de vingt carmes d'Ouide tirez du liure de l'art d'aimer, & ce parlant du mariage au peuple. Vvigand auroit occasiō de se plaindre, si son Luther n'auoit apporté vn Euangile planierement Venerien, comme celuy qui lasche la bride à tous moines & nonnains,

nonnains, & permet aux gens mariez de s'accointer de leur chābriere, si la femme ne viēt assez tost, ou si elle ne veult pas.

LE septiesme mal est la personne-latrie, quand ceux qui ont inuenté des sectes de ce temps, sont presque adorez par leurs sectateurs: où il iette vne pierre au iardin de Melancthon & des molz Confessionnistes, qui ont quicté Luther en certains poinctz. Ceste dissension a tousiours duré entre Melancthon & Illyric, & n'est pas encor' assoupie. Melancthon a escrit fort aigrement contre ceux qui suyuent Illyric, lequel a esté disciple de Melancthon mesme.

LE huietieme mal est, selon Vvigand, que ez petites & grandes vniuersitez, ces personne-latres, ou adorateurs d'hōmes, corrompent la ieunesse. Il faiēt grand mal à ce Lutheriē, dequoy on chasse ainsi les opinions de son Luther, & crainēt qu'en fin on n'en face plus de mentiō en l'Europe. Il se plainēt dequoy les disciples de Luther corrompent la ieunesse. Les hommes doncques deuroient considerer cecy, & penser aux admonitions qui leur ont tousiours esté faiētes, de ne suyure point vn tas de predicans, qui desbauchent toute la ieunesse Chrestienne.

VVICAND recite pour le neufiesme mal, que la ieunesse est venue si desreglée & impudente par les Sacramentaires, qu'elle ne cesse de dire mal des bons docteurs de l'Eglise, (entendz des Lutheriens) qu'elle faiēt des peintures & des pasquilz, & qu'elle s'esbat à qui controuuera plus de mensonges, de sorte que les diables n'en feroient pas tant quād ilz sy voudroient mettre: & qui plus est, celuy qui est le plus naïf à faire ces choses, c'est le mignō des Maistres, & celuy qui est le plus tost prouueu d'honneur. Ce qu'il fault entendre des Melancthonistes, de ceux d'Vvittemberg, & de ceux de Lipse. Le lecteur doit en cest endroit pēser le iugement de Dieu. Car ceux qui auoient tant mesdiēt du Pape, qui l'auoient peint ignominieusement, & qui en auoient faiēt plusieurs pasquilz, maintenant sont payez de mesme monnoye par leurs aduersaires heretiques, comme nous voyōs Vvigand s'en plaindre grandement. Qui est-ce qui ne voit à l'œil par cela, que Iesus-

Ggggg.j.

Christ venge l'iniure faicte au Pape?

*Vvigan
se plaint
des imprimeurs,
pourquoy.*

LE dixiesme mal est, que ceux d'Vvitemberg & de Lipse ont tous les imprimeurs & leurs presses à commandement, quand bien ilz ne font qu'imprimer des sornettes ou iniures contre les fidelles seruiteurs de Dieu: de maniere que ceux qui veulent declarer les heresies qui pullulent, ou faire certaines Apologies, ne scauroient trouuer vne presse pour ce faire. Attendons sur cecy vn euident tesmoignage de Dieu courroucé contre les Lutheriens. Je vous ay dict cy dessus, que quand Luther & ses adherans commencerent à prescher, les imprimeurs se battoient à qui imprimeroit leurs liures, & ce faisoient fort correctement, combien que les liures des Catholiques fussent par iceux mis en lumiere tous gastez & corrompuz. Or maintenant la chance est tournée, pouraultant que les nouveaux Lutheriens (dict Vvigan) espouuantés les imprimeurs avec leurs fouldres, si qu'ilz n'osent desormais rien imprimer contre leur erreur. Vous voyez comme Dieu a renuersé le desfeing des Lutheriens, qui vouloient chasser le Pape, & maintenant leurs compaignons en heresie les chassent: & celuy qui auoit tant detesté l'excommunication du Pape, qu'il disoit icelle deuoir estre plustost aimée, que haye, cognoist maintenant la force de l'excommunication de ses disciples, qui par icelle font, que les imprimeurs ne veulent imprimer, ce qui a esté composé pour maintenir tous ses erreurs.

*Vvigan
faict le
Papiste,
quand à
la discipli-
ne de l'E-
glise.*

L'VNZIESME mal, selon Vvigan, est vne remission de la discipline Ecclesiastique. Or il y a icy de quoy rire. Car Vvigan faict du Papiste, disant que les politiques ne veulent pas souffrir, que les pecheurs notoires & scandaleux soient excommuniés, & qu'ilz soient tenus pour payens, iusqu'à tant qu'ilz ayent faict penitence. Et pouraultant que cela n'est obserué, (chose notable au lecteur) plusieurs maux croissent de iour en iour, comme sont blasphemer la verité, se gaber des ministres de Dieu, voler les biens de l'Eglise, paillarder, yurongner, exercer vsures, commettre homicides, & aultres semblables. Nous voyons la puissance de la verité, veu qu'elle contrainct ses hayneux à la confesser. Que si la discipline Ecclesiastique

est vne fois remise sus, veritablement Vvigand sera tenu de faire penitence publique avec tout le troupeau des moines renuez. Mais encore, n'est-ce pas mocquerie, qu'entre les crimes sus-nommez qui croissent au nouveau Euangile, Vvigand y a nōbré la vollerie du biē de l'Eglise: veu que l'Euāgile de Luther est le motif de tous ces sacrileges & pilleries des biens de l'Eglise, à cause que quelquesfois il donna pardons de planiere remission à tous ceux, qui consacreroient leur personne, biens & honneurs, pour ruiner tous les Eueschez, Colleges & Monasteres, & leur promettoit, que par vn acte si memorable ils seroient vrayz Chrestiens & chers enfans de Dieu? Et c'est l'esguillon qui picqua si fort les rustiques à se reuolter par toute l'Alemaigne, comme il a esté veu cy dessus. Luther vouloit qu'on rauist les biens de l'Eglise à ceux qui les possédoient: & maintenant Vvigand se plainct de cela, comme si luy & ses cōpaignons y auoient interest, lesquels à bon droit seront appelez sacrileges, filz detiennent les biens d'Eglise, comme plusieurs sont.

Le douziesme mal, qui est cause de la ruine de l'Eglise selon Vvigand, est, que nulz Conciles legitimes sont obseruez: *Vvigand se plaint q les Conciles ne sont point obseruez.* Conciles, dit-il, nō de l'Eglise Romaine, mais de celle laquelle luyt la Confession présentée à l'Empereur à Ausbourg: par lequelz motz il condamne tous Conciles du Pape, des Zuingliens, & des Lutheriens d'Vvittemberg & Lipsce: de maniere que tous vrayz Conciles sont ceux d'Vvigand, d'Illyric, ou de Syriac Spangeberg, ou de quelque aultre royde Lutheriē. Voit-on pas en quel aueuglement tōbent les heretiques? Car en ceste façon les Zuingliens, Melancthonistes & Anabaptistes reiettrōt tous aultres Cōciles, que ceux de leur secte. Qui leur a donné à tant qu'ilz sont, l'autorité de faire Conciles? Le Pape, selon eux, n'a puissance quelconque d'assembler vn Concile: & eux, qui ne sont que membres pourriz de l'Eglise, en assemblent bien. En passant il vous fault noter, que quelques Lutheriens d'Vvittemberg enseignent, que les bonnes œuures sont necessaires à salut: & pour ceste raison Vvigand les appelle faulx Apostres, à cause que la seule foy le sauue,

*Brocard
d'Erasme
contre les
Lutheriens.*

prouueu qu'il aye dequoy faire bonne chere, & la commere quant & quant. Tellement qu'Erasme disoit des Lutheriens par maniere de brocard: les Lutheriens ne demandent que deux choses, argent & femmes: car quand est du reste, l'Euan- gile leur en fournit assez. Vvigand se complainct pareille- ment, que les synodes sont faictz plus à la volonté des grands, que droitement. Pourquoy donc, Vvigand, ne retournes-tu à l'Eglise Catholique, laquelle est tousiours conduyte & gou- uernée par le Saint Esprit: & hors laquelle on peult tenir des conciliabules, mais non pas des Conciles legitimes?

*Belle com-
plainte
des Sei-
gneurs se-
culiers de
ce temps,
selon Vvi-
gand.*

Le treizieſme mal selon Vvigand est, que les Empereurs sont faictz à la poste du Pape, de sorte que la vigne de Christ en est destruyte. C'est icy qu'il en veult au Pape, & mentant à l'accoustumé, il dict que les Papes ont donné ou osté selon leur bon-plaisir le diademe aux Empereurs, & plusieurs au- tres choses, qui ne valent pas le parler. Puy il parle des Sei- gneurs seculiers, desquelz les vns oultre-passans leurs bornes, mettent vn pied sur l'Eglise, dit-il: de façon qu'ilz la veullent gouverner à leur poste, qu'ilz veullent faire des ministres cō- me il leur plaira, qu'ilz enfantent tous les iours des formules de religion, qu'ilz font des nouueaux articles de foy, lesquelz à toute force ilz veulent faire tenir à la pauvre & desolée E- glise de Christ, qu'ilz prescriuent aux ministres iusqu'à quant ilz se doiuent mesler à parler des erreurs & pechez, à sçauoir qu'ilz n'ayent point à refuter les erreurs qui germent, (c'est à dire des molz Lutheriens) qu'ilz ne declarent point les faulx docteurs, qu'ilz reprennent seulement en general les pechez, quelques atroces qu'ilz soient sur ceste fin du monde, telle- ment que personne ne puisse sçauoir de qui on parle: que per- sonne ne doibt estre excommunié sinon par l'aduis de la po- lice, qu'on ne doit refuser l'usage des Sacremens si ce n'est se- lon l'aduis des Cours, quelle qu'elle soit. Et puy, dict Vvi- gand, tout ainsi que les Papes ysoient de fouldres en leur ty- rannie, ainsi ces Seculiers menagent d'emprisonner, de chas- ser & de punir les refractaires: tellement que d'un Antechrist Ecclesiastic il en faict vn seculier, & apres auoir assez attribué

*Les politi-
ques.*

ce tiltre aux Papes, il le donne pareillement aux Seigneurs Lutheriens. En quoy nous deuons admirer le iugement de Dieu, veu que ceux-cy, lesquelz n'auoient voulu se souzmettre à l'autorité du Papē, sont forcez maintenant d'endurer vn ioug beaucoup plus grief & intolerable, (comme ilz confessent) de la part des Seigneurs.

Le quatorzième mal, selon Vvigand, est l'hayne qu'on porte aux bons Docteurs de la parole de Dieu, au lieu desquelz on met vn nombre de mignons qui ne preschent qu'au plaisir des hommes. C'est de quoy se deuroit complaindre l'Eglise Catholique, pour aultant qu'au lieu de bons & Catholiques prescheurs on a installé des dameretz qui marchent à la cadence, lesquelz parlent au vouloir du peuple, & enseignent que la seule foy nous sauue. Oyons encore ce que dict Vvigand de foy & de ses compaignons: on appelle, dit-il, les fidelles & synceres ministres de la parole de Dieu Stoiques, rebarbatifz, seditieux, turbulens: & les muetz & plaiseurs (ceux d'Vvittemberg & les Adiaphoristes) sont appelez paisibles, pacifiques & salutaires Docteurs. Le pauvre Vvigand adiouste encor: Entre les ministres on trouuera plusieurs flatteurs, qui excusent le peché des grandz, à fin que les ayans amadouez de telle sorte, ilz les esperonnent à l'encontre des Docteurs synceres, (comme Vvigand, Illyric, Spangeberg) & les facent chasser: de maniere que les pauvres Docteurs sont aujourd'huy fort calamiteux. Voyla les complainctes & doléances de ce royde Lutherien Vvigand à l'encôtre des doux ou molz Lutheriens, & le pauvre homme est tant auégulé, qu'il ne considere pas, que ses compaignons heretiques l'accoustrent de mesme façon, qu'il auoit accoustumé de faire aux gens d'Eglise. La diuine vengeance ne dort pas, non: elle va tardement, mais sa tardifueté est recompensée par la griefueté du supplice.

Pour mieux expliquer les maulx qui regnent en la police, Vvigand y nombre la dissension des Gouverneurs, qui ne font point si bien liez par-ensemble comme il appartient. Mais d'où est venu cela (Vvigand) sinon de l'Euangile de ton

Ggggg.iiij.

Les prescheurs mignons & flatteurs.

Note ceuy

Valere le grand.

Dissensions entre les Seigneurs de ce temps.

Luther & de ses adherans, lesquelz abbreuans le peuple d'une religion nouvelle, l'ont diuisé de sa premiere vnion: de sorte que si les erreurs controuuez par Luther & ses partiaux ne sont esteintz, & qu'on ne reuienne à la premiere concorde des Catholiques, sans point de faulte la Chrestienté en receura du dommageable irreparable.

De la rapine des biens d'Eglise.

OR combien que ie m'ennuye moy-mesme à tant parler d'Vvigand, si fault-il encore que ie mette en auant le mal politic par luy denombé, qui est la rapine des biens d'Eglise. Car il afferme, que plusieurs seculiers abusent fort des biens & reuenuz Ecclesiastiques, si qu'ilz en vsent aultant que du leur propre, soit par droict soit par tort. Mais qui leur a defriché le chemin pour ce faire, sinon Luther & ses disciples? Vvigand dict aussi, qu'on peut bonnement appeller ceste rapine des biens d'Eglise, l'or de Tholose, de maniere que de tant de biens n'est venue qu'une plus grande paureté.

Je te supplie, lecteur, vouloir icy considerer, que quelquesfois les hommes les plus fols, imposteurs & meschans, sont forcez à dire verité. Qui doute que iamais la rapine & pillerie des biens d'Eglise n'augmente vne maison en richesses? Et toutesfois il n'y a si petit qui ne sçache, combien les Eglises ont esté pillées, voire ruinées souz l'Euangile de Luther, sans que l'Alemaigne en soit en rien emmeliorée. Tellement que Vvigand deuroit rougir & se hontoyer, attendu que c'est luy & ses compaignons qui ont causé ce desastre, dignes à la verité d'estre punis icy & en l'autre monde, pour
Esa. 49. des forfaitz si enormes. Vvigand prend plaisir à reciter ce passage d'Isaie, les Roys seront tes nourrisiers, pouraultant qu'il voudroit fort se sentir des reuenus de l'Eglise, & estre entretenu des Princes seculiers. Et de fait en plusieurs lieux les ministres ont esté entretenuz des biens Ecclesiastiques: mais l'heure viendra, à laquelle le iuge incorrompu leur fera rendre iusqu'au dernier denier de ce qu'ilz y ont prins, à sçauoir par les tourmens eternalz qu'il leur donnera.

UN autre bien grand mal en la police, selon Vvigand, est

la paillardise, laquelle a excédé toutes bornes & limites. Mais d'où cela? de l'eschole de Luther. N'est-ce pas toy, Luther, qui as escrit en ta vie, qu'un homme se pouuoit moins passer d'une femme, & la femme moins d'un homme, que de boire, manger & dormir? Vvigand donc deuroit mourir de honte, & deuroit considerer que son gentil Euangile a seruy d'amorce pour enflammer les cueurs, à ce dequoy il se complainct. Car puis que Luther ayant déia voué continence, s'est marié avec vne nonnain, ce qui seruoit pour scéller sa doctrine par vn venerable exemple: personne ne peut douter, que par sa doctrine & par ses mœurs il n'ait inuité tous les hommes, voire ceux qui ont fait vœu de cōtinence, à se faire esclaves de toute luxure: & c'est la source de ceste paillardise si effrenée, & qui enfraint toutes loix diuines & humaines.

ENTRE les maulx cōmuns Vvigand nombre cestuy-cy, qu'il n'y a point de nombre de ceux, qui sont neutralistes, & ont encore la moitié de leur cueur aux prestiges de l'Antechrist, c'est à dire à l'Eglise Catholique. Pleust à Dieu que au contraire les hommes apperceussent les impostures de ces souffleurs du nouveau Euangile, qu'ils ont preschées pour la parole de Dieu. Certainement nous verrions bien tost que l'Eglise Catholique retourneroit à sa premiere splendeur.

VVIGAND adiousté d'auantage, que la ieunesse est par trop desbordée, elle est refractaire, elle ose executer des crimes, lesquels au temps passé les hommes aagez ne cognoissoient point, dequoy tous les iours on voit assez de complaints. Vvigand dit choses veritables: mais que ne confesse-il par mesme moyé, que la doctrine de Luther a ouuert l'entrée à tous ces crimes, comme par le fil de nostre histoire nous auons aduertty le lecteur? Car Luther promet presque de faire tout ce qu'on voudra, à enfans & filles, hommes & femmes, moines & nonnains, grands & petits: choses pour lesquelles Luther deuroit auoir esté bruslé cent fois. N'est-ce pas affaire à vn homme perdu, esclave de Venus, d'escire en son liure de la vie coniugale, que l'homme ne pouuoit point fil vouloir, ains qu'il estoit nécessité d'accointer les femmes, & les fem-

La paillardise sous le nouveau Euangile.

Les Neutralistes.

La ieunesse se fort desbordée en ce temps.

mes estoient forcées de cognoistre les homes? que cela estoit plus necessaire, que dormir, boire & manger? & que pour ceste raison les prestres, moines & nonnains estoient forcez de prendre femme, iettant le froc aux horties? Dequoy t'esmerueilles tu, Vvigand? C'est Luther qui est cause de ce, dequoy

*Advertis
sement de
l'auteur.*

tu fais tes doleances. Or à tant ay-ie extraict du liure de nostre Lutherien, ce qui seruoit pour faire entendre au lecteur les dissensions de noz Euangeliques, à fin qu'il s'esiouisse de n'estre point tombé en leurs retz, & qu'il cognoisse les fructz sortys du nouveau Euāgile, exposez par les fauteurs d'iceluy. Ne pense pas, que ie me plaise à farcir mō liure de telles choses: ce que i'en ay fait iusqu'icy, n'est que pour retenir le lecteur en la religion Catholique, en luy monstrant l'aveuglement, les contrarietez & debars des nouveaux Euangeliques, quoy qu'ils se targuent de la parolle de Dieu aussi bien les vns comme les autres. Ce qu'estant consideré, ie m'asseure que le lecteur qui par apres pourra tomber sur ces discours, quictera peu à peu leur party, & sil est ia Catholique, sera constāt rou-te sa vie.

*Christofle
Gualther*

C'EST E mesme année sortit en lumiere vn escript fort aigre, cōposé par Christofle Gualther d'Vvittemberg, à l'encontre de Iehan Aurifaber de Vinaire, & à l'encontre du premier & second Tome de Luther, faicts par iceluy à Islebe. En ce liuret Gualther traicte à plaisir Aurifaber, luy reprochant d'auoir vilainement corrompu les œuures de Luther, & neantmoins ils sont tous deux Lutheriens. Il luy ob-

*Les œu-
ures de Lu-
ther corrom-
pues.*

iecte donc, qu'il a depraué les sermons de Luther, qu'il ment apertement contre sa conscience, qu'il dict force iniures, & qu'il defend ce sien forfaict Satanic. Bref, il donne tous les tiltres d'honneur à ce maistre ministre, que les Lutheriens ont coustume de donner à ceux qui sont leurs grāds amis. Il produict mesme les parolles de Luther, se plaignant dequoy plusieurs par enuie ou par auarice mettent en lumiere ses sermons tous corrompuz. Vrayement c'est raison: tu deurois bien endure que tes sermons fussent corrompuz, Luther, puis que tu as bien osé corrompre les saintes lettres. Et puy que les hereti-

heretiques osent depraver les liures des aultres , qui doute qu'ilz n'oseront bien faire le semblable és liures de l'écriture & des Saints Peres? Et si la iustice n'y met la main, quelles tenebres aurons nous par tout. Certes i'en sçay qui se complaignent, que les anciens ont esté corrompuz? Cela encore n'est pas tant admirable, que ce que dict Gualthere , à sçavoir que les Papistes & moines ont corrompu les principaux Peres, docteurs de l'Eglise. Comme si les Papistes & moines, esbanduz par toute la terre , auoient conspiré de corrompre tous les liures des Peres. Ilz disent cela, à fin qu'ilz puissent à leur plaisir accommoder les dictz des Anciens , soit au Calvinisme, soit au Lutherisme, soit à autre heresie. Gualthere deuoit bien sçavoir, que la foy Catholique n'est pas telle, qu'elle ayt affaire de corrompre les Peres , mais que le mensonge en a bien affaire, veu qu'il ne peut demeurer sans impostures & deprauations. Aille Gualthere où il voudra , ie luy quitte sa debte, moyennant qu'il satisfasse à la preface de Nicolas Amstdorf grand Lutherien , sur le premier Tome de Luther imprimé à Iène: où il afferme, qu'ez Tomes de Vvittemberg y a mille deprauations : qu'il responde pareillement à son Orfeure, & il n'aura pas tant de loisir de se prendre aux moines & Papistes. Nous pouuons monstrier force exemplaires des Peres anciens escriptz à la main , ne differans en rien de la doctrine que les Catholiques suyuent encor' à present: de sorte que Gualthere, ce braue correcteur de l'Imprimerie , deuroit auoir honte de ce dire. Luy-mesme dict , que Sebastien Munster, moine renyé, auoit reprins la version de Luther au 2. chapitre de Ionas, pour-aultant que Luther auoit aultrement traduit , que ne portoit l'hebraïsme & les commentaires des hebreux: mais que Luther luy fait responce , qu'il ne falloit point se soucier des grammaticistes Hebreux, qui sont vrais Rabbins, c'est à dire bestes sans esprit. C'est vn exemple de la modestie Lutherienne , qui traite de ceste façon tous ceux qui luy contredisent en quelque chose que ce soit. Et Gualthere imite de bien pres ceste modestie de son maistre. Or en ce sien liure il obiecte à l'Orfeure, que faulcement il afferme, que les enfans non bap

*Calomnie
euidente.*

*Munster
repréd Lu
ther, qui
luy respōd
brauement.*

Hhhhh.j.

tizez ont des pechez actuelz (oultre l'originel.) Mais ie les veux laisser en si beau chemin, me contentant d'auoir monstré, que les disciples & fauoriz de Luther ont corrompu les liures de leur Patriarque, tesmoings les aultres Lutheriens, & pour-ce est sortie grande contention entr'eux, tellement qu'Illyric est aussi de la partie.

*Plusieurs
liures he-
resiques.*

PLVSIEURS aultres liures de nos nouveaux Euangeliques furent imprimez ceste année, tous repugnâs les vns aux aultres. Les Lutheriens d'Vvittemberg, ou Brentiens, defendent leur toute-presence contre les Calvinistes d'Heidelberg, qui l'oppugnerent viuement. Pareillement Iehan Marbach, ministre de Strasbourg, fait vn assez grand liure, defendant la sentence de Luther quand à l'Eucharistie, contre les Calvinistes ou Zuingliens. Il auoit aussi escrit trois sermons, mais Iehan Saluian les accoustra si bien, qu'en l'inscription de son opuscul il afferme, qu'iceux estoient pleins de l'heresie d'Eutyches. Car Marbach est vn des meilleurs soldatz, defendeurs de la toute-presence. Encore n'estoit-ce rien, si Iacques Smidelin n'eust fait mettre plusieurs sermons en lumiere, confirmatifz de la sentence de Luther.

*Sceckius
vbiquitaire.*

SEMBLABLEMENT Iacques Sceckius de Schorndorff, en vn sié petit liure semble defendre l'vbiquité ou toute-presence. Bon Dieu, combien d'argent on employe follement pour imprimer ces pernicieux liures, pleins de refueries & heresies. Et neantmoins personne ne s'en plaint, comme si le dommage estoit petit. Et le mal est venu si incurable, qu'on n'y scauroit desormais apporter remede, ains n'auons aultre refuge, que de prier Dieu humblement, qu'il vueille secourir la Chrestienté, comme il cognoist qu'elle en a besoing.

*Soliman
contre les
Chrestiens.*

CESTE année 1566. estant l'Empereur Maximilian assez aduerty, que Soliman Empereur de Turquie faisoit estat de le bien guerroyer, & qu'il se vouloit ruer sur l'Hongrie & l'Allemagne, il traicta à la iougnée d'Ausbourg avec tous les Estatz de l'Empire, pour mettre sus quelque armée à l'encontre des inuasions de ce felon Tyran: de maniere qu'on feir vn beau camp, tant de gens de pied que de cheual. Soliman dóc,

pourfuyuant tousiours l'hayne & maltalent qu'il auoit contre les Chrestiens, vint pour assieger Siget, qui estoit vne place merueilleusement forte, gardée d'un bon nombre de vaillans hommes, le capitaine desquelz estoit le Conte de Serin, homme digne de loüange immortelle. Solimā, selon que le bruiet est, auoit vn camp de cent cinquante mille hommes. Or demeura il vingt & neuf iours deuant Siget, ne cessant iour ny nuyt de liurer assault à ceste place, & la battant impetueusement sans aucune intermission. Le seroy trop long, si ie vouloy reciter par le menu tout ce qui y fut faict: & d'auantage nous n'auons pas encore receu des memoires assez certaines de ce siege. Tant y a, que comme les Turcs assaillirent la place valeureusement, aussi les nostres se monstrerent tref vaillās à la defendre, & principalement ce bon & courageux Conte de Serin, qui monstra si grande constance & magnanimité durant tout ce siege, que Soliman en estant esmerueillé, voulut le prendre à mercy, luy promettant qu'il seroit traicté comme il appartenoit à vn homme si preux. Mais ce bon Capitaine ayma mieux estre tué par ces barbares pour l'honneur de Iesus-Christ & pour garder fidelité à l'Empereur Maximilian, que de viure à son ayse, trahyste. Et par ainsi ayant faict tout ce qu'il auoit peu pour la defence de la place, iusqu'à y auoir perdu la vie, les Turcs prindrent Siget, ce permettant le hault Dieu en vengeance de nos mesfaictz. La teste du Conte, estāt encore toute ensanglantée, fut offerte à Soliman, qui en fut fort esiouy, de maniere que de là on peult coniecturer, combien il estoit sanguinaire & cruel contre les Chrestiens. Toutesfois Dieu ne nous voulant plus punir par les mains de ce felon bourreau, il mourut peu apres ceste expedition. Plaise à Dieu deliurer quelque iour son peuple de la tyrannie & affliction de ce Turc, qui ne se plaist qu'à nous guerroyer, & nous faire oublier le sauueur du monde.

EN ce mesme an 1566. commencerent les miseres, & pitueuses Tragedies es pais de Flandres, Brabant, & aultres, appartenans au Roy d'Espaigne: & si Dieu n'y eust mis ouuertement sa main, il sembloit que la religion Catholique ne de-

Hhhhh.ij.

Siget assailli.

La mort du Conte de Serin.

Prise de Siget.

La mort de Solimā

Des troubles de Flandres.

uoit gueres tarder à estre esteinte. Je declareray donc en bref les choses auenuës & passées en ces prouinces, comme iel'ay peu entendre par lettres & memoires d'hommes à qui on peult croire. Au moys d'Octobre de l'an passé estoient venuës lettres patentes de sa Maiesté à la Gouuernante de Flandres: par lesquelles estoit enioint & commandé pour auancer la religion Catholique de plus en plus, que par tous les pais bas fussent entretenus tous les Edicts, qui auroient esté faicts alencontre des heretiques, par feu de bonne memoire Charles le quint, Empereur: lesquelz aussi auroient esté ratifiez par sa Maiesté: & aussi les canons du concile de Trente, quand à ce qui appartient à la reformation du Clergé, & certains autres articles desquelz s'ensuyuent les principaux.

*Articles
à observer
au pays
bas, par cō
mandement
du Roy.*

QUE les Curez ayent à prendre par escrit les noms de tous leurs parroissiens, & en quel lieu ilz demureroient, & de quelle condition ilz seroiēt. Que si l'en trouuoit qui puy n'agueres habiteroient en leurs parroisses, qu'ilz fussent contraincts d'auoir tesmoignage de leur vie, par le Curé de la parroisse où ilz auroient cy deuant demurē: & si cela ne se peult faire tout aussi tost, qu'on leur commande de ce faire en certain temps. Estoit aussi enioinct de demander aux gēs mariez, qu'on ne cognoistroit point, tesmoignage du Curé qui les auoit espousez, pour sçauoir s'ilz auoient esté espousez à la Catholique: & qu'on escriroit les noms tant des parties, que de ceux qui auroient esté presens à la celebration du mariage.

QUE tous Confesseurs, prendroient le nom, surnom, & la demeure de tous ceux qui se viendroient confesser à eux.

QUE le mesme seroit obserué par les Curez & leurs Vicaires, en prenāt le nom & surnō des enfans qu'on apporteroit baptizer, de leurs peres & meres, & aussi de leurs parrains.

QUE tous Maistres d'escholle, se trouueroient deuant leur Euesque, pour là exposer leur condition, leur patrie, leur religion, & quelz liures ilz lisent à leurs enfans. Sur quoy les Euesques auiseroient s'ilz doyuent estre receuz ou chassez, ou differez pour quelque temps. Que si quelques vns faisoient difficulté de se presenter à leur Euesque, il ne leur se-

roit plus permis d'instruyre la ieunesse.

Q V E les Curez feroient diligente inquisition, à sçauoir si ceux qui viuent des aumosnes publiques sont Catholiques, & silz confessent leurs pechez & communient : que sil s'en trouuoit qui ne fussent telz, ceux qui ont charge des pauures ne leur donneroient plus l'aumosne.

O R ces lettres estans receuës par Madame la Gouuernante en cest an 1566. au moys de Ianuier, elle les feit porter à tous les Euesqs & Magistratz pour les publier: & quoy qu'elles fussent pleines de iustice & equité, toutesfois quelques seditieux, reuoquent tous les troubles de Flâdres sur ces lettres.

Vray est qu'à l'occasion d'icelles courut vn bruit entre le peuple, mesmes on feit accroire à quelques Magistratz du bas *Bruit & complainte de l'inquisition d'Espaigne.* pais, que par cest Edi& l'inquisition d'Espaigne estoit introduite en Flandres. Mais le Roy entendoit seulement, que l'inquisition mesme, laquelle auoit esté obseruée durant la vie de

l'Empereur Charles le quint en ses pais, fust encore gardée & obseruée pour l'entretienement de la foy Catholique. Au demeurant, quelques vns presenterent requeste, à ce que l'inqui

sition d'Espaigne n'eust point vogue en Flandres: & mesmes *Ligue en Flandres.* pour ceste occasion quelques Seigneurs se liguèrent ensemble: & dit-on que quand à l'inquisition susdicte, il y eut aussi

quelques Catholiques qui se meirent de la ligue, lesquels neantmoins s'en separerent apres. Car en ceste confederatiō on

mesdit grandement du Roy Catholique, par-ce qu'il a tasché

(disent-ilz) d'introduyre vne inquisition pernicieuse, & qui

surpasse de beaucoup la cruauté & felonnie des Tyrās payés.

Or le Roy commanda, que les inquisiteurs exerçassent leur

office, comme par deuant ils auoient fai&, & comme il leur

appartenoit par droit & diuin & humain. Parquoy ce q̄ ces

liguez obie&ent au Roy si follement, suffit pour mōstrer, que

les Catholiques à iuste cause & raison se sont despestrez de ceste ligue: combien que peult-estre, ils ne pouuoient endurer

aucunement, qu'on parlât si aigrement à l'encontre de leur Prince. Mais telles parolles aigres & iniurieuses sont fort communes à tous ceux, qui se laissent prédre au piege de ces sedi-

Hhhhh. iij.

tieux dogmatistes : lesquelz de tout leur pouuoir gastent les Republiques, & seruent de mesche à enflammer les espritz à troubles & seditions: dequoy ie ne veux maintenant citer exemples. Ce fut donc lors qu'on commença à couuer quelques entreprises bien secrettement, combien que la fumée en sortoit quelquefois. Car au moys de Mars on punit quelque heretique seditieux à Bruges, lequel dist entre aultres choses, qu'il seroit le dernier de ceux qui seroient punis pour heresie: & que sil eust peu attaindre le moys de May, il n'y auoit plus de danger pour luy.

*Requête
à l'Empe-
reur Ma-
ximilian,
par les he-
retiques de
Flandres.*

OR le premier iour d'Auril on escriuit vne requeste en Latin à l'Empereur Maximilian, & luy fut présentée à la iour née d'Ausbourg tenuë ce mesme an, & ce au nom de ceux, lesquelz és pais bas de Flandres vouloient viure selon l'Euan-gile du filz de Dieu. En ceste requeste ilz se cōplaignent fort de l'inquisition d'Espaigne, & de la publicatiō du Concile de Trente: & prient l'Empereur, qu'il vueille admōnester le Roy Philippe, que desormais il s'abstiēne de resprendre le sang des bons & innocēs, de peur qu'il ne prouoque à cause de ce l'ire de Dieu sur luy & la maison de Bourgongne. Supplient au demeurant l'Empereur, qu'il soit soigneux à manier les affaires de la religion, & qu'il ne se fie à ceux qui suyuent vne moyen-ne religion, que nous appellons Politiques.

LE cinquiesme iour d'Auril plusieurs des Gentilz-hom-mes confederez s'assemblerent à Bruxelles, & presenterent requeste à Madame la Gouuernante, pour faire sursoir l'ex-ecution des Edicts concernans l'inquisition, iusques à ce qu'ilz auroient enuoyé quelcū au Roy. Lors que cela fut faict, estoit en la compagnie de la Gouuernante vn grand Seigneur, Che-ualier de la toison d'or, lequel, selō que le bruit est, dist à Ma-dame: il ne fault point que vous ayez crainte de ces gueux: comme sil eust voulu dire qu'ilz n'estoiēt que coquins & be-listres. Au moyē dequoy ilz s'appellerēt eux-mesmes Gueux, & dit-on que peu de iours apres il y eut vn des plus grandz de ceste ligue & faction, lequel en vn banquet public, qui fut faict à Bruxelles, cria tout hault, *Vive les Gueux:* & quāt & quāt

*D'où est
venu le
mot des
Gueux.*

beut du vin dans vn gobelet de bois à la maniere des Gueux.
Et encor' ilz prindrent tous des vestemēs de couleur cendrée
ou de gris, & pendirēt au costé des gobeletz de bois, où estoit
escriit sur vne barre d'argent, le 5. d'April 1566. *Vive les Gueux.*

Le lendemain estoit l'assemblée des Cheualiers de l'ordre, auxquels la Gouvernante, (apres leur auoir communiqué ^{Responce de la Gouvernante.} ses desseings) respōdit, qu'elle auoit conçu en son esprit quelque moderatiō de ces Edicts, laquelle elle enuoyroit au Roy son Seigneur: & qu'elle moyēeroit enuers luy quelque chose pour eux. Toutesfois, qu'elle ne se hazarderoit pas tāt, que d'abroger l'inquisition pieça encommencée, ny l'execution des Edicts, veu mesmement qu'il n'estoit point expedient au pais bas, de n'auoir aucunes loix pour le faict de la religion. Et qu'au reste ils pouuoient assez cognoistre, combien elle estoit affectionnée aux aultres prouinces de ce bas pais, veu que ia elle auoit promis aux estats de Brabāt, qu'ils n'auroiēt point d'inquisition. Le 8. d'Auril on feit courir vne responce des Cheualiers de la toison d'or, comme s'ils eussent promis, que desormais nul ne seroit puny pour estre seulement heretique, (si avec cela il n'estoit seditieux ou scandaleux) iusques à ce que le Roy en eust autrement ordonné par l'aduis des Estats. Mais c'estoit chose faicte à plaisir, comme les mesmes Cheualiers remonstrent par-apres en public. Au reste les confederez, pour mōstrer leur fidelité enuers le Roy Catholique par quelque signe exterieur, commencerent de porter ^{Denise des Gueux} son effigie d'or, ou d'argent, pendue à leur col: & representoit ceste effigie les vieux escuz. D'un costé on voyoit deux mains s'entre-tenantes l'une l'autre, avec vne besace & vn gobelet de bois, & estoit escriit dessus: *Fidelles au Roy iusques à la besace.* Il courut aussi parmy le peuple vne autre espee de cuyure, d'un costé de laquelle on lisoit ces mots, Escu de Viane: & de l'autre, Par flamme & par fer: avec les armoyries de la maison de Bourgongne engraüées dessus.

Av moys de May en Flandres, Artois, Henauld, Hollāde, ^{Assemblée des Estats en Flandres} Zelande, Frise, & Namur, les trois Estats (à sçauoir l'Eglise, la Noblesse, & le Magistrat) s'assemblerent: à fin que chacun de-

claira ce que que luy sembloit touchant la moderation des Edicts Royaux, laquelle auoit 54. articles. Et aduint que les Estats les approuerent presque tous, & principallemēt ceux d'Henauld, Artois, & Flandres, outre l'opinion & attente des confederez: & encor' adiouterent quelques articles.

LE 2. iour de Iuin la moderation susdite fut enuoyée au Magistrat d'Anuers. Ce qu'ayant entendu le peuple, comme si quelque grād' iniure eust esté faicte par icelle, supplia quelques vns: lesquels vindrent remonstrer au Magistrat, que ceste moderation ne deuoit estre receuë ny approuuée, veu qu'elle estoit faicte seulement par les Cardinalistes: car ainsi appelloyent-ils les Princes Catholiques à cause du Cardinal Granuelle. Au reste, le 9. iour de Iuin furent affichez certains placardz au coing des ruës à Bruxelles, esquels estoit contenuë ceste menace: Quiconque d'entre vous, Messieurs les Consuls, Escheuins, & Gouverneurs des principales villes de Flandres, consentira à la moderation des Edicts du Roy, sans le consentement des Confederez & du peuple, qu'il sçache que bien tost il sera mis en pieces.

*Placardz
terribles.*

*Liuret
semé par les
heretiques
rebelles de
Flandres.*

LE 12. de Iuin fut semé vn autre petit liuret escrit en François, où estoit le nom & le tiltre de tous ceux du païs bas, cōbien qu'il eust esté escrit par ceux d'une province seulement: & l'inscription d'iceluy estoit telle: L'admonition, par laquelle les bons & fidelles subiects, habitās du païs bas, & mesmes les Gouverneurs & Estats d'iceluy exposent, ce qu'en fait de religion ils demandent estre fait & arresté. En ce liuret ils alleguent la paix publique, accordée & publiée entre les Catholiques & Confessionnistes és Estats de l'an 1555, publiée, dis-je, comme ils afferment: veu que eux-mesmes n'obseruoient rien de tout ce qui estoit là ordonné. Car combien que là il soit permis aux Ordres de la Cōfession d'Ausbourg de viure en leur religion, si est-il aussi prohibé par motz expres, qu'ils ne contraindront point les Catholiques à viure selon leur religion: mesmes il est dit, qu'ils ne les pourroient recevoir en leur garde, lors & quand que lesdicts subiects se retireroient de l'obeissance des Seigneurs, ny mesme leur prester aucune
faueur.

faueur. Or auoient-ils fait imprimer ceste paix en l'ague vulgaire sans priuilege, à fin qu'ils esmeussent le peuple: & luy attribuent si grande authorité voire mesmes au païs bas, que iacoit que au commencement il semble qu'ils s'en rapportent aux estatx du païs congregez tous ensemble, toutesfois par apres ilz afferment qu'il n'est permis, ny au Duc de Brabant, ny aux Estatx, de rien constituer oultre icelle. Mais peu de temps apres, la moderation que nous venons de dire fut approuuée par les deputez des trois Estatx, nō seulement de Brabant, mais encore de toutes les aultres prouinces: & s'en allerēt en Espagne avec la responce de tous les Estatx, (comme Madame la Gouuernante auoit promis de faire) le Marquis de Bergues, & le Seigneur de Montigny. Mais les partiaux ne se contentans des requestes qu'ilz auoient faictes, attenterent bien plus grandes choses. Car l'inquisition estant vn peu remise, combien que ce ne fust avec expres consentement, ilz commencerent sur la fin du moys de May & aussi au moys de Iuin, à faire leurs assemblées sataniques au milieu des chāps: & pour mieux se fonder, feirent venir des predicans, partie des villes maritimes de Saxe, partie d'Angleterre & de Frāce, & aultres lieux, lesquelz en despit & du Roy & du Magistrat se hazarderent de prescher leurs erreurs. Au moyen dequoy on fut contrainct de commander par ordonnance publique, que telz predicans estrāgers eussent à vuyder tout le païs bas, & que tous ceux qui gasteroient le peuple fussent prins sans delay, pour en faire punition en temps & lieu, telle que le cas requerroit. Toutesfois cela ne fut point executé, pource que plusieurs n'osoient rien entreprendre contre telz predicans, à cause des grands Seigneurs qui leur tenoient la main, de maniere qu'ilz ne douterent point par-apres de prescher deuant tout le monde. On dit que les premiers qui attenterēt ce beau ieu, furent les Flamans Occidentaulx & qui auoy sinent ceux de Hypres, lesquelz on voyoit aller à la presche en armes. Ce voyans ceux d'Anuers, voulurent incontinent estre de la partie, & comme ilz eussent ia commencé de ce faire en quelque boys, le Dimanche deuant la feste Sainct Iehan Baptiste il y

*Les predi-
cans com-
mencent à
prescher
l'heresie en
Flandres.*

L'AN M.D.LXVI. HISTOIRE DE TOUTES CHOSSES

eut deux presches en vn village bien pres d'Anuers, l'un en Flaman, & l'autre en François, & sçauiez vous comment? par deux hommes dignes de ces Euâgeliques, sçauoir est vn teinturier, & vn courroyeur. Apres cela il n'estoit pas filz de bonne mere qui n'y allast en Hollande, Zelande, & Frise: mais à fin qu'ilz ne peussent estre aucunement incommodez, ilz y alloient tousiours armez. Et puy en Flandres ceux de Hippres, Gand, Hondescot, Aldenard, Bergues, Casset, Tournay, & ceux de l'Isle se meirent en mesme dance. Mais certainement ceux de Bruges resisterent presque deux moys, & ceux qu'on appelle là Francotz, (qui est vne espece de Magistrat perpetuel, * faisant le quatriesme mēbre de Flandres) demurerent encore ce iour d'huy constans. Et se sont monstrez fideles à Dieu & à leur Roy ceux de Bruxelles, de Louvain, de Dordraque, & presque tout le pais d'Artois & de Henauld, excepté Valenciennes.

* Voy
Guicciar-
din en la
description
du pais bas

LE 3. iour de Iuillet la Gouernante defendit estroitement, qu'il n'y eust aucunes assemblées, ny priuément ny publiquement, menaçant les ministres de les faire pendre, & leurs auditeurs de les bien punir: & mesmes promettoit de donner la somme de six cens escuz à quiconque luy pourroit amener quelque predicant. Ce neantmoins on dormoit à exccuter ceste ordonnance, qui fut cause que ceux d'Anuers fortyrent de la ville en plus grand nombre pour ouyr leur presche, se fians aussi à la faueur & ayde de quelques Seigneurs. Lors fut enuoyé le Conte de Megue, à fin qu'il moyennast avec eux qu'ilz eussent quelque garnison, mais il s'en fuyt à la haste, n'ayant rien gagné à parler avec eux. Et aduint bien mieux à vn des Seigneurs confederez auquel les heretiques donnerent grande somme d'argent. Si fut semé par tout le bruiet le huietiesme de Iuillet, que le Conte d'Aremberg venoit avec quelques forces du Roy: à cause dequoy chacun se teint sur ses gardes toute la nuit. Quelque iour apres cela, le feu se prit à trois maisons, qui augmenta beaucoup le courage de la populace, laquelle estant accouruë s'escria, A mort, à mort, il y a sedition: tellement que si le Magistrat ne se fust

Trouble à
Anuers.

gouuerné en cest effroy prudemment, sans point de doute c'estoit fait de la ville. Aussi voyoit-on bien souuent quelques placards affichez aux maisons des Chanoines, con- <sup>Placardz
affichez à
Anuers.</sup> nans ces motz: la parolle de Dieu est que les prebstres soient massâcrez, & qu'il faut pendre tous ces cagotz & chanoines. Au moyen dequoy plusieurs hommes d'Eglise & aultres bõs Catholiques abandonnerent leurs maisons, & par mesme moyen on emporta beaucoup de thresors. Alors la Court enuoya le Prince d'Orenge pour pacifier le tout, qui feit bien quelque cas par sa venuë, mais le peuple temeraire ne laissa pas d'aller encore plus ardemment que de coustume à sa presche, de sorte que le Dimanche 14. iour de Iuillet, on feit six presches hors la ville.

LE 15. de Iuillet les Seigneurs Confederez s'assemblerent en la ville Sainct Trudon, où furent enuoyez le Comte d'Aiguemont & le Duc d'Areescot, lesquelz ne feirent rien. Mais ayans changé d'opinion ils assignerent leur assemblée en Duffle, au dixhuietième iour de Iuillet. Si vserent les confederez en ceste assemblée à Trudon, de vestemens noirs, & <sup>L'assem-
blée à S.
Trudon.</sup> auoient vne chesne au col, à laquelle pendoit l'effigie du Roy avec les gobeletz de bois. Là fut présentée aux Confederez vne requeste des marchans & du commun peuple, par laquelle ilz supplioient les proteçteurs, qu'ilz ne fussent point empeschez en l'exercice de leur religion, iusques à ce que les estatz legitimemēt congregez en auroiēt autrement disposé. Or par-auant ilz auoient demandé seulement la congregati- on des estatz, & vous voyez que maintenant ilz adioustent, congregez legitimement, non sans grande moquerie. Au reste, ilz promeirent qu'ilz laisseroient les armes. Les Confederez leur feirent responce, que pour le fait de la religion ilz ne seroient tourmentez aucunement iusques à ce que par les estatz en seroit ordonné au contraire, moyennant qu'ilz fussent modestes & non seditieux. Et aduertirent le Prince d'Orenge & le Conte d'Aiguemont, qui estoient au Bourg de Duffle pres Anuers, qu'ilz retiendroient le peuple en tout deuoir & obeissance, pourueu qu'iceux au nom de Madame

L'AN M.D.LXVI. HISTOIRE DE TOUTES CHOSES

la Gouuernante leur proumeissent seureté iusques à l'assemblée generale. Doncques le 18. iour de Iuillet leurs deputez se trouuerent à Duffle, pour parlementer avec les Seigneurs ia nommez, & leur teint-on les propos les plus modestes qu'il seroit possible de dire, à fin qu'ilz ne fussent point irritez à faire quelque cas de pire: & furent priez par lettres, qu'ilz feissent cesser tous les presches qui se faisoient aux champs, pour ce mesmement que le bruiet courroit, que la principale cause de ces presches auoit esté la requeste du cinquiesme iour d'Auril, laquelle les Seigneurs auoient présentée. Que s'ils les faisoient cesser, par cela seul ilz seroient reputez pour innocens: veu mesmemēt, que oultre les deux Ambassadeurs que nous auons dict auoir esté enuoyez par deuers le Roy Catholique, la Gouuernante auoit encore despesché vn autre courrier en Espagne, à fin qu'il pleust au Roy accorder l'assemblée generale des Estatz, pour faire cesser tous ces synodes ou presches particuliers. Et qu'au demeurant, la Gouuernante ne leueroit point les armes alencontre d'eux, pourueu aussi qu'ilz ne commençassent. A quoy les deputez des Confederez ne respondirent rien sur le champ, pource que leur charge ne s'estendoit pas iusques là, mais par-apres ilz respondirent par escrit. Tant y a, que M. la Gouuernante voulant obuier à tous dangers, manda lettres par toutes les villes & citez: par lesquelles elle aduertissoit les habitans de se donner garde qu'il n'aduint aucun trouble en leur ville, & qu'ilz ne fussent surprins des heretiques liguez. Elle rescriuit aussi à Messieurs les Euesques, & les prioit de contenir le peuple en son deuoir à force de bien prescher & corriger les mauuaises mœurs, & qu'ilz ne cessassent de ieusner, & faire prieres & aumosnes pour appaiser l'ire & fureur de Dieu. Ce que entre aultres obserua soigneusement l'Euesque de Bruges, commandant au Clergé de ieusner le mercredy, vendredy & Samedy, & admonnestant le peuple que desormais il fust plus ardent à prier Dieu, à quoy faire il les en-horta tous les iours l'espace d'un mois. Vn peu apres on aduertit par lettres Messieurs de Bruges & les Francotz, par quelles ruses les hereti-

Admonition aux Confederez de Flandres.

Deuoir des Euesques au temps des troubles.

ques auoient deliberé d'introduyre le presche aupres de leur ville le Dimanche prochain, à quoy s'opposèrent fort les Brugeoys quelque temps. Mais les autres villes commencerent à enroller quelques gens-d'armes, afin que sil suruenoit quelque trouble il fust incontinent esteinct, d'autant que chacun tenoit pour resolu, que les heretiques brassoient quelque cas. Toutesfois ceux d'Anuers ne voulurent point encore faire leuée de gens dans leur ville, quoy que le Prince le requist. Or aduint que quelques vns se parforgerent d'establiir le presche des champs enuiron ce temps à Monts en Henauld, mais on sortit de la ville, & furent tresbien frottez ceux qu'on rencontra, & peu de temps apres furent chassez bien loing de là.

SV R la fin du moys de Iuillet les deputez des Confederrez se trouuerent de rechef à Bruxelles, & respondirent par escrit assez prolixement à neuf poinctz proposez à Duffle. *Responce des Confederrez.* Premièrement ilz remercient la Gouuernante de ce qu'elle auoit despesché quelques Seigneurs en Espagne. Secondement, ilz promettent d'estre obeissans au Roy Catholique & à Madame la Gouuernante. 3. que quand à l'inquisition, la promesse n'auoit pas esté gardée. 4. que la trop longue attente de la responce du Roy, l'extraordinaire assemblée des estatz, & aussi les menaces faictes tant à la noblesse qu'au simple peuple, estoient cause qu'ilz ne pouuoient empescher le peuple, qu'il n'allast tousiours à la predication. 5. qu'ilz sont tous prestz de resister à tous ennemys estrangers du pais, mais q leur deuoir ne leur permettoit pas de cōbattre les fidesles seruiteurs du Roy. 6. qu'on ne scauroit verifiser qu'aucun d'entr'eux ayt incité le peuple aux susdictes predications, combien qu'ilz ne vueillent nyer, que plusieurs d'eux n'y aillent, par-ce qu'ilz sont d'une mesme religion. 7. qu'ilz s'estoient trauaillez en vain iusques icy à empescher les susdicts presches, & partant ilz supplient son Altesse d'y apporter remedes plus expediens. 8. qu'ilz ne doutent aucunement de la bonne affection du Roy, voire mesmes qu'ilz souhaitent grandement sa venue, pour aultant qu'ilz n'ont en rien offen-

liij.iiij.

se fa Maieſté. Ce neantmoins, voyans que son Altesse ne se fioit gueres à eux, & que mesmes ilz estoient communément accusez de lese maieſté, qu'à bon droit ilz auoient demandé ayde de l'estranger, & que toutesfois ilz aymoient beaucoup mieux, que son Altesse & les Cheualiers de l'ordre de la toison leur promeissent seureté. Finalement ilz ne nyent point qu'ils n'ayent promis tout ayde aux marchans & aultre peuple à l'assemblée Sainct Trudon, mais qu'ilz n'auoient fait cela pour aultre fin, sinon à fin qu'ilz ne fussent contrainctz de mendier secours du François. Et le premier iour d'Aoust, d'autant qu'ilz auoient entendu que la Gouuernante desireroit bien qu'ilz s'expliquassent plus clairement, ilz le firent par vn aultre escript assez long. Auquel ils disent entre aultres choses, qu'ilz estoient bien fort occasionnez à se plaindre, pour ce que apres leur requeste présentée certains Cheualiers de l'ordre s'estoient sequestrez & alienez d'eux comme criminelz de la Maieſté, & auoient enhorté leurs parens & amis de ne se liguier point avec eux: & posé qu'ils l'eussent ia fait, qu'ils s'en retirassent incontinent: & beaucoup de choses semblables y sont comprises, lesquelles nous laissons pour le present. Et tandis vn iour furent semez plus de deux milles placards à Anuers, dans lesquels estoit contenu cecy: il est permis à ceux de l'Eglise reformée de viure selon la profession de leur foy, moyennant qu'ilz se monstrent promptz & fidelles seruiteurs du Roy, & qu'ilz n'excitent aucuns troubles, en obeissant aussi aux Magistratz. Mais comment se pourroit-il faire, qu'ilz fussent fidelles subiectz du Roy, veu qu'ilz suyuent & defendent les sectes malgré luy? Certes ils declarerēt assez par effect leur fidelité vn peu apres. Car au mois d'Aoust le propre iour S. Laurent, l'Eglise de ce Sainct fut ruinée à Caslet en Flandres, par vn apostat Augustin qui enflāma & accouragea la populace à faire ce beau chef d'œuvre.

*Aultre
escript des
beretiques.*

*Placards
affichez à
Anuers.*

Le lendemain ceux de Bailleul, & le 13. du mesme mois ceux de Hyppres se ruerent sur les monasteres des mendians & autres, & ruinerent tous les temples qui estoient dedans ou

dehors la ville, briserent toutes les images, les Crucifix, les au-
tels, les baptisteres, les tabernacles, orgues, bancs, chapelles, <sup>Eglises & monastere-
res pillez</sup> chaires, chandeliers, voire mesmes meirēt en piece les liures.

Et apres suyuirēt ceux de Caslet, Popering, Hondescot, Ros-
brug, Bergues, Armentiere, Rotornac, & autres : lesquels, ou
hommes subornez & attiltrez par eux à ce faire, briserent &
bruslerent, ou aussi emporterent toutes sortes d'ornemens,
thesors, calices, platēnes, chopinettes, & encensoirs: & (ce qui
est horrible mesmes à dire enuers tous hōmes qui font pro-
fession d'estre Chrestiens) la fureur les domta si bien, qu'ils
meirent souz les pieds, que di-ie souz les pieds: qu'ils percerēt

& bruslerent la sainte Eucharistie, dont n'est merueille filz <sup>Brutalité
des heresi-
ques.</sup> en feirent autant aux reliques des Saints, & au saint Chres-

me. Continuans encore leur rage, ils gasterent plusieurs bel-
les bibliothèques, perte certainemēt irreparable & aux ama-
teurs des lettres & à l'Eglise: Et sçavez-vous comment cela <sup>Les Bru-
geois res-
sistent aux
heretiques</sup> alla? quelques pendarts en bien petit nombre feirent tout ce
rauage depuis le 10. iusques au 26. iour d'Aoust, en Flandres,

Hollande, Zelande, & Frise. Or comme les Brugeois eussent
ouy dire, qu'il venoit bien 30. ou 40. mille heretiques, lesquels
à main forte vouloient planter le presche en leur ville, ils cō-
çurent merueilleuse crainte & nō sans cause, iusqu'à ce qu'ils
veirent qu'ils n'estoient que huit cens armez de pistolles &
espées: lesquels ayans presché deux fois au costé de la ville ne
sçeurent rien faire d'avantage. Car le Conte d'Aiguemont es-
toit en la ville, appelé par le Magistrat d'icelle, lequel Conte
enuoya vn herauld pour signifier à ces Messieurs qu'ils vuy-
dassent tost le païs de Bruges. Et me semble, que Monsieur le
Preuost de Bruges, le Seigneur d'Ogniez Cheualier de l'or-
dre, merite d'estre haut-louē en cest endroict, lequel ferma
les portes de la ville sur le nez à cinquāte heretiques, qui vou-
loient entrer pour brasser quelque cas de nouveau. Lesquels
voyans qu'ils auoient trouué visage de boys, chanterent leurs
psalmes iouxte les murailles de la ville, & se donnoient quel-
que morceau à manger l'un à l'autre, qui estoit leur gentille
Cene.

L'AN M.D.LXVI. HISTOIRE DE TOUTES CHOSES

Trouble à
Anuers.

LE 15. d'Aoust le iour de l'Assumption nostre-dame, nouveau trouble s'esmeut en la cité d'Anuers. La estoit la chaire posée & accoustree, en laquelle les Calvinistes deuoient prescher: mais ils furent empeschez de poursuivre par l'autorité du Prince d'Orenge & du Magistrat. Le Dimanche ensuyuant on feit procession en l'honneur de la vierge Marie comme estoit la coustume, & ne fut sans q plusieurs eussent belle peur, voyans que les heretiques disoient mille blasphemés contre la sainte vierge. Le lendemain le Prince d'Orenge partit d'Anuers, au moyen dequoy les heretiques pensoient estre venuz à la fin de leurs desseings, & feirent tant que ce iour là y eut sept predications tant de Calvinistes que des Lutheriens.

Brisement
des images
à Anuers.

Le mardy ensuiuant tandis que les Chanoines disoient vespres en l'Eglise nostre-dame, voicy vn couturier qui mōra en la chaire, & ayant demandé vn nouueau testament, prouoqua le Pasteur à disputer auecques luy. Dequoy estant irrité quelque nautonnier bon Catholique, feit bien tost descendre le couturier de la chaire, mais il se trouua vn heretique lequel bleça ce nautonnier au bras d'un coup de pistolle, & incontinent le tumulte s'espandit par l'Eglise & par toute la ville. Ceste Eglise nostre-dame estoit vne des plus belles qu'il est possible de veoir, enrichie & embellie de plusieurs architectures & peintures excellentes; & de choses de tres-grande valeur. Ce fut en ce temple auquel ces belistres se meirent à faire la guerre aux images, abbatans & brisans en mille pieces les autels, & images: & mesme le lieu ou reposoit le pretieux corps de nostre Seigneur, qui auoit cousté à faire quelques milliers d'escuz. Quand aux autels ils les arracherent des le fondement, & puis les meirent en pieces, ce qu'ils feirent pareillement és autres temples & monasteres, forçenez & priuez de leur sens. Et ne laisserent presque rien d'entier és monasteres, d'autant qu'ils iettoient par terre ce qu'ilz ne pouuoient deuorer, & espandoient le vin & la ceruoyse en debondant les muys: & est chose horrible, qu'ils meirent de l'urine & du fient és pots à beurre & en la farine, & pillerēt tous les meubles: & (pour gaster & ruiner les ames) enhorterent les

Rage des
heretiques
es monastere
s.

moynes

moynes à ietter le froc aux horties. Brief nul ne scauroit dire ne croire, le mal que feirent ces endiablez hommes en peu de iours seulement, à Anuers & autour d'icelle ville. Car quelques vns d'entr'eux sortans de la ville, allerent assouir leur rage & fureur autour d'icelle, ne laissant rien d'entier és Eglises. Et fault bien dire que la premiere nuit que cest orage commença, fut bien perilleuse aux Catholiques, & signamment à ceux qui estoient des Eglises ou monasteres, tellement qu'ilz estoient à demy-morts de peur, & fuyoiēt qui çà qui là, n'attendant que l'heure de mourir. Vous eussiez veu les pauvres nonnains fuir de leurs monasteres à demy couuertes, à fin qu'elles peussent euitier les pattes de ces mastins. Lesquelz fermerent l'espace de quelques iours les portes de toutes les Eglises, à fin qu'on ne peust desormais celebrer la Messe, de forte que quelque homme de bien a gentiment dict, que en ce temps là ceste ville estoit vne nouvelle Babylone, sans Roy, sans loy, sans sacrifice.

O R les Calvinistes auoient leur presche en ceste Eglise Cathedrale, & les Lutheriens en l'Eglise Saint George. Lors y auoit à Anuers vn homme fort importun & audacieux, né pour faire sedition, & s'appelloit Herman, lequel fut comme le capitaine & guidon de ceste populace enragée, par ses predications seditieuses. Et à fin qu'il ne manquaſt rien à la confusion de ceste ville, apres que les Calvinistes & Lutheriens eurent leur lieu assigné pour prescher, les Anabaptistes furent si hardys que de prescher publiquement hors la ville. Mais cela leur estant defendu par le Magistrat, ils desisterent de prescher en telle sorte, & neantmoins ils scauoient où s'assembler couuertement en la ville. Et c'est ainsi que ceste ville fut si vilainement desolée, par ces trois heresies si diuerses entre-elles, des Calvinistes, Lutheriens, & Anabaptistes. Mais ie ne doy pas oublier, que apres qu'ilz se furent bien tourmentez à abbatre le Crucifix de la grande Eglise, ils souffrirent que les deux larrons qui estoient en mesme croix y demeuraſſent tousiours: par quelle chose ils nous feirent toucher au doigt, qu'ils n'ont que faire de la memoire de nostre Sauueur qui a enduré mort

Kkkkk.j.

*Lutheriens,
Calvinistes & Anabaptistes preschent à Anuers.*

Le crucifix abbatu, non les larrons.

pour nous . Si auoient deliberé ces heretiques seditieux de s'emparer vn iour du palais fort grand & magnifique, & quant & quant de la tour nostre-dame, & des prisons pour se fortifier: finalement de créer nouueaux Magistratz & se faire maistres de la ville: mais le Senat fut si prudent, que ces meschans ne peurent accomplir leurs conceptions.

*Eglises de
Bossedue
gastées.*

LE 22. d'Aoust, les heretiques de Bossedue briserent tout ce qui estoit en l'Eglise Saint Iehan, Eglise si belle & si propre qu'on n'y eust sçeu rien adiouster d'ornement & perfection: & toutes les aultres Eglises & monasteres esprouuerent la fureur & peruersité de ceste canaille. Et singulierement les Conuens des Cordeliers & Iacobins, esquelz y auoit bõ nombre de gens fort addonnez au seruice de Dieu. Mais ce sont ceux à qui en veulent ces heretiques, sçachans bien que leurs erreurs & leurs meschancetez sont de beaucoup retardées, par les predications & aultres honnestes exercices de ces hommes. Si fut aussi la Chartreuse de celle ville miserablement desolée, & ce sont les beaux faictz de ce nouueau Euan-gile, lesquelz quiconque sçait mieux commettre, est le plus estimé entre ses compaignons.

*Eglises
rompues à
Gand, à
Tournay.*

LE 23. iour semblable guerre fut denoncée aux images en la ville de Gand, & le iour ensuyuant à Valenciennes & à Tournay. Et en tous ces lieux, comme aussi à Bossedue, furent commises choses horribles enuers la sainte Eucharistie & les reliques des Saints, mesmes es sepulchres de quelques grands Seigneurs, sous espoir d'y trouuer du thresor: & dit-on que lon trouua à Tournay grande quantité d'or & d'argent. Au demeurant, ceux qui feirent ces beaux tours à Gand, n'estoient, selon qu'on dict, que trois ou quatre cens des plus bellistres de la ville, tellement que c'est merueille comme si peu de gens & si coquins eurent mesmes la hardiesse d'entreprendre cela. Ils feirent mille maux, & nommément à l'Abbaye de Blandin, & au conuent des Iacobins, renuersans force mar-

*Bibliothe-
ques gastées
par les
heretiques.*

bre de grande valeur, &, qui pis est, plusieurs Bibliothèques excellentes, entre lesquelles celle de Blandin auoit grand nombre d'exemplaires fort anciens. Es lieux cy dessus men-

tionnez n'y eut aucun seruice diuin par quelque temps, au grand contentement des diables à qui tel seruice n'est en rien agreable. Et ne dormoient pas messieurs les predicans en plusieurs aultres lieux, ains allumoient le feu ia assez espris, par toute maniere de laquelle ils se pouuoient aduifer.

TEL iour s'esmeut le tumulte à Malines, qu'il s'estoit esle-
 ué à Gand, & ia seruoit on sur l'Eglise des Iacobins & des Carmes pour y faire comme és aultres, n'eust esté que les bourgeois ne le voulurent endurer: tellement que sur le vespre les heretiques allerent piller hors la ville le conuent de Hansuic & quelques aultres monasteres: & on ne feit point le diuin seruice à Malines, depuys le mardy iusques au Dimanche. Ils auoient enuiron douze ieunes hommes pour leurs capitaines, lesquelz vn peu deuant auoient tiré hors de prison vn prisonnier à Viluord.

LE 24. iour d'Aoust qui est le iour & feste Saint Barthelemy, la rage & peruersité des heretiques se môstra bien apertement à Aldenard & és bourgades circonuoyfines. En ces quartiers y a vn fort beau conuent de religieuses qu'on appelle Magdendal, dans lequel ils briserent les images, comme on auoit fait és Abbayes d'Anuers, & rompirent encore tout ce qui sert pour le diuin seruice, mesmes les vitres & aultres choses qui là estoient. Or le bruiet auoit couru à Bruges, que du costé de Gand venoient bien soixante mille huguenotz, lesquelz s'estoient resoluz de faire mourir Messieurs de Bruges, silz faisoient semblant de resister: car ce iour auoit esté assigné pour ruiner les Eglises de Bruges & mettre les images en pieces, & à fin que cela fust fait plus commodément, on auoit fait courir ce fol bruiet. Au moyen dequoy suruint de rechef grand trouble en ceste cité, & toute la nuict on ne cessa par le commandement du Magistrat, d'emporter les plus riches ioyaux & plus pretieuses images des Eglises és lieux plus asseurez, & meit-on gardes en chacune Eglise, qui seroient pour faire teste à l'effort des heretiques, d'autant que les menaces croysoient de iour en iour. Mesmes le Magistrat feit hastiuelement venir quelque garnison par le Conte d'Aigue-

L'AN M.D.LXVI. HISTOIRE DE TOUTES CHOSES

mont, & n'estoient que quarante harquebuziers, par la venue
desquelz ceste ville euit vn fort grand peril & desordre. Et
incontinent apres on feit leuée de soldatz dans la ville aux
despens du Clergé & des bourgeois, & estoient bien deux
cens que de la ville que de dehors, qui empescherent toute la
brauade des heretiques. Et en cest endroit seront à iamais
loüangez ceux de Bruges, avec ceux de Louvain & de Bru-
xelles, qui se sont opposez aux heretiques de pied & de teste:
& avec eux ceux d'Alost en Flandres, de Tendremonde,
Courtray, Dunkerque, & singulierement ceux de l'Isle, les-
quelz se porterent fort sagemēt pour s'exempter de tout tu-
multe, en ostāt toute sorte d'armes aux heretiques. Aussi tous
ceux qui ont esté fermes & constans en cest esbranlement
des affaires, meritent grandes & singulieres loüanges à tout
iamais.

*Brise-ima-
ges à V-
trech.*

LE 25. d'Aoust les heretiques forçerent à Vtrech quatre
Eglises parrochiales, & le conuent des Cordeliers & Iaco-
bins: & le lendemain ayant fait nettoier l'Eglise Sainct Iac-
ques, prescherēt en icelle toute vne semaine. Ce neantmoins
les cinq Eglises collegiales & les autres cōuents feirent si bō
guet, que les galans ne les peurent endommager, & mesmes
ne cesserent point de celebrer la Messe. Ces heretiques execu-
terent leur rage & fureur accoustumée ez villes d'Hollande,
excepté Dordraque, Goude & Harleim. & quelques autres pe-
tites villes, & se porterent fort cruellemēt enuers les pauvres
mendians, quoy que ce fust sans meurtre.

*Edict de
la Gouver-
nante.*

TANDIS doncq' que ceste pitoyable Tragedie du nou-
ueau Euangile se iouoyt, Madame la gouuernante feir publi-
er vn edict le vingtroisiesme d'Aoust rāt au nom du Roy Ca-
tholique comme au sien: & donnoit assurance à toute la no-
blesse confederée, promettoit encore surseance de l'inquisi-
tion, iusques à tant qu'il eust pleu aultrement au Roy. Mais
ceste assurance fut donnée avec telles conditions, qu'ilz se-
roient obeissans d'oresenauant à la Maieité, & qu'ilz tasche-
roient selon leur possible à assoupir tous ces troubles & re-
uoltes, ne permettroient que les bris-images poursuyussent

plus oultre, ains puniroient tous les infracteurs de cest edict, mettroient peine que le Clergé, le Magistrat, & la noblesse Catholique ne seroit greuée ny offensée, que la populace poseroit tout soudain les armes, que és lieux où par le passé il n'y auroit point eu de presche il n'en y auroit point encores, & que és lieux où ia il en auroit esté fait, elles se feroient sans trouble ou scandale quelconque. Finalement qu'ils resisteroient ensemble à tous ennemys estrangers & aux rebelles, & persuaderoient à ceux de la nouuelle religion, que desormais ils fussent obeissans à ce qui auroit esté conclu & arresté par le Roy selon l'adujs des Estatz.

LE 24. d'Aoust quelques vns des Seigneurs confederez ^{Les confederez escriuent aux heretiques} escriuirent lettres aux ministres, consistoires, & marchans, par lesquelles ils les exhortoient de se tenir modestes iusques à ce qu'ilz seroient venus pour faire cesser tous troubles, & les prioient de se tenir pour asseurez qu'on ne les molesteroit point pour le fait de la religion. Le lendemain iceux mesmes avec dix aultres, iurerēt tant pour eux que pour tous les cōfederez, qu'ilz garderoient entierement tout ce qui auoit esté ordonné par la Gouuernante, & quant & quant aneantissent leur ligue tant que ceste asseurance auroit lieu.

A v reste le 25. dudit moys par edict public fut ordonné, ^{Edict contre les briseurs d'images.} que tous briseurs d'images, pilleurs d'Eglises & de monastres, incendiaires, & semblables malfaiçteurs seroient punis corporellement & leurs biens confisquez: & d'abondant on constitua amende arbitraire & perte de priuileges à tous Magistratz, Preuostz, & tous aultres qui ne feroient leur deuoir à rembarrer ceste canaille susdicte, & aussi vn grief supplice à ceux qui s'assembleroient avec les armes.

LE 28. d'Aoust le Seigneur de Bacquerzel estat enuoyé pour assoupir les troubles à Aldernad, par cas fortuit trouua au môr Girard quelques briseurs d'images de ceux mesmes qu'auoient assailly Aldernad. Parquoy il feit sonner le tocsein pour amasser les citoyens & paisans, avec lesquels il courut ^{Heretiques tuez.} sus à ces briseurs d'images: & furent tuez dix ou douze des plus braues d'iceux, & le ledemain furent pendus 21. Les aul-

Kkkkk.ijj.

tres qui estoient en grand nombre furent foüettez & banniz. Et en mesme temps on feit semblable expedition de ceste vermine d'hommes à Marchenes, qui est vn riche conuent de religieux de l'ordre Sainct Benoist. Ces galans auoient rompu leur foy au Seigneur de la Tour, de ne point rompre l'Eglise parochiale de la Seigneurie: & mesmes auoient fait choses bien fort indignes à la sainte Eucharistie. Au moyen dequoy il appella quelques gentils-hommes de Doüay, avec lesquels & ses villageois il happa les heretiques sortans du dict conuent, où plusieurs furent massacrez, plusieurs naurez, & vn ministre leur Capitaine pendu tout sur le champ. Or ia faisoit-on amas de gens au pais d'Artoys & de Luxembourg au nom du Roy, à fin de domter les heretiques rebelles, à cause que ces mal heureux ne pouuoient oncques demeurer en repos, & mesmes vouloient obtenir qu'il y eust presche à Bruxelles: ce que toutesfois le Magistrat empescha, faisant fermer les portes à fin qu'ilz ne peussent sortyr, à quoy tous les citoyens qui sont appelez au conseil tenoient la main fort dextrement.

*Les predi-
cans chas-
sez des E-
glises.*

OR estoit le Prince d'Orenge de retour à Anuers, & bien tost apres on feit leuée de gens plus grande que parauant, iusques à deux mille quatre cens hommes. Au mesme iour fut executé vn Angloys & deux aultres pandartz, & trois condânez aux galeres: fut aussi enioinct aux heretiques sur grosse peine, de ne point molester en sorte que ce fust les Catholiques touchant la Messe & aultres offices, & qu'iceux feroient de rechef predications & aultres exercices selon l'Eglise catholique. On permet aussi aux heretiques de prescher en la nouvelle ville, moyennant que ce ne fust pas és Eglises. A cause dequoy le predicant Lutherien fut contrainct de quitter l'Eglise Sainct George, & toutesfois il ne voulut iamais obeïr, sans auoir licence de faire temples, desquelz les vns appartiendroient aux Lutheriens, & les aultres aux Caluinistes. Au demeurant, à Malines fut pendu vn briseur d'images le dernier iour d'Aoust, & les chefs de la faction furent tous emprisonnez.

LE 3. iour de Septembre la Gouuernante fait commander souz peine de la mort, de ne point leuer cōpaignies, & de ne se faire enroller à la guerre: ce qu'elle fait, par ce qu'elle auoit ia esté certiorée, que les heretiques assembloient vn camp en quelque lieu, pour se venger. Et en ce moys furent tenuz plusieurs traictez avec les heretiques par toute Flandres, & furent signez par eux és lieux mesmes où il y auoit eu exercice de leur fauce religiō. Le traicté fut fait à Gand l'onzième de ce moys avec plusieurs cōditions, que i'ometz pour briefuete, & pour ce aussi que tant ailleurs que à Gand mesmes ce traicté fut rompu, & le seditieux Hermā, duquel nous auons fait mētion cy dessus, fut r'appellé & retenu lōguemēt.

LES heretiques qui estoient à Bruges appellerent cest Herman le propre iour S. Croix en ce mesme moys, & feirēt leur presche dans le cimetiere S. Croix, à fin que le peuple Catholique fust frustré de sa deuotion. Mais l'apresdinée on sonna le tocsin, & enuoya l'on quelques soldats, qui les feirent bien retirer au lieu où ils auoiēt fait le semblable le dixiesme d'Aoust. Mais leur presche fut empesché en ce mesme lieu par les soldats & quelques Espaignols, lesquels auoient esté mal menez par ces gallans: & en cest escarmouche y en eut quelques vns de blecez des deux costez. Toutesfois e'estoit fait des heretiques, si les Brugeois n'eussent redouté les accords faits avec eux. Au moyen dequoy le lendemain les heretiques se veindrent plaindre en grand nombre, & s'enhardirēt tant que de menacer les Magistrats. Parquoy pour quelques causes, & par ce qu'on auoit ia accordé avec eux, cōme nous auons dict, & pour ce qu'ils vsoient de terribles menaces, & que d'autre part ils auoient présenté vne requeste fort seditieuse: le Senat fut forcé de leur permettre le presche au lieu susdict, iusques à ce que le Conte d'Aiguemont seroit arriué: & quant & quant pour euitier sedition proposerent vne ordonnance, comme on auoit déia fait à Anuers, Gand, & ailleurs, que les Catholiques n'empescheroient point leur presche, & qu'ils ne se molesteroient ny offenseront les vns les autres. Et toutesfois il se trouua quelques Catholiques, les-

*Traicté
de Gand
avec les he-
retiques.*

*Presches
hors de
Bruges.*

quels remplirent la place d'ordures & voiries, à fin qu'ils n'y peussent prescher: & presenterent requeste aux Magistratz, à ce que tels presches fussent defenduz: promettans de vouloir mourir & despendre tout leur bien pour ceste fin: à cause de quoy le Magistrat feit le mieux qu'il peut, pour retarder le peuple d'aller à ce presche.

Iniure contre la S. Eucharistie.
 SUR la fin du mois de Septembre quelque Seigneur, que ie ne veux nommer, accompagné de quelques siens fauorits, entra dans l'Eglise de sa Seigneurie, rôpit & autels & images, & ayant fait apporter tous les ioyaux & meubles de l'Eglise selon l'inuentaie, les reduict tous en cendres, mesmes meit le feu à quelques maisons particulieres. Le mesme Seigneur print la sainte Eucharistie dans vne custode en quelque village, & la feit mager à son parroquer. Sur quoy ie ne sçay que dire, sinon q Dieu n'est ignorant de quel supplice il doit venger vne si grande iniure, à laquelle & à semblables forfaits ces miserables predicans enflamment les hommes. Mais à la parfin les oiseaux d'enfer les becqueteront, & payeront eternellement la folle encher de si enormes & execrables iniures à l'encontre de la S. Eucharistie: sinon qu'ils facent penitence, & qu'ils ramènent au vray chemin ceux qu'ils ont deuoyez.

Troubles en Hollande.
 LES Dauentriens permirent à leur pasteur d'enseigner le peuple selon la forme de la Confesion d'Ausbourg, laissant aux Chanoines tout ce qui estoit leur. Les Hollandoys se souz-leuerent de rechef, & à Delphes, qui est vne ville d'Hollande, les femmes, ou pour mieux dire les homes habillez en femmes, ietterent les Cordeliers hors la ville. Les Chartreux & Cordeliers d'Amsterdam furent aussi iettez hors leurs monasteres, & en eussent autant eu les nonnains, si les citoyens n'y eussent porté grand empeschement. En mesme temps les habitans de la ville de Four resisterent vaillamment aux heretiques qui les vouloient assaillir, & en tuerēt quelques vns, les autres gaignerēt au pied. Ces galans auoient conspiré avec quelques autres, mais on surprint l'escallade qu'ils vouloient faire.

OR en mesme mois à cause que les heretiques ne cessoiēt de mur-

de murmurer en Flandres, on fut contrainct de leur permettre de bastir des lieux pour faire leurs assemblées hors la ville: sçauoir est à Gand, Hyppres, Aldenard, Bailleul, Armêtiere & quelques aultres lieux, ce qui fut fait à l'exemple de ceux d'Anuers.

LE 4. d'Octobre, les heretiques de Malines voulurent tirer de prison les briseurs d'images. Mais le Conte d'Hocstrate, qui auoit esté quelque temps gouuerneur d'icelle ville, appaisa toute ceste esmeute, & fut toutesfois contrainct le lendemain de deliurer ces prisonniers. Le mesme iour fut de rechef faite defence à Bruxelles, de s'assembler en secret au dedans de la ville, sous peine de la corde aux ministres, & d'exil aux assistans. Peu de iours apres comme le Prince d'Orenge eust esté contrainct se retirer en Hollâde, (à cause qu'il estoit Lieutenant en Bourgongne, Holande, Zelâde & Outrech) le mesme Conte d'Hocstrate fut substitué en sa place au gouuernement d'Anuers, ce qui fut fait bien à point: pour ce que s'il n'eust esté present le 17. iour du mois, sans doute ces heretiques desbordez n'eussent pas seulement pillé les Eglises, mais aussi les maisons des riches. Car sur le vespre de ce iour ils s'assemblerent en la grand' Eglise Nostre-dame, sous vn Capitaine d'Anuers, allegans pour pallier leur meschanceté, que c'estoit pour les images, par ce qu'on auoit ia releué quelques chapelles: mais à la verité leur but & dessein n'estoit aultre, (comme confesserent les chefs de ceste bende à la torture) q, apres auoir occupé l'Eglise, & les maisons des monnoyeurs comme vne forteresse, se ietter la nuit sur les maisons des riches, & piller tout. Si assembla le Conte quelques gens, avec lesquels il les chassa des Eglises, naura plusieurs d'entr'eux, & print les chefs & principaux moteurs de ceste sedition. Et par ce que quelques lettres, lesquelles menaçoient les freres mineurs, auoiēt couru ce iour-là, il leur enuoya quelques soldatz pour leur garde. Or ce Capitaine que nous auons dict, ayant esté prins sur la minuyct, fut pëdu sur les sept heures du matin au milieu de la place. Ce nonobstant les heretiques poursuuoient tousiours, & en toute diligence edifioiēt cinq

*Trouble
nouveau à
Anuers.*

L'AN M.D.LXVI. HISTOIRE DE TOUTES CHOSES

lieux pour leur presche au dedans la ville, desquelz celuy qui appartenoit aux huguenotz de France, estoit plus excellent que les aultres.

*Oultrecuy
d'ance des
heretiques.*

LE 25. d'Octobre les Estatz s'assemblerent à Outrech, où assista le Prince d'Orenge. Les heretiques furent si oultrecuydez pour lors, qu'ils oserent bien prescher iouxte la porte du chasteau, & ne voulurent en partyr par le commandemēt du Gouverneur, de maniere qu'il ietta quelques coups de canon sur eux, ce qui les feit bien desloger, & plusieurs furēt naurez, mais nul tué. Au demeurant, Eric Duc de Brunswic estoit là-pres avec quelques troupes de gens de pied, dont les Hollandois n'oserent oncques rien attēter: ny les Brabāçons à cause de la garnison prochaine à Bruxelles.

*Tumulte
à Bruges.*

LE 1. iour de Novembre il y eut vn predicant à Aloft, lequel ne se contentant pas du lieu assigné pour prescher, voulut s'approcher plus pres de la ville, dont il fut pendu incontinent. Le 3. iour s'esmeut vn nouveau trouble à Bruges, & peu s'en fallut qu'il ne veint en grande seditiō. Car comme les heretiques retournoient de leur presche, ayans accoustumē de se retirer chacun à son logis, certain nōbre s'arresta à la porte, estans ia plusieurs entrez dans la ville. Et en voicy venir cinquante, lesquelz si tost qu'ils eurent apperceu les murailles de la ville, commencerent à chanter leurs psalmes à haulte voix, tellement qu'à ce son quelques vns de ceux qui estoient ia rētrez se meirent de la partie. On leur commande de se taire, & le Consul faict fermer la porte, où iceux bleçerent le tabourneur. Ce voyans ceux de la garde, débenderent les pistolles sur les heretiques, desquelz deux tumberent sur le champ, & plusieurs furent bleçez, dont trois rendirent l'ame incontinēt. Parquoy les heretiques prenoient les armes sur cela, quand voicy la garnison q. les empescha de se bouger, & par ce moyē furent aneanties toutes les machinations de ces meschans, & quelques vns coupables de ceste ligue furent mis en prison.

EN ce mois de Novembre six ministres Lutheriens appelez par les Confessionistes vindrent à Anuers, les principaux desquelz estoiet Illyric & Spangēberg, qui peu de iours

apres meirent en lumiere leur confession en langue Latine & Flamande, laquelle ilz intitulerent la confession des ministres de Iesuf christ en l'Eglise d'Anuers consentant avec la confession d'Ausbourg. Les Calvinistes d'autre costé auoyent iamis en lumiere leur Confession en Flamand, laquelle ils appelloient la briefue Confession de foy. L'une & l'autre a esté assez amplement refutée par les Catholiques. Au demeurant, les Lutheriens ne feirent gueres bien leurs affaires à Anuers, à cause que les Calvinistes tenoient là leurs grands iours. De maniere que les Lutheriens ayans abandonné la place, & Spangenberg estant venu à Coloigne, quelcun luy va demander comment les affaires se portoient à Anuers ou quelque chose semblable: à Anuers (dict le ministre) le Christ est perdu entre deux Larrons, voulant par cela signifier les Papistes & Calvinistes, & que les Lutheriens n'y auoient pas grand' vogue ny autorité. Il n'y a aucun doute que Illyric, Spangenberg, & tous ces gens de bien n'eussent choisy leur demeure en vne contrée si bonne, si les choses fussent allées selon leur desir.

Les Lutheriens ne furent gueres bien venus à Anuers.

Les heretiques de Bruges en ce moys n'estans contents d'auoir leurs assemblées, taschoient d'introduyre le baptesme, le mariage, & les sepultures à la façon de ceux d'Anuers & des Flamens Occidetaulx. Dequoy estant irrité l'Euesque de Bruges, à cause qu'il ne pouuoit obuier à cela par ses seules predications, feit tant enuers le Senat, que tous exercices de ceste religion non mentionnez en l'assurance que nous auons dicté cy dessus, fussent prohibez. Parquoy vn peu apres cōme quelque heretique eust faict baptizer son fils au ministre, il fut banny, & à ceste occasion grand nombre de ces partiaux veindrent à la Court, pour se complaindre du tort faict en la personne d'un des fidelles: mais ilz furēt r'enuoyez iusqu' à ce que la Gouuernante eust ordonné quelque chose de certain. Or quand à elle, sa responce fut, que ceux de Bruges auoient fort bien faict, & par mesme moyen commada, que és aultres villes de Flandres on ne feist point telz exercices de religion: aussi n'auoit elle iamais approuué cela.

Demande des heretiques de Bruges.

LE 25. de Nouembre le Prince d'Orenge pacifia tout à
Llll. ij.

*Trans-
action avec
ceux d'U-
trech.* Vtrech avec les heretiques, par mesme moyen qu'auoit fait le Conte d'Aiguemont en Flandres, sinon que ces conditions y furēt adioûstées, Que personne n'empescheroit, que les bri-
seurs d'images & les voleurs ne fussent prins : Que personne ne feroit courir, ny ne retiendrait par deuers soy aucuns libel-
les diffamatoires contre la Maïesté, la Gouuernante, & les Magistratz: Que personne ne chanteroit publiquement choses lesquelles pourroient inuiter le peuple à sedition & muti-
nerie: Que les prescheurs Catholiques ou sectaires ne diroient mal en preschant de leur partie aduersé, & qu'en faisant autre-
ment ilz ne prescheroient plus, bien leur seroit-il permis de reprendre & taxer generally les vices.

*Impieté
en la Ce-
ne des he-
retiques.* CEUX de Valenciennes commēcerent ce mois à dresser les cornes plus que de coustume, ne se contentans d'auoir le presche au pourpris de leur ville, & mesmes en la grande Eglise S. Gaugeric, & vn iour ils ietterēt le Clergé hors la ville, pendant que le Magistrat ne sçauoit à quel Sainct se vouier à cause d'une si grande multitude d'hommes perdus. La Gouuernante les aduertissoit souuent de rēdre les Eglises aux Catholiques, mais ils faisoient des sourdz à ceste semonce. Et firent proclamer par tout ce quartier, q̄ à certain iour la Cene Caluinésque seroit faicte en la grāde Eglise: en laquelle Cene ilz ont de coustume, oultre les blasphemés qui y sont communs, (à fin que l'vse des mortz de Madame la Gouuernante) de abiurer & renier deuant toutes choses l'Eglise Catholique & Romaine, & protester de n'y iamais retourner, ains de la persecuter tant qu'ilz pourrōt. Au reste, le 26. de ce mois M. la Gouuernante rescriuit à Messieurs de Valenciennes qu'ilz receussent garnison, veu mesmement que chacū sçauoit, que deux de leurs ministres auoient dict en leur presche, q̄ le Cōsistoire des Caluinistes de ceste ville n'estoit point obligé de prester obeïssance aux Magistratz: & qu'au demeurāt elle garderoit en tout & par tout ce qu'elle auoit promis aux Seigneurs de la ligue. Comme dōc les Magistratz & la plus saine partie des bourgeois ne se mōstrassent point au cōmencement refractaires à ces lettres, ces ministres toutesfois persuaderēt

*Les mini-
stres re-
belles.*

au peuple, quil ne deuoit point auoir garnison dans la ville.

LE 14. de Decēbre on feit de rechef publier l'ēdict de ne prendre point les armes à l'encontre des Catholiques, & par consequent du Roy: & fut adiousté, qu'il estoit permis de resister par voye de faict à tous ceux qui ce feroiēt, comme criminelz de lese maiesté, & ennemys iurez de la patrie, mesmes de ruīner leurs maisons pourueu que le Preuost du lieu y assistast. Et en mesme iour les Valenciennois furent prononcez estre rebelles à la Maiesté, tant pour-ce qu'ilz auoyent refusé de receuoir garnison, (estans admonnestez de ce faire par vne seconde iussion de M. la Gouuernante au commencement de ce moys) que pour-ce qu'ils auoient dessarré quelques pieces d'artillerie sur les gens du Roy pres le monastere S. Salue, & que pour la seconde fois ilz auoient pillé la maison des Chartreux & l'Eglise S. Vedast. Or fut ceste sentence des Valenciennois publiée par toutes les aultres villes, en laquelle estoient comprins tous ceux qui leur feroient auoir ou viures ou armes. Quelque peu apres ilz feirent vne saillie hors la ville & estoient bien trois mille, mais les gens du Roy les feirent biē tost retirer d'oū ilz estoient partis, en faisans demeurer sur la campagne quelques soixante. Et fut mis le siege deuāt la ville avec assez bonnes troupes, de maniere qu'ilz ne pouuoient auoir viures ny secours. Au moyen dequoy les sectaires assemblerent leurs gens, pour ayder à leurs compaignons, & commença-on à leuer compaignies en celle partie de Flādres qui tire plus vers l'Occident. Si se ioignirent à eux quelques vns ramassez à Tournay, & commencerent le beau iour de la feste de Noel à marcher en bataille chacū sous son enseigne. Et le lendemain ils meirent le feu à la maison de l'Official de Tournay, & pillerent toutes les prochaines Abbayes & les villages de là autour, sans pardōner au chasteau du Seigneur de Vvaterlos, à cause qu'il les auoit faict escamper d'aupres de l'Eglise, du sōmet d'vne tour. Mais tost apres ilz payerēt biē ce forfaict. Car le Seigneur de Raslegē Gouuerneur de l'Isle, de Doūay, & d'Orches, estāt aduertie de ceste troupe de Flamās laquelle marchoit au deuant des aultres, enuoya à l'encontre

*Rebelliō à
Valenci-
ennes.*

*Heretiqs
bien fro-
tez* d'eux, le iour S. Iehan, cinquante hommes à cheual, & deux cens soldatz harquebuziers, lesquelz attaquans quatre cés des Caluinistes, en taillerent en pieces 150. Les aultres qui s'estoiēt retirez à la tour susdicte de Vvaterlos, perirent tous ou de feu ou de fumée, sans que pas vn des gens du Roy y perdist la vie.

*Religieu-
ses vexées.* Ce iour mesme, les heretiqs de Tournay, apres auoir pillé la maison des Chartreux & des religieuses, y meirent le feu, & manierent ces nonnains cōme vous pouuez penser. Car ayās prins l'Abbesse avec quelqs ieunes religieuses par le chemin, ilz les promenerent par tous les quarefours de la ville en derision, & feirent presque mourir de peur les vieilles: & ne cesserent toute nuit de tourmenter ces miserables, tellement qu'à fort grandes difficultez peurent-elles euitier, qu'elles ne fussent honnies par ces vilains. Le lendemain, qui fut le iour des Innocens, apres que trois iours durans ilz eurent pillé & les reliques & tout ce qui estoit bon à prendre, ilz bruslerent l'Abbaye S. Nicolas. Et delà, ne sçachans encore le desastre auenu à leurs compaignons, veindrent au village de Vvaterlos pensans les secourir. Quoy voyant le Seigneur de Rassegem, despescha toute la nuit courriers pour aduertir de ce les garnisons & les prochains Seigneurs Catholiques, voire mesmes les païsans enroollez de long temps pour vn mesme accidēt, si bien que le lēdemain à six heures il se veit auoir deux mille hommes de pied des villages de la-aupres, trois cens soldatz harquebusiers, & cent hōmes de cheual. Les ennemys estoiet trois mille de nombre fait. Et commencerent à s'entr'escarmoucher l'un l'autre, à cause que par fois les heretiques se retiroient dans Tournay. Si trouuerēt en teste sans qu'ilz y pélassent, le Seigneur de Norcarme, Lieutenant en Henauld acompaigné de dix enseignes de Fanterie, & sept cés cheuaulx. Lequel attaquāt brusq̄mēt ces heretiqs, en despescha sept ou huit cés, ne perdāt q̄ sept ou huit des siens. En mesme mois les heretiqs meirent souuēt tout leur esprit à surprēdre la ville d'Vtrech, mais ils perdirēt entieremēt leur peine, quoy qu'ilz s'efforcerēt d'escheller les murailles, & les aultres de rōpre les portes, & faire plusieurs aultres choses tendētes à mesme fin.

*Deffaitte
des here-
tiques.*

OR iusques icy i'ay exposé les choses auenues au païs bas, ^{Troubles de Gueldres.}
 fans rien toucher des troubles suruenuz au païs de Gueldres, vn mandement du Roy, par lequel sa maiesté vouloit, q̄ personne n'allast à la guerre sinon souz le Gouverneur de Gueldres: qui estoit Charles, Conte de Megue, Cheualier de la toison d'or, lequel s'est monstré fort fidelle à son Roy en ce remuëmēt de toutes affaires.

LE 10. d'Aoust, y eut vn ministre de Caluin qui cōmença à prescher hors la ville de Nimegen dās le cimetiere des Iuifs, & eut assez bel auditoire. Le lendemain qui estoit le Dimanche, chacun ne fut pas si chaud à y aller, à cause que la pluye les empeschoit & faisoit demeurer à la maison. Mais le Dimanche d'apres il prescha en vn autre lieu, où accoururent plusieurs hōmes des villes voy fines pour ouyr ce predicant. Toutesfois il y auoit bon nombre de Catholiques à Nimegen, qui estoient extrememēt marrys de ces predications du ministre: tellement que la vigile de l'Assumption, tous les plus honnestes & notables bourgeois, espoingonnez du zele de Dieu, s'assemblerent, à fin de resoudre par quel moyen ils pourroient chasser ce loup rauissant, où furent aussi recitées quelques requestes faictes par les gens de bien, par lesquelles ils se parforçoient de faire en sorte, que ceste Republique seroit exempt de toute innouatiō. Mais il sy trouua quelques politiques & factieux, à l'occasion desquels on ne peut rien conclure de bon. Doncques cest apostat fut introduict dans la ville par ses sectateurs le iour S. Barthelemy à cinq heures du matin, & peu s'en fallut qu'ils ne se ruassent tout soudain sur la grande Eglise, tant ils estoient aspres & ardants. De maniere que sur le soir on emporta couuertement tous les plus beaux ioyaux ^{Prudence des Catholiques de Nimegen.} & riches ornemēs de celle Eglise. Le lendemain, iour du Dimanche, ce ministre prescha souz vn arbre au vieil cimetiere,

qu'ils appellent: & pour-ce que chacun craignoit grâdement, que ces heretiques apres auoir ouy leur presche, (duquel ils sortent ordinairement furieux & seditieux) ne se iettassent sur la grand' Eglise, & qu'ils ne pillassent tout, on dist la grand' Messe tumultuairement, & mesmes l'office de Nonne ne fut point dicté, pour-autant que les prestres se meirent à harpenter les rues à qui mieux mieux: & ainsi on porta tout ce qui pouuoit estre osté de l'Eglise & des monasteres, és maisons des bourgeois, & ferma-on les portes. Le iour de la decollation S. Iehan Baptiste, ce predicant fut mené par quelques vns du Senat en l'Eglise S. Iehan, quoy que le peuple trouuaist cela de fort mauuaise digestion, mesmes le ministre eust bien esté ietté hors de l'Eglise, si quelque Senateur n'y eust mis empeschement. Mais il y auoit quelques Conseillers qui conuiuoié, lesquels par-apres furent priez de leurs estats. Le premier *Arrest de la Court.* iour de Septembre la Court ordonna souz peine de la hart, (à cause que les bons citoyens auoient impetré cela d'eux le iour deuant) que personne n'empeschast que le diuin service ne fust fait és Eglises & monasteres, & que nul ne pillast les biens des Eglises: & permettoit aussi au predicant de prescher en l'Eglise S. Iehan, iusques à ce que les Estats fussent paracheuez. Le second iour de ce moys le Prieur des Iacobins, homme fort docte, commença la dispute avec le ministre, mais il fut impossible de la mettre à fin, à cause de la multitude des sectaires, & des iniures qui y estoient dictes. Car les heretiques emportent rousiours le dessus par crierie & cōices, quand ils ne peuuent gagner à belles raisons. Le iour S. Mathieu le mesme ministre donna le baptême à vn enfant au temple S. Iehan, ayant seduict les parens par argent pour ce faire, qui est vn des chefs d'œuvre des nouueaux Euangeliques, & l'vne des ruzes par lesquelles ils dilatent leur doctrine.

LE 25. iour s'esmeut vn grand trouble entre les bons citoyens de celle cité. Car les heretiques qui veilloient la nuit, auoient rompu les barreaux qui sont deuant le Crucifix au cimetiere S. Estienne, de quoy furent si indignez & irritez ces bons bourgeois Catholiques, qu'ils se trouuerent tous au lieu où on

où on faisoit guet toute la nuit. Le Senat ayant descouvert cela, quelques vns des plus notables se transporterent iusques là, demandans que vouloit dire ceste assemblée. On leur feit ^{Devoir} responce, qu'ilz allassent veoir ce qu'on auoit fait au cimi- ^{des Bour-} ^{geois de} ^{Nimegē.} tiere Sainct Estienne. Alors ilz les exhorterent d'attendre pour le moins iusques au iour, mais les bourgeois respondi- rent, que c'estoit par trop attendu, & commencerent à crier, aux armes: & chacun s'en alla tout soudain à sa maison, de sorte qu'en moins de rien ilz se trouuerent tous armez, & feirent sortir en place les deux Consulz avec l'enseigne & estandard, lesquelz iurerent qu'ilz seroient du costé des Catholiques. Pareillement fut crié à son de trompe par toute la ville, que tous bourgeois & habitans se retirassent soudain souz ceste enseigne, & qu'en faisant autrement ilz seroient reputez pour ennemys du Roy & de la ville. Apres disner les Cōsulz font defence à tous ministres de prescher, & commandent qu'ilz vuydassent la ville tout incontinent, lesquelz predicans auoient gaigné au pied, ou bien s'estoient mussez en ^{Conseillers} ^{heretiques} ^{chassez.} quelques cachettes. Si demurerent les citoyens tenās les armes au poing toute celle nuyt & iusques à midy du lendemain, auquel iour furent chassez de la Court cinq Conseillers heretiques & cinq Catholiques mis en leur place. Ce qu'on feit pareillement à cinq des Maistres de la societé S. Nicolas, comme ilz les appellent, huiet desquelz assistent tousiours au Senat de ceste ville, & au lieu de ces cinq furent esleuz cinq autres bons Catholiques: par-ce que tout le monde fut d'opinion, qu'on denoit ainsi procedder pour arracher ceste yuoye. Ce fait, à cause que les bourgeois estoient ia las, ilz presterēt serment au Senat, & se retirerent. Mais apres disner, plusieurs femmes avec des broches & ferremens coururent au temple ^{La chaire} ^{du mini-} ^{stre abba-} ^{tie.} Sainct Iehan, pour mettre à terre la chaire du ministre: mais elles ne peurent rien faire à cause que les portes estoient fermées. Le lendemain matin deuant qu'il fust cinq heures, les citoyens abbatirent la chaire, & la faisans porter au milieu de la place fut mise en cendres. Or le second iour d'Octobre furent apportées lettres au palais de Nimegen lesquelles quel-

ques Seigneurs des Confederez escriuoient, & par icelles accusoient les citoyens de grande tyrannie enuers le Senat. Mais les citoyens ne feirent pas grand conte de cela, ains respondirēt, que quelque iour le temps feroit toucher au doigt, qu'il estoit tout autrement qu'ilz ne disoient, & que les Senateurs auoient esté chassez à bonne & legitime raison.

*Les gueux
de Nime-
gen veulēt
auoir le
presche.*

LE 15. d'Octobre les Gueux de Nimegen s'estans assemblez au cimetiere Saint Antoine, requierent à la Court par quelques entre-metteurs, que leur ministre leur fust restitué, & par mesme moyen les bannis, & que chacū viuroit en paix des deux costez. Or le Senat ne se pouuoit assembler pour lors, à cause que plusieurs estoient absens, & à l'occasion de ce le dixhuietiēme iour les Gueux retournerent au Palais, & proposerent de rechef leur requeste. Le peuple Catholique craignant qu'on arrestast quelque chose à l'auantage des heretiques, & ne pouuant plus supporter toutes ces fascheries, delibera de mettre cecy à bas à fin d'en estre deliuré tout à fait. Les Gueux vn peu apres midy se promenoient avec grande brauade parmy la place, & attendoient leur responce au chasteau du Faulcon. Les Catholiques irritez de ceste brauade, feirent de rechef crier l'alarme, donnant signe du sommet de la tour, si biē qu'en vne demy-heure la place fut toute pleine, & ne partirēt oncques de là, que le Côte de Megue ne fust arriuē d'Arneim, leq̃l ilz auoient enuoyé q̃rir audict lieu. Et partāt les heretiqs qui cōmençoierēt à se saisir des cousteaux, se retirerent tout coy, & ne sçait-on qu'ils deuindrēt: biē sçait-on q̃ leur resolutiō estoit, de se faire maistres de la place & attendoient quelque secours, mais tous leurs desseings s'en allerent en fumée. Le lendemain arriua Monsieur le Conte, lequel fut reçu fort honorablement des bons & Catholiques citoyens, & conduict dedans la ville, & estoient quelque sept mille citoyens qui l'auoient esté recueillir hors la cité. Quād au Conte, il n'auoit que soixante cheualx, & fut en grand honneur conduict au chasteau du Faulcon. Quoy fait, les Consulz commanderent au peuple de mettre bas les armes, & se retirer à leurs maisons. Si fut arresté par la Court le vingt

*Arriuée
du Conte
de Megue
à Nimege*

troisiesme d'Octobre, qu'on leueroit cent soldatz, qui seroient pour garder la ville iour & nuict avec aultant des gens du Conte. La veille de Toussainctz tous les citoyens de Nimegen presterent foy & serment au Senat, qu'ilz seroient obeïssans aux Consulz, qu'ilz ne presteroient l'oreille à ces predicans, qu'ilz ne porteroient nul dommage aux biens de l'Eglise, ains qu'ilz les defendroient comme les leurs propres. *Louange des bourgeois de Nimege.* Voyla doncq' comment les affaires de Nimegen se porterent, d'où on peult veoir & cognoistre facilement, si ceux doiuent estre priez de loüange & honneur, qui ont bataillé si constamment pour la conseruation de la foy Catholique, & pour garder leur foy au Roy Philippe.

CEVX de Ruermonde eurent quelque temps le presche *De Ruermonde.* des heretiques, & les affaires des Catholiques s'en allerent presque à vau l'eau en celle ville: iusqu'à tant qu'il pleur au bon Dieu viuifier la paix & vnion Catholique en ce lieu, & conuertir les larmes des bons en ioye tref-grande.

OR tandis que le feu estoit ainsi allumé par ces contrées, *Louange du Senat de Coloigne.* & qu'il y auoit grand danger, que ceste racaille d'hommes estant vne fois eschaufée ne courust oultre les terres du Roy Philippe: le Senat de Coloigne print merueilleuse peine d'empeschier que les troubles ne prinsrent pied en leurs limites, & par leur vigilance ne fut rien innoué: tellement que iusques aujourdhuy par la puissante main de Dieu, qui conduict & gouuerne leur conseil, ceste cité tref-illustre se peult vanter à bon droict, d'auoir tousiours soustenu la religion de ses peres, & ne permet aucunement que l'heresie se coule dans elle, dont il n'y a point de doute, que Dieu ne la bien-heure tousiours, & que la posterité ne la loüe.

L'AN 1567. au commencement du moys de Ianuier, ou sur la fin del'an precedent, ceux de Mastrich & de Maseque oserent leuer les crestes à l'encontre de leur Seigneur l'Euesque du Liege, & denongerent la guerre aux images, & introduyrent le presche heretique, refusans d'auoir garnison. Et en mesme temps Madame la Gouuernante du païs bas, & aussi le Conte de Megue en Flandres, feirent defence d'aller à

Mmmmm.ij.

L'AN M.D.LXVII. HISTOIRE DE TOUTES CHOSES
telz presches ou aultres exercices de la nouvelle religion:
mais encore ne furent-ils pas obeïs pour ceste fois.

*Paix en
Phrise.*

LE septiesme iour de Ianuier le Conte d'Aremberg Gou-
uerneur de Phrise, fait prescher bonne obeïssance en tout ce
païs des Frisons, ayant reçu le serment de trois villes d'Ouer-
issel, par lequel ilz promettoient de ne se bouger iusqu'à tant
que le Roy seroit venu. Aussi reçut-on Leuuardie avec quel-
ques conditions que i'omettray pour brefuë.

*Tournay
reprins.*

ON recouura aussi la ville de Tournay par le Seigneur
de Norcarme, à cause qu'il trouua moyen de faire entrer
dans la ville neuf enseignes de gens de pied par le chasteau,
& bien peu apres fait pendre deux ministres, & quinze here-
tiques des plus puissans & factieux de la ville. Aussi ne laissa-
il aucunes armes aux citoyens, & fait cesser tous presches &
tous autres exercices de la religion de Calvin, & si fut l'Euesq
restituë, leq^l vn peu deuant auoit esté chassé avec le Clergé.

ENVIRON ce temps ceux de Valenciennes enuoyerent
leurs deputez par deuers l'Altesse, mais ilz ne peurent rien
faire de ce qu'ilz pretendoient: ains quelque iour apres com-
me ilz fussent sortis de la ville pour aller au fourrage, on les
attaqua, & demurerent sur la place bien cent trente, & ve-
noient tousiours nouvelles forces aux assiegeans.

EN mesme mois, comme quelque ministre se fust de re-
chef mis en deuoir de prescher à Tournay contre le com-
mandement faict par le Seigneur de Norcarme, on desarra
vn gros canon, & de ce coup plusieurs de l'assemblée s'en re-
tournerent bien naurez. Les bonnes dames de la ville de l'Isle
festans vn iour assemblées, apporterent à l'Eglise tous leurs
enfans qu'on leur auoit rauys & baptizez au ministre, & fai-
soient cela, à fin que ce qui restoit à l'accomplissement du sa-
crement selon la mode Catholique, y fust adiousté. Et le Sei-
gneur de Rassegem voulut que le semblable fust faict aux
enfans des païsans.

*Ceremo-
nies du
baptisme
données
aux enfans.*

OR le dixneuuesme iour de Ianuier les Eglises, qu'ilz ap-
pellent reformées, presenterent de rechef vne requeste à
Messieurs les Confederez, par laquelle ces gentilsz reforma-

teurs se complaignoient grandement de ce qu'on n'auoit gardé l'assurance à eux promise, & qu'encores auoit-on prohibé de n'exercer leur religion en sorte que ce fust, combien que lesdictz Seigneurs auoient interpreté, que ces exercices estoient comprins sous le nom de presche. Se complaignoient aussi des persecutions & afflictions de leurs ministres & autres de leur religion, en quoy estoit enfrainct ce que les Seigneurs auoient promis : en oultre des enfans rebaptizez par les Catholiques : & (ce qu'à faulx ilz obiectent aux Catholiques) leur ramenteuoient plusieurs de leur societé, lesquels pour danger de leur vie auoient abandonné leurs pais, femmes & enfans : aussi propoisoient ilz ceux de Valenciennes, lesquels auoient eu pire que n'auroient les ennemis formelz : la gendarmerie qui pilloit & rauageoit par tout le pais tous ceux qu'on cognoissoit estre de leur religion. Adioustoient au surplus, que sous espoir de l'assurance sus mentionnée ilz s'estoient monstrez les plus obeissans & modestes qu'il seroit possible, & admonnestent les Seigneurs qu'ilz pensent vn peu en eux-mesmes, filz ne se complaignent à bonne & iuste cause, veu que se fians en eux ilz ont esté menez comme à la boucherie, & experimenté le comble de tous maux. Au reste ilz supplioient les Seigneurs qu'il leur pleust declarer, si la Gouuernante & les Cheualiers de l'ordre auoient permis tout exercice de leur religion, pour-aualtant que par les lettres il n'estoit faicte mention que du presche seulement. Que si tout exercice estoit par cela comprins, qu'ils soignassent à ce que toutes choses accordées par-ensemble fussent entierement obseruées, & qu'il leur fust loysible d'auoir exercice de leur religion sans fascherie quelconque. Et concludoient aux fins, que leurs freres de Valenciennes fussent secouruz de la calamité extreme en laquelle ilz estoient reduictz. Les sectaires doncques ne cessans de pratiquer tous les iours quelque chose de nouveau, Madame la Gouuernante se resolut d'exterminer leur presche entierement. Au moyen dequoy le premier iour de Feurier elle manda à certain personnage de grande autorité, que les ministres s'estans representez à Malines de-

*Requête
des sectai-
res aux
Seigneurs
liguez.*

uant le Magistrat, il leur demanda silz vouloient de leur bon gré cesser de prescher. Lors le ministre Lutherien respondit qu'il ne se monstreroit point difficile en cest endroit, pourueu qu'on luy permist de dire à Dieu à ses gens le lendemain: mais le ministre Caluiniste fait responce, qu'il ne pou-

*Les Calui-
nistes ne
voulēt ces-
ser de pres-
cher.*

** Voy
Guicciard-
in la
description
du pays
bas.*

uoit faire cela sans offencer sa conscience. Parquoy des le lendemain * le Drossard de Brabant, qu'ilz appellent, par le commandement de la Gouuernante alla prendre le ministre Caluiniste dans sa chaire mesme, lequel on nommoit Martin Sinet, & avec luy il happa deux aultres qui auoient fait venir les premiers ces ministres, & alla encores attraper vn aultre au presche des Lutheriens, & les emmena tous à Malines.

*La Gou-
uernante
reponst
les requie-
stes des
Seigneurs.*

ENVIRON ce temps quelques gentilz-hommes de la ligue se trouuerent à Anuers, l'un desquelz qui tenoit le premier ranc entr'eux, desireux de satisfaire aux prieres susdictes des partiaux, & pour ce delibéré de presenter requeste à la Gouuernante, luy rescriuit, sil plairoit à son Altesse que luy & les siens l'allassent trouuer. Elle fait responce, comme quelques vns colligent des lettres du mesme Seigneur, qu'elle auoit esté trop prompte de receuoir la requeste à elle présentée le cinquiesme iour d'Auril, veu les troubles & maulx qui delà auoient prins leur source: & que partant elle ne vouloit desormais estre charmée de mesme sorte, & ne desiroit point leur venue. Et mesmes le sixiesme iour de ce moys elle defendit, que certains Seigneurs confederez n'entrassent en sorte que ce fust dans la ville de Bruxelles. Parquoy le huitiesme de Feurier le mesme Seigneur respondit à la Gouuernante, &

*Requeste
escripte
des confe-
derez.*

pareillement luy enuoya vne requeste au nom de quelques confederez, par laquelle ilz taschent à se purger, & disent que fidellement, cōme sont tenuz de faire tous Seigneurs, ilz festoiēt estudiez à la paix par tout le pais bas, & q̄ tous troubles eussent peu estre assoupis, si lon eust proceddé cōme il auoit esté accordé. Mais pendant q̄ toutes choses alloient de mieux en mieux, & que de iour à aultre on attendoit quelque chose

de l'arrest du Roy & des Estats, on auoit remué & changé le tout, oultre toute expectation, & oultre ce qu'on auoit promis quand on vint à capituler avec les Princes. Et partant que le peuple se voyant frustré de son esperance & de la foy à luy promise, reiettoit la faulte de cecy sur eux, & les blasmoit de ce qu'ils n'auoient tenu leur promesse, cōme son Altesse pourroit cognoistre par l'escrit du peuple. A quoy ils adioustoient quelque mot touchant les ministres vexez, & qu'on ne tēdoit à autre but que d'esteindre tous presches, & que la Gouvernante ne se fioit pas aux Confederez, iusqu'à leur commāder de ne se trouuer point à l'assemblée des Seigneurs, & n'entrer point en certaines villes, & mēmes de les prendre par les chemins cōme criminels, & choses semblables. Supplioient aussi, que son Altesse declarast, si elle auoit pas compris tout exercice souz les presches, comme ils auoient donné à entendre au peuple: qu'elle gardast inuiolablement la foy & assurance promise aux Seigneurs, & qu'elle feist departir la gendarmerie leuée à l'encontre d'eux, & que tous Edicts faits apres la conuention fussent declarez nuls. Que si cela se faisoit, toutes choses se porteroient bien, autrement, que plusieurs maux en aduiendroient, & grande effusion de sang. Finalement ils requierēt vne briefue responce, à fin que selon icelle ils pouruoyent à leurs affaires. Voyla le sommaire de ceste requeste, & dirons incōtinent ce que respōdit la Gouvernāte là dessus.

CAR ce mēme iour le gallād Martin Siner ministre Calviniste à Malines, fut pendu, combien que, comme on peult faire foy par son seing manuel, il fust au-parauant retourné à l'Eglise Catholique. Il est vray que les heretiques le nyent, à cause que immediatement deuant sa mort il auoit chanté vn psalme de Dauid en Flamand. Toutesfois sa confession estoit telle. Le 5. de Feurier, Maistre Gissen pasteur de la chappelle, (à Bruxelles) & F. Pierre Luxe Prieur des Carmes, estans venuz à moy Martin de Siner à Viluord, apres qu'ils eurent longuement disputé avec moy de plusieurs questions, & principalement du Baptisme & du Sacrement de l'autel, i'ay cogneu humblement mon erreur, lequel i'ay promis de confu-

Vn ministre retourné à la religion Catholique.

ter moy mesme & de fait & de parolle, deuant tous ceux auxquels ie l'ay enseigné, renouuant libremēt à tous mes erreurs, & me soubmettant es autres choses à leur discretion. Et en tesmoignage de ce i'ay escrit cecy, & signé, Martin Siner. Et de rechef, le Martin Siner confirme les choses cy dessus ecrites, le 8. de Feurier.

Responce
peremptoi-
re de la
Gouver-
nante.

LE 16. de Feurier M. la Gouuernante respondit à ce principal Seigneur des Confederez sur la requeste par luy présentée, en ceste maniere: Qu'elle ne scauroit imaginer quelz Seigneurs, ny quel peuple c'est qui presente telles requestes, attēdu que plusieurs Seigneurs Confederez se tiennent trefcontēs, tant pour ce qu'on fait cesser l'inquisition & les Edicts, que pour occasion de l'assurāce à eux promise, & que à ceste cause ils se presentoiēt de iour en iour à faire tel seruice qu'il plairoit à la Maieſté. Mais qu'elle ne se pouuoit assez esmerueiller, comment ils se sont mis en teste qu'elle auroit voulu permettre l'exercice de la religion, considéré que tout au contraire elle auoit assez déclaré, cōbien elle se sentoit offensée, dequoy apres le traité accordé quelques Seigneurs auoient assuré le peuple touchant ces exercices, ce qui estoit totalement contre son vouloir & intention: veu que la promesse q̄ les Seigneurs faisoient d'oster toutes armes, scādales, & troubles, emportoit de faire cesser quant & quant tout exercice, auquel elle n'auoit iamais consenty de la moindre parolle. D'abondant, silz ramenteuoient en eux-mesmes avec quelle angoyſſe & destresse d'esprit elle auroit permis le presche es lieux accoustumez sans armes ny scandale, ilz pourroient aysément cognoistre le peu d'affection qu'elle auoit, de conceder tout autre exercice de religion, qu'elle specifioit. Quand à ce qui appartient à la liberté, elle l'auoit concedée seulement entāt que la requeste du cinquiesme d'Auril ne leur seroit point imputée, mais non point touchant la religion, iaçoit que contre leur propre conscience ils l'auoient detorquée iusqu'à là. Et partāt qu'elle auoit iuste & legitime cause d'estre irritée, dequoy si fauement on luy auoit attribué cela, & que la Maieſté en estoit à bon droit grandement irritée, ayant entendu que

que le peuple se feroit vsurpé tous exercices d'icelle religion, & que par son nouveau Magistrat il rangeoit & gouuernoit les officiers du Roy: ce que ladicte maiesté n'endureroit iamais, ains le vengeroit par le secours de ses bōs & fidelles subiectz. D'auantage, touchant ce qu'ilz disoient qu'elle n'auoit tenu ce qui auoit esté accordé, elle respond, q̄ tout cela estoit fōdé sous vne fauce & trop large interpretatiō de ses parolles, & q̄ à bon droict plusieurs Magistratz ne l'auoiēt iamais permis. Au reste, qu'elle n'auoit en riē cōtreuenue à sa promesse, si apres icelle faicte on auoit prins quelques vns pour leurs mal faictz, & qu'en cest endroict ilz se gardoient bien de mettre en auant les brisemens d'images, & pilleries des Eglises, lesquelles auroiēt esté faictes depuys ledict accord, mesmes par quelques Gentilz hommes confederez: & qu'on auoit faict venir le presche dans les villes, comme il ne fust que és chāps au-parauant. D'abondant, qu'on s'estoit emparé des Eglises, on auoit chassé les religieux, on auoit faict venir plusieurs predicans estrangers, & bien qu'ilz eussent promis d'empeschier les presches, si est-ce qu'on en auroit faict és lieux, où par le passé il n'en y auoit point eu. Que le peuple animé & enflammé par eux s'estoit saisy de quelques places royales, auoit emporté l'artillerie & toutes sortes de munitiōs, auoit chassé les Lieutenans & Magistratz du Roy, de maniere que plusieurs se seroient trouuez en grand peril de leur vie. Que le mesme peuple renoit les villes du Roy, qu'il tenoit la campagne régée en bataille, qu'il menaçoit d'assassiner tous Ecclesiastiques & officiers royaulx & tous Catholiques, & que son Altesse mesme y estoit comprise, & que par voye de faict ilz ruynoient monasteres, Eglises, maisons nobles & aultres. Doncques que par toutes ces choses, (& mesmement par les lettres que leur gendarmerie escriuoit à ceux de Valenciennes, lesquelles auroiēt esté surprises) on colligeoit assez, à quoy tout ce remuë-mesnage deuoit venir, si Dieu par les mains des fidelles seruiteurs du Roy ne l'eust empesché: à sçauoir à priuer le Roy de tous ses païs & prouinces. Finalement qu'on iugeoit à loeil de leurs entreprises, par ce qu'ilz supplioient que le camp fust rompu,

& que par ce moyen le cousteau fust osté à qui Dieu l'auoit donné, & que tous édictz du Roy fussent anullez. Voila partie de ce que leur escriuit Madame la Gouvernante, laquelle s'est trouuée durant si grandz troubles & affaires en mille destresses, comme chacun peult penser.

*Herman
ministre
seditieux.* ENVIRON ce temps le seditieux Herman, duquel nous auons fait mention cy dessus, en-horta le peuple de Hassel subiect à l'Euesque du Liege, qu'ilz eussent le presche au pourpris de la ville, & qu'ilz brisassent les images, & luy-mesme meit le feu à tous les ornemens de l'Eglise au milieu de la place: de maniere qu'il eschaufa si bié ceux d'Hassel, qu'ilz se rebellerent à l'encontre de l'Euesque du Liege, & le tenoient si cher & si pretieux, que iamais ilz ne le voulurent laisser aller à Tongeren où on le demandoit, filz n'auoient leurs Consulz en hostage: & mesmes le conuoyerent avec trois ou quatre cens hommes d'armes iusqu' à moytié de chemin, où ceux de Tongres le veindrent recueillir. Or aduint à Hassel vne chose digne d'estre icy mentionnée, & qu'on a estimé comme miracle. Les briseurs d'images estoient vne nuit bien empressez à abbatre le Crucifix, & voicy que par deux fois les torches furent esteintes, sans qu'il y eust aucun vent qui soufflast pour lors. Là estoit present cest Herman, lequel estonné de cela feit iurer tous les assistans, qu'ilz ne le reueleroient à personne. Finalement l'Euesque du Liege fait assieger Hassel, & le ministre Herman craignant vn peu sa peau laisse là tous ceux qu'il auoit empiegez, & plie ses quilles se muant souz vne charrettée de foin, qui est vne ruze à la mode Euangelique.

*Le Chan-
celier de
Brabant
en prison.* QUEL CVN des chefs & principaux des sectaires d'Anuers fut enuoyé à Bosleduc, pour gouverner celle ville. Car ilz n'auoient pas voulu receuoir la garnison du Roy, & les sectaires de celieu s'estoient portez fort insolemment. Mesmes le Chancelier de Brabant avec le Seigneur de Peterfon ayant esté par-auant enuoyé pour pacifier les troubles, ilz ne faillirent pas de les retenir cōme prisonniers. Le Conte de Megue auoit quelques seize enseignes de gens de pied autour de la

ville, pour empescher qu'il ne leur veint des viures & du secours.

LE 16. de Feurier sur les dix heures du soir la maison des Cordeliers d'Anuers fut arse & bruslée pour la plus part, & de ce plusieurs accusoient les heretiques. Mais ie n'en veux rien affermer, bien que ie sçache qu'ilz ont faict de plus grandz maulx & dommages. On se trouuailla fort de calomnier ces bons peres Cordeliers, comme ceux qui auroient mangé de la chair en quaresme: pour quoy persuader ilz auoient ietté des os dans leur iardin. Si y eut quelques honnestes dames, lesquelles entrèrent dans le conuent pour se prendre garde des meubles & hardes, dont quelques vns disoient, que c'estoient femmes publiques illec entrées à la suasion des heretiques. Lors les sectaires ne faillirent pas de les prédre & happer, comme si ce fussent esté les chambrières de ces religieux, & feirent courir ce bruiet, iacoit que les propres maris de ces femmes testifiassent, qu'en ce mesme instant elles estoient parties de leurs maisons pour entrer là dedans. Et de ce on voit comme les sectaires bruslent d'une incredible hayne à l'encontre des religieux, & pleust à Dieu qu'au contraire ilz bruslassent de charité & dilection.

ON auoit ramassé à Anuers quelque nombre d'heretiques, lequel on feit sortir hors la ville, & estans sortis, plusieurs fallerent ioindre avec eux. Au moyen dequoy la Court enuoya par deuers eux le * Marggraue avec quelques soixâte hommes de pied, pour entendre d'eux par quelle autorité ilz faisoient cela. Mais ces pendartz ne se feirét que mocquer d'eux, & voulurent contraindre le Marggraue à crier, *vine les gueux*. Or peu de tēps apres estans souz la charge de quelcun des Seigneurs confederez, ilz allerent par eau en Hollande & Zelande. Et parmy les chemins se parforgerent d'auoir par assault Flissingen, & puy Rammech, qui est vne forteresse sur la mer, ce qu'ilz attentoient pour se munir & fortifier: mais ilz ne sçurent oncques venir à bout de leurs entreprises, à cause des gens du Roy qui les en empeschoient fort brauement. Ilz se meirent en peine de surprendre la ville d'Vtrech, mais le

Nnnnn.ij.

*Le conuēt
des Cordeliers d'Anuers bruslé*

*Les heretiques tascēt à forger les plaies du Roy
* Voy Guicciardin.*

Conte de Megue y meit ordre avec douze enseignes de gens de pied. On print quelques vns des plus opiniaftres, & confifqua on les biens de tous les fugitifz, & leurs personnes furent adiournées de comparoir en public. Ces heretiques auoient laiffé enuiron deux mille hommes à Viane, à fin qu'ilz pillaffent tout autour d'Vtrech, & qu'ilz troublaffent toute la nauigation du Rhin, iufques à prendre les nauires & la marchandife. A Amfterdam auffi fe trouua quelcū des Seigneurs de la ligue, qui feit du trouble-feste, & ne teint à luy que tout n'allast à vau l'eau. Si estoient les habitans de ceste ville fi marchande diuifez en plusieurs & fort diuerfes factions, & les euffiez veu tous les iours en armes par la ville. Toutesfois les Catholiques les euffent bien rangez, fi la Court n'eust le tout pacifié, pour crainte qu'il n'aduint pis.

Les Seigneurs iurent qu'ilz feront bons Catholiques.

CE fut enuiron ce temps que les Cheualiers de la toifon d'or iurerent, selon qu'auoit requis le Roy Catholique, qu'ilz garderoient la foy Catholique & Romaine, & l'obedience enuers le Roy. Si prefterent le mefme iurement tous les autres Seigneurs confederez par le commandement du Conte d'Aiguemont, & principalement en Flandres. Et le mefme Seigneur refcriuit à toutes les villes de Flandres, qu'elles auiffent à ce que fans vfer de violence on feist cesser tous presches, & mefmes sur le commencement du Quaresme luy courant par tout le païs de Flandres, se meit en deuoir de persuader à toutes les villes qu'ilz n'vffassent plus de ces presches, mais il y en eut bien peu qui obeïrent pour ceste fois.

Le presche cessa à Bruges, & Aldernad.

L'ONZIESME iour de Mars ou enuiron, messieurs de Bruges defireux de voir le presche aboly & esteinct en leur ville, enuoyerent certains hommes au lieu où se faisoit le presche, pour denôçer au ministre de se trouuer le lédemain pour prefter le serment comme l'on auoit proceddé és autres villes: & en cas de refus qu'on luy defenderoit de plus prescher. Mais le galand demeura quelque moys qu'il n'osa comparoir, & puy apres il euada par fuyte, à cause dequoy le Dimanche prochain le presche cessa.

LE semblable aduint à Aldernad le neufiesme de ce mois,

& ce à l'occasiō de ce que ie vay escrire. Les sectaires de ceste ville, contre le serment donné par leurs sur-intendans au consistoire, estoient allés en armes à leur presche le second iour de Mars. Qui fut cause que le iour y dessus cotté, furent enuoyez quelques soldatz de la garnison, pour empescher qu'ils ne s'assemblassent en armes. Les heretiques osèrent ruer quelques pierres sur ces soldatz, lesquelz irrités de ce, lascherent les harquebuses & en tuerent neuf, sans conter ceux qui y furent naurez, desquelz dix-huict moururent par-apres: &, ce qui me semble digne d'admiration, il n'y eut aucun des brieurs d'images de celle ville, qui ne mourut en ceste meslée, ou bien peu apres.

PRESQUE en mesme temps le Prince d'Orenge & le Conte de Hocstrate par le commandement de la Gouvernante, tascherent de mettre en teste aux chefs des heretiques d'Anuers, que pour trois mois ilz feissent cesser leurs presches. Mais ils ne gaignerent rien en cela, ains peu de temps apres y eut vn grand tumulte en ceste ville, & si grand qu'aultre qui eust encores esté, par l'occasion que voicy. Quelques compagnies heretiques, retournées d'Hollande & Zelande, & augmentées de iour en iour par nouveau renfort, rauageoient tout ce qui est alentour d'Anuers, & si pillerent la maison de quelque officier du Roy, & les prochaines Eglises. Ces gens icy auoient alors pour leur deuise des queues de renard, lesquelles ilz portoient à leur chapeau ou bien à leur morrion. La Gouvernante ayant ouy nouuelles de cecy, y enuoya le Drossard de Brabant avec quelques compagnies de gens de pied & de cheual, lesquelles on assembla à la haste des garnisons de Flandres & de Brabant. Ceux-cy ne faillirent pas d'attaquer les heretiques estans en desarray, ilz en tuent plusieurs, & comme l'on dict, il y en demeura plus de deux cens oultre ceux qui se sauuerent à la fuyte. Plusieurs aussi se noyerent dans le Fleuve de Lescaud, & plusieurs furent bruslez dans vne grange, tellement que bien peu se peurent sauuer en la ville. Aussi print-on quelcun des principaux comme il fuyoit, lequel descourrit tout le secret des Gueux, & portoit

*Grand
trouble ad-
uenu à
Anuers.*

sur soy le catalogue de tous ceux qui s'estoient faitz enrroller pour la guerre. Les Huguenotz d'Anuers voulurent donner secours à leurs compaignons, mais estans sur ce empeschez par le Prince d'Orenge & le Conte de Hocstratan ilz rompirent les portes, & sçachans qu'on auoit fort mal accoustre les leurs, s'en retournerent tout court à Anuers. Toutesfois de retour qu'ilz furent, ilz dirent quelque iniure au Prince, & mesme le menacerent, iusqu'à extorquer quelques pieces d'artillerie & aultres armes, desquelles estans munis sinuestirent du marché au bled, & desployans leurs enseignes marcherent de front pour se saisir du palais. Mais par la diligence du Prince d'Orenge & du Conte de Hocstratan & aussi par celle des Magistratz, on fit tant enuers quelques cheffz des sectaires, que pour ce iour il y auroit paix. Ce pendant les heretiques estans en fureur & audace, allerent deliurer tous les prisonniers, soit qu'ilz fussent là par debtes, soit par crimes.

Rage des heretiqs. Le lendemain pour-ce qu'il sembloit qu'ilz machinasent encore vne autre sedition, la concorde susdicte fut restablie & confirmée avec quelques conditions, qu'ilz rompirent le iour mesme, pour-auint que l'apres-dinnée souz la conduyte de cest Hermã, qui s'en estoit fuy d'Hasselet, ilz commencerent de plus beau à piller les monasteres, & principalement ceux des Cordeliers, des Iacobins, & des Carmes. Et pour se paistre en leur meschanceté d'auantage, ilz promenerent quelques Cordeliers par toute la ville, & leur feirent mille maux. Ilz n'oublierent pas de prendre les clefz, & les donnerent à leur Herman, & ce faict, despescherent gens en grande diligence pour certiorer ceux de Valenciennes à tenir tousiours bon, & leur dire qu'Anuers estoit de leur party. Toutesfois on meit si bon ordre, que pour ce iour ilz n'attenterent rien plus.

Le lendemain des l'aube du iour ils s'assemblerent, & faisoient estat de piller toute la ville. Et de fait au son de la cloche ils conuoquerent tous les Calvinistes & Confessionistes, & les sommerent de se trouuer tous ensemble à la susdicte

place pour la tuition de l'Euangile. La chose estoit en grand danger, & estoit fait des richesses de ceste belle ville, mesmes les Magistrats & bons Catholiques estoient ia trouffez, si par l'aduis & sage iugement du Prince, du Conte, & de la Court, on n'eust fait sonner vne autre cloche pour assembler à la haste tous les bourgeois & toutes les nations, faisans crier par les rues, que quicôque voudroit secourir le Roy ou la Court, il se trouuaft diligemment à la place. Au moyen dequoy en moins de rien s'assemblerent non seulement les Catholiques Alemans, Espaignols, Italiens, & Portugallois, mais encores les Confessionistes Lutheriens, se ioignans aux Catholiques pour rembarrer les Caluinistes comme seditieux. Certes les Caluinistes eussent esté à ceste fois aisémēt iertez hors la ville, n'eust esté que quelques vns se meirent en sequestre pour euitier le meurdre & effusion de sang. Parquoy on appointa de rechef avec eux, mais bien autrement que le iour precedent, à sçauoir que sans aucun delay ils mettroient les armes bas, ils rendroient toute l'artillerie qu'ils auoient prinse, que nul, sinon le Magistrat, auroit autorité ou puissance de deployer l'enseigne. De sorte que depuis ce temps les Caluinistes ont esté bien escornez, & n'ont iamais entrepris de faire quelque brauade en celieu, mesmes leurs chefs se retirerent peu à peu, & principalement Herman, homme que les sectaires mesmes ont en horreur & execration. Toutesfois ceux-cy par mesme moyen iouïrent de la paix commune, avec quelques conditions.

EN ce moys le Duc d'Arescot & le Conte d'Aiguemont furent enuoyez par M. la Gouuernante à ceux de Valencien- nes: & le treiziesme iour de ce moys demâderent à parler avec vingt de ceux de dedans, leur promettans seureté: & se deuoit faire le colloque sur les trois heures apres midy. Toutesfois pour ce iour personne ne sortit, disans qu'ils estoient fort empeschez, mais le lendemain ils despescherent quelques vns, en intention qu'ils peussent sçauoir seulement les conditions qu'on leur vouloit offrir au nom de la Gouuernante, lesquelles estoient fort equitables. Et apres cela ils s'en

*Diligence
des Catho-
liques, par
laquelle ils
furēt mai-
stres des he-
retiques.*

*Orgueil
de ceux de
Valencien-
nes.*

retournerent : & le quinzième du mois estans ia animez & entestez par ceux d'Anuers, ils feirent responce plus sçante à des vainqueurs qu'à des vaincuz: tellement que les sus-nommez Princes retournerét sans rien exploicter de leur charge, & fut assiegée Valenciennes plus fort que deuant.

A VSSI fut en mesme saison enuoyé vn homme, Secretaire du Conseil priué du Roy, à vn des principaux Seigneurs de la ligue qui pour lors estoit à Amsterdam, pour l'aduertir par l'autorité de M. la Gouuernante, de sortir de celle ville & de faire quelques autres choses, s'il ne vouloit estre tenu pour ennemy public de la patrie. Arriué que fut le Secretaire celle part, il ne peut oncques tirer autre responce, sinon qu'il n'estoit pas tel à qui il fallust respondre. Or au logis où s'estoit retiré le Legat de la Gouuernante à Amsterdam, estoient plusieurs des Gentils-hommes confederez, lesquels le retindrét prisonnier quelques iours, le menaçans plusieurs fois de le tuer, & ne luy laisserent lettres ny memoires quelsconques. Le Magistrat ne se remuoit aucunement pour crainte de ce grand Seigneur, iusqu'à tant qu'iceluy nya que rien eust esté fait à son aduen. Car alors le Secretaire, (sans toutesfois recouurer ses memoires) prenant vn esquis du Scultet & du Consul, ce sçachant seulement son hoste, euadà leurs pattes, & peu apres ce Seigneur fut prononcé estre public ennemy du pais.

Hasselet se rend.

ENVIRON ceste saison la ville d'Hasselet se rendit à l'Euesque du Liege avec telles conditions, qu'ils payeroient à l'Euesque les fraiz du siege, qu'à leurs despens ils repareroiét les monasteres & Eglises, que par cy apres ils feroient profession de la foy Catholique. Et voyla le prouffit & l'auancemēt qui naist du nouveau Euangile, auteur de toute rebellion. La ville estant rendue, on y meit bonne garnison.

LE 16. iour de Mars ou enuiron, les sectaires de Bruges de rechef susciterét vn nouveau ministre, seruiteur d'un cousturier. Lors veindrent quelques vns de la part de Messieurs de Bruges & des Francotz, lesquels feirent defence à ce ministre de prescher. Toutesfois il se parforce de ce faire, & comme il veut entrer dans la ville, on le happe à la porte, & le meinent en

Les Heretiques de Bruges se veulent reuer, & ceux d'Anuers aussi.

on en prison. De sorte q̄ depuys les presches ont cessé à Bruges, & toutesfois encore châterēt- ilz deux ou trois fois leurs Psalmes en leur langue, iusqu' à ce que par édict public le 26. de Mars on leur interdit toutes assemblées.

LE 22. de Mars le Seigneur de Norcarme ayant amené ^{Prinse de Valenciennes.} quelques gros canōs de Douay, Tournay, & quelques autres lieux prochains, battit si impetueusement les murailles de Valenciennes, que bien tost les assiegez voulurēt parler de composition. Icelle leur estant octroyée sur le vespre, ilz dirent qu'ilz estoient contens de rendre la ville en telles conditions que parauāt ilz auoient refusées, ce qu'on ne voulut pas faire. Doncques le lédemain au point du iour on bat encore la muraille avec vingt & deux grosses pieces de canon, on abat le clocher de quelque Eglise qui apporta grand dommage aux prochaines maisons, & ne cessa- on de tirer coups, iusqu' à tāt que devant midy on feit vne belle & grande bresche, par laquelle les soldatz pouuoient aysément entrer dans la ville: cē qu'on feit, quoy que les femmes de la ville toutes esperdues feissent signe des mains de se vouloir rendre. Le lendemain matin les soldatz estans prestz de les assaillir viuement, sur le midy ilz se veindrent rendre à la mercy du Roy sans prescrire aucunes conditions. Parquoy le iour de Pasques fleuries, le Seigneur de Norcarme avec la plus grande partie de sa gendarmerie entra apres midy dans la ville, laquelle il rendit paisible au Roy. Au reste, faisant fermer les portes pour quelques iours, il emprisonna Michel Herlin & son filz, fort riches marchandz, avec deux ministres chefs de toute ceste rebellion. Il ne fault point dire si les heretiques plierēt les espauls, apres qu'vne ville si forte qu'estoit Valēciēnes fut prinse par force. Peu apres on enuoya quelques compagnies pour reprendre vne petite ville nōmée Cambresis, que les heretiques tenoiēt. Mais si tost que les habitans entendirent la prinse de Valenciennes, ilz s'en fuyrent tous, & trouuerent les soldatz les portes ouuertes.

A v commencement du moys d'Auril ceux de Mastrich ^{Ceux de Mastrich se rendent.} se rendirent au Roy, enuoyans leurs deputez à Bruxelles, & souf

Ooooo.j.

L'AN M.D.LXVII. HISTOIRE DE TOUTES CHOSES

firent qu'il y eust garnison pour le Roy en leur ville. Car il fault entendre, que long espace de temps ilz auoient esté rebelles, & estans instiguez par les heretiques, ilz s'estoient portez à la façon d'iceulx. Mais telz deportemens & effortz le plus souuent reüssissent mal, & n'y a rien qui punisse plus la temerité qu'elle mesme.

Capitulation
accord avec
ceux d'An
uers.

LE 7. d'April la Gouuernante capitula avec ceux d'Anuers, qui auoient enuoyé leurs deputez par deuers son Altesse, & ce avec ces conditiós. Que tous ministres & prescheurs sectaires seroient tenuz de vuyder Anuers tout soudain. Que tous presches des heretiques, exercices, & tout ce qui de ce depend, comme sont les Consistoires, assemblées, cueillettes de deniers & choses semblables cesseroient: Que les temples ou ruinez ou pillez seroient remis en leur entier: Que le seruice diuin seroit réstably en tous endroictz, & quant & quāt les predications & toutes les ceremonies des Catholiques, sans porter aucun empeschement ou iniure ny aux personnes Ecclesiastiques, ny à leurs biens: Que tous bourgeois & habitans obeïroient au Roy, & obserueroient tous ses édictz, mesmes ceux qui auroient esté publiez puy le commencement de ces troubles: Que desormais ilz n'endureroient point en leur ville aucuns banniz, vagabons, formalizez contre le Roy, heretiques estrangers, fugitifz, apostatz, & aultres semblables: Que l'anciēne autorité des Magistratz, & l'obeïssance à eux deuē seroit obseruée: Que les gēf. d'armes q pour lors estoient en garnison, iureroient de garder sans rien enfreindre tout ce qui auroit esté accordé & appointé, tant qu'ilz demeureroient là. Et promettoit la Gouuernante, si cela estoit planierement gardé, que les bourgeois de celle ville ny aultre queleconque ne seroient recherchez, molestez, ny persecutez pour le fait de la religion, iusqu' à tant que le Roy avec le Conseil des Estatz en auroit aultrement ordonné, à laquelle ordonnance ilz obeïroient pour lors, comme tous les aultres subiectz du Roy. Que si quelques vns refusoient de se conformer, quand à ce qui seroit de la religion, à ce que le Roy & les Estatz auroient arresté, ils obeïroient, ou s'en iroient hors delà. Ce neantmoins

on n'entendoit comprendre en ceste capitulation les criminelz de lese maiesté, de pillerie de temples & de brisemens d'images, de larcins, rebellion, coniure contre la Maiesté, & de semblables crimes. Si furent receuës toutes ces condiçions par ceux d'Anuers, au moyen dequoy les choses commencerent à se porter mieux de là en auant.

LE 9. d'Auril y eut à Bosseduc vne grosse sedition. Car cō-
Trouble à
Bosseduc.
 mel'on vouloit faire prester serment à celuy, lequel (comme nous auons ia recité) auoit illec esté enuoyé d'Anuers pour gouverner la ville, & iceluy ne vouloit iamais iurer aultremēt qu'il auoit deliberé de faire: les Sectaires rompent les portes du Palais, surprennent les Magistratz qui consultoiēt cest affaire avec les citoyens, & font fuyr tous les meilleurs & affectionnez bourgeois. Toutesfois nostre Dieu pourueut si dextrement à ceste esmeute, que chacū se retira à son logis sur le vespre, tout coyement.

OR l'onzième iour du mesme moys le Senat donna cōgé aux cōpaignies qui estoient venuës, & les paya, & ce faict cest homme d'Anuers se retira: & incontinent apres trois heures, on r'enuoya monsieur le Chancelier de Brabant & Peterfom, lesquelz furent conduicts iusques à Bruxelles par 32. soldatz. Et tout soudain la Court leua quatre cens hommes pour garder la ville, de maniere que le presche fut entieremēt arraché delà, si bien que plusieurs heretiques emmenerent leurs biens dehors, & s'en allerent.

LE 10. d'Auril sortirent de la ville d'Anuers neuf ministres heretiques, partie Caluinistes & partie Lutheriens, & incontinent apres toutes leurs Eglises furent fermées & scellées par le commandement de la Court, iusqu'à ce que la Gouvernante seroit là venuë.

EN ce mesme temps comme le Conte d'Aiguemont eust faict cesser toutes sortes de presches par le pais de Flandres deuāt Pasques, on se mit à abbatre & ruiner les cabanes des heretiques à Balieul, Hyppres, Armentiers & lieux circōuoyfins. Mais à Commines par le commandement du Duc d'Arscot, des poultres de celles Eglises on feit trois belles poten-

ces, esquelles plusieurs tout soudain firent leur dernière demeure. Semblablement l'Eglise des heretiques de Gand fut sappée rez de terre par si grande allegresse des gendarmes, qu'en vne demy-heure toute la matiere fut vendue. Aussi on commença de prendre supplice au pais de Flandres, de ceux qui s'estoiēt mis en armes enuiron la feste de Noël, & de tous briseurs d'images: & en fut faicte si bonne poursuyte, qu'en trois moys en la seule ville de l'Isle y en eut quatre vingts de penduz, des villages prochains. Consequemmēt furent chassés tous presches, & toutes Eglises heretiqs abbatuës au pais d'Hollande & Zelande, si que peu à peu il y eut repos & tranquillité.

*Despeche
des hereti-
ques.*

LE 24. d'Auril on celebra à Anuers vne Messe solennelle du S. Sacrement de l'autel en la grand' Eglise nostre dame. Car les chanoines estoient ia de retour, & arriuoiēt de iour en iour les marchandz de tous quartiers, tellement que tous les chemins estoient remplis de marchandises. Or on feit en forte que ains que la Gouuernante fust là arriuee, on nettoya tref-bien tant l'Eglise de nostre Dame, que les aultres. Et ce mesme iour toute la gendarmerie de la ville fut cassée, hormis quatre compaignies, dequoy les gens d'armes se sentoient fort offencez. Mais le Magistrat y meit ordre, faisant venir la gendarmerie du Roy, laquelle s'approchoit bien fort de la ville. Parquoy le 26. iour de ce moys sur la pointe du iour, entrerent en la ville seize enseignes de gens de pied, soubz la cōduyte du Conte de Mansfeld. Toutesfois deuant cela on feit entrer quelques charrettes chargées, qu'on meit & diuisa à tous les quantōs, à fin que les meschās n'eussent aucun moyē de les aggresser.

*Tranquil-
lité à An-
uers.*

LE 28. dudit moys M. la Gouuernante accompagnée de plusieurs Cheualiers de l'ordre, & de toute la Court arriua à Anuers, & auoit escorte de sept cens cheuaux pour sa garde & celle de la ville, & trois cēs aultres dehors, qui voltigeoiēt à fin qu'aucun trouble ne s'esmeust. Entrée qu'elle fut dans la ville, elle tira droit à l'Eglise Nostre-dame, en laquelle toutes choses auoyent pieça esté deuēment preparées, tellement

qu'on y chanta incontinent la Messe du S. Esprit, & auoit-on dict deuant vn *Te Deum laudamus* en action de graces.

Le premier iour de May, partit d'Amsterdam sur la minuit, ce grand Seigneur, duquel nous auons ia parlé cy dessus, qui fut conuoyé iusqu'à sa nauire avec force flambeaux, accompagné de plusieurs gentilz-hommes confederez, ayât avec soy sa famille & biens meubles. Au reste deuant cela soixante soldatz pillerent la maison des Chartreux hors la ville d'Amsterdam, & puy se ruerent tout de mesme sur l'Abbaye d'Aiguemont, tourmentans les pauures moines, & menans assez loing le Prieur captif. Delà s'en allans tous chargez de butin & grands thesors, costoyerent la ville d'Alcmaric, & sacagerent vn monastere prochain de ce lieu. Le Côte de Megue feit son deuoir à les poursuyure, mais il ne les peut oncques attraper, deuant qu'ilz se fussent iointz aux leurs, qui estoient quatre mille & d'auantage, fort bien en conche de toutes sortes d'armes. Vray est que comme la Gouuernante eust fait deffence à quelques villes, de ne les secourir aucunemēt, ilz connillerent en plusieurs lieux deuant qu'ilz peussent trouuer nauires. Toutesfois ilz forcerent en fin les habitans d'une petite ville, & s'embarquerent tous, hors-mis cent qui estoient arriuez trop tard, qui furent tuez pour la plus part, & en fut prins vingr, dont les dix furent tout soudain penduz. Tellement que ceux qui estoient à Viane & es lieux prochains, ceste desfaicte entendue, changerent d'habitz & s'en fuyrent: toutesfois tous ceux qu'on peut attrapper rendirēt leur ame dās la potence.

Au demeurant, quelques Seigneurs confederez capitaines de ceux-cy, estoient particulierement retirez en vn nauire, & ce malgré le maistre d'iceluy, lequel à cause de ce les rendit entre les mains du Conte d'Aremberg qui venoit au deuant. Car ilz auoient bien beu & dormoient profondement, si que la compaignie dudit Seigneur Conte en prit cent & d'auantage, dont il y en auoit soixante trois gentilz-hōmes. Aussi fut saisy en la mesme nef le butin du monastere d'Aiguemont, avec 30 ou 40. mille Dalles. Les gentilz-hommes.

mes pris furent menez pour la plus part à Viluord : par commandement de la Gouuernante. Or cest eschech donna vn mauvais croc aux heretiques, & abbatit bien leur orgueil, principalement par ce que les prisonniers decouurirent plusieurs de leurs entreprises. La ville de Viane fut par-apres occupée par Eric Duc de Brunswic, & le païs d'Vtrech recouura sa paix & tranquillité.

LE 10. de May quelques enseignes de gens de pied entrèrent au nom du Roy dans Amsterdā, & vn peu deuant dās Bosleduc. Le mesme iour aussi furent penduz à Anuers deux briseurs d'images & quatre aultres, sans mettre par nombre plusieurs qu'on pendoit à la campagne. Si commanda en ce temps M. la Gouuernante, que le nom & surnom de toutes les familles d'Anuers fust prins par escrit, & aussi toutes les armes qu'on auroit és maisons. Elle donna les Eglises des heretiques aux soldatz estrangers, par telle condition qu'ilz les rueroyent ius de terre. Et en y a qui disent, que pour la matiere de cinq Eglises des heretiques, on offrit 14. mille escus du Rhin.

Toutes choses restituées à Anuers.
Ambassadeurs Alle-mans en Flandres.
 ENVIRON le 20. iour de ce moys quelqs Ambassadeurs des Seigneurs d'Allemagne veindrēt par deuers l'Altesse, supplians qu'on donnast liberté à ceux qui suyuoient la cōfession d'Ausbourg par le païs bas, & qu'on ne les molestast pour raison de toutes choses auenuës. On leur feit responce, qu'on ne scauroit rien arrester en ceste part, sans auoir entendu quelle estoit la volōté du Roy: & qu'au reste son Altesse les supplioit, qu'ilz ne se messassent point des affaires de la religion en ce païs: & ainsi ils n'impetrerent rien.

Edict d'un ne femme.
 LE 22. de May le marquis de Bergues alla de vie à trespas, en Espagne. Sa fēme n'ayāt encor' ouy nouuelles de sa mort, environ ce temps feit mettre en prison le Consul de la ville entant qu'il estoit Caluiniste, & feit cōmandement, que quicōque auroit faict baptizer ses enfans au ministre, ou se seroit marié en ceste façon, & mesmes ceux qui auroient faict la Cene à la mode des Caluinistes, & ne s'en vouldroiet repentir, quictassent tout soudain la ville: & dit-on qu'il y en eut biē 700. qui s'osterent de là.

LE 24. de May M. la Gouuernante publia vn Edict à An-
uers au nom du Roy, pour assoupir tous troubles qui par cy
apres eussent peu sourdre pour le fait de la religion, sans qu'il
y fust faire aucune mētion du passé. Car le Roy auoit mandé
qu'il se reseruoit la punition ou pardon de ces faits, selon qu'il
appartiendroit. Si estoit tel le sommaire de cest Edict.

*Edict pu-
blie à An-
uers.*

1. Que selon le contenu de l'Edict publié l'an precedēt, oultre la confiscation de tous biens, les ministres heretiques seroient penduz, & ceux qui donneroient leurs maisons pour faire assemblées: aussi tous receleurs d'iceux, s'ils estoient coustumiers de ce faire, ou qu'ils fussent obstinez heretiques: Ceux qui se trouueroient à tels presches seroient punis arbitrairement, de sorte toutesfois, que le iuge s'enquisteroit s'ils auroient fait cela par curiosité, ou bien s'ils y alloient en armes: Que les peres, les curateurs, ou maistres seroient punis selon l'arbitre du iuge, pour les fautes de leurs enfans & famille, & que les enfans ou seruiteurs seroient fouettéz, si les peres ou maistres ne faisoient apparoir du deuoir qu'iceux auroient fait.

2. Que selon vn autre Edict de l'an passé, tous briseurs d'images, pilleurs ou brusleurs d'Eglises & monasteres, ou tous ceux qui leur porteroient ayde & confort, seroient penduz, & leurs biens confisquezz, & qu'il estoit permis à vn chacun de les amener au Magistrat. Et en oultre estoit cōmandé aux Magistrats, qu'ils ne permeissent aucunemēt tels crimes, ains qu'ils les empeschassent à toute force, souz peine arbitraire & de restituer le dommage qui auroit esté fait aux Eglises.

3. Que les heretiques qui oseroient vser des exercices de leur religion seroient ou penduz ou descapitez, & que ceux qui leur auroient esté fauorables en ceste part, seroient punis.

4. Que tous enfans nouueaux-nez seroient portez à l'Eglise & baptisez à la Catholique, & que les Curez auroient vn liure auquel ils insereroient le iour du baptesme, & le nom tant du baptizé, que de son pere & ses parrains, souz peine arbitraire aux peres qui n'auroient voulu leur enfant estre baptizé. Mais si ce baptesme se faisoit à l'heretique, que la vie y pendoit, &

du baptizant & de celuy qui le feroit baptizer. Aussi iureroiēt les sages femmes, qu'elles r'apporteroient au Magistrat les enfans qui naissent, aduenant que dans 24. heures ils n'auroient esté baptizez, & si elles contreuenoient à cecy, qu'elles fussent punies.

5 Que nul Regent n'institueroit la ieunesse ny publiquemēt ny priuément, que premier il ne fust examiné d'un Principal, & deux personages deputez du Senat: & feroient serment de n'interpreter point liures ny tenir opinions contraires à l'Eglise Catholique: & aduenant que cy apres ils enseignassent erreurs ou heresies, qu'ils auroient la teste trenchée, & leurs biens confisquezz, & les parēs qui auroient enuoyé leurs enfans à telles escholes, seroient punis d'amende arbitraire.

6 Que les Preuosts & Magistrats, & mesmes les Visiteurs, obserueroient les Edicts faicts touchāt les Imprimeurs & Libraires, & que ceux qui les enfreindroiēt, mourroient, & leurs biens seroient appliquez au Fisc, s'ils sont coustumiers de ce faire: autrement seroient punis d'amēde arbitraire, ceux aussi qui acheteroiēt tels liures seroient punis d'amēde pecuniaire.

7 Que quiconque imposeroit aux subiects du Roy cueillettes ou subuentions pecuniaires, sans le commandement du Roy (quoy qu'on leur donnast de bien bonne affection) seroient neantmoins tenüz à peine arbitraire, & d'en restituer quatre fois autant qu'ils en auroient reçu, ce qui seroit appliqué partie au Roy & partie aux pauures.

8 Ont esté declarez rebelles tous sur-intendans aux consistoires, & ont esté prohibez tous consistoires tant dedans que dehors les villes: & aussi toutes assemblées, souz pretexte de la Cene Caluinesque, du Colloque, de la visitation, & de la religion, tendantes à troubler la paix publique, & ce souz peine de la harr.

9 Est faict cōmandement à tous bannis, fugitifs, vagabōds, apostats, & specialemēt à ceux qui seroient là venüz charouillez du desir de la religiō, de sortir hors des villes dans 24. heures, & ce souz peine du foïet, d'exil, ou de la mort, selon que le cas le requerroit.

10 Que quiconque viendroit d'ailleurs faire sa demeure au pais bas, si c'estoit vn banny, seroit contrainct de vuyder la contrée tout soudain sous la peine exprimée es lettres de l'exil: que si c'estoient aultres hommes, ilz apporteroient le tesmoignage de leur vie & de la cause qui les a esmeuz à laisser les aultres citez, donné à eux par leur Curé & Magistrat.

Finalement on prohibe tous scandales, & toutes iniures à l'encontre des hommes Catholiques & des Ecclesiastiques: & ce sous peine de mort & de confiscation de biens, si le scandale est grand, aultrement d'amende arbitraire. Au reste que tout cecy auroit cours & valeur, iusqu' à tant qu'aultrement auroit esté ordonné du faict de la religion.

S v r la fin de May les heretiques de Steemberg, (si bien me souuient) se mutinerent, & cōmencerent de rechef à faire beau mesnage à quelques Eglises. Mais enuoyez que furent en ce lieu 300. hommes d'armes d'Anuers, les vns fuyrent, les aultres demeurās pour les gages furent penduz.

A v moys de Iuin on feit punitiō à Valenciennes des quatre principaux Calvinistes de ce lieu, l'un desquelz estoit le riche marchand Michel Herlin avec son filz, & deux predicans. Cest Herlin, prononcée que fut la sentence contre luy & son filz, avec vn tranche-plume qu'il tenoit sous son manteau, se donna quelques coups, desquelz on dit que les vns estoient mortelz. Or cogneut-on ce faict par le sang qui en decoula, & fut soudain mené au suplice. Ce que voyans les heretiques se mutinerent, & se parforcerent de deliurer & luy & les aultres, ny ne voulurent ouyr les gens d'armes qui les aduertissoient de se porter sagement. A cause dequoy on tira quelques coups de pistolles sur eux, & de ces coups en tumberent royde mortz six, & en y eut plusieurs dangereusement naurez.

O r aduint vne chose memorable à Cambresis, quoy que ie ne soye recors ny en quel moys ny en quel iour cela fut faict. En ce lieu y auoit vn certain Iehan, apostat de l'ordre des Carmes & predicant des heretiques, qui se faisoit appeller le Seigneur Philippes. Tellement qu'estant prins à la fin, il

Ppppp.j.

nya tresbien qu'il fust le moyne qu'on estimoit. Et quoy que plusieurs hommes qui le cognoissoient fort bien, tesmoignassent du contraire, & mesmes sa mere, laquelle par certains indices monstroient que veritablement c'estoit son fils, & l'exhortoit de reprendre son habit de religieux: neantmoins il respondit impudemment, qu'il ne la cognoissoit point. Il fut en fin si pressé de tesmoings, que malgré luy il confessa qu'il estoit frere Iehan le Carme. Parquoy on le pend au chasteau, d'où les heretiques l'osterent & l'enterrent en vne fosse prochaine. Et voicy que le bruit courut par tout, que ce Iehan estoit resuscité, & qu'il preschoit en France, & s'en trouuoit aucuns qui asseuroient l'auoir veu & l'auoir ouy prescher. Mais à fin de monstrier combien ilz estoient meschans & effrontez, les Catholiques feirent tant qu'ilz trouuerent le corps, & quoy qu'il sentist déia fort mal, si le pendirent-ilz encores vne fois, & ne fut plus osté delà.

*Heretiqs
proscriptz.*

A Hyppres, Tournay, & Gand, & en plusieurs autres lieux de Flandres, plusieurs heretiques absens de leurs maisons furent citez à certain iour sous peine de confiscation de leurs biens. Or ils ne comparurent point au iour assigné, & furent leurs biens en partie confisquezz. Tellement qu'à Tournay en vn seul iour il y eut cent & six Gueux proscriptz, seulement des terres de Tournay, & tous leurs biens adiugez au Fisc, & si en auoit plusieurs en prison au chasteau, & croyoit-on que bien peu en eschaperoient. Or aduint qu'à Aldernad l'un des plus puissans heretiques fut mis à la torture, & ne voulut rien confesser. Tellement qu'estant conuaincu par tesmoings, & craignant d'estre geinné pour la seconde fois, ou peut-estre aussi, craignant l'ignominie & honte d'une mort publique, se precipita en bas par la fenestre de sa maison, & neantmoins par vne singuliere benignité de Dieu qui ne veut point la mort du pecheur, il ne mourut point pour vne telle cheute, ains se recognoissant confessa ses pechez, & rendit l'ame à Dieu en bon Catholique.

*Vn hereti-
que se pre-
cipite de sa
maison.*

Le iour Sainct Pierre & Sainct Paul, fut fait à Gand vn miracle aux reliques de Sainct Liuin, vne femme boyteuse y

estant guerye, lesquelles reliques deux iours deuant auoient
esté rapportées en l'Eglise Saint Bauon, d'un chasteau où on
les auoit trāsportées pour la crainte des heretiques. Brief c'est
chose si certaine que quelques miracles furēt pour lors faictz,
qu'ilz ont esté enregistrez aux archiues publiques.

*Miracles
faictz par
S. Linn.*

ENVIRON ce temps quelques heretiques tascherent de
faire leurs assemblées aupres de Bruges comme de coustume,
allegans pour pretexte de leur effort, que les presches n'a-
uoient esté prohibez que iusqu'à la feste Saint Iehan. Mais
là suruint le Lieutenant du Gouverneur de Flandres avec
quelques gens de cheual qu'il print au chasteau de Gand, le-
quel attrapa vn regent, qui auoit baptizé vn enfant à sa mode
vn peu deuant, bien deliberé de prescher incontinent. Si fut
pendu des le lendemain matin, & furent quelques aultres
prins, les aultres eurent recours à vne legere fuyte.

*Vn regent
pendu.*

COMME on vouloit pendre vn heretique à Harlinge en
Phrise, il retourna à la religiō Catholique, & confessa ses pe-
chez à vn Cordelier, requerant que la Messe fust dictē pour
son ame, & qu'on luy administra le saint sacremēt. Ce qu'e-
stant faict & comme on pensoit que cestuy-cy pendu avec
les aultres eust déia rendu l'esprit, le Preuost va aduiser qu'il
souspiroit encores & n'estoit du tout mort, & au moyen de ce
commanda au bourreau de luy auancer la mort en luy don-
nant encores vn fault. Il se met en deuoir de ce faire, mais la
corde se rompit, & tumba le criminel en bas, demandant peu
apres & à Dieu & au Preuost pardon avec vne voix cassée &
tremblante: ce qu'il impetra, & fut mis entre les mains d'un
chirurgien.

*Vn hereti-
que se reco-
gnust, &
p' ce moien
Dieu le
sauua de
la mort.*

OR n'y eut-il personne en l'assistance, qui n'estimast com-
me miracle, de quoy ce pauvre homme auroit eue sa vie sauue
par la reception de la Sainte Eucharistie, de sorte que tous
les iours plusieurs retournent au troupeau de l'Euangile par
la Frise, seulement à ceste occasion.

LE 18. iour de Iuillet l'Altesse retourna à Bruxelles, com-
me elle eust demeuré à Anuers avec toute la Cour iusqu'en
ce temps, mais le Conte de Mansfeld demeura à Anuers en

Ppppp.ij.

garnison. Vn peu auparauant quelques Gueux auoient eu vn predicant à Ruermonde en Gueldres, lequel auoit premiere-
ment presché à Nimegen, & puy à Maseque. Or desiroient
ceux de Ruermonde l'introduyre, à fin qu'il preschast le iour
& feste de la Visitation de la vierge Marie. Mais voyans qu'il
estoit impossible de ce obtenir, le presche fut fait en vn cháp
pres la ville, auquel allerent bien cinq cens hommes de Ruer
monde, comme l'on dict. Les catholiques se voyans en des-
arroy, appellent quelque Seigneur leur voy sin, & le suppliant
qu'il voulust secourir la ville par quelques siens gendarmes.
Il sy transporte avec quelques gens, & tout soudain fait fer-
mer les portes. Les heretiques retournās de leur presche, voy
ans qu'on leur faisoit visaige de bois, furent aussi estonnez
comme si cornes leur fussent venuës: ilz prient qu'on leur ou-
ure les portes, & les Catholiques respondent qu'ilz ne les re-
cognoissoient point pour citoyens. Ilz reuiennent encores,
& requierent qu'ilz fussent admis à fin de pouoir soulager
leurs femmes & enfans. Et dit-on que les Catholiques leur
enuoyerent leurs femmes & enfans par dessus la muraille, &
ne les voulurent laisser entrer. Voyla ce que i'ay entendu
par hommes graues & dignes de foy, comme i'ay cy deuant
protesté, touchant les choses passées és basses Allemaignes ou
païs bas, & l'ay voulu adiouster à mon histoire, quoy que ie
sçache assez, que quelques aultres y mettront la main pour
mieux & plus amplement la descrire.

*Prise de
Gotha.*

A v moys d'Auril de ceste année presente, la ville de Go-
the assiegée par quelque trait de temps par l'Empire, se rendit
avec vn fort chasteau & presque imprenable, & la fut prins
Guillaume Grumbach, & peu apres fut puny fort rigoureuse-
ment avec quelques aultres. Et me semble digne d'estre noté,
que, si ie ne me trompe, ce Grumbach fut tué enuiron le mes-
me temps, que l'Euesque de Vvircibourg Melchior Zobel, fut
massacré mal-heureusemēt l'an 1558. ce que nous auons mē-
tionné cy dessus. Mais ie n'escriray rien d'auantage de cecy,
pour ce que ie ne le sçay asseurement.

C E S T E année le Conte d' Helfenstein, Seigneur fort illu-

estre & de grande autorité enuers tous les Princes d'Allemai-
gne, en présence de plusieurs graues hommes qui csta le Luthe-
risme & la confession d'Ausbourg, à laquelle il auoit consen-
ty des premiers, si mon opinion ne me deçoit, & depuys est
entierement Catholique. Or demeura-il, avec vn sien frere
pareillemēt Comte, trois semaines chez M.le Cardinal d'Auf-
bourg, & ayant chassé de ses terres tous heretiques & predi-
cans mariez, a rappellé les predicateurs & prebstres Catholi-
ques: lesquelz ont grand deuoir à reduyre le pauvre & sim-
ple peuple, à faire reédifier les autelz & images, & mesmes le
peuple y va soigneusement. Plusieurs hommes des villes pro-
chaines fort estōnez d'vne telle nouveauté, se recognoissent,
& retournent à l'vniō de l'Eglise nostre mere vnique, quoy
que les faulx prophetes grinsēt les dens, dequoy ilz voyent
les brebis de Iesuf-christ leur estre ostées du gosier. D'auanta-
ge, le Seigneur Venerād Gabler, professeur de medecine fort
celebre, suyuant l'exemple de ce Comte a reprins la foy Ca-
tholique, & auoit esté present ce medecin lors que Pierre Pol-
Verget estoit aux angoysses de la mort, en qui il auoit veu
certains signes esmerueillables, qui l'auoient induict à estre
Catholique.

OR entre plusieurs choses qui ont esguillōné ce Comte
à reprendre la religion Catholique l'vne des principales cau-
ses a esté, dautant que (comme il tesmoigne) il n'a trouué au-
cun fondement ou concorde, ny en la doctrine, ny és cere-
monies de la confession d'Ausbourg, & que mesmes ses mini-
stres ne luy en auoient peu rien apprendre: de maniere qu'ilz
l'ont precipité tantost d'vn costé & tantost d'aultre, iusqu'à
estre tumbé, quant & ses subiectz, en des erreurs fort absur-
des. Aussi par-ce que Luther & tous ses sectateurs ont esté
fort inconstans en leurs escritz, & maintenant ont enseigné
vne chose & tantost vne aultre.

COMME la Flandres estoit en si grandz troubles, & Ma-
dame la Gouuernante ne pouuant pas acheminer les subiectz
du Roy Philippe, à tel repos qu'elle eust bien desiré: sa Maie-
sté estant aduertie, que cela proceddoit en partie de quelques

grandz Seigneurs du païs, qui r'enuersoient tout ce que son Altesse faisoit, sans vouloir obéir aux commandemens d'icelle: apres plusieurs deliberations le Roy se resolut d'enuoyer en Flandres pour appaiser ces desordres, Dom Ferrand Aluarez de Toledé, Duc d'Albe, Marquis de Corie, & son Lieutenant & Capitaine general, comme celuy qui par l'espace de trente ans auoit seruy l'Empereur Charles Quint en toutes ses guerres, & qui cognoissoit fort bien l'humeur des habitâs du païs bas. Parquoy ledict Seigneur Duc accompagné de Dom Federic & Dom Ferrand de Toledé ses enfans, & d'autre bon nombre de Cheualiers & Gentilz-hômes, partit d'Espagne, & vint surgir à Genes: & delà vint à Ast, où l'armée qu'il vouloit mener en Flandres, s'estoit assemblée, & montoit icelle à neuf mille Espaignolz tous vieux soldatz, sept mille Sauoyfiens, & mille cheuaux legers, tous bien en ordre & experimenterz en la discipline militaire. Avec ceste armée il se meit à chemin par les terres du Duc de Sauoye, au moys de Iuillet, & s'attendoit-on biē qu'en passant il deust essayer la ville de Geneue: mais pour ne perdre tēps, & aussi pour quelques aultres raisons il s'en déporta, de maniere qu'e peu de iours il gagna le païs de Flandres. Où estant arriué, Madame la Gouuernāre luy teint quelque propos pour vser de douceur enuers les Flamans, à fin de ne les agacer, & qu'en faisant ainsi les choses pourroient se mieux porter. Mais le Duc pesant mieux les choses, & mesmes voyant q̄ le Prince d'Orenge & quelques autres (de qui on s'estoit tousiours douté) au seul bruiēt de sa venue auoient gagné l'Allemagne à la haste, il auisa le cōtraire: & departit si biē son armée par les villes, qu'en deux iours il la pouuoit ramasser. Peu de iours apres il se meit à prendre les chefs des seditiōs & esmeutes passées. Quoy fait, il feit bastir

*Citadelle
à Anuers*

les desseings d'une citadelle en la ville d'Anuers, par vn ingénieur nommé Pacciot qu'il auoit amené de Sauoye: dōt les Flamans furent fort intimidez, & encore plus quād ilz veirent q̄ les biens des seditieux, autheurs du demolissement des Eglises, estoient cōfisquez par ledict Sieur Duc pour le r'establissement d'icelles, & à ceste occasion plusieurs abandonnerent le païs.

LES affaires de Flandres estans en tel estat, le Prince d'Orange & le Comte Ludouic son frere qui s'en estoient allez en Alemaigne, eussent bien voulu r'auoir leurs biens & heritages: mais n'ayans aucun moyen pour l'heure, commencerent à supplier les Seigneurs Alemans qui sont de mesme religion qu'eux, à ce que par leur moyen ils peussent recouurer leurs biens. De sorte que les Princes d'Alemaigne donnerent moyen audict Sieur Prince, d'amaasser trois mille cheuaux & douze mille hommes de pied, avec lesquelles forces il esperoit faire quelque chose, se confiant au reste avec les intelligences qu'il auoit au pais de sa naissance. Quoy voyant le Duc d'Albe, il feit commandement expres à vn chacun de suyure la religion Catholique, & si feit porter toutes les armes des habitans ez maisons des Gouverneurs des villes du pais, en cela se monstrant auoir toute puissance. Au moyen dequoy Madame la Duchesse de Parme, pieça Gouvernante, demanda au Roy Philippe d'estre deschargée de ce fascheux gouuernemēt, ce qu'elle impetra, & luy feit sa maiesté present de trente mille escuz en don, & de quatorze mille escuz en rēte pour elle & les siens, & ainsi se retira son Altesse en Italie vers le Duc de Parme son mary, ayant gouuerné cinq ans le pais bas. Apres cela, le Duc d'Albe commença à monstrier quelle puissance & autorité luy estoit donnée en Flandres par le Roy, à sçauoir d'estre Capitaine general, d'establir tels Capitaines & Gouverneurs que bō luy sembleroit, & de faire plusieurs autres choses, & feit publier & imprimer ceste sienne puissance. Et pour plus s'asseurer en son estat, il osta les clefs de la ville de Bruxelles à ceux qui en auoient la charge. Lesquelles nouuelles estās r'apportées à Messieurs de Gand, s'en veindrent complaindre audict Sieur Duc, menans avec eux le Sieur Comte d'Aiguemont: lesquels toutesfois furent r'enouoyez par son Altesse comme il appartenoit. De ce fait des Gantois estant irrité ledict Sieur Duc, assembla le conseil des estats en sa maison, où il exhiba la charge à luy donnée par le Roy: & ce fut lors qu'il feit emprisonner les Comtes d'Aiguemont & de Horne, & le secretaire dudit Comte de Horne

*Secours
medié par
le Prince
d'Orange
en Ale-
maigne.*

*Armes
ostées aux
citoyens.*

*Madame
de Parme
quicte Flā-
dres.*

*Puissance
donnée au
Duc d'Al-
be en Flā-
dres.*

*Seigneurs
prisonniers
en Flādres*

avec tous les enseignemens & memoires de son maistre, & aussi le Seigneur de Baquerfel, Cōseiller du Comte d'Aiguemont: & furent tous menez au fort de Gand, souz la garde d'un bon nombre d'Espagnols. Ces choses ainsi disposées, ledict Sieur Duc se transporta de Bruxelles à Anuers le 24. iour d'Octobre, pour mettre ordre à la Citadelle, laquelle en grandeur esgalle le chasteau de Milan, & reuiennent les frais des fondemens d'icelle à 24000 ducats. Or tandis q̄ ledict Sieur Duc se tenoit à Anuers, il despescha le Sieur Comte d'Aremberg avec plusieurs aultres grands Seigneurs & gentils-hommes vers le Roy de France, qui y amenerent grand nombre de Cauallerie & de fanterie, ioints avec le Duc de Guyse, pour-autant que ce fut en ce temps que les seconds troubles de France commencerent, desquels il nous faudroit parler des à present selon le temps: mais pour ne confondre les matieres nous le reseruerons aux discours ensuyuans. Parquoy toutes choses estans deuément disposées à Anuers, où il auoit eu des citoyens quatre cens mille escuz, partie pour le bastimēt de la Citadelle, partie pour la solde de son armée, son Altesse partit de ladicte ville d'Anuers, & retourna à Bruxelles.

1568.

Garnisons
et places
des hereti-
ques.

Enfans
des Sei-
gneurs re-
tirez à An-
uers.

Seditieux
punis.

SEIOVRNANT en ladicte ville, & estant encore plus au vray informé des efforts du Prince d'Orenge & de son frere, ensemble de la ligue faicte par les Sieurs d'Aiguemont & de Horne avec le sus-dict Prince, l'an 1568. au mois de Feurier il enuoya garnison d'Espagnols à Brede, suiuite au Prince, faisant le mesme aux autres places des Seigneurs liguez. Il feit aussi mener de Louuain à Anuers les enfans dudit Sieur Prince & des Comtes sus-nommez, dont celuy du Prince a esté enuoyé en Espagne, pour y estre instruiēt en bonnes mœurs & façons de viure. Et ce pendant il faisoit tousiours examiner quelques officiers & domestiques du Comte d'Aiguemont, mesmement sur la ligue avec le P. d'Orenge, non-obstant toutes requestes à luy presentées par l'Empereur Maximilian. Quiconque aussi estoit trouué coupable des seditions auenuës, comme cy deuant auons amplement recité, estoit puny cōme le cas le requeroit. Fut aussi le Sieur Prince d'Orenge

d'Orenge assigné à comparoistre dans briefz iours , pour se iustifier des crimes à luy imposez.

Si fut enuoyé enuiron le 20.iour de Mars le Sieur de Beo ^{Heretiqs} uors avec quelques troupes , pour rompre quelque assen- ^{des faitz} blée de païsans aupres d'Anuers, qui faisoient là mille maux, ^{& penduz} estans déia venus iusqu' au nombre de 1500. iceux toutesfois furent desfaitz facilement , & oultre furent penduz à Anuers bien cent cinquante heretiques , qui cuyda estre cause d'vne sedition.

Sur ces entre-faictes , le bruiet courut en Flandres , & ^{Bruict des} mesmes le Duc d'Albe en fut aduertie par l'Ambassadeur du ^{reistres ve-} Roy Catholique en France , que les reistres qui estoient ve- ^{nus en} nuz pour le secours des Huguenotz en France (comme nous dirons) retournans apres la paix faicte , seroient pour attenter quelque chose contre l'estat de Flandres : à cause dequoy le Duc feit r'enforcer les frontieres du païs de gens de cheual & de pied, à fin que si lesdictz reistres entreprenoiert sur luy, ilz trouuassent chausseure à leur pied. Et comme son Altesse estoit en ceste peine , on descouurit que quelques vns auoient ^{Coniure} machiné & complotté sa mort , pendant qu'il feroit ses de- ^{contre le} uotions la semaine sainte, & de faire le semblable des Espa- ^{Duc d'Al} gnolz qui seroient à Bruxelles. Toutesfois Dieu voulut que ^{be, & Cler} ce desseing ne fust executé, ains furent punis rigoureusement ^{gé du Lie-} plusieurs rebelles , & nommément ceux qui auoient coniuéré ^{ge.} le massacre dudiect Sieur. La semblable punition fut faicte de ceux, qui auoient couuertement desseigné la mort de l'Euesque & Clergé du Liege, pour en-apres saccager la-dicte ville. Bref on n'oyoit parler d'autres nouuelles, que de coniures & conspirations contre les Espaignolz, souz pretexte de remettre le païs en liberté. Or sur le moys de May , le Duc ayant ^{Deffaitte} sceu qu'vne bonne troupe de gendarmerie Alemãde estoit ^{d'Alemãs} aupres de la riuiera de Meuse , pour empescher qu'ilz ne pas- ^{pres Ma-} sassent ladicte riuiera, feit aller quelques gens de cheual & de pied à l'encontre d'eux , qui les estrillerent si bien qu'ilz en desfeirent plus de seize cens , sans perdre plus hault de quarante des leurs : & fut ce faict pres de Mastrich sur ladicte ri-

Qqqqq.j.

uiere. Mais à cause que telle deffaiete n'estoit auenue que par leur desordre, ilz ne perdirent point courage pourtant, ains se faisirent de plusieurs places, dont ilz faisoient gros dommages, & donnoient bien de l'affaire aux Espaignolz. Outre cecy, venoient plusieurs forces du costé d'Allemagne tât à pied qu'à cheual, tellement que combien que les frontieres fussent bien garnies, neantmoins avec si grande puissance ilz eussent peu mener le Duc à quelque desauantage. Et partant ledict Sieur faict comme eux, il faict faire monstre generale, où il se trouua auoir quatre vingtz enseignes de gens de pied avec autres qu'il feist encore leuer, & quelque deux mille cinq cens cheuaux. Nous vous auons déia dict que le Prince d'Orange auoit esté q̄rir secours en Allemagne: lequel ayant amassé, il tire vers Flandres, non pas soy disant aller contre le Roy, mais bien pour r'entrer en ses biens & remettre les bannis chacun en les leurs. Si auoit le Comte Ludouic durant cecy pris deux villes au païs de Frise, Vedem & Dam, & à ceste occasion le Duc despescha bon nombre d'hommes qu'il enuoya en ces quartiers souz le Comte de Megue: ce que voyant ledict Comte Ludouic, voulut forcer la ville de Gruningue, mais il trouua là à qui parler. Le Duc d'Albe estoit lors bien pressé d'affaires, comme on peult penser: mais neantmoins il continuoit la confiscation des biens des rebelles, à tout laquelle il soldoya partie de son armée, ayant le Comte Palatin differé de rendre 150000. escuz pris par luy, comme quelques marchans les voulussent donner pour le Roy Philippe. Et mesmes en ce temps ledict Duc feist publier vn edict, à ce que tous ceux qui pour le faict de la religion se seroient cy deuant absentez, se vinsent presenter chacun à son Magistrat, & les principaux d'iceux furent appelez à trois briefz iours: mais aucun ne retournoit, craignans tous d'estre punis. Ce-pendant le Duc entend que le Comte Ludouic remuoit quelque chose en Frise, au moyen dequoy il y enuoye le Comte d'Aremberg avec grand' force de caualerie & bon nombre de fanterie: ce que sachant le Comte Ludouic se retire en vn village, & comme les Catholiques le vou-

*L'armée
du Duc
d'Albe.*

*Confisca-
tions de
biens.*

*Edict du
Duc.*

loient aller trouuer, enuiron mille harquebuziers de Ludo-
 uic vindrent attacher l'escarmouche contre les nostres, qui
 dura iusqu'à la nuit. Le lendemain les ennemys n'estoient
 plus au mesme lieu, ains à Dam, où les Catholiques les suyui-
 rent: mais la cauallerie des Catholiques n'estoit encor' arri-
 uée, de maniere que l'ennemy se voyant auoir l'auantage, se
 rua brusquement sur les Catholiques, qu'il meit en fuyte com-
 me il pretendoit bien: & en ceste rencontre plusieurs braues
 hommes moururent, le Comte d'Aremberg y fut prins. Et
 dict-on qu'en ce confliet le Comte Alphonse de Nansau,
 frere du Prince d'Orange, auoit esté occis par le Comte d'A-
 remberg: dont il n'est merueille si ledict Sieur Comte estant
 pris par les gens du Comte Ludouic, fut tué par-apres: & fu-
 rent aussi quelques Espaignolz prisonniers penduz. C'est ce-
 ste bataille que les heretiques recommandent tant, en vn li-
 ure des seconds troubles de France. Vne heure apres ceste
 route des Catholiques, suruint leur Cauallerie, & par ainsi les
 Catholiques attaquèrent de rechef l'ennemy, & feirent si
 bien qu'ilz s'emparerent de la place qui estoit assez forte &
 bien munie. Ceste deffaiete aduint par la faulte des nostres,
 qui furent temeraires, & infracteurs de la discipline militai-
 re: tellement que quelques vns en ont esté punis par le Duc
 d'Albe.

*Deffaiete
des Catho-
liques en
Phrise.*

*Le Comte
d'Arem-
berg tué
estant pri-
sonnier.*

*Dam re-
prise par
les gens du
Duc.*

Or iceluy considerant qu'il estoit necessaire pour le re-
 pos commun, que les chefs de la rebellion fussent punis &
 chastiez, apres que les crimes de rebellion & lese maiesté eu-
 rent esté deuément prouuez à l'encontre du Comte d'Aigue-
 mont, & que le proces dressé par le Procureur general eust
 esté veu & visité: son Altesse donna arrest contre ledict Sieur
 le 4. iour de Iuin, le condamnant à estre descapité à Bruxel-
 les, & confisquant au Roy tous les biens dudit Sieur. Laquelle
 sentence estant r'apportée au Comte, il la trouua fort rigou-
 reuse, & escriuit au Roy de ceste rigueur, pour ses enfans. Et
 le lendemain sur le point du iour, il ouyt deuotieusement la
 Messe, il se confessa, & reçeut nostre Seigneur: duquel deuoir
 vsa aussi le Comte d'Horne, prisonnier avec luy.

*Arrest
contre le
Comte
d'Aigue-
mont.*

*Les com-
tes d'Ai-
guemont &
Horne
meurent
Catholiques.*

Qqqq.ij.

Le sixiesme iour de Iuin estant venu, on couurit le chafauld de drap noir en la place du marché de Bruxelles, & fut descapité le Côte d'Aiguemont le premier, & puy le Comte d'Horne. Leurs testes ne demeurerēt que deux heures sur les colonnes où elles auoient esté posées : & le peuple auoit si grand regret de la mort du Comte d'Aiguemont, qu'ilz prioient vnanimement Dieu pour son ame, & visitoient presque son corps comme si ce fussent esté reliques. Durant le moys de Iuin furent faictes plusieurs autres executions par ledict Sieur Duc à Bruxelles, ie dis de grands personnages: à quoy ledict Sieur se hastoit, estant deliberé d'aller incōtinent cōtre les rebelles. Or en ceste saison les armées estoient en Frise, le Duc ayant renforcé les troupes des Catholiques apres la route du Côte d'Aremberg: & se retiroient les Catholiques à Gruningue ville forte & bien munie, laquelle le Comte Ludouic voulut surprendre en y faisant mettre le feu vne nuit par hommes apostez, mais cela fut descouuert. Dont ledict Comte, qui auoit bien seize mille hommes en son armée, assiegea la ville, mais pour neant, à cause qu'il n'auoit point de pieces de batterie, & que dedans y auoit de vaillās Capitaines & soldatz, comme les Comtes de Megue & de Martinēgue. Sur cela le Duc se prepare pour aller en auant, faisant au preallable tirer à quatre cheuaux le secretaire du Cōote d'Aigue mōt pour ses crimes, & brusler quatre aultres tous vizz, iustice qui donna grande frayeur à plusieurs. Tellement que son Altesse partit de Bruxelles sur le mois de Iuillet pour se ioindre à l'armée, menant avec soy de belles compagnies, & ainsi vint à Bosleduc. Ce-pendant ceux qui estoient dans Gruningue ne cessoiēt de faire saillies sur le Comte Ludouic, de maniere qu'il y reçeut fort gros dommage. Le Duc d'Albe estant à Bosleduc, fait venir artillerie & munitions pour son armée, de la ville de Malines, & des basteaux pour faire pontz, & fut tout cela enuoyé vers Frise: lesq̃lles prouisions faictes, le Duc print la volte de Gruningue où estoient ses forces, arriuant là le 14. de Iuillet. Dont le Comte Ludouic leua le siege de Gruningue, & comme il fuyoit les Catholiques ne faillirent de le

*Siege de
Gruningue
par le
Comte
Ludouic.*

*Le Duc
d'Albe
va au cāp.*

*Prouisions
de guerre
par le Duc.*

pourfuyure, & ne l'endommagerent beaucoup, par-ce qu'il rompoit les pons, son armée passée. Comme le Comte alloit plus en-avant, tant plus d'hōmes se ioignoient à son armée, à cause q̄ ce país est fort infecté d'heresie, de sorte qu'il estoit grandemēt fort, avec lesquelles forces il gaigna le hault de la riuere de Hems, & campa en vn lieu trefort de son assiette, delibéré d'y demeurer, iusqu' à tant que le secours de son frere le Prince d'Orenge (qui seiournoit pres la ville de Coloigne sur le Rhin avec ses troupes) fust arriué, estimant que force aucune ne scauroit aborder le lieu où il estoit. Toutesfois le Duc ne trouuant rien inexpugnable, proposa de les combattre là, & si leur ferma les passages à fin qu'ilz ne luy eschappassent. Il enuoye donc des gens pour attaquer l'escarmouche avec les gens du Comte, & neātmoins le Duc n'estoit pas delibéré de se haster rāt pour cōbattre son ennemy qui estoit fort: mais luy-mesme força le Duc à se haster, pēsant bien faire. Car pour-ce que le lieu estoit marescageux & enuironé de fossez, il trouua moyē de desboucher les cōduyctz des eaux, & icelles fait respandre sur les Catholiques pour les noyer. Au moyē de quoy le Duc se hastia pour ne reduyre ses soldatz à combattre ayans l'eau iusqu' à la ceinture, outre ce qu'il auoit peur, qu'il ne suruint vne pluye qui empescheroit sa scopetterie. Parquoy le combat cōmence, & ne fut oncques veu plus grāde alegresse des combattās Catholiques, de maniere que l'ennemy tourna tout aussi le dos, & fut roydemēt suiuy, si que les chemins estoient decouuers de corps mortz, outre ceux qui perirent dans les bouës, & aultres qui se noyerent se voulans sauuer dans la riuere de Hems. Et ce qui est plus admirable, il ne demeura que dix ou douze Catholiques mortz & autant de blecez, y estans demeurez bien sept mille heretiques, dont la plus grand part estoient du país bas, & ayant l'ennemy perdu seize pieces d'artillerie, & leurs reistres quelques quinze cens chariotz de bagage, & aussi grand nombre de deniers. De laquelle victoire obtenuē le 21. iour de Iuillet, le Duc d'Albe rendit incontinent graces à Dieu, & furent les nouuelles portées à Rome & en Espagne.

*Le Comte
Ludouic
se cāpe en
lieu fort.*

*Courge du
Duc.*

*Comme le
Duc se ha-
sta de dō-
ner bata-
ille.*

*Victoire
du Duc
d'Albe.*

APRES ceste desconfiture, le Comte Ludouic se retira à son frere le mieux qu'il peut, & vindrent iceux ensemble pē-
 sans bien faire quelque grand coup en Flandres. Ce qu'enten-
 dant le Duc, partit soudain du païs d'Hollande où il estoit allé
 apres la bataille, & vint à Mastrich, passa la Meuse, & dōna de-
 gäst au païs pour ne laisser aucuns viures à l'ennemy qui ve-
 noit. Son armée estoit de trente mille hommes de pied & six
 mille cheuaux, & sur le commencement du mois de Septēbre
 il eut nouuelles, que le Prince d'Orège auoit passé le Rhin &
 que son armée estoit de 25. mille hōmes de fanterie avec bon
 nombre de cheuaux: & pēsoit-on qu'il deust tirer en France, à
 cause qu'en ce temps les troisiēsmes troubles estoient surue-
 nus audict royaume. Toutesfois le Prince disoit qu'il vouloit
 aller trouuer le Duc d'Albe, lequel pour tenir teste au Prince
 s'arresta vne lieuē par delà Mastrich sur la riuere de Meuse
 vers le Liege. Et par-apres fait vne fort belle remonstrance à
 son armée, les encourageant au seruicē de Dieu & de la cou-
 ronne d'Espaigne, si bien que cela hauça de beaucoup le cou-
 rage à ses gens. Ce-pendant l'armée du Prince print vne pla-
 ce par deçà Coloigne par trahyson, qui toutesfois leur fut vé-
 duē cherement. Or ne croyoit-on plus que l'ennemy voulust
 aller en France, à cause qu'on le voyoit prendre vn autre che-
 min, à sçauoir celuy de Gueldres, tellement qu'il s'approchoit
 tousiours plus pres du Duc: mais toutesfois on ne sçauoit que
 penser de ses desseings, à cause qu'il ne s'auançoit point, com-
 bien que la saison l'en deust semondre, pourautant qu'il auoit
 l'hyuer à doz, & ses moyens ne bastoient pas pour soudoyer
 vne armée si grande tout vn hyuer, au lieu que le Duc d'Albe
 ne manquoit nullement d'argent. Outre ce le Prince n'auoit
 presque point de viures, point de munitions, point de ba-
 steaux, qui sont grandes incommoditez: & combien qu'on
 se doutast qu'il eust beaucoup d'intelligences, si est ce que
 le Duc y auoit mis si bon ordre, qu'il n'y auoit rien à crain-
 dre. D'auantage c'est chose trop certaine que les chefs de
 l'armée du Prince n'estoient gueres bien obeïs, de façon
 qu'on ne se doit point esmerueiller si ces forces s'en allerent

*Armée
catholique
& du Pri
ce d'Orège*

*Le Duc à
Mastrich.*

*Grandes
incommo-
ditez du
Prince.*

en fumée. Toutesfois le Prince estoit resolu de passer la ri-
 uiere de Meuse, & le Duc autant resolu de luy deffendre
 ce passage, & partant il sauance vers le Prince: lequel voyant *Le Prince*
 ce rusé Duc l'importuner si fort, & n'ayant point de bastiaux, *passé la*
 cōme nous auons dict, fut contraint de passer la riuiere à gué, *Meuse à*
 en vn lieu où elle estoit fort basse, ayant mis cinq cens che-
 uaux au deuant pour empescher l'impetuosité de l'eau, & a-
 uec tout cela neantmoins il feit grosse perte de cauallerie &
 fanterie. Par ce moyen il deceut le Duc d'Albe, lequel voyât *Rusé du*
 cela, se retira dās les forteresses, à fin que l'ennemy n'eust au- *Duc.*
 cun lieu pour passer son hyuer, & qu'avec l'incommodité du
 temps il se deffeist soy mesme, pour-ce que ces païs sont fort
 pluuieux & difficiles. Le Prince estāt ainsi passé, ne feit con-
 tre de la ville de Tilemont, ce que soupçonnoit pourtant le *Grande*
 Duc, ains ledict Prince tire vers la riuiere qui separe le Liege *deffaite*
 & le Brabant: où estant arriué il passa fort inconsiderément, *du Prince*
 sans regarder ce qui luy pouuoit auenir. Dequoy estāt le Duc *passant r-*
 aduert, enuoya grosses forces de cauallerie & fanterie, &
 mesme de l'artillerie, luy suyuant apres: & fut telle l'escarmou-
 che donnée par les Catholiques, que cinq mille heretiques y
 demeurerent pour les gages deçà la riuiere, & si furent enco-
 re poursuyuis au delà. De laquelle rouverte le Prince estant
 beaucoup esmeu & estonné, ne sçauoit quel conseil prendre:
 & bien que quelque secours luy fust venu de France, si est-ce
 qu'il ne luy seruoit de rien, ains l'endommageoit à cause qu'il
 n'auoit nulz viures & nuls deniers: & qui pis est, toutes ses in-
 telligēces ne luy seruoient de rien, à cause que les subiects du
 Roy ne se remuoient aucunement. Desquelles difficultez *Le Prince*
 se voyant estre vaincu, il se retira sans sonner le tabourin, *vaincu de*
 prenant presque mesme chemin qu'il estoit venu, ce qui ne se *difficultez*
 fait sans dommage. Le Duc mouroit d'enuie de le bien fro-
 ter, & toute son armée y estoit fort affectionnée, ayant eu au
 commencement du mois de Nouembre secours du Roy de
 France: mais le Prince gaigne la Meuse vistement, laquelle *Fuyte du*
 toutesfois il ne peut passer à gué, à cause de l'hyuer qui l'auoit *Prince.*
 accreué, dont il luy fut force de prendre le chemin de France

comme fil eust voulu courir, ayant crainte d'estre surprins par le Duc d'Albe qui le talonnoit. Quelque caualerie du Duc les suyuit come ils fuyoient, & en faisoit demeurer tousiours quelcun: mais non pas tel nombre, que, peult-estre, eust demeuré, si le Duc eust voulu se hazarder vn peu d'auantage, qui se contentoit d'auoir chassé vn si puissant ennemy des terres de son Roy, sans aucun sien dommage. Le prince ayant trauerfé le país bas à grand' peine, & sans grand dommage, (à raison de ce que nous venons de dire) feit tant par ses iournées, qu'il se veint ioindre avec le Duc de deux-ponts, mais avec bien petites forces. Et est celuy Duc, qui faisoit ses ap-
*Le Prince
vint au
Duc de
deux-ponts* prefts pour passer en France au secours des reformez, comme nous dirons en son lieu. Le Duc ayant ainsi chassé son ennemy, se retira à Bruxelles, & administra iustice à tout le país, come il scait bien faire. Au reste, le lecteur ne trouuera mauuais, si nous auons poursuiuy ces troubles de Flandres iusqu'à la fin, sans obseruer le temps: car nous auons ce iuit, pour rendre la continuation de l'histoire plus facile, & allons dire ce qui aduint en France l'an 1567.

*Les seconds
troubles de
France.* COMBIEN que la France pouuoit auoir assez apprins par ses premiers troubles, qu'il n'y a meilleur moyen de la ruiner, qu'en tournant le cousteau de ses propres enfans contre soy-mesme, encore que le pretexte de religion les y semble contraindre: neantmoins ceste année elle se plôgea de rechef en la mesme guerre, & d'autant plus alaigremét, qu'elle sembloit auoir déia repris ses anciennes forces, par l'heureux cours du temps qui auoir esté depuis quelques années. Or ie pése qu'il ne me faut point icy exposer l'occasion, qui esmouuoit ceux de la pretenduë religion reformée à reprêdre les armes. Tant y a qu'ils ont imprimé vn liure, par lequel ils disent que c'estoit pour presenter vne requeste au Roy, mais les Catholiques n'y adioustoient point de foy. Doncques le 28. iour de
*Le Roy
gagn. Pa
vis à la ha
ste.* Septêbre, veille S. Michel, come le Roy se retiroit de Meaux en sa bonne ville de Paris, quelques siens subiects s'estans assemblez en armes, le voulurent accoster: mais sa Maiefté ne trouua

trouua point bon de parlementer avec eux en telle façon, de maniere que pour eüiter tout peril, il gaigna la ville de Paris le plus hastiüement qu'il peut. Si trouua à son arriüée ladicte ville si esperduë pour cest accident inopiné, qu'à voir le trouble du peuple, il sembloit qu'une soudaine mutation des choses la deüst accabler. Les reformez n'ayans peu presenter leur requeste sur le chemin de Meaux, (ie veux icy vser de leurs parolles) vindrent en la ville S. Denys, distant de Paris deux petites lieuës, pour plus commodemēt aduertir le Roy de ce qu'ilz auoient à luy remonstrer, sur beaucoup de choses qu'il ne fault point icy specifier. Quoy qu'il y ayt, qui les irrita incontinent apres à brusler les moulins qui sont pres les fauxbourgs S. Martin. Or le mercredy ensuyuant sans occasion s'ourdît vn espouuantement à la porte S. Iacques, qui causa vn tel effroy en ceste grande cité, que tout le iour chacun se teint sur ses gardes. Du depuys la ville se trouua en grande disette de viures, tant pour-ce que les chemins estoient occupez & du costé S. Denys, & du costé S. Iacques, les reformez ayans la ville d'Estampes à leur deuotion: que pourautant qu'on ne pouuoit finer de farines, & principalement lors que par la lascheté d'un homme le pont de Charenton vint entre les mains des reformez, passage fort important à la cité.

Les reformez ayans failly à leur entreprise, & partant soucieux d'un lieu où ilz se pourroient retirer à seureté quand bon leur sembleroit, auiserent qu'il n'y auoit meilleure ville pour cela, que celle d'Orleans, tant pour-ce qu'elle est au cueur de France & comme maistresse de la riuere de Loire, que pour-ce qu'ilz auoient pieça apprins par experience combien elle est forte. Au moyen dequoy ilz feirent tant qu'ilz s'en emparerent des le commencement de ces troubles, & ne voulans guerres demeurer sans produyre les fruietz qui sortent de leur religion, & se repentans de n'auoir pas assez trauaillé les premieres guerres à l'honneur de Dieu: ilz sapperent les Eglises de ceste ville rez pied rez terre, entre lesquelles estoit celle de Sainte Croix, siege Episcopal, Eglise qui n'auoit guerres de pareilles en France. Le semblable ont-ilz fait en plusieurs

Rrrrr.j.

*Paris en tumulte.**Les moulins de Paris bruslez.**Effroy des Parisiens & la cherté en icelle.**Le pont de Charenton prins.**La ville d'Orleans prise.**Eglises ruinées.*

villes de ce Royaume par eux occupées, de sorte qu'à peine
 ſçauroit-on cognoistre en quelle place les-dictes Eglises ont
 iadis esté. En la ſuſdicte ville d'Orleans y auoit vn bon Cor-
 delier, nommé Picard, fort hay des reformez à cause de ſes
 belles & fructueuſes prediatiōs faiçtes aux Catholiques: le-
 quel pour euites les mains, ſouillées encore du ſang de ceux
 qui auoient eſté martyrizés à la premiere guerre, comme
 nous auons dict, fut contrainct de demeurer trois bons mois
 dans vne caue, ne voyāt ny Soleil ny Lune: & par ce moyen
 il vit encor' au grand ſoulas du peuple catholic.

*M. Pi-
 card pref-
 cheur à
 Orleans.*

COMME les reformez eſtoient à Saint Denys, le Roy
 manda venir ſa nobleſſe à ſon ayde: & en cecy il fut ſi prom-
 ptement obey, qu'en bref temps les plus ſegnalez Cappitai-
 nes de France ſe trouuerent à Paris, pour ſ'emploier coura-
 geuſement au ſeruice de ſa Maieſté. Et partant icelle voyant
 que ſon peuple de Paris ſouffroit beaucoup, pour auoir ſi pres
 de ſes portes les reformez & ne pouuoir mettre le nez hors
 d'icelles ſans danger: delibera de les chaffer de Saint De-
 nys, où ilz ſ'eſtoient monſtrez vn peu plus modeſtes qu'ail-
 leurs, Dieu ne permettant qu'une ſi belle & ſi ancienne E-
 glife, vray Mauſolée de nos Roys, fuſt ainſi ruinée, ou pour-
 ce auſſi, qu'ilz ſe faſchoient de rompre la gueine, n'ayans peu
 auoir le couſteau.

*Eglise de
 S. Denys
 nō gaſſée.*

*La batail-
 le de S.
 Denys.*

DONCQVES le lundy veille Saint Martin ſa Maieſté
 feit ſortir ſes troupes hors de Paris, & y eſtoit preſent Mon-
 ſieur le Conneſtable, qui deſiroit en ſa vieilleſſe extreme fai-
 re encore ce ſeruice à Dieu & à ſon Roy. Icelles eſtans venu-
 es iuſqu'au village de la Chapelle à moytié chemin de Paris
 à Saint Denys, le choc commença entre les Catholiques &
 les reformez, qui n'eſtoient en trop grand nombre, pour-
 ce que lors le Sieur Dandelot eſtoit abſent de la bataille. La ren-
 contre fut furieuſe de part & d'autre, les reformez bataillans
 fort obſtinément, & les Catholiques de grand courage: de
 ſorte que Monſieur le Conneſtable y fut frappé, & fut ſa ble-
 çure telle que d'icelle peu de iours apres il rédit l'ame à ſon
 Dieu, bien-heureux pour eſtre mort à la querelle d'iceluy &

*Mort de
 M. le Con-
 neſtable.*

de son Roy. Bref il n'est memoire de bataille faicte plus ardemment, que fut ceste-cy: en laquelle les reformez furent rembarrez iusques dans Saint Denys, estans plusieurs d'iceux demeurez sur la place, & aussi plusieurs Catholiques. Que si les tenebres n'eussent esté fauorables aux vns, (Dieu les gardant encore pour amender noz pechez) ie croy qu'il n'eust point esté besoing de les suyure par apres, se sentans encore bien fortz, pour n'auoir perdu à la Bataille aucun de leurs principaux cheffz, & pour auoir receu ceux qui estoient absens au iour d'icelle bataille. L'armée du Roy les suyuit peu à pres, & comme ilz eussent rasché de prendre la ville de Sens, elle les contraignit de leuer le siege. Or à cause que l'une partie ne faisoit autre chose que fuyr, & ne vouloit iamais attendre vne bataille, il aduint que Monsieur, frere du Roy, chef de l'armée, ne peut oncques les auoir à son plaisir, quoy qu'il feist: & parrant l'hyuer se passa sans choses beaucoup memorables, sinon que par fois il se faisoit des escarmouches, & rencontres, esquelles il demeuroit tousiours quelcun. Et en ceste façon fut blecé à la iambe Monsieur le Duc de Neuers, qui ne s'espargnoit non plus à l'auancement de l'honneur de Dieu & au service du Roy durant ceste guerre, qu'il faict maintenant par son bon conseil, & par sa pieté cogneuë aux plus petitz. L'occasion qui faisoit courir les reformez vers l'Alemaigne, fuyans la puissance du Roy, estoit l'alliance que tous reformez ont par ensemble: & nommément celle qu'ilz auoient avec le Comte Palatin & autres Alemans, par lesquels ilz auoient esté secouruz les premiers troubles, & l'ont esté les derniers, ce qui a reüssy à leur grand proffict.

CAR depuys ilz reçurent grand nombre de reistres à eux amenez par le Sieur Calimir, filz du Comte Palatin: qui protestoit ne vouloir rien entreprendre sur l'estat du Royaume, mais seulement maintenir ses confreres en l'exercice de leur religion. Tant y a que la venuë de ces reistres maistres haüça merueilleusement le courage aux reformez, de façon qu'ilz rebrousserent chemin, faisans neantmoins entendre à leurs Maiestez qu'ilz ne desiroient rien plus que la paix. Et

Riii.ij.

L'AN M.D.LXVIII. HISTOIRE DE TOUTES CHOSES

partant le Roy plus soucieux du repos & tranquillité de son peuple, que de la guerre contre ses propres subiectz, com-
La Roynie mença à y entendre: & mesmes la Roynie mere, à qui les affai-
ra au cap. res de ce Royaume ont tousiours esté en tresgrande recom-
mendation, se transporta iusqu' au camp, pour mettre ordre à
tout ce qu'elle verroit estre expedient. Si partit sa Maiesté du
Le Cardis camp peu apres, & feit venir en seure garde le Sieur Cardi-
nal de nal de Chastillon iusqu' au bois de Vincennes pres Paris, à
Chastillon raison que ledict Sieur auoit esté deputé par ceux de la reli-
au bois de gion pour parlementer de la paix avec leurs Maiestez. Au-
Vincennes quel lieu estant, les Sieurs de Moruilliers & de Lansfac le fu-
rent trouuer de par le Roy, & mesmes furent faictz plusieurs
aultres abouchemens, pour pacifier ces troubles: mais toutes-
fois on ne peut rien conclure pour lors, à cause que l'un costé
se monstroient vn peu trop refractaire.

OR du depuys les reformez & leurs reistres se retirerent
Chartres en la ville d'Orleans, & delà assiegerent par apres la ville de
assiegee. Chartres vers le Quaresme, ville qu'on pensoit ne pouuoit
sostenir leur effort: mais la vaillance & le zele de ceux de de-
dans fut tel, que l'aduersaire ne peut rien gagner de ce qu'il
Paix en pretendoit. Et à ceste occasion, la paix qui auoit esté iusqu' icy
France. souuentes fois traictée, & qui sembloit à quelques vns demeu-
rer par trop à estre concludë, pour les incommoditez qui sur-
uenoient de iour à aultre, fut arrestée en ce Quaresme: dont
le peuple sentit quelque allegement, mais non tel qu'il desi-
roit, pour ce qu'elle dura trop peu. Or continuoient tous-
iours les troubles en Flandres, cy dessus entierement recitez,
& partant nous conioindrons des à present ce qui aduint en
nostre France la mesme année.

A peine y auoit il cinq mois passez depuis la paix qui meit
Les trois- fin aux seconds troubles, qu'on recommença à esguiser les
esmes trou cousteaux en France, souz mesme pretexte que les deux pre-
bles de cedentes fois. Car il est dict en vn liure par eux imprimé, que
France. l'édict dernier de pacification n'estoit entreterenu, & mesmes
qu'il y auoit danger pour leurs principaux Chefz, filz n'euf-
Faulte de sent vñ de grande viltesse: & Functius, heretique Aleman, a-

osé escrire en sa chronologie, que le Roy ou les Catholiques rompirent la paix, pourquoy refuter ie ne veux icy perdre le temps. Quoy que soit, les villes de la Rochelle, Montauban, & Santerre, par eux prises ez seconds troubles, n'auoient esté rendues. Pour doncques commencer la tragedie (qui depuys a esté conuertie en comédie) le Prince de Condé se retira *Le Prince à la Rochelle.* à la Rochelle, qu'ilz auoient encore, comme ie vien de dire, & le semblable feit le Sieur Amiral: mais le Sieur d'Andelot *Le Sieur d'Andelot passe le Loire.* ne le peut pas faire si aysément, à cause qu'il auoit à passer la riuiere de Loire, lequel passage luy estoit empesché par le Sieur Comte de Martigues Catholique. Dont il luy fut force de s'exposer à passer ladicte riuiere à gué, au dessouz la ville de Saumur, en quoy faisant il reçeut gros dommage, & ledict Sieur Comte aussi. Mais estant vne fois passé, il surprit Monsieur le Duc de Roüanois, grand Escuyer de France, qui pour *Prise du Duc de Roüanois.* lors estoit à son chasteau d'Oiron, ne pensant à rien moins qu'à vne telle desconuenue: & fut ledict Sieur emmené à la Rochelle, dont neantmoins il sortit par-apres.

LE Roy doncques voyant que son indulgence passée *Edict catholique du Roy.* esguillonnoit tousiours ses suietz à choses nouuelles, & que ses edictz precedens n'estoient pas pour acheminer son peuple à viure en bonne paix: en ce moys de Septembre il feit vn edict par lequel sa Maiesté vouloit, qu'il n'y eust autre exercice de religion que de la Catholique: monstrant en cela son entier & incorrompu desir de remettre sus la vraye doctrine. Et pour-autant que tout secours vient d'enhault, de celuy qui tient les sceptres en sa main, & les distribue à qui luy plaist, ladicte Maiesté suyuant la trace de ses ancestres, ains que faire marcher en auant ses forces, feit vne générale & celebre procession en sa ville de Paris le iour Saint Michel, *Celebre procession à Paris.* pour inuoquer l'ayde du tout-puissant: & en icelle furent portez solennellement les corps Saint Denys, Saint Rustic & Saint Eleuthere, qui pieça n'auoient esté portez en telles supplications publiques. Ce qu'estant fait, & toutes choses deuément préparées pour mener vne guerre, peu apres Monsieur, frere du Roy, partit de Paris pour estre Chef de l'armée *Monsieur de l'Eglise.*

Catholique: en quoy il s'est porté si vertueusement, constamment, & chrestienement, que la posterité n'oubliera iamais les loüanges qui luy sont deuës, eu encores esgard à sa tendre ieunesse, qui peu souuent se delecte d'un tonnerre d'artillerie au milieu d'un camp, & qui à toute peine peult souffrir les travaux qu'en toute saison on prend à la guerre: ce qui est aduenü à Monsieur durant ceste-cy, si oncques il aduint à homme.

*Pays de
Xaintonge
aux re-
formez.*

PENDANT que l'alarme sonnoit ainsi par-my la France, les reformez deliberez de cantonner au pais de Xaintonge, tant pour la fertilité du dict pais, que pour auoir à doz la Rochelle, ville tref-forte & bien munie, s'emparerent facilement de plusieurs villes, & audict pais, & en Poictou, & en Gascoigne mesme, dont ilz souloient appeller ce pais le pais de conqueste. Les villes estoient Sainct Iehan d'Angely, Cognac, Taillebourg, Chasteau-neuf, Xaintes, Nyort, Melle,

*La Roynne
de Nauarre
à la Ro-
chelle.*

*Angou-
lesme prise*

Blaye, & aultres qu'ilz prindrent depuys. Peu de iours apres la Roynne de Nauarre avec son filz & sa fille vint premierement à Bergerac, & delà à la Rochelle. Mais la ville d'Angoulesme leur estant si voyline, & les empeschant de dilater leur conqueste, ilz meirent le siege deuant icelle, & comme elle eust tenu bon l'espace de huit iours, elle vint en leur puissance.

*Prise de
Pons.*

Ne restoit plus au pais de Xaintonge, que la ville de Pons, qui fut par eux prise, & mesmes le chasteau, qui neantmoins auoit virilement resisté huit ou neuf iours contr'eux: & lors furēt prins Monsieur & Madame de Pons avec leurs enfans, qui furent tous menez à la Rochelle: en quoy ledict Sieur de Pons feit merueilleuse perte de ses biens. Ce-pendant Monsieur estoit ia venu iusqu'à Poictiers, & delà à Perigueux. Où estant, Messieurs de Mont-pensier, de Guyse & de Brissac alerent attaquer quelques forces conduytes par les Sieurs de

*Defaite
du Sieur
de Mou-
uans en Pe-
rigueux.*

Mouuans & de Pierre-gourde, qui estoient venuz avec les troupes du pais de Prouence de Viarets & autres prouinces, desquelles le principal chef estoit le Sieur d'Acier. Si n'estoient alors ces troupes toutes ensemble, ains estoient separees, & auoit ledict Sieur d'Acier aduertý le Sieur de Mou-

uās de se retirer: mais la magnanimité des sus-diets Seigneurs Catholiques ne laissa escouler vne telle occasion, ains se ruās sur ces troupes de Mouuans pres le village de S. Chastie en Perigueux, les meirēt en route, & en feirent demeurer quelques mille sur le champ, & entr'iceux les Capitaines Mouuans & Pierre-gourde. Quoy fait, Monsieur se retira à Chastel-heraud, où estoit arriuée son artillerie.

LE 18. iour de Nouembre fut faite la rencontre des Catholiques & reformez à Iaseneuil ^{Deffaicte à Iaseneuil.} gueres loing de Poictiers, en laquelle plusieurs combattirent vaillamment, de sorte que les reformez y feirent grand' perte: laquelle nouuelle estant sçeuē à Paris, on ne faillit de chāter *Te Deum* en signe de liesse: toutesfois le Roy y perdit quelques vaillans hōmes. Apres ceste rencontre, les reformez prindrent la ville de Mirebeau. Quoy voyant Monsieur, s'approcha de ladiēte ville, & la reprint ^{Reprise de Mirebeau.} facilement, & mesmes le chasteau fut peu apres prins par Monsieur le Conte du Lude. Du depuis les deux armées se voyoient iournellement vers les villes de Chinon & Loudun, auquel tēps l'hyuer fut si aspre & extreme, que plusieurs ^{Hyuer fort aspre.} mouroient de froid ez armées. Or se disent les reformez auoir esté aydez en ce temps par la Royne d'Angleterre, de plusieurs munitions, & de trois cens mille angelorz: en quoy ie suis contēt de leur croire, pour ne me monstrier opiniastre.

CESTE année 1569. au mois de Feurier, la Royne de Navarre & les Seigneurs reformez se trouuans à Nyord, feirent vendre quelques biens d'Eglise, (comme ils escriuent) pour subuenir aux fraiz de leur guerre: ce qui nous apprend (comme bien qu'il y ait assez d'autres raisons) que pour le soustien & defence de l'Eglise il n'est mauuais aliener quelques biens d'icelle, quand les affaires le requierent, comme aussi il a esté fait en ce Royaume pour les mesmes causes & raisons, ces troubles durans. Si rascherent les reformez enuiron ce temps de surprendre la ville & chasteau de Luzignan, lieu bien fort, ^{Luzignan tenu par les reformez.} ne distant que quatre lieuēs de Poictiers: mais ils ne perdirēt que leur peine. Et ne fault penser que le temps se passast, sans que les Catholiques feissent plusieurs escarmouches sur eux,

& singulierement le Sieur de Brissac, qui bouilloit en sa ieu-
nesse, & ne cessoit oncques de les endommager.

*La batail-
le de Iar-
nac, où
mourut le
S. Prince
de Condé.*

SVR le commencement du mois de Mars l'ost des refor-
mez print son chemin vers S. Iehan d'Angely, Congnac &
Xainctes, laissant le Poictou: dont Monseigneur le Duc d'An-
iou, frere du Roy, les poursuyuit, mais non par le mesme che-
min, ains en tirant vers Angoulesme: & s'estant emparé de la
ville de Chasteau neuf, (à fin que pour briefueré ie laisse icy
plusieurs circonstances de ce fait) voyant aussi que en se ha-
stant il les contraindroit à liurer la bataille, le Dimanche 13.
du mois de Mars il se presente à eux entre Iarnac & Cha-
steau-neuf, pres vn village & Abbaye nommée Bassac: & ayât
fait passer ses forces sur la riuiere de Charête, il liura la batail-
le dure & aspre, en laquelle il se monstra tref-hardy combat-
tant, & aussi tous les autres grands Seigneurs de l'armée, de
maniere que le succes d'icelle fut tel, que Monsieur le Prince
de Condé demeura sur le champ, & plusieurs autres gentilz-
hommes de ses troupes: & le reste fut mis à vau de route, si
bien que Monsieur alla coucher la nuict suyante en la ville
de Iarnac sur la mesme riuiere de Charête. Toutesfois le Roy
y perdit quelques bons seruiteurs, & entr'iceux Monsieur de
Monfalez, Capitaine vaillant & vertueux.

*Mort du
Sieur de
Monfalez*

LES reformez ayans reçu vne telle escorne que nous ve-
nons de dire, le Sieur Prince de Nauarre fut déclaré estre leur
Chef par cy apres. D'autre costé Monsieur poursuyuant sa
bonne fortune, voulut vne-fois employer ses forces à pren-
dre la ville d'Angoulesme, mais les reformez craignans la per-
te de ceste forte ville, la renforcerent d'hommes y conduictz
par le Sieur de Mongommery. Six cornettes y estâns entrées,
quatre aultres partoient de la ville de Pons pour y entrer pa-
reillement: ce qu'estât cognu au camp des Catholiques, quel-
ques braues Capitaines leur allerent couper le chemin, &
de faict en taillerent la plus part en pieces. Ce faict, Monsieur
tourne ses forces sur la ville & chasteau de Mucidan au mois
d'Auril, & feit en sorte que la place fut prinse & ruinée rez
pied rez terre. Mais en contr'eschange de tant de victoires &
heureux

*Angou-
lesme s'en-
forcée.*

*4. Cornet-
tes deffai-
lles.*

*Mucidan
pris.*

heureux succès durant ces guerres, Monsieur le Conte de Brissac, Colomnel de la fanterie François, (qui iusqu' à ceste heure n'auoit cessé d'attaquer l'ennemy à toutes occasions, & souuentefois l'auoit beaucoup endommagé par sa vaillance & indôté courage) fut à ce siege frappé à la teste d'un coup d'harquebuze, & de ce coup rendit incontinct l'esprit à Dieu, pour l'Eglise duquel il auoit tousiours desiré de respandre son sang. Il mourut au grandissime regret de toute l'armée Catholique, & avec tel los de ses haultz faictz d'armes, que voire les enuieux sont contrainctz de hault-louer sa prouesse & vertu.

*Mort de
Monsieur
de Brissac.*

OR ce-pendant le Sieur d'Andelot, pour contenir les vil-
les de leur obeissance assez estonnées de la mort du Prince
de Condé, faisoit la reueüe sur les garnisons d'icelles, & tra-
uailloit incessamment: desquelz trauaux il reçeut tel loyer,
que se trouuant malade sur le moys de May, il se retira incon-
tinent en la ville de Xainctes, où il mourut le septiesme iour
dudit moys. Ces choses ainsi passées, Monsieur s'achemine
vers le pais de Berry, pour recueillir les forces qu'amenoit
Monsieur le Duc d'Aumale, & declarerons à present commēt
cela aduint.

*La mort
de Mon-
sieur d'An-
delot.*

*M. d'Au-
male ioint
avec Mon-
sieur.*

LE Roy ayant ia deux foys experimenté, que l'insolence
de ses suietz dependoit principalement des forces qu'ilz
pretendoient tousiours auoir de l'Allemagne, auoit esleu des
l'an precedent Monsieur d'Aumale, vaillant & Catholique
Prince, pour avec quelques forces empescher, que ces Ale-
mans ne peussent secourir leurs freres, comme ilz auoient
faict par le passé. En quoy ledict Sieur Duc exploicta fidele-
ment sa charge, & non sans grandz trauaux, menant vne ar-
mée tout vn hyuer en vn pais tres-froid, & in-acoustumé au
François. Neantmoins il se trouua vn nommé Vvolfang, Duc
de deux-pontz, qui leua vne armée pour venir en France, souz
pretexte d'auoir compassion de l'affliction de ses freres refor-
mez, & de la pure religion qui s'en alloit trespasser: labeurs
que la France a si bien recognuz, qu'elle garde encore le
corps dudit Sieur en ses propres entrailles. Iceluy donc e-

*M. d'Au-
male vers
l'Alle-
magne.*

*Le Duc
de Deux-
pontz leue
vne armée*

estant entré en ce Royaume, (pour-ce que les entrées d'iceluy sont tres-difficiles à garder, & mesmement quand on a à repousser si grosses forces qu'estoient les siennes) penetra peu à peu si auant, qu'environ la my-may il arriua pres la ville de la Charité, sur la riuere de Loire, ayant esté tout-iour costoyé dudit Sieur d'Aumale. Or s'attendoit-on bien, qu'il ne passeroit iamais ladicte riuere sans qu'on l'attaquast: mais les choses vindrent lors si à contrepoil, qu'il s'empara d'icelle ville de la Charité oultre toute expectation, & croit-on qu'il y eut là quelque faute. De maniere que deslors rien ne le peut forclorre du libre passage de Loire, & fut son armée incontinent en Berry, & delà en Limosin: dont les Princes reformez furent merueilleusement esiouïs, & le vindrent rencontrer le dixiesme iour du moys de Iuin à deux lieues de Chalus ville de Limosin, ayans lesdits Sieurs reformez enuoyé par-auant

Mongomery en Gascoigne le Sieur de Mongommery en Gascoigne pour prendre les compagnies des Vicomtes qui faisoient illec beau mesnage. *La mort du Duc de deux-pontz* Mais le Duc de deux-pontz ne iouïst gueres long temps du bon air de France, à cause que le lendemain de sa reception, qui estoit l'onzieme de Iuin, il rendit l'ame à ceux qui la tiennent, en vn village distant environ trois lieues de Limoges.

Le Prince d'Orange en France Son armée estoit accompagnée du Prince d'Orége, (qui n'auoit peu se ioinde autrement avec leurs forces) du Comte Ludouic de Nansau son frere, & de plusieurs autres, de sorte qu'il n'est merueille si le courage hauça à ceux qui par-auant ne scauoient de quel bois faire fiesches.

O R le Pape à present viuât, (qu'on sçait estre vn des plus vertueux que nous ayons eu de long temps, & qui cherist grandement l'extirpation des heresies) auoit cy-deuant mis sus quelques compagnies Italiennes pour les enuoyer en France au secours du Roy, souz la conduyte du Seigneur Comte de Sainte-fiore: lesquelles compagnies environ ce temps arriuerent à Monsieur en assez bel equippage, & c'est comme Dieu distribuë tousiours le doux apres l'amer. Mesmes en ceste saison la Roynne mere, desiruse de mettre les affaires de ce Royaume en bon ordre, & mettre le cuer aux

Secours du Pape arriue à Monsieur.

soldatz qui sembloient se mescontenter, alla en grande diligence iusqu'au camp. Et estant arriuée à Limoges elle exécuta ce qu'elle auoit entrepris, qui réussit au grand profit des Catholiques. Sur ces entre-faictes se faisoit tousiours quelque escarmouche entre les deux armées, de maniere qu'aduenant le 25. iour de Iuin, quelques bendes du Seigneur Strozze, vaillant Capitaine Catholique, & du Cappitaine Piles l'entre-contrerent pres Saint Irier la-Perche en Limosin, & fut le choc fort aspre: mais (comme si les aduersitez nous deussent venir toutes en vn coup) la fortune fut telle, que ledict Seigneur Strozze y fut prins & quelques aultres braues gentils-hommes, ce qui ne fut faict sans grosse perte de la partie aduersé.

*La Roynie
au camp.*

*La prise
du Sei-
gneur
Strozze.*

DE VANT ceste escarmouche, à sçauoir des le douzième du mois de Iuin le Sieur Comte du Lude, Lieutenant du Roy en Poictou, auoit mis le siege deuant la ville de Nyort, & mesmes y auoit faict bresche: mais sçachant au vray que grand secours venoit aux assiegez, & qu'en demeurant trop deuant la ville il pourroit estre enclos, & perdre l'artillerie, leua le siege, & laissa partie d'icelle artillerie en la ville de S. Maixent où demeura Monsieur d'Onoux, vaillant Cappitaine: & le reste se retira à Poictiers.

*Le Siege
de Nyort,
par M. du
Lude.*

OR sur le commencement du mois de Iuliet l'armée des reformez se retirant vers la Xainctonge, Monsieur trauersa le Limosin & le Berry, & se retira en Touraine: mesmes estant à Loches il licentia partie de son armée, tant pour la rafraichir du labeur continuel si long temps enduré, que pour croistre les compagnies par ce moyen, de façon que ses forces estoient lors fort petites, & celles de sa partie aussi grosses qu'elles eussent encor' esté iusqu'icy. Ce qu'eux voyans bien à cause qu'ilz auoient tousiours l'œil au bois, & ne pouuans demeurer vn iour en repos, auiserent qu'il leur seroit bon de battre le fer tandis qu'il estoit chaud, & prendre quelque bonne ville, pour s'amplifier tousiours. Pour doncques mettre ces desseings à chef, ilz veirent qu'il n'y auoit meilleure ville en ces quartiers-là, que Poictiers, assez opulente, & pleine pour

*L'armée
Catholique
licentiee.*

*Occasion
pour les re-
former.*

lors de plusieurs hommes riches, qui s'estoient illec retirez à seureté, desquelz ilz pourroient auoir grosses rançons. Et partant ilz auisent de luy oster tout secours & deuant & derriere, de maniere que le douziesme iour de Iuillet ilz prindrent la ville de Chastel-heraud distant seulement sept lieues de Poictiers du costé de Paris, & puy le vingtiesme iour dudit moys ilz prindrent la ville & chasteau de Luzignan, à quatre lieues de ladicte ville de Poictiers vers la Rochelle, laquelle place de Luzignan est bien forte, mais n'y ayant lors aucune esperance de secours il fut force de la rendre à l'ennemy. Si fut la ville de la Charité assiegée par le Sieur de Sanffac, vaillant & experimenté Cappitaine, sur la fin de ce moys de Iuillet: mais il ne la peut prendre, ses forces n'estant bastantes pour ce fait. Deuant que ie die mot du siege de Poictiers, il fault noter que pendant ce siege le Sieur de Terrides, Cappitaine Catholique, auoit presque prins tout le pais de Beau, qui est la vraye seigneurie de la Royne de Nauarre, iusqu'à tant que le Sieur de Mongommery (que cy dessus auons dict auoir esté enuoyé en ces quartiers) y arriua de grande vistesse, & surprit ledict Sieur de telle façon qu'il l'emmena prisonnier, luy, le Cappitaine Sainte Colombe, & plusieurs autres braues gentils-hommes, dont ledict Sieur de Terrides mourut par apres, & le Sieur de Sainte Colombe fut meurtry par ceux qui l'auoient prins. Chastel-herauld & Luzignan estans prises à la façon sus-dicte, & Monsieur ayant ses forces debendées, les reformez faisoient estat de s'emparer de la ville de Poictiers, tant pour ce qu'elle est assez mal tenable de sa nature, que pour ce qu'ilz estimoient que ceux de dedans ne pourroient estre secourus assez tost. Toutesfois on s'estoit de longue-main douté de ce siege, & auoit-on r'enforcé les plus foibles endroictz de la ville: ce que neantmoins n'eust esté suffisant, silz n'eussent eu aultres gens pour la defence de la ville que ceux d'ordinaire. Et partant à la bonne heure Monsieur le Duc de Guyse estoit entré dans Poictiers le vingt-deuxiesme iour de Iuillet ou enuiron, avec bon nombre de Capitaines & Seigneurs, & aussi avec quelques industrieux

Chastel-herauld & Luzignan prises par l'ennemy.

Siege de la Charité.

Prise des Sieurs de Terrides & de S. Colombe en Beau.

Du siege de Poictiers.

Monsieur de Guyse entre dans Poictiers.

Italiens : laquelle venuë encouragea le peuple de telle sorte,
 qu'il estoit resolu d'endurer vn siege iusqu' à l'extremité . Les
 Seigneurs principaux estoient Monsieur de Guyse & Mon-
 sieur le Marquis de Maine son frere , Monsieur le Comte du
 Lude , ses freres de Chastelliers , Sauteré & Briançon , les Si-
 eurs de Mompezac , de Morthemar , de Ruffec , de Boyffe-
 quin , de Clermont Alard , d'Argence , & depuys le Sieur d'O-
 noux y arriua de Saint Maixent avec bon nombre d'hom-
 mes , ayant illec encloué son artillerie , que cy dessus nous
 auons dict y auoir esté laissée : & plusieurs aultres Seigneurs
 & gentilz-hommes , qui se sont monstrez vaillās à la defence
 de ceste ville . Il y auoit aussi plusieurs Cappitaines de gens de
 pied , comme le Cappitaine Sainte Soline , Arfac , la Prade ,
 Montal , la Vacherie , le Lys , Bonneau , & aultres , tous dignes
 d'eternelle memoire pour s'estre tres-courageusement em-
 ployez durant ce siege . L'ennemy auoit grandes forces de-
 uant la ville , & la battit furieusement au pré l'Abbesse &
 vers Saint Cyprian , iusqu' à faire bresches de quatre vingtz
 piedz & plus , & nonobstant il ne peut oncques mettre le
 pied dans la ville , à cause que du costé qu'il battoit , la riuiere
 du Clain laue les murailles de la ville , & mesmes passe vn cou-
 rant d'eau à trauers vn lieu qu'on appelle le pré l'Abbesse au
 dedans de la ville : duquel ruisseau les assiegez se sceurent si
 bien ayder , qu'ayans empesché le cours de la riuiere par sub-
 tilz engins , l'auteur desquelz fut le Sieur de la Bidoliere ha-
 bitant de ladicte ville , ilz feirent venir l'eau si haulte dans le
 sus-dict pré , que l'ennemy veit bien par ceste subtile inuen-
 tion , que la furie de son canon & ses bresches ne luy serui-
 roient mes-huy rien de ce costé , ce que le Sieur Amiral auoit
 bien preueu des le commencement , mais en cecy il auoit sui-
 uy le conseil d'aultruy . Au moyen dequoy il tourne sa batte-
 rie vers Saint Cyprian , où il proffita aussi peu par ses bres-
 ches , qu'il auoit faict au lieu precedent . Dont estant tout des-
 piré il retourne vers le chasteau qui est pres la porte Saint La-
 dre , par laquelle on vient à Paris : & par là voulut-il donner vn
 assault , mais il fut vaillamment & brauement soustenu par les

Seigneurs
qui y e-
stoient.

Capitai-
nes de gens
de pied.

Cours
d'eau de
grād prouf
fict à la
ville.

Bresche
au pré
l'Abbesse
de nul ef-
fect, &
aussi à S.
Cyprian.

Effort de
l'ennemy
vers le cha-
steau.

*Diligence
des Sei-
gneurs.**Hommes
de marque
mors au
siege.**Saillies des
assiegez.**Longueur
du Siege.**Siege de
Chastelle-
raud.*

assiegez, de sorte que par-apres ilz se tenoient assez fortz pour ceux qui ne pouuoient riē faire de ce qu'ils auoient tenu pour certain. Si ne fault oublier la merueilleuse diligence que faisoient les gentilsz hommes à remparer les bresches, & à autres exercices d'un siege, & que Monsieur de Guyse mesme chargeoit la hotte aux autres, pour inuiter vn chacun à bien faire. Ne fault aussi enseuelir en oubly la mort de plusieurs vaillans hommes, qui moururent durant ce siege au grand regret des assiegez pour leur prouesse & vertu, mais laissant vn los perpetuel de leur nom à toute la posterité. Telz furent le Cappitaine la Vacherie, le Sieur de Nultz, le Sieur de Briançon frere de Monsieur le Comte du Lude, Monsieur d'Onoux, vaillant & experimenté Seigneur qui representoit de son maintien la figure d'un Mars, le Seigneur de Prunay, notable Cappitaine, le Sieur de Montal le ieune, & plusieurs autres qui seront louangez à tousioursmais. Durant ledict siege plusieurs saillies furent faictes par les assiegez sur l'ennemy, & ce par les portes de la Trenchée & Pont-à-char, esquelles furent faictz plusieurs actes de cheualerie, comme quand fut vn iour apportée la cornette de quelques reistres conquise sur eux par vaillance, & quand vn seul Italien recoustr son filz, que deux des ennemys emmenoient, & si amena l'un d'eux prisonnier en la ville. Finalement plusieurs choses dignes de memoire furent executées, que i'omettray pour le present, pour ne m'attacher à descrire ce siege qui merite vn liure entier, n'ayant dict ce peu que pour la continuation de l'histoire. Ce siege dura iustement six semaines & trois iours, iusqu'à tant que le Roy ayant pendant ledict siege recueilly ses forces, & ne voulant laisser en proye vn nombre de si illustres Seigneurs assiegez, outre la ville de grande importance, fait marcher son armée souz la conduyte de Monseigneur le Duc d'Aniou son frere, qui ne se monstra moins ardent à ce besoing qu'il auoit tousiours fait au-parauant. Et de prinsault le sixiesme iour de Septembre il saheurta à la ville de Chastelleraud, qu'il feist battre, mais neantmoins il ne poursuuyt point, se contéant

d'auoir fait ce qu'il auoit proietté, à sçauoir de faire leuer le
 siege à l'ennemy de deuant Poictiers, pēdant qu'il orroit l'ar-
 tillerie si pres de luy. Ce qui aduint si bien à propos, que le <sup>Siege leuē
de deuant
Poictiers.</sup>
 siege de ladiēte ville fut leuē le 7. iour de Septembre, à la grā-
 de lieſſe de ceux de dedans, qui feirent le lendemain vne bel-
 le proceſſion generale, où fut porté le *Corpus Domini*, pour ré-
 dre graces à Dieu, qui les auoit deliurez d'un peril si grand &
 si euidēt. Et ne faut passer souz ſilence la grande charité, que <sup>Humani-
té de M.
de Guyſe.</sup>
 Monsieur de Guyſe exerça enuers plusieurs affligez hereti-
 ques, qui estoient demeurez bleçez ou malades le siege eſtāt
 leuē, en quoy il se monſtra vray imitateur des vertuz de son
 tant renommé pere au siege de Metz, comme en plusieurs au-
 tres actes. Les choses estans ainſi diſposées, lediēt Sieur de
 Guyſe, comme ſil fuſt venu de se recreer, ſ'en alla trouuer
 Monsieur, prest de faire quelque aultre bon ſeruice au Roy.
 Et en ce temps le Prince d'Orenge (ne ſçait-on pourquoy) <sup>Le Prince
d'Orenge
ſ'en va.</sup>
 partit du camp des reformez, & depuis le departement de
 Monsieur de deuant Chaſtelleraud, se feirent quelques eſcar-
 mouches, iuſqu'à tant que lediēt Sieur Duc d'Aniou arriua à <sup>Eſcarmon-
ches.</sup>
 Chinon, où il receut encore quelques forces de celles que cy
 deuant il auoit licentiées. Si bien qu' avec son armée il ſortit
 de Chinon le 26. de ce moys de Septembre, & ne ceſſoit de
 cōſiderer l'occafion où il pourroit auoir l'auantage ſur les re-
 formez, ou les tirer à vne vraye bataille comment que ce fuſt,
 ſçachant bien que ſil y auoit bataille lors q̄ leur armée estoit <sup>Zeſe de
Monsieur.</sup>
 merueilleuſement forte, l'un ou l'autre y perdrait beaucoup:
 mais au reſte il ſe fioit du tout en Dieu, qui defend la cauſe iu-
 ſte, & qui pieça auoit fait toucher au doigt, que les Catholi-
 ques ſont ceux pour qui ſa diuine Maieſté combat. Il aduint
 doncques que les deux armées, qui ſe coſtoyoient touſiours
 l'une & l'autre, ſe veirent de ſi pres le troiſieſme iour du moys <sup>De la ba-
taille de
Moncon-
tour.</sup>
 d'Octobre, en vne belle plaine prochaine de Moncoutour
 en Poictou, qu'estans comme agacées de marchander ſi lon-
 guement, le Sieur de Tauannes denonça à Monsieur que
 l'heure estoit venuē de bien faire. Auſſi auoyent les reformez
 mis ordre à leur armée, & n'estoient moins fortz que l'armée

L'AN M.D.LXIX. HISTOIRE DE TOUTES CHOSES

du Roy, de sorte qu'il y auoit assez à penser à qui auroit du meilleur ceste iournée. Partant le choc commença entre les deux camps rude & aspre, & faisoient les ennemys gros domage par leur canon, & d'auantage la meſlée fut telle, que la

Monsieur en danger personne meſmes de Monsieur fut en danger. Mais ſes troupes tant de Suiſſes que d'autres eſtans vn peu micux r'alliées, & les grands Capitaines eſtans bien diſpoſez chacun à leur lieu, la charge fut donnée ſur l'ennemy ſi viuement, que non-obſtant ſon artillerie il fut contrainct ceder à la charge, & donner moyen aux Catholiques d'auoir le deſſus, ſi bien que leur

Fuyte des reformez meilleur fut de ſe ſauuer à la fuyte, dont quelques Catholiques ſe meirēt à les chaffer bien trois lieuës, & de fait les chemins en furent couuerts. Bref, en ceste bataille, qui eſt reputée auoir eſté auſſi furieuſe qu'autre qui ait eſté de ce ſiecle, les Catholiques François ont dequoy ſe reſiouir grandement, veu que par leur prouèſſe aſſiſtée du hault Dieu, l'heretique y fut domté, qui iuſqu'icy ſembloit encor' auoir vn contre-poix contre le Catholique. Et Monſeigneur le Duc d'Aniou ſ'y eſt acquis vne telle loüange & renommée, que meſmes les nations eſtranges la chanteront à iamais. Le nombre des reformez y morts fut de plus de dix mille hommes, combien qu'ils ayent oſé mettre en lumiere q̄ ſeulement ils y perdirent trois mil Lanſquenets & quelques douze cens François: mais ie m'aſſeure que ſils en euſſent eu ſi bõ marché, ils n'eueſſent pas tant conuillé par-apres. Monsieur de Guyſe y fut blecé à la iambe, & le Marquis de Baden y mourut, & quelques autres.

Prisonniers. Outre les morts des reformez, furent prins les Sieurs d'Acier, & la Nouë, qui ſont en grand'eſtime enuers les leurs. Cest orage eſtant tumbé ſur le chef des reformez, ils ſe retirerent haſtiuement à Partenay, où ilz arriuerent ſur la minuyct: & le lendemain de la bataille les Chefs, ſe trouuerēt tous à Nyort, eſtōnez comme fondeurs de cloches, où ilz r'allierent ce qui reſtoit, & partans de ladiète ville de Nyort gaignerēt la Xainctonge, laiſſans audiēt Nyort le ſieur de Mouy, qui y reçeut vn coup, duquel il mourut depuys. Et peu de iours apres les villes de Chaſtelleraud, Nyort, Partenay, Luzignan, Xainctes & Pons,

*Mort du
Sieur de
Mouy.
Villes ren-
dus.*

& Pons, furent remises en l'obeïssance du Roy, qui en ce tēps vint à Nyort avec la Roynes sa mere. Or les reformez ne voulans aucunement ietter le manche apres la coignée, encore qu'ilz fussent assez affoiblys par leur derniere deffaiete, si est-ce qu'ilz resolurent de tenir bon dans la ville de S. Iehan d'Angely, pour par ce moyen distraire les forces du Roy de les poursuyure, & pour auoir moyen de faire ce-pendant leurs besongnes au moins mal qu'ilz pourroient: lequel cōseil leur a bien succedé. Ce voyant Monsieur, il arriua deuant ladicte ville le 14. iour de ce moys d'Octobre, & l'auoient les reformez bien munie & remparée, oultre ce qu'elle est assez forte & tenable de sa nature, & celuy qui commandoit dedans estoit le Cappitaine Piles, estimé hardy & courageux, & qui auoit esté blecé à Poictiers, allant à l'assault du costé du Chasteau, La ville commença à estre battuë le 22. iour dudict mois, & fut si bien poursuiuy en ceste batterie, que plusieurs bresches furent faictes d'un costé & d'autre: mais les assiegez furent si vigilans à la defence & au remparemēt des bresches, qu'ilz rendoiēt iceux lieux plus defensables apres la bresche, que deuant: ioint que le fossé leur estoit merueilleusemēt favorable. Ce-pendant leurs Maiestez arriuerent au siege, & fut capitulé avec ceux de dedans, que s'il ne leur venoit secours dans dix iours il rendroit la ville. Quoy que ce soit, ilz feirent tant par subtilz moyens, qu'ilz feirent entrer par la porte de Maista ie ne sçay combien d'hommes le 18. iour de Nouembre. Et le 19. dudict mois comme on recommençoit la batterie, fut tué par ceux de dedans Sebastien de Luxebourg, Comte de Martigues, & Gouverneur du païs & Duché de Bretagne: Seigneur qui s'estoit tout le temps de sa vie, & singulièrement durans ces guerres civiles de France, si vaillamment employé à l'honneur de Dieu, à la protection de l'Eglise Catholique, & au seruice de son Prince, que ses vertus & prouesses ne seront iamais enseuelies ez tenebres de l'oubly. On cognut (comme coustumierement il aduient) combien ce Seigneur valloit viuant, quand luy estant allé de ce monde en vn plus heureux on ne regrettoit que sa perte, tant dommagea-

Tttt.j.

*Cappitai-
ne Piles
dans S. Ie
han.*

*Siege de
S. Iehan.*

*La mort
de Mon-
sieur de
Martigues.*

L'AN M.D.LXIX. HISTOIRE DE TOUTES CHOSES

ble aux François. Si fut rendue ladicte ville de S. Iehan, le troisieme iour du mois de Decembre, & Monsieur y entra lors, ayant pardonné à ceux de dedans.

*Prinse de
Noyers.*

A v mois d'Octobre de la presente année le Sieur de Sanf sac, vn des plus anciens Cappitaines de ce Royaume, assiegea la ville de Noyers, retraicte des reformez de Champaigne & de Bourgongne, d'où grandes incommoditez suruenoient de de iour à autre: & y exploicta si bien, qu'il la prit, & furent les prisonniers menez à Troye en Châpaigne, où partie d'iceux furent assommez par les ruës deuant qu'ilz peussent estre mis en prison. Ce fait, le mesme Sieur mit le siege deuant Veze-
*Veze-
lay
tient bon.* lay, pieça occupée par les reformez: mais pour-ce que la place est forte, & qu'elle estoit defendue par plusieurs hommes, & que les forces dudit Sieur n'estoient suffisantes pour l'expugnatiō d'vne telle ville, il n'y peut faire autre chose de tout cest hyuer, combien qu'il sy fust employé courageusement & prudemment.

*Les reformez
à Montauban.*

O R comme les forces du Roy estoient deuant S. Iehan, & que les Chefz des reformez pouuoient gagner au pied, ils prindrent le chemin de Gascongne, tant pour aultres fins que pour se ioindre avec les troupes qu'auoient pieça les Vicomtes en ces quartiers, & ainsi passerent la riuier de Dordonne avec bastiaux au mesme mois d'Octobre, de maniere qu'au mois de Nouembre ils arriuerent en la ville de Montauban, place bien forte, & pieça detenuë par eux. Mais leurs pratiques ne leur succederēt pas si bien, en ce qu'ilz entreprindrēt en ce temps sur la ville de Bourges. Car puy que leurs forces estoient presque nulles en ceste saison, & puy qu'ilz n'auoient pas la peau du lyon, (cōme dict le prouerbe) il leur estoit besoin de se vestir de celle du regnard. Ils auoient dōc practiqué quelcū, par lequel ilz auoient asscurace d'entrer à la grosse tour de ladicte ville: mais celuy avec qui ilz auoient telle intelligēce, descouurit tout le fait au Cappitaine de la ville, qui luy feit si bien iouer son rōlle, que les Sieurs de Renty, de Lespau, des Essars & autres, qui estoient entrez dans icelle tour, furent attrapez, & aultres tuez du canon de la ville, qui attendoient

*Entreprin
se sur la
ville de
Bourges.*

l'heure d'entrer dedans : & par-ainſi fort mal leur reüſſit leur entrepriſe ſur ladicte ville.

SEMBLABLEMENT y eut quelque trouble au Royau-^{Trouble en Angle terre.} me d'Angleterre au mois d'Octobre de ceſte meſme année. Car quelque nombre de bons Catholiques ſeculiers & Eccleſiaſtiques, (entre leſquelz eſtoiet le Duc de Nortfolc, les Cōtes d'Arondel, de Penbrouch, de Suffec, & le Mylord Lonlay) ſeſtans hazardez de preſenter quelque requête mal plaiſante à leur Royné, ſ'en trouuerent ſi mal, qu'eſtans pourſuyuis ils furent prins par les gens de la Royné, & amenez au chasteau de VVindeſour, où ilz furent ferrez par commandement de la-dicte Dame.

LES Turcs eurent ceſte année guerre alencōtre des Sarra-^{Perte des Turcs alē- contre des barbares.} zins & aultres rebelles és parties d'Arabie, & a eſté telle leur deſcōuenue qu'ilz y ont perdu la ville de la Meque, ſituée ſur la mer rouge. Les meſmes Turcs ces années dernieres ont perdu quelques batailles à l'encontre des Moſcouites, leſquelles batailles ont eſté données és regions Septentrionalles iouxte la riuier de Donk, iadis dicte Tanaïs. (Functius.)

L'AN 1570. lors qu'on euſt eſtimé, que les reformez de-^{Les Prin- ces au pays de Thoulouſe.} uoient auoir plus de ſoing à ſe garder, veu leur foibleſſe & petites forces, que à porter quelque dommage aux Catholiques: ilz prindrent neantmoins tel courage, & ſe remeirent ſus de telle façon, qu'ez païs voiſins des lieux où ils ſe tenoient, à ſça uoir le Quercy & les enuirōs de la grande cité de Thoulouſe, (ville qui leur a faiēt touſiours teſte, ſouſtenüe par le bō Magiſtrat qui l'a gouuerne) ilz monſtrèrent qu'ilz eſtoient encor' aſſez forts pour nuyre beaucoup aux bons, & au reſte n'atten- toient pas grandes choſes, apres auoir recueilly les forces de leurs Vicōtes. Et en ce tēps le Roy ſeiournoit en la ville d'An- gers & Monſeigneur le Duc d'Aniou auſſi, auquel lieu eſtans les propos furent ouuers de remettre le peuple de France en quelque bon repos & aſſeurée tranquillité, veu que la clemē-^{Ouverture de la paix.} ce ſied beaucoup mieux au Prince que ſeuerité, & principale- ment pour-ce que la calamité & miſere de la France eſtoit telle par les guerres paſſées, que la ſeule paix ſembloit la pou-

uoir alлегer. Ce qui fut cause que iacoit que les armes ne fussent point encores laissées d'un costé ne d'autre, toutesfois les choses qui se faisoient lors ne furent point si memorables qu'au-parauant. Et partant ie me deporteray de dire ce qui aduint, à cause qu'il y a plus à s'ennuyer qu'à se delecter, veu que la guerre n'estoit point menée à outrance, comme cy dessus, & ne taschoit-on que de s'accorder à cause que la guerre

*Mariage
de M. de
Montpen-
sier & de
la seur de
M. de
Guyse.*

sembloit auoir trop duré. Leurs Maiestez estans en ladicte ville d'Angers, furent celebrées les noces entre Monseigneur Loys de Bourbon, Duc de Montpensier, & la seur de Monseigneur le Duc de Guyse, mariage qu'il semble que Dieu ayt tramé, pour conioindre & lier ensemble ces deux illustres maisons d'un lien indissoluble. Le laisse plusieurs escarmouches qui furent faictes depuys, ains que la paix fust accordée:

*Cappitai-
nes la Ri-
uiere &
Puygail-
lard.*

le passe aussi plusieurs beaux faictz des Cappitaines la Riuere & Puygaillard au pais de Xaintonge contre les reformez: pour-auint que ces choses seront quelque iour escrites par le menu, & ne seroient, peult-estre, trouuées bonnes en cest

*Forces as-
semblées
sous M. le
Mareschal
de Cossé.*

endroit. Il est vray que le Roy feit assembler quelques troupes sous la conduyte de Monsieur le Mareschal de Cossé, lesquelles prindrent leur chemin vers où on pensoit que Monsieur l'Amiral pourroit estre necessité à combattre: mais on n'auoit garde de le forcer iusqu'à là, quelque deuoir qu'on feist, pour-auint qu'il ne faisoit qu'vser d'eschappatoires, se

*Deputez
pour la
paix.*

voyant ne pouuoir bonnement faire teste avec ses forces. Tāt y a que la paix se traictoit rousiours par les deputez de par le Roy, les Sieurs de Biron & de Malassise, qui exploictèrent si bien leur charge, qu'en fin d'un costé & d'autre on passeura de la paix: & neantmoins sur ces entre-faictes la ville de Xaintes (regainnée apres la bataille de Montcoutour) fut de rechef prinse par les reformez.

*La paix
faicte.*

FINALEMENT la paix tant desirée & souhaittée fut conclue, publiée, & depuys a esté entretenuë au grand contentement de plusieurs, qui estoient comme bannys de leurs maisons & estatz. Il n'est besoing d'icy inserer les articles, tant pour-ce que ce seroit chose trop prolix, que pour-ce qu'ilz

sont cogneuz aux plus petitx. Dieu vueille que le peuple Catholic puyſſe en toutes guerres auoir ſecours d'en hault, & n'eſtre vaincu de l'aduerſaire, & qu'ẽ la paix il ſoit obſeruateur des commandemens de ſon Dieu: en quoy faiſant, il debilitera plus la force de l'herẽſie, que par mille & mille batailles.

DE VANT que la paix fuſt concluẽ en France, naſquit à Paris vn monſtre fort eſpouuentable, de deux enfans iumeaux qui ſ'entretenoient par les parties honteuſes, & en fin l'vn ſeit mourir l'autre. Ce qui donna matiere & occaſion à pluſieurs de philoſopher là deſſus, & d'eſplucher ce qui pourroit eſtre ſigniſiẽ par vn ſigne ſi admirable, les vns l'interpre-^{Monſtres} tans contre la paix qu'on traittoit, les autres autrement: de-^{venũ à Pa} quoy ie ne traitteray d'auantage, pourautant que tu peux veoir & ce monſtre & pluſieurs autres, enuoyez de Dieu au temps des herẽſies, traictez & expliquez diligemment par non moins docte que bien-diſant M. Arnauld Sorbin, predicateur du Roy, en ſon liure *de monſtris*. Pluſieurs autres mō-^{vi.} ſtres aduenoient ez beſtes non raiſonnables, dont on peult penſer que l'ire & indignation de Dieu nous menaçoit encore de ſes fleaux: leſquelz à peine pourrons nous euter, en vn ſiecle ſi deſordonnẽ, que celui auquel nous viuons.

CESTE annẽe au temps du Quareſme, pour les ſeruices ^{Cofme de} que l'Egliſe a de tout temps receuz de la maiſon de Mẽdicis, ^{Mẽdicis} le Pape Pie cinquiẽſme declara Cofme de Mẽdicis, cy-de-^{Archiduc} uant Duc de Florence & de Siene, grand-Duc ou Archi-duc ^{de Florẽce} de Florence. Et voyla comme ceſte ville de Florence eſt venũe à ce degre, n'ayant eſtẽ autresfois que Republique, iuſqu'au temps d'Alexandre de Mẽdicis, qui en fut ſeulement Chef: de maniere que Cofme à preſent viuant, qui a ſuccedẽ à Alexandre, eſt comme le premier Duc, voire Archi-duc de la-diẽte ville.

ET ceſte meſme annẽe Sultan Selym, Empereur de Tur-^{Le Turc} quie, denonça la guerre ouuerte à la Seigneurie de Veniſe, ^{guerroye} pour ne luy auoir voulu quicter le droit qu'il pretend luy ap-^{en Chipre.} partenir en l'Iſle & Royaume de Chypre. C'eſt ceſte iſle, qui

seule, hélas! reste aux Chrestiens de tant de Royaumes & provinces, qui ont iadis presque autant esté lauées du sang des Martyrs, qu'arroufées de la pluye du ciel. Dont à bon droit les Venitiens se parforcerent de resister à vn si puissant ennemy, & meirent sus vne grosse armée de mer: mais le Turc, qui a ses forces plus prochaines du lieu, les auoit deuancez, si bien que les Venitiens ont perdu de belles places en ladicte Isle, & ne leur a esté encore possible d'y mettre ordre.

*Inondati-
ons d'eaux
à Anuers
& Lyon.*

Si on vouloit denombrez tous les fleaux que le monde Chrestien a receus ceste année, ie croy qu'il seroit impossible, tant l'ire de Dieu est embrasée sur nous. Nous auons veu le Turc firriter sur les Chrestiens, nous auons veu l'heretique reuiure, & cest hyuer plusieurs provinces reçurent tel dommage par l'inondation des eaux, qu'à peine les pourroit-on reciter. Principalement la ville d'Anuers située en vn pais fort subiect à telz desbordemens: & puy la ville de Lyon en France, qui n'auoit oncques veu le Rhosne si furieux & comme menaçant d'abolir la cité en trois ou quatre heures, faire tel degast & dedans la ville & aux champs, comme on a veu ceste année.

*Tremble-
terre à
Ferrare.*

SEMBLABLEMENT aduint en mesme saison vn tel & si espouuentable tremblement de terre en la ville de Ferrare en Italie, que de memoire d'homme on n'auoit ouy parler d'vn tel, comme celuy qui a deffaict la plus grand' part des Eglises & maisons de ladicte cité, venant par fois & non continuellement.

*Noces du
Roy de
France.*

CESTE presente année furent celebrées les noces du tref-chrestien Roy de France Charles neufiesme, & de tref-uertueuse Princesse, Elizabeth d'Austriche, en la ville de Mezieres sur la riuere de Meuze.

*Entrée du
Roy & de
la Roynie à
Paris.*

Et l'an suyuant le Roy feit son entrée fort magnifique & excellente en sa bonne ville de Paris au mois de Mars: le semblable aussi feit la Roynie au mesme mois, ayant esté premierement sacrée à Saint Denys en France par Monsieur le Cardinal de Lorraine.

Ces années dernières la société des Iesuites a tellement *Des Indes*
travaillé à annoncer la foy Chrestienne aux païs Orientaux, *Orientales.*
que en oyant parler de tel fruit il nous semble que soyons re-
uenuz au temps de l'Eglise primitive. Les païs sont les pro-
vinces de Goa, de Cocin, de la Cina, de Selebi, de Iappon, &
plusieurs Isles, & aultres païs que nous ne sçaurions nommer,
tant s'en faut que nous puyssions deuément reciter les choses
y faictes: lesquelles le lecteur pourra plus aysément voir és e-
pistres composées en Latin, & autres imprimées en François,
sur ceste matiere.


FIN.

AV LECTEUR.

Les fautes qui sont suruenues sont faciles à voir, & partant nous ne les noterons
point. Quelques fois pour la similitude des mots est surueue faulte, comme Vuittem-
berg au lieu de Vvirtemberg, pour ce que ce mot escrit avec vne r, est vne Duché, &
l'autre vne ville. Pareillemēt Vayuode pour le Vayuode. Aussi auons nous laissé quel-
ques noms non traduits, pour ce qu'ils sont vitez de ceste façon, comme Ratisbone
qui s'appelle vulgairement Regensburg. Tu supplieras aysément le reste. Et à Dieu.

62-272
10 MAY 68
CHARMONAL





5571
5961h

